


# Deus Itaumbyry



New Testament in Bakairí

**Deus Itaumbyry  
New Testament in Bakairí**

copyright © 2011 Wycliffe Bible Translators, Inc.

Language: Bakairí

Translation by: Wycliffe Bible Translators, Inc.

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Bakairí

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2014-04-22

---

PDF generated using Haiola and XeLaTeX on 23 Aug 2023 from source files dated 30 Dec 2021

521fc4dc-fae1-547b-b3c6-9853e24bf2ed

## Contents

MATEUS . . . . .	1
MARCOS . . . . .	74
LUCAS . . . . .	119
JOÃO . . . . .	194
ATOS . . . . .	243
ROMANOS . . . . .	313
1 CORÍNTIOS . . . . .	344
2 CORÍNTIOS . . . . .	373
GÁLATAS . . . . .	391
EFÉSIOS . . . . .	402
FILIPENSES . . . . .	412
COLOSSENSES . . . . .	419
1 TESSALONICENSES . . . . .	426
2 TESSALONICENSES . . . . .	432
1 TIMÓTEO . . . . .	436
2 TIMÓTEO . . . . .	444
TITO . . . . .	450
FILEMÔM . . . . .	454
HEBREUS . . . . .	456
TIAGO . . . . .	480
1 PEDRO . . . . .	487
2 PEDRO . . . . .	495
1 JOÃO . . . . .	500
2 JOÃO . . . . .	507
3 JOÃO . . . . .	509
JUDAS . . . . .	511
APOCALIPSE . . . . .	514

## MATEUS Unâ Koendonro Jesus Cristo Wâgâ Mateus Inweniby

Xirâ livru wâgâ inweniloy Mateus nhangahu odaji iemâmy Deus. Awlygue Deus itaumbyrylâ xirâ Mateus nhegatuyby. Jesus nhapygueni, aguely idani warâ ewy myakâwândy Mateus.

Kâmakerim Jesus Cristo wâgâ kiuntuhoem myakâwândy Deus xirâ inwenien-honly. Xirâ livru wâgâ Jesuslâ, Messias awly kiuntuly, mâkâ Deus “Igonose urâ” kehobyry. Jesus iazehobyry wâgâ, âdy waunroem aini awly tiuntuhomoe ximukâ enuagaeni modo xyrense idâhobyry wâgâ, José, Maria, iamudo warâ Egitoram âwientomobry wâgâ, târâpa odopâdomobry wâgâ warâ xirâ aguely.

Tâlâ xirâ wâgâ “Jesus iwy wâgâ unâ nhegatuhobyry.” Jesus aguely: “Koendâ lelâ âduerymo xurâem aitaungâ. Tâpeânzeba itaungâ. Ipa kydato xuduze lelâ Deus.” Turâ modo tonomedâzê lâpylâ, âdara Deus agâ aguelymo awly wâgâ. Xirâ iwenihobyry wâgâ tutuze kurâ, Deus kywymâry awly, âdy xypyry etay aini modo awly warâ.

### *Jesus Cristo idamudo (Lc 3.23-38)*

<sup>1</sup> Jesus Cristo wâgâ ise unâgu. Davi iwerypyry myakâwâm Jesus Cristo, Davi pylâ Abraão iwerypyry-ro warâ. <sup>2</sup> Saguhoem kuru ise Jesus idamudo kâengatuly, Abraão donropyrylâ, pymâ Daviram. Abraão myakâwândy Isaque nhunwym; Isaque, Jacó nhunwym. Jacó, Judá, iwaigorudolâ warâ nhunwym. <sup>3</sup> Judá, Peres, Zera warâ nhunwym. (Tamar myakâwândy isemo ezedy.) Peres, Esrom nhunwym. Esrom, Arão nhunwym. <sup>4</sup> Arão, Aminadabe nhunwym. Aminadabe, Nasom nhunwym. Nasom, Salmom nhunwym. <sup>5</sup> Salmom, Boaz nhunwym. (Boaz ise myakâwândy Raabe keho.) Boaz, Obede nhunwym. (Obede ise myakâwândy Rute.) Obede, Jessé nhunwym. Jessé, Davi nhunwym.

<sup>6</sup> Jesus idamudo ise iwerâ kâengatuly, Davidâpalâ, kypemugudo sawâtybyem Babiloniaram satyby modoram. Kydamudo iwymâry ton-honreim, tynrenseim warâ myakâwândy Davi. Davi, Salomão nhunwym. (Bate-Seba keho agâ imerymo. Urias iwydypyry myakâwândy mâkâ.) <sup>7</sup> Salomão, Roboão nhunwym. Roboão, Abias nhunwym. Abias, Asa nhunwym. <sup>8</sup> Asa, Josafá nhunwym. Josafá, Jorão nhunwym. Jorão, Uzias nhunwym. <sup>9</sup> Uzias, Jotão nhunwym. Jotão, Acaz nhunwym. Acaz, Ezequias nhunwym. <sup>10</sup> Ezequias, Manassés nhunwym. Manassés, Amom nhunwym. Amom, Josias nhunwym. <sup>11</sup> Josias, Jeconias, iukonodolâ warâ nhunwym. Israeldâ Jeconias pymâem awly ume myakâwândy kydamudo adaholy Babiloniaram. Iweâpa myakâwândy Babiloniadâ awlymo, tâtymo anaxilâ odopâdomoem en-hem kehomba tawylymogue.

<sup>12</sup> Jesus idamudo ise iwerâ kâengatuly, kydamudo Babiloniaram satoem sawâtyby modo dompyryenlâ, Jesus iazehobyryram. Jeconias, Salatiel nhunwym. Salatiel, Zorobabel nhunwym. Akaemo ume myakâwândy kydamudo Babilôniadâpa odopâdylymo tâtymo anaxilâ. <sup>13</sup> Zorobabel, Abiúde nhunwym. Abiúde, Eliaquim nhunwym. Eliaquim, Azor nhunwym. <sup>14</sup> Azor, Sadoque nhunwym. Sadoque, Aquim nhunwym. Aquim, Eliúde nhunwym. <sup>15</sup> Eliúde, Eleazar nhunwym. Eleazar, Matã nhunwym. Matã, Jacó nhunwym. <sup>16</sup> Jacó, José nhunwym. José akâwâm Jesus nhunwyn-em ini, Maria agâ tohogüinduo. Jesus ani Maria imery. Jesus mawânkâ Cristo kelygue tâzekeim, Messias “Deus Ingonyby” keze aguely.

<sup>17</sup> Jesus idamudo merâ kâengatuly: Abraão donropyryem katorze lelâ iepadomobyry, Daviram; eagonro katorze modo lâpylâ Davi donropyryem israelita domodo Babiloniaram satyby modoram, eagonro katorze iepadobyryem lâpylâ Jesus iazeho odaxi.

### *Jesus iazehobypy*

(Lc 2.1-7)

<sup>18</sup> Jesus iazehobypy wâgâ ise unâ kâengatuly. Pekodo Maria keho myakâwâm ise. Uguondo José keho agâ ohogünrim wâne myakâwâm mâkâ. Ohogünlymo iraynâlâ olâ myakâwâm Deus Ispiritury eon-honrugue adamyly. <sup>19</sup> Moisés inweniby ara lelâ adâidysedo myakâwâm mâkâ José. Maria imegu tiuntuduo olâ myakâwâm imoze tâkeze, âdykâ aniempyra tawylygue. “Eagonro uguondoram adâiehoze keanra awâkâ” tâkeduo. Aituo tutuzebalâ imoze kely, Maria tâwentâzeba itoem. <sup>20</sup> “Âdara ise awidly-ro?” kely ume myakâwâm, nhâenkyem Deus eanjury âepanâguely; eyam aguely myakâwâm:

— José, Davi iweryypyry, tywypazeba ikâ Maria agâ ohogünze. Tymegue lelâlâ wâne, âdaunlo uguondoram nâdynanâoba olâ. Awâkâ pekodo iodano iamudo, Deus Ispiritury awâkâ xuguni. <sup>21</sup> Uguondo ise awâkâ imery. Awâkâ iamudo wâgâ ise Deus kurâdo nhemakely, inakanhe aitomobyry nhygakely warâ. Awylygue ise “Jesus” kelygue mâenzetâdyly — kely myakâwâm anju Joséram.

(“Jesus”, “Kâmakerim” keze aguely.)

<sup>22-23</sup> Iweâpalâ myakâwândy Isaías aguely:

“Pekodo âdykâ uguondo nhynanâdânry adamyze.

‘Emanuel’ kely ise imery ezedy”

kewândymy Isaías tinweniby wâgâ.

(“Emanuel”, “Kagâlâ Deus” keze aguely.)

Jesus iazedu, aguehobypy aralâ myakâwâm aidyly.

<sup>24</sup> Kopaelâgâem myakâwâm José, anju aguehobypy ara aidyly. Maria tagâ nhedyly.

<sup>25</sup> Nyanâbyra olâ myakâwâm, imery saguho iazeho odaxi kehoem. “Jesus” kelygue myakâwâm iamudo nhezetâdyly.

## 2

### *Ximukâ enuagaeni modo Jesus eydâ atoram idâhomobyry*

<sup>1</sup> Jesus iazely myakâwâm xidadâ imeimbyry Belémdâ, Judéia eynynâ, Herodes pymâem awyly ume. Jesus iazepygueduo, xixi egaseho eynynonro modo ewy idâlymo myakâwâm xidadâ Jerusalémram. Ximukâ enuagaeni modo myakâwâm akaemo, âdy aini awyly tiuntuomoem. <sup>2</sup> Saintybyem myakâwâm tonlo modo nhapâiguelo:

— Âdykâka iamudo judeu domodo iwymâryem iazeypy? Xixi egaseho eynynâ ani xina ximukâ nhedyly, iazehobypy xutuho. Enado âzeguhoam ise, ehogueze warâ xina âewyly — kelymo.

<sup>3</sup> Egary tindatuo, toenzepa kehoem myakâwâm pymâ Herodes âseguâdâdyly. Toenzepa lâpylâ myakâwâm mâtâ xidadâ odano modo âda tâidyly nutuba idylymo, âseguâdâdylymo warâ. <sup>4</sup> Aituo Herodes, kurâdo eynynâ Deus agâ aguewâni modo iwymârydo, Moisés inweniby wâgâ enomedâni modo warâ indâtyguly, tyampâiguelomoem:

— Âdykâka ise Messias Deus Ingonokyly iazely? — kely.

<sup>5</sup> Aituo in-hogulymo:

— Belémdâ ise iazely, Judéia eynynâ. Warâ myakâwâm Deus itaumbypy egatuimbyry Miquéias inwenily:

<sup>6</sup> “Kydamu Judáram xuduypy onro odaylâ myakâwâm awârâ xidadâ imeimbyry, Belém. Tâwâlâ lelâlâ wâne mâtâ xidadâ imeimbyry awyly.

Alâ olâ ise mâtâ xidadâ egary,

târâ pymâ ton-honreim iazely awylygue.

Israelita domodo iwymâry ise mâkâ.

Kaneru eni modo tâguy nhedyly ara ise tynynonro modo nhedyly' nygue Deus" kewânmy Miquéias tinweniby wâgâ – kely judeu domodo iwymârydo Herodesram.

<sup>7</sup> Aituo myakâwâm Herodes, akaemo ximukâ enuagaeni modo ingâsenehonly, eagâmo lelâ adâkehoem. Saintuomo, adapâigueolmo:

– Âdaraka ani mâtâ ximukâ Messias iazely xutuho âepanâguely? – kely.

Aituo tientobyrry nhegatulymo. <sup>8</sup> Aguepygueduomo, eyanmo aguely:

– Inepa Belémram idâwâtaungâ. Koendâ iamudo âdykâ awyly xutuwâdaungâ. Mâentuomo, yam egatuwâdaungârâ. Udâdyse lâpylâ urâ myarâ, enadoram âzeguhoam ise, koendonroem awyly wâgâ auguehoem – kely Herodes; kewâdly kulâ olâ myakâwâm.

<sup>9-10</sup> Ilâpygueduomo, ximukâ enuagaeni modo âxiguelmo. Belémram idâlymo myakâwâm. Tâtâdaymolâ, ximukâ xixi egaseho eynynâ saguhoem tientybymolâ nhetonguylmo kau wâgâ. Toenzepa kehoem myakâwâm iomazelmo mâtâ ximukâ tientonduomo. Iwaunrorumoenlâ mâtâ ximukâ idâly, idâhomo tânehonze. Iamudo eydâ ato nhang-awaym myakâwâm ximukâ epagudyly. <sup>11</sup> Âtâ odaji egawântybyem myakâwâm iamudo nhedylymo Maria ihuay. Iamudo enado âzeguhoam idylymo, tynrense tawyly tienehonomoem. Ilâpyryem tysejiguy etary nhenahunguelmo. Iamudo xurâem tiantyby nhudulymo: ouru, incensu tyânrânguneim, mirra warâ.

<sup>12</sup> Ilâpygueduomo myakâwâm kopae nhâenkymoenlâ Deus eyanmo aguely:

– Herodesram egatuze todopâzebane itaungâ – kely.

Aituo tâty anaxilâ odopâdylymo eagonro ânwa oze, Jerusalém einkâ sakadânry oze.

### *José, Maria, Jesus warâ Egitoram âwientomobry*

<sup>13</sup> Ximukâ enuagaeni modo idâpygueduomo myakâwâm anju âepanâguely Joséram, nhâenkyem. Eyam aguely:

– Autaungâ. Inepa tarâpa itaungâ. Merâ iamudo xuien-honze enra Herodes, tyâen-hon-hoem. Egitoram âwientaungâ iamudo agâ. Târâlâ wao itaungâ. Âgâsezemo urâ, modopâdomoem – kely.

<sup>14</sup> Anju agueduo myakâwâm inepa kehoem José saudly. Kopaelâ kehoem âwiendylymo iamudo agâ Egitoram. <sup>15</sup> Herodes iguely ara myakâwâm târâ awylymo. "Egitodâba ymery xigâsedâ" kewândymy Deus, Oséias inweniby wâgâ. Jesus iamugâry Egitodâba odopâduo, Deus aguehobry ara kehoem myakâwâm aidyly.

### *Herodes iamimeom nhâen-hon-hobry*

<sup>16</sup> Ximukâ enuagaeni modo tonokudobrytiuntuduo myakâwâm Herodes iewiâpadly. Aituo tyzodadury modoram aguely:

– Belémram idâwâtaungâ. Iamudo uguondo imeombyry xyâwâtaunda tâjihuano modo dompyryem, azagâ anupeom modoram xyâwâtaunda. Idânârâ xyâwâtaungâ, xidadâ odano modo, poji anano modo, xidadâ iwaguepaom modo alelâ – kely.

Jerusalémdâ tatay, ximukâ enuagaeni modo aguewânmomy: "Azagâ anu sakadyby wâgâ akâwâm mâtâ ximukâ pymâ iazely xutuho xina nhedyly" kewânmomy. Aguehomobry wâgâ myakâwâm Herodes, idânârâ iamudo uguondo imeombyry tâjihuano modo dompyryem, azagâ anupeom modoram nhâen-honwâdyly, âdykonlo pymâem ini awyly nutuba tawylygue. <sup>17</sup> Arâ myakâwândy Deus itaumbry egatuimbyry Jeremias aguehobry ara aidyly:

<sup>18</sup> "Xidadâ Ramâdâ kurâ domodo tytyrungue toenzepa eogunrumo xina nidadâ.

Tymeombyry xyâhobry wâgâ Raquel eogunru xina nidadâ.

Ânguy nhetubanâguylymba itynrumo

idânârâ tymembyry xyâhobry wâgâ"  
kewândymy tinweniby wâgâ.

Jeremias inwenihobyry ara kehoem myakâwâm Herodes uguondo modo imeombyry nhâen-honwâdyly. (Israel iwydy Raquel iweompyrlâ mawânkâ israelita domodo.)

### *José, Maria, Jesus warâ Egitoram odopâdomobyry*

<sup>19</sup> Herodes igueduo myakâwâm Deus, tyanjury Egitoram ingonodyly, José xuruse. José xykyly ume myakâwâm anju âepanâguely nhâenkyem. <sup>20</sup> Eyam aguely:

— Aukâ. Israelram odopâgâ, iamudo, ise warâ agâ. Mâkâ iamudo tyândyedonro modo ipa, niguemo — kely.

<sup>21</sup> Aituo myakâwâm José, Maria, Jesus warâ saudylymo. Israelram odopâdylymo.

<sup>22</sup> Saintybyem myakâwâm “Arquelau pymâ, Herodes imerybyry, tunwym ejipyano” kely indadyly. Awylygue myakâwâm José eanu myarâ Judéia yan-yam idâze, “Pymâ iwelo iamudo xyâen-honze enra” tâkeduo. Nhâenkyenlâ olâ myakâwâm Deus aguely:

— Galiléia yan-yam âxidâdaunda — kely.

Aituo Galiléia yan-yam âxidâze idâlymo. <sup>23</sup> Xidadâ Nazarédâ myakâwâm âxidâdylymo. Iweâpa Deus itaumbypyry egatuwânybyry modo, “nazareno” kelygue âzezekeoze kehombypyrlâ. Nazaréram iamudo Jesus agâ âxidâze idâduomo, Deusaguehobyry ara aidyly.

## 3

### *João kurâ domodoram Jesus âewyly wâgâ aguehobyry*

(Mc 1.1-8; Lc 3.1-17; Jo 1.19-28)

<sup>1</sup> Tâlâ myani uguondo João Batista keho Judéia eynynâ. Âji âdy peba atodâ myani mâkâ âxidâdybyem awyly. Deus itaumbypyry mykâinane nhegatuly kurâ domodo myarâ idânri modoram. <sup>2</sup> Alâ mykâinane aguely:

— Âjityendaungâ, inakanhe kulâ amitomobyry wâgâ. Deus izepa ato aiedyly imowâdaungâ warâ. Iweâpa nitaymba ise Deus Ingonybyty âewyly. Kywymâryem ise — tâkeze mykâinane.

<sup>3</sup> Warâ myakâwândy Deus itaumbypyry egatuimbyry Isaías inwenily João Batista wâgâ: “Messias wâgâ agueim târâ âji âdy peba atodâ ise aguely.

Adâkely idase idâwâtyby modoram:

‘Inepa ise Deus Ingonybyty saindyly.

Izepa ato aiedyly imowâdaungâ.

On-hondypyry lelâ itaungâ, aguely mâindatomoem.

Pymâ ton-honreim kâty anaxi âewyly kiuntuduo wâne,

    kâty inatary tuonse, tuonkeze warâ kurâ,

    myara on-hondypyry lelâ kydawyly aguely idase’ ”

kely ise mâkâ unâ egatuim, warâ myakâwândy Deus itaumbypyry Isaías inwenily.

João Batista myani Kywymâry saindyly egatuim. <sup>4</sup> Camelu xuhudugue xygatyby mykâinane João ety iwogonro, âdy pebaom ety iwogonro emyenro kulâ. Tâjitubygue kulâ mykâinane iwanxiegu. Kahuli, penrâ warâ mykâinane ipyniry. <sup>5</sup> Jerusalémdâ tâtyuneim modo, Judéia eynynonro modo, paru Jordão emelano modo warâ tâtâzemo mykâinane João aguely idase. <sup>6</sup> João aguely tindatuomo myani toenzepa kurâ domodo aguely eyam:

— Deus izepa ato alieni xina. Adâidyl tumoze olâ xina-ro warâ — kelymo.

Arâ agueduomo myani paru Jordão ikay Joãoram batiza âieholymo, Deus izepa ato adientomobyry wâgâ tâjityenze tawylymo tienehon-homoem, inakai modo adiendlyly imoimbyryem tawylymo tienehon-homoem warâ.

<sup>7</sup> Agui kehoem myani fariseu domodo, saduceu domodo warâ Joãoram batiza âiehoze idâlymo. Tutuze olâ myani João, akaemo nâjityembra awyly Deus izepa ato adientomobyry wâgâ. Awylygue aguely eyanmo:

— Âgâ poji âduguel ume âsemagazeze kewâni ara kulâ âmaemo! Warâ wâne amygue-lymo: “João batiza kyetuo ise kydâsemaguel. Deus kângazedaymba ise” myguelymo.

<sup>8</sup> “Deus eynynonro urâ” myguelymo wâne, Deus eynynonro keba olâ âmaemo. Deus izepa ato amânhetomobyry wâgâ tâjityenze mawylymo enehorim aietaungâ, inakanhe amidylymo imoimbyryem mawylymo mânehon-homoem warâ. <sup>9</sup> “Deus kânagazenehonwâbyra ise, Abraão iweonma kurâ” tâkezeba itaungâ. Abraão iweryem tadalafil mâkeba mårâ kuru. Âdy mâkeba awârâ! Auguelly xirâ âyanmo. Ton-honre Deus, xirâ tuhu modo Abraão iweryem ienehonze. <sup>10</sup> Nady koendâ ewisedâny pygue satâly. Iwindy âzesagueoly. Peto onwanji adameoly alelâ aieholly. Nady koendâ ewisedâny ara kulâ âmaemo. Deus izepa ato mâmmpa âmaemo-ro watay, inepa ise Deus inagazenehonlymo.

<sup>11</sup> — Urâ pygueduo eagonro âese lâpylâ Deus wâgâ aguenri. Ton-honreim ise mâtâ, iemyenro keba. Mâtâ ise yakadâ kuru ton-honreim. Ihuru etary sanienlâ witoem nudupa lâgâlâ. Urâ parugue batiza âenimo, Deus izepa ato amânhekylymo wâgâ tâjityenze mawylymo mânehon-homoem, inakanhe amidylymo imoimbyryem mawylymo mânehon-homoem warâ. Mâtâ âeni olâ ise Deus Ispiritury xudunri, eynynâ mawylymo xutuhoem. Inakanhe amitomobyry xygakeze, peto wâne saxium nhaduândyly âpa ezay myara. <sup>12</sup> Trigu ekaunâni wâneam tuduakeze ewy nhekaunândyly myara mâtâ. Tynynonro modo iduakewâze ejidy tâkehobryanlâ ise nhekanândyly, trigu etary kehobypy odaxilâ ekanândyly myara. Tynynâbaom modo olâ typgueba kehoem enagazeze peto âdaunloenlâ nhântâny onwanxi ise nhameley — kely João.

### *João Jesus batiza nhetobyry*

(Mc 1.9-11; Lc 3.21-22)

<sup>13</sup> Alâ myani Jesus Galiléia eynynâba idyly, paru Jordâoram idâly, João batiza tyetoem.

<sup>14</sup> João myani batiza tiendyseba, Jesus tynrenseim kuru awyly tutuze tawylygue. Aituo aguely:

— Batiza âetoem yam mâewyly. Âmâlâ yakadâ kuru tynrenseim. Âmâ batiza yekâ — kely João.

<sup>15</sup> Warâ olâ Jesus aguely:

— Ize wato aralâ nidâ. Batiza yekâ. Ara ise Deus ize ato aguiendyly — kely.

Aituo João âkeá kely. Jesus batiza âieholly myani, Deus eynynonroem tawyly tienehon-hoem.

<sup>16</sup> Jesus âjikaguely paikayba. Âjikaguebygueduo myani kau âzenahunguely nhedyly. Papaem myani Deus Ispiritury xytâguyly, ekadyly nhonwa. <sup>17</sup> Aituo kau oday Deus itanru indadyly lâpylâ:

— Ymery toenzepa kâinwyneguuly merâ, toenzepa womazeâni — kely myani Deus.

## 4

### *Deus ize ato arabâ Jesus aitoem, Satanás aiese kehobypy*

(Mc 1.12-13; Lc 4.1-13)

<sup>1</sup> Ilâpyryem myani Jesus adaholy Deus Ispirituryam âji âdy peba atoram. Tarâ myani Deus izepa ato anhetoem Satanás aiese kely wâne. <sup>2</sup> Quarenta iguandyly, quarenta eme-dyly warâ myani Jesus nâwinduapyra awyly. Alâ myani toenzepa kehoem ewindupadyly.

<sup>3</sup> Aituo Satanás eyam saindyly, aguely:

— “Deus imery urâ” mygueansema. Âkealâ kuru amyguely-ro watay, awârâ tuhu pãoem iekâ pylâ — kely.

<sup>4</sup> Aituo myani Jesus aguely:

— Amyguehobypy agânhetaymba ise urâ.

“Pão kiendawynlygue lelâ inkâba kyiguepa kydawyly.

Idânârâ Deus agueho kieinwândyly, aguiendyly warâ watay,

kyiguewâpyra kurâ”

kely mawânrâ Deus itaumbyry awo wâgâ iweniby — kely Jesus.

<sup>5</sup> Ilâpygueduo myani Satanás, Jesus nhadyly Jerusalémram. Deus ijidadâr kelygue tâzekeim myani mâtâ xidadâ. Deus ety nhangakuedaji myani nhadyly. <sup>6</sup> Aituo aguely:

— “Deus imery urâ” mygueansema. Âkealâ kuru amyguely-ro watay, tarâpa onro onwa adamegâ. Mâdyâwâpyra ise âmâ. Warâ mawânrrâ iwenibyem Deus itaumbyry awo wâgâ: “Deus nhese lelâ.

Anju domodo igonose awâniem.

Âihugueduo, awâse lelâ tâmarygue,

âda mipyra mitoem, âhuru tuhu onwa nâdyâpa itoem warâ”  
kely iwenibybe mawânrrâ — kely Satanás.

<sup>7</sup> Aituo myani Jesus eyam aguely:

— Onro onwa kadamewâbyra ise urâ. Warâ lâpylâ iwenibyem awyly Deus itaumbyry awo wâgâ:

“Deus imakelymo mâtentomoem kulâ, kâmayno akâiedaundâ.

Amidylymo-ro watay, mâtinwâmpyra mawylymo kulâ ise mâtenehonlymo”  
warâ lâpylâ iwenibyem awyly — kely Jesus Satanásram.

<sup>8</sup> Ilâpyryem myani iwy kaynonro onwa adaholy Satanásram. Idânârâ onro anano modo nhenehonly; idânârâ âdydo imeom iwâkuru modo, tâwâenseim modo warâ nhenehonly.

<sup>9</sup> Aituo myani aguely Jesusram:

— Idânârâ awârâ mâtentaynl modo âyam xuduze urâ, ienado âzeguhoam midyly yrentoen-ro watay — kely.

<sup>10</sup> Jesus aguely:

— Âyrentoem inado âzeguhoam witaymba ise urâ! Deus itaumbyry awo wâgâ iwenibyem:

“Kywymâry Deus enado lelâ âzeguhoam itaungâ.

Aguehobyry ara lelâ aitaungâ”  
kely iwenibyem. Idâ, Satanás. Tarâpa ikâ — kely Jesus.

<sup>11</sup> Aituo Satanásram âjionly. Satanásram âjiompygueduo myani anju domodo saindyly, Jesus eydâ atoram xuahuze, idânârâ ize ato modo xuduze warâ.

### *Jesus Galiléia eynynâ tâwanu nhaguhobyry*

(Mc 1.14-15; Lc 4.14-15)

<sup>12</sup> João Batista kadeia oday kely tindatuo myani Jesus Galiléia yan-yam idâly. <sup>13</sup> Xidadâ Nazaréamba olâ myani odopâdondly-ro warâ. Xidadâ Cafarnaumdâ myani âxidâdyly, Galiléia iwalu iwaguepa, saguhoem kydamudo Zebulom, Naftali warâ eonronruem xuduupy eynynâ. <sup>14-16</sup> Enanâguewâdaungâ saguhoem Deus itaumbyry egatuimbyry Isaías inweniby:

“Kydamudo Zebulom, Naftali warâ eonronru

Galiléia eynynâ ejiku, paru Jordão kuynâ,  
tuomareim kuru ise âmaemo judeu, judeu keba alelâ,

mâtâ anaym tâjikuneim modo,  
âdaralâ Deus itaumbyry mâtuntuba olâ âmaemo.

Awylygue toenzepa âiguelymo mâyntadylymo, mâseguâdâdylymo warâ.  
Deus wâgâ âzenomedâoze olâ âmaemo,

iajinu odano aramo lelâ ise, iamu odanopyryem” kewândymy.

<sup>17</sup> Deus xunâr yegatuze myan-yam Jesus idâduo, Isaías inweniby ara kehoem myani aidyly. Târâlâ myani Jesus unâ nhegatuly adaguly. Alâ myani aguezesedyly:

— Âjityendaungâ inakanhe amitomobyry wâgâ. Inakanhe adâjidyly imowâdaungâ warâ.  
Arâ lelâ ise Deus âwymârymoem awyly — kezesedyly.

### *Jesus kanra awâni modo tynynonroem ingâsedobyry*

(Mc 1.16-20; Lc 5.1-11)

<sup>18</sup> Paru Galiléia emelay tadakobâday myani Jesus azagâ uguondo nhedyly, iwaigoru, iukono warâ; Simão Pedro, André warâ. Âedâgue kanra sawâni myani akaemo, vende tientoem. Âedâ paikaji nhamedaymo myani Jesusram âzecholymo. <sup>19</sup> Azakâlâram myani Jesus aguely:

— Âetaungâ. Saguhoem kanra keankâ mawelymo; iwerâ kurâ domodo ynynonroem itoem unâry egaturin-em ise âmaemo — kely.

<sup>20</sup> Inepa kehoem myani âedâ kanra sawâto inmolymo, Jesus eynynonroem tâitomoem, Deus wâgâ tiuntuhomoe.

<sup>21</sup> Tâtâday myani Jesus azagâ uguondo modo nhetondyly, Tiago, iukonolâ João warâ. Zebedeu imeombyry myani akaemo. Ekadybymoem myani tywepirymo oday tunwym agâ. Âedâ kanra sawâto myani kua nhekylymo, kopaelâgâroem. Aituo myani Jesus akaemo ingâsedyl tynynonroem itomoem. <sup>22</sup> Inepa kehoem tywepiry odayba idylymo. Tunwym tyânzemo myani, Jesus agâ tâtâhomoe.

*Jesus kurâ domodo nhenomedâdobyry, tâwânuneim modo kua nhetobyry warâ  
(Lc 6.17-19)*

<sup>23</sup> Idânârâ Galiléia eynynonro âtâ anakâ myani Jesus sakadyly. Âtâdyguyhomodâ mykâinane Deus wâgâ nhenomedâdylmo. Deus iwymârymoem idyly wâgâ mykâinane unâ iwâkuru nhegatuly. Tâwânuneim modo, âsenagazeni modo warâ kua tyese mykâinane.

<sup>24</sup> Tâinkâ lelâba myani anhekyly egary idâly Síria eynynâ. Aituo pylâ myani tâwâneim modo Jesusram nhadylymo-ro warâ. Âdaunlo tâzewânlâ kua nhekyly. Kadopâgue taseim modo kua nhetaynly. Ekomani modo kua nhetaynly. Adakobâdânry modo kua nhetaynly lâpylâ warâ myani. Idânârâ tâwâneim modo tyam idâypy kua tyese lelâ myani. <sup>25</sup> Toenzepa myani kurâ domodo nhapygue awyly, Galiléia eynynâba âetaymby modo, Dez Xidadâ anano modo, Jerusalém donro modo, Judéia eynynonro modo warâ, paru Jordão kuynonro modo lâpylâ warâ.

## 5

*Jesus kurâdo ivy wâgâ âtâdyguyby nhenomedâdobyry  
(Mt 5.1-7.29)*

<sup>1</sup> Toenzepa kehoem myani kurâ domodo Jesus eydâ atoram idâly. Arâ kurâdo tientuo myani ivy onwa âkuly, ekadyly warâ. Eynynonro modo iopaji idylymo myani. <sup>2</sup> Aituo myani kurâ domodo enomedâdyl Jesus nhaguly.

*Âdara tojiomaru kuru awyly xutuho  
(Lc 6.20-23)*

<sup>3</sup> Aituo Jesus aguely kurâ domodoram:

— Tuomareim kuru mâkâ, Deuslâ idânârâ tâlâ tato xuduim awyly xuturim.  
Imâembâ lelâlâ wâne, Deus kaynonro olâ iwymâry, eni warâ.

<sup>4</sup> — Tuomareim kuru mâkâ iwerâ âjityeni.

Itynru ume, Deuslâ mawânkâ ise iomazeâni.

<sup>5</sup> — Tuomareim kuru mâkâ tâlâ tato modo wâgâ kulâ sawoem itânry.  
Deus tynynonro modoram, “Xuduze urâ” kehobyry emakeze mawânkâ.

<sup>6</sup> — Tuomareim kuru mâkâ Deus ize ato modo lelâ adiendye donro.  
Kurâ tâwinzeim, tatuenzeim warâ wâne pyni, paru warâ lelâ ize ato,

myara lâpylâ Deus ize ato lelâ adiendye awyly.

Idânârâ ize ato xuduze Deus, ton-honre lelâ tâinwântoem.

<sup>7</sup> — Tuomareim kuru mâkâ âkelo modo ityeni.  
Deus mawânkâ ityenze lâpylâ.

8 – Tuomareim kuru mâkâ Deus izepa ato aniempyra tâitoem Deus xurâ modo wâgâ lelâ âtynanâni,

Deus eydâ atoram idâze mawânkâ.

9 – Tuomareim kuru mâkâ, tâdâtuebadly, tâdâseguebyly warâ adain-hoem aini.  
Tymery ara lelâ mawânkâ ise Deus nhedyly.

10 – Tuomareim kuru mâkâ Deus ize ato ara aidylygue tânagazezeim.  
Deus kaynonro mawânkâ ise iwymâry, eni warâ.

11 – Ynynonro mawylymogue, ynynâbaom modoram âjiewiâseoze âmaemo. Âunâguezemo. Inagazenehonzemo. Âwâgâmo kewâdylymo kulâ ise warâ. Arâ wâne ise amyguehonlymo, tuomare lelâ olâ ise âmaemo. 12 Tytywanzeba itaungâ, tuomare lelâ. Deus olâ eydâ tatodâ imâem âyanmo nhudulype, omazeânímo nhekanâdybybe. Deus izepaom modoram mâzenagazeolymo. Alâ mykâinane Deus xunâry egatuim modo nhenagazedylymo lâpylâ – kely Jesus.

### *Jesus, “Peku, iajinu warâ emyenro âmaemo” kehobyry*

(Mc 9.50; Lc 14.34-35)

13 Aituo Jesus aguely:

– Peku pyni tâkubâzeânze, podo niwânzeânehomba warâ, myara âmaemo taunlo modo ywâgâ amyguelymo, kurâ domodo yeinwântomoem, inakanhe nâiehoba itomoem warâ. Peku onro agâ on-hoam ityby olâ pyni ikaji ietoem nudupa. Âdaitoem ânguy ize inkâba. Awylygue adameoly lelâ, adakabeoly warâ sakani modoram.

14 – Iajinu, iamu oday kydadakobâdo kiento nhesagonly myara ywâgâ mâuntuenhonlymo. Koendâ kehoem wâne xidadâ iwy angatay saunâtyby edyly myara ywâgâ totoenzeba aguewâtaungâ. 15 Lamparina kienmanâdyly watay, âdylâ iaxi kioentaymba kurâ. Kayanlâ kianlokuândyly, idânârâ âtâ odano modo nhesagon-hoem. 16 Lamparina kaynâ ekanâdyby ara ise koendâ amidylymo âzecholy idânârâam, Deus mâinwândylymo warâ. Koendâ amidylymo tientuo: “Koendonroem unwâmo Deus kaynonro awyly” aguehonze – kely Jesus.

### *Jesus Moisés inweniby wâgâ aguehobyry*

17 Jesus aguely:

– “Jesus aguehobyry lelâ iwerâ kyzeinwâne, âdaitoem saguhoem Moisés agâ, tunâry egatuwâni modo agâ warâ, Deus aguehobyry kieinwântaymba kurâ” tâkezeba itaungâ. Deus Moisésram kâzewenry inwenien-hoymby koendâ kuru mâuntuhomoem xirâ kâewyly, mâinmohomoem inkâba. 18 Kau, onro warâ tâlâ awyly ara, Moisés inweniby tâlâ lelâ lâpylâ ise; tugukewâduneba ise xypyry etaji kehoem. Iwenihobyry tokalâ letralâ tygakeduneba ise. Xirâ mawânrâ mâuntudyzemo kuru wato. 19 Moisés inweniby modo ewy einwântâny, kurâ domodo mâtâ neinwâmpyra itoem aguenri watay âdy mâkeba ise mâkâ, Pymâ Deus nhekyly modo duay. Deus Moisésram kâzewenry inwenien-hoymby ara aini, kurâ domodo enomedâni waunlo watay, tywyneim ise mâkâ Pymâ Deus eydâ atodâ. 20 Warâ âyanmo auguely. Fariseu domodo, Moisés inweniby wâgâ enomedâni modo warâma koendâ aini, tâkewâze kurâ. Kurâ domodo tynrentomoem kulâ olâ akaemo aidy-ro warâ. Deusgue âwymâgumo ize mataymo, kurâ domodo ize ato ara kulâ aini modo takaze Deus ize ato aietaungâ – kely Jesus.

### *Ânguy kienwiâsebyra kine*

21 Jesus aguely:

– Tydaselâ âmaemo, Moisés kydamudoram aguehobyry: “Ânguy kâdyâwâtaundâ. Kyâimpypyry pymâ domodo xyâen-honze lâpylâ” kewândymy Moisés. 22 Urâ olâ warâ âyanmo auguely. Deus enanaji, kagonro kienwiâsedyly, inakai kuru, ânguylâ kyânlý aralâ lâpylâ. Awylygue kyewiâsenibe-ro watay, adaholy pymâdoram âzenagazeohoem.

Âkelo xunâguenibyry tribunalram sadlyle lelâ, setenta pymâ tynreim modoram âzenagazeohoem. “Tuândy kulâ âmâ” keypy watay, samely lelâ peto nhântânry onwanji. <sup>23-24</sup>Tâwâlâ lelâlâ wâne Deus etydâ mawylymo, âdylâ Deusram egameze, târâ mawylymo ume, mâdunâgueohomobyry mâenanâguelymo-ro watay, Deus xurâem mantybymo târâlâ wao nhânwâtaungâ, mâengamebamolâ. Waunroem mâkâ âewiâsenimobypy agâ âtunâguedaunda wao. Koendâ lelâ agâmo-ro watayma tâwâlâ Deus etyram modopâdylymo, Deus xurâem mantybymo egameze.

<sup>25</sup> — Ânguylâ tribunalram adysemo watay, waunroem wao eagâ koendâ âtunâguedaungâ, agâmo tyewiâseba itoem. Arâ amipyra âmaemo-ro watay, tribunalram asemo. Târâ ise; pymâ domodo polícia domodoram igameinmo-ro warâ mâzetadâohomoem. <sup>26</sup>Dinheru mâempywadomoem juiz aguehobyry idânârâ mâempywabyra âmaemo-ro watay, igasewâbyra ise âmaemo târâpa. Arâ lâpylâ Deus agâ koendâ itaungâ koendâ mitomobe awyly umelâ. Xirâ mâuntudyzemo kuru wato – kely Jesus.

### *“Eagâ mohogüin-homobyry keba kulâ kâdynanâdaundâ” Jesus kehobyry*

<sup>27</sup>Jesus aguely:

— Tutuzelâ âmaemo Moisés inweniby: “Âwydymo keba kulâ kâdynanâdaundâ” kely myakâwândy inwenily. <sup>28</sup>Urâ olâ warâ âyanmo auguely: Uguondo pekodo enupeguygueni, tynanâdyze, iwydy keba olâ waunlo, inakanhe mâkâ xunâgu tyangahu oday. Nynanâbyra wâne, arâlâ olâ âzewentâoly Deusram. <sup>29</sup>Inwentânehoinmo Deus mâendysebamo ato kâzetaundâ. Koendâ tâise azakâlâ inumo etyly, Deus mâendysebamo ato mâempyra mitomoem. Koendonro kuru tânuembalâ Deus agâ tadalafil; idânârâ kodo peto nhântânry onwanxi adameoly mawânrâ koendâpaom kuru. <sup>30</sup>Deus xurâem inwentânehoinmo akâiedaundâ imarymogue. Koendâ tâise imarymo satâly, samely warâ, Deus izepa ato amânhepyra mitomoem. Koendonro kuru tâmaguebalâ Deus agâ tadalafil; idânârâ kodo peto nhântânry onwanxi adameoly mawânrâ koendâpaom kuru – kely Jesus.

### *Jesus tâdâximoly wâgâ aguehobyry*

*(Mt 19.1-9; Mc 10.1-12; Lc 16.18)*

<sup>31</sup>Jesus aguely:

— Tutuzelâ âmaemo Moisés inweniby: “Pekodo eagâ mohogüin-homobyry mânmodyze âmaemo watay, tâwâlâ imowâdaungâ. Âdaituo mânmolymo awyly xutuhoem pape mânweniby whole olâ eyam xuduwâtaungâ” kely myakâwândy inwenily. <sup>32</sup>Urâ olâ warâ âyanmo auguely. Âdaituoba kulâ âwydymo kâjimowâdaundâ. Eagonro uguondo agâ ituo lelâma pekodo imoly. Pekodo imoyby agâ ohogüimby watay Deus izepa ato ara kulâ lâpylâ aidyly. Deus xurâem, waunroem eagâ ohogüimbylâ mawânkâ iso kuru – kely Jesus.

### *Jesus aguienkyl kykehobyry wâgâ aguehobyry*

<sup>33</sup>Jesus aguely:

— Tutuzelâ âmaemo Moisés inweniby: “Deusram amyguehomobyry watay, aietaungâ lelâlâ; amyguehomobyry amânhepyra tâiseba itaungâ” kely myakâwândy inwenily. <sup>34</sup>Urâ olâ warâ âyanmo auguely. Âdaunloenlâ Deus ezedy âwankuem kâietaudâ. “Mâkâ kaynonro tutuze âkealâ auguely awyly” tâkezeba itaungâ. “Mâkâ kaynonro” myguelymo-ro watay, Deusranlâ amyguelymo lâpylâ, kaynâ ejidy awylygue. <sup>35</sup>“Mâkâ onro xyganipyry âkealâ auguely awyly tutuze” tâkezeba itaungâ. Deusranlâ arâ amyguelymo. Deus mawânkâ onro anaynlâ lâpylâ. “Mâkâ Jerusalém donro âkealâ auguely awyly tutuze” tâkezeba itaungâ, Deusranlâ arâ amyguelymo, Deus Ijidadâry kelygue tâzekeim awylygue. <sup>36</sup>“Iangatolezeze urâ, uguewâdyly kulâ-ro watay” tâkezeba itaungâ. Tokalâ

kyangahudu kiampakanânehonwâbyra kurâ, kienmyguymânânehomba warâ, Deus nhygatyby awylygue. <sup>37</sup> “Aiese urâ” myguelymo watay, aietaungâ. “Agânhepyra ise urâ” myguelymo watay, akâiedaundâ. Amyguehomobyry aralâ aitaungâ, Deus ezedy mâmempâguebamolâ. Deus ezedy mâmempâguenymo-ro watay, Diabulâ aienehonrim – kely Jesus.

*Tâdâpeândyly wâgâ Jesus aguehobyry  
(Lc 6.29-30)*

<sup>38</sup>Jesus aguely:

— Tutuzelâ âmaemo Moisés inweniby: “Ânguylâ otoguylymo, inuxiguylymo warâ watay, enuxiguywâdaungâ lâpylâ. Âerymo nhukagâdyly watay, iery xukagâdaungâ lâpylâ” kely myakâwândy inwenily. <sup>39</sup> Urâ olâ warâ âyanmo auguely: “Ânguylâ âdalâ âetuomo, âpeânze tâkezeba itaungâ” uguely. Mâjiwapagainhoduomo, tâpeânzeba itaungâ. MYRYK itaungâ, iladune âwapagain-homoem lâpylâ. <sup>40</sup> Âdylâ amânhetomobyry wâgâ mâmewentâolymo watay, policiaram adahoze âmaemo. Târâ “Âgamizary merâ uguondoram xudugâ” myguehondromo, tâwâlâ âwalitoru nadâ lâpylâ. <sup>41</sup> Sodadu Roma donro âyanmo “Ysejiguy sakâ tokalâ kilômetro” keduo, azagâ kilômetro lelâ sataungâ. <sup>42</sup> Âyanmo âdylâ ekanibyryram âunduwâtaungâ. Âdylâ tiempywaguylyem ekanibyryam âunduwâtaungâ lâpylâ – kely Jesus.

*Âizepanromo agâ koendâ lelâ itaungâ  
(Lc 6.27-28,32-36)*

<sup>43</sup>Jesus aguely:

— Tutuzelâ âmaemo Moisés inweniby: “Âwynenimo lelâ iwynedaungâ. Âwynedânrymo kâjiwynedaundâ” kely myakâwândy inwenily. <sup>44</sup> Urâ olâ warâ âyanmo auguely. Âwynedânrymo agâ koendâ lelâ itaungâ, ataen-homo mâmwyneguylymo agâ matomo ara. Ânguylâ inakanhe âedylymo watay, inakanhe aitobyry wâgâ Deusram ekadaungâ, eagâ koendâ lelâ itoem. <sup>45</sup> Koendonro mawânkâ Deus, tynynonro modo agâ, tynynâbanro modo agâ alelâ. Xixi tohobanâze mawânkâ koendonro modoem, inakai modoem alelâ. Kopâ tyihugueânze lâpylâ tâinwânni modoem, tâinwântânrý modoem alelâ. Awylygue koendâ lelâ âmaemo ataen-homo, âduerymo alelâ agâ-ro watay, Deus kaynonro xurâem kuru mawylymolâ mâmenehonlymo. <sup>46</sup> Agâmo koendonro agâ kulelâ koendâ mawylymogue, “Deus koendonro kurâem xuduze, koendonro kydawylygue” tâkewâzeba itaungâ. Âdyem itaymba awârâ. Asaemo dinheru impostu epywadobyry emakewâni modo tataen-ho modo agâ koendâ lelâmo lâpylâ. Awylygue arâ amidylymo watay, âkelo modo takaze amidylymo mâkeba. <sup>47</sup> Âpemugudomo agâ lelâ, ataen-homo agâ lelâ warâ mâmasedaenguylymo, âunâgumo warâ lâpylâ watay, âkelo modo takaze amidylymo mâkeba. Deus eynynâbaom modo mawânkâ tataen-ho modo agâ koendâ lelâ lâpylâ. <sup>48</sup> Koendâ lelâ idâñârâ kurâ domodo agâ itaungâ, Kunwym kaynonro ara, mâtâ idâñârâ koendâ eni ara – kely Jesus.

## 6

*Jesus tâdâsemawyadâdyly wâgâ aguehobyry*

<sup>1</sup>Jesus aguely.

— Xirâ âyanmo augueho. Tâmaynelâ itaungâ, tâzenanaym kehoem âdylâ amânhedepyra mitomoem, amyguepa mitomoem warâ. Igaromoem kulâ âdylâ koendonro amânhedylymo-watay, Deus ipywadaymbamo ise amânhetybymo wâgâ.

<sup>2</sup> — Awylygue kaikâ modo mâmewyadâdylymo watay, amânhetybymo ânguyam kâzegaetaundâ. Koendonroem âdutuim modo aito araba aitaungâ. Kaikâ modo

nhemawyadâdlymo watay, tâinkâ lelâba adientyby nhegatulymo, kurâ domodo âtâdyguyho odakâ, xidadâ earuary oze warâ. Kurâ domodo tywâgâ koendâ aguehoem kulâ kaikâ modo nhemawyadâdlymo. Deus koendonro nuduwâpyra ise eyanmo. Aitomobyry ebyrylâ ise awârâ kurâdoram âzehogueolymo.<sup>3</sup> Awylygue âdy pebaom modo mâenmawyadâdlymo watay, ânguyam kâzegaetaundâ. Koendâ kehoem aietaungâ, ataen-homo kuru nhutulyemba kehoem, imarymo pâem eynynonro wâne, imarymo aho eynynonro anhekylly nutuba myara.<sup>4</sup> Awylygue kaikâ modo emawyadâdaungâ, ânguy nutubalâ. Kunwym Deus olâ idânârâ aguienkylly tâense. Koendonro amânhekyllymo tâense, ipywazemo-ro warâ – kely Jesus.

*Jesus Deus agâ aguykehoem konomedâdobyry*

(Lc 11.2-4)

<sup>5</sup> Jesus aguely:

— Deus agâ amyguedaymo, koendonroem âdutuim modo ara inkâba itaungâ. Deus agâ adâkehomoem XYDYK idylymo, âtâ tâdâtâdyguyho oday, arua iskinarydâ warâ, kurâ domodo tâentoem kulâ. Deus koendonro nuduwâpyra ise eyanmo. Aitomobyry ebyrylâ awârâ kurâdoram âzehogueohomo. Xirâ mâuntudyzemo kuru wato.<sup>6</sup> Koendonro lelâlâ Deus agâ agueze kydâtâdyguyly. Koendonro lâpylâ olâ kurâ kulelâ eagâ aguykely. Awylygue âji ânguy âynanâbyramo atodâ eagâ aguewâtaungâ. Kunwym Deus awâtârlâ ise agâmolâ. Mâemptyra lelâlâ wâne âmaemo, alâ olâ eagâ aguewâtaungâ. Âmaemo kulelâ eagâ amyguelymo tydase mâkâ. Arâ amituomo koendonro âyanmo xuduze.

<sup>7</sup> — Deus agâ amyguedaymo, amyguehomobyrylâ adâkezezeba itaungâ. Deus einwântâny modo ara inkâba aitaungâ. Deus tydadyly waunlo ara, enanajimo, imeâgâemba kehoem adâkelymogue.<sup>8</sup> Aguehomo ara inkâba aguewâtaungâ. Tutuze mawânkâ Kunwym Deus âdy ize matomo, mâenkadylymo iraynâlâ.<sup>9</sup> Deus agâ amyguedaymo, warâ aguewâtaungâ:

“Pabai kaynonro, tynrenseim lelâlâ mawyly, izedy awyly warâ idânârâ nhutudyzemo xina.

Ânguy âwankuem âepyra nidâ.

<sup>10</sup> Tarâ xina iwymâryem ikâ.

Xina xirâ onro anano modo ize mato ara lelâ xina aiedyse awyly,  
târâ kaynâ agonro modo ize mato ara aito ara lelâ.

<sup>11</sup> Âmâlâ kopaelâgâembaba xina ipyniry âundugâ.

<sup>12</sup> Inakanhe xina aitobyry xygakegâ,  
âkelomo inakanhe tynynâ aitobyry xina nhenanânehon-ho ara.

<sup>13</sup> Satanás izepa mato aienehonze keduo, xina agâlâ ikâ,  
izepa mato xina aniempyra itoem.

[Xina iwymâry âmâ.

Ton-honre kehoem âmâ, amânhedyse mato aiese.

Tynrenseim âmâ.

Aunlolâ ise âmâ, typgueim keba. Arâlâ ise”]\*

— warâ aguewâtaungâ Deusram.

<sup>14</sup> — Inakanhe âetomobyry mâenanânehonlymo-ro watay, Kunwym kaynonro xygakeze lâpylâ inakanhe amitomobyry.<sup>15</sup> Inakanhe âetomobyry mâenanânehomba âmaemo-ro watay, Kunwym kaynonro nygakeba lâpylâ ise inakanhe amitomobyry – kely Jesus.

*Tâdâwinduapyra tâjidyly wâgâ Jesus aguehobyry*

<sup>16</sup> Jesus aguely:

\* **6:13** Idânârâ livru saguho modo wâgâ iwenibyemba xirâ.

Tâjityenzeba itaungâ, Deus agâ amyguehomoem mâwinduapyra midylymo watay. Koendonro emyenro modo ara inkâba itaungâ. Deus agâ adâkehomoem nâwinduapyra tâise tawyly xutudyzemo. Awylygue tytyreim ara idylymo. Nâzemelagogueba, nâzekagâimba warâ awylymo. Kurâ domodo tywâgâ koendâ aguehoem kulâ arâ aidylymo. Âdy koendonro nuduwâpyra ise Deus eyanmo. Aitomobyry ebyrylâ awârâ kurâdoram âzehogueolymo. <sup>17-18</sup> Âmaemo olâ, Deus agâ amyguehomoem mâwinduapyramo mituomo, tuomare lelâ itaungâ. Azemelagoguewâdaungâ lelâ, âzekagâinwâdaungâ lelâ warâ, ânguy mâwinduapyra mawylymo nutuba itoem. Kunwym kaynonro agâmolâ. Amidylymo tutuze mâkâ. Mâkâlâ ise âyanmo koendonro xudunri – kely Jesus.

### *Koendonro kaynâ ekanâdyby*

(Lc 12.33-34)

<sup>19</sup> Jesus aguely:

– Tarâ onro anaym âdydo imeom tâwâentuneim modo kâzekanâdaundâ, potogo, tuonro warâ inakanhe nhetodâ, âzemagazeohodâ warâ. <sup>20</sup> Awylygue âzeon-hondâdaungâ, Deus ize ato amânhetomoem. Arâ ise koendonro ekanâdybybe mawylymo târâ kaynâ. Âdaunloenlâ tuonro, potogo warâ inakanhe nhetâny. Tâmagazeim modo nemagazebyra ise. <sup>21</sup> Xirâ anano tâenseim wâgâ kulâ mâpaunzedylymo watay, mâtâ wâgâ kulâma âwaunkymo. Deus xurâ toenzepa ize matomo-ro watay olâ ise, ize ato ara lelâ ise amidylymo – kely Jesus.

### *Kodo iajimanâni*

(Lc 11.34-36)

<sup>22</sup> Jesus aguely:

– Kânugue mawânrâ kytâho kiendyly, iajino oze kytâly. Koendâ kiendyly-ro watay, ânwa iozeno oze lelâ kytâly. <sup>23</sup> Koendâ kiempyra kurâ-ro watay, tuzase kurâ, iamu duay tâduzato ara. Epy xurâem toenzepa lelâlâ iamu – kely Jesus.

{“Kânu agâlâ mawânrâ kyangahu âsewanily” keze Jesus aguely. Deus ize ato aguiendyse kurâ-ro watay, iozeno lelâ aguienkyl. Arâ aguiendyseba kurâ-ro watay, iozeno keba kulâ aguienkyl. Toenzepa ise kydâsenagazedyly, aguehobyry kieinwâmpyra kurâ-ro watay.}

### *Deus lelâ kieinwântaymba kurâ, toenzepa âdydo imeom ize lâpylâ kurâ watay*

(Lc 16.13; 12.22-31)

<sup>24</sup> Jesus aguely:

– Azagâ tywymâgueim kurâ watay, nuduwâpyra azakâlâ agueho aguentoem; tokalâ âdylâ aguiendyse, eagonro âdylâ aguiendyse lâpylâ. Aituo tokalâ aguehobyry lelâ aguienkyl. Arâ lâpylâ Deus ize, toenzepa tydinerugu ize waunlo modo Deusgue lelâ iwymâgoem nudupa awyly – kely Jesus.

<sup>25</sup> – Warâ âyanmo auguely. Tâseguâdâzeba itaungâ pyni wâgâ, okumo wâgâ warâ, âiguepa mitomoem. Itymo owogonromo wâgâ tâseguâdâzeba itaungâ. Pyni keba, okumo keba, âtâ tâjiwogonro keba warâ tywyneim kuru. Deus ize matomo xuduze lelâ âpynirymo, itymo owogonromo warâ. <sup>26</sup> Etaungâ atâingâ konopio modo. Typiembamo. Typyniry netâbyramo, nekaunâbyramo, netadâbyramo etary odaji warâ wâne. Deus olâ ipynirymo tuduze. Deus xurâ âmaemo. Tawâguneim modo ipyniry tiunduho ara, âyanmo xuduze lâpylâ. <sup>27</sup> Mâungukedânrymo wâgâ tâseguâdâzeba itaungâ. Âdara âiguelymo wâgâ tâseguâdâzeba itaungâ. Kyigueho odaji ituo, kyiguepa kitoem aguentaymba kurâ. Deuslâ kyigueho xutuim.

<sup>28</sup> – Mâzetydâdomogue, mâtâgudâdomogue warâ tâseguâdâzeba itaungâ. Etaungâ poji anano tadawanku. Nâsewanibamo, tâty tywogonro tianâtomoe. Kâdâkerâ nawâpyramo tâty tywogonro adientomoem warâ wâne. Deuslâ olâ iwâkudâni. <sup>29</sup> Kydamu Salomão toenzepa âdypeom myakâwândy, toenzepa lelâlâ. Iwâkuru modo myakâwândy ety

iwogonro. Poji anano sawanku olâ Salomão ety iwogonro takaze kuru tywâkurein-ro warâ. <sup>30</sup> Iweâpa nipyra olâ awârâ poji anano sawanku. Iwerâ koendâ, tywâkure warâ, kopaelâgâem ipa, iladybyem lelâ, peto emanâdoem âieholo lelâ warâ. Awârâ sawanku tâense Deus; nhesemo lâpylâ. Itymo owogonromo xuduze. Mâinwâmpyra olâ âmaemo!

<sup>31</sup> — Tâseguâdâzeba itaungâ. “Âdykâ kaise xina typniry, toku, tâty tywogonro warâ nhedyly?” tâkezeba itaungâ. <sup>32</sup> Deus einwântânry modo typnirymo, tokumo, tâty tywogonro modo wâgâ warâ kulâ inanry âtynanâdylymo. Âmaemo olâ, awârâ wâgâ tâtynanâzeba itaungâ. Tunwyn-em âmaemo Deus kaynonrogue. Tutuze mâkâ idânârâ ize matomo. Âpynirymo, okumo, itymo owogonromo, awârâ modo xuduze lelâ. <sup>33</sup> Awylygue âwymârymo Deus ize ato modo waunroem aietaungâ. Mâkâ ize ato wâgâ waunroem mâpaunzeduomo, idânârâ ize matomo xuduze Deus – kely Jesus.

<sup>34</sup> — Tâseguâdâzeba itaungâ kopaelâgâ ainigue. Kopaelâgâembaba mawânkâ Deus tynynonro modo nhedyly. Mâseguâdâdomogue kulâ mâpaunzedlymo watay, adakaladâze âmaemo – kely Jesus.

## 7

### *Ânguy kienwentâbyra kine (Lc 6.37-38,41-42)*

<sup>1</sup> Jesus aguely:

— Ânguy kâzewentâdaundâ, Deus iwentâbyramo itoem lâpylâ. <sup>2</sup> Âkelomoram mâundulymo ara lâpylâ ise Deus âyanmo nhuduly. Imâem mâundulymo watay, imâem lâpylâ ise Deus nhuduly. Imâemba watay, imâembalâ ise nhuduly warâ. <sup>3</sup> Agonromo tâwentâze âmaemo, âdiempa inakanhe aitobyry wâgâ kulâ, âmaemo olâ inakanhe kuru aini. Koendonro mâkeba awârâ. Agonro âzenupialodobyry lelâ mâenkylymo, inumo odano se iwatary imâsedo pylâ mâempyra âmaemo-ro myara. <sup>4</sup> Agonromo âzenupialodobyry etyze myguewâdylymo, inumo oday se iwatarybe awyly umelâ. <sup>5</sup> Saguhoem wao inumo odano se iwatary etywâdaungâ, koendâ agonromo âzenupialodobyry mâentyhomoem. Koendonro emyenro wâne âmaemo, inakanhe kulâ olâ amidlylymo! Saguhoem kuru wao inakanhe amidlylymo imowâdaungâ. Inakanhe amidlylymo mânmpygueduomoma ise tâwâlâ agonrodo mâunrudlymo, inakanhe anipyra itoem.

<sup>6</sup> — Deus itaumbyry egatuly izepaom modo tindadyseba awyly umelâ aguehonly watay, tindadyseba inkâba, Deus itaumbyry iweniby kaxoroam samely waunlo ara kulâ. Amyguelymo watay, kaxoro ara otoguyzemo, nhâsemo warâ. Tuhu tâwâensem pâsega nhakabehoem samely myara kulâ ise amyguehomobyry – kely Jesus.

### *Ize kydato Deusram kyzekane (Lc 11.9-13)*

<sup>7</sup> Jesus aguely:

— Ekadaungâ. Mâenkaduomo, emakeze lelâ âmaemo. Xuiwâtaungâ. Mâwinduomo, soenkeze lelâ âmaemo. Pyantaylâ âtâ sudo igâsedaungâ, enahungueze lelâ mawânkâ. <sup>8</sup> Idânârâ ekanibyry modo emakeze. Xuirimpyry modo soenkeze. Âtâ sudo pyantay tygâsenibyryram enahungueze. <sup>9</sup> Âmerymo turu nhekaduo, tuhu mâunduwâpyra âmaemo. <sup>10</sup> Kanra âjihuyby nhekaduo, âgâu mâunduwâpyra âmaemo eoduem. <sup>11</sup> Inakai wâne âmaemo, iwâkuru modo olâ âmerymoram mâundulymo. Kunwym kaynonroma kuru koendonro-ro; koendonro modo xuduze ekanibyry modoram!

<sup>12</sup> — Âkelomo agâ koendâ itaungâ, agâmo koendâ awyse matomo ara. Xirâ aguely mawânrâ Moisés inweniby, akaemo Deus wâgâ aguewâni modo konomedâdobry warâ – kely Jesus.

*Aguipa kulâ ise Deus eydâ atoram idâwâni modo*  
*(Lc 13.24)*

<sup>13</sup> Jesus aguely:

— Agui lelâ yeinwândysebaom modo tâwâlâ ize tato ara kulâ adâidysé awylymo; Deus ize ato ara adâidysébamo. Pyanta tâtaydygueim oze tâgawândyse awylymo, ânwa tâtaydygueim oze tâtâdyze awylymo warâ. Awylygue ise tâdâsenagazedoram kulâ idâlymo, Satanás eydâ atoram. Akaemo araba itaungâ. Yeinwântaungâ, pyanta tâtabigueim oze egawânni ara. <sup>14</sup> Ton-honreim olâ awârâ ânwa tâtabigueim oze tâdâtâly, pyanta tâtabigueim oze tâzegawândyly warâ, myara lâpylâ aguipa kulâ Deus eydâ atoram idâwâni modo, tâwâlâ âjize tawyly imowâni modo, Deus ize ato ara lelâ aitaynrim modo warâ — kely Jesus.

*Konokuze kulâ “Deus itaumbyry egatuim xina” kewâni modo*  
*(Lc 6.43-44)*

<sup>15</sup> Jesus aguely:

— Tonomeguelâ itaungâ, “Deus itaumbyry egatuim xina” kewâni modo agâ. Udodo kaneru xuhudugue âzetydâdyby emyenro kulâ akaemo. <sup>16</sup> Inakanhe aidylymogue olâ ise Deus eynynonro keba awylymo mâuntulymo. Tyguyreim, uvague tâwituneba; kazainwam, figugue tâwiseba warâ. Tâwilygue lelâ mawânrâ nady modo ewitu. <sup>17-18</sup> Se takyguenry, koendâ lelâ ewily, ein-hoem tuduze. Se takygueim, inakanhe lâpylâ ewily, ein-hoem nudupa. <sup>19</sup> Se koendâ tâwisenry satâly lelâ. Peto onwanji samely-ro warâ. <sup>20</sup> Warâ ise ânguy Deus wâgâ koendâ aguenri, ânguy konokuni warâ awyly, mâuntulymo aidyly wâgâlâ — kely Jesus.

*Idânârâ inkâba ise Deus pymâem atoram tâdâtâly*  
*(Lc 13.25-27)*

<sup>21</sup> Jesus aguely:

— Deus aguehobyry ara aini modo lelâ ise Deus eydâ atoram idânri. Toenzepa kurâ domodo yam, “Pymâ, pymâ” kewâni modo, kewâdylymo kulâ olâ. Pabai kaynonro eydâ atoram nâtâwâbyramo ise, Deus aguehobyry ara anipyra awylymogue. <sup>22</sup> Xypyry etay, “Jesus eynynonro xina” kewâtyby modo warâ ise yam aguelymo: “Pymâ, Deus itaumbyry xina egatuwâm on-honrugue. Toenzepa kadopâ modo xina egaseânmâ, toenzepa adyesenry modo warâ xina aiemâ on-honrugue” kezemo yam. <sup>23</sup> Warâ olâ ise eyanmo auguely: “Âtuwâbyramo urâ. Ydâpa itaungâ, âmaemo inakanhe aitaynrim modo!” keze lelâ urâ — kely Jesus.

*Deus aguehobyry ara lelâ aini, aguehobyry araba aini warâ*  
*(Lc 6.47-49)*

<sup>24</sup> Jesus aguely:

— Deus itaumbyry indadyly, aguehobyry ara aidyly waunlo uguondo tonomegueim, tuhu wâgâ tâty itâni byry emyenro. <sup>25</sup> Toenzepa kopâ ihugueduo, paru inwenly. Sapezenru ton-honre kehoem âtâ onwa idâly. Mârâ âtâ olâ nihugueba, tâhugane kehoem tuhu wâgâ itâdyby awylygue.

<sup>26</sup> — Deus itaumbyry idani, aguehobyry ara aniempyra olâ waunlo uguondo sagunu wâgâ tâty itâni emyenro kulâ. <sup>27</sup> Toenzepa kopâ ihugueduo, paru inwenly. Ton-honre kehoem adapezeinly âtâ onwa. Aituo âtâ ihuguelly. Idânârâ kehoem adakalaguely, tâhuganeba itâdyby awylygue — kely Jesus.

*Adâkeho tutuze lelâlâ Jesus*

<sup>28</sup> Jesus aguepygueduo, toenzepa myani kurâ domodo âsewânily, arâ tâzenomedâoduomo. <sup>29</sup> Aguelymo:

— Adâkeho tutuze lelâlâ awâkâ uguondo! Ton-honruguelâ awâkâ aguely, akaemo Moisés inweniby wâgâ enomedâni modo ara inkâba — kelymo.

## 8

*Jesus uguondo tâjimituguelygue tâwâneim kua nhetobyry  
(Mc 1.40-45; Lc 5.12-16)*

<sup>1</sup> Iwy wâgâpa Jesus xytâguyly. Toenzepa myani kurâ domodo nhapygue awyly. <sup>2</sup> Aituo myani uguondo iopaji saindyly. Jesus enado âzeguhoam idyly, tynrense tawyly tienehon-hoem. Tâjimituguelygue tâwâneim myani mâkâ. Aituo Jesusram aguely:

— Pymâ, kua yese ton-honre mawyly, xutuanze. Kua yedyse âmâ watay, kua yekâ wao — kely.

<sup>3</sup> Jesus tâmarygue MÂ' nhedyly. Eyam aguely:

— Kua âedyse urâ. Tâwânepa âmâ iweâma. Kua âetai — kely.

Ilâenlâ kehoem kua idyly. Iwâgâ pinuri peba idyly, itugoenzely warâ. <sup>4</sup> Eyam aguely:

— Idakâ. Iweâma tâwâlâ idâ. Ânguyran-ne xirâ kua âetobyry kâzegatu — kely.

— Kurâdo eynynâ Deus agâ agueinram âzechora, kua itybyem mawyly nhetoem. Kua itybyem mawyly kurâdo nhetoem, Deusram âdylâ xudugâ, kâzewenryem Moisés inweniby agueho ara — kely Jesus.

*Jesus sodadu domodo iwymâry agâ tâwaneim ewânu ume kua nhetobyry  
(Lc 7.1-10)*

<sup>5-6</sup> Jesus idâly xidadâ Cafarnaumram. Saimpygueduolâ kehoem myani sodadu domodo iwymâry idâly eyam. Aituo aguely:

— Pymâ, târâ ietydâ yagâ tâwaneim toenzepa ewânu. LYK itoenlâ nudupa. Toenzepa âpyneândyly. Kua mânhedyse wâne urâ — kely.

<sup>7</sup> — Idâze urâ itynra, kua iese — kely Jesus.

<sup>8</sup> Târâ endaylâ Jesus mâkâ tâwâneim kua iese ton-honre awyly tâinwânsse olâ myani mâkâ uguondo. Aituo myani aguely:

— Pymâ, âdy mâkeba urâ, ietyram mâwântoem. Toenzepa ton-honreim âmâ. Iwague endaylâ yagâ tâwaneim kua itoem amyguely watay, kua ise lelâ mâkâ — kely sodadu iwymâry. <sup>9</sup> — Ywymâry modo aguely tâinwânsse urâ. Tyzodadugue lâpylâ urâ, yeinwânni modogue warâ. Kâingonotuo, tâtâze lelâ. Eagonro kâingâseduo, tâese lelâ warâ. Yagâ tâwaneinram “Xirâ aiekâ” ugueduo, inepa adyese lelâ warâ — kely myani cem sodadu domodo iwymâry.

<sup>10</sup> Awârâ tindatuo myani Jesus toenzepa kehoem âsewânily, mâkâ sodadu domodo iwymâry toenzepa tâinwândyly tiuntuduo. Aguely mâkâ kurâdo tyampygueni modoram:

— Eagâ tâwaneim kua kânhedyly tâinwânsse mynra merâ uguondo. Ânguy yeinwânni kâentaymba urâ merâ Roma donro yeinwânto ara kehoem. Kypemugudo israelita domodo duay kuru ânguy yeinwânni lâpeba merâ ara! — kely.

<sup>11</sup> — Enanâguewâdaungâ xirâ. Toenzepa ise israelita domodo keba ewy Deus pymâem atoram idâim. Xixi egaseho eynynonro modo, egawânto eynynonro modo warâ kehoem ise âtâdyguylymo Deus pymâem atodâ. Toenzepa ise âzetyguedlymo, iomarumo warâ, kydamudo Abraão, Isaque, Jacó akaemo agâ. <sup>12</sup> Tâlâ olâ ise toenzepa kypemugudo israelita domodo ewy Deus pymâem atoram idâdânry, yeinwâmpyra awylymogue. Iamu odaxi ise adameolymo, toenzepa kehoem âsenagazedomoem. Toenzepa ohogüenzemo, tyery saguzemo warâ, tâsenagazedylymogue — kely Jesus.

<sup>13</sup> Jesus aguely sodadu iwymâryam:

— Idâ ityam. Agâ tâwaneim kua kânhedyly; meinwântaima. Aituo enra kua kânhedyly — kely.

Jesus aguely umelâ myani sodadu iwymâry agâ tâwaneim kua idyly lelâ târâ.

*Jesus tâwânuineim modo kua nhetobyry  
(Mc 1.29-34; Lc 4.38-41)*

<sup>14</sup> Sodadu modo iwymâry agâ âtunâguedybyem myani Jesus idâly Simão Pedro etyram. Saintybyem myani Simão imenhundu tâwâne, toenzepa kehoem iaturu kely indadyly.

<sup>15</sup> Jesus tâwâneim eguetonra idâly. Emay wâgâ nhawâdyly. Ilâ umelâ kehoem myani kua idyly; tyatureba idyly, pekodo saudyly, ipynirymo aiese, âwinduatomoem.

<sup>16</sup> Iguampygueduo myani kurâ domodo kadopâgue taseim modo, tâwânuneim modo warâ Jesusram nhadylymo. Kadopâ kurâ domodo odanya egasehoem, tâwânuneim modo kua itoem warâ aguely. Aituo kadopâ modo egasewâdyly, idânârâ tâwânuneim modo kua itaynly warâ. <sup>17</sup> Warâ myakâwândy Deus itaumbyry egatuimbyry Isaías aguely iwâgâ:

“Mâkâlâ kâwânu kua ieni,  
kydâpyneândo etynri warâ”  
kewândymy.

Jesus kurâ domodo kua nhetuo, Isaías aguehobyry aralâ aidyly.

*Jesus kieinwândy-ro watay, kieinwândyly kinmopa kine*  
(Lc 9.57-62)

<sup>18</sup> Alâ myani Jesus toenzepa kurâ domodo nhedyly, taynâ, tâynâ warâ kehoem. Tynynonro modo agâ kulelâ tidyse lâwâne myani. Aituo eyanmo aguely:

— Kydâzkuâne paru kuyam — kely.

<sup>19</sup> Egaselymo iraynâ kehoem olâ myani Moisés inweniby wâgâ enomedâni saindyly. Jesusram aguely:

— Pymâ, âynynonroem widyse urâ. Âdyam mydâhobyryram idâze lelâ urâ, agâ kâsenomedâdoem — kely myani.

<sup>20</sup> Jesus aguely:

— Ton-honre ise enra. Idânârâ ânguydo imeom tâjikune lelâ xykyhobe warâ; poroho, tawâguneim modo warâ tâjikune lelâ. Urâ, Uguondo Kaynâpa Âetyby olâ, iekobyzegue-hoenlâ tâtyemba — kely.

<sup>21</sup> Aituo eagonro uguondo koendâ kehoem Jesus aguely idanipyry aguely:

— Pymâ, saguhoem pabai ugueho wao ise kâenkyly, niguepa awyly ara. Igueduo, epyâbygueduo ise âynynonroem widyly — kely.

<sup>22</sup> Jesus olâ eyam aguely:

— Iweâ lelâlâ âekâ ynynonroem. Yeinwântâny modo igueypy ara kulâ, iazeontoem Deus aniempyra awylygue. Xirâ anano wâgâ kulâ âtynanâdylymo. Xirâ onro anano modo wâgâ âtynanâni modolâ igueypy nepyâdâ — kely myani.

*Jesus sapezenru ton-honreim, kopâ tyelugueim agonro nhepagunâdobypy*  
(Mc 4.35-41; Lc 8.22-25)

<sup>23</sup> Akaemo azagâ uguondo agâ agueypyem myani Jesus tynynonro modo agâ paruam idâly. Pepi odaxi âxiedyly, paru tienkuâdomoem. <sup>24</sup> Mârâ paru imâsedo tuotagueze ataymo kehoem myani kopâ sapezenru ton-honreim agonro adaguly. Ton-honre kehoem myani sapezenru paru nhahugânily. Parugue pepi adapadyly warâ. Jesus olâ myani xykyly lelâ. <sup>25</sup> Aituo eynynonro modo nhuagueândyly, adaenkelymo warâ:

— Pymâ, âwaguegâ! Aukâ! Kâmakegârâ. Kyiguely ise xirâ! Pepi xytyzeaji xirâ! — kelymo.

<sup>26</sup> Aituo myani tuagueântuo, Jesus eyanmo aguely:

— Tâseanezeba itaungâ. Imakezemo ton-honre wawyly mâinwâmpyra lâgâlâ ianumo — kely.

Aituo saudyly. Ton-honre kehoem aguely:

— Arâ kehoem tadapezeinzeba ikâ! — kely sapezenruram.

— Tahugâneba ikâ! Ipagugâ! — kely paru sahugânuram warâ.

Agueduo, tapezenremba idyly, paru tahugâneba idyly warâ. <sup>27</sup> Toenzepa myani âsewânilymo, âseguâdâdylymo warâ. Aituo aguelymo:

— Etaungâ! Sapezenru nadapezeimba itoem adyese. Paru tahugâneba itoem adyese warâ. Ânguy kuruka awâkâ eon-honru xudunri, awârâ modo anhetoem? — kelymo.

*Jesus azagâ uguondo kadopâgue taseim modo kua nhetobyry  
(Mc 5.1-20; Lc 8.26-39)*

<sup>28</sup> Jesus tynynonro modo agâ saindyly paru Galiléia kuyam, Gadararam\*. Târâ myani azagâ uguondo kadopâbeom modo agâ oxiodylymo. Tâdâzepyâdodâpa myani idâlymo, târâlâ âxidâdybyem tawylymogue. Kâmayno, tytazeim warâ myani akaemo. Mârâ âji einkâ sakani modoram tâdytaozemo mykâinane. <sup>29</sup> Jesus tientuo myani ago kehoem adaenkelymo:

— Xina kâdynanâdâ, Deus imery. Xina âsenagazedo naimpyralâka xina enagazeze mâewyly? — kelymo.

<sup>30</sup> Tâlâ myani târâ iwaguepa toenzepa pâsega âwinduani modo. <sup>31</sup> Aituo kadopâdo aguely Jesusram:

— Xina mânhânyduo, awâkâ pâsega modo iodaxilâ xina igonokâ — kelymo.

<sup>32</sup> Aituo Jesus aguely:

— Tâwâlâ, idâwâtaungâ — kely.

Agueduo, kadopâ modo akaemo uguondo modo odaypa egasewâdyly. Pâsega modo iodaxi egawândylymo. Kadopâbe tâituo myani pâsega modo enuimbadaynly. Egatudylymo. Iwy wâgâpa paikaji adamunedylymo. Idânârâ kehoem tyense, iguewâdyly.

<sup>33</sup> Pâsega eni modo iwy wâgâpa pâsega paikaji adamunedyly tâensemô myani. Mârâ aidyly tientuo, âwenkelymo. Inepa kehoem idâlymo xidadâram. Xidadâ odaxi taintuo tonlo modoram tientyby nhegatulymo. Tâgatuzemo lâpylâ myani Jesus kadopâ modo nhânyhobyry. <sup>34</sup> Arâ egary tindatuomo, idânârâ kehoem mâtâ xidadâ odano modo Jesus agâ oxioze idâlymo. Toxioduomo, aguelymo eyam:

— Âxiguegâ xina ety anaymba. Taynynâ inkâba ikâ — kelymo Jesusram, tâguy pâsega nhaindyseba tawylymogue.

## 9

*Jesus adakobâdâny kua nhetobyry  
(Mc 2.1-12; Lc 5.17-26)*

<sup>1</sup> Ilâpygueduo myani Jesus tynynonro modo agâ paruam idâly. Pepi imâsedo odaxi âxiedylymo, paru tienkuâdomoem. Âzekuâdybyem, tyjidadâry Cafarnaumram saindyly.

<sup>2</sup> Tonlo modo ewy uguondo adakobâdâny nhadylymo sawo wâgâ, Jesus kua nhetoem. Kua nhedyly tâinwânsemo awyly tiuntuduo myani Jesus aguely tâwâneinra:

— Ton-honre ikâ. Idânârâ inakanhe amitobyry modo xygakeagui — kely.

<sup>3</sup> Moisés inweniby wâgâ enomedâni modo Jesus aguely tindatuo, tâpaunzezemo myani.

— Koendâpa awâkâ Jesus aguely! Deus nhunâguedyly kulâ awâkâ! Deus agâ âzekiba tâidyse awyly kulâ! — kelymo.

<sup>4</sup> Tutuze olâ Jesus âdy nhangahumo oday xunârymo awyly-ro warâ. Aituo aguely:

— Arâ ywâgâ tâpaunzezeba itaungâ. Unâguedaundâ — kely. <sup>5</sup> — Merâ adakobâdânyam: “Idânârâ inakanhe amitobyry modo xygakeagui” uguely-ro watay, mâuntuwâbyra ise âmaemo âkealâ, âkealâba warâ auguely awyly. “Aukâ. Adakobâgâ” ugueduo, adakobâdyly-ro watay olâ xutuze âmaemo ton-honre wawyly! <sup>6</sup> Merâ koendâ adakobâdyly mâtenuomo, xutuze âmaemo, kurâ domodo inakanhe aito xygakeze ton-honre wawyly urâ Uguondo Kaynâpa Âetyby — kely Jesus.

Aituo adakobâdânyam aguely:

\* **8:28** Gerasa lâpylâ myani mâtâ âji ezekeho.

— Aukâ. Iguetudobyry sanâkâ; adakobâgâ; idâ itynra — kely.

<sup>7</sup> Aguely umelâ kehoem kua idyly. Saudyly. XYDYK idyly. Adakobâdyly. Tâtyram idâly. <sup>8</sup> Mâkâ aidyly tientuo kurâ domodo âsewânilymo, âseanedylymo warâ. Aituo myani aguelymo:

— Koendonro, ton-honreim warâ Deus, awâkâ uguondo tâwânuneim modo kua nhetoem eon-honru nhuduhobyry wâgâ! — kelymo.

### *Jesus Mateus tynynonroem itoem ingâsedobyry*

(Mc 2.13-17; Lc 5.27-32)

<sup>9</sup> Adakobâdânry kua tiempygueduo myani Jesus târâpa âxiguely. Tadakobâday myani Jesus iedyly, urâ Mateus. Pymâ Roma donro xurâem dinheru impostu epywadobyry emakerim urâ. Târâ dinheru kâenmakezedodâ ekadybyem wawyly ume ani Jesus yam aguely:

— Yagâ âekâ. Ynynonroem ikâ, yagâ mâsenomedâdoem — kely.

Aituo yaudyly. Jesus agâ udâly, eynynonroem witoem. <sup>10</sup> Kopae ietydâ âwinduatoem kâingâsedyly. Aituo Jesus ietyram idâly. Xina âwinduadyly ume, yataen-ho modo ewy saindylymo, impostu epywado emakewâni modo. Kurâ domodo saindylymo lâpylâ, inakanhe tâgaruneim modo. Xina agâ ekadylymo, tâwinduatomoem. <sup>11</sup> Fariseu domodo ewy Jesus xina agâ âwinduadyly tientuomo, Jesus eynynonro modoram aguelymo:

— Kâzewenry araba kulâ awâkâ âwymârymo Jesus aidyly! Dinheru impostu epywado emakewâni modo agâ, kurâdo inakai modo agâ warâ nâwinduapyra tâise awâkâ! — kelymo.

<sup>12</sup> Aguelymo tindatuo Jesus eyanmo aguely:

— Deus wâgâ auguehoem uirimpypyrlâ asaemo. Tâwânuneim modo mawânkâ kua tyeni xuirim, tâwânunenry modo keba. <sup>13</sup> Deus itaumbyry awo wâgâ iweniby mâuntuba lelâ kuruka âmaemo: “Ânguyo imeom xyâly, iaduândyly mâkeba ize kuru wato, kurâ domodo âjigue koendâ awyly” kewândy Deus. Koendâ âpaunzedaungâ, âdakeze aguely awyly mâuntuhomoem. Inakanhe aitaynrim modo igâseze kâewyly. Inakanhe aitânrý modo igâseze inkâba xirâ kâewyly — kely Jesus.

### *Saguho kiuntuyby kyjimonre, iwelo kiuntuhoem*

(Mc 2.18-22; Lc 5.33-39)

<sup>14</sup> Aituo João Batista eynynonro modo ewy saindylymo, Jesusram aguelymo:

— Xina João Batista eynynonro modo, fariseu domodo warâ xina nâwinduapyra tâise inanry, Deus agâ adâkehoem. Âynynonro modo olâ nâwinduapyra nipyramo, Deus agâ adâkehomoem. Âdaituoka xina aito ara anipyra awylymo kâzewenry agueho ara? — kelymo.

<sup>15</sup> Aituo Jesus eyanmo aguely:

— Eagâmo watay, nâwinduapyra nitaymbamo ise. Eagâmopa wituo olâ nâwinduapyra isemo, Deus agâ adâkehomoem. Todohogün-horam igâsedaymby modo ohogünrim agâ tatay, nâwinduapyra nitaymbamo, etygumo lelâ. Ohogünrim tuduaypa ituo lelâ nâwinduapyra idylymo myara — kely.

<sup>16</sup> Jesus aguely:

— Âtâbâ adauguehobyry tawentâzeba âtâ iwelo sapidubygue. Âtâ sawentâdobryy tukuiduo, odopâduo, tadaugueze mawânrâ âtâbâ. <sup>17</sup> Tâjituby vinhu etaryem xygatyby iwelo keba odaxi vinhu iwelo tâkanâduneba. Tâjituby iwelo keba odaxi ekanâduo, etary tadaugueze mawânrâ. Aituo vinhu apâdyly. Aypa olâ, vinhu iwelo etaryem tâjituby iwelo xygatyby odaxilâ ekanâdyly watay, vinhu nhewantuo, imâem ituo warâ, tâjituby iwelo tâzepâgueze. Etary, vinhu alelâ nâxiumebyra — kely Jesus.

{Jesus aguely, saguho konomedâdobryy kinmohoem, iwelo konomedâdo kieinwântoem warâ. Saguhobyry mawânrâ nâseinwâmbyra iwelo agâ.}

*Jesus pekodo tâwâneim kua nhetobyry, âwynsaundo igueypy kurâem nhetondobyry warâ (Mc 5.21-43; Lc 8.40-56)*

<sup>18</sup> Jesus eyanmo aguely ume myani uguondo âtâ tâdâtâdyguyho iwymâry Jesus iopaji saindyly; âzeguhoam idyly enado. Aguely:

— Inoro wao ietyam. Iexiryze nigueaki. Nhonwa imary MÂ' ieta wao, kurâem itondoem — kely.

<sup>19</sup> Aituo Jesus eagâ idâly. Xina Jesus eynynonro modo tâtâze lâpylâ ani eagâ.

<sup>20</sup> Pymâ etyram xina idâly ume, pekodo tâwâneim Jesus ikaynâ saindyly. Imery etary myani âunkeim; kuapa idyly agâ toenzepa myani iunu ihuguely, toenzepa lelâlâ. Doze anupe myani mâkâ arâ ewânu. Eyam taintuo, ety MÂ' nhedyly, ikaynâlâ. <sup>21</sup> Warâ tâpaunzeduo myani aidyly.

— Etylâ MÂ' kânhetuo, kua yese lelâ — tâkeduo.

<sup>22</sup> Tâtâ tywogonro MÂ' ietuo, Jesus MYRYK idyly. Pekodo nhedyly. Eyam aguely:

— Tyanepa ikâ. Kua ietybyem âmâ, kua kyettâ wawyly mânwântobyry wâgâ — kely. Aguely umelâ kehoem myani pekodo kua idyly lelâlâ.

<sup>23</sup> Ilâpygueduo ani xina idâly lelâ. Pymâ etyram xina saindyly. Saintybyem, âguedy tuhu esagueyby odaxi etadâdo eremu xina indadyly. Idânârâ ani tonlo modo eogunrumo, âpyneândylymo warâ, âwynsaundo igueypyem lelâlâ awylygue. <sup>24</sup> Aituo ani Jesus eyanmo aguely:

— Igasewâdaungâ wao. Niguerwâpyra awâkâ âwynsaundo; xykyly kulâ — kely.

{Arâ aguely, kurâem tientondly tiuntuduo.}

Arâ aguely tindatuomo, nheinledylymo. Igueypyem lelâlâ awyly tiuntuduomo, nâepaigueba awylygue. <sup>25</sup> Egasebygueduomo, Jesus idâly igueypy eguetunâdobryram. Egawântybyem Jesus âguedy emary wâgâ nhawâdyly. Ilâenlâ kehoem kurâem nhetondly, kama wâgâpa saudyly idyly. <sup>26</sup> Idânârâ âtâ anary iwaguepaom modo Jesus âwynsaundo kurâem nhetondobyry egary tydasemo myani.

*Jesus azagâ epy kua nhetobyry*

<sup>27</sup> Jesus agâ târâpa xina âxiguely ume, azagâ epy xina nhapygue idâly. Warâ adaenkelymo:

— Xina tytyenzelâ ikâ, Jesus. Pymâ ton-honreim âmâ, âdamu Davi ara! — kelymo.

<sup>28</sup> Jesus âtâ tâxidâdobryram saintuo azagâ epy modo eagâ egawândyly. Iopaji saindylymo. Jesusram adapâigueolymo:

— Tainwânselâ lelâlâka âmaemo, kua âenimoem wawyly? — kely.

— Tainwânselâ xina, Pymâ — kelymo.

<sup>29</sup> Aituo Jesus enumo onwa tâmary MÂ' nhedyly, kua tientomoem.

— Kua âedyly; tainwânselâ mawylymogue kua midylymo — kely.

<sup>30</sup> Aguely umelâ kehoem epyemba idylymo. Kua tiempygueduomo, Jesus eyanmo aguely:

— Awitobyry ânguyram kâzegatuwâdaundâne! — kely.

<sup>31</sup> Tâtâdaymo olâ mâkânra lelâba nhegatulymo Jesus kua tyetobyry.

*Jesus tytarenry kua nhetobyry*

<sup>32</sup> Azagâ epy kua ityby idâpygueduomo, kurâ domodo ewy uguondo tytarenry nhadylymo. Nâjitalimba mâkâ uguondo, kadopâram nâjitalimba âiehoybyem awylygue. <sup>33</sup> Jesus mâkâ iodano kadopâ egasehoem agueduo, uguondo koendâ âjitäinly adaguly. Idânârâ kurâ domodo âsewânllymo. Aituo aguelymo:

— Âdykâ Israeldâ uguondo kadopâbeom kua ieni xina netaymba, Jesus anheto ara! — kelymo.

<sup>34</sup> Fariseu domodo enanaji olâ Jesus aidyly Deus eon-honrugueba.

— Kadopâ modo iwymâry eon-honrugue kulâ awâkâ kadopâ modo nhegaseândyly — kelymo; kewâdylymo kulâ olâ.

### *Jesus kurâ domodo intyendobyry*

<sup>35</sup> Idânârâ âtâ anakâ ani Jesus adakobâdyly. Âtâ tâdâtâdyguyho odakâ kurâ domodo nhenomedâdyly. Unâ iwâkuru nhegatuly, âdara Deus idânârâ kurâ domodo iwymâryem idyly wâgâ. Âdaunlo tâzewanugue tâwâneim modo kua tyese lelâ ani. <sup>36</sup> Tadakobâdodâ Jesus toenzepa kurâ domodo nhedyly, kaikâem kulâ. Tientuo, toenzepa intyendylomo, âseguâdâdylymogue, itynrumogue warâ, kaneru todonenry ara kulâ awylymogue.

<sup>37-38</sup> Aituo xinaram aguely:

— Etaungâ kurâ domodo. Koendâ tâise Deus itaumbyry nhutulymo. Aguipa kulâ olâ egatuim modo. Deusram ekadaungâ, agui kurâ ingonotoem tywâgâ agueze. Urâem, asaemo kurâ domodo mârâ etâdyby sahuadyby tâkaunâzeim ara, ekaunâni modo olâ ipa myara — kely Jesus.

## 10

### *Jesus tynynonro modo eon-honru nhuduhabory*

(Mc 3.13-19; Lc 6.12-16)

<sup>1</sup> Aituo Jesus xina doze lelâ tinduakeyby modo indâtyguyly. Xinaram aguely:

— On-honrumo kâunduly, kadopâ mânhânyhomoeim, tâwânuneim modo kua mânhetomoem warâ — kely.

<sup>2-4</sup> Induakeyby modo ezedy xirâ, tywâgâ aguenriem:

Waunroeno Simão (Pedro kelygue tâzekeim)

André (Simão iukono)

Tiago, João warâ (Zebedeu imeombyry)

Filipe

Bartolomeu

Tomé

Mateus (Levigue tâzekeim lâpylâ urâ, saguhoem dinheru impostu epywado emakerimbyry)

Tiago (Alfeu imerybyry)

Tadeu

Simão (tâty anary izetonro lelâlâ tawylygue, Roma donrogue tywymâgu izepaom)

Judas (Queriote donro, Jesus egamenribyry izepaom modoran-ro warâ)

Warâ ani xina doze lelâ, Jesus induakeyby modo.

### *Jesus tynynonro modo Deus wâgâ unâ iwâkuru egatuze ingonotobyry*

(Mc 6.7-13; Lc 9.1-6)

<sup>5</sup> Deus xunâry egatuze ani xina âjigonoholy. Xina idâly iraynâ, Jesus aguely:

— Judeu keba modo ety anaxi tâtâzebane itaungâ. Samaria eynynonro modo ety anaxi tâtâzeba itaungâ warâ. <sup>6</sup> Kypemugudoram lelâ Deus itaumbyry egatuwâdaunda, Israelita modoram. Kaneru xuzatyby ara kulâ akaemo. <sup>7</sup> Warâ ise amyguelymo: “Inepa ise Deus kurâ domodo iwymâryem idyly” myguelymo. <sup>8</sup> Tâwâneim modo kua ietaungâ. Tâjimituguelygue tâwâneim modo kua ietaungâ. Igueypy modo kurâem ietondaungâ. Kurâ domodo kadopâbeom modo kua ietaungâ warâ. Awârâ modo amânhetomoem tâbyguepa on-honrumo kâunduly. Awylygue kadopâbeom modo, tâwânuneim modo warâ kua ietaungâ, tâbyguepalâ. <sup>9</sup> Mydâdaymo âdylâ manâtomoeim ouru, prata, dinheru, awârâ modo kadataundâ. <sup>10</sup> Owosarymo kadataundâ. Âgamizarymo, âhurumo etary warâ mâungukehomo kadataundâ. Amatagorumo ânwa oze mâzesebydâdomoeim kadataundâ lâpylâ warâ. Tâwaneim mawânkâ âdy ize tato tâmakeze lelâ tâzetoem. Awylygue idânârâ ize matomo ara âdydo imeom âduduze lelâ.

**11** — Âtâ anaxi aintuomo, âdaunlo uguondo koendonro awyly etaungâ, târâ eagâlâ mitomoem. Mâkâ etydâlâ itaungâ, eagonro âtâ anaryam mydâlymo ara. **12** Âdaunlolâ âtâ odaji igawândylymo watay, tonlo modo agâ âsedaenguwâdaungâ. “Deus koendâ nhese” kewâtaungâ eyanmo. **13** Tonlo âtâ odano modo koendâ idaenkulymo, mâengatulymo tindadysemo warâ watay, koendâ ise Deus akaemo agâ awyly. Koendâ idaenkubamo, unâ mâengatulymo tindadysebamo warâ watay olâ Deus eagâmo koendâ itoem kâzekadaundâ.

**14** — Mârâ âtâ odano modo, xidadâ odano modo koendâ idaenkubamo, mâengatulymo tindadysebamo warâ watay, inepa târâpa âxiguewâdaungâ. Igasedaymo, âhurumo etary etywâdaungâ, xutoleguguewâdaungâ warâ, Deusram tânagazezeim awylymo xutuhuem, ize ato ara anipyra awylymogue, yeinwâmpyra awylymogue warâ. **15** Sodoma donro modo, Gomorra donro modo warâ myakâwândy ânguydo kulâ. Awylygue myakâwândy Deus peto in-hugueândyly nhonwamo adain-homoem. Xypyryem, idânârâ tynynâbanro modo enagazeze. Deus itaumbypy māengatulymo izepanro modo olâ ise Sodoma donro modo, Gomorra donro modo warâ âsenagazedobypy takaze kehoem kuru âsenagazezeni. Xirâ māuntudyzemo kuru wato – kely.

*Jesus tâdâsenagazedyly wâgâaguehobyry*

(Mc 13.9-13; Lc 21.12-19)

**16** Jesus aguely:

— Ydataungâ. Deus xunâry egatuze ogonodylymo kâmayno modo duaxi, auwa tâwinzeim modo duaxi kaneru igonodyly ara. Âgâu ara, tonomegue itaungâ, kâmaynodâpa tâdâsemaguely māuntuhomoem. Koendâ olâ itaungâ, papa ara, âdanimo mânhewiâpanânehomba mitomoem. **17** Tonomeguelâ itaungâ. Yizepaom modo awâsemo, yeinwândylymogue. Adahoze âmaemo pymâ modo enadoram, mâzenagazeohomoem. Apiogüen-honzemo âtâ tâdâtâdyguyho oday. **18** Yeinwândylymogue, idânârâ pymâ domodoram adahoze âmaemo. “Tumunreim âmaemo” keze akaemo pymâdo, inagazedomoem. Pymâ domodo enado mataymo tâwâlâ ise unâ iwâkuru māengatulymo âdara imakehomobyry wâgâ judeu domodo iwymâryam, judeu keba modo iwymâryam warâ. **19** Amyguehomo wâgâ tadahulizeba olâ itaungâ, pymâ domodo enadoram madahoduomo. Deus agâmolâ ise. Âurusemo amyguehomoem. **20** Âunârymo wâgâ kulâ inkâba ise amyguelymo, Deus Ispiritury xunâry wâgâ.

**21** — Ipemugudomoanlâ ise yeinwânni modo âzenagazeoly. Ipemugumolâ ise pymâdoram egamenrimo, âdyohomoem. Âjiukonoem, âjiwaigoruem warâlâ ise âsegamelymo. Tâjiunwym, tymery agâlâ ise âsegamelymo lâpylâ, âdyohomoem. **22** Ynynonroem mawylymogue, toenzepa ise mâyjiewiâseolymo. Âmaemo yeinwândyly imodâny modo olâ âsemagueze, aunloenlâ Deus agâ mitomoem. **23** Mârâ xidadâ eydâ matomodâ ynynonroem mawylymogue mâzenagazeoduomo, eagonro âtâ anaxi âwientaungâ, târâ ywâgâ amyguehomoem. Auguely âyanmo. Urâ Uguondo Kaynâpa Âetyby odopâze urâ, idânârâ Israel eynynâ âtâ anakâ ywâgâ amyguelymo iraynâ.

**24** — Enomedâni mawânkâ tonomedâzeim takazeno. Pymâ mawânkâ tâwaneim takazeno. **25** Tonomedâni eto ara lâpylâ ise âsenomedâni âzecholy. Âwanu sodo ara lâpylâ tâwaneim âzecholy. Ayetomo ara lâpylâ ise amâieholymo. Inakanhe aguezemo ywâgâ. Belzebu eon-honrugue kulâ iewanu nhegaedylymo. Âunâguezemo lâpylâ; inakanhe aguezemo âwâgâmo – kely Jesus.

(Belzebu, Satanás ezedy eagonro).

*Deus lelâ kydynrene*  
(Lc 12.2-7)

**26** Aituo Jesus aguely:

— Ânguy kâdytadaundâ, ywâgâ inagazedylymogue kulâ. Idânârâ soentaymby âjiepanâgueowâze lelâ. Idânârâ koendâ tydasenrybyry MON warâ âjidahoze. <sup>27</sup> Âyanmo kulelâ auguehobyry idânârâ kurâ domodoram egatuwâdaungâ. Âmaemo kulelâ māindatybymogue kurâ domodo xurutaungâ.

<sup>28</sup> — Ârinmo kâdytadaundâ; igadopyrmo âdaunloenlâ adaindânry tyân-hoem ton-honremba mawânkâ. Tâwâlâ lelâlâ wâne inagazedylymo. Ton-honremba olâ Satanás eydâ tatoram ogonosemo. Deus anhekyly xytadaungâ. Awâkâ kulelâ mawânkâ âigueduomo, Satanás eydâ atoram ogonosemo ton-honreim. <sup>29</sup> Idânârâ tâense awâkâ Deus. Etaungâ konopio. Imâem tâwâentuneba konopio. Tokalâ moeda imeimbyry tâwâensenrygue azagâ konopio tadanâhoze. Onro onwa igueypyem nihuguebamo olâ Deus aguehobyry odayba kulâ. <sup>30</sup> Nhetâmo lâpylâ Deus. Â dara lelâ angahumo wâgâ angahudumo awyly tutuze. <sup>31</sup> Awylygue tâseguâdâzeba itaungâ. Deus konopio tâense watay, âmaemoma kuru nhesemo lâpylâ. Xurâem, âmaemo tywyneim kuru, konopio modo takaze – kely Jesus.

### *“Jesus eynynonro urâ” keze tyanenry modo*

(Lc 12.8-9)

<sup>32</sup> Jesus aguely:

— Tâjidiuay, “Jesus eynynonro urâ” myguelymo-ro watay, “Ynynonrolâ asaemo” keze lâpylâ urâ Pabai kaynonroam, enado mawylymo ume. <sup>33</sup> Tâjidiuay, “Jesus eynynonro keba urâ” myguelymo-ro watay olâ, Pabai kaynonroam, “Ynynonro mâkeba asaemo” keze lâpylâ urâ, enado mawylymo ume – kely Jesus.

### *Jesus wâgâ âewiâmunezemo tagonro agâ*

(Lc 12.51-53; 14.26-27)

<sup>34</sup> Jesus aguely:

— Kâetuo, inakanhe tadalafil, tâdâseguebyly warâ adainly keanra keankâ, inanajimo. Arâpa olâ. Espada iemaym kâenewly waunlo ara urâ. Ynynonro kebaom modo ynynonro modo agâ âseguebyzemo. <sup>35</sup> Yeinwândylymogue, âpemugudomolâ ise âewiâsenimo. Tâjimeom tunwym iewiâseze. Tâzexiry tyze iewiâseze. Tâjiweise tymenhundu iewiâseze. <sup>36</sup> Warâ ise âpemugudomolâ âewiâsedylymo, âkelomo agâmo iewiâky takaze kehoem yeinwândylymogue.

<sup>37</sup> — Ynynonroem midyse mataymo, unwânmoo, âzemo, âmerymo, ixirymo warâ takaze kehoem ywynedaungâ. Yakadâ âdaunlo kurâdo kulâ mânwyneguylomo-ro watay, ynynonroemba ise âutulymo. <sup>38</sup> Ynynonroem lelâlâ midyse mataymo, ize matomo ara kulâ amidylymo imowâdaungâ. Mâsenagazedylymo umelâ auguely idataungâ, yeinwântaungâ warâ, âiguehomo odaji kehoem, kruz manâdylymo-ro waunlo ara. Arâparo watay, ynynonroemba ise mataunaze. <sup>39</sup> Tyâzepa mitomoem kulâ, “Jesus eynynonro keba urâ” myguelymo watay, Deus eydâ atoram mydâpa ise âmaemo. “Âdykâ ‘Jesus eynynonro mâkeba urâ’ uguewâpyra ise urâ, tâwâlâ ise kâdyoly” myguelymo watay, Deus eydâ atoram idâze âmaemo, aunloenlâ eagâ mitomoem – kely Jesus.

### *Koendonro modo Deus xuduze tynynonro modoram*

(Mc 9.41)

<sup>40</sup> Jesus aguely:

— Koendâ nhenimo, koendâ iedyly lâpylâ. Koendâ ieni, ugononibyry Deuslâ koendâ nhekyly. <sup>41</sup> Koendonro xuduze Deus tunâry egatuwâni modoram. Koendonro xuduze lâpylâ olâ tunâry egatuwâni modo emawyadâni modoram. Koendonro xuduze Deus, koendâ aitaynrim modoram. Xirâ koendonro lâpylâ xuduze Deus, koendâ aitaynrim modo emawyadâni modoram, koendâ aidylymogue.

<sup>42</sup> — Âdylâ amânhekyly ynynonro modo emawyadâdoen-ro watay, tâwâlâ wâne parugue kulâ mankuilymo, alâ olâ ise Deusram mâzepywaolymo. Tâwâlâ lelâlâ wâne ynynonro modo âdy keba awyly, alâ olâ Deusram âzeholymo. Xirâ mâuntudyzemo kuru wato — kely.

## 11

*João Batista tynynonro modo Jesus agâagueze ingonotobyry  
(Lc 7.18-35)*

<sup>1</sup> Jesus xina doze lelâ tinduakeyby modo xurudyly ewanikeimbyryem, târâpa idâly, xidadâ modo anakâ Deus wâgâ unâ iwâkuru egatuze.

<sup>2</sup> Kadeia oday myani João Batista, Jesus Cristo egary indadyly. Egary tindatuo, azagâ tynynonro modo ewy ingtonodyly Jesusram. <sup>3</sup> Jesusram taintuo, aguely indadylymo aidyly nhedylymo warâ. João aguehobypy ara Jesus nhapâiguelymo:

— “Deus Ingontobyby âese” kehobyrlyâ âmâ? Eagonro ise xina inwânwânyly? — kelymo.

<sup>4</sup> Aituo Jesus in-hoguly:

— Odopâdaungâ. Mâentybymo, mâindatybymo warâ Joâoram egatuwâdaunda.

<sup>5</sup> “Jesus tâwâneim modo kua nhedyly xina nedâ. Epybyry modo koendâ tâense. Adakobâdânrybyry modo tadakobâzemo iwerâ. Tâjimituguelgygue tâwânuineimbyry modo itugoenzeybyem. Kydatânrybyry modo koendâ tydasemo. Iguewâtyby modo kurâem tyetonze. Kaikâ modoram Deus xunâry iwâkuru Jesus nhegatuly xina nidadâ lâpylâ.

<sup>6</sup> ‘Tuomareim ise yeinwândyly imodânry modo!’ nygue Jesus” myguelymo ise Joâoram — kely Jesus.

<sup>7</sup> Aituo João eynynonro modo azakâlâ odopâdylymo. Idâpygueduomo Jesus aguely João wâgâ kurâ domodoram:

— Agui âmaemo ewy tâtâze âji âdy peba atoram, João aguely idase. Âdaunloka mâkâ, inanajimo? Etaungâ adapezeinly-ro watay, poji wayam wayam warâ tâzekânize. Myara keankâ João, inanajimo? Âdy pebaom modoram âkelo unâ nhegatuly, âdypeom modoram âkelo unâ nhegatuly warâ keankâ aguely, inanajimo? Ainkâba, tokalelâ mâkâ xunâry. Âdypebaom agâ, âdypeom agâ alelâ mâkâ Deus wâgâ aguely. <sup>8</sup> Medâmolâ ety iwogonro iwâkuru keba awyly. Âdypeom xidadâ odano, âtâ imâsedo iwâkurugue tâtyreim warâ mawânkâ âtâ tâjiwogonro tâwâneim ieni. Âdypeom mâkeba mâkâ.

<sup>9</sup> — Âdaunlo kuruka mâkâ, âmaemoem? Deus itaumbyry egatuim? Mâkâlâ mâkâ Deus itaumbyry egaturinlâ. Warâ olâ auguely âyanmo. Deus itaumbyry egatuim âdaunlo kulâ mâkeba mâkâ. Idânârâ Deus itaumbyry egatuim modo takaze tynreim mâkâ. <sup>10</sup> Warâ iwenibyem awyly Deus itaumbyry awo wâgâ: “Anra unâry egatuim. Waunroenlâ ise merâ kâingonodyly, kurâ domodo nhonse Messias saintodâ” kewândy Deus. Kurâ domodo yaintodâ nhoniem kehobypy mâkâ João. <sup>11</sup> Uguondo âdaunlo kulâ mâkeba mâkâ João. Tynreim mâkâ, idânârâ saguhoem Deus itaumbyry egatuwâni modo takaze. Mâkâlâ keankâ “Inepa ise Deus Ingontobyby âewyly” keim. Âdara Deus kurâ domodo iwymâryem idyly awyly koendâ nutuba olâ mâkâ. Iwerâ Deus Ingontobybygue twymâgueim watay, mâkâ takaze ise xynru. Tâwâlâ lelâlâ wâne âdaunlo kulâ awyly. Xirâ mâuntudyzemo kuru wato.

<sup>12</sup> — João Deus wâgâ unâ egatuly nhagupygueduolâ keankâ kurâ domodo Deus twymâryem izetonro modo âzenagazeoly Deus eynynonro keba modoram. Inakai modoram adainhoze kelymo, Deusgue iwymâgumogue. <sup>13-14</sup> Saguhoem Moisés iweniwândymy âdara Deus pymâem idyly awyly wâgâ. Deus eynynâ aguewâni modo iweniwânmô lâpylâmy warâ. “Elias emyenro sainse, Deus itaumbyry egatuim, Deus Ingontobyby saindyly iraynâ” kelymo. Aguehomobyrylâ mawânkâ mâkâ João. Aguely

mâinwâmpyra olâ keankâ âmaemo. <sup>15</sup> Augueho mâuntudyze âmaemo watay, koendâ idataungâ.

<sup>16</sup> — Âdaunloem mawylymo wâgâ agueze urâ, âmaemo xirâ umeno modo. Iamimeom tagonrodo taseray âzenanâdoge tâzenanâdyzebaom ara kulâ âmaemo. <sup>17</sup> Tataen-hodo tugoru indyduo, tâidysebamo. Tataen-hodo itynru ume, tytyrembamo. <sup>18</sup> Âdiempa kulâ João Batista âwinduadyly, vinhu nenypa. Warâ awylygue, “Kadopâbeom awâkâ” myguelymo. Urâ Uguondo Kaynâpa Âetyby kâwinduadylygue, kadakuilygue warâ, “Idolai awâkâ. Nhuduypymo tâinze, tânyze alelâ. Impostu epywado emakewâni modo, kurâdo inakai modo eataen-ho warâ awâkâ” myguelymo. <sup>19</sup> Aguitobyry, aguykehobypy warâ wâgâlâ Deus nhutuly xurâem, xurâempa warâ kydâzeholy — kely Jesus.

### *Jesus einwântânry modo âsenagazedo*

(Lc 10.13-15)

<sup>20</sup> Xidadâ Corazimdâ, Betsaidadâ, Cafarnaumdâ warâ Jesus Deus eon-honrugue toenzepa adyesenry modo aiemâ. Tâenselâ wâne akaemo Jesus aidyly; alâ olâ neinwâmpyra awylymo. Inakanhe adâidylmogue nâjityembyramo lâgâlâ. Adâidylly timodyzebamo. Aituo Jesus ton-honre kehoem iwâgâmo aguely adaguly:

<sup>21</sup> — Warâ auguedyse wawyly unâry izepaom modoram. Toenzepa kehoem ise mâsenagazedylymo, âmaemo Corazim donro modo, Betsaida donro modo warâ. Toenzepa adyesenry modo kehoem ajiedâ âjidâdârymodâ, Deus eon-honru kâenehohoem. Yeinwândyseba olâ mataunaguynre. Tumunruneim modo akâwândy Tiro, Sidom warâ donro modo. Deus eon-honru enehonze âjidâdârymodâ awitobyry ara ânguylâ aidyly-ro watay, inakanhe adâidylly tumozemo tâise, Deus tâinwânsimo warâ. Tâzetydâzemo tâise âtâem saku tyxieim sakâjibygue, pelupâ tyangahumo onwa tyesemo tâise warâ, inakanhe adâitomobyry wâgâ tâjityendyly tienehon-homoem, imoimbyryem tawyly tienehon-homoem warâ. Deus eon-honrugue awidylly tâense lelâlâ wâne âmaemo. Inakanhe amidyllymo mâinmopa olâ âmaemo.

<sup>22</sup> — Corazim donro modo, Betsaida donro modo warâ, tâdâsenagazedo saintuo, âmaemo ynynâbaom modo toenzepa ise mâsenagazedylymo, Tiro, Sidom warâ donro modo âsenagazedo takaze kehoem. Xirâ mâuntudyzemo kuru wato. Medâmolâ Deus eon-honrugue awidylly. Akaemo olâ nepyra.

<sup>23</sup> — Âmaemo Cafarnaum donro modo koendonro, tynreim warâ âmaemo, inanajimo. Deus eydâ atoram mydâlymo warâ wâne, inanajimo. Arâpa olâ. Satanás eydâ atoram ise mâjigonoholymo. Inakai kehoem akâwândy Sodoma donro modo. Deus eon-honru enehonze Cafarnaumdâ awitobyry nhedylymo-ro watay, inakanhe adâidylly tumozemo tâise, Deus tâinwânsimo warâ. Ijidâdârymo tainzepa tâise. Deus eon-honrugue awidylly tâense lelâlâ wâne âmaemo. Inakanhe amidyllymo mâinmopa olâ âmaemo. <sup>24</sup> Cafarnaum donro modo, xypyry etay, tâdâsenagazedo saintuo, âmaemo ynynâbaom modo toenzepa ise mâsenagazedylymo, Sodoma donro modo âsenagazedo takaze kehoem. Xirâ mâuntudyzemo kuru wato. Tâenselâ âmaemo Deus eon-honrugue awidylly. Akaemo olâ nepyra — kely Jesus.

### *Âmaemo mâsemaguedyzedo modo Jesusram âetaungâ*

(Lc 10.21-22)

<sup>25</sup> Ilâpyryem Jesus aguely Deusram:

— Kau odano modo, onro wogonro modo warâ sodo âmâ, Pabai! Âdaunlo modoanlâ âunârybyry mutuen-ho, tonomegueim modoram lelâ inkâba, enomedâdaymby modoram lelâ inkâba warâ. <sup>26</sup> Amânhedyse mato aralâ ise aidyly — kely.

<sup>27</sup> Deus agâ adâkebygueduo, Jesus agueondyly tonlo modo agâ:

— Pabai idânârâ won-honru, ienomery warâ xuduim. Mâkâ kulelâ koendâ kuru utunri. Urâ lelâ lâpylâ Pabai Deus koendâ kuru xuturim warâ. Eyam kâuntuen-hoymby lâpylâ olâ koendâ Deus xutuze.

<sup>28</sup> — Mâkâ tâmânreingue tyekeim wâne ekozely, myara ekozeybyem mawylymo. Yeinwântaungâ, ikuâdânim, ahulirinmo warâ kâentyhoem. Âkarymo wogonro tâmânreingue âekelymo waunlo ara ise, ikobyzeguelymo. <sup>29</sup> Ynynonroem itaungâ. Âsenomedâdaungâ ywâgâ. Ikobyzeguehomo ese âmaemo. Koendonro urâ, tyewiâseim mâkeba. Imakerinmoem ise urâ. <sup>30</sup> Kâenomedâdo ara amitomoem ton-honruneba, agâmolâma ise urâ, on-hondâzemolâ. Tâmânreim sanâni emawyadâni emyenro urâ — kely Jesus.

## 12

### *Jesus eynynonro modo tâzekobyzegueho oday trigu ewily nhasewâdomobyry (Mc 2.23-28; Lc 6.1-5)*

<sup>1</sup> Tâzekobyzegueho oday ani Jesus agâ xina trigu ejidy ezakâ sakadyly. Toenzepa ani xina ewindy. Sahuadybyem ani trigu ewily. Awylygue xina nhasewâdyly, tâmarygue xina nhatuguely, xina nhaguly warâ. <sup>2</sup> Fariseu domodo ewy xina aidyly tientuo ani Jesusram aguelymo:

— Egâ âynynonro modo aidyly! Trigu ewily nhasewâdylymo, nhatuguelymo warâ. Tutuzelâ âmâ, kâzwenry eynynâ kokobyzegueho oday kydâsewaniba kydawly — kelymo.

<sup>3</sup> Aituo Jesus aguely:

— Enanâguewâdaungâ typynigueba tâituomo, kydamu Davi, eagonro modo warâ aitomobyry, toenzepa tâwindymogue. <sup>4</sup> Deus ety odaji myakâwândy Davi egawândyly. Târâ myakâwândy Deusram xuduypy pão modo nhanâdyly, nhedawynlymo tagonrodo agâ. Kâzwenry eynynâ olâ tâise akaemo pão nedawympa. Kurâdo eynynâ Deus agâ aguewâni modo lelâ tâise mâtâ pão edawynrim, âkelo modo lâpylâ warâpa. Deus xurâem olâ myakâwândy akaemo inakanhe aidyly keba. <sup>5</sup> Kurâdo eynynâ Deus agâ aguewâni modo kokobyzegueho oday âsewaniduo, inakanhe aidylymo mâkeba lâpylâ.

<sup>6</sup> — Deus ety takaze mâynrenkylymope tarâ âduaymo awyly olâ mâuntudyzemo kuru wato.

<sup>7</sup> Warâ Deus aguehobyry iwenibyem awyly: “Ânguydo imeom xyâly, iaduândyly mâkeba ize wato kuru, kurâ domodo âjigue koendâ awyly” kewândy Deus. Xirâ mâuntuba olâ âmaemo. Âdakeze xirâ aguely awyly mâuntulymo watay, ynynonro modo âdaituoba kulâ mâenwentâdaymba tâise âmaemo. <sup>8</sup> Uguondo Kaynâpa Âetyby urâ. Âdy iwâkuru adyeseim, adyesenry warâ tâzekobyzegueho oday xuturim urâ — kely Jesus.

### *Jesus uguondo âzemapiluguedânrý kua nhetobyry (Mc 3.1-6; Lc 6.6-11)*

<sup>9</sup> Târâpa âxiguebyem Jesus idâly âtâ tâdâtâdyguyhoram. <sup>10</sup> Uguondo âzemapiluguedânrýbe ani târâ. Tâlâ pylâ ani kurâdo ewy Jesus izepaom modo. Jesus tiunâguedomoem kulâ aidyly enuagaeni modo. Xunâzelymo:

— Tâzekobyzegueho oday Jesus, awâkâ uguondo emary kua nhedyly watay, Moisés inweniby araba aidyly awyly aguykenre. “Deus aiedyseba ato amientai” kykenre — kelymo.

<sup>11</sup> Aituo Jesus in-hoguly:

— Tâzekobyzegueho oday iguymo kaneru tâtagueim odaxi ihuguely-ro watay, kopaelâgâem mânhenehonwâbyra âmaemo, mâentyhomoe. Kydâsewanaho keba awyly umelâ, tâzekobyzegueho oday iguymo tâtyze âmaemo. <sup>12</sup> Kaneru takaze kywynu! Awylygue, tâzekobyzegueho oday koendonro aguiendyly watay, Deus ize atolâ aguienkylly — kely Jesus.

<sup>13</sup> Aituo Jesus uguondo âzemapiluguedânrýram aguely:

— Âzemapiluguegâ — kely.

Jesus agueduo, uguondo âzemapiluguely, emary kua ienipyryem awylygue. Koendâ idyly; emaduno ara idyly.

<sup>14</sup> Fariseu domodo olâ târâpa egaselymo, Jesus tyâen-hon-hoem tâtunâguedomoem.

### *Saguhoenlâ Isaías Jesus wâgâ aguehobyry*

<sup>15</sup> Tyâly kelymo tiuntuduo ani Jesus târâpa âxiguely. Toenzepa ani kurâ domodo nhapygue idâlymo. Akaemo duano tâwânuneim modo idânârâ kua nhetaynly. <sup>16</sup> Aituo ani eyanmo aguely:

— Ânguyran-ne awitobyry kâzegatuwâdaundâ — kely.

<sup>17</sup> Saguhoem iweniwânlâmy Isaías Deus Ingonyby arâ aidyly wâgâ. Deus aguehobyry aralâ kehoem Jesus wâgâ aidyly.

<sup>18</sup> “Etaungâ! Anra merâ iemary kâinduakeyby.

Toenzepa kâinwyneguyl merâ, toenzepa womazeâni warâ.

Yispiritury nhonwa iese urâ.

Judeu domodoram, judeu keba modoram alelâ ise unâry koendonro nhegatuly.

<sup>19</sup> Kurâ domodoram tyewiâse aguepa ise, nadaenkeba ise warâ.

Arua oze nâseubyra ise.

<sup>20</sup> Toenzepa ise kytyendyly.

Awylygue ise kurâ domodo âdiempa tâinwânni modo koendâ lelâ nhedyly.

Peto nhâseajiom wâne tyânlânehonzeba myara ise

âdiempa tâinwânni nitywanânehomba awyly.

Inakai modo adain-ho odaxi alâ ise aisezedlyly.

Kurâ domodo inakanhe tâentuneim modo koendâ lelâ nhedyly,

se iwetary âdukagâdyby saseudyly wâne myara.

<sup>21</sup> Einwânse akaemo idânârâ, tâmakehomoem’ kely Deus,”

itaumbyry Isaías iweniby.

### *“Satanás eon-honru kainly lakuru Deus eon-honrugue” Jesus kehobyry*

(Mc 3.20-30; Lc 11.14-23)

<sup>22</sup> Ilâpygueduo ani Jesusram uguondo nhadylymo, tytaremba, kâempyra warâ âiehoyby kadopâram. Jesus mâkâ kua nhedyly. Kadopâ egaseduo uguondo koendâ âjitainly idyly, epyemba idyly warâ. <sup>23</sup> Awârâ tientuo, tonlo modo toenzepa âsewânilymo. Âjigue aguelymo:

— Davi kydamudo iwymâryem awyly myakâwândy myara keanra ise Jesus kywymâryem awyly — kelymo.

<sup>24</sup> Awârâ tindatuo fariseu domodo aguely:

— Kadopâ modo iwymâry Belzebu\* eon-honrugue kulâ awâkâ kadopâ modo nhânyly — kelymo; kewâdylymo kulâ olâ.

<sup>25</sup> Âdara xunâgumo awyly tutuze myani Jesus. Aituo aguely:

— Âjigue âzety anano modo âseguebyly-ro watay, mâtâ âtâ anary tadainze. Âjiukonoem, âjiwaigoruem warâ âjigue âseguebyly-ro watay, tunwyndo sodokewâzemo. Koendâ nâzepyramo, âjidueryem tâisemo mawânkâ. <sup>26</sup> Kadopâ modo iwymâry mawânkâ Satanás. Kadopâ modo âjigue âseguebylymo, tygue tygue idylymo warâ watay, ton-honremba tâise Satanás. <sup>27</sup> “Jesus kadopâ nhânyly olâ, Belzebu mawânkâ aitoem eon-honru xudunri” tâkeze âmaemo. “Belzebu eon-honrugue kulâ kadopâ mânhânylymo” myguepa olâ âmaemo âynynonromoam. Arâ âynynonromoram amyguepa âmaemo-ro watay, arâ yam adâkezeba lâpylâ itaungâ. <sup>28</sup> Deus eon-honruguelâ kadopâ modo kânhânyly. Won-honru tiundulygue, tutuen-honze mâkâ, tarâ pymâem wawyly — kely Jesus.

\* <sup>12:24</sup> Satanás ezedy eagonro awârâ “Belzebu.”

**29** — Uguondo ton-honreim ety odaji ânguy negawântaymba, emagaduze, tâkâjizeba mâkâ watay. Ekâjiduo lelâ ise jiguy emagazedyly. Satanás eon-honrugue aini mâkeba urâ, eon-honru sainrim lâkuru — kely.

**30** — Ynynâba âmaemo-ro watay, ynynonroem inkâba âmaemo. Kurâ domodo Deus nheinwântoem iemawyadâbyra âmaemo watay, neinwâmpyra itomoem amânhenehonlymo lakuru. Ydâ iwague mânhenehonlymo; mâindâtyguylymo tâise koendonro kuru — kely Jesus.

**31** — Deus izepa ato amânhedylymo, amygueylymo, mâunâguedylymo warâ watay, idânârâ awârâ modo xygakeze Deus, mâenkadylymo-ro watay. Deus Ispiritury ewanu wâgâ inakanhe kulâ amyguehomobyry olâ ise Deus nygakeba. **32** Urâ Uguondo Kaynâpa Âetyby wâgâ inakanhe amygueylymo-ro watay, idânârâ yam inakanhe amyguehomobyry xygakeze Deus, Deusram mâenkadylymo nhygakehoem watay. Deus Ispiritury ewanu wâgâ inakanhe kulâ amyguehomobyry olâ ise Deus nygakeba. Xirâ mawânrâ mâuntudyzemo kuru wato — kely Jesus.

### *Ewily wâgâlâ nadî âdaunlo awyly xutuly*

(Lc 6.43-45)

**33** Jesus aguely:

— Se takyguenry koendâ lelâ ewisely; kiein-hoem tuduze. Se takygueim inakanhe kulâ ewisely; kiein-hoem nudupa. Ewily wâgâlâ se âdaunlo awyly xutuly, koendonro, inakai warâ awyly — kely Jesus.

{Koendâ aguidyly, aguykely wâgâlâ koendonro kydawyly âdutuoly. Inakanhe aguidyly, aguykely warâ wâgâlâ inakai kydawyly âdutuoly. Warâ Jesus konomedâze aguely.}

**34** Jesus aguely:

— Âgâu ara kâmayno kulâ myaze âmaemo! Awylygue koendonro modo wâgâ amyguepa mawylymo. Kyangahu odanolâ mawânrâ aguykeho. **35** Âdylâ ekanâdo oday koendonro ekanâdyby watay, koendonrolâ tâtyzeim. Inakai ekanâdyby watay, inakailâ lâpylâ tâtyzeim. Arâ lâpylâ kunâry kyangahu oday kydâpaunzedo kienkanâdyby. Koendonro watay, koendonrolâ aguykeho. Inakai watay, inakailâ aguykeho warâ.

**36** — Xypyry etay, Deus enadoram mâepanâgueduomo, inakanhe amyguehomobyry ara ise mâkâ idânârâ inagazedylymo. Xirâ mawânrâ mâuntudyzemo kuru wato.

**37** Âunârymo wâgâlâ âdaunlo mawylymo tutuen-honze âmaemo. Âunârymo wâgâlâ ise Deus tâwentâzeinhe, tâwentâzein-emba warâ mawylymo nhutuly — kely Jesus.

### *"Adyesenry aiekâ" kehomobyry Jesusram*

(Mc 8.11-12; Lc 11.29-32)

**38** Ilâpygueduo Moisés inweniby wâgâ enomedâni modo, fariseu domodo warâ Jesus iopaji idâlymo, aguelymo:

— Âdylâ adyesenry amânhedyly tiendyse xina, Deuslâ ogononi, on-honru xuduim warâ awyly xina nhutuhoem — kelymo.

**39** Aituo Jesus eyanmo aguely:

— Iumunrumi âmaemo xirâ umeno modo! Deus tumoze âmaemo, pekodo tuso inmoho ara. “Adyesenry aiekâ, Deus Ingonytyby mawyly xina tiuntuhoem” tâkeze âmaemo. Deus itaumbypyry egatuimbyry Jonas aitobyry enanâguewâdaungâ. **40** Kanra

imâsedoram xuoympyem, azagâ<sup>†</sup> emedyly idyly ara myakâwândy mâtâ ioday awyly, Niguepa olâ myakâwândy; kanra imâsedo âjitaguiquely ara. Alâpylâ ise, yigueduo, ieguepybyry etadâdybyem awyly. Azagâ emedyly idyly wâgâ olâ ise kurâem witondly. Mâenanâgueduomo ise, Deus Ingonytybylâ wawyly, mäuntulymo. <sup>41</sup> Kanra adyry odanopyryem myakâwândy Jonas idâly Niniveram, Deus itaumbryy egatuze. Jonas aguely tindatuomo myakâwândy, mâtâ xidadâ odano modo Deus nheinwândlymo. Âjityendylymo inakanhe tawyly inmolymo warâ. Akaemo emyenro keba olâ âmaemo. Urâ, Jonas takaze won-honru. Auguely mäindadysebamo, mânwândysebamo warâ olâ âmaemo. Awylygue ise xypyry etay, Deus enadoram mäepanâgueduomo, warâ ise Nínive donro modo Deusram aguelymo: “Tâwâlâ akaemo kurâ domodo Jesus aidyly, aguely warâ einwântânybyry modo nâsenagazedâmo” kezemo.

<sup>42</sup> — Enanâguewâdaungâ mâtâ pekodo Sabâdâ pymâpyry. Taypa myakâwândy mâtâ idâly, eagonro anaymba, Salomão enomery idase. Ienomery olâ Salomão enomery takaze kehoem. Tarâ âduaymo lelâlâ wâne urâ, arâlâ olâ inomedâdomo mäindadyseba, mäuntudyzeba warâ mawylymo. Awylygue ise xypyry etay Deus enadoram mäepanâgueduomo, warâ ise mâtâ pekodo pymâ aguely Deusram: “Tâwâlâ akaemo kurâ domodo Jesus tonomedâdyly tindadysebamo atomobyry ara nâsenagazedâmo” keze — kely Jesus fariseu domodoram, Moisés inweniby wâgâ enomedâni modoram warâ.

### *Kadopâ odopâdobyry* (Lc 11.24-26)

<sup>43</sup> Jesus aguely:

— Tâlâ myani kadopâ kurâ odaypa nhânyby. Mâtâ kadopâ adakobâdyly myani paru peba ato einkâ, tâjidy xuize. Tâjidy nepyra olâ myani. <sup>44</sup> Aituo mâtâ kadopâ tâwâlâ aguely: “Iegasehobyryanlâ ise kodopâdyly mâtâ saguhoem inakanhe kânhetybyanlâ” kely. Adâkeduo, odopâdyly. Nodopâbyra awyly ara, koendâ myani mâtâ uguondo, eagonro kadopâram nädynanâoba, âtâ koendâ kehoem nhontyby, taxiemba wâne myara.

<sup>45</sup> Aituo myani mâtâ kadopâ sete lelâ tataen-hodo inakai modo kuru ese idâly, mâtâ uguondo odaxi tâxiedomoem. Aituo mâtâ uguondo ago kehoem kuru inakanhe itondly, tokalâ kadopâbe tatobyry takaze kehoem. Arâ lâpylâ ise inakanhe misezedylymo, yeinwâmpyra âmaemo watay — kely Jesus.

### *Jesus tyze, tukonodo warâ wâgâ aguehobyry* (Mc 3.31-35; Lc 8.19-21)

<sup>46</sup> Jesus aguely ume ise, iukonodo warâ saindylymo eydâ atoram. Kuoholâ ingâsenehonlymo. <sup>47</sup> Aituo Jesusram aguenri aguely:

— Âze, âukonodo warâ tarâ kuohomo. Agâ adâkedyzemo — kely.

<sup>48</sup> Aituo Jesus aguely:

— Yze lelâlâ mâtâ pekodo. Konodo lelâlâ akaemo uguondo modo warâ. Tâlâ lâpylâ olâ yze ara lelâ, konodo ara lelâ warâ kâenkyly kuru — kely.

<sup>49</sup> — Etaungâ ynynonro modo. Assaemo mawânkâ yze ara, konodo ara warâ kâenkyly, kâinwyneguuly warâ. <sup>50</sup> Idânârâ mâtâ Pabai kaynonro ize ato ara aitaynrim modo mawânkâ konodo ara, koudo ara, yze ara warâ kâenkyly — kely Jesus.

---

<sup>†</sup> **12:40** Judeu domodo emedyly nhapâgueho ara, azagâ tokalâ warâ myakâwândy, tokalâ iguandyly aralâ mawânkâ kogoneyam watay, nhapâguelymo. Awylygue karaiwaem, “azagâ tokalâ” kely, “azagâ emedyly” kely keba awyly. Ânguy Pakuenraram sexta-feira kopae nove horas saindyly. Sábado oday târâlâ. Domingo pealâ duas horas pylâ tâty anaxi odopâdyly-ro warâ watay, “Azagâ tokalâ warâ emedyly ara Pakuenradâ wakynre” kepa. Bakairi domodo xurâem azagâ emedyly ara kulâ. Awylygue xirâ versículu wâgâ koendâ itoem, “azagâ emedyly idyly ara” kely iwenily.

## 13

*Jesus trigu ewy tamuinze etâni wâgâ unâ nhegatuhobyry  
(Mc 4.1-9; Lc 8.4-8)*

<sup>1</sup> Ilâ iguandyly umelâ Jesus âtâ odayba egasely. Paru Galiléia emelaji idâly. Târâ ekadyly, kurâ domodo enomedâze. <sup>2</sup> Toenzepa kurâ domodo eydâ awyly tânâmize kehoem. Awylygue pepi imeimbyry târâ ekâjiby odaxi idyly, târâ enday kurâ domodo tienomedâdoem. Kurâ domodo tâpagune lelâ paru emelay, Jesus xunâry idase. <sup>3</sup> Unâ ani nhegatuly, kurâ domodo tienomedâdoem. Aguely:

— Xirâ idataungâ. Tâlâ myani uguondo trigu tamuinze etâni typi ezay. <sup>4</sup> Nhamuinday, tâlâ myani ânwa oze ihugueim. Mârâ myani konopio modoram tadaguoze. <sup>5</sup> Tâlâ pylâ myani toenzepa tuhube atoram ihugueim, onro tâsanigueba atoram. Inepa kehoem myani târâ iazely wâne, tydâetâgueba olâ mâtâ ago idyly. <sup>6</sup> Xixi myani nady tyaduânse, iwindy ago ondaxi nâtâba awylygue. <sup>7</sup> Tâlâ myani tyguyreimpe atoram ihugueim. Tyguyreim modo, trigu modo warâ âzekiba ago idyly myani. Tyguyreim olâ ago ini kuru, trigu takaze kehoem. Aituo kopâ ihugueyby nikuiba. Mârâ duay tawylygue trigu newiseba. <sup>8</sup> Tâlâ myani onro iwâkuru onwa ihugueim. Awylygue koendâ kehoem ago itaynly. Toenzepa myani mâtâ nady modo ewitunu. Koendâ kehoem myani ekaunâdyly ewy modo wâgâ cem, sessenta, trinta alelâ kehoem — kely.

<sup>9</sup> Warâ Jesus nhegatuly eyanmo.

— Xirâ unâ koendâ mâuntudyze mataymo, koendâne angahumo odaji ietaungâ — kely Jesus.

*Âdaituo unâ tâgatuzeingue kulelâ tienomedâdyly Jesus aguehobyry  
(Mc 4.10-12; Lc 8.9-10)*

<sup>10</sup> Aituo xina Jesus eynynonro modo kuru nhapâiguely:

— Âdaituoka mânomedâday unâ mânengatuly, ago lelâ amyguepa mawly? — xina kely.

<sup>11</sup> Aituo Jesus in-hoguly:

— Saguhoem mykâinane Deus kaynonro nutuen-homba âdara idânârâ iwymâryem tâidyl. Urâlâ olâ xutuen-hoim âyanmo. Koendâ ise âyanmo auguely. Deus koendâ tiuntudyzebaom modo olâ unâ tâgatuzeingue lelâ kâenomedâdyly; ago lelâ auguepa.

<sup>12</sup> Imâem ywâgâ mâuntudyze âmaemo watay, Deuslâ ise mâuntuhomoe aieni. Ânguy ywâgâ tiuntudyzeba watay olâ, âdiempa ywâgâ tiuntuyby enanânehonze, utuba ise warâ.

<sup>13</sup> Awylygue, kurâ domodo kâenomedâday, unâ kâengatuly, tahule kâenomedâdomo nutuba itomoem. Agânhekyly tâensemolâ wâne, nutubamo olâ, nepyramo-ro waunlo ara kulelâ. Auguely tydasemolâ wâne, âdakeze auguely nutubamo olâ ise, nidapyra waunlo ara lelâmo. <sup>14</sup> Deus aguehobyry Isaías inweniby ara aidyly iwerâ:

“ Idase wâne âmaemo,  
âdakeze aguely awyly mânuntuba olâ ise âmaemo.

Ese wâne âmaemo,  
âdy mânkylymo awyly mânuntuba olâ ise âmaemo.

<sup>15</sup> Auguely mânindadyseba, yeinwândyseba warâ âmaemo.

Mâpaunzebyramo itybyem, âzenuahuymbyem, âjiwantahuybyem waunlo ara lelâ  
âmaemo,

inomedâdomo mânuntuba mawylymogue.

Ywâgâ mâuntudyze lelâlâ âmaemo watay, auguely tydase,  
tâinwânsse warâ tâise âmaemo.

Tâpaunzeze tâise âmaemo, âjiwantahudânry ara, âzenuahudânry ara warâ.

Inakanhe amitomobyry tygakeze tâise urâ,

yynynonroem mitomoem' nygue Deus”

kely myakâwândy Isaías inwenily — kely Jesus.

<sup>16</sup> Jesus xinaram agueondly:

— Tutuze olâ âmaemo, awylygue omarumo. Mâenkylymo tutuze lelâ âmaemo. Mâindatyby tainwânse lelâ âmaemo warâ. <sup>17</sup> Saguho Deus eynynâ aguewâni modo, kurâdo Deus eynynonro modo warâ toenzepa mäenkylymo tiendyse tâisemo myakâwândy, nhetomoem anipyra olâ myakâwândy. Mâindakylymo tindadyse tâisemo myakâwândy, nidapyramo olâ myakâwândy. Xirâ mawânrâ mäuntudyzemo kuru wato — kely.

*Jesus âdakeze nady wâgâ adâkely awyly aguehobyry*

(Mc 4.13-20; Lc 8.11-15)

<sup>18</sup> Aituo Jesus aguely:

— Ydataungâ wao. Inomedâzemo nady ewy wâgâ auguehobyry ise âyanmo koendâ kâengatuly. <sup>19</sup> Mârâ nady ewy ânwa oze tamuinze etâdyby tadaguoze. Aituo âdy niazepa myani târâ samuin-hobryrdâ. Tâlâ lâpylâ arâ Deus itaumbyry idataynrim modo. Tydasemo wâne. Inepa olâ Satanás idânârâ indatybymo nhangahumo odayba nhetyly. Aituo pylâ Deus neinwâmpyra awylymo-ro warâ.

<sup>20-21</sup> — Mârâ nady ewy onro tuhubeom onwa ihuguewâdyby inepa kehoem iazely. Iwindy modo ago ondaxi nâtâba awylygue olâ, inepa iladaynly, iguewâdyly warâ. Tâlâ lâpylâ arâ Deus itaumbyry idataynrim modo. Tindatyby modo tainwânsemo wâne tuomare kehoem. Tâzenagazeodo olâ inepa kehoem Deus neinwâmpyra idylymo.

<sup>22</sup> — Mârâ nady ewy tyguyreim duaxi ihuguewâdyby; ago tâise wâne, newiseba olâ, tuahuze mârâ tyguyreim awylygue. Tâlâ lâpylâ arâ Deus itaumbyry idataynrim modo, Deus tainwânse wâne. Xirâ onro anaym adienkyly modo wâgâ kulâ olâ âseguâdâdylymo. Toenzepa âdype tâidylkulâ, toenzepa tydinerugadyly kulâ warâ olâ ize atomo. Awylygue Deus nhenanânehonlymo. Deus itaumbyry nidapyra, iwâgâ nâpaunzebyra warâ idylymo. Deus wâgâ ânguy agâ aguepa idylymo.

<sup>23</sup> — Mârâ nady ewy onro iwâkuru onwa ihuguewâdyby olâ koendâ iazely, ago idyly warâ. Toenzepa ewisely. Tâlâ myani ewy wâgâ cem lelâ ewily xuduim, sessenta lelâ ewily xuduim, trinta lelâ ewily xuduim warâ. Tâlâ lâpylâ arâ Deus itaumbyry idataynrim modo tindakylymo lelâ nheinwânklymo. Deus lelâ nheinwânklymo. Ize ato lelâ anheklymo. Iwâgâ aguelymo toenzepa kurâ domodo nheinwântoem warâ — kely Jesus.

*Jesus joiu wâgâ unâ nhegatuhobyry*

<sup>24</sup> Ilâpygueduo, Jesus âkelo unâ nhegatuondly tienomedâdomoem. Aguely:

— Unâ segatuji wao, âdara Deus kaynonro kywymâryem lelâlâ idyly awyly wâgâ mäuntuhomoem. Tâlâ myani uguondo typi ezay trigu ewy tamuinze etâni.

<sup>25</sup> Nhamuimbygueduo myani, kopae xykylymo ume, iduery ipi ezaji idâly. Trigu ewy samuin-hobryrdâ myani joiu\* keho ewy nhamuinaly. Samuinrimbyryem myani idâly.

<sup>26</sup> Aituo myani trigu ewy, joiu ewy warâ samuimby iazewâdyly, ago itaynly, âzekiba kehoem ewisewâdyly warâ. Aituo myani sodo agâ tâwanuneim modo mârâ joiu, trigu-empa awyly nhedylymo. <sup>27</sup> Aituo myani âpa ezary sodoram idâlymo. Aguelymo eyam: “Trigu ewy kulelâma keankâ mamuinly târâ âpa ezay; toenzepa olâ joiu, trigu duakâ. Ânguyka keankâ joiu ewy mârâ ezaxi samuinrim?” kelymo.

<sup>28</sup> — Aituo âpa ezary sodo in-hoguly: “Uduery keanra keankâ samuinrim” kely.

— Eagâ tâwamuneim modo aguelymo: “Joiu xina nhonkedyzeka âmâ iweâ lelâlâ?” kelymo.

<sup>29</sup> — Warâ olâ âpa ezary sodo aguely eyanmo: “Alâ nidâ. Joiu monhokelymo-ro watay, trigu nhonkeze lâpylâ mataunaze. <sup>30</sup> Tâwâlâ trigu, joiu alelâ âzekiba ago nidâ. ‘Ekaunâdo odaji ituo joiu ise waunroem kuru monhokelymo, mäintugâjilimo, iaduhoem,

\* <sup>13:25</sup> Trigu ipery ara iazeim joiu keho. Newiseba kulâ, nuduwâpyra âdaunlo joiu, âdaunlo trigu warâ awyly xutuhoem.

peto onwanji manmelymo warâ. Ilâpygueduo ise trigu mânkaunâdylymo. Kâenkanâdo odaxi mânkanâdylymo-ro warâ' keze urâ ekaunâni modoram" kely myani sodo – kely Jesus.

*Jesus mostarda ewy wâgâ aguehobyry*

(Mc 4.30-32; Lc 13.18-19)

<sup>31</sup> Jesus âkelo unâ nhegatuondly eyanmo tienomedâdomoem. Aguely:

— Unâ segatiji wao âdara Deus kaynonro kywymâryem lelâlâ idyly awyly mâtuntuhomoem. Tutuzelâ âmaemo, idânârâ nady ewy modo takaze kehoem mostarda ewy imeimbyryem awyly. <sup>32</sup> Tâtâduo olâ tyazeze, eagonro modo etâdaymby modo takaze kehoem ago tâise, imâsedo mododem kehoem twatazeze warâ. Awylygue tawâguneim modo iwatarý wâgâ tâty anhetoem nhuduly – kely Jesus.

{“Myara lâpylâ saguhoem kuru aguipa kurâdo kulâ Deus tywymâryem awyly einwânni modo. Ilâpygueduo olâ agui idylymo” keze Jesus aguely.}

*Jesus fermentu wâgâ aguehobyry*

(Lc 13.20-21)

<sup>33</sup> Jesus âkelo unâ nhegatuondly, tienomedâdomoem. Aguely:

— Xirâ unâ lâpylâ segatiji wao, âdara Deus kaynonro kywymâryem lelâlâ idyly awyly mâtuntuhomoem. Pekodo pão aieni imâem trigu nhedyly; fermentu olâ âdiempa kulâ nhedyly. Mârâ fermentu pão ioliho âdiempaombyry olâ trigu tuolize imâem kehoem – kely Jesus.

*Jesus unâgue lelâ tienomedâdaymo aguehobyry*

(Mc 4.33-34)

<sup>34</sup> Unâem lelâ ani Jesus kurâ domodo nhenomedâdyly. <sup>35</sup> Warâ myakâwândy Deus itaumbyry egatuimbyry Asafe inwenily:

“Unâ ise kâengatuly,

eagâmo augueday.

Adaguday tutuzenrybyry wâgâ augueday”

kely myakâwândy.

Aituo Jesus unâ kurâ domodo tienomedâdoem nhegatudo, Deus itaumbyry egatuimbyry aguehobyry ara kehoem aidyly.

*Jesus âdakeze joiu wâgâ adâkely awyly aguehobyry*

<sup>36</sup> Agueypyem Jesus kurâ domodo nhodokely. Xina agâ âtânra idâly. Saintybyem iopaji xina idâly, sapâigueze:

— Kurâ domodo agâ kydatay, joiu trigu duano wâgâ amygueaki. Âdyka enra awârâ unâgue mânmedâdyzemo mato? – xina kely.

<sup>37</sup> Aituo xinaram aguely:

— Urâ Uguondo Kaynâpa Âetyby trigu ewy tamuinze etâni emyenro urâ. <sup>38</sup> Trigu ewy, joiu ewy alelâ âpa ezay etâdyby ara mawânkâ kurâ domodo tarâ onro anaym awyly, ynynonro modo, ynynâbaom modo alelâ. Ynynonro modo, Deusgue tywymâgueim, trigu ewy aramo. Satanás eynynonro modo pylâ joiu emyenro-ro warâ. <sup>39-40</sup> Âpa ezary sodo iduery emyenro mawânkâ Satanás. Nady ekaunâdyly umeno ara lâpylâ ise xypyry etay aidyly. Tâwaneim modo joiu iaduhoem peto onwanji nhamehomo, ara lâpylâ ise xypyry etay anju domodo, Deus eynynâbaom modo eydâpa nhamelymo. <sup>41</sup> Pymâem kuru wituo, iemary modo igonose urâ târâ kaynâpa, kurâdo inakanhe aityby modo, idânârâ kurâdo inakanhe kulâ aitoem aienibyry modo warâ idâtyguyze. Mâkâ modo duapya ynynonro modo iese iemary modo. <sup>42</sup> Peto nhântâny onwanji ise inakai modo nhamelymo. Târâ ise eogunrunumo, tyery nhagulymo warâ tâpyneândylymogue. <sup>43</sup> Awârâ ume ise ânguy Deus eynynonro kuru awyly edyly. Xixi wâne eunu duapya idyly myara ise Deus

eynynonro modo, tynakaiguneim modo duaypa idylymo. Pabai Deus pymâem atodâ ise ejikumo. Xirâ koendâ māuntudyze mataymo, koendâ idataungâ – kely Jesus.

### *Jesus tâwâenseim soentyby wâgâ aguehobyry*

<sup>44</sup> Aituo Jesus aguely:

— Unâ segatuji wao âdara Deus kaynonro kywymâryem lelâlâ idyly awyly māunturomoem. Tâlâ myani uguondo âpa ezay tâtagueim esagueim. Tiensagueday myani tâwâenseim epyâdyby nhoenkely. Toenzepa kehoem mârâ tientuo, iomazely. Âpa ezary sodo keba olâ myani mâtâ. Aituo mârâ tâwâenseim tiempâgueby, nhepyâdondly. Ilâpygueduo, idâly. Idânârâ tâlâ tato modo vende nhedyly. Ebyry tienmakeybygue, mârâ tâwâenseim tiempâdobyry onro nhanâdly – kely Jesus.

### *Jesus pérola wâgâ unâ nhegatuhobyry*

<sup>45</sup> Jesus aguely:

— Unâ segatuji wao, âdara Deus kaynonro kywymâryem lelâlâ idyly awyly māunturomoem. Tâlâ myani uguondo pérola vende ieni, sanâni warâ. <sup>46</sup> “Xirâ pérola toenzepa tâwâenseim, tâwâenseim lelâlâ, sanâkâ” kehonly myani. Aituo idânârâ tâlâ tato modo vende nhedyly. Ebyry tienmakeybygue mârâ pérola tâwâenseim lelâlâ nhanâdly – kely Jesus.

{“Koendonro kuru Deusgue kywymâgu, idânârâ tâlâ kydato takaze kehoem” keze Jesus aguely.}

### *Jesus âedâ kanra sawâto wâgâ nhenomedâdobyry*

<sup>47</sup> Jesus aguely:

— Unâ segatuji wao, âdara Deus kaynonro kywymâryem lelâlâ idyly awyly, māunturomoem. Tâlâ myani uguondo modo ewy âedâgue kanra sawâni. Agui kehoem myani âedâ oday kanra inwynly, tâseim, tâsenry alelâ. <sup>48</sup> Âedâ kanrage xumyduo myani paru emelaji nhuxidlymo. Sagunu wâgâ ekadybyem, kanra iduakelymo. Cestu modo odaxi tâseim nhedylymo. Tâsenry nhamelymo lelâ warâ. <sup>49</sup> Arâ lâpylâ ise xypyry ume kurâ domodo âjideakeoly. Anju domodo âese; kurâ domodo iduakeze. Kurâ inakai modo etyzemo Deus eynynonro modo duaypa. <sup>50</sup> Deus eynynâbaom modo tâdâsenagazedo peto nhântâny onwanxi adameozemo. Târâ ise eogunrumo, tyery nhagulymo warâ, tâsenagazedylymogue – kely Jesus.

### *Iwelo konomedâdo, saguhobyry konomedâdo warâ*

<sup>51</sup> Jesusram xina adapâigueoly:

— Idânârâ auguehobyry tutuze wâne âmaemo? – kely.

Aituo xina in-hoguly:

— Tutuze – xina kely.

<sup>52</sup> Aituo Jesus aguely:

— Koendâ lelâlâ Moisés inweniby wâgâ enomedâni modo yeinwândylymo watay. Tâwâlâ Moisés inweniby wâgâ, âdara Deus kaynonro kywymâryem idyly awyly wâgâ alelâ nhenomedâdobylymo, uguondo wâne koendonro modo tienkanâdyby saguhobyry, iwelo alelâ nhoenkely myara – kely Jesus.

### *Nazaré donro modo Jesus neinwâmpyra atomobyry*

(Mc 6.1-6; Lc 4.16-30)

<sup>53</sup> Unâ tiengatubygueduo ani Jesus târâpa âxiguelly. <sup>54</sup> Xidadâ Nazaréram odopâdyly, tânamadobyryanlâ. Târâ tâdâtâdyguyhodâ kurâ domodo nhenomedâdly. Aguely idanipyry modo toenzepa âsewânilymo nhenomedâdo wâgâ. Aituo âjigue aguelymo:

— Toenzepa awâkâ enomegu; kiuntuba olâ kurâ ânguy enomedânbiry awyly. Adyesenry modo adyele lelâlâ; kiuntuba olâ kurâ âdara awârâ anhedyly awyly. <sup>55</sup> Segue âdydo imeom xygani Maria agâ imery kulâ mawânkâ; Tiago, José, Simão, Judas warâ iwaigorú

kulâ awâkâ. <sup>56</sup> Eaundudo tarâ kuduaylâ inanry kyjidadârydâlâ. Kiuntuba olâ kurâ âdykâ awâkâ awârâ nhutuhobyry awyly – kelymo.

<sup>57</sup> Jesus iamugâry enipyry tawylymogue, Deus Ingonyby môkâ awyly neinwâmpyra awylymo. Aguely tindadyseba awylymo warâ. Warâ olâ Jesus eyanmo aguely:

— Unâ egatuim tâty anaym, unâ nhegatuduo ipemugudoram nâzeinwân-honwâbyra. Ety odano modoram, ety anano modoram warâ tainwântuneba, âkelo kulâ einwânni – kely Jesus.

<sup>58</sup> Neinwâmpyra tawylymogue tonlo modo Jesusram nâtâba awylymo. Aituo myani âdiempa kulâ adyesenry modo târâ anhedyly.

## 14

*João Batista nhangasagâdobyry*

(Mc 6.14-29; Lc 9.7-9)

<sup>1</sup> Mârâ ume Herodes Galiléia eynynonro modo iwymâry. Jesus anhekyly egary indadyly. <sup>2</sup> Aituo tagâ tâwanuneim modoram aguely:

— João Batista kurâem itondyby keanra awâkâ Jesus. Awylygue mawânkâ eon-honru adyesenry modo aiese – kely.

<sup>3-4</sup> João igueypyem awyly tutuze olâ myani Herodes, mâkâlâ lelâlâ nhangasagânehoimbyry tawylygue. Âdara João xyâhobyry awyly ise kâengatuly wao. Herodes myani Herodias agâ tohogüindyze, tukono Filipe iwydyem awyly umelâ. Alâ mykâinane João aguezesedly eyam:

— “Kukono iwydy agâ todohogüinly lâpeba” kelype Moisés inweniby wâgâ – kezesedly.

Awylygue myani Herodes tyzodadury modoram aguely:

— João Batista sawâtaunda. Emakâjiwâdaungâ, etadâdaungâ warâ – kely.

<sup>5</sup> Herodes wâne myani João tyâen-hondyz, tyangahu oday xunâzely olâ:

— Kâyâen-honly-ro watay, kurâdo iewiâpaze yagâ – kely.

Kurâdo enanaji Deus itaumbyry egatuim mawânkâ myani João.

<sup>6</sup> João kadeia oday awyly umelâ myani Herodes iazehobyry etyguedo saindyly. Alâ myani Herodias âdara João tyâen-honly awyly nhutuly. Mârâ âty ume Herodias exiry myani igâsedaymby modo nhetoem âini. Âidyly tientuo myani Herodes toenzepa kehoem nhehoguedyly. <sup>7</sup> Aituo âwynsaundoram aguely:

— Tâwâlâ âdylâ ize mato ekagâ; xuduze lelâ urâ. Tâwâlâ ise Deus ienagazedyly, mâenkadyby kâundupa wituo – kely.

<sup>8</sup> Âdy nhekaguylly awyly agueimpyryem olâ myani ise. Awylygue myani Herodesram aguely:

— João Batista mânhangasagânehonly ize wato. Iweâma ise nhangahubyry mâenenehonly prato oday xarâ-ro warâ – kely.

<sup>9</sup> Awârâ tindatuo myani pymâ Herodes toenzepa kehoem itywandyly. Adâkehobyry awylygue olâ myani anhenehonly lelâlâ, tingâsedaymby modo, “Tâwâlâ ise Deus ienagazedyly, mâenkadyby kâundupa wituo” kely idanipyrymoem awylygue. <sup>10</sup> Aituo sodadu ingâsedyly. Eyam aguely:

— João nhangasagâda. Nhangahubyry xarâ enekâ-ro warâ – kely.

<sup>11</sup> Aituo sodadu idâly, João etadâdobypyrram nhangasagâze. Ilâpyryem nhangahubyry prato odaxi nhedyly, nhadyly âwynsaundoram. Âwynsaundo tyzeram xuduim. <sup>12</sup> Aituo myani João eynynonrobry modo xyâhobyry egary indadylymo. Tiuntuduomo myani eguepybyry ese idâlymo. Nhadylymo. Tuhu esagueyby odaxi nhetadâdylymo warâ. Jesusram, egatuze tâtâzemo myani. Warâ myani João âdyoly, awylygue myani Herodes tutuze lelâ awyly, João igueypyem awyly.

*Jesus cinco mil uguondo modo cinco pão, azagâ kanra âjihuyby warâgue nhuantobyry  
(Mc 6.30-44; Lc 9.10-17; Jo 6.1-14)*

<sup>13</sup> João xyâhobyry egary tindatuo ani Jesus pepi odaxi âxiedyly. Paru ozelâ xina âxiguelu. Âji âdy peba atoram xina idâly. Kurâ domodo olâ âdyam idâhobyry tutuze. Xidadâ odano modo, âtâ anary iwaguepaom odano modo warâ myani tuhuru wâgâ Jesus agâ oxioze idâwâni modo. <sup>14</sup> Pepi odayba itybyem Jesus toenzepa kurâ domodo tynwânwâni modo nhedyly. Akaemo ityenmâ Jesus. Iduaymo tâwânuneim modo kua iemâ.

<sup>15</sup> Iguandyly ume Jesus iopaji xina idâly. Eyam xina aguely:

— Iguandyly enra. Âdykâ pyni xuiho lâpeba tarâ. Asaemo igonokâ, âtâ anary iwaguepaonram, typyniry xuize — xina kely.

<sup>16</sup> Jesus olâ warâ xinaram aguely:

— Nâtâwâbyramo ise. Âmaemolâ ipynirymo âunduwâtaungâ — kely.

<sup>17</sup> Aituo xina aguely:

— Nuduwâpyra xina nhuantomoe! Cinco pão, azagâ kanra âjihuyby alâ kulâ taunlo — xina kely.

<sup>18</sup> — Enetaungâ pão, kanra âjihuyby warâ Yam — kely Jesus.

<sup>19</sup> Aituo aguely:

— Tâwâlâ kurâ domodo nekadâ âji koendonrodâ — kely.

Aituo ani Jesus cinco pão, azagâ kanra âjihuyby warâ nhanâdyly. Sanânbiryem, kayam MYK idyly. Deus agâ aguely:

— Koendonro lelâlâ âmâ, Pabai, awylygue xinaem xirâ pão, merâ kanra warâ mânduly — kely.

Ilâpyryem pão nhepajiwâdyly. Xinaram nhuduly, kurâdoram xina nhepâdoem. Xina nhepâdaynly umelâ kehoem Jesus pão epajiwâdyby, kanra âjihuyby warâ agui nhenehonly. <sup>20</sup> Ize tato ara kehoem ani idânârâ kurâdo âwinduadly; kanra âjihuyby nhâdylymo, pão nhedawynlymo warâ. Koendâ kehoem iolataynlymo. Ilâpygueduo pão, kanra âjihuyby warâ âsegubydâdaymby xina nhekanâdyly cestu imâsedo modo odaji. Doze cestu tumyke ani xina nhekanâdyly. <sup>21</sup> Toenzepa âwinduanî modo, cinco mil uguondo modo lelâ, pekodo modo, iamimeom warâ tapâguezebamô.

*Jesus paru wâgâ adakobâdobyry  
(Mc 6.45-52; Jo 6.15-21)*

<sup>22</sup> Ilâpyryem Jesus aguely xinaram:

— Âxiedaunda pepi odaxi. Idâwâtaungâ Galiléia iwalu kuyam. Tarâ asaemoram âsedaengübyem ise oiosemo udâly — kely.

Aituo xina idâly. <sup>23</sup> Tonlo modoram tâsedaengubygueduo Jesus iwy onwa âkuly, mâkâ kulelâ Deus agâ adâkehoem. Iguampygueduo, mâkâ kulelâ ani Jesus târâ awyly. <sup>24</sup> Ilâem pepi oday ani xina paru iotay. Toenzepa ani xina yan-yam adapezeinly; awylygue toenzepa paru adahugânily xina iwepiry onwa. <sup>25</sup> Emedylylâ, aukuma igâtudyly ume ani, Jesus idâly xinaram paru wâgâlâ. <sup>26</sup> Jesus paru wâgâ adakobâdyly tientuo, toenzepa xina âseanedly.

— Etaungâ! Kadopâ mâkâ! — tâkewâduo, xina adaenkely tyanugue.

<sup>27</sup> Warâ olâ ani Jesus aguely xinaram:

— Âzeon-hondâdaungâ! Tâseanezeba itaungâ! Jesuslâ urâ! — kely.

<sup>28</sup> Aituo Pedro aguely eyam:

— Pymâ, âkealâ kuru âmâlâ matay, âyam paru wâgâ udâhoem aguekâ — kely.

<sup>29</sup> — Âekâ — kely Jesus.

Aituo Pedro pepi odayba idyly. Paru wâgâ SE SE warâ idâly Jesus XYDYK warâ atoram. Koendâ lelâ Pedro idâly. <sup>30</sup> Sapezenru eon-honru tiuntuduo olâ âseanedly, xytyly adaguly. Aituo adaenkely:

— Pymâ, iemakegâ! — kely.

<sup>31</sup> Inepa kehoem Jesus tâmary IUK nhedyly Pedro adawâtoem, nytyba itoem. Jesus aguely eyam:

— Pedro, imâem yeinwâmpyralâ myanze âmâ! Inepa kehoem imakeinhe wawyly mânwâmpyra mitai! — kely.

<sup>32</sup> Aituo azakâlâ pepiram idâlymo, âxiedylymo, sapezenru epagudyly warâ. <sup>33</sup> Aituo xina Jesus nhehoguedyly:

— Âkealâ Deus imery lelâlâ âmâ! — xina kely.

*Jesus Genesaré donro tâwânuneim modo kua nhetobyry  
(Mc 6.53-56)*

<sup>34</sup> Jesus agâlâ xina paru nhekuâdyly. Genesaréram xina saindyly. <sup>35</sup> Jesus saintybyem awyly tiuntuduomo tonlo modo aguely:

— Etaungâ. Awâkâ mawânkâ Jesus! — kelymo.

Âji iwaguepaom donro modoram aguelymo, tâwânuneim modo nhatomoem. Aituo toenzepa kehoem tâwânuneim modo adaholy Jesusram. <sup>36</sup> Eyam nhekadylymo:

— Ity owogonro wao MÂ' ienehongâ asaemo tâwânuneim modoram, kua itomoem — kelymo.

Idânârâ tâty tywogonro MÂ' ienipyry modo ara kua tyese ani.

## 15

*Deus agueho ara kine, saguho modo agueho ara inkâba  
(Mc 7.1-13)*

<sup>1</sup> Aituo fariseu domodo ewy, Moisés inweniby wâgâ enomedâni modo ewy warâ idâlymo Jerusalémdâpa, Jesus agâ âtunâgueze. Aituo aguelymo:

<sup>2</sup> — Kydamudo ezewenrypyry ara inkâba âynynonro modo aidyly. Tâwinduatomoem nâzemaunguewâbyramo, kâzewenry ara. Kâzewenry nhakadylymo. Koendâpa akaemo awârâ modo inmoly — kelymo.

<sup>3</sup> Aituo Jesus eyanmo aguely:

— Âmaemolâ Deus aguehobyry aietâny. Izewenrymolâ mânwânklymo, Deus aguehobyry mâkeba. <sup>4</sup> “Unwânmô, âzemo warâ einwântaungâ. Ize atomo eyanmo âunduwâtaungâ” kewândy Deus. “Tunwym, tyze warâ âsenagazedoem Deusram ekani xyâwâtaungâ” kewândy lâpylâmy warâ. <sup>5-6</sup> Âmaemo olâ aypa mânemedâdylymo. “Unwânmô, âzemo warâ ândlâ nhekadylymo watay, ‘Tâlâ wato Deusram ise kâunduly. Awylygue âdy âyanmo kâundupa wawyly’ kewâtaungâ” myguelymo. Alâ kulâ mânemedâdylymo, amidylymo warâ. Deus aguehobyry âwankuem mânhekylymo, amyguehomobyry lelâ mânwântomoem. <sup>7</sup> Koendoro emyenro wâne âmaemo. Izewenrymo kulâ olâ amyguehomo. Âwâgâmo Deus aguehobyry iweniwânm̄ Isaías:

<sup>8</sup> “Tytanrugue ywâgâ koendâ adâkezemo,  
Tuodaxi niepyramo olâ.

<sup>9</sup> Ywâgâ koendâ adâkezemo wâne,  
tâzewanke kulâ olâ kurâdo nhenomedâdylymo, augueho araba”  
kehobyry — kely Jesus.

*Deus izepa ato wâgâ Jesus aguehobyry  
(Mc 7.14-23)*

<sup>10</sup> Aituo Jesus kurâ domodo ingâsedondly, eyanmo adâkehoem:

— Idataungâ, xutuwâdaungâ xirâ augueho. <sup>11</sup> Mâimpymo mâkeba Deus agueho mankadomoem aieni; mâimpymo tâgaseze mawânrâ. Deus izepa ato amânhedyse mawylymo mawânrâ Deus xurâem inakai; angahumo odaylâ mawânrâ awârâ âtuguduly – kely Jesus.

<sup>12</sup> Aituo Jesus opaji xina saindyly. Xina aguely:

— Fariseu domodo tutuze iwâgâmo amyguely awyly, awylygue akaemo agâ iewiâky – xina kely.

<sup>13</sup> Jesus xinaram aguely:

— Nady inakai ojionkeoly, adameoly alelâ. Arâ lâpylâ ise idânârâ Pabai kaynonro eynynâbaom modo adameoly eydâpa. <sup>14</sup> Tâseguâdâzeba itaungâ fariseu domodo kywâgâ aguelygue. Epy wâne eagonro epy nhakobâdyly myara akaemo. Deus aguehobyry koendâ nutuba tawylymo umelâ, kurâdo enomedâze kewâdylymo, Epy, epy alelâ adakobâdylymo watay, azakâlâ tyihuguezemo tâtagueim odaxi – kely.

<sup>15</sup> Aituo Pedro aguely eyam:

— “Mâimpymo mâkeba Deus agueho mankadomoem aieni; mâimpymo tâgaseze mawânrâ. Deus izepa ato amânhedyse mawylymo mawânrâ Deus xurâem inakai; angahumo odaylâ mawânrâ awârâ âtuguduly” myguely enra. Koendâ wao awârâ wâgâ aguekâ – kely.

<sup>16</sup> Aituo Jesus aguely:

— Iweâpa lelâlâ wâne yagâ mawylymo; inomedâdomo wato mâuntuba lelâ olâ âmaemo!

<sup>17</sup> Âpynirymo mâkeba Deus izepa ato amânhetomoem aienehoim. Eimpy mawânrâ kuwe odaxi idâly, ilâpyryem pylâ kokomiry odaxi-ro warâ. Awârâ modo odakâ sakadybyenma egasely lelâ-ro warâ.

<sup>18</sup> — Kyangahu oday mawânrâ kydâpaunzedo, aguiendyse kydato, aguykeho warâ âtuguduly. Awylygue angahumo odayba âeni Deus izepa ato aienehonrim awyly.

<sup>19</sup> Angahumo oday Deus izepa ato amânhedylymo wâgâ tunâgue âmaemo, kurâ mâyândyse midylymo; âkelo iwydy mâynanâdyze midylymo; eagâ mohogüin-homobyry keba kulâ mâynanâdyze midylymo; uguondo, uguondo agâ tâidyse awyly âewyly; pekodo, pekodo agâ tidyse awyly âewyly; imagadudyze midylymo; tâdâsenoguduly myguedyse midylymo; âkelo mânâguedyze midylymo warâ. <sup>20</sup> Awârâ modo mawânrâ Deus xurâem âwykanânehoimmo. Tâdâzemaunguebalâ tâdâwinduadylyma Deus xurâem inakai mâkeba-ro – kely Jesus.

*Jesus pekodo Fenícia donro exiry odaypa kadopâ nhânkhyhobyry  
(Mc 7.24-30)*

<sup>21</sup> Jesus agâ xina târâpa idâly, xidadâ Tiro, Sidom warâ iwaguepaonram. <sup>22</sup> Târâ xina awyly ume pekodo Jesusram saindyly. Judeu keba mâkâ pekodo, idamudo cananéu awylygue. Aituo adaenkely:

— Ytyendâlâ ikâ. Âdamu Davi ara pymâ ton-honreim âmâ! Iexiry kadopâgue taseim; kua iekârâ wao. Toenzepa mâkâ âsenagazedyly – kely.

<sup>23</sup> Jesus olâ âdakepa. Aituo Jesus opaji xina idâly. Eyam xina aguely:

— Igonokâ awâkâ pekodo. Kyampyguedyly kulâ awâkâ. Kâkuâdâdyly kulâ awâkâ saenlu – xina kely.

<sup>24</sup> Jesus xinaram aguely:

— Kypemugudo judeu domodo eniem keankâ kâjigonoholy; kaneru xuzatyby wâne myara awylymogue – kely.

<sup>25</sup> Aguely tindatuo mâkâ pekodo iwaguepa kehoem Jesusram saindyly. Âzeguhom idyly. Enado âzeguhom itybyem aguely:

— Pymâ, iexiry odayba kadopâ nhânkhygâ – kely.

<sup>26</sup> Aituo Jesus aguely:

— Koendâ inkâba iamudo ipyniry emakely, kaxorodoam xuduhoem — kely.  
 {Awârâ adâkehogue, koendâ inkâba judeu keba modoram, judeu domodo xurâ xuduly.  
 "Judeu domodo kua kânheto iwerâ. Judeu keba modo kua kânhedyly-ro watay, iamimeom  
 pâogue kâenmakely, kaxorodoam kâunduhoen-ro waunlo ara ise" keze aguely.}

<sup>27</sup> Âdakeze aguely awyly xutuwâm olâmy mâkâ pekodo. Aituo aguely:  
 — Arâlâ, Pymâ. Sodo modo mesa iaxi pyni in-hugueânehoymby tâinze olâ kaxoro  
 imeombyry — kely.

<sup>28</sup> Jesus aguely:  
 — Yeinwântâ mawylygue olâ ise ixiry kua kânhedyly. Mâkâ odaypa kadopâ kânhânyly,  
 mâenkadobyry ara — kely.

Aguely umelâ kehoem myani mâkâ pekodo exiry koendâ idyly, kadopâ tuodaypa  
 egaseduo.

### *Jesus toenzepa tâwânuneim modo kua nhetobyry*

<sup>29</sup> Tonlopyryem Jesus agâ xina idâly, paru Galileiaram. Aituo Jesus iwy angataji  
 âkuly. Târâ ekadyly. <sup>30</sup> Toenzepa kehoem kurâdo eyam idâly. Nhakylymo ezeumpadyby  
 modo, tywyke iazeypy modo, epy modo, tytarenry modo, âkelogue tâwânuneim modo  
 lâpylâ warâ. Enadoram nhakylymo. Idânârâ kehoem kua nhetaynly. <sup>31</sup> Tytarenrybyry  
 modo koendâ kehoem âjitalnymo. Tywyke iazeypy koendâ idylymo. Adakobâdânrybyry  
 modo koendâ adakobâdylymo idyly. Epybyry modo koendâ nhedylymo warâ. Awârâ  
 tientuo tonlo modo toenzepa kehoem âsewânilymo. Aituo israelita domodo iDeusry  
 nhehoguedylymo:

— Koendoro, ton-honreim warâ âmâ, Deus — kelymo.

### *Jesus quatro mil kurâdo sete pão, aguipa kanra âjihuyby warâgue nhuantobyry (Mc 8.1-10)*

<sup>32</sup> Jesus xina ingâsedly. Aguely xinaram:  
 — Ytynroem enra asaemo kurâdo. Kopaelâgâbygueduolâ asaemo yagâ awyly. Taypa  
 âetybybe asaemo duay. Âdy nheinlymo peba-ro warâ. Ipynirymo kâundupa kulâ  
 kâingonodysebamo urâ, tâtyram todopâdaymo ânwa oze ihuguezemo mawânkâ tokozely-  
 mogue — kely.

<sup>33</sup> Aituo xina aguely Jesusram:  
 — Kuantomoem nudupa lâpylâ olâ, iwague xidadâdâ kydawylygue. Asaemo xuato  
 âdykâ imâem pyni kiempyra ise kurâ — xina kely.

<sup>34</sup> — Âdara pãobeka âmaemo? — kely.  
 — Sete lelâ, PU warâ kanra âjihuyby warâ — xina kely.  
<sup>35</sup> Aituo kurâdoram aguely:  
 — Ikadaungâ — kely.  
<sup>36</sup> Mârâ sete pão, kanra âjihuwyby warâ nhanâdyly. Tianâpygueduo Deus agâ aguely:  
 — Koendoro lelâlâ âmâ, Pabai. Awylygue xirâ pão, merâ kanra âjihuyby warâ  
 mânduly — kely.

Deus agâ agueypyem nhepajiwâdyly. Xinaram nhuduly, kurâdoram xina nhepâdoem.  
 Xina nhepâdyly umelâ kehoem Jesus pão, kanra âjihuyby warâ agui nhenehonly.  
<sup>37</sup> Idânârâ âwinduadylymo ize tato ara kehoem; koendâ kehoem ioladylymo warâ.  
 Ilâpyryem xina cestu imâsedo modo odaxi âsegubydâdyby modo nhekanâdyly. Sete cestu  
 tumyke lelâ xina nhekanâdyly. <sup>38</sup> Toenzepa âwinduani modo, quattro mil uguondo modo  
 lelâ, pekodo modo, iamimeom warâ tapâguezeba. <sup>39</sup> Ilâpyryem Jesus aguely kurâdoram:

— Tâwâlâ itymoram idâwâtaungâ — kely.  
 Agueypyem xina agâ pepi odaji âxieze idâly. Magadâ keho yan-yam ani xina idâly.

## 16

*Jesus adyesenry anhetoem aguehomobyry  
(Mc 8.11-13; Lc 12.54-56)*

<sup>1</sup> Iweâpa ipygueduo fariseu domodo ewy, saduceu domodo ewy warâ idâlymo Jesusram. Tienwentâdomoem wâne inakanhe kulâ aguedyse awylymo. Aituo eyam aguelymo:

— Deus lelâ anhekylly aiekâ, mâtâkâlâ ogononi, on-honru xuduim warâ awyly xina nhutuhoem — kelymo.

<sup>2</sup> Aituo Jesus eyanmo aguely:

— Iguandyly ume, kau sapabiladyly watay, “Koendâ isenra kopaelâgâ emedyly, kopâ peba” tâkeze âmaemo. Adâise inanry amyguehomobyry ara kehoem. <sup>3</sup> Emetybyem, tyame, eunu tâmyguyne warâ watay, “Kopâ ihugueze iwerâ” myguenymo. Amyguehomobyry ara adâise lelâlâ. Tutuze âmaemo, kau mâtendylymo watay, kopâ ihugueze, nihugueba warâ awyly. Agânhekylly modo Deus eon-honruguelâ agânchedyly awyly mâtuntuba lelâ olâ âmaemo. <sup>4</sup> Ânguydoem kulâ âmaemo xirâ umeno modo iwerâ! Deus einwândyly mâtâinmolymo, pekodo tuso inmoho ara. “Adyesenry aiekâ, Deus ingonotyby mawyly xina nhutuhoem” mygueakimo yam. Deus unâry egatuimbyry Jonas aitobyry enanâguewâdaungâ. Jonas kanra imâsedo tuompygueduo egasehobyry ara, igueypyem kurâem witondyly watay, xutuze âmaemo Deus Ingonotyby lelâlâ wawyly — kely.

Agueypyem Jesus akaemo nhodokely, idâly.

*“Fariseu domodo, saduceu domodo warâ ifermenturygue tâmaynelâne itaungâ” Jesus kehobyry*

*(Mc 8.14-21)*

<sup>5</sup> Paru tienkuâday pão sadly xina enanânehonwâm. <sup>6</sup> Aituo Jesus xinaram aguely:

— Idataungâ. Tâmaynelâne itaungâ fariseu domodo, saduceu domodo warâ ifermenturygue — kely.

<sup>7</sup> Âdakeze Jesus arâ aguely awyly xina nutuba olâ. Aituo âjigye xina aguely:

— Âdaituoka awâkâ arâ aguely? Pão kieneypyra kydatobyry wâgâ? — xina kely.

<sup>8</sup> Jesus olâ xina aguely idamâ. Aituo xinaram aguely:

— Âdauguewâpyra urâ, pão mâtâenanânehon-homobyry wâgâ. Pão wâgâ inkâba auguely. Mâtâinwâmpyra olâ âmaemo, idânrâ ize matomo ara tuduze wawyly. Âdiempa kulâ mawânrâ yeinwândylymo — kely.

<sup>9</sup> — Âdaituoka ton-honreim wawyly mâtâinwâmpyra mawylymo! Saguhoem cinco mil uguondo modo xuadâ cinco pâogue. Idânrâ âwinduatyby modo nioladâmo. Toenzepa cestu modo mumytâdâmo âsegubydâdybygue warâ. Tânanâguezelâ keanra âmaemo.

<sup>10</sup> Iwerâ quatro mil uguondo modo xuatai lâpylâ sete pâogue. Idânrâ âwinduatyby modo niolataimo. Toenzepa cestu modo mumytâdaimo âsegubydâdybygue. Tânanâguezelâ keanra âmaemo lâpylâ. <sup>11</sup> Pão wâgâpa auguely awyly mâtuntuba gâlâ olâ keanra âmaemo, “Tâmaynelâne itaungâ fariseu domodo, saduceu domodo warâ ifermenturygue” ugueduo — kely.

<sup>12</sup> Tahuleba kehoem xina fermentu pão ioliho keba agueho awyly xina nhutuly. Fariseu domodo, saduceu domodo warâ nhenomedâdo wâgâ olâ myani Jesus aguely.

*Pedro, “Messias âmâ” Jesusram kehobyry*

*(Mc 8.27-30; Lc 9.18-21)*

<sup>13</sup> Ilâpygueduo Jesus idâly xina agâ âtâ anary modo Cesaréia de Filipe iwaguepa. Aituo xinaram aguely:

— Ânguy tâkezeka inanry kurâdo yam, urâ Uguondo Kaynâpa Âetybyam? — kely.

<sup>14</sup> Aituo xina in-hoguly:

— Tâlâ inanry, “João Batista kurâem itondyby awâkâ Jesus” kewâni modo. Tâlâ inanry, “Elias kurâem itondyby awâkâ” keim modo warâ. Tâlâ lâpylâ inanry, “Deus eynynâ aguenripyry Jeremias kurâem itondyby awâkâ” keim modo. Tâlâ lâpylâ inanry, “Deus eynynâ aguewâtyby modo ewy kurâem itondyby awâkâ” keim modo warâ — xina kely.

**15** Aituo xinaram aguely:

— Âmaemo-ro? Ânguy tâkeze âmaemo yam? — kely.

**16** Aituo Simão Pedro in-hoguly:

— Messiaslâ âmâ, Deus iguedânyr imery — kely. (“Deus Kâmakeze Ingonytyby” keze “Messias” kely.)

**17** Jesus eyam aguely:

— Mâkâlâ urâ. Tuomareim kuru âmâ, Simão, João imery. Ânguy awârâ mâuntuhoem inomedâdaymba. Pabai kaynonrolâ âyam xutuen-hoim. **18** Âmâ Pedrogue tâzekeim. “Tuhu imâsedo” keze xirâ âze aguely. Amyguehobyry ara Deus Ingonytybylâ wawyly einwânni watay, ynynonrolâ. Âtâ tuhu wâgâ itâdyby wâne alâ kulâ nihugueba myara ise ynynonro modo âda tyeseba awyly. Tâwâlâ wâne iguelymo, idâzemo olâ yam, yagâ aunloenlâ itomoem. Xirâ mâuntudyze wato kuru. **19** Ynynonro modo mâentoem aiese urâ, pymâ âtâ ijawerygue tâmaseim wâne, âtâ tânahungueze, tânahunze warâ myara ise âmâ. Tarâ onro anaym aiedyseba matobe watay, Deus anienehonwâbyra ise. Tarâ onro anaym aiedyse matobe watay, Deus anienehonze warâ — kely Pedroram.

**20** Aituo Jesus aguely idânârâ xinaram:

— Mâkâlâ urâ, Deus Ingonytyby. Iwerâ kuru wao olâ Messiaslâ wawyly kâzegatuwâdaundâ — kely.

*Jesus tyiguely wâgâ, kurâem tâitondyly wâgâ warâ aguehobyry  
(Mc 8.31-9.1; Lc 9.22-27)*

**21** Ilâenlâ Jesus nhegatuly xinaram âda tyedyly awyly.

— Jerusalémram idâze urâ. Kywymâry modo toenzepa târâ ienagazenehonzemo. Kurâdo eynynâ Deus agâ aguewâni modo iwymârydo, Moisés inweniby wâgâ enomedâni modo warâ ienagazenehonzemo. Akaemo ise yiguehoem aienehonrim. Yigueduo, azagâ emedyly\* idyly wâgâ olâ ise kurâem witondyly — kely.

**22** Pedro olâ neinwâmpyra arâ Deus Ingonytyby âdyoly awyly. Awylygue nhejikely, eagâ adâkehoem:

— Pymâ, arâ adâkezeba ikâ. Âtyenze Deus. Inagazenehonwâbyra ise warâ — kely.

**23** Aituo Jesus MYK idyly xinaram. Pedro aguehobyry nehoguebyra tawylygue aguely eyam:

— Satanás arâ amyguehoem aieni, Pedro. Satanás aguely kâindataymba ise urâ. Ânwa ozeno tuhu wâne kuhodaigâdyly myara Deus ize ato agânhedyseba mawyly. Deus xunâry ara inkâba âunâgu, uguondo modo xunâry ara kulâ — kely Pedroram.

**24** Aituo Jesus aguely xinaram:

— Ynynonroem ize mataymo, augueho ara aitaungâ. Kopaelâgâembaba ize wato ajetaungâ; amânhedyse matomo mâkeba ajetaungâ. Kurâ tyâzeim kruz nhadyly tyâhoram myara, ynynonro modo on-hondybyem nidâ igueze. **25** “Jesus eynynonro keba urâ” myguelymo, tyâzepa mitomoem kulâ watay, âdiempa kulâ ize xirâ anaym kurâem mawylymo. Âigueduomo Deus enadoram mydâwâpyra ise âmaemo. Yeinwândylymogue mâydylymo watay olâ, Deus enadoram idâze âmaemo; aunloenlâ ize eagâ mawylymo. **26** Tâwâlâ wâne âdydo imeom sodoem mawylymo, ize matomobe mawylymo warâ, Deus eydâ atoram mydâhomoe nepywabyra olâ awârâ modo. Deus agonro keba

\* **16:21** Nota de pé Mateus 12.40dâ egâ.

âmaemo watay, âdype matomo âdy mâkeba. Ânguy niguepa tâitoem nepywadaymba. Tâdâsenagazedo amaxi ise mydâlymo.

<sup>27</sup> — Uguondo Kaynâpa Âetyby urâ. Idâze urâ Deus eydâ atoram; odopâze olâ urâ Deus dompyryem anju domodo agâ. Kodopâdy ise Kunwym eon-honru tânehonze. Pymâ tynrenseinhe lelâlâ ise urâ. Yeinwânni modo yagâlâ ienehonze urâ. Yeinwântânyrybyry modo tâdâsenagazedoram igonose urâ. <sup>28</sup> Iwerâ ydataynrim modo ewy esemo Deus eon-honrugue pymâem widyly adaguly. Xirâ mâtundudyzemo kuru wato — kely Jesus.

## 17

### *Iwy wâgâ Jesus âkeloem itobyry*

(Mc 9.2-13; Lc 9.28-36)

<sup>1</sup> Seis iguandyly ipygueduo ani Jesus iwy onwa âkuly. Pedro, Tiago, Tiago iukono João warâ tagâ nhakyly. <sup>2</sup> Târâ Jesus âkeloem idyly nhedylymo myani. Xixi ara kehoem emydy ehozeladyly; esagoymby ara kehoem ety iwogonro sapekadyly warâ nhedylymo. <sup>3</sup> Moisés, Elias warâ nhedylymo lâpylâ, Jesus agâ xunâgumo ume. <sup>4</sup> Aituo Pedro aguely Jesusram:

— Koendâ kehoem tarâ kydawyly, Pymâ. Ize matay, azagâ tokalâ warâ âtâ imeimbyry aiese urâ, âmâem, Moisés-em, Elias-em warâ — kely.

<sup>5</sup> Pedro aguely umelâ eunu tohozeleim xytâguyly nhonwamo. Eunu duay Deus aguely indadylymo:

— Ymery toenzepa kâinwyneguyl merâ, toenzepa womazeâni. Aguely idataungâ — kely.

<sup>6</sup> Pedro, Tiago, João warâ tâjitanru tindatuo, tâseanezemo myani. Awylygue âzeguhoam idylymo onwâgâ.

<sup>7</sup> Aituo Jesus eyanmo idâly. Mâ' nhedylymo. Eyanmo aguely:

— Autaungâ. Tyanepa itaungâ! — kely.

<sup>8</sup> Adâkehonduo iwykaudylymo enuaguynrumo. Jesus kulelâ olâ nhekylomo; Moisés, Elias warâ netombyramo.

<sup>9</sup> Aituo xytâguylymo iwy wâgâpa. Tytâguylymo ume Jesus aguely Pedro, Tiago, João warâam:

— Mâentybymone iweâkuru ânguyram kâzegatuwâdaundâ. Yiguely, kurâem witondly wituo maise tâwâlâ mâengatulymo — kely.

<sup>10</sup> Aituo aguelymo:

— Moisés inweniby wâgâ enomedâni modo adâkeze: “Elias âese, Messias Deus Ingonytyby iraynâ” tâkezemo. Âdaituoka arâ aguelymo? — kelymo.

<sup>11</sup> Aituo Jesus in-hoguly:

— Âkealâ aguelymo; Eliaslâ mawânkâ Messias saindyly wâgâ agueim. <sup>12</sup> Warâ olâ âyanmo auguely: “Elias ara ini nâedâ” uguely. Deus eynynâbaom modo olâ ize tato ara kehoem nenagazedâ. Myara lâpylâ ise ienagazenehonlymo, urâ Uguondo Kaynâpa Âetyby — kely.

<sup>13</sup> Aguely tindatuomo Pedro, Tiago, João warâ tutuzemo lelâ João Batista wâgâ aguely awyly.

### *Jesus salokuzenomo odano kadopâ nhânyhobyr*

(Mc 9.14-29; Lc 9.37-43)

<sup>14</sup> Jesus, Pedro, Tiago, João warâ agâ iwy wâgâpa xytâguybygueduomo, toenzepa kurâdo târâ âtâdyguybyem awyly. Uguondo kurâ domodo duay Jesus iopaji saindyly, enado âzeguhoam idyly, eyam aguely:

**15** — Pymâ, ymery wao ityengâ! Kua iekâ! Tokomaze inanry merâ; toenzepa inanry âsenagazedyly. Tokomaduo, peto onwanji tyihugueze inanry, paikaji atay warâ.

**16** Âynynonro modoram sekadai wâne, kua nhetomoem. Kua niepyramo olâ enra – kely.

**17** Aituo Jesus aguely:

— Âdy einwânni kebalâ myanze âmaemo! Ânguydo kulâ âmaemo! Agâmolâ wâne urâ, yeinwâmpyra olâ âmaemo. Ynadaize yeinwâmpyra lelâ mawylymogue. Enetaungâ awâkâ salokuzenomo xarâ – kely.

**18** Jesusram nhadylymo. Tyam nhatuomo ton-honre kehoem Jesus mâkâ salokuzenomo iodano kadopâram aguely:

— Igasegâ iweâ lelâlâ merâ salokuzenomo odaypa, kadopâ! Todopâzeba ikâ-ro warâ!  
— kely Jesus.

Agueduo kadopâ egasely. Salokuzenomo kua idyly.

**19** Mârâ aipygueduo xina Jesus iopaji saindyly. Mâkâ kulelâ awyly ume xina nhapâiguely:

— Ton-honre lâwâne enra xina aidyly, kadopâ tiânkyhoem. Âda xina niepyra olâ enra.  
Âdaituo kukeanra? – xina kely.

**20** Aituo Jesus in-hoguly:

— Deus koendâ mâinwâmpyra mawylymogue enra mâkâ kadopâ mâingonopyra mawylymo. Mostarda ewy imeimbyry aralâ âdiempalâ yeinwântâ âmaemo watay, adyeseny adyese lelâ tâise âmaemo. Xirâ mâuntudyzemo kuru wato. Yeinwântâ lelâlâ âmaemo-ro watay, xirâ iwyrat “Âxiguegâ; tarâpa ikâ” mygueymo-ro watay, tâxigueze tâise. Adyeseny amânhetomoem ton-honre lelâ tâise âmaemo. **21** [Ton-honreim lelâlâ mâkâ kadopâ salokuzenomo iodanopyry. Deus eon-honru kienkadoem, kydâwinduapyra kidyly wao warâ lelâ mâkâ igonodyly]\* – kely Jesus.

### *Jesus tyiguely wâgâ agueontobry*

(Mc 9.30-32; Lc 9.43-45)

**22** Galiléia eynynâ xina adakobâday Jesus xinaram agueondly tyiguely wâgâ:

— Urâ Uguondo Kaynâpa Âetyby yizepaom modo emaxi âzegameoze urâ. **23** Akaemo ise yâen-honri. Yigueduo, azagâ emedyly† idyly wâgâ olâ ise kurâem witondly – kely.

Jesus tyiguely wâgâ aguely tindatuo, toenzepa kehoem ani xina itynwandyly.

### *Deus ety impostury epywado*

**24** Cafarnaumram xina saimpygueduo aunlo keba uguondo modo âewyly xina eydâ atoram. Deus ety impostury epywado emakeim myani akaemo. Pedroram idâlymo sapâigueze:

— Âwymâry Deus ety impostury epywaze? – kelymo.

**25** Aituo Pedro in-hoguly:

— Epywaze mâkâ – kely.

Ilâpygueduo Pedro egawândly Jesus eydâ atoram. Deus ety Impostury epywado wâgâ Pedro aguely iraynâ, Jesus Pedroram aguely:

— Ânguyka tâise pymâdoram impostu epywani? Xirâ anano modolâ? Âkelo anano modo? Âdara mâuntuly, Simão? – kely.

**26** Aituo Pedro in-hoguly:

— Âkelo anano modo tâise epywani – kely.

Aituo Jesus aguely:

— Iozelâ amyguely – kely. — Pymâ ety anano modo tâise nepywabyra. Alâpylâ urâ Deus ety impostury epywani keba wawyly tâise, Deus eydâpa âetyby wawylygue.

\* **17:21** Idâñârâ livru saguho modo wâgâ iwenibyemba xirâ. † **17:23** Nota de pé Mateus 12.40dâ egâ.

<sup>27</sup> Alâ olâ ise kâempywadyly, Deus ety impostury epywado emakewâni modo newiâpabyra itomoem. Paruam idâ. Atâry samegâ. Saguho mawepy ikaguegâ. Mâkâ kanra itay moedape ise. Mârâ moeda ise Deus ety impostury epywado emakeim modoram mâunduly. Xuduze lelâ mâtâ, urâ, âmâ warâ impostu kiempywadoem – kely.

## 18

*Ânguyka tynrenseim kuru?*

(Mc 9.33-37; Lc 9.46-48)

<sup>1</sup> Ilâpygueduo kehoem xina Jesus iopaji idâly, sapâigueze:

– Ânguyka xina enday tynrenseim kuru Deus kaynonro pymâem atodâ? – xina kely.

<sup>2</sup> Aituo Jesus iamudo tonlo ingâsedly tyam. Iamudo saintuo, Jesus xina ontaji iamudo nhedly. <sup>3</sup> Aituo aguely:

– Merâ iamudo ara itaungâ. Âwâlâ kulâ mâzehoguedlymo tâiseba itaungâ. Iamudo arâpa âmaemo-ro watay, mydâpa ise âmaemo Deus pymâem atoram. Xirâ mâuntudyzemo kuru wato. <sup>4</sup> Merâ iamudo ara mâdutuduomoma toenzepa ise âynrumo Deus nhekyly modo duay. <sup>5</sup> Pymâem xynru waunlo keba merâ iamudo. Mâkâ ynynonro xurâem koendâ amânhedylymo, tynrenseim keba awyly umelâ warâ watay, urâenlâ amânhedylymo. Mâkâ ynynonro xurâem koendâ amidylymo, tynrenseim keba awyly umelâ warâ watay, urâenlâ amidylymo – kely Jesus.

*Deus einwânnipyryem neinwâmpyra ienehoim toenzepa ise âsenagazedyly*

(Mc 9.42-48; Lc 17.1-2)

<sup>6</sup> Jesus aguely:

– Merâ iamudo yeinwânto ara yeinwânni yeinwâmpyra ienehoim koendâ tâise tuhu imâsedo iwymy wâgâ ekâjily, parutabâ ikaji samely, iguehoem, yeinwâmpyra nhenehonly iraynâlâ. <sup>7</sup> Kurâ domodo Deus izepa ato aiedyly imodânry modo mawânkâ toenzepa âsenagazezemo. Yeinwâmpyra itomoem aienehoim olâ ise toenzepa kuru âsenagazeni.

<sup>8</sup> – Imarymogue Deus izepa ato akâiedaundâ; mydâdysebamo atoram tâtâzeba itaungâ warâ. Koendâ tâise imarymo atay, âhurumo atay warâ satâly, samely warâ, Deus izepa ato amânhepyra mitomoem. Koendonro kuru tâmaguebalâ, tuhuguebalâ warâ Deus agâ aunloenlâ mawylymo; idânârâ kodo peto nhântânry onwanji adameoly mawânrâ koendâpaom kuru. <sup>9</sup> Deus mâendysebamo ato kâzetaundâ. Koendâ tâise inumo etyly, samely warâ, Deus mâendysebamo ato mâempyra mitomoem. Koendonro kuru tânuembalâ Deus agâ aunloenlâ mawylymo; idânârâ kodo peto nhântânry onwanji adameoly mawânrâ koendâpaom kuru – kely Jesus.

*Jesus enomedâzemo, kaneru xuzatyby wâgâ aguehobyry*

(Lc 15.3-7)

<sup>10</sup> Jesus aguely:

– Imâemba yeinwânni izepa tâiseba itaungâ. Deus anju domodo tugonose akaemo eniem. <sup>11</sup> [Kaneru eni wâne tâguy xuzatyby xuize tâtâze, myara lâpylâ ynynâbaom modo kâwinly, inakanhe awylymo kâyngakehoem, kâenmakehomoem warâ.]<sup>\*</sup> <sup>12</sup> Cem kaneru ewy tokalâ xuzatuo, âdaidlyka sodo, inanajimo? Noventa e nove tyânze âwinduatiadâlâ, mâkâ xuzatyby xuize tâtâhoem. <sup>13</sup> Nhuinly, nhedly. Tientuo, toenzepa kehoem iomazely, noventa e nove âwinduani tionmaendyly takaze kehoem iomaru. Xirâ mâuntudyzemo kuru wato. <sup>14</sup> Kaneru sodo tokalâ tâguy xuzadyseba awyly ara lâpylâ Kunwym Deus kaynonro tokalâ kurâ ewy Satanás ejidyram idâdyseba awyly; tâwâlâ lelâlâ wâne tynrenseim keba awyly – kely Jesus.

*Kurâdem inakanhe ityby agâ kydâtunâguene*

\* **18:11** Idânârâ livru saguho modo wâgâ iwenibyemba xirâ.

**15** Jesus xinaram aguely:

— Ynynonro ewy inakanhe idyly agâmo-ro watay, idâwâtaungâ eagâagueze. Inakanhe itobyry wâgâaguewâtaungâ; âmâ, mâkâ warâ âtunâguedaungâ. Amyguelymo koendâ tindatuo, “Aetobyry enanânehongâ” kely âyanmo watay, aitobyry enanânehonwâdaungâ. Eataen-hoem itondaungâ. **16** Amyguelymo tindadyseba watay olâ tokalâ atay, azagâ atay warâ agâmo antaungâ, eagâ amygueontomoem. Wakely iwenibybe mawânrâ Deus itaumbypy awo wâgâ: “Ânguy tâna gazezeba ise, azagâ, azagâ tokalâ warâ ewentâni peba watay” kely iwenibybe. **17** Akaemo aguely tindadyseba watay olâ idânârâ yeinwânni modoram anhetyby modo wâgâaguewâtaungâ, mâkâ agâaguehomoe. Turudyly tindadyseba watay olâ, Deus einwântâny modo ewyenlâ mâkânidâ; impostu epywado emakewâni modo aralâ etaungâ warâ — kely.

*“Pabai agâamyguedaymo, agâmolâurâ” Jesus kehobyry*

**18** Jesus aguely:

— Tarâ onro anaym aiedyseba matomobyrybe watay, Deus aidyseba lâpylâ ise târâ kaynâ; tarâ onro anaym aiedyse matomobyrybe watay, Deus aidyse lâpylâ târâ kaynâ. Xirâ mâuntudyzemo kuru wato.

**19** — Tarâ onro anaym âmaemo azagâmâseinwândylymo, tokalelâmâenkadomoem watay, Pabai kaynonro xuduze lelâmâenkadybymo. **20** Yagâagueze âtâdyguywâni modo eagâlâurâ, tâwâlâwâne azagâ, azagâ tokalâ warâkulâawyly. Xirâmâuntudyzemo kuru wato lâpylâ — kely Jesus.

*Jesus, tataen-ho inakanhe itobyrynenanânehombanro wâgâaguehobyry*

**21** Pedro Jesusram iwaguepa idâly, nhapâiguel:

— Ânguylâ inakanhe kulâynynâ aisezedly watay, âdaraka ise awidly aitobyrykâenanânehohoem, Pymâ? Sete lelâ inakanhe ynynâ aisezebygueduo tâwâlâkâpeândyly? — kely.

**22** Aituo Jesus in-hoguly:

— Sete lelââdalâmâiehoduo tâpeânzebaikâ. Aedyly agâ, aedyly agâ warâ enanânehongâ aetobyry. Mapâguely eki kehoem awyly umelâ, enanânehongâ; tâpeânzebaikâ. **23** Deusgue tywymâguneim modo inakanhetuduerytyetobyrymodo tânanânehonze. Unâsegatuji wao:

— Tâlâmyani pymâtagâtâwanuneim modo igondarywâgâadâkedyzedonro. **24** Aituo akaemo tokalâ, tokalâ warâingâsedly. Saguho ingâseguyly myani imâem kuru tugondagueim. Milhão kehoem myani igondary. **25** Âdara nhepywadoem nudupa lelâlâmyani, âdy peba tawylygue. Aituo myani iwymâryaguely: “Vendeâedylyisenra, âmâ, âwydy, âmeombyry alelâ” kely. “Tydinerugueinramisevendeâedyly. Idânârââsejiguy modo vendeieseurâwarâ. Mâkâeagâiwano iwelo ise idânârâdinherumâenmakely yam xudunri, ogondarymâempywadylyara” kelymâkâtoenzepatugondagueinram. **26** Agueduo, mâtâtâwaneimtoenzepakehoemadahulily. Aituoâzeguhoamidyliiywymârenado. Eyamaguely: “Ytyendâlâwaoikâ. Arâkehoemayedâ. Âdiempawaoiwânwânkâ. Epywazelelâurâagâugondago” kely.

**27** — Tutuzeolâiwymâry, mâtâtagâtâwanuneimâdypebaawyly. Aituoaguely: “Yagâogondagoenanânehonzeurâ. Yagâtugondagunebaiseâmâ. Idâlelâ” kely. **28** Aituo tâwanneimidâly. Târâpââxigueybyemmyanitataen-hotagâtugondagueimagâoxiodyly. Adiempakulâolâmyanimâtâeagâigondagu, cemmoedaprataqueto lelâ. Aituo myanitataen-hoiwymywâgânhawâdyly. Tingounkulyumeeyamaguely: “Iweâlelâlâkehoemiepywagâ” kely.

**29** — Aituo myani eataen-hoâzeguhoamitybyemaguely: “Ytyendâlâikâ. Iwânwânkâwao. Idânârâkehoemagâugondagoepywazelelâurâ” kely.

<sup>30</sup> — En-hem kepa olâ myani. Tataen-ho nhadyly lelâ etadânehonze kadeia odaxi. “Tarâlâ ise âmâ, idânârâ yagâ ogondago mâempwyadoem” kely. <sup>31</sup> Tataen-ho nityembyra kehoem aidyly tâense myani akaemo eagonro modo. Tientuo, mâtâ tataen-ho aienibyry izepa tâisemo myani. Aituo myani nhegatulymo tywymâryam. <sup>32</sup> Aituo iwymârymo mâtâ aityby ingâsenehonly. Aguely eyam: “Koendoro keba myaze âmâ! Âtyendylygue yagâ imâem ogondago idânârâ kehoem senanânehoangui, mäenkadobyry wâgâ. <sup>33</sup> Ataen-ho mityendyze, âtyendobyry ara” kely.

<sup>34</sup> — Tyewiâpaduo myani pymâ tyzodadury modoram aguely: “Merâ tumunreim kadeia odaxi sataungâ. Târâlâ yagâ tugondago nepywadâ” kely. Warâ myani mâtâ tataen-ho tagâ igondago tienanânehondyzebaom aieholy – kely Jesus.

<sup>35</sup> Xina agâ tunâry tympygueândoem kuru Jesus aguely:

— Arâ lâpylâ ise Pabai kaynonro aedylymo, inakanhe amâiehohomobyry mäenanânehomba âmaemo-ro watay – kely Jesus xinaram.

## 19

*Jesus tâjiwydy imoly wâgâ aguehobyry*

(Mt 5.31-32; Mc 10.1-12; Lc 16.18)

<sup>1</sup> Agueypyem Jesus xina agâ idâly Galileiadâpa. Judéia yan-yam xina odopâdyly ânwa oze, paru Jordão kuynâ, xixi egaseho eynynâ. <sup>2</sup> Toenzepa kurâdo xina agâ awyly. Iduanomo tâwânuneim modo kua tyese ani Jesus.

<sup>3</sup> Fariseu domodo ewy eagâ agueze idâlymo. Tienwentâdoem wâne inakanhe kulâ aguedyse awylymo. Aituo Jesus nhapâiguelymo:

— Kâzewenry eynynâ, tâwâlâka uguondo tywydy inmoly âdy wâgâlâ? – kelymo.

<sup>4</sup> Aituo Jesus in-hoguly:

— Deus itaumbyry iweniby tutuzelâ âmaemo. “Kaudyly umelâ myakâwândy Deus uguondo, pekodo warâ nhygadyly, ohogüinrin-em” warâ iwenibyem awyly Deus itaumbyry awo wâgâ. <sup>5</sup> Warâ lâpylâ myakâwândy Deus aguely: “Awlygue mawânkâ uguondo, tunwym agâpa, tyze agâpa warâ idyly, tywydy agâ lelâ tâitoem. Awlygue azagâpa awylymo, tokalelâ” kewândymy Deus. <sup>6</sup> Awlygue mawânkâ ohogüimby modo tywydy agâ tokalelâ awylymo, Deuslâ âzeyam ienimo awlygue. Awlygue ânguy ohogüimby modo âximohoem aniempyra nidâ – kely Jesus.

<sup>7</sup> Fariseu domodo Jesusram agueondylymo:

— Tutuzelâ âmâ Moisés inweniby: “Âwydy mânmodyze âmaemo watay, tâwâlâ imowâdaungâ” kely. “Iweniwâdaungâ olâ âdaituo mânmodyze awyly. Aitybyem eyam pape mânwenibyem eyam xuduwaâtaungâ. Igonotaungâ lelâ-ro warâ” kely myakâwândy inwenily. Arâ-ro watay, âdaituo pylâka koendâpa tâjiwydy imoly awyly? – kelymo.

<sup>8</sup> Jesus in-hoguly:

— Tutuze myakâwândy Moisés, tienkyly modo ânguydo kulâ, Deus ize ato adiendysedo keba awylymo. Awlygue myakâwândy Moisés “Tâwâlâ tâjiwydy imoly” kely inwenily, pekodo tâwentâzeba itoem. Kaudyly umelâ olâ myakâwândy Deus ohogüinwâdyby modo âximoly izepa awyly. <sup>9</sup> Agâmo ohogüimbyem tawyly umelâ, eagonro uguondoram âdynanâoly watay lelâ imowâdaungâ, mânmodyze mataymo olâ-ro warâ. Tâwâlâ lâpylâ arâ aidyly umelâ eagâ mawylymo. Âdaituoba kulâ âwydymo mânmodyze, eagonro agâ mitomoem kulâ-ro watay olâ, Deus ize ato arabâ kulâ amidylymo. Waunroem mohogüin-homobyrylâ âwydymo kuru Deus xurâem, nhatano keba. Xirâ mâtuntudyzemo kuru wato – kely Jesus fariseu domodoram.

<sup>10</sup> Aituo xina aguely:

— Arâ atayma, uguondo nohogüimbalâ koendâ awyly-ro – xina kely.

<sup>11</sup> Jesus aguely:

— Âkealâ, Deus eon-honru nhuduypy lelâ olâ nohogüimba tawyly emaenrim. <sup>12</sup> Tâlâ mawânkâ âdaituo uguondo nohogüimba ato. Tâlâ imezedânryenlâ iazeypy; awylygue tohogüindyzeba awylymo. Tâlâ emukeybyem tawylygue, tohogüindyzebaom. Tâlâ mâkâ Deus itaumbyry tiengatuhuem tohogüindyzebaom, pekodogue, iamudogue warâ aekuru tâtynanâdyzeba tawylygue. Deus, nohogüimba itoem eon-honru nhuduypy lelâ ohogüindânry – kely.

*Jesus iamimeom agâ atobyry*

(Mc 10.13-16; Lc 18.15-17)

<sup>13</sup> Ilâpygueduo tâjiunwyndo Jesusram tymeom nhadylymo.

— Asaemo nhangahu onwa imary iekâ. Deusram koendâ âzehohomoem ekagâ asaemo xurâem – kelymo.

Xina olâ ani akaemo iamudo sanipyry modo tâuse:

— Jesus kâdynanâdaundâ – tâkeze.

<sup>14</sup> Arâ xina agueduo Jesus xinaram aguely:

— Arâ adâkezeba itaungâ! – kely. — Tâwâlâ iamimeom yam nâedâ. Kodopâdaundâmo. Iamimeom wâne enra ohondbyyem lelâ yam tâetoem, myara lâpylâ kurâ domodo nohondâ, yeinwântomoem, Deus kaynonro iwymârymoem itoem – kely.

<sup>15</sup> Aituo Jesus nhangahumo onwa tâmary nhedyly; mâkânra, mâkânra warâ aguely:

— Deus koendâ nhese – kely.

Aitybyem idâly.

*Uguondo toenzepa âdypeom agâ Jesus aguehobyry*

(Mc 10.17-31; Lc 18.18-30)

<sup>16</sup> Alâ ani uguondo Jesusram saintybyem, aguely:

— Pymâ koendonro, âdyka ise koendonro enday agânhekyly, Deusram udâhoem, aunloenlâ eagâ witoem warâ? – kely.

<sup>17</sup> Aituo Jesus in-hoguly:

— Amyguely tutuzeka âmâ? Âdaituoka koendonro myguely yam? Tokalelâ koendonro kuru, Deus lelâ. Deus agâ midyse âmâ-ro watay, Moisés inweniby wâgâ agueho ara aikâ – kely.

<sup>18</sup> — Âdaunloka ise Moisés inweniby ewy agânhekyly? – kely uguondo.

Jesus in-hoguly:

— “Ânguy kâdyâ. Eagâ mohogüin-hobyry lelâ xynanâgâ. Tâmagazeba ikâ. Aitobyry wâgâpa kulâ âkelomo kâzewentâdâ. <sup>19</sup> Unwâm, âze warâ einwânkâ, xyrenkâ warâ. Agonro agâ âpynegâ; koendâ mâteto ara, arâ lâpylâ agonrodo agâ koendâ ikâ” – kely Jesus.

<sup>20</sup> Aituo uguondo aguely:

— Aunlolâ inanry idânârâ amyguehobyry Moisés inweniby ara awidly. Âdy pylâka ise agânhetonguyl, Deus agâ lelâ witoem? – kely.

<sup>21</sup> Jesus aguely:

— Deus enudâ kuru amidyse matay, âsejiguy modo idânârâ vende ieta. Ebyry ise âdy pebaom modoram mâunduly-ro warâ. Awârâ amânhedyly-ro watay, tâlâ lelâ ise âmâ koendonro Deus eydâ atodâ ekanâdyby. Idânârâ tâlâ mato mâunduduo, odopâgâ, ynynonroem mitoem – kely Jesus.

<sup>22</sup> Jesus arâ aguely tindatuo ani mâkâ uguondo toenzepa tydinerugueim âjityendyly, tysejiguy modo vende tiendyseba tawylygue. Tytynre kehoem idâly.

<sup>23</sup> Aituo Jesus xinaram aguely:

— Ton-honre lelâlâ âdypeom modo yeinwântoem, Deus kaynonro iwymârymoem itoem warâ, tysejiguy kulâ ize atomo kuru awylygue. Xirâ mâuntudyzemo kuru wato. <sup>24</sup> Ton-honre camelu agüie ihu oze sakadoem, arâ lâpylâ ton-honre âdypeom modo tâlâ tato inmohomoem, Deusgue lelâ tywymâgomoe warâ – kely.

<sup>25</sup> “Ton-honre lelâlâ âdypeom modo Deusgue iwymâgomoe” Jesus keduo, toenzepa kehoem xina âseguâdâdyly. Xina enanaji, âdypeom modo lakuru Deus eydâ atoram idâim waunlo ara awylygue. Âjigue xina aguely:

— Arâ atayma ise ânguy nâsemaguewâbyra-ro — xina kely.

<sup>26</sup> Aituo Jesus xinaram MYK itybyem aguely:

— Âkealâ, ânguy nâsemaguewâbyra ton-honrugue kulâ, Deus olâ kurâ domodo anhetânry adyese lelâ. Âdy anhetânry lâpeba Deus — kely.

<sup>27</sup> Jesus aguely tindatuo myani Pedro aguely:

— Xina-ro? Idânârâ tâlâ tato xina niâm, âynynroem tâitoem. Iwerâ ise-ro? Âdy ise xina nhemakely? — kely.

<sup>28</sup> Jesus xinaram aguely:

— Deus idânârâ kehoem iweloem nhetondyl ume, pymâ xurery iwâkuru wâgâ ise iekadyly, pymâem witoem, urâ Uguondo Kaynâpa Âetyby. Pymâem wituo, pymâem lâpylâ ise âmaemo. Pymâdo xurery wâgâ ise ikadylymo, kypemugudo israelita domodo iwymâryem. <sup>29</sup> Idânârâ tâlâ matomo mânhânlamo, ynynroem mitomoem watay, Deus xuduze lelâ ipa matomo. Xirâ mâuntudyzemo kuru wato. Itymo mânhânduomo, âkyhomoe ijidymo xuduze. Âwaigorumo, âukonomo, nhaundumo, unwânmô, âzemo, âmeonmo warâ mânhânduo, Deus âpemugumo nhetomo ara kehoem nhenimo, âwynenimo warâ xuduze. Âpimo mânhânduomo, Deus âpynirymo xuduze. Tâlâ matomo mânhânlamo ynynroem mitomoem watay, âdy ize matomo xuduze, mânhâmpymo takaze kehoem ise tâlâ mawylymo. Âigueduomo olâ ise aunloenlâ Deus agâ mawylymo. Xirâ mâuntudyzemo kuru wato. <sup>30</sup> Iwerâ waunropyry modo, ilâem âgânâynra ise. Âgânonrobryy modo, ilâem waunroem ise warâ — kely Jesus.

## 20

### *Jesus uva ezay tâwanuneim modo wâgâ nhegatuhobyry*

<sup>1</sup> Jesus aguely:

— Unâ segatuji wao, âdara Deus kaynonro kywymâryem lelâlâ idyly awyly mâuntuhomoem. Tâlâ myani uguondo imâsedogue tyfazendagueim. Typi ezay uva etânehonrimbyryem myani. Ekaunâdyly ume, emedyly wâgâ idâly tâwanuneim modo xuize, uva nhekaunâdomoem. <sup>2</sup> Uguondo modo tientuo myani, eyanmo aguely: “Tâwanuneim modo ize urâ iwerâ, uva ekaunâniem. Koendâ ise ipywadylymo. Tuguanse mâsewanilamo-ro watay, tokalâ moeda prataguetogue ise ipywadylymo” kely. Tutuzemo myani koendâ nhepywadyly awyly. “Ize lelâ ise xina amygueho ara. Âpi ezay âsewanize lelâ xina iwerâ” kelymo myani. Arâ âseinwândybyem, âpa ezary sodo akaemo ingonodyly âsewanize. <sup>3</sup> Emddyly wâgâ nove horas awârâem myani eagonro tâwanuneim modo xuionse idâondyl. Tâsewanidyzedonro modo âtâdyguyhoam idâly. Tâsewanidyzedo modo tientuo, eyanmo aguely: <sup>4</sup> “Uva ekaunâni ize urâ” kely. “Iwerâ wao ypi ezaji âsewaniwâdaunda. Koendâ ise ipywadylymo” kely.

<sup>5</sup> — Âseinwândybyem myani âpa ezaji âsewanize idâlymo. Kuotatay myani âpa ezary sodo idâondyl tâwanuneim modo xuionse. Tientuo myani eyanmo aguely: “Urâem uva ekaunâdaunda. Koendâ ise ipywadylymo” kely. Inepa kehoem myani akaemo aguewâtobryy modo idâly âpa ezaji. Três horas kogoneyam lâpylâ warâ tâwanuneim modo xuionse idâondyl Tâsewanidyzedonro modo tientuo myani, eyanmo aguely: “Urâem uva ekaunâdaunda. Koendâ ise ipywadylymo” kely. Inepa kehoem myani akaemo aguewâtobryy modo idâly âpa ezaji. <sup>6</sup> Kogoneyam, cinco horas awârâem myani âpa ezary sodo idâondyl tâsewanidyzedo modo âtâdyguyhoam. Tâsewanidyzede donro modo tientuo

myani aguely: “Âdy amânhepyralâ inanry tarâ âguansezedylymo. Âdaituoka âsewanize mydâpa mawylymo?” kely.

<sup>7</sup> — “Tâsewanidye wâne xina, ânguy olâ xina ewanu nudupa” kelymo.

— “Ypi ezaji pylâ uva ekaunâdaunda” kely âpa ezary sodo. Agueduo myani idâlymo âsewanize.

<sup>8</sup> — Iguandyly ume, seis horas awârâem myani sodo aguely tâwanuneim modo iwymâryram: “Tâwanu inmoho odaylâ akaemo. Idânârâ tâwanuneim modo igâsegâ, mâempywadomoem. Tokalâ hora lelâ âsewaniby modo saguhoem epywagâ, xypyryem ise tuguanse âsewaniby modo-ro warâ” kely.

<sup>9</sup> — Warâ myani nhepywadaynl. Saguhoem nhepywaguyl myani akaemo tokalâ hora lelâ âsewaniby modo. Tokalâ moeda praguetogue myani âzepywaolymo.

<sup>10</sup> Tuguanse âsewaniby modo awârâ tientuo myani, aguelymo âjigue: “Imâem ise kâpywadyly, tokalâ moeda takaze” kelymo. Tokalâ moeda praguetogue kulâ olâ myani akaemo modo âzepywaolymo lâpylâ. <sup>11</sup> Tâpywadobyry tientuomo myani âpa ezary sodo agâ iewiâpadlymo. Eyam aguelymo: <sup>12</sup> “Koendâ xina mâempywanehonwâbyra enra âmâ. Tokalâ hora kulâ awâkâ agâ saintyby modo nâsewaniagui. Xina lakuru enra tuguanse kehoem âdâpigu oday âsewanirim. Xina agâ âzekiba kehoem akaemo mepywanehoangui. Xina menokudai” kely akaemo tuguanse âsewaniby modo.

<sup>13</sup> — Aituo myani âpa ezary sodo eyammo aguely: “Idataungâ wao. Inokudaymbamo urâ. ‘Tokalâ moeda praguetogue tuguanse âsewanize lelâ xina’ mygueakimoma.

<sup>14-15</sup> Ize wato ara ydineruru agânhedyly. Âzekiba idânârâ kâempywaneonly-ro watay, inokudylymo mâkeba. Akaemo modo arâ kâempywadobyry wâgâ tyewiâseba itaungâ. Mâsewânilymo kulâ. Anra ipywadomo. Emakewâdaungâ. Idâwâtaungâ-ro warâ” kely. Warâ myani, âpa ezary sodo, tâwanuneim modo warâ aidly. <sup>16</sup> Iwerâ waunropyry modo, xypyry etay âgânâynra ise. Âgânonrobyry modo, xypyry etay waunroem ise – kely Jesus.

{ Koendâ lelâ awâkâ Jesus agaityon-enlâ tâinwânni agâ, iamudoenlâ tâinwânni agâ alelâ keze awârâ aguely. }

### *Jesus, “Yigueduo, kurâem itonze urâ” keontobyry*

(Mc 10.32-34; Lc 18.31-34)

<sup>17</sup> Xidadâ Jerusalémram xina âkuly. Tâtâday Jesus aguiom modo duanya xina nhejikely. Aituo xinaram aguely:

<sup>18</sup> — Idataungâ wao auguely. Jerusalémram xirâ kytâly. Yizepaom modoram adawâhoze urâ, urâ Uguondo Kaynâpa Âetyby. Kurâdo eynynâ Deus agâ aguewâni modo iwymârydo, Moisés inweniby wâgâ enomedâni modo warâ iegamezemo. “Nigue awâkâ” kezemo. <sup>19</sup> Judeu keba modo emaxi iegamezemo. Akaemo ise âwankuem yeni, yapiogunri, kruz wâgâ yârim warâ. Awârâpygueduo, azagâ\* emedyly idyly wâgâ olâ ise kurâem witondly – kely.

### *Tiago, João warâ xurâem isemo nhekadobyry*

(Mc 10.35-45)

<sup>20</sup> Zebedeu iwydy, Tiago, João warâ agâ Jesusram saindylymo. Enado âzeguhoam itybyem eyam aguely:

— Âyam kâenkaguyl wao aiekâ – kely mâkâ pekodo.

<sup>21</sup> Aituo Jesus mâkâ pekodo nhapâiguely:

— Âdyka mâenkadyze mato? – kely.

Pekodo in-hoguly:

— Pymâem kuru mituo, asaemo azagâ ymeombyryne apay ekanâgâmo, tokalâ aho eynynâ, tokalâ pâem eynynâ warâ, pymâem agâ itomoem – kely.

---

\* **20:19** Nota de pé Mateus 12.40dâ egâ.

**22** Jesus aguely mākâ imeombyryram:

— Māuntuwâbyra âmaemo âdara yagâ pymâem mitomoem adâjidly awyly. Toenzepa kâsenagazedo ara kehoem âsenagazeze tâeganeka ise âmaemo? — kely.

Aituo aguelymo:

— Emaenze lelâ xina, māenmaen-ho ara — kelymo.

**23** Jesus aguely:

— Âsenagazeze urâ, âmaemo lâpylâ warâ. Yahoru eynynâ ekani, pâem eynynâ ekani warâ kâinduakeba olâ urâ. Pabai kaynonrolâ ise iduakeim. Mâkâ mawânkâ târâ tâzekado nhonipyry — kely.

**24** Tiago, João warâ ise nhekadobyry tindatuo, xina nehoguebyra ani. Eagâmo xina tyewiâpadaynze warâ. **25** Aituo Jesus xina idânârâ ingâsedly tuopaji, xina agâ adâkehoem:

— Tutuzelâ âmaemo, pymâdo ton-honreim modo, tyewiâse kehoem kurâdo agâ aguely, adâkehobyry anhetomoem. **26** Âmaemo olâ arâpa itaungâ. Mâdyren-hondzye mataymo, tâzemaryenlâ itaungâ. **27** “Imawyadâbyramo ise urâ. Pymâ wawylygue; âmaemolâ ise urâem aieni” tâkezeba itaungâ, pymâem mituomo. **28** Yara itaungâ. Deus Ingonytoby lelâlâ wâne urâ, iemawyadâdomoem âetyby keba olâ urâ, imarymo lakuru urâ. Igueze âetyby urâ. Kurâdo inakanhe aito modo epywaze ise yiguely, Deus aguehobyry ara — kely Jesus.

*Jesus azagâ epy kua nhetobyry*

(Mc 10.46-52; Lc 18.35-43)

**29** Jericódâba xina egaseday, toenzepa kurâ domodo xina nhapygue idâlymo. **30** Tâlâ ani azagâ epy ânwa edazekâ ekadybyem. “Jesus awâkâ sakani” kely tindatuomo, azakâlâ adaenkelymo:

— Xina tytyenzelâ ikâ, Pymâ ton-honreim! Âdamu Davi ara pymâ ton-honreim âmâ! — kelymo.

**31** Ton-honre kehoem kurâdo eyanmo aguely:

— MYK alelâ itaungâ. Tadaenkezeba itaungâ warâ — kelymo.

Adâkehonduomo lakuru ago kuru adaenkelymo:

— Xina tytyenzelâ ikâ, Pymâ. Âdamu Davi ara pymâ ton-honreim âmâ! — kelymo.

**32** Jesus epagudyly. Akaemo azagâ ingâsedly. Tuopaji saintuomo Jesus aguely:

— Âdyka âmaemoem agânhedyse matomo? — kely.

**33** — Tiendyse xina, Pymâ — kelymo.

**34** Tintyenduomo Jesus enumo MÂ’ nhedyly. Inepa kehoem nhedylymo. Xina nhapgueniem idylymo lelâ-ro warâ.

## 21

*Jesus Jerusalémram saintobyry*

(Mc 11.1-11; Lc 19.28-40; Jo 12.12-19)

**1** Âtâ anary Betfagé iwaguepa xina saindyly, Jerusalém iwaguepa, iwy Se Oliveira Ekaram. Myarâ saintybyem, Jesus xina ewy azagâ waunroem ingonodyly. **2** Wakely eyanmo:

— Idâwâtaungâ Betfagéram. Aindylymo umelâ ise tokalâ jumenta, imerylâ warâ ekâjiby māendylymo. Azakâlâ ekâjiguewâdaungâ. Enetaungâ xarâ. **3** “Âdaituoka jumenta, imery warâ mandylymo?” myguehonlymo watay, “Kywyâmâry asaemo izetonro. Inepa olâ ise jumenta, imery warâ nhopânehonly” myguelymo lelâ ise — kely Jesus.

**4-5** Warâ myakâwândy Deus itaumbypy egatuim Zacarias inwenily:

“Jerusalém donro modoram aguewâtaunda:

‘Etaungâ! Âwymârymo saindyly.

Pymâ ton-honreim ara kehoem inkâba ise âewyly.

Jumentinhu wâgâ ise âewyly, jumenta imery wâgâ' kewâtaunda eyanmo"  
kely myakâwândy inwenily.

Jesus jumentinhu wâgâ Jerusalémram saintuo, Zacarias inweniby ara kehoem aidyly.

<sup>6</sup> Aituo akaemo azagâ ingonotyby modo idâly. Jesus aguehobyry ara aidylymo. <sup>7</sup> Jumentinhu, ise alelâ nhadylymo. Tygaparyguelâ jumentinhu, ise warâ inkawendâdylymo. Ilâpyryem Jesus jumentinhu onwa âkuly. <sup>8</sup> Jesus saindyly iray toenzepa kehoem kurâ domodo tygapary ânwa oze PO PO nhedylymo, Jesus tynrense tawyly tienehon-homoem. Tâlâ pylâ wakuri sary tiantâwâdyby modo onro onwa PO PO ieni modo, tynrense tawyly tienehon-homoem, pymâ ton-honreim kehoem iray adâitomo ara. <sup>9</sup> Waunroem idâwâni modo, âgânâ idâwâni modo warâ adaenkewâdylymo adaguly:

— Hosana Davi iweryypyry! — kelymo. (“Tohoguezeim Davi iweryypyry” keze aguely.)

— Tohoguezeim kuru awâkâ Deus eon-honru enehonze âeni! Hosana Deus kaynonro!

— kelymo.

<sup>10</sup> Warâ Jesus Jerusalém odaxi saindyly. Idânârâ kehoem mâtâ xidadâ odano modo âjigue agueylmo:

— Ânguya mâtâ saini? — kelymo.

<sup>11</sup> Aituo kurâdo in-hoguly:

— Jesus mâtâ, Deus ynynâ aguenri. Galiléia eynynonro, xidadâ Nazaré donro mâtâ — kelymo.

*Jesus ânguydo imeom vende ieni modo Deus ety odayba nhegaseândobyry.*

*(Mc 11.15-19; Lc 19.45-48; Jo 2.13-22)*

<sup>12</sup> Jesus egawândyly Deus ety idaseraji. Âdydo imeom vende ieni modo, sanâni modo warâ târâpa nhegaseândaynl, Deus ety oday aidylymo awylygue. Dineru troca ieni modo iwenzary nhameley. Papa vende ieni modo xurery nhamunedly.

<sup>13</sup> Egaseânimobyryem eyanmo aguely:

— Deus itaumbyry awo wâgâ iwenibyem: “Xirâ iety yagâ agueho xirâ” kewândy Deus. Kurâ domodo mâtâenmagazedylymo kulâ olâ. Ânguydo imeom Deusram tiunduly nhanâdylymo watay, toenzepa mâtâenwâentanâdylymo. Dineru âmaemoenlâ mânhedlymo. Deus ety, tâmagazeim modo otoendoem mânhedlymo kulâ — kely Jesus.

<sup>14</sup> Jesus Deus ety idaseray atay, epy modo, adakobâdânrô modo warâ eyam idâlymo. Kua tyesemo ani Jesus. <sup>15</sup> Aituo tonlo modo iamimeom adaenkewâdyly:

— Hosana Davi iweryypyry! — kelymo.

Kurâdo eynynâ Deus agâ aguewâni modo iwymârydo, Moisés inweniby enomedâni modo warâ Jesus akaemo tâwânuñeim modo kua nhedyly nhedylymo, iamimeom saenlu indadylymo warâ. Aituo toenzepa kehoem iewiâpadlymo. <sup>16</sup> Jesusram agueylmo:

— Iamimeom âwâgâ aguely midatai? Arâ aguepa nidâmo — kelymo.

— Xidatailâ. Kâeumpyramo olâ ise urâ. Tutuze urâ, Deus itaumbyry awo wâgâ iweniby tutuzelâ mawylymo: “Iamimeonra, iamimeom tâjihuano modoram warâ ise mâtâehogueoly kuru” kely iweniby — kely Jesus eyanmo.

<sup>17</sup> Jesus Deus ety odayba egasebygueduo, xina idâly Jerusalémdâpa. Betanianra xina xykyze idâly.

*Jesus figueiraram, “Iwîseondaymba ise âmâ” kehobyry*

*(Mc 11.12-14,20-25)*

<sup>18</sup> Kopaelâgâem emedyly wâgâ Jesus agâ xina odopâdyly Jerusalémram. Tâwinze myani Jesus. <sup>19</sup> Awylygue figueira ânwa edazekânrô toenzepa saryum tientuo, ago iopaji saindyly. Tâwîse-ro waunlo ara, enanaji, tarysely agâlâ ewiseim mawânrâ figueira.

Tâwîseba olâ ani mâtâ, toenzepa saryun-em lelâ. Aituo Jesus figueiraram aguely:

— Iwisen daymba olâ ise âmâ — kely.

Aguepygueduolâ kehoem figueira iladyly. <sup>20</sup> Xina emâ figueira sary iladyly. Toenzepa kehoem xina âsewanîly. Aituo xina aguely:

— Inepa kehoem awârâ figueira sary niladai! — xina kely.

<sup>21</sup> Jesus xinaram aguely:

— On-honrumo kâunduly mânwândylymo, âkealâ kuru ton-honre wawyly mânwândylymo warâ watay, adyesenry modo aiese lelâ âmaemo, figueira agânhetobyry takaze. Amânhetomoem on-honrumo kâunduypygue idânârâ aiese lelâ âmaemo. Xirâ iwyram “Âxiguegâ; paikaji adamegâ” myguelymo-ro watay, tâjidydâpa tâxigueze tâise, paikaji tadameze warâ. <sup>22</sup> Emakeze mawlymo mânwântuomo, mâenkadybymo âyanmo xuduze Deus. Xirâ mâtudyzemo kuru wato — kely Jesus.

*Deuslâ Jesus igononi, âdaunlo kulâ mâkeba*

(Mc 11.27-33; Lc 20.1-8)

<sup>23</sup> Jerusalémram saintybyem, Jesus idâly Deus ety odaji. Târâ kurâdo nhenomedâdyly ume, kurâdo eynynâ Deus agâ aguewâni modo iwymanydo, eagonro pymâ modo warâ eyam idâlymo. Aituo nhapâiguelymo:

— Ânguya tarâ Deus etydâ arâ amitoem agueim? — kelymo.

<sup>24</sup> Aituo Jesus in-hoguly:

— Apâiguezemo lâpylâ wao urâ. Uhoguduomo ise ânguy ugononibyry awyly auguely — kely.

Aituo aguely:

<sup>25</sup> — Ânguya ani João Batista inakanhe adâitobyry wâgâ âjityendyby modo batiza nhetoem aguenri? Deuslâ? Âdaunlo uguondo kulâ? Uhoguwâdaungâ wao — kely.

Aituo myani âjigue aguelymo:

— Iwerâ, ise-ro? Âdara kuru ise kin-hoguly? “Deuslâ agueim” kykeduo, “Âdaituo pylâka João aguehobyry mânwâmpyra mawlymo?” keze. <sup>26</sup> “Uguondo kulâ ani João aitoem agueim, Deus mâkeba” kykeduo, kurâ domodo kagâ iewiâpadaynze. “Deuslâ João Batista igononi” tâkezemo inanry — kelymo.

<sup>27</sup> Awylygue warâ in-hogulymo:

— Xina nutuwâbyra ânguy João Batista batiza nhetoem agueim awyly — kelymo.

Aituo Jesus aguely:

— Arâ atayma auguepa lâpylâ ise urâ, ânguy xirâ agânhetoem ugononi awyly-ro — kely.

*Jesus azagâ tâjimery wâgâ unâ nhegatuhobyry*

<sup>28</sup> Jesus aguely pymâ modoram:

— Adâjitory ise unâ kâengatuly. Koendâne idataungâ mâtuduhomoem. Tâlâ myani uguondo azagâ tymegueim. Tymery saguhobyryram aguely: “Ypi uva kâentâdobyry ezaxi isenra âsewanize mydâly” kely. <sup>29</sup> Imery aguely: “Kâsewanidyzeba aze iwerâ. Udâpa ise aze” kely. Agueypyem olâ tunâry nhugukely. Idâly âpa ezaji âsewanize. <sup>30</sup> Aguely lâpylâ iukonoam: “Uva kâentâdobyry ezaxi isenra âsewanize mydâly” kely. Mâkâma, “Idâze lelâ urâ, Pabai” keim. Agueypyem olâ myani âsewanize nâtâba.

<sup>31-32</sup> Aituo Jesus aguely pymâ domodoram:

— Âdaunloka akaemo enday tunwym ize ato ara aini? — kely.

Aituo in-hogulymo:

— Iwaigoru âsewanize idâhobyry wâgâ — kelymo.

Jesus eyanmo aguely:

— Âkealâ awârâ. Mâkâ iukono ara kulâ olâ amidylymo. Impostu epywado emakewâni modo, pekodo inakanhe aini modo warâ mawânkâ yeinwântâmo. Âmaemo kulelâ yeinwântâny. Âdara Deus ize ato ara lelâ amidylymo awyly enomedâze keankâ mâkâ

João Batista âewyly. Aguely māindadyseba olâ keankâ âmaemo. Akaemo kurâdo izepa matomo keankâ toenzepa João aguely idani. Akaemo impostu epywado emakewâni modo, pekodo inakanhe aini modo warâ nājityendâmo inakanhe adâitomobyry wâgâ, adâidyl nimomo warâ. Akaemo aidyly māentuomolâ, mājityendylymo, inakanhe amidylymo māinmolymo mipyra olâ keankâ âmaemo. Deus ize ato ara amitaymba âmaemo. Awylygue ise Deus pymâem atoram mydâpa mawylymo. Xirâ māuntudyzemo kuru wato – kely Jesus.

*Tâwanuneim modo koendâpa aitobyry wâgâ Jesus unâ nhegatuhobyry  
(Mc 12.1-12; Lc 20.9-19)*

<sup>33</sup> Ilâpyryem Jesus tonlo modoram aguely:

— Idataungâ wao xirâ unâ. Tâlâ myani uguondo uva etâdybybeom. Aituo uva ejidy nhahodânehonly tuhu imâsedo modogue. Onwâgâ tâtagueim nhesaguehonly, uva ekuguehoem tâjihurugue, vinhu xygatoem. Âtâ imeimbyry kaynâ olâ-ro waunlo aienehonwânmy tâmagazeim enuagaendo, ânguydo imeom nady saguwâni modo enuagaendo warâ. Ilâpyryem myani uva ejidy etaynrim modope nhedyly. Warâ myani eyanmo aguely: “Ypi mâendylymo-ro watay, uva xutudo, epajigâze urâ agâmo” kely. Koendâ lelâ myani in-hogulymo. Aituo myani idânârâ âtunâguedybyem, âtâ anary iwaguenonra idâly. <sup>34</sup> Uva ekaunâdo odaji ituo myani tâmary modo ingonodyly, akaemo tâwaneim modoram nhekaunâdybymo ewy turâ emakeze. <sup>35</sup> Aituo myani ingonotyby modo idâlymo âpa ezaji. Saintuomo, tâzenagazeozemo myani uva ejidy etaynrim modoram. Adapioguolymo, âdyolymo, tuhugue tadamytâoze âdyolymo warâ myani aieholymo. <sup>36</sup> Aituo myani uva sodo eagonro tâmary modo ingonotondyly wâne, turâ emakeze. Adyetonzemo lelâ olâ myani.

<sup>37</sup> — Ilâpyryem myani uva sodo tymery ingonodyly. “Ymery tokaleom awylygue âda nientaymbamo ise” tâkeduo myani ingonodyly. <sup>38</sup> Sodo imery saindyly tientuo myani âpa ezay tâwanuneim modo âjigue aguelymo: “Uva ejidy sodo imery mâtâ âeni. Tunwym igueduo, mâtâ ise ipibyry sodo. Kydyânrene, nhunwym ipibyry kurâenlâ itoem” kelymo.

<sup>39</sup> — Aituo myani mâtâ uva sodo imery nhawâdylymo. Sawânipryem, âpa ezayba nhedylymo, tyân-hoem – kely Jesus.

<sup>40</sup> Aituo Jesus adâkely idani modo nhapâiguewâdyly:

— Uva ejidy sodo odopâdyly watay, ise-ro? Âdaiehoze akaemo? – kely.

<sup>41</sup> Aituo in-hogulymo:

— Todopâduo, tumunruneim modo xyâen-honze mâtâ. Eagonro modo ise mâtâ uva ejidy eniem nhekly-ro warâ. Ipi eni iwelo modoma tienkaunâduo, sodo xurâ xuduze – kelymo.

<sup>42</sup> Aituo Jesus eyanmo aguely:

— Deus itaumbyry awo wâgâ iweniby mâintaimbymo enanâguewâdaungâ.

“Tâlâ myani tuhu imeâgâkeba, âtâ itâdo.

Idânârâ itâdaynrim modo mâtâ tuhu tâensembo,

mâtâgue âtâ tintâdyzebamolâ.

Deus xurâem olâ mâtâ tuhu tywyneim kuru!

Kywymâry Deus induakeyby mâtâ tuhu, âtâ itâdoem.

Deus anhetyby awylygue iwâkuruem awyly!”

warâ iwenibyem awyly – kely.

<sup>43</sup> — Yizepa matomobyry enanâguewâdaungâ. Awylygue judeu keba modoram ise âdara Deus kywymâryem idyly awyly egatuly. Yeinwânsemo-ro warâ. Akaemo iwymâryem ise Deus, âwymârymoemba. <sup>44</sup> [Ânguylâ mâtâ tuhu onwa ihugueyby, âdyâze. Ânguy onwalâ mâtâ tuhu ihugueduo, samiunze] – kely Jesus.

<sup>45</sup> Aituo ani akaemo kurâdo eynynâ Deus agâ aguewâni modo iwymârydo, fariseu domodo warâ Jesus unâ nhegatuyby indadylymo. Tywâgâ aguely awyly nhutulymo myani, Jesus izetonro keba tawylygue, tâwanuneim modo âpa ezary sodo imery izepa atomobry ara. <sup>46</sup> Awylygue Jesus tientadânehondyzé idylymo, tyâen-hon-hoem. Âjigue aguelymo:

— Iweâ lelâlâ kianwânehonly watay, kurâdo kagâ iewiâpaze Xurâmoem, koendonro lelâlâ awâkâ Jesus, Deus eynynâ aguenri awâkâ — kelymo.

Awylygue Jesus âdara niepyra awylymo ilâenlâ.

22

*Todohogüin-ho etyryam igâsedyby modo wâgâ Jesus aguehobyry  
(Lc 14.15-24)*

<sup>1</sup>Jesus âkelo unâ nhegatuly, tienomedâdomoem. <sup>2</sup>Warâ aguely:

— Unâ segatuji wao, âdara Deus kaynonro kywymâryem lelâlâ idyly awyly mâuntuhomoem. Tâlâ myani pymâ tynrenseim, tumuru ohogün-hoem âty imâsedo aieni. <sup>3</sup> Toenzepa myani kurâdo tâtyram âwinduase idâhoem ingâsedyby modo. Alâ ituo myani tâmary modo ingonodyly aguewâtobypy modo igâseze, âwinduase idâhomoe. Akaemo olâ myani tâtâdyzeba. <sup>4</sup> Ine warâ myani tâmary eagonro modo ingonodyly. Warâ myani aguely eyanmo: “ ‘ ‘Alâ pyni nâwanikeagui. Tapirâ tadygueim modo nâdyoaki, nâjihuogui warâ. Alâ idânârâ. Yagâ âzetyguedaungârâ” keanry xina iwymâry’ kewâtaunda kâingâsedaymby modoram” kely âty sodo.

5 — Aituo myani emary modo idâondyly igâsedonzemo. Todohogüin-ho etryam tâtâdyzeba olâ myani akaemo. Âsewanize lelâ myani idânârâ idâlymo. Tâlâ myani tyfazendaryanlâ âsewanize idâim, tylojaryanlâ âsewanize idâim warâ. 6 Tâlâ lâpylâ olâ myani tygâseze idâypy modo sawâni, sapiogurim, xyârim warâ. 7 Aty sodo tâmary modo enagazenibyry modo agâ iewiâpadly myani. Aituo myani tyzodadury modoram aguely: “Iemary modo xyârimpyry modo xyâwâtaunda. Ijidadârymo iaduântaunda warâ” kely. Tywymâry aguehobyry ara myani sodadu domodo aidly. 8 Ilâpyryem warâ myani aguely tâmary modoram: “Alâ wâne todohogüin-ho etry. Kâingâsedaymby modo olâ enra yagâ tâzetyguedyzeba. Awylygue ise kâingâsedombyramo wawyly. 9 Idâwâtaungâ arua oze. Idânârâ monhontybymolâ ise mâingâseguylymo âtynra âetomoem” kely myani âty sodo.

<sup>10</sup> – Aituo myani emarydo arua oze idâlymo. Idânârâ kurâdo tiontyby ara nhadylymo âtynra. Kurâ domodo inakanhe aitânry modo, inakanhe aini modo alelâ myani nhakylymo. Saintybyem, âtâ tâjiwogonro iwâkuru tâduduoze myani eyanmo. Âty sodo ety tumyze myani. <sup>11</sup> Inepa kehoem myani âty sodo egawândyly, saintyby modo edaenkuze. Akaemo duay tâlâ olâ myani uguondo âtâ iwâkurugueba kulâ âzetydâni, igâsedby modo âtâ odaji egawântoem xuduypygueba kulâ. <sup>12</sup> Aituo myani âty sodo mâkâ uguondo nhapâiguel: “Âdaituoka kâingâsedaymby modoram kâunduypy âtâguepa âzetydâdybyem mawyly?” kely eyam. Mâkâ olâ myani nihoguba. <sup>13</sup> Aituo myani âty sodo aguely tâmary modoram: “Etaungâ awâkâ uguondo; kâingâsedbyby modoram kâunduypy âtâguepa kulâ âzetydâdyly. Tarâpa tâise awâkâ. Emakâjiwâdaungâ. Ihugâjiwâdaungâ. Iamu odaji samewâdaungâ warâ. Myarâ samewâdyby modo âsenagazedoram, ohogüendomoram, tyery nhaguhomoram warâ” kely myani âty sodo. <sup>14</sup> Arâ lâpylâ wâne, idânârâ kurâdo igâsedby Deusgue iwymâgoem. Aguipa kulâ olâ yeinwânni modo. Awylygue ise aguipa kulâ lâpylâ Deus eydâ atoram idânri modo awyly – kely Jesus.

*Impostu epywadyly wâgâ Jesus nhapâiguehomobyry  
(Mc 12.13-17; Lc 20.20-26)*

<sup>15</sup> Jesus aguely tindatuo myani fariseu domodo âxiguely âtunâgueze, Jesus tien-wentâdomoem. Warâ aguelymo:

— Moisés inweniby wâgâpa kulâ aguehoem aguyjiene — kelymo.

**16** Âtunâguedybyem tynynonro modo ewy, Herodes eynynonro modo ewy warâ Jesus agâ agueze ingonodylymo. Saintybyem, ingonotaymby modo Jesusram aguelymo:

— Pymâ, konokuni keba mawyly, tutuze xina. Deus ize ato wâgâ âkealâ xina mâenomedâdyly. Iozeno lelâ amygueho, ânguy izepa awyly umelâ. Pymâdo tynrenseim modo ize ato amânhetoem kulâ amygueho mâungukewâbyra âmâ. **17** Awylygue âdara impostu epywadyly wâgâ mâuntuly wao xinaram aguekâ. Moisés inweniby ara, koendâ pymâ Roma donro César-ram impostu ebyry epywadyly? Koendâpa? — kelymo.

**18** César tiunâguedoem kulâ tapâiguelymo awyly xuturimbyryem olâ myani Jesus.

Aituo aguely:

— Koendonro emyenro wâne âmaemo, koendonro keba olâ âmaemo. Inra esagueyby odaji wâne ânguylâ ihuguely myara wâne ienokudyze mawylymo. **19** Moeda enetaungâ, pymâ Roma donro xurâem kiempywado — kely.

Agueduo moeda nhadlymo. **20** Emaxi nhudulymo. Jesusram adapâigueolymo:

— Ânguy emydy ekudoka xirâ wogonro? Ânguy ezedy iwâgâ iweniby warâ? — kely.

**21** Aituo in-hogulymo:

— Roma donro kywymâry César ezedy, emydy warâ — kelymo.

Jesus aguely:

— César xurâ, Cesaranlâ xuduwanâtaungâ. Deus xurâ, Deusranlâ xuduwanâtaungâ warâ — kely.

**22** Jesus aguely tindatuo âseguâdâdylymo. Napâigueombyra idyllymo. Aituo idâlymo.

*Iguewâtyby modo kurâem itondlyly wâgâ nhapâiguehomobyry*

*(Mc 12.18-27; Lc 20.27-40)*

**23** Mârâ iguandyly wâgâlâ saduceu domodo ewy Jesus agâ âtunâgueze idâlymo. Iguewâtyby modo kurâem itondlyly einwânni keba myani akaemo. Jesus iopaji saindylymo. **24** Aguelymo:

— Idakâ, Pymâ. Moisés ezewenry tutuzelâ âmâ, iweâpa kydamudoem inweniby: “Uguondo tywydy namypalâ iguely-ro watay, iukonobyrylâ nohogüim iwydypyry agâ, imezeândoem. Aituo iamudo iazepy, igueypy imeryenlâ âdutuoly” kelype. **25** Xina olâ ise warâ nhegatuly. Tâlâ myakâwâm sete uguondo modo âjiaigoruem, âjukonoem waunlo. Iwaigoru ohogünly myakâwâm. Tywydy namypalâ iguely. Iukonobyrylâ myakâwâm ohogünrim pypâ agâ. **26** Mâkâ lâpylâ myakâwâm tywaigoru iwydypyry namypalâ iguely. Azagâ tokalâ ietomo iukono ohogünly myakâwâm pypâ agâ. Mâkâ lâpylâ iguewâm, tywaigoru iwydypyry namypalâ. Tywaigoru iwydypyry namypalâ lâpylâ myakâwâm quatro ietomo, cinco ietomo, seis ietomo, sete ietomo warâ iguewâdylymo. Sete uguondo lelâ myakâwâm mâkâ pekodo agâ ohogünby. **27** Idânârâ mâkâ uguondo modo iguewâpygueduo myakâwâm, mâkâ pekodo iguely lâpylâ.

**28** — Xirâ xina apâiguedyze ato. Âkealâ kuru igueypy kurâem itondlyly watay, âdaunlo uguondo akaemo sete ewy iwydyenka ise mâkâ, kurâem itonduomo? Idânârâ akaemo sete lelâ iwydyem ityby mawânkâ! — kelymo.

Âdalâ kulâ in-hoguly tientomoem kulâ olâ ara aguelymo.

**29** Aituo Jesus in-hogulymo:

— Iozepa kulâ âunâgumo! Mâuntuwanâbyra âmaemo Deus itaumbry awo wâgâ iweniby. Âdydo imeom aiese Deus ton-honre awyly, mâuntuba gâlâ âmaemo. **30** Iguewâtyby modo kurâem itonze lelâlâ, nigueompyra tâitomoem. Anju domodo nohogünwâbyra. Alâpylâ iguewâtyby modo, kurâem itonduo, nohogün-ondaymbamo ise. **31** Iozeno kuru iguewâtyby modo kurâem itonze kely mâtaimbaka minasemo? Enanâguewâdaungâ Deus Moisésram aguehobry. **32** Deus aguewâny: “Deus urâ, Abraão, Isaque, Jacó warâ iDeusry; tarâlâ asaemo yagâlâ” kewândymy. Kurâdo enanaji olâ, Deus einwânni

iguewâtyby modo, iguewâtybyem lelâlâ. Deus xurâem olâ akaemo igueypyemba, târâlâ akaemo Deus eydâ atodâ. Arâ aguehobyry wâgâ Deus einwântaynrim modo nigueompyra awyly kiuntuly – kely Jesus.

<sup>33</sup> Jesus aguely tindatuo toenzeim keba gâlâ kurâdo âsewânily, arâ kurâdo nhnomedâduo.

*Deus aguiendye ato  
(Mc 12.28-34; Lc 10.25-28)*

<sup>34</sup> Saduceu domodo nhewentâguylyemba kehoem Jesus aguely, kely tindatuo myani fariseu domodo âtâdyguylymo. <sup>35</sup> Moisés inweniby wâgâ enomedâniibe myani akaemo ewy. Inakanhe kulâ Jesus aguedyse wâne myani. Awylygue Jesusram aguely:

<sup>36</sup> — Toenzepa Moisés kâzewenryem inweniby modo. Âdaunloka koendonro kuru? Âdaunloka awârâ modo takazeno kuru? – kely.

<sup>37</sup> Jesus in-hoguly:

— “Kwyymâry Deus iwynedaungâ âdydo imeom, kurâ domodo warâ mânwynedomo takaze kehoem. Idânârâ ize matomo, Deus ize ato ara lelâ nidâ. Idânârâ angahumo oday âunâgommo Deus ize ato lelâ nidâ warâ.” <sup>38</sup> Xirâ aguely mawânrâ tâzezewenry takazeno kuru. <sup>39</sup> Eagonro tâzezewenry koendonro lâpylâ xirâ: “Agonromo agâ âpynedaungâ; koendâ mâzetomo ara, arâ lâpylâ agonrodo agâ koendâ âzetaungâ” kewândy Deus. <sup>40</sup> Arâ aini kydatay, idânârâ Moisés inweniby aralâ aguidyly, Deus itaumbypyry egatuwâni modo inweniby aralâ warâ – kely Jesus.

*Jesus, “Ânguya Messias?” kehobyry  
(Mc 12.35-37; Lc 20.41-44)*

<sup>41</sup> Târâ fariseu domodo âtâdyguybyem atay, Jesusram adapâigueolymo:

<sup>42</sup> — Âmaemoem, ânguya Messias, inanajimo? Ânguy iweryypyry? – kely.

Aituo in-hogulymo:

— Davi iweryypyry ise Messias. Davi pymâem atobyry ara ise mâtâ tarâ onro anaym pymâem awyly – kelymo.

Aituo Jesus eyanmo aguely:

<sup>43</sup> — Iozepa kulâ amyguelymo. Tutuzelâ myakâwândy Davi, âdaunlolâ kurâ takaze kehoem ton-honreim Messias awyly. Awylygue “Ywymâry” kewândy Davi Messiasram, niazepa awyly umelâ. Deus Ispiriturylâ mawânkâ eyam xutuen-hoim. Tutuzelâ âmaemo Davi inweniby:

<sup>44</sup> “Deus aguely myakâwâm Ywymâryram:

‘Yahoru eynynâ ikagâ tynrenseim ekadodâ,  
âduery modo eon-honru kainly ara,  
âdydo ara kulâ âhuru iaxi kânhedylymo ara’ kely Deus”

kely myakâwândy Davi inwenily.

<sup>45</sup> — Davilâ Messias tywymâryem awyly wâgâ aguewândymy. Awylygue kiuntuly âdaunlo kulâ uguondo keba awyly. Messias tynrenseim kuru awyly xutuwâdaungâ, Davi takaze – kely Jesus eyanmo.

<sup>46</sup> Jesus aguely tindatuo ânguy adâkedyzeba idyly, âkealâ aguely awylygue. Ilâpyryenlâ, ton-honremba idylymo, sapâigueze.

## 23

*Fariseu domodo wâgâ, Moisés inweniby wâgâ enomedâni modo wâgâ warâ Jesus aguehobyry*

*(Mc 12.38-39; Lc 11.43,46; 20.45-46)*

<sup>1</sup> Ilâpyryem Jesus xinaram, kurâ domodoram warâ aguely:

<sup>2</sup> — Moisés inweniby wâgâ enomedâni modo, fariseu domodo warâ koendâ tutuzemo Moisés inweniby. Awârâlâ akaemo ewanu, Moisés inweniby wâgâ enomedâdylylâ. <sup>3</sup> Awylygue aguedaymo, koendâ aguelymo idataungâ, idânârâ aguehomobyry ara aitaungâ warâ. Earamo adâiseba olâ itaungâ. Koendâ lelâlâ wâne nhenomedâdylymo. <sup>4</sup> “Aiekâ” tâkehomobyry ara anipyramo lâpylâ olâ. Tâjienwyeno tâmânreim sanâdyly tâmaenzeba ato ara awârâ nhenomedâdomo, tâmaenzein-emba awyly. Akaemolâ ne-maembamo, ânguy tienmawyadâdomoem. <sup>5</sup> Tâzehogueoly kulâ ize atomo. Tâjituby wâgâ Deus itaumbypyry inwenilymo watay imeâgâemba kehoem tâjituby tywendy wâgâ, tâwâry wâgâ warâ nhekâjilimo. Etaungâ etymo. Tâty tywogonro wâgâ imâem kehoem panu ihomigadyby nhekâjien-honlymo, tynrentomoem kulâ. <sup>6</sup> Âtâ tâdâtâdyguyho odaji tâtâduomo, tâgareim ekado wâgâ ekadylymo, arâ lâpylâ âty mododâ. <sup>7</sup> Âdykâlâ kurâdo âtâdyguyho einkâ takaduomo, mâkâ modo tâdaenkudyzemo, tynrendysemo warâ inanry. “Konomedâni” kelygue lelâ tâzekedyze awylymo.

<sup>8</sup> — Urâ lelâ inomedâni kuru. Awylygue “Ienomedâni” myguehondyze tâiseba itaungâ. Agonromo takazeno mâkeba âmaemo; idânârâ âzekiba âmaemo, âjiukono, âjiwaigoru waunlo ara lelâ. <sup>9</sup> Tunwyune lelâlâ wâne âmaemo, tarâ onro wâgâ. Deus kaynonro olâ unwânmoo kuru âugunimopyry. <sup>10</sup> Nhenimope lelâlâ wâne âmaemo, “Pymâ” myguehomo. Deus kaynonro olâ âwymârymo kuru. <sup>11</sup> Âduaymo tynrenseimbe-ro watay, imawyadâdâmo. <sup>12</sup> Koendonroem tawyly wâgâ aguewâni modo, tynrempa âiehoze. Koendonroem tawyly wâgâ aguedânrý modo olâ, âdyren-honze — kely Jesus.

*Jesus ton-honre aguehobyry koendâ lelâ aini emyenro modoram  
(Mc 12.40; Lc 11.39-42,44,52; 20.47)*

<sup>13</sup> Aituo Jesus aguely, Moisés inweniby wâgâ enomedâni modoram, fariseu domodoram warâ:

— Moisés inweniby wâgâ enomedâni modo, fariseu domodo warâ, toenzepa âsenagazeze âmaemo! Koendâ lelâ aini emyenro wâne âmaemo, koendonro aieni keba olâ âmaemo. Deus kaynonro âwymârymoem awyseba âmaemo; kurâ domodo iwymâryem idyseba warâ. Pyanta kadiadugue enahuimbyryem xave soeni emyenro âmaemo, igawâmpyra mitomoem, tâgawândysedo modo mâenkaunânehomba mitomoem lâpylâ warâ.

<sup>14</sup> [— Moisés inweniby wâgâ enomedâni modo, fariseu domodo warâ, toenzepa âsenagazeze âmaemo! Koendonro ara wâne amyguelymo, koendonro aieni keba olâ âmaemo. Pekodo pypâ modoram amyguelymo inanry: “Xinalâ ise âsejiguymo eni; tusonebama âmaemo” myguelymo. Isejiguymo âmaemoem mânhetomoem kulâ olâ mâenokudylimo. Deus agâ amyqedaymo, imeâgâemba kehoem amyguelymo, koendâ igaromoem kulâ. Awylygue ise Deus inagazedylymo, eagonro modo takaze kehoem.]

<sup>15</sup> — Moisés inweniby wâgâ enomedâni modo, fariseu domodo warâ, toenzepa âsenagazeze âmaemo! Koendonro emyenro wâne âmaemo, koendonro keba aieni olâ âmaemo. Taypa kehoem wâne mydâlymo, kâmayno einkâ kehoem akadylymo warâ wâne mânwânkylmogue kurâdo enomedâze. Arâ amidylymo, aguipa kurâdo mânomedâdomo tyeinwântoem, saguho tâzezewenry inmoly umelâ. Mânomedâdomo einwânni modo inakanhe kehoem adâisemo-ro warâ, amânhekylymo takaze kehoem. Agâmolâ ise idâlymo peto nhântânrý onwanji.

<sup>16</sup> — Âmaemo Moisés inweniby wâgâ enomedâni modo, fariseu domodo warâ toenzepa âsenagazeze âmaemo! Epy eagonro epy sakobâni ara kulâ âmaemo. Inanajimo, Deus ety oday ourugue xygatyby modo tywyneim kuru, Deus ety takaze. “Tâwâlâ ise Deus ety adakalaguely, auguehobyry agânhepyra urâ watay’ myguelymo-ro watay, tâwâlâ

'Aiese urâ' myguehobyry amânhepyra mawylymo. 'Tâwâlâ ise Deus ety odano ourugue xygatyby modo âjimatywâdyly, auguehobyry agânhepyra urâ watay' myguelymo-ro watay olâ, 'Aiese urâ' myguehobyry aietaungâ" warâ inanry mâenomedâdylymo.

<sup>17</sup> Aindonro âmaemo. Epy emyenro âmaemo! Deus ety tywyneim kuru, iodano modo takaze. Mârâ ioday awylygue kulâ awârâ modo iwynu. <sup>18</sup> Inanajimo, awârâ Deusram xuduypy tywyneim kuru, mesa Deusram xuduypy ekanâdo, altar takaze. "Tâwâlâ ise altar inakanhe idyly, auguehobyry agânhepyra urâ-ro watay' myguelymo-ro watay, tâwâlâ 'Aiese urâ' myguehobyry amânhepyra mawylymo. 'Tâwâlâ ise Deusram kâunduypy inakanhe idyly, auguehobyry agânhepyra urâ-ro watay' myguelymo-ro watay olâ, 'Aiese urâ' myguehobyry aietaungâ" warâ mâenomedâdylymo. <sup>19</sup> Epy emyenro âmaemo! Deusram mâengamelymo âdy mâkeba mâkâ xurâem, ety odano mesa onwa mâenkanâdylymo iraynâ. <sup>20</sup> Awylygue altar iwogonro tynrense kurâ watay, altar, iwogonro modo alelâ kiynrenkyly. <sup>21</sup> Deus, ety alelâ tywyneim. Deus ety tynrense kurâ-ro watay, alâpylâ Deus kiynrendyly. <sup>22</sup> Deus eydâ ato wâgâ aguykely watay, Deus wâgâ lâpylâ aguykely, mâkâlâ mawânkâ pymâ ton-honreim awâtârâ.

<sup>23</sup> — Moisés inweniby wâgâ enomedâni modo, fariseu domodo warâ, toenzepa âsenagazeze âmaemo! Koendonro emyenro kehoem âmaemo, koendonro aieni keba olâ. Dez âsejigumo ewy, tokalâ inanry mâundulymo Deusram, Moisés inweniby agueho ara. Âpa ezano pyni ekubâzeândo ewy warâ inanry Deusram mâundulymo, hortelâ, erva-doce, cominho, awârâ modo. Âdainkâba awârâ modo mâundulymo Deusram. Deus xurâem tywyneim kuru amânhepyra olâ minasemo. Âdypebaom, kaikânrô modo warâ mâintyendaymba minasemo. Ioze lelâ amipyra, Deus mâinwâmpyra âmaemo warâ. <sup>24</sup> Epy eagonro epy sakobâni emyenro âmaemo. Toenzepa kuru Moisés inweniby modo wâgâ kulâ mâtynanâdylymo; mârâ tywyneim kuru pylâ amânhepyra âmaemo-ro. Okumo ikano mazagâ mainguelymo, camelu pylâ monwonlymo-ro myara.

<sup>25</sup> — Moisés inweniby wâgâ enomedâni modo, fariseu domodo warâ, toenzepa âsenagazeze âmaemo! Koendonro emyenro âmaemo, koendonro aieni keba olâ âmaemo. Moisés inweniby ara amidyse mawylymo umelâ, inakanhe kulâ adâiselâ âmaemo tyewiâpazelâ warâ. Tâdâjitoguylâ tâkeze minasemo, ize matomo mâenmakehomoem. Tâlâ wâne kopu, prato warâ ikaynâ lelâ nhagokely, ioday pylâ nagokeba waunlo emyenro âmaemo. Deus ize ato ara adâjidylâ mâuntuba olâ âmaemo. <sup>26</sup> Epy ara kulâ âmaemo, fariseu domodo. Deus ize ato ara lelâ aitaungâ. Aituomoma ise Deus tywykeba nhedylymo. Kopu koendâ sagokeyby ara ise âmaemo, kuoho, odaymo alelâ.

<sup>27</sup> — Moisés inweniby wâgâ enomedâni modo, fariseu domodo warâ, toenzepa âsenagazeze âmaemo! Koendonro emyenro âmaemo, koendonro aieni keba olâ âmaemo. Igueypy etadâdo emyenro âmaemo! Kuoho tywâkure kehoem tapekeingue iwâkudâdybyem awylygue, iodano olâ tâjibyry, tywângueim myara âmaemo. <sup>28</sup> Koendonroem mawyse mawylymo kulâ, koendonro mâkeba âmaemo, angahumo oday âunârymo inakanhe lelâlâ — kely Jesus.

*Koendonro emyenro, koendonro aieni keba olâ waunlo modo enagazeze Deus  
(Lc 11.47-51)*

<sup>29</sup> Jesus aguely:

— Âmaemo Moisés inweniby wâgâ enomedâni modo, fariseu domodo warâ, toenzepa âsenagazeze âmaemo! Koendonro emyenro âmaemo, aunlo keba olâ âmaemo. Deus itaumbyry egatuwânybyry modo equepybyry etadâdobyry nhangatay tuhu iwâkuru kehoem ekanâni âmaemo. Torre iwâkuru kehoem aieni âmaemo, koendonro modo iguewâtyby enanâgueho. <sup>30</sup> Amyguelymo: "Tâlâ kurâ mârâ ume-ro watay, Deus emary modo kyânwâpyra tâise kurâ; kydamudo ara aguitaymba tâise kurâ" myguelymo.

<sup>31</sup> — Inakanhe mawylymo soense myguelymo wâgâlâ âdamudomo Deus emary modo xyârimpyry aralâ ânguydoem mawylymo mânehonlymo. <sup>32</sup> Alâ ise amidylymo âdamudomo aitobyry aralâ. Âmaemo ise akaemo aitobyry takaze kuru inakanhe aini. <sup>33</sup> Âgâu tyewiâseim emyenro âmaemo! Âgâu poji iaduly ume âsemagueze kewâni emyenro kulâ âmaemo! “Âsemagueze kurâ” myguelymo wâne. Peto nhântânry onwanji idâze lelâlâ olâ âmaemo.

<sup>34</sup> — Urâlâ ise ywâgâ aguenri âyanmo igononi. Aguelymo, mâinwantaguedyzeba olâ ise âmaemo. Akaemo ewy xyâze âmaemo. Akaemo ewy kruz onwa sakâjize âmaemo. Eagonro modo sapioguze âmaemo âtâ tâdâtâdyguyhodâ. Tâinkâ lelâba ise mâwinlymo, mâenagazedomoem. <sup>35</sup> Âdamudomo kurâdo koendonro modo nhâhobry wâgâ âmaemo ise tânagazezeim. Abel, Adão imery, âdaityby mâkeba myakâwândy saguhoem âdyoim. Alâ myakâwândy toenzepa âdaitânry modo âdyozesedyly. Xypyryem xyâypy myakâwândy Zacarias, Baraquias imery, âdyoly Deus etydâ. Mesa Deusram xuduypy ekanâdo, Âji Tynrenseim Kuru warâ ontay myakâwândy âdyoly. <sup>36</sup> Idânârâ âdamudomo aitobyry modo wâgâ âmaemo xirâ umeno modo ise tânagazezeim. Xirâ mâuntudyzemo kuru wato – kely Jesus.

*Jesus Jerusalém domodo wâgâ toenzepa kehoem itywandobyry  
(Lc 13.34-35)*

<sup>37</sup> Ilâpygueduo Jesus aguely Jerusalém donro modo wâgâ, eydâmolâ waunlo ara lelâ:

— Âmaemo, Jerusalém donro modoram xirâ auguely. Iweâparoem, âjidadârymo donro modo Deus itaumbyry egatuwânbiry modo xyâwânmomy. Agui Deus ingonotaymby modo tuhugue tyâzemo myakâwâm. Arâlâ olâ toenzepa âwynedylymo. Aukuma wâne tymeombyry tawâry iaxi tydâtgyuze, tuan-hun-hoem, myarâ idânârâ nhedysemo wawyly. Agui olâ keankâ âmaemo ewy yizepaom modo. <sup>38</sup> Deus odokezemo. Saguhoem wâne ani koendâ agâmo myarapa ise Deus. Âtâ sodokeyby ara ise âmaemo. <sup>39</sup> Ietondaymba ise âmaemo, “Koendonro lelâlâ âmâ, Deus Ingonyby” yam myguelymo ara. Xirâ mâuntudyzemo kuru wato – kely Jesus.

## 24

*“Deus ety adakalagueoze” Jesus kehobyry  
(Mc 13.1-2; Lc 21.5-6)*

<sup>1</sup> Jesus xina agâlâ âxiguely Deus ety idaserayba. Tâtâday, Jesus iopaji idâypyem, xina aguely ani:

— Egâ xirâ Deus ety! Iwâkuru kehoem xirâ! – xina kely.

<sup>2</sup> Aituo Jesus aguely:

— Arâ wâne awârâ Deus ety imâsedo mâendylymo. Adainhoze olâ awârâ. Idânârâ adakalagueoze. Angato inkâba ise awârâ tuhu modo; ihuguewâze awârâ onro onwa – kely Jesus.

*Jesus tâdâsenagazedyly wâgâ aguehobyry  
(Mc 13.3-13; Lc 21.7-19)*

<sup>3</sup> Ilâpyryem xina idâly iwyram, Se Oliveira Ekaram. Târâ Jesus ekadyly. Iopaji idâypyem xina nhapâiguely:

— Âdara kaise xypyry iwaguepa idyly, xina nhutuly? Âdy kaise inepa modopâdo odaxi itybyem awyly xina nhutuho? – xina kely.

<sup>4</sup> Jesus in-hoguly:

— Inanaynmolâ itaungâ, kodopâdo wâgâ ânguy inokubyramo itoem. <sup>5</sup> Xypyry etaji idyly ume, toenzepa ise “Messias urâ, Deus Ingonyby” kewâni modo. Toenzepa ise agueduomo âsenogudaynrim modo. <sup>6</sup> Tâinkâ lelâba âseguebylymo, âdyâwâdylymo warâ

kely idase âmaemo. Tadahulizeba olâ itaungâ, awârâ modo egary mâindatuomo. Aise awârâ modo, âdypydâdo keba olâ ise. <sup>7</sup> Âkelo anano modo âdyâwâsemo; âjitanwebaom modo âdyâwâsemo warâ. Tâinkâ lelâba ise onro âzekânily. Âtâ anakâ pyni peba ise. <sup>8</sup> Tâdâsenagazedyly imâem ise zedyly, pekodo âsenagazedyly xigâlegueam tymery iazehoem ewânugue myara.

<sup>9</sup> — Yizepaom modo awâsemo, yeinwândylymogue, asemo pymâ modo enado. Toenzepa inagazenehonzemo, âehonzemo warâ. Ynynonroem mawylymogue, toenzepa ise mâjiewiâseolymo. <sup>10</sup> Mârâ ume, toenzepa ise yeinwândyly imowâni modo, nâzenagazeoba tâitoem. Yeinwândyly imowânbiry modo, yeinwânni modo iewiâseze. Pymâ domodo enagazenehonzemo. <sup>11</sup> Kurâdo enokuni modope ise. Warâ ise aguelymo: “Deus wâgâ aguenri xina” kezemo. Kewâdylymo kulâ olâ ise. Toenzepa kurâdo enokuzemo. <sup>12</sup> Tâinkâ lelâba ise inakai modo awyly. Awyllygue ise ânguy tagonrodo niwynebyra awyly. Peto wâneam tyântoem âdiempa tâise, myara ise kurâdo âpynedly adainly. <sup>13</sup> Idânârâ awârâ emaenwânbiry modo olâ âsemagueze. Aunloenlâ ise Deus agâ awyllymo. <sup>14</sup> Tâinkâ lelâba ise unâ iwâkuru sani idâly. Deusgue tywymâgu wâgâ aguelymo ise. Xirâ modopygueduo ise kodopâdyly — kely Jesus.

*Jesus Jerusalém adainholi wâgâ aguehobry  
(Mc 13.14-23; Lc 21.20-24)*

<sup>15</sup> Jesus aguely:

— Âepanâgueze Deus izepaom kuru, mâkâ inakai kuru. Jerusalémdâ ise âepanâgueley, Deus ety oday, Deus unâry egatuim Daniel iwâgâ aguehobry. (Xirâ itainwâni modo xutuze, âdara keze aguely awyly.) <sup>16</sup> Mâkâ inakai Jerusalémram saintuo, âmaemo Judéia donro modo iwyram âwientaungâ, otoenze. <sup>17</sup> Inepa kehoem âwientaungâ. Itymo inatay âmaemo watay, tâwânseba itaungâ itymo odaji, âdylâ ese. <sup>18</sup> Âpa ezay âsewanize mataymo, inepa âwientaungâ. Itymo mâungukehomo ese todopâzeba itaungâ. <sup>19</sup> Toenzepa âsenagazeze pekodo modo ioday tymegueim, tuhuazeim modo warâ. Tahule âwienniembamo mawânkâ ise. <sup>20</sup> Deusram ekadaungâ, kopâ umepa, tâzekobyzegueho odaypa warâ, xirâ tâdâsenagazedo saindyly itoem, inepa tâdâwientoem nudupa ise.

<sup>21</sup> — Ton-honre ise awârâ tâdâsenagazedyly saindyly. Deus onro nhugutobyryenlâ arâ kehoem tâdâsenagazedyly peba awyly. Anitombyra ise-ro warâ xirâ emyenro kuru. <sup>22</sup> Deus olâ mârâ tâdâsenagazedo epagunâze, aisezedyly lelâ waypa itoem. Aypa watay, ânguy nemaenwâbyra tâise; idânârâ tadarinze. Tynynonroem tinduakeyby modo wâgâ olâ Deus anhedyly ise — kely Jesus.

<sup>23</sup> — Kodopâdo xutuze âmaemo, ânguy âdakepalâ. Awyllygue, “Anra merâ Messias” kely mâindatuomo, kâzeinwântaundâ. “Awâtârlâ awâkâ Messias” kely mâindatuomo, kâzeinwântaundâ warâ. <sup>24</sup> Mârâ ume toenzepa ise konokuni modo. “Deus Ingonytyby urâ” kezemo, kurâdo enokuze. “Deus keankâ ugononi, xunârybyry egatuze” kewâni modope lâpylâ ise, kurâdo enokuze. Adyesenry modo kehoem aiesemo, kurâ domodo iomazeâni aiesemo lâpylâ warâ. Idânârâ enokuze kezemo; Deus induakewâdyby modo enokuze kezemo lâpylâ, akaemo olâ ise nâzenokuoba.

<sup>25</sup> — Inanaynmolâ itaungâ. Aurudylymo olâ waunroenlâ, mârâ ume mâzenokuoba mitomoem. <sup>26</sup> Ânguylâ, “Egâ. Messias naintai. Poji anaym mâkâ” kely-ro watay, kâzeinwântaundâ. Uize tâtâzeba itaungâ, kodopâdaymba ise urâ ilâem. “Messias naintai. Âtâ oday notoendai” kely-ro watay, kâzeinwântaundâ. <sup>27</sup> Idânârâ kodopâdyly esemo. Ielu wâne kau wâgâ, âzechoruguely xixi egaseho eynynâ, egawânto eynynâ warâ idânârâ nhetomoem, myara ise kodopâduo, idânârâ yaindyly nhedylymo. <sup>28</sup> Tywângueimpe atoram elaho modo âtâdyguyl, ânguy “Târâ igueypy” keduo inkâba. Arâ lâpylâ ise kurâdoram kodopâdyly âdutuoly, ânguy âdakepalâ — kely Jesus.

*Uguondo Kaynâpa Âetyby odopâdo xutuho  
(Mc 13.24-27; Lc 21.25-28)*

<sup>29</sup> Jesus aguely:

— Mârâ tâdâsenagazedy sakabygueduo, xixi, nunâ warâ tohoreba ise. Ximukâ modo kau wâgâpa ihuguewâze. Kaynâ tyngataymby modo ihugueânze Deus. <sup>30</sup> Ilâem ise kau oday âepanâgueli urâ Uguondo Kaynâpa Âetyby kodopâdyly xutuho. Idânârâ ynynâbaom modo mâtâ tientuo, âseanezemo. Eunu duay ytâguyl esemo. Pymâem kuru wawylygue, toenzepa won-honru enehonze. <sup>31</sup> Târâ kaynâ trombeta idyen-honze urâ. Anju domodo igonose urâ, idânârâ âtâ anakâ Deus iduakeyby modo idâtyguyze, xixi egaseho eynynâ, egawânto eynynâ, norte eynynâ, sul eynynâ warâ — kely.

*Jesus odopâdo xutuhobe ise  
(Mc 13.28-31; Lc 21.29-33)*

<sup>32</sup> Jesus aguely:

— Inepa kodopâdyly awyly xutuhobe ise, iwaguepa kopâ ihugueho awyly xutuho ara. Etaungâ figueira. Iwatary modo ikuandaynly, sary ilusewâdyly warâ watay, tutuze âmaemo kopâ ume idyly awyly. <sup>33</sup> Myara lâpylâ ise xirâ auguehobyry modo aidyly adaguly mâtentuomo, kodopâdo iwaguepa awyly mâtuntulymo. <sup>34</sup> Aise xirâ âdydo imeom, idânârâ xirâ onro anano modo iguelymo iraynâ. <sup>35</sup> Kau, onro warâ adainze. Auguehobyry olâ ise nadaimpa, nâtugugueba warâ; aunloenlâ ise. Xirâ mâtuntudyzemo kuru wato — kely Jesus.

*Ohondbyem lelâ itaungâ, Jesus odopâdyly iraynâ  
(Mc 13.32-37; Lc 17.20-37)*

<sup>36</sup> Jesus aguely:

— Kunwym Deus kulelâ xuturim kuru âdara kodopâdyly awyly, kopae atay, peto oday atay warâ. Ânguy xirâ anano nutuwâbyra. Anju domodo nutuwâbyra. Urâ Deus imerylâ kâuntuwâbyra urâ. <sup>37</sup> Noé umenobryy ara, arâ lâpylâ ise urâ Uguondo Kaynâpa Âetyby kodopâduo. <sup>38</sup> Saguhoem, paru inwenlygue tadaidlymo iray, kurâdo xara tatomo aralâ mykâinane. Âwinduadylymo. Adakuilimo. Salokuzenomo modo, âwynsaundo modo warâ ohogünlymo warâ myakâwândy aidylymo, Noé pepi imâsedo âtâ emyenro tyngatyby odaji âxiedly iray. <sup>39</sup> Inepa iguein-em tawyly nutuwâbyramo myakâwândy. Deus olâ myakâwândy toenzepa kehoem kopâ tugonose idânârâ adain-homoem, myara lâpylâ ise agui kurâ domodo kodopâdyly nenuembyra awyly.

<sup>40</sup> — Kodopâduo, ynynonro modo sase urâ. Ynynâbaom modo olâ ise urâ kampyra. Ynynonro modo, ynynâbaom modo agâ on-hoan-ro watay, ynynonro modo lelâ ise taseim Deus eydâ atoam. Azagâ uguondo âpa ezay tâwaneim, ynynonro, ynynâbaom warâ watay, ynynonro adahoze Deusram, eagonro olâ âjionze. <sup>41</sup> Azagâ pekodo trigu sakoim, ynynonro, ynynâbaom warâ watay, ynynonro adahoze Deusram, eagonro olâ âjionze. <sup>42</sup> Ywânwântâlâ itaungâ. Mâuntuwâbyra âmaemo, âdara urâ Uguondo Kaynâpa Âetyby kodopâdyly awyly. <sup>43</sup> Âdara tâmagazeim saindyly awyly nutuwâbyra âtâ sodo. Tutuze-ro watay, tânanaynlâ tâise, tysejiguy tienmakehoem. <sup>44</sup> Kodopâdyly tânuenzelâ itaungâ; inanaynmolâ lâpylâ itaungâ warâ. Ienuendylymo ume inkâba ise urâ Uguondo Kaynâpa Âetyby kodopâdyly. Xirâ mâtuntudyzemo kuru wato — kely Jesus.

*Tâwaneim koendonro wâgâ, inakai wâgâ warâ Jesus unâ nhegatuhobyry  
(Lc 12.41-48)*

<sup>45</sup> Jesus aguely:

— Unâ segatuji wao, âdara kodopâdyly awyly mâtuntuhomoem. Fazenda sodo taypa tâtâly iraynâ, tagâ tâwaneim tonomegueim, koendonroram watâkeze: “Udâly wao ise. Âmâ ise iety, ysejiguy, yagâ tâwanuneim modo warâ eni. Kopaelâgâembaba ise akaemo

mâwandyly. Âdy ize atomo âundugâ” tâkeze mâkâ eagâ ewano, tâtâday. Tâwaneim koendonro eagâ tânuenze myara ienuendaungâ. <sup>46</sup> Fazenda sodo aguehobyry ara aidyly-ro watay, koendâ ise iwymâry eagâ awyly, todopâduo. <sup>47</sup> Tâmaryam aguely ise: “Koendonro lelâ âmâ. Koendâ lelâ tâwanuneim modo medâ. Awylygue idânârâ ysejiguy modo eniem ise âmâ” kely. <sup>48</sup> Koendâ tâwaneim keba mâkâ watay olâ eagâ tâwano aguehobyry ara anipyra. “Tahule nodopâdaymba ise mâkâ sodo” kely tyangahu oday. <sup>49</sup> Adâkeduo, koendâ tagonro modo nepyra. Tapioguzemo. Âtydâ kulâ warâ. Âwinduadyly, adakuily, toku ikaji kehoem idyly toku ikano modo agâ warâ aidyly. <sup>50</sup> Mâkâ tâwaneim tynwânwândyly umepa iwymâry saindyly. <sup>51</sup> Eagâ ewano mâkâ tâwaneim agâ tyewiâpaze, tâdâsenagazedoram talehoze-ro warâ, Deus einwântânry modo âsenagazedoram. Ohogüenze, tyery saguze warâ tâsenagazedylygue – kely Jesus.

## 25

### *Jesus dez âwynsaundo wâgâ unâ nhegatuhobyry*

<sup>1</sup>Jesus aguely:

— Unâ segatuji wao, âdara Deus kaynonro kywymâryem lelâlâ idyly awyly mâuntuhomoem. Tâlâ myani kopae salokuzenomo ohogün-ho etyry. Kuoho myani akaemo dez âwynsaundo modo mâkâ salokuzenomo enuenze. Lamparinague tâmatunemo myani. <sup>2-4</sup>Cinco lelâ myani akaemo âwynsaundo modo ewy tonomegueim. Tumyke myani tylamparinary nhadylymo, sapadondo warâ. Cinco âwynsaundo modo myani tonomegueim keba. Tumyke lelâ tylamparinary nhadylymo; sapadondo napyramo olâ myani. <sup>5</sup>Tahuleba idyly myani ohogünrim. Aituo myani idânârâ âwynsaundo modo xuedunu iwynely, xykylymo.

<sup>6</sup> — Kuetâji xuagueânímo adaenkely: “Etaungâ! Ohogünrim saindyly! Iotaungârâ” kely.

<sup>7</sup> — Aituo myani âwynsaundo modo xuaguewâdyly. Tylamparinary nhântybyem awyly nhedylymo, taseba awylygue. Aituo tonomegueim modo nhapadylymo, nhe-manâdylymo warâ. <sup>8</sup>Aituo myani akaemo âwynsaundo modo tonomeguenry aguely: “Âdiempa wao xina ilamparinary eoku âunduwâtaungâ. Xina ilamparinary nhâdyly olâ” kelymo.

<sup>9</sup> — Tonomegueim modo olâ en-hem kepa. Aguelymo myani: “Sapadondo xina nhenetyby nuduwâpyra âmaemoem. Âlamparinarymo eoku anâtaunda” kelymo.

<sup>10</sup> — Agueduomo myani akaemo tonomeguenry modo idâlymo tylamparinary eoku sanâse. Nodopâbyramolâ myani ohogünrim saindyly. Akaemo tonomegueim modo myani ohondypyenlâ tawlygue, eagâlâ egawândylymo âtyam. Warâ myani pyanta âzenahuoly, xavepe âieholys warâ.

<sup>11</sup> — Ilâpygueduo myani akaemo âwynsaundo modo tonomeguenry saindylymo. Ohogünrinram adaenkelymo: “Yataen-ho! Yataen-ho! Xina egawântoem pyanta enahunguegâ” kelymo.

<sup>12</sup> — Ohogünrim eyanmo aguely: “Kâenahungueba ise aze. Tarâpa itaungâ. Yataen-ho mâkeba âmaemo” kely. Warâ myani âwynsaundo modo, tonomegueim, tonomeguenry warâ aidylymo – kely Jesus.

<sup>13</sup>Warâ Jesus xinaram aguely:

— Inanaynmolâ itaungâ! Mâuntuwâbyra ise âmaemo âdara kodopâdyly – kely.

### *Azagâ tokalâ warâ tâwaneim modo wâgâ unâ Jesus nhegatuhobyry*

(Lc 19.11-27)

<sup>14</sup>Jesus aguely:

— Unâ segatuji wao âdara Deus kaynonro kywymâryem lelâlâ idyly awyly mâuntuhomoem. Uguondo tydinerugueim âkelo âtâ anaxi tâtâly iraynâ myani

tagâ tâwanuneim modo ingâsedly. Eyanmo aguely: “Koendâne ysejiguy etaungâ. Dinhru xirâ âyanmo kâunduly. Imâem ienehowâdaungâne xirâ âyanmo kâunduypy” kely myani. <sup>15</sup> Aiedyly nhutulymo aralâ olâ myani nhuduly, imâem nhetomoem. Saguoram quinhentas moedas ourugueto modo\* myani nhuduly, nhatanoram duzentas moedas, azagâ tokalâ ietomoram, cem moedas warâ. Aitybyem myani idâly. <sup>16</sup> Mâkâ quinhentas moedas lelâ emakerimbyry âdyo imeom nhanâdly, tyanâtyby vende nhedyly warâ myani mâtâ dinherugue. Alâ imâem nhenehonly; mil moedas lelâ idly. <sup>17</sup> Mâkâ duzentas moedas emakerimbyry, alâpylâ myani âdyo imeom nhanâdly, tyanâtyby vende nhedyly warâ mâtâ dinherugue. Alâpylâ dinheru imâem nhenehonly; quattrocentas moedas nhedyly. <sup>18</sup> Mâkâ cem moedas emakerimbyry olâ myani anipyra. Tâtagueim tâsagueze, dinheru tâpyâze warâ myani.

<sup>19</sup> — Iweâpa itybyem myani mâkâ dinheru sodo odopâdly. Saintybyem myani tokalâ, tokalâ warâ tâmary modo ingâsedly, dinheru âdanhetbymo awyly tiuntuhoem. <sup>20</sup> Saguhoem kuru saini myani mâkâ quinhentas moedas emakerimbyry. Mil moedas myani nhuduly eagâ tâwanonra. Aituo myani aguely: “Pymâ, quinhentas moedas keankâ yam mâtudly. Âdyo imeom sanâdâ, kanâtyby vende xiedâ warâ, quinhentas moedas kânhetondoem. Anra, mil moedas lelâ âdinheruru” — kely.

<sup>21</sup> — “Koendâlâ myze amidâ!” kely myani iwymâry. “Koendorro âmâ. ‘Aiekâ’ ugue-hobyry amiendâ. Koendâmy awârâ âdiempa dinheru kâunduypy mewani. Âdyo imeom manâdâ, manâtyby vende miedâ warâ. Aituo, imâemba kâunduypy imâem mânhenhon-hobyry wâgâ, imâem ise âmâem kâunduly. Yagâ âzetyguegârâ” kely myani iwymâry.

<sup>22</sup> — Ilâpyryem myani duzentas moedas emakerimbyry idâly. Aituo aguely: “Pymâ, duzentas moedas keankâ yam mâtudly. Âdyo imeom sanâdâ, kanâtyby vende xiedâ warâ âdinherurugue, duzentas moedas kânhetondoem. Anra xirâ quattrocentas moedas lelâ âdinheruru” — kely.

<sup>23</sup> — “Koendâlâ myze amidâ!” kely myani iwymâry. “Koendorro âmâ. ‘Aiekâ’ ugue-hobyry amiendâ. Koendâmy awârâ âdiempa dinheru kâunduypy mewani. Âdyo imeom manâdâ, manâtyby vende miedâ warâ. Aituo, imâemba kâunduypy imâem mânhenhon-hobyry wâgâ, imâem ise âmâem kâunduly. Âekâ. Yagâ âzetyguegârâ” kely lâpylâ myani mâtâna.

<sup>24</sup> — Aituo myani mâkâ cem moedas emakerimbyry idâly, aguely: “Pymâ, ânguy ityeni keba mawyly, tutuze urâ. Mâsewanihobyrygueba âdype midyly. Xina âsewanirim, âmâ pylâ xina ewanopyrygue âdypeon-ro. <sup>25</sup> Âytadâ, awylygue âdinheruru ondaxi sepyâdâ. Egâ, anra tarâ dinheru mâtudly” kely.

<sup>26</sup> — Iwymâry eyam aguely myani: “Inakanhe tâwaneim, xynumi warâ myanze âmâ. Yam amyguely enra: ‘Mâsewanihobyrygueba âdype midyly. Xina âsewanirim, âmâ pylâ xina ewanopyrygue âdypeon-ro’ mygueanse. <sup>27</sup> Ydinheruru imâem itoem âdy amânhedyseba matay, dinheru xynanâdaynrim modoram metadânehondyzê banco odaji. Imâem ydinheruru tyenehonze tâise akaemo. Arâ tâise kodopâduo imâem kâenmakely” kely. Aituo iwymâry aguely eagonrodoram: <sup>28</sup> “Merâ inakanhe tâwaneim emayumba moeda emakewâdaungâ. Mil moeda modopeonra xuduwaataungâ” kely. <sup>29</sup> “Mâkâ toenzepa tâlânro, imâem emakeze, iwerâ tâlâ tato takaze. Mâkâ agui ipaom olâ, âzemakeoze iwerâ aguipa tâlâ ato. <sup>30</sup> Iamu odaxi awâkâ tâwaneim inakai samewâdaungâ, toenzepa âsenagazedoem. Ohogüenze, tyery saguze warâ awâkâ târâ tâsenagazedylygue” kely myani

\* <sup>25:15</sup> Gregüem aguehobyry, cinco talentos, azagâ talentos, tokalâ talento warâ. Quinze anos lelâ kâwanu ebyry myani tokalâ talento. Awylygue, xuduypy toenzepa dinheru awyly, toenzepa lelâlâ. Setenta e cinco anos âsewanizeze tatobyry ebyry waunlo ara myani waunro nhemakely. Eagonro myani trinta anos âsewanizeze tatobyry ara. Tokalâ ieto uguondo myani quinze anos âsewanizeze tatobyry ebyry ara.

iwymârymo tonlo modoram. Warâ myani akaemo azagâ tokalâ warâ tâwaneim aidylymo – kely Jesus.

*Deus eynynonro, eynynâbaom modo warâ iduakeho*

<sup>31</sup> Jesus aguely xinaram:

— Pymâem kuru wituo ise kodopâdyly. Anju domodo agâ ise kâewyly. Yaimpygueduo, pymâ tynreim ekado wâgâ ise iekadyly. <sup>32</sup> Tâinkâ lelâba ise anju domodo adakobâdyly kurâdo idâtyguyze. Kaneru eni wâne, kaneru modo âikânra tyese kabra modo duaypa myara ise ynynonro modo âikânra âedylymo, ynynonro keba modo duaypa. <sup>33</sup> Yahoru eynynâ ise ynynonro modo kâenjitâdyly. Pâem eynynâ ise ynynâbaom modo kâenjitâdyly, tyguelâ itomoem. <sup>34</sup> Aituo ise yahoru eynynonro modoram auguely: “Yagâ âetaungâ, Deus xurâem tywyneim âmaemo. Deus idânârâ nhugudyly iraynâlâ myakâwândy, âmaemoem koendonro nhekanâdyly. Deusgue tywymâgueim modo xurâ tâlâ mâkâ, mâtâ koendonro lelâlâ. <sup>35</sup> Koendâ lelâ ise Deus agâmo, koendâ yagâ mawylymogue. Iewindy ume, uwamâmo. Yatuandyly ume, parugue yakuiwânmô. Itymo anakâ kadakobâdyly ume, itymodâ ykyânmâmo, utubamolâ. <sup>36</sup> Iety ywogonro muduwânmô, tâtyemba wawyly ume. Iewânu ume, wonmâmo, Iewiânmâmo warâ, kua witoem. Kadeia oday watay, yam IU ise mydâwânmô, womazeânze” keze urâ ynynonro modoram.

<sup>37</sup> — Aituo ise koendonro modo yam aguely: “Pymâ, xina nutuwâbyra âdakeze amyguelly awyly” kelymo ise. “Âdykâ tâty anaym xina nhetaymba ani. Inwindy ume xina âwapyra ani. Âdykâ xina akuiwâbyra, atuandyly ume. <sup>38</sup> Âkykândaymba lâpylâ warâ xina tâty oday. Tâtyemba mawyly ume, xina itydâdaymba ani. <sup>39</sup> Iwânu ume, ontaymba, iweântaymba warâ ani xina, kua mitoem. Kadeia oday matay, omazeânze xina nâtâwâbyra ani” kezemo yam. <sup>40</sup> Warâ ise auguely eyanmo:

— “Ynynonro modoram pyni, paru, âtâ xykyhomo warâ muduwânmô. Ynynonro modo ewânumo ume, kadeia oday awylymo ume warâ, iomazeânze mydâwânmô. Ukono emyenro modo koendâ memâmo. Kaikânro modo, tâwâneim modo warâ koendâ mäendylymo-ro watay, urâlâ mäenkylymo” keze urâ yagonro modoram. Xirâ mâtudyzemo kuru wato.

<sup>41</sup> — Warâ ise akaemo pâem eynynonro modoram auguely: “Ydâpa itaungâ, âmaemo Deus izepa ato modo. Inakanhe kehoem ise mäsenagazedylymo. Mâtâ peto nhântâny Diabu ejidyem, eanjury kadopâ keho modo ejidyem warâ Deus anhetyby odaji idâze âmaemo. Âdara igasewâbyra ise âmaemo târâpa. <sup>42</sup> Koendâ inkâba ani iedylymo. Awylygue ise mäzenagazeolymo lâpylâ. Iewindy ume, uwapyra mataunaguynre. Yatuandyly ume, yakuiba mataunaguynre parugue. <sup>43</sup> Itymo anakâ kadakobâdyly ume, itymodâ ykyâmbrya mataunaguynre. Tâtyemba wawyly ume, iety ywogonro mâtundupa mataunaguynre. Iewânu ume, wompyra, iewiâmpyra warâ mataunaguynre, kua witoem. Kadeia oday watay, yam IU ise mydâwâpyra mataunaguynre womazeânze” keze urâ ynynâbaom modoram.

<sup>44</sup> — Warâ ise yam aguelymo: “Âdykâ nhetaymba xina. Awylygue ani koendâ tawyly tienehon-hoem xina aniempyra awyly. Inwindy ume xina âwapyra; atuandyly ume, xina akuiba, âdykâ xina agâ mipyra mawylygue. Tâtyram âkykândaymba xina apyra; ity owogonro xina nudupa, xina agâ mipyra mawylygue. Iwânu ume, kadeia oday mawyly ume warâ xina âyam IU nipyra, xina âutuba awylygue” kezemo yam.

<sup>45</sup> — Aituo ise auguely eyanmo: “Âdykâ kaikânro modo mäenmawyadâdaymba ani âmaemo. Akaemo mäenmawyadâdaymba âmaemo watay, urâlâ mäenmawyadâdyzeba matomo” keze urâ eyanmo. Xirâ mâtudyzemo kuru wato – kely.

<sup>46</sup> — Akaemo ynynâbaom modo idâlymo ise myarâ kurâdo inakai modo âsenagazedoram. Ynynonro modo olâ Deus agâ idâze aunloenlâ – kely Jesus.

## 26

*Jesus xyâly wâgâ aguehomobyry  
(Mc 14.1-2; Lc 22.1-2; Jo 11.45-57)*

<sup>1</sup> Waunroem aini modogue xina tienomedâbygueduo, Jesus xinaram agueondly:

<sup>2</sup> — Tutuzelâ âmaemo, kopaelâgâbygueduo kâtyry Páscoa awyly, kydamudo Egitodâba âsemaguehomobyry etyry. Yizepaom modo yawânehonzemo, kruz onwa yakâjien-honzemo yiguehoem warâ. Warâ ise ayedyllymo urâ Uguondo Kaynâpa Âetyby — kely xinaram.

<sup>3</sup> Aguehobyry ara kehoem aidyly. Kurâdo eynynâ Deus agâ aguewâni modo iwymâryo, kywymâry modo warâ Caifás ety imâsedo oday myani âtâdyguylymo. Caifás ani kurâdo eynynâ Deus agâ aguewâni modo iwymâry kuru. <sup>4</sup> Âjigue aguelymo myani, âdara Jesus tientadânehonly, tyâen-honly warâ wâgâ. Kurâ domodo nhutudyzebamo olâ myani. Aituo myani aguelymo:

<sup>5</sup> — Koendâpa ise enra âty ume sawâdyly. Toenzepa ise kurâdo âzetygueni modo. Jesus etadâdobryy egary indadylymo watay, kagâ iewiâpazemo, âjitoguyzemo warâ — kelymo wâne myani.

*Pekodo Jesus nhangahu onwa uriza nhapâdobyry  
(Mc 14.3-9; Jo 12.1-8)*

<sup>6</sup> Jesus agâ xina idâondly âtâ anary Betanianra. Târâ tatay xina idâly Simão tâjimituguelygue tâwâneimpyry etyram. <sup>7</sup> Xina âwinduadyly ume, pekodo Jesus iopaji saindyly. Alabastrogue uriza etary xygatybygue tâmase; uriza tâwâenseim nardogue tumyke ani mâtâ. Uriza tyânrrângueim nhapâdly Jesus nhangahu onwa. <sup>8</sup> Pekodo uriza nhapâdly tientuo aidyly xina nehoguebyra. Aituo âjigue xina aguely:

— Etaungâ! Awâkâ pekodo uriza tâwâenseim alâ kulâ nhumedyly! <sup>9</sup> Awârâ uriza vende iedylylâ-ro watay, toenzepa tâise idinherugu. Koendâ tâise vende nhedyly, âdy pebaom modoram dinheru tiunduhoem — xina kely.

<sup>10</sup> Xina aguely xuturimbyryem olâ Jesus. Aituo xinaram aguely:

— Arâ adâkezeba itaungâ merâ pekodoram. Âwankuem kâietaundâ warâ. Koendonro merâ urâem anhekyly. <sup>11</sup> Aunlolâ ise âdy pebaom modope awyly mânemawyadâdomoem. Urâ olâ ise âdiempa kulâ agâmo wawyly. <sup>12</sup> Wonwa uriza tyânrrângueim niapâdai, yigueduo, ieguepybyry etadâdo odaji ietoem, wondly ara. <sup>13</sup> Merâ anhetyby ânguy nenanânehonwâbyra ise. Âdykâlâ unâ koendonro egatuly watay, tânanâguezeinlâ ise merâ aitobyry. Xirâ mâtuntudyzemo kuru wato — kely Jesus.

*Jesus tiengamehoem, Judas dinheru nhemakehobyry  
(Mc 14.10-11; Lc 22.3-6)*

<sup>14</sup> Aituo Jesus eynynonroem ityby ewy Judas xidadâ Queriote donro idâly kurâdo eynynâ Deus agâ aguewâni modo iwymârydoram, Jesus wâgâ agueze. <sup>15</sup> Aituo myani Judas aguely:

— Âdaraka ise iepywadylymo, Jesus âyanmo kâengameduo? — kely.

— Trinta moedas pratague ise ipywadyly. Anra — kelymo myani.

Aituo Judas dinheru nhemakely. <sup>16</sup> Ilâpygueduo Judas âdara Jesus tiengamely awyly wâgâ âpaunzedly.

*Jesus, “Ohondaungâ, Páscoa kientyguedoem” kehobyry  
(Mc 14.12-21; Lc 22.7-13; Jo 13.21-30)*

<sup>17</sup> Pão ioliho pebaom etyguedo adaguly ume Jesusram xina aguely:

— Âdykâka ise pyni iwâkuru xina anhenehondye mawyly, xirâ Páscoa ume kydawinduatoem? — xina kely.

<sup>18</sup> Jesus in-hoguly:

— Jerusalémdâ ise kydâwinduadyly. Idâwâtaungâ wao myarâ. Mâkâ uguondo auguehobyry agâ oxioze âmaemo. “ ‘Alâ enra iweâma’ keanryze Konomedâni. Itydâ ise tynynonro modo agâ Páscoa nhetyguedyly, âwinduadyly warâ” kewâtaunda eyam — kely Jesus.

<sup>19</sup> Jesus aguehobyry ara aidylymo. Pyni modo adyenehonzemo myani, Páscoa xina nhetyguedoem.

<sup>20</sup> Iguampygueduo xina myarâ idâly Jesus agâ. Xina ekadyly tâwinduatoem. <sup>21</sup> Xina âwinduatay Jesus aguely xinaram:

— Idataungâ wao. Tokalâ âmaemo ewy ise yizepanro modoram iegamerim — kely.

<sup>22</sup> Jesus agueduo xina itynwandyly. Mâkâ, mâtâ warâ xina aguely:

— Urâ mâkeba ise igamenri, Konomedâni! — xina kely.

<sup>23</sup> Aituo Jesus aguely:

— Âmaemo ewylâ olâ ise iegamerim, yagâ pão edawynrim modo ewylâ. <sup>24</sup> Deus itaumbyry egatuwâni modo iweniwânmy ywâgâ: “Uguondo Kaynâpa Âetyby âdyoze” kely myakâwâm inwenilimo. Aguehomobyry ara ise awidly. Toenzepa âsenagazeze olâ yizepanro modo emaxi iegamerimbyry. Niazepa wânkâ nidysse! — kely.

<sup>25</sup> Aituo egamenrianlâ adapâigueoly, Judasram:

— Yanlâ amyguely watay, Ienomedâni. Urâ mâkeba ise igamenri — kely.

Aituo Jesus in-hoguly:

Mâkadulylâ awârâ — kely.

*Kywymâry Jesus iguehobyry enanâgueho*

(Mc 14.22-26; Lc 22.14-20; 1Co 11.23-25)

<sup>26</sup> Tâwinduatay Jesus pão nhanâdyly. Deusram aguely:

— Koendonro âmâ, Pabai, xirâ pão mâundulygue — kely.

Aguenripyryem pão nhepajiwâdyly. Mâkânra, mâtâ warâ nhuduly. Aguely xinaram:

— Sawâtaungâ. Edawynwâtaungâ. Xirâ pão kâempajiwâdyby, wodolâ xirâ — kely.

<sup>27</sup> Ilâpyryem kopu vinhue taseim tâmaxi nhedyly. Deusram aguely:

— Koendonro âmâ, Pabai, xirâ vinhu mâundulygue — kely.

Aguenripyryem, mâtâ warâ nhuduly, xina nhenyhoem. Aituo aguely xinaram:

— Enywâdaungâ idânârâ âmaemo. <sup>28</sup> Unulâ xirâ. Tâunkeze ise yiguely, toenzepa kurâdo emakeze, inakanhe aitomobyry xygakeze. “Ynynonro modo emakeze urâ” Deus kehobyry mawânrâ. Awylygue iseunu tyapâze yigueduo, iwelo tâdâsemaguehobe Deus nhedyly. <sup>29</sup> Xirâ pygueduo, Páscoa kâentyguedombyra, vinhu kâenyombyra warâ wao ise urâ agâmo, Pabai Deus eynynonro modo myarâ pymâem atoram saindylymo ara. Xirâ mâuntudyzemo kuru wato — kely Jesus.

<sup>30</sup> Âty âwanikebygueduo, xina igâtudyly Deus tionmaendoem. Igâtudybyem xina idâly iwy Se Oliveira Ekaram.

*Jesus Pedroram, “Azagâ tokalâ warâ, ‘Kâuntuwâbyra urâ awâkâ’ keze âmâ” kehobyry*

(Mc 14.27-31; Lc 22.31-34; Jo 13.36-38)

<sup>31</sup> Jesus aguely xinaram:

— Xirâ kopae idânârâ âwiense âmaemo. Wodokeze âmaemo. Deus itaumbyry sawo wâgâ iwenibyem: “Kaneru sodo xyâduo, idânârâ eguy modo adapâeguyze” kewânmy Deus. Arâ ise ayedylymo. <sup>32</sup> Yigueduo, kurâem itonze olâ urâ. Kurâem witombygueduo, âwaynâmolâ ise udâly Galileiaram — kely.

<sup>33</sup> Agueduo myani Pedro aguely:

— Tâwâlâ wâne ise idânârâ odokelymo. Urâ olâ ise odokeba — kely.

<sup>34</sup> Jesus olâ warâ eyam aguely:

— Xirâ kopae, aukuma igâtudyly iraynâ, azagâ tokalâ warâ ise “Jesus kâuntuwâbyra urâ” myguely. Xirâ mâuntudye wato kuru — kely.

<sup>35</sup> Pedro olâ agueondyly lelâ:

— “Jesus kâuntuwâbyra urâ” uguewâpyra ise urâ. Tâwâlâ ise agâlâ yâlymo. “Jesus kâuntuwâbyra urâ” uguepa olâ ise urâ — kely.

Idânârâ xina Jesus eynynonro modo aguely:

— “Jesus kâuntuwâbyra urâ” xina kepa lâpylâ ise — xina kely.

*Jesus Tunwym agâ Getsemanidâ aguehobyry*

(*Mc 14.32-42; Lc 22.39-46*)

<sup>36</sup> Xina saindyly âji Getsemaniram. Myarâ saintybyem Jesus xinaram aguely:

— Tarâlâ wao itaungâ, ikadaungâ warâ, Deus agâ agueze udâday — kely.

<sup>37</sup> Adâkebygueduo, Jesus Pedroram, azagâ Zebedeu imeombyryram warâ aguely:

— Yagâ âetaungâ; akaemo modo lelâ ise taunlo — kely.

Aituo eagâ idâlymo iwague nekâ. Târâ myani toenzepa kehoem Jesus itywandyly.

<sup>38</sup> Aituo myani aguely eyanmo:

— Toenzepa enra ytynru, yigueho ara kehoem. Tarâlâ wao itaungâ. Tykyzeba olâ itaungâ, ynynâ Deus agâ amyguehomoem — kely.

<sup>39</sup> Âdiempa waunroem idâly myani. Târâ myani âzeguhaoam idyly, Deus agâ adâkehoem:

— Pabai, toenzepa kuru kâsenagazedyly warâ izepa wâne urâ. Ize wato araba olâ aidyse wawyly, ize mato aralâ — kely myani.

<sup>40</sup> Deus agâ agueypyem myani, Pedro, Tiago, João warâ âxiân-hobryram idâly, xykylymo ume. Xuagueânimopyryem myani aguely Pedroam:

— Âmâ, agonrodo warâ âkylymo enra. Âdiempalâ ynynâ Deus agâ amyguehomoem âkyba mitomoem nudupa kuru? — kely.

Aituo eyanmo aguely:

<sup>41</sup> — Nhaum, xuagueypyem lelâ itaungâ, inanaynmolâ warâ. Satanás umohomoem aienehonze keze. Deusram ekadaungâ, Satanás ize ato amânhepyra mitomoem. Deus eon-honru peba kulâ yagâ tâdâsenagazedyly mâenmaenwâbyra ise âmaemo, yagâ mâsenagazedyze mawylymo umelâ — kely myani Jesus.

<sup>42</sup> Jesus idâondyly âdiempa waunroem, Deus agâ agueonse:

— Pabai, idânârâ adyese âmâ. Toenzepa kuru kâsenagazedyly warâ izepa wâne urâ. Ize wato araba olâ aidyse wawyly, ize mato aralâ — kely.

<sup>43</sup> Ilâpyryem myani odopâdondyly Pedro, Tiago, João warâ eydâ atoram. Xykyondybymoem awyly nhedyly. Toenzepa myani xuedunumo, xuagueypyem lelâ itomoem nudupa. <sup>44</sup> Jesus târâpa âxigueondyly. Deus agâ agueonse idâly. Alâpylâ myani agueondyly:

— Pabai, idânârâ adyese âmâ. Toenzepa kuru kâsenagazedyly warâ izepa wâne urâ. Ize wato araba olâ aidyse wawyly, ize mato aralâ — kely.

<sup>45</sup> Ilâpyryem Jesus eagâ idâypy modo warâ odopâdylymo xina eydâ atoram. Xinaram Jesus aguely:

— Âkylymo kulâ enra. Inuzeba lelâ mataunaze, Deus agâ amyguehomoem. Alâ! Iweâ lelâlâ yizepaom modo emaxi âduduze urâ. <sup>46</sup> Autaungâ. Inoro, eagâmo kyodoxioda. Etaungâ! Awâkâlâ iegamerim saindyly — kely.

*Jesus nhawâtomobyry*

(*Mc 14.43-52; Lc 22.47-53; Jo 18.3-12*)

<sup>47</sup> Jesus aguely ume Judas saindyly. Jesus eynynonrolâ kâinane mâkâ. Toenzepa kurâdo eynynâ Deus agâ aguewâni modo iwymârydo ingonotaymby modo, kywymârydo ingonotaymby modo warâ Judas agâ saindylymo. Espadague, segue warâ tâmatune kehoem saindylymo, Jesus sawâse. <sup>48</sup> Taindylymo umelâ myani Judas eyanmo aguely:

— Uguondo konhonuguguyl, mākâlâ ise mākâ, Jesuslâ. Tâwâlâ ise manwâdylymo — kely.

<sup>49</sup> Aituo Judas saindyly Jesus iopaji, aguely:

— Âdapalâ wâne, Pymâ? — kely.

— Âdaintâba urâ — kely Jesus.

Aguenripyryem Jesus iwaparydâ nhonugudyly; tataen-ho agâ adâito ara nhedaenkuly.

<sup>50</sup> Jesus eyam aguely:

— Yataen-ho, inepa aiese māetobyry aiekâ — kely.

Aituo Judas agâ idâwâtyby modo Jesus nhawâdylymo, nhemakâjilimo warâ.

<sup>51</sup> Xina ewy tydahoru imâsedo ety odayba tâtyze ani. Kurâdo eynynâ Deus agâ aguewâni modo iwymâry kuru agâ tâwaneim iwantazagâmâ.

<sup>52</sup> Aituo eyam Jesus aguely:

— Adâiseba ikâ. Âdahoru ekanâgâ. Tutuzelâ âmâ, “Espadague âseguebyby, espadaguelâ ise âdyoly” kely. <sup>53</sup> Kâsemaguehoem âmâ, uguewâpyra urâ. Pabairam tâise kâenkadly kâsemaguehoem. Inepa tâise toenzepa kehoem anju domodo ingonodyly iemakeze.

<sup>54</sup> Deus itaumbyry awo wâgâ inwenibyem olâ ara âsenagazeniem wawyly. Anju domodo kâingâsedyly watay, iwenihobypy aguehobypy araba ise awidly — kely Jesus mâtâ aienibypyram.

<sup>55</sup> Ilâ ume Jesus aguely kurâdo tawâse idâypy modoram:

— Espadague, segue warâ tâmase kehoem yawâse mâewylymo, tâmagazeim urâ-ro waunlo ara. Yawâtomo tuduzelâ keankâ saguhoem, kyâho pebalâ. Kopaelâgâembaba keankâ Deus ety idaseray, agâmo agueze wawyly. Târâlâ yawâpyra olâ mataunaguynre. Yawâto odayba awylygue keankâ ilâenlâ yawâpyra mawylymo. Tâwâlâ yawâtaungâ lelâ, âdaitybyemba wawyly umelâ. <sup>56</sup> Arâlâma Deus itaumbyry egatuwâni modo ywâgâ inwenibyem awyly Deus itaumbyry awo wâgâ — kely Jesus.

Jesus sawâtuo, idânârâ xina eagonropyry modo nhodokely. Xina âwiendyly.

### *Jesus judeu domodo iwymârydoram satobyry*

(Mc 14.53-65; Lc 22.54-55,63-71; Jo 18.12-14,19-24)

<sup>57</sup> Ilâpygueduo Jesus nhadylymo kurâdo eynynâ Deus agâ aguewâni modo iwymâry kuru Caifás etyram. Idânârâ pymâ tynruneim modo târâ âtâdyguybyem awylymo. Kurâdo eynynâ Deus agâ aguewâni modo iwymârydobe, Moisés inweniby wâgâ enomedâni modo warâmo myani târâ, idânârâ uguondo modo tynrenseim modope warâ. <sup>58</sup> Myarâ idâdaymo myani âgânâ kehoem Pedro idâly, Caifás ety idaseraji. TâgawâNSE, tâkaze warâ myani akaemo guarda domodo agâ, âdara Jesus nhedylymo tientoem.

<sup>59</sup> Kurâdo eynynâ Deus agâ aguewâni modo iwymârydo, kywymâry modo, kurutaynrim modo warâ, âdara Jesus tienwentâdo wâgâ aguelymo myani. Mâkâ wâgâ âdalâ kulâ aguenri nhuinlymo warâ, âdy wâgâ tiân-homo awyly tiuntuhomoe. <sup>60</sup> Akaemo pymâ domodoem olâ myani âdy ewentâdo peba, iwâgâ aguewâni modo kewâdyly kulâ awylygue. Ilâpyryem myani azagâ uguondo saindyly pymâdo enadoram. Jesus ewentâze kewâdylymo kulâ olâ myani. <sup>61</sup> Warâ aguelymo:

— Jesus aguehobypy tindatyby ise xina nhegatuly. “Deus ety sakalagueze urâ. Azagâ\* emedyly idyly ara saunâtonze olâ urâ” kely, xina nidadâ — kelymo myani, Jesus tienwentâdomoem.

<sup>62</sup> Aguelymo idanipyryem, kurâdo eynynâ Deus agâ aguewâni modo iwymâry kuru sauduly. Jesus nhapâiguelly:

\* **26:61** Nota de pé Mateus 12.40dâ egâ.

— Âwâgâ aguelymo midatailâ. Âkealâ, âkealâba iwentâdomo awyly ise amygueho? Adamyguepaka ise âmâ mâsemaguehoem? — kely.

**63** Âdakepa olâ myani Jesus tâsemaguehoem. Aituo myani kurâdo eynynâ Deus agâ aguewâni modo iwymâry kuru nhapâiguedony:

— Messiaslâka âmâ, Deus Ingontyby? Deus iguedânrý imerylâka âmâ? Âkealâ xinaram mâmengatuba âmâ-ro watay, âsenagazeze âmâ — kely.

**64** Aituo Jesus in-hoguly:

— Mâkâlâ urâ, amygueho aralâ. Xirâpygueduo ekadybyem ise urâ Deus ton-honreim ahoru eynynâ. Eagâ ise pymâem wawyly. Eunu duay ise Deus eydâpa kâewyly. Xirâ mâmuntudyzemo kuru wato — kely Jesus.

**65** Toenzepa kehoem kurâdo eynynâ Deus agâ aguewâni modo iwymâry kuru iewiâpadly “Deus imerylâ urâ” Jesus kely tindatuo. Tyewiâkygue tâty tywogonrolâ nhaunguely. Pymâdo târâ âtâdyguyby modoram aguely:

— Deus nunâguedai merâ Jesus. Deus agâ âzekiba tawylylâ agueho, “Deus imerylâ urâ” keduo. Ânguy kingâsedaymba ise kurâ, ewentâniem. Midataimolâ Deus wâgâ aguely.

**66** Âdara iedylyka inanajimo inakanhe kehobyry wâgâ? — kely.

Aituo pymâ domodo aguely:

— Uguondo inakai kulâ awâkâ! Xyâly lelâ! — kelymo.

**67** Agueypyem emydy onwa KUITÚ kelymo, nhapiogulymo warâ. Jesus nhenuahulymo, tiampioguhoem. Sapiogunrimbyryem, aguelymo:

**68** — Ânguyka apiogurim? Apiogüimbyry xutugâ, âkealâ kuru Deus Ingontyby matay — kelymo.

*Pedro, “Jesus kâuntuwâbyra urâ” kehobyry  
(Mc 14.66-72; Lc 22.56-62; Jo 18.15-18,25-27)*

**69** Jesus pymâdo enado atay, Pedro târâ taseraylâ myani. Pekodo târâ tâwaneim ewy Pedro einkâ sakadyly. Koendâ kehoem enipyryem aguely:

— Jesus Galiléia donro eynynonro modo ewylâ âmâ — kely.

**70** Aituo myani kurâdo enanaym Pedro aguely:

— Mâkâ mâkeba urâ! Kâuntuwâbyra urâ awâkâ! Ânguyka awâkâ Jesus, iwâgâ amyguehomo? — kely.

**71** Agueypyem myani taseraji tâdâwânto iwyantaji Pedro idâly. Eagonro pekodo târâ tâwaneim modo ewy, Pedro tientuo, tydâ iwaguepanro modoram aguely myani:

— Jesus Nazaré donro eynynonro ewy awâkâ uguondo — kely.

**72** Mâkâ pekodo aguely tindatuo myani Pedro agueondly:

— Âdykâ Jesus eynynonroem witaymba urâ. Kâuntuwâbyra urâ awâkâ. Tâwâlâ ise Deus ienagazenehonly, uguewâdyly kulâ-ro watay — kely.

**73** Ilâpyryem myani uguondo modo ewy Pedro iopaji saindylymo.

— Jesus eynynonrolâ âmâ. Tutuze xina, Galiléia donro mawyly, earamolâma amygueuly — kelymo.

**74** Aituo myani Pedro agueondly:

— Mâkâ mâkeba urâ! Kâuntuwâbyra urâ awâkâ uguondo! Tutuze Deus âkealâ auguely awyly. Tâwâlâ ise Deus ienagazenehonly, uguewâdyly kulâ-ro watay — kely. Pedro.

Aguely umelâ myani aukuma igâtudly. **75** Tindatuo, Pedro Jesus tyam aguehobyry nhenanâguely, “Xirâ kopae, aukuma igâtudly iraynâ, azagâ tokalâ warâ ise ‘Jesus kâuntuwâbyra urâ’ myguely” kehobyry. Aguehobyry tienanâgueduo myani toenzepa Pedro itynwandyly. Târâpa âxiguely. Tâjityenze kehoem eogumadly.

## 27

*Pilatosram Jesus satobyry  
(Mc 15.1; Lc 23.1-2; Jo 18.28-32)*

<sup>1</sup> Emetybyem idânârâ akaemo kurâdo eynynâ Deus agâ aguewâni modo iwymârydo, pymâ judeu domodo iwymârydo warâ âtunâguedylymo, âdara kuru Jesus tyâen-honlymo awyly tiuntuhomoe. <sup>2</sup> Tonlo guarda modoram nhekâjien-honlymo, nhaleholymo, nhegamehonlymo warâ Pilatosram, pymâ Romadâpa ingonotybyram.

*Judas âdyâhobyry  
(At 1.16-19)*

<sup>3</sup> Judas, Jesus egamenribyry, pymâdo Jesus tiân-homoem aguelymo tientuo, toenzepa kehoem âjityendyly, pymâdoram mâkâ tiengamehobyry wâgâ. Awylygue myani kurâdo eynynâ Deus agâ aguewâni modo iwymârydoram, kywymâry modoram warâ idâly. Mârâ trinta moeda sopâze kely mâkâ tiengamehobyry ebyry. <sup>4</sup> Eyanmo aguely:

— Inakanhe lelâlâ awidâ; mâkâ uguondo âdaityby keba kulâ sawâneho — kely.

Aituo eyam aguelymo:

— Awârâ tiuntudyze inkâba xina. Âmâ inakanhe aini, xina mâkeba — kelymo.

<sup>5</sup> Agueduomo, Judas mâtâ dinheru nhamely Deus ety odaji. Dinheru sameimbyryem, idâly okogâjize.

<sup>6</sup> Akaemo kurâdo eynynâ Deus agâ aguewâni modo iwymârydo mâtâ moeda praguetu sanânibyryem, aguelymo:

— Xirâ dinherugue keankâ uguondo xyâhoem epywadyly. Awylygue ise Moisés inweniby eynynâ, Deus ety oday kienwanipa kydawyly — kelymo.

<sup>7</sup> Aituo âtunâguedybyem, mâtâ dinherugue onro nhanâdylymo. “Âdydo imeom onrogue xygato” kehobyry. Mâtâ onro nhanâdylymo judeu keba modo igueypy etadâdoenlâ.

<sup>8</sup> Jesus iguehoem egamehobyry ebyrygue sanâtyby awylygue, “Xyâhoem egamehobyry ebyrygue sanâtyby” kelyguelâ mâtâ âji ezeku iwerâ. <sup>9</sup> Aguewânlâmy Jeremias, Deus eynynâ agueypy\*: “Trinta lelâ moeda praguetu nhemakelymo. Israel iweom ‘Warâ ise ebyryem kiunduly’ kehobyry” kewâm. <sup>10</sup> Mâtâ dinheru tienmakeybygue, âdydo imeom onrogue xygato ejidy nhanâdylymo. Warâ myani aidylymo, Kywymâry Deus aguehobyry ara tâkeze myakâwâny Deus eynynâ agueim.

Warâ myani Judas mâtâ dinheru, Jesus tiengamehobyry ebyry anhedyly.

*Jesus Pilatos enado satobyry  
(Mc 15.2-5; Lc 23.1-5; Jo 18.33-38)*

<sup>11</sup> Jesus XYDYK warâ, mâkâ pymâ Romadâpa ingonotyby, Pilatos enado. Pilatosram adapâigueoly:

— Judeu domodo iwymâry kuruka âmâ? — kely.

Jesus in-hoguly:

— Mâkâlâ urâ, amygueho ara — kely.

<sup>12</sup> Akaemo kurâdo eynynâ Deus agâ aguewâni modo iwymârydo, kywymâry modo warâ tâwentâduo, âdakepa olâ Jesus.

<sup>13</sup> Pilatos aguely Jesusram:

— Akaemo iwentâdo midatailâ. Amyguehonly mâin-hogubaka ise âmâ? — kely.

<sup>14</sup> Jesus olâ âdakepa. Toenzepa kehoem Pilatos âseguâdâdyly, Jesus tâsemaguehoem âdakepa awylygue.

*“Nigue lelâ awâkâ Jesus” Pilatos kehobyry  
(Mc 15.6-15; Lc 23.13-25; Jo 18.38-19.16)*

---

\* <sup>27:9</sup> Zacarias 11.12-13 warâdâ aguely. Zacarias myakâwâny agueim. Judeu domodo xurâem olâ idânârâ Deus xunâry egatuwâni modo inweniby Jeremias aguehobyryem lelâ nhutulymo.

<sup>15</sup> Páscoa etyguedyly ume, aunlolâ mykâinane Pilatos etadâdyby modo ewy tokalâ nhetaguehonly, âdaunlolâ kurâdo nhekadybylâ. <sup>16</sup> Ilâ ume tâlâ myani uguondo kadeia oday tâtagueim, kurâ domodo nhutuly, Barrabásgue tâzekeim. <sup>17</sup> Aituo kurâdo âtâdyguyly, Pilatos ety iwyantay. Pilatos eyanmo aguely:

— Ânguya kâentaguedyze matomo, [Jesus] Barrabás keho, Jesus Messias keho Deus Ingonytyby? — kely.

<sup>18</sup> Tâsewânilygue kulâ akaemo judeu domodo iwymâry, Jesus tyam nhegamely awyly, tutuze olâ myani Pilatos. <sup>19</sup> Pilatos târâ tribunaldâ ekadybyem awyly ume myani iwydy âjitaumbyguely eyam.

— Jesus âdakâiedâ. Koendoro awâkâ uguondo. Âdy inakanhe anientaymba awâkâ. Kopae eagâ kâjiâensedai. Toenzepa kâsenagazedai eagâ kâjiâensedobyry wâgâ — kely.

<sup>20</sup> Akaemo kurâdo eynynâ Deus agâ aguewâni modo iwymârydo, kywymâry modo warâ toenzepa kurâdoram aguelymo.

— Barrabás nhetaguehoem ekadaungâ Pilatosram. Jesus xyâhoem ekadaungâ-ro warâ — kelymo.

<sup>21</sup> Ine warâ myani Pilatos kurâdoram agueondly:

— Âdykonlo uguondoka kâentaguehondyze matomo? — keondly.

Aituo in-hogulymo:

— Barrabás! — kelymo.

<sup>22</sup> — Âdakânhedly pylâka ise merâ Jesus, Messias, Deus Ingonytyby? — kely myani Pilatos.

Idânârâ kehoem in-hogulymo:

— Kruz onwa sakâjien-hongâ, iguehoem! — kelymo.

<sup>23</sup> — Âdaituo? Ienanaji, âda nitaymba merâ iguehoem — kely Pilatos.

Agueduo olâ idânârâ adaenkelymo ton-honre kehoem:

— Kruz onwa sakâjien-hongâ, iguehoem! — keondly.

<sup>24</sup> Tutuze olâ Pilatos, aguiom kurâdo tunâry nugukeba awyly. Tutuze lâpylâ, akaemo tagâ iewiâpadly, aguehomobyry ara anipyra-ro watay. Aituo tâzemaunguehoem paru nhenenehonly. Enanaynmo âzemaunguely, tâwentâzeba tawyly tienehon-hoem. Eyanmo aguely:

— Urâ keba ise âsenagazeni merâ uguondo iguehobyry wâgâ. Âmaemo ise tâwentâzeim, mâyâen-hohomobyry wâgâ — kely.

<sup>25</sup> Idânârâ kurâdo aguely:

— Xinalâ ise tâwentâzeim awâkâ iguehobyry wâgâ, xina, xina imeombyry, xina iweompyry alelâ — kelymo.

<sup>26</sup> Aituo Barrabás nhetaguehonly, nhekodomobyry ara. Ilâpyryem myani Roma donro sodadu domodoram aguely:

— Jesus sapioguwâdaungâ. Ilâpyryem ise mandylymo, kruz onwa sakâjize-ro warâ, iguehoem — kely.

### *Sodadu domodo Jesus âwankuem nhetobyry*

*(Mc 15.16-20; Jo 19.2-3)*

<sup>27</sup> Ilâpyryem sodadu domodo Jesus nhadyly palaciuram, Pilatos etyram. Idânârâ târâ sodadu modo âtâdyguylymo myani. Jesus tuontaji nhedylymo, âwankuem tiento-moem. <sup>28</sup> Jesus etygueimbyryem, âtâ BOH waunlo tapabileingue nhetydâdylymo, pymâ âzetydâdo ara, âwankuem tiento-moem. <sup>29</sup> Tyguyreim koroaem xygatyby myani mâkâ nhangahu onwa nheklymo. Aho eynynâ segue nhematâdylymo, pymâ ara. Enado âzeguhaoam idylymo, pymâ enado adâitomo ara. Eyam aguelymo:

— Tynrenseim âmâ, judeu domodo iwymâry kuru! — kelymo, âwankuem nhedylymo.

<sup>30</sup> KUITÚ kelymo nhonwa, segue nhangatainlymo warâ. <sup>31</sup> Âwankuem ienipyryem âtâ BOH waunlo tapabileim Jesus wâgâpa nhetylymo. Ety iwogonropyryguelâ nhetydâdylymo. Ilâpyryem nhadylymo, kruz se xygatyby onwa sakâjize.

*Jesus kruz wâgâ iguehoem sakâjihobyry  
(Mc 15.21-32; Lc 23.26-43; Jo 19.17-27)*

<sup>32</sup> Xidadâ odaypa tâgasedaymo, uguondo Simão agâ oxiodylymo. Xidadâ Cirene donro myani mâkâ. Aituo myani, sodadu domodo kruz Jesus tiankâjiho eyam nhanânehonlymo.

<sup>33</sup> Golgotaram myani Jesus nhadylymo. (Iwy Calvariogue tâzekeim lâpylâ, tâjiangahubyry ara enurunugue.) <sup>34</sup> Târâ myani vinhu tâzenukuru agâ ietybygue sakuize kelymo. Ekunibryem myani tienydyzeba idyly. <sup>35-38</sup> Aituo kruz onwa nhakâjilymo. JESUS MERÂ, JUDEU DOMODO IWYMÂRY KURU kely iweniby sakâjiwânmomy Jesus nhangawaym kruz wâgâ. Âdaítuo Jesus nhakâjilymo awyly xutuhoem myani mâtâ anhedylymo. Ilâem lâpylâ azagâ tâmagaduneim modo nhakâjilymo. Tokalâ Jesus ahoru eynynâ, eagonro pâem eynynâ warâ nhakâjilymo. Sakâjirimbyryem, Jesus ety iwogompyry nhepajiwâdylymo. Dadu nhamelemyo ânguy, ânguy warâ Jesus ety iwogompyry emakeim awyly tiunturomoem. Aitybyem ekadylymo, akaemo azagâ tokalâ warâ kruz onwa sakâjiwâdyby ânguy nynanâbyra itoem.

<sup>39</sup> Tâinkâ sakadaynrim modoram âwankuem âieholo. Angakânilimo, inwykelymo warâ.

<sup>40</sup> — “Deus ety sakalagueze urâ” myguema. “Azagâ emedyly<sup>†</sup> idyly ara kulâ saunâtonze urâ” mygue warâ. Ton-honreim lelâlâ matay, tâwâlâ âsemaguegâ! Deus imery âmâ watay, kruz wâgâpa âytâguygâ! — kelymo.

<sup>41</sup> Kurâdo eynynâ Deus agâ aguewâni modo iwymâryo, Moisés inweniby wâgâ enomedâni modo, kywmâry modo warâ âwankuem nhedylymo. Aguelymo:

<sup>42</sup> — Âkelomo nemake, tâwâlâ nâsemagueba olâ! Israelita domodo iwymâry lelâlâ-ro watay, iweâ lelâlâ kruz wâgâpa nytaguy. Xytâguyly-ro watay, einwâNSE kurâ. <sup>43</sup> “Deus imery urâ” nygue. “Deus ietâ” nygue warâ mawânkâ. Âkealâ kuru-ro watay, Deus kruz wâgâpa xytâguyânze âese iweâ lelâlâ! Deus tâense watay, nemake pylâ! — kelymo, âwankuem nhedylymo.

<sup>44</sup> Akaemo azagâ tâmagaduneim modo eagâ sakâjiwâdyby modoram âwankuem âieholo lelâ lâpylâ.

*Jesus iguehobyry  
(Mc 15.33-41; Lc 23.44-49; Jo 19.28-30)*

<sup>45</sup> Kuotatay idânârâ iamadyly; azagâ tokalâ warâ horas ani iamu. <sup>46</sup> Azagâ tokalâ horas ituo myani Jesus adaenkely:

— *Eli, Eli, lemá sabactani?* — kely. (“Pabai, âdaítuoka wodokely?” keze aguely.)

<sup>47</sup> Tonlo modo, koendâ nidapyra tawylygue, Elias ingâsedly ara nhenehonlymo, Deus eynynâ agueim lâpylâ mykâinane mâkâ. Aituo aguelymo:

— Idataungâ. Elias ingâsedly tâmakehoem — kelymo.

<sup>48</sup> Akaemo ewy egatudyly myani vinhu nhewantybygue esponja ikuize. Tinkuibygueduo se iopiry onwa nhekâjily. Jesus nhugakâin-hoem wâne nhuduly.

<sup>49</sup> Eagonro modo eyam aguely:

— Ine wao. Elias awâkâ ingâseguyly. Elias emakeze âewyly kyzene wao — kelymo.

<sup>50</sup> Aituo Jesus adaenkeondly ago kehoem, tyiguehoem kuru. Ipa kuru idyly.

<sup>51</sup> Iguely ume kehoem myani, Deus ety oday Deus Âepanâgueho xuahuho tyxieim iotagâ adauguely kaynonrobryem, on-yam; Deus, kurâdo agâ tygue ito myani mâtâ xuhuru. Ton-honre kehoem onro âzekânily. Tuhu imâsedo modo tatuwâze myani. <sup>52</sup> Onro âzekâniduo, âguedy modo etadâdo âzenahunguewâdyly. Aituo myani Deus eynynonro

<sup>†</sup> 27:40 Nota de pé Mateus 12.40dâ egâ.

igueypy modo myarâ ietyby, kurâem itondylymo. <sup>53</sup> Tâkanâdobrydâba egaselymo. Deus, Jesus kurâem nhetombygueduo myani akaemo idâly xidadâ Jerusalémram, Deus ijidadâryam. Târâ tâtyuneim modoram tâzehozemo myani.

<sup>54</sup> Sodadu Roma donro modo iwymâry, izodadury Jesus etaynrim modo warâ onro âzekânily tâensemô myani. Aidyl tâensemô warâ. Tientuomo, toenzepa kehoem myani âseanedlymo. Aguelymo:

— Deus imery lelâlâ mynra merâ uguondo! — kelymo.

<sup>55</sup> Tâlâ myani târâ pekodo modo, iwaguelâ olâ nhedylymo. Jesus sakâjily iraynâ, Jesus Galiléia eynynâ atay, emawyadânybyry ani akaemo pekodo modo tâlâ tatomogue.

<sup>56</sup> Maria (Magdala donro), Maria (Tiago, José warâ ise), Zebedeu imeom ise warâ myani iduaymo.

*Jesus egueypybyry tuhu imâsedo tâtagueim odaji nhetadâdomobyry*

(Mc 15.42-47; Lc 23.50-56; Jo 19.38-42)

<sup>57</sup> Iguandyly iraynâ uguondo tydinerugueim José saindyly, xidadâ Arimatéia donro. Jesus einwânni lâpylâ myani mâkâ. <sup>58</sup> Aituo José, Pilatosram idâly agueze:

— Jesus nigueaki, Pymâ. Kruz wâgâpa kâytâguyândye olâ urâ, tuhu imâsedo tâtagueim odaxi kâenkanâdoem. Tâwâlâ kâytâguyândy? — kely.

Aituo Pilatos, Jesus egueypybyry José nhatoem,

— Tâwâlâ — kely.

<sup>59</sup> Aituo José, Jesus egueypybyry kruz wâgâpa nhytâguyândyly. Xytâguyânybyryem intuwynly âtâ iwelo linhuguetogue. <sup>60</sup> Tyigueduo tâtaryem tiensaguehoymby oda-

jilâ myani Jesus egueypybyry nhetadâdyly. Iwelo esagueze myani mâtâ tâtagueim.

Myarâ egueypybyry ienipyryem nhenahunly tuhu imâsedogue. Ilâpygueduo, idâly.

<sup>61</sup> Azagâ pekodo modo: Maria Magdala donro, Maria lâpylâ warâ Jesus egueypybyry etadâdobrydâmolâ myani.

*Jesus egueypybyry etadâdobrydâ guarda domodo âxidâdobry*

<sup>62</sup> Páscoa etyry sakabygueduo, iguandyly ume akaemo kurâdo eynynâ Deus agâ aguewâni modo iwymârydo, fariseu domodo warâ idâlymo Pilatos agâ âtunâgueze.

<sup>63</sup> — Pymâ, tyiguely iraynâ, warâ keankâ Jesus aguely: “Yigueduo, azagâ<sup>‡</sup> emedyly idyly wâgâ kurâem itonze urâ” nygue. Xirâ âkealâba kulâ aguehobryy enra xina nhenanâgueley. <sup>64</sup> Awylygue Jesus egueypybyry etadâdobry koendâ mânehoneonly xina ize ato. Azagâ emedyly idyly ara enipe târâ nidâ, eynynonrobryy modo egueypybyry nemagazebyra itomoem. Tienmagazeduo, “Jesus kurâem nitondâ” kezemo mawânkâ. Toenzepa iwerâ “Jesuslâ Messias” kelygue tonokudo einwânni modo. “Jesus kurâem itondybyem” kely nheinwândyly watay lakuru ise aguykeho einwândyly inmolymo kuru — kelymo.

<sup>65</sup> Aituo Pilatos eyanmo aguely:

— Âdainkâba. Anra yzodadury modo. Idâzemo lelâ agâmo, azagâ emedyly ise târâ agâmo awyly, Jesus etadâdobryy eniem. Imawyadâzemo, ânguy Jesus egueypybyry nynanâbyra itoem — kely.

<sup>66</sup> Aituo myani Roma donro sodadu domodo tagâ nhadylymo. Tâtagueim enahun-ho enahunguebyem awyly xutuho tyesemo myani, ânguylâ Jesus egueypybyry eydâ atoram egawânipryem awyly tiuntuhomoe. Adiempygueduo myani idâlymo. Sodadu domodo lelâ myani eniem âxiânrim.

## 28

*Jesus kurâem itondobry*

(Mc 16.1-10; Lc 24.1-12; Jo 20.1-10)

<sup>‡</sup> 27:63 Nota de pé Mateus 12.40dâ egâ.

<sup>1</sup> Tâzekobyzegueho sakabygueduo domingo pealâ pekodo modo Jesus eguepybyry etadâdobyryram idâlymo, Maria Magdala donro, Maria lâpylâ warâ. <sup>2</sup> Tadaguzeim kulâ onro âzekânily. Anju Deus ingonotyby myani Jesus eguepybyry etadâdobyry enahun-ho ejikeim. Tuhu imâsedo ejikeimbyryem myani nhonwa ekadyly. <sup>3</sup> Ielu ara kehoem myani ehoru, tapeke kehoem ety iwogonro warâ. <sup>4</sup> Târâ eniem âxiâymby modo tâseaneze myani, tadapânizemo warâ. Onro onwa ihuguewâdylymo myani, ekomadybyem.

<sup>5</sup> Anju kaynâpa âetyby pekodo modoram aguely myani:

— Tâseanezeba itaungâ. Tutuze urâ, Jesus mâwinlymo awyly, kruz onwa sakâjiby.

<sup>6</sup> Tarâpa olâ mâkâ. Ipa, kurâem nitondai, aguehobyry aralâ! Etaungârâ etadâdobyryam. Ânguy lâpeba tarâ. <sup>7</sup> Inepa idâwâtaungâ, eynynonro modoram egatuze. “Kurâem nitondai! Waunroenlâ ise Galileiaram idâly. Târâ ise mâendylymo” kewâtaunda eyanmo. Auguehobyry ara ise aidyly — kely myani anju.

<sup>8</sup> Inepa kehoem pekodo modo Jesus eguepybyry etadâdobyry nhodokelymo. Toenzepa myani eanumo, iomarumo lâpylâ warâ. Egatudylymo Jesus eynynonro modoram tiengatuhomoem. <sup>9</sup> Jesus eagâmo toxioze myani. Aituo myani aguely:

— Âdapa lâwâne âmaemo? — kely.

— Âdapa — kelymo.

Iopaji saindylymo. Enado âzeguhoam idylymo. Ixinary tywymogoynzemo myani, koendonroem awyly wâgâ adâkezemo warâ.

<sup>10</sup> Aituo myani Jesus eyanmo aguely:

— Tâseanezeba itaungâ. Idâwâtaungâ. Ynynonro modoram aguewâtaunda. “Âwaynâmolâ ise Jesus idâly Galileiaram. Târâ ise âwânwândylymo. Ese âmaemo” warâ kewâtaunda — kely Jesus.

### *Guarda domodo xunâry*

<sup>11</sup> Pekodo modo xinaram Jesus wâgâ agueze idâday myani guarda domodo ewy xidadâram odopâdylymo. Idânârâ tientyby ara myani kurâdo eynynâ Deus agâ aguewâni modo iwymârydoram nhegatulymo. <sup>12</sup> Kurâdo eynynâ Deus aguewâni modo iwymârydo myani kurâdo nhutudyzeba akaemo tyam nhegatuyby. Aituo myani kywymârydo agâ âtunâgueze idâlymo. Koendâ âtunâguedybyem myani toenzepa kehoem guarda domodoram dinheru nhudulymo. <sup>13</sup> Warâ myani eyanmo aguelymo:

— Jesus eguepybyry wâgâ amyguehonly-ro watay, “Kopae xina xykyly ume Jesus eynynonro modo nâtâ, eguepybyry emagazeze” kewâtaungâ lelâne. <sup>14</sup> Pilatos âkyhomobyry wâgâ agâmo iewiâpadly-ro watay, xina ise eagâ aguenri, inagazebyramo itoem — kelymo.

<sup>15</sup> Aituo myani guarda domodo dinheru nhemakely. Kurâdo eynynâ Deus agâ aguewâni modo iwymârydo aguehobyry ara lelâ aguelymo. Arâ lelâ myani judeu domodoram nhegatulymo, kypemugudoram. Xirâ tonokudobyry tainwânselâ akaemo judeu domodo ewy iwerâ.

### *Jesus onze tynynonro modoram âepanâguehobyry*

(Mc 16.14-18; Lc 24.36-49; Jo 20.19-23; At 1.6-8)

<sup>16</sup> Xina idâly Galileiaram. “Târâ ise kydoxiodyly” Jesus kehobyry iwy onwa xina âkulys.

<sup>17</sup> Târâ Jesus tientuo, toenzepa kehoem xina iomazely. Enado xina âzeguhoam idyly. Koendâ awyly wâgâ xina aguely warâ. Tâlâ olâ ani xina ewy Jesuslâ awyly einwântâny.

<sup>18</sup> Aituo Jesus xinaram saindyly, aguely:

— Deus kaynâ, onwâgâ alelâ pymâem witoem anygue. <sup>19</sup> Awylygue idâwâtaungâ awârâem kurâdope ato ara enomedâzemo, yeinwântomoem. Yeinwâmpygueduomo, batiza ietaungâmo, ynynonroem, Pabai Deus eynynonroem, Deus Ispiritury eynynonroem warâ awylymo xutuhomoem. <sup>20</sup> Amitomoem inomedâdomobyry ara lâpylâ

enomedâdaungâmo. Enanâguewâdaungâ, agâmolâ wawyly, koendâ nhetomoem xypyry etaji kehoem – kely Jesus.

Alâ kulâ.  
Mateus

## MARCOS

# Unâ Koendonro Jesus Cristo Wâgâ Marcos Inweniby

Xirâ livru wâgâ inwenily Marcos nhangahu odaji iemâmy Deus. Awylygue Deus itaumbrylâ xirâ Marcos nhegatuyby. Jesus Cristo wâgâ kiuntuhoem myakâwândy Deus xirâ livru inwenien-honly. Jesus Cristo eon-honru wâgâ aguely xirâ wâgâ kiuntuly. Tunwym Deus aguehobyryem awylygue, toenzepa adyesenry emyenro kehoem adyese mâkâ, Deus eon-honrugue. Kadopâgue taseim modo, tâwanuneim modo, epy modo, adakobâdânry modo, idatânry modo warâ kua tyese mâkâ. Capítulo 6dâ cinco pão, azagâ kanra âjihuyby warâ agui nhenehon-hombyry tytainze kurâ, cinco mil uguondo modo xuatoem; paru wâgâ tadakobâze lâpylâ myakâwândy.

*João kurâ domodoram Jesus âewyly wâgâ aguehobyry  
(Mt 3.1-12; Lc 3.1-20; Jo 1.19-28)*

<sup>1</sup> Deus Imery Jesus wâgâ xirâ unâ aguely; Deus imery lelâlâ awâkâ. <sup>2</sup> Iweâpalâ myakâwândy Isaías Deus itaumbry wâgâ agueseze awyly. Awârâ âdydo imeom aidyly wâgâ inwenily warâ. Saguhoem warâ myakâwândy Deus, Tingonotybyram aguely: “Ynynonro modoram mydâly iraynâ, uguondo igonose urâ,

âwâgâ aguenriem on-hondybyem lelâ itomoem,  
âdatomoem, âinwântomoem warâ.

<sup>3</sup> Messias wâgâ agueim târâ âji âdy peba atodâ ise aguely.

Adâkely idase idâwâtyby modoram:

‘Inepa ise Deus Ingonytoby saindyly.

Izepa ato aiedyly imowâdaungâ.

On-hondybyem lelâ itaungâ’ aguely mâindatomoem.

Pymâ ton-honreim kâty anaxi âewyly kiuntuduo wâne,  
kâty inatary tuonse, tuonkeze warâ kurâ,  
myara on-hondybyem lelâ kydawly aguely idase”

warâ myakâwândy Deus itaumbry Isaías inwenily.

<sup>4</sup> Arâlâ myani João âji âdy peba atodâ awyly, Isaías aguehobyry aralâ. Kurâ domodo idâly myani eydâ atoram. Eyanmo aguely myani Deus aguehobyry:

— Âjityendaungâ, inakanhe amitomobyry wâgâ. Deus izepa ato aiedyly imowâdaungâ. Deus einwântaungâ, inakanhe amitomobyry nhygakehoem. Parugue batiza âiehowâdaungâ, inakanhe amidylymo imoimbyryem amidylymo mâenehon-homoem — kely.

Inakanhe tadowly timoduomo myani, Deus eynynonroem tawyly nhenehonlymo.

<sup>5</sup> Toenzepa mykâinane xidadâ Jerusalém donro modo João aguely idase idâlymo. Tâtâze lâpylâ mykâinane Judéia donro modo. Aguewâdylymo myakâwâm:

— Deus izepa ato aieni ani xina. Adâidylly tumoze olâ xina-ro warâ — kelymo.

Arâ agueduomo, Joãoram batiza âieholymo paru Jordão ikay, Deus izepa ato adientomobyry wâgâ tâjityenze tawylymo tienehon-homoem, inakai modo adiendlyly imoimbyryem tawylymo tienehon-homoem warâ. <sup>6</sup> Camelu xuhudu xygatyby mykâinane João ety. Tâjitubygue kulâ mykâinane iwanxiegu. Kahuligue, penrâgue warâ mykâinane ipynigu. Kurâ domodoram aguely mykâinane:

<sup>7</sup> — Eagonro âese lâpylâ Deus wâgâ aguenri. Ton-honreim ise mâkâ, iemyenro keba. Mâkâ ise yakadâ kuru ton-honreim. Âdy mâkeba urâ. Ihuru etary ekâjiguerin-enlâ witoem nudupa lâgâlâ, ihuru kâingokehoem\*. <sup>8</sup> Urâ parugue batiza âenimo, Deus izepa

\* <sup>1:7</sup> Tâwaneinhe sanâtyby modo myakâwândy adakobâni modo ihuru etary ekâjigueim, etyim, ihugogueim warâ.

ato amânhetomobyry wâgâ tâjityenze mawylymo mânehon-homoem, inakai modo aiedyly imoimbyryem mawylymo mânehon-homoem warâ. Mâkâ âeni olâ ise Deus Ispiritury xuduim, einwânni modo eon-honwanâniem, izepa ato aniempyra itomoem, ize ato lelâ anhetomoem warâ – kely João.

*João Jesus batiza nhetobyry  
(Mt 3.13-17; Lc 3.21-22)*

<sup>9</sup> Aituo Jesus idâly Galiléia eynynonro âtâ anary Nazaré donropyryem myarâ João eydâ atoram. Târâ myani Jesus batiza âieholi Joãoram paru Jordão ikay, Deus eynynonro tawyly tienehon-hoem. <sup>10</sup> Paikayba tâjikagueday myani Jesus kau âzenahunguely nhedyly. Papaem Deus Ispiritury xytâguyly nhonwa. <sup>11</sup> Aituo kau oday Deus itanru indadlyl lâpylâ:

– Ymery âmâ, toenzepa kâinwyneguyly; toenzepa womazeâni âmâ – kely Deus.

*Deus ize ato araba Jesus aitoem, Satanás aiese kehobyry  
(Mt 4.1-11; Lc 4.1-13)*

<sup>12</sup> Aituo Deus Ispiritury Jesus nhadyly âji âdy peba atoram. <sup>13</sup> Quarenta iguandyly, quarenta emedyly warâ Jesus târâ awyly. Ânguyo doimeom tyewiâtuneim modope mykâinane târâ. Târâ atay Deus iduery Satanás âepanâguely. Idânârâ wâne myani anhedyly, Jesus, Deus ize ato araba aitoem. Jesus olâ myani mâkâ agueho ara anipyra. Ilâpygueduo myani anju domodo xytâguyly Jesus eydâ atoram xuahuze, idânârâ ize ato modo xuduze warâ.

*Jesus Galiléia eynynâ tâwanu nhaguhobyry  
(Mt 4.12-22; Lc 4.14-15; 5.1-11)*

<sup>14</sup> João Batista etadâbygueduo myani Jesus Galiléia eynynâ adakobâdyly, Deus itaumbypyry iwâkuru egatuze. <sup>15</sup> Aguely myani:

– Inepa ise idânârâ mâuntulymo Deus pymâ ton-honreim awyly. Âjityendaungâ, inakanhe amitomobyry wâgâ. Inakanhe adâjidyl imowâdaungâ warâ. Deus itaumbypyry iwâkuru einwântaungâ – kely.

<sup>16</sup> Aituo Jesus paru Galiléia emelay adakobâdyly. Tadakobâday azagâ uguondo nhedyly, Simão Pedro, iukonolâ André warâ. Âedâgue kanra sawâni myani akaemo, vende tientoem. Âedâ paikaji nhamelymo ume myani Jesusram âzeholymo. <sup>17</sup> Jesus aguely eyanmo:

– Âetaungâ. Saguhoem kanra keankâ mawelymo; iwerâ kurâ domodo ynynonroem itoem unâry egaturin-em ise âmaemo – kely.

<sup>18</sup> Inepa kehoem âedâ kanra sawâto inmolymo, Jesus eynynonroem tâitomoem, Deus wâgâ tiuntuhomoe.

<sup>19</sup> Tâtâday myani Jesus azagâ uguondo modo nhetondly, Tiago, iukonolâ João warâ. Zebedeu imeombypyry myani akaemo. Ekadybymoem tywepirymo oday; âedâ kanra sawâto kua nhedylymo, kopaelâgâroem. <sup>20</sup> Aituo myani Jesus akaemo ingâsedly tynynonroem itomoem. Tunwynmo, tagâ tâwaneim modo warâ tyânzemo myani, Jesus agâ tâtâhomoe.

*Jesus uguondo kadopâgue taseim kua nhetobyry  
(Lc 4.31-37)*

<sup>21</sup> Aituo Jesus tynynonro modo agâ xidadâ Cafarnaumram saindyly. Tâzekobyzegueho oday myani Jesus idâly âtâ tâdâtâdyguyho odaji, enomedâzemo. <sup>22</sup> Aituo idataynrim modo aguely:

– Koendâ lelâlâ wânkâ merâ konomedâdyly uguely! – kelymo.

Ton-honre kehoem mawânkâ aguely, adâkely tutuze tawylygue, tâzewenry ara kulâ kurâ domodo enomedâni modo arapa. <sup>23</sup>Târâ enomedâzemo Jesus atay myani uguondo kadopâgue taseim âepanâguely. Uguondo oday myani kadopâ adaenkely Jesusram:

<sup>24</sup>—Xina kâdynanâdâ! Tutuze urâ koendâ kehoem ânguy mawyly, Jesus Nazaré donro! Xina eon-honru etyze âetyby mawyly, tutuze urâ. Inakanhe amitaymba âmâ; Deus ingonotyby âmâ warâ — kely uguondo kadopâgue taseim; uguondo keba olâ agueim, kadopâ.

<sup>25</sup>Ton-honre kehoem myani Jesus aguely mâkâ uguondo odano kadopâram:

— MYK alelâ ikâ! Adâkeonzeba ikâ! Igasegâ iweâ lelâlâ merâ uguondo odaypa! — kely Jesus.

<sup>26</sup>Jesus agueduo kadopâ uguondo nhapânily ton-honre kehoem. Ton-honre kehoem adaenkely. Ilâ umelâ myani uguondo odaypa egasely, idâly. <sup>27</sup>Idânârâ etaynrimbyry modo tâsewâñizemo, tuomazezemo warâ myani. Aituo âjigae aguelymo:

— Iwelo modogue awâkâ konomedâdyly! Âdykâ awârâ aguely kindataymba kurâ! Kadopâ takaze kehoem awâkâ aguehobypy eon-honru. Warâ keduo, aguely âzeinwânhonly lelâ — kelymo myani.

<sup>28</sup>Inepa kehoem Galiléia eynynonro modo Jesus egary indadylymo.

### *Jesus Pedro imenhundu kua nhetobyry*

(Mt 8.14-15; Lc 4.38-39)

<sup>29</sup>Ilâpygueduo, Jesus egasely Tiago, João warâ agâ âtâ tâdâtâdyguyho odaypa. Simão<sup>†</sup>, André warâ etyram myani idâlymo. Simão imenhundu tâwâne myani toenzepa iaturu.

<sup>30</sup>Jesus egawândyly tientuo, tonlo modo eyam aguely:

— Toenzepa Simão imenhundu ewânu — kelymo.

<sup>31</sup>Aituo tâwâneim eguetonra idâly. Emery wâgâ nhawâdyly, sautoem. Ilâenlâ kehoem myani iaturu inmoly. Aituo myani pekodo tyatureimbyry saudly, ipynirymo aiese, âwinduatomoem.

### *Jesus tâwâñuneim modo kua nhetobyry*

(Mt 8.16-17; Lc 4.40-41)

<sup>32</sup>Xixi âwâmpygueduo, myani tonlo modo tâwâñuneim modo, kadopâgue taseim modo warâ Jesusram nhadylymo. <sup>33</sup>Toenzepa kurâdo âtâdyguyly Simão etyinataji, Jesus aidyly ese. <sup>34</sup>Âkelo tâzewâñugue tâwâñuneim modo kua tyese lâpylâ myani. Kadopâ modoram aguely:

— Kurâ domodo imowâdaungâ. Ânguy wawyly adâkezeba itaungâ-ro warâ.

Jesus arâ aguely myani, Deus Imery Jesus awyly tutuze kadopâ modo awylygue, awârâ xutuen-hon-ho odaji nipyra awylygue.

### *Jesus Deus wâgâ Galiléia eynynâ nhegatuhobyry*

(Lc 4.42-44)

<sup>35</sup>Pealâ myani Jesus âxiguely. Âji âdy peba atoram idâly, Deus agâ agueze. <sup>36</sup>Tuagueduo Simão Pedro domodo Jesus târâpa awyly nhedylymo. Aituo xuize idâlymo. <sup>37</sup>Deus agâ aguely ume nhodylymo. Tiontu aguelymo:

— Adaituoka tarâ mawyly? Idânârâ âdykâ mawyly tiuntudyzemo enra — kelymo.

<sup>38</sup>Aituo Jesus in-hoguly:

— Âkealâ. Taunloem kulelâba olâ keankâ kâjigonoholy. Inoro âtâ anary iwaguepaonram, Deus xunârybyry egatuze — kely Jesus.

<sup>39</sup>Aituo âtâ anary Galiléia eynynonro modo einkâ adakobâdylymo. Deus wâgâ adâkeze myani âtâ tâdâtâdyguyho odakâ, kadopâgue taseim modo kua tyese warâ myani.

<sup>†</sup> **1:29** Simão myakâwândy ezedy, Jesus olâ Pedrogue ezetâni.

*Jesus uguondo tâjimituguelygue tâwâneim kua nhetobyry*

(Mt 8.1-4; Lc 5.12-16)

<sup>40</sup> Jesus adakobâday myani uguondo iopaji saindyly. Tâjimituguelygue tâwâneim myani mâkâ. Jesus enado âzeguhoam idyly, tynrense tawyly tienehon-hoem. Aituo myani Jesusram aguely:

— Pymâ, kua yeze ton-honre mawyly, xutuanze. Kua yedyse âmâ watay, kua yekâ wao — kely.

<sup>41</sup> Toenzepa myani Jesus mâkâ tâwâneim intyendyly, arâ tientuo. Aituo tâmarygue MÂ' nhedyly. Eyam aguely:

— Kua âedyse urâ. Tâwânepa âmâ iweâma. Kua âetai — kely.

<sup>42</sup> Ilâenlâ kehoem kua idyly. Iwâgâ pinuri peba idyly, ituby itugoenzely warâ.

<sup>43</sup> Uguondo kua tiempygueduo Jesus aguely:

— Iweâma tâwâlâ idâ. <sup>44</sup> Ânguyran-ne xirâ kua âetobyry kâzegatu — kely.

— Kurâdo eynynâ Deus agâ agueinram âzehora, kua itybyem mawyly nhetoem. Kua itybyem mawyly kurâdo nhetoem, Deusram âdylâ xudugâ, kâzewenryem Moisés inweniby agueho ara — kely Jesus.

<sup>45</sup> Mâkâ uguondo olâ myani târâpa itybyem kua tyetobyry tâgatuze lelâ. Idânârâ egary indadylymo. Awlygue, xidadâ imâsedo odakâ Jesus nâtâba awyly, toenzepa kurâdo tydâtyguyba itoem. Kurâ domodo aguipaom duay, xidadâ imeombyry oday alelâ ize awyly. Kurâ domodolâ aguely idase, nhomedâdo xutuze warâ idâim.

## 2

*Jesus adakobâdâny kua nhetobyry*

(Mt 9.1-8; Lc 5.17-26)

<sup>1</sup> Iweâpa itybyem myani Jesus odopâdyly xidadâ Cafarnaumram. Inepa kehoem egary indadylymo warâ; Jesus târâ awyly nhutulymo. <sup>2</sup> Toenzepa lâpylâ kurâdo myarâ idâypy âtâdyguybyem awylymo. Tasera tumyke kehoem, toenzepa lelâlâ âtâ odaji tâdâwântoemba lâgâlâ. Deus wâgâ Jesus aguely indadylymo. <sup>3</sup> Jesus âtâ oday aguely ume uguondo tâwâneim adaholy. Adakobâdâny myani mâkâ. Aituo quattro eaten-hodoram adaholy sawo wâgâ. <sup>4</sup> Toenzepa kurâdo awlygue olâ myani Jesus iopaji naimpyra awylymo. Pyanta oze tâgawâmpyra tawyly tientuomo myani âkulymo âtâ angawanxi\* tâdâkuho wâgâ adakobâdâny agâ. Jesus nhangawaym kehoem myani in-hoguylimo. Ilâ oze myani tâwâneim eguetudo wâgâlâ tasegue nhytâguyândylymo. <sup>5</sup> Aidylymo tientuo Jesus tyangahu oday aguely:

— Awâkâ adakobâdâny kua kânhedyly tâinwâñse asaemo — kely.

Aituo Jesus aguely eyam:

— Idânârâ inakanhe amitobyry modo xygakeagui — kely.

<sup>6</sup> Moisés inweniby wâgâ enomedâni modo târâlâ myani âtâ oday ekadaymbyem. Jesus aguely tindatuomo, âpaunzedlymo:

<sup>7</sup> — Koendâpa awâkâ Jesus aguely! Deus nhunâguedyly kulâ awâkâ! Deus agâ âzekiba tâidysse awyly kulâ! Âdaunlo uguondo nhygakely mâkeba awârâ idânârâ inakanhe adâjito byry modo! Deus lelâ awârâ xygakerim — kelymo.

<sup>8</sup> Tutuze olâ myani Jesus âdy nhangahumo oday xunârymo awyly. Aituo aguely:

— Arâ ywâgâ tâpaunzezeba itaungâ! Unâguedaundâ — kely.

<sup>9</sup> — Merâ adakobâdânyram: “Idânârâ inakanhe amitobyry modo xygakeagui” uguely-ro watay, mâuntuwâbyra ise âmaemo âkealâ, âkealâba warâ auguely awyly. “Aukâ. Iguetudobyry sanâkâ. Adakobâgâ” ugueduo, adakobâdy-ro watay olâ xutuze âmaemo, ton-honre wawyly! <sup>10</sup> Merâ koendâ adakobâdy mâentuomo, xutuze âmaemo, kurâ

\* **2:4** Mârâ ume âtâ nhangakuedary TUN-HUM waunlo lelâ mawânrâ saryum waypa, iwerâ âtâ emyenro keba.

domodo inakanhe aito xygakeze ton-honre wawyly, urâ Uguondo Kaynâpa Âetyby – kely Jesus.

<sup>11</sup> Aituo adakobâdânryam aguely:

– Aukâ, iguetudobyry sanâkâ, adakobâgâ, idâ itynra – kely.

<sup>12</sup> Aguely umelâ kehoem koendâ idyly, saudyly idânârâ enanaynmo. Tâguetudobyry nhanâdyly, adakobâdyly, egasely, tâtyram idâly. Idânârâ âsewânilymo, iomazelymo warâ. Aituo aguelymo:

– Koendonro, ton-honreim warâ Deus! Âdykâ aunlo kientaymba kurâ! – kelymo.

*Jesus Levi tynynonroem itoem ingâsedobyry*

(Mt 9.9-13; Lc 5.27-32)

<sup>13</sup> Aituo Jesus egaseondyly. Idâondyly paru Galiléia edazekâam. Toenzepa myani kurâdo saindyly eyam, Deus wâgâ nhenomedâdoam. <sup>14</sup>Târâ tadakobâday Jesus, uguondo impostu epywado emakeim nhedyly. Levi myani mâkâ, Alfeu imery. Ekadybyem myani kurâdo impostu nhepywadodâ. Aituo Jesus aguely eyam:

– Yagâ âekâ, Ynynonroem ikâ, yagâ mâsenomedâdoem – kely.

Aituo Levi saudyly. Jesus agâ idâly, eynynonroem tâitoem.

<sup>15</sup> Ilâpygueduo kopae Jesus tynynonro modo agâ âwinduadylymo Levi etydâ. Dinheru impostu epywadobyry emakewâni modo, kurâdo judeu domodo izepa ato modo, Jesus aguely idase eagâ adakobâni modo warâ târâmo lâpylâ âwinduadylymo. <sup>16</sup> Moisés inweniby wâgâ enomedâni modo, fariseu domodo warâ âdara idyly awyly tânuagaenzemo myani. Izepa tatomo agâ Jesus âwinduadyly tientuomo, Jesus eynynonro modoram aguelymo:

– Kâzewenry araba kulâ awâkâ Jesus aidyly! Dinheru impostu epywado emakewâni modo agâ, kurâ domodo inakanhe kulâ aini modo agâ warâ âxiduaji nipyra tâise awâkâ! – kelymo.

<sup>17</sup> Aguelymo tindatuo Jesus eyanmo aguely:

– Deus wâgâ auguehoem uirimpypyrlâ asaemo. Tâwânuneim modo mawânkâ kua tyeni xuirim, tâwânunenry modo keba. Inakanhe aini modo igâseze kâewyly, “Inakanhe aitânry urâ” kewâni modo igâseze inkâba xirâ kâewyly – kely.

*Saguho kiuntuyby kyjimonre, iwelo kiuntuhoem*

(Mt 9.14-17; Lc 5.33-39)

<sup>18</sup> João Batista eynynonro modo, fariseu eynynonro modo warâ ezewenrymolâ mykâinane nâwinduapyra idylymo, Deus agâ adâkehoem. Aituo kurâ domodo saindyly; Jesusram aguelymo:

– João Batista eynynonro modo, fariseu eynynonro modo warâ nâwinduapyra tâisemo inanry, Deus agâ adâkehomoe. Âynynonro modo olâ nâwinduapyra nipyramo, Deus agâ adâkehomoe. Âdaituoka anipyra awylymo kâzewenry agueho ara? – kelymo.

Aituo Jesus eyanmo aguely:

<sup>19-20</sup> – Eagâmo wawyly ara, nâwinduapyra nitaymbamo ise. Eagâmopa wituo olâ nâwinduapyra isemo, Deus agâ adâkehomoe. Todohogün-horam igâsedaymby modo mawânkâ ohogünrim agâ tatay, nâwinduapyra nipyra, etygumo lelâ. Ohogünrim tudu-aypa ituo lelâ nâwinduapyra idylymo myara – kely.

<sup>21</sup> Jesus eyanmo agueondyly. Nhenomedâdylymo xirâ modogue.

– Âtâbâ adauguehobyry tawentâzeba âtâ iwelo sapidubygue. Âtâ sawentâdobyry tukuiduo, odopâduo, tadaugueze mawânrâ âtâbâ. <sup>22</sup> Tâjituby vinhu etaryem xygatyby iwelo keba odaji vinhu iwelo tâkanâduneba. Tâjituby iwelo keba odaji ekanâduo, etary tadaugueze mawânrâ. Aituo vinhu apâdyly. Aypa olâ, vinhu iwelo etaryem tâjituby iwelo xygatyby odajilâ ekanâdyly watay, vinhu nhewantuo, imâem ituo warâ, tâjituby iwelo tâzepâgueze – kely Jesus.

{Jesus aguely, saguho konomedâdobyry kinmohoem, iwelo konomedâdo kieinwântoem warâ. Saguhobyry mawânrrâ nâseinwâmbyra iwelo konomedâdo agâ.}

*Jesus eynynonro modo tâzekobyzegueho oday trigu ewily nhasewâdomobyry  
(Mt 12.1-8; Lc 6.1-5)*

<sup>23</sup> Tâzekobyzegueho oday myani Jesus tynynonro modo agâ trigu ejidy ezakâ sakadylymo. Sahuadybyem myani trigu ewily. Tâtâdaymolâ Jesus eynynonro modo trigu ewily nhasewâdyly; tâzewenkelâ aidylymo. Tâmarygue nhekuguelymo, nhagulymo idylymo.

<sup>24</sup> Aituo fariseu domodo ewy, akaemo aidyly tientuomo, Jesusram aguelymo:

— Egâ âynynonro modo âsewanily! Trigu ewily nhasewâdylymo, nhatuguelymo warâ. Tutuzelâ âmâ, kâzewenry eynynâ kokobyzegueho oday âdy aguento keba awyly — kelymo.

<sup>25</sup> Aituo Jesus aguely:

— Enanâguewâdaungâ typynigueba tâituomo, kydamu Davi, eagonro modo warâ aitomobyry. Ewindymo lelâlâ myakâwândy. <sup>26</sup> Deus ety odaji egawândylymo. Abiatar myakâwândy mâtâ ume kurâdo eynynâ Deus agâ aguewâni modo iwymâry kuru. Davi, eagonro modo warâ tytyenze tawylygue myakâwândy, Deusram xuduypy pão modo Daviram nhuduly. Kâzewenry eynynâ olâ tâise Davi domodo nedawynmpa. Kurâdo eynynâ Deus agâ aguenri lelâ mawânkâ tâise mâtâ pão edawynrim, âkelo modo lâpylâ warâpa. Davi myakâwândy tâdawynze, tagonrodo tuase warâ. Deus olâ myakâwândy nehoguebyramo nipyra, nhedawynduomo. <sup>27</sup> Tyanepa kine, ânguylâ tâzekobyzegueho oday emawyadâze. Deus tâzekobyzeguehoem anhetyby lelâlâ wâne sâbado. Tâwâlâ olâ xirâ oday tâdâsemawyadâdyly. <sup>28</sup> Uguondo Kaynâpa Âetyby urâ. Âdy iwâkuru adyeseim, adyesenry warâ tâzekobyzegueho oday xuturim urâ — kely Jesus.

### 3

*Jesus uguondo âzemapiluguedânrâ kua nhetobyry  
(Mt 12.9-14; Lc 6.6-11)*

<sup>1</sup> Jesus egawântondyly âtâ tâdâtâdyguyho odaxi. Uguondo âzemapiluguedânrâbe myani târâ. <sup>2</sup> Tâlâ lâpylâ myani târâ kurâdo ewy Jesus izepaom. Jesus tiunâguedomoem kulâ aidyly enuagaeni modo xunâzelymo:

— Tâzekobyzegueho oday Jesus awâkâ uguondo emary kua nhedyly watay, Moisés inweniby araba aidyly awyly aguyenre. “Deus aiedyseba ato amientai” kykenre — kelymo.

<sup>3</sup> Aituo Jesus mâkâ uguondo âzemapiluguedânrâ ingâsedly:

— Âekâ xarâ — kely.

<sup>4</sup> Mâkâ tuopaji idâduo Jesus âtâdyguyby modo nhapâiguel:

— Âdaraka Moisés inweniby aguely, koendâ aguidyly, inakanhe aguidyly tâzekobyzegueho oday? Ânguylâ tâzekobyzegueho oday kâmaynoem watay, kienmakely? Tâwâlâ kingueânehonly? — kely Jesus.

Ânguy olâ aguely nihoguba.

<sup>5</sup> Jesus tyewiâpaze, tytywanze warâ myani. Saguhobyry tâzewenrylâ ize atomo kuru awylygue, mâkâ uguondo nityembyramo myani. Aituo Jesus uguondoram aguely:

— Âzemapiluguegâ — kely.

Jesus agueduo, uguondo âzemapiluguey, emary kua ienipyryem awylygue. <sup>6</sup> Awârâ tientuo fariseu domodo târâpa egaselymo. Herodes eynynonro modo ewy agâ âtunâgueze idâlymo, Jesus tyâen-hon-homoem.

*Toenzepa kurâdo Jesus aguely idase âtâdyguyhomobyry*

<sup>7</sup> Târâpa Jesus âxiguelo. Paru Galiléia emelaji myani idâlymo tynynonro modo agâ. Toenzepa kurâdo Galiléia donro, Judéia donro warâ eagâ idâlymo. <sup>8</sup> Xidadâ Jerusalém donro, Iduméia donro warâ eagâ idâwânmô lâpylâ. Paru Jordão eynynonro, Tiro eynynonro, Sidom eynynonro modo warâ idâwânmô lâpylâ. Tâinkânro modo lelâba myakâwâm eagâ idâni modo, anhekyly tiuntudyze tawylymogue. <sup>9</sup> Toenzepa kurâdo okonodyly tientuo tynynonro modoram aguely:

— Pepine nhontaungâ. Kurâdo yakabeba itoem, pepi oday ekadybyem ise kâenomedâdylymo — kely.

<sup>10</sup> Toenzepa kurâdo kua nhedyly awylygue, tâwânnuneim modo kurâdo agâ okonodylymo, Jesusram taintomoem, “MÂ’ kientuo, kua ise kurâ” tâkeduomo. <sup>11</sup> Kadopâgue taseimbe lâpylâ târâ. Jesus tientuo myani enado âzeguhaoam itybyem, aguelymo:

— Deus imerylâ âmâ! — kelymo.

<sup>12</sup> Jesus olâ ton-honre kehoem aguely:

— Ânguyem wawyly adâkezeba itaungâ — kely kadopâ modoram.

*Jesus tynynonro tienomedâguyly modo induakehobyry*

(Mt 10.1-4; Lc 6.12-16)

<sup>13</sup> Ilâpygueduo Jesus iwy onwa âkuly toenzepa kurâdo agâ. Akaemo ewy myani induakely. <sup>14</sup> Induakewâdyby modo iopaji idâim. Doze lelâ induakely tunâry egaturinem.

— Ynynonro ise âmaemo, yagâ âsenomedâniem. Ogonodylymo olâ, Deus itaumbypy egatuze. “Jesus tunâry egatuze ingonotaymbô modo” kely ise izedymo — kely.

<sup>15</sup> — On-honrumo xirâ kâunduly, kadopâ mânhankyhomoe — kely Jesus.

<sup>16</sup> Doze lelâ induakeyby:

Simão (“‘Pedro’ ise izedy” Jesus kehobyry)

<sup>17</sup> Tiago, João warâ, Zebedeu imeombyry (“Boanerges” kelygue nhezetâdyby lâpylâ asaemo, “Ton-honre tytareim” keze aguely.)

<sup>18</sup> André

Filipe

Bartolomeu

Mateus

Tomé

Tiago (Alfeu imery)

Tadeu

Simão (Tâty anary izetonro lelâlâ tawylygue, Roma donrogue tywymâgu izepaom.)

<sup>19</sup> Judas, Queriote donro (Jesus egamenribyry izepaom modoran-ro)

Warâ Jesus induakewâguyl.

*“Satanás eon-honru kainy lakuru Deus eon-honrugue” Jesus kehobyry*

(Mt 12.22-32; Lc 11.14-23; 12.10)

<sup>20</sup> Ilâpyryem Jesus egawândyly âtâ odaji tynynonro modo agâ. Târâ awyly tiuntuduo toenzepa kurâdo Jesus tiendysedonro modo myarâ idâly. Awylygue, tynynonro modo agâ âwinduatoem nudupa lâgâlâ. <sup>21</sup> Jesus ipemugudo awârâ tiuntuduo ese idâlymo, Jesus “Âindâam idyly” kely idanipyryem tawylymogue. <sup>22</sup> Jesus ipemugudo saindyly ume myani Moisés inweniby wâgâ enomedâni modo Jerusalémdâpa saintybyem, Jesus wâgâ aguelymo:

— Belzebu\* eon-honrugue kulâ awâkâ kadopâ modo nhânyly — kelymo; kewâdylymo kulâ olâ.

<sup>23</sup> Aituo Jesus akaemo arâ aguewâtyby modo tuopaji ingâsedily. Tienomedâdomoem, Satanás eon-honrugueba kadopâ modo inwenkely wâgâ, aguely:

\* <sup>3:22</sup> Satanás ezedy eagonro awârâ “Belzebu.”

— Satanás kadopâ niwenkewâbyra, eynynonrolâ mawânkâ. Tâwâlâ Satanás okonodyly waunlo ara kulâ tâise. <sup>24</sup> Âjigue âzety anano modo âseguebyly-ro watay, mârâ âtâ anary tadainze. <sup>25</sup> Âjipemugu âjigue kulâ âseguebylymo watay, tyewiâpadaynzemo, tâwiensem warâ. Tagonro agâ koendâ nâzepyramo, âjidueryem tâisemo mawânkâ. <sup>26</sup> Kadopâ modo iwymâryma Satanás. Kadopâ modo âjiguelâ âseguebyly, tygue tygue idylymo warâ watay, ton-honremba tâise Satanás. Tywymâgueba tâisemo mawânkâ. Satanás eon-honrugue inkâba kadopâ modo kânhânyly. Satanás eon-honru kainly lakuru Deus eon-honrugue — kely.

<sup>27</sup> — Uguondo ton-honreim ety odaji ânguy negawântaymba, emagaduze, tâkâjizeba mâkâ watay. Ekâjiduo lelâ ise jiguy emagazedyly. Satanás eon-honrugue aini mâkeba urâ, eon-honru sainrim lakuru — kely myani Jesus.

<sup>28</sup> — Deus izepa ato amânhedylymo, amygueylymo, mâunâguedylymo warâ-ro watay, idânârâ awârâ modo xygakeze Deus, mâenkadylymo-ro watay. <sup>29</sup> Deus Ispiritury ewanu wâgâ inakanhe kulâ amyguehobypy olâ ise Deus nygakeba. Arâ agueim modo aguehobypy Deus nygakewâbyra aunloenlâ. Xirâ mâuntudyzemo kuru wato — kely Jesus.

<sup>30</sup> “Kadopâ agâ awâkâ Jesus” kerim modope awylygue myani Jesus arâ aguely.

### *Jesus tyze, tukonodo warâ wâgâ aguehobypy*

(Mt 12.46-50; Lc 8.19-21)

<sup>31</sup> Jesus aguely ume, ise, iukonodo warâ saindylymo eydâ atoram. Kuoholâ ingâsenehonlymo. <sup>32</sup> Toenzepa târâ kurâdo iopay ekadaymbyem awyly. Târâ mawânkâ aguehonly:

— Âze, âukonodo warâ târâ inuendyly — kehonly.

<sup>33</sup> Aituo Jesus aguely:

— Yze lelâlâ mâkâ pekodo. Konodo lelâlâ akaemo uguondo modo warâ. Tâlâ lâpylâ olâ yze ara lelâ, konodo ara lelâ warâ kâenkyly kuru — kely.

<sup>34</sup> Arâ adâkebygueduo Jesus MYK idyly, tânâmize ekadaymby modoram, aguely:

— Etaungâ. Asaemo mawânkâ yze ara, konodo ara warâ kâenkyly, kâinwyneguyl warâ.

<sup>35</sup> Idânârâ mâkâ Deus ize ato ara aietaynrim modo mawânkâ konodo ara, koudo ara, yze ara warâ kâenkyly — kely Jesus.

## 4

### *Jesus trigu ewy tamuinze etâni wâgâ unâ nhegatuhobypy*

(Mt 13.1-9; Lc 8.4-8)

<sup>1</sup> Jesus kurâdo nhenomedâdondly paru Galiléia emelay. Toenzepa myani kurâdo eydâ âtâdyguybyem awyly. Aituo ekadyly pepi sagunu iwaguepanro odaji. Kurâ domodo tâpagune lelâ paru emelay, Jesus xunâry idase. <sup>2</sup> Jesus unâ nhegatuly, kurâ domodo tienomedâdoem, aguely:

<sup>3</sup> — Xirâ idataungâ. Tâlâ myani uguondo trigu ewy tamuinze etâni typi ezay.

<sup>4</sup> Nhamuinday olâ myani tâlâ ânwa oze ihugueim. Mârâ myani konopio modoram tadaguze. <sup>5</sup> Tâlâ pylâ toenzepa tuhube atoram ihugueim, onro tâsanigueba atoram. Inepa kehoem myani târâ iazely wâne, tydâetâgueba olâ mârâ ago idyly. <sup>6</sup> Xixiram tâjiaduân-honze myani nady tyaduânse, iwindy ago ondaxi nâtâba awylygue. <sup>7</sup> Tâlâ myani tyguyreimpe atoram ihugueim. Tyguyreim modo, trigu modo warâ âzekiba ago tâise myani. Tyguyreim olâ ago ini kuru, trigu takaze kehoem. Aituo kopâ ihugueyby nikuiba. Aituo âdaitoem nudupa. Mârâ duay tawylygue trigu newiseba. <sup>8</sup> Tâlâ myani onro iwâkuru onwa ihugueim. Tyazewâse, ago tâise, tâwiseze warâ myani. Toenzepa myani mârâ nady modo ewitunu. Koendâ kehoem myani ekaunâdyly ewy modo wâgâ cem, sessenta, trinta alelâ kehoem — kely.

<sup>9</sup> Warâ Jesus nhegatuly eyanmo.

— Xirâ unâ aguely koendâ mâuntudyze mataymo, koendâne angahumo odaji ietaungâ — kely Jesus.

*Âdaituo unâ tâgatuzeingue kulelâ tienomedâdyly Jesus aguehobyry  
(Mt 13.10-17; Lc 8.9-10)*

<sup>10</sup> Ilâpygueduo kurâ domodo idâwâdyly, Jesus aguely idanipyryem. Jesus eynynonro modo, târâ âxiânwâdyby modo warâ Jesus nhapâiguelymo:

— Âdaituoka mâmrenomedâday unâ mâmengatuly, ago lelâ amyguepa mawyly? — kelymo Jesusram.

<sup>11</sup> Aituo Jesus in-hoguly:

— Saguhoem mykâinane Deus nutuen-homba âdara idânârâ iwymâryem tâidyl. Urâlâ olâ xutuen-hoim âyanmo, âmaemoma mâmindadysedonromo. Koendâ ise âyanmo kâuntuenhonly. Deus koendâ tiuntudyzebaom modo olâ unâ tâgatuzeingue lelâ kâenomedâdyly.

<sup>12</sup> Agânhekyly tâensemolâ wâne, nutubamo olâ, nepyramo-ro waunlo ara kulelâ. Auguely tydasemolâ wâne, âdakeze auguely nutubamo olâ ise. Koendâ tiuntuduomo, Deus izepa ato aiedyly tumozemo tâise. Deus tâinwânsemo tâise, inakanhe aitomobyry tygakeze tâise Deus warâ — kely Jesus.

*Jesus âdakeze nady wâgâ adâkely awyly aguehobyry  
(Mt 13.18-23; Lc 8.11-15)*

<sup>13</sup> Alâ Jesus agueondyly:

— Nady wâgâ kâengatuby mâmuntuba âmaemo watay, eagonro modo kâengatudo mâmuntuwâbyra ise âmaemo. <sup>14</sup> Inomedâzemo nady ewy wâgâ auguehobyry ise âyanmo koendâ kâengatuly. Mâkâ nady ewy âpa ezay tamuinze etâni emyenro mawânkâ Deus itaumbyry egatuim modo. Deus itaumbyry iwâkuru pylâ awârâ nady ewy ara-ro. Onro onwa nady ewy samuin-hobyry ara lâpylâ Deus itaumbyry kurâ domodoram âzegatuoly.

<sup>15</sup> Mârâ nady ewy ânwa oze tamuinze etâdyby tadaguze myani. Aituo âdy niazepa awyly târâ samuin-hobyrydâ. Tâlâ lâpylâ arâ Deus itaumbyry idataynrim modo. Tydasemo wâne. Inepa olâ Satanás idânârâ indatybymo nhangahumo odaya nhetyly. Aituo pylâ Deus neinwâmpyra awylymo-ro warâ.

<sup>16-17</sup> — Mârâ nady ewy onro tuhubeom onwa ihuguewâdyby inepa kehoem iazely. Iwindy modo ago ondaxi nâtâba awylygue olâ, inepa iladaynly, iguewâdyly warâ. Tâlâ lâpylâ arâ Deus itaumbyry idataynrim modo. Tindatyby modo tâinwânsemo tuomare kehoem. Tâzenagazeodo olâ inepa kehoem Deus neinwâmpyra idylymo.

<sup>18</sup> — Tâlâ mârâ nady ewy tyguyreim duaxi ihuguewâdyby, ago tâise wâne, newiseba olâ, tuahuze mârâ tyguyreim awylygue. Tâlâ lâpylâ arâ Deus itaumbyry idataynrim modo, Deus tâinwânsemo wâne. <sup>19</sup> Xirâ onro anaym adienkyly modo wâgâ kulâ olâ âseguâdâdylymo. Toenzepa âdype tâidyl kulâ, toenzepa tydinerugadyly kulâ warâ olâ ize atomo. Kurâdo tohoguedyly kulâ ize atomo. Awylygue Deus nhenanânehonlymo. Deus itaumbyry nidapyra, iwâgâ nâpaunzebyra warâ idylymo. Deus wâgâ ânguyram aguepa idylymo warâ.

<sup>20</sup> — Mârâ nady ewy onro iwâkuru onwa ihuguewâdyby olâ koendâ iazely, ago idyly warâ. Toenzepa ewisely. Tâlâ myani ewy wâgâ cem lelâ ewily xuduim, sessenta lelâ ewily xuduim, trinta lelâ ewily xuduim warâ. Tâlâ lâpylâ arâ Deus itaumbyry idataynrim modo, tindakylymo lelâ nheinwânklymo. Deus lelâ nheinwânklymo. Ize ato lelâ anhekylymo. Iwâgâ aguelymo, toenzepa kurâ domodo nheinwântoem warâ — kely Jesus.

*Âdy kioempyra kine Deus kurâem anhetyby  
(Lc 8.16-18)*

<sup>21</sup> Jesus aguely:

— Âyanmo kâengatuyby koendâ mâuntudyzemo urâ. Peto tyatygueim âdylâ iaxi toen-tuneba, kama iaxi tyeseba, cestu iaxi tyeseba warâ. Kayanlâ kianlokuândyly âtâ oday, idânârâ nhesagon-hoem. <sup>22</sup> Idânârâ unâry mâuntuba mitomoemba xirâ auguely. Koendâ kehoem mâuntuhomoem auguely. Idânârâ soentaymby modo âjiepanâgueowâze; idânârâ koendâ tydasenrybyry modo âjidahoze, keze mawânrâ xirâ auguely. <sup>23</sup> Xirâ unâ koendâ mâuntudyze âmaemo watay, koendâne angahumo odaji ietaungâ. <sup>24</sup> Idânârâ auguehobyry koendâ idataungâ. Mâindatomobyry ara lelâ amidlymo-ro watay, ago kuru mâuntuhomoem inomedâdonzemo lelâ urâ. <sup>25</sup> Imâem ywâgâ mâuntudyze âmaemo watay, imâem ise mâuntulymo. Ywâgâ mâuntudyzeba âmaemo watay olâ, âdiempa ywâgâ mâuntuybymo enanânehonze âmaemo. Utuba ise âmaemo warâ — kely Jesus.

### *Deuslâ Jesus einwânni modo imâem nhutuhomoem aieni*

<sup>26</sup> Aituo Jesus agueondly. Unâ nhegatuondly enomedâzemo:

— Deus kywymâryem kuru idyly wâgâ ise auguely. Tâlâ myani uguondo nady ewy tamuinze etâni. <sup>27</sup> Nady ewy tientâbygueduo myani eagonro âwanu anhekyly. Peto oday âsewanily, kopae xykyly. Eagonro ewanu anhetay, nady ewy iazely, ago itaynly. Deuslâ mâtâ ago ieni, uguondo keba. <sup>28</sup> Onro iwâkuru watay, ewy samuimby tyazeze, ago tâise, tâwiseze, tahuaze warâ. <sup>29</sup> Trigu sahuaduo, sodo nhatâwâdyly, ekaunâdo odaji itybyem awylygue — kely Jesus.

{Deus itaumbypyrlâ lelâ kieinwânyly watay, ize ato ara aise lelâ kurâ. Awyara lâpylâ ise ohondbyem lelâ kydawyly kâense Jesus âewyly-ro watay.}

### *Jesus mostarda ewy wâgâ aguehobyry*

(Mt 13.31-32; Lc 13.18-19)

<sup>30</sup> Tienomedâdondomoem Jesus âkelo unâ nhegatuondly myani eyanmo. Aguely:

— Unâ segatuji wao âdara Deus kywymâryem lelâlâ idyly awyly mâuntuhomoem. <sup>31</sup> Tutuzelâ âmaemo, idânârâ nady ewy modo takaze kehoem mostarda ewy imeim-byryem awyly. <sup>32</sup> Tâtâduo olâ tyazeze, kaynâ kehoem ago tâise, eagonro modo etâdaymby modo takaze kehoem ago tâise; imâsedo modoem kehoem tywatazeze warâ. Awylygue tawâguneim modo iwatary wâgâ tâty anhetoem nhuduly — kely Jesus.

{“Myara lâpylâ saguhoem kuru aguipa kurâdo kulâ Deus tywymâryem awyly einwânni modo. Ilâpygueduo olâ agui idylymo” keze Jesus aguely.}

### *Jesus unâgue lelâ tienomedâdaymo aguehobyry*

(Mt 13.34-35)

<sup>33</sup> Jesus Deus wâgâ kurâdo nhenomedâdyly, unâ nhegatuly warâ. Nhutuhomo aralâ olâ mykâinane nhenomedâdylymo. <sup>34</sup> Kurâdo nhenomedâdyly watay, âdylâ wâgâ mykâinane unâ nhegatuly. Tynynonro modo koendâ tonomedâze olâ mykâinane âdara keze mâtâ unâ aguely awyly wâgâ.

### *Jesus sapezenru ton-honreim, kopâ tyelugueim agonro nhepagunâdobypyrlâ*

(Mt 8.23-27; Lc 8.22-25)

<sup>35</sup> Ilâ iguandyly ume Jesus tynynonro modoram aguely:

— Paru kuyam kydâzekuâne — kely.

<sup>36</sup> Aituo kurâ domodoram âsedaengulymo. Pepi odaji âxiedylymo, tâzekuâdomoem Jesus agâ. Kurâ domodo idâwânmô lâpylâ eagonro pepi modo oday. <sup>37</sup> Azekuâdylymo ume myani kopâ sapezenru ton-honreim kopâ agonro adaguly. Toenzepa kehoem myani paru adahugânily, xytyânimobelâ kehoem. <sup>38</sup> Mâtâ aitay myani Jesus pepi ihudâ xykyly tyangahu awo wâgâ. Aituo tytylymo tiuntuduo, eynynonro modo nhuagueândyly. Adaenkelymo:

— Pymâ, âwaguegâ! Aukâ! Kyiguely ise xirâ! Kytyly awyly mâempyraka âmâ? — kelymo.

<sup>39</sup> Aituo saudly. Ton-honre kehoem aguely:

- Arâ kehoem tadaapezeinzeba ikâ! — kely sapezenruram.
- Tahugâneba ikâ! Ipagugâ! — kely paru sahugânuram warâ.
- Agueduo tapezenremba idyly, paru tahugâneba idyly warâ. <sup>40</sup> Aituo myani aguely tynynonro modoram:

  - Tâseanezeba itaungâ. Imakezemo, ton-honre wawyly mânwâmpyra lelâ waunlo ara lâgâlâma âmaemo — kely.
  - <sup>41</sup> Toenzepa myani âseanedlymo, aguelymo:
  - Etaungâ! Sapezenru nadapezeimba itoem adye. Paru tahugâneba itoem adye warâ. Ânguy kuruka awâkâ eon-honru xudunri, awârâ modo anhetoem? — kelymo.

## 5

### *Jesus uguondo kadopâgue taseim kua nhetobyry* (Mt 8.28-34; Lc 8.26-39)

<sup>1</sup> Jesus tynynonro modo agâ paru Galiléia kuyam saindyly myani, Gerasaram\*. <sup>2</sup> Jesus pepi odapya âzetybygueduo uguondo kadopâgue taseim agâ oxiodyly. <sup>3</sup> Tâdâzepyâdodâpa myani idâly, târâlâ âxidâdybyem tawylygue. Aunlolâ mykâinane âzekâjioly kurâdoram, korenty ferroguetogue, ton-honreingue kehoem. <sup>4</sup> Toenzepa wâne mykâinane nhemakâjilimo, in-hugâjilimo warâ. Mârâ tâkâjiho tukagâze lelâ olâ mykâinane mâkâ. <sup>5</sup> Iwy tâtaguneim modo igueypy etadâdo odakâ mykâinane adakobâdyly. Peto oday, kopae alelâ mykâinane tâinkâ adakobâdyly. Aunlolâ mykâinane saenlu, tâwâlâ kulâ tuhugue âdyâly warâ.

<sup>6</sup> Aituo myani iwaguelâ Jesus nhedyly. Eyam tâgase kehoem idâly. Inepa kehoem âzeguohoam idyly Jesus enado. <sup>7-8</sup> Arâ aituo Jesus aguely mâkâ odano kadopâ modoram:

- Igasewâdaungâ merâ uguondo odapya. Merâ uguondo kâzenagazaundâ — kely.
- Agueduo uguondo adaenkely.
- Ynanâdâ, Jesus, Deus Ton-honreim Imery! Ienagazenehomba mitoem âyam kâenkadyly — kely myani uguondo kadopâgue taseim.

<sup>9</sup> Arâ adaenkduo myani Jesus aguely eyam:

- Ânguyka izedy? — kely.
- “Aguiom” xina ezedy, agui tawylygue — kely mâkâ kadopâdo iwymâry uguondo oday.

<sup>10</sup> Kadopâ uguondo odano agueondly:

- Xina xirâ âjidâpa kâzejike — kely.

<sup>11</sup> Tâlâ myani târâ iwaguepa toenzepa pâsega âwinduani modo iwy wâgâ. <sup>12</sup> Aituo myani kadopâ modo aguely Jesusram:

- Awâkâ pâsega modo iodaxilâ xina igonokâ — kely.

<sup>13</sup> Agueduo Jesus eyanmo aguely:

- Tâwâlâ, idâwâtaungâ iodaximo — kely.

Aituo myani uguondo odapya egaselymo. Pâsega iodaxi pylâ egawândylymo. Toenzepa myani pâsega târâ awyly, azagâ mil awârâem. Kadopâbe tâituo myani pâsega modo enuimbadaynly. Egatudylymo. Iwy wâgâpa adamunedlymo paikaji. Idânârâ kehoem tyense, iguewâdyly.

<sup>14</sup> Pâsega eni modo iwy wâgâpa pâsega paikaji adamunedly emâmomy. Mârâ tien-tuo, âwenkelymo. Inepa kehoem idâlymo xidadâram. Poji anakâ takadaymo, tonlo modoram nhegatulymo pâsega modo aitobyry. Xidadâram taintuomo tonlo modoram nhegatulymo lâpylâ. Arâ egary tindatuo myani xidadâ odano modo aityby ese idâlymo. <sup>15</sup> Jesusram saindylymo. Târâ uguondo kadopâgue taseimbyry kua ietybyem, âzetydâdybyem warâ nhedylymo, saguhobyry araba, ekadybyem, koendâ lelâ xunâgu

\* <sup>5:1</sup> Gadara lâpylâ myakâwâm mâtâ âji ezedy.

warâ. Arâ mâkâ tientuomo, toenzepa âseanedlymo. <sup>16</sup> Jesus aidyly etaynrimbyry modo âdara aitobyry awyly tâgatuzemo myani. Jesus mâkâ uguondo kadopâgue taseim kua nhetobyry, pâsegado paikay nhetayn-hombyry warâ nhegatulymo. <sup>17</sup> Awârâ tindatuo Jesusram aguelymo:

— Âxiguegâ xina ety anaymba. Taynynâ inkâba ikâ — kelymo, Jesus tâguy pâsega nhaindyseba tawylymogue.

<sup>18</sup> Agueduomo myani Jesus idâly pepi odaji ekaze. Aituo myani uguondo kua ityby aguely eyam:

— Idâze urâ agâ — kely.

<sup>19</sup> Jesus olâ warâ aguely:

— Atâlâ ikâ. Itynralâ odopâgâ. Âmâem koendonro Deus anhetyby egatura âpemugudoram — kely.

<sup>20</sup> Aituo myani uguondo idâly. Dez Xidadâ anakâ myani Jesus kua tyetobyry egatuze. “Jesus kua yedâ” kely tindatuo toenzepa âsewânilymo.

### *Jairo Jesus ingâsedobyry*

(Mt 9.18-19; Lc 8.40-42)

<sup>21</sup> Aituo Jesus tynynonro modo agâ mâtâ paru nhekuâdondlymo. Toenzepa myani kurâdo iose idâly mâtâ paru emelaji. <sup>22</sup> Eagâmo aguely ume âtâ tâdâtâdyguyho iwymâry Jairo, Jesus iopaji saindyly; âzeguhoam idyly enado. <sup>23</sup> Jesusram aguely:

— Inoro wao ietyram. Iexiry iguely mâtâ. Ytyengâ wao — kely. — Nhonwa imary MÂ’ ietâ wao, kua itoem, niguepa itoem — kely.

<sup>24</sup> Aituo Jesus eagâ idâly. Idâday, taynâ, tâynâ warâ tadakabzelâ kehoem kurâ domodo.

### *Jesus pekodo tâwâneim kua nhetobyry*

(Mt 9.20-22; Lc 8.43-48)

<sup>25</sup> Kurâdo duay tâlâ myani pekodo tâwâneim. Imery etary myani âunkeim; kuapa idyly agâ toenzepa iunu ihuguely, toenzepa lelâlâ. Doze anupe myani mâkâ arâ ewânu.

<sup>26</sup> Tâpyneândylygue idâzesedyly kua kyeni modoram. Tâwâense nhepywadyly, kua nipyra-ro warâ. Âdara tienwiândyly awyly nutubamo olâ mykâinane. Toenzepa kua kyeni modo epywanibyryem myani mâkâ pekodo, tâsewiândoem wâne, inakanhe idyly lakuru olâ myani, tydineruguepa idyly warâ. <sup>27-28</sup> “Kua kyetâ Jesus” kely tindatuo myani aguelymo tindatobyry aralâ tyangahu oday xunâzely:

— Ety MÂ’ kânhetuo, kua ise lelâ urâ — kely.

Aituo kurâ domodo duakâlâ Jesus ikaingâ saindyly. Eyam taintuo, ikaynâ ety iwâmudâ MÂ’ nhedyly. <sup>29</sup> Ety MÂ’ nhedyly umelâ kehoem myani iunu ihuguely epagudyly. Jesus kua tyeni awyly xutuwâny. <sup>30</sup> Awârâ umelâ kehoem lâpylâ Jesus nhutuly, ânguylâ kua ienipyryem tawyly. Aituo âsemyombâdyly kurâdo tientoem. Aituo kurâdomoram aguely:

— Ânguya enra iety MÂ’ yeny? — kely.

<sup>31</sup> Aituo Jesus eynynonro modo in-hogulymo:

— Egâ, toenzepa kurâdo okonodaynlymo onwa. Agui asaemo ewy ity MÂ’ nietai — kelymo.

<sup>32</sup> Âdakepa olâ Jesus enuaguynru lelâ, ânguy tâty MÂ’ ienipyry awyly tientoem. <sup>33</sup> Kua itybyem tawyly tiuntuduo mâkâ pekodo tyanugue, tapâne kehoem Jesus enadoam saindyly, âzeguhoam idyly, aguely:

— Ity MÂ’ ienipyryem kua witai — kely.

<sup>34</sup> Aituo Jesus aguely pekodoam:

— Kua itybyem âmâ, kua kyetâ wawyly mânwântobyry wâgâ. Idâ lelâ ityam. Awârâ aunlogue, tâwânepe ise âmâ iweâma — kely.

*Jesus Jairo exiry kurâem nhetondobyry igueypyem awyly ume  
(Mt 9.23-26; Lc 8.49-56)*

<sup>35</sup> Jesus aguely umelâ Jairo ety donro modo saindyly; Jairoram aguelymo:

— Ipa ixiry nigueaki! Itynra âdaiseba kulâ Jesus kadadâ — kelymo.

<sup>36</sup> Jairoram aguelymo idanipyryem tawlylygue Jesus aguely:

— Tadahulizeba ikâ. Yeinwânkâ — kely Jairoram.

<sup>37</sup> Pedroram, Tiagoram, iukono Joãoram warâ Jesus aguely:

— Âmaemo lelâ ise yagâ idâim. Eagonro modo nâtâba ise — kely.

<sup>38</sup> Aituo myani Jairo etyram saindylymo, egawândylymo. Egawântybyem myani Jesus, tonlo modo âwynsaundo epyâdoem on-hondylymo nhedyly. Tâguepymo eongüendylymo, âpyneândylymo warâ nhedyly. <sup>39</sup> Aituo myani Jesus aguely:

— Âdaituoka ogunrumo, mâpyneândylymo warâ? Niguewâpyra awâkâ âwynsaundo; xykyly kulâ — kely.

{Arâ aguely, kurâem tientondly tiuntuduo.}

<sup>40</sup> Arâ aguely tindatuomo nheinledylymo. Igueypyem lelâlâ awyly tiuntuduomo, nâepaigueba awylygue. Aituo Jesus aguely:

— Kuohoram igasewâdaungâ wao. Âwynsaundo nhunwym, ise, Pedro, Tiago, João alelâ yagonro nidâ — kely.

Agueypyem myani Jesus eagâmo egawândyly igueypy ejidyrat.

<sup>41</sup> Tâgawâmpygueduomo myani igueypy emary wâgâ sawânipryem, Jesus aguely:

— Talitâ kumi — kely. (“Aukâ, âwynsaundo” keze aguely.)

<sup>42</sup> Adâkehonly umelâ kehoem myani âwynsaundo âepaigueondly, kurâem itondly. Kama wâgâpa saudyly, adakobâdyly idyly. (Doze anupe myani âwynsaundo.) Adakobâdyly tientuo myani enipyry modo âseguâdâdylymo. <sup>43</sup> Aituo Jesus aguely:

— Ânguyran-ne tarâ aityby kâzegatuwâdaundâ — kely.

Âwynsaundo sodo modoram,

— Xuataungâne merâ — kely Jesus.

## 6

*Nazaré donro modo Jesus neinwâmpyra atomobyry*

*(Mt 13.53-58; Lc 4.16-30)*

<sup>1</sup> Cafarnaumdâba Jesus âxiguely. Tynynonro modo agâ xidadâ Nazaréram odopâdyly, tânamadobyryanlâ. <sup>2</sup> Tâzekobyzegueho oday âtâ tâdâtâdyguyho odaji idâly. Târâ Deus wâgâ aguely, kurâdo enomedâze. Toenzepa aguely idani modo âseguâdâdylymo. Aituo aguelymo:

— Koendâ Deus wâgâ tutuze lelâlâ awâkâ uguondo; kiuntuba olâ kurâ âdykâ awârâ nhutuhobyry awyly. Toenzepa awâkâ enomegu, kiuntuba olâ kurâ ânguy enomedânybyry awyly. Adyesenry modo adyese lelâlâ; kiuntuba olâ kurâ âdara awârâ modo anhedyly awyly. <sup>3</sup> Mure, mesa, awârâ modo segue xygahudâni Maria agâ imery kulâ mawânkâ; Tiago, José, Judas, Simão warâ iwaigoru kulâ awâkâ. Eaundudo tarâ kuduaylâ inanry kyjidadârydâlâ — kelymo.

Jesus iamugâry enipyry tawylymogue, Deus Ingonotyby mâkâ awyly neinwâmpyra awylymo. Aguely tindadyseba awylymo warâ.

<sup>4</sup> Aituo myani Jesus aguely:

— Unâ egatuim tâty anaym, unâ nhegatuduo ipemugudoram nâzeinwâ-honwâbyra; âkelo âtâ anano modo kulâ einwânni — kely.

<sup>5</sup> Neinwâmpyra tawylymogue tonlo modo Jesusram nâtâba awylymo. Aituo âdiempa kulâ adyesenry modo târâ anhedyly. Aguipa kulâ tâwâneim tâmarygue MÂ' nhekyl, kua tientoem warâ. <sup>6</sup> Toenzepa myani âpaunzedly, agui târâ Nazaréda tainwântânry modo awylygue.

*Jesus tynynonro modo Deus wâgâ unâ iwâkuru egatuze ingonotobyry  
(Mt 10.5-15; Lc 9.1-6)*

Ilâpyryem myani Jesus kurâdo nhenomedâdyly âtâ anary imeombyry anakâ. <sup>7</sup> Akaemo doze tynynonro modo igâsemâmy, Deus wâgâ agueze tingonotomoem. Azagâ myarâ, azagâ myarâ, azagâ myarâ warâ myani ingonodylymo. Kadopâ nhânyhomoe eon-honrumo nhuduly. <sup>8</sup> Egaselymo iraynâ aguely:

— Unâ idataynrim modolâ ise âdy ize matomo xudunri. Pyni, dinheru, âsejiguymo etary warâ kadataundâ. Amatagoromo lelâ sataungâ, ânwa oze mâzesebydâdomoem. <sup>9</sup> Owogonromo lelâ itymo sataungâ; âhurumo etary mâungukehomo kadataundâ warâ. <sup>10</sup> Âtâ anaxi aintuomo, saguhoem âgâsenimobyry etydâlâ itaungâ. Târâlâ âkywâdaungâ, eagonro âtâ anaryam mydâlymo ara. <sup>11</sup> Ânguy idaenkubamo, amyguelymo tindadyseba warâ atoram aindylymo-ro watay, inepa igasewâdaungâ. Târâpa igasedaymo, âhurumo etary etywâdaungâ, xutoleguguewâdaungâ warâ, Deusram tângazezeim awyly xutuhomoem, ize ato ara anipyra awylymogue, yeinwâmpyra awylymogue warâ — kely Jesus.

<sup>12</sup> Aituo eynynonro modo Deus itaumbyry egatuze idâlymo. Alâ myani tâtâhobyrydâ aguezesedlymo:

— Âjityendaungâ Deus xurâem inakanhe amitomobyry wâgâ. Inakanhe Deus xurâem amitomo imowâdaungâ. Aguely kadakadaundâ — kelymo.

<sup>13</sup> Kadopâ tyânyzemo mykâinane. Toenzepa kurâdo tâwâneim modo nhangahu onwa azeiti tyesemo mykâinane warâ, kua tientomoem.

*João Batista nhangasagâdobyry  
(Mt 14.1-12; Lc 9.7-9)*

<sup>14</sup> Jesus anhekyly modo egary idamâmy pymâ Herodes, tâinkâ lelâba Jesus wâgâ aguelymo awylygue. Tâlâ wakenri modo:

— João Batista kurâem itondyby keanra awâkâ Jesus. João kurâem nitondâ. Awylygue eon-honru adyesenry modo aiese — keim.

<sup>15</sup> Tâlâ lâpylâ wakenri modo:

— Mâkâ keba awâkâ. Elias awâkâ Jesus-em ini — keim.

Tâlâ pylâ,

— Mâkâ keba awâkâ. Saguho modo Deus itaumbyry egatuwânbiry ewy kurâem ityby awâkâ Jesus — keim.

Warâ myani aguelymo, ânagadoem kulâ. <sup>16</sup> Ânguyem Jesus awyly wâgâ aguelymo idamâmy Herodes. Aituo myani aguely:

— João Batistama igueypyem, xiangasagâneho mawânkâ, Jesus-em olâ âepanâguely iwerâ — kely.

<sup>17-18</sup> Âdara João xyâhobyry awyly ise kâengatuly wao. Herodes myani Herodias agâ tohogünze, tukono Filipe iwydyem awyly umelâ. Alâ mykâinane João aguezesedly eyam:

— “Kukono iwydy agâ todohogüinly lâpeba” kelype Moisés inweniby wâgâ — kezesedly.

Awylygue myani Herodes tyzodadury modoram aguely:

— João Batista sawâtaunda. Emakâjiwâdaungâ, etadâdaungâ-ro warâ — kely.

<sup>19</sup> Herodias myani João izepa, tyâen-honly mykâinane ize ato. <sup>20</sup> João xyâen-honze tyane olâ myani Herodes, uguondo koendâ lelâ aini mâkâ awyly, tutuze tawylygue. Deus ize ato ara lelâ aini João awyly tiuntulygue lâpylâ warâ. Awylygue myani nhetadânehonly

lelâ. Alâ mykâinane Herodes xunâgu João agâ. Ize ato mykâinane João agâ tâdunâgu. João aguely tindatuo, âdy adienkyly awyly nutuba idyly mykâinane.

<sup>21</sup> Alâ myani Herodias âdara João tyâen-honly awyly nhutuly. Herodes tyazehobypy nhetyguedyly myani. Idânârâ pymâ domodo, sodadu iwymâry modo, uguondo tâgaruneim modo warâ tygâseze myani. Idânârâ myani âzetyguedylymo Herodes agâ. <sup>22</sup> Awinduadylymo ume myani Herodias exiry âise egawândyly nhetomoem, iomazeânzemo. Aidyl tientuo myani Herodes, eagonro modo warâ toenzepa kehoem nhehoguedylymo. Aituo myani eyam aguely:

— Tâwâlâ âdylâ ize mato ekagâ; xuduze lelâ urâ. <sup>23</sup> Tâwâlâ ise Deus ienagazedyly, mâenkadyby kâundupa urâ-ro watay. Pymâ ton-honreim urâ. Adypeom urâ. Idânârâ tâlâ wato epajiwâze urâ, ize matay — kely âwynsaundoam.

<sup>24</sup> Aituo myani mâkâ âwynsaundo tyze agâ agueze idâly.

— Âdyka ise kâenkaguyl? — kely.

— João Batista nhangahu ekagâ; ilema ise xarâ mâenenehonly-ro warâ — kely ise.

<sup>25</sup> Aituo myani mâkâ âwynsaundo odopâdyly pymâ Herodesram. Aguely myani:

— João Batista mânhagasagânehonly ize wato. Iweâma ise nhangahubyry mâenenehonly prato oday xarâ-ro warâ — kely.

<sup>26</sup> Awârâ tindatuo toenzepa kehoem myani pymâ Herodes itynwandyly. Tingâsedyby modo enanaym adâkehobypy awylygue olâ myani anhenehonly lelâ. <sup>27</sup> Aituo myani sodadu kyârim ingâsedyly, eyam aguely:

— João nhangasagâda. Nhangahubyry xarâ enekâ-ro warâ — kely.

Aituo myani sodadu idâly João etadâdobyryam nhangasagâze. <sup>28</sup> Ilâpyryem myani nhangahubyry prato odaji nhedyly, nhadyly âwynsaundoam. Âwynsaundo myani tyzeram xuduim. <sup>29</sup> Aituo myani João eynynonrobypy modo xyâhobypy egary indadylymo. Tiuntuduomo myani eguepybyry ese idâlymo. Nhadylymo. Tuhu esagueyby odaji nhetadâdylymo warâ.

Awârâ wâgâ myani Herodes âpaunzedyly. Awylygue myani “João keanra awâkâ Jesus” kely tyangahu oday.

*Jesus cinco mil uguondo modo, cinco pão, azagâ kanra âjihuyby warâgue nhuantobyry (Mt 14.13-21; Lc 9.10-17; Jo 6.1-14)*

<sup>30</sup> Jesus xunâry egatuze igonotaymby modo todopâdaynzmemo myani. Odopâdybyem adientaymby modo, tienomedâdaymby modo warâ Jesusram nhegatulymo. <sup>31</sup> Toenzepa Jesus tynynonro modo agâ atoam, kurâdo saindyly, egasely warâ, Jesus tynynonro modo agâ koendâ âwinduatomoemba. Aituo tynynonro modoram Jesus aguely:

— Inoro âji âdy peba atoam. Ekozeybyem mataunaze adakobâzezedybyem. Âetaungâ yagâ. Ikobyzeguewâdaungârâ wao — kely.

— Inoro pylâ — kelymo.

<sup>32</sup> Aituo Jesus tynynonro modo agâ pepi oday âdy peba atoram idâlymo. <sup>33</sup> Kurâdo olâ pepi oday idâlymo tâense-ro warâ. Awylygue Jesus tynynonro modo agâ âdykâ awyly nhutulymo. Aituo tysegoze idâlymo tuhuru wâgâ, paru nhere. Waunroenlâ saindylymo. <sup>34</sup> Pepi odayba itybyem Jesus toenzepa kurâdo tynwânwâni modo nhedyly. Akaemo tytyenze myani Jesus ânguy Deus wâgâ nhutuhomoem aguenri peba awylygue. Kanerudo eni pebaom aramo mawânkâ. Aituo Deus wâgâ kurâdo nhenomedâdyly.

<sup>35</sup> Iguandyly ume Jesus eynynonro modo eyam saintaynly. Aituo aguelymo:

— Iguandyly enra. Âdykâ pyni xuiho lâpeba tarâ. <sup>36</sup> Asaemo igonokâ âpa ezaji, pyni xuize, âtâ anary iwaguepaonram warâ — kelymo.

<sup>37</sup> Jesus olâ aguely:

— Nâtâwâbyramo ise. Âmaemolâ ipynirymo âunduwâtaungâ — kely.

— Arâ xina anipyra ise enra! Toenzepa dinherupe-ro watay lelâ tâise, duzentas moedas prataguetoque lelâ merâ idânârâ ipyniry adanâdyly. Âdy peba xina-ro warâ — kelymo. {Tokalâ iguandyly âwanopyry epywado mawânrâ myani tokalâ moeda pratagueto.}

<sup>38</sup> Aituo Jesus aguely:

— Âdara pãobeka akaemo? — kely.

Aituo xutuze idâlymo. Odopâdybyem Jesusram aguelymo:

— Cinco pão, azagâ kanra âjihuyby warâpe — kelymo.

<sup>39</sup> Aituo Jesus aguely:

— PU târâ, PU târâ warâ ikadaungâ âji koendonrodâ — kely.

<sup>40</sup> Kurâdo idânârâ ekadaynly PU târâ, PU târâ, PU târâ warâ cem, cinquenta warâ âzepajiwâdylymo. <sup>41</sup> Aituo Jesus cinco pão, azagâ kanra âjihuyby warâ nhanâdyly tâmaxi. Sanâniubyrem, kayam MYK idyly. Deus agâ aguely:

— Koendonro lelâlâ âmâ, Pabai, awylygue xinaem xirâ pão, merâ kanra warâ mâunduly — kely.

Ilâpyryem pão nhepajiwâdyly, tynynonro modoram nhuduly, kurâdoram nhepâdomoem. Nhepâdylymo umelâ kehoem Jesus pão epajiwâdyby, agui nhenehonly. Azagâ kanra âjihuyby nhepajiwâdyly tynynonro modoram nhuduly lâpylâ myani, kurâdoram nhepâdomoem. Nhepâdaymolâ kehoem kanra âjihuyby agui idyly lâpylâ.

<sup>42</sup> Ize tato ara kehoem idânârâ kurâdo âwinduadyly; kanra âjihuyby nhâdylymo, pão nhedawynlymo warâ. Koendâ kehoem iolataynlymo. <sup>43</sup> Ilâpygueduo myani Jesus eyynynonro modo pão, kanra âjihuyby warâ âsegubydâdyby nhekanâdylymo cestu imâsedo modo odaji. Doze cestu tumyke âsegubydâdyby nhuduly. <sup>44</sup> Toenzepa myani âwinduani modo, cinco mil uguondo modo lelâ, toenzepa lâpylâ pekodo modo, iamimeom warâ.

### *Jesus paru wâgâ adakobâdyry*

(Mt 14.22-33; Jo 6.15-21)

<sup>45</sup> Ilâpyryem Jesus tynynonro modoram aguely:

— Âxiedaunda pepi odaji. Idâwâtaungâ paru kuyam kurâdo Betsaida donro modoram. Tarâ asaemoram âsedaengübyrem ise oiosemo udâly — kely.

— Idâze lelâ xina — kelymo myani.

<sup>46</sup> Tonlo modoram tâsedaengubygueduo, Jesus iwy onwa âkuly, Deus agâ agueze.

<sup>47</sup> Iguampygueduo, Galiléia iwalu iotay pepi odano modo; mâkâ kulelâ myani Jesus târâ awyly. <sup>48</sup> Jesus iwaguelâ nhedylymo. Kura kehoem inkâguelymo eon-honrugue, nhonwamo adapezeinly awylygue. Emedyly wâgâ, aukuma igâtuduo myani Jesus idâly eyanmo. Sakazemo kely ume myani, <sup>49</sup> paru wâgâ adakobâdyly nhedylymo. “Kadopâ” tâkewâduo adaenkelymo. <sup>50</sup> Jesus olâ myani eyanmo aguely:

— Âzeon-hondâdaungâ. Tâseanezeba itaungâ! Jesuslâ urâ! — kely.

<sup>51</sup> Aituo pepi odaji âxiedyly. Âxieduo, tapezenremba idyly. Awârâ tientuomo, toenzepa kehoem âseanedlymo. <sup>52</sup> Jesus pão, kanra warâ agui tienehonduo, enehonwâm, Deus Ingonytyby tawyly. Awârâ anhetuolâ ânguy Jesus awyly nutubamo olâ myani. Awylygue mawânkâ nutuba awylymo, âdara mâkâ paru wâgâ adakobâdyly awyly, ago lelâlâ Messiaslâ mâkâ awyly neinwâmpyra tawylymogue.

### *Jesus Genesaré donro tâwânuñeim modo kua nhetobyry*

(Mt 14.34-36)

<sup>53</sup> Jesus tynynonro modo agâ paru nhekuâdylymo. Genesaréram saindylymo. Saintybyem, pepi nhekâjilymo sagunu wâgâ. <sup>54</sup> Jesus âzetyly umelâ myani kurâdoram âdutuoly, aguelymo warâ:

— Etaungâ. Awâkâ mawânkâ Jesus! — kelymo.

<sup>55</sup> Inepa kehoem tonlo modo xuruse idâwâdylymo, “Jesus naintai” keze. Târâ tawyly ume, eagonro âtâ anakâ idâwâm lâpylâ Jesus, tynynonro modo agâ. Tâtymo anaxi Jesus saintybyem awyly tiuntuduo, tonlo modo tâwânuneim modo eguetudo wâgâ eyam nhadylymo. <sup>56</sup> Âdyam idâhobyrydâ, tonlo modo, tâwânuneim modo tasemo lelâ Jesus kua nhetoem. Eyam nhekadylymo:

— Ity owogonro wao MÂ’ ienehongâ asaemo tâwânuneim modoram, kua itomoem — kelymo.

Idânârâ tâty MÂ’ ienipyry modo ara kua tyese myani. Arâlâ myani aidylymo xidadâ imeimbyry odakâ idâduo, xidadâ imâsedo odakâ, âtâ anary imeimbyry modo odakâ lâpylâ warâ.

## 7

*Deus agueho ara kine, saguho modo agueho ara inkâba  
(Mt 15.1-9)*

<sup>1</sup> Aituo fariseu domodo ewy, Moisés inweniby wâgâ enomedâni modo warâ Jerusalémdâpa idâlymo Jesus eydâ atoam. <sup>2</sup> Âjigue aguelymo:

— Etaungâ Jesus eynynonro modo aidyly. Kydamudo ezewenrypyry araba kulâ akaemo aidyly. Kâzewenry ara nâzemaunguewâbyramo, tâwinduatomoem — kelymo.

<sup>3</sup> Judeu domodoma tâzewenry saguhobypyry nimopa, fariseu domodo sahogueni kuru. Agaityom modo aitobyry aralâ aidylymo. Âzemaungueybyem lelâ âwinduadylymo.

<sup>4</sup> Tianâtybymo tugokezemo lelâ, tydâlâseim, tâinzeim warâ tugokezemo, âmugâ, kudupi, awârâ modo sagokely wâne myara. Saguho modo ezewenry nimopamo. <sup>5</sup> Awylygue myani fariseu domodo, Moisés inweniby wâgâ enomedâni modo warâ Jesusram aguelymo:

— Kydamudo ezewenrypyry ara inkâba âynynonro modo aidyly. Tâwinduatomoem nâzemaunguewâbyramo kâzewenry ara. Koendâpa akaemo awârâ modo inmoly — kelymo.

<sup>6</sup> Aituo Jesus eyanmo aguely:

— “Deus tâinwânse xina” tâkeze wâne âmaemo; âtuahuze kulâ olâ amyguelymo. Âwâgâmo Deus aguehobypyry iweniwânmmy Isaías:

“Tytanrugue ywâgâ koendâ adâkezemo.

Tuodaxi niepyramo olâ.

<sup>7</sup> Ywâgâ koendâ adâkezemo wâne,

tâzewenke kulâ olâ kurâdo nhenomedâdylymo, augueho araba’ kely Deus” kely myakâwândy Isaías inwenily — kely Jesus.

<sup>8</sup> Aituo myani Jesus agueondly fariseu domodoram, Moisés inweniby wâgâ enomedâni modoram warâ:

— Deus ezewenry tutuze wâne âmaemo, uguondo modo ezewenry kulâ olâ amânhelykylymo. <sup>9</sup> Saguuhobypyry modo aguehobypyry kulâ mâinwânylymo, Deus aguehobypyry mâkeba. “Deus aguely tâinwânse xina” tâkewâze wâne âmaemo, mâinwâmpyra olâ âmaemoro warâ. <sup>10</sup> Tâlâ myakâwândy Deus aguehobypyry Moisés inweniby wakely: “Unwânmô, âzemo warâ einwântaungâ. Ipa atomo eyanmo âunduwâtaungâ” kewândymy Deus. “Tunwym, tyze warâ âsenagazedoem Deusram ekani xyâwâtaungâ” kewândy lâpylâmy warâ. <sup>11-12</sup> Âmaemo olâ aypa mâenomedâdomo. “Unwânmô, âzemo warâ âdylâ nhekadyly watay, ‘Tâlâ wato Deusram ise kâunduly. Awylygue âdy âyanmo kâundupa wawyly’ kewâtaungâ” myguelymo. Alâ kulâ mâenomedâdylymo. <sup>13</sup> Arâ mâenomedâduomo, Deus itaumbypyry idadyly mâinmolymo, amyguehomobypyry lelâ mâinwântomoem. “Âmeonmo enomedâdaungâ xina aguehobypyry ara” tâkeze âmaemo. Inakai modo adyese âmaemo — kely myani Jesus.

*Deus izepa ato wâgâ Jesus aguehobyry  
(Mt 15.10-20)*

**14** Aituo Jesus kurâ domodo ingâsedondly, eyanmo adâkehoem:

— Idataungâ, xutuwâdaungâ xirâ augueho. **15** Mâimpymo mâkeba Deus agueho mankadomoem aieni; mâimpymo odaymopa tâgaseze mawânrâ. Deus izepa ato amânhedyse mawylymo mawânrâ Deus xurâem tywykeim; angahumo odaylâ mawânrâ awârâ âtugudyly. **16** [Xirâ unâ koendâ mâuntudye mataymo, koendâ angahumo odaji ietaungâ]\* – kely.

**17** Eyanmo aguenripyryem Jesus kurâdodâpa âxiguely. Egawândyly âtâ odaji tynynonro modo agâ. Tâgawâmpygueduomo nhapâiguelymo:

— Âdara kezeka enra mâtâ amyguely? – kelymo.

**18-19** Aituo Jesus aguely:

— Iweâpa wâne yagâ mawylymo; kurâdo ara lâpylâ olâ mâuntuba mawylymo! Auguely wâne mâtindadysemo wato. Âpynirymo mâkeba Deus izepa ato aienehoim. Eimpy mawânrâ kuwe odaxi idâly, ilâpyryem pylâ kokomiry odaxi-ro warâ. Awârâ modo odakâ sakady-byenma egasely lelâ-ro warâ – kely.

**20** Aituo agueondly:

— Kyangahu oday mawânrâ kydâpaunzedo, aguiendye kydato, aguykeho warâ âtugudyly. Awylygue angahumo odayba âeni Deus izepa ato aienehonrim awyly.

**21-22** Angahumo oday Deus izepa ato amânhedylymo wâgâ tunâgue âmaemo. Arâ amidye âmaemo watay, eagâ mohogüin-homobypy keba kulâ mâynanâdyze midylymo; imagadudyze midylymo; kurâ mâyândyse midylymo; âkelo iwydy mâynanâdyze midylymo; toenzepa âdype midyse mawylymo; âkelo xurâem inakanhe amidyse midylymo; tâdâsenogudyly myguedyse midylymo; âkelo isejiguybe midyse mawylymo; âkelo mânâguedyze mawylymo; âkelo modo takaze kehoem mâdutudye midylymo; amidylymo, amyguelymo warâ âdy mâuntubamo kulâ warâ. **23** Idânârâ inakanhe adâjito angahumo odaylâ mawânrâ âtugudyly; awârâ modo mawânrâ Deus xurâem tywykeinhe âenehoinmo. Tâdâzemaunguebalâ tâdâwinduadylyma Deus xurâem inakai mâkeba-ro – kely myani Jesus.

*Jesus pekodo Fenícia donro exiry odaypa kadopâ nhânyhobyry  
(Mt 15.21-28)*

**24** Tonlopyryem Jesus idâly myani xidadâ Tiro iwaguepaom yan-yam. Saintybyem egawândyly âtâ odaji. Târâ Tiro oday tawyly nhutudyzebamô wâne myani Jesus; inepa olâmy târâ awyly xutuwânmô. **25** Târâ xidadâ oday tâlâ myani pekodo exiry kadopâgue taseim. Jesus saintybyem awyly tiuntudu, mâtâ ise eyam idâly, âzeguhaoam idyly enado.

**26** Âkelo anano myani mâtâ; Judá donro keba. Feniciadâ egaseyby, âtâ anary Síria eynynâ. Enado âzeguhaoam itybyem aguely:

— Pymâ, iexiry odayba kadopâ nhânygâ – kely.

**27** Jesus aguely:

— Tâwâlâ iamimeom nâwinduadâ saguhoem. Koendâ inkâba iamudo ipyniry emakely, kaxorodoram xuduhoem – kely.

{Awârâ adâkehogue, koendâ inkâba judeu keba modoram, judeu domodo xurâ xuduly. “Judeu domodo kua kânheto iwerâ. Judeu keba modo kua kânhedyly-ro watay, iamimeom pâogue kâenmakely, kaxorodoram kâunduhoen-ro waunlo ara ise” keze aguely.}

**28** Âdakeze aguely awyly xutuwâm olâmy mâtâ pekodo. Aituo aguely:

— Arâlâ, Pymâ. Iamimeom mesa iaxi pyni in-hugueânehoymby tâinze olâ kaxoro imeombyry – kely.

\* **7:16** Idânârâ livru saguho modo wâgâ iwenibyemba xirâ.

<sup>29</sup> – Arâ amyguehobyry wâgâ yeinwântâ mawyly tutuze urâ. Awylygue enra ixiry odaypa kadopâ kânhânyly. Tâwâlâ itynra odopâgâ – kely Jesus.

<sup>30</sup> Agueduo myani pekodo tâtayram idâly. Saintybyem tâxiry kua itybyem awyly nhedly. Koendâ lelâ tykyho wâgâ eguetudybyem awyly warâ.

### *Jesus uguondo kydatânry, koendâ aguedânry kua nhetobyry*

<sup>31</sup> Aituo Jesus egasely Tirodâpa. Sidom einkâ, âji Dez Xidadâ kelygue tâzekeim einkâ warâ sakadyly. Paru Galiléia emelaji myani idâly. <sup>32</sup> Uguondo kydatânry, koendâ âjitaindânry warâpe myani târâ. Eataen-hodo Jesusram nhadylymo myani, aguelymo eyam:

– Ityengâ wao merâ uguondo. MÂ’ iekâ wao, kua itoem – kelymo.

<sup>33</sup> Agueduomo, Jesus âdiempa kurâdo duaypa nhejikely. Tâmary ewily iwantary onwa nhedly. Ilâpyryem KUITÚ kely. Tâdaku âdiempa uguondo ilu onwa nhedly. <sup>34</sup> Ilâpyryem kayam MYK idyly. Tunwym agâ aguely. Ton-honre kehoem âepaiguely, aguely:

– *Efatá* – kely. (“Âzenahunguegâ” keze aguely.)

<sup>35</sup> Mâkâ aguepygueduo, inepa kehoem myani uguondo koendâ indadyly, âjitaingly warâ. <sup>36</sup> Jesus aguely kurâdoram:

– Ânguyran-ne xirâ kâzegatuwâdaundâ – kely.

Aguehobyryenlâ olâ tâinkâ lelâba nhegatulymo. <sup>37</sup> Jesus egary tindatuomo toenzepa myani âsewânilymo.

– Koendonro lelâlâ mâkâ! Kydatânry modo indatoem adyese, tytarenry modo âjitainguem adyese warâ – kelymo.

## 8

### *Jesus quatro mil kurâdo sete pão, aguipa kanra âjihuyby warâgue nhuantobyry (Mt 15.32-39)*

<sup>1</sup> Ilâpyryem iweâpa nipyralâ kurâ domodo Jesus aguely idase âtâdyguyondlymo. Âdygue typyniguebamo myani. Arâ awylymo tiuntuduo, Jesus tynynonro modo ingâsedly. Eyanmo aguely:

<sup>2</sup> – Ytynroem enra asaemo kurâdo. Kopaelâgâbygueduolâ keankâ yagâ awylymo. Âdy nheinlymo peba-ro warâ. <sup>3</sup> Taypa âetybybe asaemo duay. Koendâpa ise nâwinduapyrâlâ etymoram kingonodylymo. Arâ kâingonodylymo-ro watay, ekozezemo tâwindygue – kely.

<sup>4</sup> Aituo Jesusram eynynonro modo aguely:

– Kuantomoem nudupa lâpylâ enra, iwague xidadâdâ kydawlygue. Asaemo xuato âdykâ imâem pyni kiempyra ise kydaze – kelymo.

<sup>5</sup> Aituo Jesus aguely:

– Âdara pãobeka âmaemo? – kely.

– Aituo in-hogulymo:

– Sete lelâ – kelymo.

<sup>6</sup> Aituo kurâdoram aguely:

– Ikadaungâ – kely.

Mârâ sete pão sanânbibyryem, Deus agâ aguely:

– Koendonro lelâlâ âmâ, Pabai. Awylygue xirâ pão mâunduly – kely.

Deus agâ agueypyem, pão nepajiwâdyly. Tynynonro modoram nhuduly, kurâdoram nepâdomoem. Nepâdylymo umelâ kehoem Jesus pão epajiwâdyby agui nhenehonly.

<sup>7</sup> Tâlâ lâpylâ myani aguipa kanra imeombyry âjihuyby. Jesus agueondly Deus agâ:

– Koendonro lelâlâ âmâ, Pabai; awylygue xinaram merâ kanra mâunduly – kely.

Deus agâ agueypyem myani tynynonro modoram Jesus aguely:

– Epâdaungâ merâ kanra kurâ domodoram – kely.

<sup>8</sup> Idânârâ âwinduadylymo ize tato ara kehoem, koendâ kehoem ioladylymo warâ. Ilâpyryem Jesus eynynonro modo cestu imâsedo modo odaji âsegubydâdyby modo nhekanâdylymo, sete cestu tumykune lelâ. <sup>9</sup> Toenzepa âwinduani modo; quatro mil lelâ kurâdo. Ilâpyryem Jesus aguely kurâdoram:

— Tâwâlâ itymoram idâwâtaungâ lelâ — kely.

<sup>10</sup> Agueypyem pepi odaji âxieze idâly tynynonro modo agâ. Dalmanuta yan-yam idâlymo.

*Fariseu domodo Jesus adyesenry anhetoem aguehobyry*

(Mt 12.38-42; 16.1-4; Lc 11.29-32)

<sup>11</sup> Aituo fariseu domodo Jesus iopaji idâlymo. Tienwentâdomoem wâne inakanhe kulâ aguedyse awylymo. Aituo eyam aguelymo:

— Deus lelâ anhekyly aiekâ, mâtâkâlâ ogononi, on-honru xuduim warâ awyly xina nhutuhoem — kelymo.

<sup>12</sup> Toenzepa myani Jesus itynru, tâinwâmpyra awylymo tiuntuduo. Aituo imâem âepaigueybyem aguely:

— Kurâdo ize ato ara âdylâ adyele lelâ urâ, Deuslâ ugononi awyly kâenehohoem. Deus ingonotyby wawyly kâenehondyzelâ urâ. Mâenkadybymo agânhepyra olâ ise urâ, mâtâ eon-honru keba mawânârâ mâtendyse matomo, ienwentâdomoem kulâ arâ amyguelymo — kely myani Jesus.

<sup>13</sup> Aituo myani Jesus târâpa âxiguely. Pepi odaji odopâdyly, paru tienkuâdoem.

*“Fariseu domodo, Herodes warâ ifermenturygue tâmaynelâne itaungâ” Jesus kehobyry*  
(Mt 16.5-12)

<sup>14</sup> Jesus eynynonro modo pão sadly enanânehonwânmomy. Tokalâ kulâ myani pão nhadylymo. <sup>15</sup> Aituo myani Jesusram âduruholymo:

— Idataungâ. Tâmaynelâne itaungâ fariseu domodo, Herodes warâ ifermenturygue — kely.

<sup>16</sup> Âdakeze Jesus arâ aguely nutubamo olâ. Awlygue myani âjigue aguelymo:

— Âdaituoka awâkâ arâ aguely? Pão kienepyra kydatobyry wâgâ? — kelymo.

<sup>17</sup> Jesus olâ aguelymo idamâ. Aituo eyanmo aguely:

— Âdauguewâpyra urâ, pão mâtânenânehon-homobyry wâgâ. Pão wâgâ inkâba au-

gueley. Âdy inomedâdomo awyly mâtuntuba lelâ kuru mataunaze. Deus eon-

honrube wawyly mâtâinwâmpyra lelâ âmaemo. Âdaituoka augueho mâtuntuba mawylymo!

<sup>18</sup> Agânhekyly tâenselâ âmaemo, auguely tydaselâ âmaemo warâ. Agânhetaynly modo,

kurâdo kâenomedâdo modo warâ Deus xurâlâ awyly, mâtâinwâmpyra lelâ olâ âmaemo.

Kurâdo toenzepaom modo kânwantobyry enanâguewâdaungâ. <sup>19</sup> Cinco mil uguondo modo

xuadâ cinco pâogue. Idânârâ âwinduatyby modo nioladâmo warâ. Âdara cestu tumykeka

mekanâdâmo âsegubydâdyby? — kely.

— Doze cestu lelâ — kelymo.

<sup>20</sup> Jesus eyanmo agueondly myani:

— Quatro mil kurâdo xuatoem sete pão agui xienehoangui, âdara cestu tumykeka mekanâdaimo âsegubydâdyby? — kely.

— Sete cestu lelâ — kelymo.

<sup>21</sup> — Won-honru tâense lelâlâ wâne âmaemo, ânguy wawyly mâtuntuba lelâ olâ âmaemo — kely Jesus.

*Jesus uguondo epy Betsaida donro kua nhetobyry*

<sup>22</sup> Ilâpyguedu, Jesus, eynynonro modo warâ xidadâ Betsaidaram saindylymo. Saimpygueduomo, tonlo modo uguondo epy eyam nhadylymo. Jesusram aguelymo:

— Xina tytyenzelâ ikâ. Merâ uguondo enu Mâ’ iekâ, nhetoem — kelymo.

<sup>23</sup> Emary wâgâ sawânipryrem Jesus epy kurâdo duaypa nhedyly. Tâmary ewily edakudânyryrem Jesus uguondo enu MÂ' nhedyly. Aienibyryem eyam aguely:

— Âdylâ tâense âmâ? — kely.

<sup>24</sup> MYK itybyem, uguondo aguely:

— Âdiempa tâense wâne urâ. Se ara kulâ olâ kurâdo adakobâdyly kâendyly — kely.

<sup>25</sup> Aituo Jesus tâmarygue enudâ MÂ' nhetondyly. Ilâenma koendâ nhedyly idyly.

<sup>26</sup> Ilâpyryem Jesus uguondo ingonodyly.

— Tâwâlâ idâ ityam. Todopâzeba waone ikâ Betsaidaram — kely.

*Pedro, “Messiaslâ âmâ” Jesusram kehobyry*

(Mt 16.13-20; Lc 9.18-21)

<sup>27</sup> Ilâpygueduo myani Jesus, eynynonro modo warâ tuhuru wâgâ idâlymo âtâ anary modo Cesaréia de Filipe iwaguepa. Tâtâdaymo myani Jesus tynynonro modoram aguely:

— Ânguy tâkezeka inanry kurâdo yam? — kely.

<sup>28</sup> Warâ myani eynynonro modo in-hoguly:

— Tâlâ inanry, “João Batista kurâem itondyby awâkâ Jesus” kewâni modo. Tâlâ inanry, “Elias kurâem itondyby awâkâ” keim modo. Tâlâ lâpylâ inanry, “Deus eynynâ aguewâtyby modo ewy kurâem itondyby awâkâ” keim modo warâ — kelymo.

<sup>29</sup> — Âmaemo-ro? Ânguy tâkeze âmaemo yam? — kely Jesus.

Aituo Pedro in-hoguly:

— Messiaslâ âmâ — kely. (“Deus Kâmakeze Ingonytyby” keze “Messias” kely.)

<sup>30</sup> Aituo myani Jesus eyanmo aguely:

— Mâkâlâ urâ. Iwerâ kuru wao olâ Messiaslâ wawyly kâzegatuwâdaundâ — kely.

*Jesus tyiguelly wâgâ, kurâem tâitondyly wâgâ warâ aguehobyry*

(Mt 16.21-28; Lc 9.22-27)

<sup>31</sup> Aituo myani Jesus tynynonro modoram aguely:

— Urâ Uguondo Kaynâpa Âetyby toenzepa âsenagazeze urâ. Kywymâry modo yizemo inkâba ise. Kurâdo eynynâ Deus agâ aguewâni modo iwymârydo, Moisés inweniby wâgâ enomedâni modo warâ ienagazenehonzemo. Akaemo ise yiguehoem aienehoim. Yigueduo, azagâ emedyly\* idyly wâgâ olâ ise kurâem witondyly — kely.

<sup>32</sup> Kulâkâba kehoem myani Jesus iguein-em tawyly nhutuen-honly. Pedro olâ myani neinwâmpyra arâ Deus Ingonytyby âdyly awyly. Awlylygue myani nhejikely, eagâ adâkehoem:

— Pymâ, arâ adâkezeba ikâ — kely.

<sup>33</sup> Aituo Jesus MYK idyly, tynynonro modoram. Pedro aguehobyry nehoguebyra, tawylygue myani aguely:

— Satanás arâ amyguehoem aieni, Pedro. Deus xunâry ara inkâba âunâgu, uguondo modo xunâry ara kulâ. Satanás aguely kâindataymba ise urâ — kely.

<sup>34</sup> Aituo Jesus kurâ domodo, tynynonro modo warâ ingâsedly, eyanmo aguely:

— Ynynonroem ize mataymo, augueho ara aitaungâ. Kopaelâgâembaba ize wato aitaungâ; amâhedyse matomo mâkeba aitaungâ. Kurâ tyâzeim kruz nhadyly tyâhoram myara, ynynonro modo on-hondybyem nidâ igueze. <sup>35</sup> “Jesus eynynonro keba urâ” mygueylmo, tyâzepa mitomoem kulâ watay, âdiempa kulâ ise xirâ anaym kurâem mawylymo. Âigueduomo Deus enadoram mydâwâpyra ise âmaemo. Yeinwândylymogue, unâry mânwândylymogue warâ mâdyolymo watay olâ, Deus enadoram idâze âmaemo; aunloenlâ ise eagâ mawylymo warâ. <sup>36</sup> Tâwâlâ wâne âdydo imeom sodoem mawylymo, ize matomobe mawylymo warâ, Deus eydâ atoram mydâhomoe nepywabyra olâ awârâ modo. Deus agonro keba âmaemo-ro watay, âdype matomo âdy mâkeba. <sup>37</sup> Ânguy,

\* <sup>8:31</sup> Nota de pé Mateus 12.40dâ egâ.

niguepa tâitoem nepywadaymba. Tâdâsenagazedo amaxi ise mydâlymo. <sup>38</sup> Uguondo Kaynâpa Âetyby urâ. Idâze urâ Deus eydâ atoam, odopâze olâ urâ Deus dompyryem anju domodo agâ. Kodopâdyly ise Kunwym eon-honru tânehonze. Iwerâ xirâ inakanhe tadalafil ume ywypazeni, kâenomedâdo iwypazeni warâ, kodopâduo, iwypazeze lâpylâ urâ – kely.

## 9

<sup>1</sup> — Iwerâ ydataynrimbyry modo ewy Deus eon-honrugue lelâ pymâem idyly enipe ise – kely myani Jesus.

### *Iwy wâgâ Jesus âkeloem itobyry (Mt 17.1-13; Lc 9.28-36)*

<sup>2</sup> Seis iguandyly ipygueduo Jesus iwy onwa âkuly. Pedro, Tiago, João warâ myani tagâ nhakyly. Târâ Jesus âkeloem idyly nhedylymo. <sup>3</sup> Toenzepa myani ety iwogonro sapeku, ehozelu warâ, âtâ igokewâni modo lâgâlâ tâise myara kehoem napekanâbyra. <sup>4</sup> Moisés, Elias warâ nhedylymo lâpylâ Jesus agâ xunâgumo ume. <sup>5</sup> Aituo myani Pedro aguely Jesusram:

— Koendâ kehoem tarâ kydawly, Pymâ. Azagâ tokalâ warâ âtâ imeimbyryla xina nitâdâ, âmâem, Moisés-em, Elias-em warâ – kely.

<sup>6</sup> Pedro, Tiago, João warâ toenzepa tâseanezemo myani. Awylygue myani Pedro âdara tâkely awyly nutuba kulâ arâ aguely. <sup>7</sup> Inepa kehoem myani eunu xytâguyly nhonwamo. Eunu duay Deus aguely indadylymo:

— Ymery toenzepa kâinwyneguylly merâ. Aguely idataungâ – kely.

<sup>8</sup> Adâkehonduo iwykaudylymo enuaguynrumo. Jesus kulelâ olâ myani nhekyllymo; Moisés, Elias warâ netombyramo myani.

<sup>9</sup> Aituo xytâguylymo iwy wâgâpa. Tytâguylymo ume, Jesus aguely Pedro, Tiago, João warâam:

— Mâentybymone iweâ kuru ânguyram kâzegatuwâdaundâ. Yiguely, kurâem witondly wituo maise tâwâlâ mâengatulymo – kely.

<sup>10</sup> Aguely einwânmâmomy. Âjigue olâ warâ aguelymo:

— Âdaituoka awâkâ arâ aguely? Deus Ingonytyby awâkâ. Âdaraka ise iguely, kurâem itondly warâ? – kelymo.

<sup>11</sup> Aituo Jesus nhapâiguelymo:

— Moisés inweniby wâgâ enomedâni modo adâkeze: “Elias âese, Messias Deus Ingonytyby iraynâ” tâkezemo. Âdaituoka arâ aguelymo? – kelymo.

<sup>12</sup> Aituo in-hoguly:

— Âkealâ aguelymo; Eliaslâ mawânkâ Messias saindyly wâgâ agueim. Iwenibyem Deus itaumbyry awo wâgâ: “Uguondo Kaynâpa Âetyby âzenagazeoze. Agueho tindadyse inkâbamo ise” kely iwenibyem. Awârâpe angahumo oday? <sup>13</sup> “Elias ara ini nãedâ” uguelly. Deus eynynâbaom modo olâ nenagazedâ, Deus itaumbyry awo wâgâ agueho ara – kely.

### *Jesus salokuzenomo odano kadopâ nhânskyhobry (Mt 17.14-21; Lc 9.37-43)*

<sup>14</sup> Jesus, Pedro, Tiago, João warâ agâ iwy wâgâpa xytâguybygueduo myani, tagonrodo nhedylymo kurâ domodo duay. Moisés inweniby wâgâ enomedâni modo ton-honre kehoem âjihogulymo Jesus eynynonro modo agâ, kadopâ niânskyba awylymogue. <sup>15</sup> Jesus saindyly tientuo, toenzepa kurâdo âsewânlily. Inepa kehoem myani edaenkuze idâlymo.

<sup>16</sup> Aituo Jesusram adapâigueolymo:

— Âdy wâgâka enra amyguelymo? – kely.

<sup>17</sup> Uguondo kurâ domodo duay in-hoguly myani:

— Pymâ, ymery senetai âyam; kadopâgue tase merâ, âjitain-hoemba-ro warâ. <sup>18</sup> Kadopâ ymery odaji idyly watay, onro onwa tameze lelâ inanry, itabigonzy, tyery nhaguly warâ inanry ton-honremba nhedyly. Âynynonro modoram sekadai wâne, kua nhetomoem. Kua niepyramo olâ enra — kely salokuzenomo nhunwym.

<sup>19</sup> Aituo Jesus aguely:

— Âdy einwânni kebalâ myanze âmaemo! Agâmolâ wâne urâ, yeinwâmpyra olâ âmaemo. Ynadaize yeinwâmpyra lelâ mawlymogue. Enetaungâ awâkâ salokuzenomo xarâ — kely.

<sup>20</sup> Jesusram nhadylymo. Jesus tientuo, kadopâ salokuzenomo nhapânily. Salokuzenomo ihuguely, onro wâgâ âtâgumidyl; itabigonzy idyly. <sup>21</sup> Aituo Jesus salokuzenomo nhunwym nhapâiguelly:

— Iweâpa merâ âmery arâ awyly? — kely.

Nhunwym in-hoguly:

— Iamugâryenlâ merâ arâ awyly. <sup>22</sup> Alâ inanry kadopâram adameozezedly peto onwanji, paikaji warâ tyân-hoem. Xina tytyenzelâ ikâ. Kua mânhedyse matay, ymery kua iekâ wao — kely.

<sup>23</sup> Jesus aguely:

— Âdaituoka yam, “Kua mânhedyse matay” myguely? Tâinwânni xurâem âdylâ adyele lelâ Deus — kely Jesus.

<sup>24</sup> Aguely umelâ salokuzenomo nhunwym aguely:

— Âdiempa tâinwânnse urâ. Won-hondâgâ, imâem kâinwântoem — kely.

<sup>25</sup> Aituo Jesus toenzepa kurâdo tuopay âtâdyguyl; nhedyly. Tientuomo, ton-honre kehoem kadopâram aguely:

— Igasegâ iweâ lelâlâ merâ salokuzenomo odaypa, kadopâ! Nidapyra itoem, aguepa itoem warâ akâiedâ. Tâwântonzeba ikâ iodaxi! — kely Jesus.

<sup>26</sup> Jesus aguely tindatuo, kadopâ adaenkely. Salokuzenomo ton-honre kehoem nhapânily. Iodaypa egaselylâ-ro warâ. Kadopâ tuodaypa egasebygueduo igueypy ara idyly.

— Etaungâ. Nigueaki awâkâ! — kely tonlo modo, onro wâgâ awyly tientuo.

<sup>27</sup> Jesus olâ salokuzenomo emary wâgâ XYDYK itoem nhaunâdyly.

<sup>28</sup> Mârâ aipygueduo myani Jesus egawândyly tynynonro modo agâ âtâ odaji. Mâkâ kulelâ awyly ume Jesus nhapâiguellymo:

— Ton-honre lâwâne enra xina aidyly, kadopâ tiânyhoem. Âda xina niepyra olâ enra. Âdaituo kukeanra? — kelymo.

<sup>29</sup> Aituo Jesus in-hoguly:

— Ton-honreim lelâlâ mâkâ kadopâ salokuzenomo iodanopyry. Deus eon-honru kienkaduo lelâ mâkâ igonodyly — kely.

### *Jesus tyiguely wâgâ agueontobyry*

(Mt 17.22-23; Lc 9.43-45)

<sup>30</sup> Jesus tynynonro modo agâ târâpa âxiguellymo. Galiléia einkâ myani sakadylymo. Ânguy âdykâ tawyly nhutudyzeba myani Jesus, <sup>31</sup> tynynonro modo lelâ tienomedâdyze ato awylygue. Aituo aguely:

— Urâ Uguondo Kaynâpa Âetyby yizepaom modo emaxi âzegameoze urâ. Akaemo ise yâen-honri. Yigueduo, azagâ emedyly\* idyly wâgâ olâ ise kurâem witondyly — kely.

<sup>32</sup> Âdaituo Jesus tyiguely wâgâ aguely awyly nutuba olâ myani eynynonro modo. Eyam “Âdaituoka arâ amyguely?” keze tywypazemo myani. Nutuba lelâ tawylymogue, tâudyllymo ytaze.

\* <sup>9:31</sup> Nota de pé Mateus 12.40dâ egâ.

*Ânguyla tynrenseim kuru?*

(Mt 18.1-5; Lc 9.46-48)

**33-34** Jesus, eynynonro modo warâ Cafarnaumram idâlymo myani. Tâtâlymo ume myani, Jesus eynynonro modo tuduay ânguyl tynrenseim kuru awyly wâgâ aguelymo. Aituo myani tykyhoram saintybyem, eyanmo Jesus aguely:

— Âdyka enra ânwa oze âunâgom? — kely.

MYK imâmo lelâ olâmy tunârybyry tinwypazedylymogue.

**35** Aituo myani Jesus ekadyly. Eyanmo aguely:

— Kuturin-em tidysedo, tynrendysedo warâ idânârâ nemawyadâdâ, mâkâ keba tâmawyadâzeim nidâ — kely.

**36** Aituo myani tonlo iamudo nhenenehonly tyam. Mâkâ myani iontajimo nhekyly. Iwymogoimbyryem myani eyanmo aguely:

**37** — Pymâem xynru waunlo keba merâ iamudo. Mâkâ ynynonro xurâem koendâ amânhedlymo, tynrenseim keba awyly umelâ warâ watay, urâenlâ amânhedlymo. Âdylâ urâem amânhetuomo, ugononibyry xurâenlâ ise amânhedlymo lâpylâ — kely Jesus.

*Deus eynynâ aini izepa kipyra kine, kuduano keba awylygue kulâ*

(Lc 9.49-50)

**38** Aituo João aguely:

— Xina Enomedâni, âunâry egatuze xina tâtâly ume, uguondo on-honrugue kadopâ nhânyrim xina nedâ. “Jesus eon-honrugue kadopâ modo kâjâny” xina nygue eyam. Xina ewy keba awylygue keankâ xina aguely — kely.

**39** Aituo Jesus aguely:

— “Adâiseba ikâ” tâkezeba itaungâ. Won-honrugue adyesenry modo aieholly watay, urâenlâ mâkâ aidyly. **40** Kuduery keba watay, kataen-holâ mâkâ. **41** Ynynonro modo âmaemo. Koendâ nhenimopyryam koendonro xuduze Deus. Parugue kulâ wâne akuylim, alâ olâ ise Deusram âzepywaolymo. Xirâ mâuntudyzemo kuru wato — kely.

*Deus einwânnipyryem neinwâmpyra ienehoim toenzepa ise âsenagazedly*

(Mt 18.6-9; Lc 17.1-2)

**42** Aituo Jesus agueondyly:

— Merâ iamudo yeinwânto ara yeinwânni yeinwâmpyra ienehoim koendâ tâise tuhu imâsedo iwymy wâgâ ekâjily, parutabâ ikaji samely, iguehoem, yeinwâmpyra tienehonly iraynâlâ. **43** Imarymogue Deus izepa ato akâiedaundâ. Koendâ tâise imarymo satâly, Deus izepa ato amânhepyra mitomoem. Koendonro kuru tâmaguebalâ Deus agâ aunloenlâ mawylymo; koendâpa mawânrâ peto nhântâny onwanji madameolymo. **44** [Târâ iguewâtyby modo toenzepa tâsenagazeze, tâjynryryram tâdâhoze, peto adaindânryam tâjiaduân-honzemo warâ.]†

**45** — Deus mydâdysebamo atoram tâtâzeba itaungâ. Koendâ tâise âhurumo satâly, Deus mydâdysebamo atoram mydâpa mitomoem. Koendonro kuru Deus agâ mawylymo, ihuru satâbyem; koendâpa mawânrâ infernudâ peto nhântâny onwanji madameolymo. **46** [Târâ iguewâtyby modo toenzepa tâsenagazeze, tâjynryryram tâdâhoze, peto adaindânryam tâjiaduân-honzemo warâ.]‡

**47** — Deus mâendysebamo ato kâzetaundâ. Koendâ tâise inumo etyly, Deus mâendysebamo ato mâempyra mitomoem. Koendonro kuru tânuembalâ aunloenlâ Deus pymâem atodâ mawylymo; koendâpa mawânrâ tâdâsenagazo peto nhântâny onwanji madameolymo. **48** Târâ iguewâtyby modo toenzepa tâsenagazeze, tâjynryryram tâdâhoze, peto adaindânryam tâjiaduân-honzemo warâ — kely Jesus.

† 9:44 Idânârâ livru saguho modo wâgâ iwenibyemba xirâ. ‡ 9:46 Idânârâ livru saguho modo wâgâ iwenibyemba xirâ.

<sup>49</sup> — Tâseanezeba itaungâ, mâsenagazeduomo. Peto kyaduântobypy ara kehoem wâne kydâsenagazedyly ewânu. Tâseguâdâzeba olâ itaungâ. Deusram âtuybyem kurâ, ize tato kagâ anhetoem. Kydâsenagazedyly watay, âdy mâkeba awârâ. Kyzeinwâne, kieinwâmpyra kipyra kine, peku, tanepa nipyra myara. <sup>50</sup> Peku pyni ekubâzeândoem koendâ awyly, podo niwânzeânehomba warâ, myara âmaemo taunlo modo ywâgâ amyguelymo, kurâ domodo yeinwântomoem, inakanhe nâiehoba itomoem warâ. Peku, onro agâ on-hoam ityby olâ pyni ikaji tyeseba. Arâ lâpylâ mâpaunzedomo koendâ ietaungâ. Arâ ise koendâ mawylymo. Ânguy agâ inakanhemba mawylymo — kely Jesus.

## 10

*Jesus tâjiwydy imoly wâgâaguehobyry*  
(Mt 5.31-32; 19.1-12; Lc 16.18)

<sup>1</sup> Jesus tynynonro modo agâ idâly Cafarnaumdâba myani Judéia yan-yam. Ilâpygueduo paru Jordão nhekuâdylymo. Toenzepa myani kurâdo âtâdyguyondly iopay. Âtâdyguyduomo tâzewenry aralâ nhenomedâdylymo. <sup>2</sup> Fariseu domodo ewype lâpylâ myani târâ. Tienwentâdoem wâne myani inakanhe kulâ aguedyse awylymo. Aituo myani Jesus nhapâiguelymo:

— Kâzewenry eynynâ, tâwâlâka uguondo tywydy inmoly? — kelymo.

<sup>3</sup> Jesus in-hoguly tiampâiguelymo agâlâ:

— Âdaraka Moisés inweniby aguely tâjiwydy imoly wâgâ? — kely.

<sup>4</sup> Aituo myani in-hogulymo:

— Tutuzelâ âmâ, kydamu Moisés inweniby: “Âwydy mâinmodyze matay, tâwâlâ imogâ. Iwenigâ olâ âdaituo mâinmoly awyly. Aitybyem pape mâinwenibymo eyam xudugâ. Igonokâ lelâlâ-ro warâ” kely myakâwândy inwenily — kelymo.

<sup>5</sup> Aituo Jesus aguely:

— Tutuze myani Moisés, tienkyly modo ânguydo kulâ, Deus ize ato adiendysedo keba warâ awyly. Awylygue myakâwândy Moisés “Tâwâlâ tâjiwydy imoly” kely inwenily, pekodo tâwentâzeba itoem. <sup>6</sup> Kaudyly umelâ olâ myakâwândy Deus ohogünwâdyby modo âximoly izepa awyly. “Kaudyly umelâ myakâwândy Deus uguondo, pekodo warâ nhygadyly, ohogünrin-em” warâ iwenibyem awyly Deus itaumbyry awo wâgâ. <sup>7</sup> Alâpylâ iwenibyem awyly: “Âwylygue mawânkâ uguondo, tunwym agâpa, tyze agâpa warâ idyly, tywydy agâ lelâ tâitoem. <sup>8</sup> Ohogüinduomo, tokalâ kurâ ara lelâ Deus xurâem” warâ iwenibyem awyly Deus itaumbyry awo wâgâ. Awylygue azagâpa awylymo, tokalelâ. <sup>9</sup> Ohogüinduomo Deuslâ âzeyam ienimo; awylygue ânguy ohogüimby modo âximohoem aniempyra nidâ — kely Jesus.

<sup>10</sup> Aituo âtâ oday ataymo, Jesus eynynonro modo agueondlylymo:

— Awârâ wâgâ agueonkâ xinaram, âdara awylygue uguondo, pekodo warâ nâximoba awyly wâgâ — kelymo.

<sup>11</sup> Aituo Jesus agueondly:

— Uguondo modo, âwydymo kâjimowâdaundâ. Mâinmolymo watay, eagonro pekodo agâ tohogünzeba itaungâ. Eagonro agâ mohogüinduomo, Deus izepa. Deus xurâem, saguholâ âwydymo, nhatano keba. <sup>12</sup> Pekodo modo, osomo kâjimowâdaundâ. Mâinmolymo watay, eagonro agâ tohogünzeba itaungâ. Deus xurâem, saguholâ osomo, nhatano keba — kely.

*Jesus iamimeom agâ atobyry*  
(Mt 19.13-15; Lc 18.15-17)

<sup>13</sup> Ilâpygueduo tâjiunwyndo tymeom nhadylymo Jesusram.

— Asaemo nhangahu onwa imary iekâ. Deusram koendâ âzehohomoem ekagâ asaemo xurâem — kelymo Jesusram.

Jesus eynynonro modo olâ myani akaemo iamimeom sanipyry modo tâuse:

— Jesus kâdynanâdaundâ – kelymo myani.

<sup>14</sup> Jesus olâ agueymo nehoguebyra; awylygue myani tynynonro modoram aguely:

— Arâ adâkezeba itaungâ! — kely. — Tâwâlâ iamimeom nâedâ. Kodopâdaundâmo. Iamimeom wâne enra ohondybyem lelâ yam tâetoem, myara lâpylâ kurâ domodo nohondâ, yeinwântomoem, Deus iwymârymoem itoem. <sup>15</sup> Yam tâetoem ohondânry modo Deusgue tywymâgunebamo ise, iamimeom wâne enra ohondybyem lelâ yam tâetoem myarapa tawylymogue. Xirâ mâuntudyzemo kuru wato — kely.

<sup>16</sup> Aituo tokalâ, tokalâ warâ Jesus iamimeom nhanâdyly. Nhangahumo onwa tâmary nhedyly, mâtâkra, mâtâkra warâ aguely:

— Deus koendâ nhese — kely.

*Uguondo toenzepa âdypeom agâ Jesus aguehobyry*

(Mt 19.16-30; Lc 18.18-30)

<sup>17</sup> Jesus egasely, idâly. Uguondo ânwa oze tâgase kehoem âewyly. Jesus enado âzeguhoam itybyem myani aguely:

— Koendonro lelâlâ âmâ, Pymâ. Âdaraka awidyly Deusram udâhoem, aunloenlâ eagâ witoem warâ? — kely.

<sup>18</sup> Aituo Jesus in-hoguly:

— Amyguelu tutuzeka âmâ? Âdaituoka “Koendonro lelâlâ âmâ” myguely yam? Kurâ koendonro lâpeba, Deus lelâ koendonro. <sup>19</sup> Tutuzelâ âmâ, âdy Deus aguiendyse ato awyly Moisés inweniby: “Ânguy kâdyâ. Eagâ mohogün-hobyry lelâ xynanâgâ. Tâmagazeba ikâ. Aitobyry wâgâpa kulâ âkelomo kâzewentâdâ. Unwâm, âze warâ einwânkâ, xyrenkâ warâ” — kely Jesus.

<sup>20</sup> Aituo uguondo aguely:

— Salokuzenomoem wawyly umelâ idânârâ Moisés inweniby ara awidyly; adyesezelâ urâ — kely.

<sup>21</sup> Tywyneze kehoem Jesus mâtâ nhedyly, eyam aguely:

— Tâlâ lâpylâ olâ amânhekyly. Âsejiguy modo idânârâ vende ieta. Ebyry ise âdy pebaom modoram mâuunduly-ro warâ. Awârâ amânhekyly-ro watay, tâlâ lelâ ise âmâ mâtâ koendonro Deus eydâ atodâ ekanâdyby. Idânârâ tâlâ mato mâuunduduod opâgâ, ynynonroem mitoem — kely Jesus.

<sup>22</sup> Jesus arâ aguely tindatuo myani uguondo tuomareba idyly, itynwandyly, idânârâ tysejiguy vende tiendyseba tawylygue, idâly.

<sup>23</sup> Aituo Jesus tynynonro modo nhedyly. Eyanmo aguely:

— Ton-honre lelâlâ âdypeom modo yeinwântoem, Deusgue iwymâgomoem warâ, tysejiguy kulâ ize atomo kuru awylymogue — kely Jesus.

<sup>24</sup> Agueduo, Jesus eynynonro modo toenzepa âseguaâdylymo. Toenzepa âdypeom lakuru Deus ize ato waunlo ara mawânkâ, enanajimo. Aituo Jesus agueondyly:

— Ton-honre lelâlâ âdypeom modo yeinwântoem, Deus tywymâryem nhetoem warâ, tysejiguy mawânkâ ize atomo kuru. <sup>25</sup> Ton-honre camelu agüie ihu oze sakadoem, arâ lâpylâ ton-honre âdypeom modo tâlâ tato inmohomoem, Deusgue lelâ tywymâgomoem warâ — kely Jesus.

<sup>26</sup> “Ton-honre lelâlâ âdypeom modo Deusgue iwymâgomoem” Jesus keduo myani, toenzepa kehoem Jesus eynynonro modo âseguaâdylymo, âdypeom modo lakuru Deus eydâ atoram idâim waunlo ara enanajimo awylygue. Aituo âjigue aguelymo:

— Arâ atayma ise ânguy nâsemaguerâbyra-ro — kelymo.

<sup>27</sup> Aituo Jesus eyanmo MYK itybyem aguely:

— Âkealâ, ânguy nâsemaguerâbyra ton-honrugue, Deus olâ kurâ domodo anhetânry adyese lelâ. Âdy anhetânry lâpeba Deus — kely.

<sup>28</sup> Jesus aguely tindatuo, Pedro aguely:

— Xina-ro? Idânârâ tâlâ tato xina niâm, âynynonroem tâitoem — kely.

**29-30** Aituo myani Jesus eyanmo aguely:

— Idânârâ tâlâ matomo mânhâlymo, ynynonroem mitomoem watay, Deus xuduze lelâ ipa matomo. Xirâ māuntudyzemo kuru wato. Itymo mânhânduomo, âkyhomoem ijidymo xuduze. Âwaigorumo, âukonomo, nhaundumo, unwânmô, âzemo, âmeonmo warâ mânhânduomo, Deus âpemugumo nhetomo ara kehoem nhenimo, âwynenimo warâ xuduze. Âpimo modokelymo watay, Deus âpynirymo xuduze. Tâlâ matomo mânhâlymo Deus itaumbyry egatuze madakobâdomoem watay, âdy ipa matomo xuduze, mânhâympymo takaze kehoem, até cem vezes lelâ. Âiguepa mawylymo ara, toenzepa ise yeinwântâny modoram mâzenagazeolymo yeinwândylymogue. Âigueduomo aunloenlâ ise Deus agâ mawylymo. Xirâ māuntudyzemo kuru wato. **31** Iwerâ waunropyry modo, ilâem âgânâynra ise. Âgânonrobypyry modo, ilâem waunroem ise warâ — kely Jesus.

*Jesus, “Yigueduo, kurâem itonze urâ” keontobyry*

(Mt 20.17-19; Lc 18.31-34)

**32** Jesus, eynynonro modo warâ tuhuru wâgâ xidadâ Jerusalémram âkulymo. Waunroem myani Jesus idâly. Tyanepa, adâieholo tutuze tawylygue, âgânâ eynynonro modo idâly-ro warâ. Izepanro modo mârâ xidadâ oday awyly tiunturomo eynynonro modo âdara tâidylly nutuba idylymo. Tyane myani kurâdo eagâ idâwâni modo. Aituo Jesus tynynonro modo aguiom duaypa nhejikely iwaguedope, âdatidylly awyly wâgâ adâkehoem.

**33** — Idataungâ wao auguely. Jerusalémram xirâ kytâly. Yizepaom modoram adawâhoze urâ Uguondo Kaynâpa Âetyby. Kurâdo eynynâ Deus agâ aguewâni modo iwymârydo, Moisés inweniby wâgâ enomedâni modo warâ iegamezemo. “Nigue awâkâ” kezemo. Judeu keba modo emaxi iegamezemo. **34** Akaemo ise âwankuem yeni, iedakudâni, yapiogunri, yârim warâ. Awârâpygueduo azagâ\* emedyly idyly ara olâ ise kurâem witondly — kely.

*Tiago, João warâ Jesus agâ pymâem tâitoem nhekadomobyry*

(Mt 20.20-28)

**35** Ilâpygueduo Zebedeu imeom Tiago, João warâ Jesus iopaji saindylymo. Nhekadylymo eyam:

— Xina nhekadybyne aiekâ, xina kely, Pymâ — kelymo.

**36** Agueduomo, Jesus aguely:

— Âdyka mäenkadyze matomo? — kely.

**37** Warâ in-hogulymo:

— Pymâem kuru mituo, xina iduakegâne, agâ pymâem xina itoem. Tokalâ aho eynynâ, tokalâ pâem eynynâ warâ xina ekanâgâ — kelymo.

**38** Arâ agueduomo, Jesus aguely:

— Mâuntuwâbyra âmaemo âdara yagâ pymâem mitomoem amidylymo awyly. Toenzepa kâsenagazedo ara kehoem âsenagazeze tâeganeka ise âmaemo? Yigueze ise myara igueze tâeganeka ise âmaemo? — kely.

**39** — Emaenze lelâ xina, mäenmaen-ho ara — kelymo myani.

Aituo myani Jesus aguely:

— Âsenagazeze urâ, âmaemo lâpylâ warâ. Iguezze urâ, iguezze lâpylâ âmaemo. **40** Yahoru eynynâ ekani, pâem eynynâ ekani warâ kâinduakeba olâ urâ, yagâ pymâem itoem. Deuslâ ise iduakeim. Mâkâ mawânkâ târâ tâzekado nhonipyry — kely.

\* **10:34** Nota de pé Mateus 12.40dâ egâ.

**41** Tiago, João warâ Jesus agâ pymâem tâidyse awyly tindatuo, eagonrodo eagâmo iewiâpadaynly.

**42** Aituo Jesus idânârâ ingâsedlymo tuopaji, eagâmo adâkehoem.

— Tutuzelâ âmaemo, pymâdo ton-honreim modo, tyewiâse kehoem kurâdo agâ aguely, adâkehobyry anhetomoem. **43** Âmaemo olâ arâpa itaungâ. Mâdyren-hondzye mataymo, tâzemaryenlâ itaungâ. **44** “Imawyadâbyramo ise urâ. Pymâ wawylygue, âmaemolâ ise urâem aieni” tâkezeba itaungâ, pymâem mituomo. **45** Yara itaungâ. Deus Ingonyby lelâlâ wâne urâ, iemawyadâdomoem âetyby keba olâ urâ, imarymo lakuru urâ. Iguezé âetyby urâ. Kurâdo inakanhe aito modo epywaze ise yiguely, Deus ize ato ara — kely Jesus.

### *Jesus epy Jericó donro kua nhetobyry*

(Mt 20.29-34; Lc 18.35-43)

**46** Jesus, tynynonro modo agâ xidadâ Jericó einkâ sakadylymo. Kurâdogue tyampyguenone kehoem xidadâ odapya egaselymo ume epy Bartimeu, ânwa edazekâ ekadybyem awyly, sakadaynrim modoram dinheru tienkadoem.

**47** — Jesus Nazaré donro enra awâkâ sakani — kely tindatuo myani adaenkely:

— Ytyendâlâ ikâ, Jesus. Âdamu Davi ara pymâ ton-honreim âmâ! — kely.

**48** Ton-honre kehoem eyam aguelymo:

— MYK alelâ ikâ! Tadaenkezeba ikâ! — kelymo eyam.

Agueduomo lakuru myani epy adaenkely:

— Ytyendâlâ ikâ, Jesus! Âdamu Davi ara pymâ ton-honreim âmâ! — kely.

**49** Jesus epagudyly. Aguely tonlo modoram:

— Epy Yam enetaungâ — kely.

Epynra aguelymo:

— Tyanepa ikâ! Aukâ. Âgâsedlyly mâkâ — kelymo eyam.

**50** Aituo Bartimeu tâty BOH waunlo tâmaegoze kehoem nhetyly, nhamely, saudylly, Jesus iopaji adaholy.

**51** Aituo Jesusram adapâigueoly:

— Âdyka âmâem agânhedyse mato? — kely.

— Kâentondzye urâ, Pymâ — kely in-hoguly.

**52** — Ipa, kua mitai, kua âeniem wawyly mâinwântobyry wâgâ. Idâ lelâ itynra — kely Jesus.

Ilâenlâ kehoem Bartimeu nhetondyly, ânwa oze Jesus nhampygue idâly lelâ.

## 11

### *Jesus Jerusalémram saintobyry*

(Mt 21.1-11; Lc 19.28-40; Jo 12.12-19)

**1** Âtâ anary Betfagé, Betânia warâ Jerusalém iwaguepaonram myani Jesus, tynynonro modo, kurâ domodo warâ agâ saindylymo. Iwy Se Oliveira Ekadâ epagudylymo. Myarâ saintybyem Jesus tynynonro ewy azagâ waunroem ingonodyly. **2** Wakely eyanmo:

— Idâwâtaungâ mâtârâ âtâ anary iwaguepaonram. Myarâ aindylymo umelâ ise jumentinhu ekâjiby mândylymo. Ânguy âkuhobyry keba mâkâ. Ekâjiguelâdaungâ; enetaungâ xarâ. **3** Ânguylâ apâiguelymo: “Âdaituoka jumentinhu mandylymo?” kely-ro watay, “Kwymâry merâ izetonro. Inepa olâ ise nhopânehonly” myguelymo lelâ ise — kely Jesus.

**4** Myarâ idâypyem jumentinhu kuoho ekâjibyem nhedylymo. Aituo nhekâjiguelymo.

**5** Aidylymo tientuo, tonlo modo aguelymo:

— Âdaituoka mânkâjiguelymo? Iguymo mâtkeba awâkâ — kelymo.

**6** Jesus tyam aguehobyry ara myani aguelymo:

— Kywymâry merâ izetonro. Inepa olâ ise nhopânehonly — kelymo.

Aituo tonlo modo aguely:

— Âdainkâba. Sataungâ lelâ — kelymo.

<sup>7</sup> Jumentinhu nhadylymo Jesusram. Saintybyem myani tygaparyguelâ jumentinhu inkawendâdylymo. Aituo Jesus jumentinhu onwa âkuly. <sup>8</sup> Toenzepa kurâ domodo tâty BOH waunlo ânwa oze, PO PO tyesemo myani Jesus idâwaym. Tâlâ pylâ myani wakuri sary tiantâwâdyby modo onro onwa PO PO ieni modo, tynrense tawyly tienehom-homoem, pymâ ton-honreim idâwaym adâitomo ara. <sup>9</sup> Waunroem idâwâni modo, âgânâ idâwâni modo warâ adaenkelymo adaguly:

— Hosana Deus! — kelymo. (“Tohoguezeim Deus” keze aguely.)

— Tohoguezeim kuru awâkâ Deus eon-honru enehonze âeni!

<sup>10</sup> Ton-honreim âmâ!

Xina iwymâry ise âmâ!

Davi pymâem atobypy ara ise pymâem mawyly!

Hosana Deus kaynonro

— kelymo.

<sup>11</sup> Jesus Jerusalém ijidadâry odaji saindyly. Saintybyem, Deus ety odaji egawândyly, nhenuagaendyly. Enuagaenibyryem, egasely. Betânia anaxi odopâdyly doze tynynonro modo agâ, iguandyly awylygue.

*Jesus figueiraram, “Iwiseondaymba ise âmâ” kehobyry*

(Mt 21.18-19)

<sup>12</sup> Kopaelâgâem Jesus, tynynonro modo agâ odopâdyly Betânia donropyryem Jerusalémram. Tâwinze myani Jesus. <sup>13</sup> Iwague endaylâ figueira nhedyly, tarygoengue kehoem. Tâwise-ro waunlo ara, enanaji, tarysely agâlâ ewiseim mawânrâ figueira. Aituo eyam iwaguepa saindyly. Ewily sasegâze wâne, tâwiseba olâ, âdaunloenlâ ipa lelâlâ, ewiseho umeba awylygue. <sup>14</sup> Aituo Jesus figueiraram aguely:

— Iwiseondaymba olâ ise âmâ. Ânguy iwily neinhotaymba ise — kely.

Eynynonro modo Jesus aguely idamâmomy.

*Jesus ânguydo imeom vende ieni modo Deus ety odaypa nhegaseândobyry*

(Mt 21.12-17; Lc 19.45-48; Jo 2.13-22)

<sup>15</sup> Figueiraram agueypyem Jesus, tynynonro modo agâ Jerusalémram saindylymo. Saintybyem, Jesus egawândyly Deus ety idaseraji. Âdydo imeom vende ieni modo târâ aidyly tientuo nehoguebyra, kurâdo nhenokudylymo kulâ awylygue. Aituo tyewiâse kehoem idânrâ sanâni modo, vende ieni modo warâ nhegaseândaynl. Dinheru troca ieni modo iwenzary nhamunedly, papa vende ieni modo xurery nhameley idyly.

<sup>16</sup> — Xirâ âtâ âwankuem kâietaundâ. Âsejigumo xirâ taseraçâ kadakobâdaundâ. Idâwâtaungâ. Igasewâdaungâ tarâpa — kely.

<sup>17</sup> Egaseânimobyryem eyanmo aguely:

— Deus itaumbyry awo wâgâ iwenibyem: “Xirâ iety idânrâ kurâ domodo yagâ agueho xirâ” kewândymy Deus. Kurâ domodo mâenmagazedylymo kulâ olâ. Ânguydo imeom Deusram tiunduly nhanâdylymo watay, toenzepa mâenwâentanâdylymo. Dinheru âmaemoenlâ mânhedylymo. Deus ety, tâmagazeim modo otoendoem mânhedylymo kulâ — kely Jesus.

<sup>18</sup> Kurâdo eynynâ Deus agâ aguewâni modo iwymârydo, Moisés inweniby wâgâ enomedâni modo warâ Jesus aguely idamâmy. Jesus agâ iewiâpadlymo myani. Jesus anhekylle lelâ kurâdo nhehogueguyl, aguely lelâ inwantagueguyllymo warâ awylygue. Awylygue âdara Jesus tyâly awyly wâgâ tyangahu oday xunâzelymo.

<sup>19</sup> Iguandyly ume Jesus, tynynonro modo agâ Jerusalémdâpa idâlymo.

*Figueira iladobyry**(Mt 21.20-22)*

<sup>20</sup> Emetuo Jesus, tynynonro modo agâ odopâdyly Jerusalémram. Jesus, “Iwisen daymba ise âmâ” kehobyry figueira einkâlâ myani sakadylymo, todopâdaymo. Igueypyem lelâ mâtâ se nhedylymo. Iwindy agâ kehoem warâ iladybyem awyly. <sup>21</sup> Tientuo, Pedro nhenanâguely Jesus mâtâ figueiraram aguehobyry. Aituo Jesusram aguely:

— Egâ figueira, Pymâ. Kopaelâgâ kulâ keankâ “Iwisen daymba ise âmâ” myguely eyam. Ipa iwerâ, idânârâ kehoem iladybyem awyly — kely Pedro.

<sup>22</sup> Aituo myani Jesus eyanmo aguely:

— Toenzepa Deus einwântaungâ. <sup>23</sup> Deusram mâenkadybymo aidyly tâinwânsê âmaemo watay, adâise lelâ. Tâinwânsê lelâlâ âmaemo watay lelâ olâ ise aidyly. Amânhetomoem on-honrumo kâunduupygue idânârâ aiese lelâ âmaemo. Xirâ iwyram, “Âxiguegâ; paikaji adamegâ” myguelymo watay, tâjidydâpa tâxigueze tâise, paikaji tadameze warâ. <sup>24</sup> Deus agâ amyguelymo, tâinwânsê kehoem amyguelymo watay, xuduze lelâ. Arâ amyguelymo watay, mâenkadybymo aiese lelâ. Xirâ mâuntudyzemo kuru wato. <sup>25</sup> Deus agâ amyguedaymo, âkelomo agâmo inakanhe aitobyry enanânehonwâdaungâ, Kunwym Deus inakanhe amitomobyry nhygakehoem. <sup>26</sup> Âkelomo aitobyry mânenanânehomba âmaemoro watay, inakanhe amitomobyry Kunwym Deus nygakewâbyra ise, mâenkadybymo nudupa ise warâ. Xirâ mâuntudyzemo kuru wato — kely Jesus.

*Deuslâ Jesus igononi, âdaunlo kulâ mâkeba**(Mt 21.23-27; Lc 20.1-8)*

<sup>27</sup> Jesus, eynynonro modo warâ Jerusalémram saintondylymo. Saintybyem, idâlymo Deus ety odaji. Taseragâ myani Jesus adakobâdyly. Jesus târâ atay, kurâdo eynynâ Deus agâ aguewâni modo iwymârydo, Moisés inweniby wâgâ enomedâni modo, uguondo tâgareim modo warâ iopaji idâlymo. <sup>28</sup> Aituo nhapâguelymo:

— Ânguyka tarâ Deus etydâ arâ amitoem agueim? — kelymo.

<sup>29</sup> Aituo Jesus in-hoguly:

— Apâiguelymo lâpylâ ise. Uhoguduomo, ânguy ugononibyry awyly agueze urâ — kely. Aituo aguely:

<sup>30</sup> — Ânguyka ani João Batista, inakanhe adâitobyry wâgâ âjityendyby modo batiza nhetoem agueim? Deuslâ? Âdaunlo uguondo kulâ? Uhoguwâdaungâ wao — kely.

<sup>31</sup> Aituo aguelymo:

— Iwerâ ise-ro? Âdara kuru ise kin-hoguly? “Deuslâ agueim” kykeduo, “Âdaituo pylâka João aguehobyry mâinwâmpyra mawylymo?” keze. <sup>32</sup> “Uguondo kulâ ani João aitoem agueim, Deus mâkeba” kykeduo, kurâ domodo kagâ iewiâpazemo — kely pymâ domodo.

João Batista, Deus itaumbyry egatuin-em igonotyby awyly tâinwânsê mawânkâ myani kurâ domodo. Awylygue “Deus mâkeba igononi” keze eanumo.

<sup>33</sup> Awylygue in-hogulymo:

— Xina nutuwâbyra ânguy João batiza nhetoem agueim awyly — kelymo.

— Arâ atayma auguepa lâpylâ ise urâ, ânguy xirâ agânhetoem ugononi awyly-ro — kely Jesus.

**12***Tâwanuneim modo koendâpa aitobyry wâgâ Jesus unâ nhegatuhobyry**(Mt 21.33-46; Lc 20.9-19)*

<sup>1</sup> Ilâpyryem Jesus tonlo modo kurâdoram agueondyly. Enomedâzemo unâ nhegatuly:

— Tâlâ myani uguondo uva etâdybybeom. Aituo uva ejidy nhahodânehonly tuhu imâsedo modogue. Onwâgâ tâtagueim nhesaguehonly, uva ekuguehoem tâjhurugue,

vinhu xygatoem. Âtâ imeimbyry kaynâ olâ-ro waunlo aienehonwânmy tâmagazeim saindyly enuagaendo, ânguydo imeom nady saguwâni modo enuagaendo warâ. Ilâpyryem myani uva ejidy etaynrim modope nhedyly. Warâ myani eyanmo aguely: “Ypi mäendylymo-ro watay, uva xutuduo, epajigâze urâ agâmo” kely. Koendâ lelâ myani arâ âjihogulymo. Aituo myani idânârâ nhonipyryem, âtâ anary iwaguenonra idâly.

<sup>2</sup> — Uva ekaunâdo odaji ituo myani tâmary ingonodyly akaemo tâwaneim modoram, turâ emakeze. <sup>3</sup> Aituo ingonotyby idâly âpa ezaji. Saintuo, tâzenagazeozemo myani uva ejidy etaynrim modoram. Sawâmâmomy, sapioguwânmomy warâ. Aguelymo: “Idâ. Xina âdy nuduwâpyra ise âpa ezary sodoram” kelymo. <sup>4</sup> Saguho âdy peba odopâduo myani uva sodo eagonro tâmary ingonotondyly wâne, nhekaunâdybymo ewy turâ emakeze. Âpa ezary etaynrim modo olâ myani mâkâ tânagazezemo, tyangatainzemo, kywypadoem kulâ adyesemo warâ. Âdy nudupamo myani âpa ezary sodoram. <sup>5</sup> Aituo myani eagonro ingonodyly myarâ âpa ezaji. Tâwanuneim modo nhâlymo lelâ. Alâ pylâ myani eagonro modo aiehowâdyly. Toenzepa kehoem nhapiogulymo. Eagonro modo nhâlymo.

<sup>6</sup> — Alâ tâmary ingonokyly peba idyly. Imery inwyneguyl kulelâ idyly. Alâ ingonodyly. “Merâ ymery tokaleom awylygue âda nientaymbamo ise” tâkeduo, ingonodyly. <sup>7</sup> Sodo imery saindyly umelâ, âpa ezay tâwanuneim modo âjigue aguelymo: “Uva sodo imery mâkâ âeni. Tunwym igueduo, mâkâ ise ipibyry sodo. Kydyânrene, nhunwym ipibyry kurâenlâ itoem” kelymo.

<sup>8</sup> — Aituo myani mâkâ uva sodo imery nhawâdylymo, nhâlymo, eguepybyry nhame-lymo âpa ezayba — kely Jesus.

<sup>9</sup> Aituo Jesus adâkely idani modo nhapâiguel:

— Âdyka ise mâkâ uva sodo akaemo âpa ezary eni modoem anhekyly? Agueze urâ âyanmo. Todopâduo, uguondo modo xyâwâse mâkâ sodo. Eagonro modo ise mâtâ uva ejidy eniem nhekyly-ro warâ. <sup>10</sup> Deus itaumbyry awo wâgâ iweniby mäintaimbymo enanâguewâdaungâ:

“Tâlâ myani tuhu imeâgâkeba, âtâ itâdo.

Idânârâ itâdaynrim modo mâtâ tuhu tâensembo,

mâtâgue âtâ tintâdyzebamo olâ.

Deus xurâem olâ mâtâ tuhu tywyneim kuru!

<sup>11</sup> Kywymâry Deus induakeyby olâ mâtâ tuhu, âtâ itâdoem.

Deus anhetyby idânârâ iwâkuru kurâem!”

warâ iwenibyem awyly — kely.

<sup>12</sup> Pymâdo, âpa ezary eni inakai wâgâ unâ tindatuo, toenzepa iewiâpadlymo. Tywâgâ aguely awyly nhutulymo, Jesus izetonro keba tawylygue, tâwaneim modo âpa ezary sodo imery izepa atomobyry ara.

Awylygue Jesus tientadânehondye idylymo, tyâen-hon-hoem. Âjigue aguelymo:

— Iweâ lelâlâ kianwânehonly watay, kurâdo kagâ iewiâpaze — kelymo âjigue.

Awylygue myani Jesus âdara niepyra awylymo ilâenlâ, nhodokelymo lelâ.

*Impostu epywadyly wâgâ Jesus nhapâiguehomobyry*

*(Mt 22.15-22; Lc 20.20-26)*

<sup>13</sup> Mâtâpyqueduo judeu domodo iwymârydo aguely fariseu domodo ewyram, Herodes eynynonro modo ewyram warâ:

— Idâwâtaungâ Jesus agâ agueze. Moisés inweniby wâgâpa kulâ aguehoem ise amygue-lymo — kelymo.

<sup>14</sup> Saintybyem igonotaymby modo Jesusram aguelymo:

— Pymâ, konokuni keba mawyly, tutuze xina. Deus ize ato wâgâ âkealâ xina mänenomedâdyly. Iozeno lelâ amygueho, ânguy izepa awyly umelâ. Pymâdo tynrenseim

modo ize ato amânhetoem kulâ amygueho mâungukewâbyra âmâ. Awylygue âdara impostu epywadyly wâgâ mâuntuly wao xinaram aguekâ. Moisés inweniby ara, koendâ pymâ Roma donro César-ram impostu epywadyly? Koendâpa? – kelymo.

**15** César tiunâguedoem kulâ tapâiguelymo awyly xuturimbyryem olâ myani Jesus.

Aituo aguely:

– Inra esagueyby odaji wâne ânguylâ ihuguely myara wâne ienokudyzé mawylymo.

Moeda enetaungâ, kâentoem – kely.

**16** Aituo moeda nhadylymo, nhudulymo, Jesusram adapâigueolymo:

– Ânguy emydy ekudoka xirâ wogonro? Ânguy ezedyka iwâgâ iweniby warâ? – kely.

Aituo in-hogulymo:

– Roma donro kywymâry César ezedy, emydy warâ – kelymo.

**17** Aituo Jesus aguely:

– César xurâ, Cesaranlâ xuduwanâtaungâ. Deus xurâ, Deusranlâ xuduwanâtaungâ warâ – kely.

Jesus aguely tindatuo Jesus enokuze kewâtyby modo âseguâdâdylymo. Âdara tien-wentâdo nutuba tâituomo.

### *Iguewâtyby modo kurâem itondly wâgâ nhapâiguehomobyry*

(Mt 22.23-33; Lc 20.27-40)

**18** Saduceu domodo ewy Jesus agâ âtunâgueze idâlymo myani. Iguewâtyby modo kurâem itondly einwânni keba akaemo. Jesus iopaji saindylymo. Aguelymo:

**19** – Idakâ, Pymâ. Moisés ezewenry tutuzelâ âmâ, iweâpa kydamudoram inweniby: “Uguondo tywydy namypalâ iguely-ro watay, iukonobyrylâ nohogüim iwydypyry agâ, imezeândoem. Aituo iamudo iazeypy, igueypy imeryenlâ âdutuoly” kelype. **20** Xina olâ ise warâ nhegatuly. Tâlâ myakâwâm sete lelâ uguondo modo âjiaigoruem, âjiukonoem waunlo. Iwaigorumo ohogünly myakâwâm. Tywydy namypalâ iguely. **21** Iukonobyrylâ myakâwâm ohogünrim pypâ agâ. Mâkâ lâpylâ myakâwâm tywaigoru iwydypyry namypalâ iguely. Azagâ tokalâ ietomo iukono ohogünly myakâwâm pypâ agâ. Mâkâ lâpylâ iguewâm, tywaigoru iwydypyry namypalâ. **22** Tywaigoru iwydypyry namypalâ lâpylâ myakâwâm quattro ietomo, cinco ietomo, seis ieto, sete ietomo warâ iguewâdylymo. Sete uguondo lelâ myakâwâm mâtâ pekodo agâ ohogünby. Idânârâ mâtâ uguondo modo iguewâpygueduo myakâwâm, pekodo iguely lâpylâ.

**23** – Xirâ xina apâiguedyze ato. Âkealâ kuru igueypy kurâem itondly watay, âdaunlo uguondo akaemo sete ewy iwydyenka ise mâtâ, kurâem itonduomo? Idânârâ akaemo sete lelâ iwydyem ityby mawânkâ! – kelymo.

**24** Aituo Jesus in-hoguly:

– Iozepa kulâ âunâgumo! Deus itaumbypy awo wâgâ iweniby mâtuntuba kuruva âmaemo! Âdydo imeom aiese Deus ton-honre awyly, mâtuntuba gâlâ âmaemo.

**25** Iguewâtyby modo kurâem itonze lelâlâ, nigueompyra tâitomoem. Anju domodo nohogünwâbyra. Alâpylâ iguewâtyby modo, kurâem itonduo, nohogün-ondaymbamo ise.

**26** – Iozeno kuru iguewâtyby modo kurâem itondly, kely mâtaintimbaka minasemo. Enanâguewâdaungâ Moisés inweniby igueypyem kurâem tâjitonduy wâgâ, se imeimbyry niadupalâ tyatygueindâ Deus aguehobypy: “Deus urâ, Abraão, Isaque, Jacó warâ iDeusry; tarâlâ akaemo ywâgâ” kewandy Moisésram. **27** Kurâdo enanaji olâ Deus einwânni iguewâtyby modo, iguewâtybyem lelâlâ. Deus xurâem olâ akaemo igueypyemba, târâlâ akaemo Deus eydâ atodâ. Arâ aguehobypy wâgâ Deus einwântaynrim modo nigueompyra awyly kiuntuly. Ioze inkâba awârâ “Igueypy kurâem nitombyra” myguelymo – kely Jesus.

### *Deus aguiendyse ato*

(Mt 22.34-40; Lc 10.25-37)

<sup>28</sup> Moisés inweniby wâgâ enomedâni ewy agueymo idamâ. Koendâ lelâ Jesus saduceu domodo agueymo in-hoguhobyry tutuze tawylygue, Jesusram aguely:

— Toenzepa Moisés kâzewenryem inweniby modo. Âdaunloka koendonro kuru? Âdaunloka awârâ modo takazeno kuru? — kely.

<sup>29</sup> Aituo Jesus in-hoguly:

— Warâ mawânrâ Deus itaumbypyry awo wâgâ iwenibyem awyly: “Israel iweom, ydataungâ. Kywymâry awâkâ Deus. Awâkâ kulelâ Kulturim! Tokalâ kulâ awâkâ!

<sup>30</sup> Kywymâry Deus iwynedaungâ idânârâ âdydo imeom, kurâ domodo warâ mânwynedomo takaze kehoem. Idânârâ ize matomo, Deus ize ato ara lelâ nidâ. Idânârâ angahumo oday âunâgommo Deus ize ato lelâ nidâ. Idânârâ amânhokylymo Deus ize ato ara lelâ nidâ” warâ. Xirâ aguely mawânrâ tâzezewenry takazeno kuru.

<sup>31</sup> — Eagonro tâzezewenry koendonro lâpylâ xirâ: “Agonromo agâ âpynedaungâ; koendâ mâzetomo ara, arâ lâpylâ agonrodo agâ koendâ âzetaungâ” kewândymy Deus. Xirâ azagâ tâzezewenry auguehobyry mawânrâ mâtâ kuru — kely Jesus.

<sup>32</sup> Aituo Moisés inweniby wâgâ enomedâni ewy aguely Jesusram:

— Koendâ lelâlâ amyguely, Pymâ. Âkeá lelâlâ amyguehobyry modo. Deus kulelâ kywymâry. Ipa eagonro Deus. <sup>33</sup> Deus kinwyne guyly kuru nidâ, kurâdo, âdydo imeom warâ takaze. Mâkâ ize ato ara lelâ kyangahu oday kunâgu nidâ. Ize ato ara lelâ aguine. Ton-honre kehoem eagâ kydawlyl nidâ. Mâkâ agâ, mâtâ agâ alelâ âjize kine, âwâlâ âjize kydato ara. Deus ize kurâ, kurâ domodo ize kurâ warâ watay lâpylâ olâ iomaru kuru-ro warâ, âdydo imeom, ânguydo imeom warâ egameduo iomaru takaze kehoem — kely.

<sup>34</sup> Awârâ tindatuo, tutuze myani Jesus, mâtâ Moisés inweniby wâgâ enomedâni tutuze kehoem aguely awyly. Aituo eyam aguely:

— Koendâ kehoem Deus wâgâ tutuze âmâ. Deusgue tywymâgueinhe iseaji mynra âmâ — kely.

Aqueduo tonlo modo Jesus napâigueba idylymo.

*Jesus, “Ânguyka Messias?” kehobyry*

(Mt 22.41-46; Lc 20.41-44)

<sup>35</sup> Deus ety idaseray kurâdo tienomedâdyly ume, Jesus aguely tydataynrim modoram:

— Moisés inweniby enomedâni modo, “Uguondo kulâ Messias; Davi iweryypyry tarâ onro anaym kulâ ise pymâem awyly” kelymo. Âyanmo auguely olâ, âkealâ awyly mâtuntuhomoem. <sup>36</sup> Tutzelâ myakâwândy Davi, âdaunlolâ kurâ takaze kehoem ton-honreim Messias awyly. Awylygue “Ywymâry” kewândymy Davi Messiasram, niazepa awyly umelâ. Deus Ispiriturylâ mawânkâ eyam xutuen-hoim. Tutzelâ âmaemo Davi inweniby:

“Deus aguely myakâwâm Ywymâryram:

‘Yahoru eynynâ ikagâ tynrenseim ekadodâ,

âduery modo eon-honru kainly ara,

âdydo ara kulâ âhuru iaxi kânhedylymo ara’ kewândymy Deus”

kely myakâwândy Davi inwenily, Deus Ingonyby wâgâ.

<sup>37</sup> — Davilâ myakâwândy Messias tywymâryem awyly agueim. Awylygue kiuntuly âdaunlo kulâ uguondo keba awyly. Messias tynrenseim kuru awyly xutuwâdaungâ, Davi takaze — kely Jesus.

Koendâ kehoem kurâdo Jesus tonomedâdyly indadylymo.

*Moisés inweniby wâgâ enomedâni modo wâgâ Jesus aguehobyry*

(Mt 23.1-36; Lc 20.45-47)

<sup>38</sup> Aituo Jesus agueondly kurâdoram:

— Tonomeguelâ itaungâ Moisés inweniby wâgâ enomedâni modo aito ara amipyra mitomoem. Koendonro aramo wâne, koendonro kebamo olâ. Earamopa itaungâ.

Kurâ domodoram tâzehogueoly kulâ ize atomo. BOH waunlogue lelâ etyunmo, Deus eynynonroem tawyly tienehon-homoem. Âdykâlâ kurâdo âtâdyguyho einkâ takaduomo, mâtâ modo tâdaenkudyzemo, tynrendysemo warâ. <sup>39</sup> Âtâ tâdâtâdyguyho odaji tâtâduomo, tâgareim ekado wâgâ ekadylymo, arâ lâpylâ âty mododâ. <sup>40</sup> Pekodo pypâ modoram aguelymo inanry: “Xinalâ ise âsejigumo eni; tusonebama âmaemo” kelymo. Isejigumo turâem tientomoem kulâ olâ nhenokudylymo. Deus agâ adâkedaymo, imeâgâembâ kehoem aguelymo, koendâ tâgaromoem kulâ. Awylygue ise Deus nhenagazedylymo, kurâdo takaze kehoem – kely Jesus.

*Pypâ âdy pebanro Deusram tydineruru nhuduhobyry  
(Lc 21.1-4)*

<sup>41</sup> Deus ety idaseray Jesus ekadyly, dinheru Deusram xuduypy etary iwaguepa. Ilâ odaji dinheru ieni modo myani nhenuagaendyly. Toenzepa tydinerugueim modo imâem dinheru nhetadâdylymo nhedyly. <sup>42</sup> Aituo pypâ âdy pebanro kehoem saindyly. Azagâ moeda imeimbyry, tâwâensenry nhetadâdyly nhedyly lâpylâ. <sup>43</sup> Awârâ tientuo, Jesus aguely tynynonro modoram:

– Deus xurâem, mâtâ pypâ nhetadâdyby tâwâenseim kuru, akaemo âdypeom modo nhetadâdyby takaze. <sup>44</sup> Dinheru âsegubydâdyby akaemo nhuduly. Mâtâ olâ idânârâ tâlâ tato ara nuduaki, typniry tianâto alelâ. Xirâ mâuntudyzemo kuru wato – kely Jesus.

## 13

*“Deus ety adakalagueoze” Jesus kehobyry  
(Mt 24.1-2; Lc 21.5-6)*

<sup>1</sup> Aituo Jesus âxiguely Deus ety idaserayba. Tâtâday, Jesus eynynonro ewy aguely:

– Egâ, Pymâ. Iwâkuru kehoem Deus ety! Tuhu iwâkuru kehoem âtâ itâdobyry! – kely.

<sup>2</sup> Aituo Jesus aguely:

– Arâ wâne awârâ Deus ety imâsedo mâtendylymo. Adainhoze olâ awârâ. Idânârâ adakalagueoze. Angato inkâba ise awârâ tuhu modo; ihuguewâze awârâ onro onwa – kely Jesus.

*Jesus tâdâsenagazedyly wâgâ aguehobyry  
(Mt 24.3-14; Lc 21.7-19)*

<sup>3</sup> Ilâpyryem idâlymo iwy onwa Se Oliveira Ekaram. Târâ iwy wâgâ ekadybyem Jesus Deus ety nhesedyly iwague endaylâ. Pedro, Tiago, João, André warâ eyam idâlymo.

<sup>4</sup> Eagonrodo naimpyra awyly umelâ sapâigueze:

– Âdara kaise xypyry iwaguepa idyly xina nhutuly? Âdy kaise tâenseim Deus ety adakalagueoho odaji itybyem awyly xutuhoem? Âdara kaise awârâ adaguhoem aidyly? – kelymo.

<sup>5</sup> Aituo Jesusram âzenomedâolymo:

– Inanaynmolâ itaungâ, kodopâdo wâgâ ânguy inokubyramo itoem. <sup>6</sup> Xypyry etaji idyly ume, toenzepa ise “Messias urâ, Deus Ingonyby” kewâni modo. Toenzepa ise agueduomo âsenogudaynrim modo. <sup>7</sup> Tâinkâ lelâba âseguebylymo, âdyâwâdylymo warâ kely idase âmaemo. Tadahulizeba olâ itaungâ, awârâ modo egary mâtindatuomo. Aise awârâ modo, âdypydâdo keba olâ ise. <sup>8</sup> Âkelo anano modo âdyâwâsemo. Âjitanwebaom modo âdyâwâsemo warâ. Tâinkâ lelâba ise onro âzekânily. Âtâ anakâ pyni peba ise. Tâdâsenagazedyly imâem iseze, pekodo âsenagazedyly xigâlegueam tymery iazehoem ewânuque myara.

<sup>9</sup> – Tonomeguelâ itaungâ. Yizepaom modo awâsemo yeinwândylymogue. Asemo pymâ domodo enadoram, mâtzenagazeohomoem. Apioğuen-honzemo âtâ tâdâtâdyguyho oday. Yeinwândylymogue, pymâ domodoram adahoze âmaemo. Pymâ domodo enado mataymo

tâwâlâ ise unâ iwâkuru mâengatulymo âdara imakehomobyry wâgâ. <sup>10</sup> Xypyry etaji idyly iray, unâ iwâkuru ywâgâ agueim âzegatuoze idânârâ kurâdoram. <sup>11</sup> Adahoze âmaemo pymâ domodo enadoram, âzetadâoze âmaemo warâ. Amyguehomo wâgâ tadahulizeba itaungâ, pymâdo enadoram madahoduomo. Pymâdo enado mawylymo ume, Deus agâmolâ ise. Âurusemo amyguehomoem. Âunârymo wâgâ kulâ inkâba ise amyguelymo, Deus Ispiritury xunâry wâgâ.

<sup>12</sup> — Ipemugüanlâ ise yeinwânni modo âzenagazeoly. Ipemugumolâ ise pymâdoram egamenrimo, âdyohomoem. Âjiukonoem, âjiwaigoruem warâlâ ise âsegamelymo. Tâjiunwym, tâjimery warâlâ ise âsegamelymo lâpylâ, âdyohomoem. <sup>13</sup> Ynynonroem mawylymogue, toenzepe ise mâjiewiâseolymo. Âmaemo yeinwândyly imodânry modo olâ âsemagueze, aunloenlâ Deus agâ mitomoem – kely Jesus.

*Jesus Jerusalém adainholy wâgâ aguehobypy  
(Mt 24.15-28; Lc 21.20-24)*

<sup>14</sup> Aituo Jesus agueondyly:

— Âepanâgueze “Deus izepaom kuru” keho, mâkâ inakai kuru. Jerusalémdâ ise âepanâgueley, Deus ety oday, tâjidydâpa kulâ. (Xirâ itainwâni modo xutuze, âdara keze aguely awyly.) Mâkâ inakai kuru Jerusalémram saintuo, âmaemo Judéia donro modo iwyram âwientaungâ, otoenze. <sup>15</sup> Inepa kehoem âwientaungâ. Itymo inatay âmaemo watay, tâwânsoba itaungâ itymo odaji, âdylâ ese. <sup>16</sup> Âpa ezay âsewanize mataymo, inepa âwientaungâ, itymo iwanomoguelâ. Itymo mâungukehomo ese todopâzeba itaungâ.

<sup>17</sup> — Toenzepa âsenagazeze pekodo modo ioday tymegueim, tuhuazeim modo warâ. Tahule âwiennembamo mawânkâ ise. <sup>18</sup> Deusram ekadaungâ, kopâ umeba xirâ tâdâsenagazedo saindyly itoem; inepa tâdâwiento nudupama ise. <sup>19</sup> Ton-honre ise awârâ tâdâsenagazedy saindyly. Deus onro nhugutobyryenlâ arâ kehoem tâdâsenagazedy peba awyly. Anitombyra ise-ro warâ mâtâ emyenro kuru. <sup>20</sup> Deus olâ mâtâ tâdâsenagazedo epagunâze, aisezedly lelâ waypa itoem. Aypa watay, ânguy ne-maenwâbyra tâise; idânârâ tadainze. Tynynonroem tinduakeyby modo wâgâ olâ ise Deus anhedyly – kely Jesus.

<sup>21</sup> Jesus aguely:

— Kodopâdo xutuze âmaemo, ânguy âdakepalâ. Awylygue “Anra merâ Messias” kely mâindatuomo, kâzeinwântaundâ. “Awâtârlâ awâkâ Messias” kely mâindatuomo, kâzeinwântaundâ warâne. <sup>22</sup> Toenzepa ise enra konokuni modo. “Deus Ingonytby urâ” kezemo. “Deus keankâ ugononi, itaumbyry egatuze” kezemo. Adyesenry modo kehoem aiesemo, kurâ domodo iomazeâni aiesemo warâ. Idânârâ enokuze kezemo; Deus indu-akewâdyby modo enokuze kezemo lâpylâ, akaemo olâ ise nâzenokuoba. <sup>23</sup> Inanaynmolâ itaungâ. Âurudylymo olâ waunroenlâ, mâtâ ume mâzenokuoba mitomoem – kely Jesus.

*Uguondo Kaynâpa Âetyby odopâdo xutuho  
(Mt 24.29-31; Lc 21.25-28)*

<sup>24</sup> Aituo Jesus aguely:

— Mâtâ tâdâsenagazedy sakabygueduo, xixi, nunâ warâ tohoreba ise. <sup>25</sup> Ximukâ modo kau wâgâpa ihuguewâze. Kaynâ tyngataymbô modo ihugueânze Deus. <sup>26</sup> Idânârâ kurâdo kâepanâgueley ese, urâ “Uguondo Kaynâpa Âetyby” keho. Eunu duay ise ytâgyuly. Pymâem lelâlâ wawyly; toenzepe won-honru enehonze urâ. <sup>27</sup> Anju domodo igonose urâ idânârâ âtâ anakâ, Deus induakeyby modo idâtyguyze. Xixi egaseho eynynâ, egawânto eynynâ, norte eynynâ, sul eynynâ warâ ise yeinwântaynrim modo âewyly – kely Jesus.

*Jesus odopâdo xutuhobe ise  
(Mt 24.32-35; Lc 21.29-33)*

**28** Aituo Jesus aguely:

— Inepa kodopâdyly awyly xutuhobe ise, iwaguepa kopâ ihugueho awyly xutuho ara. Etaungâ figueira. Iwetary modo ikuandaynly, sary ilusewâdyly warâ watay, iwaguepa kopâ ume idyly awyly tutuze âmaemo. **29** Myara lâpylâ ise xirâ auguehobypy modo aidyly adaguly mâentuomo, kodopâdo iwaguepa awyly mâuntulymo. **30** Aise xirâ âdydo imeom, idânârâ xirâ onro anano modo iguelymo iraynâ. **31** Kau, onro warâ adainze. Auguehobypy olâ ise nadaimpa, nâtugugueba warâ; aunloenlâ ise. Xirâ mâuntudyzemo kuru wato — kely Jesus.

*Ohondbyem lelâ itaungâ, Jesus odopâdyly iraynâ*

(Mt 24.36-44)

**32** Aituo Jesus aguely:

— Kunwym Deus kulelâ xuturim kuru âdara kodopâdyly awyly, kopae atay, peto oday atay warâ. Ânguy xirâ anano nutuwâbyra. Anju domodo nutuwâbyra. Urâ Deus imerylâ kâuntuwâbyra urâ. **33** Tonomeguelâ olâ itaungâ. Kâewlyl inwânwântaungâ. Mâinwânwâmpyra tâiseba itaungâ, âdara kodopâdyly mâuntuba mawylymogue kulâ.

**34** — Unâ ise âyanmo kâengatuly, mâuntuhomoe. Alâ myani uguondo adakobâze idâly. Tâgasely iraynâ tagâ tâwanuneim modoram aguely: “Iegasely ise. Âdara kodopâdyly kâuntuba olâ urâ. Iwanumone aietaungâ. Auguehobypy aietaungâ” kely myani. Pyanta eniram aguely myani: “Inanaynlâne ikâ, pyanta mâenahunguehoem kodopâduo” kely. **35** Awylygue myani tâwanuneim modo âsewanilymo lelâ. Nâsewaniba nipyramo. Âdara âtâ sodo odopâdyly nutubamo mawânkâ. **36** Arâ lâpylâ aunlolâ kodopâdyly iwânwântaungâ. Auguehobypy amânhepyra tâiseba itaungâ. Tyneim, xykynri warâ ara inkâba itaungâ. **37** Yeinwâmpyra tâiseba itaungâ. Auguehobypy amânhepyra tâiseba itaungâ, kodopâdyly ara — kely Jesus.

## 14

*Jesus xyâly wâgâ aguehomobyry*

(Mt 26.1-5; Lc 22.1-2; Jo 11.45-57)

**1** Azagâ iguandyly kulâ myani Páscoa etyry adaguhoem, judeu domodo idamudo Egítodâba âsemaguehomobyry etyguedo, pão ioliho pebaom nhedawyn-homo. Kurâdo eynynâ Deus agâ aguewâni modo iwymâryo, Moisés inweniby wâgâ enomedâni modo warâ âjigue âtunâguedylymo myani, âdara Jesus tianwânehonly, tyâen-honly warâ wâgâ. Kurâ domodo nhutudyzebamo. **2** Aituo aguelymo:

— Koendâpa ise enra âty ume sawâdyly. Toenzepa ise kurâdo âzetygueni modo. Jesus sawâtobyry egary indadylymo-ro watay, kagâ toenzepa iewiâpazemo — kelymo.

*Pekodo Jesus nhangahu onwa uriza nhapâdobyry*

(Mt 26.6-13; Jo 12.1-8)

**3** Jesus idâondly âtâ anary Betanianra. Târâ tatay myani idâly Simão tâjimituguelgue tâwâneimbyry etyram. Jesus, eynynonro modo warâ Simão agâ âwinduadylymo myani. Âwinduadylymo ume, pekodo Jesus iopaji saindyly. Alabastrogue uriza etary xygatybygue tâmase; uriza tâwâenseim nardogue tumyke mårâ. Etary enahuru nhukagâdyly, tienahunguehoem. Ilâpyryem uriza tyânrângueim nhapâdyly Jesus nhangahu onwa.

**4** Uriza nhapâdyly tientuo, tonlo modo, aidyly nehoguebyra. Aituo aguelymo:

— Etaungâ! Awâkâ pekodo uriza tâwâenseim alâ kulâ nhumedyly! **5** Awârâ uriza vende iedyly-ro watay, trezentas moedas takaze kehoem tâise idinherugu\*. Koendâ tâise vende nhedyly, ebyry âdy pebaom modoram tiunduhoem — kelymo.

Toenzepa pekodo nhunâguedylymo.

\* **14:5** Tokalâ anu ara kehoem tâsewanize uguondo trezentas moedas pratagueto tâmakehoem.

***6 Aituo Jesus aguely:***

— Arâ adâkezeba itaungâ merâ pekodoam. Kâjiwypazenehonwâdaundâ. Koendonro merâ urâem anhekly. <sup>7</sup> Aunlolâ ise âdy pebaom modope awyly; ize matomobyry aralâ ise âdylâ mâuundulymo. Urâ olâ ise âdiempa kulâ agâmo wawly. <sup>8</sup> Idânârâ adienkyly ara anientai. Wonwa uriza tyânrângueim niapâdai, yigueduo, ieguepybyry etadâdo odaxi ietoem wondly ara. <sup>9</sup> Merâ anhetyby ânguy nenanânehonwâbyra ise. Unâ koendonro egatuly âdykâlâ-ro watay, tânanâguezeinlâ ise merâ aitobyry. Xirâ mâtuntudyzemo kuru wato — kely Jesus.

***Jesus tiengamehoem, Judas dinheru nhemakehobypy  
(Mt 26.14-16; Lc 22.3-6)***

<sup>10</sup> Aituo myani Judas xidadâ Queriote donro Jesus eynynonro modo ewy, idâly kurâdo eynynâ Deus agâ aguewâni modo iwymâryo doam, eagâmo âtunâgueze. Eagâmo âseinwândly myani Jesus eyanmo tiengamehoem. <sup>11</sup> Aguely tindatuo, toenzepa kehoem iomazelymo.

— Xina emaxi Jesus mâengamely-ro watay, ipywaze xina — kelymo myani.

Eagâmo adâkebygueduolâ kehoem Judas, âdara Jesus tiengamehoem adâidly awyly nhutuly.

***Jesus, “Ohondaungâ, Páscoa kientyguedoem” kehobypy  
(Mt 26.17-25; Lc 22.7-16,21-23; Jo 13.21-30)***

<sup>12</sup> Egitodâba tydamudo âsemaguehomobyry tienanâguehoem, judeu domodo pão ioliho pebaom nhedawyn-ho, kordeiru nhâhomo warâ, âty Páscoa keho oday awylygue myani Jesus eynynonro modo aguelymo eyam:

— Âdykâka ise pyni iwâkuru xina anhenehondye mawyly, xirâ Páscoa ume kydawinduatoem? — kelymo.

<sup>13</sup> Aituo Jesus azagâ tynynonro ewy ingonodyly âji nhonse. Egaselymo iray Jesus aguely eyanmo:

— Idâwâtaungâ xidadâ Jerusalémram. Myarâ aintuomo, uguondo âmugâ oday paru sani iose âmaemo. Idâwâtaungâ eagâ. <sup>14</sup> Igawântaungâ egawântobyry âtâ odaji. Mârâ âtâ sodo agâ aguewâtaungâ: “Pymâ mawânkâ âty Páscoa tientyguedyze tarâ xirâ kopae. Âdykonlo âtâ sahomery oday kaise tynynonro modo agâ kordeiru nhunru nhâdly, pão ioliho pebaom nhedawynly warâ?” kewâtaungâ âtâ sodoram. <sup>15</sup> Eagâlâ ise mâtulymo, âtâ sahomery kaynonro odaji. Târâ ise sahomery imeâgâ keba nhenehonly Tâlâ ise târâ mesa, tâzekado, idânârâ ize kydato modo warâ. Târâ ise kypniry amânhenehonlymo — kely myani Jesus.

<sup>16</sup> Jesus aguepygueduo, azakâlâ idâlymo. Saindylymo xidadâram. Saintybyem, Jesus aguehobypy ara lelâ nhedylymo. Mâkâ uguondo agâ oxiodylymo, idâlymo eagâ, âtâ nhedylymo warâ, Páscoa tientyguedomoem. Pyni modo aienehonrimbyryem myani odopâdylymo Jesus eydâ atoam.

<sup>17</sup> Iguampygueduo, Jesus myarâ idâly tynynonro modo agâ. Saindylymo. Âwinduadylymo. <sup>18</sup> Âjigue tâwinduataymo, Jesus aguely eyanmo:

— Idataungâ auguely. Tokalâ âmaemo ewy yâdysedo modo emaxi iegameze. Yagâ âwinduani modo ewylâ ise iegameim — kely.

<sup>19</sup> Jesus agueduo, itywandylymo. Mâkâ, mâtâ warâ aguelymo:

— Urâ mâtkeba ise igamenri, Pymâ! — kelymo.

<sup>20</sup> Aituo Jesus aguely:

— Âmaemo ewylâ olâ ise iegamerim, yagâ pão edawynrim modo ewylâ. <sup>21</sup> Deus itaumbypy egatuwâni modo iweniwânmy ywâgâ. Uguondo Kaynâpa Âetyby âdyoze,

kelymo myakâwâm. Aguehomobyry ara ise aidyly. Toenzepa âsenagazeze olâ yizepanro modo emaxi iegamerimbyry. Niazepalâ wânkâ nidysé! – kely.

*Kywymâry Jesus iguehobyry enanâgueho  
(Mt 26.26-30; Lc 22.14-20; 1Co 11.23-25)*

<sup>22</sup> Tâwinduatay, Jesus pão nhanâdyly. Deusram aguely:

– Koendoro âmâ, Pabai, xirâ pão mâundulygue – kely.

Agueypyem, pão nhepajiwâdyly. Mâkânra, mâkânra warâ nhuduly, nhedawyn-homoem. Aituo aguely eyanmo:

– Sawâtaungâ. Xirâ pão kâempajiwâdyby, wodo xirâ – kely.

<sup>23</sup> Ilâpyryem kopu vinhugue taseim tâmaxi nhedyly. Deusram aguely:

– Koendoro âmâ, Pabai, xirâ vinhu mâundulygue – kely.

Agueypyem, mâkânra, mâkânra warâ nhuduly nhenyhomoem.

<sup>24</sup> Aituo Jesus aguely:

– Unulâ xirâ. Tâunkeze ise yiguelly, toenzepa kurâdo emakeze. “Ynynonro modo emakeze urâ” Deus kehobyry mawânrâ. Awyllygue ise unu tyapâze yigueduo, iwelo tâdâsemaguehobe Deus nhedyly. <sup>25</sup> Xirâ pygueduo, Páscoa kâentyguedombyra, vinhu kâenyombyra warâ wao ise urâ agâmo, Pabai Deus eynynonro modo myarâ pymâem atoram saindylymo ara. Xirâ mâuntudyzemo kuru wato – kely Jesus.

<sup>26</sup> Âty âwanikebygueduo igâtudylymo Deus tionmaendoem. Igâtudybyem idâlymo iwy Se Oliveira Ekaram.

*Jesus Pedroram, “Azagâ tokalâ warâ Kâuntuwâbyra urâ awâkâ’ keze âmâ” kehobyry  
(Mt 26.31-35; Lc 22.31-34; Jo 13.36-38)*

<sup>27</sup> Aituo tâtâlymo ume, Jesus aguely tynynonro modoram:

– Xirâ kopae idânârâ âwiense âmaemo. Wodokeze âmaemo. Deus itaumbypyry sawo wâgâ iwenibyem: “Kaneru sodo xyâduo, idânârâ eguy modo adapâeguyze” kewânmy Deus. Arâ ise ayedylymo. <sup>28</sup> Yigueduo, kurâem itonze olâ urâ. Kurâem witombygueduo, waunroenlâ ise Galileiaram udâly – kely.

<sup>29</sup> Agueduo Pedro aguely:

– Tâwâlâ wâne ise idânârâ odokelymo. Urâ olâ ise odokeba – kely.

<sup>30</sup> Jesus olâ warâ eyam aguely:

– Xirâ kopae, aukuma igâtudyly azagâ ieto iraynâ, azagâ tokalâ warâ ise “Jesus kâuntuwâbyra urâ” myguelly. Xirâ mâuntudyze wato kuru – kely.

<sup>31</sup> Pedro olâ agueondyly lelâ:

– “Jesus kâuntuwâbyra urâ” uguewâpyra ise urâ. Tâwâlâ ise agâlâ yâlymo. “Jesus kâuntuwâbyra urâ” uguepa olâ ise urâ-ro warâ – kely.

Idânârâ Jesus eynynonro modo aguellymo lâpylâ:

– “Jesus kâuntuwâbyra urâ” xina kewâpyra lâpylâ ise – kelymo.

*Jesus Tunwym agâ Getsemanidâ aguehobyry*

*(Mt 26.36-46; Lc 22.39-46)*

<sup>32</sup> Aituo Jesus, tynynonro modo agâ âji Getsemaniram idâlymo. Myarâ saintybyem myani Jesus eyanmo aguely:

– Tarâlâ wao itaungâ, ikadaungâ warâ, Deus agâ agueze udâday – kely.

<sup>33</sup> Adâkebygueduo, Jesus Pedroram, Tiagoram, Joãoram warâ aguely:

– Yagâ âetaungâ; eagonro modo lelâ ise taunlo – kely.

Aituo eagâ idâlymo iwague nekâ. Târâ myani toenzepa kehoem Jesus itywandyly.

<sup>34</sup> Aituo aguely:

– Toenzepa enra ytynru, yigueho ara kehoem. Tarâlâ wao itaungâ. Tykyzeba olâ itaungâ, ynynâ Deus agâ amyguehomoem – kely.

<sup>35-36</sup> Âdiempa waunroem idâly myani. Târâ âzeguhoam idyly, Deus agâ adâkehoem:

— Pabai, Pabai, idânârâ adyese âmâ. Toenzepa kuru kâsenagazedyly warâ izepa wâne urâ. Ize wato araba olâ aidyse wawyly ize mato aralâ — kely.

<sup>37</sup> Deus agâ agueypyem, Pedro, Tiago, João warâ âxiân-hobyryram idâly, xykylymo ume. Xuagueânimobryem, aguely Pedroam:

— Âkyly enra, Pedro. Agonrodo lâpylâ warâ xykylymo enra. Âdiempalâ ynynâ Deus agâ amyguehomoem âkyba mitoem nudupa kuru? — kely.

Aituo eyanmo aguely:

<sup>38</sup> — Nhaum, xuagueypyem lelâ itaungâ, inanaynmolâ warâ. Satanás umohomoem aienehonze keze. Deusram ekadaungâ, Satanás ize ato amânhepyra mitomoem. Deus eon-honru peba kulâ yagâ tâdâsenagazedyly mâenmaenwâbyra ise âmaemo, yagâ mâsenagazedyze mawylymo umelâ — kely myani Jesus.

<sup>39</sup> Aituo Jesus idâondly âdiempa waunroem, Deus agâ agueonse:

— Pabai, idânârâ adyese âmâ. Toenzepa kuru kâsenagazedyly warâ izepa wâne urâ. Ize wato araba olâ aidyse wawyly, ize mato aralâ — kely.

<sup>40</sup> Ilâpyryem myani odopâdondly Pedro, Tiago, João warâ eydâ atoram. Xykyondybymoem awyly nhedyly. Toenzepa myani xuedunumo, enuzehomoemba. Xykylymo tientuo, âduagueâñ-honlymo, aguely:

— Âkylymo kulâ enra. Inuzeba mataunaze, Deus agâ amyguehomoem — kely.

Tywypadlymogue âdakepamo myani eyam.

<sup>41</sup> Aituo Deus agâ agueze idâondly. Ilâpyryem odopâdondly tynynonro modo eydâ atoam. Nhuagueântondlymo. Aituo agueondly eyanmo:

— Âkylymo kulâ enra. Inuzeba lelâ mataunaze, Deus agâ amyguehomoem. Alâ! Iweâ lelâlâ yizepaom modo emaxi âduduoze urâ. <sup>42</sup> Autaungâ. Inoro; eagâmo kydoxiada. Etaungâ. Awâkâlâ iegamerim saindyly! — kely.

### *Jesus nhawâtomobry*

(Mt 26.47-56; Lc 22.47-53; Jo 18.3-12)

<sup>43</sup> Jesus aguely ume myani Judas saindyly, Jesus eynynonrolâ kâinane mâkâ. Toenzepa kurâdo eynynâ Deus agâ aguewâni modo iwymâryo ingonotaymby modo, Moisés inweniby wâgâ enomedâni ingonotaymby modo, kywymâryo ingonotaymby modo warâ Judas agâ saindylymo. Espadague, segue warâ tâmatune kehoem saindylymo, Jesus sawâse. <sup>44</sup> Taindylymo ume Judas eyanmo aguely:

— Uguondo konhonuguguyly, mâkâlâ ise mâkâ, Jesuslâ. Tâwâlâ ise manwâdylymo. Kâzemakehonwâdaundâne — kely myani Judas.

<sup>45</sup> Aituo Judas saindyly Jesus iopaji, aguely:

— Pymâ — kely.

Aguenrippyrem Jesus iwaparydâ nhonugudyly; tataen-ho agâ adâito ara nhedaenkuý. <sup>46</sup> Aituo Judas agâ idâwâtyby modo Jesus nhawâdylymo, nhemakâjilimo warâ. <sup>47</sup> Jesus eynynonro ewy tydahoru ety odayba nhetyly. Kurâdo eynynâ Deus agâ aguewâni modo iwymâry kuru agâ tâwaneim inwantazagâdyly. <sup>48</sup> Jesus aguely kurâdo tawâse idâypy modoram:

— Espadague, segue warâ tâmase kehoem yawâse mâewylymo, tâmagazeim urâ-ro waunlo ara. <sup>49</sup> Yawâtomo tuduzelâ keankâ saguhoem, kyâho pebalâ. Kopaelâgâembaba keankâ Deus ety idaseray, agâmo agueze wawyly. Târâlâ yawâpyra olâ mataunaguynre. Yawâto odayba awylygue keankâ ilâenlâ yawâpyra mawylymo. Tâwâlâ yawâtaungâ lelâ, âdaitybyemba wawyly umelâ. Arâlâma ywâgâ iwenibyem awyly Deus itaumbyry awo wâgâ — kely.

<sup>50</sup> Jesus sawâtuo, idânârâ kehoem Jesus eynynonro modo nhodokelymo, âwiendylymo.

**51** Salokuzenomo BOH waunlogue tâtyeim lelâ myani Jesus nhataymo nhapygue idâim. Mâkâ sawâse kewânmo lâpylâmy. **52** Tâty tywogonro wâgâ tadarawâhoduo, âzetyguewâm olâmy; tâtyembalâ myani âwiendy.

*Jesus judeu domodo iwymârydoram satobyry  
(Mt 26.57-68; Lc 22.54-55,63-71; Jo 18.12-14)*

**53** Ilâpygueduo, Jesus nhadylymo kurâdo eynynâ Deus agâ aguewâni modo iwymâry kuru etyram. Idânârâ pymâ tynruneim modo târâ âtâdyguybyem awylymo. Kurâdo eynynâ Deus agâ aguewâni modo iwymârydo, Moisés inweniby wâgâ enomedâni modo, idânârâ uguondo modo tynrenseim warâ myani tonlo.

**54** Myarâ idâdaymo, âgânâ kehoem Pedro idâly, kurâdo eynynâ Deus agâ aguewâni modo iwymâry kuru ety idaseraji. TâgawâNSE, tâkaze warâ myani peto opaji, guarda domodo agâ âunse. **55** Kurâdo eynynâ Deus agâ aguewâni modo iwymârydo, idânârâ judeu domodo iwymârydo, Moisés inweniby wâgâ enomedâni modo warâ myani âjigue aguelymo âtâ oday:

— Azagâ atay, azagâ tokalâ warâ atay kurâ domodo ewy kuduinre, âzekiba lelâ Jesus wâgâ ewentâniem, kyâen-hon-hoem — kelymo.

Arâ ize tatomo ara kurâdo ewy nepyramo olâ. **56** Toenzepa mawânkâ kurâdo Jesus ewentâze kewâni modo. Iozepa kulâ aguewâdylymo. Âikâ âikâ warâ kulâ aguelymo.

**57** Ilâpyryem tonlo modo ewy saudyly pymâdo enanaym, Jesus ewentâze kewâdyly.

**58** — “Deus ety uguondo modo intâdyby sakalagueze urâ. Azagâ<sup>†</sup> emedyly idyly ara saunâtonze urâ” kely, xina nidadâ — kelymo.

**59** Toenzepa kurâdo Jesus ewentâni, “Deus ety sakalagueze urâ” kehobyry wâgâ wâne. Nâzeinwân-hombamo olâ, âzekiba aguenri peba awylygue.

**60** Aguelymo idanipyryem, kurâdo eynynâ Deus agâ aguewâni modo iwymâry kuru saudyly idânârâ tâzenanaym, Jesus nhapâiguel:

— Âwâgâ aguelymo midatailâ. Âkealâ, âkealâba inwentâdomo awyly ise amygueho? Âdalâ myguepaka ise âmâ mâsemaguehoem? — kely.

**61** Jesus olâ âdakepa myani tâsemaguehoem. Aituo kurâdo eynynâ Deus agâ aguewâni modo iwymâry kuru nhapâigueondyly:

— Messiaslâka âmâ, Deus Ingonyby? Deus koendonro imerylâ âmâ? — kely.

**62** Aituo Jesus in-hoguly:

— Messiaslâ urâ, Deus imerylâ warâ. Xirâpygueduo ekadybyem ise urâ, Deus tonhonreim ahoru eynynâ. Eagâ ise pymâem wawyly. Eunu duay ise Deus eydâpa kâewyly — kely Jesus.

**63** Toenzepa kurâdo eynynâ Deus agâ aguewâni modo iwymâry kuru iewiâpadly, “Deus imerylâ urâ” Jesus kely tindatuo. Tyewiâkygue tâty tywogonrolâ nhaunguely. Pymâdo târâ âtâdyguywâdyby modoram aguely:

— Ânguy kingâsedondaymba ise kurâ, Jesus ewentâniem. **64** Deus nunâguedai awâkâ Jesus. “Deus imerylâ urâ” keduo, Deus agâ âzekiba tawylylâ agueho. Ânguy kiunhotaymba ise kurâ, ewentâniem. Midataimolâ, Deus wâgâ aguely. Âdara iedylyka inanajimo inakanhe kehobyry wâgâ? — kely.

Aituo pymâ domodo aguely:

— Uguondo inakai kulâ awâkâ! Xyâly lelâ awâkâ! — kelymo.

**65** Aituo nhedakudâdylymo, nhenuahulymo, nhapiogulymo nhedylymo.

— Ânguya apiogurim? Apiogüimbyry xutugâ, âkealâ kuru Deus Ingonyby matay — kelymo.

<sup>†</sup> **14:58** Nota de pé Mateus 12.40dâ egâ.

Ilâpyryem guarda domodoram nhegamelymo. Guarda domodoram âjiwapagainholo, adapioguoly âieholo myani.

*Pedro, “Jesus kâuntuwâbyra urâ” kehobyry  
(Mt 26.69-75; Lc 22.56-62; Jo 18.15-18,25-27)*

<sup>66</sup> Jesus pymâdo enado atay, Pedro târâ taseraylâ. Pekodo târâ tâwaneim ewy Pedro einkâ sakadyly. <sup>67</sup> Pedro âundyly nhedyly. Koendâ kehoem enipyryem aguely:

— Jesus Nazaré donro eynynonro modo ewylâ âmâ — kely.

<sup>68</sup> — Mâkâ mâkeba urâ. Kâuntuwâbyra urâ awâkâ. Ânguyka awâkâ Jesus, iwâgâ amygueho? — kely myani Pedro.

Agueypyem, pyanta taseraji tâdâwântoram Pedro idâly. Mârâ umelâ myani aukuma igâtudly. <sup>69</sup> Eagonro pekodo târâ tâwaneim modo ewy, Pedro tientuo, iwaguepaom modoram aguely:

— Jesus eynynonro ewy awâkâ uguondo — kely.

<sup>70</sup> Mâkâ pekodo aguely tindatuo, Pedro agueondly:

— Âdykâ Jesus eynynonroem witaymba urâ. Kâuntuwâbyra urâ awâkâ — kely.

Ilâpyryem tonlo modo agueondly:

— Jesus eynynonrolâ âmâ. Tutuze xina, Galiléia donro mawyly, earamolâma amyguely — kelymo.

<sup>71</sup> Aituo Pedro agueondly:

— Mâkâ mâkeba urâ! Kâuntuwâbyra urâ awâkâ uguondo amyguehomo! Tutuze Deus âkealâ auguely awyly. Tâwâlâ ise Deus ienagazenehonly, uguewâdyly kulâ-ro watay — kely.

<sup>72</sup> Pedro aguely umelâ, aukuma igâtudondly. Tindatuo Pedro, Jesus tyam aguehobyry nhenanâguely, “Xirâ kopae, aukuma azagâ igâtudyly iraynâ, azagâ tokalâ warâ ise ‘Jesus kâuntuwâbyra urâ’ myguely” kehobyry. Aguehobyry tienanâgueduo, toenzepa Pedro âjityendyly, ohogüendly warâ.

## 15

*Pilatosram Jesus satobyry  
(Mt 27.1-2,11-14; Lc 23.1-5; Jo 18.28-38)*

<sup>1</sup> Emetybyem myani pymâ tynrentuneim modo âtâdyguuly: kurâdo eynynâ Deus agâ aguewâni modo iwymâryo; Moisés inweniby wâgâ enomedâni modo; judeu domodo iwymâryo, akaemo Sinédrio kelygue tâzekeim; iwymâry modo warâ. Âtunâguedlymo, âdara kuru Jesus tyâen-honlymo awyly tiuntuhomoe. Guarda domodoram nhekâjien-honlymo, nhaleholymo, nhegamehonlymo warâ Pilatosram, pymâ Romadâpa igonotybynra. <sup>2</sup> Jesus tânado atay, Pilatos nhapâiguely:

— Judeu domodo iwymâry kuruka âmâ? — kely.

Jesus in-hoguly:

— Mâkâlâ urâ, amygueho ara — kely.

<sup>3</sup> Kurâdo eynynâ Deus agâ aguewâni modo iwymâryo toenzepa myani Jesus nhewentâdylymo. <sup>4</sup> Aituo Pilatos aguely Jesusram:

— Akaemo iwentâdo midatailâ. Amyguehonly mâin-hogubaka ise âmâ? — kely.

<sup>5</sup> Jesus olâ âdakepa. Toenzepa kehoem Pilatos âseguâdâdyly, Jesus tâsemaguehoem âdakepa awylygue.

*“Nigue lelâ awâkâ Jesus” Pilatos kehobyry  
(Mt 27.15-26; Lc 23.13-25; Jo 18.38-19.16)*

<sup>6</sup> Páscoa etyguedly ume, aunlolâ mykâinane Pilatos etadâdyby ewy tokalâ nhetaguehonly, kurâdo nhekadybylâ. <sup>7</sup> Ilâ ume tâlâ myani uguondo kadeia oday tâtagueim,

Barrabásgue tâzekeim. Târâlâ mâkâ, tagonrodo agâ, pymâ Roma donro agâ âjizepa awylymogue; kyâim awylymogue warâ nhetadâdybymo.

<sup>8</sup> Agui kurâdo idâwânmy Pilatosram ekaze:

— Âty ume aunlolâ ani etadâdyby ewy mâentaguehonly. Uguondo xina etaguedyze ato etaguehongâ — kelymo.

<sup>9</sup> — Âwymârymo Jesus âdara kânhenehonlyka ize matomo? Kâinmoen-hondyzeka âmaemo?  
— kely Pilatos.

<sup>10</sup> “Ekâjiguen-hongâ” kelymo-ro waunlo ara myani, enanaji. Tâsewânilygue kulâ akaemo kurâdo eynynâ Deus agâ aguewâni modo iwymârydo, Jesus tyam nhegamely awyly, tutuze myani Pilatos. <sup>11</sup> Kurâdo eynynâ Deus agâ aguewâni modo iwymârydo toenzepa kurâdoram aguelymo:

— Barrabás nhetaguehoem ekadaungâ Pilatosram. Jesus xyâhoem ekadaungâ-ro warâ — kelymo.

Akaemo aguehobyry ara kurâdo aguely. <sup>12</sup> Aituo Pilatos nhapâigueondly:

— Merâ uguondo “Pymâ” myguehomo âdakânhedylyka ize matomo? — kely.

<sup>13</sup> Aituo adaenkelymo:

— Kruz wâgâ sakâjien-hongâ iguehoem! — kelymo.

<sup>14</sup> — Âdaituo? Ienanaji, âda nitaymba merâ iguehoem — kely Pilatos.

Agueduo olâ idânârâ adaenkelymo ton-honre kehoem:

— Kruz wâgâ sakâjien-hongâ iguehoem! — keondlymo.

<sup>15</sup> Kurâdo tionmazeândye myani Pilatos. Awylygue Barrabás nhetaguehonly, nhekedomobyry ara. Ilâpyryem Roma donro sodadu domodoram aguely:

— Jesus sapioguwâdaungâ. Ilâpyryem ise mandylymo, kruz onwa sakâjize-ro warâ, iguehoem — kely Pilatos.

### *Sodadu domodo Jesus âwankuem nhetobyry*

(Mt 27.27-31; Jo 19.1-3)

<sup>16</sup> Ilâpyryem sodadu domodo Jesus nhadyly Pilatos ety idaseraji. Idânârâ sodadu domodo târâ âtâdyguylymo, Jesus âwankuem tientomoem. <sup>17</sup> Âtâ BOH waunlo tapabileingue nhetydâdylymo, pymâ âzetydâdo ara, âwankuem tientomoem. Tyguyreim koroaem xy-gatyby myani mâkâ nhangahu onwa nhekylymo.

<sup>18</sup> — Tynrenseim lelâlâ âmâ, judeu domodo iwymâry kuru! — kelymo, âwankuem nhedylymo.

<sup>19</sup> Edakudâmâmomy, segue nhangatainwâmomy warâ. Enado âzeguhoam idylymo, pymâ enado adâitomo ara. <sup>20</sup> Âwankuem ienipyryem âtâ BOH waunlo tapabileim Jesus wâgâpa nhetylymo. Ety iwogonropyryguelâ nhetydâdylymo. Ilâpyryem nhadylymo kuohoram, kruz se xygatyby onwa sakâjize.

### *Jesus kruz wâgâ iguehoem sakâjihobyry*

(Mt 27.32-44; Lc 23.26-43; Jo 19.17-27)

<sup>21</sup> Ânwa oze tâtâdaymo, uguondo Simão agâ oxiodylymo. Xidadâ Cirene donro mâkâ, Alexandre, Rufo warâ nhunwym. Xidadâ odaji saindyly myani poji ananobyryem. Tiontuo, sodadu domodo kruz Jesus tiankâjiho eyam nhanânehonlymo. <sup>22</sup> Golgotaram myani Jesus nhadylymo. (Iwy Calvariogue tâzekeim lâpylâ, tâjiangahubyry ara enurunugue.) <sup>23</sup> Târâ vinhu mirra agâ ietybygue sakuize kelymo, kruz onwa takâjily newânebyra itoem wâne, nenypa olâ.

<sup>24-27</sup> Nove horas atay myani kruz onwa nhakâjilimo. JESUS MERÂ, JUDEU DOMODO IWYMÂRY KURU kely iweniby sakâjiwânmomy Jesus nhangawaym kruz wâgâ. Idânârâ âdaituo Jesus nhakâjilimo awyly xutuhoem mårâ anhedylymo. Ilâem lâpylâ azagâ tâmagaduneim modo nhakâjilimo. Tokalâ Jesus ahoru eynynâ, eagonro pâem eynynâ

warâ nhakâjilymo. Sakâjirimbyryem, Jesus ety iwogonropyry nhepajiwâdylymo. Dadu nhamelymo myani, ânguy, ânguy warâ Jesus ety iwogonropyry emakeim awyly tiunturomoem. <sup>28</sup> [Deus itaumbypy saguho wâgâ iweniby ara kehoem aidylymo. “Mâkâ Deus Ingonyby inakanhe kehoem aityby ara ise âzenagazeoly” kewânmy.]

<sup>29</sup> Tâinkâ sakadaynrim modoram âwankuem âieholo. Angakânilymo, inwykelymo warâ.

— “Deus ety sakalagueze urâ” myguema. “Azagâ emedyly\* idyly ara saunâtonze urâ” mygue warâ. <sup>30</sup> Ton-honreim lelâlâ matay, tâwâlâ âsemaguegâ! Kruz wâgâpa adakâjiguegâ, âytâguygâ warâ! — kelymo.

<sup>31</sup> Kurâdo eynynâ Deus agâ aguewâni modo iwymâryo, Moisés inweniby wâgâ enomedâni modo warâ âwankuem nhedylymo, aguelymo:

— Âkelo modo nemake, tâwâlâ nâsemagueba olâ! <sup>32</sup> “Messias urâ, Deus Ingonyby” nygue. “Âwymârymo kuru urâ” nygue. Kruz wâgâpa xytâguyly watay, Messiaslâ awyly einwâNSE kurâ — kelymo myani.

Akaemo azagâ tâmagaduneim modo eagâ sakâjiwâdyby modoram âwankuem âieholo lelâ lâpylâ.

### *Jesus iguehobyry*

(Mt 27.45-56; Lc 23.44-49; Jo 19.28-30)

<sup>33</sup> Kuotatay idânârâ iamadyly. Iamapygueduo três horas lelâ myani iamu. <sup>34</sup> Azagâ tokalâ warâ horas ituo, Jesus adaenkely:

— Eloí, Eloí, lemá sabactani? — kely. (“Pabai Deus, âdaituoka wodokely?” keze aguely.)

<sup>35</sup> Tonlo modo, koendâ nidapyramo tawylygue, Elias ingâsedly ara nhenehonlymo myani, Deus eynynâ agueim lâpylâ mykâinane mâkâ. Aituo aguelymo:

— Idataungâ. Elias awâkâ ingâsedly, tâmakehoem — kelymo.

<sup>36</sup> Akaemo ewy egatudyly myani, esponja, vinhu nhewantybygue ikuize. Tin-kuibygueduo, se iopyry onwa nhekâjily. Jesus nhugakâin-hoem wâne nhuduly. Aituo eagonro modo aguely:

— Ine wao. Elias ingâseguyly. Elias kruz wâgâpa etyze âewyly kyzene wao — kelymo.

<sup>37</sup> Aituo Jesus adaenkeondly ago kehoem, tyiguehoem kuru. <sup>38</sup> Iguely ume kehoem Deus ety oday Âji Tynrenseim xuahuho txieim iotagâ adauguely kaynonrobryem, on-yam; Deus, kurâdo agâ tygue ito myani mâtâ xuahuru.

<sup>39</sup> Târâ Jesus sakâjihobyry ipebaylâ myani sodadu iwymâry. Jesus iguely emâmy. Iguely tientuo aguely:

— Deus imery lelâlâ keanra enra merâ uguondo! — kely.

<sup>40</sup> Tâlâ myani târâ pekodo modo, iwaguelâ olâ nhedylymo. Maria, (Magdala donro), Salomé, Maria (José, iukonolâ Tiago warâ ise), eagonro pekodo modo warâ lâpylâ iduanomo. <sup>41</sup> Xirâ modo iraynâ, Galiléia eynynâ atay, tâlâ tatogue Jesus emawyadânybyry akaemo pekodo modo. Tâlâ lâpylâ târâ pekodo modo Jesus nhapyguenibyry modo Jerusalémram saintay.

### *Jesus eguepybyry tuhu imâsedo tâtagueim odaji nhetadâdomobyry*

(Mt 27.57-61; Lc 23.50-56; Jo 19.38-42)

<sup>42</sup> Tâzekobyzeguehoem todohondo âwanikely myani. <sup>43</sup> Iguandyly iraynâ myani José idâly tâegane kehoem pymâ Pilatos agâ agueze. Xidadâ Arimatéia donro myani mâkâ. Judeu domodo iwymâry Sinédrio kelygue tâzekeim ewy myani. Idânârâ kurâdoram tâdutuoze, tâdyren-honze warâ mykâinane. Idânârâ kurâdo iwymâryem Deus idyly sainto tânuenze mykâinane. Pilatos etyram saindyly, aguely:

— Jesus nigueaki, Pymâ. Kruz wâgâpa kâyntâguyândyze olâ urâ, tuhu imâsedo tâtagueim odaji kâenkanâdoem. Tâwâlâ kâyntâguyândyly? — kely.

\* <sup>15:29</sup> Nota de pé Mateus 12.40dâ egâ.

**44** “Jesus nigueaki” kely tindatuo, Pilatos neinwâmpyra myani. Awylygue sodadu domodo iwymâry Gólgota donrobyry ingâsedly. Sodadu domodo iwymâry saintuo myani nhapâiguely:

— Âkealâ “Jesus nigueaki” kehonly? — kely.

**45** Aituo sodadu domodo iwymâry aguely:

— Âkealâ, nigueaki lelâlâ — kely.

Aituo Pilatos Joséram aguely:

— Tâwâlâ, Jesus eguepybyry sakâ tuhu imâsedo tâtagueim odaxi — kely.

**46** Agueduo, José idâly. Âtâ tapaileim linhugueto tâwâenseim rhanâdyly. Ilâpyryem Jesus eguepybyry kruz wâgâpa nhytâguyândyly, intuwynly warâ. Ilâpygueduo, eguepybyry nhetadâdyly tuhu imâsedo tâtagueim esagueyby odaji. Myarâ ienipyryem, nhenahunlymo tuhu imâsedogue. **47** Azagâ pekodo Jesus eguepybyry sadyly etaummâmomy, Maria (Magdala donro), Maria (José ise) warâ. Âdykâ Jesus eguepybyry etadâdyly awyly emâmomy.

## 16

### *Jesus kurâem itondobyry*

(Mt 28.1-8; Lc 24.1-12; Jo 20.1-10)

**1** Tâzekobyzegueho iguampygueduo Maria Magdala donro, Salomé, Maria (Tiago ise) warâ idâlymo uriza tyânângueim sanâse, Jesus eguepybyry onwa tientomoem, tâzewenrymo ara. **2** Kopaelâgâem, pealâ idâlymo Jesus eguepybyry etadâdobryam. **3** Ânwa oze tâtâday myani âjigue xunâgumo:

— Pekodo modo lelâ kurâ. Ânguya ise tuhu imâsedo tâtagueim enahun-hombyry etyim?  
— kelymo.

**4** Tuhu imâsedo awylygue arâ aguelymo. Iwaguepa saintybyem olâ tâtagueim enahun-hobrytu tuhu imâsedo ejikebyem nhedylymo. **5** Aituo myani Jesus eguepybyry etadâdobryram âwândylymo. Tâwântaymo, salokuzenomo ekadyby iwaguelâ tahoru eynynâ nhedylymo. Âtâ tapekeingue âzetydâdybyem awyly. Tientuo, pekodo modo toenzepa âseanedly. **6** Mâkâ olâ myani aguely:

— Tâseanezeba itaungâ. Tutuze urâ, Jesus Nazaré donro mâwinlymo awyly, kruz onwa sakâjiby. Tarâpa olâ mâtâ. Ipa, kurâem nitondai! Etaungârâ etadâdobryam. Ânguy lâpeba tarâ. **7** Idâwâtaungâ, Pedro domodoram egatuze: “Waunroenlâ ise Galileiararam idâly. Târâ ise âwânwândylymo, mâtendylymo warâ aguehobry aralâ” myguelymo ise eyanmo — kely.

**8** Aituo pekodo modo egasely. Inepa kehoem Jesus eguepybyry etadâdobry nhodokelymo. Âseguâdâdylymo, toenzepa kehoem adapânilymo, tâseaneduo. Xidadâram todopâdylymo ume ânguyram negatubamo tientyby modo, tindatyby modo warâ. Toenzepa lelâlâ ekuâgumo.

### *Jesus Maria Magdala donroram âepanâguehobry*

(Mt 28.9-10; Jo 20.11-18)

**9** [Domingo pealâ, Jesus kurâem itombygueduo, Maria Magdala donro waunroem kuru eni. Iweâpa xirâ modo aidly iraynâ, Jesus mâtâ pekodo odano sete lelâ kadopâ tyânyze myani. **10** Jesus kurâem itondybyem awyly tientuo, idâly eaten-ho modoram Jesus kurâem itondybyem awyly egatuze. Toenzepa myani itynrumo, eogunrumo warâ. **11** Eyanmo saintybyem, Maria Magdala donro aguely:

— Jesus kurâem nitondai! Urâ lelâlâ setai — kely.

Agueduo neinwâmpyramo.

*Jesus azagâ tâinwânniram âepanâguehobypy  
(Lc 24.13-35)*

<sup>12</sup> Ilâpyryem azagâ Jesus einwânni modo idâly eagonro âtâ anaxi. Ânwa oze awylymo ume, Jesus âepanâguely eyanmo. Saguhoem tientobyry arapa tiendyly awylygue myani ânguy nutuba mâkâlâ awyly. <sup>13</sup> Jesus lelâlâ mâkâ awyly tiuntuduomo, Jerusalémram odopâdylymo tagonro modoram, Jesus tientobyry egatuze. Akaemo azagâ aguely neinwâmpyramo lâpplâ.

*Jesus onze tynynonro modoram âepanâguehobypy  
(Mt 28.16-20; Lc 24.36-49; Jo 20.19-23; At 1.6-8)*

<sup>14</sup> Kopae onze lelâ uguondo modo Jesus eynynonro âjigue âwinduadylymo ume, Jesus âepanâguely eyanmo. Aituo aguely:

— “Jesus kurâem nitondai. Xina netai kurâem itondyby” kehondulâ mânwâmpyra lâgâlâ âmaemo. Tâegane kehoem âmaemo, mâindatybymo mânwântomoem — kely.

<sup>15</sup> Adâkebygueduo, agueondly:

— Idâwâtaungâ tâinkâ lelâba Deus itaumbyry idânârâ kurâdoram agueze. <sup>16</sup> Warâ aguewâtaungâ: “Jesus mânwântomo, Jesus einwânniem mawylymo mânehon-homoem batiza âiehowâdaungâ, Deus imakezemo, aunloenlâ eagâ mitomoem. Jesus mânwâmpyra âmaemo watay, Deus eydâ atoram aintaymba ise âmaemo.” Warâ idânârâam aguewâtaunda. <sup>17</sup> Yeinwântaynrim modoram won-honru xuduze urâ, adyesenry modo kehoem anhetomoem. Won-honrugue kurâdo odaypa kadopâ nhâkyze âmaemo. Won-honrugue tâjitanru âdykâ tydasenry agueze âmaemo. <sup>18</sup> Âgâu manwâdylymo, venenu mâenylymo warâ watay, âda mitaymba ise âmaemo. Won-honrugue tâwânuneim modo kua iese âmaemo, imarymogue MÂ’ mânhetuomo — kely Jesus.

*Jesus Deus eydâ atoram âkuhobypy  
(Lc 24.50-53; At 1.9-11)*

<sup>19</sup> Tynynonro modo agâ aguepygueduo, Kywymâry Jesus adaholy Deus eydâ atoam. Deus ahoru eynynâ ekadybyem awyly, eagâ pymâem tâitoem. <sup>20</sup> Jesus Deusram idâpygueduo myani eynynonro modo Deus itaumbyry egatuze idâlymo. Idânârâ âtâ anakâ tâtâhobyrydâ mykâinane aguelymo Jesus wâgâ. Jesuslâ eon-honrumo xuduim; tywâgâ unâ iwâkuru nhegatudaymo, mâkâlâ eon-honrumo xudunri adyesenry modo anhetomoem. Mârâ anhetuomo, kurâ domodo tutuze âkealâ aguelymo awyly.]

Alâ kulâ.  
Marcos

## LUCAS Unâ Koendonro Jesus Cristo Wâgâ Lucas Inweniby

Xirâ livru wâgâ inwenily Lucas nhangahu odaji iemâmy Deus. Awylygue Deus itaumbryrlâ xirâ mâkâ nhegatuyby. Médico myakâwândy mâkâ, gregu, judeu keba.

Xirâ livru wâgâ Jesus Cristo iazehobypy kiuntuly. Kâmakerim ise-em tawyly tiuntuduo, Maria igâtudobyry tutuze kurâ xirâ wâgâ. Poji anaym tâguy kaneru eni modoram "Belémdâ imakerinmo niazeaki" anju kehobypy tutuze kurâ xirâ wâgâ warâ.

Jesus anhetyby, nhenomedâdobypy warâ xirâ wâgâ kiuntuly. Xirâ pape wâgâ tytainze kurâ, Jesus turâ modo nhenomedâdobypy, âdara Deus agâ aguelymo awyly warâ.

Capítulo 15dâ tâgatuze lâpylâ kaneru xuzatyby soenkeyby wâgâ, moeda xuzatyby soenkeyby wâgâ, tâjimery, tunwym sodokerimbyry, eyanlâ odopâdyby wâgâ warâ, Jesus aguehobypy. Xirâ unâ Jesus nhegatuyby modo, Jesus kieinwântuo lelâ Deus iomazely awyly kiuntuhoem, aguely.

Tutuze lâpylâ kurâ, Deus izepa ato adientuo, Zaqueu itywandobyry, inakanhe adâidly imohobypy warâ. Warâ myakâwândy Jesus aguely: "Deus agâpaom ese, emakeze warâ kâewyly" kely.

Jesus iguehobypy wâgâ, igueypyem kurâem itondobyry wâgâ warâ tytainze kurâ, xirâ pape wâgâ.

### *Aguely adaguho*

<sup>1</sup> Pymâ Teófilo, xirâ pape wâgâ âdaise Jesus onro anaym atobypy, anhetyby modo warâ wâgâ mâuntuhoem waunroem kâinwenily mâkeba xirâ. Eagonro modo iweniwânmomy lâpylâ anhetaymby modo wâgâ. <sup>2</sup> Saguhoem Jesus aidyly etaynrimbyry modo agâ âtunâguemâmomy. Egatuhabypy ara pylâ iwâgâ aguelymo, inwenilimo-ro warâ. <sup>3</sup> Urâ lâpylâ, kura kehoem koendâ aitaymby modo ara kâuntuhoem awidyly. Ienanaji, koendâ âyam kâinwenily, koendâ kehoem âurutoem Jesus aitobypy wâgâ, aguehobypy wâgâ warâ, adaguhobypyrlâ, xypyryam. <sup>4</sup> Toenzepa Jesus wâgâ tâzenomedâoze âmâ. Xirâ kâinwenily olâ, âkealâ kuru egary awyly mâuntuhoem.

### *"João Batista iazely ise" kehobypy*

<sup>5</sup> Saguhoem kâinwenily ise, Zacarias, iwydylâ warâ aitomobypy wâgâ. Herodes, judeu domodo eonronru anaym pymâem awyly ume tâlâ myakâwâm uguondo Zacarias keho, iwydylâ Isabel warâ, saguhoem kurâdo eynynâ Deus agâ aguewâni modo ipemugubyry myakâwâm mâkâ. Eagâ Zacarias âsewaniho myakâwâm "Abias Ipemugudo" kelygue tâzekeim. <sup>6</sup> Zacarias, Isabel warâ koendâ mykâinane aidylymo Deus ize ato ara lelâ. Judeu domodoram Deus aguehobypy modo ara lelâ mykâinane aidylymo. Tâwentâzeba tâitomoem âdy inakai aniempyro mykâinane. <sup>7</sup> Tymeguebamo myakâwâm, imezerim keba Isabel awylygue, agaityoem iso, aripiem iwydy warâ awylymogue.

<sup>8-9</sup> Deus ety oday tâwanu aiese myakâwâm Zacarias, âsewaniho oday awylygue. Akaemolâ mykâinane tagonrodo iduakeim âdylâ aieniem, tâwâlâ, tâwâlâ warâ tâwanu xuduupy anhetomoem. Zacarias myakâwâm induakelymo se atuby tyânrângueim Deusram egameyby iaduâniem. <sup>10</sup> Deus ety odaji egawândyly myakâwâm se satuby tyânrângueim modo iaduâns. Ilâ iaduântay mykâinane kuoho kurâ domodo Deus agâ aguely.

<sup>11</sup> Aituo myakâwâm anju kaynâpa âetyby Zacariasdâ âepanâguely. XYDYK warâ myakâwâm, mesa se satuby tyânrângueim iaduânto sahoru eynynâ. <sup>12</sup> Mâkâ tientuo myakâwâm Zacarias toenzepa âseanedly. Ada tâidly nutuba idyly. <sup>13</sup> Aituo myakâwâm anju aguely eyam:

— Tâseanezeba ikâ, Zacarias. Deus amyguely nidatai. Mâenkadyby ara aiese lelâ. Âwydy adamyze lelâ. João kelygue ise mäenzetâdly-ro warâ. <sup>14</sup> Toenzepa ise iazeduo mohomaendyly, kurâdo ohomaenze lâpylâ warâ. <sup>15</sup> Deus xurâem, uguondo tywyneim ise mâkâ. Vinhu enynri keba, toku ikaji ini keba warâ ise mâkâ. Niazepa awyly umelâ ise Deus Ispiritury Koendonro eagâ awyly. <sup>16</sup> Israelita domodo Kywymâry Deus nheinwântoem aienehonze warâ. <sup>17</sup> Kurâ domodo koendâ iese Kywymâry sainto iray. Deus itaumbyry egaturin-em iesemo warâ. Deus Ispiritury myakâwâm Elias eon-honru tuduze, myara ise âmery agâ awyly, tâjimery modo tunwym agâ koendâ itoem aiese. Deus einwântânrybyry modoram, Deus einwânehonze. Warâ ise Israel donro modo koendâ nhedyly, Kywymâry saindyly iray — kely myakâwâm anju Zacariasram.

<sup>18</sup> Aituo myakâwâm Zacarias aguely anjuam:

— Xina nimezewâbyra ise! Agaityoem urâ, aripiem ywydy warâ! — kely.

<sup>19</sup> Aituo myakâwâm anju aguely:

— Gabriel urâ. Kopaelâgâembaba Deus agâ wawyly emaryem. Mâkâlâ âyam ugononi, xirâ unâ iwâkuru auguehoem. <sup>20</sup> Auguely mâyinwâmpyra wâne âmâ, aito odaxi ituo olâ auguehobypy aise. Mâyinwâmpyra matobyry wâgâ âmery iazeho odaxi ise tytaremba mawyly — kely.

<sup>21</sup> Xunâgumo ume toenzepa myakâwâm kurâdo âtâdyguybyem awyly kuoho, Zacarias egasely inwânwânsse. Âjigue aguelymo:

— Iweâpa idyly enra Zacarias se satuby iaduântodâ — kelymo.

<sup>22</sup> Egaseybyem agueze kewâdly wâne eagâmo; tytaremba itybyem lelâ. Tâmaryguelâ egatuze kewâdly târâ adâitobyry. Aituo myakâwâm aguelymo:

— Deus gâlâ awâkânrâ târâ se satuby tyânrângueim iaduântodâ nâepanâgueagui — kelymo.

<sup>23</sup> Deus ety oday tâwanu ewanikeimbyryem myakâwâm Zacarias tâtyram idâly.

<sup>24</sup> Iweâpa nipyralâ myakâwâm iwydy Isabel adamyly. Cinco nunâ ara lelâ myakâwâm âdyam negaseba awyly. <sup>25</sup> Alâ mykâinane tyangahu oday xunâgu:

— Koendonro lelâlâ awâkâ Pymâ Deus urâem! Awylygue iwerâ kâpybazebyra wawyly, tymegue wawylygue; ânguy unâguebyra ise warâ — kely.

### *Deus eydâpa “Jesus iazely ise” kerim âetobyry*

<sup>26</sup> Seis nunâ Isabel adamybyem awyly ume myakâwâm, Deus tâmary anju ingonodyly unâ enese xidadâ imeimbyry Galiléia donro Nazaréram. Gabriel myakâwâm mâkâ Deus emary ezedy. <sup>27</sup> Mariaram myakâwâm Deus itaumbyry nhadyly. Âwynsaundo myakâwâm mâkâ, ânguy nhuniby keba, José agâ ohogünrim kehobypy, pymâ Davi iwerypyry agâ.

<sup>28</sup> Aituo myakâwâm anju Mariaram idâly, aguely:

— Tuomare ikâ, Maria. Kywymâry Deus agâlâ, koendonro âmâem adientoem — kely.

<sup>29</sup> Anju aguely tindatuo, Maria âpaunzedyly âda tâidyl nutuba idyly, âseguâdâdyly. Âdakeze mâkâ aguely tiuntudyze.

— Adaituoka arâ amyguely? — kely.

<sup>30</sup> Aituo anju aguely:

— Tâseanezeba ikâ, Maria — kely.

— Deus induakeyby âmâ, koendâ kehoem nhetoem — kely.

<sup>31</sup> — Adamyze âmâ. Jesus kelygue ise âmery mäenzetâdly. <sup>32</sup> Aunlo kulâ keba ise mâkâ, uguondoem ituo. “Deus ton-honreim imery” ise mâkâ. Pymâem ienehonze Deus. Tydamudo Davi pymâem atobyry ara ise âmery pymâ tâgarein-em awyly — kely.

<sup>33</sup> — Jacó iweompyry modo iwymâryem, enimoem warâ lâpylâ ise. Aunlolâ ise pymâem awyly, typgueim keba — kely\*.

\* <sup>1:33</sup> Israel lâpylâ Jacó ezedy eagonro. Awylygue iweompyry Israelitasgue âzezekeoly.

**34** Aituo Maria anjuram aguely:

— Âdaraka ise awârâ aidyly? Âdykâ mawânkâ uguondo ynanâbyra — kely.

**35** Aituo anju aguely:

— Deus Ispiriturygue ise madamyly. Deus tâgareim Ispiritury onwa âese âmezehoem. Awyligue ise iamudo iazeim “Kywymâry Deus Imery” kelygue ezeku. Deus imery tawylygue ise, Deus ize ato lelâ anhekyly — kely.

**36** — Âpemugu Isabel agâ aityby enanâguegâ. “Nimezewâbyra ise awâkâ” kehobyry mâkâ. Iwerâ olâ aripienlâ tymegue, seis nunâguetogue. **37** Âdy adiendyse tato adyese lelâ Deus — kely.

**38** Aituo Maria aguely:

— Âdy Deus aidyse ato tâwâlâ ise yagâ anhedyly ize tato aralâ — kely Maria. Maria aguepygueduo anju odopâdyly Deus eydâ atoram.

### *Maria, Isabel etyram idâhobyry*

**39** Iweâpa nipyralâ Maria ohondly, xidadâ imeimbyry iwy donroram Judéia yan Yam tâtâhoem, Zacarias, Isabel warâ etyram. **40** Saintybyem, egawândyly. Typemugu Isabel nhedaenkuly. **41** Maria, Isabel nhedaenkudaylâ myakâwâm Isabel ioday iamudo âjítâgûily. Deus Ispiritury Isabel enomery nhuduly, waunroem aitaynrim modo wâgâ aguehoem. **42** Aituo Isabel aguely Mariaram:

— Deus induakeyby âmâ pekodo modo enday, koendâ kehoem nhentoem, iamudo iazenri lâpylâ koendâ kehoem tientoem warâ. **43** Odaypa iazeim iamudo ise ton honreim kuru, ymery takaze kehoem. Tuomare olâ urâ, âmâ Kâmakerim ise ietyram mâtobypy wâgâ. **44** Iedaenkuly tindatuo, iamudo niomazeagui woday, nâtâgûiagui warâ. **45** Tuomareim lelâlâ âmâ, Deus koendonro âmâem anhetobypy wâgâ; warâ kehobyry tâinwânse mawylygue — kely Isabel Mariaram.

### *Maria, Deus koendonroem awyly wâgâ tygâkyem aguehobyry*

**46** Aituo Maria aguely:

— Ywymâry Deus koendonro awyly wâgâ tunâgue urâ yangahu oday.

**47** Iemakerim mâkâ. Toenzepa womaru.

**48** Âdy mâkeba urâ, ienanânehomba olâ keankâ.

Iwerâma ise idânârâ aguelymo:

“Koendonroem Maria awyly Deus xurâem,  
Deus aguehobyry ara aitobyry wâgâ” kelymo ise.

**49** Ton-honreim lelâlâ awâkâ Deus; koendâ kehoem iedyly.

Koendonro lelâ aieni awâkâ.

**50** Koendonro tawyly tânehonze idânârâ âwankuem tyetânr modoram,  
adaguhaboryrlâ, xypyryam kehoem warâ.

**51** Toenzepa ton-honreim awâkâ.

Tâwâlâ kulâ tywâgâ koendonroem tawyly aguewâni modo tainze Deus.

**52** Ton-honruneim modo ton-honremba tyese,  
ton-honrenry eon-honru tuduze warâ.

**53** Âdy pebaom modoram âdy koendonro modo tuduze Deus.

Âdypeom modo olâ âdy peba tyese.

**54** Xina nâzemakeo.

Israelita domodo agâ koendonroem tawyly adâkehobyry nenanânehomba Deus.

**55** Iweâpa myakâwândy aguely tako Abraão agâ:

“Koendâ ise urâ agâ, âweom agâ warâ” kewândymy.

Adâkehobyry anhedyly

— kely Maria.

<sup>56</sup> Azagâ tokalâ warâ nunâ lelâ Maria, Isabel agâ awyly. Ilâpyryem tâtyram odopâdyly.

*Zacarias, Isabel warâ imery iazehobyry*

<sup>57</sup> Alâ Isabel âjihuadâdo odaji idyly. Uguondo imeimbyry iazely. <sup>58</sup> Ety iwaguepaom modo, ipemugudo warâ imery iazehobyry egary indadylymo. Awylygue, Deus, Isabel agâ koendonroem kuru awyly nhutulymo. Idânârâ nhomaendylymo eagâ.

<sup>59</sup> Iamudo iazehobyry tokalâ semana ipygueduo, âtybe myakâwâm ezedy xuduho, ilery ety iopiry satâho warâ. Mâkâ uguondo imeimbyry ilery ety nhatâlymo, judeuem awyly xutuhoem. Tonlo modo wâne Zacariasgue tienzetâdyze awylymo, nhunwym ezedyguelâ.

<sup>60</sup> Aituo iamudo ise aguely:

— “João” ise ezedy — kely.

<sup>61</sup> Aituo aguelymo:

— Adaituo? Awârâgue tâzekeingue typemuguneba âmaemo — kelymo.

<sup>62</sup> Isabel, “Zacarias” kelygue tienzetâdyzeba awyly tiuntuduomo, tâmarygue nhunwym nhapâiguelymo, âdakelygue tienzetâdyze awyly tiuntuhomoem. <sup>63</sup> Tâmaryguelâ Zacarias tinweniho nhekadyly. Nhudupymo wâgâ inwenily: “ ‘João’ ise iamudo ezedy” kely inwenily. Âze inweniby tientuomo, idânârâ eydonro modo âseguâdâdylymo. <sup>64</sup> Awârâ ume kehoem myakâwâm Zacarias âjitaon-ondyly. Deus koendonroem awyly wâgâ aguely.

<sup>65</sup> Aituo toenzepa tonlo modo âseguâdâdylymo. Târâ tâtyuneim modo tâinkâ lelâba, iwy odakâ Judéia eynynonro awârâ modoem, mâtâ aitobyry lelâ nhegatulymo. <sup>66</sup> Idânârâ egary idataynrimbyry modo ara awârâ wâgâ xunâgumo âpaunzedlymo, aguelymo lâpylâ warâ:

— Uguondo aunlo kulâ mâkeba ise awâkâ. Âdy wânkâ ise anhekyly? — kelymo.

Kywymâry Deus olâ mykâinane tâenselâ-ro warâ ton-honrugue.

*Zacarias âdydo imeom aidyly wâgâ aguehobyry*

<sup>67</sup> Aituo myakâwâm Deus Ispiritury, Zacarias enomery nhuduly. Deus aguehobyry nhegatuly:

<sup>68</sup> — Koendonro mawyly wâgâ xina aguely, pymâ Deus!

Xina israelita domodo xurâem koendonro âmâ.

Kâmaynodâpa xina etyze mâtâ.

Âynynonro modo memake.

<sup>69</sup> Xina emakerim ton-honreim migonodâ, pymâ Davi iweryypyry.

<sup>70</sup> Âunâry egatuwâni modo agâlâ myakâwâm amyguely:

“Igonose urâ Davi iweryypyry, Messias” myguely.

Amyguehobyry aralâ amidly.

<sup>71</sup> “Imakezemo urâ âduerymo amaymba.

Âizepanromo amaymba warâ” myguely.

<sup>72</sup> “Âtyendâmolâ ise urâ, âweonmo lâpylâ warâ.

Agâmo auguehobyry kâenanânehonwâbyra ise urâ”

warâ myakâwândy xina idamudoram amyguely.

<sup>73-74</sup> Saguhoenlâ myakâwândy xina idamu Abraãooram amyguely:

“Âweompyry modo iduery amaymba emakeze urâ,

tyanepa auguehobyry anhetomoem.

Auguehobyry agânehepyra witaymba urâ” myguely myakâwâm.

<sup>75</sup> Warâ myakâwândy amyguely, aunloenlâ, xina israelita domodo âmâenlâ itoem,

ize mato lelâ xina anhetoem warâ

— kely Zacarias, Deusram.

<sup>76</sup> Ilâpygueduo, Zacarias tymeryram aguely:

— Ymery, Deus Ton-honreim xunâry aguenri ise âmâ.  
 Pymâ tâgareim iray todohondlyl wâne saintodâ,  
 myara ise Kywymâry saindylly iray kurâ domodo mâunrudly.  
<sup>77</sup> Warâ ise israelita domodoram amyguely:  
 “Deus kâmakeze.  
 Inakanhe aguitobyry Deus xygakeze” myguely ise, ymery.  
<sup>78</sup> Toenzepa awâkâ Deus kywynedyly.  
 Aunlolâ kagâ koendâ awyly.  
 Kâmakerim igonose.  
 Deusdâpalâ ise Kâmakerim âewyly.  
 Kyajimanânibe awylygue wâne kytâho kiendylly myara ise mâkâ wâgâ Deusram tâdâtâly  
 kiuntuly.  
<sup>79</sup> Deus wâgâ xutuen-honze kyam.  
 Iwerâma iamu odano ara kulâ kurâ-ro.  
 Tâjiguely amaym kulâ kurâ.  
 Kâmakerim olâ ise ânwa iajimanâni ara.  
 Deus agâ koendâ lelâ kyeze, tyanepa eagâ kitoem – kely Zacarias tymeryam.  
<sup>80</sup> Zacarias imery ago idyly, uguondoem idyly. Deus wâgâ nhutuly, iwâgâ aguely warâ  
 Deus Ispiriturybe xuturim awylygue. Âji âdy peba atoram idâly wao, Deus itaumbypyry  
 israelita modoram tiengatuly iraynâ.

## 2

### *Jesus Cristo iazehobypy* (Mt 1.18-25)

<sup>1</sup> João iazepygueduo, iweâpa nipyralâ myakâwâm pymâ kuru Roma donro Augusto  
 aguely:

— Urâ Augusto, pymâ kuru. Xirâ ytaumbypyry kâingonodyly idânârâ kurâdo kâentaynlly  
 modoram: “Idânârâ âmaemo âdamudomo iazehobypyrdâlâ izedymo iweniehonwâdaungâ.  
 Kurâdo kampâguely mawânrâ” — kely.

<sup>2</sup> Saguhoem kuru kurâ domodo sapâguelylâ myakâwâm Augusto pymâem awyly ume.  
 Ilâ ume Cirênio pymâ Siriadâ. <sup>3</sup> Aituo idânârâ kurâ domodo idâwâdylymo tydamudo  
 iazehobypyryanlâ, tâzedy iweniehonze.

<sup>4</sup> Aituo myakâwâm xidadâ Nazaré, Galiléia eynynonro dombyryem José idâly  
 Belémram, Judéia eynynonro anaxi. Pymâ Davi iwerypyry myakâwâm mâkâ. Awylygue  
 tâzedy iweniehonze idâly Belémram, Davi iazehobypyryanlâ. <sup>5</sup> Tywydy agâlâ myakâwâm  
 José Belémram idâly. Idâhu imeâgâemba myakâwâm Maria. <sup>6</sup> Belémdâ ataymolâ  
 myakâwâm iamudo egaseho saindylly. <sup>7</sup> Toenzepa myakâwâm târâ kurâdo awyly. Âtâ  
 âxidâdomo peba myakâwâm. Awylygue myakâwâm tapirâ xykyhodâlâ âxidâdylymo. Târâ  
 Maria imebyary uguondo imeimbyry iazely. Tymery ikowendânybyryem myakâwâm  
 Maria nheguetunâdyly tapirâ xuato odaji.

### *Kaneru etaynrim modoram anju, “Jesus niazeaki” kehobyry*

<sup>8</sup> Kopae myakâwâm kaneru etaynrim modo poji anaym awylymo, Belémdâ  
 iwaguepalâ, tâguy kaneru ese. <sup>9</sup> Aituo anju âepanâguely eyanmo, Deus tâmaryem  
 ingonotyby. Tohozely kehoem myakâwâm, Deus eydâpa âewyly awylygue. Târâ kaneru  
 eni mododâ MAH warâ kehoem myakâwâm peto odano ara kehoem iajimadyly. Aituo  
 toenzepa âseanedlymo.

<sup>10</sup> Anju olâ aguely:

— Tâseanezeba itaungâ! Unâ iwâkuru egatuze xirâ âyanmo kâewyly. Idânârâ xirâ unâ  
 idataynrim modo toenzepa iomazeze — kely myakâwâm. <sup>11</sup> — Imakerinmo niazeaki

iwerâ, târâ Davi iazehobyrydâ. Deus Ingonyby mâtâ, Messias, âwymârymoem. <sup>12</sup> Âkealâ augueho mâtuhomoem, tapirâ xuato oday ise uguondo imeimbyry ituwymbyem eguetunâdybyem warâ mâtendylymo – kely myakâwâm.

<sup>13</sup> Inepa lâpylâ toenzepa anju modo âepanâguewâdyly. Igâtudylymo myakâwâm:

<sup>14</sup> — Târâ eydâ atodâ Deus nâzehogueo! Xirâ onro anano modo nadahuliba nidâmo, turâem itoem Deus induakewâdyby modo! – kely myakâwâm, igâkymo.

<sup>15</sup> Tygâtubygueduomo myakâwâm anju domodo odopâdylymo lelâ Deusranlâ. Odopâbygueduomo myakâwâm kaneru etaynrim modo âjigue aguelymo:

— Inoro Belémram, âdaityby kyzeta. Kywymâry aguehobyry kudutura – kelymo.

<sup>16</sup> Inepa kehoem myakâwâm idâlymo. Maria, José, warâ nhedylymo. Tapirâ xuato oday iamudo nhedylymo eguetunâdybyem, ituwymbyem warâ. <sup>17</sup> Aituo anju domodo iamudo wâgâ aguehobyry nhegatulymo. <sup>18</sup> Kaneru etaynrim modo aguehobyry idanipyry modo toenzepa kehoem myakâwâm âsewânilimo. <sup>19</sup> Maria tyangahu oday xunâgu mâtâ nhegatuybymo wâgâ. Awârâ modo tyangahu oday nhekanâdyly. <sup>20</sup> Aituo myakâwâm iamudo enipyryem uguondo modo, poji anaxi odopâdylymo. Deus koendonro awyly wâgâ igâkymo Deus wâgâ iomarumo.

— Koendonro lelâlâ Deus, koendonro modo kientoem, kindatoem warâ anhetobyry wâgâ – kely, igâkymo.

Anju domodo aguehobyry aralâ myakâwâm nhedylymo.

### *Iamudo nhezetâdomobyry*

<sup>21</sup> Iamudo iazehobyry tokalâ semana itybyem awyly ume, âtybe myakâwâm, ezedy xuduho, judeu domodo aito ara. Ilery ety nhatâlymo lâpylâ myakâwâm, israelitalâ awyly xutuhoem, Deus induakeyby ewy. “Jesus” kelygue nhezetâdylymo. Maria nadamypalâ myakâwâm anju aguely: “‘Jesus’ kelygue ise mâtzenetâdylymo” kely.

### *Maria, José warâ iamudo nhatomobyry Deus ety odaji*

<sup>22</sup> Ilâpyguedu, Maria inwânwândyly myakâwâm Deus ety odaji tâtâho saindyly, pekodo ekuize israelita Deus aguehobyry ara aito. Aituo myakâwâm Maria, José warâ iamudo Jerusalémram nhadylymo, Deusram enehonze. Kurâdo eynynâ Deus agâ agueinram nhenehonlymo, iamudo Deus xurâ awyly xutuhoem. <sup>23</sup> Saguhoem Moisés inweniby mawânrâ myakâwândymy: “Saguho iamudo iazeypy watay, Deus xurâem lelâ” kewândymy. <sup>24</sup> Jesus ise idâly myakâwâm azagâ tawâguneim modogue tâmase, Deusram tiengamehoem. Deus ety oday tâwaneinram nhuduly, mâtâ nhâhoem, nhaduântoem warâ. Moisés inweniby wâgâ mawânrâ iwenibyem: “Pekodo âdy pebaom iamudo iazeypy ise israelita watay, azagâ pâmuko atay warâ nhuduly” kely.

<sup>25</sup> Mâtâ ume uguondo Simeão tâtymem myakâwâm Jerusalémdâ. Judeu domodo ezewenry eynynonro mykâinane. Deus ize ato ara lelâ mykâinane aidyly. Alâ mykâinane typemugudo emakerim Deus ingonodyly nhenuendyly. Eagâlâ mykâinane Deus Ispiritury. <sup>26</sup> “Âiguely iraynâ ese âmâ Deus Ingonyby” Deus Ispiritury kehobyrylâ Simeãooram.

<sup>27</sup> Jesus Deus ety odaji sato emedyly ume Deus Ispiritury aguely myakâwâm Simeãooram:  
— Idâ Deus ety odaji – kely.

Aituo myakâwâm idâly. Maria, José warâ iamudo Jesus agâ saindylymo myakâwâm; Deus itaumbypy iweniby agueho ara aidylymo. <sup>28</sup> Aituo Simeãooram âzeholymo. Simeão iamudo nhanâdyly. Deus koendonroem awyly wâgâ aguely:

<sup>29</sup> — Iweâma tuomare urâ, Pymâ Deus.

“Igonose urâ” myguehobyry migonodâma.

Alâ ise. Tâwâlâ ise iweâma yiguel.

<sup>30</sup> Ienugue kehoenma setai, merâ kurâ domodo emakerim âydâpa âetyby.

<sup>31</sup> Idânârâ kurâdo emakerin-em migonodâ.

<sup>32</sup> Judeu keba modoram xutuen-honze âdara Deus ize awyly,

iajinu wâne kydadakobâdo nhesagonly myara.  
 Mâkâ wâgâ, judeu domodo koendâ aguehonze, kurâ domodo mâinduakebyby  
 — kely myakâwâm Simeão Deusram.

<sup>33</sup> Simeão iamudo wâgâ aguely tindatuo myakâwâm José, Maria warâ âsewânlymo.  
<sup>34</sup> Simeão agueondyly myakâwâm eyanmo:  
 — Deus agâmolâ ise, nhenimoem — kely.  
 Aituo myakâwâm Jesus isenra aguely:

— Deus induakebyby wâne merâ iamudo, kypemugudo judeu domodo ewy âmery neinwâmpyramo olâ ise. Awylygue ise Deus agâpa âieholymo. Igueduomo âji tâdâsenagazedoram ise idâlymo. Tâlâ pylâ olâ ise âmery einwânni modo. Deus eydâpa nâiehobamo ise-ro warâ. Igueduomo eydâ atoram ise idâlymo. Âmerylâ ise kurâ domodoram âdara âsemaguelymo wâgâ aguenri. Toenzepa olâ ise izepanro modo. <sup>35</sup> Deus âdara kydawly xutuen-honze, Jesus eynynâ, eynynâba warâ kydawly. Âsenagazeze âmâ, âmery aietaynlygue. Espadague ihoguyby ara ise âmâ — kely Simeão, Jesus isenra.

<sup>36</sup> Ilâpyryem myakâwâm aripi Ana saindyly, Deus itaumbyry agueim, Maria, José warâ iamudo agâ, Deus ety oday atomoram. Fanuel exiry myakâwâm mâkâ, judeu domodo ewy myakâwâm Aser iweompyry. Âwynsaundoem tatay myakâwâm ohogüinly. Sete anu ohogüimbyem awyly ume olâ myakâwâm iso iguely. <sup>37</sup> Iweâpa myakâwâm pypâbyryem awyly. Oitenta e quatro anupe myakâwâm ilâem. Alâ mykâinane idâly Deus ety odaji. Kopae, peto oday alelâ mykâinane Deus wâgâ aguely. Nâwinduapryra tâise mykâinane, Deus agâ adâkehoem. <sup>38</sup> Simeão, Maria, José warâ agâ xunâgu ume myakâwâm mâkâ saindyly, aguely:

— Koendonrolâ enra Deus! — kely.  
 Deus Jerusalém donro modo nhemakely enuenni lâpylâ myakâwâm Ana. Kurâ domodoram aguely lâpylâ Maria imery wâgâ.

### *Maria, José warâ Jesus agâ Nazaréram odopâdomobyry*

<sup>39</sup> Moisés ezewenry ara aitybyem myakâwâm José, Maria warâ iamudo agâ odopâdylymo Galiléia yan-yam, tâtymoram Nazaré anaxi.

<sup>40</sup> Iamudo ago idyly myakâwâm. Eon-howanzedyly, enomezezedly warâ. Koendâ lelâ myakâwâm Deus nhedyly.

### *Jesus doze anupe atay, Páscoa etyguedoram idâhobyry todo modo agâ*

<sup>41</sup> Aunlolâ myakâwâm José, Maria warâ Jerusalémram idâlymo Páscoa etyguedoram, Egitodâba tydamudo âsemaguehobyry etyguedoram. <sup>42</sup> Jesus doze anupe awyly ume Páscoa etyguedoram idâlymo myakâwâm Jerusalémram, ezewenrymolâ awylygue.

<sup>43</sup> Âtybygueduo myakâwâm José, Maria warâ odopâdylymo tâtyam. Jesus Jerusalémdâlâ âxiânlly nepyramo myakâwâm. <sup>44</sup> Odopâdaynrim modo duaylâ enanajimo. Iguandyly ara lelâ ânwa oze idâlymo. Iguandyly ume myakâwâm nhuinlymo, typemugudo duay, tataen-ho modo agâ warâ. <sup>45</sup> Nepyramo olâ. Aituo myakâwâm emetobyry aralâ xuize odopâdylymo Jerusalémram. Tuguanse myakâwâm, nhuinlymo. <sup>46</sup> Deus ety oday myakâwâm nhedylymo, Moisés inweniby wâgâ aguewâni modo duay ekadybyem. Eagâmo xunâgu, aguelymo, indadyly, nhapâiguely idyly ume. <sup>47</sup> Toenzepa myakâwâm târâ idataynrim modo âsewânly.

— Aekuru wânkâ merâ iamudo enomegu! Tutuze lelâlâ merâ koendâ kehoem kunâry in-hoguly! — kelymo.

<sup>48</sup> Maria, José warâ âsewânlymo lâpylâ, tientuo, tindatuo warâ. Ise aguely myakâwâm eyam:

— Xina arâ akâiedâ, Mery. Urâ, unwâm warâ âdykâ mawyly nutuba tawylygue, toenzepa xina âwize nâsenagazêdâ — kely Maria.

<sup>49</sup> Aituo myakâwâm Jesus aguely eyanmo:

— Uipa midysemo. Pabai ety odaylâ wawyly mutudyzemo – kely.

<sup>50</sup> Arâ Jesus agueduo nutubamo myakâwâm âdakeze aguely awyly. Nutubamo myakâwâm âdy aiese kuru Jesus âewyly awyly.

<sup>51</sup> Aituo myakâwâm Jesus odopâdyly eagâmo Nazaréram. Aguelymo nakabyra. Ise olâ myakâwâm idânârâ aitaymby modo nenanânehomba.

<sup>52</sup> Jesus ago idyly, enomezely alelâ. Toenzepa kurâ domodo, Deus warâ ize atoem awyly.

### 3

*João kurâ domodoram Jesus âewyly wâgâ aguehobyry*

*(Mt 3:1-12; Mc 1:1-8; Jo 1:19-28)*

<sup>1</sup> João, Deus itaumbyry nhegatuly adaguly ume, quinze anos myani Tibério, Romadâ pymâem awyly. Pôncio Pilatos myani Judéia donro modo iwymâry. Galiléia donro modo iwymâry myani Herodes. Iwaigoru Filipe myani Ituréia eynynâ, Traconitesdâ warâ pymâem awyly. Lisâniás myani Abilenedâ pymâ. <sup>2</sup> Anás, Caifás warâ myani kurâdo eynynâ Deus agâ aguewâni modo iwymâry kuru. Âji âdy peba atodâ myani Zacarias imery, João. Târâ awyly ume myani Deus aguely eyam, tytaumbyry egatuze kurâ domodoram idâhoem. <sup>3</sup> Aituo myani João Deus itaumbyry egatuze idâly. Idânârâ paru Jordão eynynâ mykâinane adakobâdyly, Deus itaumbyry egatuze. Warâ myani aguezesedyly:

— Âjityendaungâ inakanhe amitomobyry wâgâ. Deus izepa ato aiedyly imowâdaungâ. Deus einwântaungâ, inakanhe amitomobyry nhygakehoem. Parugue batiza âiehowâdaungâ, inakanhe mawylymo imoimbyryem mawylymo mâenehon-homoem — kely mykâinane.

<sup>4</sup> Saguhoem Deus itaumbyry egatuim Isaías aguehobyry ara awârâ aidyly:  
“Messias wâgâ agueim târâ âji âdy peba atodâ ise aguely.

Adâkely idase âetaymby modoram:

‘Inepa ise Deus Ingonytyby saindyly.

Izepa ato aiedyly imowâdaungâ.

On-hondbyyem lelâ itaungâ, aguely mâindatomoem.

Pymâ ton-honreim kâty anaxi âewyly kiuntuduo wâne,

kâty inatary tuonse, tuonkeze warâ kurâ,

myara on-hondbyyem lelâ itaungâ saindyly iray.

<sup>5</sup> Idânârâ koendâpanro modo kua iedyly.

Tâttaguneim modo mâentamuhomo ara;

tywyguneim modo, mâinwyguehomo ara,

ânwa tâkâineim, mâenkâinuguehomo ara,

ânwa tâttagueim modo, tywyguneim modo warâ âzekiba lelâ mânhetomo ara warâ,

Arâ lâpylâ ise inakai modo mâinmolymo, Deus Ingonytyby iray.

<sup>6</sup> Idânârâ kurâ domodo ese âdara Deus kâmakely awyly’ kely ise”  
kewândymy Isaías.

João Batista myani Kywymâry saindyly egatuim. <sup>7</sup> João, Deus itaumbyry nhegatudo, toenzepa kurâdo idâly eyam:

— Batiza tyedyse xina — kelymo.

Tyam idâwâni modoram myani João aguely:

— Âgâpoji âduguely ume âsemagueze kewâni ara kulâ âmaemo! Warâ wâne amygue-lymo: “João batiza kyetuo ise kydâsemaguely. Deus kânagazedaymba ise” myguelymo.

<sup>8</sup> “Deus eynynonro urâ” myguelymo wâne, Deus eynynonro keba olâ âmaemo. Deus izepa

ato amânhetomobyry wâgâ tâjityenze mawylymo enehorim aietaungâ, inakanhe amidylymo imoimbyryem mawylymo mânehon-homoem warâ. “Deus kânagazenehonwâbyra ise, Abraão iweonma kurâ” tâkezeba itaungâ. Abraão iweryem tadawyly mâkeba mâtâ kuru. Âdy mâkeba awârâ! Auguely xirâ âyanmo. Ton-honre Deus, xirâ tuhu modo Abraão iweryem ienehonze.<sup>9</sup> Nady koendâ ewisedânry pygue satâly. Iwindy âzesagueoly. Peto onwanji adameoly alelâ aieholo. Nady koendâ ewisedânry ara kulâ âmaemo. Deus izepa ato mânmpa âmaemo watay, inepa ise Deus inagazedylymo – kely myani João.

<sup>10</sup> Aituo myani kurâdo aguely:

– Âdaraka Deus xina aidyse awyly? – kelymo.

<sup>11</sup> João in-hoguly:

– Deus tainwânse lelâlâ mawylymo enehonwâdaungâ. Itymo owogonromo azagâpe âmaemo watay, ipaonra tokalâ âunduwâtaungâ. Typynigue mataymo, epajigâdaungâ ipanro agâ – kely.

<sup>12</sup> Aituo myani Romadâ pymâem dinheru impostu ebyry emakewâni modo ewy saindyly. João batiza tyedysemo, Deus xurâem tawyly tienehon-homoem. Aituo João nhapâiguelymo myani:

– Konomedâni, âdara kuruka ise xina aidyly, Deus tainwânse tawyly tienehon-hoem?

– kelymo.

<sup>13</sup> Aituo João in-hoguly:

– Pymâ aguehobryy ara lelâ dinheru emakewâdaungâ. Âunârymo wâgâ kulâ imâem nhuduomoem adâkezeba itaungâ – kely.

<sup>14</sup> Sodadu domodo ewyram lâpylâ myani adapâigueoly:

– Xina-ro? Âdaraka ise xina aidyly, inakanhe adâidly imoimbyryem tawyly, Deus einwânniem tawyly warâ tienehon-hoem? – kelymo.

Aituo myani João in-hoguly:

– Ânguy idinheruru kâzemakewâdaundâ, tutoguyze kehoem. Ânguy âdanipyra kulâ âdygue kâzewentâdaundâ. Tuomare lelâ itaungâ ipywadomogue – kely.

<sup>15</sup> Toenzepa myani kurâdo inwauntunu, koendonro modo lelâ aini awyly tiunturomo. Aituo âjigue aguelymo:

– Messias kinwânwânyylâ keanra awâkâ João, Deus Ingonytyby! – kelymo.

<sup>16</sup> Aituo myani idânârâ eyanmo João aguely:

– Âese eagonro Deus wâgâ aguenri. Ton-honreim ise mâkâ, iemyenro keba. Mâkâ ise yakadâ kuru ton-honreim. Ihuru kâingokehoem, ihuru etary ekâjiguerin-em witoenlâ nudupa lâgâlâ. Urâ parugue batiza âenimo, Deus izepa ato amânhetomobyry wâgâ tâjityenze mawylymo mânehon-homoem, inakanhe amidylymo imoimbyryem mawylymo mânehon-homoem warâ. Mâkâ âeni ise Deus Ispiritury xudunri, eynynâ mawylymo xutuhoem. Inakanhe amitomobyry xygakeze, peto wâne saxium tyaduânse âpa ezay myara\*. <sup>17</sup> Trigu ekaunâni wâne ewy wâgâpa ewily tyekygueze myara ini mâkâ. Tynynonro modo iduakewâze ejidy tâkehobryanlâ ise nhekanâdyly, trigu etary kehobryy odajilâ ekanâdyly myara. Tynynâbaom modo olâ typygueba kehoem enagazeze, peto âdaunloenlâ nhâtâny onwanji ise nhamely – kely João.

<sup>18</sup> Arâ adâkely umelâ myani, João, Deus itaumbryy nhegatuly kurâdoram. Mârâgue lelâba nhurudylymo. Ton-honre kehoem eyanmo aguely. <sup>19</sup> Pymâ Herodes, Herodias agâ ohogüimbyem. Herodes iwaigoru iwydylâ myani mâkâ. Aituo João aguely Herodesram:

– Koendâ inkâba âwaigoru iwydylâ agâ mohogünly – kely pymânrâ.

\* <sup>3:16</sup> Ilâ ume tâwaneinhe sanâtyby modo myakâwâm adakobâni modo ihuru etary ekâjiguerim, etyim, ihuru igokeim warâ.

Idânârâ inakanhe aitobyry modo wâgâ lâpylâ warâ aguely. <sup>20</sup> Herodes olâ João aguely neinwâmpyra. Nhawânehonly lelâ, kadeia odaxi nhetadânehonly warâ.

### *João Jesus batiza nhetobyry*

(Mt 3.13-17; Mc 1.9-11)

<sup>21</sup> Tâzetadâoly iraynâ, João toenzepa kurâ domodo batiza tyeso, Deus eynynonroem tawyly nhenehon-homoem. Alâpylâ Jesus batiza âieholo Joãoram, Deus eynynonroem tawyly tienehon-hoem. Paikayba itybyem, Jesus aguely myani Deus agâ. Aituo kau âzenahunguely. <sup>22</sup> Papaem myani Deus Ispiritury xytâguyl nhonwa. Aituo myani kau odaypa Deus itanru indadyly lâpylâ.

— Ymery âmâ, toenzepa kâinwyneguyl; toenzepa womazeâni âmâ — kely Deus.

### *Jesus idamudo*

(Mt 1.1-17)

<sup>23</sup> Batiza tyepygueduolâ myani Jesus Deus xunâry egatuly nhaguly. Trinta anu awârâempe myani. Judeu domodo xurâem, José imery mâkâ. Eli imery, José. <sup>24</sup> Matate imery, Eli. Levi imery, Matate. Melqui imery, Levi. Janai imery, Melqui. José imery, Janai. <sup>25</sup> Matatias imery, José. Amós imery, Matatias. Naum imery, Amós. Esli imery, Naum. Nagai imery, Esli. <sup>26</sup> Maate imery, Nagai. Matatias imery, Maate. Semei imery, Matatias. José imery, Semei. Jodá imery, José. <sup>27</sup> Joanâ imery, Jodá. Resa imery, Joanâ. Zorobabel imery, Resa. Salatiel imery, Zorobabel. Neri imery, Salatiel. <sup>28</sup> Melqui imery, Neri. Adi imery, Melqui. Cosâ imery, Adi. Elmadâ imery, Cosâ. Er imery, Elmadâ. <sup>29</sup> Josué imery, Er. Eliézer imery, Josué. Jorim imery, Eliézer. Matate imery, Jorim. Levi imery, Matate. <sup>30</sup> Simeão imery, Levi. Judá imery, Simeão. José imery, Judá. Jonâ imery, José. Eliaquim imery, Jonâ. <sup>31</sup> Meleá imery, Eliaquim. Mená imery, Meleá. Matatá imery, Mená. Natâ imery, Matatá. Davi imery, Natâ. <sup>32</sup> Jessé imery, Davi. Obede imery, Jessé. Boaz imery, Obede. Salá imery, Boaz. Nasom imery, Salá. <sup>33</sup> Aminadabe imery, Nasom. Admim imery, Aminadabe. Arni imery, Admim. Esrom imery, Arni. Peres imery, Esrom. Judá imery, Peres. <sup>34</sup> Jacó imery, Judá. Isaque imery, Jacó. Abraão imery, Isaque. Tera imery, Abraão. Naor imery, Tera. <sup>35</sup> Serugue imery, Naor. Reú imery, Serugue. Pelegue imery, Reú. Éber imery, Pelegue. Salá imery, Éber. <sup>36</sup> Cainâ imery, Salá. Arpaxade imery, Cainâ. Sem imery, Arpaxade. Noé imery, Sem. Lameque imery, Noé. <sup>37</sup> Matusalém imery, Lameque. Enoque imery, Matusalém. Jaredé imery, Enoque. Maalalel imery myakâwândy Jaredé. Cainâ imery, Maalalel. <sup>38</sup> Enos imery, Cainâ. Sete imery, Enos. Adão imery, Sete. Deus nhygatyby myakâwândy Adão.

## 4

### *Deus ize ato araba Jesus aitoem, Satanás aiese kehobyry*

(Mt 4.1-11; Mc 1.12-13)

<sup>1</sup> Deus xurâem tawyly tienehon-hoem Joãoram batiza âieholoybyem myani Jesus paru Jordãoodâpa âxiguely. Deus Ispiritury agâ myani. Aituo Deus Ispirituryam adaholy âdy peba atoram. <sup>2</sup> Quarenta iguandyly, quarenta emedyly warâ myani Jesus târâ awyly. Târâ tawyly ara, nâwinduapyra. Alâ myani ewindupadyly. Târâ atay Deus iduery Satanás âepanâguely. Toenzepa wâne Jesus enokuze kely, Deus aguehobyry nhakadoem. <sup>3</sup> Aituo Satanás eyam aguely:

— “Deus imery urâ” mygueansema. Âkealâ kuru amyguely-ro watay, awârâ tuhu pãoem iekâ pylâ — kely.

<sup>4</sup> Aituo Jesus aguely:

— Amyguehobyry agânhetaymba ise urâ. “Pão kiendawynlygue lelâ inkâba kyiguepa kydawyly” kely iwenibybe Deus itaumbypy awo wâgâ — kely Jesus.

<sup>5</sup> Ilâpyryem iwy onwa adaholy Satanásram. Idânârâ kehoem onro anano modo nhenehonly. <sup>6</sup> Aituo myani aguely:

— Idânârâ awârâ mâentaynl modo iwymâryem âese urâ. Tâinkâ lelâba ise pymâem mawyly. Koendoro modo idânârâ âmâem xuduwâse urâ. Idânârâ awârâ mâentaynl modo sodoma urâ. Ânguylâ pymâem kânhedyse urâ-ro watay, adyese urâ. <sup>7</sup> Âmâenlâ ise idânârâ awârâ modo, ienado âzeguhoam midyly, yrentoen-ro watay — kely.

<sup>8</sup> Jesus aguely:

— Inado âzeguhoam witaymba ise urâ! Warâ Deus itaumbry aguely:  
“Kywymâry Deus enado lelâ âzeguhoam itaungâ.

Aguehobyry ara lelâ aitaungâ”  
kely iwenibyem — kely myani Jesus.

<sup>9</sup> Ilâpygueduo myani Satanás, Jesus nhadyly Jerusalémram. Deus ety nhangakuedaji sanipyryem aguely:

— “Deus imery urâ” mygueansema. Âkealâ kuru amyguely-ro watay, tarâpa onro onwa adamegâ. <sup>10</sup> Mâdyâwâpyra ise âmâ. Warâ mawânrâ iwenibyem Deus itaumbry awo wâgâ:

“Deus nhese lelâ.

Anju domodo igonose awâniem.

<sup>11</sup> Âihugueduo, awâse lelâ tâmarygue,

âda mipyra mitoem, âhuru tuhu onwa nâdyâpa itoem warâ”  
kely iwenibybe mawânrâ — kely myani Satanás.

<sup>12</sup> Aituo myani Jesus eyam aguely:

— Onro onwa kadamewâbyra ise urâ. Warâ lâpylâ iwenibyem awyly Deus itaumbry awo wâgâ:

“Deus imakelymo mâentomoem kulâ, kâmayno akâiedaundâ.

Amidlylomo-ro watay, mâinwâmpyra mawylymo kulâ ise mânehonlymo”  
warâ lâpylâ iwenibyem awyly — kely Jesus Satanásram.

<sup>13</sup> Warâ myani Satanás aguely, Jesus Deus aguehobyry nhakadoem wâne. Satanás aguehobyry ara anipyra olâ myani Jesus. Aituo myani Satanás, Jesus nhodokely. Âdara kuru Jesus Deus aguehobyry nhakadoem adiendyly xutuze wao.

### *Jesus Galiléia eynynâ tâwanu nhaguhobyry*

(Mt 4.12-17; Mc 1.14-15)

<sup>14</sup> Jesus odopâdyly myani Galiléia yan-yam. Eagâlâ myani Deus Ispiritury. Idânârâ mâtârâ âji anakâ myani Jesus egary indadylymo. <sup>15</sup> Deus wâgâ mykâinane âzenomedâolymo, âtâ judeu domodo âtâdyguyho odakâ. Koendâ lelâ myani Jesus wâgâ aguelymo:

— Idataungâ. Ânguy awâkâ ara koendâ konomedâni lâpeba! — kelymo.

### *Nazaré donro modo Jesus neinwâmpyra atomobyry*

(Mt 13.53-58; Mc 6.1-6)

<sup>16</sup> Târâpa Jesus âxiguely. Tânamadobyry Nazaréram idâly. Tâzekobyzegueho oday myani tâzewenry ara âtâ tâdâtâdyguyho odaji idâly. Târâ tawyly ume, saudyly myani Deus itaumbry kaynâ kehoem tintain-hoem. <sup>17</sup> Aituo pape ituwymbi imâsedo âduduoly, Isaías inweniby. Iweâpa Deus itaumbry egatuimbyry myakâwândy mâkâ. Warâ kelydâ lelâ myani Jesus pape ituwymbi nhawynkely:

<sup>18</sup> “Kywymâry Deus Tyispiritury ingonodyl yam.

Mâkâlâ keankâ ugononi,

unâ iwâkuru âdy pebanro modoram kâengatuhoem,  
etadâdaymby modo, tânagazezeim modo warâ kâenmakehoem,  
epyem itaymby modo nhetondoem warâ.

<sup>19</sup> ‘Iweâma ise Deus tynynonro modo nhemakely’ keze ugononi keankâ”

warâ Deus itaumbypyry awo wâgâ iwenibyem awyly – kely Jesus.

<sup>20</sup> Tintaimbygueduo, Jesus pape imâsedo intuwiyondyly. Târâ âtâ tâdâtâdyguyho oday tâwaneinram nhuduondyly, ekadyly. Idânârâ tonlo modo toenzepa myani Jesus nhesedylymo. <sup>21</sup> Aituo myani Jesus aguely:

— Iwelo keba xirâ mâindaklymo; iwerâ olâ ise xirâ aidyly adaguly – kely.

<sup>22</sup> Idânârâ tonlo modo aguely myani:

— Idataungâ! Koendonro kehoem awâkâ uguondo! Âdydo imeom koendâ kehoem aguely, âdykâ kindatânry kehoem. José imery kulâ wâne, tonomegueim olâ – kelymo âjigue.

<sup>23</sup> Aituo Jesus aguely:

— Cafarnaumdâ awitobyry tutuze âmaemo. Awylygue ise târâ awitobyry ara, tarâ ienamadobypyrdâ awidyse mawylymo. Warâ ise Yam amyguelymo: “Tâwâlâ âsewiângâ, kua kyeni” myguelymo ise. Âdylâ adyesenry, agânhedyse mawylymo. <sup>24</sup> Unâ egatuim ipemugudoram kuru tâinwântuneba; âkelo kulâ einwânni. Xirâ mâuntudyzemo kuru wato.

<sup>25</sup> — Saguhoem Deus tynynâ aguewâni modo eon-honru tuduze myakâwândy adyesenry modo anhetomoem, Israelita keba modo nhemawyadâdomoem. Elias ume toenzepa myakâwândy tarâ Israeldâ pypâbyry modo. Typniguba tawylygue âsenagazeni modo, três anos e meio kopâ nihugueba awylygue, âdy âpa ezay ago nipyra awylygue, toenzepa myakâwândy pypâ israelita modo typniguentry. <sup>26</sup> Deus olâmy Elias igonomâ Sarepta donro pypâ emawyadâze. Israelita keba myakâwândy mâkâ, Sidom eynynonro. Deus eon-honrugue myakâwândy Elias mâkâ pekodo ipyniry aguipaombyry agui nhenehonly, kopâ ihugueondyly nhotoem. Pypâ israelita xurâem myara aniempyra myakâwândy Elias. <sup>27</sup> Toenzepa lâpylâ myakâwândy tâdâjimituguelygue tâwânuim modo tarâ Israeldâ, Eliseu ume. Deus olâ myakâwândy Eliseu eon-honru nudupa akaemo kua nhetoem. Sodadu domodo iwymâry Naamâ keho kua iese lelâ ingonodyly, israelita keba myakâwândy mâkâ, Síria donro – kely Jesus.

<sup>28</sup> Awârâ tindatuo, toenzepa iewiâpadlymo, judeu keba modo lelâ Deus nhemawyadâguyly kely tindatuo. <sup>29</sup> Aituo myani sautaynlymo. Sautybyem Jesus nhawâdylymo. Xidadâ odaypa nhadylymo. Iwy iay myani mâtâ xidadâ ejiku. Awylygue iwy angataji nhadylymo. Târâpa igonose kelymo ihuguel, iguelitoem. <sup>30</sup> Âdaniepyramo olâ. Aituo Jesus kurâ domodo duakâ kehoem sakadly.

### *Jesus uguondo kadopâgue taseim kua nhetoobyry*

(Mc 1.21-28)

<sup>31</sup> Aituo myani Jesus idâly, Galiléia eynynonro xidadâ Cafarnaumram. Târâ myani kurâdo nhénomedâdyly tâzekobyzegueho oday. <sup>32</sup> Arâ nhénomedâdyly tindatuo myani toenzepa kehoem kurâdo âsewânilymo. Aguelymo:

— Pymâ ara kehoem aguely. Adâkely tutuze, âkeá lelâlâ aguely warâ merâ – kelymo.

<sup>33</sup> Tâlâ myani târâ âtâ tâdâtâdyguyho oday uguondo kadopâgue taseim. Uguondo oday myani kadopâ adaenkely Jesusram:

<sup>34</sup> — Xina kâdynanâdâ. Tutuze urâ koendâ kehoem ânguy mawyly, Jesus Nazaré donro! Xina eon-honru etyze âetyby mawyly, tutuze urâ. Inakanhe amitaymba âmâ; Deus ingonotyby âmâ warâ – kely uguondo kadopâgue taseim; uguondo keba olâ agueim, kadopâ.

<sup>35</sup> Ton-honre kehoem Jesus aguely mâkâ uguondo odano kadopâram:

— MYK alelâ ikâ! Adâkeonzebane ikâ! Igasegâ iweâ lelâlâ merâ uguondo odaypa! – kely Jesus.

Idânârâ kurâdo enanaym kehoem mâkâ kadopâ uguondo onro onwa nhameley. Onro onwa sameimbyryem kadopâ egasely uguondo odaypa, âdaniepyra olâ. <sup>36</sup> Idânârâ etaynrimbyry modo âsewânilymo. Âjigue aguelymo:

— Idataungâ konomedâni ton-honre kehoem aguely. Ton-honreim merâ! Tunâry wâgâlâ awâkâ kadopâ nhâky! Agueduo, idâly lelâ — kelymo.

<sup>37</sup> Inepa kehoem Galiléia eynynonro modo Jesus egary indadylymo.

*Jesus tâwânuneim modo kua nhetobyry*

(Mt 8.14-17; Mc 1.29-34)

<sup>38</sup> Ilâpyryem myani Jesus egasely âtâ tâdâtâdyguyho odaypa. Simão Pedro etyram idâly. Simão imenhudu toenzepa myani iaturu. Jesus egawândyly tientuo, tonlo modo eyam aguely:

— Toenzepa Simão imenhudu iaturu — kelymo.

<sup>39</sup> Aituo myani eydâ atoram idâly. Saintybyem eatado XYDYK idyly. Aituo aguely ton-honre kehoem, mâkâ tyatureba itoem.

Aguely umelâ, tyatureba idyly. Inepa kehoem myani saudyly; ipynirymo aiese, âwinduatomoem.

<sup>40</sup> Xixi egawâmpygueduo, idânârâ tonlo tâwânuneim modo Jesusram adaholymo. Mârâgue lelâba tâwânuneim modo myani nhakylymo. Aituo myani Jesus akaemo nhangahu onwa tâmary nhedyly, kua itomoem. <sup>41</sup> Kadopâgue taseim modope myani akaemo duay. Jesusram tâjiânykyoduo, tadaenkeze kehoem kurâdo odaypa adâkewâdyly:

— Deus Imery âmâ! — tâkeze.

Warâ olâ Jesus aguely kadopâ modoram:

— Âdatâkezeba itaungâ! — kely.

Messias-em tawyly nhutuduomo, ânguyram nhegatudyzebamô myani Jesus.

*Jesus Deus wâgâ Galiléia eynynâ nhegatuhobyry*

(Mc 1.35-39)

<sup>42</sup> Emetybyem myani xidadâ odaypa Jesus egasely. Âji âdy peba atoram idâly. Toenzepa kurâdo Jesus xuize awyly. Tiontu myani aguelymo:

— Tâtâzeba ikâ, Jesus. Xina agâlâ ikâ tarâ Cafarnaumdâ — kelymo.

<sup>43</sup> Jesus olâ aguely:

— Tarâ lelâ wipyra ise aze. Deus xunârybyry âkelo âtâ anakâ auguedyse lâpylâ urâ. “Inepa ise Deus pymâem awyly xirâ anaym” uguedyse lâpylâ urâ. Agueze Deus ingonotybyma urâ — kely Jesus.

<sup>44</sup> Tâdâtâdyguyho modo odakâ mykâinane Deus xunârybyry nhegatuly idânârâ âji judeu domodope ato ara.

## 5

*Jesus uguondo âedâgue kanra awâni modo tynynonroem ingâsedobyry*

(Mt 4.18-22; Mc 1.16-20)

<sup>1</sup> Paru Galiléia\* emelay sagunu wâgâ Jesus eagâmo awyly. Tokonoze kehoem myani kurâ domodo, Deus xunârybyry nhegatuly idase awylymo. <sup>2</sup> Aituo azagâ pepi sagunu wâgâ TUXUK TUXUK ietyby nhedyly. Sodo modo myani iodaya itybyem, âedâ kanra awâto igokeze aidylymo. <sup>3</sup> Mârâ tokalâ pepi sodo myani Simão Pedro. Aituo Jesus pepi odaji âxiedybyem sodoram aguely:

— Âwepiry wao âdiempa igonokâ — kely.

Jesus aguehobyry ara sodo anhedyly. Aituo Jesus pepi oday ekadybyenlâ kurâ domodo sagunu wogonro modo nhenomedâdyly.

<sup>4</sup> Enomedâdylymo ewanikeimbyryem Simão Pedroam aguely:

— Paru esanigonra pepi sakâ — kely.

Simão Pedroram, pepi odano modoram warâ aguely:

\* <sup>5:1</sup> Paru Galiléia, Genesaré lâpylâ ezedy eagonro.

— Âedâ samewâdaungâ paikaji, kanra manwâtomoem — kely.

<sup>5</sup> Aituo Simão Pedro aguely:

— Ah, Pymâ, tâmese enra xina kanra sawâse kewâdyly. Ânguy xina nawâtaymba enra. Amyguehobypy ara aise lelâ olâ xina — kely.

<sup>6</sup> Aituo âedâ nhameondylymo paikaji. Ilâenma toenzepa kehoem kanra nhawâdylymo-ro, âedâ adauguezeseaji kehoem. <sup>7</sup> Aituo Simão Pedro eagonro pepi odano modo tâmaryguelâ tâmawyadâze âetomoem ingâsedly. Myarâ saintybyem, azakâlâ kehoem kanrage pepi xumywâdyly, xytyzeaji kehoem kanrage tumykugue. <sup>8</sup> Kanra peba atobyrydâ toenzepa sawâtyby tientuomo, myani Simão Pedro Jesus enado âzeguhoam itybyem, aguely:

— Tâwâlâ wixi, Pymâ. Âdy mâkeba urâ âmâem, inakanhe aini kulâ — kely.

<sup>9</sup> Mâkâlâ, eataen-ho modo warâ âsewânilymo, toenzepa kehoem kanra tianwâtuomo.

<sup>10</sup> Zebedeu imeombyry, Tiago, João warâ toenzepa kehoem âsewânilymo lâpylâ, Simão Pedro eagonrodo. Aituo Jesus aguely Simão Pedroam:

— Tâegane ikâ. Saguhoem kanra sawâniem makynre. Kurâ domodo ynynonroem itoem unâry egaturin-em ise âmaemo iwerâ — kely myani Jesus.

<sup>11</sup> Agueduo, pepi modo nhuxidylymo sagunu onwa, târâlâ âxiân-hoem. Idânârâ timobygueduo myani Jesus agâ idâlymo, âsenomedâze.

### *Jesus uguondo tâjimituguelygue tâwâneim kua nhetobyry*

(Mt 8.1-4; Mc 1.40-45)

<sup>12</sup> Jesus myani uguondo tâjimituguelygue tâwâneim ety anaym. Toenzepa myani uguondo âjimituguely. Jesus nhedyly. Aituo eyam idâly. Jesus enado âzeguhoam idyly, tâmydy onro onwa nhedyly, Jesus tynrense tawyly tienehon-hoem. Aituo Jesusram aguely:

— Pymâ, kua yese ton-honre mawyly, xutuanze. Kua yedyse âmâ watay, kua yekâ wao — kely.

<sup>13</sup> Jesus tâmarygue MÂ' nhedyly. Eyam aguely:

— Kua âedyse urâ. Tâwânepa âmâ iweâma. Kua âetai — kely.

Ilâenlâ kehoem kua idyly. Iwâgâ pinuri peba idyly, itugoenzely warâ. <sup>14</sup> Eyam aguely:

— Idakâ. Iweâma tâwâlâ idâ. Ânguyran-ne xirâ kua âetobyry kâzegatu — kely.

— Kurâdo eynynâ Deus agâ agueinram âzechora, kua itybyem mawyly nhetoem. Kua itybyem mawyly kurâdo nhetoem, Deusram âdylâ âundugâ, kâzewenryem Moisés inweniby agueho ara — kely myani Jesus.

<sup>15</sup> Tâinkâ lelâba Jesus egary âjidaholy. Aituo myani kurâ domodo aguely idase idâlymo. Tâwânuim modo idâly kua tyetoom. <sup>16</sup> Aunlolâ myani Jesus idâly âji âdy peba ato modoram, Deus agâ agueze.

### *Jesus adakobâdâny kua nhetobyry*

(Mt 9.1-8; Mc 2.1-12)

<sup>17</sup> Jesus Deus wâgâ nhenomedâdyly myani. Eydâ iwaguepa ekadybyem fariseu domodo ewy, Moisés inweniby wâgâ enomedâni modo warâ. Jerusalémdâpa âewylymo; idânârâ xidadâ Galiléia eynynâba, Judéia eynynâba lâpylâ warâ âetaynlymo. Kywymâry Deus eon-honrugue Jesus kurâ domodo kua nhetaynly. <sup>18</sup> Aituo myani uguondo modo adakobâdâny nhadylymo kama emyenro xygatyby wâgâ, Jesus kua nhetoem. Âtâ odaji tienkaunâdyzemo wâne, Jesusram tiantomoem. <sup>19</sup> Toenzepa kurâdo awylygue olâ âdara nâwâmpyra awylymo mâkâ agâ. Aituo pyanta oze tâgawâmpyra tâituomo, âkulymo âtâ nhangataji tâdâkuho wâgâ mâkâ uguondo agâ. Tarâ tyntâguyândo in-hoguylymo. Mârâ adientybymo oze tâwâneim nhytâguyândylymo kurâdo tonlo modo duakâ kehoem Jesus enadoram. <sup>20</sup> Aidylymo tientuo myani Jesus tyangahu oday aguely:

— Awâkâ adakobâdânry kua kânchedyly tâinwânse asaemo – kely.

Aituo Jesus aguely adakobâdânryam:

— Inakanhe amitobyry modo xygakeagui – kely.

**21** Moisés inweniby wâgâ enomedâni modo, fariseu domodo warâ Jesus aguely tindatuo, tâpaunzezemo myani.

— Koendâpa awâkâ Jesus aguely! Deus nhunâguedyly kulâ awâkâ! Deus agâ âzekiba tâidye awyly kulâ! Âdaunlo uguondo nhygakehonly mâkeba awârâ inakanhe adâjitoryy modo! Deus lelâ awârâ xygakerim – kelymo.

**22** Tutuze olâ Jesus âdy nhangahumo oday xunârymo awyly-ro warâ. Aituo aguely:

— Arâ ywâgâ tâpaunzezeba itaungâ! Unâguedaundâ — kely. **23** — Merâ adakobâdânryam: “Inakanhe amitobyry modo xygakeagui” uguely-ro watay, mâuntuwâbyra ise âmaemo, âkealâ, âkealâba warâ auguely awyly. “Aukâ, adakobâgâ” eyam ugueduo, adakobâdylly-ro watay olâ, xutuze âmaemo ton-honre wawyly! **24** Merâ koendâ adakobâdylly mäentuomo, xutuze âmaemo, kurâ domodo inakanhe aito xygakeze ton-honre wawyly urâ Uguondo Kaynâpa Âetyby — kely Jesus.

Aituo myani adakobâdânryam aguely:

— Aukâ, iguetudobyry sanâkâ, adakobâgâ. Idâ itynra — kely.

**25** Aguely umelâ kehoem kua idyly, Saudyly idânârâ enanaynmo. Tâguetudobyry nhanâdylly. Adakobâdylly, egasely, tâtyram idâly. Deusram aguely:

— Koendonro, ton-honreim warâ âmâ! — tâkeze, idâly.

**26** Toenzepa kehoem Idânârâ âsewânilymo, âseanedlylmo warâ. Deusram aguelymo:

— Koendonro, ton-honreim lelâlâ warâ âmâ, Deus! Koendonro modo aieni. Âdykâ koendonro awârâ emyenro kientaymba kurâ, iwerâ olâ kyzetai! — kelymo.

### *Jesus Levi<sup>†</sup> tynynonroem itoem ingâsedobyry*

(Mt 9.9-13; Mc 2.13-17)

**27** Ilâpygueduo myani Jesus târâpa âxiguely. Tadakobâday myani pymâ ton-honreim Roma donro xurâem dinheru impostu epywado emakeim nhedyly. Levi myani mâtâ impostu epywado emakerim ezedy. Ekadybyem myani kurâdo dinherugue impostu nhepywadodâ. Jesus aguely myani eyam:

— Yagâ âekâ. Ynynonroem ikâ, yagâ mâtâsenomedâdoem — kely.

**28** Aituo myani Levi saudyly. Dinheru Roma donro pymâ xurâem emakely inmoly. Jesus agâ idâly; eynynonroem tâitoem. **29** Ilâpyryem Levi âty anhedyly, Jesus tynynonroem tygâsebygueduo. Pyni tâkubâgueim anhenehonly. Jesus ingâsedlyly âtyam, dinheru impostu epywado emakewâni modo lâpylâ, kurâ domodo warâ. Toenzepa myani Levi etydâ kurâdo âwinduani modo. **30** Tâlâ lâpylâ myani târâ uguondo modo ewy Jesus izepaom: fariseu domodo, Moisés inweniby enomedâni modo warâ, (fariseu domodo lâpylâ akaemo.) Jesus, akaemo modo agâ âwinduadyly tientuomo, toenzepa iewiâpadlylmo. Aituo Jesus eynynonro modoram aguelymo:

— Kâzewenry ara inkâba amidlylmo! Dinheru impostu epywado emakewâni modo agâ, kurâdo inakai modo agâ warâ mâtâwinduapyra tâise âmaemo — kelymo.

**31** Jesus olâ eyanmo aguely:

— Deus wâgâ auguehoem uirimpypyrlâ asaemo. Tâwânuñeim modo mawânkâ kua tyeni xuirim, tâwânenry modo keba — kely.

**32** — Inakanhe aitaynrim modo igâseze kâewyly, inakanhe adâjidly imohomoem. “Inakanhe aitânrâ urâ” kewâni modo igâseze inkâba xirâ kâewyly — kely Jesus.

### *Saguho kiuntuyby kyjimonre, iwelo kiuntuhoem*

(Mt 9.14-17; Mc 2.18-22)

<sup>†</sup> **5:26** Azagâ myani ezedy. Aramaiku-em Levi; hebraiku-em Mateus warâ.

<sup>33</sup> Tonlo modo ewy Jesusram aguely:

— João Batista eynynonro modo, fariseu eynynonro modo warâ nâwinduapyra tâisemo inanry, Deus agâ adâkehomoem. Akaemo pylâ âwinduadylymo, adakuilymo alelâ. Koendâpa akaemo arâ aidyly — kelymo.

<sup>34-35</sup> Aituo Jesus eyanmo aguely:

— Eagâmo watay, nâwinduapyra nitaymbamo ise. Eagâmopa wituo olâ nâwinduapyra isemo, Deus agâ adâkehomoem. Todohogün-horam igâsedaymby modo watay, ohogünrim agâ tatay, nâwinduapyra nitaymbamo, etygumo lelâ. Ohogünrim tuduapta ituo lelâ nâwinduapyra idylymo myara — kely.

<sup>36</sup> Aituo Jesus enomedâzemo aguely:

— Ânguy âtâ iwelo natâwâbyra, âtâbâ tianwentâdoem. Nhawentâduo, âtâ iwelo inakanhe nhedyly kulâ tâise. Sawentâdobyry iwelo nadaugepa tâise. Tawentâzeim tâise, adauguein-ro warâ. Âtâ iwelo ewy koendâpa âtâbâ sawentâdoem. <sup>37</sup> Tâjitulo vinhu etaryem xygatyby iwelo keba odaxi vinhu iwelo tâkanâduneba. Tâjitulo iwelo keba odaji ekanâduo, etary tadaugueze mawânrâ. Aituo vinhu apâdyly. <sup>38</sup> Aypa olâ, vinhu iwelo etaryem tâjitulo iwelo xygatyby odajilâ ekanâdyly watay, vinhu nhewantuo, imâem ituo, tâjitulo iwelo tâzepâgueze. Etary, vinhu alelâ nâxiumebyra. <sup>39</sup> Ânguy vinhu iwelo tienydyze inkâba, vinhu nhewantyby enyrimbyryem. “Vinhu saguhobyrylâ koendonro tânyzeinhe” tâkezemo — kely.

{Jesus aguely, saguho konomedâdobyry kinmohoem, iwelo konomedâdo kieinwântoem. Saguhobyry mawânrâ âzekiba nâseinwâmbyra iwelo konomedâdo agâ.}

## 6

*Jesus eynynonro modo tâzekobyzegueho oday trigu ewily nhasewâdomobyry  
(Mt 12.1-8; Mc 2.23-28)*

<sup>1</sup> Tâzekobyzegueho oday Jesus tynynonro modo agâ trigu ejidy ezakâ sakadylymo. Iduakâ takaday olâ myani Jesus eynynonro modo trigu ewily tasewâzemo. Tâmarygue nhatuguelymo, nhagulymo idylymo. <sup>2</sup> Fariseu domodo ewy, akaemo aidylymo tientuo Jesus eynynonro modoram aguelymo:

— Kadasewâdaundâ, kadatuguewâdaundâ warâ awârâ trigu ewily iwerâ. Tutuzelâ âmaemo, kâzwenry eynynâ kokobyzegueho oday kydâsewaniba kydawyly — kelymo.

<sup>3</sup> Aituo Jesus aguely:

— Enanâguewâdaungâ typnigueba tâituo, kydamu Davi, eagonro modo warâ aitomobyry, toenzepa tâwindymogue. <sup>4</sup> Deus ety odaji myakâwândy Davi egawândyly. Deusram xuduupy pão modo nhanâdyly, nhedawynly idyly. Tagonrodo nhedawynhoem xuduwanmy warâ. Judeu domodo eynynâ olâ tâise akaemo awârâ pão modo nedawynmpa. Kurâdo eynynâ Deus agâ aguenri lelâ mawânkâ tâise mâtâ pão edawynrim, âkelo modo lâpylâ warâpa. Deus olâ myakâwândy nehoguebyramo nipyra mâtâ nhedawynduomo. <sup>5</sup> Uguondo Kaynâpa Âetyby urâ. Âdy iwâkuru adyesem, adyesenry warâ tâzekobyzegueho oday xuturim urâ — kely Jesus.

*Jesus uguondo âzemapiluguedânry kua nhetobyry  
(Mt 12.9-14; Mc 3.1-6)*

<sup>6</sup> Tâzekobyzegueho oday Jesus egawântondly âtâ tâdâtâdyguyho odaji. Âwântybyem, Deus xunârygue tonlo modo nhenomedâdyly. Târâ uguondo emary eahoru eynynonro âzemapiluguedânrybe myani. <sup>7</sup> Tâlâ lâpylâ myani târâ fariseu domodo, Moisés inweniby wâgâ enomedâni modo warâ. Jesus tiunâguedoem kulâ aidyly enuagaeni modo xunâzelymo:

— Tâzekobyzegueho oday Jesus awâkâ uguondo emary kua nhedyly watay, Deus ezewenry arapa aitobyry kyzegatunre. “Deus aiedyseba ato amientai” kykenre — kelymo.

<sup>8</sup> Jesus olâ myani tutuze akaemo nhangahumo oday xunârymo. Awylygue uguondo âzemapiluguedânryam aguely:

— Aukâ. XYDYK ikâ; âekâ xarâ waunroem — kely Jesus.

Agueduo uguondo saudly, XYDYK idyly. <sup>9</sup> Jesus tonlo modoram aguely:

— Âdaraka Moisés inweniby tâzekobyzegueho oday aguienkyl wâgâ aguely? Âdyka adyeseinhe agueho, koendonro aguiendyl, inakai aguiendyl, kely? Ânguylâ tâzekobyzegueho oday kâmaynoem watay, kienmakely, tâwâlâ kingueânehonly? — kely Jesus.

<sup>10</sup> Aituo Jesus idânârâ kehoem kurâdo tydonro modo nhenuagaendyl. Aguely uguondo âzemapiluguedânryram:

— Âzemapiluguegâ — kely.

Jesus agueduo, uguondo âzemapiluguel myani, emary kua ienipyryem awylygue.

<sup>11</sup> Awârâ tientuo myani Moisés inweniby wâgâ enomedâni modo, fariseu domodo warâ iewiâpadaynlymo. Âjigue aguelymo:

— Âdakiendylka ise awâkâ Jesus? — kelymo.

### *Jesus tynynonro tienomedâguyly modo induakehobyry*

(Mt 10.1-4; Mc 3.13-19)

<sup>12</sup> Ilâpygueduo Jesus iwy onwa âkuly, tynynonro modo agâ, Deus agâ agueze. Tâmese myani Deus agâ xunâgu. <sup>13</sup> Emetybyem, tynynonro modo ingâsedyl. Akaemo ewy doze lelâ induakely. Aituo eyanmo aguely:

— Âduakelymo, ywâgâ amyguehomoem — kely.

<sup>14</sup> Doze lelâ iduakeyby:

Simão (“‘Pedro’ ise izedy” Jesus kehobyry.)

André (Simão iukono)

Tiago

João

Filipe

Bartolomeu

<sup>15</sup> Mateus

Tomé

Tiago (Alfeu imery)

Simão (tâty anary izetonro lelâlâ tawylygue, Roma donrogue tywymâgu izepaom)

<sup>16</sup> Judas (Tiago imery)

Judas, Queriote donro (Jesus egamenribyry izepanro modoran-ro.)

Warâ Jesus induakely.

### *Jesus kurâ domodo nhenomedâdobry, tâwânuñeim modo kua nhetobyry warâ*

(Mt 4.23-25)

<sup>17</sup> Ilâpyryem myani Jesus xytâguyl eagâmo iwy wogompyryem. Toenzepa iwy iakoay eynynonro modo. Toenzepa lâpylâ myani iwagueno modo ewy: Jerusalém donro modo, Judéia eynynonro modo, azagâ xidadâ parutabâ emelano Tiro, Sidom warâ donro modo warâ. <sup>18</sup> Âdy Jesus agueho awyly xutuze, kua âiehoze warâ myani akaemo idâly. Kadopâgue taseim modo idâly myani, kua âieholymo lelâ. <sup>19</sup> Idânârâ tâwânuñeim modo MÂ’ tiendyse, eon-honrugue kua tâitomoem. Idânârâ MÂ’ ienipyry modo kua itaunmâmomy.

*Âdara tojiomaru kuru awyly xutuho*  
*(Mt 5.1-12)*

- <sup>20</sup> Ilâpygueduo myani Jesus tynynonro modoram MYK idyly. Eyanmo aguely:
- Tuomareim kuru âmaemo âdy pebaom modo.  
Deuslâ olâ âwymârymo, nhenimo warâ.
  - <sup>21</sup> – Tuomareim kuru âmaemo tâwinzeim modo.  
Ilâpyryem ise idânârâ ize matomo tâlâ lelâ.
  - Tuomareim kuru âmaemo tytyruneim modo, tuoguruneim modo warâ.  
Ilâpyryem olâ ise omarumo, âilumo lelâ warâ.
  - <sup>22</sup> – Tuomareim kuru ise âmaemo. Iwerâ kulelâ mâjiewiâseolymo; ânguy izepa ato modo, tywykeduneim modo, tunâgueduneim modo warâ. Urâ Uguondo Kaynâpa Âetyby xurâem mawylymogue ise mâzenagazeolymo. <sup>23</sup> Arâ watay, tytywanzeba itaungâ, tuomare lelâ. Deus olâ eydâ tatodâ imâem âyanmo nhudulype, omazeânímoem nhekanâdybybe. Deus izepanro modoram mâzenagazeolymo. Alâ mykâinane akaemo idamudo lâpylâ Deus xunâry egatuwâni modo nhenagazedyly – kely.
  - <sup>24</sup> Tynynâbaom modoram aguely lâpylâ:  
– Kaikâlâ ise âmaemo âdypeom modo.  
Iwerâ kulelâ omarumo.  
Ilâpyryenma ise tuomareba âmaemo.
  - <sup>25</sup> – Kaikâ âmaemo iwerâ pyni sodo modo.  
Âsewinzeze âmaemo.  
– Kaikâlâ âmaemo iwerâ tuomareim, tyeileim warâ.  
Âjityenze, ohogüenze warâ âmaemo.
  - <sup>26</sup> – Kaikâlâ ise âmaemo, Deus izepa ato aieni modoram âzehogueorim modo. Alâ pylâ mykâinane âadamudomoram iozepa kulâ Deus itaumbry egatuwâni modo âzehogueoly – kely Jesus.

*Âizepanromo agâ koendâ lelâ itaungâ*  
*(Mt 5.38-48)*

- <sup>27</sup> Aituo myani Jesus agueondly eyanmo:
- Ydataynrim modoram xirâ auguely. Âwynedânrymo agâ koendâ lelâ itaungâ, ataen-homo mânwyneguylymo agâ matomo ara lelâ. Âewiâsenimo agâ koendâ lelâ itaungâ. <sup>28</sup> Ânguylâ âmeodoram igameduomo, âmeodoram igameinmobypyry xurâem Deusram ekadaungâ koendâ lelâ nhetoem. <sup>29</sup> Mâjiwapagainhoduomo, tâpeânzeba itaungâ. MYRYK itaungâ, iladune âwapagain-homoem lâpylâ. Âgamizary âzemagazeoduomo, tâwâlâ âwalitoru nadâ lâpylâ. <sup>30</sup> Âyanmo âdylâ ekanibyryram âunduwâtaungâ. Ânguylâ âsejiguy nhemagazedu, “Epywagâne” tâkezeba itaungâ. <sup>31</sup> Koendâ itaungâ âkelomo agâ, agâmo koendâ awyse matomo ara.
  - <sup>32</sup> – Koendâ lelâ itaungâ idânârâ agâ, ataen-homo agâ kulelâ inkâba. Agâmo koendonro agâ kulelâ koendâ mawylymo watay, âdyem nitaymba awârâ. Ânguy takazeno mâkeba âmaemo. Kurâdo inakai modo kuru tataen-ho agâ koendâmo lelâ. <sup>33</sup> Agâmo koendonro agâ kulelâ koendâ mawylymogue, “Deus koendonro kurâem xuduze, koendonro kydawlygue” tâkewâzeba itaungâ. Âdyem itaymba awârâ. Kurâdo inakai modo kuru, tagâ koendonro agâ koendâmo lâpylâ. <sup>34</sup> Ipywanimoem awyly mâtuntulymoram kulelâ âdylâ mâtundulymo-ro watay, “Deus âdylâ koendonro xuduze aguitobyry wâgâ” tâkewâzeba itaungâ. Deus einwântâny modo arâ adâisemo lâpylâ.
  - <sup>35</sup> – Akaemo ara inkâba itaungâ. Inagazenimo agâ koendâ itaungâ. Koendâ lelâ xurâem aitaungâ, ipywadomo peba awylymo umelâ. Inagazenimo koendâ lelâ mâtendylymo watay, ise Deus koendâ nhedylymo, koendonro nhudulype âyanmo warâ.

Kurâ koendonro agâ kulelâba Deus koendâ awyly, kurâ inakanhe aini modo agâ lâpylâ, "Kagâ koendonro mâkeba Deus" kewâni modo agâ. Idânârâ agâ koendâ mataymo, Deus eynynonroem mawylymo âdutuoze. <sup>36</sup> Koendâ itaungâ, Kunwym kaynonro ara – kely Jesus.

*Ânguy kienwentâbyra kine  
(Mt 7.1-5)*

<sup>37</sup> Jesus aguely myani:

— Ânguy kâzewentâdaundâ, Deus iwentâbyramo itoem lâpylâ. Ânguy kâdunâguedaundâ, Deus âunâguebyramo itoem lâpylâ. Âkelomo inakanhe aitobyry enanânehonwâdaungâ, Deus inakanhe amitomobyry nhygakehoem. <sup>38</sup> Âkelomoram ipa ato âunduwâtaungâ, tâwânrempa, Deus ize matomo nhuduhoem lâpylâ, saku kiampazezeduo, xumykadyly ara. Arâ lâpylâ ise Deus âyanmo imâem nhuduly, tâwânrempa mataymo. Imâem mâundulymo watay, imâenlâ ise Deus âyanmo nhuduly. Imâembalâ ise nhuduly warâ – kely Jesus.

<sup>39</sup> Aituo Jesusram âzenomedâolymo, aguely:

— Epy, eagonro epy akobâniem nitaymba. Aidyly-ro watay, azakâlâ tyihuguezemo tâtagueim odaji. <sup>40</sup> Enomedâni mawânkâ tonomedâzeim sakani kuru. Pymâ mawânkâ tâwaneim sakani kuru – kely Jesus.

<sup>41</sup> — Agonromo tâwentâze âmaemo, âdiempa inakanhe aitobyry wâgâ kulâ, âmaemo olâ imâem inakanhe kuru aini. Koendonro mâkeba awârâ. Agonro âzenupialodobyry lelâ mâenklymo, inumo odano se iwatary imâsedo pylâ mâemptyra âmaemo-ro myara. <sup>42</sup> Agonromo âzenupialodobyry etyze myguewâdylymo, inumo oday se iwatarybe awyly umelâ. Saguhoem wao inumo odano se iwatary etywâdaungâ, koendâ agonromo âzenupialodobyry mâentyhomoem. Saguhoem kuru wao inakanhe amidylymo imowâdaungâ. Inakanhe amidylymo mâinmopygueduomoma ise tâwâlâ agonrodo mâunrudylimo, inakanhe anipyra itoem – keze Jesus aguely.

*Ewily wâgâlâ nady âdaunlo awyly xutuly  
(Mt 7.15-20; 12.33-35)*

<sup>43</sup> Jesus aguely:

— Se takyguenry, koendâ lelâ ewily, ein-hoem tuduze. Se takygueim, inakanhe lâpylâ ewily, ein-hoem nudupa. <sup>44</sup> Ewily wâgâlâ se âdaunlo awyly xutuly. Tyguyreim, uvague tâwituneba; kazainwam, figugue tâwiseba warâ; tâwilygue lelâ mawânrâ nady modo ewitu. <sup>45</sup> Âdylâ ekanâdo oday koendonro ekanâdyby watay, koendonrolâ tâtyzeim. Inakai watay, inakai lâpylâ tâtyzeim. Arâ lâpylâ kunâry, kyangahu oday kydâpaunzedo kienkanâdyby. Koendonro watay, koendonrolâ aguykeho. Inakai watay, inakailâ aguykeho warâ. Aguykeho mawânrâ, âdara kyangahu oday kunâgu awyly xutuen-hoim – kely Jesus.

*Deus aguehobyry ara lelâ aini, aguehobyry araba aini warâ  
(Mt 7.24-27)*

<sup>46</sup> Jesus eyanmo aguely:

— "Pymâ, Pymâ" mygueylimo kulâ yam, auguehobyry mâinwâmpyra olâ âmaemo. Koendâpa awârâ. <sup>47</sup> Âdaunlo ynynonro modo kuru awyly wâgâ ise kâengatuly. Auguely tydasemo; auguehobyry adyesemo warâ awylygue. <sup>48</sup> Tâlâ uguondo koendâ kehoem tâty itânibyry nihugueba itoem; mâkâ emyenro asaemo. Tâsanigue kehoem tâty enu etary nhesaguely, tâhugamune kehoem tiempadâdoem, nâzekâniiba itoem. Toenzepa kopâ ihugueduo, paru inwenduo, mâtâ âji nhptyândyly warâ. Mâtâ âtâ olâ nihugueba, tâhugane kehoem tuhu wâgâ itâdyby awylygue. Arâ lâpylâ yeinwânni modo kâenomedâdobryy imodâny modo. <sup>49</sup> Talâ lâpylâ auguely idani modo, auguehobyry aniempyramo olâ waunlo. Uguondo koendâ tâty itâdâny emyenro akaemo. Sagunu

wâgâ kulâ tâty intâdyly. Imâem nesagueba âtâ enu tiempadâdoem. Toenzepa kopâ ihugueduo, paru inwenduo, mâtâ âji nhytyândyly. Aituo âtâ ihuguelly. Idânârâ kehoem adakalaguelly, tâhuganeba itâdyby awylygue – kely Jesus.

## 7

### *Jesus sodadu domodo iwymâry agâ tâwaneim ewânu ume kua nhetobyry (Mt 8.5-13)*

<sup>1</sup> Akaemo kurâdo agâ agueypyem Jesus idâly xidadâ Cafarnaumram. <sup>2</sup> Tâlâ myani mâtâ xidadâdâ sodadu Roma donro iwymâry. Tâlâ lâpylâ myani eagâ tâwaneim mâtâ ize ato kuru. Toenzepa myani mâtâ tâwaneim ewânu iguezeseaji kehoem. <sup>3</sup> Aituo myani sodadu iwymâry “Jesus kurâdo kua nhedyly” kely indadyly. Awârâ tindatuo myani judeu domodo iwymâry ewy ingâsedly. Eyanmo aguely:

— Jesusram ekadaunda wao, yagâ tâwaneim kua iese âetoem — kely.

<sup>4</sup> Aituo idâlymo Jesus agâ agueze. Eagâ toxioduomo, aguelymo mâtâ sodadu iwymâry aguehobyry. Myarâ idâhoem nhekazezedlymo. Aguelymo:

— Uguondo koendonro mâtâ. Toenzepa xina izetonro mâtâ. Nhekadyby aieta wao.

<sup>5</sup> Roma donro wâne mâtâ, kurâ judeu domodo izetonro olâ mâtâ. Mâkâlâ keankâ âtâ itânehonrim, xina Deus wâgâ agueze âtâdyguyho — kelymo Jesusram.

<sup>6</sup> Aituo Jesus eagâmo idâly. Âtânra saindylymo ume, sodadu iwymâry tataen-ho modo ewy Jesusram agueze ingonodyly.

— “Pymâ, âdy mâtkeba urâ, ietyram mâtântoem. <sup>7</sup> Toenzepa ton-honreim âmâ, agâ tunâgueim mâtkeba tâise urâ. Ton-honreim âmâ. Iwague endaylâ yagâ tâwaneim kua itoem amyguely watay, kua ise lelâ merâ. <sup>8</sup> Ywymâry modo aguely tâinwânsurâ. Tyzodadugue lâpylâ urâ yeinwânni modogue warâ. Kâingonotuo, tâtâze lelâ. Eagonro kâingâseduo, tâese lelâ warâ. Yagâ tâwaneinram ‘Xirâ aiekâ’ ugueduo, inepa kehoem adyese lelâ warâ” keanry xina iwymâry — kelymo ingonotaymby modo.

<sup>9</sup> Awârâ tindatuo myani Jesus toenzepa kehoem âsewânily, mâtâ sodadu domodo iwymâry toenzepa tâinwândyly tiuntuduo. MYK idyly. Aguely mâtâ kurâdo tyampygueni modoram:

— Eagâ tâwaneim kua kânhedyly tâinwânsurâ mynra mâtâ uguondo. Ânguy yeinwânni kâentaymba urâ mâtâ Roma donro yeinwânto ara kehoem. Kypemugudo israelita domodo duay kuru ânguy yeinwânni lâpeba mâtâ ara! — kely Jesus.

Iwague endaylâ myani Jesus aguely:

— Kua ikâ — kely.

Agueduo, uguondo kua idyly. <sup>10</sup> Sodadu iwymâry eataen-ho modo odopâdyly etyram. Saintybyem mâtâ tâwâneimbyry kua itybyem nhedylymo.

### *Jesus pypâ imery igueypy kurâem nhetondobyry*

<sup>11</sup> Mâtâ uguondo kua ienipyryem ine nipyralâ, Jesus idâly xidadâ Naimram. Eynynonro modo, toenzepa kurâ domodo warâ idâlymo eagâ. <sup>12</sup> Xidadâ odaxi tâdâwânto iwaguepa ataymo, Jesus âguedy epyâdoram sani modo nhodylymo. Pypâ imery tokaleom myani mâtâ âguedy. Toenzepa myani kurâdo mâtâ xidadâ odano modo igueypy nhapygue idâlymo. <sup>13</sup> Isebyry tientuo toenzepa myani Jesus intyendyly. Aituo aguely:

— Tuogunrepa ikâ — kely.

<sup>14</sup> Agueypyem myani iwaguepa saindyly. Mâtâ igueypy sawo MÂ’ nhedyly, sani modo epagudoem. Aituo myani epagudylymo. Epaguduomo, Jesus aguely igueypyram:

— Kurâem itongâ. Aukâ, salokuzenomo — kely.

<sup>15</sup> Jesus aguely umelâ kehoem mâtâ salokuzenomo kurâem itondyly. Tawo wâgâpa saudlyly, âjitanly alelâ. Jesus aguely isenra:

— Anra âmery — kely.

**16** Salokuzenomo igueypy, kurâem itondyly tientuo toenzepa kehoem idânârâ âseanedlymo. Deusram aguelymo myani:

— Koendonro âmâ, Deus! Xina agâlâ merâ âynynâ agueim, mâkâ xina emakeze mâingonotyby! — kelymo.

**17** Idânârâ Judéia eynynâ, tâinkâ iwaguepaom modo eynynâ warâ indataynlymo Jesus Naim donro salokuzenomo igueypy kurâem nhetondobyry.

*João Batista tynynonro modo Jesus agâ agueze ingonotobyry  
(Mt 11.2-19)*

**18** João Batista Jesus aitobyry egary indadyly. Eynynonro modo eyam egatuim.

**19** Aitobyry egary tindatuo myani azagâ tynynonro modo ewy ingâsedlyly. Eyanmo aguely:

— Jesusram idâwâtaungâ. “‘Deus ingonotyby âese’ kehobyrlyâkâ âmâ? Eagonro ise xina inwânwânyly?” kewâtaunda Jesusram — kely João Batista.

**20** Aituo Jesusram idâlymo. Saintybyem, aguelymo:

— “‘Deus ingonotyby âese’ kehobyrlyâ âmâ? Eagonro ise xina inwânwânyly?’” keze João Batista ingonotyby xina. Awârâ mawânkâ tiuntudyze ato — kelymo.

**21** Saintaymo toenzepa myani Jesus kurâdo tâwâneim modo kua nhedyly. Kurâdo inakanhe ieni kadopâ nhâkywâdyly. Epy modo nhetoem kua nhedyly lâpylâ warâ.

**22** Aituo Jesus aguely mâkâ azagâ João ingonotobyram:

— Odopâdaungâ. Mâentybymo, mâindatybymo warâ Joâoram egatuwâdaunda. “Jesus tâwâneim modo kua nhedyly xina nedâ. Epybyry modo koendâ tâense. Adakobâdânrybyry modo tadakobâzemo iwerâ. Tâjimituguelgue tâwâneimbyry modo itugoenzeybyem. Kydatânrybyry modo koendâ tydasemo. Iguewâtyby modo kurâem tyetonze. Kaikâ modoram Deus xunâry iwâkuru Jesus nhegatuly xina nidadâ lâpylâ.

**23** Tuomareim ise yeinwândyly imodânry modo!” nygue Jesus. Myguelymo ise Joâoram — kely Jesus.

**24** Aituo João eynynonro modo odopâdylymo. Idâpygueduomo Jesus aguely João wâgâ kurâ domodoram:

— Agui âmaemo ewy tâtâze keankâ âji âdy peba atoram, João aguely idase. Âdaunloka mâkâ, inanajimo? Etaungâ adapezeinly-ro watay, poji wayam wayam warâ tâzekâneze. Myara keankâ João, inanajimo? Âdy pebaom modoram âkelo unâ nhegatuly, âdypeom modoram âkelo unâ nhegatuly warâ keankâ aguely, inanajimo? Ainkâba, tokalelâ mâkâ xunâry. Âdypebaom agâ, âdypeom agâ alelâ mâkâ Deus wâgâ aguely. **25** Medâmolâ ety iwogonro iwâkuru keba awyly. Âdypeom xidadâ odano, âtâ imâsedo iwâkurugue tâtyreim warâ mawânkâ âtâ tâjiwogonro tâwâenseim ieni. Âdypeom mâkeba mâkâ.

**26** — Âdaunlo kuruka mâkâ, âmaemoem? Deus itaumbyry egatuim? Mâkâlâ mâkâ Deus itaumbyry egaturinlâ. Warâ olâ auguely âyanmo. Deus itaumbyry egatuim âdaunlo kulâ mâkeba mâkâ. Idânârâ Deus itaumbyry egatuwâni modo takaze tynreim mâkâ. **27** Warâ iwenibyem awyly Deus itaumbyry awo wâgâ: “Anra ytaumbyry egatuim. Waunroenlâ ise merâ kâingonotyby, kurâ domodo nhonse Messias saintodâ” kewândymy Deus. Kurâ domodo yaintodâ nhoniem kehobryrlyâ João — kely Jesus.

**28** Jesus aguely eyanmo:

— Uguondo âdaunlo kulâ mâkeba mâkâ João, uguely olâ âyanmo. Tynreim mâkâ, idânârâ saguhoem Deus itaumbyry egatuwâni modo takaze. Mâkâlâ keankâ “Inepa ise Deus Ingonytby âewyly” kerim. Âdara Deus kurâ domodo iwymâryem idyly awyly koendâ nutuba olâ mâkâ. Iwerâ Deus Ingonytbygue tywymâgueim watay, mâkâ takaze ise xynru. Awârâ xuturim watay, mâkâ takaze ise xynru, tâwâlâ lelâlâ wâne ise âdaunlo kulâ awyly — kely Jesus.

<sup>29</sup> Pymâ domodo mâkeba myani João aguely ehogueni, âdaunlo kurâdo kulâ, Roma iwymâryem impostu emakewâni modo kulâ warâ. Awârâ tindatuo, toenzepa kurâdo mâkâ xunâry ize idyly. Deus ize ato araba aitybyem tawyly tutuzemo tawylygue. Deus tâinwânseim awyly tutuzemo. Aituo Joãoram batiza âieholymo, Deus eynynnon-roem tawyly tienehon-homoem. <sup>30</sup> Judeu domodo iwymârydo olâ myani, João aguely tindadysebamo, fariseu domodo, Moisés inweniby wâgâ enomedâni modo warâ. Awylygue myani Deusram nâzemakeoba awylymo, Joãoram batiza nâiehoba awylymo warâ.

<sup>31</sup> Jesus kurâdo târâ âtâdyguybyram aguely:

— Âdaunloem mawylymo wâgâ agueze urâ, âmaemo xirâ umeno modo. <sup>32</sup> Iamimeom tagonrodo taseray âzenanâdoge tâzenanâdyzebaom ara kulâ âmaemo. Tataen-hodo tugoru indyduomo, tâidysebamo. Tataen-hodo itynru ume, tytyrembam. <sup>33</sup> Âdiempa kulâ João Batista âwinduadyly, vinhu nenypa. Warâ awylygue, “Kadopâbeom awâkâ” myguelymo. <sup>34</sup> Urâ Uguondo Kaynâpa Âetyby kâwinduadylygue, kadakuilygue warâ, “Idolai awâkâ. Nhuduypymo tâinze, tânyze alelâ. Impostu epywado emakewâni modo, kurâdo inakai modo eataen-ho warâ awâkâ” myguelymo. <sup>35</sup> Aguitobyry wâgâlâ Deus xurâem, Deus xurâempa warâ kydâzeholy – kely Jesus.

### *Jesus Simão etyram âwinduase idâhobyry*

<sup>36</sup> Tâlâ myani uguondo Simão keho. Fariseu myani mâkâ. Jesus ingâsedyly myani tâtyram âwinduase idâhoem. Jesus idâly. Egawântybyem ekadyly tâwinduatoem. <sup>37</sup> Tâlâ myani târâ xidadâ oday pekodo inakanhe kehoem aityby. Jesus olâ inakanhe aitobyry modo xygakeimbyryem. Inakanhe adâitobyry modo Jesus nhygakehobyry wâgâ myani mâkâ pekodo eagâ tuomare tawyly tienehondye awyly. “Kopae fariseu Simão etydâ ise Jesus âwinduadyly” kely tydase myani. Aituo Jesus âwinduatoram idâly. Uriza etary tâwâenseim alabastrogue xygatyby myani tagâ nhakyly urizague tase. <sup>38</sup> Egawândyly. Jesus eydâ atoram iwaguepa kehoem idâly. LÂPU idyly. Eogumadyly. Aituo Jesus ihuru inkuiy tânugurugue. Tyangahuduguelâ Jesus ihuru in-huguoguely. Ihuru nhonugudyly. Ihuru onwa uriza nhapâdly. <sup>39</sup> Pekodo aidyly tientuo myani Simão aguely tyangahu oday:

— Deus eynynâ agueim mâkeba keanra awâkâ Jesus. Deus Ingontybylâ-ro watay, tutuze tâise, awâkâ pekodo toenzepa inakai lelâlâ awyly. Mâ’ nâiehowâbyra tâise warâ — kely myani Simão tyangahu odaylâ.

<sup>40</sup> Simão xunâry tutuze olâ myani Jesus. Aituo eyam aguely:

- Simão, koendâ idakâ. Âdylâ auguedyse watobe urâ âyam — kely.
- Aguekâ lelâ, Ienomedâni — kely.

<sup>41</sup> Aituo Jesus aguely:

— Tâlâ myani azagâ uguondo, tydinerugueinram dinheru ekanibyry modo. “Ipywaze lelâ xina” kewânmomy. Tokalâ myani imâem kehoem dinheru ekani, quinhentas moedas pratagueto lelâ. Eagonro myani âdiempalâ nhekadyly, cinquenta moedas prataquetolâ. <sup>42</sup> Akaemo azakâlâ olâ myani, tienkadyby ebyry nudupamo, âdy peba tawylymogue. Aituo dinheru xuduimpyry aguely azakâlâam: “Âdainkâba. Enanânehonze lelâ urâ awârâ” kely azakâlâam. Aituo, mâkâ azakâlâ tâpywabyra ato nhenanânehonly — kely Jesus.

Aituo Simão nhapâiguely:

— Âdaunloka mâkâ ewy ogondarymo enanânehonze lelâ urâ keduo, mâkâ agueypy iwyneni kuru, imâem tugondagueim, imâembâ tugondagueim? Âdara inanaji, Simão? — kely.

<sup>43</sup> Aituo Simão in-hoguly:

- Mâkâ imâem tugondagueim – kely.
- Iozelâ mihoguagui – kely Jesus.

**44** Jesus MYK idyly pekodoam. Simâoram agueondly:

— Metai merâ pekodo anhekyly. Amânhetyby takaze kehoem merâ pekodo ayedly; ywynecâ kuru tawyly nhenehonly, xurâem agânhetyby wâgâ. Kâzewenryem adakobâni aieto ara ayepyra enra âmâ. Ity odaji iegawâmpygueduo, agâ tâwaneinram uhuguoguehonwâbyra enra âmâ. Merâ olâ tânuguruguelâ kehoem uhuru nigokeagui. Tyan-gahudugue uhuguogueagui warâ. **45** Yaimpygueduo, wonugubyra enra âmâ. Merâma uhuru ionuguzezelâ. **46** Âdiempalâ azeiti yangahu onwa mânhepyra enra âmâ. Merâma uriza tâwâenseingue kehoem uhuru niârânzeântai. **47** Warâ âyam auguely, Simão. Toenzepa yagâ tuomaru nhenehonly merâ pekodo, idânârâ inakanhe aitobyry modo kâyngakeduo. Imâem inakanhe aitobyry kâyngakewâdyby modo, imâem lâpylâ aidylymo urâem ywynecâ tawyly tienehon-homoem. Imâemba kulâ inakanhe aitobyry kâyngakewâdyby modo olâ imâemba kulâ urâem aidylymo – kely.

**48** Ilâpyryem myani Jesus aguely pekodoram:

— Idânârâ nhutuhomoem, saguhoem inakanhe amitobyry modo xygakeimbyryem wawyly, augueondly. Inakanhe amitobyry modo xygakeagui – kely.

**49** Târâ eagâ âwinduataynrim modo aguelymo:

— Idataungâ! Arâ aguepa tâise awâkâ. Deus lelâ inakanhe aguitobyry modo xygakeim, âdaunlo kulâ mâkeba – kelymo.

**50** Jesus olâ pekodoram aguely:

— Yeinwândylygue, enra imakely. Agâlâ ise Deus nheniem – kely.

## 8

### *Pekodo modo, Jesus eynynonro modo warâ nhemawyadâdomobyry*

**1** Iweâpa itybyem Jesus adakobâze idâly xidadâ modo anakâ, poji anakâ warâ, unâ iwâkuru agueze, âdara Deus kywymâryem awyly wâgâ. Doze eynynonro modo eagâ tâtâzemo myani. **2** Xidadâram, poji anaxi warâ tâtâly iraynâ, Jesus pekodo modo tâwâneim, kadopâgue taseim modo warâ kua nhedyly. Azagâ tokalâ warâ mâkâ ewy Jesus einwânniem imâ: Maria Magdala donro (sete kadopâgue taseimbyry Jesus kua nhetyby), **3** Joana, (Herodes isejiguy eni Cuza iwydy), Susana, eagonro pekodo modo lâpylâ warâ, Jesus, eynynonro modo tâmawyadâzemo myani, tydineruruguelâ, tâlâ tatoguelâ warâ.

### *Jesus trigu ewy tamuinze etâni wâgâ unâ nhegatuhobyry*

(Mt 13:1-9; Mc 4:1-9)

**4** Toenzepa kurâdo Jesus aguely idase idâlymo, xidadâ âkelo anano modo warâ kehoem. Idânârâ âtâdyguybyem awylymo ume myani enomedâzemo unâ nhegatuly; **5** aguely:

— Tâlâ myani uguondo trigu tamuinze etâni typi ezay. Nhamuinday, tâlâ myani ânwa oze ihugueim. Mârâ myani sakadaynrim modoram tadakabeoze, konopio modoram tadaguze warâ. **6** Tâlâ pylâ myani toenzepa tuhube atoram ihugueim. Mârâ myani tyazeze, tyluseze warâ. Ago nipyra olâ. Iladaynly lelâ, iwindy ago ondaxi nâtâba awylygue. **7** Tâlâ myani tyguyreimpe atoram ihugueim. Tyguyreim modo, trigu modo warâ âzekiba ago tâise myani. Tyguyreim olâ ago ini kuru, trigu takaze kehoem. Aituo kopâ ihugueyby nikuiba. Mârâ duay tawylygue trigu newiseba. **8** Tâlâ myani onro iwâkuru onwa ihugueim. Iazewâdyly, ilusewâdyly, koendâ ago itaynly warâ myani. Toenzepa myani mârâ nady modo onro koendonro wâgâ iazeyppy ewitunu. Koendâ kehoem myani ekaunâdyly, toenzepa ewitugue. Ewy wâgâ cem lelâ myani ewily nhuduly – kely Jesus.

Eyanmo Jesus aguely:

— Xirâ unâ koendâ mâuntudyze âmaemo-ro watay, koendâne angahumo odaji ietaungâ — kely.

*Jesus âdakeze nady wâgâ adâkely awyly aguehobyry  
(Mt 13.10-23; Mc 4.10-20)*

<sup>9</sup> Akaemo doze lelâ Jesus eynynonro modo nutubamo âdakeze aguely awyly. Aituo nhapâiguelymo:

— Âdakezeka awârâ unâ aguely? — kelymo Jesusram.

<sup>10</sup> Aituo Jesus aguely:

— Saguhoem mykâinane Deus nutuen-homba âdara idânârâ iwymâryem tâidyly. Urâlâ olâ xutuen-hoim âyanmo. Koendâ ise âyanmo kâuntuen-honly. Deus koendâ tiuntudyzebaom modoram olâ unâ tâgatuzeingue kulelâ kâenomedâdyly. Agânhedyly tâensemolâ wâne, nepyramo-ro waunlo ara kulelâ. Auguely tydasemolâ wâne, âdakeze auguely nutubamo olâ ise, nidapyra waunlo ara lelâmo.

<sup>11</sup> — Unâ nady ewy târâ târâ warâ ihugueyby, âdakeze kâenomedâdo aguely awyly ise kâengatuly. Mârâ nady ewy ara mawânrâ Deus itaumbyry aidyly. Târâ târâ warâ onro onwa nady ewy samuin-hobyry ara lâpylâ mawânkâ Deus itaumbyry idataynrim modo âzekiba lelâba nheinwândylymo. <sup>12</sup> Mârâ nady ewy ânwa oze tamuinze etâdyby tadaguoze, tadakabeoze warâ. Aituo âdy niazepa myani târâ samuin-hobyrydâ. Tâlâ lâpylâ arâ Deus itaumbyry idataynrim modo. Tydasemo wâne. Inepa olâ Satanás idânârâ indatybymo nhangahumo odanya nhetyly. Aituo Deus neinwâmpyra idylymo.

<sup>13</sup> — Mârâ nady ewy onro tuhubeom onwa ihuguewâdyby inepa kehoem iazely. Iwindy modo ago ondaxi nâtâba awylygue olâ, inepa nady iladaynly, iguewâdyly warâ. Tâlâ lâpylâ arâ Deus itaumbyry idataynrim modo. Tindatyby modo tâinwânsomo tuomare kehoem. Tâzenagazeoduo, âwankuem tâiehoduo, tâdunâgueoduo warâ olâ inepa kehoem Deus neinwâmpyra idylymo.

<sup>14</sup> — Mârâ nady ewy tyguyreim duaxi ihuguewâdyby, ago tâise wâne, newiseba olâ, tuahuze mâtâ tyguyreim awylygue. Tâlâ lâpylâ arâ Deus itaumbyry idataynrim modo, Deus tâinwânsomo wâne. Âdype tidyly kulâ, tohomaendyly kulâ warâ olâ enananomo. Toenzepa tydinerugadyly kulâ ize atomo warâ. Awylygue Deus nhenanânehonlymo, ize ato aniempyra idylymo warâ. Deus wâgâ ânguy agâ aguepa idylymo.

<sup>15</sup> — Mârâ nady ewy onro iwâkuru onwa ihuguewâdyby olâ koendâ iazely, ago idyly warâ. Toenzepa ewisely. Tâlâ myani ewy wâgâ cem lelâ ewily xuduim. Tâlâ lâpylâ arâ Deus itaumbyry idataynrim modo, tindakylymo, nheinwândylymo lelâlâ. Deus aguehobyry wâgâ lelâ âpaunzedylymo. Adyesemo lelâlâ Deus “Aietuangâ” kehobyry — kely Jesus.

*Âdy kioempyra kine Deus kurâem anhetyby  
(Mc 4.21-25)*

<sup>16</sup> Aituo Jesus aguely:

— Tâdâzesagon-ho kienmanâduo, âdylâ iaxi kioentaymba kurâ. Kama iaxi kioempyra lâpylâ kurâ warâ. Kayanlâ kianlokuândyly ejidyanlâ, idânârâ âwântaynrim modo nhesagon-hoem. <sup>17</sup> Idânârâ unârâ mâuntuba mitomoemba xirâ auguely. Koendâ kehoem mâuntuhomoem auguely. Idânârâ soentaymba modo âjiepanâgueoze lelâ. Idânârâ tydasenrybyry âjidahoze.

<sup>18</sup> — Idânârâ auguehobyry koendâ idataungâ. Imâem ywâgâ mâuntudyze âmaemo watay, imâem ise mâuntulymo. Ywâgâ mâuntudyzeba âmaemo watay olâ, imâembâ mâuntuybymo enanânehonze âmaemo. Utuba ise âmaemo warâ — kely Jesus.

*Jesus tyze, tukonodo warâ wâgâ aguehobyry  
(Mt 12.46-50; Mc 3.31-35)*

<sup>19</sup> Jesus aguely ume ise, iukonodo warâ saindylymo eydâ atoram. Toenzepa myani kurâdo eyam iwaguepa saintomoemba. <sup>20</sup> Aituo tonlo modo ewy Jesusram aguely:

— Âze, âukonodo warâ tarâ kuohomo. Agâ adâkedyzemo — kely.

<sup>21</sup> Jesus aguely idânârâ tonlo modoram:

— Yze lelâlâ mâkâ pekodo. Konodo lelâlâ akaemo uguondo modo warâ. Deus xunâry idataynrim modo, aietaynrim modo warâ olâ yze ara, konodo ara warâ kâenkyly — kely Jesus.

*Jesus sapezenru ton-honreim, kopâ tyelugueim agonro nhepagunâdobyry  
(Mt 8.23-27; Mc 4.35-41)*

<sup>22</sup> Alâ myani pepi odaxi âxiedybyem Jesus tynynonro modoram aguely:

— Paru kuyam inoro — kely.

Aituo âzekuâdylymo. <sup>23</sup> Tâzkuâdaymo myani Jesus xykyly. Kopâ sapezenru ton-honreim agonro adaguly. Toenzepa kehoem paru adahugânily. Pepi xumyly parugue, xytyzeaji kehoem idyly. Kâmaynomoem kehoem myani. <sup>24</sup> Aituo âseanedlymo xytyzeaji kehoem tawylymogue. Tâseaneduomo, Jesus nhuagueândylymo. Adaenkelymo:

— Pymâ, âwaguegâ! Aukâ! Kyiguely ise xirâ! Pepi xytyzeaji xirâ! — kelymo.

Aituo saudyly. Ton-honre kehoem aguely:

— Arâ kehoem tadapezeinzeba ikâ! — kely sapezenruram.

— Tahugâneba ikâ. Ipagugâ — kely paru sahugânuram warâ.

Agueduo tapezenremba idyly, paru tahugâneba idyly warâ. <sup>25</sup> Aituo tynynonro modoram aguely:

— Yeinwâmpyra lelâ waunlo ara lâgâlâma âmaemo! — kely.

Toenzepa âsewânily, âseguâdâdylymo warâ. Aguelymo:

— Etaungâ! Sapezenru nadapezeimba itoem adyese. Paru tahugâneba itoem adyese warâ. Âdara kuruka awârâ modo anhedyly? Ânguy kuruka awâkâ? — kelymo.

*Jesus uguondo kadopâgue taseim kua nhetobyry  
(Mt 8.28-34; Mc 5.1-20)*

<sup>26</sup> Jesus, tynynonro modo agâ saindyly myani paru Galiléia kuyam, Gerasaram\*.

<sup>27-29</sup> Jesus pepi odayba ipygueduo myani uguondo mâtâ xidadâ odano eyam idâly. Iweâpa myani mâkâ uguondo, kadopâ modoram inakanhe âieholy. Âtâ oday nitaymba mykâinane. Tâtyemba mykâinane adakobâdyly tâdâzepyâdo odakâ. Alâ myani korenty ferroguetogue in-hugâjilymo, nhemakâjilymo warâ. Tatâwâze lelâ olâ mykâinane kadopâ modo eon-honrugue. Kadopâ modolâ mykâinane sani âdy peba atoram. Aituo Jesus iopaji saintybyem, mâkâ kadopâgue taseim toenzepa kehoem adaenkely. Jesus enado âzeguhoam idyly. Jesus aguely kadopâ modoram:

— Igasewâdaungâ merâ uguondo odaypa — kely.

Arâ Jesus agueduo myani kadopâ modo mâkâ uguondo ioday aguelymo Jesusram:

— Xina kâdynanâdâ, Jesus, Deus Ton-honreim Imery! — kely ago kehoem.

<sup>30</sup> Arâ adaenkeduo Jesus aguely eyam:

— Ânguya izedy? — kely.

— “Aguiom” iezyed — kely myani.

Arâ aguely, agui kadopâ modo tuoday awylygue. <sup>31</sup> Kadopâ modo aguely:

— Mâtâ tâtagueim tuhuadaguentry odaji xina kâjigonodâ, xina âsenagazedoram — kelymo. Tadaenkeze myani aguezesedylymo.

<sup>32</sup> Tâlâ myani târâ iwaguepa toenzepa pâsega âwinduani modo iwy wâgâ. Aituo kadopâ modo aguelymo Jesusram:

— Awâkâ pâsega modo iodaxilâ xina igonokâ — kelymo.

\* **8:26** Gadara lâpylâ myani mâtâ âji ezedy.

Aituo Jesus eyanmo aguely:

— Tâwâlâ idâwâtaungâ iodaximo — kely.

<sup>33</sup> Arâ Jesus agueduo myani, kadopâ modo uguondo odaypa egasewâdyly. Pâsega modo odaxi egawândylymo. Kadopâbe tâituo myani, pâsega modo enuimbadaynly. Egatudylymo. Iwy wâgâpa adamunedylymo paikaji. Idânârâ kehoem tyense; iguewâdylymo.

<sup>34</sup> Pâsega eni modo, iwy wâgâpa pâsega paikaji adamunedyly emâmomy. Mârâ tientuomo, âwenkelymo. Inepa kehoem idâlymo xidadâram. Poji anakâ takadaymo tonlo modoram nhegatulymo pâsegado aitobyry. Xidadâ odaxi taintuo myani tonlo modoram aidyly tientyby nhegatulymo lâpylâ. <sup>35</sup> Arâ egary tindatuomo, xidadâ odano modo aityby ese idâlymo lâpylâ. Jesusram saindylymo. Myarâ saintybyem myani uguondo kadopâgue taseimbyry nhedylymo. Âzetydâdybyem, ekadybyem warâ Jesus aguely idase saguhoem tientomobypy araba. Koendâ, kua itybyem tientuomo myani Jesus nhytadlymo, kadopâ modo nhâkyze eon-honrugue. <sup>36</sup> Jesus awâkâ uguondo kua nhedyly etaynrimbyry modo tientyby wâgâ nhegatulymo. <sup>37</sup> Aituo idânârâ Gerasa eynynonro modo Jesus nhytadlymo.

— Âdylâ aiese awâkâ tarâlâ watay — kelymo.

Aituo eyam aguelymo:

— Âxiguegâ xina ety anayumba. Taynynâ inkâba ikâ — kelymo, Jesus tâguymo pâsega nhaindyseba tawylymogue.

Agueduomo Jesus âxiguely; pepi odaji âxiedyly, tâtâhoem.

<sup>38</sup> Aituo kadopâgue taseimbyry aguely eyam:

— Idâze urâ agâ — kely.

Jesus olâ aguely:

<sup>39</sup> — Itynra odopâgâ. Âmâem Deus anhetyby egatura — kely.

Agueduo, uguondo idâly. Idânârâ târâ tâtyuneim modoram, Jesus kua tyetobyry egatuwânmmy.

*Jesus pekodo tâwâneim kua nhetobyry, âwynsaundo igueypy kurâem nhetobyry warâ (Mt 9.18-26; Mc 5.21-43)*

<sup>40</sup> Jesus, eynynonro modo warâ mârâ parulâ myani nhekuâdonguylymo. Toenzepa myani kurâ domodo târâ mâkâ inwânwânsse awyly. Iomarumo saindyly tientuo.

<sup>41</sup> Eagâmo aguely ume myani uguondo Jairo keho, âtâ tâdâtâdyguyho iwymâry, Jesus iopaji saindyly; âzeguhoam idyly enado. Aguely:

— Inoro wao ietyam. <sup>42</sup> Iexiry, tokaleom, doze anugueto toenzepa ewânu, iguezeseaji kehoem. Kua ietâ wao — kely.

Aituo myani Jesus eagâ idâly. Idâday, tokonoze kehoem kurâ domodo.

<sup>43</sup> Tâlâ lâpylâ myani pekodo tâwâneim kurâ domodo duay. Imery etary myani âunkeim; kuapa idyly agâ toenzepa myani iunu ihuguely, toenzepa lelâlâ. Doze anupe myani mâkâ arâ ewânu. Tâpyneândylygue mykâinane idâzesedly kua kyeni modoram. Tâwâense nhepywadyly, kua nipyra-ro warâ. Âdara tienwiândyly awyly nutubamo olâ mykâinane. Toenzepa kua kyeni modo epywanibyryem myani kua tâitoem tâkewâduo, idinheruru olâmy adainwâm. <sup>44</sup> Aituo myani saindyly Jesus ikaynâ. Eyam taintuo, ety iwogonro MÂ' nhedyly, ikaynâlâ. Ety MÂ' nhedyly umelâ kehoem myani iunu ihuguely epagudyly, kua idyly.

<sup>45</sup> Aituo Jesus nhapâiguely:

— Ânguya enra MÂ' yeny? — kely.

— Urâ keba — kely Jesus iopano modo.

Aituo Pedro aguely:

— Egâ, toenzepa tarâ kurâ domodo awyly; onwa MÂ' tâiselâ kehoem, Pymâ. Agui asaemo ewy MÂ' âetai — kely.

<sup>46</sup> Jesus olâ wakely lelâ:

— Ânguylâ MÂ' yetai. Won-honrugue ânguylâ kua xietai, xutuanze — kely.

<sup>47</sup> Mâkâ pekodo myani totoendo nutuba tâituo. Tyanugue, tapâne kehoem Jesus enadoram saindyly. Âzeguhoam idyly, tâinwânse tawylygue. Idânârâ enanaynmo aguely:

— Urâ enra MÂ' âeni, Jesus, kua yeniem mawyly, kâuntuduo. MÂ' âetuolâ enra koendâ kehoem kua widly — kely.

<sup>48</sup> Aituo Jesus eyam aguely:

— Kua itybyem âmâ, kua kyettâ wawyly mâinwântobyry wâgâ. Idâ lelâ itynra Tâseguâdâzeba ikâ — kely Jesus.

<sup>49</sup> Jesus aguely umelâ Jairo ety donro saindyly, aguely:

— Jairo, ipa ixiry, nigueaki! Itynra âdaiseba kulâ Jesus kadadâ — kely.

<sup>50</sup> Mâkâ aguely tindatuo Jesus Jairoram aguely:

— Tadahulizeba ikâ. Yeinwânkâ. Kurâem itonze lelâ ixiry, koendâ ise lelâ warâ — kely.

<sup>51</sup> Aituo myani saindylymo Jairo etyram. Jairoram aguely:

— Inoro âmâ, âwydy warâ igueypyram — kely.

Ilâpyryem tynynonro modoram aguely myani:

— Pedro, João, Tiago alelâ xina agâ negawândâ. Eagonrodoma talâ wao nidâ — kely.

<sup>52</sup> Idânârâ târâ âtâdyguyby modo eogunrunu, itynrunu warâ, âwynsaundo igueduo.

Aituo Jesus aguely:

— Tuogunrepa itaungâ. Niguewâpyra awâkâ âwynsaundo, xykyly kulâ — kely.

{Arâ aguely, kurâem tientondly tiuntuduomo.}

<sup>53</sup> Arâ agueduo myani nheinledylymo. Igueypyem lelâlâ awyly tiuntuduomo, nâepaigueba awylygue. <sup>54</sup> Jesus idâly myani igueypy eguetunâdobyryram. Egawântybyem myani Jesus âwynsaundo igueypy emary sawânipryem aguely:

— Aukâ, âwynsaundo — kely.

<sup>55</sup> Adâkehonly umelâ kehoem myani âwynsaundo âepaigueondly, kurâem itondly, saudyly idyly. Ilâpygueduo myani Jesus aguely âwynsaundo sodo modoram:

— Xuataungâne — kely.

<sup>56</sup> Nhunwym, ise warâ toenzepa kehoem âsewânilymo. Warâ olâ myani Jesus eyanmo aguely:

— Ânguyran-ne tarâ aityby kâzegatuwâdaundâ — kely.

## 9

*Jesus tynynonro modo Deus wâgâ unâ iwâkuru egatuze ingonotobyry*

(Mt 10.5-15; Mc 6.7-13)

<sup>1</sup> Jesus doze tynynonro modo ingâsedly myani. Eyanmo aguely:

— On-honrumo kâunduly, idânârâ kadopâ mânhâkyhomoem, tâwânuim modo kua mânhetomoem warâ. Won-honrugue ise amidlymo. <sup>2</sup> Aguewâtaunda unâ iwâkuru, âdara Deus kywymâryem idyly awyly wâgâ. Tâwânuim modo kua ietaungâ. <sup>3</sup> Mydâdaymo âdy kadataundâ. Amatagorumo ânwa oze mâzesebydâdomoem kadataundâ. Sakola kadataundâ. Pyni, dinheru warâ kadataundâ. Owogonromo lelâ itymo sataungâ, mâtuguguehomo kadataundâ. <sup>4</sup> Âtâ anaxi aintuomo, saguhoem âgâsenimobyry etydâlâ itaungâ. Târâlâ âkywâdaungâ, âkelo âtâ anaryam mydâlymo ara. <sup>5</sup> Mârâ xidadâ odano modo idaenkubamo, unâ mâengatulymo tindadysebamo warâ watay, inepa târâpa âxigewâdaungâ. Igasedaymo âhurumo etary etywâdaungâ, xutoleguguewâdaungâ warâ, Deusram tânagazezeim awylymo xutuhoem, ize wato ara anipyra awylymogue, yeinwâmpyra awylymogue warâ — kely myani Jesus.

<sup>6</sup> Aguepygueduo eynynonro modo idâlymo, myarâ, myarâ warâ, unâ iwâkuru egatuze, âdara Deus kywymâryem idyly awyly wâgâ, tâwânuneim modo kua iese warâ.

*Herodes Jesus ânguyem awyly nutuba atobyry  
(Mt 14.1-12; Mc 6.14-29)*

<sup>7</sup> Herodes myani Galiléia eynynonro modo iwymâry. Idânârâ kehoem Jesus, eynynonro modo warâ aidyly egary indadyly. Aituo Jesus wâgâ âdatâkeho nutuba idyly. Tâlâ wakenri modo:

— João Batista kurâem itondyby awâkâ Jesus — keim.

<sup>8</sup> Tâlâ lâpylâ myani wakenri modo:

— Mâkâ mâkeba awâkâ. Elias, awâkâ Jesus-em ini — keim.

Tâlâ pylâ,

— “Mâkâ mâkeba awâkâ. Saguho modo Deus itaumbyry egatuwânyibyry ewy kurâem ityby awâkâ Jesus” keim.

Awylygue Herodes âdatâkeho nutuba idyly. <sup>9</sup> Aituo myani aguely:

— Tutuze ku-aze João Batista igueypyem awyly-ro. Urâlâma keankâ nhangasagânehoim. Ânguka awâkâ Jesus? Âdaunlo uguondo kulâ mâkeba keanra awâkâ, adyesenry anhetoem ton-honre awyly egary xidadâ mawânkâ — kely.

Toenzepa myani Jesus tiendyse awyly.

*Jesus cinco mil uguondo modo, cinco pão, azagâ kanra âjihuyby warâgue nhuantobyry  
(Mt 14.13-21; Mc 6.30-44; Jo 6.1-14)*

<sup>10</sup> Jesus xunâry egatuze odopâdaynlymo. Odopâdaymbyem myani adientaymby modo Jesusram nhegatulymo. Ilâpygueduo myani Jesusram adaholymo Betsaidaram, akaemo kulelâ tagâ itoem wâne. <sup>11</sup> Agui olâ myani kurâdo Jesus idâypyem awyly xutuwâni modo. Aituo idâlymo xuize. Saintuomo myani Jesus nhedaenkulymo. Deus idânârâ iwymâryem ituo âdara aidyly awyly wâgâ myani aguely. Tâwânuneim modo kua nhedyly lâpylâ.

<sup>12</sup> Iguandyly awylygue myani akaemo doze Jesus eynynonro modo Jesusram idâlymo; eyam aguelymo:

— Iguandyly enra. Egâ toenzepa kurâdo! Xurâmoem pyni peba, xykyhomo peba warâ tarâ. Âpa ezajilâ, âtâ anary iwaguepaom modoranlâ warâ asaemo igonokâ, âwinduatomoem, xykyhomoem warâ — kelymo.

<sup>13</sup> Jesus olâ warâ aguely:

— Tarâlâ nidâmo. Âmaemolâ ipynirymo âunduwâtaungâ — kely.

— Nuduwâpyra xina nhuantomoem! Cinco pão, azagâ kanra âjihuyby alâ kulâ taunlo. Xina idâdyseka âmâ âdyanlâ pyni xuize, asaemo kurâ domodo xuatoem? — kelymo.

<sup>14</sup> Toenzepa myani târâ kurâdo awyly, uguondo modo kulelâ cinco mil lelâ\*.

Aituo myani Jesus aguely tynynonro modoram:

— PU târâ, PU târâ, PU târâ warâ cinquenta, cinquenta warâ âzepajiwâdomoem aguewâtaungâ — kely.

<sup>15</sup> Jesus aguehobypy ara anhedylymo. <sup>16</sup> Aituo myani Jesus cinco pão, azagâ kanra âjihuyby warâ sanânyibyryem kayam MYK idyly. Deus agâ aguely:

— Koendonro lelâlâ âmâ, Pabai, awylygue xinaem xirâ pão, merâ kanra warâ mânduly — kely.

Ilâpygueduo pão, kanra âjihuyby warâ nhepajiwâdyly. Tynynonro modoram nhuduly, kurâdomoem nhepâdomoem. Nhêpâdaymolâ kehoem myani Jesus pão epajiwâdyby, kanra âjihuyby warâ agui nhenehonly. <sup>17</sup> Ize tato ara kehoem myani idânârâ kurâdo âwinduadyly; kanra âjihuyby nhâdylymo, pão nhedawynlymo, koendâ kehoem iolataynlymo warâ. Ilâpygueduo myani Jesus eynynonro modo pão, kanra âjihuyby warâ

\* <sup>9:14</sup> Pekodo modo, iamimeom modo warâ tapâguezeba myani.

âsegubydâdaymby nhekanâdylymo cestu imâsedo odaji. Doze cestu tumyke myani âsegubydâdyby nhekanâdylymo.

*Pedro, "Messiaslâ âmâ" Jesusram kehobyry  
(Mt 16.13-20; Mc 8.27-29)*

<sup>18</sup> Alâ myani Jesus idâly mâkâ kulelâ, Deus agâ agueze. Eagâlâ myani eynynonro modo iwaguepalâ. Deus agâ agueypyem tynynonro modoram aguely:

— Ânguy tâkezeka inanry kurâdo yam? — kely.

<sup>19</sup> Warâ myani eynynonro modo in-hoguly:

— Tâlâ inanry, “João Batista kurâem itondyby awâkâ Jesus” keim modo. Tâlâ inanry, “Elias, awâkâ” keim modo. Tâlâ lâpylâ inanry, “Deus eynynâ aguewâtyby modo ewy kurâem itondyby awâkâ” keim modo warâ — kelymo.

<sup>20</sup> — Âmaemo-ro? Ânguy tâkeze âmaemo yam? — kely Jesus.

Aituo Pedro in-hoguly:

— Messiaslâ âmâ, Deus ingonotyby — kely.

<sup>21</sup> — Mâkâlâ urâ. Iweâ kuru wao olâ Messiaslâ wawyly kâzegatuwâdaundâ — kely Jesus eyanmo.

*Jesus tyiguely wâgâ, kurâem tâitondyly wâgâ warâ aguehobyry  
(Mt 16.21-28; Mc 8.31-9.1)*

<sup>22</sup> Aituo myani Jesus eyanmo agueondly:

— Urâ Uguondo Kaynâpa Âetyby, toenzepa âsenagazeze urâ. Kywymâry modo yizemo inkâba ise. Kurâdo eynynâ Deus agâ aguewâni modo iwymâry modo, Moisés inweniby wâgâ enomedâni modo warâ ienagazenehonzemo. Akaemo ise yiguehoem aienehonrim. Yigueduo, azagâ<sup>†</sup> emedyly idyly wâgâ olâ ise kurâem witondyly — kely.

<sup>23</sup> Ilâpygueduo myani Jesus aguely idânârâ tonlo modoram:

— Ynynonroem ize mataymo, augueho ara aitaungâ. Kopaelâgâembaba ize wato lelâ aietaungâ; amânhedyse matomo mâkeba aietaungâ. Kurâ tyâzeim kruz nhadyly tyâhoram myara, ynynonro modo on-hondybyem nidâ igueze. <sup>24</sup>“Jesus eynynonro keba urâ” myguelymo, tyâzepa mitomoem kulâ watay, âdiempa kulâ ise xirâ anaym kurâem mawylymo. Âigueduomo, Deus enadoram mydâwâpyra ise âmaemo. Yeinwândylymogue mâdylymo watay olâ, Deus enadoram idâze âmaemo; aunloenlâ ise eagâ mawylymo warâ. <sup>25</sup>Tâwâlâ wâne âdydo imeom sodoem mawylymo, ize mato modope mawylymo warâ, Deus eydâ atoram mydâhomoem nepywabyra olâ awârâ modo. Deus agonro keba âmaemo watay, âdype matomo âdy mâkeba. Ânguy niguepa tâitoem nepywadaymba. Tâdâsenagazedo amaxi ise mydâlymo. <sup>26</sup>Uguondo Kaynâpa Âetyby urâ. Idâze urâ Deus eydâ atoram. Odopâze olâ urâ Deus dompyryem. Kodopâdyly ise Kunwym eon-honru tânehonze. Anju domodo mâkâ ingonotyby ehozelugue tânâmize kehoem ise kâewyly. Kurâ domodo enanaym ywypazeni modo, kâenomedâdo iwypazeni modo warâ, kodopâduo, iwypazeze lâpylâ urâ. <sup>27</sup>Asaemo ydataynrimbyry modo ewy Deus lelâ pymâem idyly enipe ise. Xirâ mâuntudyzemo kuru wato — kely myani Jesus.

*Iwy wâgâ Jesus âkeloem itobyry  
(Mt 17.1-13; Mc 9.2-13)*

<sup>28</sup> Tokalâ semana awârâem ipygueduo myani Jesus iwy onwa âkuly, Deus agâ agueze. Pedro, Tiago, João warâ kulâ myani tagâ nhakyly. <sup>29</sup>Deus agâ aguely ume myani Jesus âkeloem idyly. Emydy âkeloem idyly, ety iwogonro toenzepa kehoem sapeku, ehozelu idyly. <sup>30</sup>Aituo myani azagâ uguondo modo târâ âepanâguely, Moisés, Elias warâ myani.

<sup>31</sup> Aguelymo myani Jesus agâ Jerusalémdâ âzenagazeoly wâgâ, iguely wâgâ warâ, Deus aguehobyry ara. <sup>32</sup>Pedro, eagonro modo warâ toenzepa ekozeybyem tawylygue myani

<sup>†</sup> 9:22 Nota de pé Mateus 12.40dâ egâ.

xykylymo, azagâ Deus donropyry âepanâgueday. Xuaguelymo. Jesus âkeloem itybyem nhedylymo, tohozele kehoem. Azagâ uguondo eagâ nhedylymo. <sup>33</sup> Jesusdâpa Moisés, Elias warâ âxiguelymo. Âxiguelymo ume myani Pedro aguely:

— Koendâ kehoem tarâ kydawyly, Pymâ. Azagâ tokalâ warâ âtâ imeimbyryla xina nitâdâ, âmâem, Moisés-em, Elias-em warâ — kely.

Âdara tâkely awyly nutuba kulâ arâ aguely. <sup>34</sup> Pedro aguely umelâ myani eunu âepanâguely. Nhamanâdyly. Pedro, Tiago, João warâ toenzepa kehoem âseanedlymo tydâ iamatu. <sup>35</sup> Eunu duay Deus aguely indadylymo myani:

— Ymery merâ, Messias-em kâingonotyby, “Igonose urâ” uguehobyry. Aguely idataungâ — kely.

<sup>36</sup> Deus aguepygueduo myani mâkâ kulelâ Jesus awyly nhedylymo, Moisés, Elias warâ xuzatybymoem. Jesus eynynonro modo awârâ ânguyram inepa aguepamo, negatubamo warâ myani.

### *Jesus salokuzenomo odano kadopâ nhâkyhobyry*

(Mt 17.14-21; Mc 9.14-29)

<sup>37</sup> Kopaelâgâem myani Jesus eagâ idâypy modo warâ iwy wâgâpa xytâguylymo. Tytâguybygueduomo myani toenzepa kurâdo Jesus inwânwâni modo nhedylymo. <sup>38</sup> Aituo myani uguondo kurâdo duay adaenkely:

— Ymery tokaleom kua iekâ wao, Pymâ! Kadopâ ymery odano nhâkygâ. <sup>39</sup> Kadopâ iodaxi âwândyly watay, inakanhe tyeze lelâ inanry. Toenzepa tadaenkeze, tadapâne, tytabigonzeze warâ inanry. Ymery tânagazeze kuru awâkâ kadopâ. Iguezeseaji tyeze kehoem, âdaunloenlâ nimopa-ro warâ. <sup>40</sup> Âynynonro modoram sekadai wâne, kua nhetomoem. Kua niepyramo olâ enra — kely salokuzenomo nhunwym.

<sup>41</sup> Aituo Jesus aguely:

— Âdy einwânni kebalâ myanze âmaemo! Ânguydo kulâ âmaemo! Agâmo lâwâne urâ, yeinwâmpyra olâ âmaemo. Ynadaize yeinwâmpyra lelâ mawylymogue — kely.

Aituo aguely mâkâ salokuzenomo nhunwynram:

— Enekâ âmery xarâ — kely.

<sup>42</sup> Jesusram salokuzenomo saindyly ume myani onro onwa adameoly kadopâram. Adapânily, ekomadyly warâ. Ton-honre kehoem Jesus kadopâram aguely:

— Igasegâ iweâ lelâlâ merâ salokuzenomo odaypa, kadopâ! Todopâzeba ikâ-ro warâ! — kely.

Aguely tindatuo kadopâ egasely, idâly. Salokuzenomo kua idyly. Kua tiempygueduo nhunwynram nhuduly.

<sup>43</sup> Idânârâ âsewânilymo, Jesus Deus eon-honrugue anhetyby tientuomo.

### *Jesus tyiguely wâgâ agueontobry*

(Mt 17.22-23; Mc 9.30-32)

Jesus salokuzenomo kadopâbeom kua tiempygueduo, tynynonro modoram aguely:

<sup>44</sup> — Koendâne xirâ âyanmo auguely idataungâ. Kâzenanânehonwâdaundâ. Urâ Uguondo Kaynâpa Âetyby yizepaom modo emaxi âzegameoze urâ. Akaemo ise yâen-honri — kely.

<sup>45</sup> Idamâmo wâne, âdakeze aguely awyly nutubamo olâ myani, Deus nhutuhomoem aniempyra awylygue. “Xina nutuba enra âdakeze amyguely awyly. Xinaram wao aguekâ” keze tyanemo olâ myani.

### *Ânguyka tynrenseim kuru?*

(Mt 18.1-5; Mc 9.33-37)

<sup>46</sup> Jesus eynynonro modo ânguy tyduaymo tynrenseim kuru awyly wâgâ âtunâguedlymo. <sup>47</sup> Âjigue aguehomo xutuimbyryem olâ myani Jesus. Aituo iamudo tonlo ingâsedly. Iamudo âetuo, tatadoram nhedyly, <sup>48</sup> aguely:

— Deus xurâem, âduaymo tynrenseim kuru, mâtâ âwâlâ kulâ âtyrendânry. Inanajimo, merâ iamudo âdy keba-ro waunlo ara wâne. Auguely olâ xirâ âyanmo. Pymâem xynru waunlo keba merâ iamudo. Mâtâ ynynonro xurâem koendâ amânhedylymo, tynrenseim keba awyly umelâ warâ watay, urâenlâ amânhedylymo. Âdylâ urâem amânhetuomo, ugongonibyry xurâenlâ ise amânhedylymo lâpylâ — kely Jesus.

*Deus eynynâ aini izepa kipyra kine, âkelo modo duano lelâlâ wâne  
(Mc 9.38-41)*

<sup>49</sup> Aituo myani João aguely:

— Xina Enomedâni, âunâry egatuze tâtâly ume, uguondo on-honrugue kadopâ nhâkyrim xina nedâ. “Jesus eon-honrugue kadopâ modo kâjiâny” xina nygue eyam. Xina ewy keba awylygue keankâ arâ xina aguely — kely.

<sup>50</sup> Aituo Jesus aguely.

— “Adâiseba ikâ” tâkezeba itaungâ. Kuduery keba watay, kataen-holâ mâtâ — kely.

*Samaria donro modo Jesus tynkyândyzeba itomobyry*

<sup>51</sup> Iwaguepa myani Jesus tunwym enadoram odopâdo. Âda tâieholy awyly tutuzelâ myani aralâ olâ Jerusalémram idâly lelâ. <sup>52</sup> Tâtâdaymolâ myani uguondo modo ewy ingonodyly.

— Idâwâtaungâ waunroem, kykyho xuize — kely.

Idâlymo. Saindylymo âtâ anary Samaria eynynonroram. Saintybyem myani tykyho nhuinlymo. <sup>53</sup> Tonlo modo olâ myani Jesus ingonotyby modoram warâ aguelymo:

— Judeu âmaemo. Tarâ xinadâ âkydyzebamô enra xina, Jerusalémram mydâlymo awylygue — kelymo.

{Arâ aguelymo, Samaria donro modo Judeu domodo izepa tawylymogue. Samari-adâma myani Deus ehoguedo, enanajimo.}

<sup>54</sup> Ingnotaymbô modo odopâdyly Jesus agâ oxioze. Eagâ toxioduomo myani aguelymo:

— Samaria donro modo kykydyzeba tâtymo anaym — kelymo.

Tiago, João warâ awârâ tindatuo myani aguelymo:

— Saguhoem Deus ingonokyly myakâwândy peto kau odano, tyizepanro modo tyainhoem. Âdara amyguely, Konomedâni? Deusram peto ingonotoem xina nhekadyzeka âmâ, mâtâ âtâ anano modo iguehomoem? — kelymo.

<sup>55</sup> Aituo myani Jesus MYRYK idyly. Âzeuholymo. Arâ kehoem aguelymo nehoguebyra. Eyanmo aguely:

— Âizepanromoem inakanhe adâiseba itaungâ — kely.

<sup>56</sup> Aituo myani eagonro âtâ anaxi xykyze idâlymo.

*Jesus kieinwândy-ro watay, kieinwândyly kinmopa kine  
(Mt 8.18-22)*

<sup>57</sup> Jesus, eynynonro modo warâ ânwa oze idâlymo ume myani uguondo eyam aguely:

— Âynynonroem widyse urâ. Âdyam mydâhobyryram idâze lelâ urâ, agâ kâsenomedâdoem — kely myani.

<sup>58</sup> Aituo Jesus aguely:

— Ton-honre ise enra. Idânârâ ânguydo imeom tâjikune lelâ, xykyhomobe warâ; poroho, tawâguneim modo warâ tâjikune lelâ. Urâ, Uguondo Kaynâpa Âetyby olâ, iekobyzeguehoenlâ tâtyemba — kely.

<sup>59</sup> Aituo myani Jesus aguely eagonro uguondoram:

— Âekâ yagâ, âdyam udâhobyrydâ, ywâgâ mâsenomedâdoem — kely.

Mâtâ olâ warâ aguely:

— Pymâ, saguhoem pabai ugueho wao ise kâenkyly, niguepa awyly ara. Igueduo, epyâbygueduo ise âynynonroem widyly — kely.

<sup>60</sup> Warâ olâ myani Jesus eyam aguely:

— Yeinwântâny modo igueypy ara kulâ mawânkâ xirâ onro anano wâgâ kulâ âtynanâdylymo. Xirâ onro anano modo wâgâ âtynanâni modolâ igueypy nepyâdâ. Deus kywymâry awyly wâgâ aguera — kely Jesus.

<sup>61</sup> Eagonro uguondo aguely:

— Âynynonroem widyse urâ. Âdyam mydâhobyryram idâze lelâ urâ. Saguhoem kodopâdyly wao olâ ise ypemugudoram âsedaeluge. Ilâpyryem ise udâly agâ — kely.

<sup>62</sup> — Ynynonroem lelâlâ ize matay, ize mato modo enanânehongâ, augueho ara amitoem. Mâinmoyby mâynanâdombyra âmâ-ro watay, Deus emary koendonro ise âmâ, agonro modo duay Deus eydâ atodâ. Ânwa aieni âgânâynra âsemyombâzezedly-ro watay, tâkâine kulâ anhedyly, inakanhe kulâ warâ — kely Jesus.

## 10

### *Jesus setenta e dois uguondo modo Deus itaumbyry egatuze ingonotyby*

<sup>1</sup> Ilâpygueduo myani Kywymâry setenta e dois lelâ uguondo modo induakewâdyly. Azagâ myarâ, azagâ myarâ, azagâ myarâ warâ ingonodylymo. Eyanmo aguely:

— Yraynâ idâwâtaungâ âji udâho modo ara. Xidadâ modoram idâwâtaungâ, poji anakâ kurâdope atoram warâ — kely Jesus.

<sup>2</sup> Kurâdo xuruse ingonodylymo myani. Âji modoram idâlymo iraynâ myani aguely:

— Anji ekaunâdo odano ara ise yeinwântaynrim modo. Anji odo ara awâkâ Deus. Anji ekaunâni ara awâkâ Deus xunâry egatuim modo. Aguipamo kulâ olâ. Deusram ekadaungâ, tâinkâ lelâba tâwanuneim modo unâ egatuze ingonotoem. <sup>3</sup> Deus xunâry egatuze ogonodyly, kaneru, auwa modo duaxi igonodyly ara. <sup>4</sup> Dinhru kadataundâ. Owosarymo kadataundâ warâ. Owogonromo kulelâ âhurumo etary sataungâ, eagonro kadataundâ. Ânwa oze monhontybymo agâ iweâpa tâtunâguezeba itaungâ.

<sup>5</sup> — Âtâ odaji âwântybyem “Deus agâmolâ ise” kewâtaungâ tonlo modoram. <sup>6</sup> Deus xurâem tâidysedonrobe târâ-ro watay, eagâmolâ ise Deus, amyguehomobyry ara. Deus xunâry tindadyseba tonlo modo watay olâ, agâmo kulelâ ise Deus, eagâmopa.

<sup>7</sup> Mârâ âtâ saguhoem kuru mâzekaunâohomobyry odaylâ itaungâ. Nhegameybymo einwâtaungâ, enywâdaungâ alelâ. Âdylâ nhuduypymo einze tywypazeba itaungâ, Deus xunâry mâengatulymoguelâ, mawânrâ âpynirymo mâempwydalymo. Âtâ modo odaji tâtuguezezeba itaungâ, âji iwâkuru koendonro waunlo xuize.

<sup>8</sup> — Âdaunlo âjiram aindylymo, tonlo modo koendâ idaenkulymo warâ watay, târâlâ itaungâ, nhuduypymo einwâtaungâ lelâ. <sup>9</sup> Tonlo tâwânuineim modo kua ietaungâ. “Iweâpa nitaymba ise Deus ton-honru nhenehonly âduaymo” kewâtaungâ tonlo modoram. <sup>10</sup> Âdaunlolâ âjiram mydâlymo, tonlo modo amygueylymo tindadyseba-ro watay, warâ aguewâtaungâ igasedaymo: <sup>11</sup> “Xirâ âji anano onro sawionu tuhuru etary onwa ityby xina nhutolegugue, Deus aguehobyry mâindadyseba mawylymogue âsenagazeze xutuhoem, Deus xunâry âyanmo xina egatuze âetobyry mâindadyseba matomobyry wâgâ. Mâkâ Deus eon-honru enehorim izepa matomobyry wâgâ” kewâtaungâ târâpa mâxiguelymo ume. <sup>12</sup> Sodoma donro modo mykâinane tumunruneim kehoem; awylygue myakâwândy Deus peto in-hugueândyly nhonwamo adain-homoem. Xypyryem, idânârâ turâ keba ara enagazeze. Deus itaumbyry mâengatulymo tindadysebaom modo olâ ise Sodoma donro modo âsenagazedobyry takaze kehoem âsenagazeze. Xirâ mâuntudyzemo kuru wato — kely Jesus.

*Jesus einwântâny modo âsenagazedo  
(Mt 11.20-24)*

<sup>13</sup> Aituo myani Jesus eyanmo aguely:

— Warâ auguedyse wawyly unâry izepaom modoram. Toenzepa kehoem ise mâsenagazedylymo, âmaemo Corazim donro, Betsaida donro modo warâ. Toenzepa adyesenry modo kehoem ajiedâ âjidadârymodâ, Deus eon-honru kâenehohoem. Yeinwândyseba olâ mataunaguyne. Tumunruneim modo akâwândy Tiro, Sidom warâ donro modo. Deus eon-honru enehonze âjidadârymodâ awitobyry ara ânguylâ aidly-ro watay, inakanhe adâidlymo tumozemo olâ tâise. Deus tâinwânsemo warâ. Tâzetydâzemo tâise âtâem saku tyxieim sakâjibygue, pelupâ tyangahumo onwa tyesemo tâise warâ, inakanhe adâitomobyry wâgâ tâjityendy tienehon-homoem, imoimbyryem tawyly tienehon-homoem warâ. Deus eon-honrugue awidyly tâense lelâlâ wâne âmaemo. Inakanhe amidylymo mâinmopa olâ âmaemo.

<sup>14</sup> — Tâdâsenagazedo saintuo, âmaemo ynynâbaom modo toenzepa ise mâsenagazedylymo, Tiro, Sidom warâ donro modo âsenagazedo takaze kehoem. Medâmolâ Deus eon-honrugue awidyly. Akaemo olâ akâwândy nepyramo. <sup>15</sup> Koendonro, tynreim warâ âmaemo, Cafarnaum donro modo, inanajimo. Deus eydâ atoram mydâlymo warâ wâne, inanajimo. Arâpa olâ. Satanás eydâ atoram ise mâjigonoholymo — kely Jesus.

<sup>16</sup> Aituo myani aguely tynynonro modoram:

— Pabai Deus ugonotobyry aralâ, ogonodylymo. Ywâgâ ise unâ mâengatulymo, Pabai Deus wâgâ kâengatuho ara. Awylygue amyguelymo idani modo, auguelylâ indakylymo waunlo ara lelâ ise. Amyguelymo tindadysebaom modo watay, ydadysoba awylymolâ ise. Auguely izepamo-ro watay, Deus xunârylâ ise izepa atomo — kely Jesus.

*Setenta e dois lelâ Deus xunâry egatuwâni modo odopâdobyry*

<sup>17</sup> Deus xunâry egatuze idâypyem myani setenta e dois uguondo modo odopâdobylymo; Jesusram aguelymo:

— Tuomare kehoem xina. Toenzepa kurâ domodo kadopâbeom xina kua niedâ. Kadopâ modo egasewâdly keankâ, Jesus ezedy xina agueduo, “Jesus eon-honrugue xina aidly” xina keduo — kelymo.

<sup>18</sup> Jesus aguely myani:

— Satanás takaze kehoem won-honru. Târâlâ wakâwândy, Deus, Satanás eon-honru nhetyday. Ielu kau wâgâpa ihuguely ara akâwândy mâtâ Deus ezaya ihuguely kâendyly. <sup>19</sup> Idataungâ. On-honrumo xudu, âgâu, ielawada, awâkâ modo mankabeduomo, mâtâhoba mitomoem. On-honrumo xudu; Satanás eon-honru mankado-moem. <sup>20</sup> Âdainkâba kadopâ modo mânâkyhomobyry wâgâ omarumo. Deusram idâwâni modo ezedy iweniho wâgâ izedymo iwenibyem awylygue olâ omarumo kuru nidâ — kely Jesus.

*Jesus, “Koendonro awâkâ Deus” kehobyry  
(Mt 11.25-27; 13.16-17)*

<sup>21</sup> Xirâ umelâ kehoem, Deus Ispiritury Jesus nhomazeândyly. Aituo myani Jesus aguely Deusram:

— Kau odano modo, onro wogonro modo warâ sodo âmâ, Pabai! Âdaunlo modoanlâ âunârybyry mutuen-ho, tonomegueim modoram lelâ inkâba, enomedâdaymby modoram lelâ inkâba warâ. Amânhedyse mato aralâ ise aidly — kely.

<sup>22</sup> Deus agâ adâkebygueduo myani Jesus agueondly tonlo modo agâ:

— Pabailâ idânârâ won-honru, ienomery warâ xuduim. Mâtâ kulelâ koendâ kuru utunri. Urâ lelâ lâpylâ Pabai Deus koendâ kuru xuturim warâ. Eyam kâuntuen-hoymby lâpylâ olâ koendâ Deus xutuze — kely.

<sup>23</sup> Aituo myani Jesus âsemegâiguelly. Tynynonro modoram aguely:

— Tuomareim kuru olâ akaemo won-honru tânugue etaynrim modo, māentomo ara.  
**24** Awidlyl tâense; auguely tydase warâ âmaemo. Saguho Deus xunâry egatuwâni byry modo, saguho pymâ domodo warâ mâenkylymo tiendyse tâisemo myakâwândy, nhetomoem anipyra olâ myakâwândy. Mâindaklymo tindadyse tâisemo myakâwândy, nidapyramo olâ myakâwândy. Xirâ māuntudyzemo kuru wato — kely Jesus.

### *Samaria donro uguondo koendonro xunâry*

**25** Aituo myani Moisés inweniby wâgâ enomedâni saindyly Jesus iopaji. Jesus nhapâiguelly myani, tâzewenrymo eynynâ, eynynâba warâ Jesus in-hoguly awyly tiuntuhoem kulâ.

— Adaraka awidlyl, Deus eydâ atoram udâhoem, aunloenlâ eagâ witoem, Konomedâni?  
— kely.

**26** Jesus in-hoguly myani:

— Moisés inweniby tutuzelâ âmâ. Âdakelyka mâtâ wâgâ iweniby? — kely.

**27** Uguondo in-hoguly myani:

— Deus itaumbyry awo wâgâ iweniby iwâkuru kuru: “Kywymâry Deus iwyna daungâ âdydo imeom, kurâ domodo warâ mânwy nedomo takaze kehoem. Idânârâ ize matomo, Deus ize ato ara lelâ nidâ. Idânârâ amânheklymo, Deus ize ato ara lelâ nidâ. Idânârâ angahumo oday âunâgommo warâ.” “Agonromo agâ âpynedaungâ; koendâ mâzeto ara, arâ lâpylâ agonrodo agâ koendâ âzetaungâ” kewândymy Deus — kely uguondo.

**28** — Âkealâ amyguely. Arâ amidly-ro watay, Deus eydâ atoram idâze âmâ, typgueba kehoem eagâlâ mitoem — kely Jesus.

**29** Moisés inweniby wâgâ enomedâni uguondo koendonroem myani âdutuly. Awylygue myani Jesus nhapâiguelly:

— Ânguyka ise koendâ kâenkyly? — kely.

**30** Aituo myani Jesus unâ tienomedâdoem nhegatuly. Aguely:

— Tâlâ myani uguondo judeu Jericóram idânri, Jerusalém donropyryem. Tâmagaduneim modoram isejiguy âzemagazeoly. En-hem kepälâ kehoem nhetyguelymo. Idinheruru nhemaklymo. Nhapiogulymo. Iguezeseaji kehoem inmolymo. **31** Mâtâ ânwa oze lâpylâ Deus ety oday kurâdo eynynâ Deus agâ agueim idâly myani. Târâ uguondo âdyâypyem ânwa edazekâ nhedyly. Aituo inmyly. **32** Ilâpyryem Deus ety oday tâwaneim, levita kelygue tâzekeim, idâly mâtâ ânwa ozelâ. Uguondo âdyâypy tientuo, sakadyly lelâ, âdaniepyralâ.

**33** — Ilâpyryem myani uguondo Samaria donro sakadyly mâtâ ânwa ozelâ. Samaria donro modo, judeu domodo warâ âjizetonro keba, eagâmo tâtunâguedylylâ izetonro keba. Alâ olâ, mâtâ Samaria donro judeu âdyâypy tientuo, epagudyly, toenzepa kehoem intyendyly. **34** Iopaji saindyly. Âdyâhobyry nhokodyly azeitigue, vinhugue warâ onwa nhedyly. Âdyâhobyry tionkobygueduo myani nhaunâdyly. Tâguy onwalâ nhalokuândyly; nhadyly tâdykyho odaji. Târâ myani emedyly ara kehoem nhonse awyly. **35** Emetybyem myani uguondo Samaria donro azagâ dinheru tâwâenseim nhetyly tysejiguy tiankobâdo odaypa. Tâdykyho sodo nhepywadyly. Aituo myani aguely: “Udâzesedyly ise enra. Koendâ waone merâ nhonkâ. Anra dinheru âdylâ sanâto awâkâ xurâem. Xuduze lelâ wâne keanra kua mânhetoem. Nudupa takaze idyly-ro watay, kodopâday ise kâempywadyly” kewânm — kely Jesus.

**36** Xirâ unâ tiengatubygueduo myani Jesus aguely Moisés inweniby wâgâ enomedâni ram:

— Âdykonloka mâtâ âdyâypy koendâ eni: Deus ety oday kurâdo eynynâ Deus agâ agueim? Levita? Samaria donro? — kely.

**37** — Mâtâ ityenibyry — kely Moisés inweniby wâgâ enomedâni.

— Mâtâ ara aikâ. Kaikânro modo ityengâ — kely Jesus.

### *Maria, Marta warâ etyram Jesus idâhobyry*

<sup>38</sup> Ilâpygueduo myani Jesus tynynonro modo agâ idâzesedyly Jerusalémram. Ânwa oze awylymo ume myani Marta, Maria warâ etydâ epagudylymo. <sup>39</sup> Marta pyni anhedyly ume myani iwidy Maria, Jesus iopay ekadyly, nhenomedâdo idase, tywary nemawyadâbyra idyly. <sup>40</sup> Saintaymby modo wâgâ toenzepa myani Marta ewanu. Tywidy tâmawyadâdyze myani. Awylygue Jesus iopaji saindyly, aguely:

— Egâ ywidy, Pymâ. Urâ kulelâ yânly, Toenzepa iewanu ume, emynru kulâ tarâ. Igonokâ iemawyadâze — kely.

<sup>41</sup> Aituo myani Jesus eyam aguely:

— Iozepa kulâ awârâ amyguely, Marta. Toenzepa kuru âtâ oday iwanogue mâtynanâdyly. <sup>42</sup> Iwanu, amânhedyse mato kuru, ydadyse mawyly takaze. Maria olâ kâenomedâdo tydase. Xirâ tutuzeim kuru, amânhakyly takaze. Ânguy merâ kâenomedâdobyry nhangahu odayba netywâbyra ise — kely Jesus.

## 11

### *Jesus Deus agâ aguykehoem konomedâdobyry*

(Mt 6.5-15; 7.7-11)

<sup>1</sup> Alâ myani Jesus Deus agâ aguely. Deus agâ aguepygueduo, eynynonro modo ewy eyam aguely:

— Deus agâ xina aguehoem, xina enomedâgâ, Pymâ. João Batista tynynonro modo nhenomedâdobyry ara, xina enomedâgâ lâpylâ — kelymo.

<sup>2</sup> Aituo Jesus aguely:

— Deus agâ amyguedaymo, warâ aguewâtaungâ:

“Pabai, idânârâ tynrenseim lelâlâ mawyly, izedy awyly warâ idânârâ nhutudyzemo xina.

Ânguy âwankuem âepyra nidâ.

Tarâ xina iwymâryem ikâ

Xina xirâ onro anano modo ize mato ara lelâ xina aiedyse awyly,  
târâ kaynâ agonro modo ize mato ara aito ara lelâ.

<sup>3</sup> Âmâlâ kopaelâgâembaba xina ipyniry âundugâ.

<sup>4</sup> Inakanhe xina aitobyry xygakegâ,

âkelomo inakanhe tynynâ aitobyry xina nhenanânehon-ho ara.

Satanás, izepa mato aienehonze keduo, xina agâlâ ikâ, izepa mato xina aniempyra itoem”

warâ aguewâtaungâ Deusram — kely Jesus.

<sup>5-6</sup> Aituo myani Jesus aguely tynynonro modoram:

— Idataungâ. Ataen-ho itynra kuetâji saindyly tâwinze watay; âdylâ mâunduly peba. Aituo ity apanonra mydâly, âzekainze: “Yataen-ho ietyram naintai. Âdy nheinly, nhenyly warâ peba olâ urâ. Âdylâ wao kâwantoem âundugâ” myguely tâise. <sup>7</sup> Warâ olâ tâise ity apano janela enahuymby oze aguely: “Kuetâji awârâ! Pealâ enra tâdâzekainly. Ykyly xirâ xatay ynanâdâ. Kadiadupe ietybyem pyanta. Idânârâ xina âtâ odano modo xykyly lâpylâ warâ! Yaupyra ise aze mäenkadyby xuduze kulâ” kely tâise. <sup>8</sup> Aituo, mäenkazezedyly watay, xuduze tause mâkâ. Eataen-hoem mawylygueba olâ nhuduly, mäenkazezedyly imaze. Xirâ mâuntudyzemo kuru wato.

<sup>9</sup> — Ekadaungâ. Mäenkaduomo, emakeze lelâ âmaemo. Xuiwâtaungâ. Mâwinduomo, soenkeze lelâ âmaemo. Pyantaylâ âtâ sodo igâsedauingâ, enahungueze lelâ mawânkâ. Xirâ mâuntudyzemo kuru wato. <sup>10</sup> Idânârâ ekanibyry modo emakeze. Xuirimpyry modo soenkeze. Âtâ sodo tygâsenibyryram enahungueze. <sup>11</sup> Amerymo kanra âjihuyby nhekaduo, âgâu mâunduwâpyra âmaemo eoduem. <sup>12</sup> Aukuma nhoru idâtyby nhekaduo,

ielawada mâunduwâpyra âmaemo. <sup>13</sup> Inakai wâne âmaemo, iwâkuru modo olâ âmerymoram mâundulymo. Kunwym kaynonroma kuru koendonro-ro. Awylygue ise Tyispiritury ingonodyly ekanibyry modoram! – kely Jesus.

*“Satanás eon-honru kainly lakuru Deus eon-honrugue” Jesus kehobyry  
(Mt 12.22-32; Mc 3.20-30)*

<sup>14</sup> Tâlâ myani uguondo kadopâram tytaremba âiehoyby. Aituo myani idâly Jesusram, kadopâ nhâkyhoem.

— Merâ uguondo odaypa igasegâ; todopâzebane ikâ iodaxi — kely Jesus.

Kadopâ egaseduo, uguondo koendâ âjitaingly idyly. Toenzepa tonlo modo mâkâ uguondo tytarenrybyry âjitainduo, âsewânilymo. <sup>15</sup> Tonlo modo ewy Satanás eon-honrugue kua nhedyly-ro waunlo ara, enanajimo, Deus eon-honrugueba. Awylygue âjigue aguelymo:

— Belzebu eon-honrugue kulâ awâkâ kadopâ modo nhâkyly — kelymo; kewâdylymo kulâ olâ myani. (Satanás ezedy eagonro awârâ “Belzebu.”)

<sup>16</sup> Kurâ domodo wâne myani Jesusram aguelymo:

— Deus anhekyly lelâ aiekâ, on-honru mâenehon-hoem, Satanás eon-honru warâpa — kelymo.

<sup>17</sup> Âdara xunâgumo awyly tutuze myani Jesus. Aituo aguely:

— Ajigue âzety anano modo âseguebyly-ro watay, mâtâ âtâ anary tadainze. Âjiukonoem, âjiaigoruem warâ âjigue âseguebylymo-ro watay, tunwyndo sodokewâzemo. Tagonro agâ koendâ nâzepyramo, âjidueryem tâisemo mawânkâ. <sup>18</sup> Kadopâ modo iwymâryma Satanás. Kadopâ modo âjiguelâ âseguebyly, tygue tygue idylymo warâ watay, ton-honremba tâise Satanás. Tywymâgueba tâisemo mawânkâ. <sup>19</sup> “Jesus kadopâ modo ingonodyly olâ, Belzebu mawânkâ aitoem eon-honru xudunri” tâkeze âmaemo. “Belzebu eon-honrugue kulâ kadopâ mânâkylymo” myguepa olâ âmaemo âynynonromoam. Arâ âynynonromoram amyguepa âmaemo watay, arâ Yam adâkezeba lâpylâ itaungâ. <sup>20</sup> Deus eon-honruguelâ kadopâ modo kânâkyly. Won-honru tiunduypyguelâ nhutuen-honly tarâ pymâem tawyly — kely Jesus.

<sup>21</sup> — Uguondo ton-honreim, typyeim koendâ tâty nhenuagaendyly watay, idânârâ tâlâ ato âdapa lelâ. Ânguy negawântaymba isejiguy emagazeze. <sup>22</sup> Uguondo mâkâ takaze ton-honreim âewyly watay olâ, mâkâ nemaembâ. Aituo mâkâ âtâ odo ipy âsemagueho âzemakeoly, isejiguy idânârâ adaholy, tataen-ho agâ mâkâ uguondo ton-honreimbyry kuru nhepajigâdyly warâ. Satanás takaze ton-honreim wawylygue, xurâ modo kainly.

<sup>23</sup> — Ynynâba âmaemo-ro watay, ynynonroem inkâba âmaemo. Kurâ domodo Deus nheinwântoem iemawyadâbyra âmaemo watay, neinwâmpyra itomoem amânhenehonlymo lakuru. Ydâ iwague mânânehonlymo, mâindâtyguylymo tâise koendonro kuru — kely Jesus.

*Kadopâ odopâdobyry  
(Mt 12.43-45)*

<sup>24</sup> Aituo myani Jesus aguely:

— Tâlâ myani kadopâ kurâ odaypa nhâkyby. Mâkâ kadopâ adakobâdyly myani paru peba ato einkâ, tâjidy xuize. Tâjidy nepyra olâ myani. Aituo mâkâ kadopâ tâwâlâ aguely: “Iegasehobyryanlâ ise kodopâdyly mâkâ saguhoem inakanhe kânhetbyanlâ” kely. <sup>25</sup> Adâkeduo ituo odopâdyly. Nodopâbyra awyly ara, koendâ myani mâkâ uguondo, eagonro kadopâram nâdynanâoba, âtâ koendâ kehoem nhontyby, taxiemba wâne myara.

<sup>26</sup> Aituo myani mâkâ kadopâ sete lelâ tataen-hodo inakai modo kuru ese idâly, mâkâ uguondo odaxi tâxiedomoem. Aituo mâkâ uguondo ago kehoem kuru inakanhe itondyly, tokalâ kadopâbe tatobyry takaze kehoem — kely Jesus.

*Tuomareim kuru ise Deus aguely einwântaynrim modo*

- <sup>27</sup> Jesus aguepygueduo myani pekodo kurâdo duano ago kehoem aguely:  
 – Tuomareim mâkâ pekodo igaseânibyry, tywanrygue âkuirimbyry warâ – kely.  
<sup>28</sup> Aituo myani Jesus aguely:  
 – Tuomareim kuru olâ Deus itaumbyry idani, einwânni warâ – kely.

*"Adyesenry aiekâ" kehomobyry Jesusram*

(Mt 12.38-42; 16.1-4; Mc 8.11-13)

- <sup>29</sup> Kurâdo âtâdyguybyem atay myani Jesus aguely:  
 – Iumunrumi âmaemo xirâ umeno modo! Yam, “Adyesenry aiekâ, Deus Ingono-tyby lelâlâ mawyly xina nhutuhoem” tâkeze âmaemo. “Amânhepyra âmâ watay, xina âinwâmpyra ise” myguelymo warâ. Jonas aitobyry enanâguewâdaungâ. <sup>30</sup> Nínive donro modoram Jonas aguewânmym: “Deus inagazenehonzemo, inakanhe amidylymogue” kewândymy. Urâ, Uguondo Kaynâpa Âetyby, Deus Ingonotyby lâpylâ urâ; Jonas unâ nhegatuybylâ âyanmo kâengatuly lâpylâ. “Deus inagazenehonzemo, yeinwâmpyra mawylymogue” uguely.

<sup>31</sup> – Enanâguewâdaungâ mâkâ pekodo Sabâdâ pymâpyry. Taypa myani mâkâ idâly, âkelo anayumba, Salomão enomery idase. Ienomery olâ Salomão enomery takaze kehoem. Tarâ âduaymo lelâlâ wâne urâ, arâlâ olâ inomedâdomo mâindadyseba, mâuntudyzeba warâ mawylymo. Awylygue ise, xypyry etay, Deus enadoram mâepanâgueduomo, warâ ise mâkâ pekodo pymâ aguely Deusram: “Tâwâlâ akaemo kurâ domodo, Jesus tonomedâdyly tindadyseba atomobyry ara nâsenagazedâmo” keze. <sup>32</sup> Kanra imâsedo odanopyryem myakâwândy Jonas idâly Niniveram, Deus itaumbyry egatuze. Jonas aguely tindatuomo myakâwândy, mâtâ xidadâ odano modo Deus nheinwândylymo. Âjityendylymo, inakanhe tawyly inmolymo warâ. Akaemo emyenro keba olâ âmaemo. Urâ, Jonas takaze won-honru. Xirâ mâuntudyzemo kuru wato. Auguely mâindadyseba, mâinwândyseba warâ olâ âmaemo. Awylygue ise xypyry etay Deus enadoram mâepanâguelymo-ro watay, warâ ise Nínive donro modo Deusram aguelymo: “Tâwâlâ akaemo kurâ domodo Jesus aidyly, aguely warâ einwântânybyry modo nâsenagazedâmo” kezemo – kely Jesus.

*Kodo iajimanâni*

(Mt 5.15; 6.22-23)

- <sup>33</sup> Aituo myani Jesus aguely:

– Lamparina kienmanâdyly watay, âdylâ iaxi kioentaymba kurâ. Cestu iaxi kiempyra kurâ warâ. Nhesagon-hodâ kienkanâdyly, egawântaynrim modo koendâ kehoem nhetoem. <sup>34</sup> Kânugue mawânrâ kytâho kiendyly, iajino oze kytâly. Koendâ kiendyly-ro watay, ânwa iozeno oze lelâ kytâly. Koendâ kiempyra kurâ-ro watay, tuzase kurâ, iamduay tâduzato ara. Epy xurâem toenzepa lelâlâ iamu – kely Jesus.

{“Kânu agâlâ mawânrâ kyangahu âsewanily” keze Jesus aguely. Deus ize ato aguiendyse kurâ-ro watay, iozeno lelâ aguienkyl. Arâ aguiendyseba kurâ-ro watay, iozeno keba kulâ aguienkyl. Toenzepa ise kydâsenagazedyly, aguehobyrri kieinwâmpyra kurâ-ro watay.}

<sup>35</sup> Inanaynmolâ itaungâ. Yeinwânniem mawylymo xutuwâdaungâ. Esagonrim ara xirâ unâry mâindakylymo. Yeinwâmpyra âmaemo-ro watay olâ iamu odano ara kulâ âmaemo. <sup>36</sup> Yeinwântâ kuru mataymo, koendâ utuze, koendâ ugononibyry xutuze warâ âmaemo. Anwa tyajineim oze idânri ara ise âmaemo – kely.

*Fariseu domodo wâgâ, Moisés inweniby wâgâ enomedâni modo wâgâ warâ Jesus aguehobyrri*

(Mt 23.1-36; Mc 12.38-40)

<sup>37</sup> Jesus aguepygueduo myani fariseu aguely eyam:

– Awinduakârâ ietyram – kely.

Jesusmy idâwâm. Âwântybyem mesa onwa ekadyly, nâzemaunguebalâ judeu domodo ezewenry ara. <sup>38</sup> Awârâ tientuo myani fariseu tyangahu oday aguely:

– Inakanhe kulâ merâ uguondo aidyly. Nâzemaunguewâbyra merâ, kâzwenry ara – kely.

<sup>39</sup> Aituo myani Jesus aguely eyam:

– Âmaemo fariseu domodoram xirâ auguely. Moisés inweniby ara amidyse mawylymo umelâ, inakanhe kulâ adâiselâ âmaemo tyewiâpazelâ warâ. Tâdâjituoguyl tâkeze minasemo, ize matomo mäenmakehomoem. Tâlâ wâne kopu, prato warâ sagokeim ikaynâ kulâ nhagokely, ioday iwyku netyba waunlo, myara kulâ âmaemo. Deus ize ato ara adâjidyly mäuntuba âmaemo. <sup>40</sup> Tuândy kulâ âmaemo! Tâsenoguze âmaemo, angahumo oday inakanhe âunârymo soense myguewâdylymogue. Deuslâ kodo xugunipyry, mâkâlâ lâpylâ kyangahu oday kunâry xudunri warâ. <sup>41</sup> Deus ize ato kuru âdy pebanro modoram pyni mäundulymo. Awylygue ipanro modoram âunduwâtaungâ, arâ ise twykeba mawylymo, Moisés inweniby agueho ara.

<sup>42</sup> – Toenzepa âsenagazeze âmaemo fariseu domodo! Dez lelâ âsejiguymo ewy, tokalâ inanry mäundulymo Deusram, Moisés inweniby agueho ara. Âpa ezano ewy pyni ekubâzeândo Deusram mäundulymo inanry, hortelâ, arruda, awârâ modo mäentâdybymo. Moisés inweniby kuru olâ inanry amânhepyra âmaemo. Âdypebaom, kaikânro modo warâ mäintyembyra olâ minasemo. Deus mäinwântaymba âmaemo. Tâwâlâ âsejiguymo dez ieto ewy tokalâ âunduwâtaungâ Deusram, âdypebaom modo mäintyendylymo mäenanânehombamolâ.

<sup>43</sup> – Toenzepa âsenagazeze âmaemo, fariseu domodo! Kurâdoram mâdyren-hondzye mawylymogue. Âtâ tâdâtâdyguyho odaji mydâduomo, waunroem kehoem inanry ikadlylymo pymâ modo xurery wâgâ kehoem. Kurâdo âwankuem âedyseba minasemo madakobâdomodâ warâ.

<sup>44</sup> – Toenzepa âsenagazeze âmaemo, fariseu domodo! Âkelo modoram koendonroem kehoem wâne mâzehodyze mawylymo. Koendonro keba olâ âmaemo. Âguedy etadâdobyry tywâkureim emyenro âmaemo. Einkâ kakadyly watay, âdy ioday tywângueim awyly kiuntuba olâ kurâ – kely Jesus.

<sup>45</sup> Agueduo myani Moisés inweniby wâgâ enomedâni Jesusram aguely:

– Arâ amygueleygue, xina lâpylâ mäunâgueguyl, fariseu domodo kulelâ inkâba amygueho – kely.

<sup>46</sup> Aituo myani Jesus aguely:

– Toenzepa âsenagazeze lâpylâ âmaemo Moisés inweniby wâgâ enomedâni modo. Amyguehomobyry ara amitaymba lâpylâ âmaemo. Tâjienwyeno tâmânreim tâmaenzeba ato ara awârâ mäenomedâdomo, tâmaenzeba awyly. Tykeim emawyadâdâny emyenro âmaemo. <sup>47</sup> Toenzepa âsenagazeze âmaemo, Moisés inweniby wâgâ enomedâni modo, âadamudomo aralâ tumunreim mawylymogue. Saguhoem myakâwâm Deus itaumbypyry egatuwâni modo nhâlymo. Koendonroem kehoem wâne mâzehodyze mawylymo. Awylygue akaemo Deus itaumbypyry egatuim saguhobyry equepybyry etadâdobyry modo mäinwâkudâdylymo iwerâ. <sup>48</sup> Arâ amidlylymogue âadamudomo aitobyry ara lâpylâ amidlylymo tânehonze âmaemo. Deus itaumbypyry egatuwâni modo xyâwânmomy. Eguepymobyry etadâdomobyrydâ iwâkudâni âmaemo. <sup>49</sup> Deus toenzepa tonomegugue, aguely: “Igonose urâ âyanmo iemary modo ytaumbypyry egatuwâni modo, ywâgâ aguewâni modo warâ. Egoiguezemo, xyâzemo warâ âmaemo” kewâm Deus.

<sup>50-51</sup> – Abel, Adão imerylâ myakâwândy saguhobyem kuru Deus itaumbypyry wâgâ agueim enday âdyoypy. Alâ sakazedyly, toenzepa Deus eynynâ aguewâni modo

lâpylâ âdyowâdyly myakâwândy. Xypyryem xyâppy Zacarias, Joiada imery. Deus etydâlâ myakâwândy âdyoly, mesa Deusram egameyby ekanâdo, Deus Âepanâgueho iwyantary warâ ontay. Idânârâ âdamudomo aitobyry modo wâgâ ise mâsenagazedylymo. Xirâ mâuntudyzemo kuru wato.

<sup>52</sup> — Toenzepa âsenagazeze âmaemo, Moisés inweniby wâgâ enomedâni modo! Deus imakedyze inkâba âmaemo, ânguyram unâ tâdâsemagueho mâengatudyzeba lâgâlâ âmaemo warâ. Pyanta kadiadupe ieni, ilema xave nhoendyly-ro waunlo emyenro âmaemo, igawâmpyra mitomoem, eagonro modo mâenkaunânehomba mitomoem lâpylâ warâ — kely Jesus.

<sup>53</sup> Agueypyem myani Jesus egasely âtâ odayba. Fariseu domodo, Moisés inweniby wâgâ enomedâni modo warâ toenzepa kehoem iewiâpadaynlymo, Jesus tywâgâ agueduo. Aituo egaseduo, nhapâiguelymo mâtâgue lelâba. <sup>54</sup> Tyangahumo oday xunâgumo:

— Inakanhe aguehoem aguiendyly-ro watay, kienwentâdobe ise kurâ, kyân-hoem — kelymo.

## 12

### *Idânârâ soentyby âjiepanâgueoze*

(Mt 10.26-27)

<sup>1</sup> Toenzepa kehoem myani kurâdo âtâdyguly Jesus eydâ atoram. Tokonozemo kehoem. Aituo myani Jesus aguely tynynonro modoram, kurâdo indatoem:

— Fariseu domodo arapa itaungâ. Koendonro aramo wâne, koendonro keba olâ akaemo. Fermentu massa nholiho ara akaemo inakanhe ato imâem idyly. <sup>2</sup> Idânârâ soentaymbi âjiepanâgueowâze lelâ. Idânârâ koendâ tydasenrybyry MON warâ âjidahoze. Adaunloem mawylymo âzehoze, koendonro, inakai warâ mawylymo. <sup>3</sup> Âdylâ amygue-lymo kopae iguetubygueduomo watay, emetybyem idânârâ amyguehomobryy âdutuoze. Ity oday amyguehomobryy, idânârâ kurâ domodoram âzegatuze — kely Jesus.

### *Deus lelâ kydynrene*

(Mt 10.28-31)

<sup>4</sup> Jesus aguely myani:

— Ârinmo kâdytadaundâ; igadopyrymo âdaunloenlâ adaindâny tyân-hoem ton-honremba mawânkâ. Tâwâlâ lelâlâ wâne inagazedylymo. Ton-honremba olâ Satanás eydâ atoram ogonosemo. <sup>5</sup> Deus anhekyly xytadaungâ. Awâkâ kulelâ mawânkâ âigueduomo, Satanás eydâ atoram ogonosemo ton-honreim. Augueondyly xirâ: Deus lelâ xytadaungâ. Xirâ mâuntudyzemo kuru wato, yataen-hodo.

<sup>6</sup> — Idânârâ tâense awâkâ Deus. Imâem tâwâentuneba konopio. Azagâ moeda imeim-byry tâwâensenrygue, cinco konopio tanâse lelâ kurâ. Deus olâ koendâ edyly nimopa.

<sup>7</sup> Nhetâmo lâpylâ Deus. Koendâ kehoem tutuze, angahumo wâgâ âdara angahudumo awyly. Awylygue tâseguâdâzeba itaungâ. Deus konopio tâense, âmaemoma kuru nhesemo lâpylâ. Xurâem, âmaemo tywyneim kuru, konopio modo takaze — kely Jesus.

### *“Jesus eynynonro urâ” keze tyanenry modo*

(Mt 10.32-33; 12.31-32; 10.19-20)

<sup>8</sup> Wakely myani Jesus:

— Tâjiduay, “Jesus eynynonro urâ” myguelymo-ro watay, “Ynynonrolâ asaemo” keze lâpylâ urâ. Pabai, anju domodo warâ enado ise auguely: “Ynynonrolâ akaemo” uguelymo. Xirâ mâuntudyzemo kuru wato. <sup>9</sup> Tâjiduay, “Jesus eynynonro keba urâ” myguelymo-ro watay olâ, Pabai Deus, anju domodo warâ enado, “Ynynonro mâkeba asaemo” keze lâpylâ urâ. <sup>10</sup> Urâ Uguondo Kaynâpa âetyby izepa wato amânhedlymo, amyguelymo warâ watay, idânârâ awârâ inakai modo xygakeze Deus, mâenkadylymo watay. Deus Ispiritury ewanu wâgâ inakanhe kulâ amyguehomobryy olâ ise Deus nygakeba. <sup>11</sup> Âizepanromo,

pymâ modo enadoram, âtâ tâdâtâdyguyho odaji pymâdo enadoram warâ adylymo ise, iwentâdomoem. Myarâ madahoduomo, tadalafilizeba itaungâ. “Kâsemagueho peba ise aze. Âdara uguely kâuntuba urâ pymâdo enanaym nhewentâduomo” tâkezeba itaungâ. <sup>12</sup> Deus Ispiriturylâ ise mânâ ume amyguehomoem inomerymo xudunri – kely Jesus.

*Âdydo imeom sodoem tadalafil koendonro kuru keba*

<sup>13</sup> Kurâdo duano ewy uguondo aguely myani Jesusram:

— Pabai tyigueduo, idânârâ niâm paigoem, urâem warâ, Konomedâni. Paigoram aguekâ: “Âukono agâ unwâm xurâpyry epajigâgâ” kekâ – kely mâkâ uguondo.

<sup>14</sup> Aituo myani Jesus aguely:

— Unwâm isejiguybyry ânguy xurâ awyly agueim mâkeba urâ. Âmâ, âwaigoru warâ xurâ wâgâ auguewâpyra ise urâ – kely Jesus eyam.

<sup>15</sup> Aituo myani Jesus tonlo modoram aguely:

— Auguely idataungâ; tâmaynelâ itaungâ. Idânârâ âdydo imeom sodoem lelâ waypa itaungâ. Toenzepa âdype tadalafil kulâ aunloenlâ kuomazeândaymba, aunloenlâ kitoem aguyetaymba warâ – kely Jesus.

<sup>16</sup> Aituo Jesusram unâgue âzenomedâolymo:

— Tâlâ myani uguondo toenzepa âdydo imeom sodo. Idânârâ ipi ezay etâdaymby modo koendâ kehoem ago itaynly. Eagâ tâwanuneim modo toenzepa kehoem nhekaunâdylymo.

<sup>17</sup> Toenzepa kehoem tientuo, mâkâ âdydo imeom sodo aguely tyangahu oday: “Toenzepa kehoem xirâ tâkaunâzeim. Ekanâdoem ejidy peba urâ. Âdara kukeanra ise agânhedyly” kely. <sup>18</sup> Tyangahu oday tâwâlâ myani xunâgu: “Ah, xutuagui. Âdydo imeom etadâdo imibyry modo ise yagâ tâwanuneim modo nhakalaguely, imâsedo tintâdomoem. <sup>19</sup> Tâwâlâ ise auguely. ‘Tâlâ urâ idânârâ ize wato iweâpa iniem. Âdygue kâseguâdâbyra ise urâ. Iekobyzeguely ise. Kâwinduadyly, kadakuily warâ. Tuomare ise urâ warâ’” kely mâkâ uguondo tâwâlâ tyangahu oday. <sup>20</sup> Aituo myani eyam Deus aguely: “Tuândy âmâ! Xirâ kopaelâ ise âiguely. Âkelo ise mânkanâdyby sodo, âmâ mâkeba” kely. Arâ myani mâkâ âdydo imeom sodo iguely. Tâlâ atobyry modo idânârâ âxiânl.

<sup>21</sup> — Auguely xirâ âyanmo. Adâise lâpylâ mâkâ âdydo imeom toenzepa turâem ekanânbiry modo. “Âdypeom xina” warâ aguelymo. Deus xurâem olâ âdypeom keba mâkâ agueim – kely Jesus.

*Ize kydato wâgâ kulâ kydadahuliba kine, Deus tuduze kurâem ize kydato awylygue  
(Mt 6.25-34)*

<sup>22</sup> Agueypyem myani Jesus aguely tynynonro modoram:

— Warâ âyanmo auguely. Tâseguâdâzeba itaungâ, pyni wâgâ, itymo owogonromogue warâ. <sup>23</sup> Pyni keba, âtâ tâjiwogonro keba warâ tywyneim kuru. Deus ize matomo xuduze lelâ, âpynirymo, itymo owogonromo warâ. <sup>24</sup> Etaungâ konopio modo. Typiembamo. Typyniry netâbyramo, nekaunâbyramo warâ. Typyniry netadâbyramo etary odaji warâ wâne. Deus olâ ipynirymo tuduze. Deus xurâ âmaemo. Tawâguneim modo ipyniry tiunduho ara, âyanmo xuduze lâpylâ. <sup>25-26</sup> Mâungukedânyromo wâgâ tâseguâdâzeba itaungâ. Âdara âiguelymo wâgâ tâseguâdâzeba itaungâ. Kyigueho odaji ituo, kyiguepa kitoem aguentaymba kurâ. Deuslâ kyigueho xutuim. Âigueho tâwâlâ mâungukehoem nudupa-ro watay, itymo owogonromo, âpynirymo, awârâ modo wâgâma kuru toenzepa tâpaunzezeba itaungâ. Deuslâ idânârâ ize kydato xuduim.

<sup>27</sup> — Mâzetydâdomogue, mâtâgudâdomogue warâ tâseguâdâzeba itaungâ. Etaungâ poji anano tadawanku. Nâsewanibamo, tâty tywogonro tianâtomoe. Kâdâkerâ nawâpyramo, tâtymo tywogonro adientomoem warâ wâne. Deuslâ olâ iwâkudâni. Kydamu Salomão toenzepa âdypeom myakâwândy, toenzepa lelâlâ. Iwâkuru modo myakâwândy ety

iwogonro. Poji anano sawanku olâ Salomão ety iwogonro takaze kuru, tywâkurein-ro warâ. <sup>28</sup> Iweâpa nipyra olâ awârâ poji anano sawanku. Iwerâ koendâ, tywâkure warâ, kopaelâgâem ipa, iladybyem lelâ. Awârâ sawanku tâense Deus watay, nhesemo lâpylâ. Itymo owogonromo xuduze. Mâinwâmpyra olâ âmaemo! <sup>29</sup> Pyni wâgâ, okumo wâgâ warâ tâseguâdâzeba itaungâ. <sup>30</sup> Deus einwântâny modo typynirymo, tokumo, tâty tywogonro wâgâ warâ kulâ inanry âtynanâdylymo. Âmaemo olâ, awârâ wâgâ tâtynanâzeba itaungâ. Tunwyn-em âmaemo Deusgue. Tutuze mâkâ idânârâ ize matomo. Âpynirymo, okumo, itymo owogonromo, awârâ modo xuduze lelâ. <sup>31</sup> Awylygue âwymârymo Deus ize ato modo waunroem aietaungâ. Mâkâ ize ato wâgâ waunroem mâpaunzeduo, idânârâ ize matomo xuduze Deus – kely Jesus.

*Koendonro kaynâ ekanâdyby  
(Mt 6.19-21)*

<sup>32</sup> Jesus aguely myani:

— Aguipa, ton-honremba warâ wâne âmaemo, tyanepa olâ itaungâ, âmaemo ynynonro modo. Kunwym Deus âduakewânmo, yagâ pymâem mitomoem. <sup>33</sup> Âsejiguymo modo vende ietaungâ; ebyry âdy pebaom modoram xuduwaítâtaungâ warâ. Âzeon-hondâdaungâ, Deus ize ato amânhetomoem. Arâ ise koendonro ekanâdybybe mawylymo târâ kaynâ. Tâmagazeim modo nemagazebyra ise. Âdaunloenlâ tuonro nygataymba ise warâ. <sup>34</sup> Xirâ anano tâenseim wâgâ kulâ mâpaunzedlymo watay, mârâ wâgâ kulâ âwaunkymo. Deus xurâ toenzepa ize matomo-ro watay olâ ise, ize ato ara lelâ ise amidylymo – kely Jesus.

*Jesus odopâdyly inwânwântaungâ*

<sup>35</sup> Jesus aguely myani tynynonro modoram:

— Inanaynmolâ itaungâ kodopâdo odaji ituo, ohondypyem lelâ. Tâzemary koendonro mawânkâ eagâ tâwano odopâdo oday ohondypyem, saindyly tynwânwânselâ, âzetydâdybyem, âjihuretadâdybyem, iwanxiery ekâjibyem, lamparina tyatygueim emaym warâ. Alâpylâ ohondaungâ, kodopâdyly mânwânwântomoem. <sup>36</sup> Inomedâdomoem ise xirâ unâ âyanmo kâengatuly. Tâlâ myani pymâ kopae todohogün-ho etyryam idâim. Warâ myani aguely tagâ tâwaneim modoram, âtynra tâtâly iraynâ: “Kodopâdyly tynwânwânselâne itaungâ” kely. Agueypyem idâly. Âzetyguedyly. Iweâpa itybyem odopâdyly. Odopâdybyem, pyanta TON TON nhedyly, ingâsedly. Aituo eagâ tâwaneim modo nhenahunguely. <sup>37</sup> Tuomareim mâkâ tâwaneim modo. Tywymâry odopâdyly tynwânwânselâ waunlo. Awylygue toenzepa âzehogueolymo iwymârymoram. Pymâlâ ise on-honi akaemo tuantoem. Tâty iwâkuru etyze, tâdâsewanihongue ise âzetydâdyly, ipynirymo tiunduhuem. Mesaram ekadomoem aguely âwinduatomoem. Mâkâlâ pyni aieni, xuanimo warâ. <sup>38</sup> Âdara odopâdyly awyly nutubamo myani, kuetâji atay, pealâ atay warâ. Arâlâ olâ, nykyba awylymo. Tânanaym lelâ awylymo, ohondypyem lelâ. Aituo iwymârymoram koendâ kehoem âzeholymo – kely Jesus.

<sup>39</sup> — Âdara tâmagazeim âewyly awyly nutuwâbyra âtâ sodo. Tutuze watay, tânuenze tâise, tânanaynlâ warâ, tysejiguy tienmakehoem. Xirâ mâuntudyzemo kuru wato.

<sup>40</sup> Kodopâdyly tânuenzelâ itaungâ; inanaynmolâ lâpylâ itaungâ warâ. Ienuendylymo ume inkâba ise urâ Uguondo Kaynâpa Âetyby kodopâdyly – kely Jesus.

*Tâwaneim koendonro wâgâ, inakai wâgâ warâ Jesus unâ nhegatuhaboryy  
(Mt 24.45-51)*

<sup>41</sup> Aituo myani Pedro aguely:

— Megatuaguilâ awârâ tâwaneim eagâ tâwano inwânwânselâne pyantay atobyry. Ânguyranka amyguely, xinaram kulâ, idânârâam, Konomedâni? – kely Pedro.

<sup>42</sup> Aituo myani Jesus in-hoguly:

— Tâwaneim koendonro, eagâ tâwano tânuenze myara ienuendaungâ. Fazenda sodo taypa tâtâly iraynâ, tagâ tâwaneim tonomegueim, koendonroram watâkeze: “Udâly wao ise. Âmâ ise iety, ysejiguy, yagâ tâwanuneim modo warâ eni. Kopaelâgâembaba ise akaemo mâwandyly. Âdy ize atomo âundugâ” tâkeze mâkâ eagâ ewano, tâtâday. <sup>43</sup> Fazenda sodo aguehobyry ara aidyly-ro watay, koendâ ise iwymâry eagâ awyly, todopâduo. <sup>44</sup> Tâmaryam aguely ise: “Koendonro lelâlâ âmâ. Koendâ lelâ tâwanuneim modo medâ. Awylgue idânârâ ysejiguy modo eniem ise âmâ” kely.

<sup>45</sup> — Koendâ tâwaneim keba mâkâ-ro watay olâ eagâ tâwano aguehobyry ara anipyra. “Ah, tahule nodopâdaymba ise mâkâ xirâ sodo” kely tyangahu oday. Adâkeduo, koendâ tagonro modo nepyra. Pekodo modo, uguondo modo warâ târâ tâwanuneim tapioguzemo tâise. Âtydâ kulâ, âwinduadyly, adakuily, toku ikaji kehoem idyly tataenho inakai modo agâ. <sup>46</sup> Mâkâ tâwaneim tynwânwândyly umepa iwymâry saindyly. Eagâ ewano mâkâ tâwaneim agâ tyewiâpaze, tâdâsenagazedoram talehoze-ro warâ, Deus einwântâny modo âsenagzedoram.

<sup>47</sup> — Tâwaneim, eagâ tâwano aguehobyry aietâny, toenzepa âsenagazeze, adienkyly tutuzelâ aniempyra-ro waunlo. <sup>48</sup> Mâkâ tywymâry aiedyse ato nutuba tawylygue aniempyra awyly waunloma âdiempa kulâ ise âsenagazedyly, adyeseim aniempyra itobyry wâgâ. Tâwaneim, adyeseim tutuze kulâ, aietâny olâ, iwymâry toenzepa enagazenehonze aniempyra atobyry wâgâ — kely Jesus.

### *Jesus wâgâ âjizepa isemo*

(Mt 10.34-36)

<sup>49</sup> Jesus aguely myani:

— Peto wâne saxiondâ saxium nhaduândyly, nhainly warâ-ro mâtâ emyenro urâ. Inakanhe tadalafil sainze xirâ anaxi kâewly, yeinwânni modo ioday inakanhe awyly sainze. Koendâ awyly kuru tâise “Aiekâne” kehobyry ewanikeimbyryem urâ-ro watay.

<sup>50</sup> Toenzepa âsenagazeze urâ, iguez warâ. Toenzepa kadahulily, anipyra awyly ara.

<sup>51</sup> Kâetuo, inakanhe tadalafil, tâdâseguebyly warâ adainly keanra keankâ, inanajimo. Arâpa olâ. Yeinwântâny modo, yeinwânni modo izepamo ise. Ynynâbaom modo, ynynonro modo enagazezemo, tâwâlâ wâne âjipemugüem awylymo. <sup>52</sup> Âtâ odakâ yeinwânni, yeinwântâny modo warâlâ âewiâmunezemo. Tygue tygue itaynzemo, âjigue âjitolugyzemo. <sup>53</sup> Tâjiunwym, tymeombypyry iewiâseze. Tâjimery, tunwym iewiâseze. Tâjise, tâxirydo iewiâseze. Tâzexiry, tyze iewiâseze. Tâjimenhundu, tyweise ynynonro iewiâseze. Tâjiweise, tymenhundu ynynonro iewiâseze warâ — kely Jesus.

### *Xirâ ume aini modo saindyly xutuho*

(Mt 16.1-4)

<sup>54</sup> Aituo Jesus aguely kurâdoram:

— Kau emyguymadly mâendylymo-ro watay, inepa kehoem kopâ ihuguerin-em awyly mâuntulymo, tâihugueze lelâlâ-ro warâ. Kopâ ihuguelly xutuho awârâ eunu kau wâgâ emyguymadly watay. <sup>55</sup> Sul ynynâba sapezenru âewly mâuntulymo-ro watay, “Âdâpigu adaguly isenra” myguelymo. Âdâpigu adaguho tainse lelâlâ-ro warâ. Âdâpigu adaguho xutuho awârâ sapezenru sul eynynâba âeni\*. <sup>56</sup> Tonomegueinhe wâne mâtulymo, tonomegueba olâ âmaemo. Kau mâendylymo-ro watay, kopâ ihugueze, nihugueba warâ awyly tutuze âmaemo. Se modo sawansedu, tutuze âmaemo, âdâpigu saindyly awyly. Âdaituo Deus eon-honrugue agânhedly awyly olâ mâtulymo lelâ âmaemo.

### *Koendâ lelâ âizepanromoem aitaungâ*

(Mt 5.25-26)

\* <sup>12:55</sup> Târâ Israeldâ sapezenru sul eynynonro taunlo agâ âzeki. Aituo taunlo sapezenru âdâpigu nhenewly ume, taunlo igâwynu nhenewly.

**57** Jesus aguely myani:

— Âdaituoka tâwâlâ âdykonlo koendonro, inakai warâ awyly mâuntuba mawylymo lâpylâ. **58** Etaungâ, ânguylâ agâmo tyewiâse. Âwankuem mânhetomobyry wâgâ watay, iwentâguedylymo. Aguely: “Pymânra ise adylymo, itadânehon-homoem” kely. Myarâ adylymo iraynâlâ, eagâ koendâ âtunâguedaungâ, tyewiâseba ietaungâ warâ. Amyguepa âmaemo eagâ watay, tuxize kehoem pymânra asemo. Aituo ise pymâ itadânehonlymo, pyanta nhenahuen-honly warâ. **59** Pymâ aguehobyry ara idânârâ mâempywabyra âmaemo watay, igasewâbyra âmaemo târâpa. Arâ lâpylâ Deus agâ koendâ itaungâ koendâ mitombe awyly umelâ — kely Jesus tonlo modoram.

## 13

*Jesus tyeinwântoem inakanhe adâidyly imodâny Deusram nâtâwâbyra ise*

**1** Ilâ ume kurâdo ewy Jesus iopaji idâlymo. Aguelymo myani:

— Tutuze âmâ, Galiléia domodo târâ Jerusalémâ aietomobyry. Deus ety oday ânguydo imeom xyâypy egameze ataymo, Pilatosram âzegameolymo xyâhomoem. Inakanhe awylymoguelâ âdyolymo. Âdara inanaji? — kelymo.

**2** Aituo myani Jesus aguely:

— Inanajimo arâ Galiléia domodo âdyoly, tagonrodo takaze inakai awylymogue.

**3** Arâpa olâ! Tagonrodo takaze koendâpa awylygue inkâba myani akaemo iguely. Inakanhe mawylymo mâinmopa âmaemo yeinwântoem watay, Deus eydâ atoram mydâwâpyra ise âmaemo âigueduomo. **4** Tânânguezelâ keanra âmaemo, dezoito uguondo Siloé donro modo mâtâ torre tuonwa ihugueduo iguewâtyby modo. Jerusalém donro modo takaze inakaigmogue akaemo iguely, inanajimo. **5** Arâpa olâ. Awârâ wâgâ inkâba myani arâ iguelymo. Iguezelâpylâ âmaemo. Deus izepa ato aiedyly mâinmopa âmaemo yeinwântomoen-ro watay, Deus eydâ atoram mydâwâpyra ise âmaemo. Deus agâ iwaguelâ ise âmaemo. Xirâ mâtunduzemo kuru wato — kely Jesus.

*Jesus figueira ewisedâny wâgâ unâ nhegatuhobyry*

**6** Ilâpyryem Jesus unâ nhegatuly, enomedâzemo. Aguely:

— Tâlâ myani nady figueira, âtâ inatay, nady tâwituneim modo duay etâdyby. Âdaunloenlâ newiseba olâ myani mâtâ figueira. Aunlolâ mykâinane sodo, ewiseyby ese idâzesedyly wâne. Newiseba lelâ olâ myani. **7** Aituo myani aguely mâkâ nady modo eniram: “Egâ awârâ figueira. Azagâ tokalâ warâ anu awârâ ewisely kâempyra wawyly. Ewiseho odaji ituo kâewyly ese. Âdalâ ewitu kâempyra urâ. Satâgâ. Newisewâbyra awârâ. Alâ kulâ awârâ onro nhuan-huly târâ” kely. **8** Warâ olâ myani mâkâ tâwaneim aguely: “Alâ wao nidâ tokalâ anu lelâ. Tânâmize esagueze lelâ urâ. Toenzepa adubu iese urâ-ro warâ. **9** Awârâ anu âeni wâgâ ewiseze wâne keanra awârâ figueira. Newiseba lelâ-ro watay maise tâwâlâ mantâen-honly” kely myani — kely Jesus.

*Jesus tâzekobyzegueho oday pekodo tâwâneim kua nhetobyry*

**10** Tâzekobyzegueho oday myani Deus xunârygue Jesus kurâdo nhenomedâdyly âtâ tâdâtâdyguyho oday. **11** Pekodo dezoito anu tâwâneimpe myani târâ, tykadâungueim. Âdara kua ini-emba. **12** Tientuo myani Jesus tyam ingâsedyly. Eyam Jesus aguely:

— Kua âese urâ, koendâ âkary itoem — kely.

**13** Agueypyem myani Jesus tâmary nhonwa nhedyly. Ilâ umelâ kehoem tykadâungue adakobâdybyem koendâ ikary idyly. Deus wâgâ aguely:

— Koendoro awâkâ Deus urâem! — kely.

**14** Âtâ tâdâtâdyguyho iwymâry toenzepa kehoem iewiâpadyly, Jesus mâkâ tâzekobyzegueho oday kua nhetobyry wâgâ. Aituo myani kurâdoram aguely:

— Seis emedyly lelâ tâdâsewaniho. Kua midyse mataymo, tâzewano oday âetaungâ. Tâzekobyzegueho oday kua ise tâseba itaungâ — kely.

<sup>15</sup> Aituo myani Kywymâry Jesus aguely:

— Koendonroem wâne mâdutulymo, koendonro keba olâ âmaemo. Tâdâzekobyzegueho oday tâsewanize lâpylâ âmaemo! Iguymo tapirâ, jumentu warâ paru nhenyhoem tywykâjigueze tâzekobyzegueho odaylâ. <sup>16</sup> Merâ pekodo, kydamu Abraão iwery. Dezoito anu Satanás merâ pekodo inakanhe ieseze awyly, âzewykehoemba awyly. Tâzekobyzegueho oday lelâlâ merâ kua kânhedyl — kely Jesus.

<sup>17</sup> Awârâ tindatuo myani Jesus izepanro modo âpybazedylymo. Izetonro modo olâ iomaru lelâ Jesus Deus eon-honrugue aidyly tientuo.

### *Jesus mostarda ewy wâgâ aguehobyry*

(Mt 13.31-32; Mc 4.30-32)

<sup>18</sup> Jesus aguely myani:

— Unâ segatuji wao âdara Deus kywymâryem lelâlâ idyly awyly mâuntuhomoem.

<sup>19</sup> Tutuzelâ âmaemo, âpa ezay mostarda ewy tâtâzeim, imeimbyry kulâ awyly. Mostarda ewy imeombyry kuru, nady ewy modo enday. Tâtâduo olâ tyazeze, ago tâise, imâsedo modoem kehoem tywatazeze warâ. Awylygue tawâguneim modo iwatary wâgâ tâty anhetoem nhuduly — kely myani Jesus.

{“Myara lâpylâ saguhoem kuru aguipa kurâdo kulâ Deus tywymâryem awyly einwânni modo. Ilâpygueduo olâ agui tâisemo” keze Jesus aguely.}

### *Jesus fermentu wâgâ aguehobyry*

(Mt 13.33)

<sup>20</sup> Jesus agueondyly:

— Xirâ unâ lâpylâ segatuji wao, âdara Deus kywymâryem lelâlâ idyly awyly mâuntuhomoem. <sup>21</sup> Pekodo pão aieni imâem trigu nhedyly; fermentu olâ âdiempa kulâ nhedyly. Mârâ fermentu pão ioliho âdiempaombyry olâ trigu tuolize imâem kehoem — kely Jesus.

### *Jesus pyanta tâtabigueim wâgâ aguehobyry*

(Mt 7.13-14,21-23)

<sup>22</sup> Ilâpyryem myani Jesus Jerusalémram idâly. Âtâ anary imâsedo anakâ, imeombyry anakâ warâ sakadyly, kurâdo tonomedâdaynze.

<sup>23</sup> Aituo myani adapâigueoly:

— Pymâ, aguipa kulâ ise tâmakezeim modo? Aguipa kulâ mawânkâ ise Deus izepa ato aiedyly imowâni modo, inakanhe atomobyry nhygakehoem? — kely.

<sup>24</sup> Aituo myani Jesus in-hoguly:

— Auguely xirâ âyanmo. Deus agueho mâinwântomoem âzeon-hondâdaungâ, izepa ato amânhepyra mitomoe. Tagarane kehoem pyanta tâtabigueim oze kâgawântoem, ara lâpylâ eon-honru, inakai modo aiedyly mâinmohomoem. Toenzepa wâne inakanhe tawyly imoze kewâni modo, nimopamo olâ.

<sup>25</sup> — Âtâ odo pyanta enahunze xavegue kehoem. Kuholâ ise âmaemo. Aituo ise mâingâsedylymo: “Tâwâlâla xina negawândâ, Pymâ” keze âmaemo. “Igawâmpyra ise mataunaze. Âdykâ ynynonrobryy mâkeba âmaemo” keze sodo. <sup>26</sup> Aituo ise amyguelymo: “Agâlâ ani xina âwinduadyly, adakuily warâ. Xina ijidadârydâ ani mâenomedâdyly” myguelymo ise. <sup>27</sup> Aguely ise: “Âutuwâbyramo urâ. Ydâpa itaungâ, âmaemo inakanhe aitaynrim modo!” keze. <sup>28</sup> Abraão, Isaque, Jacó, eagonro modo, Deus eynynâ aguewâtyby modo warâ, Deus eydâ atodâ akaemo iwerâ. Âmaemo olâ ise eydâ atomoram mydâpamo. Mâpyneândylymogue, eogumase âmaemo âtynrumogue. Toenzepa mâsenagazedylymogue âerymo saguze âmaemo. <sup>29</sup> Deus ize ato lelâ aienibyry modo

olâ eagâ iwerâ. Tâinkânro modo lelâba ise âtâdyguynri Deus pymâem atodâ. Xixi egaseho eynynonro modo, egawânto eynynonro modo, sul ynynonro modo, norte ynynonro modo warâ ise âtâdyguylymo. Yagâ ise âwinduadylymo; Deus tywymâryem awyly nhomaendylymo. <sup>30</sup> Iwerâ âgânonrobry modo, ilâem waunroem ise. Waunropyry modo ise âgânâyam ise warâ – kely Jesus.

*Jesus Jerusalém domodo wâgâ toenzepa kehoem itywandoobyry  
(Mt 23.37-39)*

<sup>31</sup> Jesus aguely ume myani fariseu domodo ewy iwaguepa saindylymo, aguelymo:  
— Idâ. Tarâpa ikâ. Âehondye enra Herodes — kelymo.

<sup>32</sup> Aituo Jesus aguely:

— Wakewâtaunda mâkâ, poroho todu enokuni ara konokuniram: “Jesus itanrubypyrry xirâ âyam. ‘Iweâpa witaymba ise urâ. Kâsewanily, kâempagunâbyra olâ ise urâ. Tâwânuneim modo kua iese urâ. Kadopâgue taseim modo kua iese warâ. Iwerâ, kopaelâgâ warâ ise awârâ modo agânhedyly. Azagâ tokalâ warâ iguandyly bygueduo ise aiese kâjigonohohobyry modo kâenwanikely’ keanry” kewâtaunda. <sup>33</sup> Awylygue iwerâ, kopaelâgâ, kopaelâgâbygueduo warâ ise Jerusalémram idâzeseze wawyly. Jerusalémdâ lelâ mawânkâ Deus eynnâ aguewâni modo iguely – kely Jesus.

<sup>34</sup> Ilâpygueduo myani Jesus aguely Jerusalém donro modo wâgâ, eydâmolâ-ro waunlo ara lelâ:

— Âmaemo, Jerusalém donro modoram xirâ auguely. Iweâparoem, âjjidadârymo donro modo Deus itaumbyry egatuwânbiry modo xyâwânmomy. Agui Deus ingonotaymby modo tuhugue tyâzemo myani. Arâlâ olâ toenzepa âwynedylymo. Aukuma wâne tymeombyry tawâry iaxi tydâtyguye, tuan-hun-hoem, myara toenzepa idânârâ nhedysemo wawyly. Agui olâ âmaemo ewy yizepaom modo. <sup>35</sup> Deus odokezemo. Saguhoem wâne ani koendâ agâmo myarapa ise Deus. Âtâ sodokeyby ara ise âmaemo. Ietondaymba ise âmaemo, “Koendonro lelâlâ âmâ Deus Ingonyby” yam myguehomo odaji idyly ara. Xirâ mâuntudyzemo kuru wato – kely Jesus.

## 14

*Jesus tâwâneim kua nhetobyry*

<sup>1</sup> Tâzekobyzegueho oday myani fariseu domodo iwymâry ewy Jesus tâtyram âwinduase idâhoem ingâsedly. Aituo Jesus idâly. Idânârâ tonlo modo Jesus nhenuagaendylymo, âdylâ anhedyly tientomoem, “Âdylâ adyesenry aiese lelâlâ enra tâzekobyzegueho oday” tâkeduomo. <sup>2</sup> Târâ uguondo tâwâneimbe, ewâry, ixinary warâ toenzepa myani sakygu. Mâkâ tâwâneim Jesus iopaji saindyly. <sup>3</sup> Tientuo myani Jesus aguely fariseu domodoram, Moisés inweniby wâgâ enomedâni modoram warâ:

— Âdaraka Moissés inweniby aguely tâzekobyzegueho oday tâwâneim kua iedyly wâgâ? Tâwâlâ, tâwâlâpa kua iedyly? — kely Jesus.

<sup>4</sup> Nihogubamo olâ. Aituo myani Jesus tâwâneim onwa tâmary MÂ’ nhedyly. Adyetuo, tâwâneim kua idyly. Kua tiempygueduo eyam aguely:

— Idâ lelâ itynra – kely.

<sup>5</sup> Aituo myani Jesus aguely fariseu domodoram:

— Tâsewanize lâpylâ âmaemo tâzekobyzegueho oday. Âmerymo atay, iguymo tapirâ atay warâ, tâtagueim odaji ihuguely tâzekobyzegueho oday-ro watay, kopaelâgâem mânhenehonwâbyra âmaemo. Ilâ umelâ mâentylymo, tâzekobyzegueho oday awyly umelâ – kely Jesus.

<sup>6</sup> Âdara kepamo lâgâlâ, âkealâ Jesus aguely awyly tutuze tawylymogue.

*Agonrodomo takaze mawylymo mâkeba inananomo nidâ*

<sup>7</sup> Igâsedaymby modo mesa wâgâ tâjidy koendonro lelâ induakelymo tânuagaenze myani Jesus. Mure âty sododâ iwaguepanro kehoem induakelymo, tynreim modo ekadodâ kehoem. Awârâ tientuo myani Jesus aguely:

<sup>8</sup> — Mâwinduatomoem mâtigâseolymo-ro watay tynruneim modo ekadodâba ikadaungâ, akadâmo tynreim, mure sodo modo sainse mawânkâ. <sup>9</sup> Aituo ise âty sodo âyanmo aguely: “Eagonrodâ ikadomo xuiwâtaungâ. Xirâma akadâmo tynreim modo ekado-ro” keze âgâsenimobry. Aituo ise toenzepa kehoem mâpybazedylymo. Mure âty sodo xurerydâ iwague ise mâzekanâolymo, kurâdo âdaunlo modo agâ kulâ. Arâ mawânkâ “Tynrenseim urâ” kewâni modo aieholo.

<sup>10</sup> — Mâwinduatoem mâtigâseolymo-ro watay, iwaguelâ âty sododâ ikadaungâ, kurâdo âdaunlo modo duaylâ. Awylygue mawânkâ ise âgâsenimobry warâ âyanmo aguely: “Âetaungâ wopaji, yataen-ho modo. Xirâ pymâ modo ekado onwa ikadaungârâ” kely. Awârâ tientuo, idânârâ igâsedaymby modo tynrenseim mawylymo xutuze. <sup>11</sup> Deus enanajima, kurâ domodo tâwâlâ kulâ âtyrenni watay, âdaunlo modo kulâ awâkâ aunlo. Âtyendânry modo olâ Deus xurâem, tynreim kehoem – kely Jesus.

<sup>12</sup> Ilâpygueduo myani Jesus aguely igâsedaymby modoram:

— Âty odo âmaemo-ro watay, ataen-homo lelâ inkâba, âukonodo lelâba, âwaigorudo lelâba, âpemugudo lelâba, âdydo imeom sodo modo lelâba warâ igâsededaungâ. Ilâpygueduo, âgâsezemo lâpylâ mawânkâ âdaralâ tâtyram. Âgâseni modo kulelâ mâtigâseguylymo-ro watay, ânguy mânemawyadâdylymo mâkeba awârâ. <sup>13</sup> Itydâ âty ize mataymo, âdy pebaom modo, kurâdo tywykuneim modo, ixigalamadaymby modo, epy modo warâ lâpylâ âingâsededaungâ. <sup>14</sup> Mâkâ kurâ domodo mâtigâsedylymo-ro watay, toenzepa omaromoem Deus aiese. Akaemo olâ ise eagâmo mâtigâsedylymo mâtigâsebyramo, mâtigâsebygueduomo âdy âyanmo tiunduly peba tawylymogue. Deuslâ ise omarumo xudunri. Xypyry etay, Deus tynnonro modo kurâem nhetonduo, ipywazemo lelâ. Âdy pebanro modo koendâ mâtentomobry wâgâ âzepywaoze âmaemo Deusram – kely Jesus.

### *Jesus âty imâsedodâ adâjitobry nhegatuhobyry*

(Mt 22.1-14)

<sup>15</sup> Awârâ tindatuo myani uguondo târâ âwinduani aguely Jesusram:

— Koendonro ise Deus pymâem atoram idâwâni modo, iomarumo eagâ âwinduase – kely.

<sup>16</sup> Aituo myani Jesus unâ nhegatuly, tienomedâdomoem, idânârâ igâsedaymby modo ara Deus eydâ atoram nâtâwâbyra ise kely.

— Âdydo imeom sodo myani âty imâsedoem adientoem ton-honze. Toenzepa kurâdo tygâseze myani, tâtyram âwinduase idâhomooem. <sup>17</sup> Alâ ituo, tagâ tâwaneim ingonodyly myani, ingâsedaymby modoram “Alâ iweâma. Yagâ âzetyguedaungârâ” keze. <sup>18</sup> Eagâ tâwaneim idâly. Ingâsedaynly. Igâsedaymby modo olâ tâtâdyzeba. Awylygue idânârâ âdaituo nâtâba tawyly wâgâ aguelymo. Saguho aguely myani mâtâ emaryram: “Ypi agânheto ejidy sanâdâ. Iweâ lelâlâ udâly ise ese. Kekâne âty sodoram, yagâ newiâpabyra itoem” kely.

<sup>19</sup> — Eagonro aguely: “Dez tapirâ sanâdâ, ygarosary epâgueinhe. Koendâ âsewanily kâendyly wao ise. Kekâne âty sodoram, yagâ newiâpabyra itoem” kely.

<sup>20</sup> — Eagonro aguely: “Iweâ kulâ enra kohogüinly. Awylygue ise udâpa wawyly. Kekâne âty sodoram, yagâ newiâpabyra itoem” kely.

<sup>21</sup> — Aituo myani mâtâ emary odopâdyly. Idânârâ nhegatuly âty sodoram. “Agâ tâzetyguedyzeba mâtigâsedaymby modo” kely. Awârâ tindatuo, âty sodo toenzepa kehoem tyewiâpaduo aguely: “Idâ inepa taseragâ; âdaunlo ânwa ozelâ idâ, âdy pebaom modo

etyram. Âdy pebaom modo xarâ enekâ, kurâdo tywykuneim modo, epy modo, sautânry modo warâ eagâmo kâwinduatoem” kely.

<sup>22</sup> — Emary idâly myani. Odopâdyly kurâdo âdaunlo modo agâ kulâ. “Idânârâ senetai, ese ugonotobyry modo. Ity tumykebalâ olâ; toenzepa âjipelâ” kely.

<sup>23</sup> — Aituo myani âty sodo aguely: “Kurâdo iwagueno modo eta, iwerâ yagâ âwinduatomoem. Âpa ezaji, xidadâ iwaguenonra warâ idâ. Idânârâ monhontaynly modoram yagâ âwinduase âetomoem aguekâ. Tâewyseba awylymogue kulâ, eagâmo amyguepa tâiseba olâ ikâ, agâ âewylymo mâentoem. Iety xumydyze urâ kurâdogue” kely tâmaryam. <sup>24</sup> Idânârâ tonlo modoram aguely: “Âkeá lelâlâ xirâ auguely âyanmo, kâingâsedaymbi âetânrybyry modo yagâ nâzetyguedaymba ise” kely mâkâ âty sodo — kely myani Jesus.

### *Jesus eynynnonro modo âsenagazeze*

(Mt 10.37-39)

<sup>25</sup> Jesus Jerusalémram idâly ume toenzepa myani kurâdo nhapygue awyly. Aituo âsemyombâdyly. Eyanmo aguely:

<sup>26</sup> — Ynynonroem midyse mataymo, yeinwândyse mataymo, unwârmo, âzemo, âwydymo, âmeombrymo, âwaigorumo, âukonomo, nhaundumo warâ takaze kehoem ywynaedauungâ. Yakadâ âdaunlo kurâdo kulâ mânwyneguylymo-ro watay, ynynonroemba ise âutulymo. Ize wato aietaungâ, ize matomo takaze. <sup>27</sup> Ynynonroem lelâlâ midyse mataymo, ize matomo ara kulâ amidylymo imowâdaungâ. Mâsenagazedylymo umelâ auguely idataungâ; yeinwântaungâ, âiguehomo odaji kehoem, kruz manâdylomo-ro waunlo ara. Arâpa-ro watay, ynynonroemba ise mataunaze.

<sup>28</sup> — “Jesus eynynnonro urâ” myguelymo iraynâ, tâmaenze mawylymo xutuwâdaungâ wao, yeinwâmpyra mipyra mitomoem. Saguhoem kuru âtâ itâni tintâdyly iraynâ, idânârâ âtâ isejiguy nhuduly wao nhekly tintâdoem. Idânârâ âtâ isejiguy peba-ro watay, âtâ nitâdaymba mâkâ. <sup>29</sup> Âtâ itâdyly nhaguly idânârâ âtâ isejiguy, sary warâ peba kulâ-ro watay, mâtâ âtâ nadahuba awyly etaynrim modoram âwankuem âiehoze, âjeileoze warâ. Aguelymo ise: <sup>30</sup> “Etaungâ awârâ âtâ. Sodo wâne itâdyly nagu, newanikeba olâ” kezemo.

<sup>31</sup> — Âseguebyze tâtâly iraynâ, sodadu modo iwymâry saguhoem kuru tuduery agâ tienmaenly, tienmaemba warâ tawyly wao nhutuly. Dez mil kulâ izodadury, vinte mil lelâ iduery izodadury-ro warâ watay, tyangahu odaylâ agueze: “Kienmaen-hoem ton-honre wânkâ ise kurâ âseguebyze?” keze. <sup>32</sup> Tâwâlâ aguely watay: “Kienmaemba ise kydaze” kely-ro watay, tuduery iwague awyly umelâ ise eyam agueim ingonodyly, nâseguebyba tâitomoem âtunâgueze.

<sup>33</sup> — Koendâ lâpylâ angahumo oday âdutuwâdaungâ, yeinwândyse, yeinwândyseba warâ mawylymo. Ynynonroem mataymo, ize matomo ara amidylymo imowâdaungâ, urâem lelâ amitomoem — kely Jesus.

### *Peku tanepa ityby*

(Mt 5.13; Mc 9.50)

<sup>34</sup> Jesus aguely myani:

— Koendoro wâne peku, pyni tâkubâzeânze, podo niwânzeânehomba warâ. Peku, onro agâ on-hoam ityby olâ pyni ikaji ietoem nudupa. <sup>35</sup> Âdaitoem ânguy ize inkâba mâtâ aunlo. Samely lelâ. Xirâ koendâ mâtudyze mataymo, koendâ idataungâ, xutuwâdaungâ warâ — kely myani Jesus.

## 15

### *Jesus enomedâzemo, kaneru xuzatyby wâgâ aguehobyry*

(Mt 18.10-14)

<sup>1</sup> Impostu epywadobyry emakewâni modo, judeu domodo ezewenry ara aitânry modo warâ saindylymo Jesus iopaji, aguely idase. <sup>2</sup> Fariseu domodo, Moisés inweniby wâgâ enomedâni modo warâ myani Jesus nhunâguedylymo. Aguelymo:

— Kurâdo inakai modo agâ tadalafil keduonro. Eagâmo tâdâwinduadyly keduonro warâ merâ uguondo — kelymo.

<sup>3</sup> Aituo myani Jesus warâ aguely, enomedâzemo:

<sup>4</sup> — Cem ovelhape âmaemo watay, tokalâ xuzatuo, tuize tâise âmaemo. Noventa e nove tâtadâze tâise âmaemo etadâdo odaji xuzatyby xuize mydâhomoem. <sup>5</sup> Mâentuomo, tuomazeze tâise âmaemo. Âewandaymo tâise mânnewylymo. <sup>6</sup> Itymoram aintuomo, itymo apano modo, ataen-hodo warâ mâingâsedylymo tâise. Amyguelymo: “Ohomaendaungâ yagâ. Ieguy xuzatybyma setai” myguelymo tâise — kely Jesus.

<sup>7</sup> — Deus, eagâ kaynonro modo warâ toenzepa tohomaenzemo lâpylâ, tokalâ kurâ inakanhe adâidly inmoly, Deus tyeinwântoem watay, mâkâ tainwânni modo nhomaendyly takaze kehoem. Xirâ mâuntudyzemo kuru wato — kely Jesus.

### *Jesus enomedâzemo, moeda samen-hoymby wâgâ aguehobypy*

<sup>8</sup> Jesus aguely myani, enomedâzemo:

— Tokalâ pekodo dez moedapeom, tokalâ tiamehonduo, tiamehoymby tuize myani. Lamparina tohobanâze, âtâ tawinkoenze warâ. <sup>9</sup> Tientuo, tataen-hodo, tâty apano modo warâ ingâsedyly. Aguely: “Yagâ ohomaendaungâ. Ymoedary kamehoymbyma setai” kely. Warâ myani pekodo aidyly tiamehoymby tientuo, iomaru.

<sup>10</sup> — Deus emary kaynonro modo iomazezemo toenzepa kehoem, tokalâ kurâ âjityendyly, inakanhe adâidly inmoly warâ watay. Xirâ mâuntudyzemo kuru wato — kely Jesus.

### *Jesus tâjimery tunwym sodokeimbyry odopâdyby wâgâ unâ nhegatuhobypy*

<sup>11</sup> Aituo myani Jesus unâ nhegatuly, tienomedâdomoem:

— Tâlâ myani uguondo, azagâ tymegueim. <sup>12</sup> Alâ myani imery iukono tunwynram aguely: “Âigueduo, mânhâympy modo urâem, paigoem warâ ise âzepajiwâdyly. Âiguelly kâinwânwândyseba aze. Urâem ini mâundudysse urâ inepa kehoem” kely salokuzenomo. Aituo myani nhunwym tâlâ tato ara nhepajiwâdyly iukonoem, iwaigoruem warâ. <sup>13</sup> Inepa myani mâkâ iukono idânârâ turâ âjigue nhedyly. Taypa âkelo âtâ anaxi idâly. Myarâ taintuo myani etygu kulâ. Kywypado, inakai modo warâ anhedyly. Idânârâ tunwym dinheru nhuduypy nhainly myani.

<sup>14</sup> — Idinheruru adaimpyem myani âdara typyniry nhanâto peba idyly. Awylygue toenzepa myani mâkâ salokuzenomo tâwindygue âsenagazedyly. Mârâ xidadâdâ aekuru pyni peba lâpylâ; toenzepa lâpylâ tâwinzeim modo. <sup>15</sup> Aituo myani âdylâ tâwanu xuize idâly tâwinduatoem. Uguondo tonlonra agueze idâly. Aguely myani eyam: “Âmâem âsewanize urâ, kâwinduatoenlâ. âdy kâinly peba aze” kely mâkâ salokuzenomo. Aituo myani uguondo aguely: “Tâwâlâ yfazendaryram âsewanira. Ieguy pâsega modo ise mânkyly” kely. Aituo myani idâly fazendaram, uguondo eguy pâsega eniem.

<sup>16</sup> Toenzepa myani ewindy. Ânguy olâ myani nuapyra. Awylygue myani toenzepa pâsega ipyniry ewy tieindyse idyly.

<sup>17</sup> — Toenzepa myani âsenagazedyly. Aituo aguely: “Inakanhe awitobyry wâgâlâ xirâ kâsenagazedyly. Pabai agâ tâwanuneim modo tâsegubydâzelâ kehoem ipynirymo. Ilâ enday urâ tarâ kâsewinzedly! <sup>18</sup> Pabairam kodopâdyly ise. Warâ ise eyam auguely: ‘Deus enanaym, inakanhe awidâ. Agâ inakanhe awidâ lâpylâ warâ, Pabai. Idânârâ mâunduypyma saim. <sup>19</sup> Awylygue âmery ara inkâba iegâ. Agâ tâwaneim ara kulâ iegâ’ warâ ise saintybyem pabairam auguely” kely mâkâ salokuzenomo. <sup>20</sup> Aituo myani târâpa odopâdyly tunwym etyram.

— Âtâdâ iwague endaylâ, nhunwym nhedyly. Tientuo, toenzepa kehoem intyendyly. Tâgase kehoem tymery iose idâly. Oxiodybyem inwymogoynl. Nhonugudyly. <sup>21</sup> Aituo myani mâkâ salokuzenomo aguely: “Deus enanaym, inakanhe awidâ. Agâ inakanhe awidâ lâpylâ warâ, Pabai. Idânârâ mâmunduypyma saim. Awylygue âmery ara inkâba iegâ” kely.

<sup>22</sup> — Aituo myani nhunwym tagâ tâwanuneim modoram aguely: “Iokobadaungâ, âtâ iwogonro iwâkuru kehoem enetaungâ. Etydâdaungâ. Ane iwâkuru emary ewily onwa ietaungâ. Ihuru etary ihuru onwa ietaungâ warâ. <sup>23</sup> Kâtygu ise! Tapirâ kiandyzeântyby xyâwâtaungâ warâ. Kydâwinduane! Kydohomaene! <sup>24</sup> Ymery mawânkâ nodopâdai. Igueypy ara keankâ merâ, kagâlâ olâ iwerâ! Xuzatyby ara keankâ, xarâ kyam olâ nâepanâgueondai” kely nhunwym. Ilâpygueduo myani etrymo adaguly lelâ.

<sup>25</sup> — Ilâ ume myani iwaigoru saindyly âpa ezay tâwaneimbyryem. Âtâ iwaguepa saintybyem myani tydyzeim modo aguely indadyly, tâdâidly indadyly warâ. <sup>26</sup> Aituo myani tâwaneim ingâsedly, nhapâiguely: “Âdyka awârâ? Âdaituoka âidylymo, âdydo imeom indylymo warâ?” kely.

<sup>27</sup> — Aituo mâkâ tâwaneim in-hoguly: “Âukono nodopâdai. Unwâm tapirâ kiandyzeântyby nyâen-hoogui. Âukono odopâdobyry xina nhetygueguyly” kely.

<sup>28</sup> — Awârâ tindatuo myani iwaigoru iewiâpadly. Tâgawândyseba idyly. Tiuntuduo myani nhunwym egasely kuohoram. Idâly eydâ atoram. “Igawânkâ. Xina agâ ohomaengâ, Mery” kely. <sup>29</sup> Imery olâ warâ aguely eyam: “Iweâpa agâ âsewanizeze wawyly. Âdykâ amyguehobyry kankadaymba urâ. Tokalâ bodylâ Yam mâmudupa olâ âmâ, yataen-ho modo agâ kâzetyguedoem. <sup>30</sup> Koendâpa aityby keankâ awâkâ âmerymaro. Idânârâ tydineruru mâmunduypy naim, pekodo inakai modo agâ tâitoem kulâ. Sainrimpyryem pylâ odopâdly. Tapirâ sadyzeântyby mâyâen-honly, âty aietoem” kely myani iwaigoru.

<sup>31</sup> — Aituo nhunwym aguely: “Yagâlâ minase, Mery. Idânârâ tâlâ wato, âmâ xurâ lâpylâ. <sup>32</sup> Xirâ âty agânhedyse wawyly olâ enra, kuomaru kâneehohoem. Âukono mawânkâ nodopâdai. Igueypy ara keankâ mâkâ, kagâlâ olâ iwerâ! Xuzatyby ara keankâ, xarâ kyanlâ olâ nâepanâgueondai” kely nhunwym – kely Jesus.

## 16

### *Jesus tâwaneim konokuni wâgâ unâ nhegatuhobyry*

<sup>1</sup> Aituo myani Jesus unâ nhegatuly, tynynoromo modo tienomedâdomoem:

— Uguondo tydinerugueim toenzepa âdydo imeom sodo myani mâkâ. Tâlâ lâpylâ myani uguondo mâkâ âdydo imeom sodo isejiguy eni. Eagonro tâwanuneim modo twymâryam agueze idâlymo, mâkâ isejiguy eni wâgâ. “Inokudyly kulâ mâkâ âsejiguy eni. Âdinheruru nhainly kulâ awâkâ” kelymo. <sup>2</sup> Awârâ tindatuo myani sodo mâkâ tâwaneim ingâsedly. Eyam aguely: “Iwerâ ise-ro? ‘Ienokudyly kulâ myinanry. Koendâ ysejiguy mâmantaymba âmâ’ nyguemo. Âkealâka? Pape wâgâ iwenigâ idânârâ mâmantaynly modo igondago, âdara yagâ deve awylymo kâuntuhoem. Yagâ mâmewaniombyra ise maze” kely.

<sup>3</sup> — Aituo myani tâwaneim âpaunzedly: “Tâwanepa widly ise enra. Âdaraka ise iwerâ awidyly! Ton-honreba urâ, âpa ezay tâwaneinhe. Tywypaze urâ, âkelomoram âzekainze.

<sup>4</sup> Ah! Awidyly xutuagui iweâma. Tutuze urâ, âdara ywymâry agâ tugontaguneim modo eataen-hoem widly lelâ ise. Awituo ise akaemo yagâ koendâ awylymo. Tarâpa kâjigonoholy watay, ypyniry, ipa wato modo warâ xuduzemo” kely myani mâkâ tâwaneim tyangahu oday.

<sup>5</sup> — Aituo myani idânârâ mâkâ uguondo âdydo imeom sodo agâ tugondagueim modo ingâsedly. Saguhoram aguely: “Âdara lelâka eagâ iewano agâ ogondagu?” kely. Mâkâ

in-hoguly myani: “Imâem enra kâempywaguly, quatro mil litros azeiti ioseaji” kely. <sup>6</sup> “Anra ogondary iwenibyem. Xugukeze urâ imâemba. Eagonro pape wâgâ imâembalâ ise kâinwenily. Azagâ mil litros azeiti lelâ ogondary, quatro mil mâkeba. Ikagâ. Izedy iwenigâ xirâ pape iwelo wâgâ” kely mâkâ tâwaneim.

<sup>7</sup> — Ilâpyryem myani eagonroram aguely: “Âmâ-ro, âdara lelâka eagâ iewano agâ ogondagu?” kely. Aituo myani in-hoguly: “Toenzepa ugondagu. Cem trigu etary lelâ” kely. “Xugukeze urâ ogondary. Oitenta etary lelâ ise ogondary iwerâ. Tarâ xirâ pape iwelo wâgâ izedy iwenigâ” kely mâkâ tâwaneim konokuni.

<sup>8</sup> — Aituo myani iwymâry aitobyry nhutuly. Aituo aguely: “Ienokudâ wâne. Tonomegue lelâlâ olâmy makynre. Angahu oday, âdara âpyniry, ipa mato modo mâendyl mutu, yagâpa iwanu ipygueduo. Koendâ kehoem amidâ, waunroem mâzetoem” kely myani tâwaneinram. Warâ myani tâwaneim konokuni aidyly — kely Jesus.

Aituo myani Jesus agueondly:

— Deus einwântâny modo tyangahu oday, âdara waunroem adâidyl awyly tutuzemo. Turâem pyni, ipa tato modo warâ xuduwanî modo eatael-hoem tâise lelâ. Arâ adâjidylyem lakuru enomegumo, Deus eynynonro modo takaze kehoem. <sup>9</sup> Tonomegue âdinheruru tâlâ matomo aietaungâ, agonromo mâenmawyadâdomoem. Âdinherurumo adainly watay, Deus eydâ atodâ tâjike lelâ ise âmaemo. <sup>10</sup> Âdiempa tâlâ tatogue, âkelomo emawyadâninra xuduze Deus toenzepa tâwâenseim târâ eydâ tatodâ. Âdiempa tâlâ tatogue, âkelomo emawyadâdânryram olâ ise Deus nudupa tâwâenseim târâ eydâ tatodâ. <sup>11</sup> Âigueymo iraynâlâ, koendâ âdinherurumo aiedyly mâuntuba âmaemo watay, Deus iwâkuru modo nudupa lelâlâ ise, âigueduomo. <sup>12</sup> Koendâ nhuduypy amânhepyra âmaemo tarâ onro anaym watay, nudupa lâpylâ ise koendonro modo târâ eagâ mataymo.

<sup>13</sup> — Azagâ tywymâgueim kurâ watay, nuduwâpyra azakâlâ agueho arâ aguentoem; merâ âdylâ aguiendye, mâkâ âdylâ aguiendye lâpylâ. Aituo tokalâ aguehobyry lelâ aguienkyl. Arâ lâpylâ mawânkâ awâkâ Deusgue tywymâgu ize tawyly umelâ toenzepa dinheru izetonro modo, Deusgue iwymâgüm nudupa awyly — kely Jesus.

### *Jesus kurâdo nhenomedâdomobyry (Mt 11.12-13; 5.31-32; Mc 10.11-12)*

<sup>14</sup> Toenze kulâ dinheru izetonro mâkeba fariseu domodo. Aituo, “Deus ize ato amânhekylymo atay, toenzepa âdype midylymo wâgâ mâpaunzedlymo atay warâ idu-akewâdaungâ” Jesus kely tindatuomo, aguehobyry wâgâ âwankuem nhedylymo. <sup>15</sup> Aituo myani Jesus aguely:

— Âkelomo enanaji, koendonro âmaemo. Deus olâ tutuze koendonro keba mawylymo. Tywângueim ara kulâ kurâdo iomazeândoem amânhekylymo Deus xurâem.

<sup>16</sup> — Saguhoem kydamudo âdara Deus ize ato adiendly nhutulymo myakâwâm kâzewenry Moisés inweniby wâgâ, Deus eynynâ aguewâni modo nhenomedâdo wâgâ warâ. Warâ mykâinane kydamudo aidyly, até João Batista ume. Iwerâ ozelâ ani, âdara Deus pymâem idyly wâgâ João Batista aguely. Arâ lâpylâ urâ unâ koendonro kâengatuly, âdara Deus kywymâryem idyly wâgâ. Toenzepa kurâdo Deus tywymâryem ize awyly, pymâem atoram tâtâdyze awylymo warâ.

<sup>17</sup> — Onro, kau warâ adainze. Deus aguiendye ato Moisés iweniby olâ nâtugueba. Adaunloenlâ tokalâ ezewenry iweniby ewy tâtywâduneba ise warâ.

<sup>18</sup> — Eagonro pekodo agâ mohögüinlymo, saguho âwydymo mâinmopygueduomo-ro watay, inakanhe midylymo awârâ. Aituo Deus izepa ato ara amidylymo. Deus xurâem, waunro tâjiwydylâ, iwydy kuru, nhatano keba. Pekodo imoyby agâ ohogüimby watay Deus izepa ato ara kulâ lâpylâ aidyly. Deus xurâem, waunroem eagâ ohogüimbylâ mawânkâ iso kuru — kely Jesus.

*Jesus uguondo âdydo imeom sodo wâgâ, Lázaro wâgâ warâ unâ nhegatuhobyry*

<sup>19</sup> Aituo myani Jesus unâ nhegatuondly, enomedâzemo:

— Uguondo âdydo imeom sodo myani. Kopaelâgâembaba âtâ tywogonro iwâkuru, tâwâenseim warâ nhedyly. Âtybeom ara lelâ myani etydâ. Aunlolâ myani etydâ pyni tâwâenseim, tâkubâguneim modobe awyly.

<sup>20</sup> — Tâlâ pylâ myani uguondo âdy pebaom Lázaro keho. Toenzepa myani iwâgâ pinuri modo egasely. Kopaelâgâembaba myani adaholy, mâkâ âdypeom ety iwyantaji. <sup>21</sup> Aunlolâ myani âsewinzedly. Mâkâ âdypeom typniry egupyry nhameyby, iwenzary wâgâpa ihugueyby modo kulâ myani nheinzeseguyl. Kaxorodoram iwinuriry âjilugainhol.

<sup>22</sup> — Aituo mâkâ kaikâ iguely. Anju domodoram myani egadopyry adaholy, kydamu Abraão eyam iwaguepa, Deus ize ato ara lelâ aini modoram. Tuomare kehoem myani târâ awyly. Mâkâ âdypeom tâigueze lâpypâ myani. Eguepybyry myani igueypy modo etadâdo odaji adaholy. <sup>23</sup> Deus ize ato aietânry modo egadopyry idâhoram myani adaholy. Toenzepa târâ âsenagazedly. Tâsenagazeday, iwaguelâ Abraão nhedyly, eagâ Lázaro warâ. <sup>24</sup> Aituo myani adaenkely: “Tako Abraão, ytyendâlâ ikâ! Toenzepa tarâ peto onwaym kâsenagazedly. Lázaro tâmary ewily paikaji inkuihoem aguekâ wao, ulu nhâkâwanâze âetoem. Kâenmaemba aze tarâ âdâpigul!” kely mâkâ âdypeombyryam.

<sup>25</sup> — Warâ olâ myani Abraão eyam aguely: “Âiguepa mawyly ume, toenzepa ani âdinherugu, âdydo imeom iwâkuru modope mawyly warâ. Lázaro ani âdy peba, toenzepa âsenagazedly. Iwerâ mâkâ saguhoem âsenagazedby Deus enado, awârâ modo nhewânukey. Âmâ toenzepa âsenagazeni iwerâ. <sup>26</sup> Eydâ matoram merâ idâhoem nuduwâpyra, kuontay tâtagueim imeâgâemba kehoem tâsanigueimbe. Awyarâ tâzekuâdyze donro modo âzekuâdomoem nuduwâpyra. Atonlo modo xayam nâzekuâbyra lâpypâ warâ” kely Abraão mâkâ âdypeombyryam.

<sup>27</sup> — Aituo myani mâkâ aguely: “Xirâem olâ ytyendâ ikâ, tako Abraão. Pabai ety donro modo xuruse Lázaro igonokâ. <sup>28</sup> Cinco lelâ konodope urâ târâ. Tâwâlâ Lázaro xurusemo nâtâ, niguepa tawylymo umelâ, inakanhe adâidly inmohomoem. Deus izepa ato aiedyly nimopamo-ro watay, âese lâpypâ akaemo xarâ, xirâ âji toenzepa kehoem tâdâsenagazedoam” kely.

<sup>29</sup> — Aituo myani Abraão aguely: “Tâlâ Moisés aguehobyry iweniby Deus aguiendye ato wâgâ kuruni. Tâlâ lâpypâ, saguhoem kuru Deus wâgâ aguewâni modo aguehobyry, âdara Deus agâ koendâ kitoem aguidyly wâgâ. Ilâ agueholâ âukonodo, Deus ize ato adiendye tatay, neinwândâmo” kely.

<sup>30</sup> — “Tako Abraão, Deus itaumbyry saguhobyry tindadysebamo, tyeinwândysebamo warâmo olâ inanry. Tâlâ Deus einwânniem itomoem aieto. Ânguylâ igueypy kurâem itondyby Deus wâgâ eyanmo agueze idâly-ro watay, inakanhe adâidly imozemo, Deus tyeinwântoem” kely.

<sup>31</sup> — Aituo myani Abraão aguely: “Moisés aguehobyry nidapyramo, saguho Deus wâgâ aguewâni modo aguehobyry nidapyramo warâ watay, neinwâmpyra awylymolâ ise, ânguylâ igueypy kurâem itondyby Deus wâgâ aguenri awyly umelâ” kely Abraão — kely myani Jesus.

## 17

*Deus einwânnipyryem neinwâmpyra ienehoim toenzepa ise âsenagazedyly  
(Mt 18.6-7,21-35; Mc 9.42)*

<sup>1</sup> Aituo myani Jesus aguely tynynonro modoram:

— Aunlolâ kurâ domodo Deus neinwâmpyra ienehoim modo aidyly. Toenzepa kehoem âsenagazeze mâkâ yeinwânni yeinwâmpyra ienehoim. <sup>2</sup> Koendâ tâise mâkâ iguely, yeinwânni yeinwâmpyra tienehonly iraynâlâ. Koendâ tâise tuhu imâsedo iwymy onwa

ekâjily, parutabâ ikaji samehoem, yeinwânni yeinwâmpyra idyly iraynâlâ. <sup>3</sup> Tâmaynelâ aitaungâ, aguewâtaungâ warâ. Yeinwânni modo ewy âynynâ inakanhe aidyly-ro watay, eyam aguewâtaungâ: “Deus izepa ato ara midyly awârâ. Adâiseba ikâ. Deus einwânkâ” kewâtaungâ eyam. Inakanhe adâidyly inmoly-ro watay, enanânehonwâdaungâ aito-byry. <sup>4</sup> Inakanhe adâidyly wâgâ âjityendyly watay, “Awitombyra ise urâ” keduo, inakanhe awyly enanânehonwâdaungâ. Toenzepa inakanhe aidyly umelâ, sete lelâ tokalâ iguandyly ara, inakanhe awyly enanânehonwâdaungâ — kely Jesus.

### *Jesus einwânni-ro watay, eon-honrube lelâ*

<sup>5</sup> Jesus induakeyby modo aguelymo myani eyam:  
— Xina âinwândyly imâem iekâ, Pymâ — kelymo.

<sup>6</sup> Aituo myani aguely:

— Mostarda ewy imeimbyry aralâ, âdiempa yeinwândylymo watay, toenzepa on-honrumo xuduze urâ. Figueiraram, “Onkegâ. Parutabâ ikaji âzetâda” mygueduomo, aise amyguehomobyry ara — kely Jesus.

### *Jesus tâwaneim wâgâ unâ nhegatuhobyry*

<sup>7</sup> Aituo myani Jesus unâ nhegatuly, tienomedâdomoem:

— Etaungâ. Âduaymo tâlâ uguondo emary poji anaym tâwaneim, eguy kaneru eni warâ watay, mâtâ poji anaymba saintuo, iwymâry eyam, “Ikobyzeguegâ. Ikagâ mâtwinduatoem” kewâpyra tâise. <sup>8</sup> Wakely tâise: “Iokobagâ, ypyniry aiekâ. Mesa onwa enekâ. Ohondbyyem lelâ ikâ, kâtwinduadyly ume, kadakuily ume warâ kâenkadyby mâtneetoem. Kâwanikebygueduo ise tâwâlâ mâtwinduadyly, madakuily warâ” kely tâise tâmaryam. <sup>9</sup> Pymâ tâmaryam wakepa: “Koendonro âmâ; xirâma urâem amientai” kepa. Aguehobyry aieni kulâ mâtâ emary. <sup>10</sup> Deus emary âmaemo. “Aiekâ” kehobyry amânhedylymo watay, iwanumolâ mâtâ amânhekylomo. “Koendonro âmaemo” kely kâzenuedaundâ. “Amyguehobyry aieni kulâma xina” kewâtaungâ Deusram — kely Jesus.

### *Jesus dez uguondo tâjimituguelgue tâwâneim kua nhetobyry*

<sup>11</sup> Jerusalémram tâtâly ume myani Jesus Samaria, Galiléia warâ ontagâ sakadyly. <sup>12</sup> Âtâ anary imeimbyry odaji saindyly ume myani dez uguondo tâjimituguelgue tâwânnuneim modo idâlymo iose. Iwaguelâ epagudylymo, awârâgue tâwânnuneim modo iopaji ânguy naimpyra awylygue. <sup>13</sup> Târâ endaylâ adaenkelymo:

— Xina tytyenzelâ ikâ, Jesus. Xina kua iekâ, Pymâ — kelymo.

<sup>14</sup> Tientuomo myani Jesus aguely:

— Kurâdo eynynâ Deus agâ aguewâni modoram âzechowâdaunda, kua ietybyem mawylymo nhutuhomoem — kely Jesus.

Aituo myani mâtâ dez uguondo modo ânwa oze idâlymo umelâ, kua idylymo Jesus eon-honrugue. <sup>15</sup> Kua itybyem tawyly tientuo myani tokalâ mâtâ uguondo modo ewy odopâdyly Jesusram. Todopâdyly ume myani mâtâ kaynâ kehoem xunâgu:

— Koendonro awâkâ Deus! Ton-honreim awâkâ Deus! — kely myani.

<sup>16</sup> Jesus eydâ atoram saintondbyyem, enado âzeguhoam itybyem aguely:

— Koendonro lelâlâ âmâ. Toenzepa agâ womaru, kua yetaima — kely.

Samaria donro lelâlâ wâne, alâ olâ myani Jesusram odopâdyly, kua tyetuo.

<sup>17</sup> Aituo myani Jesus aguely:

— Dez uguondo lelâ kua xietai. Akaemo nove lelâ odopâdylymo lâpylâ olâ tâise koendonro. <sup>18</sup> Akelo anano merâ: “Koendonro âmâ, kua yetaima” keim. Ytynru olâ, judeu modo ewy yam âdalâ keze nodopâbyra awylygue — kely.

<sup>19</sup> Aituo myani Jesus aguely uguondo kua itybyram:

— Aukâ. Idâ. Koendâ kehoem kua itybyem âmâ, ton-honre wawyly mânwântobyry wâgâ — kely.

*Âdara Deus pymâem idlyl wâgâ Jesus aguehobyry  
(Mt 24.23-28,36-44)*

<sup>20</sup> Aituo myani fariseu domodo ewy Jesus nhapâiguely:

— Âdaraka ise Deus pymâem tawyly nhenehonly xirâ anaym? — kelymo.

Jesus in-hoguly:

— Kienkyly mâkeba ise, Deus pymâem idlyl adaguly. <sup>21</sup> Kuodaylâ mawânrâ Deus pymâem ato. Ânguylâ wakewâpyra ise: “Etaungâ, anra tarâ. Anri târâ” kewâpyra. Odaymolâ mawânrâ Deus pymâem ato. Tâenseim keba mawânrâ Deus kuoday anhekyly — kely Jesus.

<sup>22</sup> Jesus aguely myani tynynonro modoram:

— Âsenagazeze âmaemo. Toenzepa ise agâmo wawyse mawylymo, on-hondâzemo. Tâwâlâ wâne âdiempa kulâ awyly. Urâ Uguondo Kaynâpa Âetyby tarâ agâmo witoem nudupa olâ ise. <sup>23</sup> Ayanmo aguelymo ise: “Nhaum, anra Jesus” kezemo. Tâlâ pylâ, “Jesus târâ” kewâni modo. Kâzeinwântaundâ. Uize tâgasezeba itaungâ aguehomobyryam. Tarâ inkâba ise urâ. <sup>24</sup> Urâ Uguondo Kaynâpa Âetyby kodopâduo, idânârâ iesemo. Ielu wâne kau xypyryram, xypyryram warâ tâzehorugueze, tâzehoze warâ, myara ise kodopâduo, idânârâ yaindyly âzehoze. <sup>25</sup> Awârâ iray, âzenagazeze olâ urâ. Toenzepa ise tywymâryem yizepanro modo ilâ ume.

<sup>26</sup> — Noé umenobyry ara, arâ lâpylâ ise urâ Uguondo Kaynâpa Âetyby kodopâduo.

<sup>27</sup> Saguhoem myakâwândy, paru inwenlygue tadainlymo iray, kurâdo xara tatomo aralâ mykâinane. Âwinduadylymo. Adakuilymo. Salokuzenomo modo, âwynsaundo modo warâ ohogünlymo warâ mykâinane aidlymo, Noé pepi imâsedo âtâ emyenro tyngatyby odaji âxiedyly iray. Âxiebygueduomo olâmy Deus inepa kehoem kopâ ihugueânmâ, adain-homoenlâ-ro warâ.

<sup>28</sup> — Ló umemy aimâ myara aitonze. Mârâ umeno modo xaralâ mykâinane aisezedlymo. Âwinduadylymo. Adakuilymo. Âdydo imeom nhanâdylymo. Vende nhedylymo. Typi nhetâdylymo. Tâty intâdylymo. <sup>29</sup> Sodomadâpa Ló âxigueduo olâ myakâwândy Deus peto kau odaypa tyihugueânze. Kopâ ihuguely ara kehoem tuhu tohoreim emyenro enxofre ihuguely. Idânârâ kehoem iguelymo lelâ.

<sup>30</sup> — Arâ lâpylâ ise urâ Uguondo Kaynâpa Âetyby kodopâduo, aguipa kulâ ise ywânwânni modo. <sup>31</sup> Kaynâ itymo nhangatay ilajiry wâgâ mataymo, âytâguywâdaungâ. Âwientaungâ. Âsejigumo enanânehonwâdaungâ. Âpa ezay âsewanize mataymo, inepa âwientaungâ. Todopâzeba itaungâ âtânra âsejigumo ese. <sup>32</sup> Enanâguewâdaungâ, Ló iwydy aitobyry. Deus, “Inepa âwientaungâ” keduo, neinwâmpyra myakâwândy. Xidadâram odopâze kewândymy.

<sup>33</sup> — Tâwâlâ âdutuze keim âmaemo watay, mâzemakeowâbyra ise âmaemo. Âigueduo, Deus agâ mohomaendaymba ise âmaemo. Deusram tâenseim mataymoma âzemakeoze âmaemo. Âigueduomo, Deus agâ typyguenryem ise omarumo. <sup>34</sup> Kodopâduo, ynynonro modo sase urâ. Ynynâbaom modo olâ ise urâ kampyra. Azagâ kurâ âjigamary wâgâ xykyim, ynynonro ynynâbaom warâ watay, ynynonro adahoze Deusram, eagonro olâ âjionze. <sup>35</sup> Azagâ pekodo trigu sakoim, ynynonro, ynynâbaom warâ watay, ynynonro adahoze Deusram, eagonro olâ âjionze. <sup>36</sup> [Azagâ uguondo âpa ezay âsewanirim, ynynonro, ynynâbaom warâ watay, ynynonro adahoze Deus eydâ atoram, eagonro olâ âjionze] — kely Jesus.

<sup>37</sup> Awârâ tindatuo myani eynynonro modo nhapâiguely:

— Âdykâ ise awârâ aidly, Pymâ? — kelymo.

\* <sup>17:36</sup> Idânârâ livru saguho modo wâgâ iwenibyemba xirâ versículu 36.

Aituo Jesus in-hoguly; âdykâ awyly aguepalâ:

— Tywângueimpe atoram elaho modo âtâdyguuly, ânguy, “Târâ igueypybe” keduo inkâba. Arâ lâpylâ ise kurâdoram kodopâdyly âdutuoly, ânguy âdakepalâ — kely Jesus.

## 18

### *Jesus pekodo pypâ, juiz warâ wâgâ unâ nhegatuhobyry*

<sup>1</sup> Aituo myani Jesus unâ nhegatuly, tynynonro modo tienomedâdoem, Deusram tâwâlâ ize tato nhekazezedomoem, aunlolâ eyam nhekadomoem warâ.

<sup>2</sup> — Tâlâ myani xidadâ oday uguondo, kurâdo ewentâdyly, tâwentâzeba warâ awyly wâgâ tâwaneim, awylygue juizgue ezeku. Koendonro keba olâ myani mâkâ, Deus ize ato ara aini keba, kurâ domodo koendâ eni keba, tienmawyadâdyzedonro keba warâ.

<sup>3</sup> Tâlâ myani mâtâ xidadâ oday pekodo pypâ. Aunlolâ myani juizram idâzesedyly, eagâ aguezeseze. “Mâtâ urâem inakanhe aityby agâ wao aguekâ” kezesedyly juizram.

<sup>4</sup> — Iweâpa myani juiz mâkâ pypâ aguely indasezedly kulelâ. Ilâpyryem olâ myani âpaunzedyly: “Âkealâ, Deus ize ato agânhedysedonro keba lelâlâ urâ. Kurâdo kâenmawyadâdyzeba warâ. <sup>5</sup> Ynadyly olâ pypâ yam nhekazezedlygue. Awylygue ise aguehobyry agânhenehonly. Agânhepyra urâ-ro watay, aguezesedylygue xynazema urâ” kely. Aituo juiz, mâkâ pypâ nhekadyby anhedyly — kely Jesus.

<sup>6</sup> Jesus aguely:

— Âpaunzedaungâ juiz aguehobyry wâgâ. <sup>7</sup> Adiendyseba lelâlâ wâne, pypâ nhekazezedby olâ aiemâ. Mâtâ juiz ânguydo kulâ pypâ aiedyse ato aiemâ, nhekazedlygue; Deusma kuru ise koendonro tawylygue, tyam ekazezenibyryram xuduze. Koendonro ise anhekyly, aunlolâ ekani modo xurâem. <sup>8</sup> Tynynonro modo emakeze; inepa kehoem ise awârâ modo anhedyly. Urâ Uguondo Kaynâpa Âetyby kodopâduo olâ ise aguipa kulâ yeinwânni modo. Xirâ mâtuntudyzemo kuru wato — kely Jesus.

### *Jesus fariseu wâgâ, impostu epywadobyry emakerim wâgâ warâ unâ nhegatuhobyry*

<sup>9</sup> Jesus unâ nhegatuly myani “Tagonro takaze kehoem koendonro urâ” keim modo wâgâ. Eyanmo aguely:

<sup>10</sup> — Azagâ uguondope myani. Tokalâ myani fariseu, judeu domodo ezewenry Moisés inweniby ara lelâ adâidysedo. Eagonro myani impostu epywadobyry emakerim, pymâ ton-honreim Roma donro xurâem. Azakâlâ idâlymo myani Deus etyram eagâ agueze.

<sup>11</sup> XYDYK itybyem myani fariseu. Deus agâ adâkely waunlo ara myani tânanaji; tywâgâ kulâ olâ myani aguely. Aguehobyry Deusram naimpyra. “Tuomare urâ, yagonrodo takaze koendonro urâ. Ânguy enokuni keba urâ. Ânguy kâenmagazedaymba urâ. Moisés inweniby agueho ara lelâ awidyly. Ywydy lelâ kâynanâguuly, eagonro pekodo lâpylâ warâpa. Tuomare urâ, mâkâ pymâ Roma donro xurâem impostu epywadobyry emakeim araba wawylygue. <sup>12</sup> Azagâ iguandyly lelâ inanry semana oday kâwinduapyra widyly wao, imâem agâ auguehoem. Dez lelâ âdylâ kâenmakely-ro watay, aunlolâ inanry tokalâ âyam kâunduly” kely fariseu.

<sup>13</sup> — Impostu epywadobyry emakeim olâ myani toenzepa âpybazeni, inakanhe aini tawylygue. Awylygue myani enagozeybyem lelâ awyly, iwaguelâ Deus agâ aguewâni mododâ awyly. Âjihogainly tytyrungue. Aguely: “Inakanhe aini kulâ urâ, Deus. Ytyendâlâ ikâ” kely.

<sup>14</sup> — Deus agâ adâkely ewanikeimbyryem, fariseu tâtyram odopâdyly. Impostu epywadobyry emakeim tâtyram odopâdyly lâpylâ. Warâ myani aidylymo. Impostu epywadobyry emakeim inakanhe aitobyry lelâ myani Deus nhygakely. Deus xurâem, mâkâma koendonro kuru, fariseu keba. Koendonroem tawyly wâgâ aguewâni modo,

tynrempa âiehoze. Koendonroem tawyly wâgâ aguedâny ise âdyren-hoim. Xirâ mâuntudyzemo kuru wato – kely Jesus.

*Jesus iamimeom agâ atobyry*

(Mt 19.13-15; Mc 10.13-16)

<sup>15</sup> Ilâpygueduo tâjiunwyndo Jesusram tymeom nhadylymo.

— Asaemo nhangahu onwa imary iekâ. Deusram koendâ âzehohomoem ekagâ asaemo xurâem – kelymo Jesusram.

Awârâ tientuo Jesus eynynonro modo iamudo sanipyry modoram aguely:

— Jesus kâdynanâdaundâ – kelymo.

<sup>16</sup> Aguelymo tindatuo olâ myani Jesus tynynonro modoram aguely:

— Arâ adâkezeba itaungâ! Tâwâlâ Yam iamimeom nâedâ. Kodopâdaundâmo. Iamimeom wâne enra ohondbyyem lelâ Yam tâetoem, myara lâpylâ kurâ domodo nohondâ, yeinwântomoem, Deus iwymârymoem itoem. <sup>17</sup> Yam tâetoem ohondâny modo Deusgue tywymâgunebamo ise, iamimeom wâne enra ohondbyyem lelâ Yam tâetoem myarapa tawylymogue. Xirâ mâuntudyzemo kuru wato – kely.

*Uguondo toenzepa âdypeom agâ Jesus aguehobypy*

(Mt 19.16-30; Mc 10.17-31)

<sup>18</sup> Ânwa oze myani uguondo tysejiguyeim aguely Jesusram:

— Koendonro lelâlâ âmâ, Pymâ. Âdaraka awidly, Deusram udâhoem, aunloenâ eagâ witoem warâ? – kely.

<sup>19</sup> Aituo Jesus in-hoguly:

— Amyaguely tutuzeka âmâ? Âdaituoka “Koendonro lelâlâ âmâ” myguely Yam? Kurâ koendonro lâpeba, Deus lelâ koendonro. <sup>20</sup> Tutuzelâ âmâ, âdy Deus aguiendye ato awyly Moisés inweniby wâgâ: “Eagâ mohogüin-hobypy lelâ xynanâgâ. Ânguy kâdyâ. Tâmagazeba ikâ. Aitobyry wâgâpa kulâ âkelomo kâzewentâdâ. Unwâm, âze warâ einwânkâ, xyrenkâ warâ” – kely Jesus.

<sup>21</sup> Aituo myani uguondo aguely:

— Salokuzenomoem wawyly umelâ idânârâ Moisés inweniby ara awidly, adyesezelâ urâ – kely.

<sup>22</sup> Uguondo aguely tindatuo myani Jesus aguely:

— Tâlâ lâpylâ olâ amânhokyly. Âsejiguy modo idânârâ vende ieta. Ebyry ise âdy pebaom modoram mâunduly-ro warâ. Awârâ amânhedyly-ro watay, tâlâ lelâ ise âmâ mâtâ koendonro Deus eydâ atodâ ekanâdyby. Idânârâ tâlâ mato mâundudu, odopâgâ, ynynonroem mitoem – kely Jesus.

<sup>23</sup> Jesus arâ aguely tindatuo myani toenzepa kehoem uguondo itywandyly, tysejiguy modo vende tiendyseba tawylygue. Tytynre kehoem idâly. <sup>24</sup> Mâkâ toenzepa âjityendy tientuo Jesus aguely:

— Ton-honre lelâlâ âdypeom modo yeinwântoem, Deusgue tywymâgomoe warâ, tysejiguy kulâ ize atomo kuru awylygue. <sup>25</sup> Ton-honre camelu agüie ihu oze sakadoem, arâ lâpylâ ton-honre âdypeom modo tâlâ tato inmohomoem eon-honru, Deusgue tywymâgomoe warâ – kely.

<sup>26</sup> “Ton-honre âdypeom modo Deusgue iwymâgomoe” Jesus keduo idani modo toenzepa kehoem âseguâdâdylymo, âdypeom modo lakuru Deus eydâ atoram idâim waunlo ara enanajimo awylygue. Aituo aguelymo:

— Arâ atayma ise ânguy nâsemaguewâbyra-ro – kelymo.

<sup>27</sup> — Deus olâ kurâ domodo anhetâny adyese lelâ – kely Jesus.

<sup>28</sup> Jesus aguely tindatuo, Pedro aguely:

— Xina-ro? Idânârâ tâlâ tato xina niâm, âynynonroem tâitoem – kely.

**29-30** Aituo myani Jesus eyanmo aguely:

— Idânârâ tâlâ matomo mânhânymo, ynynonroem mitomoem watay, Deus xuduze lelâ ipa matomo. Itymo mânhânduomo, âkykomoem ijidymo xuduze. Âwydymo, âwaigorumo, âukonomo, nhaundumo, unwânmô, âzemo, âmeombrymo warâ mânhânduomo, Deus âpemugumo nhetomo ara kehoem nhenimo, âwynenimo warâ xuduze lelâ. Iwâgâ mânhâympymo takaze ise Deus nhuduly. Âigueduomo aunloenlâ ise Deus agâ mawylymo. Xirâ mäuntudyzemo kuru wato – kely Jesus.

*Jesus, “Yigueduo, kurâem itonze urâ” keontobyry*

(Mt 20.17-19; Mc 10.32-34)

**31** Jesus doze tynynonro modo aguiom duaypa nhejikely, aguely:

— Idataungâ wao auguely. Jerusalémram xirâ kytâly. Deus itaumbry aguewâni modo aguehobry ara ise agâieholo, urâ Uguondo Kaynâpa Âetyby. Arâ ise târâ aidyly idânârâ aguehomobry ara. **32** Judeu keba modoram ise kâzegameoly. Âwankuem yesemo. Unâguezemo. Iedakudâzemo. **33** Yapiogüen-honzemo. Ilâpyryem ise yâen-honlymo. Azagâ emedyly idyly wâgâ kurâem itondypyem lelâ olâ ise urâ – kely.

**34** Âdakeze aguely awyly nutubamo myani eynynonro modo. Nutuba itomoem aiety-byem waunlo ara.

*Jesus epy Jericó donro kua nhetobyry*

(Mt 20.29-34; Mc 10.46-52)

**35** Jesus, eynynonro modo warâ âtâ anary Jericóram saindylymo ume, epy ânwa edazekâ ekadybyem. Sakadaynrim modoram aguely myani:

— Ytyendâlâ itaungâ. Ydineruru âunduwâtaungâ – kely.

**36** Târâ ekadybyem tatay, toenzepa kurâdo sakadyly indadyly. Aituo mâkâ lelâba nhapâiguely:

— Âdyka awârâ? Ânguya sakani? – kely.

**37** — Jesus Nazaré donro awâkâ sakani – kehonly.

**38** Adâkehonduo, adaenkely:

— Ytyendâlâ ikâ, Jesus! Âdamu Davi ara pymâ ton-honreim âmâ! – kely.

**39** Jesus eatado idâwâni modo aguelymo eyam:

— MYK alelâ ikâ! Tadaenkezeba ikâ! – kelymo.

Agueduomo lakuru myani ago kuru epy adaenkely:

— Ytyengâ, Davigue tydamudogueim! – kely.

**40** Aituo myani Jesus epagudyly. Aguely tonlo modoram:

— Epy yam enetaungâ – kely.

Tuopaji saintuo myani Jesus nhapâiguely:

**41** — Âdyka âmâem agânhedyse mato? – kely.

— Kâentondye urâ, Pymâ! – kely.

**42** — Etonze lelâ âmâ. Kua âeniem wawyly mâinwântobyry wâgâ – kely Jesus.

**43** Ilâenlâ kehoem myani epy nhetondyly. Ânwa oze Jesus nhapyguenoem idyly lelâ. Tâtâly ume aguely myani:

— Koendonro lelâlâ Deus! Ton-honreim awâkâ Deus! – kely.

Idânârâ tonlo modo, kua itybyem awyly tientuo, aguelymo:

— Âkealâ, ton-honreim lelâlâ Deus! Koendonro lelâlâ awâkâ! – kelymo.

## 19

*Zaqueu Jesus tiendyse atobyry*

**1** Aituo myani Jesus xidadâ Jericóram saintybyem, sakadyly xidadâ odakâ **2** Kurâ domodo duay tâlâ myani uguondo âdypeom, Zaqueu. Impostu epywadobyry emakewâni

modo iwymâry myani mâkâ. <sup>3</sup> Jesus tiendyse. Imâkeba tawylygue olâ myani tâjiduay nepyra awyly. <sup>4</sup> Aituo tâgase waunroem idâly. Se imâsedo sicômoro keho, figueira emyenro, onwa âkuly, Jesus iwaguepa tientoem sakadyly ume. <sup>5</sup> Se iaxi taintuo myani Jesus kayam MYK idyly. Se iwatary wâgâ ekadybyem nhedyly. Tientuo aguely:

— Zaqueu, iokobagâ âytâguygâ. Itydâ ise aze iwerâ — kely Jesus.

<sup>6</sup> Ilâ tindatuo myani Zaqueu inepa kehoem se sicômoro wâgâpa xytâguyly. Toenzepa myani iomaru. Aituo Jesus tâtymram nhadyly.

<sup>7</sup> Tonlo modo myani Jesus Zaqueu ety odaji egawândyly tientuo aguelymo:

— Etaungâ! Jesus negawântai inakanhe aini ety odaji, eagâ âwinduase. Anipyra tâise awâkâ! — kelymo.

<sup>8</sup> Zaqueu tâpague myani Jesus enado, aguely:

— Idakâ, Pymâ. Tâlâ wato epajiwâze urâ âdy pebaom modo agâ. Impostu epywadobyry kâenmakely ume, epywado imâem kehoem kâenkadyby watay, dinheru xuduonse urâ eyanmo. Tokalâ moeda kâenmagazedyby watay, quattro moeda ise eyanmo kâunduly. Azagâ moeda kâenmagazedyby watay, oito moeda ise eyanmo kâunduly. Warâ ise awidylly — kely Zaqueu.

<sup>9</sup> Aituo myani Jesus aguely:

— Xirâ âtâ sodo inakanhe aitobyry xygakeagui. Inakanhe aityby lelâlâ wâne, judeulâ olâ merâ Abraão iwerypyrylâ. <sup>10</sup> Tâjiunwym wâne tymery xuzatyby xuize tâtâze myara xuzatyby modo kâwinly, Deusdâ iwagueno modo, inakanhe awylymo kâyngakehoem, kâenmakehomoem warâ — kely Jesus.

### *Tâwanuneim modo mâtâ moeda âdara nhetyby awyly wâgâ unâ nhegatuhabory*

(Mt 25,14-30)

<sup>11</sup> Xidadâ imâsedo Jerusalém iwaguepa Jesus. Aituo tonlo modo aguely:

— Inepa wânkâ ise Jesus Jerusalémdâ pymâem idyly? — kelymo âjigue.

Arâ xunârymo tiuntuduo myani Jesus unâ nhegatuly, idanipyry modo tienomedâdoem.

<sup>12</sup> — Tâlâ myani uguondo pymâ tynreim iwerypyry. Taypa kehoem myani âjigâseoly, pymâ iwagueno agâ agueze. Pymâ iwagueno aguely: “Âmâ ise ity anano modo eni” kely. <sup>13</sup> Taypa kehoem tâtâly iraynâ, dez lelâ tagâ tâwanuneim modo ewy ingâsedaynlly. Mâkâem, mâkâem warâ tokalâ moeda ourugueto tiunduday, aguely: “Anra moeda. Xirâ dinherugue âdylâ anâtaungâ, manâtomobyry takaze vende mânhetomoem. Warâ ydinheruru imâem mânhenehon-homoem kodopâdyly ara” kely myani mâkâ uguondo. Agueypyem idâly. <sup>14</sup> Ety anano modo izepa ato myani mâkâ. Awylygue myani kurâdo ingtonodylymo pymâ iwaguenonra agueze: “Awâkâ uguondo izepa xina tywymâryem” keze.

<sup>15</sup> — Mâkâ pymâ iwagueno olâ aguely: “Merâ ise âwymârymo, izepa lelâlâ wâne âmaemo” kely. Ilâpygueduo pymâ iwelo tâty anaxi odopâdyly lelâ. Saintybyem myani, tagâ tâwanuneim modo ingâsenehonly, âdara lelâ dinheru imâem ienehonrimbyryem awylymo tiuntuhoe. <sup>16</sup> Saguho saintyby aguely: “Tokalâ moeda ourugueto tâwâenseim yam mudu. Mârâgue âdydo imeom sanâdâ; kanâtyby vende xiedâ. Aunlolâ keankâ arâ awidylly imâem itoem. Iwerâ dez moeda, toenzepa tâwâenseimbe urâ. Anra tarâ idânârâ âmâem” kely.

<sup>17</sup> — “Koendâ tâwaneinlâ myanke âmâ! ‘Aiekâ’ uguehabory amiendâ. Koendonro amiendâ âdiempa kâunduypygue. Awylygue ise dez lelâ xidadâ anano modo eniem âduakely” kely.

<sup>18</sup> — Ilâpyryem nhatano tâwanuneim âewly. Aguely: “Tokalâ moeda tâwâenseim yam mudu. Mârâgue âdydo imeom sanâdâ; kanâtyby vende xiedâ. Aunlolâ keankâ arâ awidylly, imâem itoem. Iwerâ cinco moeda, toenzepa tâwâenseimbe urâ. Anra tarâ idânârâ âmâem” kely.

**19** — Aguely tindatuo myani, mākâ uguondo tâwaneinram aguely: “Koendonro amiendâ âdiempa kâunduypygue. Awylygue ise cinco lelâ xidadâ anano modo eniem âduakely” kely.

**20** — Ilâpyryem eagonro tâwaneim idâly. Aguely: “Anra xirâ moeda tokaleom māunduypy, pymâ. Âtâ tâjiwogonrogue xitunwym. Sekanâdâ warâ. **21** Aytadâ urâ. Uguondo ânguydo kulâma âmâ. Mâsewanihobyrygueba âdype midyly. Xina âsewanirim; âmâ pylâ xina ewanopyrygue âdylâpe ini-ro” kely.

**22** — Arâ agueduo myani, eagâ ewano aguely: “Inakanhe tâwaneim lelâlâ âmâ. ‘Uguondo ânguydo kulâ âmâ’ mygueanse. ‘Mâsewanihobyrygueba âdype midyly. Xina âsewanirim; âmâ pylâ xina ewanopyrygue âdylâpe ini-ro’ mygueanse. Iweâ lelâlâ xutuze âmâ, amyguehobyry ara lelâlâ wawyly. **23** Ydineruru imâem itoem âdy amânhedyseba matay, dinheru xynanâdaynrim modoram metadânehondye banco odaji. Imâem ydineruru tyenehonzema tâise akaemo. Arâ tâise kodopâduo imâem kâenmakely” kely.

**24** — Aituo mākâ uguondo tonlo modoram aguely: “Merâ inakanhe tâwaneim emaymba moeda emakewâdaungâ. Dez lelâ moedapeonram xuduwâtaungâ” kely.

**25** — “Dez moedapelâ awâkâ, pymâ!” kelymo.

**26** — Iwymâry aguely: “Mâkâ toenzepa tâlânro, imâem emakeze, iwerâ tâlâ tato takaze. Mâkâ agui ipaom olâ, âzemakeoze iwerâ aguipa tâlâ ato. Xirâ māuntudyzemo kuru wato.

**27** Iwerâ, yizepanro modo xarâ enetaungâ, iwymâryem wawysebaombyry modo. Xarâ enenimobyryem, ienanaym xyâwâtaungâ” kely mākâ iwymârymoem itoem iduakeyby. Warâ xirâ unâ kâengatuly inomedâzemo — kely Jesus.

### *Jesus Jerusalémram saintobyry (Mt 21.1-11; Mc 11.1-11; Jo 12.12-19)*

**28** Agueypyem myani Jesus waunroenlâ idâly Jerusalémram. **29** Iwy Se Oliveira Ekaram saindylymo. Azagâ âtâ anary imeimbyry Betfagé, Betânia warâ iwaguepamo myani. Iwyrat taintuo, Jesus tynnonro ewy azagâ waunroem ingonody. **30** Warâ myani eyanmo aguely:

— Idâwâtaungâ âtâ anary waunroenoram. Aindylymo umelâ ise, jumentinhu ekâjibyem māendylymo, âdykâ ânguy nhahozeândyby mâkeba ise mākâ. Ekâjiguewâdaungâ. Enetaungâ xarâ. **31** “Ine wao. Âdaituoka awâkâ mandylymo?” myguehonlymo watay, “Kywymâry merâ izetonro. Inepa ise nhopânehonly” myguelymo lelâ ise — kely Jesus.

**32** Idâlymo. Saintybyem jumentinhu nhedylymo, Jesus aguehobyry ara.

**33** Nhekâjiguelymo ume myani, adapâigueolymo jumentinhu sodo modoram:

— Âdaituoka māenkâjiguelymo? — kelymo.

**34** — Kywymâry merâ izetonro — kelymo.

**35** Aituo myani jumentinhu nhadylymo Jesusram. Saintybyem myani tygaparyguelâ jumentinhu inkawendâdylymo. Aituo Jesus jumentinhu onwa âkuly. **36** Jesus jumentinhu wâgâ âkuybyem idâly ume, toenzepa kurâ domodo tygapary ânwa oze PO PO nhedylymo, Jesus iray, tynrense tawyly tienehon-homoem, pymâ ton-honreim kehoem iray adâitomo ara. **37** Jerusalémdâ iwaguepa awyly ume, ânwa iwy Se Oliveira Eka enagozehodâ, toenzepa kurâ domodo nhapygueni modo. Toenzepa tuomarumogue, tygâky nhagulymo, Jesus anhetyby tientomobyry wâgâ:

— Ton-honreim awâkâ Deus! Koendonro awâkâ! Tâense xina âdykâ âdaunlo uguondo anhetânry anhedyly — kelymo.

**38** Aituo myani adaenkelymo:

— Koendonrolâ awâkâ Kywymâry Jesus, Deus ingonotyby! Awâkâ wâgâ kurâ domodo koendâ itybyem Deus agâ. Koendonro awâkâ Deus kaynâ tâtyreim! — kelymo.

**39** Tâlâ lâpylâ myani kurâ domodo duay fariseu domodo ewy. Akaemo aguely tindatuo, Jesusram aguely:

— Idakâ ampygueni modo saenlu, Konomedâni. “MYK alelâ itaungâ” kekâ eyanmo — kelymo Jesusram.

<sup>40</sup> Aituo Jesus aguely:

— MYK idylymo-ro watay, Deus tuhu itainhehonze, yrentomoem, iehoguedomoem warâ. Xirâ mâuntudyzemo kuru wato — kely Jesus.

*Jesus eogumatobyry, Jerusalém donro modo âsenagazeniawylymo tiuntuduo*

<sup>41</sup> Jerusalém iwaguepa itybyem Jesus xidadâ nhesedyly. Târâ tâtyuneim modo eongüendyly myani, toenzepa tintyendylymogue. <sup>42</sup> Târâmolâ-ro waunlo ara kehoem eyanmo aguely:

— Kaikâ âmaemo-kâ Jerusalém donro modo! Yeinwântuomo lelâ Deus imakelymo awyly, mâuntudyzemo wâne urâ. Mâuntuba olâ âmaemo! <sup>43</sup> Mâsenagazedomo sainse. Âizepanromo modo âjidadârymo sahodâze. Ahodâduomo, onro, se satâwâdyby warâ muralha ipebaji idâtyguyzemo, tâkuhomoem, tâgawântomoem warâ. Tâinkâ lelâba ise sodadu modope awyly, âdaunlolâ judeu nâsemagueba itoem. Ânguydo imeom mydy oday tawâseim ara ise âmaemo. <sup>44</sup> Âdyoze, itymo adakalagueoze warâ. Tuhu angatonro lâpeba ise. Âsenagazeze âmaemo, iweâ lelâlâ Deus imakedyzemo awyly mâuntudyzeba mawylymogue. Deus âwymârymoem idysebama keankâ âmaemo — kely Jesus.

*Jesus ânguydo imeom vende ieni modo Deus ety odayba nhegaseândobyry*

(Mt 21.12-17; Mc 11.15-19; Jo 2.13-22)

<sup>45</sup> Aituo myani Jesus egawândyly Deus ety idaseraji. Âdydo imeom vende ieni modo nhedyly. Deus etydâ aidylymo tientuo myani, Jesus nehoguebyra arâ aidylymo. Ânguydo imeom vende ieni modo nhegaseândaynly. <sup>46</sup> Aituo eyanmo aguely:

— Deus itaumbyry awo wâgâ iwenibyem: “Xirâ iety yagâ agueho xirâ” kewândymy Deus. Kurâ domodo mâenmagazedylymo kulâ olâ. Ânguydo imeom Deusram tiundulymo nhanâdylymo watay, toenzepa mâenwâentanâdylymo. Dinhru âmaemoenlâ mânhedylymo. Deus ety, tâmagazeim modo otoendoem mânhedylymo kulâ — kely myani Jesus.

Ilâpyryem myani Deus ety odaypa egasely.

<sup>47</sup> Kopaelâgâembaba Jesus idâly Deus ety idaseraji, Deus wâgâ kurâ domodo enomedâze. Kurâdo eynynâ Deus agâ aguewâni modo iwymârydo, Moisés inweniby wâgâ enomedâni modo, kurâ domodo iwymâry warâ Jesus tyândysemo myani. <sup>48</sup> Adara adiendyly awyly nutubamo olâ. Tyanemo myani Jesus sawânehonze; kurâ domodo ty-izepa idyly tyntadylymogue. Kurâ domodo mawânkâ myani Jesus aguely tohoguezemo.

## 20

*Deuslâ Jesus igononi, âdaunlo kulâ mâkeba*

(Mt 21.23-27; Mc 11.27-33)

<sup>1</sup> Kopaelâgâem myani Jesus Deus etydâ awyly. Tonlo modo myani nhenomedâguyly. Unâ koendorro nhegatuly âdara Deusram âzemakeolymo wâgâ. Târâ Jesus awyly ume, kurâdo eynynâ Deus agâ aguewâni modo iwymârydo, Moisés inweniby wâgâ enomedâni modo, judeu domodo iwymâry modo lâpylâ warâ âewylymo. <sup>2</sup> Aituo nhapâiguelymo:

— Ânguyka tarâ Deus etydâ arâ amânhetyby amânhetoem agueim? — kelymo.

<sup>3</sup> Aituo Jesus in-hoguly:

— Apâiguelymo lâpylâ ise. Uhoguwâdaungâ wao. <sup>4</sup> Ânguyka ani João Batista, inakanhe adâitobyry wâgâ âjityendyby modo batiza nhetoem aguenri? Deuslâ? Âdaunlo uguondo kulâ? — kely Jesus.

<sup>5</sup> Aituo myani âjigue aguelymo:

— Iwerâ ise-ro? Âdara kuru ise kin-hoguly? “Deuslâ agueim” kykeduo, “Âdaituo pylâka João aguehobyry mâinwâmpyra mawylymo?” keze. <sup>6</sup> “Uguondo kulâ ani João aitoem agueim, Deus mâkeba” kykeduo, taunlo modo kagâ iewiâpadaynze. “Deuslâ, João Batista igononi” tâkezemo inanry. Aituo ise tuhugue tamytâze kyâlymo – kelymo.

<sup>7</sup> Awylygue warâ in-hogulymo:

— Xina nutuwâbyra, João batiza nhetoem ânguy agueim awyly – kelymo.

<sup>8</sup> — Arâ atayma auguepa lâpylâ ise urâ, ânguy xirâ agânhetoem ugononi awyly – kely.

*Tâwaneim modo koendâpa aitobyry wâgâ Jesus unâ nhegatuhobyry*

(Mt 21.33-46; Mc 12.1-12)

<sup>9</sup> Ilâpyryem myani Jesus tonlo modo enomedâze unâ nhegatuly.

— Tâlâ myani uguondo uva etâdybybeom. Uva ejidy etaynrim modope iemâmy. Warâ myani eyanmo aguely: “Ypi mâendylymo-ro watay, uva xutuduo, epajigâze urâ agâmo” kely. Koendâ lelâ myani in-hogulymo. Aituo myani idânârâ âtunâguedybyem, âtâ anary iwaguenonra idâly. Iweâpa myani târâ awyly.

<sup>10</sup> — Uva ekaunâdo odaji ituo myani tâmary ingonodyly akaemo tâwaneim modoram, nhekaunâdybymo ewy turâ emakeze. Uva ewily ekaunâni modo mâkâ ingonotyby sain-tuo, nhawâdylymo, nhapiogulymo alelâ. Âdy nudupamo âpa ezary sodoram nhatoem. <sup>11</sup> Saguho âdy peba odopâduo myani eagonro tâmary ingonotondyly. Uva ewily ekaunâni modo olâ nhawâdylymo, nhapiogulymo, kywypadoem kulâ anhedylymo. Âdy nudupamo lâpylâ âpa ezary sodoram nhatoem. <sup>12</sup> Aituo myani eagonro ingonodyly wâne. Uva ewily ekaunâni modo olâ nhawâdylymo. Nhapiogulymo lâpylâ. Sapiogunrimbyryem, ingonodylymo. Âdy nudupamolâ.

<sup>13</sup> — Aituo uva sodo âpaunzedly, aguely: “Iwerâ ise-ro? Âdaraka ise awidly? Ah, xutuagui. Ymery tokaleom kâinwyneguylise kâingonokyly. Ypi etaynrim modo âda nientaymbamo ise” kely. Aituo tymery tokaleom ingonodyly myani.

<sup>14</sup> — Sodo imery saindyly umelâ myani âpa ezay tâwanuneim modo nhedyly. Âjigue aguelymo: “Uva sodo imery mâkâ âeni. Tunwym igueduo, mâkâ ise ipibyry sodo. Kydyânrêne, nhunwym ipibyry kurâenlâ itoem” kelymo.

<sup>15</sup> — Aituo myani mâkâ uva ejidy sodo imery nhawâdylymo, âpa ezayba nhedylymo, tyân-hoem – kely Jesus.

Aituo myani Jesus adâkely idani modo nhapâiguely:

— Âdyka ise mâkâ uva ejidy sodo akaemo âpa ezano modoem anhekyly? <sup>16</sup> Agueze urâ âyanmo. Todopâduo, uguondo modo xyâwâse mâkâ uva sodo. Ilâpyryem ise etaybyano modo nhuinly uva ejidy eni – kely Jesus.

Aituo aguelymo:

— Arâne Deus anienehomba nidâ! – kelymo.

<sup>17</sup> Jesus koendâ kehoem akaemo nhedyly. Agueondyly:

— Warâ Deus itaumbyry awo wâgâ aguely:

“Tâlâ myani tuhu imeâgâkeba, âtâ itâdo.

Idânârâ itâdaynrim modo mâtâ tuhu tâensem,

mâtâgue âtâ tintâdyzebamolâ.

Deus xurâem olâ mâtâ tuhu tywyneim kuru!”  
warâ iwenibyem awyly.

<sup>18</sup> — Ânguylâ mâtâ tuhu onwa ihugueyby, âdyâze. Ânguy onwalâ mâtâ tuhu ihugueduo, samiunze – kely myani Jesus.

{Mâtâ uva sodo imery emyenro, tuhu âtâ itâni modo izepa atobyry emyenro warâ awâkâ Jesus.}

*Impostu epywadyly wâgâ Jesus nhapâiguehomobyry  
(Mt 22.15-22; Mc 12.13-17)*

<sup>19</sup> Moisés inweniby enomedâni modo iwymâryo, kurâdo eynynâ Deus agâ aguewâni modo iwymâryo warâ awârâ unâ Jesus nhegatuly indadylymo myani. Ilâ tindatuo, toenzepa kehoem iewiâpadylomo, tyanlâ Jesus aguely awyly tiuntuduomo. Jesus agâ tyewiâsemo wâne myani, nawânehombamo olâ, “Kianwânehonly iwerâ watay, kurâdo kagâ iewiâpaze” tâkemuomo, âdaunlo kurâ domodolâ mawânkâ Jesus izetonro awylygue. <sup>20</sup> Aituo Jesus anhekyly, agueho warâ nhenuagaendylymo, pymâ Pilatos enanaym tienwentâdomoem. Uguondo modo ingâsedylymo. Eyanmo aguelymo:

— Jesus agâ aguewâtaunda. Sapâiguewâdaunda. Mâuntudyze mawylymogue mapâiguelymo waunlo ara lelâne nidâ. Kâzewenkeba aguehoem kulâ ise mampâiguelymo kelymo. Agueduo ise kianwânehonly. Roma iwymâry induakeybyram ise kiunduenhonly. Awâkâ ise xyâen-hoin-ro warâ — kely myani pymâ domodo.

<sup>21</sup> Saintybyem, ingonotyby modo Jesusram aguelymo:

— Pymâ, konokuni keba mawyly, tutuze xina. Deus ize ato wâgâ âkealâ xina mânenomedâdyly. Iozeno lelâ amygueho, ânguy izepa awyly umelâ. Pymâdo tynrenseim modo ize ato amânhetoem kulâ amygueho mâungukewâbyra âmâ. <sup>22</sup> Awylygue âdara impostu wâgâ mâuntuly wao xinaram aguekâ. Moisés inweniby ara, koendâ pymâ Roma donro César-ram impostu epywadyly? Koendâpa? — kelymo.

<sup>23</sup> Tâwentâdomoem kulâ tapâiguelymo awyly, tutuze olâ myani Jesus. Aituo myani aguely:

<sup>24</sup> — Moeda enetaungâ — kely.

Moeda nhadylymo. Jesusram adapâigueolymo myani:

— Ânguy emydy ekudoka xirâ wogonro? Ânguy ezedy iwâgâ iweniby warâ? — kely.

Aituo in-hogulymo:

— Roma donro kywymâry César emydy, ezedy warâ — kelymo.

<sup>25</sup> Jesus aguely:

— César xurâ, Cesaranlâ xuduwahtaungâ. Deus xurâ, Deusranlâ xuduwahtaungâ warâ — kely.

<sup>26</sup> Jesus tienokudyzedo modo âda tiendyly nutuba idylymo, tâzenanaym tienwentâguedoem anienehomba tawylygue. Tonomegue kehoem in-hogulymo awyly tiuntuduuo myani akaemo âdakepa idylymo.

*Iguewâtyby modo kurâem itondylly wâgâ nhapâiguehomobyry  
(Mt 22.23-33; Mc 12.18-27)*

<sup>27</sup> Saduceu domodo ewy Jesus agâ âtunâgueze idâlymo myani. Judeu domodo ewy akaemo. Iguewâtyby modo kurâem itondylly einwântânry ani akaemo. Jesus iopaji saindylymo myani. <sup>28</sup> Aguelymo:

— Idakâ, Pymâ. Moisés ezewenry tutzelâ âmâ iweâpa kydamudoram inweniby: “Uguondo tywydy namypalâ iguely-ro watay, iukonobyrylâ nohogüim iwydypyry agâ, imezeândoem. Aituo, iamudo iazeypy, igueypy imeryenlâ âdutuoly” kelype. <sup>29</sup> Xina olâ ise warâ nhegatuly. Tâlâ myakâwâm sete uguondo modo âjiwaigoruem, âjiukonoem waunlo. Iwaigoru ohogünly myakâwâm. Tywydy namypalâ iguely. <sup>30</sup> Iukonobyrylâ myakâwâm ohogünrim pypâ agâ. Mâkâ lâpylâ myakâwâm tywaigoru iwydypyry namypalâ iguely. <sup>31</sup> Azagâ tokalâ ietomo iukono ohogünly myakâwâm pypâ agâ. Mâkâ lâpylâ iguewâm, tywaigoru iwydypyry namypalâ. Tywaigoru iwydypyry namypalâ lâpylâ myakâwâm quatro ietomo, cinco ietomo, seis ietomo, sete ietomo warâ iguewâdylymo. Sete uguondo lelâ myakâwâm mâkâ pekodo agâ ohogüimby. <sup>32</sup> Idânârâ mâkâ uguondo modo iguewâpygueduo myakâwâm mâkâ pekodo iguely lâpylâ.

<sup>33</sup> — Xirâ xina apâiguedyze ato. Âkealâ kuru igueypy kurâem itondly-ro watay, âdaunlo uguondo akaemo sete ewy iwydyenka ise mâkâ, kurâem itonduomo? Idânârâ akaemo sete lelâ iwydyem ityby mawânkâ! — kelymo.

<sup>34</sup> Jesus in-hoguly:

— Iozepa kulâ âunâgumo. Xirâ anaym kulâ uguondo, pekodo warâ ohogüinly.

<sup>35</sup> Igueduomo olâ ohogüin-homobyry tâtygagueze. Târâ Deus ezaylâ ise tagâ iniem Deus nhutuyby modo. Tarâ onro anaym ohogüimby modo, târâ nohogüin-ondaymbamo ise.

<sup>36</sup> Iguewâtyby modo kurâem itonze lelâlâ, nigueompyra tâitomoem. Anju domodo nohogüinwâbyra. Alâpylâ iguewâtyby modo, kurâem itonduo, nohogüin-ondaymbamo ise. Tymeombyry ara lelâ ise Deus nhedylymo, mâkâlâ kurâem ietonimo awylygue.

<sup>37</sup> — Iozeno kuru iguewâtyby modo kurâem itondly kely mâintaimbaka minasemo? Enanâguewâdaungâ Moisés inweniby igueypyem kurâem tâjitondly wâgâ, se imeimbyry niadupalâ tyatygueindâ Deus aguehobyr: “Deus urâ, Abraão, Isaque, Jacó warâ iDeusry; tarâlâ akaemo ywâgâ” kewândymy Moisésram. <sup>38</sup> Arâ aguehobyr wâgâ Deus einwântaynrim modo nigueompyra awyly kiuntuly. Kurâdo enanaji olâ Deus einwânni iguewâtyby modo iguewâtybyem lelâlâ. Deus xurâem olâ akaemo igueypyemba, târâlâ akaemo Deus eydâ atodâ — kely Jesus.

<sup>39</sup> Aituo myani Moisés inweniby wâgâ enomedâni modo ewy aguely:

— Koendâ mihoguagui, Konomedâni — kelymo.

<sup>40</sup> Aituo saduceu domodo MYK idylymo. Âdy napâigueombyra idylymo.

*Jesus, “Ânguya Messias?” kehobyr*

*(Mt 22.41-46; Mc 12.35-37)*

<sup>41</sup> Deus Ingonytyby Messias wâgâ âpaunzedylymo myani Jesus ize ato. Awylygue warâ aguely:

— Moisés inweniby enomedâni modo, “Uguondo kulâ Messias, Davi iweryypyry tarâ onro anaym kulâ ise pymâem awyly” kelymo. Âyanmo auguely olâ, âkealâ awyly mâuntuhomoem — kely. <sup>42</sup> — Tutuzelâ myakâwândy Davi, âdaunlolâ kurâ takaze kehoem ton-honreim Messias awyly. Messias wâgâ Davi tywenize myakâwândy pape Salmos wâgâ:

“Deus aguely myakâwâm Ywymâryram:

‘Yahoru eynynâ ikagâ tynrenseim ekadodâ,

<sup>43</sup> âduery modo eon-honru kainly ara,

âdydo ara kulâ âhuru iaxi kânhedylymo ara’ kewândymy Deus”

kely myakâwândy Davi.

<sup>44</sup> Davilâ myakâwândy Messias tywymâryem awyly agueim. Awylygue kiuntuly âdaunlo kulâ uguondo keba awyly. Messias tynrenseim kuru awyly xutuwâdaungâ, Davi takaze — kely Jesus.

*Moisés inweniby wâgâ enomedâni modo wâgâ Jesus aguehobyr*

*(Mt 23.1-36; Mc 12.38-40)*

<sup>45</sup> Aituo myani kurâdo indatoem, Jesus aguely tynnonro modoram:

<sup>46</sup> — Tonomeguelâ itaungâ, Moisés inweniby wâgâ enomedâni modo aito ara amipyra mitomoem. Koendonro aramo wâne, koendonro kebamo olâ. Earamopa itaungâ. Kurâ domodoram tâzehogueoly kulâ izetonro. BOH waunlogue lelâ etyunmo, Deus eynynnonroem tawyly tienehon-homoem. Âdykâlâ kurâdo âtâdyguyho einkâ takaduomo, mâkâ modo tâdaenkudyzemo, tynrendysemo warâ inanry. Âtâ tâdâtâdyguyho odaji tâtâduomo, tâgareim ekado wâgâ lelâ ekadylymo, arâ lâpylâ âty mododâ. <sup>47</sup> Pekodo pypâ modoram aguelymo inanry: “Xinalâ ise âsejiguymo eni, tusonebama âmaemo” kelymo. Isejiguymo turâem tientomoem kulâ nhenokudylomo. Deus agâ adâkedaymo, imeâgâemba kehoem

aguelymo, koendâ tâgaromoem kulâ. Awylygue ise Deus nhenagazedylymo, eagonrodo takaze kehoem – kely myani Jesus.

## 21

*Pypâ âdy pebanro Deusram tydineruru nhuduhobryy  
(Mc 12.41-44)*

<sup>1</sup> Jesus myani Deus ety idaseray, kurâdo enuagaenze. Tokalâ, tokalâ warâ dinheru kaixa odaji ieni modo myani nhenuagaendyly. Toenzepa tydinerugueim modo toenzepa dinheru nhedyly. <sup>2</sup> Pypâ âdy pebanro kaixa odaji azagâ moeda imeimbyry, tâwâensemny nhetadâdyly emâmy lâpylâ. <sup>3</sup> Awârâ tientuo myani Jesus aguely:

— Deus xurâem olâ mâkâ pypâ nhetadâdyby tâwâensem kuru, akaemo âdypeom modo nhetadâdyby takaze. Xirâ mâuntudyzemo kuru wato. <sup>4</sup> Dinheru âsegubydâdyby akaemo nhuduly. Mâkâ olâ idânârâ tâlâ tato ara nuduaki, typyniry tianâto alelâ — kely.

*“Deus ety adakalagueoze” Jesus kehobyry  
(Mt 24.1-2; Mc 13.1-2)*

<sup>5</sup> Kurâ domodo ewy aguelymo myani Deus ety wâgâ:

— Iwâkuru kehoem Deus ety! Iwâkuru kehoem tuhu imâsedo âtâ itâdobryy! Iwâkuru kehoem ekudyby modo, tuhu imeimbyry tâwâensem kehoem iwâkudâdoem kurâ domodo nhuduupy warâ! — kelymo.

Aituo myani Jesus aguely:

<sup>6</sup> — Arâ wâne, âdykonlo umelâ olâ ise awârâ mâenkylymo adakalagueoly. Idânârâ adakalagueoze lelâlâ. Angato inkâba ise awârâ tuhu modo; ihuguewâze awârâ onro onwa — kely Jesus.

*Jesus tâdâsenagazedyly wâgâ aguehobryy  
(Mt 24.3-14; Mc 13.3-13)*

<sup>7</sup> Jesus aguehobryy tindatuomo myani tonlo modo nhapâiguelymo:

— Âdara kaise xypyry iwaguepa idyly, xina nhutuly? Âdy kaise tâensem Deus ety adakalagueoho odaji itybyem awyly xutuhoem? — kelymo.

<sup>8</sup> Aituo myani Jesus in-hoguly:

— Inanaynmolâ itaungâ, kodopâdo wâgâ ânguy inokubyramo itoem. Xypyry etaji idyly ume, toenzepa ise “Messias urâ, Deus Ingonyby” kewâni modo, “Messias naintai” kewâni modo warâ. Kâzeinwântaundâ olâ! Kâjiampyguedaundâmo warâ. <sup>9</sup> Tâinkâ lelâba âseguebylymo, âdyâwâdylymo warâ kely idase âmaemo. Tywymâry agâ kurâdo âseguebyly kely idase âmaemo warâ. Tadahulizeba olâ itaungâ, awârâ modo egary mâindadylymogue. Aise lelâlâ awârâ modo, âdypydâdo keba olâ ise — kely Jesus.

<sup>10</sup> — Âkelo anano modo âdyâwâsemo, âjitanwebaom modo âdyâwâsemo warâ. <sup>11</sup> Tâinkâ lelâba ise onro âzekânily. Tâinkâ lelâba pyni peba ise. Toenzepa ise tâwânuneim modo tâzewânu inakaigue mâkâ onwa, mâkâ onwa inigue ewânu. Âdyo imeom inakai modo kulâ ise aini. Kau wâgâ esemo âdypydâdo iwague kuruba awyly xutuho.

<sup>12</sup> — Tonomeguelâ itaungâ. Awârâ modo aidyly iraynâ yizepanro modo inagazezemo yeinwândylymogue. Adahoze âmaemo âtâ tâdâtâdyguyho iwymâry modoram. Kadeia odaxi âiehoze âmaemo. Yeinwândylymogue, pymâ domodoram adahoze âmaemo.

<sup>13</sup> Enadomo mataymo, tâwâlâ ise amyguelymo âdara imakehomobyry wâgâ.

<sup>14</sup> Tadahulizeba olâ itaungâ amyguehomo wâgâ, pymâ domodo enadoram madaholymo iraynâ. <sup>15</sup> Urâlâ ise amyguehomo xudunri mâsemaguehomoem. Amyguelymo tindatuo,

âizepaom modo âkealâ amyguelymo xutuzemo. Âdakeontaymbamo ise âyanmo.

<sup>16</sup> — Âpemugudomolâ ise yeinwâmpyra tawylymogue igamenrimo yizepanro modo emaxi. Unwânmolâ, âwaigorumolâ, âukonomolâ, âpemugudomolâ, ataen-homolâ warâ ise

inwentâguenimo pymâ domodo enanaym. Âmaemo ewy xyâen-honze pymâ domodo. <sup>17</sup> Ynynonroem mawylymogue, toenzepa ise mâjiewiâseolymo. <sup>18</sup> Mâsenagazedylymo ume, âiguelymo ume, warâ olâ, “Deus ienanânehoangui” tâkezeba itaungâ. Idânârâ Deus emaynlâ ise âmaemo, angahudumolâ âda tyetuneba ise. <sup>19</sup> Yeinwândyly kâjimowâdaundâ! Yeinwândyly mânimopa âmaemo-ro watay, Deus imakezemo lelâ – kely Jesus.

*Jesus Jerusalém adainholo wâgâ aguehobry  
(Mt 24.15-28; Mc 13.14-23)*

<sup>20</sup> Aituo Jesus aguely:

— Sodadu domodoram âduahuoybyem Jerusalém mâendylymo-ro watay, inepa ise adainholo awyly mâtuntulymo. <sup>21</sup> Jerusalém adainholo xutuho saintuo, Judéia donro modo iwyram nâwiendâmo, otoenze. Jerusalém oday tâtyuneim modo inepa negasemo. Poji anano modo xidadâram nâwâmpyramo nidâ. <sup>22</sup> “Yeinwântânrý modo toenzepa enagazeze urâ, tâdâsenagazedo ume” kewândy Deus tytaumbryy awo iweniby wâgâ. Aituo ise xirâ ume Deus eynynonro keba modo toenzepa âsenagazedyly. <sup>23</sup> Toenzepa âsenagazeze pekodo modo ioday tymegueim, tuhuazeim modo warâ. Tahule âwienniembamo mawânkâ ise. Kurâdo taunlo Jerusalém donro modo toenzepa âsenagazeze. Toenzepa ise Deus eagâmo iewiâky. <sup>24</sup> Tâdâseguebyday âdyorim modope ise. Tâlâ ise âzetadâoze taseim eagonro âtâ anaxi. Israelita domodo keba ise Jerusalémdâ xutuim, arâ aitomo âwanikeho ara – kely Jesus.

*Uguondo Kaynâpa Âetyby odopâdyly xutuho  
(Mt 24.29-31; Mc 13.24-27)*

<sup>25</sup> Aituo Jesus aguely:

— Xixi, nunâ, ximukâ warâ ise xypyry etay awyly xutuen-hoim. Tâinkâ lelâba kurâdo âdara tidyly nutuba ise, âseanezemo mawânkâ. Ton-honre kehoem ise parutabâ sahugânu. <sup>26</sup> Tâinkâ lelâba ekomadaynzemo tyanumogue, âdaituo aidyly awyly tiuntuduomo. Idânârâ kaynâ tyngataymby modo ejikehonze Deus. <sup>27</sup> Aituo ise kâepanâguely urâ Uguondo Kaynâpa Âetyby. Eunu duay ise ytâguyl. Pymâem lelâlâ wawyly; toenzepa won-honru enehonze urâ. <sup>28</sup> Awârâ modo aidyly adaguly-ro watay, tytywanzeba itaungâ, âzeon-hondâdaungâ lakuru. Tuomare lelâ itaungâ. Inepama ise kodopâdyly imakezemo – kely Jesus.

*Jesus odopâdo xutuhobe ise  
(Mt 24.32-35; Mc 13.28-31)*

<sup>29</sup> Aituo Jesus aguely enomedâzemo:

— Se sawanku mâendylymoenlâ mâtuntulymo âdy iume idyly awyly, kopâ ume atay, âdâpigu ume atay warâ. Figueira sary wâgâ atay, se modo sawanku wâgâ atay warâ mâtuntulymo. <sup>30</sup> Sary ilusewâdyly mâtentuomo, iwaguepa kopâ ihugueho awyly tutuze âmaemo. <sup>31</sup> Myara lâpylâ ise xirâ auguehobryy modo aidyly adaguly mâtentuomo, mâtuntulymo. Deus on-hondbyyem awyly, mâtâlâ pymâ kuru tawyly tienehon-hoem. <sup>32</sup> Aise xirâ âdydo imeom, idânârâ xirâ onro anano modo iguelymo iraynâ. <sup>33</sup> Kau, onro warâ adainze. Auguehobryy olâ ise nadaimpa, nâtugugueba warâ; aunloenlâ ise. Xirâ mâtuntudyzemo kuru wato – kely Jesus.

*Kânanaynlâ kine Jesus odopâdo wâgâ*

<sup>34</sup> Aituo Jesus aguely:

— Inanaynmolâ itaungâ. Âtydâ lelâ waypa itaungâ. Adakuize kulâ waypa itaungâ, okumo ikaji mipyra mitomoem. Pyni wâgâ tâtynanâzeba itaungâ, itymo owogonromo wâgâ, kopaelâgâembaba iwanumo wâgâ warâ. Awârâ modo wâgâ kulâ mâtynanâdylymo-ro watay, awârâ kulâ ise angahumo odano, yaindyly mâtkeba. <sup>35</sup> Ânguydo imeom mydy onwa ihugueduo adapâendyly ara, ise âdykâingâlâ adapâendyly kodopâduo,

ywânwâmpyra tawylymogue. <sup>36</sup> Awylygue, yaindyly tânuenzelâ itaungâ, uguelly. Deus agâ amyguepa tâiseba itaungâ. On-honrumo ekadaungâ tâdâsenagazedyly mânemahomoem. “Warâ ise agâmo aidylymo” keze kurâdoram, ienado ton-honre mitomoem ekadaungâ – kely Jesus.

<sup>37</sup> Kopaelâgâembaba myani Jesus kurâdo nhenomedâdyly Deus ety idaseray. Kopae olâ idâly iwy imeimbyry, Se Oliveira Ekaram xykyze. <sup>38</sup> Emedyly wâgâ myani kurâ domodo idâly Deus etyram, Jesus aguely idase. Târâlâ myani toenzepa kehoem kurâ domodo.

## 22

### *Jesus xyâly wâgâ aguehomobyry (Mt 26.1-5; Mc 14.1-2; Jo 11.45-57)*

<sup>1</sup> Iwaguepa myani judeu domodo etyry saintoem Pão Ioliho Pebaom etyguedoem. Páscoa kelygue tâzekeim lâpylâ myani mâtâ âty. <sup>2</sup> Kurâdo eynynâ Deus agâ aguewâni modo iwymârydo, Moisés inweniby wâgâ enomedâni modo warâ âjigue âtunâguedylymo myani âdara Jesus xyâly wâgâ. Akaemolâ âdara Jesus tyâen-honly wâgâ agueim, kurâ domodo nhutudyzebamô olâ myani, tagâ iewiâpadylymo tyntadylygue.

### *Jesus tiengamehoem, Judas dinheru nhemakehobyry (Mt 26.14-16; Mc 14.10-11)*

<sup>3</sup> Aituo myani Satanás, Judas xidadâ Queriote donro, Jesus eynynonro, nhangahu odaji xunâry inakanhe nhedyly. <sup>4</sup> Kurâdo eynynâ Deus agâ aguewâni modo iwymârydo agâ, guarda iwymâry modo agâ warâ Judas agueze idâly. Jesus tiengamehoem âseinwândyly eagâmo. <sup>5</sup> Judas agueduo myani, toenzepa kehoem iomazelymo.

– Xina emaxi Jesus mânengamely-ro watay, ipywaze xina – kelymo myani.

<sup>6</sup> – Inepa ise kâengamely – kely myani Judas.

Eagâmo agueypyenlâ myani Judas, âdara Jesus tiengamely awyly nhugudyly, kurâdo nutubalâ Jesus tiengamehoem.

### *“Ohondaungâ, Páscoa kientyguedoem” Jesus kehobyry (Mt 26.17-25; Mc 14.12-21; Jo 13.21-30)*

<sup>7</sup> Judeu domodo pão ioliho pebaom nhedawyn-homo, kordeiru nhâhomo warâ, Páscoa saindyly, Egitodâba tydamudo âsemaguehobyry tienanâguehomoem. <sup>8</sup> Aituo myani Pedro, João warâram Jesus aguely:

– Iwerâ kopae ise Páscoa kientyguedyly. Kypniry, âji, kydâwinduato warâ nhonehonwâdaunda – kely Jesus.

<sup>9</sup> – Aituo aguelymo:

– Âdykâka ise xina anhenehondyze mawyly? – kelymo.

<sup>10</sup> Jesus in-hoguly:

– Idâwâtaungâ xidadâ Jerusalémram. Myarâ aintuomo, uguondo âmugâ oday paru sani iose âmaemo. Idâwâtaungâ eagâ. Igawântaungâ egawântobryy âtâ odaji. <sup>11</sup> Mâtâ âtâ sodo agâ aguewâtaungâ: “Pymâ mawânkâ âty Páscoa tientyguedyze tarâ xirâ kopae. Âdykonlo âtâ sahomery oday kaise tynynonro modo agâ kordeiru nhunru nhâdyly, pão ioliho pebaom nhedawynly warâ?” kewâtaungâ âtâ sodoram. <sup>12</sup> Eagâlâ ise mâtulymo, âtâ sahomery kaynonro odaji. Târâ ise sahomery imeâgâ keba nhenehonly. Tâlâ ise târâ mesa, tâzekado, idânârâ ize kydato modo. Târâ ise kypniry amânhenehonlymo – kely myani Jesus.

<sup>13</sup> Aituo myani azagâ uguondo idâly. Saindylymo xidadâram. Saintybyem myani Jesus aguehobyry ara lelâ nhedylymo. Mâtâ uguondo agâ oxiodylymo myani. Âtâ nhedylymo, pyni modo anhenehonlymo warâ, Páscoa tientyguedoem. Pyni modo aienehonrimbyryem myani odopâdylymo Jesus eydâ atoam.

*Kywymâry Jesus iguehobyry enanâgueho  
(Mt 26.26-30; Mc 14.22-26; 1Co 11.23-25)*

**14** Kopae tâdâwinduato odaji ituo myani Jesus idâly myarâ tynynonro modo agâ. Saintybyem myani ekadylymo âwinduase. **15-16** Aituo myani Jesus aguely:

— Páscoa kâentyguedyly xypyrylâ ise xirâ tarâ onro anaym. Awylygue toenzepa agâmo kâwinduadyse wawyly, yiguely iraynâ. Xirâpyryem kâentyguedondyly ise, Deus tynynonro modo idânârâ târâ pymâem tatodâ nhemakeduo lelâ — kely Jesus.

**17** Aituo myani Jesus kopu vinhugue taseim tâmaxi nhedyly. Deusram aguely:

— Koendonro âmâ, Pabai, xirâ vinhu mâundulygue — kely.

Aguenripyryem myani tynynonro modoram aguely:

— Mâkâ, mâkâ warâ xirâ vinhu enywâdaungâ. **18** Páscoa kâentyguedondaymba ise urâ agâmo, vinhu kâenyombyra ise urâ warâ, Deus eynynonro modo myarâ pymâem atoram saindylymo ara. Xirâ mâuntudyzemo kuru wato — kely Jesus.

**19** Ilâpyryem myani pão tâmaxi nhedyly. Deusram aguely:

— Koendonro âmâ, Pabai, xirâ pão mâundulygue — kely.

Agueypyem myani pão nhepajiwâdyly. Mâkânra, mâkânra warâ nhuduly, nhedawyn-homoem. Aituo myani eyanmo aguely:

— Wodolâ xirâ. Iwaguepama âmaemoem yigueho. Xirâ pão mâendawynduomo, âmaemoem yiguehobyry enanâguewâdaungâne — kely.

**20** Pão tiendawympygueduo myani Jesus kopu vinhugue taseim tâmaxi nhedyly. Aguely:

— Unulâ xirâ. Tâunkeze ise yiguely imakezemo. “Ynynonro modo emakeze urâ” Deus kehobyry mawânrâ. Awylygue iseunu tyapâze yigueduo, iwelo tâdâsemaguehobe Deus nhedyly. **21** Eagonro ise xirâ augueho. Tarâ yagâ ekadybyenlâ merâ iegamerim.

**22** Igueze urâ. Urâ, Uguondo Kaynâpa Âetyby âdyoze urâ, Deus “Warâ ise” kehobyry ara. Toenzepa âsenagazeze olâ yizepaom modo emaxi iegamerimbyry — kely.

**23** Awârâ tindatuo myani eynynonro modo âjigue aguelymo:

— Ânguy wânkâ ise konomedâni egamenri-ga? — kelymo.

*“Ânguya xina enday tynrenseim kuru?” Jesus eynynonro modo kehobyry Jesusram*

**24** Ilâpygueduo myani Jesus eynynonro modo âjigue aguelymo:

— Ânguya kurâpyry enday, kurâ domodo enanaji, tynrenseim kuru? — kelymo.

**25** Aituo myani Jesus aguely:

— Idânârâ pymâ domodo tâdyren-honze lelâ, ton-honreim awylymogue, “Warâ aiekâ” kerim awylymogue warâ. Tâlâ lâpylâ olâ pymâdo koendonroem tawyly adâkehohoem kurâdo ewanirim tiemawyadâdoem. **26** “Tynrenseim urâ” tâkezeba itaungâ. Tynrenseimbe âduanomo watay, tynrensenryenlâ nidâ. Mâkâ “Aietaungâ” keze ton-honreim âduaymo, aieni ara lâpylâ nidâ. **27** Ânguya tynrenseim kuru? Mesa onwa âwinduase ekadyby? Ipniry mesa onwa ieni? Urâ olâ âdaunlo kurâ ara kulâ âduaymo wawyly, âmaemoem aise, urâem amitomoem inkâba.

**28** — Kâsenagazedyly ume wodokeba keankâ âmaemo. **29** Yeinwândyly mâinmopa mawylymogue ise on-honrumo kâunduen-honly pymâem mitomoem, Pabai won-hondâdâ pymâem witoem myara. **30** Deus agâ pymâem wawyly ume, târâ yagâlâ ise âmaemo. Âdaunlolâ pymâ eataen-ho modo wâne tâwinduase, tadakuize warâ eagâ myara lâpylâ ise mâywinduadylymo, madakuilimo warâ yagâ Pabai enado. Pymâem wituo, pymâem lâpylâ ise âmaemo. Pymâdo xurery wâgâ ise ikadylymo, kypemugudo israelita domodo iwymâryem mitomoem — kely Jesus.

*Jesus Pedroram, “Azagâ tokalâ warâ ‘Kâuntuwâbyra urâ awâkâ’ keze âmâ” kehobyry  
(Mt 26.31-35; Mc 14.27-31; Jo 13.36-38)*

**31** Ilâpyryem myani Jesus aguely Simão Pedroram:

— Yeinwândyly mânmojom adiendye Satanás, Simão. Pekodo trigu nhahogudyly ume, sary sapezenruram tadahoze, ewily koendonro olâ tâxiânce. Arâ lâpylâ ise, ynynonro modo âxiânl yeinwândylymogue. Ynynâbaom modo olâ iaduwâse.

**32** Deusram on-honru nhuduhoem sekadâ, yeinwândyly mânmpo mitoem, Pedro. “Jesus eynynonro keba urâ” keze âmâ. Inepa olâ ise yeinwântondyly. Yeinwântonduo, ataen-ho modo eon-hondâgâ, yeinwândyly nimopa itomoem – kely Jesus.

**33** Agueduo myani Pedro aguely:

— Âinwândyly kâinmowâbyra ise urâ, Pymâ! Agâ kadeia odaxi âzetadâoze, âdyoze warâ wâne urâ, odokeba olâ ise urâ! – kely.

**34** Jesus olâ myani warâ eyam aguely:

— Auguely xirâ âyam, Pedro. Xirâ kopae, aukuma igâtudyly iraynâ, azagâ tokalâ warâ ise “Jesus kâuntuwâbyra urâ” myguely – kely.

### *Jesus tynynonro modo nhurutobyry*

**35** Xirâpygueduo myani Jesus tynynonro modo nhapâiguel:

— Enanâguewâdaungâ Deus xunârybyry egatuze ogonotomobyry. “Dinheru, âsejiguy etary, âhurumo etary eagonro warâ kadataundâ” ugue âyanmo. Âdy peba midâmoka ilâem? – kely.

— Âdy ipaom lâpeba keankâ. Idânârâ xina ize ato tâlâ keankâ – kelymo.

**36** Aituo myani Jesus aguely:

— Iwerâma, tywoietygue, dinherupe warâ mataymo, sataungâ. Espada mâsemaguehomo peba-ro watay, anâtaungâ. Espada sanâto peba-ro watay, âgamizarymo vende ietaungâ, manâtomoem. **37** Idânârâ Deus itaumbypyry awo wâgâ ywâgâ iwenihobyry ara kehoem ise aidyly: “Kyâim ara ise kâzeholy” warâ. Inepa ise arâ ayedylymo – kely.

**38** Aituo myani eynynonro modo aguely:

— Azagâ espada tâdâsemaguehobe xina – kelymo.

— Âdainkâba ise – kely Jesus.

### *Jesus Tunwym agâ Se Oliveira Ekadâ aguehobyry*

(Mt 26.36-46; Mc 14.32-42)

**39** Warâ tynynonro modoram aguenripyrem myani Jesus xidadâ odajpa idâly. Kopae tâtâho aralâ myani idâly iwy imeimbyry Se Oliveira Ekaram, tynynonro modo agâ.

**40** Myarâ saintybyem myani Jesus aguely tynynonro modoram:

— Satanás inakanhe amidysemo. Âynanâduomo, Deus eon-honru ekadaungâ, Satanás ize ato ara amipyra mitomoem – kely.

**41** Ilâpyryem myani Jesus âxigueli iwague kubalâ eydâmopa, trinta metros awârâem. Târâ myani âzeguhoam idyly, Deus agâ adâkehoem:

**42** — Pabai, toenzepa kuru kâsenagazedyly warâ izepa wâne urâ. Ize wato araba olâ aidyse wawyly, ize mato aralâ – kely myani.

**43** [Aituo Deus anju ingonodyly eon-hondâze. **44** Toenzepa tytyrungue, Jesus aguezesedyly Deus agâ, ton-honre kehoem. Tadahulilygue myani tune kehoem ikobizely ihuguely onro onwa.]\* **45** Deus agâ agueypyem myani saudyl. Akaemo tynynonro modo âxiânl-homobyryam idâly. Toenzepa tytyrumogue xykylymo myani.

**46** Xykylymo tientuo myani âduagueân-honlymo. Aguely:

— Tykyzeba itaungâ. Âwaguewâtaungâ. Deusram ekadaungâ, Satanás ize ato amânhepyra mitomoem – kely.

\* **22:44** Xirâ tywenizeba saguhoem gregüem iweniby modo ewy wâgâ.

*Jesus nhawâtomobryy  
(Mt 26.47-56; Mc 14.43-52; Jo 18.3-12)*

<sup>47</sup> Jesus aguely ume, Judas saindyly. Jesus eynynonrolâ kâinane mâkâ. Toenzepa myani kurâdo eagâ âewyly. Aituo Judas saindyly Jesus iopaji. Tadataen-ho modo agâ adâito ara iwaparydâ nhonugudyly tiendaenkuday. <sup>48</sup> Arâ aituo myani Jesus eyam aguely:

— Judas, koendâ inkâba, urâ Uguondo Kaynâpa Âetyby ayedyly. Yataen-ho âmâ-ro waunlo ara lelâ wonugudyly, iegamehoem — kely.

<sup>49</sup> Eynynonro modo awârâ indadyly, aidyly nhedyly warâ myani.

— Xirâ espadague ise kydâsemaguely, Pymâ? — kelymo.

<sup>50</sup> Aituo myani tokalâ akaemo ewy tydahoru ety odayba nhetyly. Kurâdo eynynâ Deus agâ aguewâni modo iwymâry kuru agâ tâwaneim iwantazagâmâmy. Tâzewyze myani mâkâ tâsemaguehoem. Aituo pylâ iwantary aho eynynonro nhatâly-ro warâ. <sup>51</sup> Aituo myani Jesus eyam aguely:

— Adâiseba ikâ! — kely.

Aituo Jesus, uguondo iwantary satâhobyrydâ Mâ' nhedyly. Mâ' nhetuo, kua idyly lelâ.

<sup>52</sup> Ilâpyryem myani Jesus aguely kurâdo eynynâ Deus agâ aguewâni modo iwymârydoam, Deus etydâ guarda domodo iwymârydoam, Judeu domodo iwymârydo tawâse âetybyram warâ:

— Espadague, segue warâ tâmase kehoem yawâse mâewylymo, tâmagazeim urâ-ro waunlo ara. <sup>53</sup> Yawâtomo tuduzelâ keankâ saguhoem, kyâho pebalâ. Kopaelâgâembaba keankâ Deus ety idaseray, agâmo agueze wawyly. Târâlâ yawâpyra olâ mataunaguyne. Yawâto odayba awylygue keankâ ilâenlâ yawâpyra mawylymo. Iweâma yawâtomo odaylâ. Iweâma Deus iduery ton-honreim ize tato anheto odaji itybyem. Iamu odano modo aito odaji itybyem iweâma-ro — kely Jesus.

*Pedro, "Jesus kâuntuwâbyra urâ" kehobyry  
(Mt 26.69-75; Mc 14.53-54,66-72; Jo 18.15-18,25-27)*

<sup>54</sup> Ilâpygueduo myani Jesus nhadylymo kurâdo eynynâ Deus agâ aguewâni modo iwymâry kuru etyram. Myarâ nhataymo myani iwaguelâ Pedro idâly âgânâ.

<sup>55</sup> Saintybyem myani peto nhehobanâdylymo taseray. Âunse peto tânâmize ekadybyenmo myani. Pedro idâly myani. Eydâmo ekadyly. <sup>56</sup> Pekodo târâ tâwaneim ewy Pedro nhedyly, peto opay âundyly ume. Koendâ kehoem enipyryem myani aguely:

— Jesus eynynonro modo ewylâ awâkâ uguondo — kely.

<sup>57</sup> — Mâkâ mâkeba urâ! Kâuntuwâbyra urâ awâkâ! — kely Pedro.

<sup>58</sup> Ilâpygueduo uguondoram âzeholy, aguehonly lâpylâ:

— Jesus eynynonro ewy âmâ — kely.

Mâkâ aguely tindatuo, Pedro agueondly:

— Jesus eynynonro mâkeba urâ. Kâuntuwâbyra urâ awâkâ — kely.

<sup>59</sup> Tokalâ hora sakabygueduo myani eagonroram âzeholy, aguehonly lâpylâ:

— Jesus eynynonrolâ âmâ! Tutuze xina, Galiléia donro mawyly, earamolâma amyguely — kely.

<sup>60</sup> Aituo Pedro agueondly:

— Âdy wâgâ amyguely awyly kâuntuwâbyra urâ! Kâuntuwâbyra urâ awâkâ! — kely.

Pedro aguely umelâ myani aukuma igâtudyly. <sup>61</sup> Aituo myani Jesus MYK idyly Pedroam. Pedro MYK idyly lâpylâ Jesusram. Pedro âsenanâguely tyam aguehobyry wâgâ: "Auguely xirâ âyam, Simão. Xirâ kopae, aukuma igâtudyly iraynâ, azagâ tokalâ warâ ise 'Jesus kâuntuwâbyra urâ' myguely" Jesus kehobyry. <sup>62</sup> Aguehobyry tienanâgueduo myani Pedro itynwandyly. Târâpa âxiguely. Tâjityenze kehoem eogumadyly.

*Sodadu Roma donro modo Jesus nhapioguhobyry**(Mt 26.67-68; Mc 14.65)*

<sup>63-64</sup> Sodadu domodo Jesus âwankuem nhedylymo myani. Nhenuahulymo, nhapioguly idylymo.

— Ânguya apiogurim? Apiogurimbyry xutugâ, âkealâ kuru Deus Ingonytyby matay — kelymo.

<sup>65</sup> Toenzepa myani aguelymo eyam, tienagazedoem.

*Jesus judeu domodo iwymârydoram satobyry**(Mt 26.57-68; Mc 14.53-65; Jo 18.19-24)*

<sup>66</sup> Emetuo myani Judeu iwymârydo, kurâdo eynynâ Deus agâ aguewâni modo iwymârydo, Moisés ezewenry wâgâ enomedâni modo warâ âtâdyguylymo. Âjigue aguelymo myani.

— Jesus kânado enenehonze kurâ — tâkehobyryem, anhedylymo.

<sup>67</sup> Aguelymo:

— Messiaslâka âmâ, Deus Ingonytybylâ? Xina kâzenokudâ! — kelymo.

Aituo myani Jesus in-hoguly:

— Âkealâ uguely-ro watay, yeinwântaymba ise âmaemo. <sup>68</sup> Apâiguelymo-ro watay, “Deus Ingonytyby wawyly tâinwânse âmaemo?” uguely-ro watay, uhoguwâbyra ise âmaemo.

<sup>69</sup> Inepa ise urâ Uguondo Kaynâpa Âetyby Deus eydâ atoram udâly. Târâ ise tynrenseinhe wawyly. Mâkâ Ton-honreim kuru ahoru eynynâ ise ekadybyem wawyly. Târâ ise wonhonru âzeholy — kely.

<sup>70</sup> Aituo myani nhapâiguelymo:

— Deus imeryka âmâ? — kelymo.

— Mâkâlâ urâ, amyguehomo aralâ — kely.

<sup>71</sup> Agueduo myani aguelymo:

— Ânguy kingâsedondaymba ise kurâ, Jesus ewentâniem. “Deus imerylâ urâ” kelyma kyjidatai — kelymo myani.

**23***Pilatosram Jesus satobyry**(Mt 27.1-2,11-14; Mc 15.1-5; Jo 18.28-38)*

<sup>1</sup> Ilâpyryem myani idânârâ pymâ domodo âtâdyguywâdyby, sautaynlymo, tâtunâguedyly âwanikebyem awylygue. Pilatosram nhaleholymo, pymâ Roma donro ingonotybyram.

<sup>2</sup> Myarâ saintybyem myani Jesus ewentâdyly nhagulymo. Aguelymo:

— Kywymâry Roma donro iewiâseni awâkâ uguondo. Kywymâry modo idueryem kurâdo tiendyse awâkâ. “Roma iwymâry César-ram impostu kâzepywadaundâ” nygue. “Messias urâ, Deus Ingonytyby” nygue lâpylâ. “Urâ ise âwymârymo kuru” nygue — kelymo.

<sup>3</sup> Aituo myani Pilatos, Jesus nhapâiguelymo:

— Judeu domodo iwymâry kuruka âmâ? — kely.

Jesus in-hoguly:

— Mâkâlâ urâ, amygueho ara — kely.

<sup>4</sup> Aituo myani Pilatos aguely kurâdo eynynâ Deus agâ aguewâni modo iwymârydoram, kurâdo tonlo modoram warâ:

— Urâem, âdy ewentâdo lâpeba merâ uguondo. Âdy wâgâ enagazedo lâpeba — kely.

<sup>5</sup> Jesus izepaom modo olâ xunâguedyly nimopamo myani.

— Tâinkâ lelâba inanry idâly kurâdo xuruse: “Pymâ Roma donro aguely kâjidataundâ” nygue. Judéia eynynâ adakobâdyly inanry. Galileiadâ ani Deus wâgâ aguely adaguly; iwerâ tarâ Jerusalémdâ — kelymo myani.

### *Herodes enadoram Jesus satobyry*

<sup>6</sup> Jesus Galileiadâ aitobyry tindatuo, Pilatos nhapâiguely myani:

— Galiléia donroka merâ uguondo? — kely.

<sup>7</sup> — Tonlo awâkâ — kelymo.

Galiléia donro Jesus awyly tiuntuduo myani Pilatos, Herodesram Jesus ingonodyly. Pilatos tutuze lâpylâ myani Herodes Jerusalémdâlâ awyly. <sup>8</sup> Jesus egary tydaselâ myani Herodes. Iweâpa myani tiendyse awyly. Âkealâ kuru Jesus egary tiuntudyze. Awylygue âdylâ Deus eon-honrugue anhedyse awyly tientoem. Awylygue myani toenzepa iomazely, Jesus tânadoram satuo. <sup>9</sup> Aituo myani Herodes toenzepa Jesus nhapâiguely aitobyry wâgâ, aguehobyry wâgâ warâ. Jesus olâ nihoguba. <sup>10</sup> Kurâdo eynynâ Deus agâ aguewâni modo iwymârydo, Moisés inweniby enomedâni modo warâ târâlâ lâpylâ myani. Toenzepa kehoem Jesus nhewentâdylymo. <sup>11</sup> Herodes, izodadury modolâ warâ Jesus âwankuem nhedylymo myani. Izepa tawylygue lelâlâ anhedylymo. Âwankuem tiendylymo umelâ myani iwâkuru kehoem âtâ pymâ ety emyenro nhonwa nhedylymo. Ilâpyryem myani Herodes nhopânehonly Pilatos enadoranlâ. <sup>12</sup> Herodes, Pilatos warâ saguhoem âjizepaombryromoem. Xirâ ume myani adataen-hoem idylymo.

### *“Nigue lelâ awâkâ Jesus” Pilatos kehobyry*

(Mt 27.15-26; Mc 15.6-15; Jo 18.39-19.16)

<sup>13</sup> Ilâpygueduo myani Pilatos, kurâdo eynynâ Deus agâ aguewâni modo iwymârydo, judeu domodo iwymârydo, kurâ domodo warâ indâtyguly. <sup>14</sup> Aituo myani eyanmo aguely:

— Merâ uguondo yam menetondaimo. “ ‘Pymâ domodo kâdytadaundâ’ kely kurâdoram” mygueansemo. Awârâ wâgâ sapâigueagui idânârâ inanaynmo. Ienanaji, mäenwentâdomoem inakanhe anipyra, aguepa warâ merâ. <sup>15</sup> Herodes xurâem âdy inakanhe aitobyry lâpeba lâpylâ warâ. Awylygue yam ingonotondyly. Âdaityby mâkeba merâ uguondo iguehoem. <sup>16</sup> Ewentâdo kâuntuba lelâlâ wâne urâ, alâ olâ kampiogüen-honly, omazeândomoem. Sapiogüen-honze urâ, imoen-honze urâ alelâ — kely Pilatos.

<sup>17</sup> [Aunlolâ mykâinane Pilatos, Páscoa etyry ume etadâdyby modo ewy tokalâ nhetague-honly, âdaunlolâ kurâdo nhekadybylâ.]\*

<sup>18</sup> “Kâinmoen-honly” Pilatos keduo myani idânârâ adaenkewâdylymo:

— Kruz onwa sakâjien-hongâ awâkâ uguondo, iguehoem! — kelymo!

— Barrabás xina mäentaguehondyzze ato — kelymo.

<sup>19</sup> Jerusalém donro modo, pymâ romano domodo agâ âseguebyby ewy myani mâkâ Barrabás. Kurâ domodo pymâ agâ iewiâpaday, uguondo modo tyâze myani. Awylygue myani kadeia odaxi âzetadâoly.

<sup>20</sup> Pilatos myani Jesus timoen-hondyzze. Awylygue myani agueondyly kurâdoram:

— Jesus sapiogüen-honze, imoen-honze warâ urâ — kely.

<sup>21</sup> Adaenkezezedylymo lakuru toenzepa kehoem:

— Kruz wâgâ nigue! Kruz onwa sakâjien-hongâ, iguehoen-ro warâ! — kelymo.

<sup>22</sup> Aituo myani azagâ tokalâ warâ Pilatos aguely idyly:

— Âdaituo? Ienanaji, âda nitaymba merâ iguehoem! Xikotygue sapiogüen-honze urâ. Ilâpyryem ise kâinmoen-honly-ro warâ — kely.

<sup>23</sup> Agueduo olâ myani kurâdo toenzepa adaenkeondylymo:

— Kruz wâgâ nigue! Kruz onwa sakâjien-hongâ, iguehoem! — kezeselâ kurâ domodo.

Nadaenkeba nipyramo. Toenzepa kehoem myani adaenkelymo. <sup>24</sup> Aituo myani Pilatos nhekadomobry ara anhenehonly. <sup>25</sup> Sodadu domodoram aguely myani:

\* <sup>23:17</sup> Xirâ tywenizeba saguhoem gregüem iweniby modo ewy wâgâ.

— Kadeiaram idâwâtaungâ. Mâkâ Barrabás etaguewâdaunda, kyârimpyry, kurâdo, pymâ Roma donro izepa ienehonrimbyry. Ilâpyryem ise Jesus kruz onwa sakâjize mandylymo — kely Pilatos.

Aituo myani Pilatos, judeu domodo iwymârydoram aguely:

— Mâenkadybymo ara enra sodadu modoram agânhenehonly — kely.

*Jesus kruz wâgâ iguehoem sakâjihobyry  
(Mt 27.32-44; Mc 15.21-32; Jo 19.17-27)*

<sup>26</sup> Aituo myani sodadu domodo Jesus nhawâdylymo, nhadylymo, kruz onwa sakâjize iguehoem. Ânwa oze tâtâdaymo myani uguondo Simão agâ oxiodylymo. Xidadâ Cirene donro myani mâkâ. Poji ananobyryem myani odopâdyly. Tiontuo myani sodadu domodo kruz Jesus tiankâjihio eyam nhanânehonlymo.

— Xirâ kruz sakâ, Jesus nhapygue — kelymo myani.

<sup>27</sup> Toenzepa myani kurâ domodo nhapyguemo awyly, pekodo modo lâpylâ warâ. Toenzepa ohogüendylymo, igueho awyly tiuntuduomo. <sup>28</sup> Jesus MYK idyly pekodo modoram. Aituo eyanmo aguely:

— Agâieholygue tohogüenzeba itaungâ, pekodo modo Jerusalémdâ tâtyruneim modo. Âwâgâmolâ, âmeombyrymo wâgâlâ warâ ohogüendaungâ. <sup>29</sup> Xidadâ oday tâtynueim modo toenzepa ise âsenagazedaynlymo. Tâsenagazedylymogue ise pekodo imezedânry modoram aguelymo: “Koendâ ise âmaemo, âdykâ tymegueba mawylymogue, âdykâ âwanrymogue iamudo makuiba mawylymogue warâ” kezemo. <sup>30</sup> Toenzepa tâsenagazedylymogue iwyram wakezemo: “Âihuguegâ xina onwa, xina xyâze, tâsenagazedyly xina nepyra itoem” kezemo Jerusalém donro modo. “Xina epyâze âihuguegâ” kezemo iwy wogonro tuhu imâsedo modoram. <sup>31</sup> Iwerâ, urâ âdykâ inakanhe aitânry kâsenagazedyly. Âmaemo inakanhe aitaynrim modo lakuru olâ ise toenzepa âsenagazeni. Wauguely: “Peto emanâdyby, peto iladânrygue kionguandyly watay, tyatyguzelâ peto iladybygue kionguatuoma kuru-ro!” — kely Jesus.

<sup>32</sup> Azagâ uguondo inakai aienibyry samâ lâpylâ sodadu domodo, kruz onwa tiankâjihomoem, Jesus agâ iguehomoem. <sup>33</sup> Iwy Calvarioram myani saindylymo. Myarâ saintybyem Jesus nhakâjilimo kruz onwa. Azagâ kyârimpyry nhakâjilimo eagâ, tokalâ aho eynynâ, eagonro pâem eynynâ warâ.

<sup>34</sup> [Aituo Deus agâ Jesus aguely:

— Pabai, awâkâ kurâdo kâzenagazêdâ. Inakanhe aitomobyry xygakegâ. Âdara tâidylly nutuwâbyra asaemo — kely Jesus.]<sup>†</sup>

Sakâjirimbyryem myani sodadu domodo Jesus ety iwogonropyry nhepajiwâdylymo mâkâem, mâkâem warâ. Dadu nhamelymo, ânguy, ânguy warâ Jesus ety iwogonropyry emakeim awyly tiuntuhomoem. <sup>35</sup> Târâ aidyly esezezelâ myani kurâdo, tywymârymo Jesus âwankuem nhetay. Pymâdo eyam aguelymo myani:

— Âkelo modo nemakewâdâ; tâwâlâ nâsemagueba olâ! Deus Ingonytyby tatay pylâ tâwâlâ nâsemague — kelymo.

<sup>36</sup> Sodadu domodo âwankuem nhedyly, nheinledyly idylymo myani. Iopaji idâlymo. Aguelymo myani:

— Anra vinhu mânenyhoem — kelymo.

<sup>37</sup> — Judeu domodo iwymâry kuru matay, kruz wâgâpa âytâguygâ, âiguepa mitoem — kelymo.

<sup>38</sup> JESUS MERÂ, JUDEU DOMODO IWYMÂRY KURU kely iweniby sakâjîwânmomy Jesus nhangawaym kruz wâgâ. Mârâ iwenibyem awyly myani, gregu, romano, judeu warâ itanwe.

<sup>39</sup> Tokalâ inakanhe aityby ewy kruz wâgâ sakâjiby Jesusram aguelymo myani:

<sup>†</sup> **23:34** Xirâ tywenizeba saguhoem gregüem iweniby modo ewy wâgâ.

— “Cristo urâ, Deus Ingonyby” mygueanse. Kainwâmpyra olâ urâ. Cristo matay pylâ, tâwâlâ âsemaguegâ. Kruz wâgâpa adakâjiguegâ, âytâguygâ warâ. Xina emakegâ lâpylâ-ro warâ — kely.

**40** Aituo eagonro aguely:

— Arâ adâkezeba ikâ. Deus mâyrentaymba âmâ! Azakâlâ awâkâ ara kydâsenagazedyly. Azakâlâ ise kyiguelly, awâkâ ara lâpylâ. **41** Kurâma âkealâ aguydâieholo-ro inakanhe itybyma kurâ. Âkealâ aguydâieholo. Awâkâ olâ âdaityby keba — kely myani.

**42** Aituo Jesusram aguely:

— Pymâem modopâduo, âinwânnipyryem wawyly enanâguegâ — kely.

**43** Aituo myani Jesus in-hoguly:

— Âkealâ xirâ âyam auguely. Kyiguelly ise xirâ, Iwerâlâ olâ ise yagâ mydâly Deus eydâ atoram — kely.

### *Jesus iguehobyry*

(Mt 27.45-56; Mc 15.33-41; Jo 19.28-30)

**44** Kuotatay myani xixi tohoreba idyly. Azagâ tokalâ warâ horas ara lelâ idânârâ iamataynly. **45** Deus tynrenseim etydâ, Deus, kurâdo agâ tygue ito xuahuru iotagâ adauguely kaynonrobryem, on-yam. **46** Aituo myani Jesus adaenkely ago kehoem:

— Pabai, imaxi iegadopyry kâengamely — kely myani.

Agueypyem myani, iguelly. Ipa idyly. **47** Sodadu Roma donro modo iwymâry myani idânârâ aidyly eselâ. Aidyly tientuo myani aguely:

— Koendonro keankâ merâ uguondo. Âda nitaymba keankâ merâ, xyâhoem — kely.

**48** Toenzepa myani kurâdo târâ awyly mâtâ ese. Iguely enipyryem myani tâtyram odopâdylymo. Tâjihogainze myani idâlymo, tytyrumogue. **49** Idânârâ Jesus eatael-ho modo iwaguemolâ myani, pekodo modo lâpylâ, Jesus agâ Galileiadâbalâ âetaymby modo. Jesus kruz wâgâ nhedylymo.

### *Jesus eguepybyry tuhu imâsedo tâtagueim odaji nhetadâdomobyry*

(Mt 27.57-61; Mc 15.42-47; Jo 19.38-42)

**50-51** Tâlâ myani târâ Judeiadâ uguondo José; Arimatéia donro mâkâ, koendâ lelâ, Deus agueho ara lelâ aini warâ. Idânârâ kurâdo iwymâryem Deus idyly sainto tânuenze mykâinane. Judeu domodo iwymâry Sinédrio kelygue tâzekeim ewy myani. Tataen-ho modo, Jesus xyâen-honze keduomo, eagâmo nâseinwâmbyra myani. **52** Aituo myani José, Pilatosram idâly agueze:

— Jesus nigueaki, Pymâ. Kruz wâgâpa kâyntâguyândye olâ urâ, tuhu imâsedo tâtagueim odaxi kâenkanâdoem. Tâwâlâ kâyntâguyândy? — kely.

**53** — Tâwâlâ — Pilatos keduo, José idâly myani.

Ilâpyryem myani José, Jesus eguepybyry kruz wâgâpa nhytâguyândyly. Xytâguyânyibryem, intuwynly âtâ linhugue. Ilâpygueduo, eguepybyry nhetadâdylymo tuhu imâsedo tâtagueim esagueyby odaji. Ânguy etarybyry keba myani mâtâ.

**54** Sexta-feira oday myani Jesus iguelly, tâzekobyzeguehoem todohondo iguandyly ume. Iguandylylâ myani âguedy myarâ nhetadâdomo, tâzekobyzegueho adagulylâ.

**55** Pekodo modo Jesus agâ Galileiadâpa âetaymby modo José nhapygue idâwânmô lâpylâmy. Âdykâ Jesus eguepybyry etadâdyly awyly emâmomy warâ. **56** Tiempygueduo myani tâtyram odopâdylymo. Tyânrânguneim modo, óleo tyânrângueim warâ nhondylymo, âguedy ituwyn-ho onwa, tiampâdomoem. Ohondybyem myani ekobyzeguelymo, judeu domodo ezewenryem mawânrâ tâzekobyzegueho oday ânguy nâsewaniba.

## 24

*Jesus kurâem itondobyry  
(Mt 28.1-10; Mc 16.1-10; Jo 20.1-10)*

<sup>1</sup> Domingo pealâ myani pekodo modo Jesus eguepybyry etadâdobyryram idâlymo. Uriza tyânrrângueim tontaymby modo nhadylymo. <sup>2</sup> Saintybyem myani, tâtagueim enahunho tuhu imâsedo ejikeybyem awyly nhedylymo. <sup>3</sup> Tâwânsemo myani tâtagueim odaxi. Âwântybyem myani Kywymâry Jesus eguepybyry târâpa awyly nhedylymo. <sup>4</sup> Toenzepa myani âseguâdâdylymo. Iwaunkymo ume myani azagâ uguondo\* âepanâgueley eyanmo, tohozeleingue kehoem tâtyeim. <sup>5</sup> Pekodo modo âseanedly myani; toenzepa lelâlâ myani âseanedlymo. Tyanumogue uguondoram MYK nipyramo myani, enagozeybymoem lelâ. Aituo myani uguondo modo aguely:

— Kurâem itondoby kâduiwâtaundâ iguewâtyby modo ejidydâ. <sup>6-7</sup> Tarâ inkâba mâkâ. Ipa, kurâem nitondai. Saguhoem Galileiadâ agâmo tatay aguehobyry enanâguewâdaungâ: “Urâ Uguondo Kaynâpa Âetyby tumunreim modo emaxi âzegameoze urâ. Iemakâjizemo, ienagazezemo. Yakâjizemo kruz onwa, yiguehoem. Igueze urâ. Azagâ† emedyly idyly wâgâ olâ ise kurâem witondyly” kehobyry – kelymo myani.

<sup>8</sup> Aguehobyry nhenanâgueley myani pekodo modo. <sup>9</sup> Tâtagueim odayba egaselymo. Odopâdylymo. Saintybyem myani akaemo onze lelâ Jesus eynynonro modoram, kurâ domodoram warâ nhegatulymo, idânârâ tientybymo ara.

<sup>10</sup> Asaemo: Maria (Magdala donro), Joana, Maria (Tiago ise), eagonro pekodo modo warâ myani Jesus eguepybyry etadâdobyryram idâypy. Tientybymo ara, tindatybymo ara warâ myani akaemo nhegatulymo. <sup>11</sup> Pekodo modo aguely indadylymo. Neinwâmpyramo olâ myani, kewâdylymo kulâ waunlo ara awylygue. <sup>12</sup> Pedro olâ myani saudyl. Tâgase kehoem idâly Jesus eguepybyry etadâdobyryram. Saindyly. Koendâ târâ tientoem âzewyly. Ituwyn-hobyry lelâ nhekyl. Aituo myani tâpaunzeze odopâdyly tâtyam.

— Iwerâ ise-ro? Âdaituo kuruka arâ aidyly? — kely.

*Emaúsrâm idâwâni modoram Jesus âepanâguehobyry  
(Mc 16.12-13)*

<sup>13</sup> Pekodo modo, “Jesus kurâem nitondai” kehobyry iguandyly ume myani azagâ uguondo Jesus nhapyguenibyry modo tuhuru wâgâ idâlymo Emaúsrâm. Dez kilômetros awârâem Jerusalémdâpa awyly. <sup>14</sup> Idânârâ Jesus agâ aitaymby modo wâgâ, pekodo modo nhegatuyby wâgâ warâ xunâgumo. <sup>15</sup> Awârâ wâgâ tunâgue idâlymo ume myani Jesus saindyly iopajimo. Eagâmo idâly myani. <sup>16</sup> Nhedylymo wâne, mâkâem awyly nutubamo olâ myani. Jesuslâ awyly nutubamo. <sup>17</sup> Aituo myani Jesus eyanmo aguely:

— Âdyka ânwa oze âunâgomo? — kely.

Uguondo tagâ aguely tindatuo myani epagudylymo, tytynre kehoem.

<sup>18</sup> Aituo myani Cleopas aguely:

— Jerusalémdâ aitaymby modo wâgâ kulâ enra xina xunâgu. Âmâ kulelâ keanra xirâ modo wâgâ âdy xutudânry! — kely.

<sup>19</sup> Aituo myani Jesusram adapâigueolymo:

— Âdyka amyguehomo? — kely.

In-hogulymo:

— Jesus Nazaré donro aietobyry wâgâ enra xina aguely. Deus eynynâ agueim keankâ mâkâ. Uguondo anhetânry aieni keankâ mâkâ, Deus anhekyly aieni warâ. Koendâ keankâ Deus wâgâ kurâdo nhenomedâdyly. Deus, kurâ domodo alelâ keankâ

\* **24:4** Anju domodo myani akaemo azagâ uguondoem âepanâgueim. † **24:6-7** Nota de pé Mateus 12.40dâ egâ.

nhomazeânguyly, adienkylygue, adâkehogue warâ. <sup>20</sup> Kywymâry modo olâ keankâ izepa. Awylygue keankâ kurâdo eynynâ Deus agâ aguewâni modo iwymâryo, eagonro pymâ modo warâ nhegamelymo pymâ Romadâpa ingonotyby emaxi. Pymâ Roma donro induakeyby nakâjien-ho kruz wâgâ iguehoem. <sup>21</sup> Mâkâlâ wâne keankâ xina israelita domodo tânagazeni modo emaymba tâmakeinhe nhutuly. Kopaelâgâbygueduo olâ keankâ iguely.

<sup>22</sup> — Toenzepa olâ iwerâ xina âseguâdâdyly, unâ âkelo tindatobyry wâgâ. Iwerâ pealâ pekodo modo nâtyagui Jesus eguepybyry etadâdobyryram. <sup>23</sup> “Eguepybyry târâpa” keanrymo olâ-ro warâ. Nodopâdaimo. “Anju kaynonro nâepanâgueagui târâ. Xina agâ agueakimo” keanrymo. “Jesus kurâem nitondai” keanrymo xinaram warâ. Warâ enra pekodo modo xinaram nhegatuly. <sup>24</sup> Awârâ tindapygueduo, eynynonrobryry ewy nâtyagui Jesus eguepybyry etadâdobyryram. Koendâ kuru pekodo modo aguehobryry ese. “Ipa târâ eguepybyry” keanrymo olâ — kely Cleopas.

<sup>25</sup> Aituo myani Jesus aguely eyanmo:

— Tahule âdy einwânni kebalâ mataunaze! Saguho Deus itaumbryy egatuwâni byry modo aguehobryy mâinwândylymo-ro watay, akaemo pekodo modo aguehobryy tainwâñse tâise âmaemo. <sup>26</sup> “Âsenagazedyly, iguely warâ ise Deus Ingonytby” tâkeze myakâwâm saguho modo Deus itaumbryy egatuwâni modo. “Kurâem itonze warâ. Deus enado ise xynru, Deus tagâ eon-honru âzekiba ienehonze” tâkezemo myakâwâm — kely Jesus.

<sup>27</sup> Idânârâ tywâgâ, Deus itaumbryy awo wâgâ inweniby koendâ kehoem nhegatuly myani. Moisés, Deus eynynâ aguewâtyby modo lâpylâ warâ, tywâgâ inwenibymo, koendâ kehoem nhegatuly myani.

<sup>28</sup> Emaús iwaguepa saindylymo myani. Jesus sakadyly lelâ waunlo ara enanajimo.

<sup>29</sup> Aituo myani idâdysebamo aguelymo:

— Xina agâlâ ikâ; kogonekâ awârâ, iguandyly ise — kelymo.

Aituo myani Jesus mâtâ azagâ tagonropyry agâ etymo odaji egawândyly. <sup>30</sup> Âwinduase ekadylymo myani. Jesus pão nhanâdyly. Deus agâ aguely myani:

— Tuomare xina, pão mânduhobryy wâgâ, Pabai — kely.

Deus agâ agueypyem myani pão nhepajiwâdyly; mâtâra, mâtâra warâ nhuduly.

<sup>31</sup> Pão nhuduly ume kulâ myani mâtâ uguondo Jesuslâ awyly nhutulymo. Akaemo tutuduo myani âtygaguely. <sup>32</sup> Aituo myani akaemo azagâ aguelymo:

— Anwa oze kydatay, Deus itaumbryy agueduo toenzepa kuomazeaguilâ — kelymo.

<sup>33</sup> Aituo myani saudylymo inepa kehoem. Jerusalémram odopâdylymo. Saintybyem myani idâlymo Onze lelâ Jesus eynynonrobryry modo, kurâdo Jesus einwânni modo warâ âtâdyguyhobryryam. <sup>34</sup> Akaemo azagâ saintybynra aguelymo myani:

— Kywymâry kurâem nitondai lelâlâm! Igueypyem inkâba. Kurâem nitondaimy! Simão netai — kelymo myani.

<sup>35</sup> — Tutuzelâ xina! Xina netai lâpylâ! Xina Emaúsram idâday, uguondo nâepanâgueagui. Xina agâ Emaúsram nâtyagui warâ. Kywymâryem awyly xina nutuagui, pão nhepajiwâday — kelymo myani.

*Jesus tynynonro modoram âepanâguehobry*

*(Mt 28.16-20; Mc 16.14-18; Jo 20.19-23; At 1.6-8)*

<sup>36</sup> Nhegatudaymo myani Jesus âepanâguelo eyanmo.

— Koendâ lelâ âmaemo — kely.

<sup>37</sup> Tientuo myani adapâendylymo, âseanedylymo warâ. Jesus egadopyry kulâ waunlo ara enanajimo. <sup>38</sup> Jesus olâ myani eyanmo aguely:

— Tâseanezeba itaungâ. “Jesus egadopyry awâkâ” tâkewâzeba itaungâ. <sup>39</sup> Urâlâ urâ! Etaungâ iemary, uhuru warâ. Mâ’ ietaungâ, kadopâembâ wawyly mâtomoem, kurâem

wawyly māinwântomoem warâ. Igueypy egadopyry mawânkâ tunrempa, tybyguepa warâ xara ietomo ara – kely myani.

<sup>40</sup> Agueypyem myani tâmary, tuhuru warâ nhenehonly. <sup>41</sup> Mâkâlâ kuru awyly neinwâmpyramolâ. Takalaguemolâ warâmo wâne myani, toenzepa olâ iomarumo, ekuâgumo lâpylâ warâ.

Aituo myani Jesus eyanmo aguely:

– Âdylâ tâinzeimpe tarâ? – kely.

<sup>42</sup> Kanra âjihuyby epajigâdyby nhudulymo. <sup>43</sup> Enanaynmolâ kanra âjihuyby nhâdyly.

<sup>44</sup> Tâwinduapygueduo myani Jesus aguely:

– Yiguely iraynâ agâmo watay, âyanmo augue. “Deus itaumbyry awo wâgâ Moisés ywâgâ inweniby ara ise awidly. Deus unâry egatuwânbiry modo ywâgâ aguehobyr yara ise awidly. Deus xurâem tygâtuneim modo ywâgâ inweniby ara ise awidly” ugue wâne-ro – kely Jesus.

<sup>45</sup> Warâ Deus aguehobyr nhutuen-honly; nhangahumo odaji nhedyly. <sup>46</sup> Aguely:

– Warâ inwenibyem awyly: “Deus Ingonyby âsenagazeze, igueze warâ. Azagâ<sup>‡</sup> emedyly idyly wâgâ olâ ise kurâem itondly” kely. <sup>47</sup> “Tâinkâ lelâba ise einwânni modo xunârybyry egatuze idâly. Aguezemo: ‘Inakanhe kulâ amidlymo wâgâ âjityendaungâ. Deus izepa ato aiedyly imowâdaungâ. Arâ ise Deus inakanhe mitomobyr nhygakely, Ingonyby tâinwânsse mawylymogue’ kezemo. Jerusalémdâ ise nhegatulymo adaguly, ilâpyryem ise tâinkâ lelâba-ro warâ” warâ inwenibyem awyly. <sup>48</sup> Amaemo awidly enipyry modo, auguely idanipyry modo warâ, aituo xirâ modogue kurâ domodoram aguewâtaunda. <sup>49</sup> “Yspiritury igonose urâ” nygue Deus. Urâlâ ise Deus “Igonose urâ” kehobyr ygononi. Deus eydâpa ise ywâgâ amyguehomoem on-honrumo eneni âewyly. Saindyly ara tarâ xidadâdâlâ itaungâ – kely Jesus.

### *Jesus Deus eydâ atoram âkuhobyr*

(Mc 16.19-20; At 1.9-11)

<sup>50</sup> Aituo myani Betanianra idâlymo Jesus agâ. Târâ tâmary IUK ienipyryem aguely myani:

– Pabai, eagâmolâne ikâ, âda kâienehomo warâ – kely.

<sup>51</sup> Adâkely umelâ myani Jesus eydâmopa âxiguely. Eydâ tatoram Deus nhalokuândly.

<sup>52</sup> Awârâ modo tindatuo, tientuo warâ myani aguelymo:

– Koendonro mâkâ Jesus! Deuslâ mâkâ! Ânguy mâkâ emyenro lâpeba! – kelymo, tiynrentomoem.

Ilâpygueduo myani tuomamune odopâdaynlymo Jerusalémram. <sup>53</sup> Kopaelâgâembaba myani idâlymo Deus etyram. Târâ Deus koendonroem awyly wâgâ aguelymo, igâkymo iwâgâ warâ.

Alâ kulâ.

Lucass

<sup>‡</sup> **24:46** Nota de pé Mateus 12.40dâ egâ.

## JOÃO

### Unâ Koendonro Jesus Cristo Wágâ João Inweniby

Xirâ livru wágâ inwenily João nhangahu odaji iemâmy Deus. Awylygue Deus itaumbrylâ xirâ João nhegatuyby. Jesus induakeyby myakâwândy mâkâ João. Jesus toenzepa inwyneguuly myakâwândy mâkâ. Mâkâ lelâlâ tientybylâ xirâ livru wágâ nhegatuly.

Kâmakerim Jesus Cristo wágâ kiuntuhoem myakâwândy Deus xirâ livru inwenienhonly. Xirâ iweniby wágâ tytainze kurâ, Deus kiuntuho mâkâ awyly. Idânârâ xugudyly iraynâlâ tâlâ myakâwândy mâkâ, tutuze kurâ; xirâ onro anaxi tâetoem olâ myakâwândy kurâem idyly. Kâmakeze iguein-em myakâwândy âewyly, judeu domodo kaneru nhâlymo inakanhe adâitomobyry xygakehoem myara.

Jesus adyesenry modo kehoem anhetobry, pekodo Samaria donro agâ aguehobry, Lázaro igueduo kurâem nhetondobry wágâ warâ adâkeze xirâ livru.

Xirâ livru xypyrydâ, capítulo 14dâ Jesus, tyiguely iraynâ, tynynonro modoram aguehobry, Deus Ispiritury tingonodyly wágâ enomedânímoem, eon-hondânímoem warâ kehobry tytainze kurâ. Capítulo 17dâ, Jesus Tunwym agâ xunâgobry tutuze lâpylâ kurâ. Iguehobry wágâ, igueypyem kurâem tâitombygueduo turâ modoram âepanâguehobry warâ tytainze kurâ.

Âdaituo xirâ iwenily awyly xutuhobe xirâ livru wágâ: Jesus Deus imeryem awyly, kâmakeinhe Deus ingonotyby awyly warâ kieinwântoem.

#### *Jesus wágâ mawânkâ Kunwym Deus kiuntuly*

<sup>1</sup> Idânârâ âtugudyly iraynâ, âdy peba awyly ume, tâlâ myakâwândy kyam Deus Xutuenhoim. Tunwym Deus agâlâ myakâwândy mâkâ. <sup>2</sup> Idânârâ nhugudyly iraynâ, Deus Xutuen-hoim Deus agâlâ myakâwândy. <sup>3</sup> Deus Xutuen-hoinlâ, idânârâ tâlânro modo adâkelygue kulâ xugunehonri. Mâkâ aguepa watay, âdy peba, ânguy peba warâ tâise.

<sup>4</sup> Deus Xutuen-hoim mawânkâ xirâ anaym tâlâ kyenehonri. Mâkâ wágâlâ ise Deus eydâ atoam kytâly, kieinwândylygue. Iajinu wâne kytâho kientoem ânwa tâsagonze, myara lâpylâ Deus wágâ kiuntuhoem anhenehonly. <sup>5</sup> Iajinu emyenro mâkâ, inakanhe aguitobyry xutuen-hoim. Iamu, iajinu tohoreba nietaymba, arâ lâpylâ inakanhe tadawyly Deus wágâ kiuntuly nianlâpyra awyly.

<sup>6</sup> Jesus Deus wágâ aguely adaguly iraynâ, Deus eagonro uguondo unâ egatuim igonomâmy, João Batistalâ. <sup>7</sup> Iajinu oze kytâduo, âdyam kytâly awyly tutuze kurâ, arâ lâpylâ Jesus âdara Deusram kaindyly awyly nhutuen-honly. Jesus wágâ agueze myani João âewyly. Idânârâ adâkely indatomoem, Jesus nheinwântomoem warâ myani João aguely. <sup>8</sup> Deus Xutuen-hoim kuru mâkeba myani João. Jesus mawânkâ kyam Deus Xutuen-hoim kuru; mâkâ wágâ ani João aguely. <sup>9</sup> Jesus xirâ onro anaxi âewyly myakâwâm, Deus kyam xutuen-honze. Mâkâ wágâ mawânrâ âdara mâkâ xurâem kydawyly xutuly.

<sup>10</sup> Mâkâ kyam Deus Xutuen-hoim onro anaxi âemâ; tarâ kuduaylâ akâwâm. Mâkâ lelâlâ idânârâ onro anano modo tytanrugue kulâ xugunipyry, Deus xurâ keba modo olâ Messiaslâ mâkâ awyly nutubamo, Deus Ingonyby. <sup>11</sup> Typemugudo judeu domodo duaxilâ wâne myani âewyly. Ipemugudo judeu domodo ewy olâ myani, eynynonroem tâidysebamo. <sup>12</sup> Tâlâ olâ myani einwânni lâpylâ, awylygue akaemo Deus xurâem nhenehonly. <sup>13</sup> Tâjimery tyze odapalâ iazely, nhunwynlâ xuguni warâ. Arâpa olâ Deus tymeryem kyedyly. Eynynonroem kydawylygue tymeryem kyedyly.

<sup>14</sup> Deus kyam Xutuen-hoim Jesus Cristo karalâ akâwâm kurâem awyly. Kuduaylâ akâwâm xirâ onro anaym awyly. Kagâ koendonro lelâlâ mâkâ. Mâkâlâ mawânkâ âkealâ

kuru âdaunlo Deus awyly xutuen-hoim. Deus imery tokaleom tawylygue, koendâ, ton-honre warâ mâkâ. Tâense kurâ koendonro kehoem awyly, ton-honre awyly warâ.

**15** Mâkâ Deus kyam Xutuen-honri wâgâ myakâwâm João Batista aguely:

— Saguhoem iwâgâ auguehobyrylâ merâ. Auguehobyry enanâguewâdaungâ, “Inepa ise mâkâ yakadâ kuru xuturim âewyly. Urâ lelâlâ wâne ani waunroem iazeim, tâlâ olâ myakâwândy merâ yazely iraylâ” uguehobyry — kely.

**16** Koendonro lelâlâ mâkâ, koendâ lelâ inanry, idânârâ kagâ awyly. Aunlolâ inanry kurâem koendonro anhesezedly. **17** Saguhoem kuru Moisésram myakâwândy Deus kâzewenry nhegatuen-honly, kydamudo judeu domodo ezewenry. Jesus Cristo wâgâ olâ iwerâ Deus koendonroem tawyly, ton-honre tawyly warâ nhenehonly. Jesus Cristo wâgâ mawânrâ âdaunlo Deus awyly kiuntuly. **18** Ânguy Deus netaymba. Mâkâ imery tokaleom olâ tâense, Deus agâ âzekibalâ tawylygue. Tunwym agâlâ mâkâ. Mâkâlâ ani koendâ kuru âdaunlo Deus awyly xutuen-honri.

### *João Batista aguehobyry*

**19** Judeu domodo iwymâryo Jerusalém donro, kurâdo eynynâ Deus agâ aguewâni modoram, emary modoram warâ aguelymo myakâwâm:

— Joâoram idâwâtaungâ. Sapâiguewâdaunda: “Âmâ-ro? Ânguyka âmâ? Âwâgâlâ amyguely? Messiaslâ âmâ, Deus ingonokyly tynwânwânseinlâ?” kewâtaunda — kelymo.

**20** Aituo idâlymo; João nhapâiguenymo. Tapâiguehobyry koendâ kehoem in-hoguly:

— Messias mâkeba urâ, mâkâ Deus ingonokyly kurâdo inwânwânyly mâkeba — kely.

**21** Aituo nhapâigueondylymo:

— Messias keba matay, Elias kurâem itondyby âmâ? — kelymo.

Aituo João in-hoguly:

— Elias mâkeba urâ — kely.

— Moisés ara Deus itaumbyry egatuim tynwânwânseinlâ âmâ? — kelymo.

— Mâkâ keba aze — kely.

**22** Aituo agueondylymo Joãooram:

— Arâ atay, ânguy pylâka âmâ? Tugononibyryam mâin-hoguhobyry tiandyse xina. Âdara tâkezeka âmâ âwâgâlâ? — kelymo.

**23** Aituo João in-hoguly, saguhoem lelâlâ Isaías inweniby aralâ:

— Âdy peba atodâ Messias wâgâ agueinlâ urâ. “Ohondaungâ Kywymâry Deus Ingonyby saintodâ, taseray tuonse wâne pymâ ton-honreim saintoem myara. Inakanhe amidylymo imowâdaungâ” keim urâ — kely João.

**24-25** Aituo, sapâigueze igonotyby modo duano, fariseu domodo, Joãooram aguelymo:

— Messias keba, Elias kurâem itondyby keba, unâ egatuim Deus ingonokyly tynwânwânyseim keba warâ âmâ-ro watayma kurâ domodo batiza iese ton-honruneba âmâ-ro — kelymo.

**26** Aituo João aguely eyanmo:

— Urâ parugue batiza âenimo. Âduaymolâ olâ awâkâ, eon-honru mâuntudânyromo. **27** Urâ pygueduo lelâlâ wâne Deus xurâem tâwanu nhaguly, awâkâ olâ yakadâ kuru tynrenseim. Mâkâ mawânkâ Deus wâgâ agueim kuru. Mâkâ ara iedylymo watay, âdy mâkeba urâ. Ihuru kâingoehoem ihuru etary etyrinhe witoenlâ nudupa lâgâlâ — kely.

**28** Betaniadâ myakâwâm awârâ aidyly, âtunâguedylymo, paru Jordão kuynâ, João, Deus eynynonroem tâidysedo modo batiza nhetondâ.

### *João Jesus wâgâ aguehobyry*

**29** Kopaelâgâem João, Jesus nhedyly. Tyam idâly tientuo tonlo modoram aguely:

— Etaungâ Deus Ingonyby. Awâkâ wâgâ ise Deus inakanhe aguitobyry nhygakely. Saguhoem, kordeiru tyâze, tyaduânse warâ mykâinane kurâdo eynynâ Deus agâ

aguewâni modo. Awârâ tientuo mykâinane Deus, inakanhe aguitobyry nhygakely. Arâ lâpylâ ise awâkâ âeni kâtaybyay iguely. Awâkâ iguehobyry wâgâ ise, inakanhe aguitobyry Deus nhygakely. <sup>30</sup> Auguehobyry enanâguewâdaungâ: “Inepa ise mâkâ yakadâ kuru xuturim âewyly. Urâ lelâlâ wâne ani waunroem iazeim, tâlâ olâ myakâwândy awâkâ yazely yraynâlâ” uguehobyry – kely.

<sup>31-34</sup> Aituo João nhegatuly ânguy Deus Ingonyby awyly.

— Adaunlo uguondo wâgâ inakanhe aguitobyry xygakely awyly kâuntuwâbyra wakynre, kordeiru ara inakanhe aguitobyry epywaze tyâzeim. “Kurâdo parugue batiza iekâ” nyguelâ Deus. “Yspiritury uguondo onwa âewyly ese âmâ. Mâkâ ise Yspiritury xuduim, ânguy ynynonro awyly tienehon-hoem, iwerâ wâne enra kurâdo batiza mânhedyly, ânguy ynynonro awyly âzehohoem myara” nygue Deus, ânguy Ingonyby awyly kâuntuhoem. Deus aguehobyry ara, Deus Ispiritury kaynâpa xytâguyl kâendyly papaem Jesus onwa. Aituo lelâlâ ânguy Messias, Deus Ingonyby awyly kâuntuly. Messias âewyly iray on-honi modo parugue batiza iedyly mawânrâ iewanu, ânguy mâkâ awyly israelita domodo nhutuhoem. Awylygue “Deus imery awâkâ Jesus” uguelly – kely João.

### *Jesus tynynonroem André, Simão Pedro warâ iduakehobyry*

<sup>35</sup> Kopaelâgâem târâlâ João azagâ tynynonro modo agâ. <sup>36</sup> Jesus sakadyly tientuo, João aguely:

— “Kordeiru Deus Ingonyby” keholâ awâkâ, mâkâ iwâgâ auguehobyrylâ – kely.

<sup>37</sup> Agueduo, akaemo azagâ Jesus nhapygue idâlymo âgânâ. <sup>38</sup> Aituo Jesus MYK idyly tykayam. Tyampygue idâlymo awyly tientuo, aguely:

— Âdaituoka yampyguedylymo? – kely.

— Konomedâni, âdykâka mâxidâdy? – kelymo.

<sup>39</sup> Jesus in-hoguly:

— Âetaungâ. Inoro eydâ watoam – kely.

Kogoneyam, quatro horas awârâem, Jesus agâ idâlymo. Nhedylymo âdykâ Jesus âxidâdybyem awyly. Eagâlâ iguandylymo.

<sup>40</sup> João Batista eynynonrolâ akaemo azagâ uguondo modo. Jesus aguely tindapygue-duo olâ eagâ idâlymo lelâ, iwâgâ tâsenomedâdomoem. Akaemo azagâ uguondo modo ewy André, Simão Pedro iukono, myani mâkâ. <sup>41</sup> Jesus agâ adâkebygueduo myani André tywaigoru nhuinly, aguely:

— Paigo, Deus Ingonyby Messias xina netai – kely.

(“Cristo” keze “Messias” kely gregüem.)

<sup>42</sup> Aituo tywaigoru nhadyly Jesusram. Jesus Simão enipyryem, aguely:

— Simão izedy, João imery. Iwerâ olâ ise izedy iwelo Cefas – kely.

(Pedro kezelâ gregüem Cefas kely, “tuhu imâsedo” kezelâ.)

### *Jesus tynynonroem Filipe, Natanael warâ iduakehobyry*

<sup>43</sup> Kopaelâgâem Jesus Galiléia yan-yam tâtâdyze idyly. Tâtâly iraynâ, Filipe agâ oxiodyly; eyam aguely:

— Yagâ âekâ, ynynonroem mitoem – kely.

<sup>44</sup> Betsaida donro myani mâkâ Filipe, André, Pedro warâ ety anano.

<sup>45</sup> Filipe, Natanael agâ agueze idâly.

— Saguhoenlâ Moisés pape kâzewenry awo wâgâ inweniby Deus Ingonykyly wâgâ aguehobyry xina netai. Deus itaumbypyry egatuimbyry modo tywenizemo lâpylâ mâkâ âeni wâgâ. Jesuslâ, Deus Ingonyby, José imery, xidadâ Nazaré donro – kely.

<sup>46</sup> Awârâ tindatuo, Natanael aguely:

— Âdy koendonro lâpeba târâ Nazarédâ! Nazaré donro ewy Messias awyly kâinwântaymba urâ — kely.

— Âekâ. Egârâ — kely Filipe.

<sup>47</sup> Natanael saindyly tientuo, Jesus aguely tagonro modoram:

— Israelita lelâlâ awâkâ saini. Ânguy enokuni mâkeba awâkâ — kely.

<sup>48</sup> Jesus aguely tindatuo, Natanael, Jesus nhapâiguely:

— Âdaraka utuly? Waunroem kydoxiodylâmâ xirâ! — kely.

Aituo Jesus in-hoguly:

— Kâenkylyemba lelâlâ wâne enra iwague mawyly, Filipe. Âgâsedly iraylâ olâ enra se figureira iay ekadybyem mawyly kâendyly — kely.

<sup>49</sup> Natanael inwauntudyly, aguely:

— Konomedâni, Deus imery âmâ! Israelita domodo iwymâry kehobyry! — kely.

<sup>50</sup> Jesus aguely:

— “Figueira iay enra nhedyly” uguehobyry wâgâ kulâ yeinwândyly! Ago kuru yeinwânsê olâ âmâ, awârâ modo takazeno agânhedyly mâtentuo — kely.

<sup>51</sup> Aituo idânârâam aguely:

— Kau âzenahunguely-ro waunlo ara ise mâtendylymo. Anju domodo yagâ xytâguyly, âkulys warâ ese âmaemo, urâ Uguondo Kaynâpa Âetyby agâ. Xirâ mâtudyzemo kuru wato — kely.

## 2

### *Jesus Canâdâ todohogüinday, adyesenry anhetobyry*

<sup>1</sup> Azagâ iguandyly ipygueduo, Canâdâ todohogüinlybe akâwâm, Galiléia eynynâ. Târâlâ akâwâm Jesus ise, todohogüin-hodâlâ. <sup>2</sup> Jesus agâ xina idâwâm lâpylâ, igâsedlybyem tawylygue. <sup>3</sup> Aituo vinhu adainly, âty nadaimpalâ. Awârâ tiuntuduo Jesus ise eyam aguely:

— Mery, igâsedlyby modo sakuihoem vinhu lâpeba — kely.

<sup>4</sup> Jesus aguely:

— Âdaituoka yam amyguely? Iewanu kanguhu oday inkâba awârâ — kely.

<sup>5</sup> Arâ aguepygueduolâ Jesus ise âty sodo emary modoram aguely:

— Ymery aguehobyry arane aitaungâ — kely.

<sup>6</sup> Tâlâ ani âtâdâ seis poty tuhugue xygatyby modo, paru ekanâdo. Oitenta, cem litros warâ mâtâ modo nhawâdyly. Tâzewenry ara, tâzemaunguehomoe, tywykeba tâitomoem warâ judeu domodo parugue nhumytâguylymo myani mâtâ. <sup>7</sup> Jesus aguely vinhu epâni modoram:

— Xirâ poty modo parugue xumytâdaungâ — kely.

Aituo parugue poty nhumytâdlymo. <sup>8</sup> Ilâpyryem aguely:

— Xirâ poty odano ewy paru âentywâdaungâ. Sataungâ âty iwymâryam — kely.

Aguehobyry ara aidlymo. Paru nhetylymo, nhadylymo. <sup>9</sup> Jesus olâ mâtâ paru vinhuem ienehonrimbyryem. Aituo âty iwymâry mâtâ xuduypy nhekudyly. Ipa, mâtâ paru, vinhuem itybyem lelâ. Âdykâ mâtâ vinhu nhetylymo awyly nutuba mâtâ. Emary modo olâ mâtâ paru poty odano modo vinhuem ietybyem awyly tutuze. Akaemolâ mawânkâ mâtâ tânyzeim poty odayba etyim. Aituo âty iwymâry uguondo ohogüinrim ingâsedly, aguely:

<sup>10</sup> — Kâzewenryem vinhu tâkubâgueim mawânrâ waunroem tâpâzeim igâsedlyby modoram. Ize tato ara nhenybygueduomo pylâ eagonro vinhu ewy epâdyly-ro warâ. Amâ olâ vinhu tâkubâgueim mekanâdai; âty adainze idâly ume kulâ pylâ mâtâempâdyly-ro! — kely.

<sup>11</sup> Târâ Canâdâ, Galiléia eynynâ, saguhoem kuru adyesenry anhedylylâ ani Jesus Deus eon-honru tienehon-hoem. Xina Jesus eynynonro modo Jesus anhetyby tientuo, einwânmâ.

<sup>12</sup> Awârâpygueduo xidadâ Cafarnaumram Jesus idâly. Ise, iukonodo warâ eagâ idâwânmô, xina lâpylâ warâ. Iweâpa xina nipyra ani târâ.

*Jesus ânguydo imeom vende ieni modo Deus ety odayba nhegaseândobyry  
(Mt 21.12-17; Mc 11.15-19; Lc 19.45-48)*

<sup>13</sup> Âty Páscoa etyguedo saindyly iray Jesus idâly xidadâ Jerusalémram, mâtâ âty aitoam, kydamudo Egitodâpa âsemaguehomobyry enanâgueho. Eagâ xina idâwâm. <sup>14</sup> Deus ety idaseraji egawântybyem kurâ domodo nhedyly. Uguondo modo tapirâ, ovelha, papa, awâkâ modo vende nhedylymo. Tanâseim ani mâkâ modo, xyâhoem, iaduântoem warâ, Deusram egamehoem. Mesa wâgâ ekadyby modo kurâdo idinheruru troca nhedyly, nhedyly lâpylâ. Târâ adyeseim keba anhekylomo. <sup>15</sup> Aituo kordague xikoty anhedyly. Vende ieni modo Deus etydâba inwenkewâdyly, ovelha, tapirâdo warâ agâlâ. Dinheru troca ieni modo iwenzary nhamunedly. Aituo idinherurumo adapâeguyl onro wâgâ.

<sup>16</sup> — Tarâpa merâ modo etywâdaungâ — kely papa vende ieni modoram.

— Pabai xyrrento xirâ âtâ, âdydo imeom vende ieto, sanâto warâ mâkeba — kely.

<sup>17</sup> Xina Jesus eynynonro modo nhenanâguely saguhoem Deus itaumbypyry awo Salmos wâgâ iweniby: “Deus, toenzepa âtâ âyrento ize wawyly. Woday peto yaduândyly-ro waunlo ara kehoem ity kâinwynedly. Awârâ ise yiguehoem aienehonrim” warâ iwenibyem awyly.

<sup>18</sup> Jesus anhetyby tientuo myani, pymâdo aguely:

— Âdylâ Deus eon-honrugue amânhedyly tiendyse xina, Deuslâ, Deus keba tarâ ami-toem aguenri mawyly tiuntuhoem — kelymo.

<sup>19</sup> — Xirâ âtâ mankalagueduomo, azagâ\* emedyly idyly ara, saunâtonze urâ — kely Jesus.

<sup>20</sup> — Nuduwâpyra! Quarenta e seis anu samâ xirâ âtâ itâdoem. “Azagâ† emedyly ara saunâtonze urâ” myguely. Myguewâdyly kulâ! — kelymo.

<sup>21</sup> Deus ety wâgâ wâne Jesus aguely, tywâgâlâ olâ aguely lâpylâ. <sup>22</sup> Igueypyem, kurâem itonduo, Deus ety azagâ emedyly ara tiaunâdyly wâgâ aguehobyry xina enanâguewâm. Tienanâgueduo, âkealâ Jesus aguehobyry awyly xina nhutuly, Deus itaumbypyry awo wâgâ iweniby âkealâ awyly lâpylâ warâ.

### *Idânârâ kyangahu oday kunâry tutuze lelâ Jesus*

<sup>23</sup> Páscoa etygueday Jesus Jerusalémâ awyly ume, toenzepa kurâdo Jesus nheinwândyly, Deus Ingonyby Messiaslâ awyly, adyesenry modo kehoem anhedyly tientuomo. <sup>24</sup> Jesus olâ kurâdo neinwâmpyra, koendâ kehoem akaemo âdaunloem awyly tutuze tawylygue; tutuze agui akaemo ewy tyizepa awyly. <sup>25</sup> Idânârâ kurâdo tutuze lelâ Jesus ânguy eyam negatubalâ. Idânârâ tyangahu oday xunâgomô tutuze, ânguy eyam aguepalâ.

## 3

### *Nicodemos Jesus agâ agueze idâhobyry*

<sup>1</sup> Tâlâ myakâwâm uguondo Nicodemogue tâzekeim. Fariseu myakâwâm mâkâ, judeu domodo iwymâry. <sup>2</sup> Kopae idâly Jesus agâ agueze.

— Tutuze xina, konomedâni mawyly, Deus ingonotyby. Agâpa Deus watay, adyesenry kehoem amânhetaymba tâise âmâ — kely.

<sup>3</sup> Jesus aguely:

\* **2:19** Nota de pé Mateus 12.40dâ egâ. † **2:20** Nota de pé Mateus 12.40dâ egâ.

— Azeompyra kulâ, Deusgue tywymâguneba âmâ. Arâ lelâ mawânrrâ Deus xurâem tâjidyly. Xirâ mâuntudyze kuru wato — kely.

<sup>4</sup> — Âwâ! Ânguy xutuybyem itybyem niazeontaymba! Nuduwâpyra kyze idâhu odaxi kydodopâdoem, kyazeontoem — kely Nicodemos.

<sup>5</sup> Jesus aguely:

— Deus Ispirituryam iweloem kydâiehoba, parugue kyazeontaymba kurâ warâ watay, Deusgue tywymâguneba. Xirâ mâuntudyze kuru wato. <sup>6</sup> Kyze idâhu odayba kâgaseduo, kurâenlâ kyazely. Awârâ keba olâ Deus einwânni modo Deus xurâem ienehoim, Deus Ispiriturylâ iweloem kyenehoim. <sup>7</sup> Awylygue tâseguâdâzeba ikâ, “Azeontaungâ” uguelygue. <sup>8</sup> Sapezenru igâky tydase, ponwary, se iwatary warâ nhekânily tâense warâ âmaemo, sapezenru kuru olâ mâempyra âmaemo. Arâ lâpylâ Deus Ispiritury, Deus einwântaynrim modo wâgâ aidyly mâempyra mawylymo; aitobyry modo lelâ mâenkylomo — kely.

<sup>9</sup> Nicodemos aguely:

— Kâuntuba lelâ aze. Âdara kuruka amyguehobyry aidyly, Deus Ispiriturygue xina iaizeondyly? — kely.

<sup>10</sup> Jesus in-hoguly:

— Kâzewenry enomedâni âmâ, awârâ olâ mâuntuba âmâ! <sup>11</sup> Idakâ. Tiuntuybylâ xina Deus eynynonro âyanmo agueho, tientybylâ xina âyanmo nhegatuly warâ. Arâlâ olâ xina agueho mâinwâmpyra mawylymo. <sup>12</sup> Xirâ onro anano wâgâ augueduo mâinwâmpyra âmaemo, Deus wâgâ augueduo lakuru ise mâinwâmpyra kuru mawylymo. <sup>13</sup> Ânguy xirâ anano kulâ Deus ezaxi nâkuwâbyra, iwâgâ egatuze nodopâbyra warâ. Urâ, Uguondo Kaynâpa Âetyby lelâ târâpa xytâguyby. Urâ lelâ Deus wâgâ aguenriem xurutyby — kely Jesus.

<sup>14</sup> Aituo aguely:

— Enanâguegâ, saguhoem kydamudo Deus einwântâny modo âji âdy peba ato einkâ adakobâday, âgâuram sâtobyry. Deus, Moisés âgâu bronzeguento anhetoem, se wâgâ nhaunâtoem warâ aguewâm, mâkâ âgâuram MYK ityby modo kua itoem. Mâkâ âgâu bronzeguento saunâtobyry ara, arâ lâpylâ ise urâ, Uguondo Kaynâpa Âetyby keho, se wâgâ kadaunâhonly, <sup>15</sup> idânârâ yeinwântaynrim modo, aunloenlâ Deus agâ itomoem. <sup>16</sup> Idânârâ Deus kywynedyly. Awylygue urâ tymery tokaleom ugonodyly. Idânârâ yeinwântaynrim modo eyam âzemodekoze. Deus agâpa tyetunebamo ise, aunlolâ ise eagâ awylymo. <sup>17</sup> Deus ugonodyly, xirâ anano modo igueduo tienagazedoem inkâba, idânârâ yeinwântaynrim modo tienmakehoem.

<sup>18</sup> — Urâ Deus imery yeinwântaynrim modo âji tâdâsenagazedoam nâtâwâbyramo ise. Yeinwântâny modo olâ idâze mârâ âji tâdâsenagazedoam, urâ Deus imery tokaleom yeinwâmpyra atomobyry wâgâ, aunloenlâ Deus agâpa ietomoem. <sup>19</sup> Iajinu MAH nheto ara xirâ anaym Deus wâgâ koendonro segatu, urâ Deus imery; Deus xurâ keba modo olâ Deus izepa ato adiendylâ ize atomo, awylygue yizepa awylymo. Iamu duay adakobâni aramo kulâ, iajinu oday adakobâni ara inkâba. Awârâ mawânrrâ yeinwântâny modo aunloenlâ âsenagazedomoem egamehonrimo. <sup>20</sup> Inakai aieni modo yizemo inkâba; ydâpa tâwiensem lelâ. Yam idâlymo-ro watay, inakai anhekylymo tâdutuoze tâise. Inakanhe adâidyl timodyzebamo tawylygue, adienkyly nhoendylymo, ânguy nutuba itoem. <sup>21</sup> Deus ize ato aieni modo olâ wopaji tainsemo. Iajinu aguienkyly nhesagon-ho ara, idânârâam koendâ anhekylymo âzeholy, Deuslâ anhetomoem eon-honrumo xuduim awyly nhutulymo warâ — kely.

*Jesus wâgâ João Batista aguehobyry*

<sup>22</sup> Awârâpygueduo, Judéia einkâ Jesus adakobâdyly. Eagâlâ xina idâly. Iweâpadobe târâ xina awyly, inakanhe adâitobyry wâgâ âjityeni modo, adâidyl timodyzedo modo warâ

parugue batiza âiehoday. <sup>23</sup> João lâpulgâ Enomdâ parugue batiza nhetaynlymo, Salim iwaguepa, târâ toenzepa paru awylygue. Toenzepa myani kurâdo idâly eyam batiza âiehoze. <sup>24</sup> (Tâtadâzeba João ilâem.)

<sup>25</sup> Judeu agâ João eynynonro modo ewy âjihoguly. Deus enanaym âdara tywykeba tâjidyly wâgâ aguelymo. <sup>26</sup> João eynynonro modo eyam agueze idâly.

— Tânanâgueze âmâ mâkâ uguondo paru Jordão kuynâ agonropyry, iwâgâ amygue-hobypy. Toenzepa kurâdo eyam idâly batiza âiehoze, âyam âeni modo takaze — kelymo.

<sup>27</sup> João aguely:

— Tuomare urâ, kurâdo eyam idâlygue. Deuslâ awârâ aienehonrim. <sup>28</sup> Auguely midadâmolâ: “Messias mâkeba urâ” ugue. Iraynâlâ olâ kâjigono holy, sainto koendâ konhontoem. <sup>29</sup> Todohogüinday, uguondo ohogüinrim xurâ mawânkâ pekodo. Eataen-ho tuomazeze lâpulgâ olâ, ohogüinrim ohomaenduo. Arâ lâpulgâ kohomaendyly, toenzepa kurâ domodo Jesus nheinwândyly kâuntuduo. Mâkâ mawânkâ Messias, urâ keba. <sup>30</sup> Agui Jesus aguely idase idâlymo ize wato, auguely idase âewylymo mâkeba — kely João.

### *Deus eydâpa âetyby awâkâ Jesus*

<sup>31</sup> Deus eydâ atodâlâ Messias âewyly. Idânârâ duay tynrenseim awâkâ Messias. Xirâ onro anano kulâ kurâ, xirâ ananolâ kiuntuly. Kydâ iwaguepa aityby kulâ kiuntuly. Tarâ kientyby, kindatyby warâ kulâ aguykeho. Messias olâ idânârâ duay tynrenseim kuru. <sup>32</sup> Deus eydâ atodâ tientyby wâgâ, tindatyby wâgâ warâ aguely. Arâlâ olâ, agui aguely einwântânybe awyly. <sup>33</sup> Warâ einwânni modo aguely: “Âkeá lelâlâ ‘Jesus, Deus imery awyly’ Deuslâ mawânkâ agueim” kelymo. <sup>34</sup> Deus aguedyse ato, mâkâ Deus ingonotyby agueho, Deus Ispiritury eagâpa nitaymba. <sup>35</sup> Kunwym Deus toenzepa lelâlâ tymery inwynedyly. Awylygue emaxilâ idânârâ nhuduly. Deuslâ idânârâ aitaynrim modo iwymâryem itoem agueim. <sup>36</sup> Awylygue ise, Deus imery einwântaynrim modo Deus agâpa tyeseba awylymo. Tyigueduo, Deusram idâzemo, aunloenlâ eagâ tâitomoem. Deus imery einwântâny modo olâ ise, Deus agâ nipyramo. Tyigueduo, âji tâdâsenagazedoam idâzemo, aunloenlâ Deasdâ iwague itomoem.

## 4

### *Jesus pekodo Samaria eynynonro agâ aguehobypy*

<sup>1</sup> Jesus nhenomedâdo idani modo aguiom kuru, João aguely idani modo takaze, Jesus agui kurâdo batiza nhenehonly, João batiza nhetyby takaze, kely tydase myani fariseu domodo. <sup>2</sup> (Jesus keba olâ tainwânni modo batiza ieni, xina eynynonro modo.) <sup>3</sup> Unâ tywâgâ, João wâgâ warâ tiuntuduo, Jesus Judéia eynynâba idyly, Galileiaranlâ odopâdyly. Eagâlâ xina idâly. <sup>4</sup> Samaria einkâ takadyze Jesus. Awylygue tâinkâ xina sakadyly.

<sup>5</sup> Samaria donro xidadâ Sicar kehoam iwaguepa xina saindyly. Mârâ xidadâ iwaguepa, onro saguhoem lelâlâ kydamu Jacó tymery Joséram nhuduypybe târâ. <sup>6</sup> Mârâ onrodâ paru etyho Jacó nhesaguehoymbybe. Kuotatay awârâem paru etyhoram xina saindyly. Toenzepa adakobâdybyem tawylygue, Jesus ekozeybyem. Aituo paru etyhodâ ekadyly tokobyzeguehoem.

<sup>7</sup> Târâ awyly ume, pekodo Samaria donro paru etyze idâly; Jesus eyam aguely:

— Parugue yakuigâ wao — kely.

<sup>8</sup> (Târâpa ani xina Jesus eynynonro modo, pyni sanâse xidadâam idâypyem.)

<sup>9</sup> Pekodo aguely:

— Judeu âmâ, samaritana urâ warâ. Ypemugudo, âpemugudo agâ âjizetonro mâkeba; koendâ oxioni keba warâ. Xina adakuihobypy oday, madakuidyzedo mâkeba âmaemo. Awylygue ywalu etary odano ewy mâenyhoem mâenkaduo, kâseguâdâdyly — kely pekodo.

Mâkâ pekodo arâ aguely, judeu domodo, samaritano domodo warâ âjizetonro keba awylymogue. Samaria donro modo adakuihobypy oday nadakuiwâbyra judeu domodo.

**10** Aituo Jesus aguely:

— Deus âmâem nhuduly māuntuly ânguy paru ekani awyly warâ māuntuly watay, yam paru tâkaze tâise âmâ māenyhoem. Yam māenkaduo, âyam tuduze tâise urâ. Mânylo-ro watay, iweloem tâiehoze tâise âmâ; âigueduo, aunloenlâ Deus agâ mitoem eyam tâtaze tâise âmâ — kely Jesus.

**11** — Tâsanigue xirâ paru etary, etyho peba âmâ-ro warâ. Nuduwâpyra paru iweloem yetoni yam māunduhoem, mârâ aunloenlâ Deus agâ witoem ayenehoim. **12** Saguhoenlâ myakâwândy kydamu Jacó xirâ paru etyho nhesaguehonly. Mâkâ, imeom, eguy modo warâ taunlolâ myakâwândy paru nhenylymo, tâiguewâsemo olâ. “Mânylo-ro watay, iweloem tâiehoze tâise âmâ” mygueduo, “Jacó takaze ton-honreim urâ” myguelylâ awârâ — kely pekodo.

**13** Aituo Jesus aguely:

— Tâwlâ lelâlâ wâne tatuanzeim modo xirâ paru ewy nhenylymo, inepa lâpylâ olâ ise satuandondylymo. **14** Paru kâunduypy enywânybyry modo olâ ise natuandombyra. Inatagâdo oze aunlolâ paru egasely myara xirâ paru iwâgâ augueho. Deus agâpa nipyra tyenehonzemo mawânrâ kâunduypy. Iguelymo-ro watay, Deusram idâzemo, aunloenlâ eagâ tâitomoem — kely.

**15** Aituo pekodo aguely:

— Awârâ paru ewy yam âundugâ wao. Arâ ise yatuambyra wawyly. Xirâ paru ese kâetombyra wawyly — kely.

**16** — Oso igâsedâ. Xarâlâ eagâ odopâgâ-ro warâ — kely Jesus.

**17** — Tusonuneba urâ — kely pekodo.

Jesus aguely:

— Âkealâ, “Tusonuneba urâ” myguely. **18** Cinco lelâ tusoneimbyry mawyly, tutuze urâ. Iwerâ ohogüimbyem inkâba âmâ uguondo eagâ mato agâ. Âkealâ amyguely — kely Jesus.

**19** Âdaunloem tawyly Jesus agueduo, pekodo âseguâdâdyly. Eyam aguely:

— Iweâma tutuze urâ, Deus wâgâ agueim mawyly. **20** Xina idamudo Deus nhehoguedyly mykâinane xirâ iwy wâgâ. Âmaemo, judeu domodo olâ “Jerusalémdâ lelâ ehoguedo” tâkeze. Âdaunlo unâka iozeno kuru? — kely.

**21** Aituo Jesus in-hoguly:

— Sainse mârâ Deus einwânni modo kuru âdykâingâlâ nhehoguedo, tarâ xirâ iwy Samaria donro wâgâ kulelâba, Deus ety Jerusalém donrodâ kulelâba warâ ise Deus ehoguedyly. **22** Âmaemo, Samaria donro modo, Deus ehogueze tâkewâze wâne âmaemo, māuntuba olâ âmaemo mâtâ kuru. Xina judeu domodo olâ tutuze, tâinwânse warâ. Judeu ewylâ mawânkâ Deus Ingonyby imakerinmoem. **23** Sainse mârâ Deus eynynonro modo, Deus ize ato ara kehoem nhehoguedo. Anri awârâ aidyly adaguly-ro warâ. Âdara ioze ehoguedyly awyly xutuen-honze eagâmolâ ise Deus Ispiritury. Deus wâgâ enomedâzemo mâtâ. Awâkâ ioze lelâ ehogeni modo mawânkâ Deus ize ato tohogue-niem. **24** Tâentuneim mâtâ Deus. Tyispirituryenlâ mâtâ ekaduo nhuduly. Deus Ispiriturygue lelâ Deus nhehoguedyly, ize ato ara kehoem, âkealâ adâkehobry nhenehon-ho ara — kely.

**25** Pekodo aguely:

— Tutuzelâ urâ, âdaralâ Messias, Deus Ingonyby, saindyly awyly. Âewyly-ro watay, idânârâ kehoem ise Deus wâgâ kiuntudyze ato aguely — kely.

**26** — Urâ agâ tunâgueim, Messiaslâ urâ — kely Jesus.

**27** Mârâ ume kehoem xina odopâdyly, pyni sanânybyryem. Jesus pekodo agâ xunâgu tientuo, tâseguâdâze ani xina. Xina ezewenry keba mawânrâ pekodo tiuntudânry agâ tâdunâgu.

— Âdyka merâ agâ ize mato? — xina kepa olâ ani pekodoam.

— Âdaituoka awâkâ pekodo agâ âunâgu? — xina kepa gâlâ Jesusram warâ.

<sup>28</sup> Aituo pekodo idâly, tywalu etary târâlâ nhânly. Xidadâam odopâdyly. Tonlo modoram aguely:

<sup>29</sup> — Paru ese watay, uguondo âdykâ kâentyby keba xiota. Idânârâ agânhetaymby modo wâgâ agueanry olâ. Etaungârâ. Messiaslâ keanra mâkâ — kely.

<sup>30</sup> Aituo agui kurâdo xidadâ odaypa egaselymo. Idâlymo Jesus eydâ atoam.

<sup>31</sup> Pekodo idâpygueduo, xidadâ odano modo saindyly ume, xina aguely Jesusram:

— Anra xina nhanâtyby pyni. Kydâwinduane, Konomedâni — xina kely.

<sup>32</sup> Jesus olâ aguely xinaram:

— Mâenetybymo kâinwâpyra ise urâ. Tâlâ urâ mânentybymo takaze kehoem, pyni koendonro. Âdy augueho awyly mâtuntuba lelâ olâ âmaemo — kely.

<sup>33</sup> Aituo xina aguely:

— Ânguylâ keanra ipyniry nenetai — xina kely.

<sup>34</sup> — Ânguy ypyniry nenetaymba. Mâkâ ugononibyry agânhetoem aguehobyry aiedy-lylâ ypniry. Idânârâ ize ato agânhetuo, âdy izetonze inkâba urâ, tuomare lelâ, âwinduatybyen-ro waunlo ara lelâ. <sup>35</sup> Wamyguelymo inanry: “Quatro nunâ pygueduo kientâdyby kienkaunâdyly lelâ ise” myguelymo. Etaungâ akaemo âeni modo. Trigu ekaunâdo odaxi ityby emyenro akaemo. Iwerâ koendâlâ Deus itaumbypy eyanmo egatuhoem; iweâpa tâiseba itaungâ.

<sup>36</sup> — Etânibyry, ekaunânbry warâ tâzepywaozemo. Koendâ lelâ âzekaunâdyly watay, tohmaenzemo. Arâ lâpylâ, waunroem ywâgâ egatuwânbry modo, ilâpyryem ywâgâ imâem kuru enomedânbry modo warâ ohomaendyly ise, aguelymo idani modo yeinwândylygue. <sup>37</sup> Âkealâ wakehonly: “Mâkâ etâni, eagonro pylâ ekaunâni-ro” kehonly.

<sup>38</sup> Ogonodylymo, ywâgâ mânengatuhomoem. Eagonro ewanugue kulâ âgâmylymo, eagonro nhetâdyby kulâ mânkaunâguylymo waunlo ara. Saguhoenlâ mawânkâ Messias saindyly wâgâ eagonro modo aguewâm. Unâ mânengatulymo idani modo yeinwânsemo, amygue-lymo tindadylygue kulâba olâ, saguhoem ywâgâ aguely tindatybymo tienanâgueduomo — kely Jesus.

<sup>39</sup> Samaria eynynonro, âtâ anary Sicar donro modo ewy agui myani Jesus Messiaslâ awyly einwânni modo, “Uguondo âdykâ kâentâny xiota. Idânârâ agânhetaymby modo wâgâ agueanry olâ” pekodo keduo. <sup>40</sup> Imâem myani Jesus wâgâ tiuntudyze awylymo. Awylygue Jesusram taintuomo, tagâlâ itoem nhekadylymo. Aituo azagâ iguandyly Sicardâ nhakadyly.

<sup>41</sup> Mâkâ lelâlâ aguely tindatuomo, kurâ domodo nheinwândylymo Messiaslâ mâkâ awyly. <sup>42</sup> Pekodoam aguelymo:

— Mâkâ tainwânsê xina iwerâ, mânengatuyby wâgâ kulelâba olâ, xina lelâlâ nhenomedâdo tindatobyry wâgâ. Tutuze xina, idânârâ tainwânni modo emakeze âetyby awyly — kelymo.

### *Jesus pymâ emaryem tâwaneim imery kua nhetobyry*

<sup>43</sup> Târâ azagâ iguandylyakanibyryem, Jesus agâ Samaria eynynâba xina egasely. Galiléia yan-yam eagâlâ xina idâly. <sup>44</sup> “Deus itaumbypy egatuim tainwântuneba ety anano modoram kuru” kely ani Jesus. <sup>45</sup> Galileiaram xina saintuo olâ ani tonlo modo koendâ kehoem xina nhedaenkulymo. Jerusalémram tâtâzemo myani, Páscoa etyguezze. Tâensemô myani târâ Jesus anhetaymby modo. Awylygue koendâ nhedaenkulymo.

<sup>46</sup> Aituo mârâ âjidâpa Jesus âxiguely, xidadâ Canánra odopâdondly, Galiléia eynynon-roam, paru vinhuem tienehon-hombyryam. Tâlâ ani Cafarnaumdâ tâjikeim pymâ emary. Toenzepa myani imery ewânu.

**47** “Judeiadâpa Jesus naindâ; Galileiadâ iwerâ” kely tindatuo myani pymâ emary Canánra idâly Jesus agâagueze:

— Toenzepa ymery ewânu târâ Cafarnaumdâ. Yagâ wao inoro, kua mânhetoem — kely.

**48** Jesus aguely eyam:

— Adyesenry agânhedyly mâentuomo lelâ yeinwândylymo — kely.

**49** Tâwâneim nhunwym aguely:

— Iguezeseaji enra iegaseday. Iokobagâ inoro, iguely iraynâlâ! — kely.

**50** — Tadahulizeba ikâ. Ityam odopâgâ lelâ. Ipa, âmery kua nitai, niguewâpyra ise — kely Jesus.

Tâwâneim nhunwym Jesus tymery kua ienipyryem awyly nheinwândyly, eydâ iwague awyly umelâ. Aituo odopâdyly tâtyam. **51** Ânwa oze tâmary modo agâ oxiodyly. Aituo aguehonly:

— Âmery niguewâpyral — kelymo.

**52** Aituo adapâigueolymo:

— Âdara hora awyly umeka keankâ ymery koendâ idyly? — kely.

Aituo in-hogulymo:

— Kopaelâgâ, kogoneyam tokalâ hora awyly umelâ keankâ iaturu inmoly — kelymo.

**53** Aituo iamudo nhunwym mâtâ kogonekâlâ Jesus “Âmery kua nitai. Niguewâpyra ise” kehobyry nhenanâguely. Aituo Jesus einwânniem idyly, idânârâ ety odano modo lâpylâ warâ.

**54** Judéia yan-yam tâtâly iraynâ adyesenry aiemâlâ Jesus Canâdâ paru vinhuem tyenehonze. Galiléia yan-yam odopâdondybyem, azagâ adyesenry anhedyly idyly ani Canâdâ, pymâ emary imery kua nhedyly.

## 5

### *Jesus uguondo adakobâdânry kua nhetobyry*

**1** Pymâ emary imery kua ienipyryem Jesus idâly Jerusalémram, âtyam. **2** Jerusalémdâ, Ovelha Modo Iwyantary keho iwaguepa tâlâ mawânrâ paru etary. Hebraikuem, “Betezata” mâtâ paru etary ezedy. Cinco lelâ varanda modo, târâ mawânkâ tâwânnueim modo emynru eguetunu warâ. **3** Mâtâ âjiam Jesus idâday, toenzepa tâwânnueim modo onwâgâ awyly: epy modo, nadakobâbyra ityby modo, tywykelâ iazeypy modo warâ. [Paru sahugânily inwânwândylymo. **4** Anju Deus ingonotyby mawânkâ mykâinane tytâguyze mâtâ paru sahugâni. Anju anhepygue duo mawânkâ tâwânnueim modo ihuguely; paikaji waunroem ihugueybylâ olâ kua ini.]\* **5** Tâlâ ani iduaymo uguondo iweâpa tâwâneim; trinta e oito anu myani mâtâ ewânu; nadakobâbyra awyly. **6** Eguetudybyem awyly ume Jesus nhedyly. Iweâpa arâ ewânu awyly nhutuly. Aituo eyam aguely:

— Kua midyse âmâ? — kely.

**7** Uguondo in-hoguly:

— Ânguy paikaji yeni peba adahugâni duo. Iegawândyse wâne urâ, eagonro tâwâneim olâ inanry uwakadâ lelâ — kely.

**8** Jesus aguely eyam:

— Aukâ. XYDYK ikâ. Iguetudobyry sanâkâ. Idâ ityam tadakobâze — kely.

**9** Ilâ umelâ kehoem, uguondo kua idyly Jesus eon-honrugue. Tâguetudobyry nhanâdyly, adakobâdyly. Sâbado oday ani awârâ aidyly, kokobyzegueho âdaunloenlâ kydâsewanilo keba ume. **10** Judeu domodo iwymâry ewy mâtâ uguondo tâguetudobyry nhanâdyly nhedylymo. Awylygue eyam aguelymo:

\* **5:4** Idânârâ livru saguho modo wâgâ iwenibyemba xirâ.

— Kokobyzegueho iwerâ. Kâzewenry ara inkâba awârâ amidyly, âdy aieto mâkeba iwerâ awârâ iguetudobyry kadadâ — kelymo.

<sup>11</sup> Aituo aguely:

— Uguondo kua yenipyry agueanry: “Iguetudobyry sanâkâ. Idâ ityam tadakobâze” keanry — kely.

<sup>12</sup> — Ânguya enra arâ amitoem agueim? — kelymo eyam.

<sup>13</sup> Kua tyenipyry ezedy nutuba olâ mâtâ uguondo, tonlo modo duaylâ Jesus idâypyem awylygue.

<sup>14</sup> Ilâpygueduo Jesus kua tientyby nhedyly Deus etydâ. Aguely eyam:

— Auguely wao idakâ. Kua itybyem âmâ. Deus izepa ato kulâne akâiedâ, arâ matobyry takaze kehoem amipyra mitoem — kely.

<sup>15</sup> Jesus aguepygueduolâ mâtâ uguondo târâpa âxiguelly. Kua tyenipyry wâgâ agueze idâly judeu domodo iwymâryam. <sup>16</sup> Jesus nhewiâsedylymo nhenuagaendylymo warâmo myani, tâzekobyzegueho oday kua nhedyly awylygue. Awylygue eynynâ inakanhe aguelymo:

<sup>17</sup> Jesus aguely eyam:

— Kopaelâgâembaba Pabai âsewanily; ara lâpylâ iewanu kâempagunâbyra wawyly — kely.

<sup>18</sup> “Pabai uguelho” Jesus keduo, Deuslâ agueho awyly tutuzemo ani. Awylygue toenzepa iewiâpadylymo, âdara tyânlly awyly wâgâ âseinwândylymo, tâzekobyzegueho oday kua nhetobyry wâgâ kulelâba, Deus “Pabai uguelho” kehoburry wâgâ lâpylâ. Arâ adâkeduo, Deus agâ âzekiba tawyly mawânkâ Jesus aguelho.

### *Deus imery idânârâ anhedyly, Deuslâ anhetoem agueim awylygue*

<sup>19</sup> Jesus aguely:

— Deus imery lelâlâ wâne urâ, won-honrugueba olâ âdydo imeom agânhedyly. Pabailâ agânhetoem agueim. Pabai anhedyly kâenkyly lelâ agânhekyly. Mâtâ anhekly, adye se urâ, imery wawylygue. Xirâ mâtundudyzemo kuru wato. <sup>20</sup> Imery wawylygue, toenzepa Pabai ywynedyly. Awylygue idânârâ adienkyly modo nhenehonly. Agânhetyby modo tâense âmaemo. Pabai yam nhenehonly aiese olâ urâ, mâtâ iwâkuru kuru. Mâtâ agânhetuo, âsewanize lelâlâ âmaemo. <sup>21</sup> Iguewâtyby modo, kurâem tyetonze Pabai. Turâ xurâ modo aunloenlâ tagâ tyenehonze mâtâ. Pabai anheto aralâ agânhedyly. Aituo ise aunloenlâ Deus agâ kânhenehonly, mâtâ eagâ kânhenehondyze wato lelâ. <sup>22</sup> Xypyry etay Pabai mâtâba ise ânguy tâmakezeim, tâmakezenry warâ awyly agueim. Aunloenlâ eagâ ini modo kâinduakehoem, âji tâdâsenagazedoam idâwâni modo kâinduakehoem warâ agueypyenlâ mâtâ. <sup>23</sup> Arâ Pabai agânhetoem aguely, idânârâ yrendylymo mawânkâ ize ato, mâtâ mâyntrentomo ara lâpylâ. Yrempyra âmaemo-ro watay, Pabai ugononibyry mâyntrentaymba lâpylâ âmaemo — kely.

<sup>24</sup> Jesus aguely:

— Auguely indadyly, ugononibyry nheinwândyly waunlo âdaunloenlâ Deus agâpa tyetuneba ise. Iguey-ro watay, aunloenlâ ise Deus agâ awylymo. Adalâ âji tâdâsenagazedoam nâtâwâbyramo ise. Xirâ mâtundudyzemo kuru wato. <sup>25</sup> Idataungâ auguely. Anri adaguly, Deus eynynâbaom modo augueho indato. Deus xurâempa awylymogue, igueypy aramo kulâ. Auguely indadylymo, yeinwândylymo warâ watay olâ, igueypyem, kurâem itondyby aramo ise. <sup>26</sup> Adaunloenlâ Deus agâpa tyetunebamo ise, iguely iraynâ, igueduo alelâ, ton-honre mawânkâ Pabai awârâ adientoem. Ynynonro modo Deus agâpa kânhenehomba witoem aguewâm lâpylâ. <sup>27</sup> “Uguondo Kaynâpa Âetyby mawylygue, auguely âyam, âynynonro modo xurâem koendonro lelâ mâtunduhoem; âynynonro keba modo pylâ ise mânagazenehonly-ro” kewâm.

<sup>28</sup> — Xirâ âyanmo augueho wâgâ tâseguâdâzeba itaungâ. Anri saindyly, idânârâ iguewâtyby modo ytaumbyry indato. <sup>29</sup> Kurâem itonzemo. Âji tâpyâdomobyrydâpa

âzepyâguezemo, egasezemo-ro warâ. Deus ize ato aienibyry modo aunloenlâ ise Deus agâ awylymo, âdaunloenlâ eagâpa tyeseba itomoem. Deus izepa ato aienibyry modo olâ âzewentâozemo. Âjigonohonzemo âji tâdâsenagazedoam, aunloenlâ târâ itomoem – kely Jesus.

### *Deus Ingonytyby tawyly wâgâ Jesus aguehobyry*

<sup>30</sup> Jesus aguely:

— Unâry wâgâ kulâ inkâba idânârâ agânhekyly modo agânhedyly. Deus aguehobyrylâ agânhekyly. Yeinwântaynrim modoram koendonro lelâ ise kâunduly; yeinwântâny modo pylâ kâenagazenehonly-ro warâ. Pabai aguehobyry lelâ mawânrâ agânhekyly. Ize wato kulâ mâkeba agânhekyly, mâkâ ugomonibyry ize atolâ.

<sup>31</sup> — Ywâgâlâ auguely-ro watay, “Deus ingonotyby urâ” ugueduo, auguehobyry âdyem nitaymba, âkealâ keim kepa watay. <sup>32</sup> Tâlâ ynynâ agueim, Deus, Pabai ugueho. Ânguy wawyly tutuze mâkâ. Ywâgâ agueho âkealâ awyly tutuze urâ-ro warâ. <sup>33</sup> Ânguy wawyly mâuntuhomoem, João Batista tapâiguen-honze ani âmaemo. Âkealâ ani mâkâ ywâgâ aguely. <sup>34</sup> Ywâgâ aguenriem ânguygue kâtuiwâbyra urâ, ânguyem wawyly mâuntuhomoem. Arâlâ olâ ynynâ João aguehobyry âyanmo kâenanâguehonly. Aguehobyry mâinwândylymo, yeinwândylymo-ro warâ watay, âzemakeoze lelâ âmaemo.

<sup>35</sup> — Lamparina koendâ kehoem tyatygueim wâne, kytâho nhesagonly, myara ani João aguehobyry mâuntulymo âdara Deus ezaxi tâdâtâly wâgâ. Mâkâ aguehobyry mâindatuomo omazemo. <sup>36</sup> Âdiempa mutumo ywâgâ. Iwerâma adyesenry kehoem agânhedyly tâense âmaemo, âkealâ kuru Deus Ingonytyby wawyly mâuntuhomoem. Pabai Deus adyesenry modo kehoem agânhetoem anygue. Mâentuomo, xutuze âmaemo, Ingonytybylâ wawyly. <sup>37</sup> Pabai ywâgâ adâkeze lâpylâ, mâkâlâ ugononi awylygue. Agueho mâindadyseba olâ âmaemo, nhutuen-honly mâuntudyzebamo warâ. Âdykâ mâkâ itanru mâindapyra, emydy mâempyra warâ olâ âmaemo. <sup>38</sup> Ywâgâ Pabai aguehobyry mâinwândylymo-ro watay, yeinwântâ tâise âmaemo. Yeinwâmpyra, ywâgâ Pabai agueho mâinwâmpyra warâ olâ âmaemo. <sup>39</sup> Âdara mâsemaguelymo awyly mâuntudyze mawylymogue, Deus itaumbyry awo wâgâ iweniby mâintainlymo. Mâsenomedâdylymo, âdara aunloenlâ Deus agâ tâjidyl kyigueduo awyly mâuntuhomoem wâne. Iweniby modolâ ywâgâ âkealâ agueim, ywâgâ lelâ mawânrâ Deus eydâ atoam tâdâtâly. <sup>40</sup> Aralâ olâ, yeinwândyseba mawylymo, aunloenlâ Deus agâ mitomoem.

<sup>41</sup> — Koendâ wawyly wâgâ, won-honru wâgâ warâ kurâdo aguepa awylygue kâseguâdâdaymba urâ. <sup>42</sup> Koendâ âutudâmo urâ, angahumo oday âunârymo alelâ. Deus izetonro ara midylymo kulâ awyly, tutuze urâ. <sup>43</sup> Pabai ugueho ingonotybyenlâ xirâ kâewyly, yizepa, yeinwândyseba warâ olâ âmaemo. Pabai ingonotybyemba âeni watay olâ âmaemo tâinwâns. <sup>44</sup> Ataen-homo âwâgâmo koendâ aguely ize matomo. Deus tokaleom âwâgâmo koendâ aguehoem, koendâ lelâ amidylymo mipyra olâ âmaemo. Awylygue mawânrâ nudupa awyly yeinwântomoem. <sup>45</sup> Kâzewenry Moisés inwenihoem Deus aguehobyry mâinwânklymo. Awylygue, “Aunloenlâ Deus agâ tâitoem idâze xina” myguelymo. Xypyry etay, idânârâ kurâ domodo Pabai enado âepanâgueduo, urâ keba ise agueim, Moiséslâ ise agueim: “Deus neinwâmpyra atomobyry wâgâ assaemo ise tâwentâzeim” kerim. <sup>46</sup> Ywâgâlâ myakâwândy Moisés inwenily urâ Deus Ingonytyby wâgâ. Moisés inweniby tâinwâns lelâlâ âmaemo-ro watay, yeinwântâ lâpylâ tâise âmaemo. <sup>47</sup> Inweniby mâinwâmpyra mawylymogue, augueho mâinwâmpyra mawylymo – kely Jesus.

## 6

*Jesus cinco mil uguondo modo cinco pão, azagâ kanra âjihuyby warâgue nhuantobyry  
(Mt 14.13-21; Mc 6.30-44; Lc 9.10-17)*

<sup>1</sup> Arâagueypyem, Jesus Galiléia iwalu nhekuâdyly pepi oday; Tiberíades kelygue tâzekeim lâpylâ mâtâ paru. Eagâlâ ani xina. <sup>2</sup> Târâ Jesus awyly tiuntuduomo, agui kurâ domodo myarâ idâly, toenzepa tâwânuneim modo kua nhedyly tientomobyry wâgâ. Adyesenry anhedyly tientondyzé tawylymogue, nhapygue idâlymo. <sup>3</sup> Jesus âkuly iwy onwa xina agâ. Târâ xina ekadyly. <sup>4</sup> Páscoa etyguedo iwaguepa idyly ani. <sup>5</sup> Jesus wayam wayam warâ MYK idyly. Tyampygue toenzepa kurâ domodo iwy onwa âkuly nhedyly. Aituo Filiperam aguely:

— Âdykâ kaise pyni kianâdyly merâ kurâ domodo ipyniryem? — kely.

<sup>6</sup> Kurâdo quantoem âdy adienkyly awyly tutuzelâ olâ myani Jesus-ro warâ. Âdara Filipe in-hoguly awyly tiuntuhoem kulâ arâ aguely.

<sup>7</sup> Aituo Filipe in-hoguly:

— Duzentas moedas pratagueto tainze tâise kurâ, pyni sanâtoem, mâtâem, mâtâem warâ pão epajiwâdoem, tydineruguepa kurâ — kely.

(Tokalâ iguandyly âwanopyry epywado mawânrâ tokalâ moeda pratagueto.)

<sup>8</sup> Aituo Simão Pedro iukono André idâly Jesus agâ aguezé.

<sup>9</sup> — Tâlâ tarâ iamudo cinco pão cevadagueto, azagâ kanra âjihuyby warâpeom. Nudupa olâ ise toenzepa kurâ domodo xuatoem — kely.

<sup>10</sup> Aituo aguely Jesus xinaram:

— Âji iwâkurudâ ekadomoem aguewâtaungâ — kely.

Poji wâgâ ekadomoem âji iwâkurube ani târâ. Aituo idânârâ ekadaynlymo. Toenzepa târâ kurâdo awyly, uguondo modo kulelâ cinco mil lelâ. <sup>11</sup> Aituo Jesus cinco pão sanânybyryem, Deus agâ aguely:

— Koendonro lelâlâ âmâ, Pabai; awylygue xinaem xirâ pão mâtunduly — kely.

Arâagueypyem, pão nhepajiwâdyly; xina nhepâdoem nhuduly. Xina nhepâdaynly umelâ kehoem Jesus pão epajiwâdyby agui nhenehonly. Ilâpygueduo, Jesus azagâ kanra âjihuyby nhanâdyly, Deus agâ aguely:

— Koendonro lelâlâ âmâ, Pabai; awylygue xinaem merâ kanra mâtunduly — kely.

Arâagueypyem, kanra nhepajiwâdyly, xina nhepâdoem nhuduly. Xina nhepâdaynly umelâ kehoem, kanra agui nhenehonly. <sup>12</sup> Ize tato ara kehoem idânârâ kurâdo âwinduadyly. Kanra âjihuyby nhâdylymo; pão nhedawynlymo; koendâ kehoem iolataynlymo warâ. Koendâ kehoem âwinduapygueduo, xinaram aguely:

— Âsegubydâdyby modo saunkuwâdaungâ, nâxiumebyra itoem — kely.

<sup>13</sup> Ilâpyryem pão, kanra âjihuyby warâ âsegubydâdyby xina nhetadâdyly. Doze cestu tumyke lelâ xina nhekanâdyly.

<sup>14</sup> Awârâ adyesenry Jesus anhedyly enipyry modo aguelymo:

— Âkealâ mynra, Deus itaumbypyry egatuim kinwânwâkylyâ mynra merâ. Roma donro takaze kehoem merâ kywymâryem kyjiene! — kelymo.

<sup>15</sup> Tywymâryem tyese kelymo tiuntuduomo, mâtâ kulelâ târâpa âxiguelly, eagonro âjiam idâly. Pymâ onro anano keba tawyly, tutuze mawânkâ.

*Jesus paru wâgâ adakobâdobyry*

*(Mt 14.22-33; Mc 6.45-52)*

<sup>16</sup> Iguandyly ume, târâ Jesus cinco pão, azagâ kanra warâgue kurâ domodo nhuantobyrydâpa xina xytâguyl. Galiléia iwaluam xina idâly. <sup>17</sup> Jesus xina agâ nâepyra. Pepi odaxi xina âxiedly, paru tienkuâdoem, xidadâ Cafarnaumram tâtâhoem. Xina idâzesedly umelâ, iamadyly. <sup>18</sup> Tahuleim kulâ adapezeinly ton-honre kehoem xina yan-yam;

toenzepa kehoem paru adahugânily. <sup>19</sup> Sagunudâpa âxiguebyem, cinco, seis kilômetros awârâem xina awyly ume, paru wâgâ Jesus adakobâdyly xina nhedyly. Xina iwepiry iwaguepa saindyly. Jesus paru wâgâ adakobâdyly tientuo, toenzepa xina âseanedly.

<sup>20</sup> Warâ olâ Jesus aguely xinaram:

— Tâseanezeba itaungâ! Jesuslâ urâ! — kely.

<sup>21</sup> Aituo Jesus pepi odaji âxiedyly. Toenzepa xina iomazely, mâkâ tagâ awylygue. Inepa xina saindyly eyam tâtâhoam.

### *Kurâdo Jesus nhuin-hobyry*

<sup>22</sup> Emetybyem, Jesus tuizemo myakâwâm târâ paru emelay, xina pepi odaxi âxiedobyrydâ.

— Âdykâ Jesus? — kelymo.

— Tokalâ kulâ keankâ pepi taunlo. Jesus olâ keankâ iodaxi nâxiebyra. Eynynonro modo lelâ keankâ âxieni. Mâkâ pebalâ keankâ idâlymo. Iwerâ olâ tarâpa — kelymo.

<sup>23</sup> Aguelymo ume, xidadâ Tiberíadesdâpa âetyby modo paru nhekuâdylymo. Tywepiry odajpa âzetywâdylymo, Jesus kurâ domodo tuantoem, “Koendonro lelâlâ âmâ, awylygue xina ipyniry mâunduly” kehobyry iwaguepa. Xuize idâwânmomy, nepyramo olâ myakâwâm.

<sup>24</sup> Jesus, xinalâ warâ târâpa awyly tientuomo, Tiberíadesdâpa âetaymby modo tywepiry odaji âxiedaynlymo, paru tienkuâdoem. Cafarnaum iduantaji saintybyem xuize idâlymo.

### *Jesus ize kydawyly, pyni kyiguepa kitoem ize kydato ara*

<sup>25</sup> Paru ekuânbiryem, Cafarnaumram saintybyem, Jesus agâ oxiodylymo. Eyam aguelymo:

— Âmâ enra xina nhuinly, Jesus. Âdaraka xarâ aindyly? — kelymo.

<sup>26</sup> — Kopaelâgâ pâogue âwatomobyry wâgâ kulâ uilymo, âdaituo adyesenry modo kehoem agânhedyly awyly mâuntuhomoem inkâba. Pão agui kânhenehonly medâmo lelâlâ wâne, adâituo agânhedyly awyly mâuntuba olâ âmaemo. <sup>27</sup> Pyni inepa adainrim, inakanhe ini warâ wâgâ inkâba âpaunzedaungâ. Tâlâ ise pyni emyenro âmaemoem, âdaunloenlâ inakanhe itânry. Emakewâni modo aunloenlâ Deus agâpa tyetuneba ise. Igueduo, aunloenlâ eagâ tâitoem eyam idâzemo. Âzeon-hondâdaungâ, xirâ augueho tâlâ mitomoem. Urâ, Uguondo Kaynâpa Âetyby kelygue tâzekeim, xuduze urâ âyanmo, yeinwândylymo-ro watay. Awârâ agânhetoem kâewly awyly nutuen-ho Pabai Deus — kely Jesus.

<sup>28</sup> Aituo Jesus nhapâiguelymo:

— Âdyka Deus xina anhedyse ato awârâ amyguehobyry xina nhemakehoem, awârâ pyni emyenro? — kelymo.

<sup>29</sup> Aituo Jesus in-hoguly:

— Âdaunlo âwanu mâkeba ise amânhekylymo. Yeinwândylymo kulâ Deus ize ato, urâ mâkâ ingonotyby — kely.

<sup>30</sup> — Adyesenry pylâ aiekâ, Messiaslâ mawyly, xina nheinwântoem. Âdyka ise amânhekyly, Deus Ingonotyby mawyly mânehon-hoem? <sup>31</sup> Iweâpa kydamudo Egitudâba egaseday, âji âdy peba ato einkâ adakobâdaymo, maná myakâwândy ipynirymo. Iwenibyem Deus itaumbypy awo wâgâ: “Pão kaynâpa eyanmo ingonokyly nhedawynhomoem” — kelymo Jesusram.

<sup>32</sup> Aituo Jesus aguely:

— Kaynâpa Deus ingonotyby maná kehogue, kydamudo xuamâmy Moisés. Pabai Deus lelâ mawânkâ pyni kuolanâni emyenro xudunri. Xirâ mâuntudyzemo kuru wato. <sup>33</sup> Deus, kydamudo tâwindygue niguepa itoem maná kau odajpa tingonotobyry, ara lâpylâ mâkâ ugonodyly xarâ onro anaxi. Pyni ize kurâ kyiguepa kitoem, arâ lâpylâ yeinwântaungâ, aunloenlâ Deus agâ mitomoem, âdaunloenlâ eagâpa mipyra mitomoem — kely.

<sup>34</sup> — Pymâ, aunlolâ awârâ amygueho xinaram xudugâ, awârâ pyni mygueho – kelymo.

<sup>35</sup> — Urâlâ mawânrâ mâtâ pyni emyenro. Urâlâ ise yeinwânni modo aunloenlâ Deus agâ ienehonri, eagâpa ienehondânry warâ. Ynynonro modo nâsewinzedondaymba natuandondaymba warâ ise. <sup>36</sup> Deus eon-honrugue agânhekyly mâtendylymo umelâ olâ auguehobyry mâtinwândyseba mawylymo. <sup>37</sup> Idânârâ yeinwânniem Pabai ize ato modo, urâ xurâ lelâ. “Yam âetaungâ, aunloenlâ yagâ mitomoem” warâ auguely yeinwândyedo modoram. Yam âetaymby modo âdaunloenlâ izepa witaymba urâ.

<sup>38</sup> — Deusdâpa ani kâewyly, ize ato agânhetoem, ize wato aiese inkâba. <sup>39</sup> Pabai koendâ yeinwântaynrim modo kâendyse awyly. Ynynonro modo tydâpa iedyly ize inkâba mâkâ. Xypyry etay, ynynonro modo kurâem kânhetondyzé mâkâ, aunloenlâ eagâ itomoem. <sup>40</sup> Pabai ize ato mawânrâ idânârâ tymery einwânni modo, aunloenlâ eagâ awyly, eagâpa nipyra. Aguehobyry awylygue ise xypyry etay kurâem kânhetondylymo – kely Jesus.

<sup>41</sup> Judeu domodo ewy nehoguebyra Jesus tywâgâlâ auguely: “Urâlâ Deus tydâpa ingonotyby pyni emyenro” kehobyry. <sup>42</sup> Aituo aguelymo:

— José imery kulâ awâkâ Jesus. Nhunwym, ise warâ tutuze kurâ. Alâ “Deusdâpa kâewyly” kely. Kewâdyly kulâ awâkâ. Nuduwâpyra awâkâ Deusdâpa âetoem! – kelymo.

<sup>43</sup> Jesus aguely eyanmo:

— Inakanhe kulâ amyguelymo imowâdaungâ. <sup>44</sup> Âwâlâ kulâ ânguy yeinwântaymba, Pabai ugononibyry yeinwântomoem aniempyra watay. Pabai ugononibyry mawânkâ kurâdo yeinwântoem aienehoim. Xypyry etay olâ kurâem itondomoem aienehonze urâ. <sup>45</sup> Saguhoem Deus itaumbyry aguewâni modo ewy warâ akâwândy inwenily: “Idânârâ ise Deusram âzenomedâolymo, âdara einwândyly awyly wâgâ.” Idânârâ Pabai nhénomedâdo idani modo, tyangahu odaji ieni modo warâ yeinwâñsemo. <sup>46</sup> Ânguy xirâ anano modo Pabai uegueho netaymba. Urâ lelâ mâkâ eni. Eydâlâma kâewyly.

<sup>47</sup> — Idataungâ auguely. Yeinwântaynrim modo Deus agâpa nitaymbamo ise. Igueduo, Deusram idâzemo, aunloenlâ eagâ itomoem. <sup>48</sup> Pyni emyenro urâ. Urâlâ ise yeinwântaynrim modo aunloenlâ Deus agâ ienehoim. <sup>49</sup> Âji âdy peba ato einkâ tadakobâdyly ume maná myakâwândy kydamudo ipyniry. Manâgue âduahonwâñmo lelâlâ wâne, iguewâñmo olâ. <sup>50</sup> Deusdâ âetyby einwânni modo, iguezemo lelâlâ wâne, nadaimpamo olâ ise. Idâzemo aunloenlâ Deus agâ tâitomoem. Pyni emyenro mawânkâ Deus Ingonytby. <sup>51</sup> Pyni emyenrolâ urâ on-hondâzemo Deus ingonotyby. Yeinwântaynrim modo Deus agâpa tyetuneba ise. Iguelymo-ro watay, idâzemo Deusram, aunloenlâ eagâ tâitomoem. Yiguely ise, ynynonro modo aunloenlâ Deus agâ itomoem. Ynynonro modo eon-hondâniem, wodo pylâ ipynirymo-ro waunlo ara ise – kely Jesus.

<sup>52</sup> Aituo idanipyry modo âjigue aguelymo:

— Kypyniryem nitaymba ise awâkâ sodo! – kelymo.

<sup>53</sup> Jesus aguely eyanmo:

— Wodo mâtopyra âmaemo, unu mâténypa âmaemo warâ-ro watay, aunloenlâ Deus agâ mitaymba ise âmaemo. <sup>54</sup> Wodo sâni, unu enyim warâ olâ aunloenlâ ise Deus agâ awylymo, eagâpa tyesebamo. Xypyry etay ise kurâem âiehondylymo-ro warâ. Xirâ mâtuntudyzemo kuru wato – kely.

<sup>55</sup> Jesus aguely:

— Pyni lelâlâ wodo, tânyzeim lelâlâ unu warâ. <sup>56</sup> Wodo sâni, unu enyim warâ watay, aunloenlâ ise yagâ awyly. Eagâlâ ise urâ; yagâlâ ise warâ. <sup>57</sup> Pabai ugononibyry igueypyem inkâba; aunlolâ mâkâ tâlâ awyly. Eagâ wawylygue, kadainwâpyra ise urâ; tâlâ lelâ. Wodo sâni modo lâpylâ yagâpa nipyramo, nadainwâpyramo warâ ise, tâlâ lelâ. Iguelymo-ro watay, eydâ watoam idâzemo, aunloenlâ yagâ tâitomoem. <sup>58</sup> Waunlo urâ pyni emyenro Deus eydâ atodâ igonotyby. Kydamudo ipynirybyry maná emyenro keba urâ. Maná tâinzemo lelâlâ wâne myakâwândy kydamudo, iguewâñm olâ. Deus ezaypa

xytâguybylâ urâ. Wodo sâni, unu enyim warâ yagâpa nâiehowâbyramo ise. Tyigueduo, idâzemo aunloenlâ Deus agâ tâitomoem – kely Jesus.

<sup>59</sup> Cafarnaumdâ Jesus xirâ modo aguely, âtâ tâdâtâdyguyho oday tienomedâdylymo ume.

### *Jesus mawânkâ aunlolâ Deus agâ kyenehoim*

<sup>60</sup> Awârâ tindatuo, Jesus nhapygueni modo ewy aguelymo:

— Arâ agueduo kiuntuwâbyra kurâ âdakeze aguely awyly. Kieinwântoem nuduwâpyra awârâ! — kelymo.

<sup>61</sup> Akaemo agueho ânguy negatuba lelâlâ wâne Jesusram, tonomedâdomo izepa awylymo tutuze olâ Jesus. Awylygue eyanmo aguely:

— Iwerâ yeinwântaymba âmaemo, augueho mâindadyseba midylymo warâ. <sup>62</sup> Âdaise wânkâ âmaemo, eydâ watobyryanlâ kâkuly mâentuomo? <sup>63</sup> Deus Ispiritury wâgâ mawânkâ ynynonro modo yeinwândylymo, âdalâ yagâpa nâiehoba tâitomoem. Igueduomo, Deus ezaxi idâze awylymo tutuen-honze Deus Ispiritury. Ânguy tâwâlâ kulâ âsemagueim lâpeba; ânguy tâwâlâ anientaymba Deus eydâ atoam tâtâhoem. Auguehobyry einwânni, aieni modo warâ agâlâ mawânkâ Deus Ispiritury. Deus Ispiritury agueduo lelâ akaemo âzemakeoly, aunloenlâ Deus agâ tâitoem tyigueduo. <sup>64</sup> Alâ olâ âmaemo ewy yeinwâmpyra mawylymo — kely.

Tâinwâmpyramo awyly wâgâ Jesus aguewâm, tutuzelâ mawânkâ akaemo ewy tainwâmpyra awyly. Ânguy tâgameim awyly xutuwâm lâpylâ.

<sup>65</sup> Jesus aguely:

— Âmaemo idânârâ inkâba yeinwândylymo. Awylygue âyanmo auguely. Pabai, yeinwântoem aguehobyry modo lelâ yeinwânni — kely.

<sup>66</sup> Awârâ tindatuo, Jesus aguely idase nhapygueni modo ewy agui eagâpa tâisemo ani.

<sup>67</sup> Aituo Jesus xina nhapâiguely:

— Âmaemo-ro? Mydâdyse lâpylâ âmaemo? — kely.

<sup>68</sup> Simão Pedro in-hoguly:

— Agâpa tâidyse inkâba xina, Jesus. Âmâ lelâ âdara aunloenlâ Deus agâ xina idyly awyly wâgâ enomedâni, âdalâ eagâpa xina nipyra itoem. <sup>69</sup> Âmâ lelâ xina nheinwânyly. Deus Ingonyby mawyly, tutuze xina — kely.

<sup>70</sup> Jesus aguely:

— Kâinduakeby âmaemo, doze lelâ. Tokalâ âmaemo ewy olâ Diabu emary — kely.

<sup>71</sup> Judas wâgâ Jesus aguely, Simão Queriote donro imery. Jesus eynynonro lelâlâ wâne Judas, arâlâ olâ izepanro modo emaxi Jesus nhegamely nhâhomoem.

## 7

### *Jesus, iukonodo warâ*

<sup>1</sup> Arâ adâkely ewanikeimbyryem, Galiléia eynynâ Jesus adakobâdyly. Judéia eynynâ nadakobâbyra awyly, tonlo pymâ domodo mawânkâ tyândyse. <sup>2</sup> Âty Âtâ Wakurigueto etyguedo iwaguepa ani, kydamudo âji âdy peba ato einkâ adakobâdaymo, âtâ wakurigueto oday kulâ xykyhomobyry enanâgueho. <sup>3</sup> Aituo Jesus iukonodo eyam aguelymo:

— Tarâpa ikâ. Judeiaram idâ, xidadâ Jerusalémram, Judeiadâ matay ampyguenibyry modo amânhokyly nhetomoem. <sup>4</sup> Mâkâ kurâ tâdutuodyze donro, adienkyly noentaymba, kurâ domodoram tâzehohoem. Aunlolâ inanry adyesenry kehoem amânhedyly; kurâ domodo enanaym pylâ aiekâ — kelymo.

Âwankuem tiendylymogue kulâ, arâ aguelymo. <sup>5</sup> Iukonodo lelâlâ wâne, Jesus Messiaslâ awyly neinwâmpyramo olâ.

<sup>6</sup> Jesus aguely:

— Âtyam udâho oday inkâba awârâ. Âmaemo olâ âdalâ mydâlymo. <sup>7</sup> Yeinwântânry modo âizemo lelâ, urâ olâ yizepamo. Anhekylymo inakai wâgâ auguelogyue, yizepa awylymo.

<sup>8</sup> Âmaemolâ âtyam idâwâtaungâ. “Idâ” mygueduomo kulâ inkâba ise âtyam udâly; Pabai ugonotuo ise udâly — kely.

<sup>9</sup> Arâ adâkebygueduo, Galileiadâlâ wao Jesus iweâpa kuba olâ târâ awyly.

### *Jesus âtâ wakuriguento etyryam idâhobyry*

<sup>10</sup> Âtyam tukonodo idâpygueduo, Jesus idâwâm lâpylâ. Tutuzebalâ idâly, kurâdo nutubalâ. <sup>11</sup> Judeu domodo iwymâry âtydâ nhuinlymo. Tonlo modo nhapâiguelymo:

— Âdykâ Jesus? — kelymo.

<sup>12</sup> Toenzepa iwâgâ aguewâni modo. Aguelymo:

— Koendonro lelâlâ mâkâ — keim.

Tâlâ,

— Koendonro mâkeba mâkâ, konokuni kulâ — kewâni modo warâ.

<sup>13</sup> Tutuzenryenlâ Jesus wâgâ aguelymo, pymâdo indadyseba tawylymogue. Jesus wâgâ adâkeduo, tânagazedyly tyntadylymogue.

<sup>14</sup> Âty quattro iguandyly sakadybyem awyly ume, Jesus idâly Deus etyam. Târâ taseray âtâdyguyby modo nhenomedâdy. <sup>15</sup> Pymâdo Jesus aguely tindatuo âsewânilymo; warâ aguelymo:

— Kydâsenomedâdobryy ara nâsenomedâdaymba awâkâ, toenzepa olâ enomegu! Âdaraka awâkâ enomegu? — kelymo.

<sup>16</sup> Aituo Jesus in-hoguly:

— Unârygue kulâ inkâba xirâ kâenomedâdylymo. Deus ugononibryy, “Aguekâ” kehobyrylâ, augueho. <sup>17</sup> Pabai ize ato aieni modo xutuzemo Deus “Aguekâ” kehobyryy augueho awyly; yangahu oday unâry kulâ mâkeba augueho awyly. <sup>18</sup> Tunâry tyangahu odano kulâ tagonroam egatuim tonomery wâgâ koendâ adâkehon-hoem kulâ aguely. Aunlo mâkeba olâ urâ. Unâ egatuim konokuni keba watay, tunâry kulâ mâkeba agueho, tugononibryy aguehobyrylâ. Tugononibryy mâkâ ehoguedyze ato, mâkâ mâkeba. Unâ egatuin-em Deus ingonotyby urâ. <sup>19</sup> Moisés myakâwândy Deus aguiendyse ato kâzewenry iweninri. Âmaemo olâ kâzewenry agueho mânwâmpyramo. Yâze myguelymo, âdawipyralâ — kely.

<sup>20</sup> Kurâ domodo aguely:

— Tuândy kulâ âmâ! Diabu agonro keanra âmâ, arâ amyguehoem! Ânguy âze kewâpyra — kelymo:

<sup>21</sup> — Iweâ kulâ keankâ adyesenry agânhedly. Tâwâneim kua kânhedly. Tâzekobyzegueho oday agânhedly awylygue mâseguâdâdâmo, yagâ âewiâpadâmo-ro warâ. <sup>22</sup> Deus aguiendyse ato kâzewenryem saguhoenlâ Moisés iweniwâm. Warâ tâzezewenry wâgâ iwenibyem awyly: “Iamudo iwelo egaseyby tokalâ semana ipygueduo ilery ety iopiry satâwâdaungâ, Judeu tawyly nhenehon-hoem” kely. Moisés agâ inkâba kâzewenry tâjilery ety iopiry satâly adaguly, kydamudo agâlâ. Iamudo tokalâ semana ipygueduo, kâzewenry agueho arâ ilery ety iopiry mantâlymo, tâzekobyzegueho umelâ. <sup>23</sup> Iamudo ilery iopiry ety tâzekobyzegueho odaylâ kehoem tatâze âmaemo watay, nhewentâdaundâ, tâzekobyzegueho odaylâ tâwâneim kua kânhedlygue. <sup>24</sup> Inakanhe aini mâtenuomo, inepa kâzewentâdaundâ. Âkealâ, âkealâba warâ awyly koendâ mâtunduomo lelâ ewentâdaungâ — kely.

### *“Messiaslâka awâkâ Jesus?” kurâdo kehobyry*

<sup>25</sup> Aituo târâ Jerusalémdâ aguelymo:

— Kywymârydo tyândyse atolâ awâkâ uguondo. <sup>26</sup> Etaungâ! Notoendaymba awâkâ. Tarâlâ idânârâam aguely. Ânguy etadâze kewâpyra. Kywymârydo nutumo keanra Deus Ingonotyby Messiaslâ awâkâ awyly. <sup>27</sup> Kurâem olâ awâkâ Messias keba. Tutuzema kurâ awâkâ âdykonlo awyly. Messias âewyly watay, MOK alelâ ise âepanâguely. Ânguy âdykonlo mâkâ awyly nutuwâbyra ise — kelymo.

<sup>28</sup> Deus ety idaseray tienomedâday, kaynâ kehoem Jesus aguely:

— Koendâ kehoem utudâ, âdykonlo wawyly tutuze warâ wâne âmaemo, inanajimo. Iozepa olâ arâ âunâgumo. Unâry wâgâ kulâ inkâba xirâ onro anaxi kâewyly; igoñotybyem tarâ wawyly. Kewâdyly kulâ nitaymba mâkâ ugónonibyry; tâinwâñseim lelâlâ mâkâ agueho. Mâuntuba olâ âmaemo. <sup>29</sup> Urâ olâ tutuze igoñotybyenlâ mawânrâ kâewyly — kely.

<sup>30</sup> Aguely tindatuo, sawâse kelymo. Ânguy olâ tâmary nhonwa niepyra, sawâto odayba awylygue. <sup>31</sup> Tonlo modo ewy agui Jesus tâinwâñsemo myakâwâm. Aguelymo:

— Messias âewyly-ro watay, adyesenry kehoem ise anhekyly, tâkezemo inanry. Awâkâ anhekyly takaze ânguy anientaymba. Arâ atayma Messiaslâ awâkâ-ro — kelymo.

### *Fariseu domodo guarda ingonotomobyry, Jesus nhawâtoem*

<sup>32</sup> Fariseu domodo, “Messiaslâ awâkâ Jesus” kely indadylymo. Aguely izepamô. Aituo kurâdo eynynâ Deus agâ aguewâni modo iwymârydo agâ aguelymo. Deus ety donro guarda modoram warâ aguelymo:

— Jesus sawâtaunda; enetaungâ xarâ-ro warâ — kelymo.

<sup>33</sup> Arâ âturudaymo, Jesus aguely tonlo modoram:

— Âdiempa kulâ ise agâmo wawyly. Inepa ise kodopâdyly mâkâ ugónonibyryanlâ.

<sup>34</sup> Uize âmaemo, iepyra olâ ise âmaemo, udâhoram mydâpa mawylymogue — kely.

<sup>35</sup> Aituo aguelymo:

— Âdyanka ise awâkâ idâly, kiempyra kitoem? Eagonro xidadâ modoam ise idâly, judeu keba modo ety anaxi enomedâzemo? — kelymo. <sup>36</sup> — Âdakezeka enra awâkâ aguely: “Uize âmaemo, iepyra olâ ise âmaemo” kely? Xina nutuba enra awârâ — kelymo.

### *“Yam âetaungâ, tatuanzeim paru enyze âeto ara” Jesus kehobyry*

<sup>37</sup> Âty xypyry tohoguezeim kuru ume Jesus saudyly. Kaynâ kehoem aguely:

— Yeinwântaungâ, âmaemo kâunduly mâenmakedyzê donro modo. Yam âetaungâ, tatuanzeim paru enyze âeto ara. <sup>38</sup> Xirâ Deus itaumbypyry awo wâgâ iweniby enanâguewâdaungâ: “Yeinwânni modo iweloem âiehozemo, âdaunloenlâ Deus agâpa nâiehoba itomoem. Paru sawedâny ara ise iodaymo eon-hondânimobe awyly aunlolâ” — kely.

<sup>39</sup> Deus Ispiritury tâinwântaynrim modoam igoñokyly wâgâ ani Jesus aguely. Xirâ modo ume Deus Ispiritury eyanmo tugonoseba ani, xirâ anaynlâ Jesus awylygue, Tunwym tynrenseim ezaxi nâtâba awylygue.

### *Jesus einwânni, einwântâny warâ*

<sup>40</sup> Aguely idanipyry modo aguelymo:

— Âkealâ, Deus eynynâ agueinlâ awâkâ uguondo. Messias kinwânwânylylâ awâkâ — kelymo.

<sup>41</sup> Einwântâny modo olâ aguelymo:

— Messias mâkeba awâkâ. Galileiadâ kulâ mawânkâ âewyly. Mârâ eynynâ inkâba ise Messias âewyly. <sup>42</sup> “Davi ipemugu ewy ise Messias” tâkeze myakâwândy Deus lelâlâ. Iazely ise Belêmdâ, Davi iazehobyrydâ. Arâ mawânrâ Deus itaumbypyry awo wâgâ iwenibyem awyly — kelymo.

Belémdâlâ iazeypy Jesus awyly nutuba tawylymogue, arâ aguelymo. <sup>43</sup> Jesus einwânni, einwântânry idylymo. <sup>44</sup> Ânguy olâ myakâwâm nawâpyra. Einwântânry modo ewy Jesus tianwâdysemo ani.

### *Judeu domodo iwymârydo Jesus neinwâmpyra atomobyry*

<sup>45</sup> Deus ety iguardary modo Jesus sawâse igonotyby modo odopâdylymo, fariseu domodo, kurâdo eynynâ Deus agâ aguewâni modo iwymârydo warâ eydâ atomoam. Aituo aguehonlymo:

— Âdaituoka Jesus mâenepyra mawylymo? — kehonlymo.

<sup>46</sup> Aituo in-hogulymo:

— Ânguy mâkâ agueho ara kehoem aguewâpyra — kelymo.

<sup>47</sup> Fariseu domodo iewiâpadaynly, aguelymo:

— Mâkânra mâzenokuoaguimo lâpylâmy! <sup>48</sup> Kywymârydo mâkâ neinwântaymba. Xina fariseu domodo ewy tokalâ mâkâ neinwântaymba. <sup>49</sup> Âdaunlo modo kulâ mâkâ einwânni. Kâzewenry wâgâ nâsenomedâdaymba akaemo, xina âsenomedâdo ara. Inakanhe âiehoze akaemo Deusram — kelymo.

<sup>50</sup> Akaemo duay tâlâ myani fariseu Nicodemos keho, kopae Jesus agâ agueze idâypy. Tataen-hodo aguely tindatuo, aguely:

<sup>51</sup> — Idânârâ kehoem kâzewenry tutuze kurâ. Koendâpa ânguylâ iguehoem aguely, eagâ aguykeba kulâ, warâ awyly tutuzelâ kurâ. Âdy anhetyby kiuntuba kulâ âsenagazedoem kienwentâdaymba kurâ. Xarâ kyjigâsene, tâsemaguehoem, âdara kely awyly kindatoem — kely.

<sup>52-53</sup> — Galiléia donro modo mâkâ eynynonro ewy ara amyguely. Tutuzelâ âmâ, Galileiadâ Deus itaumbyry egatuim âdaunloenlâ ipa awyly — kelymo.

## 8

### *Pekodo isoamba kulâ âdynanâoyby*

<sup>1</sup> [Aituo kurâ domodo tâtyam idâwâdylymo. Jesus olâ idâly iwy Se Oliveira Ekaram.

<sup>2</sup> Kopaelâgâem pealâ Jesus odopâdyly Deus etyam. Ekadyly, tydâtyguyim modo enomedâdyly nhaguondyly. <sup>3</sup> Nhenomedâdyly ume, fariseu domodo, Moisés inweniby enomedâni modo iwymârydo warâ Jesusram pekodo nhenewylymo. Eagonro uguondoam âdynanâoly emâmomy. Pekodoam aguelymo:

— Tarâ ikâ idânârâ nhetodâ — kelymo.

<sup>4</sup> Jesusram aguelymo:

— Konomedâni, ohogüimby merâ pekodo, eagonro uguondoam âdynanâoly xina netai olâ. <sup>5</sup> Imeâgâemba kehoem merâ inakanhe aitobyry. Moisés kâzewenryem inweniby wâgâ: “Tuhugue tamytâze xyâwâtaungâ pekodo isoamba kulâ âdynanâoim” kelype. Âmâro, âdara tâkeze âmâ? Tâwâlâ tuhugue xina nhâly? — kelymo.

<sup>6</sup> Awârâ arâ nhapâigueymo, Jesus âdalâ kulâ in-hoguly-ro watay tienwentâdomoem. “Tyâzepa awâkâ pekodo nidâ” kely-ro watay, “Kâzewenry neinwântaymba awâkâ Jesus” tâkezemo tâise. (“Xyâly lelâ awâkâ pekodo” kely-ro watay, “Nityendaymba awâkâ” tâkezemo tâise warâ.) Nhapâiguehomo nihoguba Jesus; enagozely lelâ, tâmary ewilygue onro wâgâ inwenily lelâ warâ. <sup>7</sup> Mâkâ pekodo wâgâ sapâiguezezemolâ. Aituo iwykaudyly, aguely:

— Âmaemo ewy âdaunloenlâ inakanhe aitânrybe-ro watay, tâwâlâ waunroem merâ pekodo onwa tuhu name — kely.

<sup>8</sup> Agueypyem âzewyondyly. Onro wâgâ inweniondyly. <sup>9</sup> Jesus arâ agueduo, idânârâ tutuzemo mawânkâ Deus izepa ato aieni lelâ tawylymo. Aituo tokalâ, tokalâ warâ

âxiguewâdylymo, agaityom modo waunroem kuru âxigueim. Ânguy peba idyly, Jesus, pekodo alelâ âxiâim. <sup>10</sup> Aituo Jesus iwykaudyly, nhapâiguely:

— Âdykâ âiguehoem iwentâni modo nitaimo? — kely.

<sup>11</sup> — Ânguy lâpeba, Pymâ! — kely pekodo.

— Âhoem auguewâpyra lâpylâ urâ. Iweâma idâ, inakanhe adâitonzeba olâ ikâ — kely Jesus.]\*

### *Jesus mawânkâ âdara Deusram kytâly awyly xutuen-hoim*

<sup>12</sup> Jesus agueondyly Deus ety idaserano modoram:

— Iajinu wâne kydakobâdo tâsagonze, myara lâpylâ ywâgâ âdara Deusram tadaindyly xutuly. Yeinwântaynrim modo Deus agâpa tyetunebamo ise. Igueduomo, idâzemo lelâ aunloenlâ eagâ tâitomoem. Ize ato ara adâidyly xutuzemo. Iamu odaypa ise adakobâdylymo, ânwa tyajineim odakâ adakobâdylymo waunlo ara ise — kely.

<sup>13</sup> Fariseu domodo eyam aguely:

— Âwâgâlâ awârâ amyguely. Ânguy âkealâ amyguely awyly eon-hondâni lâpeba. Awylygue amygueho âdyem nipyra awyly — kelymo.

<sup>14</sup> Aituo Jesus aguely:

— Âkealâ ywâgâ auguely, tainwânseim xirâ augueho. Idataungâ auguely. Tutuze urâ, âdykâba kâewyly, âdyam udâly warâ awyly. Âmaemo olâ mäuntubamo âdykâba kâewyly, âdyam udâly warâ awyly. <sup>15</sup> Ywâgâ koendâ mäuntuba lelâlâ wâne âmaemo, arâlâ olâ nhewentâdylymo. Ânguy ewentâze inkâba kâewyly, emakeze lakuru. <sup>16</sup> “Inakanhe kulâ mâkâ aidyly” uguely watay olâ; âkeá lelâlâ auguely. Yagâlâ Pabai ugononibyry; auguehobyry modogue yagâ tâseinwânze mâkâ-ro warâ. <sup>17</sup> Kâzwenry wâgâ iwenibyem: “Azagâ kurâ âkealâ agueymo-ro watay, aguehomobyry tâzeinwân-honze” warâ iwenibyem awyly. <sup>18</sup> Tâlâ azagâ âkealâ ywâgâ agueim, urâ, Pabai ugononibyry warâ. Awylygue xina agueho tainwânseim lelâlâ awyly — kely.

<sup>19</sup> Akaemo aguely:

— Âdykâka Pabai mygueho? — kelymo.

Aituo Jesus in-hoguly:

— Ânguy wawyly mäuntuwâbyra âmaemo. Pabai koendâ mäuntuwâbyra âmaemo warâ. Utulymo-ro watay, Pabai tutuze lâpylâ tâise âmaemo — kely.

<sup>20</sup> Jesus xirâ modo wâgâ aguely, Deus ety idaseray tienomedâdaymo. Deusram dinheru xuduypy etadâdo kaixa iwagueupa. Tâwâlâ wâne izepaom modo agueho izepa awylymo, ânguy olâ nawâpyra, sawâto odaypa awylygue.

### *Xirâ anano keba tawyly wâgâ Jesus aguehobyry*

<sup>21</sup> Jesus aguely:

— Idâze urâ; uize âmaemo-ro warâ. Inakanhe amitomobyry tygakezebalâ ise âigueymo. Awylygue ise udâhoram mydâpa mawylymo — kely.

<sup>22</sup> Aituo judeu domodo adapâiguelymo:

— Âdyanka ise awâkâ idâly, kytâba kitoem? Âdyâly ise? — kelymo.

<sup>23</sup> Jesus aguely:

— Taunlo onwogonrolâ âmaemo. Urâma kaynonro. Xirâ ananolâ âmaemo, urâ olâ xirâ anano keba. <sup>24</sup> Yeinwâmpyra lelâ âmaemo-ro watay, inakanhe amitomobyry tygake-duneba ise. Inakanhe amitomobyry wâgâ tâzewentâguezelâ ise âigueymo, URÂLÂ URÂ kelygue tâzekeim mäinwâmpyra âmaemo-ro watay — kely.

<sup>25</sup> Aituo nhapâiguelymo:

— Ânguyka âmâ? — kelymo.

---

\* **8:11** Idâñârâ livru saguho modo wâgâ iwenibyemba xirâ.

Aituo in-hoguly:

— Tutuzelâ âmaemo, aunlolâ inanry ywâgâ auguezesedyly. <sup>26</sup> Toenzepa âwâgâmo auguehobe wâne urâ. Augueho mâinwâmpyra olâ âmaemo, Deus ize ato amânhepyra mawylymo kâuntuen-hondzye wato. Mâkâ ugononibyry olâ kewâdyly kulâ waypa. Xirâ anano modoam auguehoem aguehobyrlâ augueho — kely.

<sup>27</sup> Nutubamo myani mâkâ “Ugononibyry” keduo, tunwym Deus wâgâlâ aguely awyly.

<sup>28</sup> Awylygue Jesus aguely:

— Iwerâ ânguyem wawyly mâuntuwâbyra âmaemo. Yiguehoem kruz onwa yakâjibygueduomo, xutuze âmaemo, Uguondo Kaynâpa Âetyby wawyly, mâkâ URÂLÂ URÂgue tâzekeinlâ wawyly. Xutuze âmaemo, Pabai auguehoem aguehobyrlâ kâenomedâdo awyly, yangahu oday unâry kulâ mâkeba. <sup>29</sup> Yagâlâ ugononibyry, urâ kulelâ yânwâpyra, ize ato lelâ mawânrâ agânhekyly — kely.

<sup>30</sup> Arâ aguely tindatuomo, agui kehoem einwânmâmomy.

*Deus eynynonro wâgâ, Diabu eynynonro wâgâ warâ Jesus aguehobyry*

<sup>31</sup> Aituo Jesus aguely:

— Augueho mâinwândylymo-ro watay, yagonroem lelâlâ ise âmaemo. <sup>32</sup> Ânguy wawyly koendâ mâuntulymo-ro watay, xutuze âmaemo, auguely âkealâ awyly. Mâuntuduomo, âzemakeoze âmaemo, mâkâ âuturimo emaymba — kely.

<sup>33</sup> Aituo aguelymo:

— Abraão iweompyrylâ xina. Âdykâ ânguyam xina nâdutuoba, xina tawâseba warâ. Âdaituoka “Mâkâ âuturimo emaymba âzemakeoze âmaemo” myguely? — kelymo.

<sup>34</sup> — Diaburam kulâ Deus izepa ato aietaynrim modo âdutuoly. Inakanhe adâjidyly nimopamo. Diabu mawânkâ Deus izepa ato aiesezeni modo iwymâry; Satanásgue tâzekeim lâpylâ mâkâ. Xirâ mâuntudyzemo kuru wato. <sup>35</sup> Mâkâ kurâ adanâhoymby, tâwâlâ vende âieholy eagonro emaryem. Mâkâ imery olâ, aunlolâ imeryem awyly; âdaunloenlâ tunwym xurâempa nipyra. <sup>36</sup> Deus imery urâ. Diabu emaymba imakelymo-ro watay, mâkâ mâinwântondaymba ise âmaemo. Aunlolâ inakanhe amitomoem aguehobyry amânhetombyra ise âmaemo. <sup>37</sup> Abraão iweompyry lelâlâ wâne âmaemo. Arâlâ olâ, yâdyse mawylymo, inomedâdomo mâinwândyseba mawylymogue. <sup>38</sup> Pabai yam nhenehoymby inanry augueho. Amânhetombyra olâ, Diabu amânhetombyra kulâ — kely.

<sup>39</sup> Aituo aguelymo:

— Abraão iweompyry xina. Mâkâ aitobyry aralâ mawânrâ xina aidyly — kelymo.

Aituo Jesus aguely:

— “Abraão iweompyry xina” tâkeze wâne âmaemo, Abraão aitobyry arapa olâ amidylymo. Abraão aitobyry ara amidyse âmaemo-ro watay, Deus ize ato tâise amânhetombyra.

<sup>40</sup> Âkealâ Deus aguehobyry kâindatyby inanry âyanmo augueho. Arâlâ olâ, yâze myguelymo. Awârâ amânhedyse matomo emyenro anientaymba akâwândy Abraão!

<sup>41</sup> Unwârâ Diabu aito ara kulâ amidylymo — kely.

Aituo aguelymo:

— Diabu imeom mâkeba xina! Tokalelâ xina nhunwym, Deus lelâ. Deus imeom lelâlâ xina — kelymo.

<sup>42</sup> Aituo Jesus aguely:

— Deuslâ unwârâ Diabu aito ara kulâ amidylymo — kely. Deuslâ unwârâ Diabu aito ara kulâ amidylymo — kely. Deuslâ unwârâ Diabu aito ara kulâ amidylymo — kely. Deuslâ unwârâ Diabu aito ara kulâ amidylymo — kely.

<sup>43</sup> Ayanmo augueho tydase lelâlâ wâne âmaemo, inomedâdyzemo wato mâuntudyzeba olâ âmaemo. <sup>44</sup> Diabu imeom kulâ âmaemo; ize atolâ mawânrâ amânhedyse matomo. Adagudaylâ Diabu kyârin-em awyly. Iozeno modo iduery kulâ mâkâ. Aunlolâ mâkâ kewâdyly kulâ awyly. Kewâdyly kulâ-ro watay, tâzewenrylâ mâkâ augueho. Augueondyly, konokuni kulâ

mâkâ, idânârâ tâdâsenogudo modo adaguholâ mâkâ. <sup>45</sup> Uguewâdyly kulâ witaymba urâ, âmaemo olâ yeinwândysebamo. <sup>46</sup> Idânârâ âmaemo, inakanhe awipyra wawyly, tutuze âmaemo. Ânguy ienwentâni lâpeba. Awylygue augueho einwântaungâ. <sup>47</sup> Deus xurâ modo mawânkâ Deus agueho tainwânsimo. Mâkâ mânwâmpyra mawylymo, xurâ keba mawylymogue – kely.

### *Abraão wâgâ Jesus aguehobyry*

<sup>48</sup> Aituo tonlo modo judeu domodo eyam aguelymo:

— “Âkealâ enra Samaria donro modo emyenro kulâ âmâ kadopâbeom” xina kely – kelymo.

<sup>49</sup> Aituo Jesus aguely:

— Kadopâbeom mâkeba urâ. Pabai uguelo tynrense urâ; âmaemo olâ yrempyramo âmaemo.

<sup>50</sup> Won-honru wâgâ, koendonroem wawyly wâgâ warâ auguepa wâne urâ. Pabai olâ ywâgâ koendâ adâkeze. <sup>51</sup> Idânârâ auguehobyry einwântaynrim modo niguewâpyramo ise. Xirâ mâuntudyzemo kuru wato – kely.

<sup>52</sup> Arâ Jesus aguely tintaduo, judeu domodo iwymârydo, aguelymo:

— Iweâma tutuze xina, kadopâ agâ kulâ mawyly! Iweâpa myakâwândy kydamu Abraão iguely. Idânârâ saguhoem Deus eynynâ agueim modo lâpylâ iguewânmô. Warâ olâ amyguely: “Idânârâ auguehobyry einwântaynrim modo niguewâpyramo ise” myguely. <sup>53</sup> Kydamu Abraão, saguhoem Deus itaumbypyry egatuwânbypyry modo alelâ iweâpalâ myakâwândy iguelymo. Akaemo takaze tynrenseim mâkeba âmâ! Uguondo tynrenseim mawyly tâgaese wâne âmâ, âdy keba olâ âmâ – kelymo.

<sup>54</sup> Aituo Jesus aguely:

— Ywâgâ kulâ koendâ auguely-ro watay, augueho modo âdyem nitaymba tâise. Urâ lelâ ywâgâ koendâ aguein-ro watay, ânguy auguehobyry neinwântaymba tâise. Pabai olâ ywâgâ koendâ agueim, mâkâ “Xina iDeusry” myguehomolâ. <sup>55</sup> Âdykâ Deus mâtaymba âmaemo, urâ olâ tâense. “Kâuntuba urâ” uguelo âyanmo-ro watay, uguelo wawyly kulâ tâise. Koendâ kehoem tutuze, tainwânsê warâ olâ urâ yam agueho modo. <sup>56</sup> Kydamu Abraão toenzepa iomazewâm, tarâ xirâ onro anaym wawyly tientuo – kely.

<sup>57</sup> — Âwâ! Cinquenta anu peba kuru maze-ro. Iweâpa lelâlâ myakâwândy Abraão iguely, azely iraynâlâ. Abraão mâtaymba âmâ! – kelymo.

<sup>58</sup> Aituo Jesus aguely:

— Abraão iazely iray, tâlâ wakâwâm – kely.

<sup>59</sup> Jesus aguely tindatuomo, tyândyse idylymo. Tuhu nhanâdylymo, nhonwa tiamehomoem. Totoenze olâ ani. Aituo Deus etydâba egasely.

## 9

### *Jesus epy kua nhetobyry*

<sup>1</sup> Alâ ani tadakobâday Jesus uguondo epyem iazeypy nhedyly. <sup>2</sup> Aituo xina Jesus nhapâiguely:

— Konomedâni, âdaituoka awâkâ uguondo epyem iazely? Izepa tato aieniem awyly xutuwâm Deus? Nhunwyndo inakanhe aitobyry wâgâ? – xina kely.

<sup>3</sup> Aituo Jesus in-hoguly:

— Awârâ modo wâgâ inkâba. Awâkâ arâ iazely, Deus eon-honru iwâgâ âzehohoem.

<sup>4</sup> Tâmaryem akâwâm Deus xirâ anaxi ugonodyly. Peto oday lelâ kydâsewanily. Arâ lâpylâ Deus aguiendye ato aguyjiene, kydâsewanilo nhuduly umelâ. Inepa mawânrâ ise xurâem aguipyra kito saindyly. <sup>5</sup> Xirâ anaym wawyly ara, âdara Deusram tâdâtâly awyly wâgâ konomedâda urâ; âdyam kytâly awyly kientoem iajimanâni emyenro urâ – kely.

<sup>6</sup> Arâ aguenripyryem, Jesus KUITÚ kely onro onwa. Onro tâdakugue nhepizeândyly. Aienibyryem epy enu onwa PYRY PYRY nhedyly. <sup>7</sup> Aguely:

— Idâ, Siloé donro paru etaryam âzemelagoguera — kely.  
("Mâkâ igonotyby" keze Siloé kely.)

Epy idâly âzemelagoguere. Odopâdyly, tâense lelâ, Jesus kua nhetybyem. <sup>8</sup> Ety iwaguepa tâtyuneim modo mâkâ epyemba awyly nhedylymo. Saguhoem dinheru nhekadyly enipyry modo lâpylâ koendâ tâense awyly nhedylymo. Aituo âseguâdâdylymo, aguelymo:

— ÂH! Mâkâ epy ekadybyem, sakani modoam dinheru ekanibyrylâ awâkâ — kelymo.  
<sup>9</sup> — Mâkâlâ — kewâdylymo.

— Mâkâ mâkeba. Emyenro kulâ awâkâ — kelymo.

Mâkâ olâ warâ aguely:

— Mâkâlâ urâ, epyem iazey pylâ — kely.

<sup>10</sup> Aituo nhapâiguelymo:

— Âdaraka amidyly kua mitoem? — kelymo.

<sup>11</sup> Aituo in-hoguly:

— Mâkâ uguondo Jesus keho enra ikila ienu onwa PYRY PYRY ieni. "Idâ, Siloé donro paru etaryam âzemelagoguera" keanry-ro warâ. Aituo enra udâly. Kâzemelagoguereagui. Iwerâ tâense urâ — kely.

<sup>12</sup> — Âdykâka mâkâ uguondo? — kelymo.

— Kâuntuba aze — kely.

### *Fariseu domodo epyem iazeypy kua ietyby nhapâiguehomobyry*

<sup>13-14</sup> Tâzekobyzegueho oday Jesus epy kua nhedyly. Aituo mâkâ kua ietyby fariseu domodoram adaholy.

<sup>15</sup> Fariseu domodoram adapâigueoly:

— Âdaraka kua midyly? — kelymo.

— Mâkâ uguondo kua yenipyry onro enra ienu onwa PYRY PYRY nhakyly. Parugue kâzemelagoguereom agueanry. Âzemelagoguebyenlâ enra kâendyly-ro warâ — kely.

<sup>16</sup> Fariseu domodo ewy aguely mâkânra:

— Mâkâ kua âenipyry, tâzekobyzegueho oday mâkâ aidyly. Arâ atayma Deus ingonotyby mâkeba mâkâ uguondo-ro; adyesenry mawânkâ anientai tâzekobyzegueho oday — kelymo.

Tâlâ olâ fariseu domodo ewy wakeim:

— Deusram aguehomba adyesenry anhetoen-ro watay, Deus eon-honru tienehonhoem adienkyly anientaymba tâise — keim.

Jesus Messias awyly einwânni, einwântâny tâisemo ani.

<sup>17</sup> Aituo eyam agueondylymo:

— "Epyemba yetai mâkâ" mygueanse. Âdara mâkâ wâgâ âunâry? — kelymo.

— Ienanaji, Deus eynynâ agueinlâ mâkâ — kely.

<sup>18</sup> Pymâ domodo mâkâ aguely neinwâmpyramo. Aituo aguelymo:

— Myguewâdyly kulâ. Epyem inkâba ani azely — kelymo.

Awylygue sodo modo ingâsedylymo.

<sup>19</sup> Sodo modo saintuo, nhapâiguelymo:

— Âmerymoka awâkâ, epyem iazeypy myguehomo? Âdaituo pylâka iwerâ nhedyly? — kelymo.

<sup>20</sup> Aituo in-hoguly:

— Xina imerylâ awâkâ. Tutuze xina epyem iazeypy awyly. <sup>21</sup> Âdara kua itobyry olâ xina nutuba. Ânguy kua ieni awyly xina nutuba lâgâlâ warâ. Xutuybyem mawânkâ. Awâkâlâ sapâigueladaungâ. Awâkâlâ ise âyanmo egatuim — kelymo.

<sup>22</sup> Arâ sodo modo aguely olâ mârâ âtâ tâdâtâdyguyho odaypa tâzegaseonlymo xytaze, “Jesuslâ Messias” kelymo-ro watay. “Deus Ingonyby Jesus awyly einwânni-ro watay, âtâ tâdâtâdyguyho odaxi negawâmpyra ise” tâkeze akâwâm pymâ domodo. <sup>23</sup> Awylygue mawânkâ: “Xutuybyem awâkâ. Awâkâlâ sapâiguewâdaungâ” kelymo.

<sup>24</sup> Aituo mâkâ uguondo kua ietyby ingâsenehondlymo. Aguelymo eyam:

— Amyguely idaselâ awâkâ Deus. Awylygue âkeá lelâlâ xinaram aguekâ. Tutuze xina, Deus izepa ato aieni awâkâ kua âenipyry awyly — kelymo.

<sup>25</sup> Aituo in-hoguly:

— Deus izepa ato adyese, aniempyra warâ awyly kâuntuwâbyra urâ. Kâuntuly epybyryem wawyly, iwerâ tâense urâ, mâkâ kua nhetybyem — kely.

<sup>26</sup> Aituo nhapâigueondlymo:

— Âdaraka enra aidyly? Âdaraka enra epyemba âedyly? — kelymo.

<sup>27</sup> Aituo uguondo in-hoguly:

— Azagâ lelâ âyanmo augueaki, yeinwâmpyra olâ âmaemo. Auguehobyry kompâzedlyro watay, mânwâmpyra mawylymo, tutuze urâ. Mâkâ kua yenipyry mânwândysemo lâpylâ âmaemo? — kely.

<sup>28</sup> Aituo mâkâ agâ toenzepa kehoem iewiâpadlymo, aguelymo:

— Âmâlâ mâkâ eynynonro, xina mâkeba! Moisés inweniby lelâ xina nheinwânykyly.

<sup>29</sup> Deuslâ, Moisés kydamudo nhenomedâdoem agueim awyly, tutuze xina. Âdy Jesus wâgâ xina nutuwâbyra. Ânguy aguehoem igononi awyly xina nutuwâbyra warâ — kelymo.

<sup>30</sup> Aituo mâkâ uguondo aguely:

— Âwâ! Kua nhetybyem wawyly tâenselâ âmaemo. Toenzepa kâseguâdâdyly, Deus ingonotybylâ mâkâ awyly mâuntuba mawylymogue! <sup>31</sup> Deus tynynonro keba modo nhekadyby nudupa awyly, tutuzelâ kurâ, izepa ato aieni nhekadyby nuduwâpyra. Tynynonro modo nhekadyby lelâ anhekyly — kely. <sup>32</sup> — Kaudyly umelâ ânguy epyenlâ egaseyby kua tyese kely tydatuneba. Ânguy awâkâ uguondo ara aieni lâpeba. <sup>33</sup> Iwerâ olâ Jesus kua yetai. Deus keba igononi-ro watay, kua yetaymba tâise — kely uguondo.

<sup>34</sup> — Epyem azely Deus izepa ato aienilâ mawylygue. Awylygue xinaram arâ kehoem adâkezeba ikâ — kelymo.

Aituo, âtâ tâdâtâdyguyho odaypa nhegaseândylymo.

### *Jesus agueho tyeinwândysebaom modo*

<sup>35</sup> Âtâ tâdâtâdyguyho odaypa uguondo egaseândobry xutuwânm my Jesus. Awylygue nhuinly. Tientuo, nhapâigueley:

— Mâkâ Uguondo Kaynâpa Âetyby tainwânsâ amâ? — kely.

<sup>36</sup> Aituo uguondo aguely:

— Kainwândyse urâ. Ânguy awyly yam aguekâ, ânguy amygueho awyly kâuntuhoem — kely.

<sup>37</sup> — Tâenselâ amâ! Eagâlâ amyguely! Urâlâ Uguondo Kaynâpa Âetyby — kely Jesus.

<sup>38</sup> Jesus aguely idanipyryem, âzeguhoam idyly enado, tynrentoem, aguely:

— Pymâ, âinwântâ urâ — kely.

<sup>39</sup> Jesus aguely:

— Xirâ anaxi kâewyly, ânguy yeinwânni, yeinwântânr warâ awyly âdutuhomoem. Epy modo wâne tyajine awyly nutuba myara Deus xurâ kebaom modo, nutuba awylymogue. Yeinwântaynrim modo olâ Deus xutuzemo, epybyryem kua ietybymoen-ro waunlo ara — kely.

<sup>40</sup> Fariseu domodo ewy eydâ iwaguepalâ. Aituo aguely indadlymo.

— “Epy ara” mygueduo, xinaranlâ enra amyguely? — kelymo.

**41** Aituo Jesus in-hoguly:

— “Xina Deus nutuwâbyra, tiuntudyze olâ xina” myguelymo-ro watay, Deus tygakeze tâise izepa ato amânhetomobyry. Tâwâlâ kulâ olâ, “Koendâ Deus tutuze xina” myguelymo, yeinwâmpyra kulâ. Arâma inakanhe amitomobyry tygakezeba awyly tânehonze awârâ. Deus xurâem, epy emyenro kulâ âmaemo — kely Jesus.

## 10

### *Kaneru sodo koendonro wâgâ Jesus nhegatuhobyry*

**1** Jesus aguely:

— Idataungâ auguely. Kaneru sodo kura odaxi pyanta oze egawândyly. Tâmagazeinma tâzegawânto ozepa egawândyly, sahodâdobyry nhakaguuly. **2** Kaneru sodo tâzegawânto oze egawânni. **3** Egawântoem pyanta tâzenahugueoze. Ezedy wâgâ sodo tâguy ingâsedaynly. Todo itanru tydase kaneru. Kura odaypa nhetaguewândyly. Poji nhaguhomoem nhadyly. **4** Waunroem idâly, eguydo nhapygue-ro warâ, todo itanru tydase tawylymogue. **5** Tiuntudânry kulâ niampyguedaymba. Itanru âkeloem awylygue, tâwenkeze lelâ — kely Jesus.

**6** Kaneru todo nhutuho ara, “Yeinwânni modo utuly” keze ani Jesus aguely. Kaneru wâgâ kulelâba aguely awyly, nutubamo olâ-ro warâ.

### *Deus eydâ atoam tâzegawântolâ Jesus*

**7** Aituo Jesus aguely:

— Kura iwyantary emyenro urâ. Pyanta oze kaneru domodo tâtary odaypa egasely poji aguze, egawântondly tâxidâdomoem warâ. Arâ lâpylâ ywâgâ lelâ Deusram tâdâtâhoem wawyly. Xirâ mâuntudyzemo kuru wato. **8** Xirâ onro anaxi kâewyly iraynâ, toenzepa akâwâm “Deus Ingonotyby urâ” kewâni modo. Kewâdylymo kulâ olâ-ro warâ. Kaneru emagazeni emyenro kulâ akâwâm akaemo kewâdyly kulâ waunlo modo. Ynynonro modo olâ akâwâm aguelymo niwantaguebyramo. **9** Deus eydâ atoam tâzegawântolâ urâ. Tâsemaguehoem wâne kaneru kura odaxi tâgawâñse myara ynynonro modo kâenmakely. Kaneru sodo tâguy poji anaym awyly ume tânuagaenzelâ myara lâpylâ ynynonro modo kâendyly. **10** Kaneru domodo emagazeze, inwenkeze, xyâze warâ kulâ tâmagazeim âewyly. Urâ olâ ynynonro modo emakeze kâewyly, igueduomo Deus agâ aunloenlâ itomoem lakuru.

### *Kaneru sodo koendonro*

**11** — Kaneru sodo koendonro emyenro urâ. Koendâ tâguy nhedyly; emakezemo tâigueze warâ. **12-13** Tâlâ olâ dinheru tienmakehoem kulâ kaneru eni, sodo keba olâ mâtâ. Auwa âepanâguely watay, todokeze lelâ. Aituo auwa kaneru nhawâdyly, ipemugudo adapâeguuly. **14-15** Mâtâ kaneru odo koendonro emyenro urâ. Utudâ Pabai; Pabai tutuze urâ warâ. Ynynonro modo tutuze lâpylâ urâ, kaneru odo koendonro tâguydo nhutuho ara. On-hondybyem urâ, ynynonro modoem yiguehoem. **16** Tâinkâ lelâba ynynonro modobe awyly. Utuzemo, yeinwâñsemo warâ. Tokalâ âjiam lelâ ise ynynonro modo kâindâtyguyly, kâentomoem, kaneru odo koendonro, tientoanlâ tâguy indâtyguyho ara.

**17** — Toenzepa Pabai ywynedyly, yeinwânni modo emakeze iguein-em wawylygue. Yigueduo, kurâem itonze urâ. **18** Ynynonro modo emakezelâ ise yiguely, awidyse wawylyguelâ. Aypa-ro watay, ânguy yâwâpyra tâise. “Igueze âmâ, kurâem itonze âmâ warâ” Pabai kehobyry aralâ ise awidyly — kely.

**19** Awârâ tindatuo, judeu domodo nâseinwâmyra idylymo Jesus wâgâ, aguelymo:

**20** — Kadopâbe itybyem awâkâ! Awylygue âindâ kulâ awyly! Aguely kâjiwantaguedaundâ — kelymo.

Tâlâ olâ warâ aguewâni modo:

**21** — Kadopâ agonro arâ aguewâpyra, epy kua nietaymba warâ! — kewâni modo.

### *Judeu domodo Jesus izepa itomobyry*

<sup>22</sup> Azagâ nunâ sakabygueduo, kopâ ihuguely adaguly ume, âty “Deus Ety Koendâ Ietobyry Enanâgueho” saindyly. <sup>23</sup> Deus ety ivarandarydâ Jesus adakobâdyly, Salomão intânehoymbydâ. <sup>24</sup> Târâ atay, eydâ âtâdyguyby modo aguely:

— Xina kâzenokudâ. Deus Ingonytybylâ âmâ? Mâkâ keba? Koendâ aguekâ, xina nhutuhoem — kelymo.

<sup>25</sup> Aituo Jesus in-hoguly:

— Deus Ingonytybylâ urâ, ugue. Yeinwâmpyra olâ mataunaguynre. Pabai eon-honrugue adyesenry modo ajiedâ, mâtâ ingonotybylâ wawyly kâenehohoem. Agânhekyly modo mâtâlâ ugononi awyly xutuen-hoim. <sup>26</sup> Ynynonro keba mawylymogue olâ Deus Ingonytyby wawyly mânwâmpyra mawylymo. <sup>27</sup> Ynynonro modo ytanru tydase; idânârâ utudâmo warâ. Kaneru todo itanru tindatuo, eyam tâtâze myara ynynonro tawylygue, auguehobyry anhedylymo. <sup>28</sup> Ynynonro modo aunloenlâ Deus agonroem ienehonze urâ. Igueduomo eagâmolâ ise Deus. Typygueim keba ise eagâ awylymo. Iemakoaymo waunlo ara kehoem ise; ânguy iemayamba nhemakelyemba kehoem. <sup>29</sup> Pabai won-honru nhuduypy, idânârâ takaze kehoem imâem awyly; ânguy mâtâ emayamba nhemakelyem inkâba. <sup>30</sup> Tokalelâ xina Pabai agâ — kely Jesus.

<sup>31</sup> Jesus aguely tindatuo, iopano modo tuhu nhanâtondylymo Jesus tyân-homoem.

<sup>32</sup> Aituo Jesus eyanmo aguely:

— Inumo angataylâ keankâ koendonro modo agânhedly, Pabai “Aiekâ” kehobyry ara. Âdaunlo agânhekyly wâgâka tuhugue yâdyse mawylymo? — kely.

<sup>33</sup> In-hogulymo:

— Koendonro amânhedlygue inkâba xina âdyse awyly, Deus mânâguedlygue. Xina emyenro kulâ âmâ, uguondo, Deus agâ âzekiba ise kerim. Awylygue xina tuhugue âdyse awyly — kelymo.

<sup>34</sup> Aituo Jesus eyanmo agueondly:

— Warâ Deus itaumbyry awo wâgâ iwenibyem awyly: “deuslâ âmaemo” kely Deus eyanmo. <sup>35</sup> Âkealâ Deus itaumbyry awo wâgâ iweniby aguely awyly, tutuze kurâ. Deuslâ akaemo deusgue ezetâni awyly, tutuze kurâ, saguhoem kuru iwâgâ aguewâtyby modo. <sup>36</sup> Deuslâ xirâ onro anaxi ugononi, aguehobyry aiese. “Deus imery urâ” ugueduo kulâ, “Deus nhunâguedly awâkâ” myguelymo. <sup>37</sup> Pabai “Aiekâ” kehobyry agânhepyra urâ-ro watay, âdy wâgâ yeinwântaymba tâise âmaemo. <sup>38</sup> Auguelygue kulâ yeinwâmpyra âmaemo-ro watay, agânhekyly mâtenuomolâ einwântaungâ. Pabai Deus agâlâ wawyly, yagâlâ Pabai Deus awyly warâ — kely.

<sup>39</sup> Aguely tindatuomo tyanwâdyse idylymo. Âsemaguewâm lelâ olâ.

<sup>40</sup> Aituo Jesus târâpa âxiguely. Paru Jordão kuyam idâondly, João kurâdo batiza nhetobyryam. <sup>41</sup> Toenzepa myani xuiwâni modo aguely:

— Merâ uguondo adyesenry modo anhedyly ara, âdy aniempyra wâne ani João. Âkealâ olâ mykeankâ merâ uguondo wâgâ aguely — kelymo.

<sup>42</sup> Agui tonlo modo Jesus tainwânsimo myakâwâm.

## 11

### *Lázaro iguehobyry*

<sup>1</sup> Tâlâ ani uguondo, Lázaro keho, Betânia donro, Maria, Marta warâ iwiry. Tâwâne myani mâtâ. <sup>2</sup> (Mâtâ Maria, Pymâ Jesus ihuru onwa uriza nhapâdyly, tyangahudugue in-hugoguely itybylâ mâtâ.) <sup>3</sup> Paru Jordão kuynâ Jesus awyly ume, Lázaro eaundudo kurâ ingonodylymo Jesusram:

— “Pymâ, toenzepa enra ataen-ho mânwyneguyl ewânu!” kera.

<sup>4</sup> Aguely tindatuo, Jesus aguely:

— Tutuze urâ, Lázaro ewânu toenzepa awyly. Tâwânugue igueze, igueypyem lelâ nâtâzezebyra olâ ise. Mâkâ aidyly tientuo, toenzepa ise aguelymo: “Koendonro, ton-honreim warâ awâkâ Deus. Koendonro, ton-honreim warâ lâpylâ imery” kezemo. Aituo ise urâ, Pabai Deus warâ xina âdyren-honly — kely.

<sup>5</sup> Toenzepa Jesus inwyneguyl mykâinane Maria, Marta, Lázaro warâ.

<sup>6</sup> Toenzepa Lázaro ewânu kely tindatuo, myarâ idâze nadahulebyra ani; azagâ emedyly takaze wao mâmâ âjidâ.

<sup>7</sup> Aituo xinaram aguely:

— Judéia yan-yam kydodopâne — kely.

<sup>8</sup> Xina olâ warâ aguely:

— Konomedâni, iweâ kulâ keankâ kypemugudo, judeu domodo, tuhugue âze kelymo. Myarâ kydodopâbyra koendâ kydawly — xina kely.

<sup>9-10</sup> Aituo Jesus xinaram aguely:

— Odopâdonze urâ. Kopaelâgâembaba xixi iatgyu doze horas ara lelâ. Peto oday adakobâni modo nâjihodaigâdaymba, xixi wâgâ. Kopae adakobâni modo olâ tâjihodaigâze, iamu oday tâtâho nepyra tawylygue — kely.

<sup>11</sup> Aituo Jesus xinaram agueondly:

— Xykyly kulâ mâkâ kataen-ho Lázaro. Xuagueânse olâ urâ — kely.

<sup>12</sup> — Pymâ, xykyly kulâ watayma, koendâ ise lelâ-ro — xina kely.

<sup>13</sup> “Igueypyem Lázaro” keze olâ ani Jesus aguely. Xina nutuba olâ âdakeze aguely awyly. Lázaro xykyly kulâ-ro waunlo ara, xina enanaji. <sup>14</sup> Aituo koendâ xina nhutuhoem Jesus aguely:

— Lázaro nigue. Ipa kuru nidâ. <sup>15</sup> Lázaro iguely iraynâ udâpa wawyly keankâ, wonhonru mâentomoem. Âkealâ kuru yeinwântuomo, toenzepa ise womaru. Inoro, âguedy kyzeta — kely.

<sup>16</sup> Aituo Tomé, Azagonropyry kelygue tâzekeim, xinaram aguely:

— Inoro lâpylâ Jesus nhâduomo eagâlâ kyiguehoem — kely.

### *Jesus igueypy modo kurâem ietoni*

<sup>17-18</sup> Aituo xina Betânia iwaguepa saindyly. Jerusalémdâ iwague kuruba mâmâ âji, três kilômetros awârâem. Âguedy eaundudopyry etyam xina saindyly iraynâ, uguondo saindyly xinaram agueze:

— Ipa Lázaro nigue. Eguepybyry tuhu imâsedo odaji xina nhetadâdobry quattro iguandyly idyly iwerâ — kely.

<sup>19</sup> Toenzepa eaundudopyry itynrumo. Toenzepa ipemugudo idâly, âkelo kurâ domodo warâ etubanâzemo, iwirymo iguehobyry tiuntuduo. <sup>20</sup> Jesus tâtyam saindyly egary tindatuo myani Marta iose idâly, Maria olâ âtâdâlâ. <sup>21</sup> Aituo Marta Jesusram aguely:

— Tarâlâ âmâ-ro watay, wi niguewâpyra tâise keankâ! <sup>22</sup> Igueypyem lelâlâ wâne, tutuze olâ urâ, Deusram mâenkaduo amyguehobyry adyese awyly — kely.

<sup>23</sup> Aituo Jesus eyam aguely:

— Igueypyem lelâ idâzesedly nitaymba ise âwiry. Kurâem itonze lelâ — kely.

<sup>24</sup> — Xypyry etay kurâem itondly, tutuze urâ — kely Marta.

<sup>25</sup> Aituo Jesus aguely:

— Iguewâtyby modo kurâem ietoni urâ, aunloenlâ typyguenryem itomoem. Tâwâlâ ise yeinwânni modo iguely. <sup>26</sup> Yagâpa nitaymbamo ise yeinwânni modo. Deusram ise, tyigueduo, idâlymo aunloenlâ eagâ tâitomoem, nigueontaymbamo ise. Tâinwânse âmâ? — kely Jesus.

<sup>27</sup> — Idânârâ amyguehobyry modo tainwânse urâ. Deus, “Xirâ onro anaxi igonose urâ” kehobyrylâ mawyly tainwânse urâ. Deus imery lelâlâ mawyly tainwânse urâ warâ — kely Marta.

### *Jesus eogumato byry*

<sup>28</sup> Agueypyem Marta idâly tywidiyam agueze. Tydawere aguely, ânguy nidapyra itoem.  
— Idy, Jesus naintai. Âgâsedly-ro warâ — kely.

<sup>29</sup> Awârâ tindatuo myani Maria inepa kehoem saudyly. Jesus agâ oxioze idâly.

<sup>30</sup> Etymoam kuru Jesus naimpyralâ, Marta agâ xina oxiodobyrydâlâ. <sup>31</sup> Târâ âtâ oday Maria etubanâze idâypy modope myani. Mâkâ saudyly, tâmaegoze kehoem egasely tientuo, tâgasezemo lâpylâ myani. Aituo nhapygue idâlymo,

— Âguedy etadâdobryam keanra idâly ohogüenze — tâkewâduomo.

<sup>32</sup> Jesus eydâ atoam saintybyem, Maria âzeguhoam idyly enado. Aitybyem eyam aguely:

— Tarâlâ âmâ-ro watay, wi niguewâpyra tâise keankâ! — kely.

<sup>33</sup> Aituo Jesus, Maria eogunru nhedyly; eagonro modo eogunru nhedyly lâpylâ warâ. Aituo Jesus toenzepa itywandyly, tuoday âsewânily warâ.

<sup>34</sup> Aituo nhapâiguelymo:

— Âdykâka keankâ Lázaro eguepybyry mâentadâdylymo? — kely.

— Egârâ, Pymâ — kelymo.

<sup>35</sup> Jesus eogumadyly.

<sup>36</sup> Aituo tonlo modo aguely:

— Lázaro tywyneze lelâlâ galâ awâkâ Jesus! — kelymo.

<sup>37</sup> Tâlâ olâ wakenri:

— Epy kua niedâ awâkâ. Ton-honreba olâ keankâ Lázaro niguepa itoem aiese — kerim.

### *Jesus Lázaro kurâem nhetondobyry*

<sup>38</sup> Jesus idâly Lázaro eguepybyry etadâdobryam, tâtagueim tuhugue tânahugueinram. Toenzepa kehoem itywandyly. <sup>39</sup> Aituo aguely:

— Awârâ tuhu etywâdaungâ! — kely.

Aituo âguedy eaundupyry Marta aguely Jesusram:

— Alâ nidâ! Tywângue awâkâ! Etadâdobryy quattro iguandyly idyly iwerâ — kely.

<sup>40</sup> Aituo Jesus aguely:

— “Yeinwântâ lelâlâ âmâ-ro watay, Deus eon-honru ese âmâ” uguehobryy mâenanâguebaka âmâ? — kely.

<sup>41</sup> Aituo mârâ tuhu imâsedo nhetylymo. Jesus kayam MYK idyly, aguely:

— Pabai, tuomare urâ, âyam auguely tydase mawylygue. <sup>42</sup> Ydatâlâ mawyly tutuze urâ, tâwâlâ lelâlâ wâne yangahu oday kulâ unâgu. Ago olâ iwerâ auguely, merâ kurâ domodo auguely indatoem, âmâlâ ugononi awyly nheinwântomoem warâ — kely Jesus.

<sup>43</sup> Arâ adâkebygueduo adaenkely:

— Lázaro, igasegâ kuohoram! — kely.

<sup>44</sup> Aituo Lázaro kurâem itondly, egasely. Ituwyn-hobryy aralâ, ixinary, ihuru, ewâry, emary alelâ. Panugue emyan-huymbyem awyly. Aituo Jesus aguely:

— Awârâ ituwyn-hobryy etywâdaungâ, adakobâdoem — kely.

### *Jesus xyâly wâgâ aguehomobyry*

(Mt 26.1-5; Mc 14.1-2; Lc 22.1-2)

<sup>45</sup> Jesus Lázaro kurâem nhetonduo, judeu domodo Maria etubanâze idâwâtyby modo ewy nheinwândyly lâpylâ. <sup>46</sup> Tâlâ olâ myakâwâm fariseu domodoram aitobyry egatuze idâim. <sup>47</sup> Aituo fariseu domodo, kurâdo eynynâ Deus agâ aguewâni modo iwymârydo, judeu domodo iwymârydo warâ âtâdyguylymo. Âjigue aguelymo:

— Âdakiendylyka awâkâ Jesus? Adyesenry modo kehoem awâkâ anhekylly. Kurâ domodo aidyly tohoguezemo-ro warâ. <sup>48</sup> Alâ aguienehonzedly-ro watay, idânârâ kurâ domodo awâkâ einwânsemo lâpylâ. Aituo ise kywymâry Roma donro modo kagâ

iewiâpadaynlymo. Kagâ âseguebyze âesemo, kainzemo, Deus ety sakalaguezemo warâ – kelymo.

<sup>49</sup> Ilâem Caifás myakâwâm kurâdo eynynâ Deus agâ aguewâni modo iwymâry kuru. Aituo myani aguely:

– Âdy mâtuntuwâbyra âmaemo! <sup>50</sup> Jesus kydyâen-honre, kydadainhopa kitoem! Tokalâ iguelylâ ise koendonro, idânârâ kyiguepa kitoem – kely.

<sup>51</sup> Âdatâkely awyly nutuwâbyra myani mâkâ. Kurâdo eynynâ Deus agâ aguewâni modo iwymâry lâwâne mâkâ ilâem, Jesus izetonro keba olâ myakâwâm. Alâ wâne, Deus nhutuen-honly, Jesus, judeu domodoem iguelylâ. <sup>52</sup> Tyangahu odano kulâ mâkeba myani mâkâ agueho, Deus nhutuen-hoymbylâ. <sup>53</sup> Kurâ judeu domodoem kulelâ inkâba Jesus iguelylâ, idânârâ kurâdo onro anano modoem. Mâkâ iguelylâ, idânârâ tâinwânni modo tâinkonro lelâba, mâkâ nheinwântomoem, tokaleom ara lelâ itoem.

<sup>53</sup> Ilâ umelâ myani judeu domodo iwymârydo Jesus xyâhoem aguelymo. <sup>54</sup> Awylygue Jesus kurâdo tâentoem kehoem nadakobâbyra awyly. Judeiadâpa âxiguelylâ. Âtâ anary Efraim kehoam idâly; âji âdy peba ato iwaguepa myani mâtârâ âji. Xina agâlâ akâwâm târâ awyly.

<sup>55</sup> Iwaguepa akâwâm Páscoa etyguedo. Toenzepa poji anaym tâtyuneim modo Jerusalémram idâly âty iraynâ. Kâzewenry ara aguidyly, kydokoguelylâ wao warâ kydâzetyguedoem. Tâzetyguedoem ohonze myani idâlymo.

<sup>56-57</sup> Fariseu domodo, kurâdo eynynâ Deus agâ aguewâni modo iwymârydo warâ, “Jesus âdykâ awyly mâtuntulymo-ro watay, xina xurutaungâ, xina nhawânehon-hoem” kehomobyry wâgâ, myani ohonze idâypy modo Jesus nhuinlymo. Âjigue adapâiguelylâ:

– Âdara inanajimo? Âese wânkâ mâkâ âtyam? – kelymo.

## 12

### *Maria Jesus ihuru onwa uriza nhapâdobyry (Mt 26.6-13; Mc 14.3-9)*

<sup>1</sup> Seis iguandyly Páscoa etyguedoem awyly ume, Jesus agâ xina idâly Betanianra, Lázaro etyram, igueypyem awyly ume kurâem nhetondyby. <sup>2</sup> Xina saindylly ani. Kopae Jesus ipyniry anhedylymo. Marta pyni epâni. Lázarope lâpylâ Jesus agâ mesa wâgâ âwinduase. <sup>3</sup> Xina âwinduadly ume Maria uriza etary meio litru tâmânreim tâmaxi nhedylly. Nady nardo iwindy ekurugue aietyby ani mâtârâ uriza. Âjiguento myani mâtârâ, âdy agâ itugândyby keba. Awylygue toenzepa ewâendylly. Jesus ihuru onwa uriza nhapâdobyry. Aitybyem tyangahudugue in-hugoguelylâ. Toenzepa âtâ oday nhârânzely. <sup>4</sup> Judas Queriote donro ani Maria aidyly nehoguebyra. (Jesus eynynonro modo ewy izepaom modo emaxi egamenribyrylâ awâkâ Judas.) Aituo Judas aguely:

<sup>5</sup> – Toenze tâwâenseim keba awârâ uriza! Awâkâ nhumeguylâ! Awârâ uriza vende iedyly-ro watay, âdy pebaom modoram tâise ebyrypyry xuduly\* – kely.

<sup>6</sup> Âdy pebaom modo tintyendylygue inkâba ani arâ aguely, tâmagazeim tawylygue. Dinheru Jesusram xuduupy etary eni ani mâkâ. Turâem tâtyze olâ mâtârâ odaji ietyby ewy.

<sup>7</sup> Aituo Jesus xinaram aguely:

– Arâ adâkezeba itaungâ Maria wâgâ. Kâjiwypazenehonwâdaundâ. Yigueduo iegueypyry onwa tiampâdoem keankâ merâ pekodo xirâ nhekanâdylly. Niwânwâmpyra olâ, awylygue iweâlâ wonwa nhapâdylly. <sup>8</sup> Aunlolâ ise âdy pebaom modope awyly. Urâ olâ ise âdiempa kulâ agâmo wawyly – kely Jesus.

### *Lázaro xyâly kehomobyry*

\* <sup>12:5</sup> Tokalâ anu ara kehoem ewanopyry ewâendylly ara myani mâtârâ uriza ewâendylly ilâem.

<sup>9</sup> Agui kurâdo Jesus Betaniadâ kely indadylymo myani. Aituo myarâ idâlymo; Jesus ese kulelâba olâ idâlymo, Lázaro ese lâpylâ, mâkâ Jesus eon-honrugue kurâem itondyby.

<sup>10-11</sup> Aituo, kurâdo eynynâ Deus agâ aguewâni modo iwymârydo âjigue aguelymo:

— Lázaro kydyâen-honre lâpylâ warâ. Mâkâ kurâem itondyby tientuo, toenzepa kurâdo Jesus nheinwândylymo, kienomedâdomo neinwâmpyra idylymo. Âdara pylâka ise xyâhoem aguiendyly? — kelymo.

### *Jesus Jerusaléram saintobyry*

(Mt 21.1-11; Mc 11.1-11; Lc 19.28-40)

<sup>12</sup> Kopaelâgâem Jerusaléram Páscoa etyguezze idâwâtyby modo, Jesus saindyly kely indadylymo. <sup>13</sup> Toenzepa myani iomarumo, saindyly tiuntuduomo. Wakuri sary nhatâwâdylymo; xidadâ odaypa egaselymo, tuomare kehoem Jesus iose.

— Hosana Deusram! — kelymo. (“Tohoguezeim Deus” keze aguely.)

Tohoguezeim kuru awâkâ Deus eon-honru enehonze âeni!

Koendâ lelâ ise Deus israelita domodo iwymâryem ini agâ

— kely kurâ domodo.

<sup>14</sup> Aituo Jesus jumentinhu nhawâdyly. Nhonwa âkuly. Iwâgâ idâly. Deus itaumbypy iweniby agueho ara aidyly:

<sup>15</sup> “Âmaemo Jerusalém donro modo tyanepa itaungâ.

Etaungâ. Âwymârymo saindyly.

Pymâ ton-honreim kawaru wâgâ sainto ara inkâba ise âewyly;

jumentinhu wâgâ ise saindyly!”

kely myakâwândy iweniby.

<sup>16</sup> Jesus agâ tatay tâense, tydase warâ ani xina awârâ modo aidyly; âdakeze aguely awyly xina nutuba olâ. Igueypyem, Jesus kurâem itombygueduo, Deus eydâ atoam odopâduo warâ lelâlâ ani xina nhenanâguely, aise Deus kehobypy ara aituo.

<sup>17-18</sup> Toenzepa kurâdo Jesus iose idâwâdylymo, xidadâ odaxi sainse idâly ume. Awârâ iraynâ, Lázaro igueypyem awyly ume kurâem nietondâ kely idamâmomy. “Lázaro, awâtârâba igasegâ” keduo aitobyry egatuly nimopamo myani enipyry modo. <sup>19</sup> Jesus wâgâ koendâ kurâ domodo aguely tindatuo, fariseu domodo âjigue aguelymo:

— “Jesus kâzeinwântaundâ” kykely neinwântaymbamo. Etaungâ! Idânârâ eagâ idâlymo — kelymo.

### *Gregu domodo ewy Jesus agâ agueze idâhomobyry*

<sup>20</sup> Gregu ewy idâypybe myakâwâm Jerusaléram âty aiese idâwâtyby modo duay. Judeu kebamo wâne, alâ olâ Deus nhyrerendylymo. <sup>21</sup> Yataen-ho Filipe, Galiléia eynynonro, Betsaidadâ tâtyreim iose myakâwâm idâlymo. Aituo aguelymo Filiperam:

— Jesus agâ adâkedyze xina — kelymo.

<sup>22</sup> Aituo myani Filipe, Andréaram aguely.

— Gregüem aguewâni modo ewy Jesus agâ adâkedyze — kely.

Aituo azakâlâ Jesus agâ agueze idâlymo, Filipe, André alelâ.

— Judeu keba modo ewy agâ adâkedyze — kelymo.

<sup>23</sup> Jesus aguely:

— Âdainkâba, tâwâlâ nâedâmo. Iwaguepa, won-honru, koendâ wawyly warâ idânârâ kurâdo nheto. <sup>24</sup> Idataungâ auguely. Nady ewy tâtâzeba watay, agui nitaymba, tokalâ kulâ. Ondaxi etâduo olâ, tyazeze, ago tâise, tâwiseze, ewyem tâise warâ. Arâ ewy agui idyly — kely.

{“Yiguely, kurâem witondyly wipygueduo, toenzepa kurâ domodo yeinwânsemo” keze myakâwâm Jesus arâ aguely.}

<sup>25</sup> Aituo Jesus aguely:

— “Ize wato aralâ ise awidyly. Tâwâlâ Deus nidâ” mygueymo-ro watay, âigueduomo, Deus agâ inkâba ise âmaemo. Eydâ atoam mydâwâpyra ise âmaemo. “Deus ize ato ara lelâ ise awidyly, ize wato ara kulâba, tâwâlâ ise kâsenagazedyly, yiguely warâ” mygueymo watay olâ, Deus eydâ atoam idâze âmaemo, aunloenlâ. <sup>26</sup> Tywymâryem yizetonro modo, yeinwântaungâ. Auguely idataungâ warâ. Eydâ watodâ lâpylâ ise âmaemo. Pabai Deus koendâ ise yeinwânni modo wâgâ aguely – kely.

### *Jesus tyiguely wâgâ aguehobypy*

<sup>27</sup> Aituo Jesus aguely:

— Takalague urâ iwerâ. Inepa kâzenagazeoly awyly, tutuze urâ. “Kâsenagazedo amayumba yekâ” keze urâ Pabairam? Arâ auguepa ise aze! Xirâ onro anaxi igueze âetybylâ urâ. <sup>28</sup> “Koendonro typygueim keba warâ on-honru enehongâ” keze olâ urâ Pabairam – kely.

Aituo kaynâ tâjitanru aguely:

— Koendonro typygueim keba warâ won-honru senen-ho. Kânehondyly ise-ro warâ – kely.

<sup>29</sup> Atonlo modo tâjitanru kau odaypa âeni indadyly. Aituo akaemo modo ewy aguely:

— Kopâ awârâ agueim! — kelymo.

Eagonro modo warâ agueim:

— Kopâ keba agueim. Anju eagâ agueim – kelymo.

<sup>30</sup> Warâ olâ Jesus aguely:

— Kopâ keba, anju keba warâ agueim. Urâem inkâba Pabai târâ kaynâ aguely âmaemoenlâ. <sup>31</sup> Inepa kehoem Deus agueze xirâ onro anaym yeinwântâny modoram: “Âmaemo tâwentâzeim inakanhe amidylymogue” kely ise. Inepa ise Deus, Diabu pymâem ato xirâ anaym nhainly. Adiendyse tato anientaymba ise Diabu. <sup>32</sup> Kruz wâgâ sakâjibyem kadaunâhonduo, eon-honru sainze urâ. Idânârâ ynynonro modo igâseze urâ, yeinwântomoem – kely Jesus.

<sup>33</sup> Adâkezelâ ani Jesus tyiguely iraynâ, âdara tyiguely awyly wâgâ.

<sup>34</sup> Atonlobypy modo aguelymo:

— Niguewâpyra ise Messias, tâkezema kâzewenry iweniby wâgâ. Aunloenlâ ise awâkâ Deus Ingonyby, tâkeze warâ. “Urâ Uguondo Kaynâpa Âetyby yiguehoem kruz onwa âiehoze urâ” mygueaki olâ. Messiaslâ âmâ-ro watay, âdaituo pylâka “Igueze urâ” myuely? – kelymo.

<sup>35</sup> Aituo Jesus in-hoguly:

— Kydadakobâdo tâense wâne kydaze peto oday, myara ise Deus ize ato ara adâjidyly inomedâdomobyry mâtuntulymo. Yeinwântaungâ, yeinwântomo nhuduly umelâ. Âdiempa kulâ ise agâmo wawyly. Yeinwântaungâ, iamu odaxi âsenagazeze mydâpa mitomoem. Iamu oday adakobâni modo wâne âdyam tâtâly nepyra, myara ise awâkâ yeinwântâny modo tâsenagazedoam tâtâly nutubamo awyly. <sup>36</sup> Agâmo wataylâ, auguely einwântaungâ. Arâ ise peto oday adakobâni ara mawylymo – kely.

### *Toenzepa judeu domodo ewy Jesus neinwâmpyra atobyry*

Agueypyem Jesus târâpa âxiguely, kurâdo tâempyra itoem. <sup>37</sup> Jesus aidyly tâensemolelâlâ wâne myakâwâm, arâlâ olâ agui judeu domodo neinwâmpyra awylymo. <sup>38</sup> Saguhoem Deus wâgâ agueypy Isaías aguehobypy ara kehoem aidyly:

“Deus, agui kurâdoram xina âtaumbypy negatu,

      aguipa kulâ olâ keankâ xina aguehobypy einwânni.

Tâensemolelâlâ wâne toenzepa on-honrugue amânhetyby,

      aguipa kulâ olâ âinwânni modo”

kely iweniwâm Isaías.

<sup>39</sup> Deus izepa tawylymogue neinwâmpyra awylymo. Saguhoem Isaías inwenihobyry ara iwerâ aidyly:

<sup>40</sup> “Deuslâ mawânkâ tienkyly modo nutuba itomoem aienehonrim,  
nhangahumo nhuanwanâdyly waunlo ara.

Warâ neinwâmpyra awylymo,

Deus ton-honru tânehonzelâ wâne,

Tytaumbyry nhegatuen-hoymby nidadâmolâ wâne warâ.

Tainwânsemo Wâne watay,

tâsemaguezemo tâise”

kely Isaías.

<sup>41</sup> Deus, Jesus wâgâ aitaynrim modo nhenehonduo, mâkâ arâ inwenily. Awylygue arâ Jesus wâgâ inwenily.

<sup>42</sup> Agui myani judeu iwymâryo Jesus einwânni modo, ânguyram negatubamo olâ myakâwâm. Fariseu domodo tâdâtâdyguyhoam tâkaunâbyra awyly nhytaguylymo. <sup>43</sup> Kurâ domodo kulâ tohoguedyze atomo, Deus keba tohogueniem ize atomo.

### *Jesus kâmakeze ôetobyry*

<sup>44</sup> Ton-honre kehoem Jesus aguely:

— Urâ kulelâ inkâba yeinwânni modo nheinwânyly, mâkâ ugononibyry lâpylâ warâ.

<sup>45</sup> Utuwâni modo ugononibyry tutuzemo lâpylâ. <sup>46</sup> Urâ iajimanâni emyenro xirâ onro anaxi kâewyly, yeinwânni modo Deus itaumbyry nhutuhomoem. Kâewyly ani, yeinwânni modo iamur odaypa iese. <sup>47</sup> Ânguy ewentâze inkâba xirâ onro anaxi kâewyly. Xirâ onro anano modo emakeze kâewyly, enagazezemo inkâba. <sup>48</sup> Augueho tindadyseba neinwâmpyra waunlo olâ xypyry etay, tâdâsenagazedoam igonose Deus.

<sup>49</sup> — Unâry wâgâ kulâ inkâba awidly. Pabailâ ugononi, awitoem, auguehoem warâ. <sup>50</sup> Deus aguehobyry ara lelâ amidylymo-ro watay, eagâpa mitaymba ise âmaemo. Aigueduomo, idâze âmaemo aunloenlâ eagâ mitomoem. Tutuze urâ, xirâ âkealâ awyly; Pabai “Aguekâ” kehobyrylâ xirâ augueho — kely Jesus.

## 13

### *Jesus, tynynonro modo in-hugoguehobyry*

<sup>1</sup> Tokalâ iguandyly kulelâ, Páscoa etry adaguhoem. Tutuze myani Jesus tyigueho saindyly awyly, xirâ onro anaymba tâito, tunwynram todopâdo. Toenzepa xina in-wynedyly tânehonze kâinane, tyigueho odaxi kehoem.

<sup>2</sup> Kopae Jesus agâ xina âwinduadyly ani. Awârâ iraynâ, Diabu, Judas Queriote donro, Simão imery, nhangahu odaji xunâry nhedyly, Jesus tyândyse donro modoram nhegamehoem. <sup>3</sup> Idânârâ adienkyly modo adientoem Tunwym ton-honru tuduze awyly, tutuze akâwâm Jesus. Deusdâpa tâewyly, eyam todopâdyly warâ, tutuze myani.

<sup>4</sup> Xina âwinduadyly umelâ Jesus saudly. Tâty BOH waunlo nhetyly. Ilâpygueduo toalha nhanâdyly, âzepagâjily. <sup>5</sup> Adâipygueduo, paru bacia odaji XU nhedyly. Tokalâ, tokalâ warâ xina ihuru ingokely. Ilâpygueduo, toalague xina in-hugoguewâdyly\*. <sup>6</sup> Simão Pedroam saintuo, mâkâ tuhuru igokedyzeba, âdykâ pymâ ânguy ihuru ingokely nepyra tawylygue. Aituo Jesusram aguely:

— Urâem tâwaneim mâkeba âmâ, Pymâ. Awylygue uhuru mâingokedyzeba wawyly — kely.

<sup>7</sup> Aituo Jesus eyam aguely:

— Iwerâ mâuntuba wâne âmâ âdaituo arâ awidly awyly. Xutuze olâ âmâ — kely.

<sup>8</sup> — Uhuru mâingokewâbyra ise âmâ — kely Pedro.

Aituo Jesus eyam aguely:

\* **13:5** Tâwaneinhe sanâtyby modo myani adakobâni modo ihuru etary ekâjigueim, etyim, ihuru igokeim warâ.

— Âhuru kâingokeba urâ-ro watay, ynynonro mâkeba ise âmâ — kely.

<sup>9</sup> Jesus agueduo, Pedro aguely:

— Pymâ, arâ atayma, uhuru lelâba igokegâ-ro, iemary, yangahu alelâ-ro! — kely.

<sup>10</sup> Aituo Jesus aguely:

— Kipygueduo, idânârâ kodo tywykuneba, kuhuru lelâ tugokezeim, itybyem kaimpygueduo. Deus inakanhe matomobyry nhygakeduo, iweâ kulâ ityby ara âmaemo. Idânârâ tywykuneba wâne âmaemo; tokalâ olâ tywykeim Deus xurâem — kely Jesus.

<sup>11</sup> Tutuze myakâwâm Jesus, ânguy tuduery emaxi tyâhoem tâgamenri awyly. Awylygue “Idânârâ tywykuneba wâne âmaemo; tokalelâ olâ tywykeim” kely, Judas agueho.

<sup>12</sup> Xina ihuru ingokebygueduo, Jesus tâty BOH waunlo nhetondyly. Mesa onwa ekadondyly. Xinaram aguely:

— Âdaituo âhugoguelymo mâuntuba mawylymo. <sup>13</sup> “Xina iwymâry”, tâkeze, “xina enomedâni” tâkeze warâ âmaemo yam. Âkealâ amyguelymo. <sup>14</sup> Âwymârymo lelâlâ urâ, inomedâni lelâlâ warâ, âhurumo olâ xigokeagui, tagonro emawyadâni wâne myara. Agonromo ihugoguewâdaungâ lâpylâ, âsemawyadâni mawylymo mâenehon-homoem. <sup>15</sup> Aetomobyry ara amitomoem, âsemawyadâdaungâ, imawyadâdomobyry ara. <sup>16</sup> Idataungâ auguely. Tâzemary, tywymâry takaze kehoem tynrentuneba; unâ sani, igononibyry takaze kehoem tynrentuneba. <sup>17</sup> Âmaemoma midataimo auguely. Awidyly metaimo warâ. Âjigue mâsemawyadâduomo, koendâ kehoem ise Deus agâmo.

<sup>18</sup> — Âmaemo kâinduakeby modo âutudâmo urâ. Tutuze urâ, tokalâ âmaemo ewy agâ Deus koendâpa awyly. Deus itaumbyry iweniby ara ise aidyly: “Uduery ise yagâ âwinduani” kely iweniby. <sup>19</sup> Agâieholi wâgâ xirâ auguely, yizepanro modo emaxi kâzegameoly iraynâ, “Aise” uguehobyry aidyly-ro watay, URÂLÂ URÂ kelygue tâzekeim wawyly mâinwântomoem. <sup>20</sup> Kâingonotaymby modo koendâ edaenkunri, urâlâ nhedaenkuly waunlo ara lelâ. Koendâ iedaenkunri, mâkâ ugononibyrylâ koendâ nhedaenkuly. Xirâ mâuntudyzemo kuru wato — kely.

### *Tâgamenri wâgâ Jesus aguehobyry*

(Mt 26.17-25; Mc 14.12-21; Lc 22.7-13,21-23)

<sup>21</sup> Agueypyem, toenzepa kehoem Jesus adahulily. Xinaram aguely:

— Idataungâ wao. Tokalâ âmaemo ewy ise yâdysedo modo emaxi iegamerim — kely.

<sup>22</sup> Aituo xina âzedly. Toenzepa xina âseguâdâdyly, ânguy agueho xina nutuba tawylygue. <sup>23</sup> Urâ Jesus toenzepa inwyneguuly iwaguepa ani iopay ekadybyem wawyly.

<sup>24</sup> Simão Pedro PUK PUK idyly, ânguy wâgâ Jesus aguely awyly auguehoem.

<sup>25</sup> Aituo ago Jesus iopaji udâly, kampâiguehoem:

— Pymâ, ânguyka ise âdysedonro modo emaxi igameim? — uguely.

<sup>26</sup> Jesus in-hoguly:

— Mâkâ pão ikuiby kâunduhobyry — kely.

Aituo pão SAGAI ietyby nhanâdyly, inkuily prato odanogue, Judasram nhuduly, Simão Querioite donro imeryram.

<sup>27</sup> Judas pão nhemakely. Ilâenlâ Satanás emaxi idyly, Satanás “Aiekâ” kehobyry anhetoem. Aituo Jesus eyam aguely:

— Amânhedyse mato inepa aiekâ — kely.

<sup>28</sup> Xina mesa wogonro modo nutuwâbyra akâwâm âdaituo Jesus arâ aguely awyly.

<sup>29</sup> Judas dinheru etary eni awylygue ani xina ewy tyangahu oday aguely:

Tâlâ pylâ wakeim modo:

— Jesus gâlâ keanra Judas pyni nhanâdyse âtyem warâ? — keim.

Eagonro modo aguely:

— Ady pebaom modoram âdylâ nhuduen-honly lâgâlâ keanra Jesus — warâ kely.

<sup>30</sup> Pão emakeimbyryem, inepa kehoem Judas idâly. Iamu odaylâ egasely, kopae awylygue.

*Koendâ lelâ âjigue itaungâ, âpynedaungâ warâ*

<sup>31</sup> Judas âxiguebygueduo Jesus xinaram aguely:

— Iwaguepa urâ Uguondo Kaynâpa Âetyby yigueho. Yigueday ise won-honru, koendâ wawyly, Deus koendâ awyly, eon-honru warâ kâenehonly. <sup>32</sup> Deus koendâ awyly, eon-honru warâ enehonze urâ. Alâpylâ awâkâ, koendâ wawyly, won-honru warâ enehonze. Inepa ise awârâ aidyly. <sup>33</sup> Tâjiunwym tymery inwynedo ara lâpylâ âwynedylymo. Âdiempa kulâ ise agâmo wawyly. Udâpygueduo, uize âmaemo. Judeu domodo iwymârydoam uguemy myara olâ âyanmo auguely: “Udâhobyryam mydâpa olâ ise âmaemo.” <sup>34</sup> Iwelo tâzezewenry ise xirâ: “Mâkâ agâ, mâkâ agâ warâ âpynedaungâ, âwynedylymo ara.” <sup>35</sup> Mâpynedylymo-ro watay, idânârâ kurâdo xutuze ynynonro mawylymo — kely.

*Jesus Pedroram, “Azagâ tokalâ warâ ‘Kâuntuwâbyra urâ awâkâ’ keze âmâ” kehobypy  
(Mt 26.31-35; Mc 14.27-31; Lc 22.31-34)*

<sup>36</sup> Aituo ani Simão Pedro Jesus nhapâiguelly:

— Âdyanka ise mydâly, Pymâ? — kely.

Aituo Jesus in-hoguly:

— Iwerâma ise âmâ udâhobyryam mydâpa. Iweâkuba ise mydâly — kely.

<sup>37</sup> Pedro nhapâigueondly:

— Âdaituoka iwerâ mydâhoram, udâpa wawyly? Kâmayno amaymba imakeze iguein-em kâdutuly! — kely.

<sup>38</sup> Aituo Jesus eyam aguely:

— Âkeaka? Xirâ enanâguegâ. Xirâ kopae, aukuma igâtudyly iraynâ, azagâ tokalâ warâ ise “Jesus kâuntuwâbyra urâ” myguely — kely.

## 14

*Jesus ânwa Kunwyn-am tâdâtâho*

<sup>1</sup> Aituo Jesus xinaram aguely:

— Tytyremba, tâseguâdâzeba warâ itaungâ. Deus einwântaungâ, yeinwântaungâ lâpylâ warâ. <sup>2</sup> Pabai eydâ atodâ toenzepa âtâ modo mâxidâdomoem. Ijidymo nhonse udâly. Aypa-ro watay, auguewâpyra tâise urâ. <sup>3</sup> Ijidymo nhonse idâypyem, odopâze urâ, nhesemo, yagâ eydâ watoam mydâhomoem. <sup>4</sup> Tutuze âmaemo ânwa eydâ watoam kani — kely.

<sup>5</sup> Aituo Tomé aguely:

— Xina nutuwâbyra âdyam mydâly awyly, Pymâ. Tutuzeinhe inkâba awârâ ânwa âyam tâdâtâho — kely.

<sup>6</sup> Aituo Jesus aguely:

— Ânwa Pabairam tâdâtâholâ urâ. Yagâ lelâ âdy iozeno awyly âdutuoly. Ywâgâ lelâ Deus eydâ atoam tadaindyly. Yeinwânni modo lelâ ise Pabairam idâim. Yeinwâmpyra âmaemo-ro watay, Pabairam aintaymba âmaemo. Yeinwântuomo lelâ eyam aindylymo. <sup>7</sup> Iwerâ utudâ âmaemo. Pabai xutuze lâpylâ âmaemo. Ietâ, utudâ warâ mawylymogue, Pabailâ mâuntulymo, mâenkylymo warâ — kely.

<sup>8</sup> Aituo Filipe aguely Jesusram:

— Pymâ, Kunwym Deus enehongâ. Awârâ kulâ xina nhekaguly, tuomazehoem — kely.

<sup>9</sup> Aituo Jesus aguely:

— Filipe, iweâpa lelâlâ wâne agâmo wawyly. Ânguy wawyly mâuntuba lelâ waunlo ara olâ âmâ! Ieni modo, Pabai tâensemo lâpylâ. Awylygue ietâ kulâ, “Pabai mygueho

enehongâ” tâkezeba ikâ. <sup>10</sup> Pabai agâ tokalâ wawyly; yagâ tokalâ Pabai awyly warâ tainwânse wânkâ âmâ, Filipe? — kely.

Aituo Jesus xinaram aguely:

— Yangahu odano kulâ mâkeba xirâ augueho, Pabai “Aguekâ” kehobyrlyâ. “Aiekâ” kehobyrlyâ agânhekyly warâ. <sup>11</sup> Auguely einwântaungâ. Einwântaungâ Pabai agâ tokalelâ wawyly. Auguely wâgâ yeinwândyseba mataymo, Pabai Deus eon-honrugue agânhetaymby modo mäentybymo wâgâlâ yeinwântaungâ. <sup>12</sup> Idataungâ auguely. Idânârâ yeinwânni modo agânhetaymby modo aiese. Yara adyesenry modo anhetoem agueypyem urâ, adyesenry ton-honreim lelâlâ. Inepa ise Pabairam udâly. Urâ lelâlâ agânheto nuduompyrama ise. <sup>13</sup> Agânhetoem mäenkadybymo aiese urâ, iezyd wâgâ idânârâ kehoem agânhetoem amyguehomobyry. Pabai ton-honreim, koendorro warâ awyly kânehohoem ise awidly. <sup>14</sup> Idânârâ iezyd wâgâ mäenkadybymo aiese urâ — kely Jesus.

### *“Deus Ispiritury igonose urâ” Jesus kehobry*

<sup>15</sup> Aituo Jesus aguely:

— Ywynedâ mataymo, auguehobry lelâ aietaungâ. <sup>16</sup> Pabairam ekaze urâ, âurunimo ingonotoem. Odokewâbyramo ise; alâ ise agâmo awyly. Deus Ispiriturylâ ise mâtâ. Mâtâ ise Deus wâgâ âkealâ kuru agueim. <sup>17</sup> Deus eynynâbaom modo agâ inkâba Deus Ispiritury. Nutuwâbyramo netaymbamo warâ ise. Âmaemo olâ xutuze. Alâ mawânkâ agâmo awyly.

<sup>18</sup> — Âxigueze wâne urâ, omopamo olâ ise urâ. Agâmo witoem odopâze urâ. <sup>19</sup> Inepa ise Deus eynynâbaom modo iepyra idylymo. Âmaemo olâ iese. Igueypyem kurâem witondobry wâgâ ise Deus agâpa mâseagongueba mawylymo; igueypyem, yagâlâ ise âmaemo. <sup>20</sup> Kurâem witonduo ise mäuntulymo, Pabai agâpa wipyra wawyly. Yagâpa mipyra mawylymo, agâpamo wipyra wawyly warâ mäuntulymo.

<sup>21</sup> — Yeinwânni modo, auguehobry idani modo warâ ywynedâ tawyly tânehonzemo. Ywyneni tywyneze Pabai. Iwynezemo lâpylâ urâ, koendâ utuhomoem aiese urâ — kely.

<sup>22</sup> Aituo Judas, Jesus nhapâigueli, Queriote donro keba olâ, eagonro:

— Âdaituoka ise xinaram kulelâ mänehonly; Deus eynynâbaom modo pylâ nepyramo-ro warâ awyly? — kely.

<sup>23</sup> Aituo Jesus in-hoguly:

— Ywyneni modo auguehobry lelâ ise anhekylymo; Pabai iwynezemo lâpylâ. Eagâmolâ ise xina-ro warâ. <sup>24</sup> Ywynedânry modo auguehobry takazemo lelâ. Urâ kulâ mâkeba xirâ mäindakylymo agueim, Pabai aguehobryenlâ xirâ auguely.

<sup>25</sup> — Agâmo wawyly umelâ xirâ auguely. <sup>26</sup> Âxigueze urâ. Âurunimo âyanmo âese olâ. Deus Ispiritury ise mâtâ, Deus ingtonotyby ietaybyaji agâmo itoem. Idânârâ âyanmo auguehobry enanâgueze, inomedâzemo warâ auguehobry modo mäuntuhamoem.

<sup>27</sup> — Yara madahuliba âesemo. Xirâ onro anano modo toenzepa ise adahulilymo, eanumo warâ. Âmaemo olâ tadalafilizeba itaungâ, tyanepa warâ. <sup>28</sup> “Idâze wâne urâ, odopâze olâ urâ” uguely midataimolâ. Toenzepa awârâ mäindatuomo madahulilymo. Tadalafilizeba itaungâ. Urâem koendâ lelâ aidyse mataymo, tâjityenzeba itaungâ; tuomare itaungâ, Pabai ugononibyryam kodopâdyly awylygue. Yakadâ ton-honreim kuru mâtâ lelâ, unâ sodo ton-honreim kuru, egatuim takaze. <sup>29</sup> Pabairam udâly iraynâ xirâ auguely âyanmo. Udâduo ise, auguehobry âkealâ awyly mäinwândylymo. <sup>30</sup> Agâmo alâ auguezesedly witaymba ise urâ. Deus eynynâbaom modo iwymâry Diabu saindyly mawânkâ. Ton-honreba olâ ise mâtâ yagâ. <sup>31</sup> Idânârâ, Pabai “Aiekâ” kehobry lelâ agânhekyly, Pabai tywyneze lelâlâ wawyly, eynynâbaom modo nheinwântomoem.

— Autaungâ. Inoro tarâpa — kely ani Jesus.

## 15

*Uva ipery emyenro awâkâ Jesus*

<sup>1</sup> Jesus xinaram aguely:

— Uva ipery emyenro urâ. Pabai pylâ uva eni emyenro-ro warâ. Se tywindyem-ro watay, iwatary modo niguewâpyra, arâ lâpylâ urâ, ynynonro modo niguepa itoem aienehonrim wawyly. <sup>2</sup> Deus aguehobyry adiendysebaom modoma uva iwatary ewisedânrý emyenro. Uva iwatary ewisedânrý eni tatâwâze myara, ise Pabai tydatânrý modo tygue nhedyly. Uva iwatary ewisenri watayma eni tâense, tuonse warâ. Inakai modo lelâ nhatâwâguyl, iwatary toenzepa ewiseondoem. Arâ lâpylâ Pabai, tynynonro modo odaypa izepa tato nhetyly, ize tato lelâ anhetomoem. <sup>3</sup> Pabai inakanhe amitomo nhygakely ani, inomedâdomobyrý mânwântomobyrý wâgâ. <sup>4</sup> Yeinwânsededaungâ lelâ, yagâpa mâiehowâbyra ise âmaemo; agâpamo wipyra ise urâ warâ. Uva iwatary wâne ipery wâgâ atay lelâ ewisely myara lâpylâ âmaemo, yeinwântuomo lelâ Deus ize ato ara amidylymo.

<sup>5</sup> — Uva ipery emyenro urâ, uva iwatary emyenro âmaemo-ro warâ. Ipery wâgâ wâne uva iwatary koendâ kehoem PE warâ awyly, myara ise yagâpa itânrý modo koendâ lelâ Deus ize ato ara aidyly. Urâ peba kulâ, mâkâ ize ato ara amipyra âmaemo. <sup>6</sup> Uva sodo iwatary satârimbyryem, âpa ezaypa nhameley. Aituo iwatary modo iladyly. Ilâpygueduo, indâtyguyl, nhaduândyly. Awyara ise, yagâpanro modo Deus iopayba iedyly. Petomâ onwanxi ise samely, mâtâ uva iwatary ewisedânrý iaduânto ara.

<sup>7</sup> — Yagâpa mipyra âmaemo, âyanmo auguehobyry mânwânsededylymo lelâ watay, emakeze lelâ âmaemo idânârâ Pabairam mânkadbybymo. <sup>8</sup> Koendonro amânhedysemo wato amânhedylymo watay, uva iwatary tâwiseim emyenro ise âmaemo. Deus koendâ awyly, eon-honru warâ enehonze âmaemo amânhekylymo wâgâ. Arâ ise ynynonro kuru mawylymo mânenehonlymo. <sup>9</sup> Pabai ywynedly ara lâpylâ âwynedlymo. Auguehobyry ara lelâ aitaungâ, âwynedâmo wawylygue. <sup>10</sup> Pabai agânhedyse ato agânhepyra witaymba urâ. Awylygue kadahuliba wawyly, ywynedâ awyly tutuze urâ. Arâ lâpylâ, “Aietaungâ” ugueho mânimopa âmaemo-ro watay, madahuliwâbyra ise âmaemo, âwynedâmo wawyly enanâgueze âmaemo.

<sup>11</sup> — Madahulidyzemo inkâba urâ, awylygue âurudylymo, tuomare lelâ mitomoem. <sup>12</sup> Xirâ auguehobyry ara aitaungâ: “Agonromo agâ âpynedaungâ; koendâ mâtetomo ara lâpylâ agonromo agâ koendâ âzetaungâ.” <sup>13</sup> Mâkâ tataen-ho emakeze iguerim mawânkâ tataen-ho iwyneni kuru. <sup>14</sup> Auguehobyry amânhedylymo watay, yataen-ho âmaemo. <sup>15</sup> “Yataen-ho” uguelly âyanmo; “iemary” uguelly mâkeba. Awylygue agâmo unâgu ywâgâ aini wâgâ. Pymâ tywâgâ aguewâpyra tâmarydoam. Âyanmo olâ auguely, idânârâ Pabai “Aguekâne” kehobyry.

<sup>16</sup> — Âmaemo mâkeba keankâ atâen-homoem witoem uduakeim; urâlâ keankâ âduakenrimo, Deus ize ato amânhetomoem, yeinwândyly mânimopa mitomoem. Arâ ise uva iwatary tâwiseim ara mawylymo, ewily inakanhe itânrý. Ywâgâ mânkadbylymo-ro watay, idânârâ mânkadbybymo xuduze lelâ Pabai. <sup>17</sup> Awylygue, xirâ auguely: “Agonromo agâ âpynedaungâ; koendâ mâtetomo ara lâpylâ agonromo agâ koendâ âzetaungâ.”

*Jesus nheinwândylymogue eynynonro modo âzenagazeoze*

<sup>18</sup> Jesus xinaram aguely:

— Ynynâbaom modo âizepamo watay, enanâguewâdaungâ, âizepamo idyly iraynâ yizepa atomobyry. <sup>19</sup> Deus eynynâbaom modo eynynâlâ âmaemo-ro watayma tâise âwynedlymo. Saguhoem Deus eynynâba wâne ani âmaemo, alâ olâ âduakelymo urâ xurâem mitomoem. Awylygue iwerâ Deus eynynâbaom modo anhekyl amânhedyseba mawylymo. Awylygue âizepamo awylymo, inagazedylymo warâ.

<sup>20</sup> — Auguehobyry enanâguewâdaungâ. Tâzemary, tywymâry takaze kehoem tynrentuneba. Pymâ eto ara lâpylâ ise emary modo âzecholy. Ienagazeni modo inagazezemo lâpylâ. Kâunrutomobyry anhedylymo-ro watay, mâunrutomo aiesemo lâpylâ. <sup>21</sup> Mâzenagazeolymo ise, ynynonroem mawylymogue. Mâkâ ugononibyry nutubamo mawânkâ. <sup>22</sup> Xirâ onro anaxi kâewyly, Deus wâgâ agueze. Tindatuo, neinwântaymbamo ani. Kâepyra urâ, eyanmo auguepa warâ watay, tâwâlâ tâise ague-lymo: “Âdykâ Deus itaumbyry xina nidataymba. Tânagazeduneba xina, tindatâny kulâ neinwâmpyra tawylygue” kelymo tâise. Auguely tydase, agânhekyly tâense warâ akaemo, yeinwâmpyramo olâ; xypyry etay Deus enagazezemo.

<sup>23</sup> — Yizepanro modo, Pabailâ izepa atomo lâpylâ. <sup>24</sup> Enanaynmolâ adyesenry modo kehoem agânhekyly. Idânârâ olâ yeinwâmpyramo. Xirâ adyesenry modo agânhepyra urâ-ro watay, “Tâwentâguezeinhe mawylymo” aguewâpyra tâise Deus. Akaemo iwerâ tâwentâguezeim, agânhetbyty tâensemolâ mawânkâ, yeinwâmpyramo olâ. Yize inkâba akaemo, Pabai izepamo lâpylâ warâ. <sup>25</sup> “Warâ ise aidyly” tâkezelâ Deus. Iwenibyem itaumbyry awo wâgâ: “Âdaituoba kulâ yizepa awylymo” kely iwenibybe.

<sup>26</sup> — Âurunimo âese, Deus Ispiritury keho, Deus eydâpalâ âeni. Deus wâgâ âkealonro ise inomedâdomo. Pabaidâpalâ ise âyanmo kâingonodyly, ywâgâ agueze lâpylâ mâkâ. <sup>27</sup> Xirâ onro anaym iewanu kanguly umelâ yagâ mawylymo. Awylygue ise ywâgâ mâindatybymo, mâentybymo warâ mâengatulymo — kely Jesus.

## 16

<sup>1</sup> Jesus xinaram aguely:

— “Ynynonro modo, ynynâbaom modoram âzenagazeoze” tâkeze urâ. Aidyly-ro watay, âtywambyramo, yeinwândyly mâinmopamo warâ mitomoem olâ auguely. <sup>2</sup> Âtâ tâdâtâdyguyho odaypa igaseânzemo, akaemo âhomo sainse. Âlymo-ro watay, Deus ize ato aralâ adâidyl waunlo ara ise enanajimo. Iozepa kulâ olâ arâ âpaunzedlymo. <sup>3</sup> Arâ aidylymo olâ ise, utuba, Pabai nutuba warâ tawylymogue. <sup>4</sup> Aidyly iraylâ olâ xirâ âyanmo auguely, mâzenagazeoduomo, madapâendyba mitomoem. “Kyam Jesus aguehobyrylâ xirâ aini” keze âmaemo — kely.

### *Deus Ispiritury ewano*

Jesus aguely:

— Yeinwâmpygueduomo, âdara mâzenagazeolymo awyly wâgâ auguepa ani urâ, agâmolâ wawylygue. <sup>5</sup> Inepa olâ ise udâly, mâkâ ugononibyryam. Âmaemo ewy olâ yapâigueba: “Âdyanka ise mydâly?” myguepamo. <sup>6</sup> Toenzepa âtynrumo, “Âydâpamo widyly” uguely mâindatuomo. Tâseguâdâzeba itaungâ.

<sup>7</sup> — Idataungâ auguely. Udâly lakuru âmaemoem koendonro. Udâpa urâ-ro watay, Âurunimo nâetaymba ise. Udâduo olâ, âyanmo igoñose urâ. <sup>8</sup> Deus Ispiritury âetuo, agueze mâkâ ynynâbaom modoram: “Wamyguelymo: ‘Tutuze xina, Deus ize ato, izepa ato warâ. Tutuze xina, koendonro, koendonro keba warâ. Tutuze xina, Deus ânguy nigonopyra awyly tâdâsenagazoam âsenagazedoem’ myguelymo. Iozepa olâ amyguelymo” kely ise eyanmo.

<sup>9</sup> — “Tutuze xina, Deus ize ato, izepa ato warâ” kelymo. Iozepa kulâ aguelymo, yeinwâmpyramo mawânkâ. <sup>10</sup> “Koendonro, koendâpaom warâ tutuze xina” kelymo. Iozepa kulâ aguelymo. Pabairam idâze urâ; ietombyra ise âmaemo-ro warâ. Myarâ kodopâduo ise koendonro lelâ wawyly mâuntulymo. Ietombyra ise âmaemo-ro warâ. <sup>11</sup> “Tutuze xina, Deus ânguy nigonopyra awyly tâdâsenagazoam âsenagazedoem” kelymo. Iozepa kulâ aguelymo lâpylâ. Saguhoenlâ Deuslâ agueim: “Urâ xurâ keba modo iwymâry aunlolâ ise infernudâ âsenagazedyly” keim. “Ynynâbaom modo lâpylâ aunlolâ infernudâ Deus enagazenehonze” keim lâpylâ.

<sup>12</sup> — Tâlâ urâ toenzepa âyanmo augueho, māuntuhomoem nudupa olâ, toenzepa mawânrâ iwerâ âtynrumo. <sup>13</sup> Deus Ispiritury âetuo olâ, âyanmo xutuen-honze, idânârâ âkealonro Deus māuntudyzemo ato. Âdy aini awyly wâgâ ise mâkâ aguely. Tyangahu odano kulâ mâkeba ise mâkâ agueho. Mâkâ agueho olâ ise Kunwym Deus tyam aguehobyrylâ. <sup>14</sup> Auguehobyry, âyanmo enanâguehonze mâkâ. Arâ ise mâkâ, koendâ wawyly, won-honru warâ nhutuen-honly. <sup>15</sup> Idânârâ augueho modo, Pabai aguehobyrylâ. Deus Ispiritury auguely idase, âyanmo egatuze-ro warâ – kely.

### *Tâjitynru, tojiomaru warâ*

<sup>16</sup> Jesus xinaram aguely:

— Iweâ lelâlâ ise iepyra midylymo. Inepa olâ ise, ietondylomo – kely.

<sup>17</sup> Xina âjigue aguely:

— Âdakeze aguely awyly kiuntuwâbyra kurâ, “Iweâ lelâlâ ise iepyra midylymo. Inepa olâ ise ietondylomo” keduo. Wakeanry lâpylâ: “Iepyra mawylymo ise, Pabairam udâly awylygue” keanry. <sup>18</sup> Âdakezeka “Inepa olâ ise, ietondylomo” kely? Kiuntuwâbyra kurâ awârâ – xina kely.

<sup>19</sup> Agueho koendâ xina nutuba awyly, tutzelâ olâ Jesus. Awylygue aguely:

— Idataungâ auguely. Adâkeonze urâ warâ. “Iweâ lelâlâ iepyra ise âmaemo. Inepa olâ ise ietondylomo.” Xirâ kebaka agonromo agâ madapâiguehomo? <sup>20</sup> Toenzepa âjityenze, eogumase warâ âmaemo. Ynynâbaom modo iomamunumo ume, tytynre ise âmaemo; omarumoem ise olâ awârâ. <sup>21</sup> Tymery egaseday, pekodo tuomaruneba ewânuque. Iamudo iazepygueduo olâ toenzepa tuomazeze, tymegue mawânkâ. <sup>22</sup> Arâ ise âtynrumo aunloenlâ nipyra awyly. Tytynre âmaemo iwerâ, “Iweâ lelâlâ ise iepyra midylymo” ugueduo, nhetonzemo olâ urâ. Aituo ise toenzepa omarumo. Ânguy tuomareba âenehonwâbyramo ise.

<sup>23</sup> — Âurunimo âetuo, inomedâzemo mâkâ. Agâmopa lelâlâ wâne ise urâ, mâkâ olâ ise agâmolâ. Tâwâlâ mapâiguelymo māuntudânrymo wâgâ. Idataungâ auguely. Iezedy wâgâ Pabai uguehoam mâenkadylymo-ro watay, xuduze mâkâ âyanmo. <sup>24</sup> “Jesus ezedy wâgâ xina nhekadyly” myguepa lelâ olâ âmaemo Deus agâ. Ekadaungâ. Mâenkadybymo emakeze âmaemo, toenzepa omaromoem. Xirâ māuntudyzemo kuru wato – kely.

### *Jesus eon-honru, Diabu eon-honru takazeno kuru*

<sup>25</sup> Jesus aguely:

— Tutuzenryem xirâ unâ kâengatuly, âdaunlo Deus awyly wâgâ inomedâdomoem. Tutuzeinhelâ inomedâdomo sainse olâ. Mâindakylymoenlâ mawânrâ ise âyanmo Pabai wâgâ auguely. <sup>26</sup> Mârâ ume, Deus agâ amyguedaymo, “Xina xirâ nhekadyly Jesus ezedy wâgâ” keze âmaemo. Âmaemoem auguezesedyly witaymba ise urâ. Âmaemolâma ise eagâ agueim. <sup>27</sup> Pabai âwynedâmo awylygue, koendonro xuduze mâkâ âmaemoem. Ywynedylymogue, Deusdâpa kâewly tâinwâNSE mawylymogue warâ âwynedylymo. <sup>28</sup> Xirâ anaxi kâetoem, Deus ingonotyby urâ. Inepa ise tarâpa widyly. Pabairam ise udâly – kely Jesus.

<sup>29</sup> Aituo xina aguely:

— Iweâma tutuzeinhelâ amyguely. Amyguedyse mato moempyra âmâ. <sup>30</sup> Idânârâ tutuze mawyly, tutuze xina. Xina apâiguely iraynâlâ, tutuze âmâ, xina adâkedyze ato. Awylygue Deuslâ ogononi awyly xina nhutuly – xina kely.

<sup>31</sup> Jesus aguely:

— Deus ingonotyby wawyly tâinwâNSE lelâlâ wâne âmaemo, arâlâ olâ koendâ yeinwâmpyra mawylymo. <sup>32</sup> Inepa ise wodokelymo. Adapâeguywâze âmaemo, itymoam, itymoam ise âmaemo. Urâ kulelâ ise yânllymo. Urâ kulelâba olâ ise urâ, Pabai yagâlâ awylygue. <sup>33</sup> Xirâ modo wâgâ auguely aidyly iraynâlâ, âtywambymoem. Yeinwântâ mawylymogue, koendâ lelâ itaungâ, tâseguâdâzeba. Xirâ anaym mawylymo

ara ton-honre ise âmaemoem; âsenagazeze âmaemo. Tâegane olâ itaungâ. Won-honruma ynynâbaom modo iwymâry Diabu eon-honru takazeno kuru – kely Jesus.

## 17

### *Jesus Tunwym agâ aguehobyry*

<sup>1</sup> Aguenripyryem, Jesus kauram MYK idyly. Deus agâ aguely:

– Pabai, amyguehobyry aralâ ise inepa yiguely. Âmery wawylygue, enehongâ koendonro wawyly, won-honru warâ. Arâ awidly, koendonroem mawyly, on-honru warâ kâenehohoem lâpylâ. <sup>2</sup> Idânârâ iwymâryem witoem amyguewâm. Kâenkyly lelâ asaemo. Âmâlâ lâpylâ asaemo ynynonroem ienehonrimo. Awylygue ise ynynonro modo agâpa kânhenehomba wawyly; igueduomo, aunloenlâ agâ nidâmo. <sup>3</sup> Akaemo aunloenlâ agâ itaynrim modo, idânârâ koendâ kehoem âutudâmo, âmâ lelâ Deus tokaleom mawyly. Utudâ lâpylâ asaemo, Jesus Cristo mâingonotyby wawyly. Kagâpa tyetuneba ise asaemo; igueduomo, idâzemo aunloenlâ kagâ itomoem.

<sup>4</sup> – Koendonro mawyly, on-honru warâ senen-ho, xirâ anaym wawyly ara. Âwanu aiese ugonotobyry sewanike warâ. <sup>5</sup> Pabai, târâ agâ wawyly ume, tâdyren-honze akâwândy urâ, onro peba awyly ume. Tâwâlâ kâdyren-hondonji, izay watay kâdyren-hobury ara.

<sup>6</sup> – Pabai, ynynonroem mânhenehonwâdyby modoram ânguy mawyly senen-ho. Âmâ xurâ lâpylâ asaemo. Âmâlâ ynynonroem ienehoimmo. Amygueho tâinwâNSE asaemo. <sup>7</sup> Tutuze asaemo, idânârâ agânhetaymby modo, won-honru mâundupyguelâ agânhetaynly awyly. <sup>8</sup> Unâ eyanmo kâengatuhuem amyguehobyry segatu. Auguehobyry neinwândâmo. Eydâ matodâlâ mâingonotybyenlâ kâewyly awyly, tutuze asaemo.

<sup>9</sup> – Pabai, âyam kâenkadyly, koendâ asaemo mâentoem. YeinwântâNRY modo mâentoem kâenkadaymba urâ. Ynynonro modo olâ koendâ egâ. Âynynonro lâpylâ mawânkâ asaemo.

<sup>10</sup> Idânârâ ynynonro modo, âynynonro lâpylâ. Idânârâ âynynonro modo, ynynonro lâpylâ. Adâkeday, adientay warâ tânehonzemo, koendonro wawyly, ton-honre wawyly warâ.

<sup>11</sup> – Inepa ise udâly eydâ matoam. Xirâ anaymba ise urâ; asaemo olâ ise tarâlâ, yeinwântâNRY modo duaymo ise-ro warâ. Pabai, koendonro lelâlâ âmâ; inakanhe amitaymba âmâ. Toenzepa ton-honreim lâpylâ âmâ, on-honrugue awitoem yam amygue. Asaemo ynynonro modo egâ on-honrugue, tokaleom ara lelâ itomoem, urâ, âmâ warâ tokaleoem kydawyly ara. <sup>12</sup> Ijipyay, xirâ anaym eagâmo watay, on-honrugue tâensemo keankâ urâ. Asaemo ewy tokalâ kulâ keankâ ynynâba ini. Âunâry awo wâgâ iweniby aralâ keankâ aidyly, aise kehobyry aralâ.

<sup>13</sup> – Inepa ise eydâ matoam udâly. Tarâ xirâ anaym wawyly ara, ynynonro modo xurâem agâ auguely, nâjityembra itomoem, tytyremba wato ara, imâem kehoem iomarumo nidâ. <sup>14</sup> Eyanmo kâengatuhuem amyguehobyry segatu. TâinwâNSE asaemo. Ynynâbaom modo adiendyse ato, adiendyse inkâba asaemo, ynynâbaom modo anhekyly, agânhedyseba wato ara lâpylâ. Awylygue, ynynâbaom modo izepa idylymo.

<sup>15</sup> – Pabai, ynynâbaom modo duaypa mâentyhomoem kâenkadaymba urâ. Diaburam nâdynanâoba itomoem xuahurumoe ikâ wao, uguely olâ. <sup>16</sup> Ynynâbaom modo adiendyse ato agânhedyse inkâba urâ, arâ lâpylâ asaemo adiendysebamo awyly.

<sup>17</sup> Amyguehobyry ara lelâ anidâmo; idânârâ amygueho âkealâ mawânrâ. <sup>18</sup> Âynynâbaom modo duaxi ugonotobyry ara, arâ lâpylâ asaemo kâingonodyly ynynâbaom modo duaxi.

<sup>19</sup> Âyam kâtuly, idânârâ agânhedyse mato agânhetoem, kâenmakehomoem. Arâ awidlylâ amâ xurâem itomoem, ize mato anhetomoem warâ.

<sup>20</sup> — Asaemo lelâba māentoem kāenkadyly. Asaemo ywâgâ aguely tindatuo yeinwânni modo olâ egâ lâpylâ. <sup>21</sup> Pabai, kāenkadyly, idânârâ yeinwânni modo tokaleom ara lelâ itomoem. Tokaleom ara kagâ itomoem kāenkadyly, yagâ mawyly ara, agâ wawyly ara warâ nidâmo. Tokaleoem nidâmo, yeinwântâny modo âmâlâ ugononi awyly nhutuhomoem. <sup>22</sup> Ton-honre witoem, koendonroem witoem warâ amyguehobyry ara lâpylâ eyanmo auguely, eon-honromoem, koendonroem itomoem warâ. Arâ awidly, tokaleom ara lelâ itomoem, yagâ tokaleom mawyly ara, agâ wawyly ara warâ. <sup>23</sup> Augueondyly, Pabai. Tokaleom waunlo ara eagâmo wawyly; tokaleon-ro waunlo ara yagâ mawyly. Aituo tokaleom ara lelâ kagâ awylymo. Arâ tientuo, ynynâbaom modo xutuzemo, âmâ ugononi awyly, ywynedo ara lâpylâ māinwynedylymo warâ.

<sup>24</sup> — Pabai, âdykâ watodâlâ, yagâ ize urâ ynynonroem mānhenehonwâdyby modo. Kytanrugue kulâ onro kiungudyly iray ywynemâ. Ywynedylygue, koendonroem, ton-honreinhe warâ witoem amyguewâm. Urâ xurâ modo won-honru, koendâ wawyly warâ nhedysemo urâ. <sup>25</sup> Pabai, âdykâ inakanhe amitaymba âmâ. Yeinwântâny modo âutuwâbyra. Urâ olâ âutudâ. Akaemo yeinwântoem amânhenehoymby modo tutuzemo âmâ ugononi awyly. <sup>26</sup> Akaemoam âtuen-ho, alâ ise awisezedyly, âdara tagonro agâ tâpynedyly nhutuhomoem, ywynedâ âmâ ara, urâlâ eagâmo witoem, nhutuhomoem warâ — kely Jesus tunwym Deusram.

## 18

*Jesus nhawâtomobyry, nhemakâjihomobyry warâ  
(Mt 26.47-56; Mc 14.43-50; Lc 22.47-53)*

<sup>1</sup> Deus agâ agueypyem, Jesus xina agâ idâly. Xina xytâguyly; paru egatudo Cedrom xina nhekuâdyly; xina salokuly. Xina idâly toenzepa se modope atoam. <sup>2</sup> Judas, Jesus iduery modo emaxi egamenribyry, tutuze lâpylâ ani mâtârâ âji Se Oliveira Eka. Tâtâzezema kâinane xina myarâ Jesus agâ. <sup>3</sup> Târâ awyly tutuze tawylygue, Judas idâly Se Oliveira Ekaram sodadu pymâ romano ingonotyby modo agâ. Fariseu domodo, kurâdo eynynâ Deus agâ aguewâni modo iwymârydo warâ, Deus ety iguardary modo ingonodylymo Judas agâ. Espada, se, esagon-ho, tyatygueim warâgue tâmatunemo lelâ. <sup>4</sup> Tutuzelâ Jesus idânârâ âdy aini awyly. Eagâmo oxioze idâly. Nhapâiguelymo:

- Ânguya mâwinlymo? — kely.
- <sup>5</sup> — Jesus Nazaré donro — kelymo.
- Mâkâ mâwinlymolâ urâ! — kely Jesus.

Eagâmolâ akâwâm Judas, Jesus egamenribyry. <sup>6</sup> “Mâkâ mâwinlymolâ urâ” Jesus keduo, âjihujiguylomo, onro onwa ihuguewâdylymo. <sup>7</sup> Ihugueybyem, sautuomo, Jesus agueondyly:

- Ânguya mâwinlymo? — keondyly.
- Jesus Nazaré donro — keondylymo.

<sup>8</sup> — “Mâkâlâ urâ” ugueanselâma. Urâ mâwinlymo atay, asaemo yagonro modo tâwâlâ nâtâmo — kely.

<sup>9</sup> Deus agâ adâkeday, “Tâensemo urâ. Tokalelâ olâ keankâ yagâpa ini” tâkehobyry wâgâ. Guarda domodoram nhekadyly tynynonro modo nawâpyra itomoem.

<sup>10</sup> Simão Pedro tyspadary nhetyly ety odayba, kurâdo eynynâ Deus agâ aguewâni modo iwymâry kuru ety oday tâwaneim Malco keho iwantary aho eynynonro nhatâly.

<sup>11</sup> Aituo Jesus aguely Pedroam:

— Adâiseba ikâ. Âdahoru ekanâgâ. Pabai aguehobyry ara âsenagazeze urâ. Tâwâlâ lelâlâ wâne tâdâsenagazedyly eon-honru, tânyzeim tudureim kâenly-ro waunlo ara kehoem — kely.

*Jesus Anás enado satobyry*

<sup>12</sup> Ilâpygueduo, sodadu domodo iwymâry, sodadu domodo warâ Jesus nhawâdylymo, nhemakâjilymo. Deus ety iguardary domodo eagâmo adâisemo lâpylâ ani. <sup>13</sup> Waunroem kuru nhadylymo Anás etyram, Caifás imeindamunra. Mârâ ume kurâdo eynynâ Deus agâ aguewâni modo iwymâry kuru Caifás. <sup>14</sup> Caifâslâ awârâ iraynâ judeu domodo iwymârydoam agueim: “Tokalâ iguelylâ ise koendonro, idânârâ kyiguepa kitoem” keim.

*Pedro, “Jesus kâuntuwâbyra urâ” kehobyry  
(Mt 26.69-70; Mc 14.66-68; Lc 22.54-57)*

<sup>15</sup> Simão Pedro, urâ warâ xina idâly Jesus sani modo nhapygue âgânâ. Tâdutuoze ani urâ, kurâdo eynynâ Deus agâ aguewâni modo iwymâryam. Awlygue kâzekaunâoly lelâ âtâ idaseraji Jesus nhapygue. <sup>16</sup> Pedro olâ kuoholâ tâxiânze, pyanta iwaguepa. Pedro yagâ negawâmpyra awly kâentuo, iegasely, auguely pekodo agâ, pyanta taseraji tâzegawânto enahungueim agâ:

— Tâwâlâ yataen-ho negawândâ — uguely.

Augueduo pekodo pyanta nhenahunguely, Pedro egawântoem. <sup>17</sup> Aituo pekodo eyam aguely:

— Awâkâ uguondo eynynonro modo ewylâ âmâ — kely.

Adâkehonduo:

— Mâkâ mâkeba urâ! Kâuntuwâbyra urâ awâkâ! — kely Pedro.

<sup>18</sup> Kopae igâwynugue târâ tâwanuneim modo, guarda domodo warâ taseray peto emanânímobryryem. XYDYK, XYDYK warâ peto tânâmize awylymo, tâuntomoem. Pedro âundylâ lâpylâ eagâmo.

*Jesus, kurâdo eynynâ Deus agâ aguewâni modo iwymârybyry enado aguehobyry  
(Mt 26.57-68; Mc 14.53-65; Lc 22.54,66-71)*

<sup>19</sup> Anás Deus agâ aguewâni modo iwymârybyry Jesusram aguely:

— Akaemo agonropyry modo wâgâ aguekâ yam. Ânguyka akaemo? Âdyka keankâ mânomedâdomo? — kely.

<sup>20</sup> Jesus in-hoguly:

— Totoenzeba keankâ auguezesedyly. Âtâ tâdâtâdyguyho modo oday, Deus etydâ idânârâ kurâdo âtâdyguyho oday warâ kâenomedâdaymo, toense kulâ inkâba keankâ auguely. <sup>21</sup> Ydataynrimbyry modo tutuzemo âdy kâenomedâdomobryry awly. Akaemo sapâiguegâ, urâ mâkeba — kely.

<sup>22</sup> Arâ Jesus agueduo, Deus ety iguardary ewy eydâ iwaguepaom inwapagainly, aguely warâ:

— Arâ adâkezeba ikâ kurâdo eynynâ Deus agâ aguewâni modo iwymârybyryam! — kely Jesusram.

<sup>23</sup> Iozepa augueaki watay, iozepa auguehobyry aguekâ. Iozelâ augueaki watay olâ, âdaituoba kulâ ywapagainhagi — kely Jesus.

<sup>24</sup> Awârâpygueduo, Anás aguely guarda domodoram:

— Caifásram Jesus sataungâ, kurâdo eynynâ Deus agâ aguewâni modo iwymâry kruam — kely.

Aituo Caifásram Jesus nhadylymo, emakâjibyenlâ.

*Pedro, “Jesus kâuntuwâbyra urâ” keontobyry  
(Mt 26.71-75; Mc 14.69-72; Lc 22.58-62)*

<sup>25</sup> Târâlâ Pedro, peto opay âundyly. Aituo aguehonly:

— Awâkâ uguondo eynynonro modo ewylâ âmâ — kehonly.

— Mâkâ mâkeba urâ! Kâuntuwâbyra urâ awâkâ! — kely Pedro.

<sup>26</sup> Caifás etydâ tâwaneim ewy Pedro nhedyly, aguely. (Pedro iwantary nhatâby ipemugu ani mâkâ.)

— Nhentai waunlo ara olâ Jesus agâ Se Oliveira Ekadâ — kely.

**27** — Mâkâ mâkeba urâ! Kâuntuwâbyra urâ awâkâ! — keondyly Pedro.  
Pedro aguely umelâ, aukuma igâtudyly.

*Pilatosram Jesus satobyry*

(Mt 27.1-2,11-14; Mc 15.1-5; Lc 23.1-5)

**28** Caifás ety dombyryem Jesus nhadylymo Pilatos ety imâsedo idaseraji, pymâ Rômadâpa ingonotyby etyram emedyly wâgâ. Judeu domodo iwymâry Pilatos ety odaji tâgawândysebamo, judeu keba awylygue. Aguelymo:

— Kâzewenry ara, judeu keba modo ety odaji kâgawântaymba kurâ. Kâgawândyly-ro watay, tywykeim ara kulâ ise Deus kâendyly. Aituo ise xirâ kopae Páscoa kientyguebyra kurâ — kelymo.

**29** Aituo Pilatos ety odaji akaemo tâgawândyseba awylygue, Pilatoslâ egaserim, eagâmo oxioze. Eyanmo aguely:

— Âdara nidâka awâkâ uguondo, ienado mânwentâguedomoem? — kely.

**30** Inakanhe aitobyry wâgâ merâ ewentâdyly. Inakanhe anipyra-ro watay, xarâ xina nenetaymba tâise. Xina ezewenry neinwântaymba merâ — kelymo.

**31** — Âwymârymoanlâ sataungâ. Izewenrymo ara anipyra-ro watay, akaemolâ ne-nagazeneho — kely Pilatos.

Aituo judeu domodo iwymârydo aguely:

— Xinama ânguy nyâen-homba. Âmaemo Roma donropyry modo lelâ aieniem ague-hoymby — kelymo.

**32** Judeu domodolâ xyâen-hoin-ro watay, kruz wâgâ inkâba tâise iguely, romano domodo lelâ mawânkâ ewentâdyby modo kruz wâgâ takâjize xyâen-honrim. Arâ aidyly olâ Jesus “Warâ ise yiguely” kehobyry adahowandoem.

**33** Pilatos tâty odaji egawântondyly. Sodadu domodoram aguely:

— Xarâ Jesus enetaungâ — kely.

Âtâ odaji Jesus nhadylymo. Târâ Pilatos aguely:

— Judeu domodo iwymâry kuruka âmâ? — kely.

**34** Jesus in-hoguly:

— Awârâ yapâigueho angahu odanolâ awârâ? Eagonro modo awârâ ywâgâ âyam agueim? — kely.

**35** Aituo Pilatos aguely:

— Judeu mâkeba urâ. Yangahu oday inkâba xirâ unâry âtugudly. Âpemugudolâ, kurâdo eynynâ Deus agâ aguewâni modo iwymârydolâ warâ inwentâni. Âdara midâka, akaemo iwentâdoem? — kely.

**36** Aituo Jesus in-hoguly:

— Pymâ lelâlâ wâne urâ, xirâ anaymba olâ pymâem wawyly. Xirâ anano pymâlâ urâ-ro watay, ynynonro modo tâjitoguyzemo tâise, iemakehomoem, ienwentâgueni judeu domodo emaxi kâzegameomba witoem — kely Jesus.

**37** Jesus aguely tindatuo, Pilatos aguely:

— Pymâ kuru âmâ? — kely.

Jesus in-hoguly.

— Pymâlâ urâ, amygueho aralâ. Xirâ onro anaynlâ yazely. Unâ iozeno egatuze keankâ kâewyly. Idânârâ unâ iozeno tindadysedo modo koendâ tydasemo, tutuzemo warâ augueho — kely.

**38** Aituo Pilatos aguely:

— Âdyka unâ iozeno mygueho? — kely.

*“Nigue lelâ awâkâ Jesus” Pilatos kehobyry*  
(Mt 27.15-31; Mc 15.6-20; Lc 23.13-25)

Egaseybyem Pilatos agueondlyly Jesus ewentâni modoram:

— Ienanaji, merâ iguehoem! — kely. <sup>39</sup> — Izewenkemo alâ inanry Páscoa māentyguedylymo ume etadâdyby ewy tokalâ kâentaguehonly, âdaunlo uguondo māinduakeybymolâ. Âwymârymo Jesus âdara kânhenehonlyka ize matomo? Kâinmoen-hondyzeka âmaemo? — kely.

<sup>40</sup> Aituo idânârâ in-hogulymo:

— Alâ awâkâ nidâ! Barrabás etaguehongâ! — kelymo.  
Tâmagazeim, kyâim warâ myakâwâm Barrabás.

## 19

<sup>1</sup> Ilâpyryem myani tonlo Roma donro sodadu domodoram Pilatos aguely:

— Jesus sapioguwâdaungâ xikotygue — kely.

<sup>2</sup> Agueduo, sodadu domodo Jesus nhapiogulymo. Ilâpyryem Jesus âwankuem nhedylymo. Tyguyreim koroaem xygatyby myakâwâm Jesus nhangahu onwa nhekylimo, pymâ domodo nhangahu wogonro ara. Âtâ BOH waunlo tapabileingue nhetydâdylymo, pymâdo âzetydâdo ara, âwankuem tientomoem. <sup>3</sup> Iopaji saindylymo.

— Tynrenseim âmâ, judeu domodo iwymâry kuru! — kelymo, âwankuem nhedylymo. Tywapagainzemo myakâwâm.

<sup>4</sup> Pilatos egaseondly. Kurâdoram aguely:

— Idataungâ auguely! Jesus enenehondonze urâ xarâ, xyâhoem urâem âdygue ewentâdo lâpeba mâkâ awyly māunturomoem — kely.

<sup>5</sup> Aituo sodadu domodo Jesus nhenetondlylymo, âtâ BOH waunlo tapabileingue etydâdybyem, koroa tyguyreim xygatyby nhangahu wâgâ warâ.

Pilatos aguely:

— Etaungâ awâkâ uguondo! — kely.

<sup>6</sup> Aituo kurâdo eynynâ Deus agâ aguewâni modo iwymârydo, Deus ety iguardary modo warâ Jesus tientuomo, adaenkelymo:

— Kruz wâgâ nigue! Kruz onwa sakâjien-hongâ, iguehoem! — kelymo.

Aituo Pilatos aguely:

— Âmaemolâ sataungâ, kruz onwa sakâjiwâdaungâ warâ, iguehoem. Urâenma awâkâ âdanipyra — kely.

<sup>7</sup> Târâ âtâdyguywâdyby modo aguelymo:

— Tâwâlâ awâkâ nigue! Uguondo kulâ awâkâ, “Deus agâ âzekibaom urâ” nygue olâ. “Deus imery urâ” nygue lâpylâ warâ. Xina ezewenryem, Deus ara tâidysedonro xyâly lelâ — kelymo.

<sup>8</sup> “Deus imery urâ” nygue Jesus” kely tindatuo lakuru Pilatos, xyâen-honze âseanedly kuru. <sup>9</sup> Tâtô odaxi egawântondly, Jesus târâlâ awylygue, nhapâiguely:

— Âdykonloka âmâ? — kely.

Nihoguba olâ Jesus.

<sup>10</sup> Aituo Pilatos aguely:

— Uhogugâ! Tarâ Jerusalémdâ pymâ kuru wawyly enanâguegâ. Ize urâ-ro watay, omoen-hondâ urâ, kruz wâgâ âehondâ urâ warâ — kely.

<sup>11</sup> — Deus amânhedyse ato lelâ yagâ amânhekyly. Deus aguepa kulâ, âdy yagâ amânhetaymba âmâ. Yâen-honly-ro watay, inakanhe kulâ awârâ, tutuzelâma âmâ, âdara wipyra wawyly yiguehoem. Âsenagazeze âmâ ayenehon-hombyry wâgâ. Mâkâ âyam iegamerimbyry olâ ise akadâ kehoem kuru âsenagazeni — kely Jesus.

<sup>12</sup> Jesus aguely tindatuo, Pilatos aguely:

— Omoen-hoze urâ — kely.

Judeu domodo târâ âtâdyguywâdyby aguelymo:

— “Pymâ ton-honreim urâ” keanry Jesus. Romadâ kywymâry kuru toenzepa tyewiâpaze, tâjipyay pymâ kuruem ise kewâni modo agâ. Awâkâ uguondo maimoen-honlyro watay, pymâ Roma donro agâ iewiâpaze — kelymo.

<sup>13</sup> Aguelymo tindatuo, Pilatos ekadyly tâwentâze, tâwentâzeba warâ awyly agueho mure onwa. Hebraiku-em, “Gabatá” awârâ âji ezedy: “Tadakobâdo tuhugue xygatyby” keze aguely. <sup>14</sup> Kuotataji iseaji Páscoa etyguedo iray akâwâm awârâ aidyly, âtyem todohondly ume. Tonlo modoram Pilatos aguely:

— Etaungâ! Anra tarâ âwymârymo kuru! — kely.

<sup>15</sup> Akaemo olâ adaenkelymo lelâ:

— Kruz wâgâ nigue! Kruz onwa sakâjien-hongâ, iguehoem! — kelymo.

Aituo Pilatos eyanmo aguely:

— Âwymârymo kâyâen-hondyzeka âmaemo? — kely.

Kurâdo eynynâ Deus agâ aguewâni modo iwymâryo olâ warâ in-hogulymo:

— Xina iwymâry mâkeba awâkâ! César lelâ pymâ kuru, Roma donro pymâ ton-honreim! — kelymo.

<sup>16</sup> Aituo Pilatos, Jesus nhegamely sodadu domodoram. Kruz onwa Jesus sakâjize nhadylymo, iguehoem.

*Jesus kruz wâgâ iguehoem sakâjihobyry  
(Mt 27.32-44; Mc 15.21-32; Lc 23.26-43)*

<sup>17</sup> Kruz takâjihio tanâse Jesus idâly âji Calvário kehoram. (“Gólgota” keze aguely hebraiku-em.)

<sup>18</sup> Myarâ saintybyem Jesus nhakâjilimo kruz onwa. Azagâ uguondo kyârimpyry nhakâjilimo lâpylâ, tokalâ aho eynynâ, eagonro pâem eynynâ warâ. <sup>19</sup> Tábua wâgâ iweniehonwânmy Pilatos: JESUS NAZARÉ DONRO MERÂ, JUDEU DOMODO IWYMÂRY KURU kely akâwâm mâtâ wâgâ iweniby azagâ tokalâ warâ itanwe: hebraiku-em, latín-em, gregüem warâ. Kruz wâgâ Jesus nhangawaym sodadu domodoram nhakâjien-honly. <sup>20</sup> Agui judeu domodo mâtâ tábua wâgâ iweniby tytainzemo myakâwâm. Xidadâ iwaguepalâ mâtâ âji Jesus nhakâjihobyry awylygue, toenzepa sakadaynlymo-ro warâ. <sup>21</sup> Kurâdo eynynâ Deus agâ aguewâni modo iwymâryo aguelymo Pilatosram:

— “Judeu domodo iwymâry kuru” kely keba tâise mânwenien-honly. “Judeu domodo iwymâry kuru urâ’ nygue merâ” kely tâise mânwenien-honly — kelymo.

<sup>22</sup> Pilatos aguely:

— Kâinwenien-hoymby, iwenibyenlâ ise! — kely.

<sup>23</sup> Kruz onwa Jesus tiankâjibygueduo, quatro sodadu domodo Jesus ety iwogompyry nhanâdylymo, nhepajiwâdylymo lelâ. Ilâpypyem, ety iwogonro BOH waunlo takâjizeny nhanâdylymo. <sup>24</sup> Aituo âjigue aguelymo:

— Ety BOH waunlo kiaunguepa kine. Dadu kydyânre, mâtâ tyzortygueim ise âtâ BOH waunlo sodo — kelymo.

Aituo arâ aidylymo. Saguhoenlâ myakâwândy Deus itaumbypyry awo wâgâ iwenibyem awyly: “Mâkâem, mâtâem warâ iety ywogonropyry nepajiwâdâmo. Ânguy ietybyry BOH waunlo sodoem ini awyly tiunturomoem dadu namemo” warâ iwenibyem awyly. Arâ aituo iwenihobyry ara kehoem aidyly.

<sup>25</sup> Kruzdâ iwaguepalâ akâwâm quatro pekodo modo: Maria, Jesus ise; Maria ivary; Maria (Magdala donro); Maria (Cleopas iwydy) warâ. <sup>26</sup> On-yam MYK itybyem Jesus tyze nhedyly, iedyly warâ, urâ toenzepa inwyneguuly. Aituo aguely tyzeram:

— Âmerylâ-ro waunlo ara ise awâkâ João nhedyly — kely.

<sup>27</sup> Aguely lâpylâ yam:

— Awâkâlâ yze. Egâ, âzelâ mânkyly-ro waunlo ara lelâ — kely.

Agueduo, yze aralâ mâtâ kâendyly-ro warâ Jesus ize awyly. Ilâpyryem ietyram kandyly kâentoem.

### *Jesus iguehobyry*

(Mt 27.45-56; Mc 15.33-41; Lc 23.44-49)

<sup>28</sup> Ilâpygueduo tutuze myakâwâm Jesus kâmakehoem aiese tâetobyry âwanikely awyly. Saguhoenlâ Deus itaumbyry awo wâgâ iweniby aguehobyry ara aidyly aitoem aguely:  
— Tatuanze urâ! — kely.

<sup>29</sup> Tâlâ akâwâm vinhu nhewantybygue etary tumykeim. Mârâ ikaji esponja inkuiyimo. Se hissopo wâgâ ekâjibyem, Jesus itaryam nhalokuândylymo, nhugakâin-hoem. <sup>30</sup> Mârâ xugakâinrimbyryem, aguely.

— Iweâma alâ aiese kâetobyry!

Arâ aguely kâmakehoem aiese tâetobyry âdypygueândyly awylygue. Agueypyem, enagozely, iguely lelâ.

### *Lançague Jesus eledydâ ihoguyhobyry*

<sup>31</sup> Aituo judeu domodo iwymârydo Pilatosram idâlymo, aguelymo:

— Kruz modo onwa sakâjiwâdyby izepa enra xina târâ awyly xirâ kopae, kopaelâgâ warâ. Sodadu domodoram ixinarymo xukawânehongâ, inepa iguehomoem, egueypy-mobyry niguampyralâ etyhoem — kelymo eyam.

Tâzekobyzegueho adagulylâ mawânrâ tynrenseim lelâlâ ani mâtâ tâzekobyzegueho-ro warâ, Páscoa etyguedo awylygue. Inakanhe mawânrâ tâise âty tynrenseim ume kehoem âguedy sakâjibyem awyly. Awylygue târâpa enâtâguyly, sadyly warâ ize awylymo.

<sup>32</sup> Aituo nhekadybymo ara Pilatos anhenehonly. Sodadu domodo idâly. Jesus eapay kruz wâgâ sakâjiwâdyby modo ixinary nhukawâdylymo, mâtâ ewânugue inepa iguehomoem. <sup>33</sup> Jesus iopaji saintybyem olâ, igueypyem awyly nhedylymo. Awylygue ixinary nukagâbyra awylymo. <sup>34</sup> Sodadu domodo ewy olâ akâwâm eledydâ Jesus tuhoguyze tylançarygue. Inepa kehoem iunu paru agonro ihuguely.

<sup>35</sup> Urâ Jesus kruz wâgâ iguely enipyrylâ xirâ egatuim. Urâ kâentyby lelâlâ xirâ kâengatuly, mânwântomoem lâpylâ. Âkealâ xirâ kâinwenily. Kâinweniby ara kehoem akâwâm aidyly. <sup>36</sup> Warâ myakâwândy saguhoenlâ iwenibyem awyly Deus itaumbyry awo wâgâ: “Ibyry ewy âdaunloenlâ tukagâduneba ise” warâ iwenibyem awyly. Aralâ akâwâm aidyly-ro warâ. <sup>37</sup> Arâ lâpylâ Deus itaumbyry awo wâgâ iwenibyem awyly: “Es-emo mâtâ lançague tin-honguybymo” warâ iwenibyem awyly. Awârâ aituo saguhoenlâ Deus inwenien-hoymby ara kehoem aidyly.

### *Jesus egueypybyry tuhu imâsedo tâtagueim odaji nhetadâdomobyry*

(Mt 27.57-61; Mc 15.42-47; Lc 23.50-56)

<sup>38</sup> Aituo myakâwâm José Arimatéia donro Pilatosram idâly agueze:

— Jesus nigueaki, Pymâ. Kruz wâgâpa kâyntâguyândyze olâ urâ, tuhu imâsedo tâtagueim odaji kâenkanâdoem. Tâwâlâ kâyntâguyândy? — kely.

— Tâwâlâ — Pilatos keduo, José idâly myakâwâm.

Jesus einwânni lelâlâ myakâwâm José, ânguram negatuba olâ-ro warâ, pymâdo tyn-tadylygue. Aituo myakâwâm José, Jesus egueypybyry kruz wâgâpa nhytâguyândyly, nhaleholo-ro warâ. <sup>39</sup> Nicodemos kopae Jesus agâ agueze idâypy, José agâ idâwâm lâpylâmy. Toenzepa myakâwâm Nicodemos aloés, mirra warâ nhadyly, trinta e cinco kilos lelâ, mâtâ edunu tyânrânguneim âguedy onwa tientoem, inepa egueypybyry niwânzepa itoem. <sup>40</sup> Jesus egueypybyry nhadylymo, intuwynlymo, panu Nicodemos nhatyby tyânrânguneimpe tientybygue; kâzewenry awârâ, kâgueypybyry kiontoem.

<sup>41</sup> Kruz wâgâ Jesus iguehobyry iwaguepa, tâlâ myakâwâm âji toenzepa se imâsedo modo etâdyby, jardim keho. Mârâ jardindâ tâlâ myakâwâm tâtagueim iwelo esagueyby tuhu imâsedo oday ânguy igueypy tâtagueyby. <sup>42</sup> Iwaguepalâ

myani mārâ jardim, Calvariodâ. Awylygue José, Nicodemos warâ Jesus eguepybyry myarâ nhetadâdylymo, tâzekobyzegueho adagulyâ awylygue.

## 20

### *Jesus kurâem itondobyry (Mt 28.1-8; Mc 16.1-8; Lc 24.1-12)*

<sup>1</sup> Domingo, pealâ koendâ nemepyra awyly umelâ myani Maria Magdala donro Jesus eguepybyry etadâdobryam idâly. Saintybyem, tâzegawânto enahun-ho tuhu ejikebyem awyly nhedyly. <sup>2</sup> Aituo tâgase kehoem xinaram idâly. Toenzepa urâ Jesus inwyneuguyly, Pedro warâ xina eydâ atoam idâly. Mâkâ xinaram aguely:

— Kywymâry Jesus eguepybyrymy etadâdobrydâba netymo. Âdyam nhetomobyry tutuzeba-ro warâ — kely.

<sup>3</sup> Aituo Pedro, urâ warâ âguedy etadâdobryam xina idâly. <sup>4</sup> Xina egatudyly. Pedro takaze olâ akâwâm iegaky awylygue waunroenlâ yaindyly. <sup>5</sup> Ioday kâentoem kâzewyly; panu linhuguelo kâendyly, iegawâmpyra olâ akâwâm urâ.

<sup>6</sup> Yaimpygueduo akâwâm Pedro saindyly, egawândyly alelâ. Târâpa Jesus eguepybyry. Panu âguedy ituwyn-hobyry lelâ nhekyly. <sup>7</sup> Panu apiduby Jesus nhangahu wogonropyry lelâ warâ nhekyly. Mârâ Jesus ituwyn-hobyry modo duaypa nhangawyn-hobyry, âikâlâ.

<sup>8</sup> Urâ, waunroem saintyby, tâtagueim odaji iegawândyly lâpylâ, âguedy etadâdobryam. Aguedy târâpa awyly kâentuo, kâinwândyly Jesus kurâem itondobyry. <sup>9</sup> Iwenibyem Deus itaumbyry awo wâgâ, Messias igueypyem kurâem itonze, kely. Tâenselâ, tydaselâ warâ lelâlâ wâne xina. Arâlâ olâ xina awârâ nutuba lelâ awyly. <sup>10</sup> Koendâ kehoem enuagaenibyryem, tâtyam xina odopâdyly.

### *Jesus Maria Magdala donroram âepanâguehobyry (Mt 28.9-10; Mc 16.9-11)*

<sup>11</sup> Âguedy etadâdobry kuoholâ myakâwâm Maria Magdala donro ohogüendyly. Tuogunru umelâ, âzewyly, IU idyly. <sup>12</sup> Azagâ anju nhedyly, âtâ tapekeingue âzetydâdybyem, Jesus eguepybyry etadâdobrydâ ekadybymoem; târâpa itybyem olâ Jesus eguepybyry. Tokalâ ekadybyem awyly nhangahu ejidypyrydâ, eagonro ekadybyem awyly ihuru ejidypyrydâ warâ. <sup>13</sup> Anju domodo pekodo nhapâiguelmo:

— Âdaituoka ogunru? — kelymo.

Aituo pekodo in-hoguly:

— Ywymâry eguepybyry nadâmomy. Âdyam nhetomobyry kâuntuba olâ urâ-ro warâ — kely.

<sup>14</sup> Awârâ agueypyem, MYRYK idyly. XYDYK warâ uguondo nhedyly. Jesuslâ myakâwâm; nutuba olâ mâkâem awyly. <sup>15</sup> Aituo Jesus aguely:

— Âdaituoka ogunru? Ânguka mâwinly? — kely.

Mârâ âji enilâ-ro waunlo ara mâkâ enanaji. Awylygue in-hoguly:

— Âmâlâ eguepybyry tarâpa etyin-ro watay, âdyam mânhetobyry yam aguekâ. Urâ ise eagonro âjiam sanehoim — kely pekodo.

<sup>16</sup> — Maria! — kely Jesus eyam.

Tâzedy wâgâ tygâseduo, Jesus lelâlâ awyly nhutuly, aguely:

— Rabôni! — kely. (Hebraiku-em, “Ywymâry” keze awârâ aguely.)

<sup>17</sup> Jesus aguely:

— Yawâdâ. Pabairam kodopâdaymba lelâ urâ. Ynynonro modoram idâ, akaemo konodo ara kehoem kâinwyneuguyly modoram. Warâ eyanmo aguekâ: “Pabairam ise kodopâdyly, mâkâ Pabai myguehomo, âDeusrymo warâam’ keanry Jesus” kera eyanmo — kely.

<sup>18</sup> Aituo Maria Magdala donro xina eydâ atoram idâly; xinaram aguely:  
 – Kywymâry Jesus kurâem itondypyem setai – kely.  
 Tyam Jesus aguehobyry xinaram nhegatuly.

*Jesus tynynonro modoram âepanâguehobyry  
(Mt 28.16-20; Mc 16.14-18; Lc 24.36-49)*

<sup>19</sup> Mârâ domingo, kopaelâ, âjigue âtâdyguybyem xina Jesus eynynonro modo. Pymâdo tawânehonly tytaze akâwâm xina. Awylygue pyanta modo koendâ kehoem enahunwâdybyem awyly. Pyanta enahuymby ozelâ Jesus egawândyly; âepanâguely xina ontay kehoem. Xinaram aguely:

– Tâseguâdâzeba itaungâ, tyanepa warâ – kely.

<sup>20</sup> Ilâpyryem xinaram tâmary kruz onwa takâjihobyry nhenehonly; sodadu lançague tuhoguyhobyry nhenehonly warâ. Emarydâ, eledydâ warâ xyâhobyry tientuo, tutuze akâwâm xina, Jesus lelâlâ mâkâ awyly. Awylygue toenzepa akâwâm xina ohomaendyly.

<sup>21</sup> Aituo Jesus agueondyly:

– Tâseguâdâzeba itaungâ, tyanepa warâ. Pabai ugonotobyry ara lâpylâ ogonodylymo, unâry mâengatuhomoem – kely.

<sup>22</sup> Ilâpyryem xina onwa ÂBU kely, aguely:

– Tâwâlâ Deus Ispiritury âyanmo nâedâ. <sup>23</sup> Deus izepa ato aienibyry modoam, “Deusram ekaze urâ, inakanhe amitomobyry nhygakehoem” mygueduomo, Deus xygakeze lelâ. “Inakanhe amitomobyry Deus nygakeba itoem ekaze urâ” mygueduomo olâ, Deus nygakeba ise – kely xinaram.

*Jesus Toméram aguehobyry*

<sup>24</sup> Xinaram Jesus âepanâgueday, xina agâ inkâba akâwâm Tomé; xina eataen-ho Jesus eynynonro lâpylâ mâkâ. “Azagonropyry” kely lâpylâ mâkâ ezedy. <sup>25</sup> Ilâpygueduo, saimpygueduo, eyam xina aguely:

– Kywymâry Jesus kurâem itondypyem xina netai – xina kely.

Xina neinwâmpyra olâ mâkâ.

– Mâkâ kurâem itondypyem awyly kâinwântaymba urâ. Kâinwândyly ise, pregugue emarydâ sakâjihobyry kâendyly, iemarygue MÂ’ kânhedyly, sodadu tylançarygue eledydâ in-hoguyhobyry iemarygue MÂN kânhedyly warâ watay lelâ ise kâinwândyly – kely.

<sup>26</sup> Tokalâ semana sakaniubyryem xina âtâdyguyondyly târâ, pyanta modo enahunwâdybyem kadiaduge. Ilâ ume Tomé târâlâ xina agâ. Pyanta enahuymby ozelâ Jesus egawândyly xina ontaji lelâ. Idânârâ xinaram aguely:

– Tâseguâdâzeba itaungâ, tyanepa warâ – kely.

<sup>27</sup> Ilâpyryem Toméram aguely:

– Egâ iemary ihoguyhobyry; imary nhonwa iekâ. Iwâry saunâkâ, ieledydâ ihoguyhobyry onwa imary iekâ. Mâinwâmpyra mawyly imogâ. Kurâem itondypyem wawyly einwânkâ – kely.

<sup>28</sup> Aituo Tomé eyam aguely:

– Ywymâry, yDeusry warâ âmâlâ! – kely.

<sup>29</sup> – Kurâem itondypyem wawyly mânwândyly, ietuo kulâ, tuomare âmâ-ro warâ. Tuomareim kuru olâ ise iepyralâ yeinwânni modo! – kely Jesus.

*Âdaituo João, Jesus wâgâ inwenily awyly xutuho*

<sup>30</sup> Xina eynynonro modo tâense akâwâm toenzepa lelâlâ ton-honrugue anhetyby. Xirâ pape wâgâ kâinwenipa olâ urâ idânârâ kehoem adyesenry modo Jesus anhetyby. <sup>31</sup> Xirâ pape kâinwenily olâ, Jesus tâinwânszelâ mitomoem, Deus Ingonyby Messias awyly mânuntuuhomoem. Deus imery awâkâ Jesus. Tâinwânsse âmaemo-ro watay, aunlolâ ise agâmo awyly. Âiguelymo watay, Deusram idâze âmaemo, aunloenlâ eagâ mitomoem.

## 21

### *Jesus âepanâguehobyry sete lelâ tynynonro modoram*

<sup>1</sup> Awârâpygueduo, Jesus âepanâgueley tynynonro modoram. Saimu imâsedo Tiberíades emelay xina awyly ume Jesus âepanâgueondly xinaram. (“Saimu Galiléia” kelygue lâpylâ mâtâ ezeku.) Aityby ise âyanmo kâengatuly. <sup>2</sup> Xina sete lelâ âjigue târâ xina awyly: Simão Pedro, Tomé (Azagonropyry kelygue tâzekeim), Natanael (Caná, Galiléia eynynonro), urâ João, paigo Tiago, azagâ xina eataen-ho lâpylâ warâ. <sup>3</sup> Aituo Simão Pedro aguely xinaram:

- Pepi oday kanra saweze ise udâly — kely.
- Agâ kanra saweze idâze lâpylâ xina — xina kely.

Aituo idânârâ xina idâly saimu emelaji. Pepi odaji xina âxiedly. Emedyly ara kehoem âedâ paikaji samezesaze xina awyly, ânguy niwympa olâ. <sup>4</sup> Emedyly wâgâ, paru emelay uguondo xina nhedyly. Jesuslâ akâwâm mâkâ, xina nutuba olâ. <sup>5</sup> Aituo Jesus ago kehoem aguely xinaram:

- Âdara kanra mawweakimo? Agui mawweakimo? — kely.

Xina in-hoguly:

- Ânguy xina nawewâpyra enra! — xina kely.

<sup>6</sup> Xinaram aguely:

- Pepi eahoru yan-yam âedâ samewâdaungâ. Toenzepa sawâse âmaemo — kely.

Aituo xina âedâ nhamely. Inepa kehoem kanra modo inwynly. Toenzepa awylygue, pepi odaji epâguely xina nemaembâ akâwâm. <sup>7</sup> Aituo urâ João, Jesus toenzepa in-wyneguuly, Pedroram auguely:

- Kywymârý Jesus mâkâ! — uguely.

Simão Pedro auguely tindatuo, tâty BOH waunlo nhetondly, kanra tianwâtoem tientyby. Paikaji adamely. Sagunuram idâly tywâre, inepa Jesusram taintoem. <sup>8</sup> Pepi oze xina idâly, tykâgueze, âedâ kanrague tumyke tâpâgueze, cem metros awârâem kulâ saintoem sagunu onwa. <sup>9</sup> Pepi odayba âzetybyem, peto ehoru kanra pylâ nhangatay âjihuly-ro warâ xina nhedyly. Pâobe lâpylâ akâwâm peto opay. <sup>10</sup> Aituo xinaram Jesus aguely:

- Awâkâ kanra manwâtybymo ewy âenetaungâ — kely.

<sup>11</sup> Aituo Simão Pedro pepi odaji âxiedly. Âedâ sagunu wâgâ nhuxidyly. Tumyke kehoem mâtâ âedâ, cento e cinquenta três kanra imâsedo modogue, nadatâwâbyra olâ mâtâ âedâ.

<sup>12</sup> — Âwinduataungârâ — kely Jesus.

Jesuslâ awyly tutuzelâ akâwâm xina, tywypaze olâ akâwâm xina, mâkâlâ awyly tiuntuhoem eyam agueze. <sup>13</sup> Aituo Jesus iopaji xina saindyly. Pão nhanâdyly. Xina ara nhepajiwâdyly. Xina ara lâpylâ kanra âjihuyby nhepajiwâdyly.

<sup>14</sup> Jesus kurâem itondbyem, azagâ tokalâ warâ âepanâguely idyly akâwâm xina tynynonro modoram.

### *Jesus Pedroam aguehobyry*

<sup>15</sup> Xina âwinduapygueduo, Jesus Simão Pedro nhapâiguelly:

— Simão, João Betsaida donro imery, toenzepa lelâlâ ywynedâ âmâ âdydo imeom takaze kehoem? — kely.

Aituo Pedro in-hoguly:

- Tutuzelâ âmâ, toenzepa âize wawyly — kely.

— Arâ atayma ywâgâ aguekâne iwelo yeinwânni modoram. Tâguy ovelha imery nheto ara egâmo — kely Jesus.

<sup>16</sup> Aituo Jesus agueondly:

- Simão, toenzepa lelâlâka ywynedyly? — kely.

– Tutuzelâ âmâ, toenzepa âize wawyly – kely Pedro.  
 – Arâ atayma ywâgâ aguekâne yeinwânni modoram. Ovelha eni ovelha nheto ara lâpylâ egâmo – keondyly Jesus.

<sup>17</sup> Jesus agueondyly, saguhoem adâkehobyry araba:

– Simão, toenzepa yize mawyly? – kely.

Awârâ tindatuo, Pedro itywandyly, in-hoguly:

– Idânârâ xuturinlâ âmâ; toenzepa âizetonro wawyly tutuzelâ âmâ – kely.

Aituo Jesus agueondyly:

– Arâ atayma ywâgâ aguekâne yeinwânni modoram. Ovelha eni, ovelha nheto ara egâmo – kely Jesus.

<sup>18</sup> Salokuzenomoe mawyly ume, ton-honre ani âmâ, ize matobyryam mydâhoem. Xirâ âyam augueho olâ ise âkealâ. Agaityoem mituo âzemakâjioze âmâ. Mydâdyseba matoam ise madaholy – kely Jesus.

<sup>19</sup> Awârâ arâ adâkeday, Jesus nhutuen-honly, âdara Pedro iguely awyly. Arâ Pedro tyigueho odaji kehoem Deus nheinwântobyry wâgâ ise Deus âzechogueoly Pedro eon-honru nhuduhobyry wâgâ.

Aituo Jesus Pedroram aguely:

– Ynynonroenlâne ikâ – kely.

### *Jesus João agâ aguehobyry*

<sup>20</sup> Pedro ikaynâ akâwâm urâ, urâ toenzepa Jesus inwyne guyly. Kopae Páscoa ume xina âwinduatay, urâlâ akâwâm Jesus eatado ekani; urâlâ, “Ânguya ise igamenri âehondyzedo modo emaxi?” kerim.

Âdara tyigueley awyly wâgâ Jesus aguely idanipyryem, Pedro MYRYK idyly. Tykaynâ iedyly. <sup>21</sup> Jesus nhapâiguel:

– Âdyka ise João agâ aini? – kely Pedro.

<sup>22</sup> Jesus in-hoguly:

– Awârâ wâgâ tâtynanâzeba ikâ. “Kodopâdo odaji niguepa nidâ” uguely watay, mâmuntuly mâkeba awârâ. Yeinwânsededyly wâgâ lelâ âtynanâgâ – kely Jesus.

<sup>23</sup> Awylygue âjigue Jesus einwânni modo aguelymo: “ ‘Kodopâdo odaji niguewâpyra ise João’ nygue Jesus” kelymo. “Âiguewâpyra ise âmâ” kewâpyra akâwâm Jesus ywâgâ. Warâ ani aguely: “ ‘Kodopâdo odaji niguepa nidâ’ uguely watay, awârâ modo wâgâ tâtynanâzeba ikâ” kely Pedroram.

<sup>24</sup> Kâentyby, kâindatyby warâ xirâ kâinwenily Jesus eynynnonrolâ urâ João toenzepa inwyne guyly. Idânârâ yataen-ho modo tutuzemo âkealâ xirâ pape wâgâ kâinwenily awyly.

### *Iwenihobyry xypyry*

<sup>25</sup> Tâlâ wâne xirâ pape wâgâ kâinweniby. Tâlâ olâ toenzepa âdydo imeom modo Jesus anhetaymby. Idânârâ kehoem anhetyby, aguehobyry warâ iwenily watay, toenzepa lelâlâ tâise livrupe awyly! Idânârâ onro anaym pape iweniby ejidy lâpeba tâise.

João

## ATOS Tunâry Egaturin-em Jesus Induakewâdyby Modo Aitobyry

Xirâ livru wâgâ Lucas inweniby Deuslâ myakâwândy nhangahu odaji ieni. Awylygue Deus itaumbyrylâ xirâ, Lucas olâ iweninri, Deus eydâ atoam Jesus odopâbygueduo, Jesus wâgâ egatuimbyry modo wâgâlâ Deus anhekyly modo kiuntuhoem.

Jesus tunâry egatudyze awyly myakâwândy xidadâ Jerusalémdâ, Judéia, Samaria warâ eynynâ, âtâ anary iwagueno mododâ lâpylâ warâ. Tytainze kurâ, unâ koendonro tâdâsemagueho Jerusalémdâ nhegatuhomobyry, Pentecostes etyguedo ume Deus Ispiritury xytâguyhobyry, Pedro, João, Filipe, Barnabé warâ ewanomopyry warâ.

Jesus nheinwândyly iraynâ, Saulo myakâwândy Paulo ezedy; Jesus eynynonro modo enagazeni myakâwândy mâkâ. Damascoram Jesus einwânni modo etadâze idâday myakâwândy Jesus eyam âepanâguely. Ilâpygueduolâ myakâwândy nhangahu oday xunâry âtuguguely. Jesus einwânniem idyly lelâ-ro warâ.

Paulo tataen-ho modo agâ iwague âxiguewâmy, Jesus xunâry egatuze. Deus Ispiritury ewanu wâgâ tutuze kurâ xirâ livru wâgâ. Mâkâ mawânkâ turâ modo Jesus xurâem ewanumo ume sagâikeinmo, eon-hondâimo warâ.

Xirâ livru wâgâ mawânrâ Deus itaumbyry egatuhobyrty kintainly, judeu keba modoram âzeinwâñ-hon-hombyry warâ. Paulo, Silas warâ Jesus wâgâ agueduomo âzetadâonwânmomy kadeia odaxi. Judeu domodo, romano domodo warâ iwymârdo enadoram âepanâguewânmomy. Jesus tyeinwândylygue eyanmo unâ tâdâsemagueho egatuly nimopa olâ myakâwândy.

### *Agueley adaguho*

<sup>1-2</sup> Âyam xirâ pape kâinwenily, Teófilo. Azagâ ieto xirâ kâinwenily. Waunro kâinweniby wâgâ Jesus tarâ onro anaym tâwanu nhaguday anhetyby, nhenomedâdobyry warâ, kayam idâhobryam. Deus eydâ atoram tâtâly iraynâ, Deus Ispiritury eon-honrugue, tunâry egaturin-em tinduakeyby modo eon-honru xuduwanmy, aitomoem, aguehomoem warâ.

<sup>3</sup> Kurâem tâitombygueduo, quarenta emedyly ara tâepanâguezezelâ myani tunâry egatuwâni modoram. Toenzepa adyesenry modo Deus eon-honrugue adyeze myani, igueypyemba tawyly tienehon-hoem. Âdara Deus pymâem kuru idyly awyly wâgâ myani eagâmo aguely. <sup>4</sup> Tunâry egaturin-em tinduakeyby modo agâ Jerusalémdâ tatay, warâ myani Jesus eyanmo aguely:

— Tâgasezeba wao itaungâ xirâ âtâ anaymba. Tarâlâ wao itaungâ, Deus Ispiritury âyanmo saindyly ara. Saguhoem âyanmo, “Deus Tyispiritury igonose” uguelâ. Saindyly inwânwântaungâ wao. <sup>5</sup> Saguhoem João batiza nhedyly ani parugue. Iweâpa nipyralâ olâ ise Deus Ispiriturygue batiza mâieholymo, ynynonroem mawylymo mânehon-homoem — kewânmy Jesus.

### *Deus eydâ atoam Jesus âkuhobyrty*

<sup>6</sup> Tunâry egaturin-em tinduakeyby modo agâ âtâdyguybyem myani Jesus. Aituo myani akaemoram adapâigueoly:

— Pymâ, anri ise iweâma kypemugudo israelita domodo eon-honru mâunduly, âjiguelâ kywymâgoem, Roma donro modo keba kywymâry itoem? — kelymo.

<sup>7</sup> Aituo myani Jesus in-hoguly:

— Tâseguâdâzeba itaungâ awârâ wâgâ. Pabai Deus “Warâ ise aidyly” kehobry saintuo, idânârâ aguehobry ara aise. Mâuntulymo keba ise anhekyly modo; âdara aidyly awyly mâuntuwâbyra ise âmaemo. Pabai kulelâ xuturim. <sup>8</sup> Deus Ispiritury âyanmo saintuo olâ,

on-honrumo xuduze, unârybyry mâengatuhomoem. Waunroem kuru tarâ Jerusalémdâ ise unârybyry mâengatulymo. Ilâpyryem ise Judearam, Samariaram warâ mydâlymo unârybyry egatuze; ilâpyryem ise idânârâ kurâdo onro anano modo ara-ro warâ – kely myani Jesus.

<sup>9</sup> Tunâry egaturin-em induakeyby modo agâ awyly umelâ myani Deus eydâ tatoram nhalokuânehonly. Âkuly umelâ myani eunu duaxi xuzadyly. Aituo myani nepyra idylymo. <sup>10</sup> Târâ Jesus âkuhobyrydâ nhesedylymo ume myani azagâ anju, uguondoem tapekeingue tâtyem âepanâguelo; Deus emary myani akaemo. Jesus tunâry egaturin-em induakeyby modoram myani âewylymo. Aituo myani aguelymo:

<sup>11</sup> — Nhaum, Galiléia donro modo, âdaituoka kaynâ lelâ inurumo? Âydâmopa nitai wâne mâkâ Jesus odopâze olâ. Iwerâ âkuly mâmentonobyry ara lâpylâ ise odopâdyly, âzeholy – kelymo.

### *Judas etaybyanoem Matias induakehomobyry*

<sup>12</sup> Aituo myani Jesus tunâry egaturin-em induakeyby modo odopâdaynly Jerusalémram, iwyry Se Oliveira Eka dombyryem. Tokalâ kilômetro myani mâtâ anaymba awyly. <sup>13</sup> Âtâ anaxi saintybyem myani âtâ tâxidâdomobyryanlâ idâlymo. Salá imâsedo kaynonro odaymo myani. Pedro, João, Tiago (Alfeu imery), André, Filipe, Tomé, Bartolomeu, Mateus, Tiago warâ, Simão, (tâty anary izetonro lelâlâ, tawylygue Roma donro kulâ tywymâryem izepaom modo ewy), Judas (Tiago imery) warâ myani akaemo. <sup>14</sup> Aunlolâ myani târâ pekodo modo agâ âtâdyguylymo Deus agâ adâkehoem. Jesus ise, iukonodo warâ târâmolâ lâpylâ myani. Aunlolâ myani akaemo idânârâ idâly, Deus agâ agueze.

<sup>15</sup> Iweâpa nipyralâ myani toenzepa kehoem kurâdo Jesus einwânni modo âtâdyguyly, cento e vinte awârâem myani kurâdo. Âtâdyguybyem awylymo ume myani Pedro saudyly, aguely:

<sup>16</sup> — Nhaum, ydataungâ, Cristo eynynâ ypmugudo. Davi iweniwânni iweâpa mâkâ Judas aitobyry wâgâ. Deus Ispiritury, Daviram inwenien-hoymby ara kehoem keankâ aidyly. Mâkâ Judas keankâ Jesus egamenri. <sup>17</sup> Xina duano lâpylâ keankâ mâkâ, xina agâ tâwaneinhe iduakeyby mawânkâ keankâ. <sup>18</sup> Âmaemo, Jerusalém donro modo tutuze âmaemo Judas dinheru nhemakehobyry, Jesus iduery modoram tiengamehoem. Mâtâ dinheruguelâ mykeankâ onro adanâholy. Târâlâ mykeankâ kaynâpa tâihugueduo, atuly. Atuduo, idânârâ kehoem ekomiry modo egasewâdyly warâ. <sup>19</sup> Idânârâ Jerusalém donro modo aityby nutumo. “Aceldama” kelygue mâtâ âji nhezetâdylymo. (“Xyâhoem egamehobyry ebyrygue sanâtyby” keze aguely) – kely myani Pedro.

<sup>20</sup> Aituo myani Pedro aguely:

— Arâ lâpylâ livru Salmosdâ iwenibyem awyly:

“Ânguy lâpeba ise ety oday.

Ânguy lâpeba nidâ ioday”

— warâ kelype.

Alâpylâ Salmosdâ iweniby:

“Âkelo ejipyano nidâ, anhekyly kehobyry anhetoem”

warâ myakâwândy saguhoem Deus itaumbry iweniby.

<sup>21</sup> — Arâ atay, uguondo kinduakenre kuduanoem, Judas Queriole donro ejipyano Jesus xunâry egaturin-em. Jesus kurâem itondbybyem awyly xuturim, enipyry. Pymâ Jesus kiampygueday kyampyguenibyry, <sup>22</sup> Jesus ewanu adaguday, âdypygueânday warâ eagâ idâypy, Jesus Joâoram batiza âieholo enipyry, Deusram adalokuonly enipyry ise kinduakely – kely myani Pedro.

<sup>23</sup> Aituo myani idânârâ tonlo modo âseinwândylymo. Aguelymo:

— José Barsabás (“Justo” keho) atay, Matias atay warâ nidâ — kelymo.

**24-25** Âdykonlo akaemo azagâ enday iduakeyby awyly tiunturomoem myani, Deus agâ aguelymo. Warâ myani aguelymo:

— Pymâ, tutuze âmâ idânârâ kurâ domodo âdaunlo awyly. Enehongâ âdykonlo mâinduakeyby awyly. Âdykonloka asaemo azagâ enday xina agâ mâingonokyly, Judas etaybyay âunâry egatuze? Xirâ âwanu mawânkâ Judas nimo. Ejidy mâinduakeybyanlâ nâtâ warâ — kelymo.

**26** Ânguy akaemo azagâ uguondo enday tduakezeim awyly tiuntuhoem aiemâmomy. Arâ myani Matias induakelymo. Aituo mâkâ Jesus xunâry egaturin-em iduakeyby modo arâ aguenriem idyly.

## 2

### *Deus Ispiritury xytâguyhobry*

**1** Pentecostes etyguedo ume myani idânârâ Jesus einwânni modo tâjidydâ âtâdyguylymo. Trigu ekaunâdyly israelita domodo nhetyguedo myani mâtâ âty. **2** Ilâ ume myani Deus Ispiritury nhonwamo xytâguly. Sapezenru ton-honreim ara kehoem myani Deus eydâ atodâba ipyru xytâguly indadylymo. Idânârâ kurâdo âtâ oday ekadaymbô modo idamâmomy. **3** Aituo myani peto iatgyu emyenro nhedylymo. Agui myani mâtâ aunlo âzepajiwâdyly, mâtâ angawaym, mâtâ angawaym, mâtâ angawaym warâ. **4** Deus Ispiritury nhonwamo âewyly, koendâ kehoem enomerymo xuduze. Aituo myani Deus Ispiriturybe tâituomo, âkelo anano modo itanwe aguelymo lâpylâ, tytanwe lelâba.

**5** Târâ Jerusalémdâ toenzepa myani judeu domodo Deus einwânni. Mâtâ ananobyry lelâba myani myarâ saini. **6** Jesus einwânni modo âkelo anano modo itanwe aguely tindatuo myani akaemo eagonro anano modo ewy âtâdyguylymo. Mâtâ tâjitanrugue nâsenomedâbyralâ myani aguelymo. Idase âtâdyguywâdyby modo toenzepa myani âsewânilymo. Koendâ kehoem mawânkâ myani aguehomo indadylymo. **7** Toenzepa myani âsewânilymo, awylygue âjigue aguelymo:

— Galiléia donro asaemo aguewâni modo. **8** Kytanwelâ olâ aguelymo kindakyly! Âdara kuruka arâ kehoem aguelymo? **9** Âzeydonro keba, âjitanweom keba warâma kurâ. Pârtia donro, Média donro, Elão donro, Mesopotâmia donro, Judéia donro, Capadócia donro, Ponto donro, Ásia donro warâ kurâ. **10** Tâlâ kuduay Frígia donro, Panfília donro, Egito donro warâ. Tâlâ tarâ kuduay Líbia eynynonro modo, Cirene iwaguepanro. Tâlâ kurâ Romadâpa âetyby. **11** Tâlâ tarâ kuduay judeu domodo lelâlâ, Israel iweompyry. Tâlâ lâpylâ tarâ âkelo kurâdo; akaemoma Israel iweom keba; judeu domodo ezewenry iweniby tâinwânsimo olâ. Creta donro, Arábia donro warâpe tarâ kuduay. Âdaraka tâjitanru tiuntudânygue aguelymo? Kytanwelâ asaemo, Deus koendâ anhetaymbô modo wâgâ aguely — kelymo.

**12** Âseguâdâdylymo myani. Âdara tâkeho nutuba idylymo. Aituo myani âjigue adapâiguelymo:

— Âdaituoka awârâ awyly? — kelymo.

**13** Kurâdo olâ myani Jesus einwânni modo tyeilezemo lelâ. Warâ myani aguelymo:

— Toku ikay tawylygue kulâ asaemo arâ aguely — kelymo.

### *Pedro kurâdoram aguehobry*

**14** Aituo myani Pedro agueze saudyly. Târâ lâpylâ myani akaemo onze lelâ Jesus tunâry egaturin-em induakeyby modo. Ago kehoem myani târâ âtâdyguyby modoram, Jerusalémdâ tâtyuneim modoram, saintaymbô modoram warâ aguely:

— Nhaum, koendâ auguely idataungâ. <sup>15</sup> Toku ikay inkâba xina, amyguehomo ara inkâba. Emedyly wâgâ kulâ awârâ, nove hora kulâ. Emedyly wâgâ xina judeu domodo vinhu nenywâbyra. <sup>16</sup> Warâ âyanmo auguely, xina arâ aguely mâindatomobyry wâgâ. Deus itaumbypyry egatuimbyry Joel Deus aguehobyry inwenibylâ xirâ aini. <sup>17</sup> Warâ myakâwândy Deus aguely:

“Xypyry iray ise xirâ agânhedyly.

Mârâ ume, Yispiritury idânârâ kurâdoram igonose urâ, âuturimoem.

Judeu domodoram, judeu keba modoram alelâ ise kâingonodyly.

Âweompyrmo unâry egatuze, uguondo modo, pekodo modo alelâ.

Salokuzenomo modo, âwynsaundo modo warâ Yispiritury anhekyly nhetomoem aienehonze urâ.

Agaityom modoram, aripidoram warâ ywâgâ auguely ise nhâenkymoem.

<sup>18</sup> Ynynonro modoram ise mârâ ume Yispiritury kâingonodyly.

Pekodo modo agâ, uguondo modo agâ alelâ ise.

Ywâgâ ise mârâ ume aguelymo.

<sup>19</sup> Kyaneni kau wâgâ iepanâgueze urâ, ton-honre wawyly kâenehohoem.

Onro anaym adyesenry modo aiese lâpylâ urâ,

won-honru kâenehohoem.

Toenzepa ise munru apâdyly.

Toenzepa âjiaduâhonzemo petoam.

Nâepaiguebamo ise eunu wâgâ.

<sup>20</sup> Xixi tohoreba ise.

Munru ara ise nunâ, sapabilu.

Kywymâry sainto iray ise awârâ aidly.

Toenzepa ton-honre tawyly tânehonze ise âewyly.

<sup>21</sup> Idânârâ, ‘Xina emakegâ, Pymâ’ keypy emakeze”

kely iweniwânm my Joel, Deus itaumbypyry egatuimbyry – kely myani Pedro.

<sup>22</sup> Aituo myani Pedro agueondly tonlo modoram:

— Nhaum, Israel donro modo, idataungâ xirâ auguely. Jesus Nazaré donro wâgâ xirâ auguely. Tyiguely iraynâ, agâmo tatay, inanaynmolâ keankâ âdaunlo uguondo kulâ anhetâny modo anhedyly. Kyzedâlâ koendonro modo, adyesenry modo warâ kientoem anhedyly. Deuslâ keankâ mârâ koendonro modo, adyesenry modo warâ Jesusram aienehonrim, tingonotyby kuru awyly tienehon-hoem. <sup>23</sup> Âmaemolâ olâ keankâ Jesus egamenri, tumunreim modoram kruz onwa adakâjiohoem, iguehoem warâ. Deus aguehobyry aralâ olâ keankâ awârâ modo aidly. Tutuzelâ myani arâ amidylymo awyly. <sup>24</sup> Jesus igueypyem awyly ume, Deus olâ kurâem nietondâ. Nigueompyra ise mâkâ-ro warâ. Nudupa lelâlâ tâise mâkâ iguewâtyby modo ejidydâ etadâdyby ara itoem.

<sup>25</sup> Kydamu Davi iweniwânm Jesus wâgâ:

“Ywymâry aunlolâ yagâ awyly, tutuze urâ.

Yagâpa nitaymba.

Tyanunepa urâ, yagâlâ awylygue.

<sup>26</sup> Awylygue toenzepa womaru.

Auguepa witaymba urâ Deus koendonroem awyly wâgâ, womazeândylygue.

Iguein-em wawyly umelâ, kâinwâmpyra wipyra wawyly.

Iekobyzeguehobe wawyly tynwânwâns wawylygue.

<sup>27</sup> Tutuze urâ, alâ igueypyenlâ yenehomba mawyly.

Wodo mâinwânzeânehomba mawyly warâ, Pymâ.

Âynynonroem wawylygue,

imary wawylygue warâ, igueypy modo duay yenehonwâbyra ise âmâ.

<sup>28</sup> Âdara aunloenlâ kyiguepa kitoom aguidyly wâgâ ienomedâdâ.

Toenzepa ise womaru, aunloenlâ agâ wawylygue”  
kely iweniwânmy Davi – kely Pedro.

<sup>29</sup> Aituo myani Pedro agueondyly:

— Ypemugudo, koendâ mâuntuhomoe awârâ Davi inweniby wâgâ agueze urâ. Tywâgâ inkâba myakâwândy aguely. Iweâpa mawânkâ myakâwândy kydamu Davi iguely. Eguepybyry sadly myakâwândy, tâtagueim esagueyby tuhu imâsedo odaji. Târâ myakâwândy inwânzely. Iwague inkâba mâkâ Davi eguepybyry etadâdobyry tâtagueim tarâ awyly. <sup>30</sup> Deus itaumbyry egatuim myakâwândy mâkâ, niguepa tatay. “Tokalâ âwerymo ewy ise pymâem kânhekyly. Judeu domodo iwymâry wâne maze myara ise pymâem awyly. Agânhekyly modo lelâlâ xirâ âyam augueho” kewânmmy Deus, Daviram. <sup>31</sup> Awylygue myakâwândy Davi tutuze lelâ awyly Deus ingonokylybe awyly. Deus Ingonyby igueypyem, kurâem itondyly Deus eon-honrugue awyly tutuze myakâwândy. Awylygue myakâwândy,

“Igueypyem lelâ mânhenehomba,

eguepybyry mâinwâneânehomba warâ ise âmâ” kely.

<sup>32</sup> — Âkealâ olâ Deus eon-honruguelâ keankâ Jesus kurâem itondyly. Tutuze xina âkealâ awyly. Jesus igueypyemba awyly xina nedâ. Âkealâ tâkeze xina: “Kurâem itondybyem mawânkâ!” <sup>33</sup> Eydâ tatoram olâ Deus nadâ. Pymâ tynrenseinhe mâkâ iwerâ, Tunwym ahoru eynynâ ekadybyem awyly. “Ispíritu igonose urâ” tâkehobypy Jesus nigonotai xinaram iwerâ. Sapezenru ton-honreim ara kehoem âjipyruguelâ midataimolâ. Peto iatygu ara kehoem xina wâgâ metaimolâ. Âtanwemo xina aguely midataimolâ warâ. Iwerâ Ispíritu Jesus ingonotybylâ awârâ modo aieni. <sup>34</sup> Tywâgâ inkâba myakâwândy kydamu Davi aguely. Deus eydâ atoram nâtâwâbyra myakâwândy eguepybyry. Jesus wâgâ myakâwândy awârâ Deus aguehobypy Davi inwenily:

“Yahoru eynynâ ikagâ tynrenseim ekadodâ,

<sup>35</sup> âduery modo eon-honru kainly ara,

âdydo ara kulâ âhuru iaxi kânchedylymo ara”

kewândymy Deus.

<sup>36</sup> — Nhaum, Israel domodo, koendâ ydataungâ. Kywymâryem Deus ingonotyby keankâ mâkâ Messias kruz onwa mankâjien-honlymo, Deus Ingonyby “Âese” kehobylâ – kely myani Pedro târâ âtâdyguyby modoram.

<sup>37</sup> Arâ Pedro aguely tindatuo myani idânârâ kehoem itywandylymo, Jesus tienagazenehon-hobypy wâgâ. Aituo myani Pedro domodoram aguelymo:

— Âdaraka ise xina aidyly iwerâ? – kelymo.

<sup>38</sup> Aituo Pedro in-hoguly:

— Âjityendaungâ inakanhe kulâ amitomobypy wâgâ. Deus izepa ato aiedyly imowâdaungâ. Jesus einwântaungâ warâ, Deus inakanhe amitomobypy nhygakehoem. Batiza âiehowâdaungâ, Jesus eynynonroem mawylymo mânehon-homoem. Tyispiritury igonose mâkâ, aunloenlâ agâmo itoem – kely myani.

<sup>39</sup> — “Âyanmo, âmeombyrymoam, âweompyrymoam, idânârâ âtâ anary onro anano modoram warâ ise kâingonodyly” nygue mawânkâ. Deus tynynonroem tingâsedaymby modoram Tyispiritury igonose – kely myani Pedro.

<sup>40</sup> Eyanmo aguezesezelâ myani Pedro; aguely:

— Inakanhe amidylymo imowâdaungâ. Jesus einwântaungâ, imakehomoem, Jesus einwântâny modo ara mâsenagazebyra mitomoem – kely.

<sup>41</sup> Agui tonlo modo ewy Pedro aguely tâinwânsimo myani. Jesus nheinwântuomo myani batiza âieholymo, Jesus eynynonroem tawyly tienehon-homoem. Ilâem toenzepa kurâdo Jesus tâinwânsimo myani, três mil awârâem. <sup>42</sup> Koendâ kehoem myani Jesus tunâry egaturin-em induakeyby modo aguely indadylymo. Tindatuo myani toenzepa

kehoem nheinwândylymo, Jesus wâgâ nhenomedâdylymo warâ. Âdy pebaonram tâlâ tato nhudulymo. Deus agâ agueze âtâdyguylomo. Âwinduase âtâdyguylomo lâpylâ warâ, Jesus iguehobyry tienanâguehomoem.

### *Jesus einwânni modo aitobyry*

<sup>43</sup> Deus eon-honrugue adyesenry modo kehoem myani Jesus tunâry egaturin-em induakeyby modo anhekyly. Awârâ modo anhedylymo tientuo, idânârâ kurâdo Deus tynrensemo tawyly enehonwânmomy. <sup>44</sup> Idânârâ Jesus einwânni modo âjigue nâtâdyguyba nipyramo myani. Tâlâ tato nhepadâdylymo ipaom modoram. <sup>45</sup> Tonrorumo, âdydo imeom tâlâ tato warâ vende nhedylymo. Ebyry tienmakeybygue, âdy pebanro modo xurâem âdylâ nhanâdylymo warâ myani aidylymo. <sup>46</sup> Kopaelâgâembaba myani Deus ety idaseray âtâdyguylomo. Alâpylâ myani tâtydâ âtâdyguylomo âwinduase, Jesus kruz wâgâ iguehobyry tienanâguehomoem. Âjigue iomarunumo. Tâwânrempamo myani, âkelomo agâ tâzepajigâzemo lelâ. <sup>47</sup> Deus nhomaendylymo.

— Deus koendonro kehoem âmâ xina agâ — kezesedylymo.

Jerusalém donro modo myani akaemo ehogueni. Kopaelâgâembaba myani kurâdo Jesus einwânni âtâdyguylomo, agui isezedylymo.

## 3

### *Pedro, João warâ Deus eon-honrugue adakobâdâny kua nhetobyry*

<sup>1</sup> Três horas kogonekâ, judeu domodo Deus agâ agueho oday myani Pedro, João warâ Deus ety odaji idâlymo. <sup>2</sup> Târâ myani uguondo adakobâdâny nhedylymo, ihuru, ipaunru warâ tywyke iazeypp. Kopaelâgâembaba myani eataen-ho modo nhadyly Deus ety iwyantaji, “Portão Iwâkuru” kehoram. Târâ myani ekadybyem tawyly ume, Deus ety odaji egawânni modo nhekaendyly:

— Ytyendaungâ. Ydineruru wao âunduwâtaungâ — kely.

<sup>3</sup> Aituo myani Pedro, João warâ egawândyly. Akaemo tientuo myani aguely:

— Ydineruru wao âunduwâtaungâ — kely.

<sup>4</sup> Agueduo azakâlâ eyam MYK idylymo. Pedro aguely eyam:

— Xinaram MYK ikâ — kely.

<sup>5</sup> Agueduo myani mâkâ uguondo MYK idyly eyanmo.

— Ydineruru nhudulymo wâne isenra — kely tyangahu oday.

<sup>6</sup> Warâ olâ myani Pedro aguely:

— Tydinerugunepa urâ. Dineru takaze kehoem koendonro olâ ise âyam kâunduly. Jesus Cristo Nazaré donro eon-honrugue âyam auguely: “Aukâ. Adakobâgâ warâ” — kely.

<sup>7</sup> Agueypyem myani Pedro mâkâ uguondo emary aho eynynonro wâgâ nhawâdyly, sautoem. Ilâ umelâ kehoem myani mâkâ uguondo saudly, adakobâdyly warâ. <sup>8</sup> Kua itybyem tawylygue, tuomarugue tadameze kehoem myani Deus ety idaseraji idâly, Pedro, João warâ agâ. Warâ myani aguely:

— Deus, koendonro kehoem âmâ, kua yetai — kely.

<sup>9</sup> Idânârâ tonlo modo emâmomy mâkâ adakobâdyly, adamely warâ. Deus koendorom awyly wâgâ aguely tydasemo lâpylâ myani. <sup>10</sup> Âseguâdâmâmomy mâkâ koendâ adakobâdyly tientuomo. Aituo myani âjigue aguelymo:

— Mâkâ pyantano adakobâdânybyrylâ awâkâ. Aunlolâ inanry sakadaynrim modo nhekaendyly. Etaungâ! Adakobâdyly, adamely warâ aidyly! Ânguy nheinwânklyemba lâgâlâ! — kelymo.

### *Deus ety idaseray Pedro aguehobyry*

<sup>11</sup> Mâkâ uguondo adakobâdânybyry Pedro, João warâ agâ tâise lelâ myani; Alpendre de Salomão keho taserano oday myani akaemo azagâ tokalâ warâ. Mâkâ kua itobyry

wâgâ tâsewânilymogue myani kurâ domodo tâgaune kehoem idâlymo eyanmo, kua ityby ese. <sup>12</sup> Târâ toenzepa kurâdo âtâdyguyly tientuo myani Pedro aguely eyanmo:

— Nhaum, koendâ ydataungâ, kydamu Israel iweom. Tâseguâdâzeba itaungâ. Xina arâ kâzesedaundâ. Ton-honrugue inkâba enra xina merâ adakobâdânrybyry kua nhedyly. Xina koendonroem awylygue inkâba merâ adakobâdly. <sup>13</sup> Kydamudo Abraão, Isaque, Jacó warâ iDeusry enra Jesus eon-honrugue kua itoem aieni, koendonro, ton-honreim waunlo Jesus awyly tienehon-hoem. Tâmaryem myani Deus, Jesus ingonodyly.

— Alâ olâ keankâ pymâ modoram mâengamelymo, kruz wâgâ iguehoem. Pymâ Pilatos wâne keankâ tienagazenehondyzeba. “Kruz onwa sakâjien-hongâ iguehoem!” myguewâtaundâmo olâ. <sup>14</sup> Koendonro, âdaini keba keankâ mâkâ Jesus. Pilatos ne-nagazenehomba itoem âkeá myguepa olâ mataunaguynre. “Kyârim Barrabás etague-hongâ. Jesus kruz onwa sakâjien-hongâ” mygueylomo lelâ keankâ. <sup>15</sup> Kyigueânehondânry keankâ iguedyse matomo.

— Deus kurâem nietondâ olâ-ro warâ. Jesus kurâem itybyem awyly, tutuze xina, tientobyry wâgâ, aguely tindatobyry wâgâ warâ. <sup>16</sup> Merâ uguondo âdaunlopyry awyly koendâ tutuzelâ âmaemo. Jesus eon-honrugue olâ enra kua idyly. Koendâ adakobâdly metaimolâ. Inumo angataylâ enra Jesus eon-honrugue kua idyly, Jesus adyese awyly xina nheinwândylygue.

<sup>17</sup> — Ypemugudo, âwymârymo agâ Jesus kruz onwa mankâjien-hondaymo, Jesus, Messiaslâ awyly mâuntuwâbyra keankâ akaemo. “Kruz wâgâ sakâjien-hongâ” myguedaymo, Deus Ingonybyty môkâ awyly mâuntuba mawylymo xutu. <sup>18</sup> “Kâinduakeby âzenagazeoze, igueze warâ” kewânmy Deus, tytaumbypyry egatuwâni modo aguehoem. Arâlâ keankâ anhenehonly, adâkehobypyry ara aitoem. <sup>19</sup> Ajityendaungâ, inakanhe amitomobyry wâgâ. Deus izepa ato aiedyly imowâdaungâ. Jesus einwântaungâ, inakanhe amitomobyry Deus nhygakehoem. <sup>20</sup> Arâ aitaungâ, Pymâ Deus kua âetomoem lâpylâ, Jesus âyanmo ingonotoem warâ. Deus, “Messias igonose urâ einwânni modoram” kewânmy.

<sup>21</sup> — Iwerâ Jesus târâ Deus eydâ atodâ. Tytaumbypyry egatuim modo aguehoem aguewânlâmy Deus: “Auguehobypyry saintuo, idânârâ iweloem ise urâ” kewânmy. Adâkehobypyry saintuo, Jesus igonotonze mâkâ. <sup>22</sup> Iweâpa Moisés inweniby ara ise aidyly: “Tokalâ kypemugu âyanmo igonose Kywymâry Deus. Deus wâgâ ise mâkâ âyanmo aguely. Tunâry egatuze ugonodâ myara ise mâkâ ingonodyly lâpylâ. Idânârâ aguehobypyry ara aitaungâ. <sup>23</sup> Inakanhe kehoem ise Deus idânârâ tâinwândysebanrobypyry modo nhenagazenehonly. Deus eynynonro modo duaypa ise akaemo tyuelâ. ‘Ynynonro keba asaemo’ keze mâkâ-ro warâ” kewândymy Moisés. Jesus onro anaxi naimpyra ataylâ myakâwândy inwenily.

<sup>24</sup> — Idânârâ myakâwândy akaemo saguhoem Deus itaumbypyry egatuwânbypyry modo Deus Ingonykyly saintuo aitaynrim modo wâgâ aguelymo. Samuel, eagonro modo warâ xirâ wâgâ aguewânmomy. <sup>25</sup> Deus itaumbypyry egatuwânbypyry modo iweompyrylâ kurâ, âmaemo, xina lâpylâ warâ. “Koendonro âmaemoem xuduze urâ” kewândymy Deus kydamudoram. Eyanmo lelâba myakâwândy aguely, kyam lâpylâ warâ. Kydamu Abraâoram aguehobypyry enanâguewâdaungâ: “Tokalâ âweryypyry ewy wâgâlâ ise idânârâ onro anano modo agâ koendâ wawyly” kehobypyry.

<sup>26</sup> — Iweâpalâ “Messias igonose urâ” tâkehobypyrlâ myakâwândy Deus, ingonokyly kurâ israelita domodoram. Koendâ kyes, kieinwântoem, inakanhe kydawly kinmohoem warâ myani ingonodyly – kely myani Pedro târâ âtâdyguyby modoram.

<sup>1</sup> Pedro, João warâ aguelymo ume myani kurâdo eynynâ Deus agâ aguewâni modo iwymârydo saindyly. Deus ety iguardary iwymâry, saduceu domodo warâ saindylymo, aguelymo idase. <sup>2</sup> Pedro, João warâ,

“Tyigueduo, Jesus kurâem nitondâ. Awylygue lakuru mawânrâ idânârâ iguewâtyby modo kurâem itonze awyly kiuntuly” kelymo tindatuo myani toenzepa kehoem iewiâpadlymo. <sup>3</sup> Aituo myani guarda domodoram aguelymo:

— Awâkâ azagâ uguondo sawâtaungâ. Ekâjiwâdaungâ. Sataungâ kadeia odaxi. Târâlâ wao nemedâmo. Nudupa enra iwerâ, juizram satomoem — kelymo.

<sup>4</sup> Toenzepa myani akaemo, azagâ uguondo Jesus wâgâ aguehomobyry idataynrimbyry modo Jesus nheinwândylymo. Cinco mil uguondo modo awârâem myani Jesus einwânni, iwelo einwânni modo agâ, pekodo modo, iamimeom warâ tapâguezeba.

<sup>5</sup> Kopaelâgâem myani pymâ Jerusalém donro modo âtâdyguylymo, judeu domodo iwymâry, agaityom modo, Moisés ezewenry wâgâ iweniby enomedâni modo warâ.

<sup>6</sup> Târâlâ myani Anás. Kurâdo eynynâ Deus agâ aguewâni modo iwymâry kuru myani mâkâ. Ipemugudo tarâlâ lâpylâ myani, Caifás, João, Alexandre, eagonro modo warâ.

<sup>7</sup> Aituo myani sodadu domodoram aguelymo:

— Pedro, João warâ enetaungâ xarâ — kelymo.

Aituo myani ese idâlymo, nhadylymo. Saintuomo myani pymâdo tânadoram ingâsedlymo.

Tânadoram idâduomo myani nhapâiguelymo:

— Ânguy unâry wâgâka keankâ uguondo adakobâdânrybyry kua mânhedylymo? Ânguy eon-honrugueka keankâ koendâ adakobâdoem amânhedylymo? — kelymo.

<sup>8</sup> Deus Ispiritury ton-hondâni awylygue tyanepa kehoem eyanmo Pedro wakely:

— Idaenkulymo wao, pymâ domodo. <sup>9</sup> Mâuntudyze âmaemo merâ uguondo adakobâdânrybyry xina kua nhetobyry, âdara xina kua nhetobyry awyly warâ. <sup>10</sup> Egatuze urâ, mâuntuhomoem, idânârâ judeu domodo nhutuhoem lâpylâ warâ. Uguondo kua idyly keankâ, Jesus Cristo Nazaré donro eon-honrugue, mâkâ kruz wâgâ mâyâympymo, Deus kurâem nhetondyby eon-honruguelâ. <sup>11</sup> Jesus izepa keankâ âmaemo. Tâlâ âwâgâmo Deus aguehobyry iweniby. Warâ aguely:

“Tâlâ myani tuhu imeâgâkeba, âtâ itâdo.

Idânârâ itâdaynrim modo mâtâ tuhu tâensembo,

mâtâgue âtâ tintâdyzebamô olâ.

Deus xurâem olâ mâtâ tuhu tywyneim kuru!”

warâ iwenibyem awyly. Âtâ itâni modo tuhu âtâ saunâto kuru izepa atomobyry ara ise mâkâ imakerinmo izepa mawylymo. <sup>12</sup> Jesus kulelâ kâmakerim, eagonro lâpeba. Ânguy eagonro nigonotaymba Deus kâmakerin-em — kely myani Pedro.

<sup>13</sup> Tyanepa kehoem Pedro, João warâ aguelymo tindatuo myani pymâ tynruneim modo toenzepa kehoem âsewânilymo. Tutuzemo mawânkâ myani âsenomedâdyby keba, âdy keba warâ awylymo; tonomegueim agueho ara kehoem agueduomo olâ Jesus eynynonrobryy asaemo — kelymo.

<sup>14</sup> Eagâmolâ myani mâkâ uguondo adakobâdânrybyry epagu. Awylygue myani Pedro, João warâ wâgâ âdakepa awylymo. <sup>15</sup> Aituo myani Pedro, João, uguondo kua nhetybymoram warâ aguelymo:

— Âxiguewâdaungâ wao tarâpa — kelymo.

Âxiguebygueduomo myani akaemo pymâ domodo âjigue aguelymo:

<sup>16</sup> — Âdakiendylyka ise akaemo azagâ uguondo modo? Idânârâ Jerusalémdâ tâjikeim modo tutuzemo, adyesenry anhetomobyry, mâkâ uguondo kua nhetomobyry. “Adakobâdânrybyry kua nietaymbamo” kykely-ro watay, kurâdo kyeileze.

<sup>17</sup> Kyjigâsedon-nemo wao, “Mâtâ uguondo kua ityby wâgâ, Jesus wâgâ warâ ânguyram

adâkezeba itaungâ” kykehoem. “Jesus wâgâ amyguezesedylymo-ro watay, toenzepa kehoem inagazenehonzemo xina” kykely ise eyanmo – kelymo myani.

**18** Aituo myani akaemo azagâ ingâsenehonlymo, aguelymo:

— Jesus xunârybyry aguely imowâdaungâ. Ânguyram iwâgâ adâkezeba itaungâ. Âdaunloenlâ Jesus xunârybyrygue ânguy kâzenomedâdondaundâ – kelymo myani.

**19** Agueduomo Pedro, João warâ aguelymo lâpylâ:

— Deuslâ keankâ, “Jesus xunâry egatuwâdaunda” kerim. Âmaemo pylâ “Kâzegatuwâdaundâ” kerin-ro. Ânguyka ise xina nheinwânyly kuru? Âmaemo? Deus?

**20** Jesus aidyly xina nedâ. Nhenomedâdo xina nidadâ warâ. Awylygue ise iwâgâ adâkely xina nimopa awyly – kelymo.

**21** Arâ agueduomo myani pymâ domodo eyanmo aguely:

— Tarâpa itaungâ. Jesus xunâry ânguyram kâzegatuondaundâ olâ-ro warâ. Iwâgâ amyguezesedylymo-ro watay, toenzepa kehoem inagazenehonzemo enra xina – kelymo.

Warâ olâ myani kurâ domodo mâtâ anano modo aguelymo:

— Koendoro awâkâ Deus. Ton-honru nudu akaemo azagâram, mâkâ adakobâdânrybyry kua nhetomoem – kelymo.

Agueduomo myani pymâ domodo akaemo azagâ tienagazenehon-ho nutuba idylymo.

Aituo myani aguelymo:

— Kienagazenehonlymo-ro watay, kurâdo kagâ iewiâpadaynzemo – kelymo.

**22** Quarenta anos takaze myani mâkâ uguondo Deus eon-honrugue kua ityby.

### *Jesus einwânni modo Deus agâ aguehomobyry*

**23** Âzetaqueoybyem myani Pedro, João warâ idâlymo Jesus einwânni modoram. Idânârâ kurâdo eynynâ Deus agâ aguewâni modo iwymârydo, judeu domodo iwymârydo warâ aguehomobyry tâgatuzemo myani. **24** Nhegatuybymo tindatuo myani idânârâ kehoem Deus agâ aguelymo:

— Pymâlâ âmâ, Deus, idânârâ xugunipyrylâ, kau, onro, parutabâ, paru warâ. Idânârâ tâlânro modo âmâlâ xuguni. **25** Âispirituryguelâ myakâwândy imary Davi xirâ aguely inwenily:

“Judeu keba modo tyewiâpazemo;

judeu domodo inakanhe âedyly wâgâ tyangahu oday tunâgue warâ.

**26** Idânârâ pymâdo on-hoam isemo.

Kywymâry Deus agâ âseguebyze kezemo.

Deus Ingono kyly idueryem isemo warâ”

kely myakâwândy Davi inwenily.

**27** — Davi aguehobyry ara kehoem keankâ aidyly. Herodes, Pôncio Pilatos warâ, judeu domodo agâ, judeu keba modo agâ warâ nâtâdyguywâdaundâmo, tarâ Jerusalémdâ âmery Jesus tienagazedomoem. Inakanhe aityby keba lelâlâ wâne keankâ; alâ olâ keankâ Mâingonotyby nhenagazenehonlymo. **28** Tutuzelâ makynre arâ ainiem awylymo, “Warâ ise aidyly” myguehobyrylâ awylygue. Idânârâ awârâ modo aidyly on-honruguelâ, arâ ize mawylyguelâ warâ.

**29** — Pabai, tutuzelâ âmâ, pymâ domodoram xina âjiewiâseolymo. Xina tienagazedyze akaemo. Imary tawylygue xina on-honru nhekadyly, tyanepa xina âwâgâ aguezese-doem. **30** On-honru xinaram xudugâ, tâwânuneim modo kua xina nhetoem, adyesenry modo kehoem xina anhetoem warâ, xina agâlâ mawyly xutuhoem. Warâ xina imarydo aiekâ, Jesus âdykâ inakanhe ityby keba eon-honrugue xina aitoem – kelymo myani Deusram.

<sup>31</sup> Deus agâ adâkely nhewanikebygueduomo myani mârâ âtâ âtâdyguyhomo âzekânily; Deus Ispiritury eyanmo âewyly, eon-hondâzemo. Aituo myani idânârâ kurâdo eon-honru âduduoly, Jesus xunâry egatuze tyanepa itomoem.

*Jesus einwânni modo tâlâ tato âdypenry modoram nhepâdomobyry*

<sup>32</sup> Koendâ kehoem myani idânârâ Jesus einwânni modo âzetaynlymo. Aguimo wâne, tokaleom aramo lelâ olâ myani. Turâem lelâ waypamo myani, tâlâ tato modo ipaom modoram nhepâdylymo.

<sup>33</sup> — Pymâ Jesus nigue wâne. Iwerâ olâ kurâem itondypyem. Kurâem itondypyem awyly ume xina nedâ — kezesemolâ myani.

Deus toenzepe eon-honrumo tuduze myani, tunâry nhegatuhomoem. Koendâ lelâ myani akaemo Jesus einwânnipyry modo agâ. <sup>34</sup> Tât y ioday tato vende iemâmomy. Tonroguneim modo tonroru vende ietaunmâmomy warâ. Ebyrypyry myani Jesus tunâry egaturin-em induakeyby modoram nhudulymo. <sup>35</sup> Akaemo myani dinheru xudunri âdy pebaom modoram. Arâ myani akaemobyry âdy peba nipyra awyly. Idânârâ ipa tato aralâ mykâinane nhemakelymo.

<sup>36</sup> Tâlâ myani uguondo José keho. (Akaemo Jesus xunâry egatuwâni modo olâ myani “Barnabé” kerim eyam. “Kon-hondâni” keze aguely.) Ilha Chipre anaym iazeypy, Levigue tydamudogueim warâ myani mâkâ. <sup>37</sup> Tonroru vende iemâmy. Ebyrypyry Jesus tunâry egaturin-em induakeyby modoranlâ myani nhuduly, âdy pebanro modoram nhuduhomoem.

## 5

*Ananias, Safira warâ Deus enokuze kehomobyry*

<sup>1</sup> Tâlâ myani Jesus einwânni Ananias, iwydylâ Safira warâ. Tonroru vende iemâmomy.

<sup>2</sup> Aituo myani Ananias tywydyram aguely:

— Âdiempa xirâ dinheru ewy kurâem kienkanâne. Jesus tunâry egaturin-em induakeyby modoram kiunduday, olâ “Idânârâ xirâ dinheru xina eonronru ebyrypyry tarâ awyly” keze lelâ kurâ — kelymo myani.

Aituo myani Ananias, Jesus tunâry egaturin-em induakeyby modoram dinheru nhadly.

Warâ myani saintybyem aguely:

— Anra dinheru. Idânârâ tarâ onro ebyrypyry kâenmakeyby awyly — kely.

<sup>3</sup> Aituo myani Pedro ton-honre kehoem eyam aguely:

— Satanás amidyse ato ara kulâ amidyly. Deus Ispiritury enokuze mygueley. “Idânârâ tarâ onro ebyrypyry kâenmakeyby awyly” mygueley wâne. Xirâ dinheru ewy mâenkanâdybymo tâlâ olâ âmaemo — kely myani Pedro.

<sup>4</sup> — Ânguy “Onroru vende iekâ” kewâpyra keankâ. Vende mânhepygueduo ânguy lâgâlâ keankâ “Idânârâ dinheru mâenmakeyby âdy pebanro modoram xudugâ” kepa warâ. Âmâ xurâlâ keankâ mârâ onro, tâwâlâ ize mato ara amânhetoem. Vende mânhepygueduo, âmâ xurâlâ keankâ dinheru warâ, tâwâlâ ize mato ara amânhetoem. Inakanhe inkâba dinheru mâempajigâdyly âmaemoem. Iwâgâ tâdâsenogudyly mygueley olâ inakai. Xina kulelâ mâkeba enokuze mygueho, Deus lâpylâ warâ! — kely myani Pedro.

<sup>5</sup> Pedro aguepygueduolâ kehoem myani Ananias onro onwa ihuguely. Iguely lelâro warâ. Idânârâ Ananias aitobyry xutuwânybyry modo toenzepe kehoem myani âseanediylymo. <sup>6</sup> Aituo myani salokuzenomo modo ewy idâly, Ananias eguepybyry ituwynze. Tintuwymbygueduo myani tâdâzepyâdoam nhadylymo.

<sup>7</sup> Três horas sakabygueduo myani Ananias iwydypyry saindyly Pedro eydâ atoram. Tuso igueypyem awyly nutuba myani. <sup>8</sup> Aituo myani Pedro eyam aguely:

— Oso dinheru onro ebyrypyry māenmakeybymo yam nenetai, âdy pebanro modoram kâunduhoem. Idânârâ māenmakeybymo ara nenetai? — kely.

— En-hem, idânârâ xina nhemakeyby aralâ enra mâkâ âyam nhuduly — kely lelâ myani iwydypyry.

<sup>9</sup> Aituo myani Pedro aguely:

— Âmâ, oso warâ myguewâdylymo kulâ. Deus Ispiritury enokuze myguehomobyry wâgâ mâsenagazebyra warâ keanra keankâ inanajîmo. Idakâ ihurumo aguely. Salokuzenomo modo oso eguepybyry tâdâzepyâdoam sanipyry modo akaemo odopâni. Âmâ ise iwerâ nhakylymo! — kely.

<sup>10</sup> Aguepygueduolâ kehoem myani iguely. Pedro enadoram kehoem myani ihuguel. Salokuzenomo modo saindylymo myani. Egawândylymo. Âwântybyem, pekodo igueypyem lelâlâ awyly nhedylymo. Aituo myani eguepybyry nhadylymo iso eata-doanlâ. <sup>11</sup> Idânârâ myani Jesus einwânni modo nhutulymo, Ananias, iwydylâ warâ Deus enokuze kehomobyry wâgâ iguehomobyry. Jerusalémdâ tâtyuneim modo egary tydasemo myani. Aituo myani toenzepa kehoem âseanedylymo. Idânârâ kehoem Deus eon-honru nhytadylymo.

### *Jesus tunâry egaturin-em induakeyby modo Deus eon-honru nhenehon-homobyry*

<sup>12</sup> Jesus tunâry egaturin-em induakeyby modo Jerusalémdâ Deus eon-honru tânehonzemo myani. Âdykâ ânguy anhetânry kehoem myani anhekylymo Deus eon-honrugue. Alâ myani idânârâ Jesus einwânni modo Deus etydâ âtâdyguylymo Galpão de Salomão oday.

<sup>13-14</sup> Agui isezedyly myani pekodo modo, uguondo modo warâ Jesus einwânni modo. Iwelo einwântaynrim modo akaemo saguhoem einwânnipyry modo agâ tâtâdyguyzemo myani. Idânârâ Jerusalém donro modo koendâ myani iwâgâmo aguely. Jesus einwântâny modo olâ myani tyane eagâmo âtâdyguyze. <sup>15</sup> Deus eon-honrugue tâwânuineim modo kua tyese myani Jesus tunâry egaturin-em induakeyby modo. Awylygue mykâinane Pedro ânwa oze sakadly tiuntuduomo, sakadodâ typemugu tâwâneim nheguetunâdylymo. Pedro sakaday, egadopyry iwâgâmo sakaduo, kua tyese mykâinane. <sup>16</sup> Jerusalém iwaguepa tâtyuneim modo, toenzepa myani tâwânuineim modo, kadopâgue taseim modo warâ nhadylymo Pedro eydâ atoram. Mâkâ modo kua tyetaynze lelâ myani Deus eon-honrugue.

### *Jesus tunâry egaturin-em induakeyby modo enagazedobyry*

<sup>17</sup> Toenzepa myani akaemo kurâdo eynynâ Deus agâ aguewâni modo iwymâry kuru, eataen-homolâ saduceu domodo warâ iewiâkymo tâsewânilymogue, ânguy adâkely nidapyra awylygue, kurâdo, akaemo Jesus tunâry egaturin-em induakeyby modo aguely lelâ nheinwânklymo awylygue warâ. <sup>18</sup> Aituo myani pymâdo aguely Deus ety iguardary modoram:

— Sawâtaungâ akaemo Jesus xunâry egatuwâni modo. Kadeia odaxi sataungâ — kelymo.

Aituo myani nhawâdylymo, nhetadâdylymo warâ. <sup>19</sup> Mârâ kopaelâ olâ myani anju Deus eydâ atodâba xytâguyl. Saintybyem myani kadeia iwyantary modo nhenahunguewâdyly, tientaguehomoem. Egasebygueduomo koendâ kehoem pyanta modo tânahuonze olâ myani. Eagâmo kuohoram idâwânm. Aituo myani eyanmo aguely:

<sup>20</sup> — Emedyly wâgâ idâwâtaungâne Deus etyam. Jesus unârybyry egatuwâdaungâ akaemo tonlo modoram unâ tâdâsemagueho — kely myani Pedro domodoram.

<sup>21</sup> Aituo myani Jesus tunâry egaturin-em induakeyby modo mâkâ anju aguehobyry ara emedyly wâgâ Deus etyram idâlymo. Deus ety idaseraji egawândylymo warâ. Kâmakerim Jesus wâgâ kurâdo enomedâdyly nhaguondylymo myani.

Kurâdo eynynâ Deus agâ aguewâni modo iwymâry kuru, eataen-ho modo lâpylâ warâ idânârâ judeu iwymâry modo ton-honreim tygâsezemo myani; idânârâ âtâdyguylymo. Pedro domodo tâtaguelâ-ro waunlo ara myani enanajimo. Awylygue myani Deus ety iguardary modoram aguelymo:

— Akaemo Deus itaumbyry egatuwâni modo etaunda — kelymo.

<sup>22</sup> Aituo myani guarda domodo kadeiarâm idâlymo. Myarâ saintybyem olâ myani, Jesus tunâry egaturin-em induakeyby modo nepyramo. Tiempyramo tituo myani odopâdylymo pymâdo âtâdyguyhobyryam. Aituo myani aguelymo:

<sup>23</sup> — Ânguy lâpeba târâ kadeia oday! Idânârâ pyanta modo koendâ kehoem enahunwâdybyenlâ, pyanta eni modopelâ warâ olâ enra. Xina pyanta nenahungueagui. Kadeia oday xina netai warâ. Akaemo etadâdyby modo peba olâ enra târâ. Ânguy xina nepyra enra — kelymo.

<sup>24</sup> Kurâdo eynynâ Deus agâ aguewâni modo iwymârydo, guarda iwymâry warâ kadeiarâm idâwâtyby modo aguely idamâmomy. Tindatuo, âseguâdâmâmomy âdara itomobry awyly nutuba tawylymogue. Aituo myani âjigue aguelymo:

— Âdaraka enra akaemo Jesus xunâry egatuwâni modo aidyly? Âdykâmo wânkâ? — kelymo.

<sup>25</sup> Aguelymo ume myani egatuim saindyly. Aguely:

— Idataungâ! Akaemo uguondo modo kopaelâgâ mâtentadânehoymbymo anrimo târâ, Deus ety idaseray. Jesus wâgâ kurâdo nhenomedâdondylymo — kely.

<sup>26</sup> Mâkâ aguely tindatuo myani akaemo Deus ety iguardary iwymâry, izodadury modo warâ Jesus tunâry egaturin-em induakeyby modo sawâtonze idâlymo. Sawâtonibryem, nenagazebyramo olâ myani.

— Asaemo kienagazedy-ro watay, kurâ domodo tuhu kuonwa samezemo. Toenzepa kurâdo asaemo nhehoguedyly — kelymo myani tyangahu oday.

Awylygue myani âdaniepyra kehoem nhadylymo pymâdo âtâdyguyhobyryam. <sup>27</sup> Pymâdo enadoram myani nhadylymo. Aituo myani kurâdo eynynâ Deus agâ aguewâni modo iwymâry kuru aguely eyanmo:

<sup>28</sup> — “Jesus wâgâ kurâdo kâzenomedâdaundâ” xina nygue wâne-ro. Etaungâ! Idânârâ asaemo taunlo Jerusalém donro modo iwâgâ unâ indadylymo. Amyguelymogue kurâ domodo xina ewentâgueze Jesus iguehobyry wâgâ — kelymo.

<sup>29</sup> Aituo myani Pedro domodo aguely:

— Deus aguehobyry ara lelâ xina aidyly, kurâdo aguehobyry ara inkâba. <sup>30</sup> Jesus iguehoem kruz wâgâ makâjien-homo. Deus kydamudo nhyrentyby olâ kurâem nietondâ.

<sup>31</sup> Deus Ingonybylâ mâkâ Jesus pymâem itoem. Deus ahoru eynynâ mâkâ iwerâ, pymâ tynrenseim ejidydâ. Kâmakerim mâkâ. Kurâ Israel iweompyry modo inakanhe kydawyly kinmohoem myani Deus, awârâ modo anhedyly. Kurâ judeu modo Jesus kieinwândyse mâkâ, inakanhe kydawyly tyngakehoem. <sup>32</sup> Jesus aidyly enipyry modolâ, aguely idanipyry modolâ warâ xina, iwâgâ aguenri. Deus olâ Tyispiritury tugonose lâpylâ tainwântaynrim modoram, Jesus wâgâ ton-honre aguehomoem. Awylygue xina adâkeho nhutuly — kely myani Pedro.

<sup>33</sup> Arâ kehoem Pedro aguely tindatuo myani akaemo pymâ tynrenseim modo toenzepe kehoem iewiâpadlymo. Akaemo Jesus xunâry egatuwâni modo xyâze kelymo warâ.

<sup>34</sup> Aituo myani tokalâ akaemo ewy saudyly. Fariseu domodo ewy myani mâkâ, Gamaliel keho. Moisés inweniby wâgâ enomedâni myani mâkâ, idânârâ nhyrekylymo warâ. Aituo myani guarda domodoram aguely:

— Asaemo uguondo modo wao kuohoram sataungâ — kely.

Egasebygueduomo myani tagonrodoram aguely:

<sup>35</sup> — Nhaum, idataungâ, kydamudo Israel iweompyry. Koendâne akaemo uguondo modo âdara kiendyly awyly kydutunre. <sup>36</sup> Uguondo Teudas aitobyry enanâguewâdaungâ. “Uguondo tynrenseim urâ. Auguely idataungâ” tâkeze myani. Toenzepa myani uguondo modo eagâ idâwâtyby modo awyly, quattrocentos awârâem. Tâdyoze olâ myani. Igueduo, idânârâ eagonropyry modo tâwenkezemo, tâtyram todopâdaynzemo warâ myani. Mâkâ Teudas aiese kewâtobyry, ton-honremba tâise myani.

<sup>37</sup> — Judas aitobyry enanâguewâdaungâ lâpylâ. Galiléia donro myakâwâm mâkâ. Kurâdo sapâgueho ume myakâwâm âepanâguely. Toenzepa kehoem kurâdo Judas agâ tâtâzemo myakâwâm. Tâdyoze lâpylâ olâ myakâwâm mâkâ. Igueduo, idânârâ eagonropyry modo tâwenkezemo lâpylâ myakâwâm. Adiendyse atobyry ton-honremba tâise lâpylâ myakâwâm. <sup>38</sup> Awylygue olâ âyanmo auguely. Jesus wâgâ aguewâni modo âdalâ kulâ aguiempyra kine, uguely. Kyzetaguehonremo lelâ. Alâ nâtâzezedaymbamo ise, ton-honrumogue kulâ, kurâdo nhenomedâdylymo-ro watay. <sup>39</sup> Deus eon-honrubemo-ro watay olâ ise âdakiempyramo kurâ, Deus agâ kydâseguebyly awylygue — kely.

Gamaliel aguely tindatuo myani idânârâ âseinwândylymo. <sup>40</sup> Aituo myani guarda domodoram aguelymo:

— Xarâ enetondaungâ akaemo Jesus xunâry egatuwâni modo — kelymo.

Aituo myani pymâdo enadoram adahondylymo. Nhapiogüen-honlymo lelâ myani. Tiampiogüen-hombygueduo myani eyanmo aguelymo:

— Ânguyran-ne Jesus wâgâ adâkeonzeba itaungâ — kelymo.

Agueypyem myani inmoen-honlymo. <sup>41</sup> Aituo myani Jesus tunâry egaturin-em induakeyby modo târâpa âxiguelymo. Toenzepa kehoem iomazelymo, Jesus Cristo wâgâ adâkeduo tâzenagazeolymo awylygue.

<sup>42</sup> Jesus wâgâ aguepa nipyramo olâ myani. Kopaelâgâembaba myani iwâgâ aguelymo. Deus ety oday kurâdo nhenomedâdylymo warâ. Âtâ odakâ adakobâdylymo lâpylâ, Jesus unâry egatuze, Jesus wâgâ agueze.

— Kâmakerim mâkâ, Deus Ingontyby — kelymo mykâinane.

## 6

### *Jesus tunâry egaturin-em induakeyby modo emawyadâni induakehomobyry*

<sup>1</sup> Mârâpygueduo toenzepa myani kurâdo Jesus einwânni modo. Judeu gregu itanwe aguewâni modo, judeu hebraiku itanwe aguewâni modo aidyly nehoguebyramo myani. Awylygue pyni âdy pebaom modoram xuduly wâgâ aguelymo:

— Aunlolâ inanry typyniguerry modo xuatay, pypâ hebraiku itanwe agueim modo lelâ imâem nhuankylomo awyly, pypâ gregu itanwe agueim takaze kehoem — kelymo myani.

<sup>2</sup> Aituo myani doze lelâ Jesus tunâry egaturin-em induakeyby modo idânârâ Jesus einwânni modo indâtyguylymo. Âtâdyguyduomo myani eyanmo aguelymo:

— Deus itaumbypyry egatuly xina ewanu. Koendâ inkâba, Jesus wâgâ adâkely xina inmoly, pypâ modoram pyni tiempâdoem kulâ. <sup>3</sup> Nhaum, sete lelâ uguondo âinduakewâdaungâ, âdy pebaom modoram pyni epâniem. Koendonro modo idukewâdaungâ, Deus Ispirityr agueho ara aini, tonomegueim warâ. Mâinduakebymo ise kopaelâgâembaba pyni epâni. <sup>4</sup> Jesus xunârybyry egatuly, eagâ adâkely warâ xina nimopa mawânrâ ise. Awârâ kulelâ ise xina ewanu, âdy pebanro modoram pyni epâdyly keba — kelymo.

<sup>5</sup> Idânârâ tonlo modo, Jesus tunâry egaturin-em induakeyby modo agueho ara izemo lelâ myani. Saguhoem kuru induakelymo myani Estêvão. Jesus einwânni myani mâkâ, Deus Ispirityr aguehobyry ara lelâ aini warâ. Ilâpyryem myani Filipe, Prôcoro, Nicanor, Timom, Pármenas, Nicolau warâ induakelymo. Antioquia donro myani mâkâ Nicolau,

judeu keba, Moisés inweniby tâinwânse olâ myani. <sup>6</sup> Akaemo iduakerimbyryem myani nhadylymo Jesus tunâry egaturin-em induakeyby modoram. Aituo myani Deus agâ aguelymo:

— Pabai, asaemo uguondo modo agâ ikâ; eon-honrumo xudugâ, âmâem aitomoem — kelymo.

Jesus tunâry egaturin-em induakeyby modo iduakewâdyby modo nhangahu onwa tâmary nhedylymo myani, ewanumo iwelo xudurimpypyrem Deus awyly xutuhoem.

<sup>7</sup> Jerusalémdâ agui idyly myani Deus itaumbyry idataynrim modo, toenzepa lâpylâ Jesus einwânni modo warâ. Agui lâpylâ myani kurâdo eynynâ Deus agâ aguewâni modo ewy Jesus einwânni modo. Jesus einwânni modo agui isezydly.

### *Estêvão ewentâdobry*

<sup>8</sup> Koendâ myani Deus, Estêvão agâ awyly. Eon-honru tuduze mykâinane Deus, adyesenry modo anhetoem. Anhekyly tientuo, tutuze myani kurâ domodo Deus eagâlâ awyly. <sup>9</sup> Tálâ olâ myani judeu domodo ewy Estêvão iewiâseni, Jesus wâgâ aguelygue. Mârâ âtâ Etadâdyby Modo Etagueyby Âtâdyguyho kelygue tâzekeim oday âtâdyguywâni modo myani akaemo, Cirene, Alexandria, Cilícia Ásia warâ donropyry modo. Aituo myani tyewiâse kehoem Estêvão nhapâiguelymo. <sup>10</sup> Koendâ lelâ olâ myani in-hoguly, Deus Ispiritury aguehoem xurunipyryem awylygue. Pymâdo enado tâwentâdoem âdalâ kulâ aguely nitaymba myani mâkâ.

<sup>11</sup> Aituo myani kurâdo ewy nhepywadylymo, âdalâ kulâ Estêvão wâgâ aguehomoe:

— “Mâkâ uguondo, Moisés nhunâguedyly, Deus nhunâguedyly warâ xina nidadâ” myguelymo ise — kelymo myani.

<sup>12</sup> Arâ myani akaemo aguely Estêvão wâgâ. Arâ aguelymo tindatuo myani kurâdo Estêvão agâ iewiâpadaynly, pymâ domodo, Moisés inweniby wâgâ enomedâni modo warâ. Inepa kehoem myani idâlymo myarâ Estêvão eydâ atoam. Estêvão sawânipypyrem, nhadylymo lelâ myani pymâdo ton-honreim âtâdyguyhobryam. <sup>13</sup> Akaemo kewâdly kulâ waunlo modo idâwânmomy lâpylâ myarâ. Aituo myani aguelymo:

— Xinalâ keankâ awâkâ uguondo Deus nhunâguedyly idani. Deus ety, Moisés inweniby warâ xunâguedyly nimowâbyra awâkâ. <sup>14</sup> “Jesus Nazaré donro Deus ety sakalagueze; idânârâ Moisés kurutoem inweniby xugukeze warâ Jesus” nygue — kelymo myani.

<sup>15</sup> Idânârâ târâ pymâdo âtâdyguyho odano modo ara myani aguelymo indadylymo. Agueduomo myani, toenzepa kehoem Estêvão nhesedylymo. Anju emydy ara kehoem myani emydy nhedylymo, Deus eagâlâ awylygue.

## 7

### *Estêvão pymâdo enanaym aguehobyry*

<sup>1</sup> Aituo myani kurâdo eynynâ Deus agâ aguewâni modo iwymâry kuru Estêvão nhapâiguelymo:

— Âkealâka âwâgâ aguelymo? — kely.

<sup>2</sup> Aituo myani Estêvão in-hoguly:

— Ydataungâ, pymâ domodo, kurâ domodo warâ. Kydamu Abraão agâlâ mykâinane Deus ton-honreim. Kydamu Abraão Mesopotâmia eynynâ atay, Harâram idâly iraynâ, Deus idâwânmomy eyam agueze: <sup>3</sup> “Ity anaymba âxiguegâ. Âpemugudo nhângâ. Mârâ âtâ anary âyam kânehonly anaxi idâ” kewândymy Deus.

<sup>4</sup> — Aituo myakâwândy kydamu âxiguely “Caldéia” kehodâba. Harã anaxi myakâwândy âxidâze idâly typemugudo agâ. Harã anaynlâ myakâwândy nhunwym iguely. Ilâpypyrem myakâwândy Deus Abraão ingtonodyly xirâ eydâ kydato anaxi. <sup>5</sup> Canaâdâ lelâlâ wâne myakâwândy kydamu ejiku, eonronruempa olâ myakâwândy. Deus olâmy eyam, “Ity anarylâ ise xirâ” kewândymy. “Âgueduo, âweompyry ety anaryenlâ ise” kewândymy

warâ. Deus arâ agueday, kydamu Abraão tymeguneba myakâwândy. <sup>6</sup> “Tarâpa âxigueze âweompyry modo. Âkelo anaxi idâzemo. Âkelo kurâdo duaxi âxidâze, idâzemo warâ. Iweâpa ise tâty anaymba awylymo, quatrocentos anos awârâem. Mârâ âtâ anary idâhomobyry iwymâry modo âweom enagazezemo. Âweom mâtâ anaym âsewanihobyry tâpywaduneba ise. Kaikâem kulâ ise enagazedylymo” kewândymy Deus – kely.

<sup>7</sup> — “Âweom enagazedaynrim modo enagazeze lâpylâ olâ urâ. Ilâpygueduo ise odopâdylymo mâtâ anaymba, tarâ yrentomoem” kewândymy Deus kydamu Abraãooram. <sup>8</sup> “Uguondo imeimbyry iazely-ro watay, ilery ety iopiry satâgâ, israelitalâ awyly xutuhoem” kewândy lâpylâmy. “Ynynonro modo aito ara aikâ” kewândymy kydamuam. Aituo myakâwândy Isaque iazely, Abraão imery. Sete emedyly itybyem atay myakâwândy nhunwym ilery ety iopiry nhatâly, Deus, “Aiekâne” kehobyry ara. Isaque uguondoem itybyem, Jacógue tymezeduo ilery ety iopiry satâwâm lâpylâmy. Uguondoem itybyem, doze lelâ myakâwândy Jacó imeom uguondo modo. Sete emedyly itybyem myakâwândy tymeombyry iazely agâ ilery ety iopiry nhatâwâdyly, israelitalâ awylymo xutuhoem. Akaemo doze uguondo modolâ idânârâ israelita modoem iepani – kely myani Estêvão.

<sup>9</sup> Aituo myani Estêvão agueondly:

— Tâlâ myakâwândy Jacó imery, José keho. Mâkâ myakâwândy inwyneuguyly kuru, eagonro tymeombyry takaze. Awylygue myakâwândy ipemugudo iwâgâ âsewânilymo. Aituo myakâwândy José vende nhedylymo Egitoram idâwâni modoram. José agâlâ olâ myakâwândy Deus. Tâenselâ târâ Egitodâ. <sup>10</sup> José âzenagazeoduo, Deuslâ myakâwândy eon-hondâni. Toenzepa kehoem myakâwândy enomery nhuduly. Salokuzenomo koendronroem tyenehonze myakâwândy. Awylygue myakâwândy Egito donro modo iwymâry “Faraó” keho, toenzepa José ize awyly, pymâem nhenehonly warâ. Tâty, tysejiguy warâ eniem nhedyly myakâwândy.

<sup>11</sup> — Mâtâ ume myakâwândy âpa ezay etâdyby iladaynly, iguewâdyly warâ Egitodâ. Tâlâ myakâwândy toenzepa âsewinzeni modo. Pyni tadainze lâpylâ myakâwândy tarâ Canaâdâ. Kydamudo typynigueba idyly myakâwândy. <sup>12</sup> Egitodâ trigu ekanâdybybe kely tindatuo myakâwândy kydamu Jacó tymeombyry ingonodyly sanâse. José iwaigorudo saguhoem myarâ idâlymolâ myakâwândy.

<sup>13</sup> — José esedaunmâmomy, ânguyem awyly nutubamo olâ myakâwândy. Idânârâ idâontomobyry wâgâ myakâwândy, “José urâ, unwânmo imery” kely eyanmo. “Ype-mugudo asaemo” kewândymy Faraóram. <sup>14</sup> Canaâram odopâdylymo iraynâ myakâwândy eyanmo José aguely: “Pabai agâ, âwydymo agâ, âmeonmo agâ warâ xarâ âetaungâ” kely. Aituo myakâwândy idânârâ kydamudo Egitoram idâlymo. Setenta e cinco lelâ myakâwândy kurâdo myarâ idânri.

<sup>15</sup> — Târâlâ myakâwândy José nhunwym iguely. Imeom, iweom warâ tâigueze lâpylâ myakâwândy târâ. <sup>16</sup> Iweâpa ipygueduo myakâwândy kydamudo ibyrypyry âzenehonly Siquémram, xarâ Canaã anaxi. Iweâpalâ olâmy Abraão onro sanâmâ Hamor imeombyry emaym, typemugudo egueypybyry tuhu esagueyby odaji etadâdoem. Aituo myakâwândy târâ kydamudo ibyrypyry etadâdyly – kely.

<sup>17</sup> Aituo myani Estêvão agueondly, tydamudo âdara itobyry awyly nhenanâguehomoem:

— Iweâpalâ Deus, Abraãooram aguehobyry adahowando odaxi itybyem myakâwândy, xirâ onro anaxi odopâdomo odaji itybyem. Egitodâ tataymo, toenzepa tyepaze olâ myakâwândy kydamu Jacó iweompyry modo. <sup>18</sup> Mâtâ ume eagonro myakâwândy pymâem ini Egitodâ. Mâkâ pymâ iwelo toenzepa myakâwândy kydamudo nhenagazedyly, târâ xyrentyby José ipemugu awylymo umelâ. Iweâpa mawânkâ myakâwândy kydamu José iguely, mâkâ pymâ iwelo ipa ataylâ.

<sup>19</sup> — Kydamudo enokumâmy, enagazemâmy warâ mâkâ pymâ iwelo. “Âmerymo iazely uguondo-ro watay, samewâdaungâ paikaji iguehoem” kewândymy eyanmo. Israelita domodo agui idyseba myakâwândy. <sup>20</sup> Mârâ ume myakâwândy kydamu Moisés iazely. Iamudo iwâkuru kehoem myakâwândy mâkâ. Azagâ tokalâ warâ nunâ myakâwândy nhunwym, ise warâ soenseze awyly âtâ oday.

<sup>21</sup> — Ago idyly olâ myakâwândy, toensein-emba idyly. Aituo myakâwândy cestu odaji nhedylymo, paikaji ingonodylymo warâ. Niguepa olâ myakâwândy. Pymâ exiry myakâwândy cestu oday awyly ume eni. Aituo tymeryem nhadyly. Tymery ara lelâ nhenamanâdyly. <sup>22</sup> Pymâ iwery ara kehoem myakâwândy. Awylygue myakâwândy idânârâ Egito donro modo ezewenrygue, enomerygue warâ nhenomedâdyly. Uguondoem itybyem atay, toenzepa myakâwândy enomegu. Tonlo modoram tâdyren-honze myakâwândy – kely.

<sup>23</sup> Aituo myani Estêvão agueondly, Moisés wâgâ, tydamudo wâgâ warâ:

— Uguondoem myakâwândy Moisés, quarenta anos, typemugudo israelita domodo tiendyse myakâwândy. <sup>24</sup> Aituo myakâwândy eydâ atomoram idâly. Târâ tatay, âdaituoba kulâ israelita Egito donroam adapioguoly tâense myakâwândy. Awylygue myakâwândy typemugu emakeze idâly, Egito donro xyâwânm myakâwândy warâ. <sup>25</sup> “Ypemugudo keanra tutuze emakerimoem Deus induakeyby wawyly” kely myakâwândy Moisés. Akaemo olâ myakâwândy Moisés neinwâmpyramo. <sup>26</sup> Kopaelâgâem myakâwândy azagâ israelita domodo âseguebyhoram idâly. Âseguebylymo epagunâze kely myakâwândy. Awylygue eyanmo aguely: “Tâseguebyzeba itaungâ. Âjipemugulâ âmaemo” kely.

<sup>27</sup> — Mâkâ tagonro enagazeni myakâwândy Moisés agâ iewiâpani, âjitoguylymo epagunâze keduo. Ihohu wâgâ igononibyryem myakâwândy aguely: “Xinaram adâkezeba ikâ. Xina iwymâry mâkeba âmâ! Xina mâuntuwâbyra âmâ! <sup>28</sup> Tutuze urâ, kopaelâgâ egípcio mâyân-hobyry. Iwerâ urâ mâyândyse mato?” kely myakâwândy Moisésram. <sup>29</sup> Agueduo Moisés âseanedlyly. Tâzenagazeoly nhytadyly, egípcio tyân-hombyry wâgâ. Aituo Egitodâba âwiendyly. Midiâ anaxi idâly. Pekodo Midiâ anano agâlâ myakâwândy ohogünly. Azagâ lelâ imeom iazely târâ.

<sup>30</sup> Quarenta anos sakabygueduo, târâ âji aguipa kurâdo atodâlâ myakâwândy Moisés, iwy Sinai iwaguepa. Moisés tuhogueim iatygu emâmy. Mârâ iatygu duay myakâwândy anju âepanâguely. Âdaunloenlâ iwatarylâ, sary warâ niadupa olâ myakâwândy. <sup>31</sup> Mârâ arâ tientuo myakâwândy Moisés âseguâdâdyly. Iwaguepa saindyly, koendâ tientoem. Iwaguepa saintybyem myakâwândy Deus aguely indadyly. <sup>32</sup> “Deus urâ, âadamudo Abraão, Isaque, Jacó warâ iDeusry” kely. Aguely tindatuo myakâwândy Moisés adapânily tyanugue. Tiendyseba idyly.

<sup>33</sup> — Aituo myakâwândy Kywymâry Deus aguely: “Tarâlâ urâ. Âhuru etary etygâ. Ienado ihuru tâtagueba ikâ, yrentâ mawyly mânehon-hoem. <sup>34</sup> Tutuze urâ, ynynonro modo Egitodâ âzenagazeoly. Alâ inanry saenlumo kâindadyly. Emakezemo kâewyly. Inepa ise Egitoram ogonodyly emakezemo” kewândymy Deus eyam – kely myani Estêvão.

<sup>35</sup> Aituo myani Estêvão agueondly:

— Kydamudo iwymâryem, Egitodâba emakerimoem warâ myakâwândy Deus Moisés induakely. Deus anju igonomâmy emawyadâze, mâkâ anju tuhogueim tyatygueim duay âepanâgueyby. Kydamudo olâ myakâwândy Moisés izepa, aguely tindadysebamo warâ. “Ânguy xina emakerin-em âduakewâbyra keankâ. Ânguy aguewâpyra keankâ xina iwymâryem mitoem” kelymo lelâ myakâwândy Moisésram. <sup>36</sup> Moiséslâ myakâwândy kydamudo sani Egitodâba. Adyesenry modo aiemâmy Deus eon-honrugue, Deus tagâlâ awyly tienehon-hoem. Egitodâ tataylâ myakâwândy nhenehonly Deus eon-honru tagâ awyly. Parutabâ Tapabileim kelygue tâzekeim takadomoem iotagâ wayam, wayam tienehonday, Deus eon-honru enehonwâm lâpylanly. Kydamudo quarenta

anos âji âdy peba ato einkâ adakobâday myakâwândy Deus ton-honru nhenehonly Moisésram. <sup>37</sup> Moiséslâ myakâwândy kydamudoramagueim: “Kyweompyryram igonose Deus tytaumbyry egatuim. Kypemugulâ ise mâkâ. Uduake wâne Egitodâpa imaker-inmoem myara lâpylâ ise mâkâ kâmakerim ingonodyly” kerim. <sup>38</sup> Kydamudo iwymâry myakâwândy Moisés, mâtâ âji âdy peba ato einkâ adakobâdaymo. Deus ingonotybylâ myakâwândy mâkâ anju târâ iwy Sinaidâ, Moisés agâagueim. Xirâ unâ iozenoagueho tâinwânselâ kurâ até iwerâ – kely myani Estêvão.

<sup>39</sup> Aituo myani Estêvão akaemo âsenanâguehoem Moisés wâgâagueondyly.

— Kydamudo olâ myakâwândy Moisés aguehobyry ara adâidysabamo, tywymârymoem izepamo warâ. Awylygue myakâwândy Egitoram odopâze kelymo.

<sup>40</sup> — Aituo myakâwândy Arâoram aguelymo, Moisés iwaigoruram, Moisés târâ iwy Sinaidâ atay: “Xina ideusry modo xygakâ; xina nhirenkyly, xina iwaunroruem itoem. Âukono Egitodâba xina nejike. Tarâpa olâ mâkâ iwerâ. Iwy Sinairam nâtâ. Xina nutuba âdara itybyem awyly” kewândymomy. <sup>41</sup> Aituo myakâwândy bizeru ekudo nhygadylymo. Mâtâ enado kaneru, tapirâ warâ tyâzemo myakâwândy. Enado âzeguhoam tâisemo myakâwândy, tynrentomoem. “Kyzetyguene merâ kydeusry” kelymo myakâwândy. Agueypyem nhetyguedylymo. Deus ara kehoem myakâwândy nhyrerendylymo, mâkâ tâmarygue tyngatybymo kulâ.

<sup>42</sup> — Awylygue myakâwândy Deus, saguhoem tientomobyry ara, nepyramo idyly. “Tâwâlâ inakanhe anidâmo, ize tato ara” kely myakâwândy Deus. Awylygue myakâwândy xixi, nunâ, ximukâ, awârâ modo kulâ nhirenkylymo awyly. Saguhoem Deus itaumbypyry egatuwâni modo iwâgâmo inwenihomobyry ara kehoem myakâwândy aidyly.

“Israel domodo, urâ mâkeba akâwâm âdamudomo nhirenkyly,

quarenta anos ara mâtâ âji âdy peba ato einkâ tadakobâdaymo.

Yam inkâba akâwâm ânguydo imeom xyâypy,

iaduântyby warâ nhegamelymo.

<sup>43</sup> Yrentaymbamo akâwâm;

tydeusry tyngatybylâ akâwâm nhirenkylymo.

Urâlâ-ro waunlo ara kehoem akâwâm nhyrerendylymo.

Moloque ekudo xygamâmo.

Âtâ imeimbyry odaji iemâmo warâ, tynrentomoem.

Mâtâ âtâ imeimbyry takobâzelâ akâwâm akaemo,

âji âdy peba ato einkâ tadakobâdaymo.

Ximukâ Raifâgue tâzekeim tynrensemo,

ekudo adyesemo warâ lâpylâ akâwâm akaemo.

Awylygue ise toenzepa inagazedylymo âdamudomo aralâ mawylymogue.

Itymo anaymba taypa ogonosemo urâ, Babilônia yan-yam”

kewândymy Deus – kely myani Estêvão.

<sup>44</sup> Aituo myani eyanmoagueondyly:

— Moisésram Deus tânehonzelâ myakâwândy âtâ tâjitulo bygueto âdara aiedyly awyly, kydamudo Deus nhrentomoem. Âdy âtâ odaji tyeseim awyly wâgâ tâduruhzelâ myakâwândy warâ. Deus, Moisésram aguehobyry ara myakâwândy anhedylymo. Mâtâ âtâ oday myakâwândy azagâ tuhu tukumeleim wâgâ Moisés inweniby ekanâdyly. Mâtâ âtâ Deus xyrento takobâzemo myakâwândy kydamudo, mâtâ âji âdy peba ato einkâ tadakobâdaymo. <sup>45</sup> Kydamudo Egitodâba âxiguewâdyby modo igueduo myakâwândy imeombyry, iweompyry warâ mâtâ âtâ nhenevylymo xarâ, Canaâram, onro Deus nhuduupy anaxi. Josué myakâwândy iwymârymo iwelo. Canaâram saintybyem myakâwândy âkeloem tytanruneim modo nhedylymo. Deus kydamudo eon-honru nhuduly myakâwândy, akaemo tâty anano modo nhejikehomoem, akaemolâ tarâ

tâxidâdoem. Kydamudo Deus tynrensemo myakâwândy mânâ âtâ tâjitulo bygueto oday, iwymârymo Davi igueypyem awyly umelâ.

<sup>46</sup> — Toenzepa myakâwândy Deus Davi inwynedyly. Koendâ kehoem myakâwândy eagâ awyly warâ. “Âtâ imâsedo, iwâkuru warâ kâintâdyze urâ, ityem. Ydamu Jacó âinwântâ myakâwândy, urâ lâpylâ warâ. Awylygue ise ity kâintâdy” kely myakâwândy Davi Deusram. <sup>47</sup> Deus olâ myakâwândy Davi intâdyzeba. Awylygue myakâwândy Davi keba Deus ety itâni awyly. Salomão Davi imery myakâwândy âtâ imâsedo Deus etyem itâni.

<sup>48</sup> — Kurâdo âtâ intâdyby odano kulâ keba olâ Deus Ton-honreim. Deus aguehobyrylâ enanâguewâdaungâ, Deus itaumbyry egatuim inweniby:

<sup>49</sup> “Tâinkâ lelâba tâlâ wawyly.

Mure iekado awârâ kau, onro pylâ uhuru kâenkobyzegueândo-ro warâ.

Âtâ mäintâdybymo oday witoem nuduwâpyra.

<sup>50</sup> Âdy iwelo urâem amânhekylymo lâpeba,  
urâlâ idânârâ xuguni wawylygue”

kewândymy Deus – kely myani Estêvão.

<sup>51</sup> Aituo myani Estêvão eyanmo agueondly:

— Eganumi lelâlâ mataunaze! Deus xurâem ânguydo kulâ âmaemo! Jesus wâgâ mäindadyse inkâba âmaemo. Nhenomedâdobyry mäuntudyze inkâba âmaemo, mäinwândyse inkâba warâ. Deus Ispiritury aguely mäinwantaguedyze inkâba âmaemo, âadamudomo aralâ.

<sup>52</sup> Deus itaumbyry egatuwâni modo enagazemâmo, xyâwânmô warâ. “Koendorro Deus Ingonokyly sainse” tâkeze myakâwândy akaemo unâ egatuwâni modo. Mâkâ Koendorro âduaximo naindâ, Jesus. Izepaom modo emaxi muduwâtaundâmo olâ. Âmaemolâ keankâ kruz onwa sakâjien-honri. <sup>53</sup> Deuslâ myakâwândy kâzewenry xudunri. Emary kaynonro myakâwândy Moisésram agueim. Agueho ara amidyseba olâ âmaemo – kely myani Estêvão eyanmo.

### *Estêvão xyâhobyry*

<sup>54</sup> Estêvão aguely tydase myani akaemo pymâ domodo. Tindatuo, toenzepa kehoem myani iewiâpadaynlymo, tyewiâkygue, tyery nhagulymo warâ. <sup>55</sup> Estêvão olâ myani nâseguâdâbyra; Deus Ispiritury idânârâ myani enomery nhuduly, aitaynrim modo nhemaen-hoem. Kayam MYK idyly myani. Deus Ton-honreim eydâ ato nhedyly. Jesus nhedyly lâpylâ XYDYK warâ, Deus eahoru eynynâ.

<sup>56</sup> — Kau âzenahungueyby kâenkly. Jesus kâenkly, Uguondo Kaynâpa Âetyby XYDYK warâ Deus eahoru eynynâ! – kely myani Estêvão.

<sup>57</sup> Agueduo myani pymâ domodo toenzepa kehoem iewiâpadaynlymo. Âjiwantahulymo, aguely nidapyra tâitomoem. Toenzepa kehoem adaenkelymo; idânârâ kehoem Estêvão onwa idâlymo myani. <sup>58</sup> Sawânipryrem myani âtâ anayumba nhegaseândylymo, tyânhuem. Târâ myani tuhugue tamytâze nhâlymo. Tuhu tiamehomoeo tâty BOH waunlo nhetylymo; salokuzenomo Saulo myani akaemo ety iwogonro eni. <sup>59</sup> Tuhu nhamelymo ume myani Estêvão, Jesusram aguely:

— Pymâ Jesus, wonkâne yigueduo, âyam yaintuo – kely myani.

<sup>60</sup> Ilâpyryem myani âzeguhoam idyly. Toenzepa kehoem adaenkely:

— Pymâ Jesus, xirâ inakanhe aitomobyry xygakegâ – kely myani.

Agueypyem myani iguely.

## 8

<sup>1-2</sup> Estêvão egueypybyry tuhu imâsedo esagueyby odaji nhetadâdylymo myani akaemo Jesus einwânni modo ewy. Toenzepa myani igueduo eogunrumo. Saulo olâ myani, Estêvão igueypyem awyly tientuo, toenzepa iomaru.

### *Saulo Jesus einwânni modo nhenagazedobyry*

Estêvão xyâpygueduolâ myani akaemo Jesus einwântânry modo, Jesus einwânni modo toenzepa enagazedylymo nhaguly. Aituo myani âwientaynlymo Jerusalémdâpa. Judéia yan-yam idâimpe myani. Samaria yan-yam idâimpe lâpylâ myani. Jesus tunâry egaturin-em induakeyby modo olâ myani nâwiempyramo, târâmolâ.

<sup>3</sup> Saulo, Jesus einwânni modo nhenagazedyly adaguly myani. Idânârâ myani tyândysemo awyly. Sawâsemo âtâ odakâ adakobâdyly myani. Uguondo modo, pekodo modo alelâ myani tuxize kehoem kadeia odaxi nhakyly.

### *Samariadâ unâ iwâkuru Jesus wâgâ egatuhobyry*

<sup>4</sup> Akaemo Jesus einwânni âwientaymby modo tâinkâ lelâba myani unâ iwâkuru Jesus wâgâ nhegatulymo, Judéia eynynâ, Samaria eynynâ warâ. <sup>5</sup> Jesus einwânni modo enagazedyly ume myani Filipe Jerusalémdâpa âwiendyly. Âtâ anary imâsedo Samaria kehoram idâly. Tonlo modoram,

— Messias mâkâ Jesus, Deus Ingontyby — kewânmy.

<sup>6</sup> Koendâ kehoem myani kurâdo Filipe aguely inwantaguedylymo, Deus eon-honrugue adyesenry modo anhedyly tientuo. <sup>7</sup> Deus eon-honrugue toenzepa kadopâbeom modo kua iemâmy. Tadaenkeze kehoem myani kadopâ modo kurâdo odaypa egasewâdyly. Alâpylâ adakobâdânry modo, ixigalamadaymby modo warâ kua nhetaynly. <sup>8</sup> Warâ myani mâtârâ âtâ anano modo iomazewâdyly.

<sup>9</sup> Târâ tâtyeimbe myani uguondo Simão keho. Âmeodo myani mâkâ. Mâkâ anhekyly tientuo, toenzepa myani samaritano domodo mâkâ nhehoguedylymo. Toenzepa myani adawily tâwâlâ kulâ, “Ton-honreim urâ” tâkewâdylygue. <sup>10</sup> Tonlo modo myani aguely inwantaguedylymo lelâ.

— Deus eon-honrube merâ uguondo! Mâkâ Toenzepa Lelâlâ Ton-honreim kelygue tâzekeim eon-honrube! — kelymo.

<sup>11</sup> Iweâpa myani arâ aieseze awyly. Koendâ kehoem myani kurâdo mâkâ anhekyly nhenuagaendylymo; iweâpalâ mawânkâ myani anhekyly wâgâ âsewânilymo. <sup>12</sup> Mâtârâ ume myani Filipe Samariadâ Jesus wâgâ unâ nhegatuly. Deus kywymâryem itybyem awyly wâgâ myani eyanmo aguely. Unâ iwâkuru myani eyanmo nhegatuly. Tindatuo, toenzepa myani kurâdo Jesus nheinwândyly, uguondo modo, pekodo modo warâ. Einwânnipyryem myani batiza âieholymo, Jesus Cristo eynynonroem tawylymo tienehon-homoem. <sup>13</sup> Simão lâpylâ Jesus tâinwâns, batiza tâiehoze warâ myani. Deus eon-honrugue Filipe adyesenry modo anhedyly tâense myani. Toenzepa tâsewâñize myani, mâtârâ tientuo. Aituo myani aguely:

— Âdara kuruka Filipe awârâ modo anhedyly? — kely myani Simão.

<sup>14</sup> Jerusalémdâlâ myani Jesus tunâry egaturin-em induakeyby modo, “Samaria donro modo Jesus nheinwândylymo” kely indadylymo. Ilâ tindatuo myani Pedro, João warâ myarâ ingonodylymo. <sup>15-16</sup> Saintybyem myani idâlymo Jesus einwânni modo eydâ atoram. Pymâ Jesus eynynonroem tawyly tienehon-homoem batiza âiehoybyem myani akaemo iwelo einwânni modo. Deus Ispiritury nâepyra wao olâ myani akaemo onwa. Aituo myani Pedro, João warâ Deus agâ aguelymo:

— Pabai, Âispiritury igonokâ asaemo Samaria donro Jesus einwânni modo onwa — kelymo.

<sup>17</sup> Agueypyem myani tâmary nhangahumo onwa nhedylymo, Deus Ispiritury tonlo modo onwa âetoem.

<sup>18</sup> Tâense myani Simão, Deus Ispiritury âewyly, Jesus tunâry egaturin-em induakeyby modo mâkâ kurâdo nhangahu onwa tâmary nhetuomo. Ton-honru ize myani myara tâitoem. Aituo myani eyanmo dinheru xuduze kely.

<sup>19</sup> — On-honrumo ara kehoem ize wawyly. Ânguylâ nhangahu onwa imarymo mânhetuomo, Deus Ispiritury tâese mâkâ kurâ onwa. Anra dinheru, ipywadomo, Deus Ispiritury igâseze ton-honre witoem — kely myani.

<sup>20</sup> Aituo myani ton-honre kehoem Pedro eyam aguely:

— Âmâ, âdinheruru alelâ adainwâtaungâ! Ioze inkâba kulâ amidyly. Deus Ispiritury eon-honru dinherugue tanâseinka, inanaji? <sup>21</sup> Xina ara Deus emaryem mitoem nuduwâpyra. Konokuni kulâ âmâ, Deus xurâem. <sup>22</sup> Âjityengâ, inakanhe amitobyry wâgâ. Inakanhe amito imogâ warâ. “Pymâ Deus, inakanhe kulâ enra yangahu oday unâgu; inakanhe awito xygakegâ” kekâ Deusram. <sup>23</sup> Âdara mawyly, tutuze urâ. Xina Deus Ispiritury ingâsedyly metailâ. Aituo enra toenzepa xina wâgâ mâsewânily. Deus xurâem olâ, inakanhe kulâ mâsewânily. Etadâdyby wâne nâsemagueba myara inakanhe amidyly mâinmopa mawyly — kely.

<sup>24</sup> — Urâem wao Pymâ Jesusram ekadaungâ, amyguehomo ara ienagazebyra itoem — kely myani Simão.

<sup>25</sup> Jesus xunâry wâgâ agueypyem, Pedro, João warâ odopâdylymo myani Jerusalémram. Âtâ anary Samaria anano modo einkâ takaday, Jesus wâgâ unâ iwâkuru tâgatuzemo myani.

### *Filipe uguondo Etiópia donro agâ Jesus wâgâ aguehobry*

<sup>26</sup> Mârâpygueduo myani anju âpanâguely. Aguely Filiperam:

— On-hongâ, Filipe. Sul einkâ idâ, ânwa Jerusalém, Gaza warâ ontano oze — kely.  
(Kurâdo aekuru sakado keba myani mârâ ânwa.)

<sup>27</sup> Aituo myani tâtâhoem ohondly. Ânwa oze myani uguondo Etiópia donro agâ oxiodyly. Ety anaym tynrenseim myani mâkâ uguondo. Pekodo pymâ Candace idinheruru, isejiguy warâ xutuim myani mâkâ. Jerusalémram idâypyem, tâty anaxi todopâdyly ume myani Filipe agâ oxiodyly. <sup>28</sup> Tygarosary oday ekadybyem myani ago kehoem Deus itaumbyry intainly. Deus itaumbyry egatuimbyry Isaías inweniby myani intainly. <sup>29</sup> Aituo myani Deus Ispiritury aguely Filiperam:

— Ainkâ mârâ karosaram iwaguepa. Mâkâ uguondo iota — kely.

<sup>30</sup> Deus Ispiritury agueduo myani Filipe egatudyly mârâ karosa iose. Iopaji sainty-byem myani mâkâ uguondo Isaías inweniby intainly indadyly. Aituo myani nhapâiguely:

— Tutuze âmâ awârâ mâintainly? Ânguy wâgâ aguely tutuze âmâ? — kely.

<sup>31</sup> — Kâuntuwâbyra urâ — kely. — Ânguy negatuba kulâ kâuntuwâbyra ise urâ. Ygarosary odaxi âkugâ. Yatado ikagâ — kely myani uguondo Etiópia donro.

<sup>32</sup> Warâ myani Deus itaumbyry ewy mâkâ Etiópia donro intainly aguely:

“Kaneru wâne tyâday, tuhudu satâday warâ âdanipyra,

myara myani mâkâ âdanipyra awyly tâsemaguehoem.

Tâwâlâ wâne âzenagazeoly,

âdakepa olâ myani tyizepaom modoram.

<sup>33</sup> ‘Inakanhe kulâ merâ aidly’ nyguemo, inakanhe anipyra awyly ume kulâ.

Ânguy eynynâ aguewâpyra myani, tienmakehoem.

Toenzepa âsenagazemâmy.

Tyâen-honzemo myani.

Tarâ onro anaym ato tadainze myani”

— kely myani mâkâ Etiópia donro intainly.

<sup>34</sup> Aituo myani Filiperam aguely:

— Xirâ Isaías inweniby wao koendâ yam egatugâ. Ânguy wâgâka xirâ aguely? Tywâgâlâ myakâwândy inwenily? Eagonro uguondo wâgâ? — kely.

<sup>35</sup> Aituo myani Filipe nhegatuly koendâ kehoem Isaías inweniby.

— Jesus wâgâ myakâwândy inwenily — kely eyam.

Aituo myani ago Deus itaumbry wâgâ aguely. Koendâ kehoem unâ iwâkuru Jesus wâgâ aguenri nhegatuly warâ.

<sup>36</sup> Tâtâdaymo myani paruam saindylymo. Aituo myani mâkâ Etiópia donro aguely:

— Egâ. Paru iwatarybe tarâ. Tâwâlápaka wânrrâ batiza yedly, Jesus eynynonroem wawyly kâenehohoem? — kely.

<sup>37</sup> [— Jesus tainwânse lelâlâ âmâ-ro watay, batiza âese lelâ urâ, Jesus eynynonroem mawyly xutuhoem — kely myani Filipe.

— Tainwânse urâ, Deus imery Jesus Cristo awyly. Iweâ lelâlâ ise kainwândyly — kely myani uguondo.]\*

<sup>38</sup> Aituo myani mâkâ Etiópia donro aguely karosa saniram:

— Tarâ kawaru epagunâgâ — kely.

Agueduo myani kawaru nepagunâdyly; azakâlâ xytâguylymo karosa odayba, paru iwataryam tâtâhoem. Târâ myani Filipe, Etiópia donro batiza nhedyly.

<sup>39</sup> Paikayba âjikaguedaymo myani Deus Ispiritury, Filipe nhadyly. Netombyra lelâ myani mâkâ uguondo Etiópia donro. Idâwâm lelâ olâmy. Toenzepa myani iomaru, Jesus tyeinwântuo. <sup>40</sup> Ilâpyryem myani Filipe âepanâguely âtâ anary Azoto kehodâ. Târâpa âxigueybyem Jesus wâgâ unâ iwâkuru tâgatuze myani âtâ anary takado modo anakâ, Cesareianra taindyly iraynâ.

## 9

### *Saulo Jesus nheinwântobyry*

(At 22.6-16; 26.12-18)

<sup>1</sup> Toenzepa myani Saulo iewiâky Pymâ Jesus einwânnipyry modo agâ. Tyânwâdysemo myani idânârâ kehoem. Aituo myani kurâdo eynynâ Deus agâ aguewâni modo iwymâry kururam agueze idâly.

<sup>2</sup> — Damascoram udâdyse urâ, Jesus einwânni modo xuize. Pape iwenigâ, izedy iwenigâ warâ, âmâlâ ugononi awyly nhutuhomoem. Myarâ saintybyem, âtâ tâdâtâdyguyho modoram idâze urâ. Iwymârymoram pape xuduze urâ, mâkâ utuhoem. Sawânehonzemo urâ idânârâ Jesus einwânni modo, uguondo modo, pekodo modo alelâ. Xarâ Jerusalémram enesemo urâ — kely myani Saulo.

<sup>3</sup> Aituo myani pymâ pape nhuduly, Saulo idâhoem. Damascoram sainseaji awyly ume myani toenzepa kehoem kau wâgâ iatygudyly; Saulo eydâ atodâ toenzepa kehoem iajimadyly. <sup>4</sup> Mârâ iatygugue toenzepa kehoem myani Saulo âseanedly. Tâseaneduo myani Saulo onro onwa ihuguely. Tâjitanru idamâmy.

— Saulo! Saulo! Âdaituoka ienagazedyly? — kely.

<sup>5</sup> — Ânguya âmâ, aguenri? — kely myani Saulo.

— Jesus urâ, toenzepa mâenagazeguyl. <sup>6</sup> Aukâ. Idâ âtâ anaxi. Târâ ise mâturuholy amânhekyl wâgâ — kely myani Pymâ Jesus.

<sup>7</sup> Saulo agâ idâwâni modo lâpylâ toenzepa âseanedaunmâmomy. Âdakepamo lâgâlâ myani. Ânguy nepyramo myani. Aguely lelâ indakylymo. <sup>8</sup> Onwâgâpa sautybyem, âdy nepyra lelâ myani Saulo, epyem itybyem tawylygue. Aituo myani eagonro modo emary wâgâ nhawâdylymo, âtâ anaxi tiantoem. <sup>9</sup> Azagâ tokalâ warâ iguandyly ara nepyra myani. Arâ tawylygue myani nâwinduaprya, nadakuiba warâ awyly.

<sup>10</sup> Uguondo Ananias kehobe myani Damascodâ. Jesus einwânni myani mâkâ. Deus agâ adâkeday, tânu oday Jesus âepanâguely nhedyly myani.

— Ananias! — kely myani Jesus.

— Talâ urâ. Âdaselâ, Pymâ — kely myani Ananias.

\* <sup>8:37</sup> Idânârâ livru saguho modo wâgâ iwenibyemba xirâ.

<sup>11</sup> Aituo myani Jesus eyam aguely:

— Aukâ. On-hongâ. Judas etyram idâ. Tutuzelâ âmâ, ânwa LÂ Itânry kelygue tâzekeim. Uguondo Saulo târâ xuigâ. Âtâ anary Tarso kehodâ iazeypy mâkâ. Deus agâ mâkâ aguely iwerâ. <sup>12</sup> Eyam aindyly, âtâ eydâ ato odaji mâwândyly warâ netai. Âmâlâ enra nhekyl. Nhetondoem imary nhonwa mânhedyly netai. Idâ myarâ — kely.

<sup>13</sup> Jesus aguely tindatuo myani Ananias aguely:

— Pymâ, toenzepa kurâdo aguely tydase urâ mâkâ uguondo Saulo wâgâ. Toenzepa âinwânni modo Jerusalémdâ tângazeze, tâkezemo. <sup>14</sup> “Iwerâ ise xarâ Damascoram âewyly, âynynonro modo sawânehonze” nyguemo. “Kurâdo eynynâ Deus agâ aguewâni modo iwymâry kuru iwaperybe mâkâ emaym, Jerusalémram kâtadâze katoem” nyguemo — kely.

<sup>15</sup> Aituo myani Pymâ Jesus aguely eyam:

— Idâ eydâ atoram. Ynynonroem mâkâ iwerâ, iemaryem kâinduakeyby wâgâ aguehoem. Judeu keba modoram, iwymârymoram, judeu modoram lâpylâ warâ agueze mâkâ ywâgâ. <sup>16</sup> Urâlâ ise Sauloram, “Yeinwântâny modoram toenzepa âzenagazeoze maze” kerim — kely.

<sup>17</sup> Aituo myani Ananias, Saulo âxidâdobyryam idâly. Âtâ odaji egawândyly. Tâmary nhangahu onwa ienipyryem eyam aguely:

— Saulo, Cristo eynynâ ypemugu, Pymâ Jesus âyam ugononi. Mâkâ ânwa oze mâentybylâ xarâ ugononi. Mâentondoem agânhedyse olâ. Deus Ispiritury nhese âetoem kâenkadyze — kely.

<sup>18</sup> Aguely umelâ kehoem myani kanra satuby emyenro modo Saulo enu wâgâpa ihuguewâdyly. Mârâ ihugueduo myani epyemba idyly, koendâ kehoem nhetondly idyly warâ. Ilâpygueduolâ kehoem myani eydâ tatodâba saudly; batiza âiehol, Jesus einwânniem tawyly nhenehon-hoem. <sup>19</sup> Ilâpyryem myani âwinduadly. Tâwinduatuo eon-honwandondly. Jesus einwânni modo agâlâ myani Damascodâ.

### *Damascodâ Saulo Jesus wâgâ aguehobyry*

<sup>20</sup> Saulo, Damascodâ tatay, Jesus wâgâ aguepa nipyra myani. Âtâ tâdâtâdyguyho modoram tâtâze myani. Warâ myani,

— Deus imery mâkâ Jesus — kely.

<sup>21</sup> Idânârâ Saulo aguely idataynrim modo toenzepa myani âseguâdâdylymo.

— Etaungâ. Jesus einwânni modo Jerusalémdâ enagazenibyry, akaemo ewy xyâen-horimbyry warâ awâkâ. Taunlo Jesus einwânni modo sawânehonze âetybylâ awâkâ. Kurâdo eynynâ Deus agâ aguewâni modo iwymârydoram etadânehonzemo tiandysemo keankâ Jerusalémram — kelymo.

<sup>22</sup> Tyanepa kehoem olâ myani Jesus wâgâ Saulo aguely. Alâ myani judeu Damasco donro modoram aguely:

— Messias kinwânwântybylâ mâkâ Jesus, Deus Ingonyby — kely.

Koendâ kehoem myani Jesus wâgâ aguely, nhangahumo odaji tientoem. Tutuze kehoem myani aguely, Jesus einwântâny modo aypa kehoemba lâgâlâ.

<sup>23</sup> Iweâpa ipygueduo myani judeu domodo iwymârydo âtâdyguyly.

— Kydyânrê mâkâ Saulo. Toenzepa kuru aguelygue kurâdo Jesus nheinwândyly — kelymo.

<sup>24</sup> Kopaelâgâembaba myani âtâ anary odaypa tâzegaseho modo ara enipe nhedylymo, Saulo tianwâtomoe. Peto oday, kopae alelâ myani nhenuagaendylymo. Xutuwâm olâmy Saulo. <sup>25</sup> Jesus einwânni modo olâ myani âsemaguehoem emawyadâni. Kopae myani cestu imâsedo odaji nhedylymo. Nhytâguyândylymo mâtârâ âtâ anary ahodâdobyry etago TURUK waunlo oze. Warâ myani Saulo âwiendyly judeu domodo iwymârydo amaymba.

### *Saulo Jerusalémram odopâdobyry*

<sup>26</sup> Aituo myani Damascodâba, Jerusalémram Saulo odopâdyly. Saintybyem, Jesus einwânni modo duaxi tâidyse myani. Neinwâmpyramo olâ myani Jesus eynynonroem awyly. Awylygue myani nhytadlymo. <sup>27</sup> Barnabé kulelâ myani Saulo Jesus eynynonroem awyly einwânni. Aituo myani Saulo nhadyly Jesus tunâry egaturin-em induakeyby modoram.

— Jesus einwânnipyryem merâ. Damascoram idâday mykeankâ Pymâ Jesus eyam âepanâguely. Aituo mykeankâ Jesus eyam aguely. Agueduo mykeankâ Saulo nheinwândyly. Damascodâ tatay tyanepa kehoem mykeankâ unâ Jesus wâgâ nhegatuly — kely.

<sup>28</sup> Barnabé aguely tindatuo myani Jesus tunâry egaturin-em induakeyby modo Saulo, Pymâ Jesus einwânnipyryem awyly nhutulymo. Eagâmo Deus wâgâ aguenriem idyly lelâ myani-ro warâ. Âtâ anakâ myani adakobâdyly, Jesus wâgâ agueze. Tyanepa myani Jesus anhetyby, aguehobyry warâ wâgâ agueze.

<sup>29</sup> Judeu âkelo âtâ anaym enamadyby modoram Jesus wâgâ adâkeze lâpylâ myani. Tyam agueho neinwâmpyra olâ myani akaemo. Awylygue myani eágâ iewiâpadlymo, xyâze kelymo warâ. <sup>30</sup> Jesus einwânni modo Saulo xyâze kelymo kely egary indadylymo myani. Aituo myani idâlymo eágâ myarâ âtâ anary Cesareianra. Târâ myani âtâ anary Tarsoram ingonodylymo, enamadobyryanlâ.

<sup>31</sup> Mârâ ume âdapa myani Jesus einwânni modo. Saguhoem enagazedomobyry ara tânagazezebamo myani Judeiadâ, Galileiadâ, Samariadâ warâ. Imâem kuru nhutulymo myani Jesus wâgâ, âdara ize ato ara adâjidyly wâgâ warâ. Toenzepa myani kurâdo Jesus nheinwândyly. Deus Ispiriturylâ myani, Deus ize ato ara aitomoem enomedânímo. Eagâmolâ myani, iomazeâñzemolâ.

### *Enéias kua ietobyry*

<sup>32</sup> Tâinkâ lelâba myani Pedro adakobâdyly, Jesus einwânni modo eon-honwanâze. Âtâ anary Lida kehoram idâwânmmy. <sup>33</sup> Uguondo Enéias kehobe myani târâ. Ixigalamadyby myani mâkâ. Oito anos myani mâkâ egueky. <sup>34</sup> Eyam IU ise idâypyem myani Pedro aguely:

— Iweâ lelâlâ ise Jesus Cristo kua âedyly, Enéias. Aukâ. XYDYK ikâ. Iguetudo nhonkâ mâxiguehoem — kely.

Pedro aguely umelâ kehoem myani Enéias ixinary kua idyly. Inepa myani saudlyly, koendâ adakobâdyly warâ. <sup>35</sup> Toenzepa Lida donro modo, Sarom donro modo warâ Enéias ese idâwânmomy. XYDYK warâ sautybyem awyly ese, adakobâdyly ese warâ myani idâlymo. Idâypyem myani Pymâ Jesus nheinwândylymo. Inakanhe adâidly inmolymo, Jesus tyeinwântomoem.

### *Pedro Jesus eon-honrugue Dorcas igueypyem awyly ume kurâem nhetondobyry*

<sup>36</sup> Pekodo Tabita kehobe myani mâtâ âtâ anary Jope anaym. (“Dorcas” keze gregu itanwe aguely.) Jesus einwânni myani mâkâ pekodo. Âdy pebaom modo eni, emawyadâni warâ myani mâkâ. Aunlolâ myani koendonro modo anhedyly. <sup>37</sup> Pedro, Lidadâ ataylâ myani Dorcas ewâmadly, iguely warâ. Igueduo myani pekodo modo mâkâ egueypybyry ingokelymo. Ilâpyryem mesa onwa nhedlymo âtâ sahomery kaynonro oday. <sup>38</sup> Jopedâ iwaguepa myani Lida. Lidadâlâ Pedro awyly tiuntuduo myani, azagâ uguondo ingonodylymo Dorcas iguehobyry egatuze. Saintybyem myani akaemo igonotaymby modo Pedroram aguelymo:

— Dorcas nigueaki. Inepa âekâ xina agâ Joperam — kelymo.

<sup>39</sup> Aituo myani Pedro inepa kehoem ohondly, eagâmo tâtâhoem. Saintuo myani tonlo modo nhadyly Dorcas egueypybyry mesa wâgâ atoram. Toenzepa myani târâ pypâbyry modo awyly. Eogunrumo myani. Âguedy koendonropyry awyly Pedroram

nhegatulymo, tâty tywogonro nhakâjiby nhenehonlymo warâ. <sup>40</sup> Aituo myani Pedro aguely:

— Idânârâ âmaemo tarâpa âxiguelâdaungâ wao — kely.

Idânârâ egasebygueduomo myani Pedro âzeguhoam idyly, Deus agâ adâkehoem. Aguenripyryem myani âguedyram MYK idyly, eyam aguely:

— Tabita, aukâ! — kely.

Agueduo myani MOK âzenutaiguely idyly. <sup>41</sup> Emary wâgâ Pedro nhawâdyly XYDYK itoem. Ilâpyryem aguely:

— Tâwâlâ idânârâ igawântaungâ — kely pypâbyry modoram, idânârâ Jesus einwânni modoram warâ.

— Anra igueypy. Kurâem nitondai — kely.

<sup>42</sup> Idânârâ Jope donro modo ewy Dorcas Jesus eon-honrugue kurâem itondybyem awyly egary tydasemo myani. Awârâ modo tiuntuduo, toenzepa kurâdo Jesus tainwânsse myani. <sup>43</sup> Iweâpa myani Pedro târâ Simão etydâ awyly. Ânguydo imeom itubygue âdydo imeom xygahudâni myani mâkâ Simão.

## 10

### *Pedro, Cornélio warâ*

<sup>1</sup> Uguondo Cornélio kehobe myani âtâ anary Cesareiadâ. Sodadu domodo “Itália donro modo” iwymâry myani mâkâ, judeu keba. <sup>2</sup> Koendonro myani mâkâ. Deus einwânni warâ, judeu keba tatodâ. Ety odano modo Deus tainwânsemo lâpylâ myani. Aunlolâ myani judeu âdy pebanro modo nhedyly, nhemawyadâdyly warâ. Kopaelâgâembaba myani Deus agâ aguely.

<sup>3</sup> Aituo myani três horas awârâem kogoneyam Deus agâ aguely. Tânu oday âtygaduo myani koendâ kehoem anju nhedyly. Eyam saintybyem myani aguely:

— Âdara, Cornélio? — kely.

<sup>4</sup> Anju tientuo, aguely tindatuo warâ âseanemâmy Cornélio.

— Âdaiseka mâewyly? — kely myani.

Aituo anju in-hoguly:

— Deus itaumbyry âyam enese kâewyly. Aunlolâ inanry Deus eagâ amyguely indadyly. Tutuze mâkâ, âdy pebaom modoem koendâ adyese mawyly. <sup>5</sup> Uguondo modo ewy âtâ anary Jope kehoram igonokâ, uguondo Simão Pedro igâseze. <sup>6</sup> Ânguydo imeom itubygue âdydo imeom xygahudâni Simão ety oday mâkâ âxidâdybyem awyly. Parutabâ iwaguepa mâkâ ety — kely.

<sup>7</sup> Agueypyem myani anju odopâdyly. Aituo myani Cornélio azagâ tokalâ warâ uguondo modo ingâsedyly. Azagâ myani emarylâ, tokalâ myani sodadu, Jesus einwânni. <sup>8</sup> Anju tyam aguehobyry eyanmo egatuimbyryem myani Cornélio aguely:

— Iweâ lelâlâ idâwâtaungâ Joperam — kely.

<sup>9</sup> Agueypygueduolâ myani târâpa âxiguelymo. Ânwa oze tuguantobyrydâlâ myani xykylymo. Kopaelâgâem myani idâondylymo. Kuotatay myani saindylymo. Saintaymo, Pedro âkulys myani âtâ kaynonro idaseraji, Deus agâ agueze. <sup>10</sup> Târâ Deus agâ adâkeday, Pedro ewindupadyly myani. Pekodo modo pyni anhetay, tânu oday âdydo imeom nhedyly myani.

<sup>11</sup> Kau âzenahunguely nhedyly lençol imâsedo nhedyly, quatro iopirydâ ekâjibyem warâ. Onro onwa myani mâtâ lençol xytâguyl. <sup>12</sup> Toenzepa myani ânguydo imeom mâtâ oday awyly. Idu odano, âtâ inatano, ânguydo imeom ârahujini modo, tawâguneim modo warâ myani nhekly. Idânârâ myani mâtâ oday judeu domodo ezewenryem tâsenry modo awyly. <sup>13</sup> Ânguydo imeom tiendyly ume myani Pedro, Deus tyam aguely indadyly.

— Aukâ, Pedro! Awâkâ mânkyly ewy xyâgâ, sâkâ warâ — kely.

**14** — Awipyra ise aze, Pymâ! Xina ezewenry eynynâ tâseim keba kulâ kântaymba ise urâ — kely myani Pedro.

**15** Aituo myani Deus agueondly:

— “Sâkâ” uguelo watay, “Kâmpyra ise urâ” tâkezeba ikâ — kely.

**16** Aituo myani Deus eyam agueondly:

— Xyâgâ, sâkâ warâ awâkâ lençol duano modo — keondly.

— Kâmpyra ise aze, Pymâ! Xina ezewenry eynynâ tâseim keba awylygue ise kâmpyra wawyly — keondly myani Pedro.

Ilâpygueduo myani,

— Xyâgâ, sâkâ warâ awâkâ — keondly Deus.

— Xina ezewenry eynynâ tâseim keba awylygue ise kâmpyra wawyly — keondly Pedro.

Ilâpygueduo myani mâtâ lençol kau odaxi odopâdy.

**17** Aituo myani Pedro âseguâdâdy. Âdara tâidyl nutuba idyly tientyby wâgâ.

— Âdyka Deus kâuntudyze ato awârâ tienehoymby wâgâ? — kely myani.

Mâtâ wâgâ âpaunzedaylâ myani azagâ tokalâ warâ uguondo Cornélio ingonotaymby modo saindyly myarâ âtâ anaxi.

— Âdykâka ânguydo imeom itubygue âdydo imeom xygahudâni Simão ety? — kelymo myani Jope donro modoram.

Âtânra saintybyem aguelymo:

**18** — Ânguydo imeom itubygue âdydo imeom xygahudâni Simão etylâ xirâ? — kelymo.

— Tarâlâ lâpylâ uguondo Simão Pedro âxidâdybyem awyly? — kelymo.

— Tarâlâ — kehonlymo.

**19** Mâtâ tientyby wâgâ kulâ myani Pedro âpaunzezedly. Aituo myani Deus Ispiritury eyam aguely:

— Azagâ tokalâ warâ uguondo âwinri nâetai. **20** Âytâguygâ. Idâ eagâmo. Judeu kebamo lelâlâ wâne, âdamyguepalâ eagâmo idâ. Urâlâ keankâ âgâsenehonrim — kely myani Deus Ispiritury.

**21** Aituo myani Pedro xytâguyly Cornélio ingonotaymby modoram.

— Pedrolâ urâ, mâwinlymolâ — kely. — Âdaitoenka uize mâewylymo? — kely myani Pedro.

**22** Aituo myani aguelymo:

— Xina iwymâry Cornélio xina igononi. Uguondo tynrenseim mâtâ, cem lelâ sodadu domodo iwymâry. Koendonro mâtâ. Âmaemo judeu domodo mânwânklymo, Deuslâ mâtâ nheinwânkly. Koendâ lelâ mâtâ aidyly, idânârâ judeu xina ijidadâry anano modo enanaji. Iweâ kulâ mykeankâ anju eyam âewyly. “Cornélio, Pedro igâsegâ. Itynra mâtâ nâedâ, âda midyly awyly aguehoem” kely mykeankâ — kelymo Pedroram.

**23** — Kopaelâgâ ise kytâly. Tarâlâ wao itaungâ — kely myani Pedro.

Mâtâ kopae târâlâ myani xykylymo. Kopaelâgâem myani Pedro on-hondly, eagâmo tâtâhoem. Jopedâ Jesus einwânnipyry modo ewy eagâmo tâtâzemo lâpylâ myani.

**24** Iguandyly ara kehoem myani idâzesedylymo. Ânwa oze tuguantobyrydâlâ myani xykylymo. Kopaelâgâem myani Cesareianra saindylymo. Cornélio tynwânwândly umelâ myani etyram saindylymo. Typemugudo, tataen-hodo, tiuntuły modo warâ tygâsenehonze myani, Cornélio, Pedro saindyly tienuendomoem. **25** Pedro saintay, Cornélio iose tâtâze, enado âzeguhoam tâise warâ myani. Warâ olâ myani Pedro eyam aguely:

**26** — Aukâ. Ienado âzeguhoam tâiseba ikâ. Uguondo imyenro kulâ urâ. Deus mâtâkeba urâ — kely.

**27** Eagâ tunâgu umelâ myani Pedro âtâ odaji âwândly. Toenzepa kurâdo âtâdyguyby modo tâense myani. **28** Aituo myani eyanmo aguely:

— Urâ, asaemo yagonrodo warâ, judeu xina, tutuzelâ âmaemo. Âmaemoma judeu keba. Xina judeu domodo ezewenry eynynâ, agâmo adataen-hoem xina nipyra, etymo odaji xina nâwâmpyra warâ. Xirâ tutuze âmaemo. Deus olâ, xina anhekyly iozepa awyly wâgâ anygue. Idamudo wâgâ kulâ ânguy izepa wipyra witoem nutuen-ho warâ. <sup>29</sup> Awylygue âdauguepalâ kâewyly — kely myani Pedro.

Aituo myani Cornelioram aguely:

— Âdaitoenka keankâ ygâsenehonly? — kely.

<sup>30</sup> Aituo myani Cornélio in-hoguly:

— Três iguandyly sakadyby kâtunâguedyly keankâ tarâ ietydâ, três horas kogoneyam, awito ara. Eagâ unâgu ume keankâ anju ydâ âepanâguel. Uguondo keankâ, tapekeingue âzetydâdybyem. <sup>31</sup> Aituo keankâ Yam aguely: “Deus tydase inanry eagâ amyguely. Tutuze mâkâ, judeu âdy pebaom modo tâmawyadâze mawly. <sup>32</sup> Uguondo modo ewy âtâ anary Jope kehoram igonokâ, uguondo Simão Pedro igâseze. Ângydo imeom itubygue âdydo imeom xygahudâni Simão ety oday mâkâ âxidâdybyem awyly. Parutabâ iwaguepa mâkâ ety” kely keankâ Yam. <sup>33</sup> Awylygue keankâ inepa kehoem âgâseni modo kâingonodyl. Tuomare urâ, inepa mâtobry wâgâ. Pymâ Deus xinaram amyguehoem aguehobyry idase xina tarâ âtâdyguybyem awyly — kely myani.

### *Pedro Cornélio etydâ âtâdyguyby modoram Jesus wâgâ aguehobyry*

<sup>34</sup> Judeu keba modoram myani Pedro aguely:

— Iweâma tutuze urâ, Deus xurâem âzekiba kydawyly, judeu, judeu keba alelâ.

<sup>35</sup> Koendâ lelâ awâkâ Deus, idânârâ ize ato ara aitaynrim modo nhedyly, âdykonlo anano modolâ. Einwânni modo tâwâlâ eynynonroem awyly, judeu, judeu keba alelâ.

<sup>36</sup> Xina Israel iweom modoram saguhoem Deus aguehobyry, tutuzelâ âmaemo. Inakanhe aguitobyry tygakeze Deus, Pymâ Jesus kieinwândy-ro watay. Inakanhe aguitobyry nhygakeybyem watay, âdy mâkâ kâwentâdo lâpeba ise. Warâ unâ iwâkuru xina indatyby.

<sup>37</sup> — Jesus wâgâ unâ tydaselâ âmaemo, idânârâ israelita domodo ety anarydâ aguehobyry. Jesus nhenomedâdyly iraynâ, João Batista aguely myani: “Inakanhe amidyllymo imowâdaungâ. Batiza âiehowâdaungâ, Deus einwânnipryrem mawylymo mânehon-homoem. Inepa ise ânguy Messias awyly mâuntulymo” kely. Galiléia eynynâ ani Jesus wâgâ egatuly adaguly. <sup>38</sup> Deus Ingonytybylâ ani mâkâ Jesus Nazaré donro. Tyispiriturylâ eyam ingonokyly, Jesus eon-honru nhuduhoem. Koendâ ani Jesus aidyly, tadakobâdo modo einkâ. Kadopâgue taseim modo kua tyeze ani. Idânârâ awârâ modo tutuze âmaemo. <sup>39</sup> Urâ, yagonropyry modo warâ, xina Jesus nedâ âtâ anary Jerusalém anaym, Israel eynynâ warâ anhekyly. Aituo ani iduery modo kruz onwa nhakâjien-honlymo. Kruz wâgâ ani iguely.

<sup>40</sup> — Azagâ\* emedyly idyly wâgâ olâ ani Deus kurâem nhetondyly. Kurâem itondybyem ani xinaram âepanâguel. <sup>41</sup> Idânârâ kurâdorampa ani âepanâguel, xinaram kulelâ. Jesus wâgâ aguenriem Deus induakeyby xina. Jesus agâ xina nâwinduadâ, nadakui warâma, Deus kurâem nhetombygueduo. Awylygue iwerâ kurâem awyly, xina nhutuly. <sup>42</sup> Mâkâlâ ani xina igononi. “Idâwâtaungâ unâ koendonro ywâgâ egatuze, tâinkonro modoram. Xypyry etay, urâlâ ise igueypy modo, iguedânrâ modo warâ âdara âieholi wâgâ aguenri. Auguehobyry ara ise idânârâ aidyly. Deuslâ, mawânkâ ‘Aikâ’ kerim awitoem” nygue Jesus. <sup>43</sup> Deus itaumbryy egatuwâni modo Jesus wâgâ aguewânmomy. “Deus Ingonytyby âese. Mâkâlâ ise tâinwânni modo inakanhe aitobyry xygakerim” tâkezemo myani — kely Pedro.

### *Deus Ispiritury judeu keba modo onwa âetobyry*

\* **10:40** Nota de pé Mateus 12.40dâ egâ.

<sup>44</sup> Pedro aguely ume, idânârâ akaemo unâ idataynrim modo onwa xytâguywânmý Deus Ispiritury. <sup>45</sup> Jesus einwânni Pedro agâ âetaymby modo tâsewâñizemo myani. Warâ myani aguelymo:

— Etaungâ! Deus Ispiritury judeu keba modo onwa nâetai! — kelymo.

<sup>46</sup> Judeu keba modo Cornélio etydâ âtâdyguywâdyby tâjitanru âkelo Deus Ispiriturydâba âenigue âjิตainlymo myani.

— Ton-honreim, koendonro warâ âmâ, Deus — kelymo myani.

Warâ myani judeu domodo, akaemo judeu keba modo onwa Deus Ispiritury âetybyem awyly nhutulymo. Aituo myani Pedro agueondly judeu domodoram:

<sup>47</sup> — Jesus tâinwâñse asaemo iwerâ. Etaungâ. Kuonwa tâetobyry ara, Deus Ispiritury nhonwamo nâetai. Tâwâlâ batiza âieholymo, Jesus tâinwâñsemo awyly xutuhoem — kely.

<sup>48</sup> Aituo myani judeu keba modoram aguely:

— Batiza âiehowâdaungâ, Jesus Cristo tâinwâñse mawylymo mânehon-homoem — kely.

Batiza tâiehobygueduo, Pedroram aguelymo myani:

— Tarâ xina agâlâ waone ikâ — kelymo.

Târâ eagâmolâ wao myani Pedro, iweâpa nipyra olâ myani târâ.

## 11

### *Pedro Cesareiadâ aityby modo Jerusalémdâ nhegatuhabory*

<sup>1</sup> Jesus tunârâ egaturin-em induakeyby modo, Judéia eynynâ Jesus einwânni modo warâ indadylymo myani Cesareiadâ aityby modo egary. “Judeu keba modo Deus itaumbyry tindatuo, Jesus neinwândâmo” kely myani indakylymo. <sup>2</sup> Pedro Jerusalémram odopâduo myani Jesus einwânni modo ewyram âdunâgueoly.

— Idânârâ Jesus einwânni modo, judeu domodo ezewenry lelâ neinwândâmo, judeu, judeu keba alelâ. Judeu keba modo tâsemaguedyzemo-ro watay, kara lâpylâ tylery ety iopiry natâen-homo — kelymo.

Pedro, Cesaréia donro modo ilery ety iopiry natâen-homba awylygue myani, eagâ iewiâpadlymo.

<sup>3</sup> — Koendâ inkâba mykeankâ Cesareiadâ mawyly. Judeu keba ety odaji igawândâ. Eagâmo mâtâdyguy, mâwinduadâ warâmy. Koendâpa awârâ arâ — kelymo myani.

<sup>4</sup> Aituo myani Pedro koendâ kehoem idânârâ aityby modo nhegatuly, târâ Jopedâ tatay aitaymby modo ara myani nhegatuly.

<sup>5</sup> — Târâ Jopedâ Deus agâ augueday kogonekâ ienu oday âtygaduo sedâ, lençol imâsedo keankâ, quatro iopiry wâgâ ekâjibyem. Wopaylâ keankâ mâtâ. <sup>6</sup> Koendâ mâtâ ioday senuagaendâ. Toenzepa ânguydo imeom sedâ, idu odano, poji anano, âtâ inatano, onro wâgâ ârahujini, kaynâ tawâguneim modo warâ. Idânârâ mâtâ modo kâzewenry eynynâ tâsenry lelâ keankâ. <sup>7</sup> Ilâpygueduo keankâ Deus yam aguely kâindadyly. “Aukâ, Pedro! Xyâgâ, sâkâ warâ awâkâ mânkyly ewy” kely keankâ Deus. <sup>8</sup> “Kâmpyra ise aze, Pymâ! Xina ezewenry eynynâ tâseim keba kulâ kântaymba ise urâ” uguelly keankâ.

<sup>9</sup> — Aituo keankâ Deus agueondly: “‘Sâkâ’ uguelly-ro watay, ‘Kâmpyra ise urâ’ tâkezeba ikâ” kely. <sup>10</sup> Aituo keankâ Deus agueondly yam: “Xyâgâ, sâkâ warâ awâkâ ewy” kely. “Kâmpyra ise aze, Pymâ! Xina ezewenry eynynâ tâseim keba awylygue ise kâmpyra wawyly” uguelly lelâ keankâ azagâ tokalâ ieto wâgâ. Ilâpygueduo keankâ mâtâ lençol imâsedo odopâdy kau odaxi.

<sup>11</sup> — Ilâpygueduo keankâ azagâ tokalâ warâ uguondo saindyly âtâ eydâ watoram. Judeu keba keankâ akaemo. Cornélio Cesaréia donro mykeankâ ygâseze igononimo.

<sup>12</sup> Eagâmo Cornelioram udâhoem nhekaduomo keankâ Deus Ispiritury yam aguely: “Âdamyguepalâ eagâmo idâ” kely. Seis uguondo modo Jope donro Jesus einwânni modo

xina agâ nâtâmo lâpylâ Cesareianra. Cornélio ety odaji keankâ xina egawândly. <sup>13</sup> Aituo keankâ Yam aguely: “Deus agâ auguely ume, anju Yam nâepanâgue. ‘Uguondo modo ewy âtâ anary Jope kehoram igonokâ, uguondo Simão Pedro igâseze. <sup>14</sup> Mâsemaguehomo wâgâ ise âyanmo, âpemugudomoam warâ aguely’ kely keankâ anju” nygue Cornélio Yam.

<sup>15</sup> — Târâ unâ iwâkuru Jesus wâgâ kâengatuly umelâ keankâ Deus Ispiritury nhonwamo xytâguyl. Saguhoem kurâ judeu modo kuonwa tâetobyry aralâ keankâ judeu keba modo onwa xytâguyl. <sup>16</sup> Aituo keankâ Pymâ Jesus aguehobyry kâenanâguely: “João kurâdo batiza nhedyly parugue. Iweâpa nipyra olâ ise Deus Ispiriturygue batiza mâieholymo, ynynonroem mawylymo mânehon-homoem” Jesus kehobyry. <sup>17</sup> Kurâ judeu domodo pymâ Jesus Cristo kieinwântuo, Deus Tyispiritury kuonwa nigonodâ. Cesareiadâ wawyly umelâ keankâ Tyispiritury ingonodyly judeu keba modo nhonwa, kuonwa tingonotobyry ara. Deus anhetyby izepa widyse inkâba urâ — kely myani Pedro.

<sup>18</sup> Jesus einwânni Jerusalém donro modo awârâ tindatu Pedro agâ tyewiâseba idylymo myani.

— Koendonro Deus! Judeu keba modo kara tynynonroem itoem anygue lâpylâ. Inakanhe tawylymo inmolymo Jesus tyeinwântoen-ro watay, eydâ atoram idâzemo tyigueduomo. Kudutuagui awârâ — kelymo.

### *Antioquia donro modo Jesus nheinwântobyry*

<sup>19</sup> Estêvão xyâpygueduo myani toenzepa Jesus einwânni modo Jerusalémdâpa âwientaynlymo. Jesus eynynâbaom modo myani enagazenimo. Taypa ânwienipe myani. Fenícia anaxi idânripe, ilha Chipre anaxi idânripe warâmo myani. Tâlâ pylâ myani Antioquia anaxi idânri modo. Tâtâhobyrydâ myani unâ Jesus wâgâ agueim nhegatulymo. Judeu domodoram kulelâ olâ myani aguelymo, judeu keba modoampa. <sup>20</sup> Tâlâ pylâ Chipre donro, Cirene donro warâ Jesus einwânni modo Antioquiaram tâtâzemo lâpylâ myani, Jesus wâgâ agueze. Unâ iwâkuru Pymâ Jesus xunâry myani nhegatulymo judeu keba modoram. <sup>21</sup> Antioquiaram idâypy modo agâlâ myani Jesus eon-honrumo xuduzelâ. Jesus egary tindatuomo, toenzepa kurâdo inakanhe adâidly tumozemo myani, Pymâ Jesus tyeinwântomoem.

<sup>22</sup> Jerusalémdâ Jesus einwânni modo, Antioquiadâ aityby modo egary indadylymo myani. Judeu keba modo Jesus tainwâñsemo kely myani indakylymo. Aituo myani Barnabé ingonodylymo myarâ.

<sup>23</sup> Saintybyem myani akaemo agâ koendâ kehoem Deus awyly nhedyly. Awylygue myani toenzepa iomaru. Aituo myani mâkâ Jesus einwânni modoram aguely:

— Koendâ kehoem Pymâ Jesus wâgâ xutuwâdaungâ. Mâinwâmpyra tâiseba itaungâ — kely.

<sup>24</sup> Koendonro myani mâkâ Barnabé. Jesus tainwâñse lelâlâ myani mâkâ; Deus Ispiritury aguehobyry adyese lelâlâ warâ. Toenzepa kurâdo Pymâ Jesus nheinwântomoem adyenehonze myani.

<sup>25</sup> Târâpa âxiguebyem myani Barnabé Tarsoram idâly, Saulo ese. <sup>26</sup> Tiontu myani eagâlâ odopâdyly Antioquiaram. Tokalâ anu myani târâ awylymo, Jesus einwânni modo agâ. Toenzepa kurâ domodo tonomedâzemo myani Jesus wâgâ. Târâ Antioquiadâ myani Jesus einwânni modo “cristão” kelygue âzezetâolymo. “Cristo eynynonro” keze awârâ âze aguely. Waunroem kuru Jesus einwânni modo arâ âzezetâolylâ myani mârâ.

<sup>27</sup> Barnabé, Saulo warâ târâ ataylâ myani Deus wâgâ aguewâni modo myarâ Antioquiaram saindylymo. Jerusalémdâpa myani idâlymo. <sup>28</sup> Tonlo modo Jesus einwânni modo agâ myani âtâdyguyl. Deus wâgâ aguewâni modo ewy tokalâ uguondo Ágabo kehobe myani. Deus Ispiritury aguehobyrybe tawylygue myani saudyly adâkehoem:

— Toenzepa ise ânwim; Judéia donro modo toenzepa âsenagazezemo — kely myani.

(Cláudio pymâem awyly ume ani aguehobyry ara aidly.)

<sup>29</sup> Ágabo aguely tindatuo myani tonlo Jesus einwânni modo Judéia donro modo nhemawyadâdylymo.

— Judéia donro modo Cristo eynynâ kypemugunra dinheru kyjigonone, typyniry nhanâtomoem — kelymo myani.

Imâem tydinerugueim modo imâem myani nhudulymo, imâemba tydinerugueim modo myani imâembalâ warâ. Tâlâ tato aralâ myani nhudulymo. <sup>30</sup> Idânârâ dinheru idâtyguyimbyryem myani Judeiadâ Jesus einwânni modo iwymâryram ingonodylymo. Barnabé, Saulo warâ myani sani.

## 12

### *Tiago xyâhobyry, Pedro kadeia odaxi etadâdobyry warâ*

<sup>1</sup> Barnabé Antioquiadâ atay myani pymâ Herodes Jesus einwânni modo ewy nhenagazenehonly. <sup>2</sup> Tyzodadury modoram myani aguely:

— Tiago, João iwaigoru, xyâwâtaunda — kely.

Aguehoymbyem tawylygue myani espadague Tiago nhangasagâdylymo.

<sup>3</sup> Toenzepa myani judeu domodo Jesus einwântâny, Tiago xyâduo, iomarumo. Kurâ domodo Tiago xyâhobyry wâgâ iomarumo tientuo myani Herodes, Pedro nhawânehonly. Âty, judeu domodo tydamudo Egitodâba âsemaguehomobryy nhenanâguehomo etyry ume myani mâtâ aidyly. Pão ioliho pebaom myani mâtâ âty ume nhedawynlymo. <sup>4</sup> Nhawâpygueduomo myani Herodes eyanmo aguely:

— Kadeia odaxi etadâdaungâ. Quatro lelâ ise eni ize wawyly. Ilâpyryem ise quattro lâpylâ, ilâpyryem quattro, ilâpyryem quattro warâ — kely.

Warâ myani Pedro nhetomoem eyanmo aguely.

— Egitodâba âsemaguehomobryy etyguebygueduo ise, Pedro kâenenehonly kurâdo enanaym kâenwentâdoem — kely myani Herodes tyangahu oday.

<sup>5</sup> Warâ myani Pedro etagu, sodadu domodo enanaynlâ. Târâ atay, Jesus einwânni modo, xurâem Deus agâ adâkezemo myani. Kadeia odaypa nhetaguehohoem myani nhekadylymo. Ton-honre kehoem myani iwâgâ Deusram aguezesedylymo.

### *Deus Pedro kadeia odaypa nhetaguehon-hombyry*

<sup>6</sup> Kopae tâwentâguedo iray, azagâ sodadu ontay myani Pedro xykyly, ekâjibyem. Azagâ korenty metalguetogue myani tâynâ, taynâ warâ ekâjibyem awyly. Azagâ sodadupe lâpylâ myani kuoho kadeia iwyantary eni. Kopaelâgâem kurâdo enanaym wâne myani Herodes tyândyse awyly. <sup>7</sup> MOK alelâ kehoem myani anju Pedro iopaji âepanâguely. Toenzepa kehoem myani nhesagonly târâ Pedro eydâ atodâ. Pedro nhewanday myani mâtâ anju MÂ' nhedyly, xuaguehoem. Xuagueduo myani eyam aguely:

— Iokobagâ aukâ, Pedro! — kely.

Agueduo myani korenty modo ewâry wâgâpa ihuguewâdyly, saudyly warâ.

<sup>8</sup> — Iokobagâ âzetydâgâ. Âwanxiery sagamigâ, âwenkadary iekâ warâ — kely myani anju. Aguehobyry ara myani Pedro ohondly.

— Ity BOH waunlo iekâ, kuohoram igasehoem. Âekâ yagâ — kely myani anju.

<sup>9</sup> Koendâ tohombygueduo myani Pedro egasely tâtadâdobyrydâba. Anju nhapyguelâ myani egasely. Tâzetaqueoly awyly nutuba olâ myani; tyâenky kulâ-ro waunlo ara myani, enanaji. <sup>10</sup> Saguho sodadu nhakadylymo myani, nhatanolâ nhakadylymo warâ. Pyanta imâsedo metalguetoram tainsemo myani, aruanra tâzegasehoram. Myarâ sain-tuomo myani kuohoram egasehoem Deus pyanta imâsedo tâwâlâ âzenahunguehoem anhedyly. Târâlâ myani anju idâly. Mâtâ kulelâ myani Pedro târâ kuoho âxiânlly. <sup>11</sup> Târâ kehoem myani Pedro tâsemaguehobyry âkealâ kuru awyly nhutuly.

— Iweâma yâenkyum keba awyly xutuagui. Kuoho lelâlâ urâ. Deus anju nigonotai, kadeia odaypa ietagueze, Herodes âdayepyra itoem. Judeu, Jesus eynynonro keba modo yâze nygue wâne, Deus olâ iemakeagui — kely myani.

<sup>12</sup> Koendâ tiuntuduo myani Pedro idâly Maria, João Marcos ise etyram. Toenzepa myani Jesus einwânni modo târâ awyly, Pedro nhetaguehoem Deusram ekaze. <sup>13</sup> Mârâ âtânra saintybyem myani Pedro pyanta TON TON nhedyly, nhenahunguehomoem, ingâsedly warâ. Târâ tâwaneim Rode myani ânguy pyanta aieni awyly ese idâim. <sup>14</sup> Itanru tindatuo myani Pedroem awyly nhutuly. Toenzepa kehoem myani iomazely. Tuomarugue, pyanta nenhunguebalâ myani odopâdyly tâgase kehoem, târâ âtâdyguyby modoram egatuze:

— Pedro awâkâ kuohonro! — kely myani.

<sup>15</sup> Aguely neinwâmpyramo olâ myani.

— Myguewâdyly kulâ — kelymo lelâ.

— Uguely mâkeba! Pedrolâ! — kely lelâ mâkâ pekodo.

— Egdopyry kulâ keanra — kelymo.

<sup>16</sup> Aguelymo ume, kuoholâ myani Pedro pyanta TON TON nhesezedly, nhenahunguehomoem. Pyanta tienahungueduomo myani, mâkâlâ awyly nhedylymo. Toenzepa myani adapâendylymo, âseguâdâdylymo warâ.

<sup>17</sup> Tâmarygue myani MYK alelâ itomoem aidyly. Aitybyem myani âdara Deus kadeia odaypa tâtaguehobyry negatuly:

— Awitobyry Tiagoram, Jesus einwânni modoram warâ egatuwâdaunda — kely.

Adâkebygueduo inepa kehoem myani târâpa âxiguely. Âkelo âjiram idâly.

<sup>18</sup> Emetybyem myani sodadu domodo Pedro ese idâlymo. Nepyramo olâ myani, Adaitobyry awyly nutubamo warâ.

— Adykâka wânkâ? — kelymo myani.

Tâseguâdâzemo myani toenzepa kehoem.

<sup>19</sup> — Xuiwâtaungâ — kewânmy Herodes.

Âdykâlâ nepyramo olâ myani. Aituo guarda domodo ingâsedly.

— Adara kuruka Pedro kadeia odaypa egasely? — kely.

Tin-hoguho nutubamo myani. Aituo myani akaemo nhâen-honly, mâkâ kadeia odanopyry nhemakehon-homobyry wâgâ. Ilâpygueduo myani Herodes âxiguely Judéia eynynâba. Cesareianra idâly wao.

### *Herodes iguehobyry*

<sup>20</sup> Toenzepa myani Herodes iewiâky, âtâ anary Tiro donro modo agâ, Sidom donro modo agâ warâ. Awylgue myani ipynirymo nigonopyra idyly. Aituo myani mâtâ âtâ anary donro uguondo modo ewy Herodesram ingonodylymo, awârâ modo wâgâ agueze. Idâypyem saguhoem kuru aguelymo myani Blasto agâ. Pymâ agâ tâwaneim myani mâkâ.

— Xina agâlâ waone ikâ, Herodes xina agâ tyewiâseba idyly ara — kelymo myani.

<sup>21</sup> Eagâmo adâkeho saintuo myani idânârâ tadanebygueduo, Herodes tâty iwâkuru kehoem nhedyly, pymâ modo lelâ ety. Mure pymâ tynreim ejidy wâgâ myani ekadyly egawântybyem. Ekadybyem myani aguely adaguly. <sup>22</sup> Aguely tindatuo myani kurâdo adaenkely:

— Deus awâkâ aguenri, uguondo keba! — kelymo myani.

<sup>23</sup> Deus xyrento ara tynrentuo myani âzehoguedly lelâ. Awylgue myani Deus anju ingonodyly, toenzepa kehoem Herodes nhewâmanâdoem. Ioday myani nhâneonly iwondoruam. Inepa myani iguely.

<sup>24</sup> Toenzepa myani kurâdo Deus itaumbyry tindadysedo modo. Tâinkâ lelâba myani Jesus einwânni modo Jesus wâgâ aguely.

<sup>25</sup> Barnabé, Saulo warâ, Jerusalémdâ Jesus einwânni modo iwymâryam dinheru tuduzemo myani, tonlo modo âdy pebanro modo xurâem nhuduhoem. Dinheru xuduimpyryem myani Antioquiaram odopâdylymo. João Marcos tagâ tasemo myani.

## 13

### *Barnabé, Saulo warâ Jesus xunâry egatuze ingonotomobyry*

<sup>1</sup> Antioquiadâ, Jesus einwânni modo ewy Jesus wâgâ kurâdo enomedânibe myani. Barnabé, Simeão, Lúcio, Manaém, Saulo warâmo myani. Tâmyguyneim kelygue tâzekeim lâpylâ myani mâkâ Simeão. Cirene donro myani mâkâ Lúcio. Galiléia donro modo iwymâry Herodes agâ enamadyby myani mâkâ Manaém. <sup>2</sup> Tâtâdyguyzemo myani Jesus einwânni modo, Pymâ Jesus xyrense, iomaenze warâ. Nâwinduapyra tâisemo myani, Deus agâ adâkehomoem. Târâ âtâdyguybyem awylymo ume myani, Deus Ispiritury eyanmo aguely:

— Barnabé, Saulo warâ xiduake, Jesus xunâry egaturin-em. Igonotaungâ akaemo, Jesus wâgâ aguehomoem — kely.

<sup>3</sup> Aituo myani tonlo modo nâwinduapyra idylymo, Deus agâ adâkehomoem. Deus agâ adâkebygueduomo myani Jesus einwânni modo, mâkâ, mâkâ warâ, Barnabé, Saulo warâ nhangahu onwa tâmary nhedylymo, Deus induakeyby awylymo xutuhoem.

### *Barnabé, Saulo warâ Chipredâ Jesus wâgâ aguehomobyry*

<sup>4</sup> Deus Ispiritury tuduakebygueduomo myani Barnabé, Saulo warâ idâlymo âtâ anary Selêusia kehoram. Târâpa idâlymo myani Chipreram.

<sup>5-6</sup> Salamina iduantaji saintybyem myani Jesus wâgâ aguelymo. Âtâ judeu domodo âtâdyguyho odakâ Jesus xunâry tâgatuzemo myani. Pafosram saindylymo. Deus ewanugue akaemo emawyadâzelâ mykâinane João Marcos.

Târâ myani judeu BarJesus nhodylymo. Konokuni aieni mykâinane mâkâ. “Deus eynynonro urâ” tâkelygue, kurâdo enokuni mykâinane. <sup>7</sup> Chipre donro pymâ Sérgio Paulo eatael-ho myani mâkâ. Tonomegueim, Jesus wâgâ aguely tindadysedo warâ mykâinane mâkâ pymâ. Awlygue myani Barnabé, Saulo warâ ingâsedyly, eagâmo adâkehomoem.

Aituo myani eagâ agueze idâlymo. <sup>8</sup> BarJesus (gregüem Elimas keho olâ myani) tataeho Sérgio Paulo, Jesus nheinwândyseba. Aituo myani toenzepa kehoem iewiâpadly akaemo Jesus unâry egatuwâni modo agâ. <sup>9</sup> Deus Ispiritury olâ myani koendâ kehoem Saulo nhurudyly aguehoem. (Itanwemo “Saulo” myani ezedy. “Paulo” myani romano domodo itanwe.) Aituo myani Paulo, Elimas nhesedyly, eyam aguely warâ:

<sup>10</sup> — Diabu ara konokuni kulâ âmâ! Tumunreim kehoem âmâ! Koendoro ize-tonro mâkeba âmâ! Pyrâu tâkâineim wâne kianmehoram naimpyra myara, ataen-hodo amânhedly, Jesus neinwâmpyra itomoem, Deus eydâ atoram naimpyra itomoem warâ. <sup>11</sup> Arâ mawylygue, Pymâ Jesus inagazeze. Epyem âese. Iweâpa nekâ ise âdy mâempyra mawyly. Xixi ehorulâ mâentaymba ise âmâ — kely.

Ilâ umelâ kehoem myani Elimas nepyra idyly. Tyame lelâ myani xurâem. Ânguy emarylâ myani nhawâkyly takobâdoem. <sup>12</sup> Paulo adyesenry anhedyly tientuo myani mâkâ mâtâ ilha iwymâry toenzepa kehoem âsewânily. Aituo Jesus wâgâ Paulo ague-hobryry nheinwândyly.

### *Paulo, Barnabé warâ Antioquiaram idâhomobyry, Pisídia yan-yam*

<sup>13</sup> Sérgio Paulo agâ adâkebygueduomo myani Paulo domodo Pafosdâba âxiguelymo. Pepi imeâgâkeba oday Panfilia yan-yam myani idâlymo. Perge iduantaji myani saindylymo. Târâ myani João Marcos eagâpamo idyly. Jerusalémram odopâdyly. <sup>14</sup> Perge donropyryem myani Paulo, Barnabé warâ Antioquiaram idâlymo, Pisídia eynynonroam.

Tâzekobyzegueho oday myani mâtâ âtâ judeu domodo Deus agâ agueze âtâdyguyhoam idâlymo. Egawântybyem myani ekadylymo. <sup>15</sup> Adâitomo ara myani târâ âtâdyguyby modo

Deus itaumbypy intainlymo ago kehoem. Moisés inwenibydâ myani intainlymo. Deus itaumbypy egatuwâni modo inweniby tytaineremo lâpylâ myani. Pape itaimbygueduo myani tonlo pymâ modo, Pauloram, Barnabéram warâ aguelymo:

— Nhaum, xinaram amyguehomobe mataymo, aguewâtaungâ. Xina eon-honwanâze amygueymo atay, xinaram aguewâtaungâ lelâ — kelymo.

<sup>16</sup> Aituo myani Paulo saudyly, tâmarygue MYK alelâ itomoem aidyly. Tytamuneba ituomo myani aguely adaguly:

— Judeu domodo, âmaemo judeu keba modo taunlo Deus xyreni modo warâ ydataungâ. <sup>17</sup> Iweâpa myakâwândy Deus israelita domodo induakely. Deus tâinwânsemo myakâwândy. Egitodâ tataymo, agui tâisemo myakâwândy. Koendâ mykâinane Deus eagâmo awyly. Ton-honruguelâ myakâwândy akaemo nhetyly târâ âsenagazedomodâpa.

<sup>18</sup> Quarenta anos ara, inakai modo Deus izepa ato kulâ mykâinane anhekylymo. Nepyramo nipyra olâ myakâwândy Deus. <sup>19</sup> Sete lelâ tygueto modo, Canaã eynynâ tâjikeimbe myakâwândy. Deus olâ myakâwândy tainhehonzero, kydamudo mâtâ âji sodoem itomoem. “Kydamudo” uguelly, judeu domodo idamudo. <sup>20</sup> Quatrocentos e cinquenta anos lelâ takaze myakâwândy kydamudo Egitodâ. Ilâpygueduo myakâwândy Canaãram odopâdylymo. Mâtâpygueduo juizes myakâwândy Deus iwymârymoem nhekylly. Kurâdo tâense, âdyo imeom taunâkeze warâ mykâinane akaemo juiz domodo. Pymâ ton-honreim kuru “rei” kelygue tâzekeingue tywymâguepamo myakâwândy — kely.

<sup>21</sup> Aituo myani Paulo agueondyly:

— Samuel juizem awyly ume myakâwândy kurâdo aguely: “Pymâ tynrenseim, ton-honreim kuru warâ xina tywymâryem ize ato, ‘rei’ keho, âkelo anary modo iwymâry ara” kewândymomy. Awylygue myakâwândy Deus saguhoem kuru Saul induakely, kydamudo iwymâryem. Uguondo Quis imery myakâwândy mâtâ, kydamu Benjamim iepadyby ewy. Quarenta anos myakâwândy Saul kydamudo iwymâryem awyly. <sup>22</sup> Deus itanru nhakaduo myakâwândy Saul pymâembâ âieholly Deusram. Davi myakâwândy Deus induakely ejipyanoem. Warâ myakâwândy Deus aguely Davi wâgâ: “Koendâ tutuze urâ awâkâ Davi, Jessé imery kâinwyneguylly. Auguehobry ara lelâ ise aidyly” kewândymy Deus.

<sup>23</sup> — Iweâpalâ myakâwândy Deus, Jesus wâgâ aguely: “Davi iweom ewy igonose urâ, judeu domodo emakeze” kely. Jesulâ myani Deus “Igonose urâ” keho. <sup>24</sup> Jesus kurâdo Deus itaumbypyrgue nhenomedâdylymo iraynâ, João Batista judeu domodoram adâkezelâ myani: “Âjityendaungâ inakanhe amitomobyry wâgâ. Deus izepa ato aiedyly imowâdaungâ. Batiza âiehowâdaungâ, inakanhe amitomobyry imoimbyryem mawylymo mâtenehon-homoem” kewânmmy. <sup>25</sup> “Imakerinmo igonose urâ” Deus kehobry keba olâ myani mâtâ João Batista. Deus, “Aiekâ” kehobry tienwanikely ume myani João aguely: “Deus Ingonybyka urâ, inanajimo? Mâtâ mâtinwânwânklymo mâkeba urâ. Urâ pygueduo ise mâtâ âewyly. Ton-honreim mâtâ, iemyenro keba. Mâtâ ise yakadâ kuru ton-honreim. Âdy mâkeba urâ. Ihuru etary ekâjiguerin-enlâ witoem nudupa lâgâlâ, ihuru kâingokehoem” kewânmmy João — kely myani Paulo.

<sup>26</sup> Aituo myani Paulo agueondyly:

— Ypemugudo, Abraão iweom, âmaemo, judeu keba modo Deus xyrentaynrim modo warâ ydataungâ. Âdara kydâsemaguely awyly wâgâ kiuntudyze Deus. <sup>27</sup> Nutuba lelâlâ myani akaemo Jerusalém donro modo, iwymârymo warâ, Jesus kâmakerin-em igonotyby awyly. Tâzekobyzegueho oday tydasemo myani, Deus itaumbypy wâgâ aguewâni modo Deus Ingonybyly Messias wâgâ inwenibymo. Nutubamo olâ myani, Jesulâ Messias awyly. Jesus xyâhoem tâkazemo myani. “Warâ ise amidylymo” Deus kehobry ara kehoem myani akaemo aidyly. <sup>28</sup> Xyâhoem Pilatosram nhekadylymo, âdy wâgâ xyâho pebalâ. <sup>29</sup> Awârâ aidyly iraynâ, Deus itaumbypy egatuwâni modo adâkezelâ myakâwâm

Jesus wâgâ. “Warâ ise Messias aidyly” kely iweniwânmomy. Saguhoem inwenihomobyry ara kehoem myani aidyly. Kruz wâgâ igueduo eguepybyry tuhu imâsedo tâtagueim odaji nhetadâdylymo.

<sup>30</sup> — Deus olâ kurâem tyetonze. <sup>31</sup> Kurâem tâitombygueduo Jesus tâepanâgueze tyampyguenibyry modoram. Iguelly iraynâ tâtâzemo myani eagâ, Galiléia donropyryem Jerusalémram nhenomedâdyly ume. Kurâem tâitombygueduo iweâpa myani Jesus akaemo modo agâ awyly. Enipyry modo, judeu domodoram kurâem itondybyem awyly wâgâ adâkezemo myani — kely myani Paulo.

<sup>32</sup> Paulo myani eyanmo agueondly:

— Unâ iwâkuru Jesus wâgâ agueim âyanmo egatuze lâpylâ tarâ xina awyly. <sup>33</sup> Iweâpa Deus kydamudoram “Warâ ise aidyly” kehobyrlâ xirâ iwerâ aini. Jesus kurâem tyetonze myani. Saguhoenlâ myakâwândy iwenibyem awyly Messias wâgâ Salmosdâ: “Ymery âmâ; unwâm urâ warâ;

kurâdoram ymery mawyly kânehonekyly warâ”  
kewândymy Deus, Jesus wâgâ.

<sup>34</sup> — “Kâingonotyby igueduo, kurâem ietonze urâ, eguepybyry niwânzepa itoem” kewândymy Deus.

“Koendâ ise urâ agâ’ uguelly akâwândy Daviram.

Davi agâ koendâ watobyry ara ise agâmo koendâ wawlyly.  
Xirâ auguehobyry ara aiese urâ”  
kewândymy Deus.

<sup>35</sup> — Warâ lâpylâ myakâwândy Davi iwenibyem awyly, Deus aguehobyry Messias eguepybyry wâgâ:

“Imarybyry, toenzepa âinwânnipyry eguepybyry  
mâinwâñzeânehomba ise âmâ”  
kewândymy Davi Deusram — kely myani Paulo.

<sup>36</sup> Aituo myani agueondly:

— Tywâgâpa Davi aguely awyly, tutuze kurâ, arâ aguehobyry wâgâ. Deus tâinwâñse, koendâ kydamudo iwymâryem awyly warâ mykâinane. Iguewâm olâmy. Idamudo eguepybyry etadâdobypyry odajilâ myakâwândy eguepybyry âzetadâoly. Târâlâ myakâwândy eguepybyry iwâñzely. <sup>37</sup> Jesus eguepybyry olâ myani niwânzepa. Deus myani kurâem tyetonze — kely.

<sup>38</sup> Warâ tâkeze myani Paulo:

— Ypemugudo, mâuntudyzemo urâ, Jesus kieinwântuo lelâ inakanhe aguitobyry Deus nhygakely awyly. Jesus wâgâlâ iwerâ xina âyanmo aguely. <sup>39</sup> Jesus mâinwântuomo lelâ inakanhe amitomobyry âdygakeoly. Inanajimo olâ inakanhe amitomobyry âdygakeoybyem, Moisés inweniby ara amidylymogue kulâ. Arâpa olâ. Jesus mâinwântuomo lelâ âdygakeoly. <sup>40</sup> Saguhoem Deus wâgâ aguewâni modo, “Deus Ingonykyly eynynâbaom modo âsenagazeze” tâkezemo myakâwândy. Eynynâ itaungâ, mâsenagazebyra mitomoem. Warâ myakâwândy Deus aguehobyry Habacuque inwenily:

<sup>41</sup> “Auguely mâinwântaymba âmaemo.

Âwankuem yedâmo lelâ.

Âpaunzedaungâ, âseanedaungâ warâ!

Âdyoze âmaemo, ytaumbyry mâindadyseba mawylymogue.  
Iwerâ agânhekly ise mâuntulymoembâ kuru,  
tâwâlâ wâne koendâ âyanmo egatuly’ kewândymy Deus”  
— kely myani Paulo.

<sup>42</sup> Adâkebygueduo lâ myani Paulo, Barnabé warâ egaselymo mâtâ tâdâtâdyguyho odayba. Idâdaymo myani tonlo modo eyanmo aguely:

— Imâem tindadyse xina Jesus wâgâ. Tâzekobyzegueho oday âetondaungâne, xinaram agueonse — kelymo myani.

<sup>43</sup> Idâdaymo toenzepa judeu domodo, Paulo, Barnabé warâ tyampyguezemo myani. Judeu keba, judeu nheinwânyly einwânni modo eagâmo tâtâzemo lâpylâ myani. Paulo, Barnabé warâ eyanmo aguely myani:

— Kagâ koendâ tawyly Deus nimowâbyra. Einwânsezedâungâ lakuru awylygue an-hekyly modo âmaemoenlâ awyly — kelymo.

<sup>44</sup> Tâzekobyzegueho saintuo myani toenzepa tonlo modo âtâdyguyondlymo, Paulo, Barnabé warâ Pymâ Jesus wâgâ aguely idase.

<sup>45</sup> Toenzepa aguelymo idataynrim modo tientuomo myani judeu domodo iwymârydo iewiâpadlymo Paulo, Barnabé warâ agâ. Tâsewânilygue kulâ myani akaemo pymâ domodo, Paulo, Barnabé warâ aguely nhakaladâdylymo:

— Inokudylimo kulâ asaemo azagâ uguondo modo — kelymo.

<sup>46</sup> Akaemo pymâ modo nytabyra olâ myani Paulo, Barnabé warâ. Tâegane kehoem aguelymo lelâ:

— Judeu âmaemo. Awylygue âyanmo xina saguhoem kuru unâ Jesus wâgâ aguely. Xina agueho mâinwândyseba olâ âmaemo. Jesus mâinwântuomo lelâ mâsemaguelymo kely mâinwântaymba âmaemo. Awylygue xina omolymo. Judeu keba modoram ise xina Jesus xunâry nhegatuly iwerâ. <sup>47</sup> Iweâpa Deus aguewânm:

“Judeu keba modoram ytaumbyry egaturin-em âduakelymo.

Esagon-ho kytâho nhesagon-ho ara ise ywâgâ mâuntuen-honlymo,  
yam idâhomoem.

Tâinkâ lelâba ise âdara tâdâsemaguely awyly wâgâ amyguelymo”  
kewândymy Deus.

— Awylygue ise judeu keba modoram xina Jesus wâgâ aguely — kely myani Paulo judeu domodoram.

<sup>48</sup> Judeu keba modo awârâ tindatuo, toenzepa kehoem myani iomazelymo.

— Koendonro mâkâ Pymâ Jesus xunâry — kelymo myani.

Idânârâ Deus induakeyby modo myani Jesus tainwânsomo, aunloenlâ eagâ tâitomoem.

<sup>49</sup> Aituo myani akaemo Jesus einwânni modo Jesus wâgâ adâkely nimopamo. Tâinkâ lelâba myani xunârybyry nhegatulymo. <sup>50</sup> Agui olâ myani judeu domodo Paulo, Barnabé warâ tyewiâpanâzemo. Tonlo pymâ modo, pekodo modo âdypeom modo warâ eagâmo iewiâpadlymo myani. Jesus neinwâmpyra myani akaemo pekodo modo; Moisés in-weniby ara lelâ aidylymo. Idânârâ pymâ domodo agâ myani judeu domodo, Paulo, Barnabé warâ nhunâguedylymo, akaemo târâpa ejikehomoem.

<sup>51</sup> Târâpa tâtâdaymo myani Paulo, Barnabé warâ tuhuru etary nhutoleguguelymo, tonlo modo Deusram tânagazezeim awyly xutuho myani mâtâ, aguehobyry tindadyseba atomobyry wâgâ. Ilâpyryem myani Paulo, Barnabé warâ Iconioram idâlymo.

<sup>52</sup> Antioquiadâ Jesus einwânni modo, toenzepa myani iomarumo, eynynonroem tawylymogue. Deus Ispiritury aguehobyry ara lelâ myani aidylymo; eagâmolâ myani-ro warâ.

## 14

### *Paulo, Barnabé warâ Iconioram idâhomo*

<sup>1</sup> Antioquiadâ adâitomobyry ara lâpylâ myani Iconiodâ aidylymo. Paulo, Barnabé warâ myarâ saintybyem âtâ judeu domodo âtâdyguyhoam tâtâzemo myani. Jesus wâgâ unâ nhegatulymo myani. Aguelymo tindatuo, toenzepa judeu domodo, judeu keba modo alelâ Jesus tainwânsomo myani. <sup>2</sup> Awylygue myani judeu Jesus einwântâny Icônio donro modo Jesus einwânni modo idueryem nhenehonlymo. <sup>3</sup> Alâ olâ myani Paulo, Barnabé warâ târâpa nâxigueba awylymo. Toenzepa myani kurâ domodo Jesus

einwânni. Awylygue myani iweâpa idylymo târâ. Tyanepa kehoem myani Pymâ Jesus wâgâ aguelymo:

— Agâmo koendâ kehoem Deus — kelymo myani tonlo modoram.

Deus Paulo, Barnabé warâ eon-honru tuduze myani, koendonro modo, adyesenry modo warâ anhetomoem. Deus arâ anhedyly myani, tonlo modo tunârybyry âkealâ awyly nheinwântomoem. <sup>4</sup> Âikâ âikâ warâ myani âpaunzedylymo Deus itaumbypy wâgâ. Tâlâ myani Paulo, Barnabé warâ eynynonro. Tâlâ lâpylâ myani judeu domodo ewy Jesus einwântânry. <sup>5</sup> Aituo myani tonlo modo ewy Paulo, Barnabé warâ iduery pymâ modo agâ adâkehoem âturudylymo tienagazenehon-homoem.

— Tuhugue kydamytânemo — kelymo myani.

<sup>6</sup> Awârâ tiuntuduomo myani Paulo, Barnabé warâ Listraram, Derberam, âtâ anary iwaguepaom modoram warâ ânwiendylymo, Licaônia yan-yam. <sup>7</sup> Âdyam tâtâhobyrydâ Jesus wâgâ adâkezemo lelâ myani.

### *Listradâ Paulo onwa tuhu nhamehomobyry*

<sup>8</sup> Uguondo adakobâdânrybe myani târâ Listradâ. Ihurudâ tywyke myani iazely. Awylygue myani nadakobâbyra awyly, ekadybyem lelâ awyly warâ. <sup>9</sup> Mâkâ uguondo myani Paulo, Jesus wâgâ aguely indadyly. Mâkâ uguondo adakobâdânry koendâ kehoem enipyryem myani Paulo tuoday aguely:

— Deus kua tyedyly tâinwânsse merâ uguondo — kely.

<sup>10</sup> Aituo myani eyam aguely:

— Aukâ! XYDYK ikâ! — kely.

Inepa kehoem myani mâkâ uguondo saudyly. XYDYK idyly, adakobâdyly warâ. Kua imâmy ihuru. <sup>11</sup> Toenzepa myani kurâdoram âzeseoly, Paulo, Deus eon-honrugue kua nhetybyem awylygue. Tientuomo myani adaenkelymo tytanwe. Paulo nutuba myani âdakeze aguelymo awyly.

— Etaungâ. Aunlo kulâ uguondo mâkeba asaemo; deus asaemo azagâ — kelymo.

<sup>12</sup> — Ton-honruneim modo asaemo azagâ, ize kydato modo — kelymo myani.

“Júpiter” kelygue myani Barnabé nhezetâdylymo, Paulo pylâ “Mercúrio” kelygue-ro warâ, mâkâ tagonro takaze kuru agueim awylygue.

<sup>13</sup> Âtâ anaxi tâzegawântodâlâ myani tydeusry Júpiter nhurentomo âtâ. Mârâ âtâ oday tâwaneim myani tadowanku koroaem xygatyby, tapirâ warâ âtâ anaxi tâzegawântoam tase. Tonlo modoram aguely myani:

— Tapirâ modo kyjiwâkudâne xirâ sawanku koroaem xygatybygue. Iweâma ise kyânlly-ro warâ, asaemo azagâram nhunru kiengamehoem, kydeusry modoram kiengamezezedo ara — kelymo myani.

<sup>14</sup> Akaemo Deus ara tyese tâkehonly tiuntudo myani Paulo, Barnabé warâ adahulilymo. Tâty tauguezemo myani, tytynru tienehon-homoem. Kurâdo duaxi egatudybyem myani adaenkelymo:

<sup>15</sup> — Adâiseba itaungâ, Nhaum! Deus mâkeba xina. Imyenromo kulâ xina! Âyanmo Jesus wâgâ agueze xina xarâ âewyly, onro xygatyby modo kulâ mânwâmpyra mitomoem, iwâgâ amyguelymo mânmojomomoem warâ. Âdyem nitaymba akaemo. Âdy âmaemoem anientaymba ise. Deus iguedâny einwântaungâ, kau, onro, parutabâ, idânârâ xugunipyry. Awâkâlâ idânârâ âdydo imeom xuguni.

<sup>16</sup> — Saguhoem, ize tato aietaynrim modo tâwâlâ aitomoem adyenehonze mykâinane Deus. <sup>17</sup> Koendâ lelâ olâ mykâinane eagâmo awyly. Warâ mykâinane Deus-em lelâlâ tawyly nhenehonly, kopâ igononilâ, âpa ezay mânentâdybymo iazeânehoinlâ. Mâkâlâ âpynirymo xudunri, idânârâ ize matomogue tuomare lelâ mitomoem xuduim warâ. Warâ mâkâ koendâ awyly agâmo, mânwântomoem — kelymo.

<sup>18</sup> “Deus mâkeba xina” kelymo umelâ kehoem myani tonlo modo akaemo tienhoguedoem, âty adiendyse awylymo, deuslâ akaemo-ro waunlo ara. Paulo, Barnabé warâ tadahulizemo myani, kurâdo arâ anipyra itomoem, âdara tidyly nutuba tawylymogue.

<sup>19</sup> Ilâpygueduo myani judeu Antioquia donro modo ewy, Icônio donro modo ewy warâ Listraram saindylymo. Jesus eynynonro keba myani akaemo. Paulo, Barnabé warâ agâ kurâdo tyewiâpanânehonzemo, izepamo tyenehonzemo warâ myani akaemo Listraram saintyby modo. Aituo myani kurâ domodo tuhugue Paulo nhamytâdylymo. Tyamytâbygueduomo myani âtâ anaymba nhuxidylymo, igueypyen-ro waunlo ara myani, enanajimo. Târâlâ myani inmolymo. <sup>20</sup> Jesus einwânni modoram tâjidâtyguyoze myani inmohomobyyrydâ. Tâensedylymo umelâ myani Paulo saudyly, âtâ anaxi idâondyl. Emetuo myani Barnabé agâ idâlymo âtâ anary Derbe kehoram.

### *Paulo, Barnabé warâ Síria yan-yam odopâdomobyry*

<sup>21</sup> Târâ Derbedâ myani Paulo, Barnabé warâ unâ iwâkuru Jesus wâgâ aguelymo. Toenzepa myani kurâdo mâtâ âtâ anano modo ewy Jesus nheinwândylymo, mâtâ unâ tindatuo. Tonlopyryem myani akaemo azagâ odopâdylymo Listraram, Iconioram, Antioquia Pisídia eynynonroam warâ. <sup>22</sup> Âtâ anary modo anakâ takaday, Jesus einwânni modo tuomazeânzemo, turusemo warâ myani, Jesus neinwâmpyra nipyra itomoem.

— Jesus mânwâmpyra tâiseba itaungâ. Deusgue twymâgueim âmaemo. Awylygue ise toenzepa kurâdo Jesus izepaom modo, âewiâsedylymo, inagazedylymo warâ. Arâ ise Deus agonro modo aieholo — tâkezemo mykâinane.

<sup>23</sup> Âtâ anary modo odakâ takadaymo, Paulo, Barnabé warâ uguondo modo tudukezemo myani, mâtâ âtâ anaym Jesus einwânni modo iwymâryem. Tinduakebygueduomo myani nâwinduapyra idylymo wao, akaemo pymâ iwelo modo eynynâ Jesusram tienkadomoem.

— Asaemo koendâ âinwânni modo iwymâryem xina induakewâdyby modo koendâ egâ. Âinwântâ asaemo — kelymo myani Jesusram.

<sup>24</sup> Aituo myani Paulo, Barnabé warâ âtâ anary Pisídia eynynonro modo odakâ sakadylymo. Panfília yan-yam myani saindylymo. <sup>25</sup> Tâinkâ takadaymo Pergedâ unâ iwâkuru Jesus wâgâ negatuba nipyramo myani. Ilâpyryem myani âtâ anary Atália iduantaji idâlymo. <sup>26</sup> Târâ myani pepi odaji âxiedylymo, Antioquia Síria eynynonroam todopâdondomoem. Iweâpa myani mâtâ âtâ anaymba âxiguebyem awylymo, Jesus xunâry egatuze. Deus ewanu aiese idâlymo iraynâ myani Jesus einwânni modo, Deus agâ xurâmoem aguelymo:

— Koendâ asaemo imary modo egâ, âunâry egatuze idâdaymo — kelymo myani tonlo modo.

Deus itaumbryy egatuimbyryem myani Paulo, Barnabé warâ myarâ odopâdylymo.

<sup>27</sup> Saintybyem myani Jesus einwânni modo agâ âtâdyguylymo, idânârâ Deus anhetybytiengatuhomoem.

— Deus xina neon-honwanâdâ, xunârybyry xina nhegatuhoem. Judeu keba modo Jesus nheinwântomoem anieneho — kelymo myani.

<sup>28</sup> Iweâpa myani Paulo, Barnabé warâ târâ Jesus einwânni modo agâ awylymo.

## 15

### *Jerusalémdâ Jesus einwânni modo iwymâry modo âtâdyguyhomobyry*

<sup>1</sup> Paulo, Barnabé warâ Antioquiadâ awyly ume myani uguondo modo ewy Judeiadâpa, Antioquiaram idâlymo. Saintybyem myani aguelymo Jesus einwânni modoram:

— Moisés inweniby ara, iamudo iazeypy ilery ety iopiry tadtâoze lelâ, iamudo judeu awyly xutuhoem, Deus xurâem awyly xutuhoem warâ. Awylygue, âmaemo judeu keba

modo māsemaguedyze mataymo, xina ezewenry ara aitaungâ. Xina ezewenry ara amipyra âmaemo-ro watay, Deus imakewâbyramo ise — kelymo.

<sup>2</sup> Arâ aguelymo tindatuo, Paulo, Barnabé warâ aguelymo nehoguebyramo myani. Aituo myani aguelymo:

— Ioze inkâba kulâ amyguelymo. Judeu keba modoem adyeseim mâkeba awârâ tâjilery ety iopiry satâly — kelymo.

Toenzepa myani âjihogulymo Judéia donro saintyby modo agâ aguehomobyry wâgâ. Aituo myani Antioquia donro modo judeu satâhogue tatâze, tatâzeba warâ tawyly nutuba idylymo.

— Uguondo modo ewy Jerusalémram igonose kurâ, awârâ modo koendâ xutuze, myarâ Jesus tunâry egaturin-em induakeyby modo agâ, Jesus einwânni modo iwymâry agâ warâ agueze idâhomoem — kelymo.

Agueypyem myani Paulo, Barnabé, eagonro modo lâpylâ warâ Jerusalémram idâwâni modo induakelymo. <sup>3</sup> Ilâpygueduo myani Paulo, Barnabé, Jesus einwânni modo ewy iduakewâdyby modo warâ Antioquiadâpa idâlymo Jerusalémram. Fenícia einkâ, Samaria einkâ warâ myani sakadylymo. Âtâ anakâ takadaymo alâ mykâinane Jesus einwânni modo agâ âtâdyguylymo.

— Agui judeu keba modo âdy tyeinwânyly tumozemo, Jesus tyeinwântomoem — kelymo mykâinane.

Aguelymo tindatuo myani âtâ anary sakadomodâ Jesus einwânni modo iomazewâdylymo.

<sup>4</sup> Paulo domodo Jerusalémram tainsemo myani. Koendâ lelâ myani âzedaenkuolymo Jesus einwânni modoram, Jesus tunâry egaturin-em induakeyby modoram, pymâ do-modoram warâ. Idânârâ Deus eon-honrugue adientybymo ara myani Paulo eyanmo nhegatuly. <sup>5</sup> Fariseu domodo ewype myani târâ. Jesus einwânnipyrymoem myani, Fariseu-em tatomodâ. Paulo aguely tindatuo, neinwâmpyramo myani. Awylygue sautybyem aguelymo:

— Judeu keba modo Jesus nheinwândylymo-ro watay, kâzewenry ara nidâmo, Moisés inweniby ara. Tylery ety iopiry natâmo, Deus xurâem tawyly tienehon-homoem. Warâ tâise Jesus einwânni modo iwelo kienomedâdyly, judeu, judeu keba modo alelâ — kelymo.

Aguehomo arâ izepa myani Paulo.

<sup>6</sup> Aituo myani idânârâ Jesus tunâry egaturin-em induakeyby modo, Jesus einwânni iwymâry modo warâ tâtunâguedomoem âtâdyguylymo.

— Tâwâlâ, tâwâlâpa judeu keba modo kara satâly? — kelymo myani âjigue.

<sup>7</sup> Toenzepa myani adâjidyl wâgâ aguelymo. Aguelymo idanipyryem myani Pedro agueze saudyly:

— Nhaum, iweâpalâ ani Deus uduakely, judeu keba modoram Jesus wâgâ aguenriem, tunâry indatomoem, nheinwântomoem warâ. Xirâ tutuzelâ âmaemo. <sup>8</sup> Kurâ domodo nhangahu odai âdara xunâgumo awyly tutuze Deus. Judeu keba modoram Tyispiritury nigonodâ lâpylâ, kyam tingonotobyry ara, judeu keba modo tinwynedyly tienehon-hoem. <sup>9</sup> Idânârâ âzekiba lelâ kurâ, Deus xurâem, judeu, judeu keba alelâ. Judeu keba modo Jesus nheinwândylymo-ro watay, inakanhe aitomobyry xygakeze mâtâ, inakanhe aguitobyry nhygakehobyry ara.

<sup>10</sup> — “Judeu domodo ara tatâduneba judeu keba modo nidâ” tâkeze Deus. Awylygue “Kara nadatâomo” mygueduomo, Deus aguehobyry sakaze myguelymo kulâ awârâ. Idânârâ kâzewenry ara kuru anitaymba myakâwâm kydamudo. Kâzewenry ara kehoem aguitoem nuduwâpyra lâpylâ iwerâ. Âdaituo pylâka judeu keba modo kâzewenke aidyse mawylymo? Tâmânreingue mânhetâdylymo-ro waunlo ara awârâ. Koendâpa arâ adâjidyl.

<sup>11</sup> Inakanhe aini lelâlâ wâne kurâ, Jesus koendonro awylygue olâ kydâzemakeoly. Arâ lâpylâ judeu keba modo nhemakely, “Warâ itaungâ” kepâlâ — kely myani Pedro eyanmo.

<sup>12</sup> Pedro aguely tindatuo myani tonlo modo âdakepa idylymo. Barnabé, Paulo warâ adâitobyry nhegatulymo indadylymo myani.

— Deuslâ ani judeu keba modoram Jesus wâgâ agueze xina igononi. Eon-honrugue adyesenry modo, koendonro modo warâ xina aniedâ — kelymo.

<sup>13</sup> Paulo, Barnabé warâ nhegatuybymo einwânmâmy Tiago. Aguepygueduomo myani aguely:

— Nhaum, ydataungâ. <sup>14</sup> Simão Pedro aguehobyry midataimolâ. “Inepa kehoem Deus koendonro tawyly nhenehonly judeu keba modoram” keanry. “Tienkylyem Deus tuduakeze myani akaemo judeu keba modo ewy” keanry. <sup>15</sup> “Aiese urâ” tâkehobyry aralâ Deus aidyly. Iwenibyenlâ myakâwândy Deus itaumbypy awo wâgâ:

<sup>16</sup> “Deus urâ.

Odopâze urâ âyanmo.

Davi iweom ynynonroemba isemo lelâlâ wâne,  
yeinwântondomoem, yrentomoem warâ aietonze olâ urâ.

Âtâ ihugueyby saunâtondyly wâne,  
myara ise iweloem kânhetondly nhangahumo oday.

<sup>17</sup> Warâ ise agânhedyly, judeu keba modo urâem itoem.

Kâingâsedyby watay, yeinwânsemo lelâ,  
urâem tawylymogue.

<sup>18</sup> Warâ auguely urâ âwymâry.

Xirâ âyanmo xutuen-honze urâ.

Saguhuem auguehobyrylâ xirâ unâ”  
kewândymy Deus, tunâry aguewâni modoram — kely myani Tiago.

<sup>19</sup> Aituo myani Tiago agueondyly:

— Ienanaji, kienkuâdâbyramo tâise kurâ akaemo judeu keba modo, Jesus tyeinwântoem, tydamudo ezewenry imoimbyryem awylygue. <sup>20</sup> Kiunrutomoem pape eyanmo kyjiweninre. Warâ ise kinwenily: “Onro xygatyby, se xygatyby warâam ânguylâ nhunru xuduupy kâdâtaundâ. Uguondo tywydy lelâ nynanâdâ; pekodo tusoram lelâ nâdynanâo warâ. Ângydo imeom idu odano modo, âtâ inatano modo warâ mâtomoem tâwâlâ wao iunu napâdâ; iunu kâzenywâdaundâ warâ.” Warâ ise kiunrudylymo. <sup>21</sup> Iweâpalâ myakâwândy judeu domodo Moisés inweniby indadyly. Até iwerâ âtâ anakâ tâzekobyzegueho oday tâtâdyguyzemolâ lâpylâ. Judeu domodo newiâpabyra itoem, xirâ pape aguehobyry ara ise judeu keba modo aidylymo — kely myani Tiago.

### *Judeu keba modoram pape igonotobyry*

<sup>22</sup> Jesus tunâry egaturin-em induakeyby modo, idânârâ Jesus einwânni modo, iwymârymo modo warâ Tiago aguely tohoguezemo myani. Aituo myani iwymârymo pape inwenily, ingonodyly warâ Antioquiadâ Jesus einwânni modoram. Pape iwenily tienwanikebygueduomo myani azagâ uguondo modo induakelymo pape saniem, Silas, Judas warâ. (Barsabás kelygue tâzekeim lâpylâ myani mâkâ Judas.) Jesus einwânni modo xurâem, koendonro myani akaemo azagâ. Paulo, Barnabé warâ myani eagâmo idâim.

<sup>23</sup> Warâ kely myani pape inwenilymo:

“Âmaemo judeu keba modoram xirâ pape xina inwenily. Âdapa lâwâne âmaemo idânârâ? Xinaem, xina ipemugu âmaemo, xina ara Jesus einwânni mawylymogue. Antioquiadâ, Síria eynynâ, Cilícia eynynâ warâ mâintain-homoem keankâ xirâ xina inwenily.

<sup>24</sup> “Tutuze xina, taunlo uguondo modo ewy awyarâ idâhomobyry. Xina ingonotobyryemba olâ keankâ idâlymo-ro warâ. ‘Mâsemaguedyze mataymo, judeu domodo satâhogue adatâowâdaungâ. Moisés inweniby ara lelâ aitaungâ warâ’ nyguemomy âyanmo. Âda midylymo awyly mâtuntuba mitaundâmomy, aguelymo mâindatuomo. Ânguy ‘Aguewâtaungâ’ keduo inkâba keankâ akaemo arâ aguely. <sup>25</sup> Âyanmo aguehomobyry

tindatuo xina nâtâdyguy, awârâ unâ wâgâ adâkehoem, koendâ tâseinwândoem warâ. Xina nâtunâguedâ âdara amidylymo wâgâ. Azagâ uguondo xina niduake awyarâ idârin-em xinaem agueze. Paulo, Barnabé warâ agâ ise idâlymo. Xina ipemugu lâpylâ asaemo Paulo, Barnabé warâ, xina ara Jesus einwânni lâpylâ awylymogue. <sup>26</sup> Adyoze tâkeze ani asaemo, Pymâ Jesus Cristo xunârybyry egatuze idâdaymo. <sup>27</sup> Awylygue Judas, Silas warâ xina ingonodyly, xina âtunâguedobyry wâgâ âyanmo aguehomoem. Koendâ kehoem âyanmo egatuzemo xirâ pape wâgâ inweniby modo.

<sup>28</sup> “Deus Ispiritury aguehobyry, xina aguehobyry warâ amânhedysemo xina ato. Tonhonre kehoem inkâba ise xirâ modo amânhetomoem; âdylâ tuonugueim âenwyenmo manâdylymo ara kulâ ise. <sup>29</sup> ‘On rogue, segue warâ xygatyby modoram ânguylâ nhunru xuduypy kâdâtaundâ. Ânguyo doimeom idu odano modo, âtâ inatano modo warâ mântomoem tâwâlâ wao iunu napâdâ; munru kâzenywâdaundâ warâ. Uguondo tywydy lelâ nynanâdâ; pekodo tusoram lelâ nâdynanâo warâ.’ Xirâ kulâ xina âyanmo agueho. Tuomare ise âmaemo, xina agueho ara amituomo. Koendâ lelâ itaungâ. Xirâ xina âyanmo inwenily. Alâ kulâ.”

Warâ myani Jesus einwânni modo inwenily judeu keba modoram.

<sup>30</sup> Silas, Judas warâ pape Antioquiaram sase tâjigonomohonzemo myani. Myarâ saintybyem myani Jesus einwânni modo indâtyguylymo, pape tiunduhomoem. <sup>31</sup> Pymâ tonlo modo ago kehoem myani pape intainlymo indatomoem. Tindatuo myani iomazelymo mârâ pape iweniby wâgâ. <sup>32</sup> Jesus wâgâ agueim myani akaemo, Judas, Silas warâ. Jesus wâgâ agueduomo, tohonwanze myani tonlo modo. Tuomaremo lelâ myani Jesus tyeinwânsezedylymogue. <sup>33</sup> Iweâpa myani akaemo azagâ târâ awyly. Todopâdomoem, ohondaymo myani tonlo modo eyanmo aguely:

— Mydâdaymo nhesemo Deus — kelymo.

Aituo myani Judas, Silas warâ odopâdylymo tugononibyry modoram. <sup>34</sup> [Silas tâxiândyze wâne myani târâ.]\*

<sup>35</sup> Antioquiadâ myani Paulo, Barnabé warâ iweâpa idylymo. Pymâ Jesus wâgâ myani, Jesus wâgâ enomedâni modo agâ lâpylâ, unâ nhegatulymo.

### *Paulo, Barnabé agâ âseagonguehomobyry*

<sup>36</sup> Târâ iweâpa itybyem myani Paulo, Barnabéram aguely:

— Âtâ anary kytâhobyry modoram kydodopâne, Pymâ Jesus einwânni modo iomazeânze. Tâinwânselâ awylymo kâuntudyze urâ, ize ato ara aidylymo awyly warâ — kely myani.

<sup>37</sup> — Inoro. João Marcos kagâ idâze lâpylâ — kely myani Barnabé.

<sup>38</sup> Paulo olâ myani João Marcos tagâmo idâdyseba.

— Kagâ nâtâbane awâkâ nidâ — kewânmmy Paulo.

Waunroem kuru unâ Jesus wâgâ egatuze idâdaymo, João Marcos eagâmo tâtâze myani. Idâhomo xypyryam kehoem nipyra olâ myani. Panfília eynynâ ataymo myani João Marcosram âjionlymo. Awylygue myani Paulo tagâmo idâdyseba awyly. <sup>39</sup> Barnabé myani mâtâ salokuzenomo tagâmo idâdyse. Toenzepa myani mâtâ wâgâ Paulo agâ aguely. Ton-honre kehoem myani âseudylymo; nâseinwâmbyramo olâ myani. Awylygue myani âseagonguelymo. Barnabé, João Marcos tagâ tase myani. Ilha Chipream myani idâlymo. <sup>40</sup> Silas myani Paulo induakely tagonroem. Âxiguelymo iraynâ, Antioquiadâ Jesus einwânni modo adâkezemo myani Deus agâ xurâmoem:

— Âunâry egatuze asaemo idâly, Pymâ. Eagâmolâ ikâ, xuahuzemo — kelymo myani.

<sup>41</sup> Aguepygueduomo myani Paulo, Silas warâ idâly. Síria einkâ, Cilícia einkâ warâ myani sakadylymo. Tâinkâ lelâba myani Jesus einwânni modo nhomazeândylymo.

\* <sup>15:34</sup> Idânârâ livru saguho modo wâgâ iwenibyemba xirâ.

## 16

### *Paulo, Silas warâ agâ Timóteo idâhobyry*

<sup>1</sup> Paulo, Silas warâ idâondymo myani Derberam, Listraram warâ. Tâlâ myani salokuzenomo Timóteo keho Listradâ. Jesus einwânni myani mâkâ. Judeu myani mâkâ ise, Jesus einwânni lâpylâ. Gregu olâ myani nhunwym. <sup>2</sup> Listradâ, Iconiodâ warâ Jesus einwânni, koendonroem Timóteo awyly wâgâ adâkezemo myani. <sup>3</sup> Paulo myani Timóteo tagâ tiandyse. Tutuze olâ myani, tâtâhodâ toenzepa judeu domodope awyly judeu keba modo duay. Tutuze myani akaemo, Timóteo iamudoem atay, judeu domodo satâho ara tatâzeba awyly, nhunwym gregu awylygue. Aituo myani tiandyly iraynâ, Paulo judeu satâho ara nhatâen-honly, judeu domodo newiâpabyra itoem. <sup>4</sup> Ilâpygueduo myani Paulo, Silas warâ Listradâba âxiguelymo. Timóteo tasemo myani tagâ. Tâinkâ lelâba âtâ anakâ takadaylâ myani, Jesus einwânni modo indâtyguylymo tiunrutomoem:

— Jerusalémdâ, Jesus tunâry egaturin-em induakeyby modo, pymâ domodo warâ pape inwenibymo agueho ara lelâ aitaungâ — kelymo myani.

<sup>5</sup> Paulo aguely tindatuo myani Jesus einwânni modo eon-honwanzezedymo. Toenzepa myani kurâdo Jesus nheinwândymo. Kopaelâgâembaba myani kurâdo Jesus nheinwânsezedy; toenzepa isezydymo lakuru myani.

### *Troadedâ Paulo enu oday uguondo Macedônia donro âtygadobyry*

<sup>6</sup> Deus Ispirityr Pauloram, eagonro modoram warâ aguely myani:

— Ásia yan-yam inkâba wao idâwâtaungâ Jesus xunâry egatuze — kely.

Awylygue myani Frígia einkâ, Galácia einkâ alelâ Jesus wâgâ agueze idâlymo. <sup>7</sup> Mísia yan-yam iwaguepa tainsemo myani. Âtâ anary Bitínia kehoam idâze kelymo ume myani Deus Ispirityr eyanmo aguely:

— Myarâ mydâdysebamo aze — kely.

<sup>8</sup> Aituo myani Mísia einkâ lelâ sakadylymo, Trôade iduantaji taintomoem. <sup>9</sup> Mârâ kopae myani Paulo enu âtygadyly. Uguondo Macedônia donro myani nhekyl XYDYK warâ.

— Âekâ Macedoniaram, Jesus xunâry xinaram egatuze — kehonly myani Paulo.

<sup>10</sup> Tânu âtygadobyry Paulo nhegatuduo ani inepa kehoem Macedoniaram tâtâhoem xina ohondly. Deuslâ tonlo modoram Jesus wâgâ unâ iwâkuru agueze tugononi awyly, tutuze tawylygue.

### *Pekodo Lídia keho, Jesus nheinwântobyry*

<sup>11</sup> Troadedâpa xina egasely ani pepi imâsedo oday. Ilha Samotrácia kehoam ani xina idâly. Kopaelâgâem ani xina saindyly Neápolis iduantaji. <sup>12</sup> Târâpa xina idâly ani tuhuru wâgâ Filiposram. Toenzepa kurâdope ani mâtâ anaym, Romadâpa saintyby modo. Macedônia eynynâ, tâgareim ani mâtâ âtâ anary Filipos keho. Iweâpa ani xina târâ awyly.

<sup>13</sup> Tâzekobyzegueho oday ani xidadâ odaypa xina âxiguelys. Paru emelaji ani xina idâly, judeu domodo Deus agâ agueze idâhoram. Pekodo modope ani târâ âtâdyguyhomodâ. Ekadybyem, pekodo modo agâ ani xina âtunâguedyly Jesus wâgâ. <sup>14</sup> Pekodo Lídia kehobe myani iduaymo. Âtâ anary Tiatira anano myani mâkâ, âtâ tâwâenseim, nawy emyenro modo vende ieni, Deus eynynonro lâpylâ olâ-ro warâ. Alâ mykâinane aguezesedyly eagâ. Paulo agueho koendâ nhutuhoem aiemâ Pymâ Jesus. Paulo aguely idanipyryem, Jesus tâinwânsse ani mâkâ.

<sup>15</sup> Awylygue ani ety odano modo agâlâ kehoem batiza âieholys, Jesus eynynonroem tawylymo tienehon-homoem. Ilâpyryem ani Lídia xinaram aguely:

— Pymâ Jesus einwânnipyryem wawyly tutuze âmaemo. Awylygue iety odaji âxidâdaungârâ — kely.

Tygâseduo ani etyram âxidâze xina idâly, târâ Filiposdâ tatay.

### *Paulo, Silas warâ Filiposdâ etadâdomobyry*

<sup>16</sup> Filiposdâ tatay, Deus agâ agueze tâdâtâho idâwaym, âwynsaundo kadopâgue taseim tâense ani xina. Diabu eon-honrugue myani waunroem aini modo nhutuly. Âdy aini tutuze awylygue, toenzepa myani dinheru nhemakely. Uguondo modoram adanâhoybyem olâ myani mâkâ. Awylygue myani idânârâ dinheru nhemakeyby xurâempa awyly.

<sup>17</sup> Xina niampyguebyra nipyra olâ ani mâkâ âwynsaundo. Taenle kehoem ani mâkâ xina nhapyguedyly:

— Deus emary asaemo uguondo modo! Kaynonro Deus emary asaemo. Âdara Deus kâmakely awyly egatuim asaemo! — kely ani.

<sup>18</sup> Iweâpa ani arâ aguezeseze awyly. Aituo ani Paulo iewiâpadly, âwynsaundoam MYK idyly, mâkâ iodano kadopâram aguely warâ:

— Jesus Cristo eon-honrugue xirâ âyam auguely. “Awâkâ âwynsaundo odaypa ikâ. Idâ” uguely — kely.

Agueduo inepa kehoem mâkâ odaypa egasely. <sup>19</sup> Mâkâ âwynsaundo âdy wayam waunroem aini modo nutuombyra awyly tiuntuduomo ani sodo modo, Paulo, Silas warâ agâ iewiâpadlymo. Aituo Paulo, Silas warâ nhawâneholymo. Nhuxineholymo praçaram, pymâ domodo âtâdyguyhoam. <sup>20</sup> Ilâpyryem ani pymâ Roma donro modoram nhaleholymo. Warâ ani eyanmo aguelymo:

— Judeu asaemo azagâ. Kâty anary inakanhe ienehonze kely asaemo. <sup>21</sup> Kâzewenry arapa kulâ konomedâdylymo. Roma donro kurâ. Alâ kulâ inkâba âkelo modo nheinwânykyly kyzeinwâne. Kâzewenrylâ kyzeinwâne — kelymo ani.

<sup>22</sup> Aguelymo tindatuo ani kurâdo âtâdyguyby modo Paulo, Silas warâ agâ iewiâpadlymo. Aituo ani pymâ domodo, tonlo modoram aguelymo:

— Asaemo azagâ etyguewâdaungâ, mampioguhomoem — kelymo.

<sup>23</sup> Toenzepa kehoem ani adapioguolymo. Sapioguybyem ani kadeia odaxi âzetadâolymo.

— Koendâne asaemo enahungâ, nâsemagueba itomoem — kewânmmy pymâ domodo etadâdyby modo eniram.

<sup>24</sup> Aguehoymbyem kadeia xypyryam kehoem nhadylymo. Târâ myani ihurumo nhakubyândylymo, se ihoguywâdyby modo odaji, nâsemagueba itomoem.

<sup>25-26</sup> Paulo, Silas warâ Deus agâ aguelymo, igâkymo warâ myani. Kadeia odaxi etadâdyby modo myani tydase. Kuetâji, akaemo azagâ Deus agâ agueday, igâtuday warâ myani toenzepa kehoem onro âzekânilo. Onro âzekâniduo, kadeia itâdobyry tuhu tatuwâze myani; kadeia tâzekâniize lâpylâ myani warâ. Mârâ umelâ myani idânârâ pyanta modo âzenahunguewâdyly. Korenty metalgueto ekâjihomobyry adatâwâdyly warâ. <sup>27</sup> Aituo myani etadâdyby modo eni xuaguely, saudyly. Kadeia iwyantary idânârâ kehoem tânahungueba awyly nhedyly myani. Idânârâ kadeia odano modo âwientbyem waunlo ara myani enanaji. Awylygue myani tydahoru nhetyly tâdyâhoem. <sup>28</sup> Âdyâze kely ume olâ myani Paulo toenzepa kehoem adaenkely:

— Tâdyâzepa ikâ! Tarâlâ xina idânârâ! Ânguy nâwientaymba! — kely.

<sup>29</sup> Paulo aguely tindatuo myani mâkâ etadâdyby modo eni esagon-ho nhenetomoem nhekadyly. Esagon-ho sawânipryem myani tâgase kehoem âwândyly. Paulo, Silas warâ eydâ atoram idâly. Tyanugue tapâne kehoem myani enadomo âzeguhoam idyly.

<sup>30</sup> Ilâpyryem myani kadeia odayba nhetaguelymo. Eyanmo aguely myani:

— Âdaka ise awidyly, kâsemaguehoem, inakanhe awitobyrxygakehoem warâ? — kely.

<sup>31</sup> Aituo myani in-hogulymo:

— Pymâ Jesus lelâ einwânkâ, mâsemaguehoem. Âpemugudo Jesus nheinwândylymo-ro watay, âsemaguezemo lâpylâ — kelymo.

<sup>32</sup> Etadâdyby modo eniram, idânârâ ety odano modoram warâ Jesus xunâry tâgatuzemo myani. <sup>33</sup> Kuetâjilâ myani, mâkâ etadâdyby modo eni, Paulo, Silas warâ sapioguhomobyry âunkehobypy ingokely. Inepa kehoem myani, mâkâ, ipemugudo alelâ batiza âieholymo, Jesus einwânniem awylymo xutuhoem. <sup>34</sup> Ilâpyryem myani mâkâ uguondo Paulo, Silas warâ nhadyly tâtyam, tuantomoe. Toenzepa myani iomarumo, Deus tâinwânsse tawylymogue, Jesus eynynonroem tawylymogue warâ.

<sup>35</sup> Emetybyem myani pymâ Roma donro modo, polícia ingonodylymo etadâdyby modo eni agâ agueze.

— Etaguegâ akaemo azagâ uguondo modo — keze ingonodylymo.

<sup>36</sup> Pymâdo itaumbyry tienmakeduo myani etadâdyby modo eni idâly Paulo, Silas warâ agâ agueze.

— Pymâdo itaguehoanguimo. “Tutuzebalâ idâwâtaungâ” keanrymomy — kely myani.

<sup>37</sup> Tutuzeba kulâ tâtaguedyzeba olâ myani Paulo. Awylygue myani policiaram aguely:

— Roma donro modo mâentomo ara xina etaungâ. Judeu wâne xina, Romadâ tâzeke lâpylâ olâ xina. Pymâ kuru Roma donro aguehobypy xina âdykâ nakadaymba. Alâ olâ keankâ tâzenanaym xina adapioguoly. Xina inakanhe aitobyry wâgâ aguepa kulâ keankâ pymâdo xina kadeia odaxi nhetadânehonly. Iwerâ pylâ xina etaguehonze kelymo, tutuzebalâ-ro. Arâ aguipyra kine! Akaemolâ nâedâ xarâ, tâzenanaym xina etagueze — kely.

<sup>38</sup> Inepa kehoem myani polícia domodo odopâdyly Roma donro pymâ modoram Paulo aguehobypy egatuze. Paulo, Silas warâ Romadâ tâzeke awyly tiuntuduo myani toenzepa âseanedlylymo. <sup>39</sup> Inepa kehoem myani kadeiaran idâlymo, Paulo, Silas warâram agueze:

— Toenzepa xina âjityendyly inagazenehon-homobyry wâgâ. Âynynâmo xina inakanhe aitobyry enanânehonwâdaungâ — kelymo myani.

Adâkebygueduomo myani idânârâ tâzenanaym kadeia odaypa Paulo, Silas warâ nhadylymo kuohoram. Warâ myani tientaguebygueduomo, aguelymo:

— Xina ety anaymba itaungâne — kelymo.

<sup>40</sup> Kadeia odaypa egaseybyem myani Paulo, Silas warâ Lídia etyram idâlymo. Târâ myani Jesus einwânni modo nhodylymo. Aituo myani eyanmo aguelymo:

— Jesus tâinwânselâ itaungâ. Ize ato ara lelâ aitaungâ warâ — kelymo.

Iomazeânimobyryem, eon-hondânimobyryem warâ myani Filiposdâba idâlymo.

## 17

### *Paulo, Silas warâ Tessalonicaram idâhomobyry*

<sup>1</sup> Filiposdâba egaseybyem myani Paulo, Silas warâ Anfípolis einkâ, Apolônia einkâ warâ sakadylymo. Ilâpyryem myani âtâ anary Tessalônica kehoam saindylymo. Judeu domodo Deus agâ agueze âtâdyguyhobe myani mâtâ âtâ anaym. <sup>2</sup> Adâito ara, tâzekobyzegueho oday myani Paulo myarâ idâly. Azagâ tokalâ warâ tâzekobyzegueho ara myani Deus itaumbyry iweniby wâgâ tonlo modo agâ xunâgu. <sup>3</sup> Messias wâgâ saguhoem kuru Deus itaumbyry egatuim modo inweniby wâgâ myani aguelymo.

— “Messias âsenagazeze, igueze warâ, ilâpyryem kurâem itonze olâ” kely myani inwenilymo. Merâ Jesus âyanmo augueho, Messiaslâ merâ, Deus Ingonytybylâ — kely myani Paulo.

<sup>4</sup> Arâ Paulo aguely tindatuo myani judeu domodo ewy Jesus nheinwândylymo. Paulo, Silas warâ eagâ idylymo lelâ. Gregu domodo ewy Deus einwânnipe myani mâtâ âtâ anaym, judeu domodo nheinwânto ara. Toenzepa akaemo ewy Jesus tâinwânsemo myani Paulo, Silas warâ aguehobypy wâgâ. Pekodo tynrenseim toenzepa tutuzeim modo Jesus tâinwânsemo lâpylâ myani. Jesus einwânniem itaymby modo, Paulo, Silas warâ agâ onhoam itaunmâmomy.

<sup>5</sup> Toenzepa typemugudo modo ewy Jesus tyeinwântoem, tâzewenrymo imolymo tientuo myani judeu domodo Jesus einwântânry, Paulo, Silas warâ agâ iewiâpadlymo. Aituo inakanhe aitaynrim modo ewy agâ âtâdyguylymo. Paulo, Silas warâ wâgâ inakanhe kulâ aguelymo myani. Aituo myani akaemo inakai modo tâwanunenry modo iewiâpadlymo, adaenkelymo adaguly. Inepa kehoem Jasão etyram idâlymo Paulo, eagonro modo warâ âxidâdobyryam. Tianwâdysemo myani, pymâ domodo enadoram tiantomoem, tienagazedomoem warâ. <sup>6</sup> Paulo domodo niompyramo olâ myani târâ. Tyewiâpaduomo myani Jesus einwânni modo, Jasão warâ tâtâdyzebalâ pymâ domodo enadoram nhadylymo. Adaenkelymo myani:

— Koendâpa akaemo Jesus wâgâ aguewâni modo. Idâhomobyrydâ, kurâ domodo tyewiâpanânehonze lelâ pymâ agâ. Iwerâem kulâ keankâ kâty anaxi saindylymo. <sup>7</sup> Jasão ety odaymo keankâ. Kywymâry Roma donro ezewenry neinwântaymbamo keankâ. “Jesus kywymâry kuru, mâkâ Roma donro pymâ mâkeba” nyguemo — kelymo.

<sup>8</sup> Awârâ aguelymo myani Tessalônica donro modo, pymâ domodo warâ nehoguebyramo. Toenzepa kehoem myani iewiâpadlymo. <sup>9</sup> Aituo myani pymâ domodo Jasâoram, Jesus einwânni modoram warâ aguelymo:

— Xinaram dinheru âunduwâtaungâ. Akaemo Jesus wâgâ aguewâni modo âdy tarâ inakanhe nienehombamo-ro watay, âyanmo xuduonse lelâ xina — kelymo.

Agueduomo myani Jasão, eataen-ho modo warâ dinheru eyanmo nhudulymo, tumohomoem.

### *Paulo, Silas, eagonro modo warâ Bereiaram idâhomobyry*

<sup>10</sup> Iquantuo myani Tessalonicadâ Jesus einwânni modo, Paulo, Silas, eataen-ho modo warâ Bereiaram ingonodylymo. Myarâ saintybyem myani, judeu domodo âtâdyguyho âtâ odaji idâlymo. <sup>11</sup> Târâ myani tonlo modo Pauloram âzenomedâolyo Jesus wâgâ. Tessalônica donro modo emyenro keba myani tonlo modo. Toenzepa myani Paulo tiengatudyze ato tindadyse awylymo. Kopaelâgâembaba myani Deus itaumbyry iweniby wâgâ âsenomedâdylymo, âkealâ kuru Paulo aguely awyly tiunturomoem.

<sup>12</sup> Agui judeu domodo ewy, gregu uguondo modo ewy, pekodo tynrenseim toenzepa tutuzeim modo ewy warâ Jesus tâinwânsimo myani târâ. <sup>13</sup> Judeu Tessalônica donro modo, “Bereiadâ Paulo, Jesus wâgâ aguely” kely tindatuomo myani idâlymo myarâ, Jesus wâgâ aguely izepa tawylymogue. Awylygue myani nhunâguedylymo, tonlo modo Jesus xunâry egatuwâni modo agâ iewiâpadomoem.

<sup>14</sup> Jesus einwântânry modo iewiâpaduo myani, tonlo Jesus einwânni modo Paulo paru emelaji nhadylymo, âwientoem. Silas, Timóteo warâ Paulo agâ nâtâbamo myani. Târâ Bereiadâlâ myani âxiânlymo. <sup>15</sup> Paulo âwientoem sanipyry modo eagâlâ myani Atenasram idâlymo. Bereiaram odopâdylymo iraynâ myani, Paulo eyanmo aguely:

— Silas, Timóteo warâ xarâ inepa âetomoen-ne aguewâtaungâ, inepa xarâ Atenasram yagâ oxioze âetomoem — kely.

Ilâpygueduo myani Beréia donro modo odopâdyly lelâ tâty anaxi.

### *Atenasdâ Paulo Jesus wâgâ aguehobyry*

<sup>16</sup> Silas, Timóteo warâ inwânwânsse Atenasdâ tatay, Paulo toenzepa xygatyby modo nhyrengkylymo, nhetygueguylmo tâense myani. Deus ara kehoem nhyrengkylymo. Toenzepa myani xygatyby modo, toenzepa lelâlâ âji sahuimbêlâ kehoem myani. Tientuo, toenzepa myani Paulo âjityendyly. <sup>17</sup> Kopaelâgâembaba myani Jesus xunâry nhegatuzezedyly. Âtâ tâdâtâdyguyho oday myani Jesus wâgâ judeu domodoram, judeu keba modoram alelâ aguezesedly. Judeu domodo iDeusrylâ myani akaemo judeu keba modo nhyrengkylymo lâpylâ. Kopaelâgâembaba lâpylâ myani praçaram idâly, Jesus wâgâ aguezeseze myarâ adakobâze idâwâni modoram.

<sup>18</sup> Agui myani kurâdo tonomeguneim modo mâtâ anaym, imâem âsenomedâdaymby modo warâ. Akaemo tonomeguneim modo ewylâ myani “epicureus” keho modo, “estóicos” keho modo warâ. Aunlolâ myani akaemo ewy Paulo agâ Jesus wâgâ xunâgumo.

— Jesus tâigueze lelâlâ myani, iwerâ olâ kurâem itondypyem — tâkeze myani Paulo eyanmo.

Arâ Paulo aguely tindatuo myani akaemo ewy aguely:

— Ânguydo kulâ awâkâ Jesus wâgâ aguenri. Iozepa kulâ, nutuba kulâ warâ awâkâ aguely — kelymo.

Tâlâ pylâ olâ,

— Kewâdyly kulâ mâkeba. Âkelo âtâ anano modo iDeusry wâgâ awâkâ aguely, kiuntudânry modo wâgâ — keim modo.

<sup>19</sup> Aituo myani akaemo tonomeguneim modo Paulo nhadylymo myarâ iwelo modogue tâdâsenomedâoam, Areópago kehoram. Târâ myani nhapâiguelmo:

— Iwelo mâengatuly tiuntudyze xina. <sup>20</sup> Âdykâ awârâ amygueho xina nidataymba. Tiuntudyze olâ xina âdy awyly. Koendâ wao xinaram egatugâ — kelymo myani.

<sup>21</sup> Idânârâ myani kurâdo Atenas donro modo unâ iwelo idadyly izetonroem awyly. Târâ enamadyby modo, âkelo âtâ ananobyry modo alelâ myani unâ izetonroem awylymo.

<sup>22</sup> Aituo myani enanaynmolâ Paulo saudyly, Areopagodâ adâkehoem:

— Nhaum, Atenas donro modo, ydataungâ. Toenzepa kuru tâzekudo tuhu xygatyby, se xygatyby warâ mâynrendylymo tarâ Atenasdâ. Awâkâ Deus myguewâtomo mâinwânylymo awyly, tutuze urâ. <sup>23</sup> Âtâ anakâ kadakobâday, toenzepa kurâ ekudo xygatyby modo, âtâ ekudo modo, ânguydo imeom ekudo warâ sedâ. Awâkâ modo mâenhoguedomo ejidydâ sedâ lâpylâ olâ “Deus tutuzenry xyrento xirâ” kely iwenibybeom âji. Deus mâuntudânrymolâ iwâgâ augueho.

<sup>24</sup> — Tytanrugue kulâ myani Deus onro, kau, paru warâ nhugudyly, idânârâ onwogonro, kau wogonro, paikano, âdyo imeom, ânguydo imeom, kurâ domodo warâ. Idânârâ tiungutyby sodo, xuturim warâ mâkâ. Kintâdyby oday kulâ tâjikeim mâkeba mâkâ. <sup>25</sup> Tâmawyadâzeim mâkeba mâkâ, mâkâlâ aieni awylygue. Mâkâlâ kyigueânehondânry. Mâkâ peba-ro watay, kydâepaiguewâbyra tâise kurâ. Awâkâlâ olâ tâlâ kydato modo xudunri. <sup>26</sup> Saguho uguondo xygamâ. Mâkâ uguondo iepadybylâ awâkâ kurâ domodo onro anakonro. Deuslâ myakâwândy tâinkâ lelâba ejitânímo. Waunro kuru uguondo tyngadyly iraynâlâ myakâwândy Deus aguely âdykâ ejidymo awyly wâgâ. Aguewândymy âdara onro anaym awylymo wâgâ, âdara agui idylymo, âdara aguipa idylymo wâgâ, âdara lelâ tynrenseim modo wâgâ, âdara lelâ tynrensenry modo wâgâ warâ.

<sup>27</sup> — Koendâ iwâgâ kiuntuhoem, kieinwântoem warâ myani idânârâ kugudyly. Iwaguepalâ awâkâ Deus, kagâ awyly. Kurâdo tuiotodâlâ awâkâ. <sup>28</sup> Saguhoem aguehonwâny: “Awâkâ Deus kâendylygue olâ tâlâ kydawly. Mâkâlâ kydadakobâdoem kon-honru xuduim” kewânmy uguondo gregu. “Deus imeom kurâ idânârâ” kewânmy saguhoem uguondo modo tonomeguneimbyry modo ewy. Aguehobyry tutuzelâ âmaemo. <sup>29</sup> Kurâma Deus imeombry. Kurâma ourugue xygatyby keba, pratague xygatyby keba, tuhugue xygatyby keba warâ. Awylygue tâzekudo xygatybyam “Deus merâ” kykeba kydawly.

<sup>30</sup> — Kaudyly ume myakâwândy saguhobyry modo koendâ Deus wâgâ nutubamo. Awylygue myakâwândy Deusram toenzepa nâzenagazeoba awylymo. Iwerâ olâ idânârâam Deus aguenripyryem: “Âjityendaungâ inakanhe amitomobyry wâgâ, amitomobyra mitomoem” keimpyryem. <sup>31</sup> Xutuimbyryenlâ Deus âdara tynnonro modo, tynynâbaom modo warâ âikâam, âikâam tientoem. Uguondo Deus induakeyby

koendâ tutuze ânguy âji tâdâsenagazedoam idâim, ânguy eagâ ini lelâlâ warâ. Tâigueze lelâlâ myani, Deus olâ kurâem tyetonze. Awârâ adientuo, Deus tânehonze myani Jesuslâ kâmakerin-em tinduakeyby awyly – kely myani Paulo.

<sup>32</sup> “Jesus kurâem tyetonze myani, igueypyem lelâlâ awyly ume” Paulo kely tindatuo, tâlâ myani âwankuem ieni modo. Tâlâ pylâ olâ myani,

— Âdaralâne awârâ xinaram egatuongâ. Jesus wâgâ imâem tiuntudyze xina – keim modo.

<sup>33</sup> Adâkebygueduo myani Paulo egasely Areópagodâba. <sup>34</sup> Tonlo modo ewy Jesus tainwânsemo myani, Paulo aguely tindatuo. Uguondo Dionísio myani Jesus einwânni modo ewy; tonomegueim kehoem myani mâkâ; târâ Areopagodâ xuturim ewy myani mâkâ. Pekodo Damáris Jesus tainwânse lâpylâ myani.

## 18

### *Corintodâ Paulo Jesus wâgâ aguehobyry*

<sup>1</sup> Ilâpygueduo myani Paulo, Atenasdâba idâly Corintoram. <sup>2</sup> Târâ myani uguondo judeu Áquila nhodyly, Ponto eynynâ enamadyby. Priscila myani iwydy ezedy. Iweâpa kuba myani Itáliadâba saindylymo, âtâ anary Roma dompyryem. Pymâ kuru Cláudio, “Idânârâ judeu taunlo modo nâxiguemo” keduo myani Romadâpa âxiguelymo. <sup>3</sup> Tâjitubygue âtâ xygani myani mâkâ, Paulo emyenro lâpylâ. Târâ tatay, Áquila etydâlâ myani Paulo âxidâdyly, eagâ tâsewanihoem. <sup>4</sup> Aunlolâ myani tâzekobyzegueho oday Paulo idâly judeu domodo Deus agâ agueze âtâdyguyho odaji. Jesus wâgâ myani târâ aguely, judeu domodo agâ, gregu judeu domodo ezewenry modo agâ warâ. Jesus nheinwântomoem wâne myani aguely.

<sup>5</sup> Silas, Timóteo warâ Macedoniadâpa saindyly inwânwânselâ myani Paulo Corintodâ awyly. Saintuomo myani, Paulo tâjitubygue âtâ xygadyly inmoly, Jesus wâgâ unâ tiengatuhoem. Jesuslâ Messias, Deus Ingonytyby awyly nheinwântomoem judeu domodoram adâkezemo lâwâne myani.

<sup>6</sup> Paulo aguely tindatuo, eagâ tyewiâpazemo myani. Eagâ tâseuzemo, tywykezemo warâ myani. Aituo myani Pauloram ododoxeolymo. Tiondokedaymo, enanaynmolâ myani tâty tywogonro nhurounukely, Deus izepa ato ara kulâ aitomobyry tienehon-hoem. Aituo eyanmo aguely:

— Jesus mânwâmpyra âmaemo watay, âigueduomo, Deus eydâ atoram mydâwâpyra ise âmaemo. Mâsenagazedylymogue tâwentâzeba ise urâ-ro warâ. Âyanmo unâ Jesus wâgâ segatuagUILâma. Iwâgâ mâtundudyzeba mawylymogue, iwerâ judeu keba modo ise kâenkyl kuru. Jesus wâgâ unâ iwâkuru ise eyanmo kâengatuly – kely myani.

<sup>7</sup> Agueypyem myani mâtâ odayba egasely. Tício Justo etyram myani idâly. Tâdâtâdyguyho eynynâlâ myani mâkâ ety. Judeu keba myani mâkâ, Deus tainwânse olâ myani. Etydâlâ myani âtâdyguyby modoram Paulo Jesus wâgâ aguely. <sup>8</sup> Târâ Paulo aguely tindatuo myani tâdâtâdyguyho iwymâry Crispo Jesus nheinwândyly, idânârâ ety odano modo lâpylâ warâ. Toenzepa mâtâ âtâ anary Corinto donro modo Jesus tainwânsemo myani, Paulo Jesus wâgâ aguely tindatomo. Awylygue myani batiza âieholymo, Jesus einwânnipyryem tawyly tienehon-homoem.

<sup>9</sup> Paulo eâenkyem Jesus âepanâguewânmey eyam.

— Tyanepa ikâ, Paulo. Unâry mâtengatuba tâiseba ikâ. Aguekâ lelâ. MYK tâiseba ikâ.

<sup>10</sup> Agâlâ urâ, nhetâlâ, ânguy âda âepyra itoem. Xirâ âtâ anaym agui kurâdo yeinwânselâ, amyguely tindatuo – kely myani.

<sup>11</sup> Iweâpa nekâ myani Paulo târâ Corintodâ awyly, tokalâ anu, tuotagueze awârâem Jesus wâgâ unâ egatuze tonlo modoram. Koendâ kehoem myani Jesus wâgâ tonlo modo nhenomedâdyly.

<sup>12</sup> Tokalâ anu, tuotagueze sakabygueduo toenzepa judeu domodo eagâ tyewiâpazemo myani. Tawâsemo myani, Gálio enadoram tasemo warâ, tienwentâguedomoem. Acaia eynynonro modo iwymâry iwelo Romadâpa igonotyby myani mâkâ Gálio. <sup>13</sup> Warâ myani judeu domodo eyam aguely:

— Kâzewenke inkâba merâ uguondo kurâdo Deus yan-yam iese kely — kelymo.

<sup>14</sup> Paulo agueze kely umelâ myani Gálio, judeu domodoram aguely:

— Ydataungâ, Nhaum. Kâenagazedaymba ise urâ merâ uguondo. Roma donro pymâ xunâry nhakaduoma tâise urâ tânagazeze. Inakanhe aitybyem warâ watay tâise kâenagazedyly, amyguehomo ara. <sup>15</sup> Mâindadyseba matomo aguelygue kulâ olâ mâenwentâdylymo, inakanhe aitobyry wâgâba. “Messiaslâ awâkâ Jesus” kelygue kulâ olâ mâenwentâdylymo, inakanhe aitobyry wâgâba. Izewenrymolâ awârâ âdaituoba kulâ tâzewentâdyly, Roma donro pymâ agueho mâkeba. Izewenkemoba kulâ aguely, inanajimo-ro watay, âmaemolâ enagazaungâ. Awârâ kâindatondyzeba aze! — kely myani Gálio.

<sup>16</sup> — Tarâ tâdâsewendâdodâpa itaungâ inepa kehoem — kely myani.

<sup>17</sup> Târâpa tâgaselymo ume, âtâ judeu domodo âtâdyguyho iwymâry Sóstenes tawâsemo myani. Pymâ Gálio enanaynlâ myani nhapiogulymo. Awârâgue kulâ nâtynanâbyra olâ myani Gálio.

### *Paulo Antioquiaram odopâdobyry*

<sup>18</sup> Iweâpa myani Paulo Corintodâ awyly, Jesus einwânni modo agâ. Târâ tatay, Deusram “Âdylâ âmâem aiese urâ” kewânmy. Ilâpygueduo myani âsedaenguly tâxiguehoem. Tuhuru wâgâ myani Cencreiaram idâly. Áquila, iwydylâ Priscila warâ myani eagâ idâim. Cencréia iduantaji tainsemo myani. Mârâ tuantayba tâtâly iraynâ, Paulo tyangahudu tatâen-honze myani, judeu domodo ezewenry aralâ, Deusram adâkehobypy aralâ adâituo. Paru oze myani idâlymo, Cencréiadâpa. <sup>19</sup> Efesoram saintybyem myani Áquila, iwydylâ warâ âxiânlymo. Târâpa tâxiguely iraynâ, Paulo idâwânmy judeu domodo âtâdyguyhoam. Myarâ egawântybyem myani tonlo modo agâ Jesus wâgâ xunâgu.

<sup>20</sup> Aituo myani akaemo Pauloram aguely:

— Xina agâlâ wao ikâ — kelymo.

— Nudupa gâlâ enra udâly awylygue — kewânmy Paulo.

<sup>21</sup> Tâtâly ume myani aguely:

— Odopâze urâ, Deus ize atay — kely.

Aituo myani Paulo pepi imâsedo odaji âxiedyly. Efesodâpa idâly. <sup>22</sup> Cesareianra saintybyem, inepa kehoem Jerusalémram idâly. Târâ âdiempa kulâ myani Jesus einwânni modo agâ awyly. Inepa kehoem myani Antioquiaram idâly, Síria yan-yam.

### *Apolo Jesus xunâry nhegatuhobypy Efesodâ, Corintodâ warâ*

<sup>23</sup> Iweâpa nipyralâ myani târâpa âxiguely lâpylâ. Tuhuru wâgâ myani idâondyly Jesus einwânni modoram, Galácia yan-yam, Frígia yan-yam warâ, Jesus xunârygue tonlo modo enomedâze, iomazeânzemo warâ, Pymâ Jesus ago kuru nheinwântomoem.

<sup>24</sup> Paulo Galácia yan-yam, Frígia yan-yam warâ idâpygueduo myani judeu Apolo keho idâly Efesoram. Âtâ anary Alexandria donro myani mâkâ. Kurâdo agâ tâdâtunâguedyly koendâ kehoem myani nhutuly. Koendâ kehoem lâpylâ myani nhutuly, Deus itaumbypy egatuwânbypy modo inweniby. <sup>25</sup> Tuomare kehoem myani aguely kurâdoram Jesus wâgâ. Ioze lelâ myani nhenomedâdylymo. Mâkâ lelâlâ koendâ kuru Jesus wâgâ nutubalâ myani. João Batista aguehobypy lelâ myani nhutuly: “Âjityendaungâ inakanhe amitomobyry wâgâ. Deus izepa ato aiedyly imowâdaungâ. Batiza âiehowâdaungâ, inakanhe amitomobyry imoimbyryem mawylymo mânehon-homoem” kehobypy lelâ nhutuly.

<sup>26</sup> Alâ olâ myani Efesoram saintybyem, judeu domodo âtâdyguyho oday tyanepa kehoem nhenomedâdylymo. Áquila, Priscila warâ Apolo aguely tydasemo myani. Aituo myani tâtyam nhadylymo, koendâ kuru Pymâ Jesus wâgâ tienomedâdomoem. Koendâ kehoem myani nhugatulymo, Jesus kieinwântuo lelâ Deus eydâ atoram kaindyly awyly wâgâ.

<sup>27</sup> Aituo myani Apolo, Acaia yan-yam tâtâdyze idyly, Jesus wâgâ agueze. Tiuntuduo myani Jesus einwânni modo Éfeso donro ingüizeândylymo, eon-honwanâdylymo warâ. Acaiadâ Jesus einwânni modoram inwenilymo:

— Apolo xirâ kata sani. Jesus einwânni merâ, xunâry egatuim warâ. Koendâne Apolo edaenkuwâdaungâ — kely igatarymo.

Myarâ saintybyem Apolo, mâtâ Jesus einwânni modo tonomedâze myani Deus eagâmo koendâ atobry wâgâ. <sup>28</sup> Tâzenanaynlâ myani Jesus wâgâ aguely judeu domodoram.

— Messias mâkeba Jesus, Deus Ingonyby mâkeba — tâkezemo myani judeu domodo.

Apolo olâ myani saguhoem Deus itaumbyry egatuwânbry modo Messias wâgâ inweniby tytainze. Awyligye myani aguely:

— Idataungâ. “Warâ ise Messias aieholo” kewânmy Deus. Jesus agâ aityby modo, Deus aguehobry ara kehoem aidyly. Awyligye Jesuslâ Messias awyly, Deus Ingonyby — kely.

Koendâ lelâlâ myani aguely. Aituo pylâ myani judeu domodo âdakepa awyly-ro warâ.

## 19

### *Efesodâ Paulo unâ Jesus wâgâ nhugatuhobry*

<sup>1</sup> Apolo, Corintodâ awyly ume myani Paulo Efesoram idâly; vale de Cayster einkâ myani idâly. Efesoram saintybyem myani Jesus eynynonro modo agâ oxiodyly. <sup>2</sup> Aituo myani nhapâigueylomo:

— Jesus mânwântuomo Deus Ispiritury âyanmo nâedâ? — kely.

— Ânguya awâkâ Deus Ispiritury amygueho? Awâkâ wâgâ ânguy aguely xinanidataymba — kelymo.

<sup>3</sup> Aituo myani Paulo aguely:

— Âdaituo pylâka keankâ batiza mâieholymo? — kely.

Aituo myani in-hogulymo:

— Xina batiza âieholo, inakanhe adâitobry wâgâ tâjityenze tawyly tienehon-hoem, João Batista aguehobry ara — kelymo.

<sup>4</sup> Aituo myani Paulo aguely:

— En-hem, inakanhe adâitobry wâgâ âjityeni modo, Deus izepa ato aiedyly imoimbyry modo warâ myani João batiza nhakyly. Adâkeze lâpylanâ myani judeu domodoram: “Urâ pygueduo âeni einwântaungâ kuru” tâkeze myani. Jesus einwândyly wâgâlâ myani mâtâ aguely — kely Paulo.

<sup>5</sup> Paulo aguely tindapygueduo, batiza âieholymo myani Pymâ Jesus tâinwâns tawylymo tienehon-homoem. <sup>6</sup> Paulo nhangahumo onwa tâmary nhedyly myani. Aituo Deus Ispiritury nhonwamo âewyly. Tâjitanru âkelo Deus Ispiriturydâba âenigue âjitaínlymo. Deus itaumbyry nhugatulymo. <sup>7</sup> Doze uguondo modo lelâ myani mâtâ ume tonlo modo.

<sup>8</sup> Azagâ tokalâ warâ nunâ ara lelâ myani Paulo idâzeseze awyly judeu domodo âtâdyguyho odaji. Tyanepa myani Jesus wâgâ âtunâguedylymo. Pauloram adapâigueolymo, in-hogulymo warâ myani.

— Deus kywymâryem idyse kydatay, Jesus lelâ kyzeinwâne — kely Paulo.

<sup>9</sup> Tâlâ myani Paulo aguely idani modo ewy tâeganeim modo aguely tyeinwândysebaom modo warâ. “Jesus kieinwântuo lelâ Deus eydâ atoam kytâly” Paulo kelygue myani idânârâ kurâ domodo enanaym Paulo nhunâguedylymo.

Aituo myani Paulo, eagonro modo Jesus eynynonro modo warâ târâpa idylymo. Târâ Jesus wâgâ Paulo nenomedâbyramo idyly. Idâly myani uguondo Tirano kurâdo nhenomedâdoram. Kopaelâgâembaba myani Paulo kurâdo âtâdyguyby modo agâ Jesus wâgâ aguely. <sup>10</sup> Azagâ anos myani Paulo târâ Ásia eynynâ Pymâ Jesus wâgâ unâ egatuzeze awyly. Toenzepa myani judeu domodo, judeu keba modo warâ idaseze awylymo.

### *Uguondo Ceva imeombyry kadopâ nhânkylze kewâtomobyry*

<sup>11</sup> Deus eon-honrugue myani Paulo ânguy anhetânry modo kehoem anhedyly.

<sup>12</sup> Tâwânnuneim modo, kadopâbeom modo warâ Paulo tukobizehobyry nhuguyho atay, ety iwogonro ewano atay warâ Mâ' nhedylymo watay, kua tâiehozemo myani Deus eon-honrugue. <sup>13</sup> Judeu domodo ewy kadopâ nhânkylze adakobâdylymo. Pymâ Jesus neinwâmpyra tawylymo umelâ, Jesus eon-honrugue aise kelymo, Paulo aito ara. Warâ myani kadopâ modoram aguelymo:

— Jesus eon-honrugue igasehomoem auguely, mâkâ Paulo agueho eon-honrugue — kelymo.

<sup>14</sup> Ceva imeom myani akaemo sete uguondo modo arâ aini. Kurâdo eynynâ Deus agâ aguewâni modo iwymâry myani akaemo nhunwym. Alâ myani kadopâram aguelymo:

— Jesus eon-honrugue xina ogonodyly, Paulo agueho eon-honrugue — kelymo.

<sup>15</sup> Warâ olâ myani kadopâ aguely eyanmo:

— Jesus tutuze urâ. Ânguy Paulo awyly tutuze urâ. Âmaemo olâ âutubamo urâ — kely.

<sup>16</sup> Aituo mâkâ uguondo kadopâbeom nhonwamo adamely. Ton-honre kehoem nhapiogulymo. Etymo nhaunguewâdyly. Toenzepa kehoem âdyolymo. Awylygue tâunkeze, etymo sauguewâtybyem warâ kehoem mâtâ odayba âwiendylymo. <sup>17</sup> Idânârâ kehoem tonlo Éfeso donro modo nhutulymo Ceva imeom aietobyry. Judeu domodo, judeu keba modo warâ awârâ egary indadylymo. Aituo âseanedylymo. Pymâ Jesus toenzepa tonhonreim awyly wâgâ lelâ aguelymo.

<sup>18</sup> Toenzepa Jesus einwânni modo tâtâzemo myani tâdâtâdyguyhoam. Jesus eynynonroem tâidily iraynâ inakanhe adâitobyry noempyramo myani. Tâzenanaynlâ myani âkadulymo. <sup>19</sup> Toenzepa kuenwenwâni modo, âmeodo modo warâ Jesus eynynonroem tâisemo myani. Jesus tyeinwântuo myani tywapery modo nhenewylymo, kurâ domodo kua tientomoem, tiengamehomoem warâ tâsenomedâdobyry. Tâzenanaynlâ myani mâtâ pape nhaduândylymo, kuenwenriempa, âmeodoempa warâ itybyem tawyly tienehonhomoe. Tâwâenseim mâtâ pape; nhapâgueduomo, cinquenta mil moeda pratagueto tâise tyaduâñseba watay ebyry nhuduly. <sup>20</sup> Arâ myani unâ Jesus wâgâ toenzepa âji mododâ âzegatuoly. Deus eon-honrugue, toenzepa myani kurâ domodo Jesus nheinwândyly.

### *Éfeso donro modo iewiâpadobyry*

<sup>21</sup> Ilâpygueduo myani Paulo tyangahu oday xunâzely:

— Macedônia einkâ, Acaia einkâ warâ ise yakadyly, Jesus einwânni modo tâense. Tonloopyryem ise Jerusalémram udâly. Ilema ise Romaram udâly-ro warâ — kely.

<sup>22</sup> Tâtâly iraynâ olâ Timóteo, Erasto warâ saguhoem kuru Macedoniaram ingonokyly. Jesus wâgâ enomedâni lâpylâ myani akaemo. Mâtâ kuru olâ myani iweâpa Ásia eynynâ awyly.

<sup>23</sup> “Jesus kieinwântuo lelâ, Deus eydâ atoram kytâly” Paulo keduo myani Éfeso donro modo iewiâpadolymo Jesus einwânni modo agâ. Tyewiâkygue, toenzepa myani âtâ anaym

koendâpa nhenehonlymo. “Deus eydâ atoram kalehoim einwânni modo” kelygue myani Jesus einwânni modo nhezetâdylymo.

<sup>24</sup> Uguondo Demétrio kehobe myani târâ. Tydeusary Diana ety ekudo imeimbyry met-algueto xygani myani mâkâ. Mârâ vende tientuo, toenzepa myani dinheru nhemakely, emawyadâni modo lâpylâ warâ. <sup>25</sup> Aituo myani idânârâ tagâ tâwanuneim modo ingâsedly, Diana ety ekudo imeimbyry metalgueto xygataynrim modo lâpylâ warâ ingâsedly. Eyanmo aguely:

— Ydataungâ, Nhaum. Toenzepa dinheru kienmakely deusa Diana ety ekudo imeimbyrygue. <sup>26</sup> Âdaidyly awyly tutuze âmaemo, Paulo Jesus wâgâ agueduo. Aguely tydaselâ âmaemo. “Deus kuru mâkeba awâkâ uguondo modo kulâ nhygatyby; tohoguezeim mâkeba tâise awârâ metalgueto, segueto warâ” tâkeze inanry Paulo. Taunlo modo ewy aguidope aguely neinwândâ. Aituo deusa Diana einwândyly inmolymo. Xirâ âtâ anano modo lelâba keankâ kurâdo, Ásia eynynonro modo warâ, Paulo aguely idataynrim modo. Kiyngatyby modo einwândyly inmolymo keankâ. <sup>27</sup> Koendâpa ise enra awârâ kurâem. Alâ awârâ aisezedly-ro watay, tâwanepa ise kydaze. Dinheru kienmakeba ise. Tynrenseba ise awârâ âtâ, Diana ety. “Ekudyby modo xina nanâpyra ise” keze kurâdo. Taunlo modo aguely-ro watay, idânârâ Ásia eynynonro modo agueze lâpylâ. Awârâ lelâba-ro warâ, Deusa Diana kieinwânyly ânguy ize inkâba ise, neinwântaymba ise warâ — kely myani Demétrio.

<sup>28</sup> Demétrio aguely tindatuo myani kurâdo iewiâpadaynly. Adaenkewâdylymo:

— Tynreim awâkâ deusa Diana kieinwânyly! Idânârâ kurâ taunlo Éfeso donro modo tainwânsse kurâ! — kelymo.

<sup>29</sup> Idânârâ kehoem myani adaenkelymo ton-honre kehoem. Saenlumo tindatuo myani toenzepa kurâdo âtâdyguylymo mâtârâ âtâ anano modo ara. Âdakulâmo myani, saenlumo, okonodylymo warâ, inakanhemo lelâlâ myani. Gaio, Aristarco warâ nhawâdylymo, Macedônia donro, Paulo agâ Efesoram âetyby modo. Mâtârâ âtâimeâgâkeba kurâdo âtâdyguyhobyryam tuxize nhadylymo. <sup>30</sup> Tagonrodo sawâtobyry tiuntuduo myani Paulo mâkâ lelâlâ tâgawândyse idyly, kurâdo agâ agueze. Jesus einwânni modo olâ myani warâ eyam aguelymo:

— Awyarâ tâtâzeba ikâ — kelymo.

<sup>31</sup> Pymâ Ásia eynynonro modo ewy Efesoam âetaymby modo, tataen-homo Pauloram tytaumbypy ingonodylymo myani:

— Awyarâ kurâdo tyewiâtuneim modo âtâdyguyhobyryam tâtâzeba ikâ — kelymo myani.

<sup>32</sup> Toenzepa myani kurâdo saenlunu, okonodylymo warâ. Âikâ, âikâ warâ taenluem aguelymo. Agui myani akaemo ewy âdaituo târâ âtâdyguybyem tawyly xutudânr.

<sup>33</sup> Judeu tonlo modo ewy tyangahu oday aguelymo:

— Kânagazeze asaemo kurâdo, judeu kydawylygue, Paulo ara — kelymo.

Aituo myani uguondo Alexandre kehoram aguelymo:

— Kurâdo agâ aguekâ. “Inakanhe xina anitaymba âmaemoem” kekâ eyanmo — kelymo.

Aituo myani Alexandre kurâdo âdakepa itoem tâmarygue aidyly, “Xina judeu domodo âda nitaymba âmaemoem” tâkehoem. <sup>34</sup> Judeu mâkâ awyly tiuntuduo myani on-hoam lelâ adaenkelymo ton-honre kehoem:

— Tynreim awâkâ deusa Diana kieinwânyly! Idânârâ kurâ taunlo Éfeso donro modo tainwânsse kurâ! — kelymo.

Azagâ horas myani arâ adaenkezeze awylymo.

<sup>35</sup> Aituo myani mâtârâ âtâ anary iwymâry emary, koendâ kehoem kurâdo MYK alelâ itomoem aguely. Aituo eyanmo aguely:

— Nhaum, ydataungâ! Idânârâ tutuze kurâ, tarâ kyjidadârydâ âtâ imâsedo, iwâkuru warâpe awyly, kiynrenkyly kydeusary Diana kientyguedo. Anra lâpylâ mâtâ tuhu kau

odaypa ihugueyby, Diana ekudo emyenro. Âtâ, tuhu warâ eni kurâ. <sup>36</sup> Idânârâ tâdutuoze kykewâdyly kulâ keba awyly. Awylygue MYK alelâ itaungâ. Tadahulizeba itaungâ. Âdy koendâ kiuntuba kulâ aguientaymba kine. <sup>37</sup> Asaemo azagâ uguondo modo xarâ menetaimo. Âdy nemagazedaymba asaemo deusa ety oday. Eyam inakanhe kulâ aguepamo gâlâ warâ. <sup>38</sup> Demétrio, emawyadâni modo warâ iwâgâ adâkehobe-ro watay, pymâ modoram agueze nâtâmo. Aitoem mawânkâ pymâ awârâgue tâwaneimpe awyly. Tâtâdyguyho saintuo lelâ âtâdyguylymo awyly tutuzelâ olâ âmaemo.

<sup>39</sup> — Eagonro unâ amyguedyse âmaemo-ro watay olâ, tâwâlâ kurâ domodo âtâdyguyhoam aguewâtaunda, pymâ kuru Roma donro aguehobry aralâ. <sup>40</sup> Tarâ aityby modo, Pymâ Roma donro nhutuly-ro watay, toenzepa tâise kagâ iewiâky. “Âdaituoka madahulilymo, aenlumo warâ? Âdaituoba kulâ tâzewentâdyly myguelymo! Auguehobry keankâ mankaguelymo” keze. Âdara kin-hoguba ise kurâ – kely myani pymâ emary.

<sup>41</sup> Adâkebygueduo, âtâdyguywâdyby modo etyram ingonotaynly.

## 20

### *Macedoniadâ, Acaiadâ warâ Jesus wâgâ Paulo nhegatuhobry*

<sup>1</sup> Tyewiâtuneim modo tâtyram odopâbygueduo myani Paulo akaemo Jesus einwânni modo ingâsenehonly. Nhurudylymo myani Jesus lelâ nheinwântomoem, ize ato ara lelâ aitomoem warâ. Ilâpyryem, âsedaelguly, Macedônia yan-yam tâtâhoem. <sup>2</sup> Jesus einwânni modope ato âtâ anakâ takazemo myani. Jesus tainwânselâ itomoem, ize ato ara lelâ aitomoem warâ myani akaemo nhurudylymo. Aituo Acaiararam saindyly. <sup>3</sup> Azagâ tokalâ warâ nunâ myani târâ awyly. Paru oze Siriaram idâze kely ume myani judeu tonlo modo aguelymo:

— Tainkâ sakaday ise kyânlly – kelymo.

Arâ xunârymo awyly tiuntuduo myani Paulo odopâdyly tuhuru wâgâlâ Macedônia einkâ. <sup>4</sup> Jesus einwânni modo ewy eagâ tâtâze myani: Sópatro, Pirro imery (Beréia donro), Aristarco, Segundos warâ (Tessalônica donro), Gaio (Derbe donro), Timóteo (Listra donro), Tíquico, Trófimo warâ (Ásia eynynonro). Warâ myani Paulo nhapygueno Filposram idâday. <sup>5</sup> Urâ, Paulo warâ Filiposdâlâ ani xina, akaemo sete lelâ waunroem Troaderam xina inwânwâNSE idâday. <sup>6</sup> Pão Ioliho Pebanro etyguenibyryem ani xina Filiposdâba âxiguelly. Cinco emedyly itybyem ani xina eagâmo oxiodyly Troadedâ. Tokalâ semana ani târâ xina awyly.

### *Jesus unâry Paulo nhegatuhobry Troadedâ*

<sup>7-8</sup> Kopae, tâzekobyzegueho oday ani xina âtâdyguyly tonlo Jesus einwânni modo agâ. Pão edawynze ani xina âtâdyguyly, Jesus iguehobry tienanâguehoem. Paulo ani Jesus wâgâ xina enomedâni. Târâlâ nipyra ani mâkâ, kopaelâgâem idânri tawylygue. Awylygue ani kuetâjilâ aguely. Agui ani lamparina emanâdyby târâ xina âtâdyguyhodâ, âtâ sahomery kaynonro oday. <sup>9</sup> Salokuzenomo Êutico janela wâgâ ani ekadybyem awyly. Paulo aguezesedyly idaselâ myani xuedunu âewyly, MYN alelâ myani xykyly, janela wâgâpa ihuguelly lelâ onro onwa. Ihuguehobryram xina xytâguywâm. Xina saunâmâ wâne; ipa olâ ani mâkâ igueypyem. <sup>10</sup> Aituo ani Paulo xytâguyly. Âguedy angataji eguetudyly, inwymogoynly, Deus eon-honrugue kurâem nhenehondly. Warâ ani aguely:

— Tâseguâdâzeba itaungâ. Deus kurâem ietonze lelâ – kely xinaram.

<sup>11</sup> Ilâpyryem ani xina âkuondly sala tâtâdyguyhobry odaji. Aituo Paulo pão nhepajiwâdyly tonlo modo ara kehoem. Xina eagâ nhedawynly, Jesus turâem iguehobry tienanâguehoem. Mârâpygueduo emedyly ara kehoem Paulo aguezeseze awyly. Emetybyem ani idâly ânwa oze tuhuru wâgâ. <sup>12</sup> Mâkâ salokuzenomo janela wâgâpa ihugueybyem

igueypy, kurâem itondypyem ani etyram nhadylymo. Idânârâ ani iomamunumo, kurâem itondypyem awyly tientuo.

*Trôade donropyryem Paulo Miletoram idâhobyry*

<sup>13</sup> Paulo tuhuru wâgâ idâday, paru oze ani xina Assosram idâly inwânwâNSE. Tâxiguely iraynâ “Assosdâ ise kydoxiodyly” keypyem ani tuhuru wâgâ Assosram idâly. <sup>14</sup> Aguehobyry ara ani xina aidly. Târâ ani xina nhodyly. Xina agâ idâly paru oze âtâ anary Mitilene kehoram. <sup>15</sup> Târâpa xina âxiguebygueduo, kopaelâgâem ani xina sakadyly ilha Quios iwaguepa. Kopaelâgâem emedyly wâgâ ani Samosram xina saindyly. Tokalâ iguandyly sakabygueduo ani Mileto iduantaji xina saindyly. <sup>16</sup> Xina nâtâombyra ani Efesoram, iweâpa tâidyseba ani Paulo Ásia eynynâ. Toenzepa ani sahulu Jerusalémram taintoem. Pentecostes etyry iraynâlâ ani târâ tawyly ize awyly.

*Éfeso donro Jesus einwânni modo iwymâry agâ Paulo aguehobyry*

<sup>17</sup> Miletodâ tataylâ ani Paulo âjitaumbyguely Éfeso donro Jesus einwânni modo iwymâry modoram:

— Âetaungâ xarâ Miletoram. Inepa yagâ oxiodaungârâ — kely.

<sup>18</sup> Saintuomo ani Paulo aguely eyanmo:

— Nhaum, tutuzelâ âmaemo idânârâ awitobyry. Ásia eynynâ yaintobyryenlâ ani, <sup>19</sup> kopaelâgâembaba Pymâ Jesus wâgâ auguely. Agâmo watay, sawoem witaymba ani urâ; ywâgâ inkâba auguely. Âjidadârymo anano modo inakanhe aitobyry kâentuo, kohogüendâ. Judeu domodo ienagazedâmo toenzepa kehoem. <sup>20</sup> Jesus wâgâ âyanmo auguepa wipyra olâ wakynre. Kurâdo âtâdyguyho âtâ oday inomedâdâmo idânârâ kurâdo enanaym. Itydâmolâ inomedâdâmo lâpylâ warâ. <sup>21</sup> “Âjityendaungâ inakanhe amitomobyry wâgâ. Jesus izepa ato aiedyly imowâdaungâ. Deus aguely idatondaungâ. Pymâ Jesus einwântaungâ warâ” tâkezeze ani urâ judeu domodoram, judeu keba modoram alelâ.

<sup>22</sup> — Iweâma udâly Jerusalémram, Deus Ispiritury myarâ ugonotuo. Kâuntuba urâ, âdy târâ aini awyly. <sup>23</sup> Âsenagazeniem wawyly lelâ kâuntuly. Ietadâzemo awyly, tutuze urâ. Mârâ anaxi, mârâ anaxi warâ udâly umelâ ani Deus awârâ kâuntuhoem aguely. <sup>24</sup> Tyanepa olâ urâ-ro warâ. Yâze keduomo kadahuliwâbyra ise urâ. Pymâ Jesus ugononi, tywâgâ unâ koendoro egatuze. Wakeho xirâ unâ kâengatuly: “Deus koendoro lelâlâ. Tâwâlâ lelâlâ wâne aguehobyry sakaniubyryem kydawly, Deus olâ kâmakeze, Jesus kieinwândylygue” keze ugonodâ. Iewanuem nhuduypylâ xirâ kâenwanikely — kely.

<sup>25</sup> Aituo ani Paulo eyanmo agueondyly:

— Agâmo wawyly ume, segatu Deus kywymâryem awyly wâgâ. Xirâ kâengatuly âyanmo, Jesus mâinwântomoem. Idâze urâ. Tutuzelâ urâ, tarâ onro anaym ietombyra mawylymo.

<sup>26-27</sup> Itymo anakâ udâday, koendâ kehoem âurudâmo, âdara Deus itaumbyry awyly, Jesus einwânni modo tienmakehoem. Idânârâ Jesus wâgâ âyanmo augue. Koendâ kehoem segatu. Jesus einwântâny modo Satanás eydâ atodâ âzenagazeoly-ro watay, urâ mâkeba ise enagazenehorim. Jesus wâgâ eyanmo auguelâma tindadysebamo keankâ. Xirâ tutuzelâ âmaemo. <sup>28</sup> Âurudylymolâ xirâ-ro warâ, âmaemo Jesus einwânni iwymâry modo. Deus ize ato ara lelâ aitaungâ. Jesus eynynonro modo tâenselâ itaungâ. Akaemo eniem Deus Ispiritury induakeyby âmaemo. Pastor tâguy kaneru koendâ nhedyly wâne myara Jesus einwânni modo etaungâ. Deus xurâ modo akaemo, inakanhe aitomobyry epywaze myani Jesus iguely.

<sup>29</sup> — Tutuze urâ, agâpamo widly-ro watay, tumunruneim modo âduaximo âese awyly. Auwa tyewiâseim kaneru xyâze kely myara ise inokuzemo kelymo, Jesus mâinwâmpyra mitomoem. <sup>30</sup> Iozepa kulâ ise Jesus wâgâ mâzenomedâolymo. Iozepa inomedâdomo kulâ ise mâinwândyse atomo warâ. <sup>31</sup> Inanaynmolâ itaungâ, mâzenokuoba mitomoem

akaemoram. Enanâguewâdaungâ; tâsenagazeze kehoem ani azagâ tokalâ warâ anos Jesus wâgâ inomedâzemo wawyly – kely.

<sup>32</sup> Aituo ani Paulo eyanmo agueondly:

— Koendâ Deus nhedylymo ize wato. Xunârybyry angahumo odaji ietaungâ. Deus aguehobyry angahumo odaji mânhedylymo-ro watay, imâem xutuze âmaemo ize ato ara adâjidyly. “Idânârâ auguehobyry modo aienibyry modo agâ koendâ lelâ ise urâ” tâkeze Deus. Itaumbry angahumo odaji mânhedylymo-ro watay, koendâ ise agâmo awyly, adâkehobyry ara. <sup>33</sup> “Ydineruru âunduwâtaungâ. Iety ywogonro âunduwâtaungâ. Tâlâ matomo yam âunduwâtaungâ” uguepa wakynre ânguyram, târâ agâmo watay.

<sup>34</sup> Iemaryguelâ keankâ kâsewanily. Âtâ tâjitulogeto kâyngadyly. Vende kânhedyly, ebyrypyrygue pyni kanâtoem, âdy xina ize ato modo kanâtoem lâpylâ warâ, tutuzelâ âmaemo. <sup>35</sup> “Âsewaniwâdaungâ, âpynirymo, itymo owogonromo, âdy ize matomo warâ mäentomoem. Ady pebaom modo ipa ato âunduwâtaungâ” tâkezelâ ani urâ âyanmo. Pymâ Jesus unârybyry enanâguewâdaungâ: “Tuomare kurâ, âdylâ kyam xududuo. Kuomaru kuru olâ, âdylâ kiunduduo” kewânmy – kely Paulo.

<sup>36</sup> Agueypyem ani Paulo âzeguhoam idyly, Jesus einwânni modo iwymâryo agâ, Deus agâ adâkehomoem. <sup>37-38</sup> Idânârâ ani itynrumo, “Ietondaymba ise âmaemo” Paulo kehobyry wâgâ. Toenzepa ani eogunrumo. Inwymogoynlymo, nhonugudylymo idylymo ani. Ilâpyryem ani xina agâ idâlymo tuantaji pepi imâsedoram.

## 21

### *Paulo Jerusalémram idâhobyry*

<sup>1</sup> Éfeso donro Jesus einwânni modo iwymâryo agâ âsedaengübyem ani pepi imâsedo odaji xina âxiedyly. Ilha Côs einkâ ani xina sakadyly. Kopaelâgâem Rodesram xina idâly-ro warâ. Âdiempa kulâ ani xina târâ Rodes iduantay epagudyly. Tonlopyryem, xina idâly lelâ ani âtâ anary Pátara kehoram. <sup>2</sup> Mârâ iduantaji saintybyem, pepi imâsedo Feniciaram idânri xina nhodyly. Aituo ani mâtâ oday xina idâly. <sup>3</sup> Ilâpyryem ani sul eynynâ xina ilha Chipre nhakadyly. Ilha sakanybyryem Siriaram ani xina idâly. Âtâ anary Tiro keho Síria eynnonroram xina saindyly ani. Târâlâ ani mâtâ pepi imâsedo âdydo imeom nhapaguely. Awylygue ani xina âzetaguey lâpylâ, pepi imâsedo sapaguely, sapadondly warâ inwânwâNSE. <sup>4</sup> Pepi odayba âxiegueybyem, tonlo modo Jesus einwânni xina nhuinly. Akaemo ewy xina tuiose ani. Tokalâ semana ani xina eagâmo awyly. Saguhoenlâ Deus Ispiritury eyanmo adâkeze myani Paulo âsenagazedyly wâgâ Jerusalémdâ. Aituo ani eyam aguelymo:

— Jerusalémram tâtâzeba ikâ – kelymo.

<sup>5</sup> Myarâ idârin-em tawyly tutuzelâ olâ ani Paulo. Aituo xina idâly. Jesus einwânni modo tâtâze ani xina idâhoram. Uguondo modo, tywydy agâ, tymeom agâ warâ tuantaji tâtâzemo ani xina agâ. Târâ sagunu wâgâ idânârâ ani xina âzeguhoam idyly, Deus agâ adâkehoem. <sup>6</sup> Ilâpyqueduo ani, xina âsedaenguly eyanmo. Aituo ani xina pepi imâsedo odaxi âxiedondly, akaemo odopâdly tâtâtyram warâ.

<sup>7</sup> Xina idâly Tirodâpa, Ptolemaidanra. Myarâ saintybyem xina âxieguely. Tonlo Jesus einwânni modo edaenkuze xina idâly. Tokalâ iguandyly ara ani eagâmo xina awyly. <sup>8</sup> Kopaelâgâem xina pepi imâsedo odaxi âxiedondly, Cesareianra tâtâhoem. Xina Cesareiaram saindyly ani. Saintybyem Filipe etyram ani xina idâly. Mâtâ anaxi, mâtâ anaxi warâ Jesus wâgâ aguely myani mâkâ ewanu. Sete uguondo modo Jerusalémdâ iduakeyby ewylâ myani mâkâ, Filipe, âdypebaom modoram pyni epâni. <sup>9</sup> Quatro lelâ ani exiry âwynsaundo modo. Unâ Jesus wâgâ tâgatuze lâpylâ ani akaemo. <sup>10</sup> Iweâpadobe ani

xina târâ awyly. Târâ xina ataylâ ani uguondo Ágabo âewyly Judeiadâpa. Deus aguehobyry agueim lâpylâ myani mâkâ. <sup>11</sup> Xinaram saindyly; Paulo iwanxiery nhawâdyly. Tuhuru, tâwâry warâ nhekâjily mâtâgue. Aguely:

— Paulo, xirâ arâ âyam auguely ise, Deus Ispiritury kâuntuhoem aguehobyry aralâ. Judeu Jerusalém donro modo awâse, âhugâjize, iwâkâjize warâ. Kâzekâjiagui wâne myara ise mâtâjihomoem kulâ inkâba, yiguehoem lâpylâ, Jesuslâ arâ izetonro atay — kely ani xinaram.

<sup>12</sup> Awârâ agueduo ani xina, tonlo Jesus einwânni modo warâ, Paulo Jerusalémram nâtâba itoem xina aguely. <sup>13</sup> Tohogüenze lâpylâ ani xina, arâ aieholys awyly tiuntuduo.

— Âdaituoka arâ ogunrumo? Jerusalémram udâpa witoem unâry xugukehonze mygueymo? Pymâ Jesus “Aiekâ” kehobyry lelâ agânhedyse wato. Jerusalémram idâze lelâ urâ, iekâjihomoem kulâ inkâba, yiguehoem lâpylâ, Jesuslâ arâ izetonro atay — kely ani xinaram.

<sup>14</sup> Xina aguely tindadyseba ani. Aituo ani xina âdakepa idyly.

— Jesus ize ato aralâ nidâ — xina kely lelâ.

<sup>15</sup> Iweâpa târâ itybyem ani tysejiguy tiankyly xina nhodyly, Jerusalémram tâtâhoem.

<sup>16</sup> Cesareiadâ Jesus einwânni modo ewy xina agâ tâtâzemo ani. Jerusalémram saintybyem Menasom etyram ani xina adaholy, târâ xina itoem. Chipredâ iazepy myani mâkâ; iweâpalâ myani Jesus nheinwândy.

### *Paulo, Tiago agâ âtunâguedobyry*

<sup>17</sup> Jerusalémram xina saintuo, Jesus einwânni modo xina tientuo tuomazezemo ani. Koendâ kehoem ani xina nhedaenkulymo. <sup>18</sup> Kopaelâgâem ani Paulo agâ xina idâly, Tiago agâ agueze; Jesus einwânni modo iwymâry myani mâkâ. Idânârâ Jesus einwânni modo iwymâryo âtâdyguybyem ani târâ. <sup>19</sup> Aituo ani Pauloram âzedaenkuolymo. Ilâpygueduo, idânârâ adâitayn-hobyry nhegatuly ani eyanmo.

— Toenzepa judeu keba modo Jesus neinwândâ, iwâgâ eyanmo augueduo — kely.

<sup>20</sup> Tindatuo, idânârâ iomazewânm. Aituo ani aguelymo:

— Koendonro, ton-honreim warâ Deus — kelymo.

Aituo ani Pauloram aguelymo:

— Idakâ, xina ipemugu âmâ Cristo eynynâ. Tutuzelâ âmâ, agui judeu modo Jesus tainwânsse awyly. Enanajimo, koendonro kuru Moisés inweniby einwândyly, tâwâlâ lelâlâ wâne Jesus eynynonroem awylymo. <sup>21</sup> Moisés inweniby izepa âmâ, waunlo ara olâ enanajimo. “Paulo, judeu domodo âkelo âtâ anakonro modoram aguely: ‘Moisés inweniby imowâdaungâ. Âmerymo ilery ety iopiry kadatâwâdaundâ. Kydamudo ezewenrypyry imowâdaungâ’ nygue Paulo” warâ kely keankâ indakylymo. Kewâdyly kulâ olâ mâtâ aguehomobyry. <sup>22</sup> Saintybyem mawylymo xutuzemo lelâlâ enra. Tâpaunzeze xina, âdy xurâmoem amânhekyly wâgâ, kewâdyly kulâ mawânrâ âwâgâ indatybymo.

<sup>23-24</sup> — Tarâ xina ijidadâry oday tâlâ quatro uguondo modo, “Âdylâ ise xina anhekyly Deus xurâem” keimpyry modo. Judeu akaemo, Jesus einwânni modo. Tutuzelâ âmâ, adâkehomobyry nhewanikeymo awyly, kâzewenry ara, okoguelymo ise, âjiangaxilugueolymo ise warâ. Awârâ iraynâ, Deusram tiunduly enesemo wao olâ kâzewenry ara. Âdypeom keba olâ akaemo, tydineruguepamo warâ, Deusram tiunduly nhanâtomo peba. Warâ xina âurudyly. Eyanmo dinheru âundugâ, Deusram tiunduly nhanâtomoem. Adâkehomobyry ara aituomo, okogueduomo warâ eagâmo okoguegâ lâpylâ. Kâzewenry ara amituo, judeu taunlo modo igary tindatomobyry kewâdyly kulâ awyly xutuzemo. Moisés inweniby mânompâ mawyly xutuzemo warâ.

<sup>25</sup> — Judeu keba modo Jesus einwânni olâ tâwâlâ Moisés inweniby ara anipyra awylymo. Anhekylymo wâgâ tiunrutomo pape xina nigonodâ lâwâne. “Onrogue, segue warâ xygatyby modoram ânguylâ nhunru xuduypy kâdâtaundâ. Ânguydo imeom idu

odano modo, âtâ inatano modo warâ mântomoem tâwâlâ wao iunu napâdâ; munru kâzenywâdaundâ warâ. Uguondo tywydy lelâ nynanâdâ; pekodo tusoram lelâ nâdynanâo warâ” kely keankâ tygatary wâgâ xina nhurutomo – kelymo ani Pauloram.

— Âdainkâba. Amyguehomobypy ara aise lelâ urâ — kewâm Paulo.

<sup>26</sup> Kopaelâgâem ani Paulo akaemo quatro uguondo modo agâ Deus ety odaji idâly. Moisés inweniby ara, Deusram “Aiese xina” tâkehobypy adientuomo, akaemo okogueday, eagâmo tokogueze lâpylâ myani Paulo. Kurâdo eynynâ Deus agâ aguewâni modoram aguely myani:

— Sete emedyly sakaduo lelâlâ ise koendâ kuru tywykeba xina idyly, Moisés inweniby agueho ara. Awârâpygueduo ise mâkâ tokalâ, mâkâ tokalâ warâ Deusram tiunduhoem tianâtyby xina nhuduly-ro warâ, kâzewenry ara — kely Paulo.

### *Deus etydâ judeu domodo Paulo nhawâtobyry*

<sup>27</sup> Sete emedyly ituo myani, Paulo idâly Deus etyram. Judeu domodo Ásia eynynâba âetaymby modo Paulo nhedylymo myani, mâtâ tasera, “Judeu domodo idaserary” kelygue tâzekeindâ. Târâ Paulo tientuo, toenzepa kehoem myani iewiâpadlymo, Paulo tagâ judeu keba modo nhenetybybe-ro waunlo ara tienehonduomo, judeu keba âwânto keba mâtâ tasera awylygue. <sup>28</sup> Aituo myani adaenkelymo judeu tonlo modoram:

— Nhaum, etaungâ! Awâkâ uguondo, tâinkâ lelâba inakanhe enomedâni kulâ awâkâ! Judeu domodo eynynâba kulâ aguely. Moisés inweniby eynynâba kulâ aguely. Xirâ Deus ety eynynâba kulâ aguely waunlo. Iwerâ judeu keba modo nhenewyly xarâ kydaseraji. Âji tywykeim ara nhedyly kulâ awâkâ xirâ Deus ety! — kelymo myani.

<sup>29</sup> Arâ aguelymo myani Paulo, Trófimo, judeu keba, Deus ety idaseraji sanipyryen-ro waunlo ara tienehonduomo. Éfeso donro myani mâkâ uguondo. Paulo eagâ Jerusalémdâ adakobâdyly tâensem olâ myani. <sup>30</sup> Tâinkâ lelâba ani awârâ modo egary âtâ anakâ. Aituo ani tonlo modo tâgaune kehoem idâlymo. Paulo nhawâdlymo; nhuxidlymo Deus etydâba; judeu domodo idaserayba nhejikelymo. Ilâpyryem idânârâ pyanta nhenahunlymo. <sup>31</sup> Roma donro sodadu iwymâry, “komandanty” keho, awârâ egary tydase myani.

— Idânârâ tonlo Jerusalém donro modo iewiâmunu. Paulo tyândyse atomo — kely indadyly.

<sup>32</sup> Awârâ unâ tindatuo myani sodadu domodo ingâsedly, iwymârymo warâ. Inepa kehoem myani eagâmo idâly kurâdo eydâ atoram. Saindylymo myani kurâdo Paulo nhapioguly ume. Sodadu domodo tywymâry agâ tientuomo, inepa kehoem napioguba idylymo myani. <sup>33</sup> Aituo myani komandanty Paulo opaji saindyly. Sodadu domodoram aguely warâ:

— Sawâtaungâ merâ uguondo. Ewâkâjiwâdaungâ azagâ korentygue — kely.

Nhewâkâjiwâbygueduomo myani kurâdoram aguely:

— Ânguya merâ uguondo? Âdайдyka merâ? — kely.

<sup>34</sup> Tadaenkeze lelâ myani in-hogulymo. Âikâ, âikâ warâ myani taenluem aguelymo. Agui mawânkâ myani âdaituo tâtâdyguylymo awyly xutudânrâ modo. Âikâ, âikâ warâ tadaenlu tindatuo myani, sodadu domodo iwymâry âdara tâjidyly nutuba idyly. Aituo myani sodadu domodo ejidyanlâ nhalehol. Toenzepa myani kurâdo nhapygue idâly. <sup>35</sup> Tâdâkuhoram taintuo myani sodadu domodoram adanâhol. Tyewiâtuneim modoram âda nâiehoba itoem. <sup>36</sup> Tadaenkeze kehoem myani kurâdo nhapygue idâly.

— Xyâgâ! Xyâgâ! — kelymo.

### *“Inakanhe awitaymba urâ” Paulo kehobypy*

<sup>37</sup> Sodadu domodo ety odaji tâkaunâze kelymo ume kehoem myani Paulo aguely komandantyram, gregüem:

— Tâwâlâ agâ auguely? — kely.

Aituo myani sodadu iwymâry aguely:

— Âdaraka gregüem aguely mâuntuly? — kely. <sup>38</sup> — Mâkâ egípcio saguhoem xina agâ iewiâpadyby kebaka âmâ? “Pymâ domodo Roma donro xina neinwântaymba ise” nygue tagonro modoram. Quatro mil kyâwâni modo iwymâry ani mâkâ. Tagâ poji anaxi tasemo ani. Mâkâ keba âmâ? — kely.

<sup>39</sup> Aituo myani Paulo in-hoguly:

— Mâkâ mâkeba urâ. Judeu urâ. Tarsodâ iazeypy, Cilícia eynynonro âtâ anary imâsedo anaym. Tâwâlâ wao kurâdo agâ augueji — kely myani.

<sup>40</sup> — Tâwâlâ aguekâ — kewâm lelâmy komandanty.

Aituo myani Paulo XYDYK idyly tâdâkuho wâgâ. Tâmarygue myani kurâ domodo MYK itoem aguely. Tytamuneba ituomo myani Paulo aguely hebraiku-em, judeu domodo itanwe.

## 22

<sup>1</sup> — Nhaum, idataungâ. Ypemugudo, idataungâ âyanmo auguely, âdy inakai aieni keba wawyly mâuntuhomoem — kely myani Paulo.

<sup>2</sup> Hebraiku-em aguely tindatuomo myani âdakepa kuru idylymo, koendâ tindatoem.

<sup>3</sup> Aituo myani Paulo agueondly:

— Judeu urâ. Tarsodâ yazely, Cilícia eynynâ. Tarâ Jerusalémdâ olâ ienamadyly. Gamaliel ani ienomedâni. Koendâ kehoem ani ienomedâdyly Moisés inweniby wâgâ. Koendâ kehoem ani ienomedâdyly kydamudo ezewenrygue warâ. Deus ize ato ara awidyse ani urâ, amidyse matomo ara. <sup>4</sup> Izepa ani urâ, asaemo “Jesus kieinwântuo lelâ Deus eydâ atoram kytâly” kewâni modo. Jesus einwânni modo senagazedâ. Sawânehom. Uguondo modo, pekodo modo warâ kadeia odaxi setadâneho, xyâen-homo warâ. <sup>5</sup> Kurâdo eynynâ Deus agâ aguewâni modo iwymâry kuru, idânârâ pymâ tonlo modo warâ, Jesus einwânni modo enagazenibry wawyly, tutuzemo. Kata modo tâmakeze ani urâ, judeu Damasco donro modoram kantoem. Jesus einwânni modo kanwâdyly, kâenagazedyly witoem aguenri ani mâtâ kata. Sawâsemo, ekâjibyem xarâ Jerusalémram kâenewylymo witoem ani udâdyse wawyly myarâ. Toenzepa ani kâenagazedyzemo wawyly, Jesus nheinwândylymogue — kely myani Paulo.

*Paulo Jesus tyeinwântobyry wâgâ aguehobury*

*(At 9.1-19; 26.12-18)*

<sup>6</sup> Aituo myani Paulo agueondly:

— Damasco iwaguepa udâly ume kuotatay awârâem ani toenzepa kehoem iatygudyly kau wâgâ ienâmidâ kehoem. MAH warâ kehoem ani ydâ iajimadyly. <sup>7</sup> Aituo ani ianugue onro onwa yihuguely. Tâjitanru kâindadyly. “Saulo! Saulo! Âdaituoka ienagazedyly?” kely.

<sup>8</sup> — “Ânguya âmâ, aguenri?” uguely ani.

— “Jesus Nazaré donro urâ, toenzepa mâenagazeguylâ” kely ani.

<sup>9</sup> — Emâ akaemo yagâ idâwâtyby modo mâtâ tohoreim. Aguely lelâ ani indakylymo, âdakeze aguely nutubamo olâ ani. <sup>10</sup> Aituo ani kampâiguely: “Âdyka agânhedyse mato, Pymâ?” uguely.

— “Aukâ. Idâ âtâ anary Damascoram. Târâ ise mâturuholy amânhokyly wâgâ, Deus amânhedyse ato wâgâ” kely ani Yam.

<sup>11</sup> — Epyem yemâ mâtâ tohoreim. Awlygue ani yagonrodo iemary wâgâ yawâtâ Damascoram yadylymo. <sup>12</sup> Uguondo Ananias Deus xyrenipe myani târâ. Moisés inweniby ara lelâ aini myani mâtâ. Idânârâ judeu Damasco donro modo ize ato myani mâtâ. <sup>13</sup> Uize tâtâze ani. Wopaji saintybyem ani aguely: “Iweâ lelâlâ Deus mâtentoem aiese” kely.

— Aguely umelâ kehoem kâentondly. Mâkâ wopay kâendyly warâ. <sup>14</sup> Aituo ani Yam aguely: “Saulo, kydamudo iDeusry âduakely tâmaryem. Adienkylylâ âyam tiuntuendhondye ato. Jesus mâendyse mâkâ, Jesus âdykâ inakanhe aitânry. Jesus lelâlâ âyam aguely mâindadyse mâkâ. <sup>15</sup> Jesus wâgâ aguenri ise âmâ. Idânârâ mydâhobyry einkâ ise mäentyby, mäindatyby modo warâ mäengatuly. <sup>16</sup> Aukâ. Inepa Pymâ Jesus inakanhe amitobypy nhygakehoem ekagâ, xygakeze lelâ” kely ani Ananias Yam — kely myani Paulo.

### *Paulo igonotobyry judeu keba modoram Jesus unâry egatuze*

<sup>17</sup> Paulo aguely:

— Aituo ani xarâ Jerusalémram kodopâdyly. Deus etyram udâly, eagâ agueze. Eagâ augueday ani ienu oday Jesus kâynganehonly. <sup>18</sup> Warâ ani Yam aguely: “Inepa Jerusalémdâpa âxiguegâ. Taunlo modo ywâgâ amyguely neinwântaymba ise” kely ani.

<sup>19</sup> — “Utunri, saguhoem âdaunlopyry wawyly, tutuzelâ akaemo. Âtâ tâdâtâdyguyho odakâ âinwânnipyry modo xuize, sawâse, sapioguze warâ kadakobâdobyry, tutuzelâ akaemo. <sup>20</sup> Estêvão nhândaymo, womaru lelâ ani. Eon-honrumo kâunduly lelâ ani nhânhomoem. Nhonwa tuhu samewâni modo ety iwogonro nhoniem tâise lelâ ani urâ” uguely ani Jesusram.

<sup>21</sup> — “Tarâpa âxiguegâ, Paulo. Taypa ise ogonodyly, judeu keba modoram unâry egatuze” kely ani Jesus Yam — kely myani Paulo.

<sup>22</sup> “Jesuslâ ugononi, judeu keba modoram tunâry egatuze” keduo myani iewiâpadlymo. Ago kehoem adaenkelymo:

— Xyâwâtaungâ awâkâ! Nigue awâkâ! — kelymo.

<sup>23</sup> Ago kehoem adaenkelymo; tâty BOH waunlo nhetylymo; kayam PUGU PUGU nhedlymo; sagunu kayam nhamelymo idylymo myani. Arâ aidylymo myani, Paulo aguely nehoguebyra tawyly tienehon-homoem. <sup>24</sup> Kurâdo arâ aidyly tientuo myani komandanty tyzodadury modoram aguely:

— Eydâ kydatoram merâ uguondo sataungâ. Târâ ise mampiogulymo, inakanhe adâitobyry nhegatuhoem. Egatuze lelâ keanra, toenzepa mawânkâ judeu domodo eagâ iewiâky — kely.

<sup>25</sup> Tiampioguhoem nhekâjilimo ume olâ myani Paulo aguely cem lelâ sodadu Roma donro iwymâryam, eydâ iwaguepalâ tawylygue:

— Kurâ Romadâ tâzekeim tapioguwâduneba, kelype mawânrâ. Romadâ tâzeke lâpylâ urâ. Awylygue yapioguba tâise âmaemo, âdawitobyry wâgâba kulâ — kely myani Paulo.

<sup>26</sup> Mâkâ sodadu modo iwymâry arâ Paulo aguely tindatuo, idâly myani tywymâry komandanty agâ agueze:

— Awâkâ uguondo âdakâieneho! Romadâ tâzeke lâpylâ mynra awâkâ! — kely myani.

<sup>27</sup> Aituo myani komandanty Paulo sapâigueze idâly.

— Romanoka âmâ? Âkealâka “Romadâ tâkeze lâpylâ urâ” myguely? — kely.

Aituo myani Paulo in-hoguly:

— En-hem, Romadâ tâzekelâ urâ — kely.

<sup>28</sup> Komandanty aguely:

— Romadâ tâzeke lâpylâ urâ. Imâem sepywadâ, târâ iezydi iwenihoem — kely.

— Urâma âdy kâempwyadymba. Yazepygueduolâma Romadâ iezezu. Romadâlâ mawânkâ pabai ezeku, awylygue târâlâ iezezu lâpylâ — kely myani Paulo.

<sup>29</sup> Awârâ tindatuomo, inepa kehoem myani Paulo sapâiguewâni modo iopayba idylymo. Paulo Romadâ tâzeke awyly tiuntuduo myani, komandanty âseanedly, sapioguhoem ekâjien-hoimbyryem tawylygue.

### *Judeu domodo iwymâry modo enadoram Paulo satobyry*

<sup>30</sup> Roma donro komandanty tiuntudyze myani âdaituo judeu domodo Paulo nhewentâguedylymo awyly. Aituo myani kopaelâgâem aguely:

— Idânârâ judeu domodo xutuwâni kuru, kurâdo eynynâ Deus agâ aguewâni modo iwymârydo warâ âtâdyguylymo ize wato — kely.

Idânârâ pymâ domodo âtâdyguyduo myani komandanty tyzodadury modoram aguely:

— Paulo etaguewâdaungâ. Xarâ pymâ domodo âtâdyguyhobyryam enetaungâ — kely.

Aguehobyry ara myani aidylymo. Judeu domodo xutuwâni kuru enadoram Paulo nhadylymo.

## 23

<sup>1</sup> Aituo myani Paulo pymâ domodo âtâdyguywâdybyam MYK idyly, aguely warâ:

— Nhaum, âdalâ kulâ awitaymba wakynre. Izepa ato agânhepyra wawyly, tutuze Deus — kely.

<sup>2</sup> Agueduo myani Ananias, kurâdo eynynâ Deus agâ aguewâni modo iwymâry kuru, toenzepa kehoem iewiâpadyly. Paulo iopano modoram aguely:

— Itagainwâdaungâ — kely.

<sup>3</sup> Aituo myani Paulo aguely Ananiasram:

— Deus inagazenehonze arâ kehoem ayetobyry wâgâ. Koendonro emyenro wâne âmâ, koendonro keba olâ âmâ! Parede wâne pinta tâiehoze atuhobyry xuahuhoem mâtâ emyenro kulâ âmâ. Moisés inweniby araba awitobyry wâgâ agueze tarâ mawyly. Âmâtâ olâ kâzewenry ara aitânry. Âdawitobyry wâgâba kulâ ytagainhehonly — kely Paulo.

<sup>4</sup> Paulo agueduo myani iopano modo aguely:

— Kurâdo eynynâ Deus agâ aguewâni modo iwymâry kuru mâunâguedyly awârâ — kelymo.

<sup>5</sup> — Nhaum, auguehobyry modo wao enanânehonwâdaungâ. Kâuntuwâbyra enra urâ awâkâ, kurâdo eynynâ Deus agâ aguewâni modo iwymâry kuru awyly. Tutuzelâ urâ-ro watay, arâ auguewâpyra tâise enra urâ. Moisés iweniby wâgâma “Inakanhe adâkezeba itaungâ âwymârymoram” tâkeze — kely myani Paulo.

<sup>6</sup> Saduceu domodo ewy, fariseu domodo ewy warâ myani pymâ domodo. Arâ awyly tiuntuduo myani ago kehoem Paulo aguely:

— Ypemugudo, fariseu urâ. Fariseu lâpylâ ani pabai. Tarâ urâ kâzewentâoly, iguewâtyby modo kurâem itondlyly kâinwândylygue kulâ — kely.

<sup>7</sup> Arâ agueduo myani fariseu domodo, saduceu domodo warâ âjihogulymo adaguly. Pymâ domodo nâseinwâmbyra idylymo myani. Fariseu domodo myani, Paulo eynynonro; saduceu domodo myani Paulo iduery warâ âjipagadylymo myani-ro warâ.

<sup>8</sup> Saduceu domodo nheinwânyly myani tâentuneim modo lelâ. Enanajimo myani, igueypy modo kurâem nitombyra; kaynâ Deus emary modo “anju” keho ipa, ispíritu koendonro tarâ onro anaym ipa warâ xurâmoem. Kadopâ modo peba enanajimo. Fariseu domodo olâ myani tâinwânsemo tâensenry modope awyly. Awlygue igueypy modo kurâem itondlyly nheinwândylymo lâpylâ. Anju domodope awyly, ispíritu koendonro tarâ onro ananope awyly warâ xurâmoem. Kadopâbe awyly tâinwânsemo lâpylâ myani. <sup>9</sup> Arâ myani ago kehoem fariseu domodo, saduceu domodo warâ adaenkelymo. Fariseu domodo ewy Moisés inweniby enomedânbile lâpylâ myani târâ. Akaemo ewy ago kehoem aguely idyly myani:

— Xina enanaji, awâkâ uguondo âdy inakai aguepa, âdy inakai aniempyra warâ. Ânguylâ kientânry keanra awâkâ aguehoem xunâry xuduim, anju atay, ispíritu koendonro atay warâ — kelymo.

<sup>10</sup> Warâ myani fariseu domodo, saduceu domodo alelâ ago kehoem adaenkelymo. Fariseu domodo tyewiâpazemo myani saduceu domodo agâ. Saduceu domodo toenzepa lâpylâ myani iewiâkymo. Aituo myani komandanty aguely:

— Iweâma wânkâ ise Paulo âdyoly-ro – kely.  
 Aituo myani tyzodadury modoram aguely:  
 — Paulo etywâdaungâ awâkâ kurâdo duaypa. Sopâdaungâ eydâ kydatoram, myarâ kienmakehoranlâ – kely.

<sup>11</sup> Kopae myani Pymâ Jesus, Paulo agâ agueze âepanâguely.  
 — Tyanepa ikâ. Tarâ Jerusalémdâ ywâgâ amyguehobyry ara lâpylâ ise Romadâ ywâgâ amyguely – kely myani Jesus.

### *Judeu domodo Paulo xyâze kehobyry*

<sup>12</sup> Kopaelâgâem myani judeu domodo ewy âtâdyguly, tâtunâguedomoem. Aguelymo myani:

— Paulo kydyâtre. Âdy kieimpa, kienypa warâ ise kurâ, kyânlly iraynâ. Tâwâlâ ise Deus kânagazedyly, aguykehobyry ara aguipyra kurâ-ro watay – kelymo myani.

<sup>13</sup> Agui myani xyâze kewâni modo, quarenta takaze kehoem. <sup>14</sup> Idânârâ âjihogübyem myani idâlymo agueze kurâdo eynynâ Deus agâ aguewâni modo iwymâry modo agâ, eagonro pymâ modo agâ warâ. Eyanmo aguelymo myani:

— Âseinwândybyem xina Paulo tyân-hoem. Âdy xina neimpa ise Paulo tyânlly iraynâ. Tâwâlâ ise Deus xina nhenagazedyly, adâkehobyry ara xina anipyra-ro watay! <sup>15</sup> Warâ xina xunâry. Amaemo, eagonro pymâ domodo warâ komandantyram âjitaumbyguewâdaungâ. “Judeu domodo iwymârydo Paulo agâ adâkedyze. Iwâgâ imâem tiuntudyze asaemo. Enetaungâ, eagâmo aguehoem” kewâtaungâ komandantyram. Ânwa odaylâ ise xina inwânwândyly, tyân-hoem. Xarâ naimpyralâ – kelymo.

<sup>16</sup> Paulo idykauru olâmy idamâ, toru xyâly kelymo. Aituo myani inepa kehoem idâly sodadu domodo etyram, toru xuruse. Saintybyem myani Pauloram aguely:

— Judeu domodo ewy âdyse. Ânwa oday ise âwânwândylymo, âhoem – kely.

Idânârâ aguehomobypy ara myani toruram nhegatuly.

<sup>17</sup> Aituo myani Paulo sodadu tonlo modo ewy ingâsedly.

— Merâ salokuzenomo sakâ komandantyram. Eyam nhegatulybe merâ – kely.

<sup>18</sup> Aituo myani sodadu mâtâ nhadyly komandantyram.

— Mâtâ etadâdyby Paulo ygâsedai, merâ salokuzenomo âyam kâenetoem. Unâ nhegatulybe mynra merâ – kely myani.

<sup>19</sup> Aituo myani komandanty salokuzenomo âdiempa iwague nhejikely, ânguy adâkely nidaprya itoem. Târâ myani nhapâiguel:

— Âdyka Yam mâtengatudyze mato? – kely.

<sup>20</sup> Aituo myani Paulo idykauru in-hoguly:

— Judeu domodo ewy kugu Paulo tyândyse. Kopaelâgâ ise mâtengonotoem nhekadylymo. “Paulo xinaram igonokâ, tonomedâdo wâgâ xina nhapâiguehoem” kelymo ise.

<sup>21</sup> Awârâ kâzeinwândâ olâ. Kewâdylymo kulâ ise. Quarenta uguondo awârâem ise sakadodâ âtuahuybyem awyly. Paulo sakadyly nhenuendylymo ise tyân-hoem, myarâ saindyly iraynâlâ. “Âdy xina neimpa, nenypa warâ ise, Paulo tyânlly iraynâ. Tâwâlâ ise Deus xina nhenagazedyly, tyâmpalâ xina âwinduadyly, adakuily warâ-ro watay” keanrymo. On-hondybyem akaemo adâitomoem. Paulo mâtengonodyly kulâ inwânwânklymo – kely myani Paulo idykauru.

<sup>22</sup> Aituo myani komandanty aguely:

— Tâwâlâ idâ lelâ. Xirâ Yam mâtengatuyby olâ ânguyram kâzegatu – kely.

Salokuzenomo idâly.

*Paulo tywâgâ aguehobyry pymâ Felixram*

<sup>23</sup> Aituo myani komandanty, azagâ sodadu domodo iwymâry ingâsedyly; mâtâ cem, mâtâ cem warâ sodadu domodo xutuim myani akaemo. Saintuomo myani eyanmo aguely:

— On-hondaungâ ozodadurymo agâ Cesareiaram mydâhomoem. Kopae, nove horas, ise tarâpa igaselymo. Duzentos sodadu tuhuru wogonro modo, setenta kawaru wogonro modo, duzentos sodadu koendâ pyrâu samewâni modo warâ lâpylâ sataungâ. <sup>24</sup> Paulo sawo lâpylâ kawaru nhontaungâ, isejiguy sani lâpylâ warâ. Koendâne mâtâ uguondo sataungâ pymâ Felixram — kely.

<sup>25</sup> Ilâpyryem myani komandanty kata inwenily Felixram. Eagâmo tingonokyly.

<sup>26</sup> “Âyam xirâ kata kâingonodyly, pymâ tynrenseim. Cláudio Lírias urâ, komandanty taunlo Jerusalém donro. Idaenkuho kâingonodyly.

<sup>27</sup> “Âyam merâ uguondo tâwentâguezeim kâingonodyly, Paulo keho. Tarâ judeu domodoram nadawâho. Nhâlymo agâ keankâ. Romadâ tâzeke awyly kâuntuduo keankâ yzodaduryam kâenmakehonly. <sup>28</sup> Âdy wâgâ nhewentâdylymo awyly kâuntudyze keankâ urâ. Awylygue keankâ judeu domodo iwymâry âtâdyguyhoranlâ kanleholly. <sup>29</sup> ‘Xina ezewenry araba aidyly’ nyguemo. Urâem olâ, pymâ Roma donro aguehobypy nakabyra merâ. Etadâdoem xyâhoem warâ âdy anientaymba merâ. <sup>30</sup> Taunlo judeu domodo ewy merâ tyândysemo kehonly tarâ Jerusalémdâ. Kâuntuduo, inepa kehoem keankâ âyam kâingonodyse widly. ‘Âmaemoem Paulo inakanhe aitybyen-ro watay, pymâ Felixram aitobyry egatuwâdaunda’ ugue lâpylâ izepaom modoram.

“Xirâ kulâ âyam kâengatuly”

kely myani komandanty Cláudio Lírias inwenily.

Kata tinwenipygueduo myani sodadu domodoram nhuduly, pymâ Felixram nhato-moem.

<sup>31</sup> Aituo myani sodadu domodo tywymâry aguehobypy ara aidylymo. Paulo nhadylymo kopae âtâ anary Antipátride kehoram. <sup>32</sup> Kopaelâgâem myani sodadu tuhuru wâgâ idâwâtyby modo odopâdylymo Jerusalémmram. Paulo, sodadu kawaru wogonro modo agâ idâwâm lelâmy. <sup>33</sup> Cesareiaram saintybyem myani idâlymo pymâ Félix etyram. Eyam aguelymo:

— Anra Paulo Jerusalémdâ ewentâguedyby. Anra lâpylâ kata xina iwymâry inweniby âyam — kelymo.

<sup>34</sup> Aituo myani pymâ kata intainly. Itainrimbyryem myani Paulo nhapâiguely:

— Âdykâ ynynonroka âmâ? — kely.

— Cilícia eynynonro urâ — kely myani Paulo.

<sup>35</sup> Aituo myani mâtâ pymâ aguely:

— Inwentâguedaynrim modo saintuo, âwâgâ aguelymo idase urâ. Âdamyguely awyly idase lâpylâ urâ-ro warâ — kely.

Aituo myani tyzodadury modoram aguely:

— Kadeia odaxi ietaungâ, pymâ Herodes etydâ. Etaungâne, nâsemagueba itoem — kely.

## 24

### *Judeu domodo Paulo nhewentâdobypy pymâ Félix enanaym*

<sup>1</sup> Cinco emedyly ipygueduo myani kurâdo eynynâ Deus agâ aguewâni modo iwymâry kuru, Ananias, Cesareiaram saindyly, judeu iwymâry modo ewy agâ. Uguondo “Tértulo” keho, romano modo ezewenry xuturim, eagâ tâtâze lâpylâ myani. Saintybyem myani pymâ Felixram, Paulo aitobyry egatuze idâlymo. Mâtâ pymâ Paulo ingâsedyly. <sup>2</sup> Paulo myarâ âepanâgueduo myani Tértulo mâtâ lelâba aguely, tienwentâguedoem pymâ Félix enanaym:

— Idaenkuly saguhoem kuru, Pymâ. Koendâ xina iwerâ, xina nâseguebyba, pymâ koendonro mawylygue. Tonzepa âdydo imeom xina judeu domodoem adyese âmâ. <sup>3</sup> Pymâ, tonzepa xina agâ iomaru, idânârâ mâunduwâtyby modo wâgâ. Koendâ minase xina agâ, âdykâlâ, âdaralâ, âdykâingâ xina atodâlâ warâ. <sup>4</sup> Aekuru kuru iwanu tienkuâdâdyzeba gâlâ xina warâ. Xina adâkedyze ato mâindadyse wao olâ xina.

<sup>5</sup> — Ânguydoem kulâ merâ Paulo xina duay awyly. Âdykâ tadakobâdobyry einkâ Jesus wâgâ nhénomedâdy. Awylygue xina judeu domodo nhewiâpanâdy. Jesus Nazaré donropyry einwânni modo iwymâry lâpylâ mawânkâ awâkâ. <sup>6</sup> Deus ety âwankuem niedâ awâkâ. Judeu keba kulâ myarâ nadâ. Awylygue keankâ xina nhetadânehonly. Xina ezewenry xuturim modo enado lâwâne keankâ tienwentâdyze xina awyly, romano domodo nynanâbyralâ. <sup>7</sup> Tonlo sodadu iwymâry Lírias olâ xina emaymba Paulo nemake. <sup>8</sup> Aituo keankâ mâkâ sodadu iwymâry xarâ xina ingonody. “Inanajimo, Paulo inakanhe aitybyen-ro watay, pymâ Felixram egatuwâdaunda, tâwentâgue, tâwentâgueba warâ Paulo awyly aguehoem” nygue xinaram. Awylygue xina âyam âewyly, Pymâ. Paulo agâ aguekâ. Aguely mâindatuo ise, uguondo inakai awyly mâuntuly, xina agueho ara – kely myani Tértulo pymâna.

<sup>9</sup> Judeu domodo Tértulo aguehobyry tohoguezemo myani. Awylygue myani ague-lymo:

— Akealâ awârâ Tértulo aguehobyry modo – kelymo idânârâ.

### *Adientyby, adâkehobyry warâ Paulo Félix enanaym nhegatuhobyry*

<sup>10</sup> Aituo myani mâkâ pymâ tâmarygue Pauloram “Aguekâ” kely. Aituo myani Paulo aguely adaguly:

— Idaenkuly, Pymâ. Tutuze urâ, iweâpa xina judeu domodo iwymâryem mawyly. Awylygue ise koendâ kehoem agânhetyby modo, kâenomedâdobyry modo warâ kâengatuly âyam. <sup>11</sup> Idânârâ xirâ aguehomo, doze emedyly ara târâ Jerusalémdâ wawyly ume kulâ keankâ aidyly. Deus agâ agueze, ehogueze warâ keankâ Jerusalémram udâly. Tâwâlâ mapâiguely Deus ety odanopyry modo, âkealâ auguely awyly mâuntuhoem. <sup>12</sup> Deus etydâ watay ânguy agâ kâseudaymba wakynre, kurâ domodo kâynanâdaymba wakynre warâ, Deus etydâ, tâdâtâdyguyho mododâ, âdykâingâlâ kadakobâday warâ. Kurâdo kâynanâdyly netaymba keankâ asaemo yizepaom modo. <sup>13</sup> Ienwentâguedylymo wâne inakanhe awitobyry wâgâba olâ. Kewâdylymo kulâ olâ. Tonzepa wâne ise asaemo ienwentâdyly, kewâdylymo kulâ olâ ise.

<sup>14</sup> — Kâinwânyly ise âyam kâengatuly. Deus kâinwânyly, xina idamudo nheinwântyby. Idânârâ Moisés inweniby tâinwânsse urâ, earamo. Idânârâ saguhoem Deus eynynâ aguewâni modo inweniby tâinwânsse urâ, nheinwântomo ara. Jesus kieinwântuo lelâ Deus eydâ atoram kytâly awyly tâinwânsse olâ urâ. Judeu domodo ewy olâ neinwâmpyramo Jesus kâmakerim awyly. <sup>15</sup> Tâinwânsse urâ, Deus xypyry etay idânârâ iguewâtyby modo kurâem nhenehonly, einwânni modo, einwântânybyry modo alelâ. Agui judeu domodo kâinwânwânto ara lâpylâ inwânwândylymo. <sup>16</sup> Deus enado âepanâgueze wawyly tutuze wawylygue, idânârâ agânhedyse urâ, Deusram, kurâdoram warâ kâzewentâgueoba witoem – kely myani Paulo.

<sup>17</sup> Paulo agueondyly myani:

— Iweâpa âtâ anakâ Jesus wâgâ unâ egatuze idâypyem, Jerusalémram kodopâdâ. Judeu âdy pebaom modoem dinheru kâindâtyguyby enese, Deusram auguehobyry xuduze warâ keankâ udâly. <sup>18</sup> Deusram “Aiese urâ” uguehobyry olâ keankâ agânhokyly. Awylygue keankâ Deus etyram udâly, okogueze, xina ezewenry ara. Aguipa kulâ keankâ kurâ domodo târâ awyly. Ânguy âdalâ kulâba gâlâ keankâ warâ.

<sup>19</sup> — Deus etydâ wawyly ume ienipyry modo lâpeba tarâ, akaemo judeu Ásia eynynonro modo. Enanajimo inakanhe awidâ-ro watay, nâedâ akaemo, awitobyry egatuze. <sup>20</sup> Judeu domodo iwymâryam keankâ kadaholy, pymâ domodo âtâdyguyhoam. Pymâdo enado watay, âdylâ inakanhe awitobyry wâgâ ienwentâguebyramo keankâ. Tutuzelâ asaemo tarâ ienwentâni modo. Kainwânyly wâgâ kulâ keankâ kâzewentâoly. <sup>21</sup> Xina iwymârydo enado wawyly ume, ago kehoem augue: “Iwerâ ienwentâguedylymo, iguewâtyby modo xypyry etay kurâem itonze kely kainwândylygue kulâ” ugue — kely myani Paulo pymâ Felixram.

<sup>22</sup> Koendâ kehoem myani Félix xurutybyem awyly Jesus eynynonro modo nheinwânyly wâgâ. “Jesus kieinwântuo lelâ Deusram kytâly” kely tydase myani. Âkealâ, âkealâba warâ Paulo ewentâguedyly awyly adâkehoem tynwânwânse wao myani. Aituo myani Pauloram aguely:

— Sodadu iwymâry Lísias saintuo, aguely idase wao urâ. Mâkâ aguely kâindapygueduo ise, âdara âedyly awyly kâuntuly — kely myani.

<sup>23</sup> Arâ adâkebygueduo myani cem sodadu iwymâryram aguely:

— Ozodadury modoram aguekâ, Paulo nhetadâdomoem. Ihugâjiho, ewâkâjiho warâ olâ etyen-hongâ, kadeia oday tawyly ume tâwâlâ adakobâdoem. Tâwâlâ eataen-ho modo âdy ize ato nenedâmo — kely myani pymâ Félix.

### *Félix, Drusila warâram Paulo adâitobyry nhegatuhobyry*

<sup>24</sup> Iweâpa ipygueduo myani pymâ Félix Cesareiaram idâondly tywydy Drusila agâ. Judeu myani mâkâ pekodo. Pymâ Félix, Paulo ingâsenehonly myani, mâkâ nheinwânyly wâgâ tindatondyzé tawylygue. Aituo myani, Jesus Cristo wâgâ aguely.

<sup>25</sup> — Koendâ kine, Deus aguiendye ato lelâ aguyjiene. Deus izepa ato aiese kykeduo, “Agânhepyra ise aze” tâkezelâ kine. Xypyry etay idânârâ ise Deus enadoram kytâly. Jesus eynynonro modo typgueba kehoem iomazeânehonze. Jesus eynynâbaom modo ise typgueba kehoem nhenagazenehonly — kely myani Paulo.

Agueduo myani pymâ adahulily, Jesus eynynonro keba tawylygue. Aituo myani Pauloram aguely:

— Idâ. Âdalâ ise âgâsedondly — kely.

<sup>26</sup> Félix tynwânwânse myani, Paulo tyam dinheru nhuduly tâtaguehobyry ebyryem. Awylygue myani ingâsezedyly, eagâ tâtunâguedoem. Paulo dinheru nudupa olâ myani.

<sup>27</sup> Azagâ anos sakabygueduo myani Félix pymâemba idyly Cesareiadâ. Paulo kadeia odaypa netaguehomba myani, judeu domodo tienwiâpanâdyzeba tawylygue. Pórcio Festo myani pymâ iwelo, Félix ejipyano.

## 25

### *Festoram Paulo adâitobyry nhegatuhobyry*

<sup>1</sup> Aituo myani Festo idâly Cesareiaram pymâem. Azagâ tokalâ warâ iguampygueduo myani târâpa egasely. Jerusalémram idâly. <sup>2</sup> Saimpygueduo myani kurâdo eynynâ Deus agâ aguewâni modo iwymârydo, judeu domodo iwymârydo warâ idâlymo eagâ agueze. Paulo tienwentâdo nhegatulymo myani eyam.

<sup>3</sup> — Xarâ Jerusalémram Paulo igonokâ — kelymo myani.

Ânwa ozelâ tyân-hoem kulâ olâ myani aguelymo.

<sup>4</sup> Aituo myani Festo aguely:

— Cesareiadâlâ Paulo etagu nidâ. Inepa ise myarâ kodopâdyly. <sup>5</sup> Kodopâduo, âwymârymo yagâ igonotaungâ. Târâ ise nhewentâdylymo, enanajimo inakanhe aitobyrybe-ro watay — kely.

<sup>6</sup> Dez emedyly awârâem Jerusalémdâ itybyem myani Festo odopâdyly Cesareianra. Judeu domodo iwymârydo eagâ idâwânmomy. Kopaelâgâem myani Festo idâly tribunalram. Myarâ saintybyem myani ekadyly, aguely.

— Xarâ Paulo enetaungâ — kely.

<sup>7</sup> Paulo myarâ âepanâgueduo myani judeu, Jerusalém donropyry modo tânâmize âtâdyguylymo lelâ. Inakai modogue kehoem myani nhewentâdylymo. Warâ olâ myani Festo aguely:

— Amyguelymo tydase urâ. Âdara pylâka ise amyguelymo âkealâ awyly kâuntuly — kely. Agueduo myani âdara tâkely nutuba idylymo Paulo tienwentâdobyry modo wâgâ.

<sup>8</sup> Aituo myani Paulo tywâgâ aguely:

— Âdy inakai agânhetaymba urâ. Xina ezewenry iweniby arapa kulâ awitaymba urâ. Deus ety âwankuem kânhetaymba urâ. Âdykâ kywymâry Roma donro kâunâguedaymba urâ warâ — kely myani.

<sup>9</sup> Judeu domodo tienwiâpanâdyzeba olâ myani Festo. Aituo myani Pauloram aguely:

— Jerusalémram mydâdyse âmâ? Xirâ unâ wâgâ amyguedyse âmâ târâ, âkealâ, âkeaba warâ iwentâguedylymo awyly auguehoem? — kely.

<sup>10</sup> Aituo myani Paulo in-hoguly:

— Udâdyse inkâba urâ myarâ. Tarâ inado urâ iwerâ. Roma donro pymâ kuru César aguehobyrlyâ âmâ. Tarâlâ aguekâ, koendâ, koendâpa warâ awitobyry awyly wâgâ. Judeu domodo xurâem inakanhe awitaymba urâ, tutuzelâ âmâ. Awylygue ise kodopâbyra wawyly Jerusalémram. <sup>11</sup> Âdalâ inakanhe awitobyrybe yiguehoem kehoen-ro watay, yâen-hongâ. Judeu domodo kewâdyly kulâ watay olâ, ienagazenehomba nidâmo, kywymâry Roma donro agueho ara. Awylygue ise kywymâry Roma donro César-ram kâenkadyly. Ugonokâ pylâ mâkânrâ. Tâzekelâ urâ târâ. Mâkâ lelâlâ ise aguenri, inakanhe, inakanhemba warâ awitobyry wâgâ — kely myani Paulo.

<sup>12</sup> Arâ agueduo myani Festo âtunâguedyly turuni modo agâ. Eagâmo adâkebygueduo myani Pauloram aguely:

— “Kywymâry César-ram ugonotaungâ, Roma donroram. Mâkâ ise inakanhe awitobyry wâgâ aguenri” mygueaki. Arâ ise aedyly. Romaram ise ogonodyly — kely myani Festo.

### *Paulo wâgâ Festo aguehobry*

<sup>13</sup> Iweâpa ipygueduo myani pymâ Agripa âewyly tyaundu Berenice agâ Cesareianra, Festoram adakobâze. <sup>14</sup> Iweâpa myani târâ awylymo. Aituo myani Festo aguely eyam Paulo wâgâ:

— Tâlâ tarâ uguondo, Félix kadeia odaxi nhetadânehoymby, pymâem tawyly ume. Paulo mâkâ ezedy.

<sup>15</sup> — Jerusalémram udâduo, kurâdo eynynâ Deus agâ aguewâni modo iwymârydo, judeu domodo iwymârydo warâ yagâ agueze nâtâmo. Inakanhe aitobyry wâgâ keankâ Paulo nhewentâguedylymo. Nekadâmo kâyâen-hohoem. <sup>16</sup> Aituo keankâ Paulo agâ tyewiâtuneim modoram auguely: “Ânguy tyâwâtuneba saguhoem, aguely tydaseba kulâ” uguely.

<sup>17</sup> — Aituo keankâ xarâ Paulo eydâ atoam âewylymo. Saintuomo inepa keankâ aguelymo kâindadyly. Kopaelâgâem keankâ udâly tribunalram. Myarâ saintybyem iekabygueduo keankâ Paulo kâingâsenehonly. <sup>18</sup> “Inakai modogue kehoem isenra nhewentâguedylymo” uguely keankâ yangahu oday. Arapa olâ keankâ aguelymo.

<sup>19</sup> Tâzewanrymo ara anipyra atobyry wâgâ kulâ keankâ nhewentâdylymo. Mâkâ uguondo Jesus keho iwerâ igueypyemba awyly nheinwândylygue kulâ nhewentâdylymo.

<sup>20</sup> — Xirâ wâgâ koendâ kâuntuhoem âdara awidyly awyly kâuntuba olâ wakynre. Aituo keankâ Paulo kampâiguely: “Jerusalémram mydâdyse âmâ? Xirâ unâ wâgâ amyguedyse âmâ târâ, âkealâ, âkealâba warâ inwentâguedylymo awyly auguehoem?” uguele eyam.

**21** Tâtâdyzeba olâ keankâ. “Kywymâry Roma donro César-ram ise kâenkadyly. Ugonokâ pylâ mâkânra. Mâkâ lelâlâ ise aguenri, inakanhe, inakanhemba warâ awitobyry” nygue Yam. Aituo yzodadury modoram auguely keankâ: “Koendâ merâ etaungâ. Pymâ Roma donroram ise kâingonody” ugue eyanmo – kely myani Festo, Agriparam.

**22** Aituo myani pymâ Agripa aguely Festoram:

- Mâkâ uguondo aguely kâindadyse urâ – kely.
- Kopaelâgâ ise mâindadyly – kely myani Festo.

**23** Kopaelâgâem myani Agripa, Berenice warâ idâlymo pymâ modo âtunâguedoram. Egawântuomo myani tuomare kehoem âzedaenkuolymo, pymâ ize tadato edaenkuho ara kehoem. Festo agâ, sodadu iwymârydo agâ, uguondo tynruneim modo agâ warâ myani âwândylymo. Âwâmpygueduomo myani Festo, Paulo ingâsenehonly. **24** Paulo âetuo myani Festo aguely:

– Idaenkuly, pymâ Agripa. Idaenkulymo, pymâdo, uguondo modo xirâ âtâ anakonro modo warâ. Anra Paulo. Aguidope judeu domodo izepa ato merâ. Jerusalémdâ watay, judeu domodo yagâ anyguemo, tienwentâguedomo wâgâ. Nâedâmo lâpylâ akaemo ewy xarâ, iwâgâ yagâ agueze. Aunlolâ inanry kâyâen-hohoem aguezesedylymo. **25** Urâem olâ âdaitobyry wâgâba kulâ tyâzepa. “Kywymâry Roma donro César-ram ise kâenkadyly. Ugonokâ pylâ mâkânra. Mâkâ lelâlâ ise aguenri, inakanhe, inakanhemba warâ awitobyry wâgâ” nygue. Awylygue ise myarâ kâingonody.

**26** — Kywymâryram kata igonose urâ, âdaituo eyam kâingonodyly awyly nhutuhoem. Âdy kâinwenily awyly kâuntuba olâ urâ, âdaitybyem awyly kâuntuba wawylygue. Awylygue xarâ kâenenehonly, aguely mâindatomoem. Pymâ Agripa, amyguely kâindadyse urâ. Sapâiguegâ, in-hoguly idakâ warâ. Arâ keanra ise kata wâgâ kâinwenilype awyly. **27** Koendâ inkâba uguondo tâwentâzeim igonodyly kywymâry Roma donroram, ewentâdo wâgâ aguehomba kulâ – kely myani Festo târâ âtâdyguyby modoram.

## 26

### *Adientyby, adâkehobyry warâ Paulo, Agripa enanaym nhegatuhobyry*

**1** Aituo myani pymâ Agripa aguely Pauloram:

- Amânhetaymbi modo xinaram egatugâ – kely.

Aituo myani Paulo tâmary nhaunâdyly, pymâ Agripa tiendaenkuhoem. Aitybyem adâitobyry egatuly nhaguly.

**2** — Pymâ Agripa, idaenkuly wao. Tynreim âmâ. Tuomare urâ, inanaym auguely awylygue. Âyam kâkaduly ise xirâ, judeu domodo agueho araba awidly awyly mâuntuhoem. **3** Judeu domodo ezewenry tutuzelâ âmâ, idânârâ kehoem. Tutuze lâpylâ âmâ, xina izepa ato, xina nâseinwâmbyra ato warâ. Awylygue olâ ydakâ wao. Auguely ara uguely – kely.

**4** Aituo myani Paulo agueondly:

— Idânârâ judeu domodo tutuze, salokuzenomoenlâ Moisés inweniby ara aiseze wawyly. Cilícia eynynâ yazehobyrydâ, Jerusalémdâlâ alelâ âdykâ xina ezewenry aiedyly kâinmowâbyra urâ. **5** Judeu taunlo modo âkealâ aguely kezemo. Tutuzelâ akaemo, salokuzenomoenlâ fariseu-em wawyly. Xina judeu domodo ezewenry einwânni kuru mawânkâ fariseu domodo. **6** Iweâpalâ myani Deus aguely xina idamudoram: “Iguewâtyby modo kurâem ietonze urâ” kely. Tâinwânsse urâ, Deus adâkehobyry ara aidyly. Awârâ tâinwânsse wawylygue, yizepaom modo xarâ ienewylymo, ienwentâze. **7** Judeu domodo tâinwânsse, Deus xypyry etay igueypy kurâem nhetondyly. Awylygue xina judeu modo, Deus xyrendyly xina nimopa awyly. Peto oday, kopae alelâ xina “Aiekâ” kehobyry anhedyly. Deus iguewâtyby modo kurâem ietonze kely kâinwândylygue kulâ judeu domodo ienwentâdyly, Pymâ – kely myani Paulo.

<sup>8</sup> Idânârâ tonlo modoram myani Paulo aguely:

— Kieinwâmpyra kitoem nuduwâpyra Deus iguewâtyby modo kurâem tyetonze awyly. Einwântaungâ — kely.

<sup>9</sup> Idânârâ tonlo modo indatoem myani Paulo aguely Agriparam:

— Saguhoem, urâlâ kâinane Jesus Nazaré donro einwânni modo enagazeni. Idânârâ adyese winane, kâenagazedomoem. <sup>10</sup> Jerusalémdâ Jesus einwânni modo toenzepa senagazenehonwâm. Kurâdo eynynâ Deus agâ aguewâni modo iwymârydo kadeia odaxi kâentadânehoem aguewânm. Tawânehonzemo, kadeia odaxi tâtadânehonzemo warâ winane urâ. Iguehoem aguehonlymo watay, en-hem tâkeze kâinane urâ warâ. <sup>11</sup> Jesus einwândyly inmodyzemo wâne winane. Âtâ tâdâtâdyguyho modoram aunlolâ kâinane sawâsemo udâly. Tyewiâsezemo winane. Taypa kâinane udâly sawâsemo. Konhontuomo, toenzepa kehoem kâinane kâenagazedylymo — kely myani Paulo.

### *Jesus tyeinwândyly wâgâ Paulo aguehobyry*

(At 9.1-19; 22.6-16)

<sup>12</sup> Paulo tywâgâ agueondly myani:

— Aituo ani Damascoram udâdyse widyly, Jesus einwânni modo etadâze. Kurâdo eynynâ Deus agâ aguewâni modo iwymâry modo ani udâhoem agueim. <sup>13</sup> Pymâ Agripa, ânwa oze udâday awitobyry ise kâengatuly. Udâday, kuotatay, kau wâgâ toenzepa kehoem ani ydâ iatygudyly. Xixi takaze kehoem ani iatygu. Ienâmidâ ani iatygu; yagonro modo tânâmize lâpylâ warâ. <sup>14</sup> Aituo ani idânârâ xina onro onwa ihuguewâdyly, toenzepa tâseaneduo. Ytanwelâ ani Jesus yam aguely kâindadyly, hebraiku-em. “Saulo! Saulo! Âdaituoka ienagazedyly? Tâwâlâ kulâ mâsenagazedyly, tapirâ wâne tanî emano se tuosebileim onwa âjihugameduo tâdyâze myara midyly kulâ” kely ani. <sup>15</sup> Aituo ani kampâiguely: “Ânguyka âmâ, aguenri?” uguelly. “Jesus urâ, toenzepa mâenagazeguyylâ. <sup>16</sup> Aukâ. XYDYK ikâ. Iemaryem mitoem âduakely. Ywâgâ egaturin-em âduakely. Iwerâ mâentyby wâgâ egatugâ, waunroem aini wâgâ âyam kâengatuly wâgâ warâ. <sup>17</sup> Ywâgâ amyguedyse urâ judeu domodoram, judeu keba modoram alelâ. Kâmaynoem midyly watay, imakeze urâ, urâlâ eyanmo ogononi awylygue. <sup>18</sup> Ywâgâ aguenri ise âmâ. Ywâgâ eyanmo amygueduo, yeinwâNSEMO. Satanás einwândyly imozemo. Deus ise nheinwâNKYLYMO. Iwerâma iamu oday âzepâimbyem adakobâni ara kulâ akaemo. Yeinwântuomo, Deus inakanhe aitomo xygakeze. Peto oday adakobâni ara ise akaemo nhedyly. Xirâ nhutuhomoem ywâgâ amyguedyse wawyly” kely ani Jesus yam. Warâ ani aidyly, Damascoram udâday — kely Paulo.

### *Jesus ewanuem adâidly wâgâ Paulo aguehobyry*

<sup>19</sup> Aituo myani Paulo agueondly:

— Pymâ Agripa, warâ ani Jesus aguehobyry ara awidyly, kaynâpa yam âetuo. <sup>20</sup> Warâ ani unâ iwâkuru Jesus wâgâ aguely kanguly. Saguhoem kuru iwâgâ auguely Damascodâ. Ilâpyryem Jerusalémdâ, idânârâ Judéia eynynâ warâ ani xunârybyry kâengatuly. Judeu domodoram, judeu keba modoram alelâ inanry iwâgâ auguely. “Âjityendaungâ, inakanhe amitomo wâgâ. Deus izepa ato aiedyly imowâdaungâ. Jesus einwântaungâ. Koendonro lelâ aietaungâ, Jesus eynynonroem mawylymo, inakanhe amidyly imoimbyryem warâ mawylymo xutuhoem” ugezesedly inanry. <sup>21</sup> Xirâ unâ kâengatudo keankâ, judeu domodo yagâ iewiâpadaynl. Deus etydâ wawyly ume keankâ yawâdylymo. Toenzepa keankâ yâdyse awylymo, Jesus wâgâ auguelygue.

<sup>22</sup> — Iepyra nipyra olâ keankâ Deus, iemakedâlâ. Awylygue olâ tarâ wawyly, Jesus unârybyry idânârâ âyanmo egatuze, kurâdo âdaunlo modoanlâ, tâgareim modoram warâ. Jesus aguehobyry, anhetyby warâlâ xirâ unâry. Moisés xunârybyrylâ, saguhoem Deus itaumbypyry egatuwânbypyry modo xunârybyrylâ warâ xirâ kâengatuly. Deus onro anaxi

ingonokyly wâgâ myani agueymo. Iwerâ auguely âetobyry wâgâ. <sup>23</sup> “Deus Ingontyby âzenagazeoze, âdyoze warâ; tyigueduo, kurâem itonze” kewânmomy. Awlygue, kyigue-duo, kurâem itonze kydawyly, kiuntuly. Kytâho kientoem esagonrim, arâ lâpylâ ise Messias, Deusram kytâhoem, nhutuen-honly judeu domodo, judeu keba modo alelâ – kely myani Paulo.

<sup>24</sup> Paulo adâitobyry, adâkehobyry warâ nhegatuly ume myani Festo adaenkely:

— Toenzepa mâsenomedâdâ. Aituo âindâam midyly! — kely.

<sup>25</sup> Aituo myani Paulo, Festoram aguely:

— Âindâam witaymba urâ, pymâ ton-honreim. Koendâ kâpaunzedyly. Âkealâ auguely-ro warâ – kely myani Festoram.

<sup>26</sup> Aituo myani Paulo agueondly:

— Pymâ Agripa, âkealâ auguely awyly, tutuze âmâ. Koendâ kehoem Jesus wâgâ tutuze âmâ. Âdy totoenze kulâ anientaymba myani mâkâ; tâzenanaym lelâ myani anhedyly.

<sup>27</sup> Pymâ Agripa, saguhoem Deus eynynâ aguewâtyby modo tâinwânse âmâ. Arâ atayma Messias âewyly tynwânwânse âmâ-ro – kely Paulo.

<sup>28</sup> Aituo myani Agripa aguely:

— Ine wao. Inepa kehoem Jesus kâinwândyse mawyly – kely.

<sup>29</sup> — Koendâ tâise Jesus mânwândyly, iweâlâ atay, iweâpa atay warâ. Koendâ tâise âmâ lelâba mânwândyly, asaemo idânârâ ydataynrim modo warâ. “Idânârâ taunlo modo yara nidâmo, Jesus neinwândâmo” tâkeze winase Deusram. Yara korentygue mâzekâjiodyzebamo olâ urâ-ro warâ – kely myani.

<sup>30</sup> Awârâ aguely tindatuomo, pymâ Agripa, pymâ Festo, Agripa eaundu Berenice, idânârâ târâ ekadaymby modo warâ saudylomo myani tâgasehomoem. <sup>31</sup> Tâgaselymo ume, tindatyby wâgâ agueymo.

— Âda nitaymba awâkâ Paulo etadâdoem, xyâhoem warâ – kelymo myani.

<sup>32</sup> Aituo myani Agripa, Festoram aguely:

— “Kwyrmârý César Roma donroram ise kâenkadyly. Ugonokâ pylâ mâkânra. Mâkâ lelâlâ ise aguenri, inakanhe, inakanhemba warâ awitobyry wâgâ” kepa-ro watay, tâtaguneba tâise mâkâ, inakanhe anitaymba mâkâ, ienanaji – kely myani.

## 27

### *Festo Romaram Paulo ingonotobyry*

<sup>1</sup> Aituo ani Festo, Paulo ingonodyly Romaram, Itália anaxi xidadâ imâsedoram. Júlio cem sodadu iwymâryam aguely:

— Âmâ ise etadâdyby modo, Paulo warâ sani Romaram – kely.

(“César izodadury” kelygue myani izodadury modo ezeku; mâkâ ewy myani Júlio.)

<sup>2</sup> Pepi imâsedo Adramítiodâpa âetyby, Ásia yan-yam idâim odaxi ani xina âxiedyly. Aituo ani xina idâly adaguly. Aristarco idâwâm lâpylâ xina agâ. Macedônia eynynonro âtâ anary Tessalônica donro ani mâkâ. <sup>3</sup> Kopaelâgâem ani xina saindyly Sidom iduantaji. Koendâ ani Júlio, Paulo nhedyly. Pauloram aguely:

— Tâwâlâ ise myarâ ataen-ho modoram adakobâze mydâly. Pyni, âdydo imeom warâ nhududuomo, tâwâlâ emakegâ lelâ – kely ani eyam.

<sup>4</sup> Ilâpyryem ani xina idâly Sidomdâpa. Târâpa idâypyem ani Chipre inortyry einkâ xina idâly, sapezenru xina yan-yam âewyly awylygue.

<sup>5</sup> Cilícia, Panfília warâ edazekâ ani xina idâly. Xidadâ Mirra kehoam xina saindyly ani Lícia eynynonroam. <sup>6</sup> Târâ ani xina pepi imâsedo odayba âzetyly. Sodadu domodo iwymâry myani pepi imâsedo eagonro tâense Alexandria donropyryem Italiaram idâim. Aituo ani xina mâtâ iodaxi âxiedyly.

<sup>7</sup> Toenzepa ani sapezenru eon-honru xina yan-yam. Awylygue ani kura kehoem xina idâly. Tâpyneânze kehoem ani âtâ anary Cnido iduenrâ xina saindyly. Ton-honre kehoem sapezenru xina iduenrâ âewyly awylygue ani xixi egawânto yan-yam xina nâtâba awyly. Aituo ani sul yan-yam xina MYRYK idyly. Ilha Salmona einkâ ani xina sakadyly. Xina idâly lelâ ani sul einkâ. Ilha imâsedo Creta einkâ ani xina sakadyly, sapezenru ton-honre kuba ato einkâ. <sup>8</sup> Creta edazekâ ani xina idâly. Tâpyneânze kehoem ani xina idâly. “Tuanta koendonro” kelygue tâzekeinram xina saindyly ani. Xidadâ Laséia kehodâ iwaguepa ani mâmâ. <sup>9</sup> Cesareiadâpa xina egasehobyry iweâpa itybyem, âty Deus Inakanhe Aguitobyry Nhygakehon-ho keho sakadybyem awyly ume ani. Paru oze tâdâtâhoem kâmynoem idyly. Aituo ani Paulo aguely:

<sup>10</sup> — Nhaum, kâmynoem enra xirâ ume paru oze kytâly. Pepi imâsedo xytyze. Iodano modo myenranxi idâze. Kurâ nhese lâpylâ warâ enra — kely.

<sup>11</sup> Pepi odo, pepi iogâikeim warâ olâ ani aguelymo:

— Kâmynoem inkâba awârâ tâdâtâhoem. Tarâ tuantayba kydâxiguenre — kelymo.

Aituo ani sodadu domodo iwymâry akaemo azagâ aguely indakyly kuru, Paulo aguehobyry keba. <sup>12</sup> Koendâpa ani mâmâ tuantay tadawyly kopâ tapezenreim ume. Agui pepi oday âsewaniwâni modo ani târâ xina eydâ atodâ inepa tâxiguedyze awylymo. Awylygue ani aguelymo:

— Tâlâ tarâ Cretadâ eagonro tuanta Fenice keho. Mâmâ tuantadâ ise sapezenru kopâ agonro kiankadyly — kelymo.

Sapezenru ton-honreim tuanta Fenice einkâ nakabyra awyly, nordeste, sudeste warâ eynynâ awylygue.

### *Kopâ tapezenreim saintobyry*

<sup>13</sup> Tuanta Koendonrodâ xina awyly umelâ ani, sul eynynâ adapezeinly ton-honre kubalâ. Mâmâ sapezenru wâgâ pepi oday tâwanuneim modo aguelymo ani:

— Inoro. Kytâdyze kydatoram ise xirâ sapezenru kadyly — kelymo.

Aituo ani pepi epagunâdo, âncora keho, nhaunâdylymo. Ilâ aienibyryem ani xina âxiguely Tuanta Koendonrodâpa. Creta edazekâlâ ani xina sakadyly. <sup>14</sup> Inepa kehoem ani sapezenru âtuguguely. Xina yan-yam adapezeinly idyly. Nordeste eynynâba ani sapezenru âewyly, xina enâmize. <sup>15</sup> Toenzepa kehoem ani xina yan-yam adapezeinly. Pepi oday tâwanuneim modo nhatoem nudupa lâgâlâ. Aituo napyra idylymo. Sapezenrulâ pepi sani tâtâho yan-yanlâ.

<sup>16</sup> Ilha imeimbyry Cauda isulry eynynâ ani xina sakadyly. Tâinkâ ani sapezenru ton-honre kuba awyly. Pepi imâsedo ihu wâgâ, pepi imeimbyry ekâjibye ani. Paru tâsaniguenry oze tâdâtâho ani mâmâ pepi imeimbyry. Tahuleba kehoem ani pepi imâsedo oday tâwanuneim modo pepi imeimbyry sasery nhawâdylymo, pepi imâsedo odaji tiempâguehomoem. <sup>17</sup> Pepi imeimbyry sawânipryrem ani pepi imâsedo odaji nhedylymo. Líbia iwaguepa, paru tâsaniguenrybe myani toenzepa myenraym sagunupe atodâ. Aituo ani aguelymo:

— Sapezenru pepi nhadyly paru tâsanigueba atoam watay, pepi epaguze sagunu myenrano wâgâ. Kientyba ise kurâ-ro warâ — kelymo.

Aituo ani panu imâsedo modo, vela keho, nhenâtâguylymo. Sapezenruanlâ pepi adaholy. <sup>18</sup> Sapezenru ton-honreim nakabyra lelâ. Paikaylâ pepi âzekânioly ton-honre kehoem. Kopaelâgâem ani pepi odano modo tâmânreim modo paikaji nhamelymo, tâmânrugue pepi nytyba itoem. <sup>19</sup> Aisezedlyle lelâ ani sapezenru. Kopaelâgâem ani tâwanuneim modo pepi oday tâwanezeim modo nhamuilymo paikaji, korenty modo, sapezenru sawâto modo, awârâ modo. Kâmynoenlâ olâ ani xina.

<sup>20</sup> Kopaelâgâembaba ani iamu. Peto oday xina xixi nepyra. Kopae xina ximukâ nepyra warâ, ton-honrelâ kopâ tapezenreim ihuguely awylygue.

— Kydâsemaguewâbyra ise kurâ. Idânârâ ise kytly — xina kely ani.

<sup>21</sup> Iweâpa ani pepi imâsedo oday tâwanuneim modo toenzepa âseguâdâdylymo. Âwinduatomoenlâ nudupa lâgâlâ ani. Aituo Paulo XYDYK idyly akaemo enado. Eyanmo aguely:

— Nhaum, Cretadâ kydatay auguehobyry enanâguewâdaungâ: “Toenzepa âsenagazeze kurâ, kâpagubyra kurâ-ro watay” ugue. Tuanta Koendonro keho Cretâdâlâ kâpagudyly-ro watay, xirâ pepi isejiguy modo, âdydo imeom pepi odanopyry modo warâ kianmewâbyra tâise kurâ; arâ kehoem kydâsenagazedaymba tâise kurâ warâ. <sup>22</sup> Tâegane itaungâ! Ânguy niguewâpyra ise. Pepi lelâ ise adakalagueim — kely.

<sup>23</sup> — Deus eynynâ wato aini modo yam nutuen-hoangui. Kopae anju kaynonro nâepanâgueagui yam. <sup>24</sup> Warâ enra aguely: “Paulo, tyanepa ikâ. Iwerâ kehoem âiguewâpyra ise âmâ. Pymâ kuru Roma donro enadoram idâze wao âmâ. Koendonro awâkâ Deus. Awylgue ise nhetâlâ awyly. Âmâ, agâ idâwâni modo warâ nhesemo lelâ” keanry yam. <sup>25</sup> Awylgue olâ ton-honre itaungâ, uguely. Deus einwânni urâ. Anju aguehobyry ara aiese mâkâ. <sup>26</sup> Âsemagueze lelâ kurâ idânârâ. Xirâ pepi âdykâlâ myenraym sagunu wâgâ epaguze — kely ani Paulo.

<sup>27</sup> Azagâ semana ani mâtâ sapezenru ton-honreim xina saseze awyly parutabâ Mediterrâneo oze. Kuetâji awârâem ani pepi oday tâwanuneim modo onro iwaguepa taindyly awyly nhutulymo. <sup>28</sup> Aituo ani târâ paru esanigu nhekudylymo. Tâdyreim paikaji nhamelymo, iopirydâ emâihobeom, tâsanigue awyly eto; trinta e seis metros myani esanigu. Ilâpygueduo ani nhekudondylymo. Tâsanigue kuruba myani, vinte e seis metros kulâ.

<sup>29</sup> Onro onwa tâidyly awyly nhutulymo kuru ani. Paru emelây pepi tuhu imâsedo onwa âsemyly waunlo ara tienehondromo ani toenzepa kehoem âseanedlylymo. Awylgue quattro lelâ pepi epagunâdo nhekâjilimo; pepi ihu wâgâ paru ikaji nhamelymo, âdanipyra itoem.

— Inepa imekâ, xirâ korenty pepi epagunâdo ekâjihio adatâly iraynâlâ — kelymo myani.

<sup>30</sup> Pepi oday tâwanuneim modo pepi odayba tâsemaguedyzemo ani. Aituo ani pepi imeimbyry paikaji nhamelymo, ioday tâwientoem. Tywymâry enokuze kelymo myani. Warâ myani eyam aguelymo:

— Pepi ioruram xina idâly, xirâ tâmâreim epagudo xytâguyândonze, nâxigueba itoem — kelymo; kewâdylymo kulâ olâ myani.

<sup>31</sup> Pepi imâsedo odayba âwiense kelymo awyly tutuze olâ myani Paulo. Aituo ani Roma donro sodadu domodo iwymâryram aguely:

— Xirâ pepi oday tâwanuneim modo âwiense kelymo. Ânguy nâwiempyra nidâ. Âwiendylymo-ro watay, âdara mâtsemaguewâbyra ise âmaemo — kely.

<sup>32</sup> Agueduo ani sodadu domodo pepi imeimbyry ekâjihio nhatâlymo, tâwâlâ idâhoem.

<sup>33</sup> Emedylylâ ani Paulo idânârâ tonlo modoram aguely:

— Âwinduataungâ wao. Iweâpa keankâ xirâ koendâpa kydawyly azagâ semanabe. Xirâ ara koendâ mâtwinduapyra mawylymo. <sup>34</sup> Âwinduataungâ wao, on-honwandomoem. Tyanepa itaungâ. Ânguy niguewâpyra ise. Âda kydâiehowâbyra ise kurâ. Tokalâ kyangahudulâ kianmehonwâbyra ise kurâ — kely ani Paulo eyanmo.

<sup>35</sup> Agueypyem ani Paulo pão nhanâdyly.

— Tuomare urâ, xirâ pyne mâtunduhobyry wâgâ, Pabai — kely ani Deusram, idânârâ kurâdo enanaym.

Adâkebygueduo ani pão nhepâdyly, nhedawynly lâpylâ warâ. <sup>36</sup> Nhedawynly tientuo ani ago kuru egamadylymo. Nhedawynlymo lâpylâ. <sup>37</sup> Agui ani xina mâtâ pepi imâsedo oday awyly, duzentos setenta e seis kurâdo lelâ. <sup>38</sup> Xina nhedawympygueduo ani, trigu saku odano modo idânârâ kehoem nhamelymo paikaji, pepi ionupadoem.

### *Pepi imâsedo atuhobyry*

<sup>39</sup> Emetybyem ani pepi oday tâwanuneim modo iwague kuruba onrodâ tawyly nhedylimo, âdykâ tawyly nutubamo olâ ani. Paru epagudyby emyenro sagunupeom ani nhekylymo.

Aituo ani aguelymo:

— Kaintuo, pepi târâ kyzepagunâne — kelymo.

<sup>40</sup> Pepi epagunâdo ekâjihô tatâzemo ani. Pepi imâsedo ihugâiguerim “leme” keho ekâjigewânmo lâpylâ, pepi sase tâkewâdomoem. Ilâpygueduo ani panu imâsedo nhalokuândylymo lâpylâ, sagunu onwa sapezenru pepi imâsedo nhatoem. <sup>41</sup> Pepi olâ ani sagunu onwa naimpyra. Paru tâsaniguenydâ epagudyly lelâ. Sagunu myenrano onwalâ sakubyly. Ioru ton-honre kehoem myani sakubyly âzetyrin-emba kehoem. Paru sahugânu olâ ani ton-honre kehoem pepi onwa idâly. Awylygue ani ihudâ nhatuly.

<sup>42</sup> Sodadu domodo ani akaemo etadâdyby modo idânârâ xyâwâse kelymo, tywâre sagunu onwa nâsemagueba itomoem. <sup>43</sup> Iwymârymo Júlio olâ ani Paulo iguedyseba-ro warâ. Awylygue ani tyzodadury modoram aguely:

— Kâdyâwâtaundâmo — kely.

Warâ ani tâtaguneim modoram aguely:

— Adamewâdaungâ paikaji, sagunu onwa mydâhomoem — kely tywâruneim modoram.

<sup>44</sup> Ilâpyryem ani aguely tywârenry modoram:

— Paikaji adamewâdaungâ. Tábua wâgâ, pepi epiry adakalagueyby wâgâ warâ adawâtaungâ, sagunu onwa mydâhomoem — kely ani eyanmo.

Warâ ani xina idânârâ saindyly sagunu onwa; ânguy niguepa ani pepi atuduo.

## 28

### *Ilha Malta kehodâ Paulo atobyry*

<sup>1</sup> Onroram xina saintuo, tonlo modo xina iose tâtâzemo ani.

— Âdy kehoka xirâ ilha? — xina keduo,

— “Malta” xirâ ezedy — kewânmo.

<sup>2</sup> Koendâ kehoem ani xina nhedaenkulymo. Kopâ ihuguely, toenzepa igâwynu warâ ani. Awylygue ani peto nhatyguylymo sagunu wâgâlâ.

— Âetaungâ. Âuntaungârâ — kelymo xinaram.

<sup>3</sup> Se iladyby tindâtyguyby Paulo nhameley peto onwanji. Âgâupe myani mâtârâ peto duay. Peto âdâpigü tiuntuduo keanra ani mâtârâ se iladyby modo duaypa egasely. Paulo se peto onwanji nhameley ume ani emarydâ âdâholý. <sup>4</sup> Tonlo modo Paulo emary wâgâ âgâu adasedâdyby tientuo ani aguelymo:

— Kyârimpyry keanra awâkâ uguondo. Paru tâsanigueindâ tâiguely ume nâsemaguegui wâne, âgâu nhântybyem olâ ise nâsemagueba — kelymo.

<sup>5</sup> Aituo ani Paulo mâtârâ âgâu nhahogudyly peto onwanji. Tâtobyry newânebyra ani.

<sup>6</sup> Emary sakyzely, iguely warâ myani nhenuenguylymo. Âdalâ idyly enuenzezemolâ myani. Paulo olâ ani âdanipyra. Âdapa awyly tientuo myani, tunâry nhugukelymo.

— Uguondo mâtârâ! Kiynrenkyly deus awâkâ! — kelymo.

— Aramo, uguondolâ urâ — kewâm olâ Paulo.

<sup>7</sup> Aituo ani mâtârâ ilha donro pymâ, Públío keho, xinaram aguely:

— Inoro ietyram — kely.

Uguondo tynrenseim myani mâtârâ pymâ. Eonronrudâ iwaguepalâ myani xina âundyly sagunu wâgâ. Aituo etyram xina idâly. Koendâ kehoem ani xina nhedaenkuly. Azagâ tokalâ warâ iguandyly ara ani târâ xina awyly. <sup>8</sup> Nhunwym tâwâne myani. Tykyho wâgâlâ myani egueky, iaturu, ixigu warâ. Tâwâneim eguetonra Paulo tâwânsé ani, Deus agâ agueze:

— Deus, tutuzelâ âmâ merâ uguondo ewânu. Kua iekâ wao — kely.

Deus agâ agueypyem, nhangahu onwa tâmary MÂ' nhedyly. Warâ Deus eon-honrugue kua nhedyly.

<sup>9</sup> Toenzepa ani târâ Maltadâ tâwânuneim modo. Pymâ Públío nhunwym kua ienipyryem awyly tiuntuduomo ani Pauloram âewylymo idânârâ kehoem. Aituo kua âieholymo Deus eon-honrugue. <sup>10</sup> Tonlo modo ani koendorro kuru xina agâ. Toenzepa âdyo imeom xinaram xuduwanmo. Târâpa xina idâly ume, idânârâ xina ize ato modo xuduwanmo.

### *Malta donropyryem Paulo Romaram idâhobypy*

<sup>11</sup> Azagâ tokalâ warâ nunâ ani xina Maltadâ awyly. Pepi imâsedobe ani târâ tuantay. Xidadâ Alexandria donropyryem saintyby myani mâtâ sapezenru ton-honreim adaguly iraynâlâ. Akaemo ideusry gêmios ekudobe ani mâtâ pepi iorudâ, Zeus imeom azagonropyry ekudo, Castor, Pólux warâ. <sup>12</sup> Aituo ani xina mâtâ pepi imâsedo odaji âxiedyly. Xina saindyly ani Siracusaram. Azagâ tokalâ warâ emedyly ara ani xina târâ awyly. <sup>13</sup> Siracusa domropyryem ani xina Regioram idâly. Myarâ saintybyem, kopaelâgâem ani sapezenru âewyly xina ikaynâ. Régiodâpa egaseybyem, azagâ iguandyly wâgâ ani xina saindyly Pozuoliram\*. Pepi odayba xina âzetyly. Tuhuru wâgâ xina idâly.

<sup>14</sup> Jesus einwânni modo ewy xina iomâ târâ. Ekamâmo eagâmolâ xina itoem. Aituo ani tokalâ semana târâ eagâmo xina nhakadyly. Tonlopyryem ani tuhuru wâgâ xina idâly Romaram. <sup>15</sup> Romadâ Jesus einwânni modo xina saindyly egary tydasemo myani. Tâlâ xina inwânwâNSE idâwâtyby modo praça Ápio keho idâwaym. Tâlâ lâpylâ “Azagâ tokalâ warâ âdyo imeom vende ieto” kehodâ xina inwânwâni modo warâ. Akaemo tientuo, Paulo iomazely. Aituo Deusram aguely:

— Koendorro âmâ xina agâ, Pabai — kely.

### *Romaram Paulo saintobyry*

<sup>16</sup> Romaram xina saindyly ani. Aituo ani Pauloram aguelymo:

— Xina kadeia odaxi itadâdaymba ise. Tâwâlâ âtâ mâxidâdoem mâempywaguly ânwingâ. Sodadulâ ise inuagaeni, mâtsemagueba mitoem — kehonly.

<sup>17</sup> Azagâ tokalâ warâ emepygueduo myani Paulo judeu domodo iwymâry modo Romadâ tâtyuneim modo ingâsedaynl, eagâmo adâkehoem. Tyam idâduomo, warâ myani eyanmo aguely:

— Nhaum, tydaselâ keanra âmaemo judeu domodo Jerusalémdâ ienwentâdo. Kype-mugudo judeu tonlo modo idueryem âdawipyra olâ urâ. Kydamudo aitobyry aralâ awidyly. Arâ awidyly umelâ olâ keankâ tonlo judeu domodo yagâ iewiâkymo. Ietadâdâmo târâ Jerusalémdâ. Pymâ domodo Romadâpa igonotaymby modoram iegamemo warâ. <sup>18</sup> Idânârâ agânhetyby wâgâ yapâiguemo, idânârâ yapâiguehomobyry xihogu-ro warâ. Auguely tindatuomo, “Âdy inwentâdo lâpeba âmâ” nyguemo. Umoze nyguemo. “Âda mitobyry lâpeba âmâ âiguehoem” nyguemo warâ.

<sup>19</sup> — Judeu domodo olâ keankâ ietaguedyzebam. Aituo keankâ tonlo pymâ modoram auguely: “Romaram ugonotaungâ Kywymâry César-ram. Mâtâ lelâlâ ise aguenri, inakanhe, inakanhemba warâ awitobyry wâgâ” uguely keankâ eyanmo. Awylygue tarâ Romadâ wawyly, ywâgâlâ agueze, ihoguze warâ, ypemugudo judeu domodo ewentâgueze inkâba. <sup>20</sup> Awylygue âgâsedylymo, agâmo kâtunâguedoem. Tutuzelâ âmaemo, iweâpalâ kydamudo Deus Ingonykyly saindyly inwânwâNSEZE awylymo. Deus Ingonykyby eynynonro urâ. Kydamudo inwânwâNTYBY kâinwândylygue olâ, iwerâ korentygue kehoem ekâjibyem wawyly — kely myani Paulo.

<sup>21</sup> Aituo myani aguelymo:

\* **28:13** Poteoli lâpylâ myakâwândy mâtâ âji ezedy.

— Xina olâ awârâ âdykâ nidapyra. Âdylâ katalâ nigonotaymba inanry xina ipemugudo Judéia eynynonro âwâgâ aguenri. Judeu tonlopyry modo xarâ âetyby âunâguedaymbamo inanry. <sup>22</sup> Xina nhutuly, tâinkâ lelâba, mânwânto ara einwânni modo eynynâ inakanhe aguelymo lelâ. Awylygue mânwânkly wâgâ âmâlâ amyguely xina tindadyse ato — kelymo myani.

<sup>23</sup> Aituo Paulo agâ âseinwândylymo, Paulo agueho tindatomoem. Adâkehomobyry saintuo, Paulo eydâ atoram idâondylymo. Iweâpa Paulo eagâmo agueze awyly. Emedyly wogonropyrylâ, até kopae kehoem Jesus wâgâ unâ egatuzeze awyly, enomedâzemo. Kywymâryem Deus idyly wâgâ myani aguely eyanmo. Deus, “Igonose urâ” kehobyry wâgâ Moisés inweniby, Deus eynynâ aguewâni modo inweniby warâ tânanâguen-honze myani.

— Deus Ingonytyby awâkâ Jesus — kely myani eyanmo.

<sup>24</sup> Tâlâ myani Paulo, Jesus wâgâ aguehobypy einwânni modo; tâlâ pylâ olâ myani Jesus, Deus Ingonytyby awyly einwântâny modo. <sup>25</sup> Aituo idânârâ idâlymo, âjigue tâtunâgueze. Egasedaymo myani Paulo eyanmo aguely:

— Kydamudoam Deus Ispiritury aguehobypy Isaías inweniby enanâguewâdaungâ:

<sup>26</sup> “Apemugudoram aguera:

‘Deus aguely idadylyem tydase âmaemo,  
mâuntuba olâ âmaemo.  
Edylyem Deus anhekyly tâense âmaemo,  
âdaidyllymoguelâ.

<sup>27</sup> ‘Unâry mânwâmpyra âmaemo,  
mânwândyseba mawylymoguelâ.  
Âyanmo augedyse wato mânidayra âmaemo,  
mâindadyseba mawylymogue.

Agânhekyly mâmuntuba âmaemo,  
mâmuntudyzeba mawylymoguelâ.  
Mâjiwantahulymo, mâzepâinlymo waunlo ara lelâ.  
Arâpa watay, augueho tydase tâise âmaemo.

Agânhekyly tutuze tâise âmaemo.

Ynynonroem tâitonze tâise âmaemo.

Imakedâmo tâise urâ-ro warâ’ ”

kewândymy Deus, Isaíasram — kely myani Paulo.

<sup>28</sup> Paulo eyanmo agueondyly myani:

— Judeu keba modo Deus itaumbypy tydase awyly xutuwâdaungâ. “Kâmakerin-em Jesus iguely” kely indadylymo-ro watay, einwânsemo. Deus inakanhe aitomobyry xygakeze warâ — kely myani Paulo.

<sup>29</sup> [Paulo aguepygueduo myani judeu domodo idâly. Ton-honre kehoem âjihogulymo Paulo eynynonro modo, Paulo eynynonro keba modo warâ.]<sup>†</sup>

<sup>30</sup> Azagâ anos ani Paulo Romadâ awyly, âtâ tâpywazeim oday. Koendâ lelâ myani tyam idâwâni modo nhedaenkuly. <sup>31</sup> Idâduomo myani Deus pymâem idyly wâgâ aguely eyanmo. Pymâ Jesus Cristo wâgâ tonomedâzemo lâpylâ myani. Tyanepa myani aguely eyanmo. Unâ koendonro Jesus wâgâ aguenri negatuen-homba nipyra myani akaemo pymâ domodo.

Alâ kulâ kainwenily.

Lucas

<sup>†</sup> **28:29** Idânârâ livru saguho modo wâgâ iwenibyemba xirâ.

## ROMANOS

### Paulo Kata Inweniby Roma Donro Modoram

Xirâ kata wâgâ inwenily Paulo nhangahu odaji iemâmy Deus. Awylygue Deus itaumbrylâ xirâ Paulo inweniby. Jesus einwânni modoram myakâwândy inwenily-ro warâ. Unâ Jesus Cristo wâgâ agueim koendâ akaemo nhutudyze myakâwândy Paulo. Romaram nâtâba tawyly umelâ myakâwândy xirâ kata inwenily. Awylygue myarâ tâtâdyze tawyly wâgâ inwenily, eyanmo IU ise.

Xirâ kata wâgâ Paulo tywenize âdara kydâsemaguely awyly. Idânârâ kurâ Deus izepa ato adyese lelâ kurâ. Awylygue Deusdâ iwague kydawly. Jesus iguely myakâwândy, inakanhe aguitobry xygakehoem. Toenzepa kywynedylygue Deus kâmakely. Jesus kieinwântuo lelâ kydâsemaguely, âdy kydâsemaguelo aguienkylâ lâpeba. Deus nhemakeybyem kydawlygue; Satanás aguiendyse ato aguentaymba kurâ iwerâ. Deus Ispiritury kagâlâ awylygue, Deus kieinwândyly, ize ato aguiendyly warâ. Jesus einwânniem kituo, Moisés tâzezewenry inweniby amaymba kidyly. Kata xypyryem, Paulo tywenize, âdara Jesus einwânni modo tagonro agâ âzedyly awyly wâgâ, pymâdo aguehobry kiankabyra kydawly wâgâ warâ.

#### *Paulo xunâry adaguho*

<sup>1</sup> Urâ Paulo, xirâ kata âyanmo iweninri, Cristo Jesus emary. Mâkâ wâgâ aguenriem igonotyby urâ. Deuslâ uduakeim, ygâseni warâ, tâinkâ lelâba unâ iwâkuru tâdâsemagueho kâengatuhoem.

<sup>2</sup> Deus aguewândymy: “Unâry koendonro tâinkâ lelâba ise âzegatuoly” kewândy. Saguhoem mâkâ itaumbry egatuwâni modolâ mykâinane xirâ unâ egatuim, Jesus saindyly iraynâlâ, Deus itaumbry awo wâgâ iwenibyem. <sup>3</sup> Jesus Cristo Deus imery kywymâryem idyly wâgâ. Onro anaynlâ iazely karalâ. Davi iwerypyry mâkâ; saguhoem judeu domodo iwymâry tynrenseim myakâwândy Davi. <sup>4</sup> Kurâem wâne myakâwâm Jesus, Deus lâpylâ olâ mâkâ. Tunwym agâ âzekiba, eon-honru, enomegu, xynru warâ; âdaunloenlâ Deus izepa ato anientaymba. Iguewâm lelâlâ, toenzepa ton-honruguelâ olâ Deus, kurâem ietonmâ. Deus imerylâ lelâlâ Jesus awyly xutuholâ myakâwâm mâtâ. <sup>5</sup> Deus yagâ koendâ tawyly nhenehonly, mâkâ iemakely warâ, âdy agânhetyby wâgâ inkâba, yagâ koendâ tâidyse tawylygue. Cristo wâgâ ani Deus ugonodyly judeu keba modoram xurâem agueze. Idânârâ âtâ anakonro modo tytaumbyry indadyly, tainwândyly, adâkehobry anhedylymo warâ mâkâ ize awyly. <sup>6</sup> Âmaemo Roma donro modo myakâwândy Deus ingâseguyly, Jesus Cristo xurâem mitomoem.

<sup>7</sup> Awylygue xirâ kata âyanmo kâinwenily. Toenzepa âwynedylymogue, Deus âduakelymo xurâem mitomoem.

Âynynâmo Kunwym Deusram, Kywymâry Jesus Cristoram warâ kâenkadyly koendâ nhetomoem, akaladânímo peba nhetoem warâ.

#### *Paulo Deus agâ aguehobry*

<sup>8</sup> Warâ kely ise ygatary kanguho. Tâinkâ lelâba âmaemo Roma donro modo toenzepa Jesus mâinwândylymo kely egary. Awylygue, Jesus Cristo kurâem anhetyby kâenângueloygue inanry, Deus agâ âwâgâmo auguely kâinmoly wipyra wawyly: “Toenzepa womaru, âynynonro Roma donro modo egary kâindatuo. Koendâ inanry eagâmo mawyly, Pabai” uguely inanry. <sup>9</sup> Idânârâ yangahu oday unâry tutuze Deus; âkealâ auguely awyly tutuze. Tutuze Deus, kopaelâgâembaba âynynâmo eagâ auguely awyly. Inanânehonwâbyramo urâ. Tygüigue kehoem inanry Deus imery Jesus Cristo wâgâ unâ iwâkuru kâengatuly auguedyse wawylygue kehoem.

<sup>10</sup> Deusram auguely: “Udâdyse winase Romaram, tonlo modo âynynonro modoram adakobâze, nudupa olâ inanry. Âmâlâ udâdyse donro watay, inepa udâhoem kâenkadyly” uguely inanry eyam. <sup>11</sup> Toenzepa nhedysemo wawyly, Deus Ispiritury ienomedâdobrygue inomedâdomoem, ton-honre lelâ Jesus mâinwântomoem, Deus ague-hobryy aiese ton-honre mitomoem warâ. <sup>12</sup> Arâ kagonro agâ kydâzeon-hondâne, koendâ lelâ Deus aguiendyse ato aguentoem. Ton-honre lelâlâ ise Jesus mâinwândylymo, urâem anhetyby egary mâindatuomo. Ton-honre lâpylâ ise kâinwândyly, âmaemoem anhetyby egary kâindatuo.

<sup>13</sup> Cristo eynynâ ypemugudo, mâuntudyzemo urâ, toenzepa lelâlâ udâdyse wawyly, aunlolâ udâpa witoem aienehoimbe olâ. Ywâgâlâ, Jesus mâinwânsezedomoem Deus anhenehondye urâ, tâinkâ lelâba judeu keba modo agâ aitobyry ara. Xirâ mawânrâ iewanu mâkâ xurâem. <sup>14</sup> Tâinkâ lelâba iwâgâ auguehoem ugonomâ Jesus Cristo. Awlygue idânârâam kâengatuly tonomegueim modoram, tonomegueny modoram, pape itainly, iwenily warâ xutuwâni modoram, xutudâny modoram alelâ. <sup>15</sup> Awlygue Romaram udâdyse wawyly, unâ koendonro Jesus wâgâ kâengatuhomem, âmaemo atonlo modo koendâ mâuntuhomem lâpylâ.

### *Kydâsemaguehoem unâ iwâkuru Jesus wâgâ kyjidane*

<sup>16</sup> Tâinwânse urâ, âkeá lelâlâ, unâ iwâkuru Jesus wâgâ einwânni modo tâmakeze Deus awyly. Ton-honrugue mâkâ kâmakely. Awlygue tywypazeba xunâry kâengatuly; tadawize urâ xirâ kâengatulygue. Waunroem kuru xirâ unâ âzegatuoly myakâwâm judeu domodoram, ilâpyrem pylâ judeu keba modoran-ro warâ. <sup>17</sup> Jesus wâgâ egatuyby kindatuo lelâ mawânrâ âdara Deus xurâem tâwentâguezeba kydawly kiuntuly. Mâkâlâ mawânkâ wakeim: “Jesus einwânni modo lelâ kâenmakely” keim. Aituo mâkâ Jesus einwânni nheinwânsezedyly-ro watay, Deusram nâzewentâowâbyra ise. “Deus tâwentâguezeba kâendyly, mâkâ kieinwândylygue lelâ, âdaunloenlâ eagâpa kydâiehowâbyra ise kurâ-ro warâ, onro anaym kydawly ume, kyigueduo alelâ” kely iwenibyem Deus itaumbyry wâgâ.

### *Deus izepa ato aiedyly wâgâ agueho*

<sup>18</sup> Toenzepa kurâdo inakanhe aidylygue Deus tyewiâky enehonze. Awlygue âsenagazedomoem anhenehonly, âdalâ kulâ aidylymogue, aguemogue, nhangahumo oday xunâgommo wâgâ warâ. Deus itaumbyry âkealonro tâinwânseim tindadysebamo, mâkâ izepa ato aiedyly timodyzeba tawylygue, kurâ domodo unâ indadysebamo lâpylâ warâ. Indadylymo-ro watay, tutuzemo tâise âdara tâsemaguely awyly Jesus tyeinwântuo. <sup>19</sup> Tâlâ tawyly, koendonro tawyly, ton-honru, tonomegu warâ xutuen-honwânlâ Deus, xirâ anano modo olâ tiuntudyzeba. Awlygue ise Deusram âzenagazeolymo.

<sup>20</sup> Kaudyly umelâ, tiungutyby modo wâgâlâ Deus âdaunloem tawyly nhutuen-honly. Tâenseim keba lelâlâ wâne, nhugutyby kientuo olâ, tutuze kurâ, toenzepa ton-honreim awyly, âdaunloem awyly warâ. Onro wogonro modo, kau wogonro modo, paikano modo warâ kientuo, tutuze kurâ, Deuslâ idânârâ xugunipyry awyly. Awlygue ânguy, “Âdaunloem tawyly kiuntuhoem nenehonwâbyra Deus” kehoem nuduwâpyra. <sup>21</sup> Deus tâlâ awyly, tutuzemolâ wâne, xurâ keba modo olâ nyrempyramo. “Koendonro lelâlâ âmâ; koendonro adyese âmâ xina xurâem” kepamo warâ Deusram. Tâkuâguemolâ Deus wâgâ imâem kehoem; âdakulâ nhangahumo oday xunârymo. Iamu oday adakobâni âdykâingâ tâtâly awyly xutudâny aramo, koendâ Deus wâgâ nutuba tawylymogue.

<sup>22</sup> Tonomegue wâne âdutulymo, tuândyem lelâlâmo olâ. Deus wâgâ koendâ tutuze wâne, tânanajimo, iozepa kulâ arâ tyangahu oday xunâgommo. <sup>23</sup> Deus Iguedâny tâise nhehogueguylimo, ânguydo imeom ekudo xygatyby kulâ olâ nhehogueguylimo; kurâ ekudo, konopio ekudo, onwâgâ ârahujini ekudo warâ kulâ nhehogueguylimo. “Deus merâ” tâkeze tyngapygueduomo.

<sup>24</sup> Tynremypyramo awyly tientuo myakâwândy Deus aguely: “Auguehobyry lelâ aniempyra awylymogue, tâwâlâ inakai, kywypado warâ adiendyse tato aniendoâmo. Adâitobyry aralâ ise âsebywadylymo” kely. Awylygue mawânkâ akaemo toenzepa kywypado tagonro agâ anhedylymo. <sup>25</sup> Deus idânârâ tâlânro modo xugunipyry tâise nhehogueguylomo. Aypa olâ, tâwâlâ tyngatyby modo kulâ nhehoguedylymo. Iozeno Deus agueho neinwâmpyramo, iozepaom tyeinwântoem. Deus mawânkâ aunloenlâ tohoguezeim kuru.

<sup>26</sup> Arâ aidylymogue myakâwâm Deusram ododokeolymo. Aguely myakâwâm: “Tâwâlâ kywypado, tywykeim warâ adiendyse tato aniendoâmo. Âdaitobyry arâlâ ise âsebywadylymo” kely. Awylygue kywypado anhedylymo. Pekodo modo, uguondo lelâ waypa nhynanâguylomo; pekodo, pekodo agâ kulâ idyly. <sup>27</sup> Kywypado adyese lâpylâ uguondo modo. Uguondo, uguondo agâ kulâ idyly warâ. Peto ehoru nhântânr̄ emyen-rope ioday-ro waunlo ara akaemo. Awylygue pekodo lelâ waypa nhynanâguylomo awyly. Kywypado kulâ anhekylomo; todo kulâ olâ inakanhe nhekylomo. Arâ adâidylmogue tâwâlâ tâsenagazedo kulâ ise anhekylomo. Ewâmasemo mawânkâ inakai adientyby wâgâ.

<sup>28</sup> “Tuândy lelâ Deus wâgâ tiuntudizedo; kyzenanânehonre mâkâ” kelymo. Aituo Deus âdakepa idyly: “Tâwâlâ kywypado, inakai kehoem adiendyse tato aniendoâmo. Adâitobyry aralâ ise âsebywadylymo” kely. <sup>29</sup> Toenzepa lelâlâ inakaigumo. Toenzepa inakanhe adâito timodyzebam. Pymâ domodo, Deus warâ aiedyseba ato adiendysem. Toenzepa âdyem tâidysemo. Tâdâtyzedly kelymo. Tâdâdyâly kelymo. Iduekumo; aunlolâ âjihogulymo. Iozepa aguelymo, konokudylymo. Inepa kehoem iewiâpadylomo adâkely einwântânr̄ modo agâ. Åkelomo kulâ nhoraguekylymo, tynynonro keba kulâ âtynanâdomo. <sup>30</sup> Åkelomo nhunâguedylymo. Âdaunloenlâ Deus izepamo. Inwykelymo, tyewiâse lelâ tâjitanru in-hogulymo. Sawoem idylymo. Tywâgâ toenzepa aguelymo; “Tutuzeim xina” kelymo. Toenzepa inakai adienkyly wâgâ kulâ âpaunzedlymo. Tunwym, tyze warâ aguely neinwâmpyramo. <sup>31</sup> Koendonro tiuntudyzebamo; koendonro watay, xurâmoem inakai; inakai pylâ xurâmoem koendonro-ro warâ. “Aiese urâ” tâkehobyry aniempyramo. Ânguy izetonro kebamo. Turâem inakanhe aityby nenanânehombamo, tâpeânzemo. Ânguy nityembyramo. <sup>32</sup> “Arâ kulâ aitaynrim modo âsenagazeze. Tyigueduo, ydâ iwaguemo ise” keypyem, Deus awyly tutuzemolâ. Arâlâ olâ, Deus izepa ato aiedyly nimopa awylymo. Adâito ara âkelo modo aituo iomarumo lelâ.

## 2

### Izepa tato aieni modo enagazenehonze Deus

<sup>1</sup> Âmaemo xirâ kâinweniby itainrim modo, “Inakai aieni modo tâwâlâ nâsenagazedâmo” tâkeze wâne âmaemo. “Tâwâlâ nâsenagazedâmo” mygueduomo, inwentâdomo lâpylâ olâ amyguehomo, earamo lâpylâ mawylymogue. Akaemo inakanhe aito araba wâne ilema-ro. <sup>2</sup> Izepa tato aieni modo nhenagazenehonduo, tutuze kurâ, Deus iozeno lelâ aieni awyly. <sup>3</sup> “Akaemo inakanhe aito ara ini modo akaemo alelâ ise Deus nhewentâguyl. Urâma ise kâsenagazebyra” tâkeze âmaemo. Tâdâsenagazedo amayumba mâsemagueba olâ ise âmaemo, Deus mâinwâmpyra matomobyry wâgâ. <sup>4</sup> “Izepa wato anhedylymogue kulâ inepa kehoem kâenagazenehonlymo witaymba ise urâ” keypyem Deus. Awylygue mawânkâ mâkâ agâmo koendâ awyly, alâ kulâ newiâpabyra awyly warâ, izepa ato amânhetuomo. Arâ awyly, xurâem modopâdomoem, inakanhe amitomobyry wâgâ mâtityendylymo mawânkâ ize ato, amânhepyra midylymo-ro warâ. Âmaemo olâ mâtuntubamo, âdaitoem Deus inepa inagazenehombamo awyly. Awylygue amyguelymo: “Deus izepa ato aguyjiesezene lelâ; kângazenehomba awylylâ ise mâkâ” myguelymo.

<sup>5</sup> Toenze kulâ tâeganeim keba olâ âmaemo. Izewenrymo Deus izepa ato aiedyly mânmodyzeba âmaemo. Inakanhe amisezedylymogue, mâsenagazedomo imâem mânhesizedylymolâ. Xypyry etay, âdaunloem kydawyly Deus nhetay, ioze lelâ ise mâkâ aidyly, tâinwântânrybyry modo nhenagazenehonly, tynynonro modoram ise koendonro nhuduly warâ. <sup>6</sup> Onro anaym aguitobyry ara, aguykehobypy ara warâ ise kydâsebywadyly. <sup>7</sup> Tâlâ Deus ize ato aiedyly imodânry modo. Mâkâ aguehobypy tiankadyze inkâbamo. Iweloem tâitondyly ize atomo, imâem Jesus Cristo ara tâitomoem. “Koendonro âmaemo” tâkehonduzemo Deusram. Deus tâmakedyzemo, typygueba kehoem eagâ tâitomoem. <sup>8</sup> Tâlâ olâ Deus ize ato adiendysebaom modo. Deus itaumbypy âkealonro tyeinwândyse inkâbamo. Adiendyse tato kulâ anhekylymo; adienkyly Deus ize, izepa warâ awyly tiuntudyzemo inkâba. Arâ kulâ aitaynrim modo agâ tyewiâseba nitaymba Deus, enagazenehonzemo-ro warâ.

<sup>9</sup> Idânârâ adâkehobypy sakaniubyry modo enagazenehonze Deus. Adahulizemo, âjityenzemo warâ, judeu domodo, judeu keba modo alelâ. <sup>10</sup> Tâinwânni modo xurâem olâ ise Deus nhuduly ehogumo, iomarumo, ekobyzeguelymo warâ, Jesus Cristo ara itomoem, judeu, judeu keba alelâ. <sup>11</sup> Âzekiba lelâ mawânkâ Deus idânârâ nhedyly, âkeloem mâkâ nhedyly, mâkâ âkeloem warâpa.

<sup>12</sup> Deus, Moisésram tâzezewenry inwenien-hoymby lâpeba judeu keba modo. Alâ olâ ise Jesus einwântânry watay, aunloenlâ Deus agâpa âiehol. Judeu domodoma mâtâ tâzezewenry iwenibybe. Alâpylâ ise Moisés inweniby nhakadomobypy wâgâ Jesus einwântânry watay, aunloenlâ ise Deus agâpa âiehol warâ. <sup>13</sup> Aguely idadyly kulâ âdy mâkeba Deus xurâem. Ize ato aiedyly koendonro kuru. Arâ mawânkâ kâwentâbyra awyly, aguely.

<sup>14</sup> Judeu domodo ezewenry inweniby nâduduopa myakâwâm judeu keba modoram. Arâlâ olâ agui akaemo ewy âwâlâ anhedylymo Deus ize ato. Nhangahu odaylâ mâtâ tâzezewenry iwenibyem awyly-ro waunlo ara, Deus ize ato nhutuhomoem, tywenizebalâ. <sup>15</sup> Idânârâ kurutobyry kuodaxi ienipyryem Deus. Deus ezewenry iweniby pebaom modo Deus ize ato anhetuo, tânehonzemo, mâkâ aguehobypy tutuze tawyly. Aidylmolâ mawânrâ enehoim. Akaemolâ xutuim, âdara Deus ize ato adiendyly awyly, aniempyra tawyly warâ. <sup>16</sup> Idânârâ aguentaymby modo, kyangahu oday kunâgobypy modo warâ xutuze Deus. Xypyry etay, âdaunloem kydawyly Deus nhetuo ise aguitobyry, aguykehobypy warâ Cristo Jesus wâgâlâ kydâsebywadoem, Deus anhenehonly, koendonro, inakai alelâ. Xirâ inanry unâ iwâkuru tâdâsemagueho kâengatuday, augueho.

### *Judeu domodo ezewenry Deus Moisésram inwenien-hoymby*

<sup>17</sup> Âmaemo judeu domodo, tohomaenze âmaemo. “Xina iDeusryma Deus lelâlâ. Deus xurâem koendonro xina, xina idamudoram lelâ mawânkâ myakâwândy tâzezewenry nhuduly” tâkeze âmaemo. <sup>18</sup> Âdara Deus ize awyly tutuze mawylymo, âdy iozeno, iozepaom warâ awyly, tâzezewenry Moisés inwenibygue tâsenomedâze mawylymogue.

<sup>19</sup> “Judeu keba modo Deus itaumbypy nutuwâbyra. Xina lelâ koendâ xuturim. Epy sakobâni emyenro xina, iamu odano iajimanâni, iajinu emyenro warâ xina” tâkeze âmaemo. <sup>20</sup> “Xina lelâ Deus itaumbypy xutudânry modo enomedâni. Xina lelâ iamudo ara âdy xutudânry modo enomedâni. Deus xinaem tâzewanry inwenibybe tawylygue, idânârâ tutuze xina, mâkâ wâgâ tutuze xina, iozeno lelâ-ro warâ” tâkeze âmaemo. <sup>21</sup> Âkelo modo turuse âmaemo; âwâlâ mâturubyra olâ âmaemo. “Iwâkuru keba tâzemagaguy” myguelymo âmaemolâ tâmagazeim. <sup>22</sup> “Eagâ mohogün-homobypy lelâ xynanâdaungâ” tâkeze âmaemo. Âmaemolâ eagâ mohogün-homobypy keba kulâ xynanâni. “Deus lelâ xina nhehogueguyl; ekudyby modo etyguedyly tumoze xina” tâkeze âmaemo. Agueypyenlâ xygahudâdyby modo ehoguedo âtâ odaji igawândylymo, xurâem satyby

modo māenmagazedylymo. Awârâ arâ amidylymo, xygatyby modo ehoguedyly māinmopa mawylymo tânehonze.

<sup>23</sup> “Xina idamudoram lelâ Deus tâzewenry nhuduly” tâkeze âmaemo. Tâzezewenry agueho ara amipyra olâ âmaemo. Arâ kulâ amidylymogue, Deus âwankuem âiehol yeynynâbaom modoram. <sup>24</sup> Deus itaumbyry awo wâgâ iwenibyem: “Inakanhe amidylymo tientuo, judeu keba modo Deus âwankuem nhedylymo, itaumbyry âdyem nipyra waunlo ara tyenehonzeremo mawânkâ” kely iwenibyem.

<sup>25</sup> Deus, Moisésram tâzezewenry inwenien-hoymby ara lelâ judeu domodo aidylymo watay lelâ judeuem awyly xutuhogue satâly koendâ awyly. Koendonro anhekyly wâgâ mawânkâ nhenehonly, Deus xurâ tawyly. Mârâ tâzezewenry Deus inwenien-hoymby ara lelâ anipyra-ro watay, adatâoly kulâ mâkâ. Judeu domodo xutuhogue satâbyem lelâlâ wâne, inakanhe kulâ aito olâ tânehonze Deus xurâ keba awyly. <sup>26</sup> Judeu domodo ara tatâduneba judeu keba modo. Deus aguehobyrara anhedylymo watay olâ satâby modo ara lelâ Deus xurâem awylymo. <sup>27</sup> Awylygue ise judeu keba modo aguely: “Deus xurâ modo xutuho peba, judeu domodo ezewenrymo iweniby peba warâ lelâlâ wâne xina, Deus aguehobyrara lelâ olâ xina aidyly. Satâbyem lelâlâ wâne, judeu domodo ezewenry iwenibybe warâmo wâne, Deus aguehobyraniempyramo olâ. Awylygue ise âzenagazedylymo” kelymo.

<sup>28</sup> Judeuem kuru tadawyly Deus xurâem kuru tâjidyly warâ, Deus einwântuo lelâ. Ilery ety iopiry satâbyem lelâlâ wâne judeu domodo, Deus neinwâmpyramo watay olâ, adatâoly kulâ. <sup>29</sup> Deus xurâ modo kuru mâkâ iweloem ietyby, saguhobyrara anipyra waunlo. Tuoday Deus xurâem Deus Ispiritury iweloem nhetybyem warâ tawyly xuturim. Ilery ety iopiry satâbyemba wâne Deus xurâem tawyly tutuze olâ waunlo. “Koendonro akaemo” tâkeze Deus. Idânârâ Deus einwânni modo xurâlâ, judeu, judeu keba alelâ.

### 3

<sup>1</sup> Tâlâ warâ tunâgueim tyangahu oday: “Idânârâ Jesus einwânni modo Deus xurâ lelâ watayma âdyem nitaymba judeuem, ilery ety iopiry satâbyem tadawyly-ro” keim.

<sup>2</sup> Âdyem nipyra nitaymba! Judeuem tadawyly koendonro lelâlâ. Waunroem kuru Deus itaumbyry egatuhobyrmyakâwândy judeu domodo idamudo. Deuslâ myakâwândy judeu keba modoram nhegatuhomoem aguenri. <sup>3</sup> “Tâlâ olâ myakâwândy judeu domodo idamudo ewy mâkâ aguehobyrara lelâ aitâny. Akaemo tâinwâmpyra atobyry wâgâ keanra Deus judeu domodo agâ koendâpa awyly” tâkeze keanra âmaemo. <sup>4</sup> Aypa olâ, aypa lelâlâ. Adienkylyem adâkehobyrara aiesezelâ Deus. Idânârâ onro anakonro modo konokudâ lelâ, Deus olâ konokuni keba! Deus itaumbyry awo wâgâ iwenibyem: “Deus, amygueduo idânârâ tutuzemo, âkealâ amyguely awyly. Inwentâdyzemo wâne, âdygue inwentâdo peba olâ âmâ. Koendonro lelâlâ idânârâ amânhekyly modo” warâ iwenibyem awyly.

<sup>5</sup> Aguehobyrkiankaduo, Deus kângazenehonly watay, toenzepa ise: “Iozelâ Deus aidyly, adâjitoobyry nhenagazedu” keim modo. Awylygue, tâlâ ise wakeim: “Inakanhe aguitobyry Deus tâgaenehonze watayma koendâ inkâba mâkâ kângazenehonly aguehobyrkiankaduo. Inakanhe aguitobyrygque lakuru mawânkâ ojomaeonly kuru” keimpe. Arâ mawânkâ kurâdo aguely. <sup>6</sup> Aypa olâ, aypa lelâlâ! Kewâdyly kulâ aguehomo. Koendonro keba mâkâ-ro watay, xirâ onro anaym aguitobyry modo wâgâ kâpywaniem nitaymbatâise xypyry etay.

<sup>7</sup> Ângylâ wâne keanra warâ tunâgue: “Uguewâdyly kulâ watay, idani modo aguezemo: ‘Kewâdyly kulâ awâkâ, Deus olâ âkealâ aguely, kewâdyly kulâ waypa. Koendonro Deus’ kezemo. Awylygue tâwâlâ kienokudylymo, Deus wâgâ koendâ aguehomoem. Arâ-ro

watay, koendâ inkâba Deus ienagazenehonly uguewâdyly kulâ-ro watay" tâkewâzemo keanra. <sup>8</sup> Tâlâ keanra: "Inakanhe aguine, Deus koendonro awyly xutuhoem" keim. Âdaunloenlâ arâ aguykewâbyra kine! Tâlâ arâ augueley egaeni modo, âdykâ arâ auguepa olâ urâ. Awârâ wâgâ nhewentâgueni modo âsenagazezemo, enagazedomo keho ara kehoem.

*Ânguy koendonro aieni lâpeba, idânârâ inakai aieni kurâ*

<sup>9</sup> Tâlâ keanra wakeim: "Judeu domodoma judeu keba modo takaze koendonro Deus xurâem?" keim. Aypa olâ! Idânârâ Deus aguehobyry sakaniubyryem lelâ kurâ. Aguiuentoem Deus aguehobyry takaze lelâ kurâ Idânârâ, judeu, judeu keba alelâ. <sup>10</sup> Warâ iwenibyem awyly Deus itaumbyry awo wâgâ:

"Idânârâ kurâ xirâ anano modo Deus aguehobyry sakaniubyryem lelâ;  
ânguy âdaitânrâ lâpeba!

<sup>11</sup> Ânguy âdy koendonro, inakai warâ awyly xutuim lâpeba kurâ.

Ânguy Deus koendâ tiuntudyzedonro lâpeba warâ.

<sup>12</sup> Idânârâ Deus tânanânehonzemo,  
mâkâ ânwa iozeno imyimbyry xuzatyby ara,  
arâ lâpylâ idânârâ Deus ize ato tiuntudyzeba awylymo.

Ânguy koendonro aieni lâpeba, ipa lelâlâ.

<sup>13</sup> Tâzeguepybyry etadâdyby enahungueduo, inwânrâ inakanhe kulâ,  
kywilupanâdâ kehoem, ânguy nhemaenlyemba, myara kehoem aguehomo in-  
akanhe awyly.

Tâdâsenogudly nimopamo.

Âgâu kâtobyry inakanhe kyetâ kyiguehoem kehoem,  
myara aguehomo inakanhe kyedyly.

<sup>14</sup> Toenzepa itanrumo iwyku;  
ânguy izepamo warâ.

Awylygue aunlolâ Deusram nhekazeedylymo, izepa tato modo nhenagazenehon-  
hoem.

<sup>15</sup> Tyewiâpadly-ro watay, inepa kânagazedylymo, kyâlymo warâ.

<sup>16</sup> Âdyam idâhomobyrydâ inakai adyesemo.

Tuomaruneim modo tuomareba tyenehonzemo;  
tytynwanânehonzemo inakanhe kyetâmo lelâlâ-ro warâ.

<sup>17</sup> Âdaunloenlâ Deus agâ koendâ tadalafil nutubamo, ize ato aiedly warâ.

<sup>18</sup> Deus âwankuem tyesemo, âdy Deus anhekyly tiuntudyzemo inkâba"  
warâ iwenibyem awyly Deus itaumbyry awo wâgâ.

<sup>19</sup> Tutuzelâ kurâ, idânârâ tâzezewenry Moisésram Deus inwenien-hoymby, judeu domodo nheinwântoem awyly. Itaumbyry tâlâ awyly, âdara aguidyse Deus awyly idânârâ kiuntuhoem. Ânguy olâ Deus ize ato aunlolâ anhedyly nipyra. Awylygue judeu, judeu keba alelâ âzenagazeoze Deusram neinwâmpyra atobyry wâgâ. <sup>20</sup> Mârâgue tâdâsemaguehoem inkâba myakâwândy Deus tâzezewenry Moisésram inwenien-honly. Mâkâ ize ato ara aguipyra kydawlykiuntuhoem myakâwândy inwenien-honly.

*Jesus kieinwântuo lelâ kydâsemaguely*

<sup>21-22</sup> Iwerâma Deus nutuen-ho tâwentâzeba kâento. Judeu domodo ezewenry Moisésram inwenien-hoymby Deus kâwentâbyra itoem anienehonzâbyra. Saguho tâzezewenry kintainlygue, saguhoem Deus itaumbyry egatuwâni modo inweniby kintainlygue tutuze kurâ, âdara Deus kâmakely awyly. Jesus Cristo nheinwântuo lelâ mawânkâ Deus idânârâ Jesus einwânni modo nhemakely, judeu, judeu keba alelâ. Deus xurâem idânârâ âzekiba lelâ kurâ.

<sup>23</sup> Idânârâ Deus izepa ato adyese lelâ warâ. Awylygue Jesus kieinwândyly iraynâ Deus koendonrodâ iwaguelâ kydawly. <sup>24</sup> Inakanhe aguitobyry xygakeze myakâwâm Cristo Jesus iguely. Awylygue Jesus kieinwântuo lelâ Deus tywykeba kâendyly, koendonro emakerin-emba kydawly umelâ. Kydâsemaguehoem âdy kiempywaguyly lâpeba. Jesus kâmakely, kâmakedye tawylyguelâ. <sup>25-26</sup> Deusmy aienehonwâm Jesus tunu tyapâze Jesus iguehoem, Deus agâpa kydâiehoba kitoem. Jesus iguely myakâwâm, inakai aguienkyl Deus nhygakehoem, Jesus kieinwântuo. “Inakanhe tadawyly ebyryem tâjiguely” kewânmy Deus. “Aiese urâ” tâkehobyry aiemâ. Kurâlâ tâise Deus ingueânehonly inakanhe aguitobyry wâgâ, Jesuslâ olâ myakâwâm kâtaybyay ingueânehonly. Saguhoem adâkely sakanibyry modo newentâbyra myakâwâm Deus, kâmakerin-em aguehobyry nigonopyra tawylygue. Iwerâ olâ, Jesus iguehobyry wâgâ saguhoem Deus einwânnipyry modo inakanhe aitobyry xygakeybyem awyly.

<sup>27</sup> Kurâem kruz wâgâ Cristo aitobyry wâgâ tâwentâguezeba Deus kâendyly, kydâsemaguehoem aguitobyry wâgâ inkâba. Mâkâ kieinwândylygue lelâ kydâsemaguely. Awylygue kywâgâ koendâ aguykeho lâpeba kurâ, kydâsemaguehoem. <sup>28</sup> Augueondyly. Deus tâwentâzeba kâendyly, Jesus Cristo kieinwândylyguelâ, judeu domodo ezewenryem inwenien-hoymby aguiendylygue inkâba. <sup>29</sup> Judeu domodo iDeusry kulelâ mâkeba Deus, judeu keba modo iDeusry alelâ.

<sup>30</sup> Tokalelâ Deus idânârâ xurâem. Deus xurâem, idânârâ Jesus einwânni modo inakanhembam, judeu, judeu keba alelâ. <sup>31</sup> Warâ olâ, “Jesus kieinwântuo lelâ kydâsemaguely awylygue, âdyem nitaymba judeu domodo ezewenry Moisésram Deus inwenien-hoymby” kykeba kine. Deus aguehobyry kieinwântuo, Moisés iweniby kiankadly mâkeba, Deuslâ mawânkâ myakâwândy inwenihoeum agueim.

## 4

### *Ewentâdo lâpeba Abraão Deus xurâem*

<sup>1-2</sup> Abraão-ro? Judeu domodo idamu myakâwândy mâkâ. Mâkâ myakâwândy waunroem kuru ilery ety iopiry tatâzeim. Awârâ wâgâpa olâ myakâwândy mâkâ tâwentâguezeba awyly, Deus xurâem. Awârâ wâgâ-ro watay, Abraão sawoem tise tâise: “Tâwentâzeba Deus iedyly, koendonro wawylygue” tâkeze tâise. Awârâ wâgâpa olâ myakâwândy Deus xurâem ewentâguedo peba awyly. <sup>3</sup> Iwenibyem Deus itaumbyry awo wâgâ: “Abraão enra Deus tainwâNSE. Nheinwândylygue, Deus xurâem ewentâguedo peba awyly” warâ iwenibyem awyly.

<sup>4</sup> Kydâsewanily-ro watay, xuduly mâkeba mâtâ kydâzepywaoho. Kâwanopyry ebyrylâ kienmakely. <sup>5</sup> Deus emaymba kienmakely olâ tâbygueim keba. Koendâ aguientyby wâgâ inkâba Deus tâwentâgueba kâendyly, Jesus kieinwântuo lelâ. <sup>6</sup> Arâlâ myakâwândy Davi aguely adienkyly wâgâba tâmakely Deus einwânni modo iomaru wâgâ. <sup>7</sup> Aguely myakâwândy:

“Tuomareim mâkâ, inakanhe aitobyry Deus nhygakeyby, nhenanânehoymby warâ.

<sup>8</sup> Tuomareim mâkâ,

‘Âdy inwentâguedo lâpeba âmâ’ Kywymâry keho”  
warâ myakâwândy Davi inwenily.

<sup>9</sup> Judeu domodo satâhobyry ara satâwâdyby modo lelâ wânkâ tuomareim, kykely? Ainkâba! Tatâzenry modo Jesus einwânni tuomaremo lâpylâ. Iwenibyem mawânrâ Deus itaumbyry awo wâgâ: “Abraão Deus tainwâNSE awylygue myakâwândy, ‘Âdy inwentâguedo lâpeba âmâ’ kehonly Deusram” warâ iwenibyem awyly. <sup>10</sup> Deus mâkâ tâwentâzeba awyly nhedyly myakâwândy satâly iraynâlâ. <sup>11</sup> Deus nhewentâguedo peba aguepygueduo myakâwândy Abraão satâly-ro warâ. Nheinwândylygue myakâwândy mâkâ adatâoly. Arâ tadtâoduo, tânehonze myakâwândy Deus tainwâNSE lelâ tawyly. Arâ

awylygue judeu keba modo idamuem lâpylâ awyly, Deus tâinwânse mawânkâ akaemo. Tâwentâguezebamô-ro warâ nadatâobamolâ, tadtâly iraynâlâ Abraão nheinwântobyry ara.

<sup>12</sup> Alâpylâ judeu domodo Jesus nheinwândylymo watay, tâwentâgueduneba akaemo Deus xurâem. Âdygue tâwentâguezeba awyly aguehoymbyenmo, Jesus nheinwântomobyry wâgâ, satâbyjem awylymogue inkâba. Abraão akaemo idamuem awyly, eara satâbyjem awylymogue inkâba, mâkâ Deus nheinwântobyry ara, nheinwântomobyry wâgâ.

### *Deus, “Xuduze urâ” kehobyry kienmakely, kieinwântuo lelâ*

<sup>13</sup> Iweâpalâ myakâwândy Deus aguely Abraâoram: “Koendâ ise agâ wawyly. Tâinkânrô modo lelâba iwaunroru ise âmâ. Pymâem ise lâpylâ âweompyrydo warâ” kely. Deus, Abraâoram arâ aguely myakâwândy, Deus nheinwântobyry wâgâ, âdygue tâwentâguezeba awyly wâgâ warâ, Moisés tâzezewenry inweniby ara aidylygue inkâba. <sup>14</sup> Judeu domodo ezewenry einwântaynrim modo lelâ Deus aguehobyry emakeim watayma iguely kulâ myakâwâm Jesus-ro. Ânguy Deus tâzezewenry aguehobyry idânârâ kehoem aieni peba mawânkâ. <sup>15</sup> Tâzezewenryem adâkehobyry aietânrâ modo enagazenehonze. Deus mâtâ tâzezewenry Moisésram niweniehomba-ro watay, kiuntuwâbyra tâise kurâ mâkâ izepa ato adyese kydawly. Kurupyra Deus-ro watay, “Auguehobyry mankadlymo awârâ” kewâpyra tâise mâkâ kyam.

<sup>16</sup> Koendoro Deus. Awylygue myakâwândy Abraâoram aguely: “Koendâ ise agâ wawyly” kely. Adienkylyem adâkehobyry adyese lelâlâ Deus. Abraâoram lelâba, idânârâ tâinwânni modoram, koendoro modo xuduze Deus, judeu domodoram, judeu keba modoram alelâ. Deus tâinwânse myakâwândy Abraão, tâinwânse lâpylâ kurâ. Aituo Deus xurâem, idânârâ kurâ Jesus einwânni modo Abraão iweryypyry lelâ kurâ, eara satâby, tatâzenry alelâ. <sup>17</sup> Abraão wâgâ iwenibyem Deus itaumbypyry awo wâgâ: “Toenzepa kurâdo âkelo modo ‘Tako’ keze âyam” kely iwenibyem. Deus, aurlolâ adâkehobyry ara lelâ aidyly. Deuslâ myakâwândy Abraão nheinwânyly kuru. Mâkâ mawânkâ igueypy modo kurâem ietonî, saguhoem ipaombyry modo tâlâ ienehoimbyry warâ. <sup>18</sup> Deus einwânszelâ myakâwândy Abraão. Deus aise kehobyry anipyra awyly umelâ, Deus aguehobyry einwândyly nimopa myakâwândy mâkâ. “Toenzepa ise âepadyly. Toenzepa âweompyry iepanânehonze urâ” kewândymy Deus mâkâna. Neinwâmpyra nipyra myakâwândy Abraão, tymezely tynwânwânse myakâwândy, agaityon-em tawyly umelâ.

<sup>19</sup> Cem anu ioseaji myakâwândy Abraão. Âpaunzedly myakâwândy: “Agaityon-em urâ, ymezehoem. Ywydy Sara adamyim keba, aripiem warâ” kely. Deus aguehobyry ara aise awyly tâinwânszeze olâ myakâwândy. <sup>20</sup> Deus einwândyly âdaunloenlâ inmoly nitaymba myakâwândy. Adâkehobyry aieniem Deus awyly tâinwânszelâ myakâwândy. Nheinwânto imâem isezedly lakuru. Deus koendoroem awyly wâgâ, eon-honru wâgâ warâ adâkely nimopa myakâwândy. <sup>21</sup> “Tutuze urâ, Deus kymezehoem aienehonze awyly, aguehobyry ara” adâkely nimopa mykâinane tywydy agâ. <sup>22</sup> Einwândyly nimopa myakâwândy, adâkehobyry aieniem Deus awyly tiuntulygue. Arâ awylygue Deus xurâem ewentâguedo peba myakâwândy mâkâ. <sup>23</sup> Warâ Deus itaumbypyry awo wâgâ iwenibyem awyly: “Urâem, âdy inwentâguedo lâpeba âmâ” kewândymy Deus, Abraâoram kulelâ inkâba Deus aguely.

<sup>24</sup> Kyam lâpylâ myakâwândy aguely kiuntuhoem. Tâinwândylygue myakâwândy Deus mâkâ tâwentâguezeba awyly nhedyly, arâ lâpylâ mâkâ tâwentâguezeba kâendly, Jesus kieinwândylygue. Kywymâry Jesus igueduo kurâem ietonibyrlâ Deus. <sup>25</sup> Arâ aitoem agueypyenlâ myani Deus, Jesus iguehoem inakanhe aguitobyry xygakehoem. Deus, Jesus igueduo, kurâem tyenehondonze myani, tâwentâguezeba xurâem kydawly tienehonhoem.

## 5

*Deus xurâem, kâwentâguedo lâpeba*

<sup>1</sup> Tâwentâgueduneba Deus kâendyly iwerâ, Kywymâry Jesus Cristo tâinwânse kydawylygue. Saguhoem inakanhe kulâ kydawylygue Deusram kaintaymba akâwâm kurâ. Inakanhe kydawyly xygakeze Cristo kruz wâgâ aitobyry wâgâ olâ, Deus agâ iwaguepa ietybyem kydawyly; âdapa lelâ mâkâ agâ kydawyly. <sup>2</sup> Jesus einwânnipyryenlâ kurâ. Awylygue Deus agâpa tyeseba kydawyly. Jesus kurâem anhetyby wâgâ, Deus koendâ lelâ kâendyly, arâ tâensein-emba kydawyly umelâ. Kurâ kydohomaendyly, mâkâ agâ kidyly tutuze kydawylygue, eon-honru kiendyly ise warâ.

<sup>3</sup> Xirâ onro anaym kydawyly ara, mâkâ xurâ keba modo âwankuem kyetâmo, kânagazedâmo. Ton-honre lelâlâ wâne kurâem, tohomaenze lelâ olâ kienmaenly; kydâsenagazedyly odaylâma kiuntuzezedly âdara Jesus einwândyly awyly kinmopa kitodem kienmaen-hoem. <sup>4</sup> Einwândyly kinmopalâ kienmaenduo, kagâ tuomare Deus. Kagâ tuomare awylygue, “Xuduze urâ” kehobyry kienmakely kinwânwândyly. <sup>5</sup> Awârâ wâgâ kytynwâdaymba ise kurâ, adâkehobyry adyese lelâlâ mawânkâ Deus. Tyispiriturylâ Deus ingonokyly kagonroem, Deus toenzepa kywynedâ tutuen-honze mâkâ Ispiritury.

<sup>6</sup> Âwâlâ kydâsemaguehoem ton-honremba akâwâm kurâ. Awylygue Deus aitoem aguehobyry odaji ituo, Jesus Cristo kurâem iguely myakâwâm, koendonro keba kulâ aieni modoem. <sup>7-8</sup> Ânguy tâeganuneba kâzewenry einwânni etaybyay tyiguehoem. Tâlâ keanra tâise kurâ koendonro etaybyay igueze tâeganeim ilema-ro. Cristo olâ iguewâm inakai aieni modo etaybyaji. Toenzepa kywynedâ tawyly tienehon-hoem, Deus, Cristo tugonose myakâwâm kurâem iguehoem, izepa ato aguiendyly umelâ.

<sup>9</sup> Jesus Cristo tunu tyapâze, kurâem iguehobyry wâgâ, Deus tâwentâguezeba kâendyly. Awylygue ise xypyry etay Deus tynynâbaom modo nhenagazenehonday, kydâsemaguely, Cristo kurâem anhetyby wâgâ. <sup>10</sup> Deus iduery akâwâm kurâ, tataen-hoem kyetâ olâ akâwâm, tymery Jesus Cristo iguehobyry wâgâ. Iwerâ Deus eataen-hoem kydawylygue, âsemagueze kydawyly tutuze lelâ kurâ, Jesus mawânkâ kurâem tâitonze, igueypyemba iwerâ-ro warâ. <sup>11</sup> “Yataen-ho âmaemo, âwymârymo Jesus Cristo âmaemoem anhetyby wâgâ” tâkeze Deus kyam. Awylygue toenzepa kuomazely, koendâ Deus agâ kydawylygue.

*Adão ara Deus aguehobyry kiankadyly; Cristo wâgâ olâ kydâsemaguely*

<sup>12</sup> Adão myakâwândy waunro uguondo Deus aguehobyry sakani. Mâkâ arâ aitobyry wâgâ Deus izepa ato adyese lâpylâ kurâ idânârâ. “Auguehobyry sakanibyry modo idânârâ iguewâse” kewânmy Deus. Awylygue myakâwândy Adão iguely, kyiguely lâpylâ warâ, Deus izepa ato aieni kydawylygue. <sup>13</sup> Judeu domodo idamudo ezewenry inwenien-honly iraynâ, idânârâ xirâ anano modo Deus aguehobyry takazemo lelâ myakâwândy. Tâzewenry nhakadybymo wâgâ inkâba myakâwândy Deusram âzewentâolymo, mâtâ tâzezewenry Moisésram inwenien-hoymby peba mawânrâ myakâwândy ilâem. <sup>14</sup> Toenzepa myakâwândy kurâdo, toenzepa lelâlâ, Adão umenobryem, Moisés iazeho odaji. Idânârâ kehoenmy iguewâmo, Adão inakanhe aitobyry ara kehoem aitânry modo alelâ.

Âkelo myakâwândy Adão, Messias Deus ingonotyby agâ. Adão aitobyry wâgâ mawânrâ inakanhe tadarwly, ânguy nâseinwâmbyra awyly warâ adaguly. Jesus, Messias keho, anhetyby wâgâ einwânni modo âsemaguely adaguly. <sup>15</sup> Adão aitobyry emyenro mâkeba Kâmakeim Jesus Cristo aitobyry. Adão inakanhe aitobyry wâgâ iguein-em kydawyly. Jesus Cristo koendâ atobyry wâgâ, Deus xurâem, tâwentâguezeba Jesus einwânni modo awyly warâ. Inakanhe aitaynrim modo agâ koendâ lelâ Deus awylygue, tâbyguepalâ nhemakelymo. <sup>16</sup> Augueondyly. Adão aitobyry emyenro mâkeba Kâmakeim Jesus Cristo aitobyry. Adão tâinwâmpyra itobyry wâgâ, “Idânârâ tâwentâgueduneim modo lelâ” kewândymy Deus. Agui olâ Deus nhemakely modo, Jesus nheinwântuomo. Xirâ

mawânrâ Deus tâbyguepalâ kurâem anhekyly, emakerin-emba kydawyly umelâ, itaum-byryakanibyryem kydawylygue.

<sup>17</sup> Âkealâ xirâ, tokalâ uguondo, Adão, myakâwândy Deus aguehobyry sakani. Mâkâ aitobyry wâgâ mawânrâ tâjiguelly adaguly. Ânguy iguedâny lâpeba. Tokalâ uguondo, Jesus Cristo, aitobyry wâgâ olâ koendonro kienmakely, Awylygue mawânkâ Deus xurâem tâwentâguezeba Jesus einwânni modo awyly, tâbyguepalâ kâmakely warâ. Xurâ kydawylygue, aunloenlâ ise Deus agâ kydawyly, Jesus agâ ise pymâem kydawyly-ro warâ.

<sup>18</sup> Tokalâ uguondo, Adão, myakâwândy Deus aguehobyry sakani. Adão Deus neinwâmpyra atobyry wâgâ idânârâ tâzewentâoze lelâ kurâ. Deus xurâem, Adão iweompyry mawânkâ kurâ. Tokalâ uguondo olâ myakâwâm koendonro, ioze lelâ Deus xurâem aini, Jesus Cristolâ. Inakanhe aguitobyry epywaze Jesus iguehobyry wâgâ, inakanhe aguitobyry Deus xygakewâny. Deus xurâem, kâwentâguedo lâpeba kurâ. Kyigueduo Jesus agâlâ ise kurâ, âdaunloenlâ kydadaimpâ kitoem. <sup>19</sup> Tokalâ uguondo Deus neinwâmpyra atobyry wâgâ inakanhe tadalafil adaguly; iwerâ Deus izepa ato adyese lelâ kurâ idânârâ. Tokalâ uguondo Deus neinwântobyry wâgâ olâ tâwentâzeba Deus kâendyly, Jesus Cristo kurâem iguehobyry wâgâ.

<sup>20</sup> Adão pygueduo, iweâpa lelâlâ myakâwândy judeu domodo ezewenry Deus Moisésram inwenien-honly. Âdara Deus ize ato ara lelâ adâidly awyly inwenien-honly. Deus aguehobyry takazezemolâ olâ myakâwândy. Arâlâ olâ Deus koendâ awyly; imâem isezyedly tâmakezein-emba tutuzeim modo agâ. <sup>21</sup> Deus agueho kiankadyly kinmopa kydawylygue mawânrâ kyiguelly. Deus koendâ ato olâ iwâkuru kuru; kagâ koendâ lelâ olâ Deus, koendâ ato emakerin-emba kydawyly umelâ. Kywymâry Jesus Cristo inakanhe aguitobyry tygakeze, Deus xurâem tâwentâguezeba kitoem adyenehonze warâ. Awârâ wâgâ mawânrâ ise Deus agâ aunloenlâ kydawyly.

## 6

### *Jesus kieinwântuo, iweloem kydâiehondyly*

<sup>1</sup> Kagâ koendâ lelâ Deus, izepa ato aguiendly umelâ. Tâlâ keanra ânguylâ warâ tunâgueim: “Deus ize ato aguyjiesezene lelâ, imâem lelâlâ mâkâ kagâ koendâ awyly itoem” keim. <sup>2</sup> Arâ inkâba! Igueypy wâne xirâ anano modo wâgâ nâtynanâbyra, myara lâpylâ Deus ize atogue kulâ kydâtynanâdaymba kine. Nuduwâpyra, Deus aguehobyry kiankazezedoem.

<sup>3</sup> Batiza kydâiehoduo, kienehonly Cristo Jesus agâ tokaleoem kydawyly. Deus ize ato imoimbyryenlâ kurâ, igueypy xirâ anano modo imoho ara. Xirâ tutuzelâ âmaemo. <sup>4</sup> Jesus Cristo iguepygueduo, egueypybyry etadâdybyem awyly ume, kurâem tyetonze myakâwâm Kunwym Deus. Arâ lâpylâ Deus iweloem kyetondyly. Ize kydato, kyangahu oday kunâry warâ iweloem ietondybyem. Deus ize ato aguiendye kydawyly tumoze kurâ. Batiza kituo, iweloem ietaymbyem kurâ, kâzewenry saguhobyry imoimbyryem kydawyly tânehonze warâ.

<sup>5</sup> Jesus Cristo agâ tokaleoem kydawylygue, Cristo igueduo, kyiguelly lâpylâ waunlo ara. Cristo agâ on-hoam lelâ kydawylygue, kyigueduo kurâem kyetonze Deus, Jesus kurâem tientondobyry ara, mâkâ agâ aunloenlâ kitoem. <sup>6</sup> Cristo xurâem kidly iraynâ, Deus ize ato aiedly kinmowâbyra akâwâm kurâ. Inakai aguiendye kydato aguientoem aguykehonly waunlo ara, tâwaneim wâne tywymâry aguehobyry adyese lelâ myara, awârâ modo saimpyem olâ. Jesus agâlâ kruz wâgâ adainwâm. Awylygue iwerâ Deus aguehobyry kiankadyze kidly-ro watay, aguentaymba kine. <sup>7</sup> Igueypy Deus ize ato adiendye tawyly tumoze. Awylygue Deus ize ato aguentaymba kine.

<sup>8</sup> Cristo agâlâ igueypyem kydawyly-ro waunlo ara, mâkâ kurâem itondobyry wâgâ, mâkâ agâ on-hoam itybyem lâpylâ kurâ, âdaunloenlâ mâkâ agâpa kipyra kitoem. <sup>9</sup> Deus,

Cristo igueduo kurâem ietonmâmy. Adaunloenlâ nigueompyra ise-ro warâ. Ânguy âdaunloenlâ Jesus Cristo peba itoem anienehonwâbyra. <sup>10</sup> Inakanhe aguitobyry xygakeze myakâwâm Jesus iguely tokalelâ. Awylygue âdaitoem igueondyly nitaymba. Igueypyemba mâkâ iwerâ Deus ize ato aiesezelâ. <sup>11</sup> Igueypy xirâ anano modo wâgâ nâtynanâdaymba; ara lâpylâ, Cristo Jesus agâ igueypyem mawylymogue, âdydo imeom Deus izepa ato akâiedaundâ. Cristo agâ tokalelâ mawylymo. Deus emaryem, iomaeniem warâ.

<sup>12</sup> Deus izepa ato akâiedaundâ, amânhedyse mawylymo umelâ. Deus izepa ato aiedyly keba âuturimo nidâ. <sup>13</sup> Odomo ewy inakanhe amitomoem akâiedaundâ. Deusram âtuwâdaungâ, koendonro modo lelâ amânhetomoem. Iweloem ietondybyem âmaemo. Igueypy ara akâwâm âmaemo saguhoem, iwerâ olâ, Jesus mâinwântuomo, kurâem itondybyem âmaemo. <sup>14</sup> Deus xurâem, tâwentâgueduneba âmaemo iwerâ, Jesus mâinwândylymogue. Saguhoem tâzezewenry Moisésram inwenien-hoymby ara lelâ amidylymogue inkâba arâ mawylymo. Aituo Deus ize ato ara lelâ aguine iwerâ, kagâ koendonro mâkâ awylygue, koendâ ato emakerin-emba kydawly umelâ.

### *Deus xurâem kydawlylygue ize ato lelâ aguyjiene*

<sup>15</sup> Iwerâ ise-ro? Koendonro tawylygue Deus kâmakely, tâzezewenry ara aguidylygue inkâba. Arâ awylygue âdalâ kulâ aguidyly kitoemba lâpylâ olâ. <sup>16</sup> Tutuzelâ âmaemo, ânguyanlâ tâbyguepa tâwaneinhe mâtulymo watay, mâkâ xurâem mawylymolâ. Mâkâlâ ise âuturimo. Arâ lâpylâ Satanás aguehobyrty mâyinwântomoem emaxi mâtulymo-ro watay, âiguelymolâ ise ibyrymo. Deus aguehobyrty mâyinwântomoem emaxi mâtulymo watay olâ imakezemo ipywadomoem.

<sup>17</sup> Saguhoem Deus izepa ato amânhedyse matomo kulâ akâwâm amânhekylymo. Unâ iozeno, Jesus kieinwântuo tâdâsemaguely wâgâ agueim tydase olâ âmaemo, tâinwânlse ani âmaemo warâ. Egatuyby mâyindatomobyrty ara lelâ iwerâ amidyse mawylymo. Awylygue: "Koendonro lelâlâ âmâ, akaemo Roma donro modo âmâ xurâem mâyinhetobyrty wâgâ" xina kely inanry Deusram. <sup>18</sup> Deus imakelymo ani, saguhoem inakanhe amitomobyrty amânhepyra mitondomoem. Inakanhe tadalafilâ mâkeba âuturimo iwerâ. Deus xurâem âmaemo iwerâ, ize ato lelâ amânhetomoem. <sup>19</sup> Cristo xurâem midylymo iraynâ, Satanásram ani mâtulymo, "Aiekâ" kehobyrty amânhetomoem. Idânârâ odomo wogonro tâwanize ani âmaemo Deus izepa ato amânhetomoem. Inakanhe tadalafilâ ani âuturimo. Awylygue inakanhe amidyse matomo aralâ akâwâm amidylymo. Iwerâ olâ Deusram lelâ âtuwâdaungâ, "Aiekâ" kehobyrty amânhetomoem, iozeno, koendonro warâ amânhetomoem.

<sup>20</sup> Saguhoem inakanhe tadato âuturimo awyly ume, mâtynanâdaymba ani âmaemo koendonro modo wâgâ, Deus izepa ato kulâ ize matomo. <sup>21</sup> Inakanhe amitomobyrty âmaemoem koendonro nuduwâpyra ani, mârâ amitomobyrty tywypazeze âmaemo iwerâ. Mârâ ebyry tâjiguely lelâ, aunloenlâ Deus agâpâ tâjidly warâ. <sup>22</sup> Inakanhe tadalafilâ mâkeba âuturimo iwerâ. Deus izepa ato amânhedyse mawylymo mâyinmohomoem aietybyem. Jesus xurâem mitomoem Deus imakelymo, aguehobyrty aieniem. Emakeybyem mawylymogue, aunlolâ ise Deus agâ mawylymo; âdaunloenlâ eagâpâ tyetuneba ise âmaemo. <sup>23</sup> Inakanhe tadalafilâ epywado, tâjiguely; Deus nhuduly olâ aunloenlâ eagâ kydawly, Kywymâry Jesus Cristo agâ tokaleom kydawlylygue.

## 7

### *Deus kuturim, judeu domodo ezewenry iweniby mâkeba*

<sup>1</sup> Cristo eynynâ ypmâ domodo tâzezewenry inweniwâdyby tutuzelâ âmaemo. Kyiguepa kydawly ara kulâ mârâ tâzezewenry ara aguidyly. Kyigueduo olâ, mârâ tâzezewenry modo âdyem nipyra. <sup>2</sup> Pekodo ohogüimby wâgâ ise auguely, âdara Deus agâ kydawly wâgâ kâenomedâdo mâyuntuhomoem. Kâzewenry agueho ara, pekodo

ohogüimby iso xurâenlâ. Eagonro agâ tohogüin-hoem, mâkâ inmoly nitaymba. Tuso igueduoma tâwâlâ eagonro agâ ohogüinly, tâzezewenry nhakadyly keba mawânkâ. <sup>3</sup> Mâkâ pekodo, uguondo eagonroram âdynanâoly, tusonu umelâ watay olâ tâzezentâgueoze mâkâ, tâzezewenry iweniby wâgâ agueho ara. “Iso igueduo olâ tâwâlâ ohogüinly” tâkeze tâzezewenry iweniby. Arâ watay, eagonro agâ ohogüinduo, inakanhe idyly mâkeba.

<sup>4</sup> Mârâ tâzezewenry Moisésram inwenien-hoymby wâgâpa mâsemaguelymo awyly wâgâ ise iwerâ kâinwenily, âdara iweloem mitondylymo awyly mâuntuhomoe. Kyigue-duo, tâzezewenry amaymba tâise kurâ; arâ lâpylâ Jesus einwânniem kituo, tâzezewenry amaymba kidyly. Cristo agâ tokaleom kydawylygue, mâkâ agâlâ kydâdyly. Awylygue Cristo xurâ kurâ, igueypyem awyly ume, Deus kurâem nhetondyby. Iweloem kydâiehondyly myani, Deus aguiendyse ato aguentoem. <sup>5</sup> Iweloem tyeseba kydawyly ume, inakanhe aguidyly kulâ ani ize kydato. Tâzezewenry tydase ani kurâ, mânâ aguiendyseba ato aguiendyse lelâ olâ ani kurâ. Idânârâ kodo wogonrogue ani Deus izepa ato aguiendyly, Deus kintywanânehon-hoem. Tâjiguely awârâ nhuduly-ro warâ, se tâwiseim tâwilylâ nhuduho ara.

<sup>6</sup> Judeu domodo xurâem tâzezewenry inwenien-hoymby ani aiese kykewâdo saguhoem. Arâ Deus xurâem tâwentâguezeba kydawyly waunlo ara ani kânanaji, idânârâ mânâ aguentoem nudupa olâ ani. Toenzepa wâne ani kieinwândyse kydawyly, toenzepa lâpylâ olâ ani adyesenry aguiendyly. Iwerâ, kydâsemaguehoem, mânâ saguho tâzezewenry aguentaymba kurâ. Kâtadâdobyrydâ kydâzekâjigueoly waunlo ara. Cristo igueduo, kyiguely lâpylâ waunlo ara akâwâm. Tutuze kurâ, iwerâ Deus “Aiekâ” kehobyry aguiendyly, Deus Ispiritury aguentoem aguehobyry wâgâ.

### *Judeu domodo ezewenry wâgâ iwenihobyry*

<sup>7</sup> Tâlâ keanra warâ tunâgueim modo: “Arâ atayma judeu domodo ezewenryem, Moisésram inwenien-hoymby koendonro mâkeba-ro” keim. Arâ adâkezeba itaungâ! Koendonrolâ mânâ tâzezewenry. Mârâ peba-ro watay, kâuntuwâbyra tâise urâ, Deus izepa ato ara kulâ awidly awyly. Ywâgâlâ wâne auguely, idânârâ olâ inakai aguiendyly. Warâ tâzezewenry wâgâ iweniby: “Âkelomo xurâ tâlâ mawyse tâiseba ikâ” kely. Aguely peba-ro watay, kâuntuwâbyra tâise urâ, âkelo xurâpe widyse wituo, Deus izepa ato ara kulâ awidly awyly. <sup>8</sup> Xirâ kâenanâgueduo, âkelo isejiguy emyenrobe widyse tâise lâpylâ urâ. Inakai modo kulâ agânhedyse witoem adyese lâpylâ ani. Tâzezewenry peba-ro watay, awârâ kâuntuba lâpylâ tâise urâ; tâwentâguezeinhe kulâ tâise urâ.

<sup>9</sup> Deus xurâem uguondo koendonro urâ-ro waunlo ara ani ienanaji saguhoem. Tâzezewenry iweniby kâuntudo olâ ani Deus izepa ato ara kulâ awidly awyly kâuntuly. Deus aguehobyry takaze wawylygue, xurâem koendâpa wawyly tutuze ani urâ. <sup>10</sup> Deus xurâem iwague ani urâ, idânârâ tâzezewenry iweniby kâinwântoem nudupa awylygue. Aituo, Deusdâ iwaguepa yenehoin-em iweniby, mâkâ agâpa kâiehohoem adyenehonze ani. <sup>11</sup> Enokudyby urâ; tâzezewenry kâinwântuo, kâsemaguely waunlo ara ani ienanaji. Judeu domodo ezewenry inwenien-hoymby agueho ara awituo aunloenlâ Deus agâ widly, warâ ani yangahu oday unâry. Idânârâ kehoem mânâ tâzezewenry iweniby agânhepyra wawyly, tutuze olâ ani urâ. Tâjiguelygue, aunloenlâ eagâpa kydâieholy warâ mawânrâ Deus aguehobyry sakaduo ebyry.

<sup>12</sup> Deus, Moisésram judeu domodo ezewenry inwenien-hoymby olâ iozeno, Deuslâ mawânkâ xuduim, mâkâ lelâ mawânkâ iozeno. Iozeno, koendonro warâ mâkâ aguehobyry, Deus itaumbrylâ mawânrâ. <sup>13</sup> Aituo, tâlâ warâ keim: “Mârâ tâzezewenry inwenien-hoymby koendonroka Deus agâpa witoem aienehoim?” keim. Arâ inkâba! Kâinwâmpyra watobryrlâ Deus agâpa witoem aienehoim. Deus izepa ato agânhetuo, Deus aguehobyry kâenanâguely: “Xirâ akâiedâ. Awârâ akâiedâ” kehobyry. Arâ tâzezewenry

nhenanâguen-honly inakanhe awitayn-hobyry modo. Deus xurâem inakanhe kehoem kâinwâmpyra watobyry nhenanâguen-honly.

*Deus ize ato ara aguidyse kydawly umelâ, izepa ato aguiendyly*

<sup>14</sup> Tutuze kurâ, Tyispirityenlâ Deus, Moisésram tâzezewenry inwenien-honly awyly. Kurâ kulâ urâ; won-honruguelâ mâkâ koendonro agânhedyse ato agânhetaymba urâ. Tâwaneim, tywymâry aguehobyry adiendyseba tawyly umelâ, adyese. Arâ lâpylâ urâ, Deus izepa ato agânhedyseba wâne urâ, adyese olâ urâ. <sup>15</sup> Koendonro agânhepyra urâ-ro watay, âwâlâ inanry auguely: “Âdaituoka enra agânhedyse wato agânhepyra wawyly?” uguely. Deus izepa ato agânhedyly watay, âwâlâ inanry auguely: “Âdaituoka enra agânhedyseba wato agânhedyly?” uguely. <sup>16</sup> Deus aguehobyry kankadyly watay, âwâlâ inanry auguely: “Inakai kulâ awârâ agânhetyby awyly’ adâkeze Deus.” Deus itaumbyry iozeno, iozeno lelâlâ. <sup>17</sup> Urâlâ ize wawylygue inkâba, Deus izepa ato agânhedyly. Wodaylâ agânhedyse wawyly âtugudyly. Mârâlâ utunri-ro waunlo ara ayedlyly.

<sup>18</sup> Kurâ kulâ urâ; xirâ onro ananolâ urâ, inakai modo aieni urâ. Awylygue won-honruguelâ, koendonro agânhedyly wipyra wawyly. Agânhedyse wâne urâ, agânhetoem nudupa olâ. <sup>19</sup> Inakai agânhedyseba wato adyese urâ; koendonro agânhedyse wato olâ urâ agânhepyra. <sup>20</sup> Inakai agânhedyseba wato agânhedyly watay, tânehonze awârâ, won-honrugueba Deus izepa ato agânhedyly awyly. Wodaylâ Deus aguehobyry kankadyze wawyly âtugudyly, ize ato agânhepyra widyly-ro warâ.

<sup>21</sup> Tutuze urâ, arâ yagâ aidyly awyly. Koendonro agânhedyse wâne urâ, inakai aiedyly lelâ olâ kâuntuly. <sup>22</sup> Ize wato Deus tâzezewenry aguentoem inwenien-hoymby. <sup>23</sup> Agânhetoem Deus agueho ize wato, iweloem yetondâ mawânkâ mâkâ; iwelo modo iwerâ ize wato, yangahu oday unâgo warâ. Tâlâ olâ woday Deus aguehobyry arapa ayenehorim. Koendonro agânhedyse wato, inakanhe agânhedyse wato agâ woday âtuebadlymo-ro waunlo ara. Etadâdyby, kadeia oday tâeni ize ato anhekyly, ize tato mâkeba, arâ lâpylâ urâ, inakanhe awidyse urâ-ro watay, awidyseba wipyra urâ.

<sup>24</sup> Tuomareim mâkeba urâ! Âwâlâ inanry kadapâiguely: “Ânguy wânkâ ise Deus izepa ato aiedyly kâinmohoem aienehoim, yigueduo, âji tâdâsenagazedoam udâpa witoem?” uguely inanry. <sup>25</sup> Kywymâry Jesus Cristolâ mawânkâ kâmakeim! Inakanhe awidyse wato agânhepyra witoem won-hondâdâ mâkâ. Awylygue inanry, “Yagâ koendonro lelâlâ âmâ, Jesus Cristo anhekyly wâgâ” uguely Deusram.

Arâ urâ iwerâ. Toenzepa Deus ize ato agânhedyse wawyly. Jesus Cristo yagâpa-ro watay, Deus izepa ato lelâ tâise agânhekyly. Arâ lelâ olâ kurâ idânârâ.

## 8

*Deus Ispiritury Kuturim*

<sup>1</sup> Awylygue Cristo Jesus agâ tokaleom modo âdaunloenlâ Deusram ewentâdo peba awyly. <sup>2</sup> Cristo Jesus xurâem kidly iraynâ, Deusdâ iwague kydawly. Awylygue Deus izepa ato aiedyly kinmohoem nudupa awyly. Deus olâ kâmake. Iweâma Deus Ispiritury kagâlâ. Deus izepa ato aiedyly kinmohoem kon-honru tuduze mâkâ, Jesus Cristo agâ tokaleom ara itybyem kydawlygue. <sup>3</sup> Ton-honre Moisésram inwenien-hoymby idânârâ aguentoem. Awylygue mâtâ tâzezewenry wâgâ kulâ kydâsemaguehoem nudupa awyly. Deus lelâ ton-honreim, inakanhe aguitobyry xygakeze. Tymery Jesus Cristo igonomâ. Karalâ akâwâm iazely xirâ onro anaym. Kâmyenro lelâlâ wâne, âdaunloenlâ Deus izepa ato aniempyra olâ. Deus imery iguely myakâwâm, inakanhe aguitobyry xygakehoem. Inakanhe tadarwly emaym kurâ-ro waunlo ara akâwâm, mâkâ olâ inakanhe tadarwly emaymba kâmakedâ, Satanás “Aiekâ” kehobyry aguiempyra kitoem.

<sup>4</sup> Mâtâ iguely myakâwâm, Deus aguehobyry kiankabyra kitoem. Deus Ispiritury kurtobyry ara lelâ aguidyly iwerâ, ize kydato ara kulâ inkâba. Awylygue Deus aguehobyry

adyese lelâ kydawly. “Aikâ” kehobypy aralâ aguidyly. <sup>5</sup> Ize tato aralâ adâidysedo modoma mânânlâ âdutuolymo. Deus Ispiritury aguehobypy ara aini modo olâ mâkârlâ âdutuolymo. <sup>6</sup> Ize tato aralâ adâidysedonro modo aunloenlâ ise Deus agâpa âieholymo, igueduomo. Deus Ispirituryam âdutuoim olâ ise nadahulibamo, xurâmoem koendâpa awly umelâ. Tyigueduo Deus agâ isemo eydâ atodâ. <sup>7</sup> Ize tato aralâ adâidysedo modo Deus iduerylâ akaemo. Deus agueho neinwântaymbamo; mâkâ ize ato aiedyly nutubamo lelâlâ. <sup>8</sup> Ize tato aralâ adâidysedo modo Deus niomazeândaymba; nuduwâpyra Deus ize ato ara aitomoem.

<sup>9</sup> Âmaemo olâ aunlo keba. Agâmolâ kuru Deus Ispiritury-ro watay, amânhetomoem aguehobypy adyese âmaemo. Inakanhe amidyse matomo amânhetaymba âmaemo. Deus Ispiritury agâpaom, Cristo xurâ mâkeba. <sup>10</sup> Cristo agâmo awylygue, iweloem ietondybyem mawylymo, âdaunloenlâ Deus agâpa mâiehoba mitomoem. Iguezé âmaemo inakanhe amitomobypy wâgâ. Arâlâ olâ ise Deus agâpa tyeseba mawylymo. Târâ Deus eydâ atodâ, kurâem âenehondonzemo Deus Ispiritury, Deus xurâem, âdy inwentâguedomo peba mawânrâ. <sup>11</sup> Deus Ispiritury, Jesus Cristo igueypyem awly ume, kurâem itondoem adyese myakâwâm, tâkanâdobyrydâba egasehoem. Arâ lâpylâ, mâkâ kieinwândyly watay, xypyry etay kurâem kitondoem aiese mâkâ, kâpyâdobyrydâpa kâgasehoem. Tyispiritury agonromoguelâ ise Deus awârâ anhedyly.

<sup>12</sup> Cristo eynynâ ypemugudo, ize kydato ara inkâba kine. <sup>13</sup> Ize kydato aralâ aguidyly-ro watay, kyigueduo ise eagâpa kydawly. Deus Ispiritury kagâlâ awylygue, mâkâ izepa ato aiedyly kinmoly-ro watay olâ âdaunloenlâ Deus agâpa kydâiehoba ise kurâ, xirâ onro anaym kydatay, kyigueduo alelâ.

<sup>14</sup> Deus Ispirituryam âdutuoim Deus imerylâ. <sup>15</sup> Saguhoem Deus aguehobypy aiese kykewâdyly, kângazenehonly kiyntadylygue kulâ. Tâwaneim, tângazezeba tâitoem tywymâry aguehobypy aieni ara kulâ ani kurâ. Iwerâ olâ âwâlâ kyenehorimbyryem Deus Ispiritury; saguhobypy ara inkâba kurâ iwerâ. Deus Tyispiritury ingonotyby kagâlâ awylygue, tyanunepa kurâ. Tutuzema kurâ, inakanhe aguituo kydâsemaguehobe awly; aunloenlâ Deus kângazenehomba awly warâ. Deus Ispiritury kyam tutuen-honze, Deus imery kydawly. Awlygue, Deus agâ aguykeday, “Kunwym” kykely.

<sup>16</sup> Deus imeryem kydawly, tutuze kurâ, mâkâ Ispiriturylâ mawânkâ awârâ xutuenhoim; “Âkealâ” tâkeze mâkâ. <sup>17</sup> Deus imery kydawlygue ise, tynynonro modoem nhekanâdyby kienmakely. Cristo agâlâ ise koendonrope kidly. Xirâ onro anaym kydawly ara, Deus xurâ keba modo kângazezemo, Cristo tienagazedobyry ara. Cristo pymâem awly ume, âdyren-honly ume warâ, pymâem ise, âdyren-honze warâ lâpylâ olâ kurâ mâkâ agâlâ.

### *Deusram kytâduo ise kuomaru kuru*

<sup>18</sup> Inakanhe lelâlâ wâne, tarâ onro anaym kydâsenagazedyly, sakani kulâ olâ awârâ. Târâ Deus eydâ kydawly ume, kurâem aini olâ ise sakani keba, typygueim keba warâ. Kydâsenagazedaymba ise kurâ târâ. <sup>19</sup> Idânârâ Deus nhugutaymba modo tynwânwâne xypyry etay Deus tynynonro modo nhutuen-honly. <sup>20</sup> Adaguday, idânârâ koendâ lelâ myakâwândy. Ilâpyryem olâ idânârâ tâlânro modo inakanhe isezydly. Idânârâ iguewâdyly. Âwâlâ kulâ inkâba arâ aidyly, arâlâ Deus aguehobypy awlygue, waunroem xugutyby iso, iwydy warâ mâkâ itaumbyry nhakabygueduolâ. Awlygue, idânârâ iweloem tyedyly inwânwândyly.

<sup>21</sup> Idânârâ xirâ onro anano modo inakanhe itaynly iwerâ; iguezemo, iwânzezemo warâ. Xypyry etay, tynynonro modo, idânârâ tiungutaymba modo warâ iweloem ienehonze Deus. Mâkâ ize ato ara lelâ ise akaemo, âdaunloenlâ inakanhe nipyra tâitomoem, niguepa, niwânzepa warâ tâitomoem. <sup>22</sup> Idânârâ xirâ onro anano modo tâsenagazeze, iweloem tyetondyly enuenze, pekodo tymery iazely tienueyday saenlu wâne myara. <sup>23</sup> Awârâ

modo kulelâba ise iweloem tyeseim. Kurâ idânârâ koendonro “Xuduze urâ” kehobyry emakeze kydawly kiuntuhoem Deus Ispiritury ingonotobyry modo tynwânwânse lâpylâ kurâ. Toenzepa iweloem kydâieholo kinwânwândyly mâtâ kodo âdaunloenlâ iguedânrygue. Kuodaylâ kydâpyneândyly, inepa kehoem aidyse.

<sup>24</sup> Inakanhe aguitobyry, Jesus kieinwântuo, xygakeinhe Deus awyly tynwânwânse ani kurâ, awylygue mâtâ kâmakely. Kâmakely tainwânse lelâlâ wâne kurâ, awârâ âdypygueândyly kuru olâ ise xypyry etay, kodo iwelo âdaunloenlâ adaindânrygue iweloem kydâiehoduo. Awârâ mawânrâ kinwânwânyly. Iwerâ tâlâ kydato kinwânwântaymba kurâ. <sup>25</sup> Kinwânwânsezedyly lakuru olâ iweloem kydâieholo. Tâmaenze kurâ, emakeze kydawly kieinwândyly kinmopalâ Deus aguehobyry.

<sup>26</sup> Deus agâ aguykely kiuntuba kurâ-ro watay, Deus Ispiritury kagâlâ konomedâze, aguykely kiuntuhoem. Kunwyn-am kytaumbypy nhadyly; tutuzenryem kehoem eagâ aguely. <sup>27</sup> Âdy Deus ize ato tutuze Deus Ispiritury. Awylygue, Deus xurâ modo eynynâ eagâ agueduo, Deus ize ato aralâ nhekadyly.

<sup>28</sup> Idânârâ tinwyneguyly modo xurâem koendonro modo, inakai modo alelâ koendâ itoenlâ Deus anhenehonly, ize ato anhentomoem ingâsedby awylygue. <sup>29</sup> Onro tiungudyly iraynâlâ myakâwândy Deus ânguy, ânguy warâ tynynonroem ini modo nhutuly. Akaemo tuduakeze myakâwândy. “Ymery Jesus Cristo ara koendonroem itomoem igâseze urâ. Iwaigorumo ise mâtâ, kâindukewâdyby modo ise iukonodo, eaundudo warâ-ro” kewândymy Deus. <sup>30</sup> Tinduakewâdyby modo Deus tynynonroem igâsemâ. Ingâsedlymo kulâ warâpa olâ, turâem ewentâguedomo peba tyenehonze lâpylâ myakâwâm Deus. Tâwentâguezeba nhedlymo kulelâ mâkeba myakâwâm; xypyry etay Deus imery agâ kynroem, koendâ kitoem warâ aiemâ lâpylâ mâtâ.

### *Cristo wâgâ Deus kywynedly*

<sup>31</sup> Deus Ispiritury kagâlâ awyly kiuntulygue, xypyry etay inakanhe tadawyly wâgâ kâwentâguebyra Deus itoem, kydadahuliwâbyra kurâ. Kynynâ Deus awylygue, ânguy âda kyetaymba ise. <sup>32</sup> Tymery Jesus Cristo âsenagazedyly nimanâbyra myakâwâm Deus. Âsenagazedoem, kruz wâgâ iguehoem warâ adyenehonze lelâ myakâwâm mâtâ, kurâ idânârâ mâtâ einwânni modo mâtâ agâpa kydâiehoba kitoem. Toenzepa kywynedlygue myakâwâm Deus tymery kywâgâ iguehoem ingonodyly; tainwânseim kuru koendonro kyam nhuduly adâkehobyry ara.

<sup>33</sup> Kurâ Deus induakewâdyby modo ânguy kâwentâguedaymba ise. Tâwentâguezeba kydawly wâgâ adâkeze Deus, mâtâlâ mawânkâ inakanhe aguitobyry xygakeim. <sup>34</sup> Cristo Jesus iguely myakâwâm, inakanhe aguitobyry xygakehoem. Tyigueduo, kurâem tâitonze myakâwâm. Igueypyem inkâba iwerâ. Kunwym Deus ezay mâtâ, târâ pymâem awyly, kurâem Deusram nhekadyly warâ. Awylygue ise xypyry etay, ânguy kygonopyra awyly âji tâdâsenagazedoam. <sup>35</sup> Toenzepa lelâlâ Jesus Cristo kywynedly. Âdy kulâ mâtâ kywynebyra itoem anienehonwâbyra! Takalague, tâsenagazeze, xurâ keba modoram tâzenagazeze, typnigueba tâise, âdy peba tâise, kâmaynoem tâise, tyigueze lelâlâ warâ wâne kurâ. Arâlâ olâ, âdy Jesus kywynebyra itoem anienehomba awyly. Idânârâ aitaynrim modo wâgâ Jesus kâempyra nitaymba. <sup>36</sup> Deus itaumbypy awo wâgâ iweniby ara lelâ aidyly:

“Âmâ xurâem tawylygue,

kopaelâgâembaba xina âdyoze kely.

Kaneru domodo tyâhoram idâim ara kulâ xina âzenagazeoly âmâ xurâ keba modoram” kely myakâwândy Deus inwenien-honly.

<sup>37</sup> Arâ wâne aguydâieholo, âdy Jesus kieinwâmpyra kitoem aienehoim peba olâ. Tâegane lelâ kienmaenly, kywynebyra nipyra mawânkâ Cristo. Sodadu tuduery modo samuneni ara kurâ. <sup>38</sup> Ton-honre kehoem xirâ Deus kywynebyra nipyra ise, uguely. Tâwâlâ

ise igueypyem, kyiguepa warâ kydawly, kywynebyra nipyra olâ ise. Anju domodo, kadopâ modo, awâkâ modo kulâ kywynebyra itoem anienehonwâbyra ise. Iwerâ aitaynrim modo, waunroem aitaynrim modo warâ kulâ kywynebyra nienehonwâbyra ise. <sup>39</sup> Kau wogonro modo, onwogonro modo warâ Deus kywynebyra itoem anienehonwâbyramo. Deus nhugutyby ewy, Deus kywynedyly nekuâdâdaymba. Kywymâry Cristo Jesus wâgâlâ mâkâ kywynedyly nhenehonly, mâkâ agâlâ kydawlygue.

## 9

### *Deus induakeyby modolâ judeu domodo*

<sup>1-2</sup> Cristo xurâ wawylygue, uguelwâdyly kulâ witaymba urâ. Woday tutuze urâ, âkealâ awyly. Inokubyramo wawyly kâuntuhoem, yam tutuen-honze lâpylâ Deus Ispirity. Toenzepa lelâlâ kâjityendyly, agui mawânkâ ypemugudo ewy Cristolâ kâmakeim awyly einwântâny modo. Toenzepa akaemo Cristo nheinwândyse wawyly. Ydamudo iweom lâwâne akaemo; tokalelâma xina idamu. <sup>3</sup> Auguely tâise Kunwyn-am: “Urâlâ nhewentâguegâ, judeu domodo âsemaguehoem. Tuduzelâ watay, urâlâ Cristo agâpa yenehongâ, ypemugudo mâkâ agâpa tyeseba itomoem” warâ tâise Deusram auguely.

<sup>4</sup> Ypemugudo judeu domodo Deus iduakewâm turâem itomoem. Eagâmolâ myakâwândy Deus, ton-honru, tohugu warâ enehonwânmey eyanmo. “Toenzepa koendonro âyanmo xuduze urâ. Toenzepa ise âepadylymo. Onro iwerâ eydâ matomodâ sodolâ ise âmaemo” warâ iweâpa lelâlâ Deus Abraãooram aguezesedobyry sakabygueduo myakâwândy Moisésram Deus ypemugudo ezewenry inwenien-honly, ize ato ara adâidlyl nhutuhomoem. Deusram âduruholymo, âdara tohoguedomoem aidylymo nhutuhomoem. “Igonose urâ Messias âyanmo, imakehomoem” kewândymy Deus. <sup>5</sup> Iweâpa lelâlâ Abraão, Isaque, Jacó (Israelgue tâzekeim lâpylâ) warâ umepa myakâwâm Jesus iazely judeuenlâ akaemo ewypyry awylygue. Uguondo tynrenseim modo iwerypyrylâ mâkâ. Deus mâkâ, idânârâ xuturim, eni, aunlolâ tohoguezeim warâ.

<sup>6</sup> “Urâ xurâ ise Israel domodo. Aunloenlâ ise kâendyly” kewândymy Deus. Idânârâpa olâ israelita domodo Jesus einwânni, aguipa kulâ. “Aiese urâ’ tâkehobyr anientaymba Deus” kykeba olâ kine. Idânârâpa mawânkâ israelita iunupeom modo Deus induakeybyem awyly. <sup>7</sup> Agui myakâwândy Abraão iweom, idânârâpa olâ Abraão iweompyry Deus xurâem awyly. Warâ myakâwândy Deus aguely: “Âpemugu ewy enday, âmery Isaque iweompyry lelâ ise kâenmawyadâguyly, kâenkyly warâ, âmeombyry eagonrodo iweompyry mâkeba” kewândymy Deus, Abraãooram.

<sup>8</sup> Awylygue kiuntuly, idânârâpa Abraão iweompyry Deusram iduakeyby awyly. Tâlâ myakâwândy Abraão imeom eagonrodo, akaemo agâ koendâ tawyly keba olâ myakâwândy Deus agueho. Sara, Abraão iwydy adamly iraynâlâ, Deus aguely myakâwândy Abraãooram: “Âmâ, Sara warâ imezeze âmaemo” kely. Deus aguehobyrara myakâwândy imery Isaque iazely. Awylygue Isaque iweompyry lelâ Deus koendâ nhekyly awyly; akaemo lelâ Deus “Kâinduakeyby” keho. <sup>9</sup> Aguewâm mawânkâmy Deus Abraãooram: “Auguehobyr odaxi ituo, won-honru enehonze urâ. Anu iwelo âeni wâgâ, âwydy Sara imery uguondo iazeze” kewândymy.

<sup>10</sup> Agueypyem tawylygue myakâwândy Deus, Isaque, Rebeca agâ imeom ewy tokalelâ induakely; azagonro myakâwândy imeomo, âzetaylâ iazeypy. <sup>11-12</sup> Akaemo iamimeom azagonro iazely iraylâ, Deus aguewânmey isemoram: “Âmery azagonro xutulymo-ro watay, iukono ise tywaigoru xutuim” kewândymy. Mâkâ arâ aguely myakâwândy, tyze idâhu oday awylymo umelâ, koendonro, inakai warâ aniempyra awylymo umelâ. Arâ Deus adâkehobyr nhonwa kuru nhedyly myakâwândy arâ ize tawylyguelâ, âdalâ idyly wâgâ inkâba. <sup>13</sup> Iwenibyem Deus itaumbyry awo wâgâ, mâkâlâ aguehobyr: “Jacó, tâjiukono, kâinduakeyby; Esaú, tâjiwaigoru olâ kâinmetyby” kewândymy.

<sup>14</sup> Ânguylâ wâne keanra warâ tâkeze: “Koendâ inkâba Deus, tokalâ induakely, eagonro pylâ imekyly-ro warâ” tâkeze. Aypa olâ! <sup>15</sup> Saguhoem myakâwândy Deus aguely Moisésram: “Koendâ wawyly, eagâ koendâ wawyse wato agâlâ. Eagâ koendâ wato iduakeim urâ” kely. <sup>16</sup> Awylygue Deus kuduakely, ize kydawlyguepa, aguienkylî wâgâpa warâ. Ize tawylygue lelâ Deus kuduakely. <sup>17</sup> Deus itaumbyry awo wâgâ iwenibyem mâkâ lelâlâ Faraóram aguehobyry: “Urâlâ akâwâm âduakenri, tarâ Egitodâ pymâem mitoem, aitaynrim modo wâgâ won-honru kâenehohoem. Arâ awidly, tâinkâ lelâba urâ lelâ Deus awyly nhutuhomoem” kewândymy Deus. <sup>18</sup> Deus ânguy agâlâ koendonroem tâidyse watay, adâise mâkâ. Ânguylâ tâeganeinhe tiendyse watay, adyese lâpylâ.

*Deus induakeyby modo, imetyby modo warâ*

<sup>19</sup> Tâlâ ise âmaemo ewy wakenri: “Deus aise kehobyry ara lelâ idânârâ aidly watayma, koendâ inkâba Jesus einwântâny modo infernuram igoñodly-ro. Ânguy Deus ize ato anipyra itoem anientaymba.” <sup>20</sup> Arâ inkâba, yataen-ho domodo, aguewâni modo! Âdy mâkeba kurâ; Deus agâ kydâjihoguhoem ton-honruneba kurâ. Âmugâ xyganilâ âdaunlo tyngakyly awyly xutuim, “Warâ ise” tâkehobyry aralâ nhygadyly. Âmugâ tyganipyryram: “Arâpa tâise ayedly” kewâpyra. <sup>21</sup> Âmugâ xygani ize tato aralâ nhynanâdly. Ikila tiamenti bygue âmugâ iwâkuru kehoem adyese, iwâkudâdobe kehoem warâ, eagonro iwâkudâdo peba adyese aunloem kulâ tâwanizeinhe. Mâkâlâ xuturim, âmugâ keba.

<sup>22</sup> Arâ lâpylâ Deus kuduakely, kurâ mâkâ nhugutyby mâkeba iduakeim. Tyewiâky, ton-honru warâ tienehondyzé tainwântâny modoran-ro watay, arâ adyese lelâ mâkâ. Arâ awylygue, âdanipyralâ inakanhe aitomo nhemaenly. Mârâ xypyry etay olâ, infernuram igoñosemo âsenagazedomoem arâ atomobyry wâgâ. <sup>23</sup> Toenzepa tywâkuru, tohugu, ton-honru, koendonro tawyly warâ tienehondyzé mâkâ tainwânni modoram watay, tânehonze lelâ. Toenzepa akaemo tytyenze mâkâ. Adaguly umelâ xutuwâny mâkâ, akaemo târâ tuomareinhe awyly, “Xuduze urâ” kehobyry koendonro emakerin-em awyly warâ. <sup>24</sup> Deus kygâsedyly myakâwândy xurâem kitoem, judeu, judeu keba alelâ. <sup>25</sup> Saguhoem Deus aguewâm tytaumbyry iweniribyry Oséias iwapery wâgâ:

“Ynynâbaombyry modo ynynonroem isemo.

Kâinwynedânybyry modo toenzepa ise kâinwynedylymo’ kely Deus.”

<sup>26</sup> Warâ lâpylâ myakâwândy Oséias inwenily Deus itaumbyry:

“Âmaemo judeu keba modo watâkehonze:

‘Deus eynynonro mâkeba âmaemo’ tâkehonze ani.

‘Deus iguedâny imery’ kehonze olâ âmaemo’ kely.

<sup>27</sup> Saguhoem Deus itaumbyry iweniwâm lâpylâmy Isaías:

“Aguiom lelâlâ judeu domodo.

Sagunu sapâguehoem nudupa wâne

myara lâpylâ akaemo agui awyly sapâguehomoem nudupa.

Tuduakeze kulâ olâ ise âsemaguerim modo, idânârâpa’ kely.

<sup>28</sup> Aunlolâ nhemaenzesedyly nitaymba ise Deus,

xirâ anaym tynynonro keba modo âdalâ kulâ aisezedly.

Adâkehobyry odaji ituo, enagazenehonzemo”

warâ iwenibyem awyly.

<sup>29</sup> Isaías iweniwâm lâpylâmy Deus aguehobyry aini modo wâgâ:

“Saguhoem Deus tâgupygueba kehoem Sodoma, Gomorra warâ donro modo

tainhehonze myakâwâm,

mâkâ aguehobyry nhakaduomo.

Deus Ton-honreim kypemugudo nityembira-ro watay,

idânârâ tâise judeu domodo igueypyem awyly,  
mârâ azagâ xidadâ saguhobypy sain-hobypy ara”  
warâ myakâwândy Isaías inwenily.

### *Judeu domodo ewy Jesus izepaom*

<sup>30</sup> Aituo-ro? Âdara kaise aguykely judeu keba modo âsemaguely wâgâ? Warâ ise kâinhoguly. Saguhoem judeu keba modo tâdâsemaguely wâgâ âdy nutuwâbyramo akâwâm. Awylygue Deus nuimpa awylymo, tâmakehomoem, tâwentâguezeba tâitomoem warâ. Jesus nheinwândylymo watay olâ, âzemakeozemo, tâwentâzebamô warâ Deus xurâem. <sup>31</sup> Judeu domodo olâ tâzezewenry Moisésram inwenien-hoymby, tâsemaguehoem, tâwentâguezeba tâitomoem warâ einwânce kelymo. Âsemaguehomoem nudupa olâ awârâ.

<sup>32</sup> Tâlâ keanra ânguylâ warâ agueim: “Âdaituoka akaemo nâzemakeoba awyly, tâzezewenry nheinwândylymo umelâ?” keim. Warâ kâin-hoguly: “Deus xurâem tâwentâguezenry mâkeba akaemo, Jesus neinwâmpyramo awylygue” uguely. Âwâlâ adâidylygue kulâ âsemagueze kewâdylymo, Deus ingonotyby tyeinwândylygue inkâba. Mâkâ tâgaseim, tuhu onwa tâjihodaigâze, tâihugueduo tâgato xypyryam naimpyra, myara akaemo Deus ezaxi naimpyra awylymo, Jesus neinwâmpyra awylymogue. Tuhu ihuguehomoem ihodaigânimobe-ro waunlo ara ise. <sup>33</sup> Warâ iwenibyem awyly Deus itaumbyry awo wâgâ:

“Koendâ idataungâ.

Mâkâ kâingonokyly Siãoram igonose urâ.

(Jerusalémgue tâzekeim lâpylâ mârâ.)

Mâkâ einwântâny modo yam naintaymbamo ise.

Tuhu ara ihuguehomoem ihodaigânimobe ise.

Mâkâ einwânni modo olâ urâ xurâ modoram kâunduly emakezemo;

alâ kulâ inkâba ise nheinwândylymo”

warâ iwenibyem awyly Messias wâgâ.

## 10

<sup>1</sup> Cristo eynynâ ypemugudo, toenzepa lelâlâ Deus, judeu domodo nhemakedyze wawyly. Eyam ekadyly kâinmopa winase. “Pabai, ypemugudo emakegâ. Israel iweompyry Jesus nheinwântomoem aiekâ” uguezesedyly. <sup>2</sup> Deus ize ato adiendyse awylymo, tutuze urâ, nutubamo olâ âdara koendâ aiedyly awyly. <sup>3</sup> Tâmakehomoem âdara Deus itaumbyry awyly nhutuhomobe wâne, awârâ tiuntudyzebamô olâ. Jesus kieinwântuo lelâ kydâsemaguely awyly tiuntudyzemo inkâba. Tâzezewenry Moisés inweniby saguhobypy tyeinwândylygue âwâlâ kulâ âsemagueze kewâdylymo. Deus itaumbyry ara adâidyse inkâba akaemo, mâkâ xurâem tâwentâguezeba tâitoem. <sup>4</sup> Jesus Cristo iguely myakâwâm, tâzezewenry wâgâpa kydâsemaguely awyly itoem. Mâkâ kieinwândylyro watay, Deus xurâem tâwentâzeim mâkeba kurâ. Agui olâ judeu domodo warâ agueim: “Deus xurâem tâwentâguezeba kydawly, kâzewanry saguhobypy ara aguituo lelâ” keim, iozepa kulâ olâ arâ aguelymo.

### *Tâsemagedyze donro modo tâzemakeoze, Jesus nheinwântuomo*

<sup>5</sup> Xirâ myakâwândy Moisés inwenily tâzezewenry einwândyly wâgâ Deus xurâem tâwentâguezeba tâidysedo modo wâgâ: “Ânguylâ koendonro awyly aunloenlâ watay, inakai aniempyra tokalâ watay, arâ lelâ ise âzemakeoly, tâwentâguezeba ise-ro warâ” warâ myakâwândy inwenily. <sup>6-7</sup> Warâ olâ Deus itaumbyry awo wâgâ iwenibyem awyly, Jesus kieinwântuo kydâsemaguely wâgâ. “Angahumo oday tunâgueba itaungâ: ‘Ânguy kaise Deus eydâ atoam âkuim, kâmakeim kyam tienetoem? Ânguy kaise iguewâtyby modo ejidyräm idâim, kyam mâkâ tienetoem?’ tâkezeba itaungâ” warâ iwenibyem awyly.

Deus eydâpa âemâlâ Jesus. Iguewâm, kurâem itonmâ warâ. Awylygue myarâ, myarâ warâ kytâwâbyra kurâ, âdara kydâsemaguely awyly xutuze. Mâkâlâ mawânkâ kâmakeim. <sup>8</sup> Warâ lâpylâ myakâwândy inwenien-honly: “Deus itaumbypyry âyanmo toentuneba. Tydase âmaemo; iwâgâ toenzepa tâpaunzeze âmaemo-ro warâ” warâ iwenibyem awyly Deus itaumbypyry awo wâgâ. Xirâ unâ mawânrâ xina nhegatuly, kydâsemaguehoem Jesus xunâry kieinwândyly.

<sup>9</sup> “Ywymâry mâkâ Jesus” myguelymo tâjidiay, igueduo kurâem ietonibyryem Deus awyly tâinwânse âmaemo warâ watay, âsemagueze âmaemo. <sup>10</sup> Jesus kieinwândyly-ro watay, Deus xurâem tâwentâgueduneba kurâ. Mâkâ tâinwânse kydawyly aguykely tâjidiay-ro watay, tâsemagueze kurâ. <sup>11</sup> Deus itaumbypyry awo wâgâ iwenibyem: “Deus einwânni modo âdaunloenlâ tonokudunebamo inwânwâkylymo wâgâ. Adienkylyem adâkehobypy adyese lelâ Deus awylygue” warâ iwenibyem awyly. <sup>12</sup> Tâwâlâ idânârâ nheinwândylymo, judeu, judeu keba alelâ. Idânârâ iwymâry tokalelâ. Koendonro mâkâ tagâ agueim agâ, koendonro lelâlâ. <sup>13</sup> Warâ iwenibyem lâpylâ Deus itaumbypyry awo wâgâ: “Mâkâ Kywymâryam tâmakehoem ekanibyry, mâkânra âzemekeoze” warâ iwenibyem awyly.

<sup>14</sup> Tâmakehoem nekadaymbamo ise, tâdâsemagueho tâlâ awyly neinwâmpyramo watay. Neinwântaymbamo ise, unâ Kâmakerim wâgâ nidapyramo watay. Nidapyramo ise, unâ tâdâsemagueho eyanmo tâgatuzeba-ro watay. <sup>15</sup> Âtâ anary iwaguenonra unâ egatuim Jesus wâgâ agueze nâtâba, tugonoseba warâ watay. “Tuomazeze kurâ, unâ egatuim, unâ iwâkuru enese saintuo” warâ Deus itaumbypyry awo wâgâ iwenibyem awyly.

<sup>16</sup> Unâ iwâkuru Jesus wâgâ agueim egatuly xina nimopa lelâlâ wâne, idânârâpa olâ einwânni modo, aguipa kulâ. Warâ Isaías inweniby Deus itaumbypyry awo wâgâ. “Âwâgâ xina agueday, toenzepa tindadysebaom modo, Pymâ” kewândymy mâkâ Deusram. <sup>17</sup> Waunroem unâ Jesus wâgâ agueim wao kindadyly, ilâpyryem pylâ mâkâ kieinwândyly-ro warâ.

<sup>18</sup> Tâlâ ânguylâ warâ tunâgueim: “Judeu domodo keanra Jesus wâgâ aguehonly nidapyra” tâkezemo. Mâkâ wâgâ aguehonly tydaselâ myakâwândy akaemo. Deus itaumbypyry ara aidyly:

“Tâinkâ lelâba Deus itaumbypyry MOH itybyem awyly.

Onro anaym MOH warâ unâ egatuwâni modo xunâry âjidaholy”  
warâ iwenibyem awyly.

<sup>19</sup> Ânguylâ wakeze: “Judeu domodo wânkâ xirâ unâ nutubamo?” keze. Judeu domodo tydase, tutuze warâ lelâlâ Deus aguehobypy. Tutuzemolâ myakâwâm; unâ kâmakeim izepa tawylymo, judeu keba modo nheinwândylymo ume. Warâ Moisés inweniby Deus itaumbypyry awo wâgâ aguely:

“Israelita domodo, kâinduakeby modo âmaemo.

Israel iweompyry kebaom modo urâem itomoem aiese lâpylâ olâ urâ,  
akaemo saguhoem urâem itânrybyry modo.

Akaemo wâgâ âsewâniye, iewiâseze warâ olâ âmaemo”  
warâ Deus aguehobypy iwenibyem awyly.

<sup>20</sup> Iweâpa itybyem awyly ume, tyanepa myakâwândy Isaías, Deus aguehobypy egatuze:  
“‘Uidânryppyry modo woенkezemo,

mâkâ tiuinly keba kulâ soenkenri ara.

Ygâsedânry modoram âepanâgueze urâ’ Deus kehobypy”  
Isaías inwenibybe.

<sup>21</sup> Judeu domodo wâgâ Deus aguehobypy iweniwâm lâpylâ olâmy Isaías:

“‘Peto oday, kopae alelâ kâinane judeu domodo yeinwântondly kâinwânwândyly.

Tâjiunwym, tymery iweâpa âxigueyby saindyly inwânwânto ara akâwâm

tâwâtarigue kehoem kâinwânwândylymo.

Kâingâseduomo tindadysebamo olâ akâwâm.

Yizepa tâisemo lelâ akâwâm, eyanmo augueho tyeinwândysebamo akâwâm warâ' Deus kehobrybe."

## 11

### *Deus judeu domodo intyendobyry*

<sup>1</sup> Wakeimbe ise: "Turâem tinduakeyby judeu domodo nhodokely lelâlâ wânkâ Deus?" keim. Arâ inkâba! Urâ, judeulâ urâ, Israel iwerypyrylâ urâ. Saguhoem pymâ tynrenseimbyry Abraão iwerypyrylâ urâ. Benjamim iepadyby ewylâ urâ. <sup>2</sup> Adaguly iraynâlâ myakâwândy Deus xina induakely. Iwerâ xina agâpa nipyra mâkâro warâ. Tutuzelâ âmaemo, Deus itaumbypyry awo wâgâ iweniby Elias aguehobyry typemugudo wâgâ. Enanaji myakâwândy idânârâ israelita domodo Deus neinwâmpyra itybyem. Typemugudo tâwentâze myakâwândy, Deus agâ adâkeday wakely: <sup>3</sup> "Pymâ, âtaumbypyry egatuwâni modo nyâwâdâmo. Âyam xuduupy ekanâdo tuhu nhangatyguyby nakalaguemo. Urâ kulelâ âinwânni. Idânârâ eagonro modo âinwândyly nimo. Yâze tâkezemo-ro warâ" kewândymy Deusram. <sup>4</sup> Warâ olâ myakâwândy Deus aguely eyam: "Âmâ kulelâ mâkeba yeinwânni. Tâlâ aguilâ yeinwânni modo; sete mil uguondo modo kâinduakeybybe, yeinwânsedomoem. Eagonro modo 'Deus' kehomo Baal nehogue-daymba akaemo" kewândymy Deus.

<sup>5</sup> Elias ume tâlâ myakâwândy judeu domodo ewy Deus einwândyly imodânry modo, arâ lâpylâ xina iwerâ judeu domodo ewy Jesus einwânni, aguipa wâne, tâlâ olâ. Ize tawylygue Deus nhekyly xina awylygue. <sup>6</sup> Xina tytyenze tawyly tienehon-hoem Deus ypemugudo ewy induakely, anhetyby wâgâ inkâba. Kagâ koendâ Deus awylygue lelâ kydâsemaguely. Koendâ aguienkyl wâgâ kâmakely watayma tâise, Deus koendonroem awylyguepa kydâsemaguely-ro.

<sup>7</sup> Agui israelita domodo ewy unâ tâsemagueho xutudânry, saguho tâzezewenry einwântuo lelâ tâdâsemaguely waunlo ara enanajimo awylygue. Aguipa kulâ akaemo ewy Deus induakeyby Deus xurâem tâwentâguezenry, mâkâ Ingonotyby tâinwâns awylymogue. Agui olâ Deus tygâsedlyly tindadysebaom modo. <sup>8</sup> Deus itaumbypyry iwenihobyry ara aidly:

"Deus itaumbypyry tymese akaemo;  
neinwâmpyra itomoem aiemâ mawânkâmy.  
Âindâ kulâ itomoem aiemâmy,  
tygâsedlyly nidapyramo itoem.  
Iwerâ Deus anhetyby tâensemo lelâlâ wâne,  
itaumbypyry tydasemo lelâlâ wâne warâ,  
nutubamo olâ tyam âdakeze Deus aguely awyly,  
epy, kydatânry ara kulâ akaemo"  
warâ iwenibyem awyly.

<sup>9</sup> Warâ Davi inweniby Deus itaumbypyry awo wâgâ:  
"Âwâlâ kulâ ise âsenogudylymo.  
Toenzepa mawânkâ âdydo imeompe awylymo,  
toenzepa ipynigumo âty imâsedo adientomoem.  
Tagâ Deus iomaru waunlo ara ise enanajimo. Arâpa olâ.  
Enagazenehonzemo mâkâ, inakanhe aidylymogue.  
Âpa ezano sagurim wâne inra odaxi tâihugueze,  
tâigueze warâ myaramo ise.  
<sup>10</sup> Epy wâne âdykâingâ tâtâly nutuba,  
myara inepa Deus tângazenehonlymo nutuba awylymo.  
Tynynâ koendâpa idly tientuo adahulizemo olâ,

tyenwyem tâmânreim sanâni âzewyho ara itaynlymo ise” warâ myakâwândy Deus, Daviram inwenien-honly.

**11** Wauguely: “Agui judeu domodo Jesus tyeinwândysebaom awylygue, aunloenlâ Deusram âjimolymo? Xurâem itondomoem nudupa ise? Ihugueyby sautânry ara akaemo?” uguely. Arâ inkâba! Jesus wâgâ lelâ tâdâsemaguely. Neinwâmpyra atomobyry wâgâ kulâ judeu domodo âjimoly wao. Awylygue, judeu keba modo âsemaguehoem Deus anhedyly. Judeu keba modo xurâem koendonro modo Deus anhedyly tientuomo, ype-mugudo Jesus einwânsimo, mâkânra koendâ tâzehohoem lâpylâ. **12** Agui judeu domodo Deus ingonotyby kâmakeim neinwâmpyramo. Awylygue Deus aguely: “Arâ atayma judeu keba modo Jesus einwânni ise kâenmakely, eagâ koendâ wato warâ-ro” kely. Judeu keba modoem toenzepa âdydo imeom koendonro Deus anhedyly. Judeu domodo kâmakerim inmetobyry koendâ tâjitoem anieneho watay, agui judeu domodo, agui lelâlâ mâkâ nheinwântuomo, koendonro kuru aiese Deus!

### *Judeu keba modo emakeho*

**13** Âmaemo judeu keba modoram xirâ kâinwenily. “Unâ iwâkuru Jesus Cristo wâgâ agueim egatura Judeu keba modoram” Deus kehobypy urâ. Arâ kâsewanilygue, toenzepa kohomaendyly, xirâ iewanu wâgâ. **14** Tynwânwânsse urâ, judeu keba modo Deus xurâem kely tindatuo, ypmugudo Jesus tyeinwândyse idyly tâsemaguehoem lâpylâ. Iwerâ tâlâ matomo, akaemo tâlâ idysemo wato. **15** Jesus tyeinwândysebamo awylygue, ypmugudo Deusram âjimolymo wao. Toenzepa judeu keba modo, Jesus tyeinwântuo, Deus eataen-hoem tâisemo ani. Xypyry etay, agui judeu domodo Jesus einwânnipe-ro watay, toenzepa lelâlâ ise tojiomaru. Akaemo Deus agâpa ietaymby modo, igueypy kurâem itondyby ara ietybyem ise, mâkâ agâ awylymo.

**16** “Deus, âmâ xurâ xirâ” kykely-ro watay, idânârâ mâtâgue xygatyby modo Deus xurâ lâpylâ. Deus xurâ trigu-ro watay, pão mâtâgue xygatyby mâkâ xurâ lâpylâ. Nady kientâduo, “Deus, âmâ xurâ xirâ” kykely-ro watay, nady ipery, ipebary, iwataray, sary, idânârâ mâkâ xurâem awyly. Judeu domodo idamudo Deusram âjiduakeoly-ro watay, MOH warâ akaemo iweompyry modo mâkâ xurâem awyly.

**17** Etaungâ se oliveira ipery iweâpa âpa ezay etâdyby. Oliveira idu odanogue tianseudyze sodo-ro watay, iwataray tatâwâze, mâtâ ejipyay pylâ idu odano iwataraygue nhaseudyly-ro. Adientuo niguewâpyra mâtâ azakâlâ, iwindylâ mawânrâ igueânehondâny. Se oliveira idu odano emyenro âmaemo judeu keba modo; judeu domodo pylâ âpa ezano emyenro-ro. Idu odano iwataray tadatâoze, âpa ezano ipery onwa saseudoem, arâ lâpylâ âmaemo judeu keba modo, judeu domodo ejipyay mawylymo, Jesus imenibypy modo ejipyay. Judeu domodoram “Xuduze urâ” Deus kehobypyrgue iwerâ koendâ mâtâholymo, se iwataray saseudyby niguepa itoem, iwindy wâgâ awyly ara. **18** Awylygue iwerâ judeu domodo xurâpyrybe mawylymogue kulâ sawoem tâiseba itaungâ. “Deus kagâ koendâ awylygue, Deus xurâem judeu domodo takaze koendâ kydawyly iwerâ” tâkezeba itaungâ. Iwindy mawânrâ se esebydâni, nihugueba itoem, iwataray keba. Abraão, iweom warâ wâgâlâ Deus agâmo koendâ awyly. Âwâgâmo inkâba myakâwâm mâkâ; akaemo judeu domodo idamudo agâ koendâ awyly.

**19** Wamyguelymo: “Iwataray idu odano saseudoenlâ myakâwâm âpa ezano iwataray satâly. Iwataray satâwâdyby emyenro kulâ akaemo judeu domodo, xina pylâ âkelo iwataray-ro, awârâ mawânrâ enehoim Deus xurâem tynrenseinhe xina awyly, judeu domodo takaze” myguelymo. **20** Deus, judeu domodo tumoze wao, Jesus tyeinwândyseba awylymogue. Se âpa ezano iwataray satâwâdyby ara lelâlâ ypmugudo. Jesus mânwântuomo olâ, Deus se oliveira iwataray saseudyby ara âedylymo. Awârâ wâgâ kulâ olâ judeu domodo takaze koendonroem mawylymo kâzegaetaundâ. Tâmaynelâ itaungâ, mânwâmpyra mipyra mitomoem. **21** Se oliveira iwataray kuru emyenro judeu

domodo nityendaymba myakâwâm Deus, tâinwâmpyra awylymogue. Âmaemo se iwatary saseudyby emyenroma kuru ise mâkâ nityendaymba, mâkâ mânwâmpyra midylymo-ro watay.

<sup>22</sup> Koendâ xirâ auguely inwantaguedaungâ. Koendonro Deus tâinwânni modo agâ, tâinwântânry modo olâ tânagazenehonze. Awylygue koendonro, kânagazeni alelâ Deus awyly. Agâmo koendâ olâ mâkâ, mâkâ einwânszelâ âmaemo watay; imâem lelâlâ ise mâkâ agâmo koendâ awyly. Mânwânszebyra âmaemo watay olâ mânwâmpyra matomobyry wâgâ inagazenehonzemo lâpylâ, se iwatary satâbyara lâpylâ ise âmaemo.

<sup>23</sup> Judeu domodo, Jesus neinwâmpyra tawyly immolymo watay, Deus xurâem itonze lelâ akaemo. Se iwatary satâbyejidydâlâ saseudyly wâne mâtâ ara ise akaemo. Tyam odopâdomoem adyenehonze Deus. <sup>24</sup> Judeu mâkeba âmaemo; saguhoem Deus xurâem inkâba akâwâm âmaemo. Iwerâ olâ xurâem olâ âmaemo. Se idu odano iwatary, se âpa ezano ipery onwa saseudyby emyenro âmaemo. Deus turâem âetâmo. Agui judeu domodo Jesus nheinwântoem adyese lâpylâ mâkâ, xurâem itondomoem. Deus xurâem ânagado mâkeba awârâ. Mâtâ iwatary satâbylâ, nhonwa saseudondly myara.

### *Deus koendonro lelâ idânârâ agâ*

<sup>25</sup> Cristo eynynâ ypemugudo, koendâ idataungâ. Deus induakeyby modo wâgâ saguhoem tâgatuzenry modo mâtuntudyzemo wato. Judeu domodo ewy Jesus kâmakeim awyly neinwântaymbamo ise. Arâlâ ise aisezedly, judeu keba modo Jesus einwânni modo agui idyly ara, Deus turâem ize ato ara. Judeu domodo aunloenlâ eganumo nipyramo olâ ise. Iweâpa lelâlâ Deusmy judeu keba modo ewy iduakewâm turâ xurâem itomoem. Idânârâ akaemo judeu keba modo Deus induakeyby Jesus nheinwântuo, agui judeu domodo Jesus neinwâmpyra tawyly imozemo, einwânsemo-ro warâ. Xirâ mâtuntulymo watay, judeu domodo takaze koendâ mawylymo angahumo odaji mânhetaymba ise âmaemo.

<sup>26</sup> Arâ ise Deus toenzepa judeu domodo nhemakely, toenzepa lelâlâ. Aituo ise wakehonly: “Idânârâ Israel domodo âzemakeoybyem” kehonly. Aituo judeu domodo âzemakeoly. Deus itaumbyry iwenibyara ise aidyly:

“Sião ise kâmakeim âewyly.

Jacó iweompyry inakanhe aitobyry xygakeze mâkâ.

<sup>27</sup> Inakanhe aitomobyry kâyngakeduo,

eagâmo kâseinwândo aienibyryenlâ ise urâ”

Deus kehobyry iwenibyem awyly judeu domodo wâgâ. (Jacó iweompyrylâ israelita keho, judeu keho warâ.)

<sup>28</sup> Tuduery ara Deus judeu domodo ewy nhedyly, unâ iwâkuru Jesus wâgâ agueim inmetomobyry wâgâ. Awylygue mawânrâ âmaemo, judeu keba modo, Deus xurâem mawylymo. Deus olâ judeu domodo izepa nipyra. Kaudyly umelâ myakâwândy Deus, akaemo induakely turâem itoem. Xina ipemugudo iwymâry saguhobyry modoram aguewânymy: “Âmaemo, âmeombyrymo, âweompyrymo warâ yataen-hodo lelâ” kewândymy Deus eyanmo. <sup>29</sup> Induakewâdyby modo tymetuneba ise. Koendonro Deus emaym nhemakeybymo, tâtyonduneba ise. <sup>30</sup> Awylygue iwerâ, judeu domodo Deus neinwâmpyra awylygue, toenzepa mâkâ agâmo koendâ awyly, saguhoem mâkâ einwânnipyry keba mawylymo umelâ. <sup>31</sup> Arâ lâpylâ judeu domodo agâ aidyly. Wayam waunroem akaemo ityenze mâkâ, âtyendomo ara. Akaemo agâ koendâ ise mâkâ, iwerâ neinwâmpyra awylymo umelâ. <sup>32</sup> Etadâdyby ara itomoem aiemâmy Deus, tâinwâmpyra awylymogue. Tâinwânnipyry olâ tytyenze, tytyenzeinhe awylymo umepalâ, idânârâ inakanhe atomobyry tygakeze warâ.

### *Deus koendonro awyly wâgâ agueho*

<sup>33</sup> Koendonro lelâlâ Deus. Tonomegueim lelâlâ mâkâ. Âdy nhutudânry lâpeba; âdy indatânry lâpeba warâ. Nuduwâpyra mâkâ âpaunzedo kiuntuhoem; konomery takaze mâkâ enomery. Mâkâ adiendyse ato, âdara aidyly awyly warâ kiuntuwâbyra kurâ.

<sup>34</sup> Warâ iwenibyem awyly itaumbypyry awo wâgâ:

“Ânguy Kywymâry Deus nhangahu oday xunâry nutuwâbyra, adiendyse ato nutuba warâ.

Ânguy mâkâ xuruse tonomeguneba.

<sup>35</sup> Âdylâ Deusram xuduhoem nuduwâpyra, idânârâ sodolâ mawânkâ mâkâ.

Ânguy ‘Iepywagâ’ kehoem nuduwâpyra”  
warâ iwenibyem awyly.

<sup>36</sup> Mâkâlâ mawânkâ idânârâ xuguni. Mâkâ aguehobyryenlâ mawânrâ idânârâ tâlâ awyly. Mâkâ peba-ro watay, iwerâ tâlânro modo ipa tâise. Idânârâ tâlâ awyly, mâkâ ize ato aietoem. “Deus, koendonro âmâ. Ânguy imyenro lâpeba” kykezezene mâkânra. Arâlâ nidâ.

## 12

### *Deus xurâ kydawylygue, koendonro kionmazeândoem aguyjiene*

<sup>1</sup> Warâ âurudylymo, Cristo eynynâ ypmugudo. Kytyendâ lelâlâ Deus; kagâ koendâ lelâlâ warâ. Awylygue Deusram mâtuhoemoem kâenkadyly, âwanu adiendyse tato âmaemoguelâ anhetoem. Saguhuem mykâinane ânguydo imeom nhâlymo, Deusram nhegamelymo warâ etydâ, mâkâ tionmazeândoem. Eyam kydâtuly olâ mâkâ ize ato iwerâ, mâkâ ize ato aguentoem. Awârâ mawânkâ iomazeâni. <sup>2</sup> Deus xurâ keba modo anhekyly, agueho warâ arapa aitaungâ. Âwâlâ Deus angahumo oday âunârymo nuguke, mâkâ aralâ angahumo oday âunâgomoe. Arâ-ro watay, âdy Deus ize ato awyly xutuze âmaemo. Koendâ lelâ aguiendyly mâkâ ize ato; iozepa kulâ aguiendyly, aguykely warâ izepa; iomazeâni aguiendyly ize ato.

<sup>3</sup> Deus yagâ koendâ awylygue, ienomery nhuduly, iwâgâ auguehoem, iwâgâ kâenomedâdoem warâ. Awylygue arâ âurudylymo. Sawoem inkâba itaungâ. Deus inomerymo âyanmo nhuduypygue koendâ xutuwâdaungâ xurâem amitomoem. Deus enomeryguelâ âdylâ aietaungâ, imâsedo, keba alelâ. Mâkâ xurâem âdylâ imâsedo amânhetomoem Deus inomerymo xudurimpypyrem watay, mâkâ eon-honruguelâ aietaungâ. Agonromo takaze kehoem tynrenseinhe mâtutulymo waypa olâ itaungâ.

<sup>4</sup> Tokalelâ kodo, agui olâ isejiguy. Âzekiba lelâ inkâba mâtâ modo ewanu. <sup>5</sup> Arâ lâpylâ kurâ Jesus einwânni modo, agui lelâlâ wâne kurâ, tokaleom ara lelâ olâ kurâ, Jesus Cristo agâ on-hoam kydawylygue. <sup>6</sup> Kagâ koendonro lelâlâ Deus. Awylygue idânârâ kyam konomery nhuduly, mâkâ xurâem aguentoem. Âzekiba lelâba olâ konomery âduduoly. Awylygue Deus aguentoem kon-honru nhuduhabypyry aralâ aguyjiene. Itaumbypyry egatuin-enlâ kon-honru nhuduly-ro watay, kyzegatunre. <sup>7</sup> Emawyadâniem kon-honru nhuduly-ro watay, tâmawyadâzeim kyzemawyadâne. Kienomedâdoem kon-honru nhuduly-ro watay, kyzenomedânemo. <sup>8</sup> Deus ize ato xutudânry modo kiunrutoem kon-honru nhuduly-ro watay, kudurunemo. Âdy pebaom modo emawyadâniem kon-honru âduduoly-ro watay, tâwânrampa tâlâ kydato kydudunre. Pymâem kitoem kon-honru nhuduly watay, tâmayne kehoem kâwanu aguyjiene, koendâ lelâ. Kagonro modo ityeniem kon-honru nhuduly watay, tuomare kehoem awârâ aguyjiene.

<sup>9</sup> “Kâinwyneguylâ âmâ” myguelymo kulâ keba nidâ, koendâ amidylymoguelâ tywyneze lelâlâ mawylymo enehonwâdaungâ. Inakai izepa itaungâ, Deus ize ato koendonro ize matomo nidâ. <sup>10</sup> Âpemugumo âwankuem mânhepyra mitomoem âzeon-hondâdaungâ. Amaemo Cristo eynynâ âjipemugu modo âpynedaungâ. <sup>11</sup> Tynepa itaungâ. Tugüigue

lelâ âsewaniwâdaungâ warâ, tuomare lelâ Kywymâry xurâem amitomoem. <sup>12</sup> Tuomare itaungâ, târâ eydâ atodâ mâenmakelymo mâinwântaymo. Takalague âmaemo-ro watay, idânârâ emaenwâdaungâ, Jesus mâinwâmpyra mipyramolâ. Deus agâ amyguelymo kâjimowâdaundâ. <sup>13</sup> Cristo eynynâ âpemugudomo kaikânro modoram âsejiguymo ewy âunduwâtaungâ. Jesus einwânni modo iwague âetyby modo xuataungâ, ejidymo xykyhomoem âunduwâtaungâ warâ.

<sup>14</sup> Deus xurâ keba modo inakanhe âedylymo watay, “Pabai, koendâ lelâ ikâ eagâmo” kewâtaungâ Deusram. Mâpeândomoem kâzekadaundâ; Deus eagâmo koendâ itoem lakuru ekadaungâ. <sup>15</sup> Tuomaruneim modo agâ mataymo, eagâmo ohomaendaungâ; tuoguruneim modo agâ mataymo, eagâmo ohogüendaungâ. <sup>16</sup> Mâkâ agâ, mâkâ agâ alelâ koendâ itaungâ. Sawoempa itaungâ. Âdaunlolâ âwanu amânhetomoem amyguehonlymo watay, “Agânhepyra ise urâ, aunlo kulâ keba wawylygue” tâkezeba itaungâ. Âkelo modo takaze kehoem tonomegueinhe mâtutulymo waypa itaungâ.

<sup>17</sup> Inagazenimo inagazedomobyry ara lâpylâ mâpeândly tâiseba itaungâ. Âzeonhondâdaungâ, koendonro amânhetomoem koendâ amyguehon-homoem. <sup>18</sup> Koendâ lelâ aitaungâ, ânguy agâ tamekygueba, idânârâ agâ koendâ lelâ mitomoem. <sup>19</sup> Cristo eynynâ ypemugudo, inakanhe kulâ amâieholymo watay, tâpeânzeba itaungâ. “Pabai, mâkâ ayetobyry, tutzelâ âmâ” kewâtaungâ Deusram. Mâkâlâ mawânkâ ise inagazenimo enagazenehoim. Warâ Deus itaumbyry awo wâgâ iwenibyem awyly:

“Inweââimoem kehobyry urâ.

Urâem ityby modo enagazeni, enagazeze urâ’ kewândymy Deus.”

<sup>20</sup> Deus aguehobyry ara lelâ aitaungâ:

“Âduery tâwinze-ro watay, xuakâ.

Tatuanze-ro watay, parugue sakuigâ.

Arâ amidyly watay,

âewiâsedly imoze mâkâ âduery, âpybazeze-ro warâ”  
warâ iwenibyem awyly.

<sup>21</sup> Tâpeânzeba itaungâ, inagazenimo agâ olâ koendâ itaungâ. Aitomo ara aise myguelymo-ro watay, akaemo ara inakanhe ise lâpylâ âmaemo; koendâ âduerymo etaungâ; atâen-homoem ietaungâ lelâ.

## 13

### Pymâ domodo aguely kyzeinwâne

<sup>1</sup> Pymâ domodo aguehobyry einwântaungâ, uguely idânârâam. Idânârâ pymâdo, pymâem awyly arâlâ Deus ize awylygue. Deus arâ izepa watay, pymâ lâpeba tâise. Awylygue idânârâ pymâdo, pymâem awyly, Deus aguehobyryenlâ awylygue.

<sup>2</sup> Mâkâ pymâ aguehobyry einwântânry, Deus pymâem itoem aguehobyrylâ mâkâ nheinwântânry. Pymâ einwântânry modo âsenagazeze. <sup>3</sup> Inakanhe aini modo mawânkâ pymâdo xytani, koendâ aini modoma nytabyra.

Awylygue, pymâdo mâyntabyra mitomoem, koendonro lelâ aietaungâ. Aguelymo makabyra âmaemo watay, koendonroem mawylymo agueze. <sup>4</sup> Deus ewanu aieni akaemo pymâdo, koendâ mitomoem. Inakai adyese âmaemo watay olâ, akaemo xy-tadaungâ. Auturimo tawylygue inagazenehondâmo lelâlâ mawânkâ. Arâ aituomo, Deus aguehobyrylâ anheklymo. <sup>5</sup> Awylygue arâ âurudylymo. Pymâdo aguely kadakadaundâ. Deus inagazebyramo itoem kulâ inkâba akaemo aguely einwântaungâ; iozelâ arâ adâjidyly mâtutulymoguelâ.

<sup>6</sup> Deuslâ pymâdo xuruni, kurâdo edylyem âsewanihomoem. Awylygue impostu mâempywadomoem nhekadylymo-ro watay, epywadaungâ lelâ, tâwanu anhetomoem lâpylâ. <sup>7</sup> Augueondly, mâempywaguylmobe watay, epywadaungâ. Impostu watay,

impostulâ epywadaungâ, pymâdo tâwanu anhetomoem. Idânârâ pymâdo xyrentaungâ, âwankuem kâietaundâmo warâ.

### *Kagonro agâ kydâpynene*

<sup>8</sup> Mâempywaguylymobe watay, epywadaungâ. Aunlolâ âpynezezaungâ, âdylâ epywadyly âwanikedânrâ ara. Arâ mâpynedylymo-ro watay, idânârâ tâzezewenry Deus Moisésram inwenien-hoymbylâ amânhekylymo. <sup>9</sup> Warâ mawânrâ Moisésram Deus inwenien-hoymby: “Eagâ mohogüin-hobry lelâ xynanâgâ, eagonro lâpylâ waypa. Ânguy kâdyâ. Tâmagazeba ikâ. Âkelomo isejiguy wâgâ tâsewâñizeba ikâ” kewândymy Deus. Tâlâ lâpylâ olâ eagonro tâzezewenry modo. Tâzezewenry enday tutuzeim kuru olâ xirâ: “Agonromo agâ âpynedaungâ; koendâ mâzetomo ara, arâ lâpylâ agonrodo agâ koendâ âzetaungâ” warâ iwenibyem awyly. <sup>10</sup> Agonromo agâ tâpyneze lelâlâ âmaemo watay, idânârâ koendonro aiese âmaemo. Xurâmoem inakanhe amidylymo mitaymba ise âmaemo. Kagonro agâ tâpyneze kurâ-ro watay, idânârâ Deus aguehobyrylâ kieinwâñkyly.

### *Tonomeguelâ kine, Deus aguehobyry aguientoem nhuduly umelâ*

<sup>11</sup> Awylygue Deus ize ato ara lelâ aietaungâ, Kywymâry Jesus âeto iwaguepa isezyedly mawânrâ. Xykywâni modo araba itaungâ. Tonomeguelâ itaungâ, Deus aguehobyry amânhetomoem nhuduly umelâ. Jesus âetuo, Deusram âzemakeoybyem ise kurâ. Iwaguepa idyly Jesus âeto. Iweâpa nidâlâ mawânrâ kieinwâñtobyry.

<sup>12</sup> Kywymâry âetuo, idânârâ inakanhe tadato modo sainze, xixi egaseduo wâne tyamepa idyly myara. Awylygue akaemo iamu oday anhekyly kyjimonre, xixi egaseduo, sodadu typy tâmaxi tyese, on-hondbybyem tuduery tinwâñwântoem myara. Kondonro lelâ Deus aguiendyse ato aguientoem on-hondbybyem kine. <sup>13</sup> Koendonro modo lelâ aguyjiene, kydzeseoduo kydzâpybazebyra kitoem. Toku ikaji kipyra kine. Eagâ kydhogüin-hobry keba kulâ kiynanâbyra kine. Kywypado aguiempyra kine. Tâdâjitoguyl kykeba kine. Âkelomo isejiguy wâgâ kydzâsewâñiba kine. <sup>14</sup> Aguiendyse kydato kulâ aguienkyl watay, Deus izepa ato adyeze kurâ. Awylygue inakai aguiendyse kydato aguiempyra kine. Kywymâry Jesus Cristo olâ kyzeinwâñsezene, mâkâ ize ato aguientoem.

## 14

### *Cristo eynynâ kypemugudo kiunâguebyra kine*

<sup>1</sup> Tâlâ âduaymo ton-honremba kulâ Jesus einwânni, koendâ Deus ize ato xutudânrâ modo warâ. Kododokewâdaundâmo, kâdunâguedaundâmo warâ. Eagâmo tyewiâpazeba itaungâ, nhutudânrymobe watay. <sup>2</sup> Tâlâ mâkâ ton-honre kehoem Jesus einwânni modo, Awylygue, âdy nheindânrâ peba, nhâtânrâ peba warâ. MON alelâ typynigue Deus tâmagazebyra awyly tutuze tawylygue. Tâlâ pylâ ton-honre Jesus einwâñtânrâ modo. Awylygue podo nâpyra awylymo. Tâzewily modogue lelâ ipynigumo.

<sup>3</sup> Warâ auguely âyanmo, âmaemo MON alelâ typynigueim modoram: “Tâzewily modogue kulâ typynigueim modo kâdunâguedaundâ. ‘Tuândy kulâ âmaemo, podo mâmbyra mawylymogue’” tâkezeba itaungâ eyanmo. Alâ tâzewily modogue typynigueim modoram auguely: “Podo sâni modo kâdunâguedaundâ. ‘Deus izepa ato kulâ amânhekylymo’ tâkezeba itaungâ.” Deus mawânkâ newentâguebyramo. <sup>4</sup> Cristo eynynâ âpemugu Deus emary mâkâ, imarymo keba. Deuslâ mâkâ xutuim. Mâkâ nheinly, nheindânrâ warâ wâgâ ewentâgueze ton-honruneba âmaemo. Deus ize ato anhedylyro watay, iwâgâ koendâ agueze Deus. Deus izepa ato anhedyly-ro watay, mâkâlâ ise xuruni. Kywymâry Jesuslâ mawânkâ ise tânudâ kehoem itoem aienehoim.

<sup>5</sup> Tâlâ mâkâ Jesus einwânni: “Tâlâ iguandyly tynrenseim kuru” keim. Mârâ oday lelâ Pymâ Jesus nhehoguedyly, nâsewaniba warâ. Tâlâ pylâ Jesus einwânni wakeim: “Idânârâ iguandyly âzekiba lelâ” keim. Awylygue kopaelâgâembaba Jesus agâ aguely,

nhehoguedyly warâ. Mâpaunzedylomo âkealâ kuru olâ etaungâ. <sup>6</sup> “Tâlâ iguanto tynrenseim kuru Deus ehoguedo” kewâni modo, awârâ umelâ Kywymâry Jesus koendâ kehoem nhehoguedo lâpylâ. MON alelâ typynigueim, tâzewilygue lelâ typynigueim modo warâ. Kywymâry Jesus tyeinwândyse tawylygue arâ aidylymo. Tâwinduadylymo iray, “Kunwym Deus, koendonro lelâlâ âmâ, merâ podo xina nhânyly mâmundulygue” tâkezemo Deusram. Alâpylâ podo sâtâny modo aguely: “Kunwym Deus, koendonro lelâlâ âmâ, xirâ tâzewily kain-hoem mâmunduhobyry wâgâ” tâkezemo lâpylâ Deusram warâ.

<sup>7</sup> Jesus mawânkâ kâeni, kuturim warâ. Tarâ onro anaym kydawyly, mâkâ ize ato aiese, ize kydato aiese inkâba. Kyigueho, kyiguepa kito warâ kinduakewâbyra kurâ, ize kydawylygue kulâ. <sup>8</sup> Tarâ onro anaym kydawyly ara, Kywymâry Jesus ize ato ara lelâ aieniem tarâ kydawyly, ize kydato ara kulâ ainiem inkâba. Kyigueduo kulâ mâkâ agâpa kidyly kitaymba ise kurâ; kâensezelâ mawânkâ ise mâkâ. Awylygue Kywymâry Jesus xurâempa kipyra kydawyly ise, igueypyem, igueypyemba alelâ. <sup>9</sup> Jesus Cristo tâigueze, kurâem tâitonze olâ akâwâm, kuturin-em itoem. Iguewâtyby modo, iguedânry modo alelâ iwymâry mâkâ. <sup>10</sup> Idânârâ âmaemo Cristo eynynâ âjipemugu lelâ. Tâwâlâ wâne tâzewily modogue typynigueim mawylymo, podo sâni mawylymo warâ, idânârâ âyanmo auguely. “Tâtunâguezeba itaungâ. Cristo eynynâ âpemugumo kâzewentâdaundâ. Xirâ enanâguewâdaungâ. Xypyry etay idânârâ ise Deus enado kydawyly, kywâgâ agueday.”

<sup>11</sup> Deus itaumbypyry iweniby agueho ara ise aidyly:  
“Idânârâ onro anano modo ienado âzeguhoam isemo,

iwymârymo wawyly enehonze akaemo.

“Deus lelâlâ âmâ, eagonro lâpeba” kezemo yam.

Urâlâ “Warâ ise aidyly” keim’ kewândymy Deus”  
warâ iwenibyem awyly Deus itaumbypyry awo wâgâ.

<sup>12</sup> Augueondyly, idânârâ ise Deusram kydâkaduwâdyly aguitobypyry, aguykehobyry warâ wâgâ.

### *Âkelomo Deus izepa ato anhetoem akâienehonwâdaundâ*

<sup>13</sup> Awylygue, kagonro kiunâguedyly kyjimonre. “Cristo eynynâ ypemugu Kywymâry aguehobyry nhakadoem aienehoim agânhepyra ise urâ” kykenre tâwâlâ. Âjihodaigâdoem tuhu idâwanxi iedyly waunlo ara mawânrâ. <sup>14</sup> Kywymâry Jesus âpaunzedo aralâ kâpaunzedyl. Awylygue MON alelâ kâinly, kândyly warâ; pyni tâinzenry, podo tâsenry warâ lâpeba. Tâlâ olâ Jesus einwânni wakeim modo: “Podo kiântuo, Deus kagâ iewiâpaze” keim. Awylygue âdaunloenlâ podo nhunru nâpyramo. Tiântuomo, Deus ezewenry sakanibyryem âdutulymo.

<sup>15</sup> Warâ âyanmo auguely, pyni MON alelâ einrim modoram. Mâkâ tâzewilygue lelâ typynigueim, podo mândylymo nhedyly watay, tiândyse tâise mâkâ. Nhâdyly-ro watay, âjityenze mâkâ, tâsenryem awyly tiuntuduo. Arâ amânhenehondromo, Cristo eynynâ âpemugumo xurâem koendâ amidylymo mâkeba. Mâinlymogue kulâ, mânylymogue kulâ warâ âpemugumo inakanhe aitoem akâienehonwâdaundâ. Emakeze Cristo iguehobyry xurâem koendonro aietaungâ. <sup>16</sup> Âmaemoem koendonro wâgâ ânguy inakanhe kulâ aguehoem akâienehonwâdaundâ. <sup>17</sup> Aguehobyry kiankabyra kydawyly, âkelo agâ kyewiâpabyra kydawyly, Deus Ispiritury kagâ awylygue kuomaru warâ, Deus kywymâryem awyly enehonri, kieinly, kienly warâ mâkeba. <sup>18</sup> Kagâ tuomare Deus, aguehobyry ara lelâ aguisezedyly-ro watay, kurâ domodo kywâgâ koendâ lelâ aguezemo lâpylâ.

<sup>19</sup> Aituo kagonro agâ koendâ kyenehoim lelâ aguyjiene, kagonro agâ âdapa lelâ kitoem. Kagonrodo Jesus nheinwândyly imâem ieni lelâ aguyjiene. <sup>20</sup> Idânârâ kurâ Jesus einwânni modo agâlâ Deus, mâkâ kyize ato ara lelâ kitoem. Aituo, Cristo eynynâ âpemugu Deus xurâem inakanhe nhutuly akâiedaundâ, tâsenry, tâinzenry warâ lâpeba.

Mânklymogue, mâinlymogue warâ, âpemugumo adiendyseba ato amânhenehonduomo olâ iozepa amidlymo. <sup>21</sup> Iozeno âpemugu Cristo eynynonro xurâem adyesenry amânhenehomba mawyly. Iozeno kuru podo mâmpyra mawylymo, vinhu mâenypa mawylymo warâ, âdylâ Cristo eynynâ âpemugumo inakanhe aitoem amânhenehomba mawylymo warâ. Arâ amidlymo, Deusram mâenwentânehomba mitomoem. <sup>22</sup> Awârâ modo wâgâ arâ âunâgumo-ro watay. Deus, âmâ alelâ xutuim nidâ. Awârâ modo wâgâ agonrodo agâ mâtunâguebyra mitomoem. Kuoday tutuzema kurâ Deus ize ato adyese kydawly, kydadahuliwâbyra kurâ. <sup>23</sup> “Âdara wânkâ urâ sâse, kâmpyra” myguelymo watay, mântuomo, Deus mâinwâmpyra midylymolâ, ago lelâ mâinwâmpyra mâtomobyry wâgâ. Kieinwâmpyra kulâ aguidyly watay, Deus kieinwâmpyra kydawlylâ mawânrâ awârâ.

## 15

### *Kagonro modo kyzon-honwanâne*

<sup>1</sup> Kurâ ton-honre lelâlâ Jesus einwânni modo mâkâ ton-honremba einwânni modo kienwiâsedaymba kine. Kydurunemo lakuru, koendâ nhutuhomoem, ton-honrenry isejiguy sanâdylyem kienmawyadâdylo waunlo ara. Xurâmoem koendonro aguyjiene, kurâem lelâ waypa. <sup>2</sup> Cristo eynynâ kypemugudo xurâem koendonro aguyjiene, iomazeââimo warâ. Awârâ aguiendyly, imâem Jesus Cristo nheinwânsezedomoem. <sup>3</sup> Turâem kulelâ aidyly nitaymba akâwâm Cristo; warâ Salmos wâgâ iwenibyem awyly: “Âwykedaymo, ywykelymo-ro waunlo ara lâpylâ ani” warâ iwenibyem awyly. <sup>4</sup> Idânârâ Deus itaumbyry iweniby modo, konomedâdoem myakâwâm âjiwenioly. Iweniby kintainduo, tâzeon-hondâze kurâ, kydâsenagazedyly kienmaen-hoem, Jesus einwândyly kinmopalâ.

<sup>5</sup> Deuslâ kon-honwanâni, kydâsenagazedyly kienmaen-hoem, einwândyly kinmopa kitoem warâ. Deus agâ adâkeze inanry urâ âwâgâmo: “Pabai, Roma donro modo âynynonro modo eon-honwanâgâmo, tagonro xurâem koendâ lelâ aitomoem, Jesus Cristo aitobyry ara” uguelly. <sup>6</sup> Arâ âwâgâmo Deusram auguelly, tokaleom âmaemo-ro waunlo ara, Kywymâry Jesus Cristo nhunwym monhomaendomoem.

### *Unâ koendonro idânârâ kurâ domodoem tâzegatuze*

<sup>7</sup> Cristo eynynâ âpemugumo kâjimetaundâ, âkeloem agâmo ezewenrymo watay. Tâpyneze lelâ itaungâ eagâmo, Cristo âwynedomo ara. Koendâ mâzedlymo tientuo, idânârâ ise Deus nhehoguedylymo. <sup>8</sup> Saguhom Deus aguewândymy xina idamudo Abraãooram, Isaquenra, Jacóram warâ: “Igonose urâ âpemugudo emawyadâni, emakeim warâ” kewândymy. Awlygue, Cristo âewyly judeu domodo emawyadâniem, emakeinhe warâ itoem, adâkehobyry adyese lelâlâ tawyly Deus nhenehon-hoem eyanmo. Âewyly myakâwâm judeu domodo xurâem koendonro aiese. <sup>9</sup> Âewyly myakâwâm judeu keba modo, “Pabai, koendonro lelâlâ âmâ, xina tytyenze mawylygue” Deusram kehomoem. Deus itaumbyry awo wâgâ iwenihobyry ara ani aidyly.

“Judeu keba modo duay wawyly ume,

âwâgâ koendâagueze urâ.

Igâtuze urâ, omazeândoem”

warâ Davi inwenibyem awyly.

<sup>10</sup> Xirâ Moisés aguehobyry iwenibyem lâpylâ Deus itaumbyry awo wâgâ:  
“Amaemo judeu keba modo,

Deus induakeyby modo agâ ohomaendaungâ”

warâ iwenibyem awyly.

<sup>11</sup> Davi aguehobyry Deus itaumbyry awo wâgâ iwenibyem lâpylâ:  
“Idânârâ âmaemo judeu keba modo,

Kywymâry iomazeândaungâ.  
 Idânârâ kurâ domodo,  
 Deus koendonro awyly wâgâ imâem aguewâtaungâ”  
 warâ iwenibyem awyly.  
 12 Isaías inwenibyem lâpylâ Deus itaumbyry awo wâgâ:  
 “Jessé ipemugu âese\*.  
 Judeu keba modo iwymâryem ise Deus ingonodyl.  
 Mâkâ tâmakely inwânwânsemo”  
 kely myakâwândy inweniby Jesus wâgâ.

{Xirâ saguhobyry modo inweniby kâinwenily, saguhoem inwenibymolâ xirâ ume aini awyly mâuntuhomoem.}

13 Deuslâ olâ xutuen-hoim mâtâ kydâsemagueho emakeze lelâlâ kydawyly, mâtâ kinwânwânyly. Mâkâ tâinwânsse mawylymogue, toenzepa omazeânehondyzemo wawyly; tâkuâgueba âenehondyzemo urâ warâ, âdy ikuâdânímo peba itoem. Deus Ispiritury agâmolâ. Ize urâ, mâuntulymo lelâlâ idânârâ Deus koendonro âmaemoem “Xuduze urâ” tâkehobyry aiese awyly.

### *Paulo judeu keba modoram unâ iwâkuru egatuim*

14 Cristo eynynâ ypemugudo, koendâ tutuze urâ, agonromo agâ koendâ lelâ mâzedylymo awyly. Deus wâgâ koendâ tutuze mawylymo, agonromo xurudyly, eon-honwanâdyly warâ mawylymo. 15 Warâ olâ keankâ kâpaunzedly: “Deus wâgâ koendâ tutuzemo lelâlâ wâne, tiuntuyby nenanânehomba itomoem olâ kâinwenily” uguely keankâ âwâlâ. Awylygue xirâ âyanmo kâinweniday, âdy koemptyra wawyly, Deus mawânkâ xirâ iewanu koendonro agânhetoem uduakeim.

16 Jesus Cristo emaryem akâwâm Deus uduakely, judeu keba modoram tâdâsemaguely wâgâ unâ kâengatuhom. Jesus mânwântuomo, Deus imakelymo tâgatuze urâ. Arâ lâpylâ mawânkâ Deus mâtâ xurâem itomoem anhedylymo. Deus Ispiritury wâgâ akaemo tywykenry ara awylymo, Deus xurâem. Deus enado kurâ domodo eynynâ aguewâni modo, mâtâ xurâem koendonrolâ eyam nhegamelymo, arâ lâpylâ Jesus einwânni modo Deusram kâengamely-ro warâ.

17 Jesus Cristo agâ tokaleoem wawylygue, toenzepa womaru xirâ âwanu, Deus aguehobyry agânhedylygue. 18 Tyanunepa auguely ywâgâ Cristo anhetyby wâgâ. Agui judeu keba modo Deus nheinwântoem adyenehonze mâtâ. Auguely tydasemo, agânhekyly tâensem warâ; tientuomo, xurâem tâidyse idylymo lâpylâ. Awârâ aidyly auguehobyry wâgâ, awitobry wâgâ warâ. 19 Deus Ispiritury yagâlâ itoem aguewâm. Awylygue mâtâ eon-honrugue adyesenry modo, kurâ domodo adawihoem alieni warâ agânhedyly. Aituo imâem tiuntudyze idylymo Deus wâgâ. Tadakobâze kâinane urâ, unâ koendonro Jesus wâgâ egatuze. Âdykâingâ udâhobyrydâ, tâgatuze lelâ urâ; Jerusalémdâlâ kadaguly, iepagudyly Ilíria eynynâ. 20 Toenzepa xirâ unâ kâengatudyze wawyly, Cristo wâgâ aguely idatânrý modoram. Idanipyry modoanlâ kâengatuly-ro watay, âkelo nhaunâtyby âtâ itâdyly kâenwanikely waunlo ara kulâ tâise. 21 Warâ iwenibyem awyly Deus itaumbyry awo wâgâ:

“Âzeoze Deus âdykâ aguely idatânrý modoram, xutuzemo warâ.  
 Nhutulymoenlâ maise âzegatuoly”  
 kely myakâwândy Deus, Isaíasram inwenien-honly.

### *Paulo Romaram tâtâdyze itobyry*

22 Toenzepa udâdyse tâise urâ âyanmo IU ise; nudupa olâ udâhoem, myarâ, myarâ warâ Cristo wâgâ unâ idatânrý modoram egatuze udâly awylygue. 23 Iweâma olâ

\* 15:12 Davi nhunwym myakâwândy Jessé.

Kywymâry Jesus xurâem tarâ kâsewaniho nâdypygueândâ. Inepalâ wâne keanra ise udâly; iweâpalâma nhesemo udâdyse wawyly. <sup>24</sup> Espanharam udâhogue iweâpa widyse urâ agâmo, âwynupygueândomoem. Myarâ yaindyly iray, âdylâ ipa wato yam mâundulymo ize lâpylâ ise urâ, koendâ lelâ udâhoem.

<sup>25</sup> Âyanmo udâly iraynâ, Jerusalémram wao ise waunroem udâly, tonlo Deus xurâ âdy pebaom modo idinheruru xuduypy sase. <sup>26</sup> Jesus einwânni modo Macedônia eynynonro, Acaia eynynonro modo warâ mawânkâ dinheru tindâtyguyby xuduim, tonlo modo Cristo eynynâ typemugudo xurâem. Ize tawylymoguelâ arâ aidylymo. <sup>27</sup> Ânguy aitomoem aguewâpyra. Tiundudyse tawylymoguelâ nhudulymo. Macedônia donro modo, Acaia donro modo warâ judeu mâkeba akaemo; Jesus tâinwânsimo olâ ani, judeu domodo Jesus wâgâ unâ nhegatuly tindatuo. Saguhoem akaemoem âdy ipa atomo tuduze ani judeu domodo; “âdy ipa atomo” ugueho, Jesus xunâry augueho. Iwerâ akaemo judeu keba modo, judeu domodo ipa ato xuduim. Iozelâ akaemo judeu domodoram dinheru nhudulymo. Turâem anhetybymolâ nhemyombâguylymo tâlâ tatomogue.

<sup>28</sup> Jerusalémram yaindyly-ro watay, idânârâ dinheru idâtyguyby eyanmo xuduze urâ. Târâ iewanu kâympygueânduo, Espanha yan-yam ise udâly. Udâdaylâ ise âydâmo iepagudyly. <sup>29</sup> Awyarâ yaintuo, ohomaenze kurâ, idânârâ kurâem koendoro lelâ Cristo anhetyby wâgâ.

<sup>30</sup> Kywymâry Jesus Cristo kagâlâ awylygue, kagonro agâ kydâpynedoem Deus Ispiritury adyenehonze awylygue warâ, ynynâ Deusram mâenkadomoem âurudylymo. Ynynâ Deus agâ amyguepa tâiseba itaungâ, âurutomobyry ara. <sup>31</sup> “Pabai, Paulo mâemptyra tâiseba ikâ, Judéia eynynâ Jesus einwântâny modoram nâzenagazeoba itoem. Jerusalémdâ Deus xurâ modo tuomare lelâ mârâ dinheru igonotyby mâkâ nhakyly nemakemo warâ” kewâtaungâ Deusram. <sup>32</sup> Mâenkadylymo, Deus ize ato ara-ro watay, tuomare lelâlâ ise awyarâ yaindyly. Ekobyzegueze wao urâ agâmo; eon-honwadybyem ise iegasely, Kywymâry Jesus ewanu aieseze. <sup>33</sup> Deusram kâenkadyly, koendâ mawylymo ume, koendâpa mawylymo ume alelâ, koendâ âetomoem, mâkâ mawânkâ koendâ tadowly sodo agâmolâ mâkâ warâ.

## 16

### *Paulo âsedaelenguhobry*

<sup>1</sup> Cristo eynynâ kypemugu Febe âyanmo kâingonokyly. Pekodo koendoro merâ. Jesus einwânni Cencreiadâ âtâdyguyim modo emawyadâni merâ. <sup>2</sup> Awyarâ saintuo, koendâ etaungâ, Kywymâry Jesus xurâ lâpylâ mawânkâ merâ. Koendâ edaenkuwâdaungâ, Deus eynynonro modo tagonro agâ âsedaelenguho ara. Ânguy nemawyadâbyra nipyra merâ, toenzepa tâmawyadâze, iemawyadâdâ lâpylâ. Awylygue, âdylâ ize-ro watay, eyam âunduwâtaungâ.

<sup>3</sup> Priscila, isolâ Áquila warâ ywynu nawâdâmo. Cristo Jesus xunâry egatulyem iewanu ume toenzepa iemawyadâdâ akaemo. <sup>4</sup> Ienagazeze kewâni modo amaymba iemakeze tâkewâday âdyolymo agâ ani. “Koendoro lelâlâ âmaemo, urâem amânhetybymo wâgâ” uguelly eyanmo. Idânârâ judeu keba modo Jesus einwânni, yagâ tâseinwânzemo awârâ wâgâ. <sup>5</sup> Ywynu sawâtaungâ uguelly lâpylâ Jesus einwânni modo Áquila, Priscila warâ etydâ Deus itaumbypy idase âtâdyguywâni modoram.

Yataen-ho kâinwyneguy Epêneto ywynu nawâdâ, Ásia eynynâ waunroem kuru Cristo einwânni. <sup>6</sup> Maria lâpylâ kâendaenkuly, âmaemoem toenzepa âsewaniby. <sup>7</sup> Andrônico, Júnia warâ lâpylâ kâendaenkuly. Yara, judeu lâpylâ akaemo. Jesus wâgâ augueduo kadeia odaxi kâiehobygueduo, yagâlâ ani akaemo etagu. Jesus kâinwâmpyra wawyly umelâ akâwâm akaemo Jesus nheinwândyly. Toenzepa âdutuorim akaemo Jesus xunâry egatuim awylymogue.

<sup>8</sup> Amplíato ywynu nawâdâ, yataen-ho kâinwyneguyl Kywymâry Jesus einwânni.  
<sup>9</sup> Urbano ywynu nawâdâ lâpylâ. Cristo ewanuem xina atay, xina agonrolâ ani mâkâ. Yataen-ho kâinwyneguyl Estáquis kâendaenkudyze lâpylâ urâ. <sup>10</sup> Apeles kâendaenkuly lâpylâ, Cristo tâinwânse lelâlâ tawyly enehoimbyry. Aristóbulo ety odano modo kâendaenkuly lâpylâ. <sup>11</sup> Herodião kâendaenkuly lâpylâ, yara judeu lâpylâ mawânkâ. Narciso ety odano modoram ywynu kawânehonly lâpylâ, Cristo eynynâ ypemugudo lâpylâ mawânkâ.

<sup>12</sup> Trifena, Trifosa warâ kâendaenkuly. Imâem tâsewanize akaemo pekodo modo Kywymâry Jesus xurâem. Yataen-ho Persideam ywynu kawânehonly, Jesus xurâem imâem tâsewanize lâpylâ mawânkâ. <sup>13</sup> Rufoam ywynu kawânehonly, Kywymâry Jesus xurâem tâsewaniday, ton-honre lelâ mâkâ âsewanily, tâkeze einwânni modo. Rufo ise kâendaenkuly lâpylâ; tymery ara kehoem wonnipyry. <sup>14</sup> Asíncrito, Flegonte, Hermes, Pátrobas, Hermas, idânârâ Cristo eynynâ ypemugudo ywynu nawâdâmo. <sup>15</sup> Filólogo, Júlia, Olimpas, Nereu, eaundulâ warâ kâendaenkuly. Idânârâ Deus xurâ modo ywynu nawâdâmo.

<sup>16</sup> Âwaparymodâ tohonuguze agonromo agâ âsedenguâdaungâ, agonromo agâ tâpyneze mawylymo mâenehon-homoem\*. Idânârâ Jesus einwânni modo idaenkulymo lâpylâ.

### Tâdâturudo xypyry

<sup>17</sup> Aurudylymo, âmaemo Cristo eynynâ ypemugudo. Jesus einwânni modo âjigue kulâ âtuebadoem aienehonze kewâni modo agâ, Jesus einwândly ekuâdâni modo agâ, Kywymâry Jesus wâgâ enomedâdobyry mâindatybymo wâgâ inakanhe agueim modo agâ warâ tonomeguelâ itaungâ; sodokewâdaungâ. <sup>18</sup> Arâ aini modo, Kywymâry Jesus Cristo aidysemo ato ara inkâba aidylymo, adiendyse tato kulâ anhekylymo. Tunâgoengue kehoem tâinwântoem aguelymo; kewâdylymo kulâ olâ. Warâ tâsemaguelxutudânrý modo nhenokudylymo.

<sup>19</sup> Åkelo anaym einwânni modo adâkezemo: “Jesus xurâ Roma donro modo Jesus aguehobyry aniempyra nipyramo” tâkezemo. Åmaemo Roma donro modo Jesus einwânni modo arâ igarymo kâindadylygue, toenzepa womaru. Koendonro modo lelâ olâ koendâ mâuntudyzemo wato, amânhedysebamo urâ, eagonro modoram akâienehonwâdaundâ lâpylâ warâ. <sup>20</sup> Deus mawânkâ koendâ tadauly sodo. Inepa ise mâkâ Satanás eon-honru nhainly, âdaunloenlâ inokubyramo itoem.

Âmaemoem Kywymâry Jesusram kâenkadyly, koendâ nhetomoem.

<sup>21</sup> Timóteo idaenkulymo. Yagâ Jesus xurâem tâwaneim merâ. Lúcio, Jasão, Sosípatro warâ iwynumo manwâtomoe aguelymo; judeu lâpylâ asaemo, urâ Paulo judeuem wato ara.

<sup>22</sup> Urâ, Tércio, xirâ kata Paulo aguehobyry iweninri. Ywynu sawâtaungâ uguely âyanmo, urâ, aramo, Jesus xurâ lâpylâ wawylygue.

<sup>23</sup> Urâ Paulo augueondly. Gaio idaenkulymo lâpylâ, ety oday wato. Merâ etydâlâ inanry Jesus einwânni modo âtâdyguylmo Deus itaumbypy idase. Erasto tywynu nhawânehonly lâpylâ. Xirâ xidadâ oday dinheru xynanâni merâ. Quarto, Cristo eynynâ kypemugu, idaenkudyzemo lâpylâ.

<sup>24</sup> [Idânârâ âynynâmo Kywymâry Jesus Cristoram kâenkadyly, koendâ lelâ nhetomoem. Åkealâ xirâ.]†

### Deus wâgâ koendâ aguykenre

<sup>25</sup> Deus wâgâ koendâ aguykenre. Mâkâ kulelâ ton-honre Jesus einwândly kinmopa kitoem aienehoim. Xirâ wâgâ auguezesedyly, unâ iwâkuru tâdâsemaguelx Jesus Cristo wâgâ kâengatudo. Saguhoem iweâpa lelâlâ xirâ unâ iwâkuru Jesus Cristo wâgâ

\* <sup>16:16</sup> Saguhoem tohonuguze âsedenguâdaungâ. Iwerâma tâpymogoynzetâdâsedenguly. † <sup>16:24</sup> Idânârâ livru saguho modo wâgâ iwenibyemba xirâ.

tutuwâduneba myakâwâm, toenseim, tâgatuzenry emyenro mykâinane. <sup>26</sup> Saguhoem, Deus itaumbyry egatuwâni modo tâdâsemagueho wâgâ aguehomo koendâ tutuzeba myakâwândy. Akaemolâ nutubamo mawânkâ myakâwândy âdy mâtâ tiengatuly awyly. Iwerâ olâ xutuen-honribryem Deus Iguedânry koendâ kehoem âdy tâgatuzeim awyly. Tâinkâ lelâba tytaumbyry iwâkuru xutuhoem, idânârâ nheinwântomoem agueho, nakabyra itomoem warâ.

<sup>27</sup> Tokalelâ Deus. Tonomegueim awyly wâgâ, koendonro awyly wâgâ, tohogueim awyly warâ aguykeho itoem aunlolâ, kurâem Jesus Cristo anhetyby wâgâ.

Xirâ kulâ âyanmo kâinwenily.

Alâ ise.

Paulo

## 1 CORÍNTIOS

### Paulo Saghuo Kata Inweniby Corinto Donro Modoram

Xirâ kata wâgâ inwenily Paulo nhangahu odaji iemâmy Deus. Awylygue Deus itaumbyrylâ xirâ Paulo inweniby, âdara Deus xurâem adâjidyly wâgâ Corinto donro modo nhutuhoem. Jesuslâ myakâwândy tywâgâ Paulo aguehoem agueim. Jesus xunâry egatuze azagâ tâgasely ieto wâgâ Corintoam myakâwândy Paulo idâly (Atos 18dâ). Dezoito nunâ awârâem myakâwândy eagâmo nhakadyly. Agui myakâwândy Jesus einwânni modo, Deus ize ato wâgâ koendâ nutubamo olâ myakâwândy. Awylygue Jesus tyeinwândyly umelâ, izepa ato anhedylymo. Awylygue xirâ kata wâgâ mâtâ xidadâ oday Jesus einwânni modo xurutobyrybe awyly.

Pauloram iweniwânmomy, mâtâ modo wâgâ lelâba turutoem. Imâem myakâwândy tiuntudyze awylymo Deus ize ato ara tâitomoem. Capítulo 7dâ todohogüinly wâgâ, capítulo 8dâ xygatyby modoram pyni egameyby sâdyly wâgâ, âdalâ kulâ Jesus einwânni modo aidyly wâgâ warâ myakâwândy Paulo inwenily. Capítulo 12dâ, 14dâ warâ, Deus enomerymoem nhuduypy wâgâ Paulo eyanmo iweniwânmym. Capítulo 13dâ âdara kagonro agâ kydâpynedyly awyly wâgâ Paulo inweniby tâjitainhoze. Capítulo 15dâ Paulo inweniby âdara, kyigueduo, Deus kurâem kyetondyl wâgâ aguely, kiuntuhoem.

#### *Aguely adaguho*

<sup>1</sup> Urâ Paulo, xirâ kata âyanmo iweninri. Cristo Jesus mawânkâ uduakeim, ugononi warâ, mâtâ xurâem aguenriem; xirâ âwanu mawânrâ Deus agânhedyse ato. Sóstenes, Cristo eynynâ kypemugu, idaenkulymo lâpylâ. <sup>2</sup> Âmaemo Corintodâ Jesus eynynonro modoram xirâ kâingonodyly, Deus eynynonro modoram. Deus induakeyby âmaemo, xurâem mitomoem, Cristo Jesus agâ tokaleom ara mawylymogue. Âmaemo kulelâ inkâba, tâinkâ lelâba, idânârâ Kywymâry Jesus Cristo ehogueni modo Deus induakeybybe lâpylâ, Deus xurâem itomoem. Kurâ kywymâry mawânkâ Jesus, akaemo iwymâry lâpylâ warâ.

<sup>3</sup> Âynynâmo Kunwym Deusram, Kywymâry Jesus Cristoram warâ kâenkadyly koendâ nhetomoem, akaladânímo peba nhetoem warâ.

#### *Jesus einwânni modoram Deus koendâ awyly egatuhobyr*

<sup>4</sup> Aunlolâ Deus agâ auguely: “Pabai, koendonro lelâlâ âmâ, âynynonro Corinto donro modoem koendonro amânhetyby wâgâ, Cristo Jesus tâinwâñse awylymogue” tâkeze winase. <sup>5</sup> Jesus Cristo xurâem mawylymogue, Deus imâem anhedyly âmaemoem, ize ato ara mitomoem. Itaumbyry imâem mâtuguehomobyry tânehonze xirâ unâ iozeno, tâinwâñseim lelâlâ awyly. <sup>7</sup> Awylygue Deus Ispiritury inomerymo nhuduypybe mawylymo, Deus ewanuem amitomoem, Kywymâry Jesus Cristo odopâdyly mâtuguehomobyry ara. <sup>8</sup> Nhetâmolâ ise Kywymâry Jesus Cristo odopâdo odaji einwândyly mâtuguehomobyry mitomoem, tâwentâguezeba enadoram mâtuguehomobyry. <sup>9</sup> Âduakemo Deus, imery Kywymâry Jesus Cristo agâ tokaleoem mitomoem. Adâkehobyr adyese lelâlâ Deus. Awylygue nhesemo lelâlâ, Jesus odopâduo tâwentâguezeba mitomoem.

#### *Corintodâ Jesus einwânni modo tunâry wâgâ nâseinwâmbrya atobyr*

<sup>10-11</sup> Cristo eynynâ ypemugudo, Kywymâry Jesus Cristo aguehobyryem wawylygue, ton-honre kehoem âurudylymo. Cloé ipemugudo ewy âwâgâmo yam negatumo. “Corintodâ Jesus einwânni modo tuduekemo, nâseinwândaymbamo warâ” nyguemo. Awylygue, koendâ lelâ itaungâ; agonromo agâ koendâ lelâ âseinwândaungâ; tokalelâ angahumo oday âunârymo nidâ warâ. <sup>12</sup> “Mâseinwâmbyramo” uguely, tâlâ mawânkâ, “Paulo eynynonro kurâ; mâkâ aguely lelâ kyjidan” kewâni modo. Tâlâ, “Apolo eynynonro kurâ; mâkâ aguely lelâ kyjidan” kewâni modo. Tâlâ lâpylâ, “Pedro eynynonro kurâ; mâkâ aguely lelâ kyjidan” kewâni modo. Tâlâ, “Cristo eynynonro kurâ. Âdaunlo uguondo aguely kulâ kindataymba ise kurâ” kewâni modo warâ. <sup>13</sup> Idânârâ tainwânni modo emakeim Cristo. Mâseinwâmbyra mawylymogue, Cristolâ mâempajiwâguylymo-ro waunlo ara. Koendonro keba awârâ-ro warâ! Urâ kebama akâwâm imakezemo kruz wâgâ igueim, Cristolâ! “Paulo kainwânkly” myguelymo kebama ani, batiza mitaymo. “Jesus Cristo tainwânsse urâ” myguelymo. Awylygue, âjigue mâseinwâmbyra mawylymo imowâdaungâ.

<sup>14</sup> Alâ olâ ani Crispo, Gaio warâ kulâ batiza kânhekyly awyly, Corintodâ wawylyume. <sup>15</sup> Agui batiza kânchedyly-ro watay, “Paulo eynynonro urâ, batiza yetobyry wâgâ” tâkezemo mawânkâ keanra tâise. <sup>16</sup> (Estefanas, ety odano modolâ warâ batiza tyese lâpylâ mynra urâ. Ilâpyryem olâ ânguy batiza kânhetobyry kâenanâgueba urâ.) <sup>17</sup> Unâ tâdâsemagueho wâgâ agueim kâengatuhoem ani Cristo ugonodyly, agui kurâ domodo batiza kânhetoem inkâba. Iwâgâ augueday, idânârâ nhutulyenlâ auguely, nhutudânrymoem kehoem inkâba. Imâem âsenomedâdyby modo agueho ara, tutuzenryem kehoem auguely-ro watay, unâ kâmakeze Cristo iguehobyry nutuwâbyramo tâise. Âdaitoemba kulâ Cristo iguely-ro waunlo ara tâise.

### *Cristo kruz wâgâ iguehobyry wâgâ Deus tonomery, ton-honru warâ nhenehonly*

<sup>18</sup> Cristo einwântâny modo kruz wâgâ iguehobyry unâ tindatuomo, “Âdy mâkeba awârâ unâ. Tuândy modo xunâry kulâ awârâ” tâkezemo. Awylygue ânwa iozeno imyim ara awylymo; typygueba kehoem Deus agâpa tâjito oze akaemo. Kurâ tâmakeduneim modo olâ tutuze awârâ unâ âkeá lelâlâ awyly. “Cristo kieinwântuo, Deus eon-honrugue kâmakely awyly” adâkeze kurâ. <sup>19</sup> Warâ iwenibyem Deus itaumbryy awo wâgâ: “Tâpaunzedo lelâ iozeno awyly âdutuwâni modo iozepa âpaunzedo awyly enehonze urâ. Tonomeguneim modo enomery âdyem nipyra itoem aiese urâ” kewândymy Deus.

<sup>20</sup> Tâlâ lelâlâ toenzepa tonomegueim modo; enomerymo keba olâ emakerimo. Tâlâ lelâlâ tâzezewenry Moisés inweniby koendâ kehoem xutuim; awârâ keba olâ emakerimo. Tâlâ lelâlâ koendâ kehoem tunâgueim modo; awârâ keba olâ emakerimo. “Tuândy” tâkeze Deus, tonomeryguelâ âsemagueze kewâni modoram, enomerymo âdyempa ienipyryem tawylygue.

<sup>21</sup> Tonomegueim lelâlâ Deus. Idânârâ tiungutay, warâ myakâwândy xunâry: “Tâwâlâ ise toenzepa enomegumo, tonomerygue kulâ utubamo olâ ise” kewândymy. Jesus einwânni modo tienmakely myakâwândy nhutuly. Xirâ unâ tâdâsemagueho mawânrâ xina nhegatuly. Deus eynynâbaom modo xurâem olâ âdy keba awârâ unâ. <sup>22</sup> Tâlâ toenzepa judeu domodo ewy Jesus wâgâ xina agueho einwântâny. “Deus eon-honrugue pylâ adyesenry ajetaungâ. Arâ ise Deus itaumbryy mâengatulymo xina nheinwândyly” kelymo. Toenzepa lâpylâ judeu keba modo xina nhegatuly einwântâny. Koendâ kehoem tunâgueim aguely waunlo lelâ tindadyse atomo. Xurâmoem, Jesus einwândylygue tâdâsemagueley kely âdy mâkeba. <sup>23</sup> Cristo inakanhe aguitobyry xygakeze kruz wâgâ iguehobyry olâ xina nhegatuly. Judeu domodo enanaji, inakai kulâ xirâ unâ, Messias Deus Ingonytyby kruz wâgâ iguehobyry neinwâmpyra awylymogue. Judeu keba modo xurâem, âdy mâkeba xirâ unâ, “Kâmakeze arâ anitaymba tâise Deus” tâkezemo.

<sup>24</sup> Deus turâem ingâsedaymby modo olâ tutuze unâ iwâkuru lelâlâ awyly, judeu, judeu keba alelâ. Cristo kruz wâgâ iguehobyry wâgâ myakâwâm, Deus ton-honru, tonomery warâ nhenehonly. <sup>25</sup> Tâlâ, “Deus xunâry, Cristo kruz wâgâ iguehobyry warâ âdyem nitaymba” kewâni modo. Arâ kâmakehoem Deus xunâry olâ koendonro kuru, xirâ anano modo xunâry takaze kehoem. Tâlâ wakewâni modo: “Ton-honreim mâkeba myakâwâm Deus, kruz wâgâpa Jesus netyba mawânkâ myakâwâm” kewâni modo. Deus eon-honru olâ idânârâ kurâ domodo eon-honru takaze kehoem.

<sup>26</sup> Cristo eynynâ ypemugudo, enanâguewâdaungâ âdaunlopyry mawylymo; kaikânrobyry kulâ âmaemo, Deus âgâsedylymo iraynâ. Aguipa kulâ akâwâm âduaymo âsenomedâdyby modo, pymâ modo, pymâdogue tydamudogueim modo warâ. Arâ mawylymo umelâ olâ ani Deus imakelymo. <sup>27</sup> Tonomeguenryem tutuzeim modo mawânkâ Deus turâem induakewâgyly. Arâ aidyly olâ tonomegueim modo âpybazoedem tuduakeba awylygue. Deus tâgaesenry modo, tydineruguenry modo warâ turâem induakely, tâgaruneim modo, tydineruguneim modo warâ âpybazoedem, Deus tuduakeba awylygue. <sup>28</sup> Deus turâem induakely tâgarenry modo, kurâdo âdyempa tâenseim modo warâ, xurâ keba modo âdyempa tâenseim, imâsedoem tientoem; âdyem nhetânrymo, âdyenlâ tientoem warâ. <sup>29</sup> “Deus iemakely, tonomegueim, ton-honreim warâ wawylygue” ânguy kepa itoem, arâ aidyly.

<sup>30</sup> Cristo agâ on-hoam lelâ mawylymo, Deus induakeyby mawylymogue. Cristo wâgâma Deus xurâem koendonroem kydawyly, xurâem kydawyly, idânârâ inakanhe aguitobyry xygakely warâ. <sup>31</sup> Jeremias inweniby Deus itaumbyry awo wâgâ enanâguewâdaungâ: “Mohomaendyze mataymo, Kywymâry anhetyby wâgâ lelâ ohomaendaungâ” warâ iwenibyem awyly.

## 2

### *Kâmakeze Cristo kruz wâgâ iguehobyry egatuho*

<sup>1</sup> Cristo eynynâ ypemugudo, âyanmo Deus itaumbyry egatuze Corintoam idâypyem, mâuntulymoenlâ ani auguely. Tutuzenryem inkâba ani auguely, akadâmo tonomegueim ara inkâba. <sup>2</sup> Âyanmo udâly iray, warâ ani âwâlâ auguely: “Corintodâ wawyly ume, Jesus Cristo wâgâ lelâ ise auguely. Kâmakeze kruz wâgâ iguehobyry ise augueho” uguely ani. <sup>3</sup> Âduaymo wawyly ume, ianugue, tadapâne ani urâ; ton-honremba ani kâdutuly. <sup>4</sup> Tonomegue tawyly egaeni modo ara inkâba ani unâ kâengatuly. Ienomery kâenehohoem kulâ imâem kehoem auguely witaymba ani urâ, akaemo aito ara. Ywâgâ koendâ amyguehomoeim kulâ ize matomo kulâ mâkeba keankâ augueho. Deus itaumbyry âyanmo kâengatudo, ywâgâ inkâba ani mâinwândylymo, Deus Ispiriturylâ ton-honrugue, mâinwântomoem aienehoim. <sup>5</sup> Awylygue Jesus Cristo mâinwândylymo, tonomegueim modo aguely mâindatuomo inkâba, ton-honrugue âduaymo Deus anhetyby wâgâ olâ mâinwândylymo.

### *Deus tonomegueim kuru*

<sup>6</sup> Jesus einwânni modo koendâ Deus itaumbyry xutuim modoram olâ Deus tâzenomery nhutuen-hoymby wâgâ adâkeze urâ. Deus ize ato agâ âseinwândâny modo enomery keba, xirâ anaym pymâ modo enomery keba warâ olâ xirâ tâzenomery kâengatuly. Idânârâ pymâ domodo pymâenlâ idâzesedyly nipyramo mawânkâ ise. <sup>7</sup> Awylygue xirâ tâzenomery Deus saguhoem ânguyram nhutuen-hondânrbyry wâgâ kâengatuly. Kurâem Deus nhekanâdyby koendonro wâgâ kâengatuly. Mâkâ agâ kydawyly ume, eagâlâ ise kydâzehogueoly. Arâlâ myakâwâny xunâry, onro tiungudyly iraynâ. <sup>8</sup> Xirâ onro

anaym pymâ domodo nutuwâbyramo myakâwâm âdara Deus xunâry awyly. Tutuzemolâro watay, Kywymâry Jesus Cristo koendonro, ton-honreim warâ kruz wâgâ nyâen-howâbyramo tâise. <sup>9</sup> Deus itaumbyry awo wâgâ iwenihobyry ara kehoem olâ aitybyem awyly.

“Tywyneni modoem Deus nhekanâdyby koendonro, mâtâ tywyneim lelâlâ,  
âdykâ ânguy nhetyby keba, indatyby keba,  
ânguy tyangahu oday xunâgobyry keba”

kely myakâwândy iweniby.

<sup>10</sup> Iwerâ olâ kurâ Deus xurâ modo tutuze, saguhoem Deus nhutuen-hondânrybyry, Ispiritury mawânkâ kagâlâ xutuen-honze. Tutuze mâkâ idânârâ Deus âpaunzedo, Deus ânguyram nhutuen-hondânry alelâ. <sup>11</sup> Kurâ lelâ âdy kyangahu oday kunâry xuturim, ara lâpylâ Deus nhangahu oday xunâry xutuim Deus Ispiritury lelâ awyly. <sup>12</sup> Kyangahu oday kunâgo, ize kydato warâ Deus eynynâbaom modo ara inkâba. Deus mawânkâ Tyispiritury igonomâ, tyangahu odano tunârygue konomedâdoem, kyam koendonro modo nhuduly wâgâ aguehoem warâ.

<sup>13</sup> Unâ xina nhegatuday, Deus Ispiritury tonomedâdoborylâ xina agueho, kurâ konomery mâkeba. Arâ mawânrâ âdakeze Deus Ispiritury tyam aguehobyry awyly, Deus Ispiriturybeom modoram xina nhenomedâdy. <sup>14</sup> Mâkâ Deus Ispiritury pebaom, Deus Ispiritury agueho tindadyse inkâba, xurâmo keba mawânrâ, âdy mâkeba xurâem. Deus Ispiritury lelâ iwâgâ kiuntuhoem konomedâni. <sup>15</sup> Mâkâ Deus Ispiriturybeom idânârâ Ispíritu nhenomedâdo tutuze. Mâkâ Deus Ispiritury pebaom olâ, Deus Ispiriturybeom modo nhangahu oday xunâry nutuba. <sup>16</sup> Warâ iwenibyem Deus itaumbyry awo wâgâ: “Ânguy mâkâ Kywymâry Deus âpaunzedo nutuwâbyra. Ânguy tonomeguneba, mâkâ xuruniem” warâ iwenibyem awyly. Kurâ kydâpaunzedly olâ Cristo âpaunzedo ara, Deus Ispiritury kagâ awylygue.

### 3

#### *Paulo, Apolo warâ Deus itaumbyry egatuim*

<sup>1</sup> Cristo eynynâ ypemugudo, Corintodâ agâmo wawyly ume, Deus Ispiriturybeom modo kâenomedâdo ara inomedâbyramo wakynre. Iamudo iwelo iazeypy ara kulâ ani âmaemo, Jesus Cristo einwândyly wâgâ mâuntuba mawylymogue. Awlylygue ani Deus Ispiritury pebaonram augueho aralâ auguely. <sup>2</sup> Tâjise tywanry lelâ tymery iwelo iazeypyram nhuduly, pyni modo neimpa awylygue, myara ani inomedâdylymo Cristo kieinwândyly adaguly ume konomedâdoguelâ, mâuntulymoenlâ. Ohondybyembama âmaemo mâuntudânymogue kehoem inomedâdomo idase. <sup>3</sup> Arâlâ âmaemo-ro warâ. Amânhedyse matomo âdyeselâ âmaemo; Deus amânhedysemo ato amânhedyseba âmaemo.

Agonromo tâlâ ato wâgâ tâsewânilzelâ âmaemo, agonromo agâ tâtuebazelâ âmaemo warâ. Deus amânhedysemo ato keba amânhedysemo awyly tânehonze awârâ. Jesus einwânni modo aito ara inkâba amidylymo. <sup>4</sup> Tâlâ âmaemo ewy, “Paulo eynynonro kurâ” kewâni modo; tâlâ lâpylâ, “Apolo eynynonro kurâ” kewâni modo warâ. Deus ize ato agâ âseinwândâny modo ara kulâ amidylymo awyly tânehonze awârâ.

<sup>5</sup> Xirâ enanâguewâdaungâ. Urâ, Apolo warâ Deus aguehobyry aieni kulâ xina. Deus âyanmo xina ingonodyly ani, itaumbyry âyanmo egaturin-em, Jesus mânwântomoem. Tâwanuem Kywymâry nhuduypylâ xina anhekylly. <sup>6</sup> Nady ewy emyenro mawânrâ Deus itaumbyry; urâ pylâ nady ewy etâni emyenro-ro, waunroem kuru Deus itaumbyry âyanmo egatuimbyry wawylygue, Jesus mânwântomoem. Apolo pylâ kâentâdyby ikuirim emyenro-ro; awyarâ âyanmo nâtâ; inomedâdâmo, imâem mâuntuhomoem. Etâni keba, ikuirim keba warâ olâ ago ieni, Deuslâ. Alâpylâ Deuslâ âugunimo, ize ato ara lelâ amisezedomoem.

<sup>7</sup> Deus tynrenseim kuru, mākâ nady etâni keba, ikuirim keba warâ. Arâ lâpylâ, urâ, Apolo warâ Deus itaumbyry egatuim, enomedâni warâ kulâ xina. Deuslâ mawânkâ kurâ domodo adâkehobypy nheinwânsedemoem aienehoim. <sup>8</sup> Urâ Deus itaumbyry âyanmo egatuly sagüimpypy, Apolo inomedâzezenimobyry warâ, Jesus mânwântomoem, Deus ize ato lelâ amânhetomoem warâ. Deus aguehobypy lelâ xina anhekyly, xina epywaze mâtaro warâ, ewanuem xina aitobyry ara. <sup>9</sup> Urâ, Apolo warâ adataen-ho kulâ xina, on-hoam lelâ olâ, Deus aguehobypy xina anhedyly. Mâtâ nady ewy etâni, eagonro pylâ ikuirin-ro waunlo emyenro xina; âmaemo awâtârâ Corintodâ pylâ âpa ezary emyenro-ro, xina âsewanihoem Deus nhuduupy.

Âmaemo Jesus einwânni modo, âtâ Deus intânehoymby emyenro âmaemo. <sup>10</sup> Yagâ koendonro kehoem Deus; ienomedâdâ ewanu agânhetoem. Deus ewanu waunroem kuru aiedyly kanguly ani awâtârâ Corintodâ. Unâ tâdâsemagueho ani âyanmo kâengatuly. Koendâ âtâ ehugâni emyenro urâ; isejiguy, enu modo, nhewandary warâ epadâni emyenro nihugueba itoem. Urâ pygueduo pylâ eagonro modo idâly-ro, Deus wâgâ imâem inomedâzemo, ago kehoem mânwânsedemoem. Âtâ itâdyly ewanikeim, sarytâni, ipedâni warâ emyenro akaemo. Âtâ itâni modo wâne tâmayne kehoem tâwanu anhedylymo, myara lâpylâ olâ Deus xurâem tâwaneim modo, xurâem adienkyly koendâ aniendoâmo. <sup>11</sup> Jesus Cristo einwântuo lelâ tâdâsemaguely, tâkezelâ urâ. Cristo kieinwântuo lelâ kydâsemaguely. Mâtâlâ mawânkâ kâsebydâni. Eagonro tâdâsemaguehobe kely kieinwândyly watay, âtâ enu modo sakzyeybygue âtâ kintâdyly waunlo ara kulâ tâise.

<sup>12-13</sup> Tâlâ âtâ tintâday, isejiguy modo iweâpa emaenringue itâni modo: ouruge, prague, tuhu tohogueingue warâ. Tâlâ pylâ tuanrenrygue kulâ âtâ itâni modo: seton-honrenrygue, se satubygue, enregue warâ. Peto emanâdyby, âtâam saindyly warâ watay olâ tâzehoze âdaunlo âtâ isejiguy tuanreingue itâdyby; tuanreinguepa itâdyby warâ awyly. Mârâ tuanrenrygue itâdyby inepa mawânrâ iaduly. Deus itaumbyry egatuwâni modo, âtâ itâni emyenro akaemo. Tâlâ mâtâ unâ koendâ lelâ egatuim modo, idani modo nheinwântoem, Jesus nheinwântomoem lâpylâ warâ, tuanreingue âtâ itâni emyenro. Tâlâ mâtâ iozepa kulâ unâ egatuwâni. Aituo pylâ idani modo Jesus tyam âdara keze aguely awyly nutubamo-ro warâ. Âtâ isejiguy tuanreinguepa kulâ itâni emyenro akaemo. Cristo odopâduo, âzehoze, Deus aguehobypy koendâ aienibyryem, aguiempypy warâ kydawyly.

<sup>14</sup> Deus aguehobypy ara lelâ aieni modo mâtâ ume koendonro emakezemo. <sup>15</sup> Ize ato ara aitânry modo Deus ize ato lelâ aienibyry modo nhemakely nemakeba ise. Deus agâpa tyeseba olâ ise âzemakeoze. Tâty âdugueday tysejiguy idânrâ iaduânehoimbyry ara ise. <sup>16</sup> Tutuze âmaemo, Deus ety mawylymo. Deus Ispiritury mawânkâ agâmolâ. <sup>17</sup> Awlygue âduaymo Jesus einwânni modo nâseinwâmbrya ienehoimbe-ro watay, toen-zepa ise Deusram âzenagazeoly. Koendonro mawânrâ Deus ejidy, xurâlâ warâ; âmaemo eynynonro modo, mâtâ etylâ âmaemo.

<sup>18</sup> “Tonomegueim urâ, âdydo imeom koendâ tutuze wawylygue” keim modo âwâlâ kulâ mâsenogudylymo imowâdaungâ. Tonomegueinhe lelâlâ midyse mataymo, xirâ anano modo wâgâ kulâ mâpaunzedylymo imowâdaungâ. Deus ize atogue lelâ inomegumo nidâ, tâwâlâ lelâlâ wâne eynynâbaom modo âwankuem âedylymo, tuândyem âedylymo warâ. <sup>19</sup> Xirâ onro anano modo enomery, Deus xurâem âdy mâtoba. Saguhoem Deus itaumbyry iweniby agueho ara aidyly: “Inwânwândylymo umepa ise Deus tonomegue âdutuwâni modo enomery nhainly, ânguydo imeom inwânwândyly umepalâ mydy odaxi ihugueho ara” warâ iwenibyem awyly. <sup>20</sup> Warâ lâpylâ Deus itaumbyry awo wâgâ inwenibyem awyly: “Tonomegue lelâlâ wâne âdutulymo, enomerymo âdyem nipyra awyly, tutuze olâ Kywymâry” warâ iwenibyem awyly.

<sup>21</sup> Uguondo modo anhekyly wâgâ kulâ sawoem tâiseba itaungâ. Tâwâlâ lelâlâ wâne kurâ koendonro awyly. Idânârâ tynynonro modoram Deus nhuduypy âmaemo xurâlâ mawânrâ, xurâ mawylymogue. <sup>22</sup> Urâ, Apolo, Pedro warâ Deuslâ xina igononi âyanmo koendonro nhuduly wâgâ xutuen-honze. Xirâ onro anano modo Deus nhugudyly myakâwândy, koendâ lelâ âmaemoem itoem. Iwerâ aini modo, âigueduomo aini modo warâ âmaemoem koendonro lelâ ise. Idânârâ xirâ omarumo, inomerymo warâ Cristo lelâ xuduim. <sup>23</sup> Cristo xurâ âmaemo; Cristo pylâ Deus xurâ-ro warâ.

## 4

### *Cristo xurâem tâwaneim modo*

<sup>1</sup> Cristo xurâem tâwaneinhe xina etaungâ, Deus itaumbry saguhoem tutuzenrybyry egaturin-em aguehoymby xina. <sup>2</sup> Kâwanu âduduoly watay, aguiendyly lelâ kywymâry “Aiekâ” kehobyry ara. <sup>3</sup> Jesus xurâem iewanu tohogueze, mâen-hoguebyra warâ mawylymo wâgâ kâtynanâdaymba urâ. Tâwâlâ âkelo modo Jesus xurâem iewanu nhehoguedyly, nehoguebyra warâ awyly awârâ wâgâ kâtynanâdaymba urâ. Tâwâlâ koendâ, koendâpa warâ wawyly wâgâ auguewâpyra lâpylâ urâ warâ. Jesuslâ koendâ, koendâpa warâ “Aiekâ” kehobyry agânhedyly awyly agueim. <sup>4</sup> Jesus xurâem kâsewaniday, âdy inakanhe agânhetyby kâenanâguewâbyra urâ. Mâkâ xurâem kâsewanily ume, “Âdy iozepa agânhepyra urâ” uguely keba olâ. Kywymâry Jesuslâ ise, xypyry etay: Idânârâ “Aiekâ” kehobyry aienibyryem, agânhepyra warâ wawyly agueim. <sup>5</sup> Cristo xurâem tâwaneim modo mâunâguedylymo imowâdaungâ. Âdaituo akaemo aidyly, aguely warâ awyly mâuntuwâbyra âmaemo, Cristo olâ tutuze. Odopâduo, idânârâ kyangahu oday kunâry, koendonro, koendonro keba warâ soense kykeho xutuen-honze. Aguehobyry adientay koendâ tyangahu oday tunâgueimbyry modo ise Deus nhawily. Aguehobyry adientay koendâ tunâguenrybyry modo olâ ise nawipa.

<sup>6</sup> Cristo eynynâ ypemugudo, ywâgâlâ, Apolo wâgâlâ warâ kâinwenily, xina wâgâlâ âdara Deus emaryem tadowly mâuntuhomoem, “Deus itaumbry awo wâgâ iweniby agueho kadakadaundâ” âdakeze aguely mâuntuhomoem. Arâ ise idânârâ Deus itaumbry egatuwâni modo aguely mâindadylymo, tokalâ mâinwyneguylymo, eagonro pylâ mâinwynebyramo waypa. <sup>7</sup> Deus itaumbry egatuim kâdunâguedaundâ, agonromo takaze kehoem tynrenseim mâkeba âmaemo. Idânârâ inomerymo, tâlâ matomo warâ Deuslâ âyanmo xuduim; tâwâlâ inkâba awârâ modo tâlâ mawylymo. Deuslâ xuduim, ize ato amânhetomoem. “Koendonro agânhedyly, koendonro wawylygue” myguelymo-ro watay, Deus keba inomerymo xuduin-ro waunlo ara amyguelymo. Ânguy sawoem itoem nuduwâpyra.

<sup>8</sup> Âdygue takazeba mâdutulymo; idânârâ Deus agueho tutuze; âdypeom modoem lelâ; ton-honre kehoem mâdutulymo, eagonro modo takaze kehoem! Xina unâ tâdâsemagueho egatuim modo ton-honremba, ekuâdâniibe warâ tâise inanry xina. Koendâ lelâlâ tâise âkealâ kuru on-honrumo watay; arâma tâise xinaem koendâ awyly on-hoam lelâ konhonru itoem xypyry etay. <sup>9</sup> Urâem, pymâ domodo ara inkâba xina âzeholy! Cristo wâgâ aguenriem ingonotyby lelâlâ wâne xina, arâlâ olâ xypyryem kehoem xina ienipyryem waunlo ara Deus awyly, waunroempa. Idânârâ kurâdoram âwankuem tyeseinhe kulâ xina âdutuly. Kurâ domodo xina iguely nhetoem, ânguydo imeom tyewiâseinram tamezeim ara kulâ xina âdutuly. Arâ auguely, xirâ anano modo, anju Deus ezano modo warâ xina aieholi tâensemolâ mawânkâ.

<sup>10</sup> Cristo xurâem xina aidylygue, “tuândy” kehomo xina. Âmaemo olâ xurâ mawylymogue, tonomegueinhe mâdutulymo; iozepa kulâ olâ arâ angahumo oday âunâgumo. Deus ewanu aiese ton-honruneba xina âdutuly; âmaemo olâ ton-honre mâdutulymo. Toenzepa tohoguezeim âmaemo, ânguy xina nehoguebyra awyly ume. <sup>11</sup> Tâsewinzeze,

tatuandez warâ xina. Âtâbâgue kulâ xina âzetydâdyly. Tadapioguoze xina. Myarâ myarâ warâ xina idâly Cristo xunâry egatuze, âdatay âdykâ tykyly awyly xina nutuba.

<sup>12</sup> Tâzetoem toenzepa tâsewanize xina. Âwankuem tâieholo-ro watay, “Koendâ Deus agâmo nidâ” tâkeze lelâ xina tunâgueni modoram. Cristo tyeinwândylygue xina âzenagazeoly-ro watay, idânârâ tâmaenze xina, âpeânze xina kepalâ. <sup>13</sup> Xina wâgâ inakanhe aguelymo-ro watay, alâ iwâgâmo koendâ lelâ xina aguely. Tywykeim ara kulâ xina âzeholy. Arâlâ akâwâm saguhoem; arâlâ iwerâ warâ; tywykeim, âdyem itânry tamezeim ara kulâ xina âdutuoly.

<sup>14</sup> Arâ kâinwenily, mâpybazedomoem inkâba, âurutomoem lakuru, Deus izepa ato amânhesesebyra mitomoem. Ymery kâinwyneguyl emyenro âmaemo, awylygue xirâ kâinwenily, inomedâdomoem. <sup>15</sup> Agui lelâlâ wâne Cristo Jesus wâgâ inomedâzemo idâypy awyarâ Corintoam; urâ olâ unwânmô emyenro kuru, urâma ani Jesus kieinwântuo lelâ kydâsemaguely awyly egatuim waunroem kuru. Tâjiunwym tymery xuruni arâ lâpylâ auguely, mâindatuomo, meinwândâmo, Kunwym Deus xurâem mitomoem. <sup>16</sup> Awylygue awito ara lelâ amitomoem kâenkadyly. <sup>17</sup> Awylygue Timóteo kâingonodyly âyanmo. Kywymâry Jesus einwânni, ymery ara kehoem kâinwyneguyl. “Aiekâ” uguehobyry, aiese. Awâkâ kâingonodyly, agâmo wawyly ume auguehobyry âyanmo nhenanâguehon-hoem, Cristo Jesus einwânni wawylygue koendâ awidyly awyly nhenanâguehon-hoem warâ. Xirâ mawânrâ tâinkâ lelâba udâhobyrydâ, einwânni modoram augueho, arâlâ ise aguely lâpylâ.

<sup>18</sup> Tâlâ âduaymo sawoem ityby modo; âyanmo udâompyra-ro waunlo ara, enanajimo. <sup>19</sup> Kywymâry Jesus ize-ro watay olâ, inepa âyanmo idâze urâ. Aituoma ise akaemo sawoem ini modo egary kâindatyby âkealâ, âkealâba warâ awyly, kâuntuly. Aguehomo ara, Deus xurâem adâise lelâlâ awylymo, xutuze urâ, xurâem anipyra tawyly ume kulâ aguelymo awyly, xutuze urâ warâ. <sup>20</sup> “Deuslâ ywymâry, mâkâ eon-honruguelâ agânhediyly modo agânhediyly” tâkely umelâ, Deus izepa ato aieni, tânehonze Deus xurâ keba tawyly, mâkâ keba tywymâry awyly warâ. <sup>21</sup> Âmaemo ise âdara âurudylymo awyly xutuim, udâduo. Deus aguehobyry sakadyly mâinmopa lelâ âmaemo-ro watay, tonhonre ise âurudylymo, xikotygue apiogulymo-ro waunlo ara kehoem. Arâ mawylymo mâungukelymo, Jesus tâinwânselâ âmaemo-ro warâ watay olâ, koendâ ise agâmo wawyly; âwynedâmo wawyly enehonze urâ-ro warâ. Âmaemolâ olâ ise xutuim, âdara âurudylymo awyly.

## 5

### *Tynanâguyl keba kulâ xynanâni xuruto*

<sup>1</sup> Tâlâ âmaemo Jesus einwânni modo duay inakai kulâ aieni, kely tydase urâ. Tunwym iwydy kulâ nhynanâguyl, kely. Deus einwântâny modo anitaymba arâ kehoem! <sup>2</sup> Sawoem mawylymogue, âdy inakai aini peba âduaymo-ro waunlo ara lelâ mânhenehonlymo. Sawoem mawylymo mâkeba tâise, âtynrumo, ogunrumo warâ tâise âduaymo inakanhe aini wâgâ. Mâkâ uguondoam, “Inakanhe amitobyry wâgâ mâyityembrya mawyly ara, Jesus einwânni modo âtâdyguyhoam tâtâzeba ikâ” myguelymo tâise.

<sup>3-4</sup> Warâ âurudylymo. Corintodâ agâmopa lelâlâ wâne urâ, arâlâ olâ agâmolâ kâdutuly. Kywymâry Jesus emary wawylygue, mâkâ uguondo inakanhe aini mâenagazedomoem auguely xirâ kata wâgâ. Âurudylymo amânhediylymo wâgâ. Âtâdyguywâdaungâ, âdara mâkâ aityby amânhediylymo awyly mâuntuhomoem. Agâmolâ urâ-ro waunlo ara lelâ ise auguely. Kywymâry Jesus ioze lelâ amânhetomoem aienehonze. <sup>5</sup> Satanás emaxi egamewâdaungâ awâkâ uguondo, mâkâ emaym tawyly ara, âsenagazezedoem. Kywymâry Jesus odopâduo

olâ âzemakeoze. Xypyry etay turâ xurâ modo ise nhemakely; tynynâbaom modo olâ enagazeze.

**6** Âduaymo inakanhe aitybybe awyly ume kulâ, koendonroem mawylymo wâgâ adâkezeba itaungâ. Wakely tutuzelâ âmaemo: “Âdiempa fermentu toenzepa kehoem massa tuolien-honze” kely. Arâ lâpylâ tokalâ kurâ inakanhe aini, tagonro modo Deus izepa ato anhetoem anhenehonly. **7** Judeu domodo Páscoa tientyguedyly iraynâ, fermentu tâty oday ipa itoem tamuinzemo, arâ lâpylâ awâkâ uguondo inakanhe aityby mâtâdyguyhomodâ âduaximo kâjienehonwâdaundâ. Arâ ise âduaymo Deus izepa ato adiendysedo peba awyly; fermentu pebaom ara ise. Iweloem âenimopyryenlâ mawânkâ Deus, inakanhe amitomobyry xygakerimbyryem warâ. Páscoa etyguedyly ume, kordeiru tyâzemo mykâinane inakanhe aitomobyry Deus nhygakehoem, arâ lâpylâ myakâwâm Jesus Cristo iguelly inakanhe aguitobyry xygakeze. **8** Awylygue, Deus xurâem kydawyly kyzenanâguenre, ize ato lelâ aguyjene warâ. Ânguy kienokubyra kine, âkeá lelâlâ aguykenre warâ, Páscoa tientyguedyly ume, judeu domodo fermentubeom nedawympa atomo ara. Pão fermentu pebaom edawynly, Pymâ Jesus lelâ einwândyly xutuho.

**9** Kata kâingonotyby wâgâ âurudylymo keankâ: “Tohogüin-hobyry keba kulâ xynanâni uguondo, pekodo warâ agâ tataen-hoemba itaungâ” uguelly keankâ âyanmo.

**10** “Uguondo, pekodo warâ tohogüin-hobyry keba kulâ xynanâni modo, tydinerugu, âdyo imeompe tâidylly kulâ izetonro modo, tâmagazeim modo, xygatyby ehogueni modo warâ eataen-hoemba itaungâ” ugueduo, “Deus einwântânry modo duaypa itaungâ” uguelly mâkeba keankâ. Toenzepa xirâ onro anaym awâkâ aunlo modope awyly. Eagâmopa mitomoem nuduwâpyra. Eagâmopa midylymo tâise onro anaymba mituomo lelâ. “Awâkâ inakanhe aini modo eataen-hoemba itaungâ” kely kâinweniduo, Jesus einwânni modo arâ aini wâgâ auguelly awyly mâuntudyzemo urâ. **11** “Cristo eynynâ âpemugumo urâ” tâkely umelâ, eagâ tohogüin-hobyry keba kulâ xynanâni modo, toenzepa âdype tâidysedo modo, ekudyby ehogueni modo; aunlolâ toku ikaji ini modo; kywykeim modo, tâmagaduneim modo warâ watay, eataen-hoem tâiseba itaungâ, uguelly olâ. Âmaemo Jesus einwânni modo âjigue mâwinduatomoem mâtâdyguylymo-ro watay, mâkâ aunlo modo âduaximo kâjienehonwâdaundâ.

**12-13** Urâ mâkeba Jesus eynynâbaom modo ewentâgueni, euni warâ. Deuslâ ise tynynonro modo ewentâgueni, sagâikerim warâ, urâ mâkeba. Awâtârâ Corintodâ Jesus einwânni modo inakanhe aisezelâ watay, âmaemolâ eyanmo ton-honre aguewâtaungâ. “Deus aguehobyry takaze âmaemo. Arâ adâjidylly imowâdaungâ” kewâtaungâ eyanmo. Deus itaumbyry awo wâgâ iweniby aietaungâ: “Mâkâ inakanhe aini âduaymopa ietaungâ” warâ iwenibyem awyly.

## 6

### *Âjigue kydâseinwâmyra kydawyly wâgâ tâdâturudo*

**1** Âmaemo Jesus einwânni modo âjigue mâtuebadlymo watay, Jesus eynynonro kebanra kulâ amitomobyry wâgâ âurutomoem adâkezeba itaungâ. Jesus einwânni modoanlâ amitomobyry wâgâ âurutomoem aguewâtaungâ. **2** Tutuzelâ âmaemo, Cristo odopâduo, Deus xurâ modo ise onro anano modo xuruniem, juizem warâ ini. Mârâ ume ton-honre ise âmaemo kurâ domodo wâgâ agueze. Âdaituo pylâka Cristo eynynâ âpemugumo âtuebadbyby mâunrupyra mawylymo? **3** Tutuzelâ âmaemo, kurâ Jesus einwânni modo, anju domodo iwymâryem kitodem aguehonze kydawyly, mâtâ ume. Arâ awylygue, xirâ onro anaym tâdâtuebadbyry wâgâ xuruniem ton-honre âmaemo.

**4** Awylygue, mâseinwâmyra âmaemo-ro watay, âmaemo Jesus einwânni modo ewy keba kulâ kâjidiukewâdaundâ âurutomoem. Âdaunlo Jesus einwânnianlâ aguewâtaungâ,

tâwâlâ wâne âdy keba awyly. Amyguelymo idase, âurusemo warâ olâ koendâ lelâ mitondomoem. <sup>5</sup> Âpybazaungâ, arâ âyanmo auguelogyue. Âjigue kulâ mâtuebadylymo, âdaunloenlâ âurunimo peba âduaymo waunlo ara amidylymo. Koendâ kuruni modope awyly, tutuze olâ urâ. <sup>6</sup> Aypa olâ âmaemo, âjigue mâtuebaduomo, mydâlymo juiz Jesus eynynâbaom modoram, âduekumo wâgâ agueze. Koendâpa awârâ!

<sup>7</sup> Kywypadoem kulâ mâtuebazezedylymo. Deus ize ato araba amidylymo tânehonze awârâ. Cristo eynynâ âpemugumo inakanhe aidyly âmaemoem watay, eagâmo âewiâpabyramo tâise koendâ mawylymo, mâenmaenlymo lelâ. <sup>8</sup> Aypa olâ âmaemo. Tâlâ awâtârâ âduaymo inakanhe aitaynrim modo, Cristo eynynâ âpemugumo emagazeni modo warâ. Kywypadoem kulâ awârâ, Jesus einwânni modo âjigue nâpynebyra awyly!

<sup>9</sup> Tutuzelâ âmaemo, inakanhe aini modo Deus agâpa ise, mâkâ pymâem atodâ. “Tâwâlâ âdylâ inakai aguiendyly; idânârâ kurâ domodo Deus eydâ atoam idâim mawânkâ” kelygue tâsenoguzeba itaungâ. Tohogüin-hobyry keba kulâ xynanâni modo; xygatyby modo kulâ ehogueni modo; uguondo, uguondo warâ kulâ âtynanâni modo, pekodo, pekodo warâ kulâ âtynanâni modo; <sup>10</sup> tâmagaduneim modo; toenzepa âdype tâidysedo modo; toku ikaji ini modo; kywykeim modo; pyrâugue tâmase tâmagaduneim modo warâ Deus pymâem atoram nâtâwâbyramo ise. <sup>11</sup> Jesus Cristo mâinwâmpyra mawylymo ume, aunlope lâpylâ ani âmaemo ewy. Deus olâ iweloem âetonimobryem, arâ amipyra mitomoem aienibryem warâ. Tywykeba kitoem kydokogueho ara ani inakanhe mawylymo nhygakely. Mâkâ xurâem lelâlâ mitomoem, ize ato amânhetomoem warâ adyese ani. Saguhoem inakanhe amitomobry wâgâ tâwentâguezeba mitomoem aiemâ mâkâ; iwerâma mâkâ xurâem tâwentâguezeba âmaemo. Deus idânârâ awârâ modo an-hedly ani âmaemoem, Kywymâry Jesus Cristo kruz wâgâ iguehobyry wâgâ, Ispiritury odanomo eon-honru wâgâ warâ.

### *Odomogue amânhokylymo Deus koendâ aguehon-ho nidâ*

<sup>12</sup> Tâlâ âmaemo ewy warâ keim. “Tâwâlâ idânârâ ize wato agânhedyly, Jesus einwânni wawylygue” keim. Âkealâ wâne, âmaemoem koendonro lelâ waypa olâ. Agânhepyra witoem Deus aguepa atobyry tâwâlâ âdylâ agânhedyly. Tâlâ olâ koendâ adyeseim, aiesezyedly watay, imanâdyly kiuntudânry. Awylygue urâem koendâpaom agânhepyra wawyly, uguely. <sup>13</sup> Tâlâ âmaemo ewy warâ keim: “Deus pyni nhugudyly, kodo eon-honwanâniem. Kodo nhugudyly pyni iwyneniem.” Wakeze xirâ aguely: “Kydâwinduadyse kurâ-ro watay, kydâwinduadyly lelâ koendonro” kelymo. Warâ olâ auguely: Deuslâ kodo, pyni modo warâ xuguni. Xypyry etay olâ Deus azakâlâ sainze: kodo, pyni modo alelâ. Ize ato aguentoem Deus kodo nhugudyly, kydohogüin-hobyry keba kulâ kiynanâdoem inkâba, kywâpado modo aguentoemba warâ. Mâkâ xurâ mawânrâ xirâ kodo. <sup>14</sup> Deus ton-honrugue Jesus Cristo kurâem tyetonze myakâwâm, arâ lâpylâ ise xypyry etay kodo iwelogue kurâem kyetondyly.

<sup>15</sup> Tutuzelâ âmaemo, Cristo sodo ewylâ odomo awyly. Mâkâ mâinwântuomo, mâkâ agâ tokaleon-em tâise ani âmaemo. Awylygue, pekodo alâ kulâ adyeseim kiynanâdoem kodo kiempyra kydawyly. <sup>16</sup> Pekodo alâ kulâ adyeseim agâ uguondo eguetudyly-ro watay, Deus xurâem, tokalelâ akaemo, âjihuaji itybyem awylymogue. Iwenibyem mawânrâ Deus itaumbry awo wâgâ: “Uguondo pekodo agâ idyly watay, tokaleoem tâise” warâ inwenibyem awyly. <sup>17</sup> Kywymâry Jesus agâ kydawyly, Ispiritury mawânkâ eagâ kyeni; aituo pylâ Deus xurâem, tokaleoem kidyly-ro warâ.

<sup>18</sup> Uguondo modo, âwydymo lelâ xynanâdaungâ; pekodo modo, osomoram lelâ âdynanâôwâdaungâ. Osomo agâpa kulâ, âwydymo agâpa kulâ warâ tâjidyly imowâdaungâ. Mâkâ tohogüin-hobyry keba kulâ xynanâni Deus aguehobyrylâ nhakaguuly, todolâ mâkâ inakanhe nhakyly warâ. <sup>19</sup> Enanâguewâdaungâ: Jesus einwânni modo sodo odaylâ Deus Ispiritury ejiku, Deuslâ mawânkâ igononi kagâ itoem. Awylygue mawânrâ âwâlâ

mâdutuba mawylymo, Deuslâ âuturimo. <sup>20</sup> Deus, Jesus ingonodyly myakâwâm âmaemoem iguehoem. Imakehomoem tâwâense myakâwâm mâkâ awârâgue nhepywadyly. Idânârâ odomogue amânhokylymo, Deus koendâ aguehon-ho lelâ nidâ.

## 7

*Todohogüinly wâgâ tâdâturudo*

<sup>1</sup> Iwerâ mârâ mânwenibymo wâgâ ise auguely:

Wamyguemo Yam: “Uguondo nohogüimba keanra koendâ awyly” myguemo. <sup>2</sup> Wauguely olâ: “Koendâ lelâlâ wâne. Koendâ kehoem olâ âyanmo auguely idataungâ.” Âdalâ kulâ ânguy anipyra itoem, koendâlâ uguondo modo, pekodo modo warâ ohogünwâdylymo, tokalelâ uguondo iwyu itoem, tokalelâ pekodo isonu itoem warâ. Nohogüimbamo-ro watay, âdalâ kulâ ise aidylymo, adyeseim keba kulâ anhedylymo warâ. <sup>3</sup> Uguondo ohogünly-ro watay, tywydyam nâtyzebyra nidâ. Pekodo ohogünly-ro watay, tuoam nâtyzebyra nidâ warâ. Iso, iwydy warâ aitolâ mawânrâ. <sup>4</sup> Pekodo ohogüimby modo, osomo awârâ odono sodo, âmaemo mâkeba. Awylygue tâwâlâ osomo âynanâdâmo, ize tâitobry aralâ. Uguondo ohogüimby modo, âwydymo awârâ odono sodo, âmaemo mâkeba. Awylygue mâynanâbyramo tâiseba itaungâ, tynanâdyze awyly ume watay.

<sup>5</sup> Ohogünwâdyby modoram xirâ auguely. Âwydymo agâ, osomo agâ warâ mâtynanâbyra tâiseba itaungâ. Agonromo, “Kydâtynanâbyra wao kine, imâem Deus agâ aguykehoem” keduo olâ âdapa. Azakâlâ mâseinwânduomo lelâ olâ awârâ aidyly, iweâpa kehoem waypa lâpylâ. Iweâpa mâtynanâbyra midylymo-ro watay, âdaunlo modo agâ kulâ midyse mitomoem aienehonze keze Satanás. Arâ ise awârâ Deus izepa ato amânhedylymo-ro warâ.

<sup>6</sup> “Tohogünzeba itaungâ” uguelly keba; “Ohogünwâdaungâ” uguelly keba warâ âyanmo.

<sup>7</sup> Yara mohogüimbamolâ tâise idânârâ koendâ mawylymo. Deuslâ mohogüindyzedonromo watay olâ on-hondâzemo mâkâ, eagâ mohogüin-hobyry lelâ mâynanâdomoem. Mohogüindyzebamo Deus-ro watay, on-hondâzemo lâpylâ, ânguy mâynanâbyra mitomoem.

<sup>8</sup> Ohogüindâny modoram koendâlâ mohogüimba mawylymo yara uguelly. Pypâ modoram koendâlâ mohogüin-ombyra mawylymo yara, uguelly. <sup>9</sup> Arâ mânemahomoem nudupa-ro watay olâ ohogünwâdaungâ lelâ. Mohogüimba âmaemo-ro watay, peto tyânlâsenry ara ise awârâ; âdaunlo modolâ mâynanâdyze mawylymo. Awylygue mohogüinlymolâ koendonro.

<sup>10</sup> Iwerâ auguely Jesus einwânni ohogünwâdyby modoram. Kywymâry Jesuslâ arâ agueim, urâ kulâ mâkeba. Pekodo modo, osomo kâjimowâdaundâ. <sup>11</sup> Mâinmolymo-ro watay, eagonro uguondo agâ mohogüin-ombyralâ koendâ mawylymo; tâwâlâ olâ osomoam modopâdondylymo. Uguondo modo, âwydymo kâjigonotaundâ, uguelly.

<sup>12</sup> Iwerâ kâinwenily ise Jesus einwânni, einwântâny agâ ohogüimby anhekyly wâgâ. Xirâ modo aguepa myakâwâm Kywymâry Jesus tarâ onro anaym tatay, Yam kâuntuhoem nhutuen-hoymby olâ iwerâ âurutomo. Âmaemo Jesus einwânni ewy pekodo Jesus einwântâny agâ ohogüimbyem âmaemo. Âwydymoenlâ ize awyly-ro watay, kâjimowâdaundâ. <sup>13</sup> Pekodo modo Jesus einwânni, Jesus einwântânygue tusoneim âmaemo-ro watay, kâjimowâdaundâ, osomoenlâ ize awyly-ro watay. <sup>14</sup> Osomo agâ tokaleom ara lelâ Deus nhedyly. Aituo, osomo Jesus neinwâmpyramo lelâlâ wâne, koendâ olâ Deusram âzecholy, nhetomo ara lâpylâ. Alâpylâ pekodo Jesus einwântâny Jesus einwânni agâ ohogüimby Deusram âzecholy, iso tiento ara. Aypa-ro watay, imeomo Deusram nâzehowâbyramo tâise. Arâ awylygue olâ Deusram âzecholymo.

<sup>15</sup> Jesus einwântâny agâ ohogüimbyem âmaemo, omodyzemo mâkâ-ro watay, tâwâlâ omolymo. Nâtâba itoem mânkazeedylymo tâiseba itaungâ. Deus ize inkâba iso, iwydy

warâ âewiâmunedyly. Osomo, âwydymo warâ Jesus einwântânry omolymolâ koendonro, âewiâkymo, inakanhe kulâ amidylymo mipyra mitomoem. <sup>16</sup> Pekodo Jesus einwânni, Jesus einwântânrygue tusoneim, uguondo Jesus einwânni, Jesus einwântânrygue tywyeyim warâ, mâximobamolâ koendâ mawylymo. Koendâ amidylymo tientuo, tindatuo warâ, Jesus einwânnse, neinwâmpyra warâ awyly mâtuntubama âmaemo.

### *Deus âizemo atobyry aralâ itaungâ*

<sup>17</sup> Jesus mâinwântuomo, Deus turâem âduakedaymo arâ matomobyry aralâ itaungâ: itymo anary, iwanumo, ânguy mawylymo warâ kâdugukewâdaundâ. Xirâ mawânrâ Jesus einwânni modo âtâdyguyhodâ kâenomedâdo, mâtârem udâday. <sup>18</sup> Deus tynynonroem âgâsedylymo iraynâ judeu domodo ezewenke satâbyem âmaemo-ro watay, atâhomobyry soense tâkezeba itaungâ. Deus âgâsedylymo iraynâ judeu domodo ezewenry ara madatâoba âmaemo-ro watay, madatâolymo tâiseba itaungâ. <sup>19</sup> Deus xurâem, tâwâlâ satâbyem, tatâzeba warâ awyly. Mâkâ ize ato, “Aiekâ” kehobyry aguiendyly. <sup>20</sup> Iwelo Jesus einwânni modo âdyenlâ tato nhugukely nitaymba nidâ.

<sup>21</sup> Jesus mâinwândylymo iraynâ, tâbyguepa âsewanirin-em sanâtyby âmaemo-ro watay, tâseguâdâzeba itaungâ arâ mawylymogue. Anânimobyry, “Tarâpa mydâdyseka âmâ, tâwâlâ âsewanize mydâhomoe?” kely-ro watay, mydâdyse mataymo, tâwâlâ idâwâtaungâ.

<sup>22</sup> Âmaemo tâbyguepa âsewanirin-em sanâtyby modo, anânimobyry xurâ âmaemo; akaemo emaymba mâsemagueba âmaemo-ro warâ. Arâlâ olâ, Cristo agâ tokaleon-em mawylymogue, mâzemodeoly; Satanás eon-honru emaymba tâzemakeoze âmaemo. Turâenlâ âsewanirim modo lâpylâ Cristo xurâ âmaemo, mâkâ “Aiekâ” kehobyry aieni warâ.

<sup>23</sup> Iwerâ Cristo xurâem âmaemo, Deus mawânkâ tâwâense kehoem âmaemoem epywanibyryem, kruz wâgâ Jesus Cristo iguehobyry wâgâ. Awylygue Deus aguely lelâ inwantaguedaungâ, mâsemaguehoem kurâdo ezewenry mâkeba. <sup>24</sup> Cristo eynynâ ype-mugudo, waunroem auguehobyrylâ augueonto. Deus turâem âduakedaymo arâ matomobyry aralâ itaungâ.

### *Ohogüindâny modo, pypâ modo warâ xuruto*

<sup>25</sup> Iwerâ augueho ise ohogüindâny xuruto modo. Kywymâry Jesus Cristo tarâ onro anaym tawyly ume, xirâ wâgâ aguepa myakâwâm. Urâlâ âurunimo. Augueho koendâ idataungâ, Kywymâry mawânkâ iemakedâ, ienomery tuduze warâ. <sup>26-27</sup> Toenzepa xirâ ume Jesus einwânni modo âpyneândyly, âsenagazedyly warâ. Awylygue einwânni modo kâunrudyly, ohogüimbyem âmaemo watay, tâximozeba itaungâ. Mohogüimba âmaemo watay, alâ itaungâ. <sup>28</sup> Mohogünlymo watay, Deus xurâem, inakai mâkeba awârâ. Tutuze lâpylâ olâ âmaemo, ohogüimby modo toenzepa ekuâdânbibe awyly. Mohogüimba âmaemo-ro watay olâ, ikuâdânímo peba, ohogüimby modo ara, uguely âyanmo.

<sup>29</sup> Warâ âurudysemo wawyly, Cristo eynynâ ype-mugudo. Iweâpa nitaymba ise Cristo odopâdyly. Awylygue, xirâ anaym kydawyly ara, xirâ anano modogue kulâ kydâpaunzedaymba kine. Uguondo ohogüimby modo, âdy ikuâdâbyramo nidâ, Kywymâry Jesus ewanu amânhetomoem. Pekodo ohogüimby modo, Deus xurâem amidylymo kâjimowâdaundâ. <sup>30</sup> Âtynrumo umelâ, amânhetomoem Deus aguehobyry aietaungâ; tutuzelâma âmaemo, âtynrumo aunloenlâpa awyly. Omarumo ume, amânhetomoem Deus aguehobyry aietaungâ lâpylâ; tutuzelâ âmaemo, omarumo aunloenlâpa awyly. Âdydo imeom vende mânhedylymo umelâ, amânhetomoem Deus aguehobyry aietaungâ, aunloenlâ nipyra mawânrâ ise âsejiguymo. <sup>31</sup> Tâwâlâ lelâlâ wâne toenzepa iwanumo; amânhetomoem Deus aguehobyry olâ amânhepyra tâiseba itaungâ. Idânârâ âdydo imeom adainze mawânrâ. Xirâ onro inepa ise adainly, iwogonro modo alelâ.

<sup>32</sup> Âdy ikuâdânímo peba wâne ize wawyly. Uguondo Jesus einwânni tywyepa-ro watay, Kywymâry Jesus xurâem tâwanu lelâ mâkâ nhynanâguyl, mâkâ lelâ mawânkâ

tionmazeândyze ato. <sup>33</sup> Uguondo Jesus einwânni tywyein-ro watay olâ, xirâ onro anano modogue tâseguâdâze, tywydy âdy peba nipyra itoem, tuantoem, tyentydâdoem, tinsejiguyendoem warâ. <sup>34</sup> Awlylygue azagâ tydâwangueim ara awyly. Kywymâry Jesus xurâem tâsewanidye, tywydy tientoem tâsewanidye warâ mawânkâ.

Alâpylâ pekodo pypâ, âwynsaundo warâ; Kywymâry Jesus xurâem lelâ ize awylymo. Mâkâ mawânkâ tionmazeândyze atomo, adienkylygue, tâpaunzedogue warâ. Pekodo tusoneim olâ xirâ onro anano modogue tâseguâdâze lâpylâ, tuso tiontoem, ipyniry adientoem warâ, koendâ tuso tagâ itoem.

<sup>35</sup> Xirâ auguely, âdy âmaemoem koendonro awyly mâuntuhomoem. Tâwâlâ mohogüinlymo; tâwâlâ mohogüimba mawylymo warâ. Âmaemo mawânrâ xutuim, urâ keba. Âurudysemo wawyly olâ, Kywymâry Jesus ize ato ara lelâ amitomoem. Agueho ara lelâ amânhedysemo wawyly. Xirâ onro anano modogue mâseguâdâdylymo izepama urâ, kopaelâgâembaba amânhedysemo wawyly warâ, Deus ewanu amânhetaymo.

<sup>36</sup> Iwerâ âurudylymo salokuzenomo, âwynsaundo warâ tohogüin-hoem ohondyby, nohogüimba tâitomoem âtunâguedyby modo wâgâ. Mâkâ salokuzenomo xunâzely: “Toenzepa mâkâ pekodo ize wawyly. Mâkâ agâlâ kohogüindye wawyly” kely watay, âdainkâba. Tâwâlâ ohogüinlymo. Deus xurâem, tâwentâduneba akaemo. <sup>37</sup> Mâkâ salokuzenomo tunâry nhugukely. “Tywyepalâ koendâ wawyly. Tâwâlâ âjimanâze urâ, pekodo modo kâynanâbyra witoem, awârâ mâkeba Deus agânhedyse ato” kely watay, iozelâ mâkâ adâkehobryy ara aidyly. Âdainkâba ise mâkâ pekodo agâ nohogüimba awyly. <sup>38</sup> Todohogüinlybe, todohogüinly peba warâ koendâ lelâ. Koendonro kuru olâ, kâwano Kywymâry Jesus xurâem imâem aguiuentoem kydohogüimba kydawyly.

<sup>39</sup> Xirâ auguedyse wato pekodo tusoneim modoram. Osomo niguepa awyly ara, âwâlâ inkâba âmaemo, mâkâ âuturimo awylygue. Mâkâ iguely-ro watay lelâ, tâwâlâ midylymo; ize mataymo tâwâlâ mohogüin-ondylymo warâ. Jesus einwânni agâ olâ ohogüinwâdaungâ. <sup>40</sup> Ienanaji omaru kuru olâ ise, mohogüin-ombyralâ. Arâma kâuntuly, Deus Ispiritury yam nhutuen-hoymby.

## 8

### Xygatyby modoram pelo egameyby

<sup>1</sup> Warâ yapâiguelymo: “Tâwâlâ Jesus einwânni modo xygatyby enadoram ietyby pelo nhâdyly, tâwâlâpa?” myguelymo. Awârâ wâgâ ise iwerâ âurudylymo. Kurâ Jesus einwânni modo, einwântâny modo takaze Deus wâgâ kiuntuly. Tâmaynelâ olâ kine, sawoem kipyra kitoem. Sawoem kidyly-ro watay, ize kydato kulâ aguienkly, kagonro modo kienmawyadâbyra kurâ. Cristo eynynâ kypemugu kinwynedly watay olâ, Deus ize ato imâem lelâlâ anhetomoem adyenehonze kurâ. <sup>2</sup> Idânârâ kehoem tutuze âdutunri watay, idânârâ nutuwâbyra mâkâ, imâem nhutulybelâ. <sup>3</sup> Mâkâ Deus iwyneni Deus ize ato adyese; tinduakeyby awyly tutuze Deus warâ.

<sup>4</sup> Arâ iweninribryem, kâinweniondyly xygatybyam nhunru egameyby tâdâhoze, nâdâhoba warâ awyly wâgâ. Tutzelâ kurâ, segue, tuhugue, metalgue warâ ekudyby modo âdy keba awyly; kiynrentaymba, kiyntadaymba warâ kine. Tokalelâ mawânkâ Deus, kurâ einwânni modo kiuntuly; mâkâ mawânkâ kiynrenkly. <sup>5</sup> “Kau oday, onro anaym warâ eagonro deus modope” tâkezemo lelâlâ wâne, mâkâ “deus” tâkehomo tuo-maenzemo, “pymâ” tâkezemo lelâlâ warâ wâne. <sup>6</sup> Kurâ olâ tokalelâ Deus kykeho kienhogueguly kuru, Kunwym, idânârâ tâlânro modo xugunipyry. Mâkâ kiuntuhoem lelâ tarâ xirâ onro wâgâ kydawyly, “Aikâ” kehobryy aieniem warâ. Tokalelâ Kywymâry, Jesus Cristo lelâ, idânârâ kurâ domodo iwymâry. Jesus wâgâlâ Deus idânârâ tâlânro nhugudly. Mâkâ wâgâlâ iweloem ietybyem kydawyly.

<sup>7</sup> Tâlâ olâ Jesus einwânni modo ewy awâkâ segue, tuhugue warâ xygatyby âdy keba awyly xutudâny. Jesus tyeinwândly iraynâ, xygatyby ehogueniem sahozeybyenmo mawânkâ. Jesus tyeinwântuo, nutumo mâkâ xygatyby ehoguedyly koendâpa awyly. Awylygue xygatyby modoram egameyby tiândyly-ro watay, inakanhe, tâwentâguezeinhe warâ âdutulymo. Xurâmoem, xygatyby modoram egameyby einly, mâkâ ehoguedylylâ waunlo ara enanajimo. <sup>8</sup> Xygatyby enado egameyby tâse, kiâmpyra warâ kydawly, âdy mâkeba Deus xurâem. Mâkâ podo kiândyly watay, Deus tuomareba nietaymba; kiâmpyra kurâ-ro watay, Deus tuomareba nietaymba lâpylâ warâ.

<sup>9</sup> Âmaemo Deus itaumbyry koendâ kuru xuturim, tutuze âmaemo, ekudyby enadoram podo egameyby kiântuo, Deus izepa ato ara aguidyly keba awyly. Tâlâ olâ mâkâ egameyby sâdyly, Deus xurâem koendâpa awyly, aguewâni modo. Awylygue podo mâtuoomo mâkâ agueim modoram kâduduwâtaundâ, nhâtomoem. Eagâmo âmaemo-ro watay, kâdâtaundâ lâpylâ warâ, adyesenryem nhutulymo, amânhenehomba mitomoem. Adakobâni âjihodaigâdoem tuhu ânwa ontaji ieni ara inkâba itaungâ.

<sup>10</sup> Tâmaynelâ itaungâ, Cristo eynynâ âpemugumo Deus aguehobyry nhakadoem aienehoim amânhepyra mitomoem. Âmaemoma tutuze, xygatyby âdy keba awyly. Awylygue xygatybyam podo xuduypy sanâtonra mydâlymo, manâdylymo, mândylymo warâ mawylimo. Ton-honreba kulâ Jesus einwânnipe târâ watay olâ kâdâtaundâ, mâkâ enanaji tâseim keba mawânkâ. Mândylymo watay, mândylymo tientuo, âpaunzeze: “Xygatybyam xuduypy tâsemo watay, sâse lâpylâ urâ” keze. Aituo ise egamadyly, nhâdy, tânanaji tâseim keba awyly umelâ.

<sup>11</sup> Amidylymo tientuo aitobyry wâgâ, âmaemo mâkâ Cristo eynynâ âpemugumo inakanhe ienehoim; Jesus Cristo einwândly koendâ nutuba mawânkâ awylygue; emakeze Cristo iguehobyry lâpylâ mawânkâ. Âmaemo “imâem xutuim” modo, amidylymo tientuo aitobyry wâgâ, Cristo eynynâ âpemugumo kâmaynoem mânhenehonlymo. Koendâ Cristo einwândly wâgâ nutubamo awyly tutuzelâ âmaemo. <sup>12</sup> Cristo eynynâ âpemugumo xurâem inakanhe arâ amidylymo, adyesenryem nhutulymo, anhetoem amânhenehonlymo watay, Cristo xurâenlâ amidylymo waunlo ara awârâ. <sup>13</sup> Kândyly tientobyry wâgâ, mâkâ Cristo eynynâ ypemugu nhâdyly lâpylâ, turâem tâseim keba awyly tiuntuly umelâ watay, âdaunloenlâ kântondaymba ise urâ, Cristo neinwâmpyra nipyra itoem. Cristo eynynâ ypemugu mârâ adyesenry anhetoem agânhedyly, mydy odaxi ihuguehoen-ro waunlo ara mawânrâ.

## 9

### *Tywâgâ aguenriem Cristo ingonotyby aito, anhekyly warâ*

<sup>1</sup> Kywymâry Jesus nhutuly wawylygue, kurâdo kulâ utuwâbyra. Mâkâlâ uduakeim, iwâgâ auguehoem. Tâlâ olâ azagâ lelâ yeinwântomoem augueho. Damasco idâwaym yam âepanâguehobyry; iwâgâ kâengatudo, mâinwântomobyry warâ. <sup>2</sup> “Jesus tywâgâ aguenriem ingonotyby mâkeba awâkâ Paulo” kewâni modope lelâlâ wâne, tutuze olâ âmaemo mâkâ ingonotyby wawyly. Mâkâ wâgâ auguely mâindatuomo, tainwânsse ani âmaemo, awârâ mawânrâ mâkâ ingonotyby wawyly xutuen-hoim.

<sup>3</sup> Awylygue, “Tywâgâ aguenriem Cristo ingonotyby mâkeba keanra awâkâ Paulo” kewâni modoram auguely. <sup>4</sup> Kywymâry Jesus xurâem tâwaneim wawylygue, pyni, tânywâduneim modo warâ kâenkadly, âduaymo iewanopyry ebyryem watay, iozelâ tâise arâ awidyly. Arâ awipyra olâ urâ. <sup>5</sup> Pedro, eagonro modo, Jesus iukonodo warâ tywysaro agâlâ Jesus wâgâ agueze idâhomobyrydâ tâduahozemo iwysaromo agâlâ, nhomedâguylimo modoram. Tâwâlâ lâpylâ tâise ywydy kandyly yagâ, kandyse urâ-ro watay, ydataynrim modoanlâ tâise âduaholy, âdy ize atogue. <sup>6</sup> Urâ, Barnabé warâ âdainkâba tâise xina tydani modoram typyniry âduduohoem nhekadyly, tâdâsemaguely

wâgâ egatuwâni modo âduahohomo aralâ, âyanmo xina nekabyra olâ. <sup>7</sup> Sodadu tysejiguy tâwano modo nepywadaymba. Fazenda sodo uva tientâdyby ewiseduo, ewily tâinze, nepywabyralâ. Tapirâgue tâguyeim inwanry tânyze, nepywabyralâ warâ.

<sup>8</sup> Myara lâpylâ Jesus einwânni modo Jesus wâgâ agueim modo nhuandyly, ewanopyry ebyryem. Kurâdo xunâry kulâ mâkeba xirâ. Deus itaumbyry awo wâgâ iwenibyenlâ xirâ aguely. <sup>9</sup> Warâ myakâwândy Moisés inwenihuem Deus aguely: “Tapirâ kâjitagâjiwâdaundâ trigu âekyguehoem nhakabely ume” warâ iwenibyem awyly. Tapirâ tinyendylygue kulâ inkâba olâ myakâwândy Deus arâ aguely. <sup>10</sup> Deus itaumbyry egatuwâni modo edyly, xuadyly warâ wâgâ konomedâze myakâwândy xirâ unâ iwenily, tapirâ trigu âekyguehoem sakabeim wâgâ kulelâ inkâba. Iozelâ etânibyry, ekaunânibyry warâ âduaholy; alâpylâ iozelâ Deus itaumbyry egatuim nhenomedâguyl modoram âduaholy. <sup>11</sup> Deus itaumbyry âyanmo xina negatu, mutumo-ro warâ. Arâ awylygue: “Xina ipyniry, xina eoku, âdylâ warâ âunduwâtaungâ” tâkeze tâise xina âyanmo. Arâ aguenriem lelâlâ wâne ani xina, âduaymo tawyly ume, âdaunloenlâ pyni, âtâ, awârâ xina nekabyra olâ ani. <sup>12</sup> Jesus xunâry âyanmo egatuze idâwâtyby modo ipynirymo, eokumo warâ tuduze ani âmaemo. Koendâlâ ani amidylymo.

Iozelâ tâise xina tâzeto nhekadyly âyanmo. Xinama ani waunroem kuru Jesus wâgâ âyanmo egatuim; xina arâ aguepa olâ ise. Xina nhekadyly-ro watay, “Paulo xunâry kindataymba kine, dinheru tienmakehoem kulâ awâkâ aguely” tâkeze keanra tâise âmaemo. Awylygue, âdy xina âyanmo nekabyra awyly, unâ koendonro xina nhegatuly nekuâdâbyra itoem. <sup>13</sup> Deus ety oday tâwanuneim modo tâzeto tâmakezemo. Deusram tâgamezeim ânguydo imeom xyâwâni modo mâtâ nhunru ewy tâmakeze lâpylâ warâ. Xirâ tutuzelâ âmaemo. <sup>14</sup> Arâ lâpylâ myakâwâm Kywymâry Jesus aguely: “Unâ koendonro tâdâsemagueho egatuwâni modo ipa ato xuduim aguely idataynrim modolâ” kewânmy.

<sup>15</sup> Arâlâ olâ ani unâ kâengatuday, âyanmo âdy kâenkabyra wawyly. Xirâ arâ kâinwenily iwerâ, iepywadyly manguhomoem kâenkadoem inkâba. “Jesus xunâry kâengatuday, ânguyram âdy kâenkadaymba keankâ urâ” tâkezelâ winase, tuomare urâ awârâ wâgâ-ro warâ. Iewindygue, yatuandylygue warâ yigueylâ tâise ize wato, âyanmo kâzekaimbalâ. <sup>16</sup> Tâwâlâ kadawihuem inkâba unâ tâdâsemagueho kâengatuly. Kâengatuba wito keba xirâ-ro warâ. Kywymâry Jesus “Egatugâ” kehobyry awylygue. Kaikâlâ ise urâ, kâengatuba wituo! <sup>17</sup> Urâlâ kuru xirâ unâ koendonro tâdâsemagueho kâengatuhoem iduakein-ro watay, auguely idataynrim modoram iepywadoem tâkaze tâise urâ. Jesus induakeyby olâ urâ, arâ emaryem awitoem. Awylygue tâbyguepa tâwaneim ara wawyly, kâzepwaoly kâinwântâmpyra wawyly. <sup>18</sup> Jesus wâgâ augueday âdyka iebyry? Womazeâni tâbyguepalâ kâenomedâdylymo. Arâ awylygue, auguely idataynrim modoram iepywadoem kâenkadaymba urâ.

<sup>19</sup> Kurâ domodo itanru wâgâ kulâ aini mâkeba urâ. Idânârâ kâenmawyadâdoem tâtuze olâ urâ, Cristo einwânni modo agui isezeedoem lakuru. Awylygue iwâgâ kâengatuly. <sup>20</sup> Jesus wâgâ kâengatuhoem judeu domodo duay urâ-ro watay, ezewenrymo aralâ awidly, Jesus nheinwântomoem. Tâzewenrymo Moisés inweniby aiesezelâ mawânkâ akaemo. Awylygue, eagâmo wawyly ume, earamolâ awidly, Jesus nheinwântomoem kâenkuâdâbyramo witoem. Moisés ezewenry kâinwântuoba kâsemaguely kâuntuly umelâ aitomo ara awidly.

<sup>21</sup> Judeu keba modo duay wawyly ume, earamolâ lâpylâ awidly, Jesus nheinwântomoem. Moisésram tâzezewenry iweniehoymby arapa akaemo aidyly, judeu domodoram mawânrâ xuduly, judeu keba modoampa. Aituo urâ, judeuem wawyly umelâ, judeu keba modo agâ urâ-ro watay, xina ezewenry agueho ara awipyra urâ. Deus ize ato agânhepyra widly keba olâ, Jesus Cristo konomedâdobry aralâ mawânrâ awidly. <sup>22</sup> Ton-honreba kulâ Jesus einwânni modo agâ urâ-ro watay, xurâmoem inakai agânhetaymba urâ, Jesus nheinwântomoem. Âdykâlâ unâ tâdâsemagueho kâengatuhodâ,

ezewenrymo aralâ awidyly, nhuduhobyry aralâ, agui âzemakeohomoem, imâem Jesus wâgâ nhutuhomoem warâ.

<sup>23</sup> Arâ awidyly, MOH warâ âtâ anakâ Jesus einwântuo lelâ tâdâsemaguely kely indato-moem. Arâ ise ytaumbypy einwânni modoem koendonro “Xuduze urâ” Deus kehobyry xina nhemakely akaemo nhemakely warâ. <sup>24</sup> Tutuzelâ âmaemo, agui wâne egatuni modo, mâtâ waunroem saintyby lelâ olâ mâtâ tâmakezeim emakeim. Jesus ize ato ara lelâ aitaungâ, myarâ Deus eydâ atoam kayam aintuomo, idânârâ koendonro tynynonro modoram nhuduly mäenmakehomoem. <sup>25</sup> Tâgaseinhe izetonro toenzepa mâtâ ohonzezedly awylygue, aunlolâ ton-honre egatuzedly, waunroem saindly-ro watay, tâjiangahu wogonro ponwarygue xygatyby inepa ilani mâtâ nhemakely. Kurâ Jesus Cristo aguehobyry einwânni modo olâ izepa ato aguiempyra kitoem kydâzeon-hondâne. Deus nhuduly adaindânrý kienmakely awyly, tutuze kurâ. <sup>26</sup> Awylygue tâgaseim tadaintodâ lelâ eseni ara wawyly.

Adaimpâni koendâ enomedâdyby ara warâ, tadaimpâday, koendâ lelâ aidyly, názetyoba tâitoem; arâ lâpylâ ioze lelâ awidyly, xypyry etay Deus koendâ ywâgâ aguehoem.

<sup>27</sup> Tâsenagazeze urâ; wodo tymanâze warâ, Deus itaumbypy âkelo modoram egatuim-byryenlâ Deus “Xuduze urâ” kehobyry kâenmakeba wipyra witoem.

## 10

### *Xygatyby modo ehoguedly wâgâ agueho*

<sup>1</sup> Cristo eynynâ ypemugudo, enanâguewâdaungâ judeu domodo idamudo aitobyry, Deus lelâlâ einwândly imoduomo. Moisés myakâwândy iwymârymo, Egitodâba egasedaymo. Eunu imâsedo idâhomo enehoin-em, xuahurinmoem warâ Deus anhetyby myakâwândy nhapygueguylimo. Parutabâ Tapabileim emelaji myakâwândy saindlymo. Mâtâ parutabâ iotagâ tawéânehonze myakâwândy Deus, ilâ ontagâ idânârâ âzkuâdomoem. <sup>2</sup> Mâtâ eunu iay idâlymogue, parutabâ Tapabileim ontagâ âzkuâduomo warâ, Moisés eynynonro awylymo tâzehoze myakâwândy, (Jesus Cristo eynynonro kydawlykienehon-hoem, batiza kydâiehoho ara.) <sup>3</sup> Idânârâ myakâwândy Deus nhuduypy pyni nheinlymo kaynâ âetyby, maná keho. <sup>4</sup> Idânârâ myakâwândy paru nhenlymo Deus nhuduypy, Moisés tamatagorugue HÂ nhetuo, tuhu imâsedo odaypa egaseyby. Mâtâ tuhu mâtkeba eyanmo paru xuduim. Cristolâ, mâtâ mawânkâ eagâmo idâim, enimo warâ. <sup>5</sup> Deus aguehobyry sakani modope olâ myakâwândy. Akaemo agâ tuomareba myakâwândy Deus. Awylygue myakâwândy Egitodâba egasewâdyby modo ewy agui iguewâdyly, âdy peba ato einkâ adakobâdylymo ume. Tâinkâ lelâba idâhomobyrydâ tâdâzepyâdobyrybe lelâ myakâwândy.

<sup>6</sup> Konomedâdolâ awârâ iwerâ, akaemo Deus neinwâmpyra awylygue aitomobyry.

<sup>7</sup> Xygatyby modo kâzehoguedaundâ, akaemo modo ewy nhehoguedobyry ara. Warâ mawânrâ Deus itaumbypy awo wâgâ iwenibyem awyly: “Deus turâem induakewâdyby modolâ myakâwâm bizeru ekudo xygatyby etyguedyly sagurim. Ekamâmomy, âwinduase, adakuize warâ. Ilâpyryem saudylymo; mâtâ xygatyby tânâmize tâitomoem” warâ iwenibyem awyly. <sup>8</sup> Akaemo aitobyry ara aguipyra kine. Toenzepa myakâwândy akaemo ewy eagâ tohogüin-hobyry keba kulâ nhynanâdylymo. Awylygue myakâwândy Deus vinte e três mil awârâem kurâdo iguehoem anhenehonly tokalâ emedyly wâgâ kulelâ. <sup>9</sup> Kywymâry izepa ato aguiensezebyra kine, kagâ tyewiâse lelâlâ awyly kiuntuhoem kulâ. Akaemo aitobyry kiampâizebyra kine. Deus nhuduypy typynirymo kopaelâgâembaba mâtâlâ tieinlymogue myakâwândy ilahurumo. Awylygue myakâwândy Deus âgâu modo ingonodyly, sâniomoem. Aguimy iguewânmoo.

<sup>10</sup> Âwymârymoem Deus induakeyby kâzeusedaundâ, judeu domodo idamudo tywymâry

Moisés, Arão warâ tâusezemo myakâwândy. Awylygue myakâwândy Deus anju kyârim ingonodyly, akaemo ewy nhâhoem.

<sup>11</sup> Saguhabory modo Deus aguehabory nhakaduomo enagazedomobypy kienanâgueduo, akaemo ara kipyra kitoem. Xirâ iwenibyem awyly kintain-hoem, Deus izepa ato aguientuo kagâ aini kienanâguehoem warâ. Iwague inkâba xirâ onro anano modo adain-ho.

<sup>12</sup> Awylygue mâkâ, “Koendonro urâ. Âdaunloenlâ akaemo saguhobyry modo aitobyry ara awitaymba ise urâ” keim, tâmaynelâ nidâ, tâwesedu, nihugueba tâitoem.

<sup>13</sup> Inakanhe amidyse mituomo, amyguedyse mituomo warâ, saguho mâkeba âmaemo awârâ modo aiese keim. Ton-honre olâ itaungâ. Deus einwândyly kâjimowâdaundâ. Mâenmaenlymoembâ kehoem ton-honreim anienehonwâbyra ise Deus. Adâkehobypy adyese lelâ mâkâ. Awylygue ise, mâenmaenduomo, Deus on-honrumo nhuduly, idânârâ mankadomoem.

<sup>14</sup> Yataen-hodo kâinwyneguyl modo, xygatyby modo ehoguedyly imowâdaungâ.

<sup>15</sup> Âyanmo kâinwenily olâ, tonomegueim mawylymogue. Xutuze âmaemo âkealâ auguely awyly-ro warâ. <sup>16</sup> Jesus Cristo iguehabory kienanâguehoem kydâtâdyguyduo, tokalâ kopu odano lelâ vinhu idânârâ tânyzeim. Jesus iunu kruz wâgâ apâdyby enanâgueholâ mâtâ. Kienly iraynâ, “Koendonro âmâ, xina inakanhe aitobyry xygakeze âiguehabory wâgâ” tâkeze kurâ Jesusram. Pão tâpâze, tâdawynze warâ kurâ. Kruz wâgâ mâkâ sodo enagazebory enanâgueholâ mâtâ. Jesus Cristo agâ tokaleoem kydawylâ, arâ kienehonly. <sup>17</sup> Tokalâ pão epajiwâdyby agui edawynwâni modo; tokalelâ olâ kurâ, Deus xurâem, Jesus kieinwânyly awylygue.

<sup>18</sup> Enanâguewâdaungâ israelita domodo aito, ânguyo doimeom Deusram tiengameday. Deus etyram tienetyby podo ewy tâse akaemo, ânguyo doimeom xyâimpypyem, podo Deusram egameimbyryem warâ. Arâ adâituo, Deus xurâem tawyly tânehonzeremo, tagonro agâ on-hoam lelâ tawylymo warâ\*. <sup>19</sup> Augueondyly, xygatyby modo enadoram tyeseim, podo sâdyly, tâseba warâ awyly wâgâ. Xygatyby modo âdy mâkeba mâkâ; xygatyby kulâ. Podoma podolâ, nhunru tâseinlâ warâ.

<sup>20</sup> Warâ âyanmo auguedyse wawyly. Xygatyby ehogueni modo tâguy tyâzemo, nhunru ewy xygatyby modoram egamehoem. Kadopâ modoram kulâ nhudulymo, Deusram inkâba. Kadopâ modo mâynanâdyzemo inkâba urâ, Cristo xurâ mawylymogue!

<sup>21</sup> Nuduwâpyra Kywymâry Jesus xurâ, kadopâ modo xurâ agâ on-hoam itoem. Kadopâ modo nhetyguedaymo eagâmo mâywinduadylymo, madakuilimo warâ, ilâpyryem pão mâyendawynlymo, vinhu mâyenylymo warâ Jesus iguehabory mâyenanâguehomem warâ watay, Jesus, kadopâ modo alelâ ehogueze myguehomo. Koendâ inkâba awârâ Deus xurâem; Jesus lelâba mawânkâ mâyinwânylymo. <sup>22</sup> Jesus iewiâpanâze myguelymo wâne, Kywymâry Jesus, kadopâ alelâ mây-en-hoguedylymogue. Mâkâna tângazezeba mawylymo koendonro kuru. Mâkâ takaze kehoem ton-honruneba kurâ!

### Kurâem lelâ inkâba koendonro aguyjiene, kagonro xurâem lâpylâ warâ

<sup>23</sup> Tâlâ warâ aguewâni modo: “Tâwâlâ idânârâ ize wato agânhedyly, Jesus einwânni wawylygue” keim. Âkealâ, idânârâ koendonro lelâ waypa lâpylâ olâ. “Idânârâ ize kydato adyese lelâ kurâ” keim. Âkealâ tâlâ lâpylâ olâ aguienkyly ewy Cristo eynynâ kypemugudo nheinwânto imâem ienehondânry. Awylygue Cristo eynynâ kypemugudo Jesus nheinwândyly ekuâdâni aguempyra kine. <sup>24</sup> Kurâem kulelâ inkâba koendonro aguyjiene, kagonro xurâem lâpylâ warâ.

<sup>25</sup> Tâwâlâ podo sanâtodâ sanâtyby sâdyly, xygatybyam egamebyyem, egamebyyemba warâ awyly tapâigazebalâ. <sup>26</sup> Iwenibyem Deus itaumbyry awo wâgâ: “Onro, idânârâ

\* **10:18** Israelitas kelygue lâpylâ judeu domodo âzezekeoly.

iwogonro modo warâ Kywymâry Deus xurâ lelâ” kely. Awylygue tâwâlâ pelo modo kiândyly, sâtoem xuduypylâ mawânkâ kezelâ aguely.

<sup>27</sup> Jesus einwânni keba tâtyam âgâsedylymo mâwinduatomoem watay, mydâdyse mataymo, tâwâlâ idâwâtaungâ. Odumoem nhuduypy sâtaungâ lelâ, âdamyguepamolâ. “Tâwâlâ kulâ xygatybyam egameyby keanzé merâ pelo?” tâkezeba itaungâ. <sup>28-29</sup> “Xygatybyam egameyby merâ pelo kiânykyly” myguehonlymo watay olâ, kâdâtaundâ. Arâ ise iwelo Jesus einwânni modo adyesenryem nhutuly amânhepyra mawylymo. Mâkâ pelo tâsenryem nhutulymo nhâtoem amânhenehomba ise âmaemo warâ. Xirâ auguedyse wato. Mânylymo inakanhe awylygue inkâba mâmpyra mawylymo, âkelo xurâem inakanhe amipyra mitomoem. Tutuzelâ âmaemo tâwâlâ mândylymo awyly.

Tâlâ wakeim: “Urâlâ xutuim âdaunlo pelo kânykyly, kântânry warâ awyly. Ânguy kântoem, kâmpyra witoem warâ aguewâpyra. <sup>30</sup> Kâwinduatay, ‘Pabai, koendonro lelâlâ âmâ, xirâ pyni mâunduhobyry wâgâ’ uguelly Deusram watay, ânguy yam: ‘Podo mâtuo, pyni mâinduo warâ Deus mityeneho’ kehoem nuduwâpyra. ‘Deus aguehobyry sakaze âmâ’ kewâpyra warâ. Awârâ wâgâ Deus agâ agueypyenma urâ’ keim.

<sup>31</sup> Âkealâ. Mâwinduadylymo, madakuilymo, âdylâ amânhedylymo warâ watay olâ Deus ehoguedoem lelâ aitaungâ. <sup>32</sup> Ânguylâ Jesus neinwâmpyra itoem aienehoim akâiedaundâ, tâwâlâ judeu, judeu keba warâ awyly. Cristo eynynâ âpemugumo Deus aguehobyry nhakadoem aienehoim akâiedaundâ. <sup>33</sup> Awito ara lelâ aitaungâ. Ânguy kâintywanânehondzye inkâba urâ. Idânârâ augueho, agâhekyl warâ âmaemoem koendâ itoenlâ ize wawyly. “Âdyka ise urâem koendonro?” uguewâpyra urâ. “Âdyka ise eagonro modo xurâem koendonro?” uguelly lakuru. Arâ awidly, agui Jesus einwânni itoem, âzemakeohomoem warâ.

## 11

<sup>1</sup> Tarâ onro anaym tawyly ara Cristo aitobyry ara wâne inanry awisezedly. Awylygue awito ara lelâ aitaungâ, uguelly.

### *Âdara pekodo modo Jesus einwânni modo âtâdyguyhodâ awyly xutuho*

<sup>2</sup> “Aunlolâ xina inanâguely, xina mâunrutobyry adyece xina warâ” kely miwenimo, mâtâ Jesus einwânni modo aito âyanmo kâengatuyby. Koendâlâ arâ amidylymo. <sup>3</sup> Arâ awyly umelâ, tâlâ koendâ mâtuntudyzemo wato. Uguondo mawânkâ tywydy xuturim, Cristo, uguondo xuturim, Deus pylâ Cristo xuturin-ro warâ. <sup>4</sup> Âmaemo uguondo modo izewenrymolâ Deus agâ amyguedaymo, itaumbyry mâtengatudaymo warâ, angawentâdybyemba mawylymo. Awylygue, izewenrymo aralâ aitaungâ. Tâdâtâdyguyhodâ uguondo angawentâdyly-ro watay, Cristo âwankuem nhedyly kulâ.

<sup>5-6</sup> Pekodo modo olâ tâdâtâdyguyhodâ angawentâdybyem lelâ nidâ. Deus agâ adâkeday, Deus itaumbyry tiengatuday warâ, tusolâ tywymâry awyly tânehonzemo mawânkâ arâ watay. Pekodo ohogüimby tâjoduaxi idâly, tyangawengue watay, tâdutuoze isolâ mâkâ xutuim awyly. Pekodo isoram lelâba âdynanâoim mawânkâ angawentâdânry. Awylygue tâdâtâdyguyhodâ pekodo modo tyangawengue lelâ awyly. Tyangawenguepa watay, tuso tywypazenehonze, tâwâlâ tâpybazeze warâ. Anipyra-ro watay, nhangaxiluguebyem, uguondo ara nhangahudu satâbyem waunlo aralâ mâkâ âzeholy\*. <sup>7</sup> Uguondo olâ tâdâtâdyguyhodâ nangawentâbyra nidâ. Tara enomegoem, pymâem itoem, aguenriem warâ myakâwândy Deus waunro uguondo nhugudyly. Pekodo angawentâdybyen-ro watay olâ uguondo tutunri awyly tânehonze.

\* **11:5-6** Mâtâ ume pymâ domodo pekodo MON warâ adyeseim, aiehol ume âzeholy watay, tyangaxiluguehonzemo mykâinane. Aituo, pekodo nhangaxiluguebyem âzeholy watay, pekodo MON warâ adyeseim awyly âdutuoly idânârâam. Awylygue pekodo nhangaxilugueby toenzepa âpybazedly.

<sup>8</sup> Xirâ xutuwâdaungâ. Kaudyly ume, pekodo iguturuguepa myakâwândy Deus waunro uguondo nhugudyly; waunro pekodo nhugudyly olâ myakâwândy, uguondo iguturugue. <sup>9</sup> Uguondo keba myakâwândy Deus nhugukyly pekodo emawyadâniem. Pekodo myakâwândy nhugukyly uguondo emawyadâniem. <sup>10</sup> Aituo, Jesus einwânni modo âtâdyguyduo, pekodo modo angawentâdybyem lelâ nidâ, tuso tutunri awyly tienehon-homoem. Arâ mawânkâ tuso tâinwânse awyly âzeholy, âtâdyguywâdyby modoram lelâbaro warâ, anju domodo aguidyly enuagaeni modoram lâpylâ warâ. <sup>11</sup> Alâ olâ Jesus Cristo agâ tokaleoem tawyly umelâ, uguondo pekodo inwynedyly, tâmawyadâniem. Pekodo, uguondo inwynedyly, ton-hondâniem warâ awyly. <sup>12</sup> Uguondo iguturu ewy myakâwândy Deus nhetyly, saguho pekodo tiyngatoem. Awârâ pygueduo olâ uguondo iazely pekodo odaylâ. Idânârâ xugunipyry Deus, uguondo, pekodo alelâ.

<sup>13</sup> Âdaitoem âurutaymbamo urâ, Deus iomazeândodâ Deus agâ adâkehoem pekodo modo angawentâdyly wâgâ. Tutuzelâ âmaemo pekodo modo awârâ aieniem awyly. <sup>14</sup> Tâenselâ âmaemo, uguondo modo tusegueba awyly, pekodo modo nhangahudu arapa awyly. Imâem xusegumo-ro watay, kywypadoem kulâmo tâise, pekodo ara tâidysé awylymo mawânkâ. <sup>15</sup> Tywâkure lelâlâ pekodo imâem tusegueim. Nhangahu etydânielâ myakâwândy Deus xusery nhugudyly.

<sup>16</sup> Ângylâ, “Paulo, awârâ unâ wâgâ iozepa kulâ amyguely, Deus agâ aguehodâ angawentâdyly nitaymba pekodo” kely watay, warâ auguely “Xina Deus itaumbyry egatuwâni modo agueho, Deus agâ aguehodâ tâzezewenrylâ xina agueho pekodo angawentâdyly wâgâ” uguelly.

*Pão edawyn-ho, vinhu enyho warâ Jesus iguehobyry enanâguehoem  
(Mt 26.26-30; Mc 14.22-26; Lc 22.14-20)*

<sup>17</sup> Agâmo tuomareba lâgâlâ aze, koendâ âurutomobyry araba kulâ Kywymâry Jesus iomaenze mâtâdyguyhomodâ amidylymogue. <sup>18</sup> Âmaemo Corinto donro modo, Jesus Cristo iomaenze mâtâdyguyduomo, âweiâpadylymo; ize matomo agâ lelâ on-hoam mawylymo, mâtuebadylymo warâ amidylymo, kely tydase urâ. Adâise lelâlâ awârâ modo awyly tâinwânse urâ-ro warâ. <sup>19</sup> Koendâpa awârâ ize matomo agâ lelâ on-hoam mawylymo. Arâ amituomo olâ ânguy Kywymâry Jesus ize ato aieni, izepa ato aieni warâ awyly tâdutuoze.

<sup>20</sup> Tâtâdyguyze lelâlâ wâne âmaemo, Kywymâry Jesus iguehobyry mâenanâguehomoe, pão edawynze, vinhu enyze warâ, aguehobyry arapa olâ amidylymo. <sup>21</sup> Idânârâ saindyly mâinwânpypyramolâ tâdâwinduadyly mangulymo. Waunroem saintyby modo ize tato ara kehoem âwinduadylymo. Âgânâ saintyby modo xurâem pylâ nâsegubydâbyra-ro; tâwinze lâpylâ akaemo. Tâlâ toku ikaji tâitomoem toenzepa vinhu enyim modo. <sup>22</sup> Ioze inkâba awârâ! Tâwinze mataymo, itymodâlâ âwinduatybyem, adakuiwâdybyem warâ, tâdâtâdyguyhoam idâwâtaungâ. Tâdâtâdyguyhodâ toenzepa mâwinduadylymo, toku ikaji midylymo warâ watay, Jesus einwânni âetyby modo tohogueba mânhedylymo kulâ, âdy pebaom mâinwypazenehonlymo kulâ warâ, nhenekylymo peba awylygue. Arâ amidylymogue tuomareka urâ, inanajimo? Omaendaymbamo urâ.

<sup>23</sup> Âyanmo kâengatuly ise Kywymâry Jesus ienomedâdobory, iguehobyry enanâguehoem tâdâtâdyguyho wâgâ. Mârâ kopae, pymâdoam tâzegameoly iraynâ myakâwâm tynynonro modo agâ âwinduadyly. Pão nhanâdyly myakâwâm. <sup>24</sup> Sanânibyryem, Deus agâ aguely: “Koendonro âmâ, Pabai, xirâ pão mâundulygue” kely. Agueypyem pão nepajiwâdyly, mâtânyra, mâtânyra warâ, nhedawyn-homoem. Aituo myakâwâm aguely eyanmo. “Wodolâ xirâ. Iwaguepama âmaemoem yigueho. Xirâ pão edawynze mâtâdyguyduomo, âmaemoem yiguehobyry wâgâ âpaunzedâungâne” kely.

<sup>25</sup> Pão tiendawympygueduomo myakâwâm Jesus kopu vinhugue taseim tâmaxi nhedyly, aguely: “Unulâ xirâ. Tâunkeze ise yiguely, toenzepa kurâdo emakeze.

‘Ynynonro modo emakeze urâ’ Deus kehobyry mawânrâ. Awylygue ise unu tyapâze yigueduo, iwelo tâdâsemaguehobe Deus nhedyly. Xara amitomoem mâtâdyguylymo mâninmopa âizemo wawyly; mâtâdyguyduomo, âmaemoem awitobyry wâgâ ise mâpaunzedlymo” kely myakâwâm Jesus. <sup>26</sup> Awylygue xirâ pão mâendawynlymo, vinhu mâenylymo warâ-ro watay Kywymâry iguehobyrylâ ise mâenanâguelymo, odopâdly ara.

<sup>27</sup> Mâkâ pão tiendawynday, vinhu tienyday warâ adâjito araba kulâ aini Deus aiedyseba ato kulâ anhekyly. Jesus kruz wâgâ âdyoypy, iunu apâdyby warâ âdyempa nhedyly kulâ. Inakanhe tâjidyllylâ awârâ! <sup>28-29</sup> Mâkâ Kywymâry Jesus kruz wâgâ iguely kâmakezelâ awyly wâgâ nâpaunzebyra kulâ pão nhedawynly, vinhu nhenyly waunlo, Deus enagazenehonze. Awylygue, Jesus iguehobyry enanâguehoam mydâlymo iraynâ âwâlâ adapâiguewâdaungâ: “Tâlâ wânrâ inakanhe awito Deus nhygakehoem kâenkadânry?” kewâtaungâ. Tâlâ-ro watay, xirâ umelâ ekadaungâ, nhygakehoem. Arâma ise tâwâlâ pão mâendawynlymo, vinhu mâenylymo warâ. <sup>30</sup> Tâlâ âmaemo ewy Deusram âkadudânr modo. Awylygue ewâmadlymo, ton-honremba idylymo, iguelymo warâ.

<sup>31</sup> Awylygue, pão kiendawynly, vinhu kienyly warâ iraynâ, âwâlâ kydadapâiguenre, Deus izepa ato aienibyryem kydawyly wâgâ; nhygakehoem kyzekane-ro warâ. Arâ aguipygueduoma tâwâlâ kiendawynly, kienyly warâ; âdygue Deus kâwentâbyra mawânkâ ise. <sup>32</sup> Deus agueho kiankadyly-ro watay, kurutoem ton-honre adâkeze mâkâ, kângazenehondâ-ro warâ. Arâ aguyedyly, inakanhe aguitobyry kiengatuhoem, aguidyly kinmohoen-ro warâ. Xataylâ mâkâ kagâikely, xypyry etay, aunloenlâ mâkâ agâpa kydâiehoba kitoem, Jesus einwântânr modo aiehoho ara aguyepyra itoem.

<sup>33</sup> Awylygue augueondlyly âyanmo, Cristo eynynâ ypemugudo. Kywymâry Jesus iguehobyry enanâgueze mâtâdyguylymo-ro watay, idânârâ anelymo wao iwânwântaungâ, mâendawyn-homoem, mâenyhomoem warâ. <sup>34</sup> Ânguylâ tâwinze-ro watay, tâtydâlâ nâwinduadâ, tâdâtâdyguyhodâ Deus tânagazedoem inakanhe kulâ anipyra itoem.

Awyarâ udâduolâ ise koendâ âurudylymo.

## 12

### *Deus Ispiritury tynynonro modo enomeryem nhuduypy*

<sup>1</sup> Cristo eynynâ ypemugudo. Deus Ispiritury âikâ âikâ warâ konomery nhuduly wâgâ ise auguely, âdy âkealonro awyly mâuntuhomoem. <sup>2</sup> Tutuzelâ âmaemo, Jesus Cristo mânwândlymo iraynâ âdara matomobry. Deus lelâlâ kehoem waunlo ara ani xygatyby modo mân-hoguedlymo. Tytareim keba, kydani keba waunlo kulâ mâkâ xygatyby modo. Aunlolâ ani Satanás inokudylymo, xygatyby modo kulâ mân-hoguedomoem. <sup>3</sup> Xirâ mâuntudyzemo wato. Deus Ispirituryam âzehoim Jesus eynynâ inakanhe aguewâpyra. “Jesus mawânkâ ywymâry, utunri warâ” kely lelâ.

<sup>4</sup> Tokalelâ Deus Ispiritury, âikâ âikâ warâ olâ konomery nhuduly, ewanu aguentoem.

<sup>5</sup> Âikâ âikâ warâ wâne Kywymâry emaryem kydawyly, tokalâ kywymâry xurâenlâ olâ aguidyly, Jesus Cristo xurâem. <sup>6</sup> Âikâ âikâ warâ âwanu modo adyeseim; Deuslâ olâ idânârâ aguentoem konomery xuduim. <sup>7</sup> Deus âdy aguienkyly awyly tuduakeze, Tyispiritury kagâlâ awyly tienehon-hoem. Aguienkylyem nhuduypy aguyjiene, idânârâ iwâgâ imâem nhutuhomoem, ize ato koendâ anhetomoem warâ.

<sup>8</sup> Deus Ispiritury tynynonro modo ewy tonomedâze kuruni tonomegueinhe ito-moem. Eagonro modo tonomedâze lâpylâ tytaumbry nhutuhomoem, nhegatuuhomoem warâ. <sup>9</sup> Eagonro modo tonomedâze lâpylâ Jesus nheinwândlymo imâem itoem. Eagonro modo nhenomedâdyly tâwânuneim modo kua nhetomoem. <sup>10</sup> Eagonro modo nhenomedâdyly adyesenry Deus eon-honrugue lelâ adyeseim anhetomoem. Eagonro modo nhenomedâdyly Deus aguehobyry nhegatuuhomoem, âdy waunroem aini modo awyly nhutuhomoem warâ. Eagonro modo nhenomedâdyly ânguy Deus

tonomedâdobyrygue aini awyly; ânguy Diabu tonomedâdobyrygue aini warâ enuagae-niem. Eagonro modo tonomedâze mâtâ, âkelo tâjitanru Deus Ispiriturydâba âenigue ague-homoem. Eagonro modo tonomedâze, âdakeze mâtâ tâjitanru aguely awyly egaturin-em. **11** Deus Ispiritury lelâ arâ konomedâni. Âkeloem, âkeloem warâ konomery nhuduly, ize ato aralâ aguentoem.

### *Tokalelâ kodo kuru, agui olâ isejiguy*

**12** Tokalelâ kodo, agui olâ isejiguy Arâ lâpylâ kurâ Cristo eynynonro modo; Cristo agâ tokalelâ Deus kâendyly, âikâ, âikâ warâ aguidyly umelâ. **13** Toenzepa kurâ, judeu domodo, judeu keba modo alelâ. Tâlâ tâbyguepalâ tâwaneim modo; tâlâ turâenlâ tâwaneim modo warâ. Idânârâ kagâlâ Deus Ispiritury awylygue koendâ lelâ kurâ, katuandyly ume paru kienyduo, koendâ kidyly ara.

**14** Tokalâ kulâ inkâba kodo isejiguy. Âzekiba lelâba olâ kodo isejiguy ewanu. **15** Tâjihuru, “Tâzemary keba wawylygue, âdy mâkeba urâ” kely watay, iozepa kulâ tâise aguely. Tywyneim lâpylâ kuhuru tuhugueba kulâ kydadakobâdaymba tâise kurâ. **16** Tâjiwantary, “Tâzenu keba wawylygue, âdy mâkeba urâ” kely watay, iozepa kulâ tâise aguely. Tywyneim lâpylâ kywantary; tywantagueba kurâ-ro watay, kindataymba tâise kurâ. **17** Tâzenu modo lelâ kodo wogonro watay, âdy kindataymba tâise kurâ. Tâjiwantary lelâ kodo wogonro watay, âdy nhârângu kindataymba tâise kurâ warâ.

**18** Ize tato aralâ myakâwândy Deus kodo onwa isejiguy nhejitâdaynly. **19** Tâjiwantary lelâ, tâzenu lelâ, tâzemary lelâ warâ watay, kodo lâpeba tâise. **20** Awylygue toenzepa kodo isejiguyum âikâ, âikâ warâ. Arâ lâpylâ, toenzepa Jesus einwânni modope awyly, tokalelâ olâ Deus xurâem.

**21** Tâzenu, tâzemaryam, “Âdaitoem âize inkâba urâ” kehoem nuduwâpyra. Tâjiangahu, tâjihuruam “Âdaitoem âize inkâba urâ” kehoem nudupa warâ. Idânârâ kodo isejiguy modo tywyneim lelâ, kodo koendâ lelâ âsewanihoem. **22** Tâlâ kodo isejiguy ton-honrenryem kienkyly. Mâtâ olâ tywyneim kuru. Mâtâ peba kulâ koendâ kodo nâsewaniba mawânrâ. Arâ lâpylâ idânârâ einwânni modo tywyneim lelâ awyly, tâwâlâ lelâlâ wâne koendâ nutuba awylymo Jesus wâgâ. **23** Tâlâ kodo isejiguy tohoguezenry ara kienkyly; mâtâ olâ kien-hogueguyl kuru. Tâlâ lâpylâ kodo wâgâ tânehonzenry awylygue koendâ xuahuly, iwâkudâdyly warâ awyly. **24** Kodo wâgâ iwâkuruem tâenseim iwâkurugue kien-tydâbyra kurâ. Arâlâ Deus kodo anhedyly, koendonro keba kykeho koendâ kiontoem, kinwâkudâdoem warâ. Arâ lâpylâ âjigue kydâzene, tâwâlâ lelâlâ wâne Jesus einwânni modo Deus itaumbypykoendâ xutudâny modope awyly. Arâlâ olâ eagâmopa kipyra kine. Kyzeon-hondâñemo lakuru, koendâ nheinwântomoem, nhutuhomoem warâ.

**25** Arâlâ myakâwândy Deus kodo isejiguy modo anhedyly, idânârâ koendâ lelâ kodo wâgâ âsewanihoem. Arâ lâpylâ kurâ kagonrodo kiendyly kienwiâsebyramo. **26** Tokalâ kodo wogonro isejiguy ewâmadly-ro watay, idânârâ kehoem kodo ewâmadly. Arâ lâpylâ tokalâ Jesus einwânni âsenagazedly-ro watay, idânârâ kydâsenagazedly lâpylâ. Kodo wogonro isejiguy koendâ aguehonly watay, tohomaenze kurâ, idânârâ kodolâ mawânrâ tohoguezeim. Arâ lâpylâ, Jesus einwânni wâgâ koendâ aguelymo-ro watay, kydohomaene mâtâ agâ.

**27** Idânârâ Jesus einwânni modo Jesus agâ tokalelâ Deus xurâem. Mâtâ xurâ kurâ, tokalâ kodo toenzepa isejiguyum ara. **28** Konomery tuduze Deus tynynonro modoem koendâ lelâ aietoem. Waunroem kuru enomery nhuduly Cristo indu-akewâdyby modo, eynynâbaom modoram iwâgâ aguenriem, Nhatano nhnomedâdo Deus itaumbypykoendâ agatuly Jesus einwânni modoram, nhatano itaumbypykoendâ aguely awyly enomedâdyly einwânni modoram, âdara Deus iomazeândyly awyly nhutuhomoem agueim. Ilâpyryem eagonro modo nhnomedâdyly adyesenry Deus ton-honrugue lelâ adyeseim aieniem. Eagonro modo nhnomedâdyly tâwâneim kua ieniem. Eagonro

modo nhenomedâdyly, âdy pebaom modo, kaikânro modo warâ emawyadâniem. Eagonro modo nhenomedâdyly Jesus einwânni modo iwymâryem. Eagonro modo nhenomedâdyly âkelo tâjitanru Deus Ispiriturydâba âenigue aguewâni modo. Âdara keze mâmâ tâjitanru aguely aguehoem agueim modo warâ tonomedâze lâpylâ.

<sup>29</sup> Âikâ âikâ warâ einwânni modo âzenomedâoly, âwanu anhetomoem. Idânârâ Cristo ingonotybyem eynynâbaom modoram iwâgâ aguenriem lelâ mâkeba kurâ; tâdâtâdyguyodâ iwâgâ aguenriem lelâpa, Deus itaumbyry einwânni modoram âdakeze aguely awyly enomedâniem lelâpa, adyesenry Deus eon-honrugue lelâ adyeseim aieniem lelâpa, <sup>30</sup> tâwâneim kua ieniem lelâpa, âkelo tâjitanru Deus Ispiriturydâba âenigue aguykehoem, mâmâ tâjitanru âdakeze aguely awyly egatuin-em lelâpa warâ kurâ. Ize ato aguientoem Deus nhuduypylâ konomery.

<sup>31</sup> Inomerymo xududyse mawylymo, “âwanu koendonro” amânhetomoem. Deus Ispirituryam ekadaungâ, âwanu amânhekylymo wâgâ inomedâdomoem.

Awârâ takaze koendonro ise âyanmo augueho iwerâ.

## 13

### *Âdara kydâpynedyly wâgâ agueho*

<sup>1</sup> Xirâ onro anaym tâjitanru idânârâ auguely,  
anju kau odano modo agueho tâjitanru auguely lelâlâ wâne,  
augueho idani modo kâinwynebyra kulâ auguely-ro watay,  
ytaumbyry modo âdyem nitaymba tâise.

Sinu, gongu warâ koendâ tydyzenry ipyru ara kulâ tâise.

<sup>2</sup> Tâwâlâ lelâlâ wâne koendâ Deus aguehobyry kâengatuly,  
âdy mâkeba awârâ, ydataynrim modo kâinwynebyra kulâ auguely watay.  
Tâwâlâ lelâlâ wâne koendâ kâuntuly saguhoem kyam Deus nhutuen-hondânybyry,  
idânârâ wâgâ koendâ kâuntuly warâ,  
âdy mâkeba awârâ, ydataynrim modo kâinwynebyra kulâ auguely watay.

Kâinwândylygue iwy ejidydâpa tâjikehonze lelâlâ wâne urâ,  
âdy keba olâ awârâ, yagonro modo kâinwynebyra urâ-ro watay.  
<sup>3</sup> Idânârâ tâlâ wato modo âdy pebaom modoram tuduwâse wâne tâise urâ;  
tâwâlâ wâne tâise kâsenagazedyly, Jesus eynynâbaom modoram kâdyoly,  
wodo âjiaduân-honly warâ,  
xurâmoem koendâ awito âdyem nipyra olâ Deus xurâem,  
kâinwynebyramo kulâ awidyly-ro watay.

<sup>4</sup> Idânârâ agâ tâpyneze kurâ-ro watay,  
idânârâ tâmaenze kurâ kydâpeâmbyalâ;  
kytyenilâ kurâ;  
âsewânnirri keba kurâ;  
sawo keba kurâ;  
âkelo modo takaze koendonro kydawyly wâgâ âdutuim keba kurâ warâ.

<sup>5</sup> Tâpyneze kurâ-ro watay,  
kywypado aguykeba, aguiempyra warâ kurâ.

Tâpyneze kurâ-ro watay,  
âkelo wâgâ tâpaunzeze kurâ, kywâgâ kulelâ inkâba kydâpaunzedly;  
Tâpyneze kurâ-ro watay,  
alâ kulâ kyewiâpadly kitaymba kurâ.

Tâpyneze kurâ-ro watay,  
kurâem inakanhe aitobyry inepa kienanânehonly.

<sup>6</sup> Tâpyneze kurâ-ro watay,  
tâjityenze kurâ, iozepa kulâ kagonro aituo;

ioze lelâ aituo olâ tohomaenze kurâ.  
<sup>7</sup> Tâpyneze kurâ-ro watay,  
 âdara awyly umelâ kagonro keon-hondâdyly.  
 Kyam nhegatuly tainwânse lelâ kurâ.  
 Deus izepa ato aienibyryem awyly kiuntudo,  
 Deus nheinwântondly kinwânwâmpyra kipyra kurâ;  
 kynynâ anhekylky kyzemaenre lelâ.  
<sup>8</sup> Tâlâ Deus itaumbyry koendâ egatuho,  
 adainze olâ awârâ,  
 Tâlâ âkelo tâjitanru Deus Ispiriturydâba âenigue aguehoem enomedâdo,  
 adainze lâpylâ olâ awârâ,  
 Tâlâ toenzepa âdydo imeom xutuho,  
 adainze lâpylâ olâ awârâ.  
 Tâdâpynedyly olâ ise âdaunloenlâ nadaimpa!  
<sup>9</sup> Âdydo imeom xuturin-em Deus Ispiritury nhenomedâdyby modo  
 idânârâ koendâ kuru âdakeze aguely awyly nutuwâbyramo;  
 tâlâlâ nhutudânyromo.  
 Deus itaumbyry egaturin-em Deus Ispiritury nhenomedâdyby modo  
 idânârâ koendâ kuru nutuwâbyramo,  
 âdiempa kulâ nhutulymo.  
<sup>10</sup> Târâ Deus eydâ atodâ Deus agâ kydoxi duo olâ,  
 idânârâ mâkâ kiuntudyze ato ara xutuze kurâ,  
 mâkâ kyize ato ara lelâ ise kurâ.  
<sup>11</sup> Iamudoem wawyly ume, iamudo agueho aralâ kâinane auguely;  
 iamudo tyangahu oday xunâgo aralâ kâinane unâgu yangahu oday;  
 iamudo ize atolâ kâinane ize wato warâ.  
 Xutuybyem olâ urâ iwerâ; iamudoemba itybyem.  
 Iamudo ara inkâba awidly iwerâ.  
<sup>12</sup> Ispelhu tywykeim oday, koendâ kydâzetaymba kurâ;  
 tâzese wâne kurâ, koendâ kuruba olâ, koendâpa awylygue,  
 myara lâpylâ, Deus wâgâ koendâ kehoem kuru kiuntuba kydawly iwerâ.  
 Deus agâ kydoxi duo olâ, koendâ kehoem ese, xutuze warâ kurâ.  
 Iwerâ âdiempa kulâ kiuntuly.  
 Ilâ ume olâ mâkâ koendâ xutuze kurâ, iwerâ kutuho ara.  
<sup>13</sup> Deus kieinwândyly,  
 Deus idânârâ “Xuduze urâ” kehobyry kinwânwândyly,  
 Kydâpynedyly warâ nadainwâpyra ise.  
 Kydâpynedyly olâ mâtâ kuru.

## 14

*Âkelo tâjitanru Deus Ispiriturydâba âenigue aguely, Deus itaumbyry egatuly warâ wâgâ agueho*

<sup>1</sup> Toenzepa âpynedaungâ. Deus Ispiritury inomedâdomoem ekadaungâ, mâkâ inomedâdomobyry ara xurâem amitomoem. Itaumbyry mâengatuhomoem inomerymo nhuduhoem ekadaungâ kuru. <sup>2</sup> Âkelo tâjitanru Deus Ispiriturydâba âenigue aguein-ro watay, Deus lelâ âdakeze mâkâ aguely awyly xutuim. Deus Ispiritury eon-honrugue mawânkâ tutuzenry kehoem aguely. <sup>3</sup> Mâtâ tutuzeinhelâ Deus itaumbyry egatuim olâ Jesus nheinwântomo imâem tyenehonze, tâsenagazedyly nhemaen-homoem ton-hondâzemo. Tytyreim, kaikânro modo warâ tuomazeânzemo lâpylâ warâ. <sup>4</sup> Mâtâ unâ âkelo tâjitanru Ispíritudâba âenigue agueim watay, âwâlâ kulâ mâkâ âturudyly. Mâtâ kurâdo

indakylyenlâ Deus itaumbyry egatuim olâ idânârâ idataynrim modo turuse, Deus wâgâ imâem nhutuhomoem.

<sup>5</sup> “Âkelo tâjitanru Deus Ispiriturydâba âenigue adâkezeba itaungâ” uguely mâkeba. Tâwâlâ tâise idânârâ amygueylymo, idânârâ enomedâdybyenlâ watay. Koendoro kuru olâ idânârâ Deus itaumbyry tâjitanru tutuzeinhelâ mâengatulymo; arâma idânârâ âjidaholy âdakeze aguely awyly. Âkelo tâjitanru Ispíritudâba âenigue egatuyby âjidaholy ise, âdakeze aguely awyly egatuimbe-ro watay lelâ. Arâ ise Jesus einwânni modo ton-honre lelâ nheinwândylymo.

<sup>6</sup> Âyanmo adakobâze udâondyse wawyly, tutuzelâ âmaemo, Cristo eynynâ ypemugudo. Agâmo wawyly ume, âkelo tâjitanru Ispíritudâba âenigue auguely-ro watay, âdyem nitaymba tâise awârâ âmaemoem, âdakeze auguely mâuntubama tâise âmaemo. Âyanmo kâengatuhoem yam Deus nhutuen-hoymby kâengatuly watay, Jesus mâinwântomo wâgâ auguely watay, Deus itaumbyry awo wâgâ iweniby kâengatuly watay, âdy Jesus einwânni modo nheinwânkly, anhekyly warâ wâgâ inomedâdylymo watay, Jesus mâinwândylymo imâem iese âmaemo, mâindakylymoenlâ augueduo lelâ olâ.

<sup>7</sup> Etaungâ awârâ flauta, harpa warâ tydywâtuneim modo. Koendâ idyly xutudânr kulâ idyin-ro watay, inakanhe kulâ âzeremutâdyly. Aituo pylâ tygâseim modo, âini modo warâ nhakaladânehonly-ro warâ. <sup>8</sup> Mâkâ trombeta idyim koendâ nidypa watay, sodadu domodo nohondaymba tâseguebyhomoem. <sup>9</sup> Arâ lâpylâ tâdâtâdyguyhodâ Deus wâgâ âkelo tâjitanru Deus Ispiriturydâba âenigue amygueylymo-ro watay, âdakeze aguely awyly nutuba awylymo. Sapezenruam amyguehomobyrry adaholy-ro waunlo ara kulâ ise! <sup>10</sup> Toenzepa xirâ anaym tâjitanru âkelo modope awyly. Mârâ tâjitanru xutuwâni modoem âdakezelâ mârâ aguely; xutudânr modo xurâem olâ mârâ âdakely keba-ro waunlo ara kulâ. <sup>11</sup> Ângylâ ytainly tâjitanru kâuntulygueba-ro watay, âkelo anano mâtâ awyly tutuze urâ. Iduanomo keba wawyly, tutuze mâtâ warâ, ytanru nutuba tawylygue. <sup>12</sup> Tutuze urâ, toenzepa Deus Ispirituryam mâzenomedâodyze mawylymo. Einwânni modo imâem Jesus wâgâ nhutuhomoem amânhetomoem olâ ekadaungâ.

<sup>13</sup> Âkelo tâjitanru Deus Ispiriturydâba âenigue adâkeze âmaemo-ro watay, Deusram ekadaungâ; “Pabai, ienomedâgâ, tâjitanru tutuzenry auguehobyry âdakeze aguely awyly auguehoem” kewâtaungâ. <sup>14</sup> Tâdâtâdyguyhodâ, âkelo tâjitanru Deus Ispiriturydâba âenigue Deus agâ auguely-ro watay, auguehobyry kâuntuba wawylygue, yangahu oday lelâ nitaymba auguehobyry. Deus Ispiritury mawânkâ yispiritury agâ agueim, auguehoem.

<sup>15</sup> Âkelo tâjitanru Deus Ispiriturydâba âenigue auguepa widyly keba olâ, arâ auguehoem Deus Ispiritury ienomedâdyly watay. Âkelo tâjitanru Deus Ispiriturydâba âenigue, ytanwe lâpylâ warâ Deus agâ agueze olâ urâ. Âkelo tâjitanru Ispíritudâba âenigue iwâgâ igâtuze urâ, ytanwe igâtuze lâpylâ olâ urâ.

<sup>16</sup> Tâdâtâdyguyhodâ, âkelo tâjitanru Deus Ispiriturydâba âenigue Deus agâ amygueylymo watay, amyguehomoa “Âkealâ awârâ” kewâpyramo idataynrim modo, nutuba tawylymogue. <sup>17</sup> Tâwâlâ lelâlâ wâne amyguehomo koendoro awyly, nutubamo watay, Deus wâgâ amygueho nutuwâbyramo ise. Aituo ise amyguehomobyry âdyem nipyra-ro warâ.

<sup>18</sup> Âkelo tâjitanru Ispíritudâba âenigue adâkeze urâ, akadâmo kehoem. “Âkelo tâjitanru Aispiriturydâba âenigue auguehoem amânhetobyry wâgâ koendoro lelâlâ âmâ, Pabai” uguepa wipyra winase Deusram. <sup>19</sup> Einwânni modo âtâdyguyhodâ olâ, nhutulymoenlâ auguely, Jesus einwândyly wâgâ kâenomedâdaymo. Unâ imâemba egatulylâ koendoro kuru, imâem egatuyby âkelo tâjitanru Ispíritudâba âenigue takaze kehoem. Jesus wâgâ augueday cincolâ auguedyse wawyly, ânguy nhutudânr wâgâ toenzepa kehoem auguepa witoem.

**20** Cristo eynynâ ypemugudo, âwâgâmo kulelâ inkâba âpaunzedaungâ, iamudo âpaunzedo araba. Iamudo iwelo egaseyby inakanhe tâjidyly wâgâ nâpaunzedaymba, myara lâpylâ itaungâ. Xutuyby âdy koendonro, âdy inakai warâ awyly xutuim ara âpaunzedaungâ.

**21** Warâ myakâwândy Deus itaumbyry awo wâgâ iwenibyem awyly:

“ ‘Âkelo âtâ anano modo igonose urâ,

âkelo tâjitanrugue ynynonro modoram aguehomoem.

Kâunrudysemo wato, niwantaguebyramo isenra’ kely Deus”

warâ myakâwândy Kywymâry Deus, Isaíasram inwenien-honly\*.

**22** Âkelo tâjitanru Deus Ispiriturydâba âenigue enomedâdyby aguely watay, Jesus eynynâbaom modoem mâtârâ aguehonly, einwânni modoempa. Tâjitanru tutuzeinhelâ Deus itaumbyry egatuhoem tâzenomery Deus Ispiritury nhuduly olâ, Jesus einwânni modoem, mâtâ wâgâ koendâ nhutuhomoem, koendonro xurâmoem mâtâ anhekyly awyly nhutuhomoem warâ. Einwânni modoram nhutuen-honly, einwântânry modoamba.

**23** Tâdâtâdyguyhodâ idânârâ âmaemo âkelo tâjitanru Deus Ispiriturydâba âenigue amygueymo-ro watay, Jesus einwântânry modo, ton-honremba kulâ Jesus einwânni modo warâ egawândylymo-ro watay, akaemoam âwankuem âiehoze âmaemo. “Tuândy kulâ mynra akaemo” kehonze âmaemo. **24** Âtanwemolâ Deus itaumbyry mâengatulymo-ro watay olâ, Jesus einwântânry modo, ton-honremba kulâ Jesus einwânni modo warâ amyguehomo xutuzemo. Inakanhe aini tawyly xutuzemo. Deus aguehobyry takaze tawyly; mâtâ xurâem, tâwentâguezeim tawyly warâ xutuzemo. **25** Aituo ise âkadulymo Deus izepa ato adientyby modo wâgâ. Âzeguhoam isemo, Deus ehoguezemo warâ. “Âkealâ, tarâ agâmolâ mynra Deus” kezemo.

### Tâdâtâdyguyhodâ âdara adâjidyly awyly xutuho

**26** Cristo eynynâ ypemugudo, Deus mâtâdyguyduomo, warâ ise amidulymo. Deus tien-hoguedoem igâtuni modo, tâwâlâ nigâtudâmo. Deus wâgâ enomedâni modo, tâwâlâ nenomedâdâmo. Unâ Deus nhutuen-hoymby egatuim modo, tâwâlâ negatumo. Âkelo tâjitanru Deus Ispiriturydâba âenigue unâ egatuim, tâwâlâ negatumo; âdakeze aguely awyly agueimpe olâ nidâ. Arâ aitaungâ, agonromo koendâ Deus wâgâ nhutuzedomoem. **27** Âduaymo âkelo tâjitanru Ispíritudâba âenigue adâkedyze donro modope-ro watay azagâ, azagâ tokalâ warâlâ anygue, âjiantaylâ. Âdakeze aguely awyly agueimpe nidâ-ro warâ. **28** Ânguy agueim peba-ro watay, âmaemo âkeloem agueze keim modo MYK alelâ itaungâ. Odaymolâ âkelo tâjitanru Ispíritudâba âenigue Deus agâ aguewâtaungâ, tydaseinhe inkâba.

**29** Azagâ, azagâ tokalâ warâlâ Deus aguehobyry egatuim nidâ. Idataynrim modo koendâ niwaunsedâmo aguehomobyry, Deus wâgâ, Deus wâgâpa warâ aguely awyly tiuntuhoem. **30** Mâtâ tâmyreim ewy Deus tyam nhutuen-hoymby adâkedyze-ro watay, mâtâ Jesus wâgâ egatuim adâkeho newanike wao, nekadâ turery onwa, mâtâ adâkedyze donro XYDYK itoem, aguehoem warâ. **31** Idânârâ âmaemo egatuly xutuwâni modo tâwâlâ egatuwâdaungâ. Tokalâ, tokalâ warâ olâ ise amygueymo. Arâ ise koendâ âdakeze Deus aguely awyly, idânârâ einwânni modo nhutulymo. Aituo ise imâem Jesus nheinwânsezedylymo. **32** Deus itaumbyry egatuly xutuim modo adâkely tâpagunâzelâ nidâ, tagonrodo agueho tiunduhoem. **33** Koendâ lelâ Deus ize awyly tâdâtâdyguyhodâ, on-hoam lelâ agueim modo aguely warâ inkâba.

**34** Âmaemo Jesus eynynonro modo mâtâdyguyduomo, pekodo modo tunâgueba nidâmo, kâzewenry ara idânârâ tâdâtâdyguyho modo oday. Iso akaemo xutuim, kâzewenry aralâ. Aituo pekodo modo âjigue tunâgueba nidâmo, Deus itaumbyry egatuly nekuâdâbyra

\* **14:21** Awlygue myakâwândy akaemo ingonodyly eonronrumodâpalâ, âkelo anano modo ety anaxi âsenagazedomoem.

itomoem. <sup>35</sup> Mârâ unâ nutubamo-ro watay, tusolâ napâiguemo, tâtyam saintybyem. Kywypadoem kulâ pekodo Deus itaumbyry egatuly ume itabygu.

<sup>36</sup> Xirâ augueho wâgâ yagâ koendâ mâseinwâmyra âmaemo-ro watay, amyguehomo augueho nakadaymba. Enanâguewâdaungâ, waunroem kuru Deus itaumbyry egatuimbyry keba mawylymo, waunroem idanipyry keba mawylymo warâ. <sup>37</sup> Deus itaumbyry mâengatuhomoem Ispirituryam enomedâdybyenlâ âmaemo, Deus ewanu aieniem enomedâdybyenlâ âmaemo warâ watay, tutzelâ âmaemo, Kywymâry Jesus kâinwenihoem aguehobyryenlâ kâinwenily awyly. <sup>38</sup> Xirâ augueho iwaunsedânry, einwântânry warâ watay, tâwâlâ niwantaguebyra awyly, agueho kâjiwantagedaundâ olâ.

<sup>39</sup> Cristo eynynâ ypmugudo, toenzepa Deus Ispirituryam ekadaungâ, Deus itaumbyry egatuin-em mitomoem. Âkelo tâjitanru Deus Ispiriturydâba âenigue adâkedyzedonrobe-ro watay olâ, “Adâkezeba ikâ” tâkezeba itaungâ eyam. <sup>40</sup> Deus iomaenze mâtâdyguyduomo, âdalâ kulâ inkâba tâdâtâdyguyhodâ aitaungâ. Adâkeho saintuo lelâ agueim watay, anygue; amyguehomo iwânwântaungâ.

## 15

### *Igueypyem inkâba Cristo, kurâem itondbybyem*

<sup>1</sup> Unâ tâdâsemagueho âyanmo kâengatuyby mâenanâguedyzemo wato iwerâ, Cristo eynynâ ypmugudo. Kâmakezelâ Cristo iguely kely mâindatuomo, tainwânsse ani âmaemo. Unâ iwâkuru âyanmo kâengatuyby mâinwândylymo; mâinmowâbyra âmaemo. <sup>2</sup> Xirâ unâ mâinwântuomo, Jesus mâinwântuomo warâ lelâ Deusram mâzemekeolymo. Mâinwâmpyra kulâ, “Jesus tainwânsse urâ” myguelymo watay, âdyem nitaymba awârâ; tâmakezeba ise âmaemo-ro warâ.

<sup>3</sup> Unâ Yam egatuybylâ ani âyanmo kâengatuly, unâ tutuzeim lelâlâ. Inakanhe aguito-byry xygakeze myakâwâm Cristo iguely. Deus itaumbyry awo wâgâ “Arâ ise aidyly” kehobyry aralâ myakâwâm mâkâ Kywymâry aidyly. <sup>4</sup> Tuhu imâsedo esagueyby odaji myakâwâm equepybyry âzetadâoly. Azagâ emedyly idyly wâgâ myakâwâm Deus kurâem nhetondly, itaumbyry awo wâgâ iweniby aralâ\*. <sup>5</sup> Kurâem itondbybyem myakâwâm Pedroam âepanâguely. Ilâpyryem doze lelâ tywâgâ aguenriem tinduakeyby modoram âepanâguely. <sup>6</sup> Ilâpyryem myakâwâm quinhentos tainwânni modo âtâdyguyhomobryam âepanâguely. Akaemo ewy tâigueze; aguilâ olâ iguedânry. Akaemo mawânkâ iwerâ Jesus igueypyemba awyly wâgâ agueim. <sup>7</sup> Ilâpyryem Tiagoram âepanâguely. Ine kubalâ idânârâ tywâgâ aguenriem tinduakeyby modoram âepanâguely.

<sup>8</sup> Idânârâam tâepanâguebygueduo, xypyryem akâwâm Yam âepanâguely lâpylâ. Mâkâ kâinwândyly akâwâm, akaemo nheinwâmpygueduo iweâpa kehoem. Awylygue iamudo adakadybyem iazeypy emyenro urâ. <sup>9</sup> Jesus agâ adakobâdyby keba urâ; tywâgâ aguenriem induakeyby modo enday, âdy mâkeba urâ. Jesus Induakeyby kelygue tâzekeim mâkeba gâlâ tâise urâ warâ, mâkâ kâinwândyly iraynâ, toenzepa eynynonro modo enagazenibyry wawylygue.

<sup>10</sup> Arâ wawyly umelâ, yagâ koendâ olâ akâwâm Deus. Iweloem yetondâ mâkâ, unâ egatuin-em Jesus induakeybyem witoem, iwâgâ auguehoem. Alâ kulâ inkâba ani uduakely, xirâ agânhetoem. Toenzepa kâsewanily, koendâ lelâ mâkâ xurâem kâsewanahoem. Eagonro modo, Kywymâry Jesus induakeyby modo takaze ton-honre kehoem kâsewanily. Auguely idanipyry modo toenzepa mâkâ tainwânsse. Urâ keba olâ akaemo nheinwântoem aienehoim; Deuslâ awârâ aieni. Yagâ koendâ tawylygue, mâkâ arâ ayedyly. <sup>11</sup> Koendonro kuru olâ unâ tâdâsemagueho egatuly, xina agueim atay, eagonro modo agueim atay warâ. Xirâ unâ âyanmo xina negatu; meinwândâmo-ro warâ.

### *Kurâem itonze kurâ kyigueduo*

\* <sup>15:4</sup> Nota de pé Mateus 12.40dâ egâ.

<sup>12</sup> Igueypyem, Cristo kurâem itobyryma ani xina nhegatuly âyanmo. Tâlâ olâ âduaymo wakeim: “Cristo igueduo kurâem tyetonze lelâlâ wâne akâwâm Deus, kyigueduo kurâem kyetombyra olâ ise” keim. Arâ adâkezeba itaungâ! <sup>13</sup> Kyigueduo kurâem kitombyra kurâ-ro watayma Cristo myakâwâm kurâem nitondaymba-ro. <sup>14</sup> Cristo kurâem nitombyra watay, Deus itaumbyry âyanmo xina nhegatuly lâpeba tâise, âdy mânwânylymo peba tâise warâ. <sup>15</sup> Iguewâtyby modo kurâem nitombyra watay, konokuni kulâ tâise xina. “Deus olâ myakâwâm Cristo, igueduo, kurâem tyetonze” adâkeze lelâlâ xina warâ. Igueypy modo kurâem nitombyra kely âkealâ watay, Deus, Jesus kurâem nietondaymba tâise.

<sup>16</sup> Iguewâtyby modo kurâem nitombyra-ro watayma myakâwâm Cristo kurâem nitondaymba lâpylâ-ro, tâkanâdobyrydâ negaseba warâ-ro. <sup>17</sup> Igueypyenlâ mâkâ watay, âdyem nitaymba mânwândylymo, amitaynlymo kulâ. Igueypyenlâ mâkâ-ro watay, inakanhe amitomobyry nygakewâbyra tâise Deus, âji tâdâsenagazedoanlâ tâise mydâlymo, âigueduomo. <sup>18</sup> Cristo kurâem itondbyyemba watay, idânârâ mâkâ einwânni iguewâtyby modo tâise tâdâsenagazedodâ, aunloenlâ Deus agâpa ietybymoem, inakanhe aitomobyry tygakezeba awylygue. <sup>19</sup> Iguewâtyby modo kurâem nitombyra, kyigueduo Deus agâ kipyra kurâ warâ watay, kaikâ lelâlâ tâise kurâ, kewâdyly kulâ kieinwântobyry wâgâ. Idânârâ tarâ onro anaym Cristo xurâem aguitayn-hobypy modo, kâwanopyry, kuomarobyry, awârâ modo âdyem nitaymba tâise.

<sup>20</sup> Igueypyemba olâ Cristo iwerâ! Igueypyem awyly ume, kurâem tyetonze myakâwâm Deus. Awylygue tutuze lelâlâ kurâ, kurâem kyetonze lâpylâ mâkâ awyly. <sup>21-22</sup> Idânârâ iguewâse kurâ, saguho uguondo Adão iweom kydawlygue. Alâpylâ Jesus Cristo xurâem kydawlygue, kyigueduo kurâem itonze kurâ. Adão, Deus izepa ato anhetobyry wâgâlâ myakâwândy Deus agâpa kidyly, kyiguely adaguly warâ. Alâpylâ Jesus Deus ize ato ara lelâ aitobyry wâgâ Deus agâ kyenehondyly.

<sup>23</sup> Deus aguehobyry ara kehoem idânârâ aidyly. Waunroem kuru Deus, Jesus Cristo kurâem nhetondyly, igueypyem awyly ume. Cristo odopâduo ise kurâ eynynonro modo kurâem kitondyly. <sup>24</sup> Aituo maise onro anaym xypyrylâ idânârâ Deus iduery modo eon-honru, ton-honremba ienehonze Cristo. Awârâ adiempygueduo, “Pabai, agânhetoem amyguehobyry idânârâ ajietai. Âmâ lelâ Pymâ iwerâ. Imaym lelâ iwerâ idânârâ” keze Deusram. <sup>25</sup> Deus aguewâm, Cristo pymâem itoem. Iwerâ Deus eynynâbaom modo ton-honreim xypyry etay Cristolâ ise iwymârymo. Tuduery modo eon-honru sainze mâkâ. Sodadu wâne tuduery tiameyby tywykabeze sawânipryem tawyly tienehohoem, myara ise Cristo tynynâbaom modo eon-honru nhainly.

<sup>26</sup> Xypyryem kuru tainzeim ise tâjiguely. Kuduery awârâ tâjiguely, kyiguely tytaze kydawlygue. Cristo olâ tâjiguely sainze. <sup>27</sup> Iwenibyenlâ myakâwândy Deus itaumbyry awo wâgâ: “Idânârâ iwymâryem ise mâkâ âeni âewyly” kely myakâwândy iweniby. Cristo pymâem awylylâ agueho. Idânârâ iwymâryem lelâlâ Cristo. Tunwym Deus iwymâryem nipyra olâ; Deuslâ mawânkâ pymâem ieni. <sup>28</sup> Idânârâ iwymâryem Cristo awyly, aguewânmmy Deus. Idânârâ Deus izepaom modo eon-honru tyaimpygueduo, “Pabai, agânhetoem amyguehobyry idânârâ ajietai. Âmâ lelâ Pymâ iwerâ” keze tunwym Deusram. Warâ ise idânârâ Deus emaym lelâ idyly, ize ato ara lelâ itoem.

<sup>29</sup> Tâlâ iguewâtyby modo eynynâ batiza ini modo. Iguewâtyby modo kurâem itondlyly neinwâmpyramo-ro watay, arâ anitaymbamo tâise.

<sup>30</sup> Xina myarâ, myarâ warâ Jesus xunâry egatuze adakobâni modo kâmayno einkâ takaze inanry xina. Îwâgâ xina aguepa nipyra olâ; tutuzema xina, tyâly-ro watay, xypyry etay kurâem itonze tawyly. Arâpa-ro watay, âdaunloenlâ xirâ âwanu xina anienezedaymba tâise. <sup>31</sup> Cristo eynynâ ypemugudo, kopaelâgâembaba inanry Jesus eynynâbaom modo yâly nhegaedylymo. Âkealâ xirâ auguely. Toenzepa olâ inanry kâzehoguedyly, âduaymo Kywymâry Cristo Jesus anhetyby wâgâ.

<sup>32</sup> Tarâ Efesodâ kâmayoem keankâ kâdutuly. Ânguyo doimeom tyewiâseim modo agâ kâjitoguly waunlo ara keankâ, Jesus Cristo wâgâ augueday, yizepaom modope awylygue. Yigueduo kurâem witondly kâinwâmpyra urâ-ro watay, âdyem nitaymba tâise arâ kâsenagazedy. Aituo “Ize kydatolâ kyzeinre, toku ikaji kitoem kehoem kydadakuinre warâ, kopaelâgâlâ igueze mawânkâ kurâ” Deus eynynâbaom modo keho ara awiduly lelâ tâise koendonro.

<sup>33</sup> Aypa olâ! Arâ aguewâni modo aguelygue tâsenoguzeba itaungâ. “Xypyry etay iguewâtyby modo kurâem nitaymba ise” kewâni modo agâ on-hoam midylymo-ro watay, earamolâ ise mâinwândylymo. Tutuzelâ âmaemo wakely: “Tadataen-ho inakai, koendâ aini modo inakanhe tyesemo” kely. <sup>34</sup> Koendâ angahumo oday âunâgumo nidâ, saguhoem âunâgomobyry ara inkâba. Deus izepa ato aiedyly imowâdaungâ. Warâ auguely, mâpybazedomoem; tâlâ mawânkâ âduaymo Deus ize ato koendâ xutudânry modo.

### *Igueypyem kurâem itybyem âdara kydawly xutuho*

<sup>35</sup> Tâlâ ise sapâiguewâni modo: “Âdaraka ise kurâ, Deus kurâem kyetonduo? Âdaraka ise kodo? Xirâ kodo iwerâ tâlânro aralâka ise?” keim modo. <sup>36</sup> Tuândy domodo! Kodo âdugukeoze, kodo iwerâ tâlânro ara inkâba ise. Ewy igueduo mawânrâ âpa ezay etâdyby ilusely. <sup>37</sup> Âdylâ ewy etâdyly, trigu ewy atay warâ, âtugugueim arabâ wâne, ondaxi ietybyem olâ tyazeze, ago tâise, taryseze, tâwizeze warâ. <sup>38</sup> Âikâlâ, âikâlâ warâ nady ewy modo Deus aguehobryy aralâ. Awlygue tâwy modo aralâ etâdyby modo iazely awyly.

<sup>39</sup> Alâpylâ tâjiunru modo âzekiba lelâba awyly. Kurâ nhunru âikâlâ. Ânguyo doimeom nhunru âikâlâ, tawâguneim modo nhunru âikâlâ warâ. Kanra nhunru âikâlânro kuru-ro warâ.

<sup>40</sup> Arâ lâpylâ kau wogonro modo, onwogonro modo agâ âkeloem awyly. Idânârâ kau wogonro modo iwâkuro, taunlo onro wogonro modo iwâkuro agâ âkeloem. <sup>41</sup> Xixi, nunâ, ximukâ warâ ehoru âzekiba lelâ inkâba lâpylâ, tâwâlâ lelâlâ wâne idânârâ iwâkuruem lelâ awyly. Idânârâ ximukâ modo, âzekiba lelâ ehorunu nitaymba.

<sup>42</sup> Arâ lâpylâ ise kurâ iguewâtyby modo kurâem Deus kyetonduo, âkeloem ise kodo iweloem, iwerâ tâlâ kydato agâ. Kodo iwerâ tâlâ kydato igueze mawânrâ. Kodo iwelo olâ ise igueim keba. <sup>43</sup> Mârâ kodo tâpyâzeim ton-honreim keba, inakanhe ini kulâ. Kodo iweloem ietyby olâ ise ton-honreim, tywâkureim warâ. <sup>44</sup> Mârâ kodo tâpyâzeim xirâ anano kulâ. Kurâem kitonduo olâ kodo iweloem ietondybyem ise Deus Ispirituryam. Tâlâma kodo xirâ anano kulâ. Tâlâ lâpylâ olâ ise kodo iweloem ietondyby Deus Ispirituryam.

<sup>45</sup> Warâ Deus itaumbyry awo wâgâ iwenibyem awyly: “Waunroem âepaigueim kurâ Deus nhugukyly myakâwândy Adão, tunre, tybygue warâ” warâ iwenibyem awyly. Tâlâ olâ mâkâ, “Adão xypyry” keho, Jesus Cristo. Mâkâ wâgâ kydâzemodeoly. Mâkâ wâgâ iweloem kydâiehol, aunloenlâ Deus agâ kitoem. <sup>46</sup> Kodo Deus Ispiritury iweloem nhetondyby koendonro kuru, kodo adainrim takaze. Kodo tunreim, tybygueim warâguema saguhoem kydâduguhol. Ilâpyryem pylâ kodo Deus Ispirituryam iweloem ietybybe kidly-ro. <sup>47</sup> Kaudyly ume, waunro uguondo nhugudly myakâwândy onro edunugue. Mâkâpygueduo iweâpa lelâlâ myakâwâm Deus eagonro uguondo onro anaxi ingonodyly, mâkâ Adão takazeno kuru. <sup>48</sup> Idânârâ kurâ domodo xirâ onro anano modo Adão sodo aralâ sodomo, onro edunugue xygatyby aralâ. Cristo xurâem itaynrim modo sodo olâ ise Cristo kurâem itondybyem myani sodo ilâ emyenro. Iweloma ise kodo, Cristo Deus ezaypa âetyby sodo iwelo ara. <sup>49</sup> Uguondo onro edunugue xygatyby aralâ kurâ, arâ lâpylâ ise uguondo Deus eydâ atodâba âetyby ara kydawly.

<sup>50</sup> Xirâ mâuntudyzemo wato, Cristo eynynâ ypemugudo. Pymâem kuru Deus atoram kâgawântaymba kurâ kodo iwerâ tâlâ kydatogue. Âji ânguy nadaimpa, niguepa warâ atodâ itoem nudupa mawânrâ; xirâ kodo iwerâ tâlâ kydato tâwâmase, tadainze warâ

awylygue. Kodo iwerâ tâlâ kydato âdugukeoze olâ. Arâ ise aunloenlâ Deus agâ kydawyly, tâwânepa kydawyly, âdaunloenlâ kydadaimpâ kydawyly warâ.

<sup>51-52</sup> Koendâne âyanmo kâengatuly idataungâ, xirâ saguhoem tutuzenrybyry. Idânârâ inkâba ise kyiguely, Jesus odopâdyly iray. Xypyryem itybyem awyly xutuho trombeta âjidly-ro watay, kânu PÂGÂIM MOK idyly ara kulâ ise idânârâ kydâdugukeoly inepa kehoem. Trombeta âjidly-ro watay, Jesus einwânni modo iguewâtyby kurâem itonzemo, todo âdaunloenlâ adaindânrygue, kodo iweloem aiehowâze lâpylâ. <sup>53</sup> Xirâ kodo iwerâ tâlâ kydato tadainze lelâlâ wâne, âdaunlo emedyly wâgâlâ olâ ise âdaunloenlâ adaindânryem âieholy, kâty kywogonro iduatyby, iwelo agâ kiungukely ara. <sup>54</sup> Kodo adainrim adaindânryem âiehoduo, Deus itaumbyry iweniby agueho aralâ ise aidyly: “Tâjiguely adainlylâ ise!

Satanás eon-honru tâjiguehoem anheto adainhoze, idânârâ kehoem” warâ myakâwândy Deus inwenien-honly Isaíasram, saguhoenlâ.

<sup>55</sup> “Tâjiguelyam wakykenre:

‘Saimpyem âmâ!

Ielawada ipy etyby ara kulâ âmâ.

Âytadaymba xina iwerâ’ kykenre”

warâ myakâwândy Deus inwenien-honly, saguhoenlâ.

<sup>56</sup> Deus aguehobyry sakaniubyryem lelâ kurâ idânârâ. Deus, Moisésram tâzezewenry inwenien-hoymby kindadylygue, mâkâ izepa ato aienibyryem kydawyly kiuntuly. Awylygue ani kyiguely kiyntadyly, kyigueduo kydâsenagazedly kiyntadylygue. Iwerâ olâ tyanepa kurâ, inakanhe aguitobyry xygakeybyem awyly kiuntulygue. <sup>57</sup> Konhonwanâdâ olâ Deus, izepa ato aguiempyra kitoem, Kywymâry Jesus Cristo kurutobyry ara lelâ aguidyly awylygue. Awylygue mâkâ agâ aguykeba kipyra kine: “Pabai, iwâkuru lelâlâ âmâ! Idânârâ koendâ awyly takaze koendâ mawyly!” kykenre. Aunlolâ Deus kyzehoguene.

<sup>58</sup> Ypemugudo Cristo eynynâ kâinwyneguyl modo, Jesus toenzepa einwândyly kâjimowâdaundâ. Deus kodo iweloem ietonze awyly einwândyly kâjimowâdaundâ. Kywymâry Jesus amânhetomoem aguehobyry, amânhepyra tâiseba itaungâ. Alâ kulâ inkâba ise xurâem amitomobyry, amyguehomobyry warâ, eagâ kydawyly ume.

## 16

*Corinto donro modo dinheru nhuduhobyry Judeiadâ einwânni modo âdy pebaom mod-oem*

<sup>1</sup> Iwerâ auguely ise Jerusalémdâ Jesus einwânni modoram mâingonokylymoem dinheru mâindâtyguylymo wâgâ. Einwânni modo Galácia eynynâ âtâdyguynri modo kâunrutobyry ara lâpylâ âurudylymo. <sup>2</sup> Domingo oday, domingo oday warâ âdinherurumo ewy âentywâdaungâ mâunduhomoem. Tâlâ matomo aralâ xuduwaataungâ. Imâem emakeim, imâem nhuduly; imâemba emakeim, imâembalâ nhuduly warâ. Yaindyly kâjiwânwâtaundâ arâ adâjidyly maguhomoem, yaintuo tâlâ lelâ itoem. <sup>3</sup> Yaindyly iraylâ, iduakewâdaungâ âmaemo ewy Jerusalémram dinheru sani. Yaindyly-ro watay, kata iwenize urâ, mâinduakeybymo nhakyly dinheru agâ. Jerusalémdâ einwânni modo iwymâryam ise nhudulymo, dinheru sanilâ akaemo awyly nhutuhomoem. <sup>4</sup> Udâhoem nhuduly watay, on-hoam lelâ ise xina idâly lâpylâ.

*Paulo Corintoam tâtâdyze atobyry*

<sup>5</sup> Waunroem kuru Macedônia yan-yam udâdyse wawyly, târâ âji modo einkâ Jesus einwânni modo agâ âdiempa witoem. Ilâpyryem ise udâly, agâmo witoem.

<sup>6</sup> Yaindyly-ro watay, âydâmo iweâpa iniem mawânrâ kâdutuly, até igâwynu sakadyly ara. Awârâpygueduo, âdyanlâ udâhoem âmaemolâ ise âdy ipa wato xuduim. <sup>7</sup> Yakaday kulâ

inkâba nhedysemo wawyly. Kywymâry Jesus ize-ro watay, iweâpa widyse wâne urâ agâmo.

<sup>8</sup> Awylygue ise tarâ Efesodâlâ wawyly wao Pentecostes etyguedo odaji idyly ara.  
<sup>9</sup> Toenzepa Jesus wâgâ auguehoem tuduze ani tarâ; Deus pyanta enahungueim-byryem iegawântoem, kâsewanihoem waunlo ara. Toenzepa asaemo taunlo modo Jesus nheinwândylymo, iwâgâ auguely indadylymo warâ. Awylygue ise tahule kuru tarâpa iegaseba wawyly wao. Toenzepa Jesus xurâem agânhekyly, ekuâdâze kewâni modope awyly umelâ.

<sup>10</sup> Timóteo awyarâ saindyly-ro watay, koendâ edaenkuwâdaungâ; agâmo itoem igâsedauungâ, xuataungâ warâ. Kywymâry Jesus xurâem kâsewaniho ara lâpylâ awâkâ âsewanily. <sup>11</sup> Ânguyram âwankuem kâinehowâdaundâ. Âdy ipa ato xuduwâtaungâ, âdyam idâhobyryram koendâ lelâ idâhoem, xarâ odopâdoem warâ. Kypemugu Cristo eynynonro modo agâlâ odopâdyly kainwândyly.

<sup>12</sup> Cristo eynynâ kypemugu Apoloam adâkezeze wâne winase, Cristo eynynâ kype-mugudo agâ âyanmo IU ise idâhoem. “Iwerâ kuru udâpa ise urâ” tâkeze olâ inanry. Tâtâhoem nhududuolâ ise idâly.

### Kata xypygueândo

<sup>13</sup> Tonomeguelâ itaungâ, Satanás inokubyramo itoem. Ton-honre lelâ Jesus einwânsedaungâ. Tâdâsenagazedyly, âdylâ ton-honreim warâ mâenmaen-homoem, âsegamiwâdaungâ, âzeon-hondâdaungâ warâ. Ton-honre lelâ Deus mânwândylymo nidâ.

<sup>14</sup> Idânârâ koendonro amânhekylymo aiedyly, mâpynedylymo warâ kâjimowâdaundâ.

<sup>15</sup> Cristo eynynâ ypemugudo, Estéfanas tutuzelâ âmaemo, ety odano modo warâ. Acaia eynynonro enday saguhoem kuru Jesus einwânnipyry akaemo. Deus eynynonro modo emawyadâze tâzeon-hondâzemo, xurâmoem koendonro aiedyly nimopamo warâ. Deus xurâem adâitoem toenzepa âsewanilymo. <sup>16</sup> Akaemo âurutomo aietaungâ. Akaemo agâ Jesus ewanuem âsewanirim modo âurutomo aietaungâ lâpylâ.

<sup>17</sup> Estéfanas, Fortunato, Acaico warâ xarâ saintuomo womaze. Iemawyadâze tarâ yagâpa lelâlâ wâne âmaemo, akaemolâ olâ itaybyaymo iemawyadâni. <sup>18</sup> Toenzepa akaemo iegamanâdâ, toenzepa igamanâdâmo lâpylâ awyly, tutuze urâ. Koendâ kehoem urâ igarymo koendonro nhenetybymo kâenmakehobyry wâgâ. Asaemo ewano wâgâ koendâ aguykely lelâ koendonro.

<sup>19</sup> Jesus einwânni modo Ásia eynynonro tywynu nhawânehonlymo lâpylâ. Áquila, iwydylâ Priscila, Deus itaumbyry idase etymodâ âtâdyguywâni modo warâ idaenkulymo lâpylâ. Agâmo tokaleom ara lelâ asaemo idaenkulymo, Kywymâry Jesus xurâ tawyly-mogue, mâkâ xurâem matomo ara lâpylâ. <sup>20</sup> Idânârâ Cristo eynynâ kypemugudo taunlo modo idaenkulymo lâpylâ.

Âwaparymodâ tohonuguze âsedaenguwâdaungâ, Cristo eynynâ âjipemugu mawylymo mâenehon-homoem\*.

<sup>21</sup> Iemaryguelâ xirâ âyanmo kâinwenily, idaenkuhomoem. Urâlâ xirâ wâgâ iezyed Paulo kely iweninri.

<sup>22</sup> Kywymâry Jesus iwynedânrô modo tâwâlâ Deusram tânagazezeinhelâ nidâ.

*Marana tâ!* uguely. (“Inepa odopâgâ, Pymâ!” keze aguely.)

<sup>23</sup> Kywymâry Jesus koendâ nhetomoem kâenkadyly. <sup>24</sup> Idânârâ âmaemo toenzepa âwynedâmo wawyly mâtuntudyzemo wato, idânârâ kurâ Jesus Cristo xurâ lelâ ky-dawlygue.

Xirâ kulâ wao ise âyanmo augueho.

Paulo

\* <sup>16:20</sup> Saguhoem Jesus einwânni modo tohonuguze âsedaengulymo. Iwerâma tâpymogoynze kydâsedaenguly.

## 2 CORÍNTIOS

# Paulo Kata Azagâ Ieto Inweniby Corinto Donro Modoram

Xirâ kata wâgâ inwenily Paulo nhangahu odaji iemâmy Deus. Awylygue Deus itaumbrylâ xirâ Paulo inweniby Corintodâ Jesus einwânni modoram. Jesus Cristo wâgâ aguenriem induakeyby myakâwândy mâkâ. Waunro kata tinweniby wâgâ tonhonre kehoem myakâwândy aguely Jesus einwânni modo Deus izepa ato aieni modoram. Tâlâ myakâwândy Paulo turudylygue iewiâpani modo. Arâ kehoem tyam aguenriempa myani mâkâ nhutulymo. Xirâ kata wâgâ, Jesus wâgâ aguenriem induakeybyem tawyly adâkeze olâ myakâwândy mâkâ-ro warâ; capítulos 10-11 warâdâ, Jesuslâ tywâgâ aguenriem igononi awyly tâgatuze myani. Xirâ kata wâgâ iweniwânm myâkâ, saguhoem Deus iduery kydawly. Jesus kieinwântuo olâ, Deus kugukedâ, eataen-hoem kitoem. Xirâ kata wâgâ tytainze kurâ, Corinto donro modo dinheru ingonotobyry, Jerusalémdâ Jesus einwânni modo âdy pebaom modo xurâem.

### *Aguely adaguhô*

<sup>1</sup> Urâ Paulo, xirâ kata âyanmo iweninri, Cristo Jesus induakeyby tywâgâ aguenriem, Deus aiedyse atobypy ara. Timóteo, Cristo eynynâ kypemugu tarâ yagâlâ merâ, idaenkulymo lâpylâ. Âyanmo xirâ kata kâingonodyly Corintodâ Jesus eynynonro modoram; idânârâ Acaia eynynonro Deus xurâ modoram lâpylâ xirâ kata idâly-ro warâ.

<sup>2</sup> Aynynâmo Kunwym Deusram, Kywymâry Jesus Cristoram warâ kâenkadyly koendâ nhetomoem, akaladânímo peba nhetomoem warâ.

### *Koendonro lelâlâ Deus, koendonro lelâ anhekyly warâ*

<sup>3</sup> Aunlolâ Deus kyjiomaene, Kywymâry Jesus Cristo nhunwym, iDeusry warâ. Koendonro mâkâ kagâ. Kytynru ume, kuomazeâni warâ. <sup>4</sup> Xina âsenagazeday, Deuslâ xina eon-hondâni, âsenagazeni modo xina eon-hondâdoem, ton-honru nhuduhobyry ara lâpylâ.

<sup>5</sup> Cristo âsenagazeboryy ara lâpylâ xina âsenagazedyly, xina rheinwândylygue. Jesus Cristo tâzeon-hondâoze myani nhunwynram arâ lâpylâ xina âzeon-hondâoly Jesusram.

<sup>6</sup> Âmaemoem koendâ itoenlâ xina âsenagazedyly. Tâsenagazedyly ume, Deus tâmawyadâduo, tutuze xina âdara on-hondâdylymo awyly, mâsenagazedylymo ume. Xutuze âmaemo âdara on-hondâdylymo awyly. Arâ ise mâuntulymo âdara mâsenagazedylymo mâenmaenlymo awyly. Ton-honre lelâ ise Jesus mâinwândylymo. Xypyry etay Deus âizemo ato ara ise âmaemo. <sup>7</sup> Koendâ tutuze xina, Jesus einwândyly mâmimopa mawylymo. Awylygue, xina ara mâsenagazedylymo-ro watay, on-hondâzemo lelâlâ Deus, xina teon-hondâdobyry ara.

<sup>8</sup> Cristo eynynâ ypemugudo, Ásia eynynâ xina âsenagazeboryy mâtudyzemo wato. Ton-honre lelâlâ ani xina âsenagazedyly; tâmânreim kehoem tykary wâgâ xina nhanâkylyro waunlo ara ani; âdara tyiguely amaym tâsemaguely xina nutuwâbyra ani. <sup>9</sup> “Iweâmaze kyigueho naintai” tâkeze ani xina. Mârâ xina âsenagazeboryy olâ imâem kehoem xina Deus rheinwântoem adyenehonze, âwâlâ kulâba xina âseinwândoem. Deus lelâ kâmayno amaymba kâmakeim, iguewâtyby modo kurâem ietoni warâ. <sup>10</sup> Kâmayno amaymba xina tâmakeze ani mâkâ, xina emakezelâ ise-ro warâ. Awârâma xina rheinwânkly, inwânwânkly warâ. <sup>11</sup> Xina eynynâ Deus agâ aguewâtaungâ. Amygueylymo idase lelâ, kâmaynoem xina awyly ume xina tienmakehoem. Arâ ise koendonro tawyly xinaram nhenehonly. Toenzepa ise, “Koendonro lelâlâ Deus. Koendâ mawânkâ Paulo, eataen-ho modo warâ agâ awyly” kehonly.

*Paulo Corintoram tâtâho nhugukehobyry*

<sup>12</sup> Deus tynynonro modo aidyse ato ara lelâ xina aidyly, arâ ani mâtâ ize ato xina anhedyly, iozepa kulâ âdy adiendyseba, ânguy tienokudyzeba warâ. Arâ ani xina aidyly, Corintodâ agâmo tawyly ume. Koendorro lelâ, iozeno lelâ warâ ani xina anhekyly, tonomegugue kulâ inkâba, arâlâ mawânkâ ani Deus xina nhenomedâdyly. Arâ ani xina, Deus xurâem koendorro nhenehonly. <sup>13-14</sup> Tutuzeinhelâ âyanmo xina inwenily, âdy tutuzenry lâpeba. Tâlâ âduaymo âdakeze xina aguely awyly koendâ xutuim; tâlâ lâpylâ olâ xutudânry modo. Koendâ mâtuntulymo olâ ize wato. Arâma ise xina mâen-hoguedylymo, Kywymâry Jesus odopâduo, xina ihoguedomo ara.

<sup>15-16</sup> Tutuze wakynre udâduo, koendâ iedaenkulymo, tuomare lelâ mawylymo warâ. Awylygue Macedônia yan-yam udâday, kodopâday warâ Corintodâ iepagudyze wawyly wâne, âyanmo IU witoem. Agâmo urâ-ro watay, mohomaendomoem adyese tâise urâ, Deus itaumbryy âyanmo kâengatulygue. Tâlâ matomogue uwatâ tâise ani âmaemo warâ, Judeiaram udâhoem. <sup>17</sup> Udâhoem nudupa olâ ani mâtâ ume. Awylygue tâlâ keanra âmaemo ewy wakeim: “ ‘Kyam IU ise fâewyly’ adâkeze Paulo, âdara âniembâ tawyly umelâ” keim. Arâpa olâ. Uguewâdyly kulâ witaymba urâ. Agânhedyseba wato kulâ “Aiese urâ” uguewâpyra urâ. Unâry xuguokehoimbe; awylygue ani udâpa widyly. <sup>18</sup> Âdaunloenlâ konokudaymba Deus. Tutuze mâtâ âyanmo auguehobyry inokudomo keba awyly. “Aiese urâ” uguehobyry, agânhedyly; “Agânhepyra ise urâ” uguehobyry, agânhepyra wawyly warâ.

<sup>19</sup> Urâ, Silas, Timóteo warâ agâmo xina atay, Jesus Cristo wâgâ âyanmo xina adâkeze ani, Deus imery wâgâ. Ioze lelâ agueim mâtâ; âdaunloenlâ tâdâsenogudly kewâpyra. Adâkehobyry, adyese lelâ. Adâkehobyry nhugukely nitaymba. <sup>20</sup> Cristo wâgâlâ, Deus idânârâ “Aiese urâ” tâkehobyry anhedyly, koendâ aguehonly warâ. “Koendorro lelâlâ âmâ, Cristo wâgâlâ mawânrâ idânârâ amyguehobyry amânhedyly” tâkezelâ kine Deusram. Arâ aguykeduo, idânârâ aguehobyry âkealâ awyly kiuntulylâ. Awylygue “Amém” kykely, (“Arâlâ” kezema aguely.) <sup>21</sup> Deuslâ kohondâni, Cristo kieinwânsezedom. Deus kuduakewâm, xurâem kitoem. <sup>22</sup> Tyispiriturylâ akâwâm Deus ingonokyly, kagâ itoem, mâtâ xurâem kydawyly xutuhoem, kysejiguy wâgâ kâzedy kinwenily kurâ xurâem awyly xutuhoem myara. Âdylâ tâwâenseim kianâdyse kurâ-ro watay, âdiempa tâpywaze wao kurâ, idânârâ epywaze kydawyly xutuhoem, arâ lâpylâ akâwâm Deus Tyispiritury ingonodyly, adâkehobyry modo xuduze mâtâ awyly kiuntuhoem.

<sup>23</sup> Xirâ kâinwenily, âkealâ awyly tutuze Deus. Uguewâdyly kulâ-ro watay, Deus ien-agazeze. Unâry kâungukeduo ani, Corintoam udâpa widyly. Udâly-ro watay, âmaemo ewy Deus izepa ato aieni modo ton-honre tâusemo tâise ani urâ. Awylygue mawânrâ ani âyanmo udâompyra wawyly, âtyenehondyzebamo wawylygue. <sup>24</sup> Pymâ ara tâitoem inkâba xina âyanmo tâtâdyze awyly, topize kehoem xina agueho mânwântomoem aienehonze inkâba. Tutuze urâ, imâem Jesus tâinwânse mawylymo. Ozohonru wâgâ kydawyly olâ ize wato, âurutomoem, mânwânsezedomoem lakuru, mohomaendomoem, mâtâ ize ato lelâ amânhedylymogue.

## 2

<sup>1</sup> Awylygue ani “Idâze urâ” keypyenlâ, nhesemo udâpa widyly, âtyenehombamo witoem. <sup>2</sup> Udâly lelâ-ro watay, tâjityenze lâpylâma tâise urâ, iutomobyry wâgâ. Aituo tâise awâtârâ won-hondâni modo peba, idânârâ mawânrâ tâise tuomareba mawylymo. <sup>3</sup> Awylygue ani katalâ âyanmo kâingonokyly awyly, udâpa witoem. Unâzema yangahu oday: “Eyanmo udâly-ro watay, toenzepa âjityenze keanzé urâ, kâunrutomo nidapyramo mawânkâ ise. Katalâ wao ise kâingonokyly. Kâunrutomo indadylymo watayma ise, tuomare kehoem eyanmo udâly. Arâ ise womazely, Deus ize ato anhedylymogue; iomazezemo lâpylâ tyeinwândylymogue warâ” uguema. <sup>4</sup> Deus izepa ato aieni modope iduaymo kely kâindatuo, kâjityendobyry wâgâ keankâ, mâtâ kata kâingonodyly. Toenzepa âwâgâmo

kâseguâdâdylygue, kohogüendâ mâtâ kata kâinweniday. Mâtâ kata mânemakeduomo mâtityembyra midysemo. Âtywandomoem, tohogueba mitomoem warâ inkâba keankâ kâinwenily, toenzepa âwynedâmo wawyly mâtuhomoem lakuru.

### *Inakanhe adâitobyry wâgâ âjityeni watay, aitobyry kyzenanânehonre*

<sup>5</sup> Âduanomo ewy Deus izepa ato aienibyry urâ kulelâ mâkeba intywanâguyly, mâtâ aitobyry âtywanâdâmo lâpylâ. Inakanhe aitobyry wâgâ aguehonly keba olâ; iwerâ aitobyry enanânehonre. <sup>6</sup> Mâtâ âsenagazedoem amiendâmolâ. <sup>7</sup> Iweâma inakanhe aitobyry enanânehonwâdaungâ, iomazeândaungâ warâ, toenzepa kehoem nâtityembyra itoem. <sup>8</sup> Koendâ kehoem xutuen-honwâdaungâ mâtâ tywyneze lelâlâ mawylymo.

<sup>9</sup> Saguhoem âyanmo kâinweniby wâgâ âurudâmo, mâtâ uguondo mâtueuntomoem, mâtueazenehon-homoem warâ. Arâ âyanmo kâinwenily ani ikudomoem, mâtâ uguondo wâgâ âurutomobyry ara adâise lelâlâ mawylymo kâuntuhoem. <sup>10</sup> Âmaemo mâtâ inakanhe aitobyry mâtueanânehonlymo-ro watay, enanânehonze lâpylâ urâ, mâtâ inakanhe aitobyry tânanânehonzeimbe-ro watay. Âmaemoenlâ arâ awidly, agânhedyly warâ tutuze lelâ mawânkâ Cristo. <sup>11</sup> Adientyby wâgâ âjityeni, kienanânehon-hoem ekani inakanhe aitobyry kienanânehomba kurâ-ro watay, Satanás tohogueze. Koendâ kehoem tutuzelâ kurâ awârâ. Awylygue mâtâ inakanhe aitobyry kyzenanânehonre, Satanás ize ato kytywanânehonrim aguiemptyra kitoem.

### *Troadedâ Paulo âseguâdâdobyry*

<sup>12</sup> Troaderam udâly ani, tonlo modoram unâ koendonro Jesus Cristo wâgâ egatuze. Târâ wawyly ume, mâtâ wâgâ auguehoem adyenehonze ani Deus, pyanta nhenhunguely iegawântoem waunlo ara kehoem. Toenzepa tonlo modo Jesus tâinwânsemo ani. <sup>13</sup> Ienanaji, Cristo eynynâ kypemugu Tito târâlâ ywânwânselâ waunlo ara ani; târâpa olâ myani mâtâ. Awylygue ani iwâgâ kâseguâdâdyly. Aituo eagâ koxiobyra wituo ani inepa târâpa kâxiguelly, Macedônia yan-yam udâhoem.

### *Unâ koendonro tâinkâ lelâba Jesus wâgâ egatuhobyry*

<sup>14</sup> “Xina agâ koendonro lelâlâ âmâ, Deus!” tâkeze urâ. Cristo agâ tokalelâ xina awylygue, xina sakaladâze kewâni modope awyly umelâ, xina ewanopyry koendâ tyese olâ Deus. Tâdâjítoguyhodâ emaendânrybyry modo âwâlâ tâtuzemo, myara lâpylâ xina Cristoram âtuly, mâtâ xina iwymâry itoem. Deus tâinkâ lelâba xina ingonodyly, Jesus Cristo kieinwântuo lelâ kydâsemaguely kely wâgâ xina aguehoem, uriza tyânrângueim nhârângu MON warâ idadyly wâneam myara idatoem. <sup>15</sup> Deus itaumbypy xina nhegatudo, Cristo wâgâ xutuly. Itaumbypy xina nhegatudo, Deus tuomazeze; uriza nhârângu taypalâ kehoem idato ara mawânrâ xina agueho âjidaholy. Tâlâ xina aguely izetonro, Jesus tâinwânsemo, tâzemakeozemo-ro warâ. Tâlâ xina aguely einwântâny modo; Jesus tyeinwândysebanro. Aunloenlâ ise Deus agâpa âieholymo-ro warâ. <sup>16</sup> Jesus einwântâny modo xurâem olâ xirâ unâ inakai lelâlâ, tywângueim kyâim ara kehoem, enanajimo. Jesus einwânni modoem olâ, xina nhegatuly modo koendonro lelâlâ; tyânrângueim ara; tâinwânsemo-ro warâ, typygueba ise Deus agâ awylymo. Ânguy tonhonrugue kulâ Jesus einwântuo lelâ tâdâsemaguely kely unâ negatuwâbyra; Deusram enomedâdyby modo lelâ. <sup>17</sup> Turâem âdylâ tienmakehoem kulâ Deus itaumbypy egatuim modo emyenro keba xina. Deus ewanuem xina aidyly, mâtâ ingonotyby tawylygue, âdype tâitoem inkâba. Cristo eon-honrugue lelâ xina âsewanily, adâkely tydase, adienkyly tâense warâ Deus awyly tutuze tawylygue.

<sup>1</sup> Deus xurâem tâwanu wâgâ xina agueduo, tâwâlâ kulâ xina âzehoguedyly mâkeba. Âdaunlo xina awyly koendâ tutuzelâ âmaemo. Awylygue kata ânguy tawyly agueho pebalâ xina adakobâdyly; eagonro modo aito arapa. Tâinkâ lelâba mawânrâ Jesus einwânni modoram xina âdutuoly. Awylygue mâinwenibymo xina napyra lâpylâ warâ. <sup>2</sup> Kata iweniby emyenro âmaemo, Deus emary xina awyly nhutuhomoem. Aunloenlâ xina nhangahu oday mawylim. Jesus mâinwântuomo iweloem mâiehohomobyry wâgâ mawânrâ, âwanu âduaymo xina anhetyby idânârâam âzeholy. <sup>3</sup> Xina aguehobryenlâ Cristo mâinwântomobyry wâgâ, Cristo aguehobryenlâ xina ewanu awyly xutuholâ âmaemo, mâkâ kata sani ewanu xutuly wâne myara. Kurâdo kata inweniwâdyby modo wâgâ kulâba ani Jesus Cristo einwânniem midylymo. Mâkâ mâinwândylymo ani Deus âdaunloenlâ iguedâny Ispiritury wâgâ. Saguhoem judeu domodo ezewenry tuhu wâgâ iweniby mâintainlymogue kulâ inkâba ani mâzemakeolymo. Deus Ispiritury odaximo Cristo mâinwândylymo nhenehon-hombyry wâgâ.

<sup>4</sup> Tâwano wâgâ âduaymo xina arâ aguely, tywâgâ aguenriem Cristo induakeyby tawyly tutuzema xina. Deus tutuze, tâwanu wâgâ xina agueho iozenolâ awyly. <sup>5</sup> “Ton-honruguelâ, tonomeryguelâ warâ xina, Jesus Cristo xunâry nhegatuly” xina kewâpyra. Deuslâ xina enomedâni, xurâem xina aitoem. <sup>6</sup> Jesus einwântuo lelâ tâdâsemaguely kely mawânrâ iwelo tâdâseinwândo. Awârâ wâgâ xina nhegatuhoem xina enomedânybryem Deus-ro warâ. Xirâ iwelo tâdâseinwândo Deus xurâ mawânrâ inanry xina agueho. Moisés myakâwândy mâtâ saguhobryy tâzezewenry iweninri; iwelo tâdâseinwândo olâ Deus Ispiritury aguehobryy. Saguho tâzezewenry Deus agâpa kyenehondâ, ânguy mawânkâ idânârâ mâtâ tâzezewenry agueho ara anipyra. Xirâ iwelo tâdâseinwândo olâ kydâsemaguehoem adyese; Jesus einwânni-ro watay, aunloenlâ ise Deus agâ typygueba kehoem awyly.

<sup>7-8</sup> Saguhoem Deus tâzezewenry inwenily myakâwândy azagâ tuhu wâgâ, Moisés iwy onwa âkuhobrydâ. Târâ myakâwândy Deus âepanâguely Moisésram iajinu tohozeleim kehoem agâ. Mâtâ ehozelu Moisés emydy tohozelanâze lâpylâ myakâwândy. Iwy wâgâpa azagâ tuhugue tuhuaze xytâguydaylâ myakâwândy emydy tohozeleba isezyedly. Arâ awyly umelâ, ton-honrelâ olâ myakâwândy emydy ehozelu; ipemugudo emydyam MYK itomoem nudupa, ezewenry iweniby nhegatuday. Mâtâ tâzezewenry tywâkure, ton-honre warâ âemâ watay; Deus Ispiritury anhekyly makuru koendonro kuru.

<sup>9</sup> Mâtâ saguho tâzezewenry kâmakedâny tâzeinwân-honze-ro watay, kâmakeim iwelo Deus agueho kieinwândyly koendonro kuru, tâwentâgueba Deus kâendyly awylygue. <sup>10</sup> Tâzezewenry judeu domodo xurâem Moisésram Deus inwenien-hoymby ton-honreim, tohogueim warâ lelâlâ myakâwândy. Iwerâ tâdâsemagueho iwelo olâ imâsedo, toen-zepa ton-honreim, tohogueim warâ, saguhobryy takaze kehoem. Ipa mâtâ saguho tâzezewenry ton-honremba ietybyem tâdâsemagueho iwelo agâ. <sup>11</sup> Saguho tâzezewenry inepa ton-honremba ini tohoguezemo myakâwândy. Iwerâ iwelo tâdâseinwândo eon-honru olâ tohoguezeim kuru, saguho tâzezewenry takaze kehoem, âdaunloenlâ nadaimpa mawânrâ ise.

<sup>12</sup> Iwerâ xina nhegatuly tyanepa kehoem, Deus kâmakehoem tunâry nugukeba awyly xina nhutulygue. <sup>13</sup> Moisés tâzemyan-hunze myakâwândy âtâgue, Israel domodo tâmydy ehozelu xuzadyly nepyra itomoem. Xina olâ âdy nhoenkyly peba, unâ tâdâsemagueho tiengatuday. <sup>14-15</sup> Deus ezewenrymoem inwenien-hoymby tiuntudyzebamô myakâwândy. Nutuba itomoem, nhangahumo oday xuahuhobe ietybyen-ro waunlo aramo myakâwândy. Alâpylâ iwerâ Deus itaumbryy itainduo, nhutuhomoem nudupa awyly. Nhangahumo oday xuahuybyenlâ-ro waunlo ara mawânrâ. Koendâ nhutulymo ise Cristo nheinwântuomo lelâ. <sup>16</sup> Kywymâry Jesus nheinwândylymo watay olâ, akaemo neinwâmpyra itoem aienehoim tâzetyoze lelâ, Moisés wâgâ Deus itaumbryy awo wâgâ iwenibyem ato ara: “Tâmydy xuahuim etywânmy, Pymâ Deus agâ oxiodybyem todopâdyly ume” kely iwenibyem. <sup>17</sup> “Pymâ” kely tarâ kâinwenily-ro watay, Deus

Ispiritorylâ augueho. Deus Ispiritory kagâlâ ituo, koendâ tutuze kurâ, âzemakeooybyem kydawyly, mâkâlâ mawânkâ agueim. <sup>18</sup> Kurâ Jesus einwânni modoem olâ âdy kâkuâdâni peba mâkâ wâgâ kiuntuhoem. Kopaelâgâembaba kydâdugukeoly, mâkâ ara kisezedoem. Deus Ispiritory kagonro awylygue, Kywymâry Jesus ehogu, eon-honru warâ tânehonze kurâ, ispelhu kâgadopyry nhenehon-ho ara.

## 4

### *Paulo aitobyry Kywymâry Jesus emaryem*

<sup>1</sup> Kytyeni tawylygue ani Deus xina induakely itaumbyry egaturin-em. Awylygue xina tugüiguepa nipyra awyly, toenzepa eon-honru umelâ, tâsenagazedy umelâ warâ.

<sup>2</sup> Kywypado toense adyeseim modo adiendyseba xina. Âdy konokuni xina anientaymba. Cristo wâgâ xina aguehoem, Deus aguehobypy xina nugukewâbyra. Idânârâ xina nhegatuly Deus tyam aguehobyrly. Tâentâ, tydatâ warâ Deus awyly tiuntulygue, iozeno modo lelâ xina agueho, âdaunloenlâ konokuni keba xina awyly xutuhoem.

<sup>3</sup> Ânguylâ tâdâsemaguely wâgâ xina agueho nutuba-ro watay, Deus agâpa ietybyem mâkâ, typygueba kehoem tâdâsenagazedoam kulâ idâhoem. <sup>4</sup> Akaemo nutuba awyly, Satanás, Deus eynynâbaom modo iwymâry mawânkâ nutuen-homba ienehoim. Kurâ enuan-huyby âdy netaymba, tâwâlâ lelâlâ wâne tyajine awyly, myara mâkâ nutuba itomoem anhenehonly. “Koendonro, ton-honreim warâ Cristo. Mâkâ lelâ Deus âdaunlo awyly xutuen-hoim” xina keduo, nutuba akaemo. <sup>5</sup> “Jesus Cristo einwântaungâ, mâsemaguehomoem. Jesus âuturimo nidâ” warâ xina kely. Xirâ unâ xina nhegatuly Kywymâry Jesus anhetyby wâgâ lelâ, xina anhetyby wâgâ kulâ inkâba. Jesus emary xina. Mâinwântuomo, mâsemaguelymo awyly egatuim kulâ. <sup>6</sup> Kaudyly ume myakâwândy Deus aguely: “Tyajine nidâ iam oday” kely. Mâkâ Deuslâ kyangahu oday iajimanâni Jesus Cristo kiuntuduo, âdaunlo Deus awyly kiuntuhoem.

<sup>7</sup> Toenze kulâ tâwâenseim mâkeba xirâ unâ Jesus Cristo wâgâ xina nhegatuly, xina xirâ egatuwâni modo olâ âmugâ âjimatynri emyenro kulâ. Arâ Deus anhedyly akâwâm, eon-honruguelâ aguienyly modo aiedyly awyly tienehon-hoem, kon-honrugueba awyly tienehon-hoem. <sup>8</sup> Âdatay xina Deus xunâry egatuwâni modo, toenzepa tâsenagazeze, tuomareba xina nipyra olâ. Âdatay xina âda tâidyly nutuba tâise, xina nadahuliba olâ. <sup>9</sup> Toenzepa lelâlâ wâne xina izepanro modope awyly, Deus olâ âdykâ xina nodokeba. Âdatay toenzepa sapioguybyem xina awyly, xina niguepa olâ. <sup>10</sup> Aunlolâ xina izepaom modo xina xyâze kely, izepaom modo Jesus nhyan-hombyry ara. Deus olâmy Jesus kurâem ietomâ. Idânârâ awârâ modo aidyly, Jesus iguedâny xina agâlâ awyly enehon-hoem. <sup>11</sup> Tarâ onro anaym xina awyly ume, aunlolâ xina kâmaynoem awyly tyâly wâgâ, Jesus emaryem xina awylygue. Kâmayno modo tiankadlygue tânehonze xina. Jesus xina agâlâ awyly. <sup>12</sup> Aunlolâ xina tyiguely amaym, kâmaynoem awyly. Awârâ modo âsebywadoem olâ âzemakeoze âmaemo, aunloenlâ ise Deus agâ mawylymo warâ.

<sup>13</sup> Saguhoem Deus itaumbyry awo wâgâ iwenibyem: “Deus tâinwâñse urâ. Awylygue iwâgâ auguely’ kewândymy Davi” warâ iwenibyem awyly. Arâ lâpylâ Davi ara Deus tyeinwândylygue, aunlolâ iwâgâ xina aguely. <sup>14</sup> Kywymâry Jesus igueypyem awyly ume, kurâem ietonibyry Deus. Tutuze xina, tyigueduo, kurâem itonze lâpylâ tawyly, Jesus agâ tokaleom ara lelâ xina awylygue. Aituo ise agâmolâ xina adaholy eydâ atoram. <sup>15</sup> Xina âsenagazedyly, âmaemoem koendâ itoem, unâ iwâkuru Deus nhuduypy mâindatomoem, agâmo Jesus einwânni modo agui isezedoem warâ. Arâ ise Deus ehoguedyly, iomaendyly warâ.

### *Tâensem modo wâgâ kydâpaunzene, tâentuneim modo wâgâ kulâ inkâba*

<sup>16</sup> Awylygue xina tâegane lelâ awyly. Kopaelâgâembaba lelâlâ wâne xina iduadyly, ton-honremba xina idyly warâ, xina egadopyry olâ xina oday kopaelâgâembaba iweloem

isezedly lakuru, Deus xurâem adâjidyly xina nimopa itoem. <sup>17</sup> Tarâ onro anaym tawyly ara tâsenagazeze lelâlâ xina; âdy keba olâ awârâ. Deus mawânkâ koendonro âdaunloenlâ adaindânry xuduze. Inakanhe lelâlâ wâne tarâ xina âsenagazedly. Mârâ koendonro xina nhemakely agâ, âdy keba waunlo ara kulâ olâ ise awârâ xina âsenagazedybyry. <sup>18</sup> Tâentuneim modo wâgâ inkâba xina âpaunzedyly, tâensenry modo wâgâ. Adainrim kulâma awârâ tâenseim modo, onro anano modo kulâ awârâ. Deus nhuduly olâ ise âdaunloenlâ adainrim keba.

## 5

<sup>1</sup> Âtâ wakurigue taryeim ara kulâ kodo tarâ onro anaym. Tutuze olâ kurâ, xirâ kodo adainduo, Deus iwelo kodo xuduonse awyly. Târâ kaynâ kodoem Deus nhudulyma ise adainrim keba, âtâ adaindânryem itâdyby emyenro. Deuslâ kodo iwelo aieni, kurâ mâkeba, <sup>2</sup> Âdatay tynaze kurâ. Toenzepa Cristo odopâdyly kienuendyly. Târâ eydâ atodâ inepa kodo iwelope kidyse kydawly. <sup>3</sup> Tynwânwânse kurâ xirâ; târâ eydâ iweloem maise kodo. Kâgadopyry lelâba ise; kodope lâpylâ ise. Kydadaimpâ ise kurâ-ro warâ. <sup>4</sup> Tarâ onro anaym kodo tâlâ kydato aunloenlâ nitaymba ise. Tarâ tynaze kurâ, kodo ton-honremba awylygue, tâwâmase, tyduase warâ mawânrâ. Inepa kyiguedyse kydawlygue inkâba kynadyly. Deus kodo iwelo kyam nhuduly inepa tâlâ kidyly olâ ize kydato. Aituoma ise kodo iduatyby ipa idyllylâ; iwelo adaindânry maise kodo. <sup>5</sup> Jesus kieinwântuo mawânkâ Deus turâem kyedyly, târâ kaynâ kodo iwelo tiunduhuem. Tyispiritury igonomâ, tiunduly tâkehobyry xuduze awyly kiuntuhoem.

<sup>6</sup> Deus eydâ atodâ tâitoem âdugukeoze tawyly tiuntuduo, aunlolâ xina iomaru. Tarâ onro anaym tawyly ara, Kywymâry ejidydâ iwaguema xina. <sup>7</sup> Tarâ xirâ onro anaym tawyly ara, xina Jesus netaymba, tâinwânsse olâ xina.

<sup>8</sup> Tutuze xina, iweloem âiehoze tawyly. Toenzepa wâne xina iwelo todope tâidyle awyly, Kywymâry Jesus agâ tâitoem! Koendâ lelâlâ ise xirâ xinaem. <sup>9</sup> Adienkylygue, adâkehogue warâ Kywymâry iomazeândyly olâ xina ize ato kuru, tarâ onro anaym todo iduanigue, târâ eagâ todo iwelogue alelâ. <sup>10</sup> Idânârâ Cristo enadoram âjidâtyguyoze kurâ; aguitobyry ara ise mâkâ âdy kagâ aini awyly aguely. Idânârâ ise kienmakely, koendonro atay, inakai atay warâ, tarâ onro anaym kydawly ume aguitobyry ara.

### *Jesus Cristo wâgâ Deus eatael-hoem kidyly*

<sup>11</sup> Kywymâry Jesus âwankuem xina nietaymba. Tutuzema xina, enadoram âepanâgueze kydawly. Awylygue wâne xina kurâdo nhurudyly, Deus ize ato lelâ aiedyly nhutuhomoem. Deus tutuze alâ kulâ xina âdy aniempyra awyly. Arâ lâpylâ âkealâ auguely awyly mâuntulymo. <sup>12</sup> Arâ kâinweniduo, tâwâlâ kulâ xina âzehoguedyly mâkeba augueho. Âduaymo Deus eon-honrugue adientyby wâgâ auguely, awârâ wâgâ madawihomoem, xina xunâgueni modo aguely watay, mâin-hogulymo mâuntuhomoem. Xina xunâgueni modo adienkyly wâgâ tâzehogueoly kulâ ize atomo. Deus tohoguedo wâgâ nâseguâdâbyramo olâ. <sup>13</sup> “Tyangahugoengueim mâkeba Paulo domodo” tâkezemo. Tyangahugoengueim keba kehomo wâne xina; xina nhenomedâdo olâ Deus xurâenlâ. Koendâ xina xunâgu tyangahu oday watay, âynynâmo xina âsewanihoenlâ.

<sup>14</sup> Jesus Cristo toenzepa tywynedylygue, koendâ kehoem xurâem xina âsewanily. Koendâ tutuze xina, Cristo iguewâm idânârâ xurâem. Mâkâ iguehobyry wâgâ, eagâlâ idânârâ kyiguely lâpylâ waunlo ara Deus xurâem. <sup>15</sup> Idânârâ kurâ domodoem myakâwâm mâkâ iguely. Kurâ mâkâ einwânni modo iweloem tâiehoze kurâ; eagâ tokaleoem ietybyem kurâ. Iomazeângelâ aguidyly mâkâ ize ato. Kâmakeze mawânkâ myakâwâm iguely, kurâem itondyly warâ. Awâlâ kulâ kydâzehoguedoem, ize kydato kulâ aguentoem warâ inkâba, mâkâ kyize awyly.

<sup>16</sup> Cristo idânârâ tywyneze awyly kiuntuduo, ânguy kiunâguedaymba kurâ, Deus ize ato modo agâ âseinwândânry modo aguehomo ara. Cristo kieinwâmpyra kydatay, âdalâ kulâ ani aguykewâdyly Jesus wâgâ, einwântânry modo agueho ara kulâ. Iwerâ olâ kurâ arâ aguykeba. <sup>17</sup> Jesus einwânni modo iweloem ietybymoem mawânkâ. Nhangahu oday xunâry saguhobyry, anhekyly warâ adaimpyem, idânârâ kehoem iweloem ietybyem awyly.

<sup>18</sup> Deus lelâ mawânkâ iweloem kyeni. Saguhoem Deus agâpa kyenipe akâwâm. Jesus kruz wâgâ iguehobyry wâgâ olâ, Deus idueryypyryem, eataen-hoem kidyly. Eagonro modo eataen-hoem itomoem lâpylâ aguykehoem adâkeze akâwâm Deus. <sup>19</sup> Cristo iguelly myakâwâm inakanhe aguitobyry xygakeze. Awylygue tâwentâgueduneba kurâ. Xirâ mawânrâ unâ xina nhegatuly: Jesus mâinwântuomo, Deus iweloem âetondâmo lelâ, mâkâ eataen-hoem mitomoem. Deus aguehobyry aralâ xina nhegatuly.

<sup>20</sup> Cristo ezedy wâgâ agueim xina. Deuslâ agueim, arâ xina aguehoen-ro waunlo ara, xina agueho mâindatomoem. Cristo ezedy wâgâ agueim xina awylygue, “Deus âmaemoem adiendyse ato kâjimetaundâ” xina kely. “Tâwâlâ Deus âugukemo, eataen-hoem mitomoem, âmaemo saguhoem eynynâbaombyry modo” xina kely. <sup>21</sup> Cristo âdaunloenlâ Deus izepa ato kulâ anientaymba. Âdy ewentâguedo peba awyly umelâ, inakanhe aguitobyry wâgâ âsenagazedoem aiemâ Deus. Cristo iguelly myakâwâm, kieinwântuo, eagâ tokalelâ kituo warâ tâwentâgueba Deus kâentoem.

## 6

<sup>1</sup> Deus emary modo xina itaumbyry egatuim; awylygue âyanmo aguezesedyly xina nimopa awyly: “Âmaemoem koendonro lelâlâ Deus; Cristo tâinwânsê âmaemo-ro warâ. Aituo Deus ize ato lelâ aietaungâ, agâmo koendâ ato alâ kulâba itoem” xina kely. <sup>2</sup> Isaías iweniwânmý Deus aguehobyry:

“Koendonro wawyly kâenehondyze wato saintuo,  
mâenkadybymo tuduze ani urâ.

Imakehomo saintuo, imakemo’ kely Deus.”

Koendâ xutuwâdaungâ. Koendonro tawyly Deus nhenehon-ho naintai. Iweâ lelâlâ agâmo koendâ tâidyse! Iwerâlâ imakedyzemo awyly!

<sup>3</sup> Deus xurâem tâwanopyry xunâguedyze inkâba xina. Awylygue Jesus tyeinwândyse donro modo ekuâdâni adiendyseba xina awyly. <sup>4</sup> Idânârâ adienkyly wâgâ Deus emary tawyly tânehonze xina. Awylygue toenzepa tâsenagazedyly, âdy peba tawyly, kâmaynoem tawyly warâ xina nhemaenly, Jesus tyeinwândyly xina nimopa olâ. <sup>5</sup> Toenzepa tâmaenze xina tapioguly, tâtadâdyly, tudueryem ityby modo tângazedyly warâ. Tokozely takaze kehoem tâsewanily, nykyâba tawyly, typnigueba tawyly warâ tâmaenze xina. Arâlâ olâ Jesus Cristo einwândyly xina nimopa awyly.

<sup>6</sup> Iozeno lelâ xina anhekyly. Deus âdaunlo awyly, anhekyly, koendâ awyly warâ tutuze xina. Idânârâ tâsenagazedyly tâmaenze xina, “Kienmaembâ enra kurâ” xina kepâlâ. Idânârâ agâ koendâ lelâ xina. Tywynezemo tawyly tânehonze xina. Deus Ispiritury xina agâlâ. Idânârâ awârâ modo tânehonze, Deus emary xina awyly. <sup>7</sup> Unâ âkealonro xina nhegatuly. Deuslâ xina eon-hondâni warâ xurâem xina âsewanihoem. Deus ize ato xina anhekyly watay, âsemagueze xina tudueryem modo amaymba, tâsemagueho, tâpeândo warâpe tawylygue.

<sup>8</sup> Tâlâ xina wâgâ koendâ aguewâni modo; tâlâ lâpylâ inakanhe aguewâni modo warâ. Tâlâ xina iwykewâni modo, tâlâ lâpylâ xina ehogeni modo warâ. Tâlâ, “Konokuni akaemo” keim modo. Âkealâ olâ xina aguely. <sup>9</sup> Tywâgâ aguenriem Cristo ingonotybylâ xina awyly xutudânrâ modope. Tâlâ lâpylâ olâ ingonotybylâ xina awyly xutuwâni modo. Xina âdyoze tâkeze inanry, xina nâdyopa olâ. Xina âzenagazeoly wâne, xina niguepa olâ. <sup>10</sup> Âdatay tytywanze wâne xina; tuomareba xina nipyra olâ. Âdy peba wâne xina.

Xina aguely idataynrim modo Jesus nheinwântuomo olâ Deus nhuduly koendonrope tâisemo. Âdy peba lelâlâ wâne xina, Deus olâ idânârâ xina ipa ato tuduze; aituo pylâ tydinerugueim ara lelâlâ xina awyly-ro warâ.

<sup>11</sup> Jesus einwânni Corinto donro modo, toenzepa âwynenimo wawylygue, xirâ kata wâgâ âdy augueho koentaymba urâ. Âdara yangahu oday unâry awyly mâuntudyzemo wato, xina âdara aieholi awyly warâ. <sup>12</sup> Âwynedylymo xina nimowâbyra; âmaemolâ olâ xina iwynedyly imorim. <sup>13</sup> Tâjiunwym tymery tinwyneguylyam inweniho ara âyanmo kâinwenily. Toenzepa xina âwynedylymo, arâ lâpylâ xina iwynedaungâ uguely.

### *Kywymâry Jesus einwântâny modo agâ on-hoam tâiseba itaungâ*

<sup>14</sup> Jesus eynynâbaom agâ kulâ tokaleom ara tâiseba itaungâ; tapirâ, kawaru agâ adatado iwykâjiby araba. Jesus einwânni, einwântâny warâ ize ato âzekiba nitaymba. Koendonro, koendâpaom agâ âzekiba nitaymba. Iajinu âzekiba nitaymba iamu agâ. Jesus xurâ, Satanás xurâ warâ âzekiba inkâba. <sup>15</sup> Cristo, Diabu agâ nâseinwândaymba. (Diabu keho lâpylâ Satanás ezedy.) Cristo einwânni, einwântâny agâ nâseinwândaymba. <sup>16</sup> Deus ety, xygatyby modo etyem tyetuneba. Kurâ Jesus einwânni modo Deus âdaunloenlâ iguedâny ety kurâ. Deuslâ arâ agueim:

“Iwerâ ynynonro modo agâ ise urâ;

aunlolâ ise eagâmo wawyly.

IDeusrymo ise urâ; akaemo ise ynynonro-ro warâ”  
kewândymy Deus saguhoem.

<sup>17</sup> Iwenibyem lâpylâ Kywymâry Deus aguehobyry:  
“Yeinwântâny modo sodokewâdaungâ,  
akaemo ara inakanhe kulâ amipyra mitomoem.  
Anhekylymo inakai modo kâdynanâdaundâ.  
Ynynâbaom modo anhekyly mâinmolymo-ro watay,  
tuomare kehoem ise;  
yam modopâdylymo kâinwânwândyly.

<sup>18</sup> Unwânmô ise urâ.

Ymeombyry ise âmaemo warâ”  
tâkeze Kywymâry Deus ton-honreim, warâ iwenibyem awyly Deus itaumbyry awo wâgâ.

## 7

<sup>1</sup> Yataen-hodo kâinwyneguyly, arâ mawânkâ Deus Kunwyn-em tawyly aguely, kurâ pylâ xurâ-ro warâ. Awylygue idânârâ Deus agâpa kyenehorim modo aiedyly kyjimonre. Ize ato wâgâ lelâ kydâpaunzene; ize ato lelâ aguyjiesezene. Deus âwankuem kiempyra kine. Eyam kydâtunre, kieinwântoem.

### *Paulo iomazehobyry*

<sup>2</sup> Xina tywyneze mawylymo enehonwâdaungâ. Agâmo Corintodâ tawyly ume, ânguyem xina inakai anientaymba keankâ. Ânguy Deus izepa ato anhetoem xina anienehonwâbyra keankâ. Ânguy xina nenokudaymba keankâ, idinherurumo tienmakehoem kulâ warâ. <sup>3</sup> Idânârâ, xina mâunâguedylymo arâ uguely mâkeba. Toenze kulâ xina inwyneguyly mâkeba âmaemo, tâwâlâ lelâlâ wâne âdylâ aidyly, xina iguehoem atay, xina niguepa itoem atay warâ. Ânguy kulâ, âdy kulâ warâ olâ ise xina âwynedomo naimpa. <sup>4</sup> Tâinwânsel lelâlâ urâ, Cristo tâinwânsel lelâlâ mawylymo. Arâ mawylymogue, ihoguedâmo urâ-ro warâ. Tuomare lelâlâ urâ âwâgâmo. Toenzepa lelâlâ wâne xina ekuâdânbibe awyly, tuomareba wipyra olâ urâ.

<sup>5</sup> Xarâ Macedônia yan-yam saintybyem, âdalâ xina nekobyzeguewâbyra keankâ. Tâinkâ lelâba keankâ inakanhe tadalafil. Deus eynynâbaom modo xina agâ iewiâkymo.

Tâdâjitoguyhodâ-ro waunlo ara keankâ xina âdutuly. Toenzepa keankâ xina eanu tuoday. <sup>6</sup> Deus, tytyruneim modo iomazeâni olâ keankâ xina iomazeâni. Tito mawânkâ nigonodâ âydonromopyryem xarâ xinaram. <sup>7</sup> Saintobypy wâgâ lelâba olâ keankâ xina iomaru, âwâgâmo xinaram nhegatuyby wâgâ warâ. “Corintodâ Jesus einwânni modo womazeândâmo, eagâmo wawyly ume. Âmâ, agâ idâwâtyby modo warâ tywyneze lelâlâ akaemo. Tytynre akaemo, tuduanomo ewy inakanhe aitobyry wâgâ. ‘Aietaungâ’ myguehobypy adiendysemo lelâ. Âynynâ adâkedyzemo lelâ âynynâba kulâ aguewâni modoram” kely keankâ Tito xinaram, xarâ saintybyem. Agueduo, urâ, yagonro modo warâ toenzepa lelâlâ xina niomaze.

<sup>8</sup> Mârâ kata saguhoem âyanmo kâingonotyby mâtaintainduomo, âurutomobyry wâgâ tâjityenze ani âmaemo. Arâlâ olâ, arâ âyanmo kâinwenihobypy wâgâ âdapa lelâ wawyly. Âtywanânehon-homobypy wâgâ saguhoem kâjityendâ lelâlâ wâne ilema-ro.

<sup>9</sup> Iwerâ olâ tuomare urâ, “Izepa mato adientobyry wâgâ tâjityenze xina. Xina inakanhe aitobyry xygakegâ” Deusram myguehomobypy wâgâ. Izepa ato amânhetomobypy wâgâ mâtityendylymolâ mawânkâ Deus ize ato. Awylygue mârâ kata wâgâ kâinweniduo inakanhe awidylly mâkeba keankâ âmaemoem. <sup>10</sup> Kydâjityenduo, inakanhe aguitobyry kinmoduo warâ, Deus tygakeze mârâ inakanhe aguitobyry, nhygakehoem kienkaduo. Aituo Deus kâmakely, xurâem lelâ kitoem. Awylygue kuomazely mâkânra kydâzemekeoduo. Jesus einwântâny modo olâ tâjityendylymo umelâ, Deusram inakai adienkyly timohomoem nekabyramo. Awylygue ise Deusram nâzemakeoba awylymo. Aunloenlâ ise eydâ iwague awylymo.

<sup>11</sup> Âmaemo mâtityendomobypy olâ Deus xurâem alâ kulâba. Awylygue ani inepa kehoem kata wâgâ âurutomobypy ara amidylymo. Toenzepa ani inakanhe mawylymo, inepa kehoem Deus nhygakedyze mawylymo. Toenzepa âewiâpadâmo inakanhe aini wâgâ. Âduaymo aityby wâgâ Deus inagazenehonlymo tytaze ani âmaemo. Iedyse ani âmaemo. Iozeno lelâ ani amânhedye matomo warâ. Awâkâ uguondo murudâmo, magâikemo, menagazedâmo warâ. Idânârâ amânhetybymo wâgâ, tâwentâzeba mawylymo menehomo.

<sup>12</sup> Mâkâ inakanhe aini mânagazedomoem kulâba, inakanhe ietyby mânemawyadâdomoem kulâba warâ ani kâinwenily, Deus enanaym, tâwâlâ âmaemolâ toenzepa xina tywyneze, tâinwâNSE warâ mawylymo mânehon-homoem olâ ani kâinwenily kuru. <sup>13</sup> Igarymo tindatuo, toenzepa xina niomaze.

Igarymo wâgâ kulelâba olâ xina iomaru, Tito, xarâ saintybyem âwâgâmo iomarugue lâpylâ warâ. Agâmo tatay mykeankâ, toenzepa eganu âwâgâmo. <sup>14</sup> Tito Corintoam idâly iraynâ, koendâ ani âwâgâmo auguely eyam. “Kata kâinweniby wâgâ kâunrutmobypy ara ise aidylymo” uguely ani eyam. Auguehobypy ara kehoem myani aidyly-ro warâ. Koendâ mawânkâ medaenkumo; kata wâgâ âurutmobypy aralâ amidâmo. Idânârâ âyanmo auguehobypy âkealâ, Titoram âwâgâmo auguehobypy âkealâ lâpylâ warâ. <sup>15</sup> Atârâ agâmo tatay, âurutmobypy koendâ lelâ mâindatomobypy, âwankuem mânhepyra matomobypy warâ tienanâgueduo âwynedâmo inanry Tito. Âwâgâmo aguely koendâ eagâ matomobypy wâgâ. <sup>16</sup> Toenzepa kohomaendyly; tutuzema urâ, auguehobypy aieniem mawylymo.

## 8

### *Tâwânrampa kehoem âdypebaom modoram tâlâ tato ewy nhuduhomobypy*

<sup>1</sup> Cristo eynynâ ypmugudo, koendâ lelâ Deus Macedônia eynynâ Jesus einwânni modo agâ, xirâ mâtuntudyzemo wato. <sup>2</sup> Toenzepa tâzenagazeozemo Jesus eynynâbaom modoram. Arâlâ olâ, toenzepa ohomaendylymo. Âdy pebaom modo xurâem imâem kehoem tâlâ tato ewy nhudulymo tâwânrampa kehoem, âdy peba tawyly umelâ. <sup>3</sup> Tutuze

urâ, tâlâ tato takaze kehoem nhudulymo, tâwâlâ ize tawylyguelâ. <sup>4</sup> Aunlolâ ani “Toenzepa xina dinheru tiundudyse awyly Judéia eynynâ âdy pebaom modo Jesus einwânni modoram” kezesedylymo. <sup>5</sup> “Imâembâ kulâ isenra nhudulymo” xina nyguewâdâ. Imâem olâ ani dinheru nhudulymo. Waunroem kuru warâ aguelymo: “Kywymâry Jesus ize mato xina anhetoem amyguehobypy lelâ xina adiendyse ato” kelymo. Xinaram aguelymo ani: “Amyguehomobypy ise xina anhekyly, awârâ mawânrâ Deus xina anhedyse ato” kelymo.

<sup>6</sup> Tito awyarâ âyanmo idâypyem, dinheru mâunduypymo emakely nagu. Ize mawylymoguelâ mâundulymo, tâwânrempa kehoem! Aituo xina aguely Titoram: “Magüypyne kâjimo. Eagâmo mataymo, dinheru âdypebaom modoram tiundudyse atomo emakelyem emawyadâgâmo, iomazehomoem” xina kely. <sup>7</sup> Koendâ lelâlâ Deus xurâem iwanumo amânhedylymo. Jesus Cristo tâinwânse lelâlâ âmaemo. Tutuze âmaemo koendâ unâ iwâkuru tâdâsemagueho egatuly, koendâ tutuze âmaemo Deus wâgâ. Tuomare âmaemo Deus xurâem mâsewanidaymo. Toenzepa lâpylâ xina mânwynedlymo. Awlylygue, koendâ Deus xurâem amânhekylymoguelâ, âdy pebaom modoram ipa atomo xuduwaataungâ, mâundupa tâiseba itaungâ.

<sup>8</sup> Arâ kâinweniduo, âutudyzemo wawyly mâkeba. Macedônia eynynâ Jesus einwânni modo tuomare lelâ dinheru nhuduhomobypy olâ mâtuntudyzemo wato. Arâ ise mâtuntulymo Cristo einwânni modo agâ mâynedomo âkealâ, âkealâba warâ awyly. <sup>9</sup> Tutuzelâ âmaemo, Kywymâry Jesus Cristo kywyneni awyly. Târâ kaynâ tunwym agâlâ idânrâ sodoem tawyly umelâ, nhânwânmy. Uguondo âdy pebaon-em imâ tarâ onro anaym, arâ aidyly myakâwâm, toenzepa kywynedlygue. Arâ aitobyry wâgâ idânrâ koendonro modo Deus nhudulymo.

<sup>10</sup> Urâ yangahu oday unârâ. Koendâ tâise mâtâ anu sakadyby wâgâ magüypy mo mânwanikelymo, uguely. Âmaemolâ ani âdy pebaom modoram tuduzeinhe dinheru emakely wâgâ waunroem tyangahueim. Âmaemolâ lâpylâ ani waunroem kuru xuduly sagurin-ro warâ. <sup>11</sup> Aituo magüypy mo ewanikewâdaungâ. Tuomare ani âdinerurumo ewy âdy pebaom modoem mâundulymo mangulymo. Tuomare lelâ lâpylâ dinheru eyanmo tugonoseim mâundulymo ewanikewâdaungâ, tâlâ matomo aralâ. <sup>12</sup> Deusram âdylâ kiundudyse kurâ-ro watay, tâlâ kydato aralâ kiundudyse awyly; ipa kydato nekadaymba.

<sup>13-14</sup> “Âdy pebaom modoram âunduwâtaungâ” ugueduo; “Âdy peba itaungâ” uguely mâkeba âyanmo. Âzekiba mawylymo xina ize ato. Jerusalémdâ Jesus einwânni modo ipa ato sanâtoem dinheru âunduwâtaungâ olâ, âdy peba mawânkâ akaemo, tâlâ âmaemoro warâ. Wayam âmaemo pylâ ipa mituomo, xuduzemo lâpylâ mawânkâ. Âzekiba ise mâsemawyadâdylymo. <sup>15</sup> Warâ myakâwândy Deus itaumbypy awo wâgâ iwenibyem awyly, Israelita domodo typyniry “maná” nhaunkudaymo.

“Mâkâ imâem saunkuimbyry nâsegubydâbyra akâwâm xurâem. Mâkâ imâembalâ saunkuimbyry olâ akâwâm ipa nipyra.”

### *Tito, eagâ tâwaneim modo warâ*

<sup>16</sup> “Koendonro lelâlâ âmâ, Pabai, Tito Corinto donro modo tienmawyadâdyze itoem amânhenehon-homobypy wâgâ, xina akaemo tienmawyadâdyze ato ara lâpylâ” tâkeze xina.

<sup>17</sup> Corintoam idâontoem xina agueduo, “Idâze lelâ urâ” nygue. Eyam xina aguely iraynâlâ, toenzepa keankâ nhetondyzemo awyly. <sup>18</sup> Cristo eynynâ kypemugulâ eagâ xina ingonokyly lâpylâ. Tarâ Jesus einwânni modo koendâ inanry aguelymo awâkâ Tito agâ idâim wâgâ. Deus emary koendonro mawânkâ, Jesus einwântuo lelâ tâdâsemaguely awyly wâgâ agueim awlylygue. <sup>19</sup> Koendâ mawânkâ Jesus Cristo xurâem ewanu. Awlylygue Jesus einwânni modo niduakemo xina agâ Jerusalémram idâhoem, dinheru Deus eynynonro modoram xuduupy sase. Xina aiese awârâ, Kywymâry Jesus koendâ

egaetoem, einwânni âdypebaom modo tienmawyadâdyze xina awyly xutuhoem lâpylâ warâ.

<sup>20</sup> Imâem ise xina dinheru nhadyly. “Turâem kulâ akaemo mâtâ dinheru nhadyly” ânguy kepa itoem ise xina kulelâba xina idâly awyly. <sup>21</sup> Kywymâry Jesus xurâem, kurâ domodo xurâem warâ iozeno lelâ xina adiendye ato.

<sup>22</sup> Tito domodo agâ tokalâ Cristo eynynâ kypemugu ewy xina ingonodyly lâpylâ. Kywymâry ewanuem xina tienmawyadâdyze tawyly tânehonzezelâ mawânkâ. Âwâgâmo koendâ aguehonly tydase. Âdy pebaom modoram dinheru mâtundudyse mawylymo, tâinwânse. Awylygue iomaru kuru âyanmo tâtâhoem. <sup>23</sup> Yataen-holâ awâkâ Tito; Cristo einwândyly wâgâ âyanmo aguelyem iemawyadânilâ. Cristo eynynâ kypemugu modo Tito agâ idâim, tâinkâ lelâba Jesus Cristo einwânni modo eynynâ aguenriem iduakeybylâ akaemo. Akaemo ewanu wâgâ ise Kywymâry Jesus koendonro awyly âzegaeholo. <sup>24</sup> Akaemo iduakeyby modo idâly iraynâ, “Corinto donro modo koendâ ise idaenkulymo. Mâenkadybymo ise anhekylomo. Koendâ lelâ ise akaemo tydineruru âdy pebaom modoram nhudulymo” ugue eyanmo. Awylygue, saindylymo-ro watay, auguehobyry ara lelâne aitaungâ. Arâ ise tywynezemo mawylymo nhutulymo. Tâinkâ lelâba Jesus einwânni modo xutuzemo koendâ auguehobyry awyly.

## 9

### *Jesus einwânni modo Judéia eynynonro âdy pebaom modoram dinheru nhuduhomobyry*

<sup>1-2</sup> Akaemo Jerusalém donro âdy pebaom Jesus einwânni modoram dinheru igoñodily wâgâ toenzepa tywenize urâ. Idânârâ tutuzelâma âmaemo ize mawylymoguelâ eyanmo dinheru mâtundulymo awyly. Jesus einwânni Macedônia eynynonro modoram auguelâ: “Corinto donro modo, xidadâ iwaguepa tâtyuneim modo warâ ize tawylymoguelâ dinheru nhudulymo, Judéia eynynonro Cristo eynynâ typemugudo xurâem. Awârâ anu sakadybylâ dinheru idâtyguyl nagumo” ugue eyanmo. Arâ amânhetybymo tiuntuduo, Macedônia donro modo, aramo adâidysemo lâpylâ.

<sup>3</sup> Âwâgâmo koendâ augue: “Corinto donro modo âdy pebaom modoram tâlâ tato ewy tiundudyse, tiundudysemo lelâlâ” ugue. Awylygue udâly iraynâlâ, Tito, eagonrodo warâ kâingonodyly dinheru mâtindâtyguyhomoe omazeânzemo. Yaintuo, idânârâ nhontybyem lelâ ise kâendye wawyly, âynynâmo koendâ auguehobyry ara kehoem, auguehobyry âkeá lelâlâ itoem. <sup>4</sup> Dineru nhontybyemba satoen-ro watay, urâ, Macedônia donro modo ewy yagâ idâim warâ saintuo, âpybazeze xina, âpybazeze lâpylâ âmaemo-ro warâ. <sup>5</sup> Awylygue keankâ Cristo eynynâ kypemugudo, udâly iraynâlâ, kâingonodyly, dinheru xuduypy nhondlyem imawyadâdomoem, idânârâ nhontybyem itoem, amyguehomobyry ara. Arâ ise idânârâ nhutulymo, tuomare lelâ mâtundulymo awyly. Ânguy keba, “Jerusalém donro âdy pebaom modoram dinheru xuduwâtaungâ” keim awyly warâ. Tâwâlâ mâtundulymo, ize mawylymogue.

<sup>6</sup> Xirâ enanâguewâdaungâ: “Mâkâ imâemba etânibyry, imâembalâ nhekaunâdyly. Mâkâ imâem etânibyry, imâenlâ nhekaunâdyly warâ.” Arâ ise Deusram kydâzeholy, âkelo modo kientobyry ara. <sup>7</sup> Waunroem wao koendâ angahumo oday xutuwâdaungâ, âdara dinheru mâtundulymo awyly. Tuomare kehoem mâtundulymo xuduwâtaungâ, mâtundudyse mawylymoguelâ, tytyremba, ânguy “Xudugâ” keduopa warâ. Mâkâ tuomare kehoem xuduim Deus inwyneguyl kuru. <sup>8</sup> Koendonro modo xuduze lelâ Deus âyanmo, âdy peba mipyra mitomoem, âdy pebaom modoram mâtundulymope lelâ mitomoem lâpylâ warâ.

<sup>9</sup> Warâ Deus itaumbyry awo wâgâ iwenibyem awyly Deus ize ato aieni modo wâgâ:

“Tâwânrampa kehoem ipaom modoram nhudulymo;

Aunloenlâ ise Deus koendâ aitobyry nhenanâguelo;

koendonrogue lâpylâ ise nhepywadly”

warâ iwenibyem awyly.

<sup>10</sup> Etâni modoram ewy xuduim mawânkâ Deus, einrim modo ipyniry xuduim warâ. Arâ lâpylâ ise tâwânrempa kehoem âyanmo nhuduly, âmaemo âdy pebaom modoram tâwânrempa kehoem mâunduhomobry ara lâpylâ. Mâkâlâ ise tâlâ matomo imâem iene-hoim, âdy pebaom modoram mâundulymope mitomoem. <sup>11</sup> Imâem ise âyanmo Deus koendonro nhuduly, tâwânrempa kehoem âdy pebaom modoram mâunduhomoem lâpylâ. Awylygue ise agui Deus wâgâ koendâ aguewâni modo awyly, dinheru tuomare lelâ xuduypy eyanmo xina nhakyly wâgâ.

<sup>12</sup> Âdy pebaom modoram mâunduly-ro watay, ipa atomo kulelâ inkâba mâunduly, Deus wâgâ koendâ aguehomoem adyenehonze lâpylâ âmaemo. <sup>13</sup> “Koendonro lelâlâ Deus, xinaram âdinerurumo ewy mâingonotybymogue xina âzedly awylygue” kezemo. Deus ize atolâ amânhelymo awyly tânehonze awârâ. Mâunduypymo emakeim modo koendâ ise Deus wâgâ aguelymo. “Koendonro lelâlâ âmâ, Deus, Corinto donro âynynonro modo unâ Cristo einwântuo tâdâsemaguely aguehomoem, amyguehobyry anhedylymogue. Xinaram dinheru nudumo tâwânrempa kehoem. Xinaram lelâba, âkelo anano âdypebaom modoram nudumo lâpylâ warâ” kezemo Deusram. <sup>14</sup> Aunlolâ ise akaemo Deus agâ aguely âynynâmo, tutuzemo mawânkâ Deus koendâ agâmo awyly. “Corinto donro modo agâ koendâ lelâlâ âmâ, xina agâ koendâ itomoem amânhenehon-hombyry wâgâ” kezemo Deusram. <sup>15</sup> Koendonro lelâlâ Deus, kâmakehoem tymery ingonotobyry wâgâ. Âdakykeho peba gâlâ kurâ.

## 10

### *Jesus Cristo Paulo induakehobyry, tywâgâ aguehoem*

<sup>1</sup> “Tarâ kydâ tatay, MYK alâ kulâ ani Paulo, ton-honre kehoem aguely nitaymba. Iwague tawylygue kulâ mâkâ kata wâgâ agueze eon-honru” tâkeze âmaemobry ewy. Aypa olâ, aypa lelâlâ! Koendonro, kywyneni warâ Cristo; âdakepalâ ani tynynâbaom modo agâ koendâ awyly. Mâkâ ara ize wawyly. Koendâ kehoem augueho idataungâ, Cristo aguehobyryenlâ auguely awylygue. <sup>2</sup> Awyarâ yaindyly-ro watay, ton-honre kehoem agâmo auguedyse inkâba urâ. Tutuze olâ urâ awâtârâ: “Deus eynynâbaom modo aito ara kulâ awâkâ Paulo aidyly” keim modope awyly. Arâ aguewâni modo agâ olâ ton-honre kehoem agueze urâ, kewâdylymo kulâ awylygue.

<sup>3-4</sup> Kurâ xina aramolâ. Iozepa kulâ Cristo wâgâ aguewâni modoram xina agueduo olâ, tonokuze kulâ, tyewiâse kulâ warâpa xina aguehomo in-hoguly. Pyrâugue mawânkâ sodadu tuduery agâ âseguebyly, myarâ lâpylâ xina Deus eon-honrugue aguely, unâ tâdâsemaguelo tiengatuday. Tyangahu oday tunârygue kulâ inkâba xina aguely, Deus eynynâbaom modo agueho ara inkâba. Sodadu tuduery modo otoendo sahodâdyby nhain-ho ara lâpylâ akaemo nhangahu oday inakanhe xunâgomoxina nhainly, Deus eon-honrugue itaumbyry xina tiengatuday. <sup>5</sup> Deus tonomery nhuduypyguelâ xina, akaemo Cristo wâgâ nhenomedâdomo iozepa awyly nhutuen-honly, tyangahu odano kulâ tâpaunzedomo awyly nhutuhomoem. Deus itaumbyry xina nhegatuly, âpaunzedomo iozepaom âtuguguehoem, Cristo lelâ nheinwântomoem. <sup>6</sup> Iwerâ, agui âmaemo ewy âurutomo tindadysedonro modo. Tâlâ âduaymo auguely tyeinwândysebaom watay olâ yaintuo, ton-honre kehoem eusemo urâ, sodadu iwymâry ton-honre kehoem tainwântâny nheuto ara.

<sup>7</sup> Koendâ mâuntuba kulâ kurâ koendonro, inakai warâ awyly amyguelymo, mâendulymogue kulâ. Awylygue mawânkâ, “Cristo tywâgâ aguenriem aguehobyry xina” keim modope awyly. Mâkâ wâgâ aguehoem aguehoymbyem akaemo watay koendâ wao nâpaunzedâmo. Iwâgâ aguehoem aguehoymby lâpylâma xina! <sup>8</sup> Saguhoem âyanmo auguelâ, iwâgâ kâengatuhoem Kywymâry Jesus ingonotobyem wawyly. Tywypazeba,

mâkâ wâgâ aguenriem wawyly, augueondyly, âkealâ mawânrâ. Mâkâlâ aguenriem ugononi. Âihugueândomoem inkâba mâkâ uduakely, Deus Ispiritury amânhetomoem aguehobyry mâinwânsezedomoem lakuru.

<sup>9</sup> Mâseanedomoem inkâba arâ kata kâinwenily. <sup>10</sup> Tâlâ warâ aguewâni modo: “Tinweniby modo wâgâ, ton-honre kehoem Paulo kurudyly, pymâ mâkâ-ro waunlo ara, kuduay watay olâ, adâkeho ara aguepa. Agueho âdyem nipyra” tâkezemo. <sup>11</sup> Xutuwâdaungâ xirâ: Deus izepa ato aieni modoram augueho, eydâmo iwaguepa watay, kata âyanmo kâingonokyly wâgâ alelâ âzekiba auguely.

<sup>12</sup> Âwâlâ kulâ tâzehoguedye inkâba xina, Deus emary lelâlâ tawyly xutuhuem kulâ, mâkâ xurâ keba modo aito ara. Deus agueho ara tâise aidylamo, akaemolâ olâ âdara adâidylly awyly agueim. Tagonro agâ tâsenuagaenzemo, tataen-ho modo takaze koendâ tawyly tientomoem. Ânguy Deus emary, ânguy Deus emary keba warâ adâkezemo. Arâ adâidyllygue, ânguydo kulâ tawyly tânehonzemo. <sup>13</sup> Konokudâ akaemo, Deus tugonotobyrydâba kulâ “Mâkâlâ xina igononi” tâkemuomo. “Deus xina nigonodâ mâtâ âjiam, iwâgâ xina aguehoem” xina kely watay olâ, âkealâ. Iozelâ xina koendâ adientyby wâgâ aguely, mâkâ tugonotobyry ara. Âkealâ, mâkâlâ âyanmo xina aguehoem agueim.

<sup>14</sup> Iozepa kulâ xina idatâny modo wakeduo: “Corintodâ adâitobyry wâgâ tuo-maruneba Paulo, awâtârâ Deus itaumbyry egatuho keba mawânrâ” keduomo. Âyanmo udâhoem Deus âkeá kepa watay, aguehomo âkealâ tâise. Awyarâ xina nigonodâ olâ, unâ tâdâsemagueho egatuze. <sup>15</sup> Urâ kulelâ inkâba, Deus itaumbyry egatuim modope lâpylâ. Koendâ inkâba “Urâ kulelâ Kywymâry Jesus wâgâ agueim” uguely, atâingâ aguewâni modo ara. Tuomare kehoem olâ âduaymo watay, eagonro âji modoram Deus ugonotobyrydâ warâ agânhekyly modo wâgâ auguely. Toenzepa lelâlâ Cristo wâgâ mâtâuntuzezylymo, mâkâ ize ato ara amisezylymo ize wato. Xirâ âwanu mawânrâ agânhetoem Deus aguehobyry. <sup>16</sup> Aituo ise âkelo anaxi xina idâly itymo anary takaze lâpylâ, Jesus Cristo einwântuo lelâ tâdâsemaguely wâgâ unâ koendonro egatuze. Xirâ unâ ânguy negatuba atobyryam lelâ ise xina idâly. Arâ ise koendâ kuru xina iomaru adientyby wâgâ, âkelomo aitobyry wâgâ kulâba.

<sup>17</sup> Warâ myakâwândy Deus itaumbyry awo wâgâ iwenibyem awyly: “Tadawidyse donro watay, Kywymâry Deus anhekyly wâgâ lelâ nadawi.” <sup>18</sup> Tywâgâ agueim, tywâgâ kulâ koendâ agueduo, agueho âdyem nitaymba. Jesuslâ iwâgâ koendâ agueduo lelâ âkealâ awyly xutuly.

## 11

### *Corinto donro modo iozepa enomedâni modoram âzenokuohobyry*

<sup>1</sup> Xirâ ywâgâ augueho âdiempa emaenwâdaungâ wao, tuândy ara kulâ augueday. Cristo wâgâ iozepa kulâ egatuim aguehomo mânemaen-homo ara; augueho emaenwâdaungâ lâpylâ wao. <sup>2</sup> Toenzepa âwâgâmo kâseguâdâdyly, Deus âwâgâmo âseguâdâdo ara lâpylâ, iozeno keba kulâ amânhedylymo wâgâ. Âwynsaundo tunizenry tokalâ uguondoam lelâ nhunwym nhegamely, iwydyem itoem, idânrâ uguondo modoram inkâba. Arâ lâpylâ Cristo lelâ mânwândysemo wawyly.

<sup>3</sup> Akaemo iozepa enomedâni modo aguehobyry einwânnipyryem âmaemo watay olâ, Cristo iomazeândyly imoimbyryem keanra âmaemo. Satanás, âgâuem itybyem, Eva enokumâmy, myara lâpylâ keanra akaemoam mânenuolymo. Awârâ koendâpa yeni-ro warâ. <sup>4</sup> Jesus Cristo wâgâ âyanmo tâgatuzelâ ani xina. Xina aguehobyry meinwândâmo, Jesus meinwândâmo, Deus Ispiritury âyanmo nâedâ-ro warâ. Iwerâ olâ iozepa kulâ Jesus wâgâ aguewâni modo aguely mânindakylymo. Tuomare kehoem âmaemo, unâ iozepaom kulâ idase, Satanás eynynonro modo âurudylymo idase. Deus Ispirituryamba mâtâduruholymo. Toenzepa awârâ iekuâdâdyly.

<sup>5</sup> Iozepa inomedântimo aguely kulâ māindakylymo. Ienanaji, yakabyra olâ akaemo kâuntuly “Unâ egatuly tutuze kehoem egatuim” keho modo. <sup>6</sup> “Tonomegueim agueho araba kulâ Paulo aguely” tâkezemo. Âkeá lelâlâ keanra, koendâ kehoem auguepa lelâlâ wâne keanra urâ, Cristo wâgâ augueday. Koendâ Deus wâgâ tutuze olâ urâ, Jesus einwândylygue tâdâsemaguely wâgâ warâ. Awârâ âkealâ awyly, tutuze âmaemo, Corintodâ awitobyry, inomedâdomobyry mäenânâgueduomo.

<sup>7</sup> Unâ iwâkuru tâdâsemaguelyho âyanmo segatu, “Iepywadaungâ” uguepalâ. Iewanopyryguelâ ani kâzedyly; uguondo tynrenseim anhetâny modo adyese ani urâ. Arâ awidyly ani, Deusram mâzehogueohomoem. Iozepa kulâ awidyly awyly adâkeze keanra âmaemo. Iozelâ olâ ani awidyly! Kaikâem widâ, koendâ amyguehon-homoem. <sup>8</sup> Âduaymo unâ tâdâsemaguelyho kâengatuday, âkelo Jesus einwânni modo ani dinheru igononi kâzetoem. Tâmakeze lelâ ani urâ, âyanmo âdy kâenkabyra witoem. Akaemo âzeto ewy ani kâentyly, âmaemo mäzetomo ewy kâentyba witoem.

<sup>9</sup> Agâmo wawyly ume, âdy peba wituo, âdy âyanmo kâenkadaymba ani urâ, ikuâdâbyramo witoem. Cristo eynynâ kypemugudo Macedônia eynynâba âetyby modo olâ ani idânarâ ipa wato modo tase. Âyanmo dinheru kâenkadyzeba ani urâ; kâenkabyra ise urâ-ro warâ. <sup>10</sup> Cristo xurâ wawylygue, augueho âkealâ awyly lâpylâ, Cristo agueho âkealâ awyly ara. Toenzepa inanry womaru, unâ iwâkuru tâdâsemaguelyho âyanmo kâengatuly tâbyguepalâ awylygue. Acaia einkâ udâday, tâpywazeba kulâ Deus itaumbyry kâengatuba witoem ânguy anienehonwâbyra ise. <sup>11</sup> Tâlâ âduaymo wakeim: “Paulo kydinheruru tienmakedyzeba awyly, kywynebyra tawylygue” keim. Arâpa olâ! Âwynedâmo wawyly, tutuze Deus.

<sup>12</sup> Âdy Yam mäunduhomoem kâenkabyra gâlâ ise urâ warâ, iozepaom egatuwâni modo wâneam inomedâdomobyry epyryem dinheru nhekazezylymo myara. Iepywadomoem auguely-ro watay, “Paulo emyenrolâ xina. Inomedâdomobyry epyryem dinheru tâkaze lâpylâ mawânkâ mâkâ” tâkezemo lâpylâ tâise. <sup>13</sup> “Cristoram aguehoymbyem xina, iwâgâ aguehoem” tâkezemo wâne, konokuze kulâ olâ aguelymo. “Mâkâ xurâenlâ xina aidyly” tâkezemo. Cristo emary aramo, koendonro aramo warâ wâne, tydani modo enokuze; konokuni kulâ lelâlâ olâ akaemo. Unâ Cristo wâgâ agueim nhegaturomoem aguehoymbyem inkâba akaemo! <sup>14</sup> Koendonro aramo wâne, koendonro kebamo olâ. Tutuzenry keba olâ awârâ. Satanás, anju ara tohozele kehoem, Deus ingonotyby ara kehoem, tâepanâgueze, konokuze, arâ lâpylâ turâ modo tydani modo warâ nhenokudyly. <sup>15</sup> Satanás arâ konokudâ-ro watay, emary modo koendonro ara tâise lâpylâ konokudoem. Deus olâ enagazenehonzemo, inakai anhetomobyry aralâ.

### *Paulo âsenagazedobyry*

<sup>16</sup> Ywâgâ auguehobyrlylâ ise augueonto. Ânguy tuândy ara iepyra nidâ. Tuândy ara lelâlâ wâne iedylymo, arâlâ olâ auguely idataungâ, yagâ aityby âyanmo kâengatuhoem, Cristo emary wawylygue. <sup>17</sup> Koendonro agânhetyby wâgâ augueduo, tuândy ara kulâ auguely, tuândy mawânkâ âwâlâ kulâ âzehogueni. Kywymâry Jesus auguedyse ato araba augueho-ro warâ. <sup>18</sup> Tâlâ mawânkâ âwâlâ kulâ âzehogueni modo, tywâgâ koendâ aguehonly kulâ ize ato waunlo modo. Awylygue alâpylâ ywâgâlâ kâinwenily, yagâ aitaymby modo wâgâ kâzehoguedyly warâ. <sup>19</sup> Tonomegue wâne mâdutulymo. Arâlâ olâ, tuomare kehoem akaemo âdy xutudâny modo agueho mâinwantaguedylymo. <sup>20</sup> “Deus ingonotyby xina” kewâni modo agueho tâmaenze âmaemo. Aguehomo mâinwântomoem adâkezemo. Âsejigumo tâmakezemo, turâem tientomoem. Inokudomo tâmaenze âmaemo, âdara myguepamolâ. Akadâmo kehoem âdutulymo. Âwankuem âetâmo. Âwapagaindâmo. Arâ mâzeholymo umelâ, izepamio mipyra olâ âmaemo! <sup>21</sup> Tuomare urâ, arâ aepyramo xina awylygue. Tywypaze tâise xina, akaemo inagazedomo ara inagazezemo.

Koendonro adienkyly wâgâ agueze ton-honreimbe-ro watay, tâegane lâpylâ urâ, Deus ewanuem koendâ awidyl wâgâ agueze, tuândy tâwâlâ âzehoguedo ara. <sup>22</sup> “Hebreu xina, âkelo iunu lâpeba” kelymo; hebreu lâpylâ urâ. “Israel iweompyry xina” tâkezemo. Mâkâ iweryypyry lâpylâ urâ. “Abraão iweompyry xina” tâkezemo. Mâkâ iweompyry lâpylâ urâ. <sup>23</sup> “Cristo emaryem âsewanirim xina” tâkezemo. Mâkâ emary lâpylâ urâ, akaemo takaze olâ koendâ wawly. (Arâ augueduo, tuândy ara kuru auguely.)

Akaemo takaze tâsewanize lâpylâ urâ. Cristo wâgâ auguelygue ani akaemo takaze kâzetadâozezedly. Toenzepa tadapioguoze urâ, tokalâ kulâ inkâba. Toenzepa lâpylâ iguezeseaji tâise urâ. <sup>24</sup> Ypemugudo judeu domodo agui yapiogudâmo. Cinco vezes, trinta e nove ykarydâ kadapioguoly, judeu domodo ezewenry ara. <sup>25</sup> Romano domodo segue yapiogudâmo lâpylâ azagâ tokalâ warâ. Tuhugue tadamytâoze urâ, yâdyse tawylymogue. Azagâ tokalâ warâ kehoem pepi imâsedo ioday wato tytyze urâ. Azagâ tokalâ ieto wâgâ ani pepi iotagâ kehoem atuly; tokalâ iguandyly, tokalâ emedyly warâ ani paikay ywâru. <sup>26</sup> Cristo wâgâ egatuze udâzesedyly ume, kâmaynoem lelâlâ ani urâ. Paru toenzepa tahugâneim tâkuezagâze urâ. Tâmagazeim modo idâwanry oze yakaday, yawâtâmo, utoguydâmo warâ. Judeu domodo, ypemugudo, yâze tâkezemo; judeu keba modo ewy yâze tâkezemo lâpylâ. Xidadâ oday, poji anaym, parutabâ ikay warâ kâmaynoem ani urâ. Kâmaynoem lâpylâ ani urâ, “Cristo eynynâ âpemugulâ urâ” keim modo agâ, Cristo einwânni modo kebamo olâ.

<sup>27</sup> Âwanu ton-honreim lelâlâ ani agânhekyly, kokozeâni kehoem. Âdatay koendâ ykyba tâise urâ. Âdatay ani âdy kâinly peba, âdy kâenyly peba, toenzepa igâwynu ume âtâ kânhokyly peba tâise urâ warâ. <sup>28</sup> Awârâ modo takaze kehoem, kopaelâgâembaba Jesus Cristo einwânni modo wâgâ iekuâgu. Tâinwânsesemolâ wânkâ, Deus ize ato adyesemolâ kely inanry kâpaunzedo; ykary wâgâ tâmânreimbe-ro waunlo ara inanry xirâ kâpaunzedly. <sup>29</sup> Ton-honreba kulâ Jesus einwânnipe-ro watay, iwâgâmo tâjityenze winase ton-hondâzemo warâ. Cristo eynynâ typemugu Deus izepa ato anhetoem aienehoimbe-ro watay olâ inanry toenzepa kehoem kadahulily.

<sup>30</sup> Ywâgâlâ auguedysedonro mâkeba urâ, ywâgâlâ auguely inanajimo watay olâ. Tâwâlâ kâsemaguehoem ton-honremba watobyry wâgâ ise auguely. <sup>31</sup> Uguewâdyly kulâ keba awly, tutuze Deus. Deus lelâlâ mâkâ, Kywymâry Jesus Cristo nhunwym, iDeusry warâ. Aunlolâ koendonroem awly wâgâ aguykely kinmopa kine. <sup>32</sup> Damascodâ wawly ume, Pymâ Areta pymâem induakeyby sodadu domodo xidadâ odaji tâdâwânto nhuan-huhoem adâkeze ani, iegasedaylâ yawâtomoem wâne. <sup>33</sup> Yataen-ho modo olâ ani cestu imâsedo odaji ietadâdâmo. Xidadâ sahodâdo ewy tuhu etyhobypy oze ani mâtâ oday ienâtâguylymo. Warâ ani mâkâ pymâ yâze kerim amaymba kâsemaguely.

## 12

### *Paulo enu oday âtygadobyry*

<sup>1</sup> Ywâgâ auguelylâ wao mynra koendonro, tywâgâ aguenriem Cristo ingonotyby wawly kâenehohoem, ywâgâ koendâ auguedyseba wawly umelâ. Iwerâ kâengatuly ise uguondo enu oday âtygadyby wâgâ, Kywymâry Jesus eyam nhutuen-hoymby wâgâ warâ. <sup>2</sup> Mâkâ uguondo, Jesus einwânni mâkâ. Mâkâ aitobyry tutuze urâ. Awârâ wâgâ âyanmo kâengatuly-ro warâ. Katorze anupe mâtâ aitobyry. Deus âji kaynonroam nhadyly eydâ tatoam. Kâuntuba urâ, âdara nhatobyry, egadopyry atay, mâkâ lelâlâ atay warâ awly. Deus lelâ âdy aityby xutuim kuru. <sup>3-4</sup> Augueondly. BAUK alelâ myani mâkâ uguondo adaholy âji koendonroam, Deus ety anary, Paraisoram. Âdara aitobyry kâuntuba urâ. Egadopyry lelâ keanra ani idâim, mâkâ lelâlâ keanra idâim warâ, kâuntuba urâ; Deus lelâ xutuim. Târâ awly ume myani tâjitanru ânguy agueho keba kehoem indadyly.

<sup>5</sup> Tuomare kehoem ise mâkâ uguondo agâ aityby wâgâ auguely. Mâkâ uguondo

Deus ezaxi satybylâ urâ uguepa wawyly, tâwâlâ kulâ ywâgâ auguedyseba wawlygue. Âdaunlo kurâ aralâ ton-honremba wawyly enehoim wâgâ lelâ ise auguely. <sup>6</sup> Tâwâlâ kâzehoguedyly watay, tuândyem wawyly mâkeba tâise, âkealâma tâise auguely awitobyry wâgâ. Tâwâlâ kulâ kâzehoguedyly izepa olâ urâ. Agânhetby wâgâ, auguehobyry wâgâ warâ mawânrâ ywâgâ koendâ aguehonly ize wawyly, ienu oday âtygadobyry wâgâpa.

<sup>7</sup> Toenzepa iwâkuru modo kâentobyry, kâindatobyry wâgâ warâ, yagonrodo takaze kehoem koendonroem kâdutuly wipyra witoem, tâwâmase ani urâ, tyguyreimpe unru oday-ro waunlo ara kehoem ani kâpyneândyly. Xirâ kâsenagazedo Satanás emary âeni yapioguze-ro waunlo ara, kâzehoguebyra witoem. <sup>8</sup> Azagâ tokalâ warâ Kywymâry Jesusram tâkaze urâ, xirâ nhetyhoem. <sup>9</sup> Warâ olâ ani Kywymâry Jesus aguely: “Kâentyba ise urâ. Agâ koendâ olâ ise urâ. Mâsenagazedyly mâenmaen-hoem on-honru xuduze urâ. Awârâ lelâ ise tâlâ mato. Ton-honreba mâtutuly-ro watay, agâlâ ise urâ on-hondâz” kely.

Awylygue tuomare auguely ton-honremba wawyly wâgâ. Arâ ise idânârâ nhutulymo, Cristo xurâem awidly, yagâlâ awylygue, won-hondâdâ awylygue warâ. <sup>10</sup> Tuomare olâ urâ Cristo xurâem wawylygue, won-honrugue âdylâ aiese ton-honremba wawyly umelâ. Iwâgâ âwankuem yedylymo umelâ; kâmaynoem wawyly umelâ; Jesus einwânni wawylygue kâzenagazeoly umelâ, toenzepa iekuâdâni modope awyly umelâ, tuomareba wipyra olâ urâ, Cristo aguehobyry aiese. Ton-honreba wituo lakuru, Cristo eon-honrugue kozohondâdly.

### *Corinto domodo wâgâ Paulo âseguaâdâdobyry*

<sup>11</sup> Tuândy ara auguely, ywâgâlâ koendâ augueduo. Âmaemolâ olâ arâ auguehoem aienehoim. Ywâgâ koendâ amygueylomo-ro watay, ywâgâ auguewâpyra tâise keankâ urâ, uduery modo “Cristo ingonotyby keba mâkâ Paulo” keduomo. “Cristolâ xina iwâgâ aguehoem agueim” kewâni modolâ mâen-hogueguylymo. Yakabyra olâ akaemo! Akaemo Deus xurâem anhekyly, adyese lâpylâ urâ, akaemo anhekyly takaze olâ agânhetdyly. <sup>12</sup> Agâmo wawyly ume Deus eon-honru enehoim, adyese ani urâ. Ânguy anhetânry adyese ani urâ. Kurâ domodo adawihoem aieni modo adyese ani urâ. Deus eon-honrugue adyeseim lelâ omazeânehoinmo adyese ani urâ. Awârâ modolâ Cristo itaumbypy egatuze ignotyby wawyly xutuen-hoim. Toenzepa tâpyneâñzelâ ani kâsewanizedyly. <sup>13</sup> Âkelo xidadâdâ Jesus einwânni modoem agânhetby, adyese lâpylâ urâ âmaemoem. Cristo wâgâ kâengatuhobyry iepywadomoem âdaunloenlâ kâenkabyra olâ urâ atârâ Corintodâ. Âyanmo “Iepywadaungâ” uguepa watobyry wâgâ yagâ tyewiâse âmaemo watay, enanânehonwâdaungâ wao.

<sup>14</sup> Azagâ lelâ âyanmo IU ise tâtâze urâ, udâontoem on-hondbyyem urâ-ro warâ. Yaintuo, âdinerurumo ewy kâenkadaymba ise urâ. Ywynedylomo, yataen-hoem mawylymo warâ agâmo ize wato, âsejigumo mâkeba. Tâjiunwym mawânkâ tymery tienamanâdoem xuani, tâjimery keba tunwym xuani. Unwânmoe kâdutuly; ietomoem kâenkadyze inkâba urâ.

<sup>15</sup> Âyanmo udâly-ro watay, tuomare kehoem ise dinheru tâlâ wato kainly, nhetomoem. Âsewanize lâpylâ urâ, inomedâdomoem, imâem Jesus wâgâ mâuntuhomoem warâ. Toenzepa âwynedomobyry mâendylymo umelâka âdiempa kulâ ywynedylomo?

<sup>16</sup> “Âkealâ, Paulo kagâ tatay, tâzetoem dinheru nekadaymba” keze âmaemo. Tâlâ olâ ise warâ aguewâni modo: “Konokudyly xutuim olâ awâkâ. Jerusalém donro âdy pebaom modo xurâem dinheru tiemakeday, turâem kulâ aidyly” keimpe ise. Arâpa olâ. <sup>17</sup> Tutuzelâ âmaemo, âdaunloenlâ inokubyramo wawyly. Uguondo modo âyanmo xigonodâ, Jerusalémdâ âdy pebaom modoram dinheru mâundudyse matomo emakerinem. Âdykâ gâlâ mâtâ dinheru ewy urâem kâentyba urâ. <sup>18</sup> Tito âyanmo idâhoem augue. Cristo eynynâ kypemugu eagâ xigonodâ. Tutuzelâ âmaemo, âdaunloenlâ inokubyramo

awylymo lâpylâ. Urâ, Tito warâ âzekiba xina koendâ aidyly, agâmo tawyly ume. Âzekiba lâpylâ ani xina inokudyzebamo awyly.

<sup>19</sup> Xirâ kata māintainlymo watay, wakeze âmaemo: “Paulo kyam niweni, tuduery modo aguelygue tâsemaguehoem kulâ” myguelymo. Arâpa olâ. Deus tutuze tarâ kâinwenily âdy awyly. Cristo kâinwenihoem aguehobyrylâ kâinwenily. Idânârâ tarâ kâinwenily, imâem Jesus māinwâñsezedomoem. <sup>20</sup> Toenzepa âwâgâmo yakalagu. Âyanmo yaintuo, ize wato araba kulâ keanra ise nhedylymo. Inudâbamo kulâ lâpylâ keanra ise augueho, agâmo agânhedyly warâ. Tâlâ keanra tuduekeim modo, tâdâtyzedyly keim modo, iewiâpani modo, turâem lelâ warâ izetonro modo, tâdâseudyly keim modo, tâdâtunâguedyly keim modo, sawoem ini modo, tadakaladâdyly keim modo warâ. Awârâ modo kâendyly mawânrâ kâyntaguyly, yaintuo. <sup>21</sup> Tâlâ âduaymo inakai aieniem sahozeyby modo. Eagâ tohogüin-hobypy keba kulâ xynanâdyly nimopa. Inakai modo, kywypado modo kehoem anhekylymo. Deus izepa ato adiendylygue âjityendâny, adiendyly timodyzebamo-ro warâ. Yaintuo, toenzepa âjityenze urâ Cristo nheinwântoem agânhenehoymby modo arâ adâidylmo nimopa awyly kâentuo, toenzepa âpybazeze urâ Deus enado.

## 13

### *Tâdâturudo xypyry, tâdâsedenguho-ro warâ*

<sup>1</sup> Azagâ tokalâ warâ âyanmo udâly idyly ise. Deus izepa ato aieni modo agâ ton-honre kehoem agueze urâ. Arâ auguely olâ ise, azagâ, azagâ tokalâ warâ inakanhe aitomobypy wâgâ agueimpe-ro watay lelâ. Arâ mawânrâ Deus itaumbyry awo wâgâ iwenibyem awyly: “Tokalâ kulâ inakanhe aitomobypy wâgâ agueim watay, âkealâ awyly tâinwântuneba. Azagâ, azagâ tokalâ warâ egatuin-ro watay lelâ einwândyly” kely. <sup>2</sup> Agâmo wawyly ume, Deus izepa ato aieni modo adâidyl inmohomoem xurudâmo. Akaemo ewy inakanhe tawyly nimopa kely xidadâ olâ. Ton-honre kehoem eagâmo agueonse urâ. Tâlâ pylâ kâxiguebygueduo Deus neinwâmpyra ityby modo.

Awylygue ise, udâondyl-ro watay, ton-honre kehoem auguely idânârâ Deus aguely sakani modoram. <sup>3</sup> Udâduo, inakanhe aini modo ton-honre kâenagazenehonduo, xutuze âmaemo Cristolâ auguehoem agueim awyly. Ton-honreba nitaymba Cristo. Âduaymo ton-honru enehonze mâkâ-ro warâ, inakanhe adâidyl imodâny modo kâenagazeduo. <sup>4</sup> Âkealâ, kruz wâgâ sakâjiday, ton-honremba myakâwâm, karalâ. Deus eon-honrugue olâ myakâwâm, kurâem itondyl, âdaunloenlâ nigueompyra tâitoem. Alâpylâ urâ ton-honreim keba lâpylâ. Arâlâ olâ, Cristo agâ tokaleom ara wawylygue, Deus eon-honrugue, âurudylmo imâem māinwântomoem.

<sup>5</sup> Tâwâlâ adapâigewâdaungâ, “Cristo tâinwâñse lelâlâ wânkâ urâ? ‘Tâinwâñse urâ’ uguely kulâ?” kewâtaungâ tâwâlâ. Cristo xurâ lelâlâ mawylymo xutuwâdaungâ. Jesus Cristo Tyispiritury nigonodâ odaximo âxidâze. Awylygue ise Cristo xurâem lelâlâ mawylymo aguely. Cristo xurâ mawylymo, xutuze âmaemo. <sup>6</sup> Arâ lâpylâ Jesus Cristo xina agâlâ awyly, emary xina awyly warâ mâuntulymo ize wawyly.

<sup>7</sup> Aunlolâ Deusram xina nhekadyly âmaemoem, izepa ato amânhepyra mitomoem. Arâ xina nhekadyly, koendonro amânhesedelymo ize xina awylygue, âduaymo Deus ewanuem adientyby wâgâ koendâ adâkehon-hoem kulâ inkâba. Deus izepa ato aiedyly māinmolymo watay ise âyanmo ton-honre auguepa wawyly, yaintuo. Arâ-ro watay ise uduery modo aguelymo: “Tywâgâ aguenriem Cristo aguehobyry mâkeba awâkâ Paulo, Corinto donro modo duay ton-honru nenehomba mawânkâ. Koendâ tâwanu anientaymba” kelymo. Aguelymo umelâ Deus ize ato amânhedylymo olâ ize wato. <sup>8</sup> Jesuslâ tywâgâ aguenriem ugononi awylygue, konokuni kulâ agânhetaymba urâ. Iozeno lelâ agânhekyly. Âwâlâ kulâ imâem yenehoim agânhetaymba urâ.

<sup>9</sup> Tuomare ise urâ, toenzepa Cristo mânwândylymo, ize ato amânhedlymo warâ, myguehonlymo kâindatuo. Awylygue ise pymâ tyewiâseim ara awipyra wawyly, yaimpygueduolâ ton-honre agâmo auguepa watobyry wâgâ, uduery modo koendâpa awidly wâgâ kywypadoem, ton-honrenryem warâ wawyly aguezemo. Awârâ modo wâgâ kulâ kâtynanâbyra olâ ise urâ. Awylygue aunlolâ warâ auguely Deusram: "Corinto donro modo koendâ iekâ, idânârâ adienkyly wâgâ, adâkeho wâgâ warâ nheinwântomoem" uguely inanry. <sup>10</sup> Awyarâ udâly iraynâlâ, xirâ kata kâingonodyly, âduanomo Deus izepa ato aieni modo xina saindyly iraynâlâ, inakai aiedyly inmohomoem. Idânârâ xirâ âurutomo koendâ mâyindadylymo-ro watay, udâduo, Kywymâry Jesus Cristo eon-honrugue inagazedaymbamo ise urâ. Jesus won-honru nhuduly ani igamanâdomoem, âtywanâdomoemba. Itâni emyenro xina, sakalagueim emyenro keba.

<sup>11</sup> Cristo eynynâ ypemugudo, kâsedaelenguly ise xirâ. Deus amidysemo ato ara amidylymo etaungâ. Âurutomobypy koendâ inwantagedaungâ. Tokalelâ angahumo oday âunârymo nidâ. Tâjihoguzeba, tâtuebazeba warâ itaungâ. Arâ-ro watay, Deus toenzepa kywyneni, tâkuâgueba kyeni warâ aunlolâ ise agâmo awyly.

<sup>12</sup> Âwaparymodâ tohonuguze âsedaelenguwâdaungâ, Cristo eynynâ âjipemugüem mawylymo mâyenehon-homoem\*.

Idânârâ Deus eynynonro modo idaenkulymo lâpylâ.

<sup>13</sup> Kywymâry Jesus Cristo koendâ nhetomoem, Deus âwynedâmo tawyly nhenehonhoem, Deus Ispiritury agâmolâ itoem warâ kâenkadyly.

Alâ kulâ ise âyanmo kâinwenily.

Paulo

---

\* <sup>13:12</sup> Saguhuem Jesus einwânni modo tohonuguze âsedaelengulymo. Iwerâma tâpymogoynze kydâsedaelenguly.

## GÁLATAS

### Paulo Kata Inweniby Galácia Donro Modoram

Xirâ kata wâgâ inwenily Paulo nhangahu odaji iemâmy Deus. Awlygue Deus itaumbrylâ xirâ Paulo inweniby. Jesus Cristo wâgâ aguehoem iduakeyby mâkâ. Aituo Galácia eynynâ Jesus einwânni modoram inwenily. Galácia donro modo judeu keba myakâwândy akaemo. Tiuntudyze atomo kuru olâ “Judeu domodo satâhogue tatâzeka kurâ, kydâsemaguehoem?” kelymo. Awârâ aguely wâgâ Paulo tin-hoguho kata iweniwânm. Capítulo 2.16dâ, “Kieinwântuo lelâ Cristo kâmakely, aguienkly, aguienlâny warâ wâgâ inkâba” kely.

#### *Aguely adaguho*

<sup>1</sup> Urâ Paulo, xirâ kata âyanmo iweninri. Jesus wâgâ aguenriem aguehoymby urâ. Jesus Cristolâ, Kunwym Deuslâ warâ uduakeim. Jesus igueypyem awly ume kurâem ietonibyry mâkâ Deus. Ânguy kulâ arâ auguehoem yam aguewâpyra, âdaunlo kurâ kulâ tugonotuneba ani warâ, xirâ unâ wâgâ aguenriem witoem yam agueze. <sup>2</sup> Idânârâ Cristo eynynâ kypemugudo tarâ yagonro modo, âmaemo Galácia eynynonro modo Deus turâem induakewâdyby nhedaenkulymo lâpylâ.

<sup>3</sup> Âynynâmo Kunwym Deusram, Kywymâry Jesus Cristoram warâ kâenkadyly koendâ mâzehohomoem, akaladânímo peba itoem warâ.

<sup>4</sup> Inakanhe aguitobyry xygakezelâ myakâwâm Jesus Cristo iguely, xirâ anaym Satanás amaymba kâmakehoem, Deus ize ato agâ âseinwândâny modo aguiempyra kitoem warâ. Tâwâlâ myakâwâm Jesus âtuly, kâmakehoem. Kunwym Deus ize ato aralâ myakâwâm aidyly. <sup>5</sup> Aunloenlâ Deus ehoguedyly ize wato. Âkeá lelâlâ xirâ. Alâ-ro warâ.

#### *Eagonro tâdâsemagueho lâpeba*

<sup>6</sup> Kainwâmpyra aze, Jesus wâgâ unâ iozeno einwânnipyryem, inepa kehoem einwândlyly mânmolymo, turâem âgâsenimobyry Deus agâba midylymo warâ! Koendâ Jesus agâmo awly ume, eagonro unâ tâdâsemagueho kulâ mânwânklymo. Iozepa kulâ amidylymo! <sup>7</sup> “Eagonro tâdâsemagueho” uguelly, âdy eagonro tâdâsemagueho lâpeba olâ. Jesus kieinwântuo lelâ kydâsemaguely. Tâlâ olâ xirâ unâ tâdâsemagueho xugukeze kewâni modo. Toenzepa konokuni modo akaladâdylymo. <sup>8</sup> Awâtârâ agâmo tawyly ume, “Jesus mânwântuomo lelâ ise Jesus imakelymo” xina kepa nipyra ani. Unâ âyanmo xina nhegatuyby âkeloem ânguylâ nhegatuly watay olâ mâkâ egatuimbyry peto nhântâny onwanji ise adameoly, tâwâlâ wâne ise xinabyry ewy awly, anju Deus ezayba âeni awly warâ. <sup>9</sup> Âyanmo augue, augueondlyly xirâ: Unâ âyanmo xina nhegatuyby âkeloem ânguylâ nhegatuly watay olâ mâkâ egatuimbyry peto nhântâny onwanji ise adameoly. <sup>10</sup> Arâ auguely, kurâ domodo nhehoguedoem inkâba. Deus auguely nhehoguedyly ize wato. Kurâ domodo ywynedoem inkâba auguely. Kurâ domodo nhehoguedoem auguely-ro watay, Cristo emaryem witaymba tâise urâ.

#### *Cristo xunârâ egaturin-em aguehoymbyem tawyly Paulo nhegatuhobry*

<sup>11</sup> Cristo eynynâ ypmugudo, mânuntudyzemo urâ, xirâ unâ iwâkuru tâdâsemagueho kâengatuyby, kurâdo nhugutyby kulâ keba awly; yangahu odano keba, agaityom modo nhegatuyby keba warâ xirâ. <sup>12</sup> Jesus Cristolâ xirâ unâ xutuen-honri waunroem kuru yam. Ânguy yam aguewâpyra tâdâsemagueho wâgâ, ienomedâbyra warâ, Jesus Cristolâ ienomedâni.

<sup>13</sup> Tutuzelâ âmaemo, Jesus kainwândlyly iraynâ âdaunlopyry wawyly. Ydamudo, judeu domodo ezewenry kainwândlyly ume, âdy agânheseguylly awly egary, tydaselâ ani

âmaemo. Jesus einwânni modo toenzepa kâenagazedyly. Akaemo kâintyembyra wawyly warâ. Idânârâ ani kâyândysemo wawyly. <sup>14</sup> Ydamudo ezewenry agueho ara kulâ kâinane awidly. Tâsenomedâze lelâlâ ani urâ, judeu domodo ezewenryem iwenibygue. Koendâ kehoem kâinane xina ezewenry iweniby kâuntuly; yataen-ho modo ydadiry agâ âzekibaom modo yara kehoem nhutulymo nitaymbamo kâinane. Toenzepa kâinane ydamudo ezewenry ize wawyly. Âdaunloenlâ kâinmodyze inkâba winane.

<sup>15</sup> Yagâ koendâ tawyly enehonwâm olâ Deus. Yazely iraynâlâ myakâwândy uduakely, emaryem witoem. <sup>16</sup> Kâuntudyze ani Deus, tymery Jesus Cristolâ kâmakeze tingonotyby awyly. Jesus Yam âepanâguely iraynâ, kâuntuwâbyra kâinane urâ, mâtâ kâmakerim awyly. Deuslâ awârâ modo Yam xutuen-hoim, judeu keba modoram Jesus wâgâ kâengatuhoe. Kâmakerim kehobyry Jesus awyly kâuntuduo, ânguyram auguewâpyra wakynre urutoem. <sup>17</sup> Jerusalémram udâpa lâpylâ ani urâ, Jesus tywâgâ aguenriem induakewâdyby modo agâ agueze. Arábia yan-yam lelâ ani udâly. Iweâpa wipyralâ ani Damascoram kodopâdyly. <sup>18</sup> Azagâ tokalâ anu Jesus einwânniem wipygueduo ani Pedroram udâly urutoem, Jerusalémram. Azagâ semana ani eagâ wawyly. <sup>19</sup> Jesus tywâgâ aguenriem induakeyby modoma ani urâ kâempyra; eagâmo auguepa gâlâ warâ ani urâ. Tiago agâ lelâ ani augueky, Kywymâry Jesus iukono agâ.

<sup>20</sup> Uguewâdyly kulâ mâkeba xirâ kâinwenily; Deus tutuze âkeá lelâlâ awyly.

<sup>21</sup> Jerusalém donropyryem, Síria yan-yam, Cilícia yan-yam warâ ani udâly. <sup>22</sup> Jesus einwânni modo Judéia eynynonro modo iepyramo gâlâ ani warâ, mâtâ anaxi, mâtâ anaxi warâ mawânrâ ani udâly âkelo âji yan-yam. <sup>23</sup> Iegary lelâ myani akaemo indakyly: “Mâtâ kânagazenibyry Jesus kieinwântuo lelâ kydâsemaguely kely wâgâ mâtâ aguely iwerâ. Iweâma mâtâ tâinwânsse, saguhoem sainze tâkehobyry” kelymo. <sup>24</sup> Iegary tindatuo, Judéia donro modo aguelymo: “Pabai, koendonro lelâlâ âmâ, kânagazenibyry Jesus nheinwântoem amânhenehon-hombyry wâgâ” kelymo.

## 2

### *Jesus induakewâdyby modo agâ Paulo aguehobyry*

<sup>1</sup> Katorze anu Jerusalémram Pedro agâ agueze udâhobyry sakabygueduo, tâtâonze urâ myarâ Barnabé agâ. Tito tagâ tase ani xina. <sup>2</sup> Udâly ani, Deuslâ mawânkâ ani Yam agueim, myarâ udâhoem. Jesus einwânni modo iwymârydo agâ lelâ ani târâ kâtunâguedlyly. Eyanmo tâgatuze ani urâ, unâ iwâkuru judeu keba modoram kâengatuly wâgâ. Iewanu agânhetyby modo, iwerâ agânhesezeguly warâ, âdyem nipyra awyly izepama ani urâ. <sup>3</sup> Tutuzemolâ ani Tito gregu awyly. Awlyguelâ xina ezewenry ara tatâzeba awyly. Xina ezewenry ara adatâohoem aguepamo olâ ani.

<sup>4</sup> Ilâpyryem tygâsezebalâ kurâdo ewy egawântaynlymo ani xina âtâdyguyhobyryam. Xina âdakely awyly idase kulâ myani idâlymo. Wakelymo: “Âpemugumolâ xina, Cristo eynynâ” kelymo; kewâdylymo kulâ olâ-ro warâ. Tutuzeba tâitoem kulâ aguelymo. Tito satâbyemba awyly tiuntuduomo, aguelymo: “Jesus einwânni Tito watay, kâzewenry ara nadatâo pylâ” kelymo. Jesus Cristo kâmake, kieinwândylygue eagâ kydawly warâ. Jesus einwântâny modo olâ saguho tâzezewenry kimoyby aguentondyze. Arâ aguidyly-ro watay, mâtâ kadeia odayba etagueyby, kadeia odaxilâ odopâdondyly myara kidyly kulâ. <sup>5</sup> Âdaunloenlâ aguehomo ara izepa ani xina. “Idânârâ Jesus einwânni modo judeu domodo ezewenry iweniby modo ara lelâ aidyly, judeu, judeu keba alelâ” xina kewâpyra. Arâ xina aguely watay, Deus aguehobyry tugukeze tâise xina, âmaemo judeu keba modo xina inokudylymo kulâ tâise warâ.

<sup>6</sup> Tâlâ Jesus einwânni modo duay iwymârymoem tutuzeim; âdyem nipyra olâ awârâ urâem. Deus nheinwândylymo, itaumbypyry âkealonro nhegatulymo warâ lelâ urâem, Deus surâem warâ âdyem ini. Iwelogue urutaymbamo ani akaemo pymâ domodo; âikâ

iewanu nudupamo ani, iewanu aralâ awidly. <sup>7</sup> “Tutuzelâ xina, âmâ, Pedro warâ unâ iwâkuru Jesus einwândylygue tâdâsemaguely awyly egatuze Deus ingonotyby mawylymo. Judeu keba modoram egatuly âmâ iwanu, Pedro ewanu pylâ judeu domodoram egatuly-ro warâ” kelymo.

<sup>8</sup> Arâ aguelymo iraynâ, Jesus wâgâ judeu keba modoram kâengatuhoem adâkeze ani Deus yam, Jesus wâgâ judeu domodoram Pedro nhegatuhoem adâkehobory ara lâpylâ. <sup>9</sup> Tiago, Pedro, João warâ, Jesus einwânni modo iwymâryem tutuzeim, tutuzemo Deuslâ xirâ iewanu xuduim awyly. Iemary, Barnabé emary warâ nhawâdylymo, Jesus ewanuem xina agâ koendâ lelâ tawyly tienehon-homoem. Yam, Barnabéram warâ aguelymo ani: “Judeu keba modoram ise Jesus xunâry mâengatulymo kuru, xina ise judeu domodoram egatuin-ro warâ” kelymo.

<sup>10</sup> Xinaram nhekaguylymo ani: “Xirâ âji Jerusalém anano judeu domodo Jesus einwânni modo ewy âdy pebaom modo xurâem âdylâ anhetaungâ, âdy peba kehoem kuruba itomoem” kelymo lelâ. Urâ olâ aunlolâ awârâ agânhedyse wawyly, kâenmawyadâdomoem.

### *Paulo Pedroram, “Iozepa kulâ amidyly” kehobory*

<sup>11</sup> Awârâpygueduo, Pedro Antioquiaram IU ise âewyly. Jesus einwânni modo enanaym ton-honre kehoem eyam auguely, iozepa kulâ aidyly awylygue. Âdy aityby egatuze urâ âyanmo. <sup>12</sup> Myarâ saintybyem, judeu keba agâ âwinduadyly. Tiago ingonotyby uguondo modo myarâ saintuomo, “Judeu keba modo agâ judeu domodo nâwinduapyra nidâ” kelymo. Agueduomo, Pedro judeu keba modo agâ tâwinduadyly inmoly, nhodokelymo warâ. “Judeu keba modo Jesus einwânniem idyly-ro watay, judeu domodo ezewenry ara nadatâomo” kerim modo tiyntadylygue. <sup>13</sup> Judeu domodo Jesus einwânni modo judeu keba modo agâ nâtâdyguya, nâwinduapyra warâ tâisemo ani. Pedro aitobyry ara lâpylâ aidylymo. Barnabé judeu keba modo agâba tyenehonzemo lâpylâ ani, iozepa adâidylly awyly tiuntuly umelâ.

<sup>14</sup> Deus aidysemo ato araba aidylymo awyly kâuntuduo, idânârâ enanaynmolâ kehoem ton-honre Pedroram auguely: “Judeu âmâ, unwâm, âze warâ eynynâ. Akaemo Tiago ingonotaymby modo saindyly iraynâ, judeu keba modo agâ tâtâdyguye, tâwinduase warâ keankâ âmâ, awârâlâ Cristo ize ato awyly mâyuntulygue, kâzewenry saguhobory agueho araba awyly umelâ. Judeu âmâ. Judeu domodo ezewenry iweniby araba amidyly-ro watay, ‘Xina ezewenry iweniby ara aitaungâ’ tâkezeba ikâ judeu keba modoram” uguelly eyam.

### *Jesus kieinwântuo lelâ Deus kâmakely*

<sup>15</sup> Urâ, ypmugudo warâ judeuem xina awyly, tunwym eynynâ, tyze eynynâ warâ. “Deus induakeyby kydawylygue, iamudoenlâ kâzewenry Deus inwenien-hoymby kiuuntuly. Judeu keba modo emyenro keba kurâ, Deus ize ato nutubamo mawânkâ” xina kely kâinane. <sup>16</sup> Tutuze olâ xina iwerâ, Jesus kieinwândylygue tâwentâzeinemba Deus kâendyly awyly, xina idamudo ezewenry iweniby kieinwândylygue inkâba tâdâsemaguely. Jesus Cristo kieinwântuo, Deus inakanhe kydawyly nhygakely; awylygue Deus xurâem âdygue tâwentâzeba kydawyly. Mârâ tâzezewenry ara aini mâkeba Deus nhekyly. <sup>17</sup> Jesus tyeinwândylygue tâsemaguely awyly, tutuze xina. Tydamudo ezewenry iweniby tyeinwândylygue inkâba ise xina âsemaguely. Xina ipemugudo ewy olâ xina tâwentâzemo. “Saguhobory agueho ara amitaymba âmaemo, judeu keba modo ara kulâ” kelymo. “Cristo, Deus mâympyra mitomoem aienehoim” kelymo. Kewâdyly kulâ olâ awârâ aguehomo! Deus aguehobory sakadoem anhenehonly nitaymba Cristo.

<sup>18</sup> Awârâ unâma kâengatuzezeguyl. “Deus xurâem, âdy kâwentâdo peba awyly, Jesus kieinwândylygue, judeu domodo ezewenry iweniby ara aguidylygue inkâba” warâ uguelly kâinmopa urâ. Augueho kâungukely watay: “Deus xurâem, kâwentâdo peba

awyly judeu domodo ezewenry iweniby kieinwântuo" uguelly watay, Deus aguehobyry kankadyly kulâ tâise, se iwânzeypyguelâ âtâ kaunâtondy waunlo ara. <sup>19</sup> "Âdygue tâwentâduneba urâ, ydamudo ezewenry tainwâns wawylygue" uguelly kâinane iozepa kulâ. Jesus einwânniem wituo olâ ani tâzezewenry amaymba widyly, igueypy tâzezewenry amaymba ato ara. Deus aguehobyry ara lelâ widyly. Cristo kruz wâgâ igueduo eagâlâ yiguelly waunlo ara. <sup>20</sup> Tâwâlâ myakâwâm Cristo âtuly, kruz wâgâ kurâem tyiguehoem. Mâkâ kâinwândylygue, ize wato ara kulâ inkâba awidly. Eagâlâ igueypyem wawylyro waunlo ara, kâinwândyly iraynâ watobyry arapama urâ iwerâ. Yagâlâ iwerâ Cristo. Iwerâ toenzepa Jesus kâinwândyly, toenzepa ywyneni mâkâ. Yigueduo âdaunloenlâ Deus agâpa yenehomba ise. <sup>21</sup> Toenzepa Deus kywynedyly, ize ato aguiempyra kydawly umelâ. Kâsemaguehoem mâtâ saguho tâzezewenry agânhedly kâinwândyly watay, Deus ywynedyly wâgâ kâtynanâbyra wawylylâ tâise. Âdaunloenlâ arâ auguepa olâ urâ. Judeu domodo ezewenryguelâ inakanhe kydawly xygakely watayma tâise âdyem nitaymba Cristo iguehobyry-ro.

### 3

#### *Cristo einwântuo lelâ tâdâsemaguely, judeu domodo ezewenry einwântuo inkâba*

<sup>1</sup> Âmaemo Galácia eynynonro modo, iozepa kulâ angahumo oday âunâgumo! Tâzenokuze âmaemo; egueântybyem âmaemo-ro waunlo ara. Agâmo watay, koendâ kehoem segatulâ Jesus Cristo kruz wâgâ iguehobyry; kieinwântuo lelâ kydâsemaguely awyly warâ. Mâkâ tainwâns ani âmaemo-ro warâ. Iwerâ olâ mânwândyseba âmaemo. <sup>2</sup> Mâenanâguedyzemo urâ; judeu domodo ezewenry iweniby mânwândylymogueba âyanmo Deus Tyispiritury ingonodyly awyly, unâ iwâkuru Cristo wâgâ mânwântuomo, xirâ enanâguewâdaungâ.

<sup>3</sup> Tuândy aito ara kulâ amidylymo. Deus Ispiriturygue ani Deus ize ato ara adâjidyly mangulymo. Iwerâ olâ Deus iomazeânze myguelymo ize matomo âunârymogue kulâ. <sup>4</sup> Jesus einwândyly mânmolymo-ro watay, idânârâ Deus agâmo anhetyby modo iwâkuru modo, koendonro warâ, âdyem nipyra tyenehonze awârâ. <sup>5</sup> Wauguely olâ, koendâ mânuntuybymo mâenanâguehomoem, Deus Tyispiritury ingonodyly agâmo itoem, âduaymo adyesenry modo kehoem anhedyly warâ, judeu domodo ezewenry ara amidylymogue inkâba! Mâkâ arâ anhedyly, unâ tâdâsemagueho mânindatuomo, Jesus mânwântomobyry wâgâ.

<sup>6</sup> Saguhoem Abraão emakehobyry aralâ iwerâ mâzemakeolymo. Arâ mawânrâ Deus itaumbyry awo wâgâ iwenibyem awyly: "Deus tainwâns myakâwândy Abraão. Nheinwândylygue âdygue tâwentâzeba myakâwândy Deus nhutuly." <sup>7</sup> Xirâ xutuwâdaungâ. Kywymâry Jesus einwânni modo mawânkâ Abraão iweompyry kuru. <sup>8</sup> Idânârâ tiungudyly iraynâlâ myakâwândy Deus, judeu, judeu keba alelâ tienmakely nhutuly. Awylygue saguhoem Deus aguely Abraão: "Âwâgâ ise idânârâ kurâ domodo agâ koendâ wawyly" kely, warâ iwenibyem awyly Deus itaumbyry awo wâgâ. <sup>9</sup> Deus, Abraão agâ koendâ awyly myakâwândy, aunlolâ tainwândylygue. Arâ lâpylâ ise Deus koendâ awyly idânârâ tainwântaynrim modo agâ.

<sup>10</sup> "Âsemagueze urâ, tâzezewenry Moisésram inwenien-hoymby idânârâ tainwâns wawylygue" kewâni modo enagazeze Deus. Wakelybe mawânrâ Deus itaumbyry awo wâgâ iweniby, "Tâzezewenry Moisésram inwenien-hoymby idânârâ einwântâny modo enagazeze Deus" kely. Aunlolâ idânârâ tâzezewenry inwenien-hoymby ara ânguy anitaymba. Awylygue ise nâsemagueba awylymo, âsenagazedoram ise âjigonohonlymo Deusram. <sup>11</sup> Tutuze kurâ, ânguy tâmakezeba awyly Deusram, tâzezewenry wâgâ kulâ. Wakely Deus itaumbyry awo wâgâ: "Deus tâwentâguezeba kâendyly, mâkâ kieinwândylygue lelâ, âdaunloenlâ eagâpa kydâiehowâbyra ise kurâ-ro warâ, onro anaym

kydawyly ume, kyigueduo alelâ” kely. <sup>12</sup> Tâzezewenry tyeinwândylygue tâsemaguel y einwânni modo Deus mâkeba tâmakerin-em nhutuly. Arâ âsemagueze kewâni modo idânârâ tâzezewenry agueho ara aidyly tâise, “Emakebyem mâkâ tâzezewenry idânârâ agueho ara aisezeni” kely, iwenibyem mawânrâ Deus itaumbyry awo wâgâ. Ânguy aniempyra awârâ-ro warâ.

<sup>13</sup> Tâwentâzeim lâpylâ ani kurâ, idânârâ tâzezewenry Deus Moisésram inwenien-hoymby kieinwâmpyra kydawylygue. Cristo olâ kâwentâdoberry nygake. Kydâsenagazedogue nâsenagazedâ kâtaybyay, kruz wâgâ sakâjibyem, inakanhe kitobyry wâgâ Deus agâpa kipyra kitoem akâwâm arâ iguely. Iwenibyem mawânrâ itaumbyry awo wâgâ: “Ky-wypado mâkâ, se epadâdyby wâgâ iguehoem sakâjiby; Deusram ewentâdyby mawânkâ” kely. <sup>14</sup> Saguhoenlâ Abraãooram adâkeze myakâwândy Deus: “Yeinwântâ mawylygue, koendâ ise agâ wawyly. Âwâgâ ise idânârâ kurâ domodo agâ koendâ wawyly” kewândymy. Awylygue toenzepa lâpylâ Deus agâmo koendâ awyly, Cristo Jesus mâyinwântuomo, tâwâlâ lelâlâ wâne judeu keba mawylymo. Jesus iguely myakâwâm, idânârâ inakanhe aguitobyry epywazelâ, judeu domodoem, judeu keba modoem alelâ. Jesus kieinwândylygue, Deus Tyispiritury ingonodyly kagâ itoem, “Igonose urâ” tâkehobyrlyâ awylygue.

### *Deus Abraão agâ âseinwândobyry, tâzezewenry Moisés inweniby warâ*

<sup>15</sup> Cristo eynynâ ypemugudo, kopaelâgâembaba ainilâ ise kâengatuly, mâyuntuhomoem. Egâ wâneam azagâ uguondo âseinwândyly âdylâ adientoem watay, “Warâ ise aguidyly” kehomobyry ânguy nugukewâbyra. Adâkehobyrly aralâ aidylymo. <sup>16</sup> Arâ lâpylâ myakâwândy Deus aguely Abraão agâ, iweombyry ewy tokalâ agâ koendâ tâitoem, warâ inwenibyem awyly. Cristolâ myakâwândy mâkâ agueho. <sup>17</sup> Warâ auguedyse wawyly, koendâ mâyuntuhomoem. Deus aguely myakâwândy Abraãooram: “Koendâ ise agâ wawyly” kely. Quatrocentos e trinta anubygueduo myakâwândy Moisés tâzezewenry inwenily, Deus “Iwenigâ” kehobyrly. Deus, Abraão agâ âseinwândobyry nugukeba olâ mâyâ Moisés inweniby, Abraãooram “Warâ ise” kehobyrly nygakeba lâpylâ warâ.

<sup>18</sup> Warâ iozepa kulâ aguewâni modo aguely: “Moisés saguho kâzewanry inweniby ara aguipyra kurâ-ro watay, koendonro ‘Xuduze urâ’ Deus kehobyrly kienmakewâbyra ise kurâ” kelymo. Cristo eynynâ ypemugudo, ioze inkâba awârâ! Âkealâ-ro watay, tâzezewenry Moisésram inwenien-hoymby, Deus Abraãooram aguehobyrly tygakeze tâise. Deus kagâ koendâ awyly, kieinwândylygue, “Koendâ ise agâ wawyly, yeinwântâ mawylygue” Abraãooram tâkehobyrly aralâ. Deus, Abraão agâ koendâ myakâwândy, tâinwândylygue, tâzezewenry nheinwândylygueba.

<sup>19</sup> Warâ keanra amygueymo: “Awârâ tâzezewenry iweniby kieinwântuoba Deus kâmakely watay, âdaituo pylâka myakâwândy Moisésram inwenien-honly?” mygueymo. Deus awârâ tâzezewenry inwenien-honly, ize ato, izepa ato warâ kiuntuhoem. Warâ myakâwândy Deus tuodaylâ aguely: “Xirâ tâzezewenry Moisésram kâinwenien-hoymby âdypyguyândyly ise, Abraão iwerybyry kâingonotuo, ‘Mâkâ agâ koendâ ise urâ’ uguehobyrly. Mâkâ âetuo, awârâ judeu domodo ezewanry iweniby âdyem nitaymba ise” kewânmmy. Xina idamudoram awârâ tâzezewenry xududay, eagâmo kehoemba myakâwândy Deus aguely. Waunroem kuru Deus anju domodoram judeu ezewanry nhegatuly wao târâ eydâ tatodâ. Akaemo anju domodo pylâ tâzezewenry Moisésram egatuin-ro warâ. Moisés pylâ kurâdoram egatuin-ro; kurâ domodo wâgâ adâkeze myakâwândy Moisés Deusram. <sup>20</sup> Abraãooram “Koendâ ise nhedyly” tâkeday olâ myakâwândy Deus aguely eagâ lelâlâ. Ânguy emaxi aguepa myakâwândy.

### *Âdakeze tâzezewenry aguely*

<sup>21</sup> Deus, judeu domodo ezewenry Moisésram inwenien-hoymby, Abraãooram aguehobyry nugukewâbyra. Deus tâzezewenry ton-honreim nhygadyly kydâsemaguehoem watay, tâwentâzeba tâise kurâ, Deus xurâem, awârâ tâzezewenry kieinwândylygue kulâ. <sup>22</sup> Deus itaumbyry awo wâgâ inweniby watâkeze. Deus izepa ato aguiendyse lelâ kurâ idânârâ. Etadâdyby emyenro kurâ, korentygue ekâjibyem waunlo ara. Deus izepa ato aguiendyseba lelâlâ wâne kurâ, âwâlâ inakanhe aguidyly kinmoly kipyra olâ kurâ. Jesus Cristo kieinwântuo “Xirâ amaymba kâmakely” aguewâm olâ Deus.

<sup>23</sup> Cristo onro anaxi âewyly iraynâ, warâ akâwâm xina judeu domodo xunâgu tyangahu oday: “Kâzewenry iweniby ara aguidyly watay, Deus xurâem âdy kâwentâdo lâpeba ise kurâ” xina kely. Etadâdyby âdara tâsemaguely awyly xutudânrâ ara akâwâm xina. Tutuzelâ akâwâm xina, idânârâ tâzezewenry iweniby agueho ara anipyra tawyly. Warâ akâwâm xina, Cristo tyeinwântuo lelâ tâsemaguely awyly tiuntuly iraynâ. <sup>24</sup> Egâ wâneam iamimeom eniranlâ âzeholy. Iamudoem atay, enimobe, xurunimobe warâ. Xutuduo olâ, eni kehoemba. Arâ lâpylâ akâwâm tâzezewenryam xina judeu domodo âduruholy, Cristo âewyly ara. Mâkâ xina nheinwântuo olâ, Deus xurâem, tâwentâzeba xina. <sup>25</sup> Iwerâ olâ, Jesus einwântuo âsemagueybyem tadalafilgue, mâkâ Ispiritury kurutâ. Awylygue Moisés inweniby tâzezewenry keba xina nheinwânkly awyly tâsemaguehoem. Tutuze xina iwerâ âdy adienkyly, adientânrâ warâ awyly.

<sup>26</sup> Cristo Jesus kieinwândylygue, Deus xurâem kydawly; judeu, judeu keba alelâ, Deus imeryem kurâ iwerâ. <sup>27</sup> Batiza mâieholymo ani, Cristo xurâem mawylymo mâenehon-homoem. Cristo ara mitomoem ani iweloem mâieholymo. <sup>28</sup> Tâwâlâ judeu, judeu keba; tâwâlânro, tâpywazenry; uguondo, pekodo warâ mawylymo, Deus xurâem olâ âzekiba lelâ âmaemo. <sup>29</sup> Cristo xurâ mawylymogue, Abraão iweompyry lelâlâ waunlo ara âmaemo. Deus âyanmo xuduze, Abraãooram “Xuduze urâ” tâkehobyry.

## 4

<sup>1-2</sup> Mârâ unâ wâgâlâ ise augueondly. Egâ wâneam tymery imeimbyryram nhunwym aguely: “Âutuly-ro watay, idânârâ âyam kâundudyse wato sodo ise âmâ, awârâ modo xuturim warâ. Iamudoem mawyly ara olâ, âmâ, âsejiguy warâ enipe ise âmâ. Âuruse, âutuduo âsejiguy imaxi mânhetuo âdara amânhedyly awyly wâgâ inomedâze warâ” kely. <sup>3</sup> Myara akâwâm kurâ, Jesus kâmakely iraynâ. Awâkâ tâensenry modo eon-honru amaym kydawly, kydâsemagueba, mâkâ kadeia oday ekâjiby ara. <sup>4-5</sup> Adâkehobyry odaxi ituo, tymerylâ akâwâm Deus ingonokyly, Maria oday iazehoem. Idânârâ judeu domodo ezewenry iweniby ara lelâ aidyly, judeuem tawylygue. Mâkâ iguely myakâwâm xina emakeze, xina Moisés inweniby tâzezewenry tyeinwântuo, tâsemaguely inwânwânipry modo. “Xina” ugueondly, ypmugudo wâgâ auguely awylygue, judeu domodo. Deus, tymery ingonodyly myakâwâm tâinwânni modo nhemakehoem, Deus imeryem kitoem lâpylâ.

<sup>6</sup> Deus xurâem kydawly etoem, xurâem kydawlygue, tymery Ispiriturylâ ingonokyly kagâ itoem. Ispiritury kagâlâ awylygue, Deus agâ aguykeday, “Pabai kâinwyneguylâ âmâ” kykely. <sup>7</sup> Iwerâ Cristo aitobyry wâgâ Deus tymeryem nhetybyem âmaemo; saguhobyry modo ezewenry amaymba emakebyem. Imeryem itybyem mawylymogue, tynynonro modo xurâem tiunduly tienkanâdyby xuduze lâpylâ Deus âyanmo.

### Galácia donro modo wâgâ Paulo âseguâdâdobyry

<sup>8</sup> Saguhoem kuru Deus mâuntuwâbyra ani âmaemo, tohoguezeim modo keba kulâ deus domodo myguewâtomo emaym mawylymogue. <sup>9</sup> Iwerâ olâ Deus kuru tutuze âmaemo, âutudâmo mâkâ warâ. Âwâlâ kulâba mâuntulymo. Deuslâ aienehoim mâkâ mâuntuhomoe, mâkâlâ tynynonroem âenehoinmo warâ. Igarymo xidadâ. Mârâ saguho

tâzezewenry einwântonze myguelymo, âdy tâinzeim, âdy tâinzenry, âdy adyeseim, âdy adyeseenry warâ wâgâ. Âdyem nitaymba mâtârâ tâzezewenry iwerâ, ton-honruneba warâ. Ânguydo kulâ olâ âmaemo, âdyem itânry aietonze myguelymogue, kadeia odayba etagueyby Wâne myarâlâ todopâdonze myara. Arâ amidylymo mâkeba kâinwânwânyly! <sup>10</sup> “Judeu domodo ezewenry ara, nunâ iwelo, igâwynu, kopâ adaguho, anu iwelo warâ kientyguedyly-ro watay, Deus xurâem tâwentâgueduneba ise kurâ” myguelymo. Iozepa olâ awârâ. <sup>11</sup> Toenzepa âwâgâmo iekuâgu, “Jesus einwândyly mâmholymo watay, unâ tâdâsemagueho âyanmo kâengatuyby âdyem nitaymbaka keankâ” ugueduo.

<sup>12</sup> Cristo eynynâ ypemugudo, yara itaungâ. Judeu wawylygue, kâsemaguehoem uguewâtuo akâwâm xina ezewenry kâinwândyly. Iwerâ olâ mâtârâ tâzezewenry kâinwândylygue âsemagueze urâ uguely ximo. Imyenromolâ urâ. Arâ âyanmo auguely inakanhe amitomobry wâgâ inkâba, âwynedylmogue lakuru. Awylygue yara mitomoem kâenkadyly.

<sup>13</sup> Tutuzelâ âmaemo, saguhoem kuru âyanmo udâhobyry, âydâmo iepagudyly ani, iewâmatuo. Ilâ umelâ ani âyanmo unâ iwâkuru Jesus einwândylygue tâdâsemagueho kâengatuly. <sup>14</sup> Toenzepa ani iewânugue mâseguâdâdylymo. Awylygue ani âdalâ kulâ ayepyra mawylymo, ywynebyra mipyra mawylymo warâ. Koendâ lelâ ani iedylymo, anju Deus ingonotyby eto ara kehoem, Cristo Jesus eto ara warâ. <sup>15</sup> Jesus wâgâ auguehobyry mâindatuomo, toenzepa tohomaenze ani âmaemo, agâmolâ wawylygue. Kua yetomoem âdylâ amânhedyse kehoem matomobry, tutuze urâ. Inumo mâentydye kehoem ani âmaemo, yam mâunduhomoem\*. Iwerâ olâ âtuguguebyem âmaemo. <sup>16</sup> Âduerymo ara kulâ iedylymo, ataen-homo araba, iozeno auguehobyry mâindadyseba mawylymogue.

<sup>17</sup> Tynynonroem âedysemo mawânkâ akaemo, “Judeu domodo ezewenry einwântaungâ” kewâni modo. Âmaemoem koendonro keba olâ awârâ. Udueryem midysemo; auguely mâindadysebamo tienehondyzemo, aguely lelâ mâindatomoem. <sup>18</sup> Deus itaumbryy ioze lelâ egatuwâni modo eynynâ tadalafilâ koendonro. Aunlolâ arâ itaungâ, agâmo wawyly ume kulelâ inkâba. <sup>19</sup> Pekodo tâsenagazeze, tâzeon-hoinze warâ tymery iazehoem, myarâ lâpylâ ani kâsenagazedyly, kozeon-hoinly warâ Cristo xunâry âyanmo egatuze, âmaemo ymeombyry emyenro. Iwerâ tâsenagazelâ urâ, einwândyly mâmholymo kely kâindatuo. Âsenagazelâ ise urâ, Cristo ize ato ara kehoem amitomoem, agueho ara amyguehomoe warâ. <sup>20</sup> Toenzepa iwerâ agâmo wawyse wawyly wâne, koendâ kehoem âyanmo auguehoem. Toenzepa iekuâgu, koendâpa wawyly warâ âwâgâmo!

### Azagâ Abraão imeom, Agar agâ, Sara agâ warâ

<sup>21</sup> Warâ myguelymo keankâ: “Deus xurâem, tâwentâzeba kitoem, judeu domodo ezewenry iweniby kyzeinwâne” myguelymo. Deus, Moisésram tâzezewenry inwenien-hoymby koendâ mâtântuba olâ âmaemo. <sup>22</sup> Azagâ Abraão imeom wâgâ myakâwândy Moisés inwenily, pekodo tâmaryem Abraão nhatyby Agar imery wâgâ, Sara Abraão iwydy lelâlâ imery wâgâ warâ. <sup>23</sup> Deus kehobyryemba myakâwândy Agar adamly. Awylygue idânârâ pekodo modo imery iazeho aralâ imery iazely. Sara olâ myakâwândy adamylim keba. Warâ olâ myakâwândy Deus Abraâoram aguely: “Âwydy Sara imezeze lelâ, aripiem awyly umelâ” kely. Deus agueduo, Sara Abraão agâ imezelymo.

<sup>24</sup> Azakâlâ Abraão imeombyry wâgâ, azagâ pekodo wâgâ warâ auguely, Deus tynynonro modo agâ azagâ tâseinwândo anhetobyry mâtântuhomoem, Abraão agâ âseinwândobyry, Moisés agâ iwy Sinaidâ âseinwândobyry warâ. Egâ wâneam Agar, tâbyguepa âsewanahoem sanâtyby. Etadâdyby ara mâtâ, tywymâry emaymba itoem

\* <sup>4:15</sup> “Tâmulâ nhetyly” kely gregüem. “Tienmawyadâdomoem âdylâ adysemo tâise, akaemo duay tatay âdy peba awylymogue” keze aguely.

nudupa, tâwâlâ nâdutuba warâ. Arâ lâpylâ, Sinaidâ âseinwândomobry ara, judeu domodo tâzezewenry aiedyly nimoba awylymo. Agar, iweompyry warâ mâtâ Sinaidâ âseinwândomobry enehonri akaemo. <sup>25</sup> Augueondyly xirâ. Deus, Moisés ingâsedly myakâwândy iwy Sinairam, Arábia yan-yam. Târâ myakâwândy judeu domodo ezewenry Moisésram inwenien-honly. Judeu domodo ijidadâr tynrenseim kuruma Jerusalém. Mâtâ xidadâ etolâ mawânkâ Agar. Agar, iweompyry modo warâ etadâdyby ara, tywymâry ewanu inmohomoem nudupa, arâ lâpylâ judeu domodo etadâdyby ara awylymo, saguho tâzezewenry inmohomoem nudupa awylygue.

<sup>26</sup> Etadâdyby araba olâ kurâ. Jesus tainwânse kurâ, Deus xurâem tâwentâguezeba kitoem. Kurâ xurâem, kâjidy xidadâ tohoguezeim kuru olâ ise Jerusalém iwelo kaynonrodâ.

<sup>27</sup> Deus itaumbyry awo wâgâ warâ aguely:

“Âmâ pekodo tymeguenry, tuomare ikâ, adamye mawylygue!

Âmâ iamudo iazely ewânu xutudânrybyry, adaenkegâ omarugue, âmery iazeday.

Pekodo sodokeyby toenzepa ise imeongu, mâkâ tusoneim takaze kehoem” kely.

{Pekodo sodokeyby wâgâ adâkeday, xidadâ Jerusalém wâgâlâ myakâwândy Isaías aguely, mâtâ anano modo eagonro anaxi etadâdybyem sadylymo wâgâ Jerusalémram tuomare odopâdondylymo wâgâ, warâ aguely.}

<sup>28</sup> Isaque ara âmaemo, Cristo eynynâ ypemugudo, Deus aguehobyry ara imeryem mawylymogue, aguehobyryem Isaque iazehobyry ara. <sup>29</sup> Abraão iwydy kuru adamyhobyry mawânkâ “Âmery iazeze” Deus Ispiritury kehobyry, Agar imery keba. Agar imery, mâkâ Sara imery tângazeze olâ myakâwândy. Arâ lâpylâ iwerâ Jesus eynynâbaom modo, Jesus einwânni modo tângazezemo, nheinwândylymogue. <sup>30</sup> Warâ iwenibyem awyly Deus itaunrubry awo wâgâ: “Pekodo kâtydâ tâbyguepa âsewanihoem manâtyby igonokâ, imery agâlâ. Âigueduo, âwydy kuru imery, mâkâ pekodo tâwaneim imery agâ tunwym isejiguybyry nepajigâbyra ise” kewândymy Sara tuoam. <sup>31</sup> Cristo eynynâ ypemugudo, emakeybyem kurâ; etadâdyby araba kydawylygue. Sara Abraão iwydy lelâlâ iweombyry kurâ, Agar, Abraão etydâ âsewanihoem sanâtyby iweompyry keba.

## 5

### *Kurâ Cristo einwânni modo etadâdyby emyenro mâkeba kurâ*

<sup>1</sup> Cristo kâmakewâm judeu domodo ezewenry iweniby ara aguiyra kitoem, Deus xurâem tâwentâgueba kitoem. Etadâdyby etagueyby ara kurâ. Awylygue Jesus einwândyly kâjimowâdaundâ. “Judeu domodo ezewenry einwântaungâ, Deus xurâem tâwentâguezeba mitomoem” kewâni modo kâjiwantaguedaundâ. Etadâdyby ara tâiehodonzeba itaungâ.

<sup>2</sup> Koendâ idataungâ! Warâ âyanmo auguely. “Deus xurâem tâwentâguezeba kitoem, judeu domodo ezewenry ara kydadatâonre” myguelymo watay, Jesus mânwâmpyra mawylymo mâenehonlymolâ. Âdyem âepyramo Cristo iguehobyry waunlo ara, awylygue ezewenrymo ara madatâolymo. <sup>3</sup> Augueondyly. Judeu domodo ara madatâlymo-ro watay, idânârâ Moisés tâzezewenry inweniby ara pylâ aitaungâ. Idânârâ Moisés inweniby ara amitomoem nudupa olâ ise. <sup>4</sup> Âmaemo judeu domodo ezewenry mânwândyse donro modo, Cristo agâba itybyem âmaemo tokaleoem âenimo modokewâdaundâmo. Âmaemolâ Deus agâmo koendâpa itoem aienehoim. <sup>5</sup> Tutuze kurâ, âdalâ tâwentâzeim keba kydawyly, Deus enado kydawyly ume. Xirâ kinwânwânyly. Deus Ispiriturylâ xirâ modo xutuen-hoim, Jesus tainwânse kydawylygue. <sup>6</sup> Cristo Jesus xurâem lelâlâ kurâ watay, âdyem nitaymba judeu domodo ara kydadatâoly, kydadatâoba warâ kydawyly. Deus xurâem koendonro, Jesus kieinwândylygue, kagonro modo agâ kydâpynedy.

<sup>7</sup> Saguhoem Cristo lelâ ani mânwânylymo, mâsemaguehomoem. Iwerâ olâ iozepa kulâ mâzenomedâohomobyry mânwânylymo. Tâlâ keanra ânguylâ Deus mânwâmpyra mitomoem aienehonze keim. <sup>8</sup> Deus keba olâ keankâ mânwâmpyra mitomoem aenehōrimo. Mâkâlâ keankâ âgâsenimo, xurâenlâ mitomoem. <sup>9</sup> Wakelype mawânrâ: “Âdiempa fermentu kulâ toenzepa kehoem massa tuolize” kely. “Aguipaom aguely kulâ âdy mânwâmpyra mitomoem âenehonrim” kezelâ aguely. <sup>10</sup> Tutuze olâ urâ, Kywymâry Jesus xurâem kydawylygue kâinwânto ara einwântonze mawylymo. Kewâdyly kulâ aguewâni modo kulâ ânagadoem âenehoinmo, Deus olâ mâkâ aguewâtyby modo enagazeze lâpylâ. Âdaunlo kurâ inokunimo enagazeze Deus.

<sup>11</sup> Cristo eynynâ ypemugudo, “Judeu keba modo nadatâo âsemaguehoem” uguelly-ro watay, koendâ tâise Cristo ynynâbaom modo iedyly. Xirâ olâ auguepa wipyra wato: “Âdaitoem tatâwâduneba judeu keba modo. Jesus Cristo kruz wâgâ iguely myakâwâm, kâmakeze, kieinwântuo lelâ” uguezesedo. Auguely kâinmoba wawylygue pylâ, toenzepa judeu domodo ienagazedyly, unâguedylymo warâ. <sup>12</sup> Deus xurâem mawylymo mânenehon-homoem madatâodyzemo mawânkâ iozepa kulâ unâ egatuwâni modo. Toenzepa ikuâdânímo tâdâtûrudo iozepaom modo. Koendâ tâise akaemo emukely!

<sup>13</sup> Warâ lâpylâ âyanmo auguely, Cristo eynynâ ypemugudo. Emakeybyem âmaemo. Judeu domodo ezewenry iweniby amaymba mitomoem ani mâtigâseolymo. Aituo, “Judeu domodo ezewenry amaymba wawylygue, ize wato ara iwerâ awidly” tâkezeba itaungâ. Koendâ lelâ aitaungâ, agonromoem koendâ lelâ warâ, mâtigâseolymo. <sup>14</sup> Saguhoem Moisés iweniwâm: “Agonromo agâ âpynedaungâ; koendâ mâtetomo ara lâpylâ agonrodo agâ koendâ âzetaungâ” kely. Tâpyneze lelâ agonro agâ mâtigâseolymo watay, idânârâ tâzezewenry ara amidylymolâ ise awârâ. <sup>15</sup> Agonromo agâ âewiâpadlymo, mâtugadlymo warâ watay, agonromo agâ mâtigâseolymo imoimbyryem âmaemo. Ânguydo imeom tagonro agâ tâjítoguyday tagonro tyâze myara lâpylâ ise amidylymo, mâtigâseolymo warâ watay.

### *Deus Ispiritury kurutobyry ara lelâ aguine*

<sup>16</sup> Wauguedyse urâ. Deus Ispiritury amânhetomoem aguehobryy ara lelâ aitaungâ. Arâ amidylymo-ro watay, inakai amânhedyse matomo amânhetaymba ise âmaemo. <sup>17</sup> Inakai modo aguiendyse kydato, Deus Ispiritury aguiendyse ato agâ koendâ nâseinwândaymba; kuoday âjitoguyl waunlo ara. Deus Ispiritury aguehobryy ara amituomo inakai amânhedyse matomo anienehomba. <sup>18</sup> Deus Ispiritury aguehobryy ara amituomo, Moisés ezewenry mânwântaymba âmaemo, mâsemaguehomoem; mâtâ tâzezewenry amaymba âsemagueybyem âmaemo.

<sup>19</sup> MON warâ awârâ Deus Ispiritury izepa ato modo âzecholy. Inakanhe adâjidy. Tohogüin-hobryy keba kulâ xynanâdyly; âdaunlo modolâ. Kywypadoem kulâ adâjidy tynanâzeim modo agâ. <sup>20</sup> Onro xygatyby enado âzeguhoam tâjidyly, se xygatyby enado lâpylâ, Deus lelâlâ-ro waunlo ara xyrendyly. Tâdâseudyly. Inepa kehoem nâpynebyra tâjidyly; âdaituoba kulâ tâjiewiâpadly. Tâdâtyzedyly. Âdydo imeom turâem lelâ ize tadowly; tywâgâ lelâ tâdâpaunzedyly. Âikâlâ, âikâlâ tâjidyly, tâdâseinwândyly peba; tâdâseguebyly; tagâ âseinwândânr igoñodly. <sup>21</sup> Âdypeom watay, toenzepa tâdâseuwânily. Toku ikaji tâjidyly, tâjidolagu; kywypado aiedyly. Toenzepa inakai modo kulâ aieholy; idânârâ auguepa gâlâ urâ. Awârâ aieni modo olâ ise Deusgue tywymâguebamo, aunloenlâ ise eagâpa awylymo.

<sup>22</sup> Deus Ispiritury konomedâo olâ Deus kinwynedoem, kydâpynedoem; kuomaroem; kydâseanebyra kitoem, tâwâlâ lelâlâ wâne kâmaynoem kydawyly; idânârâ kienmaen-hoem; idânârâ agâ koendonroem kitoem; kydâzeinwâñ-hon-hoem, “Aiese urâ” kyke-hobryy aguentoem; <sup>23</sup> kydâdunâgueoly watay, tyewiâseba kin-hoguhoem; âwâlâ

aguienkly modo wâgâ kydâjimanâdoem warâ. Xirâ Deus Ispiritury aguehobyry amânhedylymo watay, âdaunlo tâzezewenry mankadlymo mâkeba.

<sup>24</sup> Cristo Jesus xurâem kurâ-ro watay, Deus izepa ato aguiempyra kitoem ton-honre ise kurâ. Idânârâ aguiendyse kydato modo kruz wâgâ sakâjibyem mawânrâ, Jesus kurâem igueduo. <sup>25</sup> Deus Ispiriturylâ Jesus kieinwântoem aienehoim, Deus ize ato ara kitoem. Awylgue tâwâlâ Deus Ispirituryam kydâzenomedâonre, idânârâ ize ato ara aguentoem.

<sup>26</sup> Sawoempa kine. Kienwiâpanâbyra kine. Âdypeom wâgâ kulâ kydâsewâniba kine warâ.

## 6

### *Mâkâ, mâkâ warâ kydâsemawyadâne*

<sup>1</sup> Cristo eynynâ ypemugudo, âyanmo auguely. Jesus einwânni modo Deus izepa ato anhedyly watay, âmaemo Deus Ispiritury aguehobyry koendâ xuturim modo, Deus ize ato aiedyly lelâ anhetondomoem, koendâ xurutaungâmo, enomedâdaungâmo warâ. Tyewiâseba olâ xurutaungâmo. Tonomeguelâ lâpylâ itaungâ, inakai amânhepyra mitomoem. <sup>2</sup> Cristo eynynâ âpemugumo emawyadâdaungâ, tytyenze mawylymo mâenehon-homoem. Âdylâ tâmânrâim nhanâkyly nhewandayba mâenâtâguylymo, emaxi manâtomoem waunlo ara. <sup>3</sup> Âdy mâuntubamo kulâ, idânârâ âdy tutuze lelâ mâdutulymo watay, tâwâlâ kulâ awârâ mâsenogudylymo. <sup>4</sup> Tâwâlâ aguitobyry modo wâgâlâ kydâdutunre, Deus ize ato ara, ize ato araba warâ kydawly. Aguitobyry koendâ-ro watay, tâwâlâ kydadawily aguitobyry wâgâ. Kagonro aitobyry wâgâ kulâba aguitobyry wâgâlâ. <sup>5</sup> Eagonro anhekyly wâgâ kydâtynanâbyra kine, Deus aguentoem aguehobyry lelâ aguyjiene.

<sup>6</sup> Jesus einwândyly wâgâ âsenomedâni modo âdydo imeom koendonro tâlâ tato modo ewy nudumo tonomedâni modoram.

<sup>7</sup> Ânguy Deus nenokudaymba! Âkealâ xirâ! Deus ize ato aienibyry koendonro emakeze lelâ. Ize ato aietânybyry olâ ise koendonro nemakeba. Wakeho tutuze âmaemo: “Kientâdybylâ ise kienkaunâguyly” kely. <sup>8</sup> Egâ wâneam, mâkâ nady onro inakai wâgâ etânibyry, koendâ nekaunâdaymba. Onro iwâkuru wâgâ typniry etânibyry olâ koendâ tâkaunâze. Alâpylâ ise inakai aiedyly kulâ kânanano-ro watay, xypyry etay, tywângueim ara kulâ ise Deus tarâ onro anaym inakai aguentby modo nhedyly. Deus Ispiritury ize ato ara lelâ aguidyly-ro watay olâ aunloenlâ ise kyigueduo Deus agâ kydawly; koendonro emakeze kurâ.

<sup>9</sup> Awylgue koendonro Deus ize ato aiese kokozeba kine. Arâlâ aguisezedly watay, Deus “Warâ ise” kehobyry odaxi ituo, koendonro kyam xuduze Deus, âpa ezay tâwaneim koendâ pyni ekaunâni ara. <sup>10</sup> Awylgue idânârâ xurâem koendonro aiedyly kinmoba kine, aguitoem nhuduly watay; akaemo Jesus kieinwânto ara einwânni modo xurâem koendonro aguyjiene kuru.

### *Tâdâsedenguho, tâdâturudo warâ xypyry*

<sup>11</sup> Urâ lelâlâ xirâ iemarygue iweninri, urâlâ âyanmo kata igononi awyly mâuntuhomoem. Imâsedo modoem kehoem kâinwenily.

<sup>12</sup> Akaemo iozepa kulâ unâ egatuwâni modo aguely âyanmo: “Adatâowâdaungâ tâzezewenry ara, Deus xurâem tâwentâguezeba mitomoem” kewâni modo; kewâdylymo kulâ. Kurâ domodo tyize itoem, koendâ tywâgâ aguehomoem warâ kulâ aguelymo. “Cristo kruz wâgâ igueypy kieinwântuo lelâ kydâsemaguely” kelymo-ro watay, judeu domoram tâzenagazeozemo tâise. <sup>13</sup> Moisés ezewenry ara adatâoybymoem wâne, idânârâ Moisés inweniby agueho ara anipyramo olâ. “Xina eynynonro akaemo” tâkehomoem kulâ, arâ madatâodyzemo awylymo.

<sup>14</sup> Kâzehoguedo kuru olâ Kywymâry Jesus Cristo kâmakeze iguehobyry kruz wâgâ. Igueypy modo xirâ onro anano modogue nâtynanâdaymba, arâ lâpylâ, mâkâ kruz wâgâ

igueypy kâinwândylygue, Deus ize ato agâ âseinwândânry modogue kâtynanâbyra wawyly. Cristo eynynâbaom modo âpaunzedo ara inkâba kâpaunzedly. <sup>15</sup> Deus xurâem, tâwâlâ Moisés ezewenry ara satâbyem, satâbyemba warâ kydawly. Deus kiuntudyze ato olâ iweloem kyedyly, ize kydato nhugukely warâ. <sup>16</sup> Deus agâ augueday wauguelly: “Pabai, koendâ iweloem ietyby modo egâ; ekuâdânímo peba iekâ, koendâ lelâ itomoem aienehongâ warâ, uguelly. Tytyenzemo lâpylâ ikâ” uguelly inanry. Arâ Deus agâ auguelly âmaemo Galácia donro modo wâgâ kulelâ inkâba; idânârâ Deus xurâ modoem lâpylâ auguelly.

<sup>17</sup> Kâenwanikehoem kuru olâ warâ auguelly. Ânguyne iweâma yakaladâdombyra nidâ. Deus xurâ keba modo yapiogumo, toenzepa ienagazedâmo, Jesus kieinwântuo lelâ kydâsemaguely uguellygue. Xirâ yapioguhobyry olâ Jesus emary lelâlâ wawyly tânehonze.

*Kywymâry nhesemo*

<sup>18</sup> Kywymâry Jesus Cristoram âynynâmo kâenkadyly, koendâ mâzehohomoem. Alâ kulâ ise âyanmo kâinwenily.

Paulo

## EFÉSIOS

### Paulo Kata Inweniby Éfeso Donro Modoram

Xirâ kata wâgâ inwenily Paulo nhangahu odaji iemâmy Deus. Awylygue Deus itaumbyrylâ xirâ Paulo inweniby xidadâ Efesodâ Jesus einwânni modoram. Paulo Jesus Cristo wâgâ aguenriem kehobyry, Romadâ etadâdybyem tawyly ume, ingonotyby xirâ kata Deuslâ myakâwândy iweniehoim. Azagâ tokalâ warâ unâ egatuze tâtâly ieto wâgâ, agui âji modoram tâtâze Jesus wâgâ unâ egatuze. Agui nunâ takaze târâ Efesodâ Jesus wâgâ egatuze, enomedâzemo warâ. Xirâ kata inwenily olâ myakâwândy iweâpa târâ eagâmoba itybyem.

#### *Aguely adaguho*

<sup>1</sup> Urâ Paulo xirâ kata âyanmo iweninri. Cristo Jesus tywâgâ aguenriem ingonotyby urâ, Deus aguehobypy ara. Âmaemo Éfeso donro modoram xirâ kâingonodyly, Deus eynynonro modoram. Cristo Jesus einwândyly mânbowâbyra âmaemo, mâkâ xurâ mawylymogue.

<sup>2</sup> Kunwym Deusram, Kywymâry Jesus Cristoram warâ kâenkadyly koendâ mâzehohomoem, akaladânímo peba itoem warâ.

#### *Cristo eynynonro kydawylygue, koendonro ise Deus kyam nhuduly*

<sup>3</sup> Deus kyzehoguene. Kywymâry Jesus Cristo iDeusry, nhunwym warâ mâkâ. Cristo agâ tokalelâ kydawylygue, kagâ koendâ lelâlâ mâkâ. Kydâsemaguehoem, inakanhe aguitobyry xygakehoem warâ toenzepa aienibyryem Deus. <sup>4</sup> Âdyo imeom tiungudyly iraynâlâ myakâwândy Deus kuduakely, xurâem kitoem, âdygue tâwentâzeba kitoem. Cristo tâinwânse kydawyly tutzelâ myakâwândy mâkâ, kieinwândylygue mawânrâ xurâem kidyly.

<sup>5</sup> Kywynedylygue myakâwândy Deus, tymeryem kuduakely, Jesus Cristo kurâem anhetyby wâgâ. Arâ Deus aidyly myakâwândy, arâlâ mawânkâ myakâwândy aidyse awyly, adiendye tato aralâ. <sup>6</sup> Kagâ koendonro lelâlâ Deus. Aguely kieinwâmpyra kydawyly umelâ myakâwâm koendonro tawyly kyam nhenehonly. Tymery tinwynegeuyly kurâem aitobyry wâgâ akâwâm Deus toenzepa koendâ tawyly nhenehonly. Awylygue koendoroem awyly wâgâ Deus kionmaendyly. <sup>7</sup> Kruz wâgâ mawânkâ myakâwâm Cristo iguely, tunu tyapâze, inakanhe aguitobyry xygakeze. Cristo kieinwândy-ro watay, tâzemakeoze kurâ. Awylygue akâwâm Deus inakanhe aguitobyry nhygakely. Tywykenry ara mâkâ kâändly iwerâ, âdygue kâwentâdaymba. Warâ akâwâm toenzepa kagâ koendâ tawyly Deus nhenehonly! <sup>8</sup> Tâwânrampa idânârâ koendonro modo kyam nhuduly, typygueba kehoem.

Tonomegueim lelâlâ Deus. <sup>9</sup> Awylygue, “Aiese urâ” tâkehobypy anhedyly. Iweâpalâ myakâwândy âdara kâmakely awyly nhutuly. Jesus Cristo iguehobypy mawânrâ kydâsemagueho, kurâ keba inakanhe aguitobyry wâgâ kyiguehoem. Saguhoem ânguy nutuwâbyra myakâwâm kâmakehoem arâ Deus xunâry awyly. Iwerâ olâ kurâ tutuze, Deus mawânkâ enehonwâm. <sup>10</sup> Warâ myakâwândy xunâry: “Aitoem kâinduakeyby iume ise Cristo idânârâ tâlânro modo iwymâryem itoem agânhenehonly, iezano modo, onro wogonro modo alelâ iwymâryem itoem” kewânmy Deus.

<sup>11</sup> Idânârâ aidyly Deus ize ato aralâ, saguhoem “Aiese urâ” kehobyry aralâ. Kydâtugudyly iraynâlâmy Deus kuduakewâm, xurâem kitoem. Cristo einwânniem kydawyly tiuntuduo myakâwândy kuduakely. <sup>12</sup> Iweâpalâ myakâwândy xina judeu domodo Messias âeni keho xina nhenuendyly. Saintuo, judeu domodo akâwâm waunroem kuru tâmakezeim, mâkâ nheinwântobyry wâgâ, judeu keba modo nheinwândylymo

iraynâlâ. Aituo Deus turâem anhetyby tientuo, “Ton-honreim, koendonro warâ lelâlâ Deus!” xina kely.

<sup>13</sup> Ilâpyryem âmaemo judeu keba modo Cristo meinwânmâmo lâpylâ, Deus itaumbypyry âkealonro âyanmo egatuduo. Cristo einwântuo lelâ tâdâsemaguely awyly mâtuntuduomo, meinwânmâmo. Mâinwântuomo, Tyispiritury Deus igonomâ, xurâem mawylymo xutuhoem. Deus aguely myakâwândy: “Yispiritury igonose urâ, ynynonro modo agâ itoem” kely. Kysejiguy wâgâ kâzedy tywenize kurâ, kurâ xurâ awyly xutuhoem, myara lâpylâ Deus Tyispiritury ingonodyly kagâ itoem, xurâem kydawyly xutuhoem. <sup>14</sup> Âdylâ kianâdyly-ro watay âdiempa tâpywaze wao kurâ, idânârâ epywaze kydawyly xutuhoem, myarâ lâpylâ akâwâm Deus Tyispiritury ingonodyly, xypyry etay “Xuduze urâ” kehobyry emakerin-em kydawyly kiuntuhoem. Awylygue koendâ kiuntuly, xypyry etay âzemakeoze kydawyly idânârâ inakai modo amaymba, xurâ kydawylygue. “Toenzepa ton-honreim, koendonro warâ âmâ” kykenre Deusram.

### *Paulo Deus agâ aguehobyry Jesus einwânni modo wâgâ*

<sup>15</sup> Kywymâry Jesus toenzepa tâinwânszelâ âmaemo, kely tydase winase. Idânârâ Jesus eynynonro modo mâinwynedylymo, kely lâpylâ warâ. <sup>16</sup> Arâ igarymo kâindadylygue, warâ inanry Deusram auguely: “Koendonro lelâlâ âmâ, âynynonro Éfeso donro modo Jesus nheinwântoem, âpynedomoem warâ amânhenehon-hombyry wâgâ” uguely. Aunlolâ inanry âmaemoem eyam kâenkadyly.

<sup>17</sup> Deus agâ augueday, auguely: “Kunwym, tohogueim, ton-honreim warâ âmâ! Pymâ Jesus Cristo iDeusry âmâ. Âynynonro Éfeso donro modo enomery xudugâ, koendâ âutuhomoem. Âispiritury eon-honruguelâ âdutuogâ, âdaunlo mawyly enehongâ warâ eyanmo. <sup>18</sup> Awârâ mâenehonly koendâ eyanmo xutuen-hongâ, koendonro xurâmoem xuduze mawyly nhutuhomoem. Âmâlâ iduakerinmo; awylygue ise xurâmoem koendonro mâenkanâdyby nhemakelymo. Eydâ matodâ toenzepa âdydo imeom koendonro modo, âynynonro modoram mâunduly ekanâdybybe awyly nhutuhomoem aienehongâ. <sup>19</sup> On-honru imâsedo lelâlâ awyly nhutudyzemo urâ, mâtâ tozohonru xina Jesus einwânni modoram mâundupy” tâkeze winase Deusram.

<sup>20</sup> Ton-honruguelâ myakâwâm Deus, Cristo igueypyem awyly ume, kurâem nhetondyly. Mâtâ ton-honruguelâ myarâ kayam tâzaxi nhadyly, eahoru eynynâ mâtâ ekadybyem awyly, tynrenseim ekado wâgâ. <sup>21</sup> Tonlo modo takaze iwerâ Cristo pymâ ton-honreinhe awyly. Idânârâ anju domodo iwymârydo iwymâry mâtâ: anju adâjidyly enuagaeni modo, anju ton-honreim modo, anju tâwanumo anhetoem agueim modo iwymâry warâ. Iwerâ xirâ anaym pymâdo xutuim mâtâ; wayam waunroem pymâ domodo iwymârylâ ise mâtâ-ro warâ. Cristo olâ idânârâ takazeno pymâ kuru. <sup>22</sup> Idânârâ iwymâryem Cristo itoem aiemâmy Deus, tynynonro modo iwymâryem warâ. <sup>23</sup> Kurâ Cristo einwânni modo kyangahu Cristo, kurâ pylâ sodo-ro warâ. Mâtâ emaynlâ idânârâ. Cristo pymâemba, ton-honremba warâ watay, âdy lâpeba tâise. Mâtâ mawânkâ idânârâ âji modo einkâ xutuim.

## 2

### *Iweloem kydâiehol, Cristo agâlâ kydawylygue*

<sup>1</sup> Saguhoem Deus aguehobyry mânwâmpyra minanemo, ize ato amânhepyramo warâ. Awylygue Deus agâpa mawylymo, xurâem, igueypyen-ro waunlo ara, mâtâ agâ moxiobyra mawylymogue. <sup>2</sup> Deus eynynâbaom modo aito ara kulâ kâinane amidylymo. Satanás kâinane mânwânylymo. Kadopâ modo iwymâry mâtâ, onro kau warâ ontay tâjikuneim modo. Mâtâ amânhetomoem aguehobyry kâinane amânhekylymo; mâtâ mawânkâ Deus einwântâny modo xutuim. <sup>3</sup> Jesus kieinwândyly iraynâlâ inakai

aguiendyse kydato adyese akâwâm kurâ. Deus ize ato mâkeba kâinane aguienkyly, kyangahu oday kunâgo warâ. Jesus kieinwâmpyra kurâ watay, kânagazenehondâ tâise Deus, tynynâbaom modo nhenagazedyly ise myara. Izepa ato adyese kâinane kurâ, anhetomo ara.

<sup>4</sup> Idânârâ Deus izepa ato aienibyryem kurâ, kytyembyra nipyra olâ, kagâ koendâ lelâ. Toenzepa mâkâ kywynedyly. <sup>5</sup> Deus izepa ato aguentobyry wâgâ Deus agâpa ietybyem kydawyly umelâ, mâkâ xurâem igueypy ara kydawyly umelâ warâ, koendâ lelâ akâwâm kâendyly. Iweloem kyemâ, kâmakewâm warâ, Cristo kieinwântuo. <sup>6</sup> Deus, Cristo kurâem nhetonduo, kurâem kitondoem aiemâ lâpylâ, Cristo Jesus agâ tokaleoem kydawylygue. Deus, Cristo igueduo kurâem tyetonze myakâwâm, târâ kaynâ pymâem itoem. Arâ lâpylâ, Cristo xurâ kydawylygue, kyigueduo kurâem kyetonze Deus, Cristo agâ pymâem kitoem. <sup>7</sup> Arâ akâwâm Deus kywynedâ lelâlâ tawyly nhenehonly. Jesus Cristo kruz wâgâ iguely myakâwâm, kâmakehoem kywynedylygue, arâ kehoem tywynezein-emba kydawyly umelâ. Warâ awylygue ise iwerâ idânârâ âdutuoly Deus koendonro lelâlâ awyly.

<sup>8-9</sup> Deus kâmakely, Cristo Jesus kieinwântuo. Mâkâ kâmakely, koendâ aguitobyry wâgâ inkâba, kagâ koendâ tawylyguelâ. Koendonro aguienkyly lâpeba Deus kâmakehoem. Arâpa-ro watay, kywâgâlâ tâise koendâ aguykely. “Deusram kâzemakeoly, koendonro wawylygue” tâkeze tâise kurâ. Tâbyguepalâ Deus kâmakely; kyam nhudulylâ mâtâ. <sup>10</sup> Deuslâ kâmakeim, iwerâ emakeybyem kitoem. Cristo Jesus agâ tokaleoem kydawylygue, Deusram iweloem kydâieholy, koendonro aguienkyly kehobyry lelâ aguien-toem.

### *Deus tokaleoem ara kyedyly, Cristo xurâ kydawylygue*

<sup>11</sup> Enanâguewâdaungâ, saguhoem Deus xurâempa matomobyry, Jesus Cristo mânwândylymo iraynâ. Judeu mâkeba âmaemo, awylygue “tatâzenry” kelygue mâtigâseolymo judeu domodoram, “satâyby” kelymo pylâ tyanlâ-ro warâ. Uguondo tâmarygue anhetyby kulâ olâ awârâ. <sup>12</sup> Saguhoem Cristo mâtuntuba ani âmaemo, xina idamu Israel iweombyry keba mawylymogue. Xina Deus turâem induakeyby modo ara, judeu keba âmaemo. Saguhoem xina idamudo agâ myakâwâm Deus âseinwândyly adienkyly wâgâ, âdamudomo agâpa. Deus, “Ynynonro modoram xuduze urâ” keho mânemakelymo mânwâmpyra ani âmaemo, mâkâ lelâ Deus awyly mâtuntuba mawylymogue.

<sup>13</sup> Iwerâ olâ âmaemo arâpa. Cristo kruz wâgâ tunu tyapâze iguely. Mânwântuomo, Deus turâem âedâmo, âmaemo eydâ iwaguenopyry modo. <sup>14</sup> Saguhoem judeu domodo, judeu keba modo warâ âjizepamo kâinane, sahodâdybyem iontaymo waunlo ara. Idânârâ kurâem olâ myakâwâm Cristo iguely, judeu domodoem, judeu keba modoem alelâ. Kieinwândylygue tokalelâ kydawyly iwerâ. Warâ akâwâm kyewiâky nhainby, sahodâdybyry nhetyly-ro waunlo ara. <sup>15</sup> Agui judeu domodo ezewenry inweniby tâdâturudo, agui lelâlâ agueho ara adâjito. Tyigueduo olâ, Cristo mâtâ tâzezewenry sainwâm. Mâtâ kieinwândylygue inkâba Deus kâmakely. Akaemo on-hoam itânry modo on-hoam tyenehonze akâwâm, judeu domodo, judeu keba modo warâ âpynedomoem. <sup>16</sup> Tyiguehobyry wâgâ Cristo, judeu domodo, judeu keba modo agâ on-hoam nhedyly, tokaleoem itomoem, Deusram nhenetondylymo-ro warâ. <sup>17</sup> Xirâ onro anaxi âemâ Cristo, âdara Deus agâ koendâ kidyly awyly egatuze. Âmaemo judeu keba modo Deusdâ iwagueno modoram unâ iwâkuru tâdâsemagueho egatuwâm, xina judeu eydâ iwaguepaom modoram warâ. Aituo nidadâ Deus agonro modo, Deus agâpaom modo alelâ. <sup>18</sup> Cristo iguehobyry wâgâ, Deus Ispiritury kadyly, Kunwym Deus ezaxi eagâ aguykehoem.

<sup>19</sup> Arâ awylygue xina judeu domodo xurâem xina nhutudânryembâ âmaemo iwerâ, âkeloemba warâ. Iweâma âmaemo Deus xurâ, xina ara. Cristo eynynâ xina ipemugu

âmaemo; âjiunwym wogonro kurâ iwerâ. <sup>20</sup> Âtâ ipery saunâtoem wâne tuhu modo iaxi tâiehozé, mârâ wâgâ pylâ ipery saunâdyly myara lâpylâ akâwâm unâ Jesus wâgâ agueim âzegatuoly ingonotyby modoram, eagonro kurâdoram lâpylâ warâ, mâtâ einwânni modo, nheinwânto ton-honremba nipyra itoem. Tuhu âtâ ipery sawoem ietyby xigâlegueam nihugueba itoem esebydâni, myara lâpylâ Cristo Jesus tynynonro modo esebydâniem awyly. Mâtâ peba-ro watay, ânguy nâsemaguewâbyra tâise. Âtâ tuhu wâgâ saunâtyby emyenro âmaemo.

<sup>21</sup> Âtâ itâdoem isejiguy taseudaynze wâne-ro myara lâpylâ Kywymâry Jesus, judeu domodo, judeu keba modo agâ on-hoam nhedyly, âjiguelo ara lelâ itomoem. Arâ kurâ idânârâ Jesus einwânni modo âtâ tokaleoem Deus etyem kydawly. Jesus pylâ mâtâ tuhu âtâ esebydâdo emyenro-ro warâ. <sup>22</sup> Cristo xurâ mawylymogue, Deus Ispiritury etyem mâieholymo, idânârâ einwânni modo agâ. Awlygue tâwâlâ “Deus ety kurâ” kykely.

### 3

#### *Paulo judeu keba modoram igonotobyry, Jesus wâgâ agueze*

<sup>1</sup> Urâ Paulo, Cristo Jesus emary wawylygue tarâ ietagü, âmaemo judeu keba modoram unâ iwâkuru kâengatulygue. <sup>2</sup> Tutuze lelâlâ âmaemo, yagâ koendâ tawylygue Deus uduake-hobry iewanu nhuduhabry warâ, judeu keba modoem koendâ itoem. <sup>3-6</sup> Adaguday warâ myakâwândy Deus ize awyly. “Kâinduakeby awylygue ise judeu domodoram koendonro kâunduly. Judeu keba modo Cristo nheinwândylymo watay olâ, xurâmoem koendonro xuduze lâpylâ urâ. Judeu domodo, judeu keba modo warâ tokaleom ara lelâ ise kâendylymo, âikâlâ mâtâ, âikâlâ mâtâ warâpa” kewânmey Deus.

Saguhoem tâgatuwâduneba myakâwândy xirâ Deus xunâry; ânguy nutuwâbyra myakâwândy. Iwerâ olâ Tyispirituryguelâ xirâ unâ nhutuen-honly. Tinduakeby modoram nutuen-ho, tywâgâ aguehoem tingonotyby modoram warâ. Yam nâzegatuo lâpylâ xirâ unâ saguhoem tâgatuzenrybyry, kâuntuhoem. Idânârâ Cristo Jesus einwânni modo wâgâ âdiempa tywenizelâ urâ, Deus xurâem, judeu domodo, judeu keba modo warâ âzekiba lelâ itomoem. Xirâ âyanmo kâinweniby mâtainduomo, xutuze âmaemo yam tunâry xutuen-hoimbyryem Deus awyly. Xutuze lâpylâ âmaemo, Cristo Jesus einwânni modo tâsemagueze awyly, judeu, judeu keba alelâ.

<sup>7</sup> Cristo xurâem iewanu unâ iwâkuru egatuly mâtâ wâgâ. Yagâ koendâ akâwâm Deus, ienomedâmâ warâ, mâtâ eon-honruguelâ xirâ âwanu agânhetoem. <sup>8</sup> Idânârâ Deus eynynonro modo takazeno mâtkeba urâ. Arâlâ yagâ koendâ olâ akâwâm Deus. Unâ Cristo Jesus wâgâ agueim judeu keba modoram egatuly iewanuem xuduwaâm, Cristo wâgâ Deus kurâem koendâ awyly wâgâ auguehoem. Cristo kiuntuduo, koendrono kienmakely mâtâ typyguenry kehoem. <sup>9</sup> Deus uduakewâm, idânârâ kurâdoram xirâ tutuzenry kâengatuhuem, âdara tynynonro modo nhemakely awyly wâgâ auguehoem. Adagudaylâ, idânârâ tâlânro modo nhugutay, nutuen-honwâbyra myakâwândy saguhobry modoram. <sup>10</sup> Anju domodo nutuwâbyramo myakâwândy, âdara Deus xunâry awyly kâmakehoem. Judeu domodo, judeu keba modo warâ on-hoam lelâ Cristo nheinwândylymo wâgâ, tokalelâ awyly wâgâ olâ ise nhutulymo kuru, Deus tonomegueim lelâlâ awyly.

<sup>11</sup> Deus âpaunzedly myakâwândy, kaudyly iraynâlâ, “Mâtâ tâdâsemaguehoem kâingonokyly einwânni modo urâem ietaynze urâ” kely. Awârâ mawânkâ mâtâ anhekylî iwerâ. Mâtâ kâmakeley Cristo Jesus kieinwântuo lelâ. <sup>12</sup> Cristo kieinwândylygue, xurâem kydawlygue warâ, tyanepa kurâ, Deus agâ aguykehoem enado. Tutuze kurâ, mâtâ kydatâ awyly, aguykeho tywantagueze awyly warâ. <sup>13</sup> Iwerâ etadâdybyem kâsenagazedyly, unâ koendrono Jesus wâgâ âyanmo kâengatulygue. Awârâ wâgâ kulâ

âtywandylymo tâiseba olâ itaungâ. Mâsemaguehomoem omaromoem warâ auguehobyry wâgâlâ xirâ kâsenagazedy.

### *Paulo Efesodâ Jesus einwânni modo eynynâ Deus agâ aguehobyry*

<sup>14</sup> Deus anhetyby modo wâgâ kâpaunzeduo, Kunwym enado âzeguhoam tâise urâ, eagâ auguehoem. <sup>15</sup> Idânârâ kurâ domodo nhunwym lelâlâ Deus, târâ kaynâ tynynonro modo, tarâ onro wogonro modo alelâ. <sup>16</sup> Awylygue warâ auguely Deusram, âmaemoem: “Pabai, toenzepa koendonro modobe âmâ âynynonro modoem, toenzepa lelâlâ, sapâguely eki kehoem. Awylygue kâenkadyly, Âispiritury eagâmo adakobânimram âynynonro Éfeso donro modo eon-honwanâdoem, ton-honre lelâ itomoem, Cristo einwândyly nimopa itomoem” uguely.

<sup>17</sup> Deusram kâenkaguylâ lâpylâ, aunloenlâ odaymo Cristo itoem, mâinwândylymogue lelâlâ, aunlolâ âwynedomoem warâ. Arâ ise se âjiwindytâdyby, âtâ tâhugane kehoem aietyby warâ wâne nihugueba awyly myara mawylymo. <sup>18</sup> Arâ ise âmaemo, idânârâ Deus eynynonro modo toenzepa kywynedâ Cristo awyly mâtuntulymo. Toenzepa lelâlâ mâkâ kywynedyly, etaydygu, iwague awyly, kayam, ondaxi esanigu warâ ekudoem nudupa.

<sup>19</sup> Ânguy koendâ nhutulyemba lelâlâ Cristo kywynedyly. Mâtuntulymo olâ ize wato kuru, awylygue Deusram kâenkadyly âmaemoem, aito ara, agueho ara warâ lelâ amitomoem.

<sup>20</sup> Deus koendâ awyly wâgâ, eon-honru wâgâ warâ aguykenre. Anhetoem kienkaguylâ takaze kehoem adyese Deus ton-honrugue. Ton-honre Deus imâsedo kehoem aiese; kienkadyby, kyangahu oday kunâgo warâ takaze kehoem adyese, mâkâ eon-honru kywâgâ aito ara. <sup>21</sup> Deus koendâ awyly wâgâ aguykenre, kynynâ anhekyly wâgâ, Cristo Jesus anhekyly wâgâ warâ. Idânârâ anhekyly wâgâ aunlolâ aguykenre. Tâjiunwyndo negatumo tymeonram, tyweonram warâ. Arâlâ nidâ.

## 4

### *Cristo xurâ kydawlygue, tokaleoem lelâ kurâ*

<sup>1</sup> Awylygue urâ, Kywymâry Jesus Cristo xurâem iewanugue kulâ etadâdyby, âurudylymo. Xurâem mitomoem Deus âgâsedaymo, mâkâ ize ato ara amidylymo, aguehobyry amânhedylymo warâ ani mâkâ ize awyly. Awylygue mâkâ xunâry ara lelâ aitaungâ. <sup>2</sup> Agonromo sakaze tâkezeba itaungâ. Inepa kehoem tyewiâpazeba itaungâ. Mâzenagazeoduomo, inepa âpeânze tâkezeba itaungâ. Agonro agâ tâpyneze mawylymo enehonwâdaungâ. Inakanhe aitomo emaenwâdaungâ, eagâmo âewiâpabyramolâ.

<sup>3</sup> Åsegamiwâdaungâ agonromo agâ mâtihoguba, mâtuebabry warâ mitomoem. Deus Ispiritury tokaleoem âedâmo. Aituo, âzeon-hondâdaungâ agonromo agâ mâseinwâmbry mipyra mitomoem.

<sup>4</sup> Mârâ, mârâ warâ wâne kodo wogonro, tokalelâ olâ, arâ lâpylâ tokaleoem kydawly, kurâ Jesus einwânni modo toenzepa kydawly umelâ. Tokalâ kulâ Ispíritu idânârâ kagonro olâ Deus Ispiritury lelâ. Tokalelâ kydâsenuendo, Deus koendonro adâkehobyry ara kyam nhuduly lelâ. <sup>5</sup> Tokalelâ Kywymâry. Tokalelâ unâ kieinwânyly, Deus itaumbry lelâ. Tokalâ wâgâ lelâ batiza kydâieholy, Jesus einwânnipyryem kydawly kienehon-hoem lelâ. <sup>6</sup> Tokalelâ Deus idânârâ kionmaenguyly; idânârâ Kunwym, kywymâry, kagâlâ, kâentâ lelâ warâ mawânkâ.

<sup>7</sup> Cristo olâ âikâ, âikâ warâ konomery xuduim, Deus xurâem aguitoem. Ize tato ara âikâ, âikâ warâ konomery nhuduly. <sup>8</sup> Deus itaumbry awo wâgâ iwenihobyry ara aidyly. “Kayam tâkuday, tagâ tase akâwâm eagâ tâjitoguyday emaendânrybyry modo.

Deus xurâ modoram koendonro modo tuduze akâwâm.”

<sup>9</sup> Âdakezeka “Kayam tâkuday” kely? Âji onwogonrodâpa, âji kaynonroam tâdâtâly agueho. “Cristo kayam âkuly” keduo, tâdutuoze onwâgâ awyly, onro onwa xytâguybyem awyly warâ. Uguondoem tâise myakâwâm, xirâ onro anaxi tytâguyhoem. <sup>10</sup> Xytâguyby,

âkuondybylâ mawânkâ mâkâ. Kayam âkuly, kau tâenseim takaze, Deus eydâ atoam lelâlâ. Mâkâ âkuly, idânârâam tâdyren-hon-hoem, kaynonro modoram, tarâ onro wogonro modoram alelâ.

<sup>11</sup> Cristolâ tynynonro modo enomedâni, turâem tâwaneinhe. Tarâ onro anaym tatay tagonropyry modo ewy iduakewâm, “apóstolos” kelygue tâzekeim akaemo. Cristo ague-hobyry tindatyby egaturin-em, adâitobyry modo nhetybymo egaturin-em ani akaemo nhenomedâdyly, ingtonodyly warâ. Kurâdo ewy nenomedâdâ mâkâ, Deus tyam nhene-hoymby, koendâ typemugudoram egaturin-em; “profetas” kelygue tâzekeim akaemo. Tâlâ mâkâ myarâ, myarâ warâ unâ tâdâsemagueho egaturin-em nhenomedâdyby; “evangelistas” kelygue tâzekeim akaemo. Tâlâ lâpylâ tynynonro modo eniem, xuruniem, Deus itaumbyry iwenibygue enomedâniem warâ nhenomedâdyby “pastores” kelygue tâzekeim akaemo. <sup>12</sup> Warâ Cristo konomedâdyly, âjigue kydohondoem, Deus emaryem kitoem, arâ ton-honre kuru einwânniem kydawyly itoem warâ. <sup>13</sup> Arâ kagonro agâ kydâsemawyadâdyly watay, kieinwândyse Deus ato ara ise Cristo kieinwândyly, Deus imery kiuntuly imâem iese kurâ warâ. Egâ wâneam iamudo. Tyazepygueduo, imeim-byryem, ton-honremba warâ. Imâem tâise olâ, ton-honwanze warâ, xutuybyem tâituo. Arâ lâpylâ kurâ. Iwelo Cristo einwânniem kituo, mâkâ wâgâ imâem kiuntuwâbyra kurâ; imâem kiuntuly agâlâ pylâ ize ato ara lelâ aguisezedly-ro warâ.

<sup>14</sup> Cristo koendâ kiuntuduo, iamudo âdylâ tindatyby einwânni arapa tâise kurâ. Kydâzenokuowâbyra kurâ, akaemo iozepa kulâ Cristo wâgâ egatuwâni modoram. Pepi wâne, tâynâ paru sahugânuram âzepâgueoly, taynynâ sapezenru ton-honrein-am âjigonoholy warâ myarapa kurâ. Akaemo iozepa kulâ unâ egatuwâni modo toenzepa ty-dani modo nhenokudyly, adâkely nheinwântomoem, ânwa iozeno ozepa nhedyly waunlo ara. <sup>15</sup> Ânguy kienokubyra olâ kine. Ioze lelâ Deus wâgâ aguykenre; âjigue kydâpynene warâ. Arâ ise imâem kiuntuly, Cristo ara kydawyly, kyangahu mawânkâ kuturim. <sup>16</sup> Idânârâ tynynonro modo on-hoam tyese Cristo, kânedy modo wâne idânârâ kuoday on-hoam tâise myara. Koendâ lelâ kodo âsewanily-ro watay, ton-honre lelâ ago idyly. Arâ lâpylâ Jesus einwânni modo âjigue tâpyneze lelâ watay, Cristo konomedâdobryy ara lelâ aguidyly watay, kieinwândyly imâem idyly. Cristo kyize ato ara kydawyly. Iamudo ara kulâba kydawyly. MAH alelâ koendâ kehoem kindadyly, Deus kyam aguehobyry Cristo kohondâdobryy awylygue.

### *Jesus eynynâbaom modo aito ara inkâba aitaungâ*

<sup>17</sup> Kywymâry Jesus xurâem agueim wawylygue, ton-honre kehoem âurudylymo. Jesus xurâ keba modo aito araba aitaungâ. Âdyem nitaymba akaemo tyangahu oday xunâgo. <sup>18</sup> Deus âdaunlo awyly, aguehobyry warâ nutuwâbyramo; nhangahumo oday tyame. Eganumo; Deus agueho tindadysebamo warâ. Awylygue nutuba awylymo, Deus tygâsedly Jesus tyeinwântoem, tâsemaguehomoem. <sup>19</sup> Âdy tâjiwypadyly keho awyly nutuba itybyem tawylymogue, inakanhe adâidysemo watay, adâisemo; kywypado adiendysemo watay, adyesemo. Aunlolâ Deus izepa ato anhesezedlymo. Deus xurâem inakai aiedyly nimowâbyra akaemo. Deus xurâem olâ tywângueim ara kulâ anhekylomo.

<sup>20</sup> Cristo einwânniem mituomo, tâduruhoze ani âmaemo, âdalâ kulâ amipyra mitomoem, amyguepa mitomoem warâ. <sup>21</sup> Jesus wâgâ aguely tydase ani âmaemo, eynynâ aguewâni modo agueduo. Tutuze urâ, ioze lelâ akaemo Jesus wâgâ inomedâdomobyry. <sup>22-23</sup> Cristo eynynonroem midylymo iraynâ, tâwâlâ kulâ akâwâm inakanhe midylymo, inakai modo kulâ amânhedyse matomo awylygue. Inakanhe adâjitoam kulâ mâzenokuolymo-ro waunlo ara. Ânwa iozepa kulâ kani emyenro mâtâ Deus izepa ato aiedyly amânhedyse matomo. Mâduruhowânmolâ olâ awârâ wâgâ. Awylygue, ekadaungâ Deusram, amânhedyse matomo, angahumo oday âunârymo warâ iweloem nhetondoem. <sup>24</sup> Iweloem âedâmo Deus. Awylygue koendâ lelâ aitaungâ, Deus ize ato ara lelâ, eara kuru misezedomoem.

Saguhoem amitomobyry imowâdaungâ, itymo tywykeim māentylymo wâne, tywykenry mânhetomoem myara.

### *Kieinwântuo, iweloem kyenehondâ Cristo*

<sup>25</sup> Iweloem ietybyem âmaemo. Awylygue tâdâsenogudyly imowâdaungâ. Âkeá lelâlâ aguewâtaungâ Cristo eynynâ âpemugudo agâ, tokaleoem itybyma âmaemo, tokalelâ wâne kodo kâsebydâni myara. <sup>26</sup> Âewiâpadylomo-ro watay, Deus izepa ato amânhedylomo tâiseba itaungâ, âewiâpaduomo kulâ. Inepa âewiâkymo nadaim, iguandyly ara kehoem waypa. <sup>27</sup> Satanás inokudomoem aienehoim âdy akâiedaundâ. Âewiâpadylomo-ro watay, Satanás inokudomoem amânhenehonlymo kulâ mawânrâ. Âduerymo egawântoem pyanta mâenahunguelymo waunlo ara, ton-honremba midylymo.

<sup>28</sup> Tâmagazeimbyry modo, tâmagaguy nimo. Nâsewanimo, idânârâ ize tatomobe lelâ itomoem. Arâ ize âdypebaom modoram nhudulymobe awyly.

<sup>29</sup> Amyguelymo idani modo tohogueba ienehonri, itywanânehonri, iewiâpanânehonri warâ adâkezeba itaungâ. Koendâ lelâ aguewâtaungâ, imâem Cristo nheinwântomoem. Koendâ lelâ âdanmoram aguewâtaungâ, amyguelymoguelâ moeon-hondâdomoem, mânurutomoem warâ. <sup>30</sup> Tyispiriturylâ ani Deus ingonokyly, agâmo itoem, xurâ mawylymo âdutuohoem. Deus Isipirity agâmo awylygue, tutuze âmaemo, Cristo odopâduo, âsemagueze mawylymo; âigueompyramo, iwâmapyramo, mâtityembyramo warâ ise. Awylygue Deus Isipirity izepa ato akâiedaundâ; kâtitywanânehonwâdaundâ. <sup>31</sup> Âdylâ inakai âynynâmo aiedyly watay, “Kâenanânehomba ise urâ; koendâ witombyra ise urâ inakai urâem aienibyry agâ” tâkezeba itaungâ; âdylâ kytay tudureimpe-ro waunlo ara awârâ wâgâ kydâpaunzezeduo. Tyewiâpazeba itaungâ; tadaenkezeba itaungâ âewiâkymogue. Âjigue tâtuagazeba itaungâ. Ânguy kâjiwykewâdaundâ. Tumunremba itaungâ. <sup>32</sup> Âkelomo agâ koendâ itaungâ, ityendaungâ warâ. Âynynâmo inakai aietyby enanânehonwâdaungâ, Cristo anhetyby wâgâ Deus inakai amânhetybymo nhenanânehon-hombyry ara, nhygakehobyry ara warâ.

## 5

### *Deus xurâ modo âdara aidly awyly xutuho*

<sup>1</sup> “Ymeom kâinwyneguyl modo” tâkeze Deus âyanmo. Awylygue mâkâ aito ara lelâ aitaungâ. <sup>2</sup> Aunlolâ agonromo agâ âpynedaungâ, Cristo kywynedo ara. Toenzepa kywynedylygue myakâwâm iguely kâmakehoem, ânguydo imeom Deus etydâ egamehobyry ara. Ânguydo imeom tyam egameyby koendâ kehoem nhârângu tindatuo, toenzepa Deus ize awyly, arâ lâpylâ Cristo adâkehobyry anhetuo toenzepa ize awyly.

<sup>3</sup> Deus xurâ âmaemo. Awylygue, tâjiso modo, âwydymo keba kulâ kâdynanâdaundâ. Tâjiwydy modo lâpylâ osomo keba kulâ âynanâbyramo nidâ. Angahumo oday awârâ peba nidâ. Toenzepa âdype, dinherube warâ midylymo kulâ mâkeba ize matomo nidâ. Awârâ inakanhe âenehoinmo peba nidâ, Deus xurâ keba modo âdygue inwentâbyramo itoem. <sup>4</sup> Amyguedaymo, inwankurumoenlâ inakai modo adâkezeba itaungâ. Kywypado modo kulâ mâengatulymo tâiseba itaungâ. Arâ agueim keba âmaemo. Agâmo koendâ Deus awyly wâgâ aguewâtaungâ; âmaemoem koendonro anhetyby egatuwâdaungâ. <sup>5</sup> Xirâ mâtitudyzemo wato. Tohogün-hobyry keba kulâ xynanâni modo, kywypado aieni modo, toenzepa âdype tâidysedonro modo warâ, Deusram nekabyra adâitobyry modo nhygakehoen-ro watay, Cristo, Kunwym Deus warâ pymâem atoram negawântaymbamo ise, tyigueduomo. (Toenzepa âdype tâidysedonro modo tâlâ tato kulâ mawânkâ inwyneguylomo kuru, Deus keba.)

### *Kywymâry Jesus ize ato xutuwâdaungâ*

**6** “Tohogüin-hobry keba xynanâni modo; toenzepa tysejiguybe tâidyse donro modo; kywypado aieni modo warâ Deus nenagazenehomba ise” keim modobe, kewâdylymo kulâ olâ. Agueim modoram tâzenokuozeba itaungâ. Izepa tato aietaynrim modo enagazenehonze Deus. **7** Awylygue, Deus izepa ato anhekylomo akâiedaundâ. **8** Saguhoem iamu oday adakobâni ara myakâwâm âmaemo, Deus mâuntuba mawylymogue. Iwerâ olâ Kywymâry Jesus âyanmo nutuen-ho, iajimanâdybyem âmaemo iamu duanopyryem. Awylygue koendonro lelâ ajetaungâ, Deus xurâem mawylymo mânehon-homoem. **9** Cristo tonomedâdobyry ara lelâ aini mawânkâ tânehonze koendonro tawyly, âdaini keba, âdaunloenlâ ânguy enokuni keba tawyly warâ.

**10** Kywymâry Jesus ize ato xutuwâdaungâ. **11** Âdaunloenlâ Deus eynynâbaom modo anhekylomo akâiedaundâ, aguehomo ara adâkezeba itaungâ warâ. Iamu oday ânwa ozepa kulâ idânri emyenro akaemo. Anipyra itomoem, aguepa itomoem warâ xurutaungâmo, Deus agueho araba tawyly nhutuhomoem. **12** Kywypadoem mawânrâ totoenze anhekylomo wâgâ aguely. **13** Âdylâ iajinuram kiandyly watay, âdy awyly tâzehoze, arâ lâpylâ, inakai anhekylomo kiuntu-honduo, idânârâ âdutuoly akaemo inakai modo aieni awyly. **14** Awylygue, Cristo tainwâNSE kurâ-ro watay, iajinu oday adakobâni ara kurâ, iamu duay adakobâni araba. Warâ aguehonly:

“Âmâ xykyby emyenro, âwaguegâ!

Igueypy emyenro, aukâ!

Deus itaumbyry mâuntuhomem mâindatoem warâ aienehonze Cristo,

iajinu soentyby nhenehon-ho ara”

kehonly.

**15** Tâmaynelâ itaungâ amânhekylomo wâgâ, amyguehomo wâgâ warâ. Tonomegueinhe itaungâ, ânguydoem kulâ inkâba. **16** Âdiempa kulâ xirâ anaym kydawyly. Awylygue, Deus xurâem adâjítobe ataylâ, âzeon-hondâdaungâ, mâkâ ize ato amânhetomoem. Toenzepa inakanhe kulâ adâjítayn-ho modo iwerâ. **17** Âdy xutudânnry araba itaungâ; âdy Kywymâry Jesus ize ato awyly xutuwâdaungâ.

**18** Toku ikaji tâiseba itaungâ. Toku ikaji midyly-ro watay, kywypado kulâ ise amânhekylomo. Deus Ispiritury amânhetomoem aguehobrylâ ajetaungâ, omazehomoem. **19** Tâzeremu Deus wâgâ agueingue âgâtudaungâ, agonromo agâ mâsegamihomoem. Deus itaumbyry awo wâgâ iwenibygue âgâtudaungâ, livru Salmos wogonrogue. Deus wâgâ agueingue âgâtudaungâ, kurâem anhetyby wâgâ warâ. Deus Ispiritury tâjigâky nhuduypygue âgâtudaungâ. Tuomare kehoem âgâtudaungâ, âgâtudyze mawylymogue kehoem, âkelo igâky mâindadylymogue kulâ warâ inkâba. **20** Kunwym Deusram wamyguepa tâiseba itaungâ: “Koendonro lelâlâ âmâ, urâem Pymâ Jesus Cristo anhetyby modo wâgâ” kewâtaungâ eyam.

### *Iso, iwydy warâ âdara aidyly awyly xutuho*

**21** Agonromo einwântaungâ, Cristo tynrense mawylymo mânehon-homoem.

**22** Tâjiwysaro modo, osomo aguehobryy ajetaungâ, Kywymâry Jesus aguehobryy ara.

**23** Tâjiso mawânkâ tywydy xuturim, Cristo tynynonro modo nhutuhomoem. Kâmakeim mâkâ Cristo, kieinwântuo. Kyangahu mâkâ Cristo, sodo emyenro pylâ kurâ-ro warâ.

**24** Cristo kieinwânto ara, arâ lâpylâ tâjiwysaro modo tuso neinwândâmo.

**25** Tâjiso modo, âwydymo koendâ etaungâ, iwynedaungâ, Cristo kywynedo ara. Kywynedylyguelâ myakâwâm iguely kâmakeze. **26** Tâwentâzeba kitoem myakâwâm iguely, Deus xurâem tywykeba kitoem. Deus itaumbyry kieinwândyly, Jesus kieinwândyly warâ watay, âsemagueybyem kurâ. Batiza kydâiehoduo, inakanhe kydawyly amaymba Jesus kyetobyry kienehonly. **27** Koendâ tynynonro modoem aidyly, âdygue tâwentâzeba, tywykeba warâ. Arâ lâpylâ aunloenlâ xurâem eagâ kitoem ize awyly, tywykeba, pekodo

tywâkureim, tygatygâguenry, pagu pebaom waunlo ara. <sup>28</sup> Alâpylâ tâjiso modo, âwydymo iwynedaungâ. Tâwâlâ mâzetomo ara, mohondomo ara warâ etaungâ.

<sup>29</sup> Ânguy todo niompyra nitaymba. Tâwinduase kurâ, kodo tâwânepe itoem, tonhonre lelâ itoem warâ, Cristo tynynonro modo nheto ara. <sup>30</sup> Kâentâ mâkâ, xurâ kydawylygue, sodo emyenro kydawylygue. <sup>31</sup> Deus itaumbyry awo wâgâ iwenibyem: “Tohogüinduo, tunwym, tyze warâ agâpa tâise uguondo, tywydy agâ tokaleoem tâitoem” warâ iwenibyem awyly. <sup>32</sup> Iso, iwydy warâ tokalelâ idyly wâgâ kyam Deus nhutuenhonly, Cristo kieinwântuo, eagâ tokalelâ kidyly awyly kiuntuhoem. <sup>33</sup> Cristo agâ tokalelâ kydawyly wâgâ auguelâ wâne, xirâ auguely olâ ohogünwâdyby modoram, tokalelâ mawânkâ ohogüimby modo. Awylygue, tâjisodo, âwydymo nhontaungâ, tâwâlâ mohondomo ara. Tâjiwysarodoam xirâ augueondyly. Osomo xyrentaungâ, pymâ mâynrentomo ara.

## 6

### *Tâjimery, tâjiunwym warâ wâgâ agueho*

<sup>1</sup> Tâjimeomyry, Cristo einwânni mawylymogue unwânmo, âzemo warâ einwântaungâ. Aguehomô ara lelâ amidylymo koendorro kuru. <sup>2-3</sup> Deus, Moisésram xirâ iwe-niehonwâm: “Unwânmo, âzemo warâ einwântaungâ. Arâ lelâ amidylymo-ro watay, iweâpa ise âmaemo onro wâgâ” kewândy. Agui tâzezewenry Deus, Moisésram inwenien-hoymby duay, xirâ lelâ warâ ise aidyly keim.

<sup>4</sup> Tâjiunwym modo, âmerymo kâjiewiâpanâdaundâ. Mâenamanâdaymo, koendâ enomedâdaungâmo, xurutaungâmo warâ, Kywymâry Jesus konomedâdobyry ara.

### *Pymâ, tâwanuneim modo warâ âdara aidylymo awyly xutuho*

<sup>5</sup> Tâwanuneim modo, âwymârymo einwântaungâ; aguehobyry aietaungâ. Âwankuem kâietaudâ. Amânhedyse mawylymoguelâ aietaungâ, Cristo xurâenlâ amânhedylymo-ro waunlo ara lelâ. <sup>6</sup> Aunlolâ mâkâ einwântaungâ, inuagaendylymo ume kulelâ inkâba. “Ywymâry ienuagaendyly ume lelâ ise, koendâ kâsewanily, koendâ ywâgâ aguehoem. Ienuagaemyra ituo, kâsewaniba ise urâ” tâkezeba itaungâ. Aypa, âsewaniwâdaungâ, amânhedyse mawylymogue lelâlâ, Cristo xurâenlâ amidylymo-ro waunlo ara lelâ, arâ mawânkâ Deus aguidyse awyly. <sup>7</sup> Warâ angahumo oday âunârymo nidâ: “Kywymâry Jesus Cristo xurâenlâ awidly, tarâ agânhetoem agueim xurâem kulelâ inkâba. Awylygue ise tuomare, tugüigue warâ kâsewanily” kewâtaungâ. <sup>8</sup> Enanâguewâdaungâ, idânârâ kurâ domodo koendâ âsewaniwâdyby epywaze Kywymâry Jesus awyly, tâwaneim, pymâ alelâ.

<sup>9</sup> Pymâ domodo, âmaemoem tâwanuneim modo agâ koendâ itaungâ. Mâeunsedylymo tâiseba itaungâ. Enanâguewâdaungâ, pymâ kurugue tywymâgueim mawylymo, Kywymâry Jesus Deus enadonrogue, âmaemo, agâmo tâwaneim modo alelâ. Âzekiba lelâ mâkâ idânârâ kâendyly.

### *Deus kuahuru nhuduho, Satanás kynanâbyra itoem*

<sup>10</sup> Kâinwenily kâympygueândoem kuru warâ auguely. Kywymâry Jesus agâ tokaleoem itaungâ, eon-honru imâsedogue mâzeon-hondâdomoem. Arâ ise, on-honrumo mâsemaguehomoem, Satanás, Deus mânwâmpyra mitomoem aienehonze keduo. <sup>11</sup> Deus âyanmo nhuduypygue, Satanás amaymba mâsemaguehomoem on-hondybyem lelâ itaungâ, sodadu tohonze, tâzetydâze warâ tâseguebyday, tâsemaguehoem myara. Sodadu tuduery emaxi itânrý ara ise âmaemo. Tonomegueim mawânkâ Satanás. Inokuzemo keze, todú eni wâné mydy tygase tywâly tienokudoem myara. <sup>12</sup> Kurâ domodo agâpa mawânrâ kydâseguebyly, Satanás agâ, tâensenry inakai modo eon-honru agâ warâ. Iamyra domodo, kadopâ modo iwymârydo agâ warâ kydâseguebyly, âji inakaidâ, kyaneni, tyameim odano iwymârydo agâ. “Âji inakai, kyaneni, tyameim” uguelly, idânârâ inakai Deus izepa ato târâlâ âewyly awylygue. Kadopâ modo tâjidydâba âeni

modo agâ xirâ kydâseguebyly. <sup>13</sup> Awylygue Deus mâsemaguehomoem nhuduwâtyby modoguelâ âtuahuwâdaungâ. Arâ ise igatubyra mawylymo, sodadu tâeganeim wâné âseguebyly lelâ myara, Satanás agâ mâseguebyhomoem, xypyry etaji kehoem. Madameoba ise âmaemo, ton-honre lelâ.

<sup>14</sup> On-hondbybyem lelâ itaungâ. Âkeá lelâlâ amyguehomo nidâ, amânhelyklymo nidâ warâ. Arâ ise on-hondbybyem mawylymo sodadu tywanxiery ienipyry ara. Iozeno lelâ aietaungâ. Mârâ tuhohu, tykary warâ xuahuruem sodadu nhekly wâné myara ise awârâ, ioze lelâ amidylymo watay. <sup>15</sup> Unâ iwâkuru tâdâsemagueho mâengatuhomoem on-hondbybyem itaungâ. Arâ-ro watay, koendâ lelâ ise Deus agâ mawylymo, sodadu wâne tuhuru etary tyesa, tâseguebyday neweseba tâitoem, myara ise awârâ tâdâsemagueho mâengatulymo watay. <sup>16</sup> Jesus Cristo einwândyly kâjimowâdaundâ. Satanás angahumo sagâikeze kely Jesus mâinwâmpyra mitomoem watay, aguely kâjidataundâ. Sodadu wâne âtuahuhobe tduery ipy tohorein-am tyâzepa tâitoem myara ise awârâ Jesus mâinwânsededylymo âwahulymo. <sup>17</sup> Akeá kuru âsemaguerin-em mawylymo xutuwâdaungâ. Mâuntulymo watay, Satanás âyanmo, “Emakeybyem inkâba âmaemo” keduo, âdaunloenâ agueho mâinwantaguedaymba ise âmaemo, sodadu tyangahu ety tyesa, tduery tyan-gahudâ tyâpa itoem myara. Deus itaumbry Deus Ispiritury nhuduypy angahumo odaji ietaungâ, âduerymo agueho mâin-hoguhomoem sodadu typygue âpeândo ara.

<sup>18</sup> Deus agâ amyguepa tâiseba itaungâ. Ekadaungâ mâkâ on-honwanâdomoem. Deus agâ amyguedaymo, agâmolâ Deus Ispiritury nidâ; mâkâlâ ise amyguehomoem agueim. Inanaynmolâ itaungâ. Âdara mataymolâ Deus agâ amyguepa tâiseba itaungâ. Aun-lolâ eynynonro modo xurâem aguewâtaungâ. <sup>19</sup> Urâem ekadaungâ lâpylâ. “Pabai, Paulo xunâry âundugâ, aguedyse mato, âwâgâ agueduo. Tyaneba âtaumbry aguehoem aienehongâ, unâ iwelo mâuntuen-honly, unâ iwâkuru Jesus kieinwântuo tâdâsemagueho” kewâtaungâ Deusram. <sup>20</sup> Tarâ ietagu, xirâ unâ iwâkuru egaturin-em wawylygue, itaumbry egatuze Pymâ Jesus ugonotuo. “Pabai, Paulo eon-hondâgâ, Jesus wâgâ tyaneba aguehoem. Saguhomem tutuzeba myakâwândy xirâ unâ, iwerâ olâ xutuen-hoimbyryem âmâ” kewâtaungâ Deusram.

### *Paulo adâkely nhypygueândo*

<sup>21</sup> Tíquico ise iegary âyanmo egatuim, âdy tarâ yagâ aini awyly mâuntuhomoem. Jesus Cristo eynynâ kypemugulâ merâ, toenzepe kinwyneguylylâ merâ. Kywymâry Jesus aguentoem aguehobryrgue kâmawyadâniem koendonro merâ. <sup>22</sup> Xina wâgâ aguehoem merâ âyanmo kâingonodyly, tarâ xina agâ âdy aini awyly mâuntuhomoem, omazehomoem.

### *Paulo Deus agâ aguehobry*

<sup>23</sup> Âynynâmo Kunwym Deusram, Kywymâry Jesus Cristoram warâ kâenkadyly akaladâniimo peba itoem, âjigue mâpynedomoem, Jesus imâem mâinwânsedoem warâ. <sup>24</sup> Warâ âynynâmo Deusram kâenkadyly, koendâ nhetomoem, âmaemo Kywymâry Jesus Cristo iwynedyly imodâny modo.

Paulo

## FILIPENSES

### Paulo Kata Inweniby Filipos Donro Modoram

Xirâ kata wâgâ inwenily Paulo nhangahu odaji iemâmy Deus. Awlygue Deus itaumbrylâ xirâ Paulo inweniby. Paulo, Jesus Cristo wâgâ aguehoem aguehoymby xirâ kata igonomâ, Romadâ kadeia oday tâtagu ume. Deuslâ myakâwândy iweniehorim, xidadâ Filiposdâ Jesus einwânni modoram. Paulo xirâ kata inwenily myakâwândy dez a doze anu ipygueduo waunroem kuru Filipooram tâtâhobyry sakabygueduo. Pauloram dinheru tugonosemo myakâwândy. Xirâ kata wâgâ dinheru nhuduhomobyry wâgâ koendonroem awylymo adâkeze mâkâ. Jesus Cristo xurâem tawylygue, tuomare tawyly, tywenize myakâwândy Paulo, tâtagu umelâ iwâgâ adâkehobyry wâgâ. Filipos donro modo turuse myakâwândy tuomare lelâ itomoem, tâsenagazedylymo ume, kâmayno amaym tawylymo ume alelâ. Cristo wâgâ iozepa kulâ unâ egatuwâni modo agueho neinwâmpyra itomoem, turuse myakâwândy, âdara Cristo ize ato ara anhedylymo awyly wâgâ lâpylâ warâ.

#### *Aguely adaguho*

<sup>1</sup> Urâ Paulo xirâ kata âyanmo iweninri, âmaemo Jesus Cristo agonro modoram. Tarâ yagâlâ merâ Timóteo. Cristo Jesus emary xina; ewanulâ xina anhekyly. Âmaemo Filipos donro modoram xirâ kata xina ingonodyly, tynynonroem Deus induakeyby modoram, Cristo Jesus eynynonro modoram, Cristo eynynonro modo iwymâryam, emawyadâni diácono domodoram lâpylâ warâ.

<sup>2</sup> Âynynâmo Kunwym Deusram, Kywymâry Jesus Cristoram warâ kâenkadyly koendâ mâzehohomoem, akaladâni peba mitomoem warâ.

#### *Paulo Deus agâ aguehobyry Filipos donro modo eynynâ*

<sup>3</sup> Inanâgueduomo watay, aunlolâ Deus agâ auguely: “Pabai, koendonro lelâlâ âmâ Filiposdâ âynynonro modo agâ, âinwântoem amânhenehon-homobyry wâgâ” tâkeze winase.

<sup>4</sup> Deus agâ âynynâmo augueday, tuomare kehoem inanry auguely. <sup>5</sup> Tuomare urâ, unâ koendonro Jesus wâgâ kâengatuday iemawyadâdomobyry wâgâ; saguhoem kuru Jesus mânwântaymo, won-hondâdâmo, unâ iwâkuru Jesus wâgâ kâengatuday, won-hondâzelâ âmaemo-ro warâ. <sup>6</sup> Jesus mânwântuomo, Deus iweloem âetondâmo. Ize ato ara lelâ amitomoem aiesezelâ mâkâ. Koendâ tutuze urâ, tiangüypy, ewanikeze Deus awyly. Aituo ise Cristo Jesus âetonduo, mâkâ âizemo ato ara kehoem ise âmaemo. <sup>7</sup> Aunlolâ inanry inanâguelymo. Toenzepa kâinwyneguyl mawylymogue. Koendâ lelâlâ Deus yagâ awyly, xurâem auguehoem ayenehon-homobyry wâgâ. Xirâ unâ egatuly wâgâ won-hondâdâ mawylymogue. Saguhoem pymâdo enadoram kâjigâseoday, unâ koendonro Jesus wâgâ agueim wâgâ eyanmo augueday won-hondâdâmo. Iwerâ tarâ ietadâdomobyry oday ekâjibyem wawyly ume won-hondâdâlâ âmaemo. <sup>8</sup> Deus tutuze, âwynedâmo wawyly. Âwynedâmo urâ, Cristo Jesus âwynedomo ara lâpylâ. Âkealâ xirâ auguely; uguewâdyly kulâ mâkeba.

<sup>9</sup> Kâenkadyly inanry Deusram, imâem lelâlâ âjigue mâpynedomoem. Deus koendâ kehoem mâtuntuzedelymo lakuru ize wato; âdy koendonro, âdy koendâpaom warâ awyly mâtuntuzedelymo ize wato. <sup>10</sup> Arâ ise koendâ mawylymo, koendonro lelâ amânhekylymo warâ. Aituo ise xypyry etay Cristo odopâduo, âdy inakaigue tâwentâzeba mawylymo. Tywykeba ise âmaemo mâkâ xurâem. <sup>11</sup> Koendonro aiesezelâ ise âmaemo, Jesus Cristo lelâ anhekyly. Koendonro amânhekylymo wâgâ toenzepa ise Deus âzehogueoly, aguezemo eon-honru wâgâ, koendonroem awyly wâgâ warâ.

#### *Cristo xunâry egatuly*

<sup>12</sup> Cristo eynynâ ypemugudo, tâwâlâ lelâlâ wâne kâsenagazedyly, mâtundudyzemo olâ urâ, unâ iwâkuru Jesus wâgâ tâzegatuzelâ awyly; toenzepa kurâ domodoram âjidaholy awyly warâ. <sup>13</sup> Cristo emary wawylygue ietagu. Idânârâ sodadu romano domodo, iwymâry kuru ety eni modo tutuzemo, kurâdo taunlo modo tutuzemo lâpylâ warâ. <sup>14</sup> Taunlo modo Cristo eynynâ ypemugudo, Kywymâry Jesus tâinwânsezemolâ, Deus itaumbyry egatuze tyanepamo warâ. Ietagu umelâ, kâjityembrya wawyly tiuntuduomo, Jesus anhedysemo ato adyesemo, tâsenagazedyly umelâ nâjityembyramo. <sup>15-17</sup> Tâlâ Jesus wâgâ agueim ewy yizepaom modo. Koendâ tawylygue inkâba Jesus wâgâ aguelymo, akaemolâ tâdyren-honly-ro warâ ize tawylymogue, tydani modoram koendâ tâzepywaoly-ro warâ ize tawylymogue kulâ warâ. Tâdâtuagadyly, tâdâtuebadly warâ kulâ adiendye atomo. Warâ tuoday aguelymo: “Toenzepa ise Paulo âsewânily, kurâdo aguykely indadyly kely tindatuo” kelymo. Augueondly, inakanhe adâkelygue kulâ Jesus wâgâ aguelymo.

Tâlâ pylâ Jesus wâgâ koendâ unâ egatuim modo. Iwâgâ aguelymo, mâkâ tinwynedlygue, ywynedylymogue warâ. Tutuzemolâ, Deus ietadânehonly tarâ, pymâdoam Jesus xunâry kâengatuhoem awyly.

<sup>18</sup> Akaemo tynrentoem kulâ, tâpywadoem kulâ Cristo wâgâ aguewâni modo wâgâ, kâsewânily witaymba urâ. Womaru lakuru, agui Jesus wâgâ aguely idataynrim modo idylygue. Cristo tinwynedylymogue iwâgâ aguelymo watay, tuomare lelâ urâ. Womazeâni kuru olâ Cristo xunâry egatuly. <sup>19</sup> Tutuze urâ, idânârâ yagâ aitaynrim modo urâem koendâ itoenlâ aidly awyly. Deusram urâem tâkazema âmaemo, Jesus Cristo ingonotyby Deus Ispiritury yagâlâ awylygue warâ. <sup>20</sup> Ize wato kuru olâ Jesus Cristo kâinwypazenehomba wawyly. Awylygue, iwerâ, tyanepa Jesus wâgâ auguedyse wawyly, tâwâlâ lelâlâ wâne ise âdylâ yagâ aidly. Yâzemo keanra, tarâ ietagodâ ietyzemo keanra warâ. Tâwâlâ ise wodo âdalâ âieholys, Cristo wâgâ koendâ aguehonly olâ ize wato.

<sup>21</sup> Yiguepa wawyly ara, won-honru Cristo nhuduypygue idânârâ adyese lelâ urâ. Yiguelys-ro watay, emakeze urâ koendonro urâem nhekanâdyby. <sup>22</sup> Yâpamo-ro watay, Cristo xunâry egatuin-enlâ ise urâ. Âdy urâem koendonro awyly kâuntuba urâ, Cristo wâgâ auguezesedyly atay, yiguelys-ro atay warâ eagâ witoem. <sup>23</sup> Azakâlâ urâem koendâ awyly. Toenzepa yiguedyse wawyly, toenzepa mawânrâ Cristo agâ widyse wawyly. Koendâ lelâ ise awârâ urâem. <sup>24</sup> Âmaemoem koendâ awyly yiguepalâ, Cristo wâgâ inomedâzezedomoem. <sup>25</sup> Tutuzelâ urâ, inepa yâpamo awyly; agâmolâ ise urâ. Agâmo itonze lelâ urâ, Cristo imâem mânwântomoem inomedâzemo urâ, mânwântuomo omaze-homoem. <sup>26</sup> Cristo Jesus wâgâ inomedâzemo agâmo witondly-ro watay, toenzepa ise omarumo. “Paulo agâ koendâ mawyly meneho” tâkeze ise Deus mâyrendylymo.

### *Kon-honru, tyanepa kehoem*

<sup>27</sup> Yagâ aini wâgâ tâtynanâzeba itaungâ. Cristo einwânni modo aito ara lelâ amidylymo mawânrâ koendonro kuru. Âyanmo idâze, udâpa warâ watay, tynynonro modo anhekylyem Cristo aguehobyry adyesemo myguehonlymo ise kâindadyse wato. Xutuze lâpylâ urâ, ton-honre Cristo xunâry mânengatuhomoem on-hoam itybyem mawylymo, iozepa kulâ unâ egatuwâni modo ton-honre kehoem mânunrutoem lâpylâ warâ. <sup>28</sup> Cristo eynynâbaom modo kâdytadaundâ; tyanepa itaungâ. Ton-honre mawylymo tientuo, xutuzemo mawânkâ ton-honremba tawyly, Deuslâ imakerinmo awylygue. <sup>29</sup> Koendonroem tawyly enehonwâm Deus âyanmo, Cristo, mânwântomoem, emaryem mitomoem mâtjeduakeoduomo warâ. Tutuzelâ akâwâm Cristo mânwâmpygueduomo, xurâ keba modoram tânagazezinhe mawylymo. Mâkâ nhutuybylâ awârâ. <sup>30</sup> Cristo eynynâbaom modo inagazedâmo; tâzenagazeoze lâpylâ urâ. Adaimpâni tozohoinze

tamezeba tâitoem myara lâpylâ kozohinzezedly, Cristo xunâry kâengatuzedoem. Filiposdâ wawyly ume, tâdâsenagazedly semaenzezedâ, Cristo wâgâ auguely kâinmopalâ. Iwerâ tydase âmaemo, iwâgâ aguezesezelâ wawyly, kâzenagazeoly egary umelâ.

## 2

### *Cristolâ uguondoem ini, onro anaxi tâetoem*

<sup>1</sup> Cristo agâ âmaemo iwerâ. Awylygue Jesus mâinwynedylymo, agonromo agâ mâpynedylymo warâ. Deus Ispiritorybe âmaemo; mâkâ mawânkâ nhenimo. Kurâ domodo xurâem koendonro aiedyly mâinmopalâ âmaemo. Tokalâ âmaemo ewy âsenagazedly-ro watay, agonromo tytyenze âmaemo. <sup>2</sup> Arâ watay, imâem agâmo tuomare witoem, agonromo agâ koendâ lelâ âzetaungâ. Ataen-homo agâ âpynedaungâ. Âzekiba ize matomo nidâ; merâ mâenmawyadâguylymo, mâkâ mâenmawyadâbyramo waypa. <sup>3</sup> Âmaemoem lelâ amidylymo tâiseba itaungâ. Agonromo takaze mâdyren-hondyzemo waypa itaungâ. Tynrenseinhe lâpylâ agonromo etaungâ. Pymâem inkâba âdutuwâdaungâ; tâzemary ara kulâ itaungâ. <sup>4</sup> Âmaemoem lelâ koendâ ize mawylymo waypa itaungâ, eagonro modo xurâem lâpylâ ize itaungâ.

<sup>5</sup> Cristo tyangahu oday xunâgo ara lâpylâ angahumo oday âunâgumo nidâ. Turâem kulelâ aidyly nipyra mawânkâ myakâwâm.

<sup>6</sup> Onro âtugudly iraynâlâ myakâwândy Cristo tâlâ awyly.

Âzekiba Tunwym Deus agâ awyly.

Arâlâ olâ, tarâ onro anaym tawyly ume,

Deus xyrento ara tynrendyse nipyra awyly.

<sup>7</sup> Mâkâlâ iduakeim nâdyren-homba tâitoem,  
tunwym Deus enado tynrento ara.

Idânârâ tâlâ tato modo inmoly, kurâem tâitoem.

Pymâ tutuzeim lelâlâ wâne mâkâ,

tâzemary ara kulâ olâ aguehoymbyem onro anaxi âewyly.

<sup>8</sup> Âdaunloenlâ Tunwym Deus aguehobyry nakadaymba,  
ize ato ara lelâ idânârâ anhesezedyly.

Kâtaybyay myakâwâm mâkâ iguely kruz wâgâ,  
Deusdâpa kipyra kitoem.

Arâ myakâwâm Jesus âwâlâ âewyly kâmakeze.

<sup>9</sup> Jesus igueduo,  
kurâem tyetonze lelâ myakâwâm Deus, tâzaxilâ odopâdoem.

Saguhoem xyrentobyry takaze kehoem xyrentoem anhenehonly;  
idânârâ kurâdo xyrento takaze mâkâ xyrendyly iwerâ.

Jesus ezedy xyrentoem aienehonwânm my nhunwym,  
idânârâ pymâ enday tynrenseinhe kuru itoem,  
âdaunlolâ kurâ ezedy takaze kehoem.

<sup>10</sup> Arâ Deus anhedyly, idânârâ tynreinseim modo takaze Jesus xyrendyly awyly xutuhoem.

Idânârâ kaynonro modo Jesus enado âzeguhaoam isemo tynrentoem,  
anju domodo, einwânni iguewâtyby modo alelâ.

Idânârâ kurâdo onro anano modo Jesus enado âzeguhaoam isemo, tynrentoem.

Idânârâ onro iano modo enado âzeguhaoam isemo lâpylâ, tynrentoem,  
kadopâ modo, Jesus eynynâbaom iguewâtyby modo alelâ.

<sup>11</sup> Enado ise aguelymo:

“Jesus Cristo, idânârâ iwymâry âmâ.

Amânhetyby wâgâ, idânârâ adâkezemo Kunwym Deus eon-honru, ehogu wâgâ warâ”

kelymo ise âzeguhoam itybyem Jesus enado.

### *Deusram tâdâtâho enehonri kurâ*

<sup>12</sup> Yataen-hodo kâinwyneguyl modo, atârâ agâmo wawyly ume, inomedâdomo ara amipyra waypa akâwâm âmaemo. Iwerâ agâmopa wawyly ume, inomedâdomobypy aiedyly kâjimowâdaundâ. Idânârâ xurâem koendâ lelâ amânhetomoem âzeon-hondâdaungâ. Deus xyrentaungâ; aguehobyry mankadylymo xytadaungâ warâ. <sup>13</sup> Deuslâ ize tato aguiendyse kitoem aienehoim. Mâkâlâ kon-honru xuduim, ize ato ara lelâ aguitoem, kyangahu oday kunâry itoem warâ.

<sup>14</sup> Âdylâ amânhetomoem amyguehonlymo watay, tâmireba, tylahureba warâ aietaungâ, <sup>15</sup> Deus eynynâbaom modo aitomo araba amitomoem. Deus aguehobyry takazemo, aiedyse ato aniempyramo warâ. Âyanmo olâ auguely, koendâ itaungâ, idânârâ Deus xurâem mawylymo nhutuhomoem. Aguehobyry kadakadaundâ. Koendâ itaungâ, âdy inakaigue tâwentâzeba mitomoem. Deus xutudâny modo duay kehoem âmaemo; awylygue ximukâ tohoreim kau wogonro tâdâtâho enehorim ara itaungâ, âdara eyam tadaindyly mânehon-homoem, uguely. <sup>16</sup> Jesus wâgâ eyanmo agueze âmaemo, âdara tâdâsemaguely awyly nhutuhomoem. Won-honru nhuduhabory ara kâsewani âyanmo Jesus wâgâ auguehoem, tâgaseim tâzeon-hoinze waunroem taintoem myara unâ Jesus wâgâ âyanmo kâengatuhomoem. Cristo odopâduo, tuomare ise eyam auguely: “Jesus, târâ Filiposdâ âmâem agânhetyby koendâ lelâ âzecholy. Anra asaemo, âwâgâ kâengatuday, âinwânni modo” uguely.

<sup>17</sup> Âdalâ iseunu tyapâze, yiguelly, vinhu ânguydo imeom xyâypy onwa iapâdyly Deusram egamehoem myara. Jesus mâinwântomobypy Wâgâ âzenagazeoze lâpylâ âmaemo. Tuomare ise urâ, Jesus wâgâ âyanmo kâengatuhobyry wâgâ, iomazeze lâpylâ âmaemo mâinwântomobypy wâgâ warâ. <sup>18</sup> Kâdyoly-ro watay, tâjityenzeba itaungâ. Ohomaendaungâ yagâ, uguely.

### *Timóteo, Epafroditô warâ*

<sup>19</sup> Pymâ Jesus ize-ro watay, iweâpa nitaymba ise Timóteo âyanmo kâingonodyly, âdara mawylymo kâuntuhoe, igarymo kâindatuo womazehoem. <sup>20</sup> Timóteo âyanmo igonose urâ, merâlâ mawânkâ, koendâ mawysedonromo, âwynenimo warâ, yara lâpylâ. Merâ emyenro kuru omazeâni, on-hondâni kâingonokyly lâpeba.

<sup>21</sup> Eagonro modo turâenlâ mawânkâ koendâ awyse awylymo, Jesus Cristo ewanu wâgâ nâtynanâdaymbamo. <sup>22</sup> Timóteo olâ emyenromo keba. Koendâ tâsewanize Jesus Cristo emaryem. Yagâ tawyly ume, unâ koendonro Jesus wâgâ tâgatuze mawânkâ ani. Iamudo tunwym nhemawyadâdyly myara merâ yagâ ewanu. <sup>23</sup> Kâdyoly atay, ietagueylymo atay warâ kâuntuduo ise Timóteo âyanmo kâingonodyly, âdara yedylymo awyly mâuntuhomoem.

<sup>24</sup> Pymâ Jesus kâzetaqueohoem anhedyly tâinwânselâ olâ urâ âyanmo. Arâ-ro watay, urâlâ ise awyarâ idâim.

<sup>25</sup> Epafroditô igonose lâpylâ urâ. Âmaemoma keankâ yam igononi, kâpyneândyly ume. Cristo eynynâ ypemugu kâinwyneguyl merâ. Sodadu âzekiba âsewanily ara, lâpylâ xina âsewanily merâ agâ, Jesus Cristo wâgâ unâ iwâkuru egatuze. <sup>26</sup> Toenzepa idânârâ nhetondyzemo awyly; toenzepa âseguâdâdyly, newâmadâ kely mâindatomobypy wâgâ. <sup>27</sup> Tâwâne lelâlâ keankâ, iguezeseaji kehoem. Deus olâ nityendâ. Awylygue olâ keankâ kua idyly. Ytyendâ lâpylâ Deus. Epafroditô iguelly-ro watay, toenzepa tâise kâjityendyly.

<sup>28</sup> Awylygue ise âyanmo kâingonodyly, mâentondomoem, kua itybyem awyly mâentuomo, omazehomoem. Arâ ise kâjityembrya wawyly, iwâgâ madahuliba mawylymogue.

<sup>29</sup> Tuomare mâendaenkudyzemo wawyly, âukonomo mâendaenkuhomo aralâ; Cristo eynynâ kypemugulâ mawânkâ. Cristo emary modo mâynrentomo ara lâpylâ xyrentaungâ.

<sup>30</sup> Tywâgâ nâtynanâdaymba keankâ merâ; ton-honre kehoem keankâ âsewanily.

Newâmadâ, iguezeseaji nidâ warâ, Cristo xurâem tâwanu ume. Wondâ olâ merâ, arâ lâpylâ tâise tarâlâ âmaemo-ro watay wondylymo.

### 3

#### *Jesus kieinwândylygue kydâzemakeoly, koendonro aguiendylygue inkâba*

<sup>1</sup> Cristo eynynâ ypemugudo, xirâ pape kâympygueândyly iraynâ, warâ uguedyse urâ âyanmo. Tuomare itaungâ, Pymâ Jesus xurâem mawylymogue! Ârudâmo lelâlâ wâne; augueondyse olâ urâ. Iwâgâ todohomaendyly mâinmopa âmaemo. Einwândyly mâinmopa âmaemo warâ watay, on-hondâzemo mawânrrâ auguehobyry. <sup>2</sup> “Judeu domodo ezewenry ara adatâwâdaungâ, Deus xurâem mawylymo xutuhoem” kewâni modo agâ tâmaynelâ itaungâ; iozepa kulâ aguehomo kâjidataundâ. Awâkâ arâ agueim modoram “Kaxoro tyewiâseim” tâkeze urâ, kâmayno awylymogue. <sup>3</sup> Kurâ Jesus einwânni modo, Deus xurâ lelâlâ kurâ, judeu domodo ezewenry ara kydadatâoly, kydadatâoba alelâ. Deus Ispiritury kuodanolâ mawânkâ xurâem kydawyly xutuho, Cristo Jesus xurâem kydawylygue Deus kien-hoguedoem aienehoim warâ. Tutuzelâ kurâ, judeu domodo ezewenry ara kydadatâoly, kydadatâoba warâ kydawyly keba kâmakeim awyly, âdy aguienkylâ lâpeba âwâlâ kydâsemaguehoem.

<sup>4</sup> Aguienkylâ modo wâgâlâ kydâsemaguely-ro watay, âsemagueybyem tâise urâ koendonro modo agânhetaymby modo wâgâ. Aguienkylâ modo wâgâpa olâ kydâsemaguely.

<sup>5</sup> Israelita lelâlâ urâ, judeu domodo idamu Benjamim iweompyry ewylâ. Yazepygueduo, sete emedyly idyly wâgâ myakâwâm yatâlymo, xina ezewenry ara, idânârâ iamimeom judeu satâho ara. Âkelo iunu lâpeba urâ, awylygue hebreu lelâlâ urâ. Moisés xina ezewenryem inweniby ara kâinane awisezedyly, fariseu domodo ewy wawylygue. <sup>6</sup> Saguhoem, Deus ize ato agânhekyly waunlo ara akâwâm ienanaji, Cristo einwânni modo kâenagazeday. Xina ezewenry agueho ara adâise winase. Awylygue kâinane uguondo koendonro ara lelâ kâdutuoly.

<sup>7</sup> Idânârâ âdara watobyry modo, agânhetyby warâ, iwerâ âdyem nitaymba urâem Cristo anhekyly modo wâgâ. Saguhoem urâem ize watobyry, âdyem nitaymba iwerâ. <sup>8</sup> Iwerâ Cristo lelâ kâinwânyly, Deus xurâem, koendâ witoem. Cristo kâinwândyly iraynâ Deus iomazeânze uguewâtay, idânârâ agânhetaymby modo kâendyly iwerâ saxium tamuinzeim ara kulâ. Iwerâ urâem Kywymâry Cristo Jesus xurâem tâjidyly, iwâgâ koendâ xutuly warâ koendonro kuru, saguhoem agânhetaymby modo takaze kehoem. <sup>9</sup> Iwerâ ize wato tokaleom ara lelâ Cristo agâ wawyly, Deus xurâem tâwentâzeba witoem, judeu domodo ezewenry iweniby kâinwândylyguepa olâ, Cristo kâinwândylygue. Agânhekyly wâgâ inkâba Deus xurâem tâwentâzeba wawyly. Mâkâ xurâem tâwentâzeba wawyly Cristo kâinwândylygue.

<sup>10</sup> Iwerâ ize wato, Cristo koendâ kâuntuzezedyly. Mâkâ igueypyem, kurâem itondyby eon-honrugue awidyse wawyly. Deus ize atolâ myakâwâm anhekyly, tâsenagazedyly umelâ. Arâ lâpylâ ize wawyly-ro warâ. Turâem koendonro modo inmoly, kruz wâgâ tâiguehoem, myara lâpylâ urâem koendonro modo kâinmodyze wawyly, Deus ize ato lelâ agânhetoem. <sup>11</sup> Arâ ise Deus, iguewâtyby modo kurâem nhetondyly ume, kurâem witondyly kâenuendy.

#### *Deus aguiendyse ato lelâ aguienkylâ*

<sup>12</sup> “Deus yize ato ara lelâ urâ iwerâ” uguely mâkeba; “Jesus aitobyry ara lelâ aini urâ” uguely keba warâ. Awidly olâ ize wato. Tâgaseim tadtaintoam taintoem âzeon-hondâdyly nepagubyra tâitoem myara lâpylâ kozohondâdyly aunloenlâ kâinwânszedoem, eydâ atoam udâly ara. Awârâ myakâwâm Cristo Jesus ize ato, turâem ygâseduo. <sup>13</sup> Cristo eynynâ ypemugudo, Deus ize ato ara kehoem inkâba urâ, uguesanselâ âyanmo. Tâgaseim âgânâyam MYK nitaymba. Waunroem lelâ nhedyly, taintodâ lelâ. Arâ lâpylâ aitaymby

modo wâgâ kâseguâdâbyra wawyly, enanânehoimbyryem wawylygue. Wayam waunroem aini modo agânhetoem lelâ iwerâ kozohondâdyly; Deus agânhedyse ato aiese lelâ iwerâ kozohondâdyly. <sup>14</sup> Tâgaseim tâgaky tympygueândoam taintoem toenzepa âzeonhondâdyly, myara lâpylâ awisezedyly, idânârâ Deus ize ato ara lelâ witoem. Kozohoinly, tâgaseim waunroem saintyby tâpywado nhemakeho ara, urâem koendonro Deus nhuduly kâenmakehoem. Jesus Cristo wâgâ kâsemaguehoem ygâsedâ mawânkâ Deus aunloenlâ eagâ witoem.

<sup>15</sup> Idânârâ kurâ Jesus Cristo ton-honre einwânni modo, ize ato koendâ xutuwâni modo, Deus kyize ato ara lelâ aguisezene. Âduaymo awârâ wâgâ âkeloem tunâgueimbe-ro watay, Deus eyanmo koendâ xutuen-honze lelâ. <sup>16</sup> Awylygue Deus “Aietaungâ” kehobyry lelâ aguyjiene, saguhoem aguehobyry aralâ.

<sup>17</sup> Cristo eynynâ ypemugudo, urâ, yataen-hodo warâ agâmo xina atay, Deus ize ato ara lelâ ani xina aidyly, xina aitobyry ara amitomoem. Xina aitobyry ara aitaynrim modo enuagaendaungâ; aitomo ara aitaungâ lâpylâ warâ. <sup>18</sup> Tâlâ toenzepa Deus ize ato ara aitânry modo. Toenzepa âyanmo adâkezelâ urâ xirâ wâgâ, iwerâ augueondyly. Toenzepa olâ ytynru, wogunru warâ, kainweniday. Inakanhe adâidylymogue, Cristo kruz wâgâ iguehobyry âwankuem nhedylymo awylygue. <sup>19</sup> Tâmakezeba ise akaemo. Aunloenlâ Deus agâpa ietybyem, âjî tâdâsenagazedoam ise âjigonoholymo. Ize tatomo inakai kulâ anhedylymogue. Tâzehoguezemo inakanhe adâidylymogue, nâpybazebyramo lâgâlâ warâ. Deus aiedyseba modo kulâ nhangahumo odano.

<sup>20</sup> Aunlo keba olâ kurâ, Cristo eynynâ ypemugudo. Tarâ wâne kurâ iwerâ; kâjidy kuru olâ târâ kau oday Deus eydâ atodâ. Târâpa ise Kywymâry Jesus Cristo âewyly; toenzepa odopâdyly kinwânwândyly-ro warâ. <sup>21</sup> Jesus odopâduo, kodo xugukewâze, ton-honreingue kehoem eara kitoem; ewâmani keba, igueim keba, iwânzeim keba warâ mâkâ sodô iwerâ. Jesus pymâ kuru; ton-honru idânârâ xirâ anano modo tiuntulygue ise mâkâ kugukely.

## 4

### Tâdâturudo xypyry

<sup>1</sup> Kywymâry Jesus einwânsizadaungâ lelâ, Cristo eynynâ ypemugudo. Toenzepa kainwyneguylâ âmaemo. Awylygue nhedyse wawyly. Toenzepa kadawily, womazeânehondâ mawylymogue.

<sup>2</sup> Warâ auguely Evódia, Síntique warâam. Tutuze urâ, mâewiâmunedylymo. Awylygue koendâ âzetaungâ, uguely. Kywymâry Jesus eynynâ âjipemugu âmaemo. <sup>3</sup> Âmâ koendâ Cristo ewanuem yagâ tâwaneimbyryam, auguely. Xurukâ akaemo azagâ pekodo modo, adataen-hoem itondomoem, uguely. Awâtârâ Filiposdâ wawyly ume, yagâ, Clemente agâ, yataen-ho modo agâ warâ nâsewanimo mawânkâ, unâ koendonro Jesus Cristo wâgâ egatulyem, idânârâ anakâ idatoem. Idânârâ yataen-hodo yagâ âsewaniby modo ezedy iwenibyem pape wâgâ: Aunloenlâ Deus Agâ Ini Modo Ezedy sawo keho wâgâ.

<sup>4</sup> Ohomaenzezedaungâ, Kywymâry Jesus xurâem mawylymogue! Tuomare itaungâ, ugueondyly-ro warâ.

<sup>5</sup> Idânârâ agâ koendâ itaungâ, agâmo koendonro agâ, koendâpaom agâ alelâ; inepa mawânkâ ise Kywymâry Jesus odopâdyly. <sup>6</sup> Âdy wâgâ kulâ tâseguâdâzeba itaungâ. Âdara mawylymo umelâ, Deus agâ aguewâtaungâ. Deusram ekadaungâ ipa matomo. Mâenkadybymo mâenmakeduomo, “Koendonro âmâ” kewâtaungâ. <sup>7</sup> Arâ eagâ amygue-duomo, tâkuâgueba, madahuliba warâ âesemo Deus, âdara anhedyly awyly mâyuntuba mawylymo umelâ. Mâkâlâ mawânkâ angahumo oday âdalâ kulâ âunârymo ienehodâny, Cristo Jesus xurâ mawylymogue.

<sup>8</sup> Xirâ kata kâenwanikeday, warâ uguedyse urâ âyanmo, Cristo eynynâ ypemugudo. Madahulilymo-ro watay, koendonro lelâ angahumo odaji âunârymo ietaungâ. Koendâ aguehoim wâgâ lelâ, iozeno wâgâ lelâ, âwankuem tyesenry wâgâ lelâ, tâwentâguezenry wâgâ lelâ, kuomazeâni wâgâ lelâ, kywypazenehondânry wâgâ lelâ warâ âpaunzedauingâ. <sup>9</sup> Agâmo wawyly ume, âyanmo senen-ho, inomedâdâmo warâ, âdara Deus ize ato aiedyly wâgâ. Kâenehoymby ara, inomedâdomobyry ara warâ lelâ aiesezeadaungâ. Agâmolâ ise Deus. Ikuâdâmimo peba âenehonzemo, koendonro aituo, inakai aituo alelâ.

### *Paulo turâem koendâ aityby modo wâgâ aguehobypy*

<sup>10</sup> Kywymâry Jesus agâ wawylygue, toenzepa womaru, dinheru mâingonotybymo wâgâ. Iweâpalâ iemawyadâdyze mawylymo, tutuze urâ. Aunlolâ iemawyadâdyze mawylymo; âdara dinheru mâingonotomo peba olâ ani. <sup>11</sup> Âdy peba wawyly ume xirâ dinheru mâingonotomobyry wâgâ kulâ inkâba auguely. Tâlâ watoguelâ kohomaendyly xutuimbyryenma urâ. <sup>12</sup> Mârâ etay âdype, mârâ etay âdy peba warâlâ ani urâ. Awylygue typnigue, typnigueba warâ wawylygue, kâseguâdâbyra urâ. Âdy peba wituo, kadahuliwâbyra urâ. Augueondyly olâ, tâlâ watoguelâ kohomaendyly xutuimbyryem urâ, uguely. <sup>13</sup> Idânârâ emaenze lelâ urâ, yagâlâ mawânkâ Cristo. Won-honru xuduze kâenmaen-hoem.

<sup>14</sup> Koendâ amidâmo, yagâ âdinherurumo mâempajigâduomo, kâsenagazedyly ume. <sup>15</sup> Macedônia eynynâba iegaseday, âyanmo unâ koendonro Jesus wâgâ egatuly kanguly lakuru ani, âmaemo kulelâ ani âdy ipa wato xuduim, tutuzelâ âmaemo, aramo ini lâpeba. Âmaemo lelâ keankâ arâ yam dinheru xuduim. Koendâ lelâ Deus agâmo nidâ. <sup>16</sup> Tessalonicadâ wawyly ume, tydineruguepa wituo, yam tugonose ani âmaemo, tokalelâba ani mâingonodylymo. <sup>17</sup> Dinheru mâingonotondomoemba olâ xirâ auguely. Ize wato kuru Deus ize ato lelâ amânhedylymo. Arâ ise ipa matomo Deus nhuduly.

<sup>18</sup> Xirâ kâinwenily, Epafroditô agâ mâingonotybymo emakerimbyryem wawyly mâuntuhomoem. Dinheru yam mâingonotybymo, toenzepa lelâlâ keankâ! Idânârâ ipa wato modo sanâdâ, nâsegubydâdâ warâ. Âdydo imeom tyânrângueim tyam xuduwâtyby tohogueze Deus, tâmakeze warâ, arâ lâpylâ mâkâ urâem amânhetybymo nhehoguedyly. <sup>19</sup> Ipa wato yam muduwâtaundâmo. Awylygue Kunwym Deus âyanmo xuduze lâpylâ idânârâ ipa matomo. Idânârâ sodo mâkâ, tâwânrreim keba warâ. Aunlolâ nhuduly Cristo Jesus eynynonro modoram. <sup>20</sup> Kunwym Deus koendonro awyly wâgâ, eon-honru wâgâ warâ aunlolâ aguykenre. Aguykeba kipyra kine. Âkeá lelâlâ xirâ.

### *Tâdâsedenguho xypyry*

<sup>21</sup> Idânârâ âmaemo Deus turâem induakeyby modo kâendaenkuly, Cristo Jesus xurâ modo. Cristo eynynâ kypemugudo tarâ yagonro modo idaenkulymo lâpylâ. <sup>22</sup> Idânârâ Deus xurâ taunlo modo lâpylâ idaenkulymo, merâ Romadâ pymâ kuru ety oday tâwanuneim modo olâ idaenkurinmo kuru.

### *Kywymâry nhesemo*

<sup>23</sup> Kywymâry Jesus Cristoram koendâ agâmo itoem kâenkadyly.  
Alâ kulâ xirâ kâinwenily. Alâ.

Paulo

## COLOSSENSES

### Paulo Kata Inweniby Colossos Donro Modoram

Xirâ kata wâgâ inwenily Paulo nhangahu odaji iemâmy Deus. Awylygue Deus itaumbrylâ xirâ Paulo inweniby, Romadâ kadeia oday tawyly ume, Colossos donro modoram, Jesus Cristo wâgâ nhutuhomoem. Deuslâ myakâwândy iweniehorim. Xirâ kata wâgâ nhurudyly, iozepa kulâ unâ egatuwâni modoram nâzenokuoba itomoem, "Uguondo koendonro lelâlâ Jesus, Deus imery keba olâ" kewâni modoram. Xirâ kata wâgâ Paulo adâkeze, Jesus uguondo awyly, Deuslâ awyly warâ.

#### *Aguely adaguho*

<sup>1</sup> Urâ Paulo xirâ kata iweninri, Cristo Jesus tywâgâ aguenriem induakeyby, Deus aguehobypy ara. Timóteo, Cristo eynynâ kypemugu tarâ yagâlâ merâ, idenkulymo lâpylâ warâ. <sup>2</sup> Âmaemo Colossos donro modoram xirâ kata kâinwenily, Deus eynynonro modoram. Cristo tâinwânse âmaemo; awylygue mâkâ eynynâ xina ipemugüem mawylymo.

Âynynâmo Kunwym Deusram warâ kâenkadyly koendâ mâzehohomoem, akaladânimmo peba mitomoem warâ.

#### *Colossos donro modo Jesus nheinwândylymo wâgâ, âpynedylymo wâgâ warâ agueho*

<sup>3-4</sup> Jesus Cristo tâinwânsezelâ âmaemo, kely tydase xina. Idânârâ Jesus eynynonro modo mânwynedlymo kely tydase lâpylâ xina warâ. Awylygue, Deus agâ âwâgâmo adâkeday, aunlolâ xina aguely, Pymâ Jesus Cristo nhunwym agâ: "Koendonro lelâlâ âmâ, Colossosdâ âynynonro modo xurâem amânhekyly wâgâ" xina kely. <sup>5</sup> Tydaselâ ani âmaemo Jesus Cristo wâgâ unâ iozeno. Mâindatuomo, âdy Jesus eynynonro modo xurâem Deus anhekyly awyly mâtuntulymo, myarâ eydâ atoram kaintuo. Adâkehobypy aieniem Deus awyly mânwântomobyry wâgâ, tutuzelâ âmaemo, Deus eydâ atodâ ekanâdyby tâlâ mawylymo. Awylygue Jesus einwândyly mâninpopa mawylymo, eynynonro modo mânwynedlymo warâ. <sup>6</sup> Jesus wâgâ unâ iwâkuru tydaselâ âmaemo, Deus itaumbryy iozeno kuru âyanmo tâzegatuozelâ awylygue. Tâinkâ lelâba Deus koendonroem awyly âzegatuoly. Awylygue xirâ mâtindapgyueduomolâ, koendonro Deus âmaemoem anhedyly mâtendylymo; koendâ mâtuntuzezedlymo lakuru koendonroem awyly.

<sup>7</sup> Deus koendonroem awyly mâtindadylymo ani, Epafras âyanmo nhegatudo. Xina ara, Cristo xurâem tâwaneim lâpylâ mawânkâ. Koendâ tâwaneim awylygue ani awyarâ idâly Jesus wâgâ unâ egatuze âyanmo. <sup>8</sup> Odopâdybyem, âwâgâmo anygue xinaram: "Colossosdâ Jesus einwânni modo toenzepa âpynedylymo, Deus Ispiriturylâ arâ aienehoinmo awylygue" nygue.

<sup>9</sup> Igarymo tindapgyueduo, aunlolâ xina nhekadyly âmaemoem Deusram. "Pabai, enomerymo xudugâ, âdy ize mato koendâ nhutuhomoem, anhetomoem warâ. Âispiritury ise awârâ eyanmo xutuen-hoim" xina kely inanry Deusram. <sup>10</sup> Deus ize ato mâtuntuduomo, Pymâ Jesus ize ato ara ise âmaemo, iomazeâni aiese âmaemo warâ. Koendonro modo lelâ ise amânhekylymo. Aunlolâ ise Deus wâgâ mâtuntuzezedlymo.

<sup>11</sup> Deusram âwâgâmo tâkaze lâpylâ xina: "Pabai, koendonro lelâlâ âmâ. Toenzepa lelâlâ ton-honreim mawylygue, Colossosdâ âynynonro modo eon-honwanâgâ, idânârâ tynynâ aitaynrim modo nhemaen-homoem tuomare lelâ, Jesus xurâ keba modo tângazeday, âpeânze kepa itomoem" xina kely inanry Deusram. <sup>12</sup> Kunwym wâgâ koendâ aguezesezelâ mitomoem. Mâkâlâ mawânkâ koendonro tawylygue, tynynonro modoem tienkanâdyby târâ kaynâ pymâem tatodâ emakerin-em âenehonrimo. <sup>13</sup> Saguhoem Satanás emaym kulâ akâwâm kurâ, iamu oday. Deus olâ Satanás amaymba kâmakerim,

kagâikenri warâ, imery toenzepa inwyneguylygue kwyymâgoem. <sup>14</sup> Cristo mawânkâ kâmakerim. Kurâem kruz wâgâ iguehobyry wâgâ mawânrrâ inakanhe aguitobypy xy-gakeybyem awyly kiuntuly.

### *Jesus Cristo wâgâlâ âdaunlo Deus awyly kiuntuly*

<sup>15</sup> Kunwym Deus kiempyra wâne kurâ. Jesus wâgâlâ olâ âdaunlo awyly kiuntuly. Deus imerylâ tawylygue, tunwym agâ âzekiba mawânkâ Jesus. Mâkâlâ idânârâ xugutyby modo iwaunroru. Tâlâlâ myakâwândy mâkâ kaudyly iraynâ. <sup>16</sup> Jesus tâlânro modo nhugunehon-hoem aiemâmy Deus, idânârâ xirâ anano modo, kau odano modo warâ. Agueduo myakâwândy âepanâguewâdyly idânârâ kienkyly, kientâny alelâ. Agueduo myakâwândy anju domodo âtugudaynly: anju ton-honreim modo, anju tagonro modo iwymârydo, anju âdylâ anhetoem agueim modo warâ. Tunwym agâlâ idânârâ nhugudyly. Jesus tâlânro modo nhugunehon-hoem aiemâmy Deus. Jesus xurâem myakâwândy idânârâ âduguholy. Mâkâlâ xuguni; turâenlâ nhugutyby modoram tâdyren-hon-hoem warâ. <sup>17</sup> Tarâ onro anaym, kau oday warâ âdy peba awyly ume, tâlâ myakâwândy Jesus Cristo. Onro anano modo, kau odano modo warâ mâkâlâ ejitâdaynrim, idânârâ ize ato ara aitomoem warâ.

<sup>18</sup> Cristolâ mawânkâ tynynonro modo nhangahu, iwaunrорумо warâ. Iguewâm wâne, Deus olâ kurâem ietonmâ. Igueypyem mâkâlâ waunroem kuru kurâem itoni, todo âdaunloenlâ nigueompyra itoem. Awylygue pymâ tynrenseinhe lelâlâ awyly. <sup>19</sup> Deuslâ agueim: “Yagâ âzekibaonlâ ymery” keim. Deus imery tawylyguelâ mawânkâ, eagâ âzekiba Jesus Cristo awyly. Awylygue âdy Deus anhekyly, adyese lelâ, agueho adâkeze lelâ warâ awyly. <sup>20</sup> Kaudyly ume, koendâ lelâ myakâwândy idânârâ Deus agâ. Adão, Eva warâ Deus aguehobyry nhakaduo olâ myakâwândy mâkâ agâ koendâ tadawyly adainly. Idânârâ tagâ koendâ ietoniem, Cristo igonomâ olâ Deus, idânârâ kau odano, onro anano alelâ turâem itondoem. Kruz wâgâ tymery iguehobyry wâgâ myakâwâm awârâ anhedyly.

### *Jesus einwândyly kâjimowâdaundâ*

<sup>21</sup> Saguhoem iwague akâwâm Deasdâpa mawylymo, Deus izepa ato kulâ amânhokylymo awylygue, angahumo odanogue kulâ âunâgumo awylygue warâ. <sup>22</sup> Deus agâ koendâ âmaemo iwerâ. Kruz wâgâ tymery iguehobyry wâgâ, Deus tataen-hoem âedâmo xurâem mitomoem, âigueduomo, tânadoam atomoem. Âdygue tâwentâzeba, tywykeba warâ, mâkâ âizemo ato ara kehoem ise âmaemo. <sup>23</sup> Arâ enadoam mydâhomoem, Jesus einwândyly kâjimowâdaundâ. Âtâ enu kiempadâdyly tâhugane kehoem, nâzekânia itoem myara koendâ kehoem Deus itaumbyry einwântaungâ. Ton-honre lelâ angahumo oday âunârymo nidâ, mâtâ etay mâyinwândylymo, mâtâ etay âkelo mâyinwândylymo warâpa mitomoem. Jesus wâgâ unâ koendonro midadâmo, meinwândâmo warâ; tutuzelâ âmaemo, Deus “Aiese urâ” tâkehobyry aieniem awyly. Awylygue mawânrrâ âigueduomo, Deus eydâ atoram idârin-em mawylymo mâyuntulymo. Awylygue awârâ mâyinwândylymo kâjimowâdaundâ. Xirâ unâ Jesus wâgâ agueim mawânrrâ tâinkâ lelâba tâgatuzeim, xirâ egatulyem tâwaneim urâ-ro warâ.

### *Paulo judeu keba modoram Jesus wâgâ aguehobyry*

<sup>24</sup> Tarâ kadeia oday ietagu, Jesus wâgâ unâ âyanmo kâengatulygue. Kâsenagazedyly lelâlâ wâne, tuomare olâ urâ, Deus ize ato aralâ mawânrrâ yagâ aidyly. On-hondbybyem urâ, Cristo ize ato ara kâsenagazedoem, xurâem iewanu ara. Mâkâ einwândyly kâinmopalâ kâsenagazedyly watay, mâkâ xurâ modo xutuzemo âdara einwândyly ni-mopalâ tâsenagazedyly awyly. Arâ ise akaemo Cristogue tywymâguneim modo kâengamanâdyly, “Cristo sodo” kelygue tâzekeim modo. <sup>25</sup> Jesus eynynonro modo koendâ kehoem Jesus wâgâ nhutuhomoem kâenomedâdoem aguewâm Deus. Mâkâ

aguehobyryem unâ koendonro kâengatuly âyanmo, judeu keba modoram. Awylygue tâinkâ lelâba Jesus wâgâ auguely, idânârâ auguehobyry kâengatuly.

<sup>26</sup> Nhutuen-hoymby keba mykâinane xirâ unâ. Iwerâ olâ nhutuen-honly Jesus eynynonro modoram. <sup>27</sup> Warâ myakâwâm Deus xunâry, judeu keba modo, judeu do modo alelâ tienmakely myakâwâm agueho. Xirâ mawânrâ tynynonro modo nhutudyze ato, saguhobyry modoram tâgatuzenrybyry. Awylygue Cristo agâmolâ awyly tâwâlâ lelâlâ wâne judeu keba mawylymo. Cristo agâmolâ awylygue, tynynonro modoram tiunduly Deus kehobyry idânârâ tâlâ âmaemo. Âdydo imeom sodo âdy peba itânrâ emyenro âmaemo. Xypyry etay, Cristo xyrendyly ume, tynwânwânsse lâpylâ âmaemo, eagâlâ mâdyren-honlymo.

<sup>28</sup> Awylygue Cristo wâgâ xina aguely idânârâam, mâkâ wâgâ koendâ nhutuhomoem, iamudo âdy xutudânrâ arapa itomoem. Turusemo, tonomedâzemo warâ inanry xina Cristo wâgâ, Deus tonomery nhuduypygue. Awylygue, Deus ezaxi tâtâduomo, ize ato ara lelâ awylymo. <sup>29</sup> Aguehobyry agânhetoem, toenzepa lelâlâ kâsewanily. Idânârâ yagâ aitaynrim modo kâenmaenly lelâ. Cristo won-honru nhuduypygue idânârâ adyese urâ, iewanu xuduypy kâympygueândoem.

## 2

<sup>1</sup> Mâuntudyzemo urâ, toenzepa âmaemoem kâsewanily, Laodicéia donro modoem, âji udâpa wato donro modoem warâ, Cristo wâgâ unâ koendonro koendâ mâuntuzezedomoem, mâinwântomoem warâ. <sup>2</sup> Arâ kâsenagazedyly kâenmaenly, tâegane lelâ mitomoem, mâpynedylymogue tokalelâ mitomoem, Deus saguhoem nhutuen-hondânrbyry koendâ mâunturomoem, kâmakeim Cristo tingonodyly awyly warâ. Mâkâ koendâ mâuntuzezedlymo watay, toenzepa ise omarumo, mâsegamlymo warâ. <sup>3</sup> Mâkâ mawânkâ âdy Deus konomedâdyze ato xutuen-hoim; mâkâlâ âdy Deus ize ato, izepa ato warâ xutuen-hoim lâpylâ. Koendonro lelâlâ xirâ xutuly, xave kaixa enahuymby enahungueho emyenro mawânkâ Cristo; mâkâ wâgâ saguhoem Deus nhutuen-hondânrâ kiuntuly.

<sup>4</sup> Xirâ mawânrâ âurutomo, iozepa kulâ unâ egatuwâni modo inokubyramo itoem; tâwâlâ lelâlâ wâne iozeno ara kehoem aguelymo. <sup>5</sup> Agâmopa lelâlâ wâne urâ, âwâgâmo kâpaunzezebyra wipyra olâ urâ. Tuomare urâ, on-hoam lelâ âmaemo, Cristo einwânszedlyly mâinmopa âmaemo warâ, kely kâindadylygue.

### Cristo agâpa kipyra kine

<sup>6</sup> Cristo Jesus âwymârmyo atay, Deus ize ato modo lelâ aietaungâ, mâkâ agâlâ mawylymo mâenehon-homoem. <sup>7</sup> Se tywindy imâsedo wâgâ âzeon-hondâdyly, sapezenru tamepa itoem myara lâpylâ Cristo einwânszededaungâ, mâsenagazedaymo, ton-honre lelâ mitomoem. Aunlolâ âtâ itâni intâzezedlyly myara lâpylâ xutuzededaungâ, imâem Cristo wâgâ. Mâinwândylymo imâem iesezaedaungâ. Xirâ mawânrâ inomedâdomobyry. “Koendonro âmâ urâem, yam mâunduypy modo wâgâ” kewâtaungâ lâpylâ eyam warâ.

<sup>8</sup> Tonomeguelâ itaungâ, iozepa kulâ unâ egatuwâni modoram tonokuzeba mitomoem, mâuntuybymo angahumo oday netyba itomoem warâ. Iozeno mâkeba konomedâdomo, unâ âdyem itânrâ, tunâry kulâ nhegatulymo, Cristo nhenomedâdobyr wogonro mâkeba. <sup>9</sup> Cristo mawânkâ Deus agâ âzekibaom kuru, tarâ onro anaym tawyly ume nâtuguguewâbyra akâwâm, Deuslâ tawylygue. <sup>10</sup> Cristo agâlâ mawylymogue, Deus aralâ lâpylâ âmaemo, Deus Ispiritury agâmo awylygue. Idânârâ tozohonru kaynonro, onwogonro alelâ takaze kehoem mawânkâ Cristo eon-honru.

<sup>11</sup> Cristo mâinwântuomo, Deus xygakewâm inakanhe amidyse matomo, xurâem mawylymo tienehon-hoem, Deus ize ato lelâ amânhetomoem tadatâlygue inkâba. Awârâ uguondo anhekylly tadatâhogue, uguondoram xina adatâoly. Cristo olâ inakanhe kidyse

kydato xygakeim. <sup>12</sup> Batiza mâiehodaymo, Cristo agâ igueypyem, epyâdybyem waunlo ara makyrenmo. Cristo kurâem itonmâ, myara lâpylâ paikayba onokuduomo, iweloem ietybyem mawylymo menehomo. Xirâ ton-honru imâsedoguelâ Deus Cristo kurâem nhetondobyrygue, iweloem aetondomoem ton-honre Deus awyly meinwânmâmo.

<sup>13</sup> Deus aguehobyry mankadomobyry wâgâ, izepa ato amânhetomobyry wâgâ warâ Deusdâpa makâwâm. Deus xurâem, igueypyem âmaemo. Iwerâ olâ, Deusram iweloem itybyem âmaemo; Cristo agâlâ iweloem ietybyem mawylymo. Jesus kieinwândyly ume, Deus idânârâ inakanhe aguitobyry tygakeze. <sup>14</sup> Deus agâ kiempywagulybe akâwâm kurâ, izepa ato aguiendylygue kygondagu waunlo ara. Kygondary kiempywabyra kydawylygue, aunloenlâ tâise Deusdâ iwague kydawyly. Deus olâ kygondary tainze; kagâ koendâ lelâ mâkâ iwerâ; Cristo mawânkâ iguewâm kruz wâgâ kygondary epywaze.

<sup>15</sup> Cristo, kruz wâgâ tyigueduo, Satanás eon-honru, idânârâ kadopâ modo Satanás nhutuly eon-honru warâ sainwâm. Egâ wâne sodadu domodo, tuduery modo agâ ton-honreimbyry âpybazedomoem ekâjibyem tâzenanaym adakobâdomoem aguely, idânârâ kurâdoram âzehohomoem myara lâpylâ akâwâm Cristo idânârâ enanaym Satanás eon-honru, kadopâ modo eon-honru warâ nhainly; mâkâ lelâ ton-honreim tawyly enehowân-ro warâ.

<sup>16</sup> Awylygue, “Mâdytadaymba âmaemo. Podo tâsenry tâse âmaemo. Tânyzenry tânyze âmaemo. Xina agâ mâtzyguebyra âmaemo. Xina aito ara nunâ iwelo mâtentyguebyra âmaemo. Kokobyzegueho oday, aguientâny adyese âmaemo warâ” keim modo wâgâ tâseguâdâzeba itaungâ. <sup>17</sup> Pyni tâinzenry modo, âty adyeseim modo warâ judeu domodo ezewenry agueho; Messias âeni wâgâ nhutuhomo kulâ myakâwâm âewyly ara. Iweâma awârâ modo kulâ kâmakerin-em kieinwâmpyra kurâ, Cristo mawânkâ âemâlâ; kâmakeze iguewâm warâ.

<sup>18</sup> Tâlâ wakeim modo: “Deus tyize itoem, tâwâlâ tadapioguze, todo tatâwâze warâ xina. Deus tyize itoem âzeguhoam tâise xina anju domodo tynrense warâ. Xina aito ara amipyra mawylymogue, koendonro mâkeba âmaemo Deus xurâem” keim modo. Akaemo agueho modo kulâ olâ kâjiwantaguedaundâ. Akaemo agueho amânhedylymo watay, koendonro Deus âmaemoem nhekanâdyby mânemakewâbyra ise âmaemo. Wakelymo lâpylâ: “Deuslâ xinaram âepanâgueim xina nhâenkyem. Tânugue tâense xina” kelymo. “Xina nenomedâdâ âdara xina aidyly awyly, tyize itoem. Awylygue akadâmo imâem iwâgâ xina nhutuly” kelymo. Kewâdylymo kulâ olâ. Deus xurâ mâkeba nhenomedâdomo; tytaumbyry kulâ nhenomedâdomo. Âdy adawihomo lâpeba. <sup>19</sup> Pymâ Jesus einwândyly imoimbyrymoem; tywaunroru imoimbyry xuzatyby aramo kulâ. Awylygue mawânkâ alâ kulâ awylymo, aguelymo warâ. Cristo mawânkâ kyangahu; sodo pylâ kurâ-ro warâ. Egâ wâne kydadaseudo modo wâgâ kodo wayam wayam idyly, eon-honwadyly warâ myara lâpylâ Cristo wâgâ Deus kon-honwanâdyly, ize ato ara aguisezedoem.

### *Iweloem ietondybyem kydawylygue, saguhoem kydatobyry ara inkâba kurâ*

<sup>20</sup> Cristo igueduo, eagâlâ âiguelymo waunlo ara akâwâm âmaemo. Awylygue kurâdo ezewenry kulâ keba âuturimo awyly. Deus xurâ kebaom modo anheklyly aiese todopâzeba itaungâ. Aguehomo kâjiwantaguedaundâ. Akaemo ezewenry aieniem mâkeba âmaemo iwerâ. Tâlâ olâ âmaemo ewy akaemo aito ara aini. <sup>21</sup> Wakelymo: “Tawâsenry keho imarymogue kadawâtaundâ. Tâsenry keho kâdâtaundâ. MÂ’ tyesenry keho MÂ’ kâiedâ. Deus agâmo tyewiâseba itoem, âurutomo einwântaungâ” kelymo. Kewâdylymo kulâ olâ. <sup>22</sup> Inepa adainrim modo wâgâ kulâ ezewenrymo aguely; kurâdo tâzezewenryem nhutuyby kulâ aguehomo. <sup>23</sup> Koendonro ara wâne kurutomo, koendonro keba olâ. “Deus ehoguedaungâ” kelymo, ize atomo ara lelâ adâjitoem; tohoguedyze Deus ato araba. “Sawoempa itaungâ” kelymo, akaemolâ olâ sawoem ini tâzewenrylâ

tyeinwândylygue. “Âwâlâ adapioguwâdaungâ, adatâwâdaungâ warâ” kelymo, ara aguepa olâ Deus. Awârâ ezewenrymo olâ ânguy Deus izepa ato aniempyra itoem anienehomba.

### 3

<sup>1</sup> Iguewâm, kurâem itonmâ warâ Cristo. Iwerâ Deus eahoru eynynâ ekadybyem awyly, pymâ ekadodâ. Deusram iweloem âiehoybyem âmaemo, igueypyem Cristo agâ kurâem mitondylymo waunlo ara. Awylygue Deus xurâ modo lelâ, aiedyse ato modo lelâ warâ angahumo odano nidâ. <sup>2</sup> Aunlolâ Deus xurâ wâgâ âpaunzezaungâ; xirâ anano wâgâ inkâba âpaunzezaungâ. <sup>3</sup> Saguhobyry arapa âmaemo iwerâ; tadaînze mâtâ. Iweloem âiehoybyem âmaemo iwerâ, Cristo agâ tokaleom ara itybyem. Deus xurâ keba modo nhutuhomoem nuduwâpyra iweloem mâiehohomobry. <sup>4</sup> Cristo tâinwânse mawylymogue iweloem mâiehondylymo. Xarâ onro anaxi odopâduo, eagâlâ ise âmaemo. Eagâlâ ise âwâkurumo, on-honrumo, âynrumo warâ. Tywâkureim, ton-honreim warâ mâtâ; eara ise âmaemo-ro warâ.

#### *Koendonro lelâ aguyjiene, inakai modo keba*

<sup>5</sup> Igueypy inakai adiendyly inmolylâ, arâ lâpylâ inakai amânhedyse matomo imowâdaungâ; Deus xurâem tywykeim ara âenehoimmo akâiedaundâ. Eagâ mohogün-homobry keba kulâ mâynanâdyzemo tâiseba itaungâ. Kywypado amânhedyse tâiseba itaungâ. Inakai modo amânhedyse tâiseba itaungâ. Toenzepa âsejiguyunmoze tâiseba itaungâ. Toenzepa kysejiguybe kidyly kulâ ize kydato watay, ilâ modo kulâ ize kydato, Deus takaze kehoem. <sup>6</sup> Adâkehobry sakaniubyry modo agâ Deus iewiâpaze, enagazenehonzemo-ro warâ. <sup>7</sup> Saguhoeim Jesus mânwândylymo iraynâ idânârâ inakai modo amânhedyse matomo amiensezedâmolâ.

<sup>8</sup> Iwerâ olâ awârâ modo imowâdaungâ; âdyem itânyr manmelymo-ro waunlo ara samewâdaungâ: tâjiewiâky, ânguydoem tadalafily, ânguy izepa tadalafily, tâdâtunâguedyly, tâdâpyguely warâ. <sup>9</sup> Myguewâdylymo kulâ tâiseba itaungâ. Izewenrymo saguhobyry inakai modo aiedyly imoimbyryenma âmaemo. <sup>10</sup> Kurâ iwelo âmaemo. Itymo owogonromo iwelo keba samerimbyryem, iwelo onwamo mânhedlymo-ro waunlo ara, iweloem ietondybyem mawylymo. Deuslâ aunlolâ iweloem âesezenimo, eara mitomoem, iwâgâ mâtudize matomo idânârâ mâtuntuhomoem. <sup>11</sup> Awylygue Deus xurâem judeu, judeu keba warâ kydawly, judeu domodo satâhogue satâbyem, tatâzeba warâ kydawly, xidadâ odano, idu odano, pymâ, tâwaneim warâ kydawly âdyem nitaymba awyly. Cristo koendonro kuru awylygue, idânârâ takaze tynrenseim awyly, tynnonro modo agâlâ warâ.

<sup>12</sup> Deus xurâ âmaemo. Âwynedlymogue myakâwândy âduakelymo turâem. Awylygue kaikâ kewâtaungâ. Ânguydoempa, koendonroem tâdutuzeba, tyewiâpazeba warâ itaungâ. <sup>13</sup> Inakanhe amâieholymo emaenwâdaungâ lelâ; âpeânze tâkezeba itaungâ. Pymâ Jesus inakanhe amitomobry tygakeze, arâ lâpylâ inakanhe amâiehohomobry enanânehonwâdaungâ. <sup>14</sup> Awârâ modo takazeno kuru tâdâpnedly. Kagonro agâ toenzepa kydâpnedly mawânrâ on-hoam lelâ kyenehorim, kytanru, kâzewenry warâ âkeloem awyly umelâ. <sup>15</sup> Cristo wâgâ mawânrâ agonromo agâ âdapa lelâ mawylymo. Agâmolâ mâtâ; mâtâlâ inakanhe amidyse matomo xygakerim. Koendâ lelâ mitomoem, mâtynedomoem, mâtseinwândomoem warâ Deus âgâsedlymo. Awylygue koendonroem awyly wâgâ anhekyly wâgâ warâ amyguepa tâiseba itaungâ Deusram.

<sup>16</sup> Aunlolâ Cristo xunâry odaymope nidâ, idânârâ amâheklymo, âtaumbrymo warâ Cristo aguehobry ara lelâ itoem. Agonromo enomedâdaungâ, xurutaungâ warâ, idânârâ tâzenomery Deusdâpa âeni mâtuybymogue. Deus itaumbry awo wâgâ iwenibygue âgâtudaungâ, livru Salmos wogonrogue. Deus wâgâ agueingue âgâtudaungâ, kurâem anhetybygue warâ. Deus Ispiritury tâjigâky nhuduypygue âgâtudaungâ. Tuomare kehoem Deus xurâem âgâtudaungâ, ânguyem awyly wâgâ agueingue, anhekyly

wâgâagueingue warâ. <sup>17</sup> Kywymâry Jesus emary mawylymogue, mâkâ amyguedysemo ato ara aguewâtaungâ, mâkâ amânhedysemo ato ara aietaungâ warâ. “Koendonro âmâ, xinaem amânhetyby wâgâ” kewâtaungâ Kunwym Deusram. Jesuslâ mawânkâ aguykehobyry Deusram sani.

### *Koendâ lelâ âzetaungâ*

<sup>18</sup> Tâjiwysaro modo, osomo aguehobyry aietaungâ, arâ mawânkâ Kywymâry Jesus Cristo einwânni modo aidyly.

<sup>19</sup> Tâjiso modo, âwydymo koendâ etaungâ, iwynedaungâ. Âwydymo kâjiewiâsedaundâ, kâzenagazaundâ warâ.

<sup>20</sup> Tâjimeombyry modo, unwânmo, âzemo warâ einwântaungâ. Awârâ mawânrâ Deus ize ato, Kywymâry Jesus xurâem mawylymogue.

<sup>21</sup> Tâjiunwyndo, âmeonmo kâzeusaundâ, newiâpabyra, nitywambyra warâ itomoem.

<sup>22</sup> Tâwanuneim modo, pymâ xirâ anano modo aguehobyry kadakadaundâ. Inuagaendylymo ume lelâ inkâba âsewaniwâdaungâ, koendâ amyguehon-hoem kulâ waypa. Koendâ lelâ âsewaniwâdaungâ, Kywymâry Jesus einwânni mawylymogue. Aiedyse ato mankadlymo tytazema âmaemo. <sup>23</sup> Idânârâ âwanu amânhekylymo, amânhedyse mawylymogue aietaungâ, tuomare, tugüigue warâ. Âwymârymo xurâem kulelâba, Kywymâry Jesus Cristo xurâenlâ amânhedylymo nidâ. <sup>24</sup> Mâkâlâ ipywanimo awyly enanâguewâdaungâ. Tâinwânni modo xurâem kaynâ tienkanâguyly koendonro ise mâkâ âyanmo nhuduly. Cristo mawânkâ âwymârymo kuru. <sup>25</sup> Idânârâ epywaze anhetyby aralâ. Koendonro aienibyry modoram, koendonrolâ ise nhuduly. Inakai aienibyry modoram inakailâ ise nhuduly warâ. Iozelâ ise arâ anhedyly.

## 4

<sup>1</sup> Pymâ domodo, koendâ âmaemoem tâwanuneim modo etaungâ. Kâzenokudaundâmo. Koendâ lelâ epywadaungâ. Târâ kaynâ tywymâgue mawylymo enanâguewâdaungâ lâpylâ.

### *Deus eynynonro modo xuruto*

<sup>2</sup> Deus agâ amyguepa tâiseba itaungâ. Inanaynmo lelâ itaungâ, eagâ amyguehomoem. Tynazeba itaungâ eagâ agueze. “Tuomare xina, xinaem amânhetyby modo wâgâ” kely kâjimowâdaundâ. <sup>3</sup> Deus agâ amyguedaymo, xinaem ekadaungâ lâpylâ, xirâ Cristo xunârybyry xina negatuba nipyra itoem. “Pabai, tâwâlâ Paulo aguehoem aienehongâ, agui Cristo wâgâ agueimpe itoem lâpylâ. Arâ lâpylâ xina nhekadyly, Paulo eagonro modo xurâem. Xirâ unâ saguhoem idatânybyry, xutudânybyry warâ modoram koendâ nhegaturomoem aienehongâ” kewâtaungâ Deusram. Awârâ wâgâlâ mawânrâ tarâ kadeia oday ietagu, Cristo wâgâ unâ kâengatulygue. <sup>4</sup> Deusram ekadaungâ: “Paulo koendâ Cristo xunâry nhegaturomoem, idânârâ idani modo koendâ nhutuhomoem warâ aiekâ” kewâtaungâ lâpylâ.

<sup>5</sup> Cristo wâgâ tâdâsemaguely amyguedaymo, Deus inomerymo nhuduhobyry ara einwântâny modo agâ itaungâ. Arâ ise Cristo wâgâ mâengatulymo mâindanehonlymo mâuntuen-honlymo warâ. <sup>6</sup> Koendonro lelâ amyguehomo nidâ, idataynrim modo amyguelymo ize itomoem, peku pyni nhekubâzeândo ara. Âdara mâin-hoguhomo awyly xutuwâdaungâ, Cristo mâinwândylymo wâgâ madapâigueoduomo.

### *Kata xypgueândo*

<sup>7</sup> Taintuo, Tíquico ywâgâ idânârâ egatuze, Cristo eynynâ kypemugu xina inwyneuguyly. Xina agâ Kywymâry Jesus xurâem koendâ tâwaneim awâkâ, aguehobyry anhedyly lelâ waunlo. <sup>8</sup> Awâkâ kâingonodyly âyanmo, âdara xina awyly mâuntuhomoem, omazehomoem, on-hondâdomoem warâ. <sup>9</sup> Onésimo eagâ kâingonokyly lâpylâ. Atonlo ewylâ awâkâ, Cristo

eynynâ kypemugu kinwyneguylý, Kywymâry Jesus aguehobyry aieni. Tarâ Romadâ aitaynrim modo egatuze lâpylâ akaemo.

<sup>10</sup> Aristarco, tarâ kadeia oday yagonro, iwynu manwâtomoe aguely. Marcos lâpylâ idaenkulymo, Barnabé ipemugu. Âyanmo saindyly-ro watay, koendâ edaenkuwâdaungâ, iwâgâ âurutomobyry ara. <sup>11</sup> Josué, Justo kelygue tâzekeim, lâpylâ idaenkulymo. Asaemo azagâ tokalâ warâ uguondo kulelâ judeu domodo Jesus einwânni enday yagâ tâwaneim. Iewanugue toenzepa iemawyadâdâ inanry asaemo, Deus idânârâ kywymâryem awyly kâengatuday.

<sup>12</sup> Epafras lâpylâ idaenkulymo; Cristo Jesus xurâem tâwaneim lâpylâ merâ, atârâ Colossosdâ âmaemo ewy Cristo einwânnilâ merâ. Aunlolâ inanry Deusram nhekadyly âmaemoem. Xurâ keba modoram mâzenagazeolymo umelâ Jesus mâinwâmpyra mipyra mitomoem Deusram nhekadyly. Deus ize ato mâuntuhomoem, amânhetomoem warâ nhekadyly. <sup>13</sup> Epafras anhekyly tâense winase. Awlygue toenzepa merâ âsewanily, uguely, âmaemo Colossos donro modo, Laodicéia donro modo, Hierápolis donro modo warâ imâem Jesus wâgâ mâuntuhomoem.

<sup>14</sup> Lucas kua kyeni toenzepa kinwyneguylý, Demas lâpylâ warâ idaenkulymo.

<sup>15</sup> Cristo eynynâ kypemugudo Laodiceiadâ tâtyuneim modo kâendaenkuly lâpylâ. Nifia kâendaenkuly, etydâ Jesus einwânni modo Jesus wâgâ imâem tiuntuuhomoem âtâdyguynri modo warâ. <sup>16</sup> Xirâ kata mâaintaimbygueduomo, Laodiceiadâ Jesus einwânni modoram igonotaungâ, akaemo lâpylâ intain-homoem. Akaemoram kata kâingonotyby ise mâintainlymo-ro warâ, intaimbygueduomo. <sup>17</sup> Arquiporam aguewâtaungâ: “Pymâ Jesus amânhetoem ‘Aiekâ’ kehobyry mäenwanikeba tâiseba ikâ” kewâtaungâ.

<sup>18</sup> Urâ Paulolâ xirâ wâgâ iezy iweninri idaenkuuhomoem. Ywâgâ adâkezelâ itaungâ Deusram, tarâ kadeia oday ietagu ume.

### *Deus nhesemo*

Deusram koendâ mâzehohomoem kâenkadyly.

Alâ kulâ ise âyanmo kâinwenily.

Paulo

## 1 TESSALONICENSES

### Paulo Saguho Kata Inweniby Tessalônica Donro Modoram

Xirâ kata wâgâ inwenily Paulo nhangahu odaji iemâmy Deus. Awylygue Deus itaum-byrylâ xirâ Paulo inweniby. Deus xirâ kata Pauloram inwenien-honly myakâwândy Tessalonicadâ Jesus einwânni modoram, xidadâ imâsedo Macedônia eynynonro. Grécia xurâem itybyem mâtâ âji iwerâ. Jesus xunâry egatuze azagâ tâtâly tientay, Tessalonicaram myakâwândy Paulo idâly. Jesus wâgâ aguely tindadysebaom modo toenzepa iewiâpadaunmâmomy. Aituo myakâwâm Paulo, Silas warâ âwiendylymo târâpa.

Paulo Corintodâ awyly ume, Tessalonicadâ Cristo einwânni modo egary egatuwânmym Timóteo eyam. Aituo Paulo xirâ kata inwenily, teon-hondâdomoem, Cristo einwânsezela itomoem, Deus ize ato ara lelâ aitomoem warâ lâpylâ nhurudylymo.

Xirâ kata wâgâ tytainze kurâ, xirâ onro anaxi Jesus odopâduo aini modo. Idânârâ einwânni modo eagâ oxioze eunu duaxi âkuly, iguedânrâ modo alelâ.

#### *Auely adaguho*

<sup>1</sup> Urâ Paulo xirâ âyanmo iweninri. Âmaemo Tessalonicadâ alâ Jesus wâgâ agueze, ehogueze, iomaenze warâ âtâdyguynri modoram xirâ kâinwenily. Kunwym Deus eynynonro modoma kurâ, Kywymâry Jesus Cristo eynynonro warâ. Xirâ kâinweniday tarâ yagâlâ asaemo Silas\*, Timóteo warâ.

Âynynâmo Deusram xina nhekadyly, koendâ mâzehohomoem, akaladânímo peba itoem warâ.

#### *Jesus tâinwânsê tawyly Tessalônica donro modo nhenehon-hombyry*

<sup>2</sup> Deus agâ adâkeday, xina inanânehonwâbyramo inanry. “Ize mato lelâ Tessalonicadâ âynynonro modo anhekyly, Pabai. Awylygue xina iomaru” tâkeze inanry xina eyam.

<sup>3</sup> Aunlolâ inanry xina âmaemoem eyam nhekadyly: “Pabai, Tessalonicadâ âynynonro modo Jesus tâinwânsemo. Awylygue Jesus eynynâ toenzepa ewanumo. Toenzepa âpynedylymo tagonro modo agâ. Awylygue ton-honre kehoem âsemawydâdylymo warâ. Jesus odopâniem awyly nhutulymo, aguehobypy awylygue. Awylygue saguhoem adâitobyry ara anitombyra awylymo, tâwâlâ lelâlâ wâne Kywymâry Jesus Cristo nheinwândylygue âzenagazeolymo. Alâ olâ toenzepa kehoem nheinwândylymo” tâkeze inanry xina Deusram.

<sup>4</sup> Cristo eynynâ ypmugudo, Deus âwynedâmo awyly, turâenlâ induakeyby mawylymo warâ, tutuze xina. <sup>5</sup> Deuslâ âduakenrimo awyly, xina aguehobypy mâindatomoem aieni awyly warâ, tutuze xina. Unâ iwâkuru tâdâsemagueho Jesus wâgâ aguenri xina negatu. Jesus wâgâ xina aguely kulâ waypa ani. Deus Ispiritury eon-honru xina nenehom lâpylâ. Åkeá lelâlâ ani xina nhegatuly, iozeno awylygue. Agâmo tatay, xina aitobyry tutuzelâ âmaemo. Koendâ mitomoenlâ ani xina arâ aidyly, aguely warâ. <sup>6</sup> Âduaymo xina atay xina aitobyry ara amidâmo. Kywymâry Jesus aito ara amidâmo lâpylâ iwâgâ âyanmo xina nhegatudo.

Xina aguely mâindatuomo, Jesus meinwândâmo. Jesus iduery modo toenzepa akaladâdâmo, inagazedâmo warâ, mâinwândylymogue. Deus Ispiritury olâ omazeândâmo.

<sup>7</sup> Akaemo Macedônia eynynonro modo, Acaia eynynonro modo warâ Jesus einwânni modo, Deus ize ato ara lelâ amidylymo nutumo. Tiuntuduomo, amitomo ara lâpylâ adâidye awylymo. “Tessalônica donro modo ara aguine” kelymo.

<sup>8</sup> Iwague endaylâ wâne ielu ipyru idadyly myara taypanro modoram amitomobypy âjidaholy; Macedônia donro modo, Acaia donro modo alâkulâ inkâba idani. Tâinkâ lelâba

\* <sup>1:1</sup> Silvano, Silas ezekeho lâpylâ.

Jesus einwândyly mânimopa mawylymo egary âjidaholy. Tainwânse lelâlâ mawylymo; egary lakuru indasezeguylymo. Awylygue ani âwâgâmo xina aguepa awyly, idânârâ igarymo âjidahoybyem awylygue. <sup>9</sup> Tâinkâ lelâba igarymo tâjidahoze. Warâ inanry aguelymo: “Jesus wâgâ Tessalonicaram agueze mydâdaymo, tonlo modo amyguelymo tydasemo ani. Tydeusrymo segueto, tuhuguento warâ neinwâmpyra tâisemo ani. Deus iguedânrâ aguehobypy ara lelâ iwerâ aidylymo, mâkâ Deus tokaleom. <sup>10</sup> Tutuzemo, Deus imery Jesus odopâniem awyly. Mâkâ nhenuenguylymo” warâ inanry âwâgâmo aguelymo. Jesus iguewâm, Deus olâ kurâem ietonmâ. Deus xurâ keba modo agâ kydâsenagazebyra kitoem, kâmakeinlâ awâkâ Jesus.

## 2

### *Deus xurâem Paulo Tessalonicadâ ewanopyry*

<sup>1</sup> Cristo eynynâ ypemugudo, tutuzelâ âmaemo, Tessalonicadâ xina Jesus xunârý nhegatudo, toenzepa kurâdo Jesus nheinwântobyry. <sup>2</sup> Âyanmo taindyly iraynâ, târâ xidadâ imâsedo Filiposdâ xina âsenagazebypy, tutuzelâ âmaemo Jesus wâgâ xina agueduo, xina nenagazedâmo. Xina nunâguedâmo. Inakanhe kehoem ani xinaram aguelymo warâ. Toenzepa kurâ domodo Jesus wâgâ xina aguepa itoem anyguemo wâne. Xirâ unâ wâgâ xina aguepa nipyra olâ, Deus “Egatuwâdaunda” kehobypy awylygue. Mâkâlâ mawânkâ ani xina eon-honru xuduim, tyanepa kehoem xina aguehoem. <sup>3</sup> Kewâdyly kulâ mâkeba xirâ xina âyanmo agueho. Jesus wâgâ xina kewâdyly kulâ nitaymba âyanmo. Âdinherurumo tienmakehoem kulâ inkâba xina Jesus wâgâ aguelymo. <sup>4</sup> Deus: “Aguewâtaunda” kehobrylâ xina aguezesedo. “Jesus wâgâ aguelymo ise urâem iwanumo” kehobrylâma xina. Aguehobypy adyese xina awyly tiuntulygue arâ aguelymo. “Deus ize ato aguykenre, kurâdo tindadyse ato mâkeba. Mâkâlâ mawânkâ kunârâ âdara awyly xuturim kuru. Jesus xunârý aguykeho tutuzelâ mâkâ” tâkeze inanry xina.

<sup>5</sup> Âdinherurumo tienmakehoem kulâ, inokuzemo kulâ warâ inkâba xina agâmo koendâ awyly, xina xunâgoengu warâ. Xinaram koendonro modo mâunduhomoem kulâ xina inomedâdaymbamo keankâ Jesus wâgâ. Awârâ tutuzelâ âmaemo, tutuzelâ lâpylâ Deus. <sup>6</sup> Tohoguedoem inkâba xina Jesus wâgâ aguelymo, xina mâen-hoguedomoem inkâba, kurâdoram tâzehogueohoem inkâba warâ. <sup>7</sup> “Cristo ingonotyby tawylygue, xina xyrentaungâ; xina aguehobypy ara aitaungâ warâ” keim tâise xina. Âdykâ olâ xina arâ aguepa âyanmo. Tâjise tymeombyry sawirim ara ani xina âduaymo tatay. <sup>8</sup> Âwynedâmo inanry xina. Awylygue âmaemoem unâ iwâkuru Deus aguehobypy xina tiengatudyze awyly. Tâwâlâ lelâlâ wâne xina âdyoly; alâ olâ Kâmakerim Jesus wâgâ xina âyanmo adâkedyze awyly. <sup>9</sup> Xirâ tânanâguezelâ âmaemo, Cristo eynynâ ypemugudo. Deus, “Egatuwâdaunda” kehobypy unâ tiengatuday, toenzepa xina nâsewani peto oday, kopae alelâ, ipa tato tianâtoem. Âdinherurumo ewy xina nekadaymba ani âduaymo tatay.

<sup>10</sup> Atârâ tatay, Deus ize ato arâ lelâ ani xina aidyly. Agâmo xina atay, pymâ domodo ezewenry xina neinwândâ. Aguehomo ara lelâ ani xina aidyly. Ânguyram alâ kulâ xina nâzewentâowâbyra. Âmaemo Jesus einwânni modo tutuzelâ âmaemo atârâ xina aitobyry. Xina aidyly nedâ lâpylâ Deus, xina aguelymo idânârâ nidadâ warâ. <sup>11</sup> Tâjiunwym wâne tymeom nhedyly myara nhedâmo, tutuzelâ âmaemo. <sup>12</sup> Tuomareba mataymo, xinalâ ani omazeââimo, âurunimo warâ, Deus ize ato lelâ amânhetomoem. Xurâem mitomoem, âgâsedâmo. Mâkâlâ âwymârymoem tâitoem âgâsenimo, târâ eydâ atodâ tagâ tohoguezeinhe tynrenseinhe warâ mitomoem.

### *Jesus nheinwândylymogue Tessalônica donro modo enagazebypy*

<sup>13</sup> Warâ inanry Deusram xina aguely: “Koendonro âmâ, Tessalônica donro modoram Jesus wâgâ xina aguely mâindanehon-hobyry wâgâ, mâinwânehon-hobyry wâgâ warâ” xina kely.

Deus aguehobyrlyâ xina xunâry awyly meinwândâmo. Mutumo, tyangahu odano kulâ keba xina agueho awyly. Deus wâgâlâ ani xina aguely. Idanipyryem, Jesus meinwândâmo. Deuslâ ani mâinwântomoem aienehoim. Iweloem âedylymo, âmaemo Jesus einwânni modo, imâem ize ato ara amitomoem, mâinwântomoem warâ. <sup>14</sup> Cristo eynynâ ypemugudo, âpemugudomolâ ani inagazenimo. Âizepamo ani Jesus einwânnipyryem mawylymogue. Adâise lâpylâ myani Judeiadâ ipemugudomoanlâ myani târâ Deus xurâ modo âzenagazeoly lâpylâ, Cristo Jesus einwânnipyryem awylymogue.

<sup>15</sup> Judéia donro modo idamudo, Deus xunâry egatuwâni modo xyâwânmomy. Iwerâem kulâ judeu domodo Kywymâry Jesus nyâen-homo. Iwerâ xina tânagazezemolâ inanry. Jesus unâry xina tiengatudyze atodâ xina nhejikelymo. Deus ize ato araba akaemo aidyly! Idânârâ Cristo einwânni modo iduery akaemo! <sup>16</sup> Judeu keba modoram Jesus wâgâ tâdâsemagueho xina nhegatudyzebamo. Awylygue toenzepa inakai modo anhesezedylomo, Deus tânagazedo nhondylymo warâ. Toenzepa ise xypyry etay âzenagazeolymo.

### *Paulo Tessalônica donro modoram tâtâondye itobyry*

<sup>17</sup> Iweâpa xina agâmopa awyly, Cristo eynynâ ypemugudo. Agâmopa lelâlâ wâne xina, alâ olâ inanry xina inanâguelymo. Toenzepa xina âyanmo tâtâondye awyly!

<sup>18</sup> Nhentondyzemo xina. Urâ Paulo udâondye widâ. Satanás olâ iekuâdâdâ. <sup>19</sup> Pymâ Jesus odopâduo, xina agâlâ ise âmaemo mâkâ enado. “Tessalônica donro asaemo. Eagâmo âwâgâ xina agueday, âinwândâ asaemo. Tâzenagazeoly umelâ âinwândâmo” keze xina Jesusram. Aituo ise xinaram aguely: “Iemary koendonro âmaemo” kely. Xina aguehobry wâgâ olâ mâinwândylymo, âkelo anano modo Jesus nheinwândylymo lâpylâ warâ. Adaimpâni wâne tâpywado tienmakeduo tuomazeze, myara xina iomazely Jesus tâinwâñse mawylymo tiuntuduo, tâpywado tienmakely-ro waunlo ara kehoem. <sup>20</sup> Toenzepa lelâlâ xina adawily, xina iomaru warâ, Jesus mâinwântomobyry wâgâ. Pymâ Jesus enadoram idâypyem, “Âinwânipyry modo asaemo, âwâgâ xina agueduo” keze xina.

## 3

<sup>1</sup> Igarymo nidapyra tawyly xina nemaemba keankâ. Awylygue xina âseinwândyly: “Urâ, Silas warâ tarâlâ ise xina Atenasdâlâ. <sup>2</sup> Timóteo ise Tessalonicaram idânri-ro warâ” uguely. Awylygue xina ingonodyly. Cristo eynynâ kypemugulâ mawânkâ koendâ Deus xurâem tâwaneim. Xina agâ nâsewani, unâ iwâkuru Jesus wâgâ egatulyem. Omazeâñzemo keankâ xina ingonodyly, Jesus einwândyly mâinmopa mitomoem. Jesus wâgâ imâem inomedâzemo xina ingonodyly. <sup>3</sup> Jesus izepaom modoram mâzenagazeolymogue âtywambyra mitomoem omazeâñzemo. Tutzelâ âmaemo, Jesus einwânni modo tânagazezeim awyly. Kydâsenomedâdoem, kieinwântoem warâ Deus nhutuybylâ myani awârâ.

<sup>4</sup> Agâmo tatay, xina âurudâmo: “Jesus kieinwândylygue âzenagazeoze kydaze” xina nygue. Arâ lelâlâ aidyly. <sup>5</sup> Igarymo kâindapyra wawyly kâenmaemba wakynre. Awylygue keankâ Timóteo kâingonodyly, Jesus tâinwânselâ mawylymo kâuntuhoem. Toenzepa keankâ iekuâdâdylymo. Aituo keankâ kâpaunzedly: “Diabu keanje Tessalônica donro modo tâsenagazedylygue Jesus einwândyly inmohomoem anieneho? Imâem iduaymo kâsewani, Cristo wâgâ eyanmo aguelyem. Âdyem nitaymbaka keankâ Jesus wâgâ kâenomedâdomobyry? Iewanopyry âdyem nipyra kawânrâ keankâ” uguely yangahu oday.

<sup>6</sup> Iweâ kulâ keankâ Tessalônica dâba odopâdyly. Âwâgâmo agueduo, toenzepa xina nohomaendâ. “Toenzepa Tessalônica donro modo Jesus nheinwândyly. Âjigue tâpynezemo. Inanâgueduomo, tuomazezemomy inanry. Nhedysemo myinanry warâ” nygue Timóteo. Toenzepa xina mâendye mawylymo; arâ lâpylâ nhedysemo xina awyly. <sup>7</sup> Arâ lâpylâ

tarâ Jesus xurâ keba modoram xina adakaladâoly, xina âzenagazeoly warâ. Jesus einwândyly mânompâ mawylymo tiuntuduo olâ xina iomaru kuru, Cristo eynynâ ype-mugudo. <sup>8</sup> Kywymâry Jesus ize ato aralâ amisezedylymo awyly tiuntuduo, âwâgâmo xina nâseguâdâbyra iwerâ. Tâwâneim kua ityby ara xina. <sup>9</sup> Awylygue Deus agâ xina aguely iwerâ: “Toenzepa xina iomaru, Tessalônicâ donro âynynonro modo xurâem amitobyry wâgâ. Jesus einwândyly nimopa awylymogue xina iomaru. Âdatâkeho xina nutuba toenzepa tuomarugue” xina kely Deusram âwâgâmo. <sup>10</sup> Izedymo wâgâ xina aguepa nipyra inanry, Deus agâ adâkeday. Alâ inanry xina Deusram nhekadyly, peto oday, kopae alelâ: “Pabai, Tessalonicaram xina idâontoem aietongâ. Tâlâ âwâgâ nhutudânyromo. Toenzepa myarâ tâtâdyze xina awyly, imâem âwâgâ enomedâzemo” tâkeze inanry xina.

<sup>11</sup> “Âynynonro modo enomedâze Tessalonicaram xina idâhoem aienehonwâdaungâ” tâkeze inanry xina Kunwym Deusram, Kywymâry Jesusram warâ. <sup>12</sup> “Tessalônicâ donro âynynonro modo âjigue tâpynezemo. Âynynâbaom modo tywynezemo lâpylâ warâ. Âjigue koendâ âpynedomoem, âkelo modo inwynedoem warâ aiekâ. Toenzepa xina akaemo inwynedo ara, arâ lâpylâ idânârâ kurâ domodo niwynedâmo. <sup>13</sup> Eon-hondâgâmo, tâsenagazedu kulâ âinwândyly nimopa itomoem, âynynâbanro modo ara nipyra itomoem. Aituo ise âdy wâgâ tâwentâguezebamo awyly Deus enado, idânârâ âynynonro modo agâ modopâduo” xina kely inanry Kywymâry Jesusram.

## 4

### *Deus ize ato ara lelâ adâjito*

<sup>1-2</sup> Agâmo tatay xina inomedâdâmolâ âdara Deus ize ato aguiendyly wâgâ. Arâlâ amidylymo-ro warâ, Cristo eynynâ ypmugudo. Iwerâ kâenkaguylâ lâpylâ olâ, Deus ize ato ara amidylymo mânompâ mawylymo, ize ato ara lelâ amânhedylymo warâ. Tutuzelâ âmaemo saguhoem xina âurutomobyry, Deus ize ato ara amitomoem. Alâ inanry xina âyanmo aguely, Kywymâry Jesus “Aguewâtaunda” kehobyry. <sup>3</sup> Enanâgueze urâ âmaemoem Deus aguehobyry. Deus xurâ lelâlâ mawylymo enehoim lelâ aietaungâ. Uguondo modo, âwydymo lelâ xynanâdaungâ. Pekodo modo, osomo lelâ âynanâdâmo. <sup>4</sup> Deus ize ato ara lelâ âwydymo agâ itaungâ. Koendâ eagâ itaungâ, xyrrentaungâ warâ. <sup>5</sup> Jesus eynynonro keba modo Deus nutuwâbyramo. Tâwâlâ nâjimanâbyramo. Tâdâgudyse idylymo-ro watay, âdaunlo agâlâ aidylymo. Akaemo aito arabâ aitaungâ. <sup>6</sup> Âpemugumo Jesus einwânni iwydy, âkelo iwydy warâ kâdynanâdaundâ. Eagonro uguondo iwydy xynanâni-ro watay, emagaguylâ mâkâ aunlo. Kywypado kulâ awârâ arâ adâjidyly. Tywydy lelâ xynanâdâny toenzepa ise Kywymâry Jesusram âzenagazeoly. Adâkezelâ ani urâ saguhoem. Augueondly xirâ ton-honre kehoem.

<sup>7</sup> Deus kuduakely izepa ato aguentoem inkâba, turâem lelâ kyize tawylygue. Kydogüin-hobyry keba kulâ kiynanâdyzeba mâkâ. Turâ modo aito ara lelâ aguidyse awyly. <sup>8</sup> Xirâ enomedâdo Deuslâ keankâ âurutomoem aguenri. Awylygue xirâ kâenomedâdo tyeinwândysebaom modo urâ kulâ mâkeba nheinwântânyromo, Deuslâ. Deus Ispiritury âdaunloenlâ inakai anientaymba. Deuslâ, Tyispiritury âyanmo igononi, inomerymo xuduze, Deus monhomazeândomoem.

<sup>9</sup> Deuslâ keankâ inomedââimo âmaemo Cristo eynynâ âjipemugu modo, âjigue mâynedomoem. Aituo xirâ wâgâ augueompyra ise urâ. <sup>10</sup> Idânârâ Macedônâia eynynonro Jesus einwânni modo agâ koendâ lelâ mawylymo, tutuze urâ. Awylygue “Alâ aisezedâungâ” uguely, Cristo eynynâ ypmugudo. <sup>11</sup> Tâjiewiâsezeba, tâtuebazeba warâ itaungâ, agonromo kâdunâguedaundâ warâ. Koendâ lelâ itaungâ. Deus amânhedysemo ato lelâ aietaungâ, âdygue tâtynanâzeba itaungâ. Tynepa itaungâ. Âsewaniwâdaungâ olâ âpynirymo, itymo owogonromo, âdy ize matomo warâpe mitomoem. Warâma keankâ

xina âurudylymo, agâmo tatay. <sup>12</sup> Arâ lelâ amisezedylymo-ro watay, âwâgâmo koendâagueze Jesus eynynâbaom modo: “Etaungâ asaemo Jesus einwânni modo. Typynirymo, tâty tywogonro warâpe tâitoem âsewanirim asaemo. Koendonro asaemo” kezemo. Ize matomobe lelâ ise âmaemo; ânguyram tâkaremba ise âmaemo warâ.

### *Kywymâry Jesus odopâdo*

<sup>13</sup> Jesus einwânni modo igueduo âdaidylymo awyly xina mâuntudyzemo ato. Awylygue aekuru tytyremba itaungâ, Jesus einwântânry modo araba. Iguewâtyby modo kurâem itonze awyly neinwâmpyramo. Awylygue toenzepa âjityendylymo. Cristo eynynâ ype-mugudo, kurâ Jesus einwânni modo olâ arâpa awyly, tutuze kurâ. <sup>14</sup> Jesus iguehobypy. Deus olâ akâwâm kurâem tyetonze. Awylygue idânârâ Jesus einwânni modo igueduo, kurâem itonzemo awyly kiuntuly, Jesus odopâduo, eagâ isemo warâ.

<sup>15</sup> Kywymâry Jesus xinaram nhutuen-hoymbylâ xina âyanmo agueho. Odopâduo, idânârâ xurâ modo ara, idâze lelâ kurâ kaynâ, eagâ oxioze. Âjigue ise einwânni modo kytâwâdyly, igueypy modo, iguedânry modo alelâ. Iguedânry modo waunroenlâ kytâwâbyra ise kurâ. <sup>16</sup> Warâ ise aidyly. Deasdâpa ise Kywymâry Jesus xytâguyly. Pymâ tâgareim saindyly wâne myara ise Jesus saindyly. Idânârâ turâ modo âtâdyguyhoem agueze. Anju domodo iwymâry ise kygâseni. Deus tytrombetary idyen-honze, Jesus odopâdyly awyly xutuhoem. Jesus einwânni iguewâtyby modo ise saguhoem kuru kurâem itoni. <sup>17</sup> Ilâpygueduo ise kurâ iguedânry modo on-hoam kidyly eagâmo, kurâ Jesus einwânni modo. Eunu duay ise kydadaholy, Kywymâry Jesus agâ oxioze, aunloenlâ eagâ kitoem. Eagâpa kitaymba ise kurâ. <sup>18</sup> Awylygue Jesus einwânni igueduo, âtynrumo kuru tâiseba itaungâ. Jesus odopâduo, eagâ itonze kydawyly, tutuzema kurâ. Xirâgue agonromo iomazeândaungâ, egamiwâdaungâ warâ.

## 5

### *Pymâ Jesus odopâdyly tynwânwânselâ kine*

<sup>1</sup> Cristo eynynâ ypmugudo, âdy aini wâgâ, âdara aidyly wâgâ warâ auguepa ise urâ. Ânguy âdara mâtâ odopâdyly awyly nutuwâbyra. <sup>2</sup> Ânguy tynwânwândyly umeba ise odopâdyly, tutuzelâ âmaemo. Âtâ odo inwânwândyly umeba wâne tâmagazeim kopae âewyly myara mawânkâ ise odopâdyly. <sup>3</sup> Warâ ise Jesus einwântânry modo aguely: “Idânârâ koendâ lelâ tarâ. Ânguy nâseguâdâbyra, takalagueba, nâsenagazebyra warâ” kezemo. Arâ aguelymo ume ise Jesus odopâdyly. Inakanhe aitomobyry wâgâ enagazezemo. Imery egasehoem pekodo idâhu ewâmadly watay, ewânuque nâsemaguewâbyra, myara ise Jesus eynynâbaom modo âsemagueho nudupa awyly.

<sup>4</sup> Cristo eynynâ ypmugudo, tutuzelâ âmaemo Jesus odopâniem awyly, iamu oday adakobâni emyenro keba mawylymogue. Odopâdyly tânuenzelâ âmaemo. Awylygue inanaynmolâ mawylymo. Tânanano wâne tâmagazeim saintuo tânanaym lelâ-ro myara ise inanaynmo mawylymo, Jesus odopâduo. <sup>5</sup> Peto oday adakobâni modo emyenro kurâ, Jesus xurâ kydawylygue, âkealâ iwâgâ tutuze kydawylygue warâ. Kopae adakobâni modo emyenro mâtâba kurâ, ize ato ara aini kydawylygue, Kywymâry Jesus odopâdyly tynwânwânselâ kydawylygue warâ. <sup>6</sup> Xykywâni modo arapa kine, xykydânry modo ara, âdy aini awyly kiuntuhoem. <sup>7</sup> Kopae xykywâni emyenro, toku ikano emyenro warâ mawânkâ Jesus einwântânry modo. Jesus odopâdyly nenuendaymbamo.

<sup>8</sup> Kurâ peto oday adakobâni modo emyenro olâ tânuenzelâ kine. Tâwâlâ kydâjimanâne, Deus ize ato aiedyly kinmopa kitoem. Sodadu wâne tuhohu xuahuho metalgueto tyese, tuduery ipy tyâpa itoem, myara Jesus kyzeinwânselâ, kagonro kyjiwynene warâ, Satanás amaymba kydâsemaguehoem, inakanhe kyeze keduo. Sodadu wâne tyangahu xuahuru metalgueto tyese, myara Jesus kyzeinwâne. <sup>9</sup> Kywymâry Jesus Cristo kieinwândylygue kydâsemaguehoem myakâwândy Deus kuduakely, kydâsenagazedoem

inkâba. <sup>10</sup> Kâmakeze akâwâm Cristo iguely, aunloenlâ eagâ kitoem. Odopâduo, eagâpa kitaymba ise kurâ igueypyem, kyiguepa alelâ. <sup>11</sup> Awylygue, âjigue âzeon-hondâdaungâ, ago kuru Jesus mânwântomoem. Âjigue tâturuzelâ itaungâ, Deus ize ato ara amitomoem. Arâlâ amidylymo awyly, tutuze urâ.

### *Paulo Tessalônica donro modo nhurutobyry*

<sup>12</sup> Eagonro lâpylâ âurutomo, Cristo eynynâ ypemugudo. Tessalonicadâ Jesus einwânni modo iwymârydo xyrentaungâ. Kywymâry Jesus induakeybylâ akaemo âwymârymoem. Jesus wâgâ inomedâdylymo, âurudylymo warâ, imâem Jesus mânwântomoem. <sup>13</sup> Xyrentaungâmo, iwynedaungâmo warâ, âmaemoem anhekylymo wâgâ. Âwymârymo kâdunâguedaundâ. Koendâ lelâ itaungâ agonromo agâ.

<sup>14</sup> Warâ lâpylâ âyanmo auguely. Tâsewanidyzebanro modo xurutaungâ: “Tynepa itaungâ, âsewanize, ize matomobe mitomoem” kewâtaungâ tâsewanidyzebanro modoram. Jesus einwândyly imoze kewâni modo xurutaungâ, Jesus einwândyly nimopa itomoem. Imâemba kulâ Jesus wâgâ einwânni modo eon-honwanâdaungâ, imâem nheinwântomoem; tâmawyadâzeim modo emawyadâdaungâ. Ânguy kâdynedaundâ; idânârâ emaenwâdaungâ, âdamyguepamolâ. <sup>15</sup> Inagazenimo kâzenagazaundâ. Koendâ lelâ idânârâ etaungâ, Jesus einwânni modo, einwântâny modo alelâ.

<sup>16</sup> Tuomare lelâ itaungâ. <sup>17</sup> Deus agâ amyguepa tâiseba itaungâ. <sup>18</sup> Deusram aguewâtaungâ: “Deus, koendonro âmâ” kewâtaungâ, âmaemoem koendâ atay, koendâpa atay alelâ. Arâ amyguelymo mawânkâ Deus ize ato, Cristo Jesus eynynonro mawylymogue.

<sup>19</sup> Deus Ispiritury anhekyly kâzkuâdaundâ. <sup>20</sup> Deus wâgâ ânguylâ aguely mâyindadylymo-ro watay, izepa tâiseba itaungâ. <sup>21</sup> Iwantaguedaungâ, sapâigrewâdaungâ warâ lakuru, aguehobypyry âkealâ, âkealâba warâ awyly mâtuhomoem. Deus eynynâ aguely-ro watay, idataungâ, einwântaungâ warâ. <sup>22</sup> Inakanhe kulâ agueduomo olâ kâzeinwântaundâ. Ânguy inakanhe kulâ kâdurutaundâ lâpylâ warâ.

<sup>23</sup> Warâ inanry Deus agâ âwâgâmo auguely: “Deus, âmâlâ inanry xina takalagueba itoem aienehonrim. Tessalônica donro modo koendâ lelâ itomoem aiekâ, ara itomoem. Eagâmolâ ikâ, inakanhe nâpaunzebyra itomoem, inakanhe anipyra itomoem, âdygue tâwentâzeba itomoem, Pymâ Jesus Cristo odopâduo” tâkeze winase Deusram. <sup>24</sup> “Aiese urâ” tâkehobypyry aieni tawylygue adâkehobypyry aralâ ise aidyly agâmo. Turâem myakâwândy âduakelymo.

<sup>25</sup> Cristo eynynâ ypemugudo, xina eynynâ adâkezelâ itaungâ Deusram.

<sup>26</sup> Tohonuguze âsedenguwâdaungâ, Cristo eynynâ âjipemugu mawylymo mânenehon-homoem\*.

<sup>27</sup> Kywymâry Jesus “Aguekâ” kehobypyry wâgâ arâ auguely âyanmo: “Idânârâ âmaemo Tessalônica donro Jesus einwânni modo xirâ pape itainly idataungâne” uguely. Xirâ kâinweniby idânârâ mâtududyzemo kuru wato.

### *Kywymâry nhesemo*

<sup>28</sup> Kywymâry Jesus Cristoram koendâ mâzehohomoem kâenkadyly.

Alâ kulâ ise âyanmo kâinwenily.

Paulo

---

\* <sup>5:26</sup> Saguhoem tohonuguze âsedengulymo. Iwerâma tâpymogoynze tâdâsedenguly.

## 2 TESSALONICENSES

### Paulo Kata Azagâ Ieto Inweniby Tessalônica Donro Modoram

Xirâ kata wâgâ inwenily Paulo nhangahu odaji iemâmy Deus. Awylygue Deus itaumbrylâ xirâ Paulo inweniby. Saguho kata Paulo eyanmo inweniby, tienmakebygueduomo, Tessalônica donro modo koendâ nutubamo myakâwândy Kywymâry Jesus Cristo odopâdyly wâgâ. Tâlâ myakâwândy “Jesus nodopâdâ” keim. Tâlâ pylâ, “Inepa ise Jesus odopâdyly” keim. Arâ tunâgugue, âpa ezay tâwanu modo inmolymo. Âkelomo ipi ezanobyrygue, âkelomo nhepywadybygue warâ kulâ myakâwândy âwinduadylymo. Aituo Paulo xirâ kata inwenily, koendâ Jesus odopâdyly wâgâ tienomedâdomoem. Xirâ kata wâgâ wakeho tytainze kurâ: “Tâsewanidyzebaom ipyniry tuduzepa nidâ” kely.

Jesus odopâdyly iray, toenzepa ise inakanhe tadalafil, Deus eynynâba itaynzemo warâ, kely tytainze kurâ xirâ kata wâgâ. Xirâ kata itainrim modo Jesus einwândyly nimopa itomoem adâkeze Paulo, iozepaongue kulâ enomedâdo neinwâmpyra itomoem warâ.

#### *Aguely adaguho*

<sup>1</sup> Urâ Paulo xirâ âyanmo iweninri. Âmaemo Tessalonicadâ alâ Jesus wâgâ agueze, ehogueze, iomaenze warâ âtâdyguynri modoram xirâ kâinweniondyly. Kunwym Deus, Kywymâry Jesus warâ eynynonroma kurâ. Xirâ kâinweniday tarâ yagâlâ asaemo Silas\*, Timóteo warâ.

<sup>2</sup> Âynynâmo Kunwym Deusram, Kywymâry Jesus Cristoram warâ xina nhekadyly, koendâ mâzehohomoem, akaladânímo peba mitomoem warâ.

#### *Jesus odopâduo, tynynâbaom modo enagazeze*

<sup>3</sup> Deus agâ adâkeday, inanânehombamo inanry xina. “Ize mato lelâ Tessalonicadâ âynynonro modo anhekyly, Pabai. Awylygue xina iomaru. Toenzepa âjigue âpynezezedlymo, saguhobypy takaze kehoem lâpylâ âinwândylymo warâ” xina kely inanry Deusram. Cristo eynynâ ypemugudo, xina arâ aguely, âkealâ awylygue. <sup>4</sup> Tadawize inanry xina âwâgâmo agueze, âkelo anano modo Jesus wâgâ ehogueze âtâdyguynri modoram: “Tessalônica donro modo agâ tuomare xina. Tâsenagazedyly tâmaenzemo, Jesus einwândyly olâ nimopamo. Deuslâ tâeniem ize atomo iwerâ” tâkeze inanry xina âwâgâmo.

<sup>5</sup> Xypyry etay adâkehobypy ara ise Deus aguyedyly; awârâ meinwândâmo. Awylygue keankâ mâsenagazedylymo mâenmaenlymo. Deus adâkehobypy adyele lelâlâ awylylâ mâenehonlymo. Awylygue ise Deus, kurâdo idânârâ iwymâryem ituo, “Tessalonicadâ ynynonro modo yagâlâ ise” kely. Warâ ise Deus anhekyly. Koendonroam, koendonrolâ nhuduly. Inakanhe aini-am, inakailâ nhuduly warâ. <sup>6</sup> Ioze lelâ aieni Deus; awylygue ise inagazenimo nhenagazedyly lâpylâ. <sup>7</sup> Deusdâpa Jesus âetuo ise kydâsenagazedyly adainly. Tyanjury ton-honruneim modo agâ ise âewyly. <sup>8</sup> Peto iatygu ara tohore kehoem ise mâkâ odopâdyly. Deus tiuntudyzeba, Jesus wâgâ unâ iwâkuru modo tindadyseba waunlo modo enagazeze. <sup>9</sup> “Ton-honreim âmâ, Jesus, tynrenseim warâ” eynynonro modo keday, typygueba ise âsenagazedylymo; pymâem atodâbamo ise. <sup>10</sup> Kywymâry Jesus odopâduo, xyrense, ehogueze warâ kurâ, eynynonro kydawlygue. “Koendonro âmâ, Jesus, ton-honreim warâ. Âyrentâ xina” kykely ise eyam. Xina agâlâ ise târâ Deus eydâ atodâ mawylymo, Jesus xunâry xina nhegatuyby, einwânnipyryem mawylymogue.

<sup>11</sup> Awylygue inanry Deusram âwâgâmo xina aguepa nipyra awyly: “Pabai Deus, xina nhekadyly, Tessalônica donro modo ize mato ara lelâ aitomoem, xypyry etay,

\* <sup>1:1</sup> Silvano, Silas ezekeho lâpylâ.

‘Ynynonro asaemo’ myguehoem. Jesus einwânni tawylygue, koendonro adiendysemo ato anhetomoem eon-honrumo xudugâ” xina kely inanry. <sup>12</sup> Koendâ lelâ amidylymo tientuo, kurâ domodo wakezemo: “Koendonro awâkâ Jesus Cristo. Aguehobyry ara lelâ mawânkâ eynynonro modo aidyly” kezemo. Warâ lâpylâ ise Deus aguely: “Urâem, koendonro akaemo Tessalônicâ donro modo” keze. Arâ Deus aguely ise, Kunwym Deus, Kywymâry Jesus Cristo warâ koendonroem agâmo awylygue.

## 2

### *Uguondo ânguyo kulâ âepanâgueze, Jesus odopâdy iraynâ*

<sup>1</sup> Xina âurudâmolâ Kywymâry Jesus Cristo odopâdyly wâgâ, idânârâ kurâ Jesus einwânni modo eagâ kydâtâdyguyl wâgâ warâ. Koendâ xirâ âurutomobypy xutuwâdaungâ. <sup>2</sup> Idânârâ kurâ domodo xutuze Kywymâry Jesus odopâdyly. Awylygue tadahulizeba itaungâ, ânguylâ “Kywymâry Jesus nodopâdâ” keduo. “Deus Ispiritury Pauloram Jesus odopâdybyem awyly nutuen-ho” myguehonlymo watay, kâzeinwântaundâ. “‘Kywymâry Jesus nodopâdâ’ nygue Paulo” kely ânguylâ watay, kâzeinwântaundâ. Ânguylâ, “Paulo igatary ‘Kywymâry Jesus nodopâdâ’ keho xina nemake” keduo, kâzeinwântaundâ warâ. Kewâdylymo kulâ ise.

<sup>3</sup> Etaungâne. Ânguylam tâzenokuozebane itaungâ. Tâinkâ lelâba ise Deusgue tywymâgu izepao mode. Deus nyrempyramo, neinwâmpyramo warâ ise. Awârâ aidyly ume, uguondo ânguyo kulâ âepanâgueze. Deus iduery ise mâkâ. Kaudyly iraynâlâ myakâwândy Deus mâkâ wâgâ aguely: “Aunloenlâ ise mâkâ uguondo ânguyo kulâ tâdâsenagazedoam kâingonodyly” kewândymy Deus. <sup>4</sup> Xirâ onro anaym tatay, toenzepa ise Deus nhewiâsedly. Idânârâ Deus xurâ mode, ize ato mode idueryem lâpylâ ise mâkâ. “Urâ lelâ yrentaungâ” keze. “Idânârâ takaze ton-honreim urâ” keze. Deus ety Jerusalém donro odaji egawâns. Pymâ ton-honreim xurery wâgâ ise târâ ekadyly. “Idânârâ onro anano mode iwymâryem urâ” keze. “Urâ lelâ Deus kuru” keze. Kewâdyly kulâ olâ ise.

<sup>5</sup> Agâmo watay, Jesus odopâdyly iraynâ âdara aidyly wâgâ auguelâ âyanmo. Enanâguewâdaungâ xirâ wâgâ âyanmo auguehobyry. <sup>6</sup> Tutuzelâ âmaemo awârâ anipyra itoem sainlânehondânybe awyly. Awylygue mâkâ uguondo ânguyo kulâ nâepanâgueba awyly wao. Tâepanâgueho odaji ituolâ ise mâkâ âepanâguely. <sup>7</sup> Uguondo ânguyo kulâ nâepanâgueba lelâlâ wâne, toenzepa olâ xirâ onro anaym inakai mode aidyly. Toenzepa lelâlâ ise inakai mode aidyly, uguondo ânguyo kulâ sainlânehondâny xirâ onro anaymba idyly-ro watay. <sup>8</sup> Sainlânehondâny xirâ onro anaymba ituo lelâ ise mâkâ uguondo ânguyo kulâ âepanâguely.

Âepanâguehobyry iweâpa nipyralâ ise Kywymâry Jesus odopâdyly, eon-honru etyze. Pymâem lelâlâ ise Jesus odopâdyly, mâkâ eon-honru etyze. ÂBU tâkelygue kulâ ise Jesus mâkâ eon-honru nhetyly.

<sup>9</sup> Ton-honru nadainhopa awyly ara ise mâkâ uguondo ânguyo kulâ aisezedly. Satanás eon-honrugue ise adyesenry mode kehoem, iwâkuru modo warâ anhedyly. Etaynrim modo iomazeze, anhekyly modo tientuo. Koendonro modo ara ise anhekyly. Anhedyly eni modo âzenokuozemo. Aituo ise tyangahu oday aguelymo: “Etaungâ. Deus eon-honruguelâ awâkâ adyesenry modo anhedyly” kezemo. <sup>10</sup> Jesus eynynâbaom modo âzenokuozemo, arâ aidyly tiendylygue. “Koendonro merâ. Koendâ merâ aidyly” kezemo. Akaemolâ ise tâwâlâ âturim tâdâsenagazedoam tâtâhomoem. Jesus wâgâ unâ aguenri nehoguebyramo, tindadysebamo warâ. Einwânnipyrymoen-ro watay, tynynâ ienimopyryem tâise Deus. <sup>11</sup> Jesus wâgâ unâ iozeno lelâ neinwâmpyra awylymogue ise Deus mâkâ uguondo ânguyo kulâ xunâry nheinwânehonly. Awylygue ise unâ tonokudo idânârâ nheinwândylymo-ro warâ. <sup>12</sup> Aituo ise Deus aguely: “Jesus wâgâ unâ iozeno

tyeinwândysebaom modo ydâ izepa ise urâ. Tâdâsenagazedoanlâ ise idâlymo, inakanhe adâidylâ mawânkâ ize atomo kuru” kely ise.

### *Deus induakeby modo âsemagueze*

<sup>13</sup> Cristo eynynâ ypemugudo, Kywymâry Jesus toenzepa inwyneuguyly âmaemo. Awylygue aunlolâ Deusram “Koendonro âmâ,” xina kely, koendonro âmaemoem anhetyby wâgâ. Kaudyly iraynâlâ myakâwândy mâkâ âduakelymo, xurâem mitomoem, Tyispiriturygue imakehomoe, ize ato ara lelâ amitomoem warâ. Unâ iozeno Jesus Cristo wâgâ mâinwântuomo, mâsemaguehomoe âduakelymo. <sup>14</sup> Jesus wâgâ unâ iwâkuru xina nhegatuduo, meinwândâmo. Awylygue ise xypyry etay Kywymâry Jesus Cristo ehoguedodâ, xyrentodâ warâ mawylymo lâpylâ. <sup>15</sup> Deus xurâem mawylymogue, tonhonre kehoem Jesus einwântaungâ. Agâmo tatay, xina inomedâdâmo, Deus ize ato ara amitomoem. Ilâpygueduo, âyanmo kata xina niweni, nigonodâ warâ xirâ modo wâgâ aguenri. Awylygue olâ inomedâdomobyry ara lelâ aitaungâ, xina kely.

<sup>16-17</sup> Kunwym Deus toenzepa kywynedyly. Kagâ koendonro tawylygue ise kon-hondâdyly, kieinwândyly kinmopa kitoem. Aunloenlâ ise eagâ kydawly warâ. Kywymâry Jesus Cristoram, Kunwym Deusram warâ omazeândoemoem ize ato lelâ amânhetomoem, mâinwânsedomoem, ohonwanâdomoem, koendonro amânhesedomoem, koendonro lelâ amyguezesedomoem warâ xina nhekadyly.

## 3

### *Xinaem Deusram ekadaungâ*

<sup>1</sup> Cristo eynynâ ypemugudo, kâympygueândoem wauguely olâ. Xinaem wao Deusram ekadaungâ. “Paulo domodo agâ ikâ. Inepa kehoem Kywymâry Jesus wâgâ mâtâ anakâ lelâba xutuen-hongâ. Mâtâ wâgâ aguelymo idataynrim modoram inepa xutuen-hongâ, einwânehongâ warâ, xina Jesus aguehobyr koendâ kehoem nhutuhobyr ara. <sup>2</sup> Toenzepa âunâry einwântâny modo, Jesus unâry egatuwâni modo xyâze kewâni modo. Paulo domodo olâ wao egâ, asaemo Deus iduery modoram nâzenagazeoba itomoem” kewâtaungâ wao Deusram.

<sup>3</sup> Adâkehobyr aieni lelâlâ mawânkâ Kywymâry Jesus. Awylygue ise aunlolâ on-honwanâdâmolâ awyly mâkâ mâinwânsedomoem. Satanás amaymba aunlolâ imakezemo mâkâ, Deus aguehobyr mankadomoem aienehonze keduo. <sup>4</sup> Kywymâry Jesus ize ato ara amidyse mawylymo xinaram nutuen-ho. Tutuze xina, Kywymâry Jesus tâinwânsedomoem, âurutomobyry ara lelâ amidylymo warâ.

<sup>5</sup> Warâ âynynâmo Kywymâry Jesusram xina nhekadyly: “Tessalonicadâ âynynnonro modo âwynedyly nimopa nidâmo, Jesus. Aunlolâ âwynedâmo. Tarâ onro anaym matay, toenzepa mâsenagazedyly memaenwân, Kunwym Deus mâinwâmpyra mipyra makâwâm. Âynynnonro modo tâsenagazedyly nhemaen-homoem, âinwândyly nimopa itomoem warâ eon-honrumo xudugâ” xina kely inanry eyam.

### *Âsewaniwâdaungâ, tâwâlâ mâzetomoem*

<sup>6</sup> Kywymâry Jesus Cristo aguehobyr ara xirâ âyanmo auguely. Âduaymo tyneim modope watay, eataen-hoemba itaungâ. Jesus tâinwânsemo lelâlâ wâne, tyneinmo kulâ olâ. Arâpama keankâ inomedâdylymo. Mâsewanihomoem keankâ inomedâdylymo, âynomoemba; tâwâlâ mâzedlymo mâuntuhomoem keankâ xina inomedâdylymo.

<sup>7</sup> Tynuneba ani xina atârâ tatay, toenzepa xina nâsewani. Awylygue xina âsewanihobyr ara âsewaniwâdaungâ. <sup>8</sup> Âdylâ tyam xuduupy tâpywaze lelâ ani xina. Peto oday, kopae alelâ ani awâtârâ xina ewanu, ânguy tâbyguepa kulâ xinaram âdy nudupa itoem. <sup>9</sup> “Xina ipyniry âunduwâtaungâ, Jesus inomedâzemo ingonotyby xina” xina kepa olâ âyanmo. Tâbyguepalâ âdydo imeom emakerim wâne tâise xina, arâ xina anipyra olâ ani. Toenzepa

ani xina âsewanily, “Paulo domodo ara kydâsewaninre” myguehomoem. <sup>10</sup> Awâtârâ tatay warâ ani xina aguely âyanmo: “Tâsewanidyzebaom ipyniry kâduduwâtaundâ, tâdâsewanily nhutuhoem” xina kely ani.

<sup>11</sup> Arâ xina âyanmo aguely olâ; tâsewanidyzebanro modope âduaymo awyly, tutuzema ani xina, nâsewanibamo. Âkelomo ewanu nhakaladâdylymo kulâ. <sup>12</sup> Kywymâry Jesus Cristo xunâry wâgâ xirâ auguely tynuneim modoram: “Agonromo ewanu kadakaladâdaundâ. Mâzetomoem âsewaniwâdaungâ, ize matomobe mitomoem” uguelly. <sup>13</sup> Âyanmo olâ warâ auguely: “Cristo eynynâ ypemugudo, koendâ amisezedylymo kâjimowâdaundâ” uguelly.

<sup>14</sup> Jesus einwânni modo ewy xirâ kata wâgâ âurutomobyry ara adâidysebaom modope watay, ânguy aunlo awyly xutuwâdaungâ, eataen-hoembâ itaungâ warâ, âpybazedomoem lâpylâ. Tâpybazeduo, tâjityenduo warâ, koendâpa adâitobyry modo imozemo lâwâne keanra. <sup>15</sup> Âduerymo arapa olâ etaungâmo-ro warâ. Xurutaungâmo, âukonomo mâunrutomo ara, uguelly âyanmo.

### *Paulo adâkely nhypygueândo*

<sup>16</sup> Warâ inanry âwâgâmo auguely Kywymâry Jesusram: “Âmâlâ inanry xina takalagueba itoem aienehonrim. Tessalonicadâ âynynonro modo koendâ itomoem aiekâ, tynynâ inakanhe atay, koendâ atay alelâ” uguelly inanry.

<sup>17</sup> Urâ Paulolâ xirâ âyanmo iweninri, idaenkurinmo warâ. Urâlâ xirâ wâgâ iezyed iweninri. Iemaryguelâ xirâ idaenkuhomo kâinwenily. Iezewenrylâ inanry kata modo kâinweniby xypyrydâ iezyed kâinwenily.

### *Jesus nhesemo*

<sup>18</sup> Kywymâry Jesus Cristoram koendâ mâzehohomoem kâenkadyly.

Alâ kulâ ise âyanmo kâinwenily.

Paulo

## 1 TIMÓTEO

### Paulo Saguho Kata Inweniby Timóteoram

Xirâ kata wâgâ inwenily Paulo nhangahu odaji iemâmy Deus. Awlygue Deus itaumbrylâ xirâ Paulo inweniby. Paulo eataen-ho myakâwândy Timóteo. Judéia donro myakâwândy Timóteo ise, Jesus einwânni, nhunwym pylâ gregu-ro warâ. Toenzepa Paulo tâmawyadâze myakâwândy Timóteo, Jesus xunâry âji iwaguenodâ nhegatuday. Efesodâ myakâwândy Timóteo âxiânlý, târâ Jesus einwânni modo iwymâryem, iwâgâ imâem nhenomedâdomoem, Jesus wâgâ iozepa kulâ unâ egatuwâni modo agueho niwan-taguebyra itomoem aguehoem warâ.

Xirâ kata wâgâ kiuntuly âdaunlo Jesus einwânni modo iwymâry (“pastor”) awyly, emawyadâni (“diácono”) warâ. Xirâ kata wâgâ lâpylâ, tytainze kurâ, pypâ modo Jesus einwânni edyly wâgâ. Mârâ ume agaityom modo, aripido modo warâ iduadyly epywado peba myakâwândy. Warâ myakâwândy Paulo aguely: “Pypâ typemugüemba watay, Cristo eynynonro modolâ mâkâ eni, xuani warâ” kely.

#### *Aguely adaguho*

<sup>1</sup> Urâ Paulo xirâ kata iweninri. Kâmakeim Deus, Cristo Jesus warâ Jesus xunâry egatuze ugonodylymo. Jesus kurâem anhetyby wâgâ mawânrâ Deus, “Xuduze urâ” kehobyry emakeze kydawyly kinwânwândyly. <sup>2</sup> Xirâ âyam kâinwenily, Timóteo, Jesus mâinwântobyry wâgâ ymery ara kâenkyly mawylygue.

Âynynâ Kunwym Deusram, Kywymâry Cristo Jesusram warâ kâenkadyly, koendâ mâzehohoem, âtyendâlâ itoem, akaladâni peba itoem warâ.

#### *Iozepa kulâ enomedâdo kinwantaguebyra kine*

<sup>3</sup> “Efesodâlâ âxiângâ” tâkeze ani urâ âyam, Macedônia yan-yam udâday. Awârâ xidadâ oday tâlâ iozepa kulâ Jesus wâgâ enomedâni modo. Awlygue atârâlâ âize wawyly, iozepa kulâ anhekylymo, aguehomo warâ amânhenehomba mitoem. <sup>4</sup> “Agaityom modo unâ nhegatuyby wâgâ kulâ tâtynanâzeba itaungâ. ‘Uguondo tynrenseimbyry imeryem, iwyrem warâ wawylygue, tynrenseim urâ’ tâkezeba itaungâ” kekâ awârâ modo wâgâ kulâ âtynanâni modoram. Unâ inakai nhaunâdyly kulâ awârâ modo. Deus wâgâ koendâ kiuntuho, kieinwânto warâ nhakaladâdyly kulâ warâ. <sup>5</sup> Atârâ Efesodâ Jesus einwânni modo âjigue kulâ nâtuebabrya itomoem amyguedyse wawyly. Âjigue âpynedylymo ize wato. Kyangahu oday kunâry tywykeba, kydâpynedyly lelâ, Jesus kieinwândyly lelâ warâ-ro watay, âdy wâgâ kâwentâdo lâpeba kurâ.

<sup>6</sup> Tâlâ mawânkâ Deus itaumbryy âkealonro einwândyly imoimbyry modo. Jesus wâgâ kewâdyly kulâ nhenomedâguylymo. Anwa iozeno imyim emyenro akaemo. Tienomedâdomolâ tutuzeim kuru waunlo ara, enanajimo, Deus aguehobyry takaze. Unâ âdyem itânry wâgâ aguely ize atomo kuru. <sup>7</sup> Deus itaumbryy iweniby enomedâniem wâne akaemo ize awyly, awârâ koendâ nutubamo olâ, adâkehôlâ, enomedâze tâkewâdo warâlâ koendâ nutubamo lâpylâ olâ.

<sup>8</sup> Koendonro lelâlâ awârâ tâzezewenry Moisés inweniby, âdy Deus ize ato, izepa ato warâ awyly kiuntuhoem, awârâ kiuntulygueba olâ ise kydâsemaguely. <sup>9</sup> Xirâ kyzenanâguentre, Deus tâzewenry inwenien-honly ioze lelâ aini modo xurutoem inkâba, iozepa aini modo xurutomoem. Deus agueho einwântâny modo, pymâdo agueho einwântâny modo; inakanhe aini modo; Deus xyrentâny modo, Deus itaumbryy einwântâny modo; tunwyndo xyâim modo; kyârim modo; <sup>10</sup> eagâ tohogüin-hobyry keba kulâ xynanâni modo; uguondo, uguondo warâ âtynanâni modo, pekodo, pekodo

warâ âtynanâni modo; kurâ nhawâdyly, nhoendyly toenzepa dinheru nhekadyly timohoem waunlo modo; konokuni modo; juiz, polícia warâ agâ âkealâba kulâ aguewâni modo, idânârâ Deus aiedyseba ato aieni modo warâ xurutoem myakâwândy tâzezewenry inwenien-honly. <sup>11</sup> Âdara kâmakely, âdara aguidyly warâ mawânrâ kâengatuhoem Deus aguehobyry. Xirâ unâ koendonro Deusdâpalâ âewyly. Koendonro, ton-honreim, tohoguezeim warâ Deus.

### *Deus koendâ lelâ Paulo agâ atobyry*

<sup>12</sup> Aunlolâ inanry Kywymâry Cristo Jesusram auguely: “Koendonro lelâlâ âmâ, amyguehobyry agânhetoem won-honru mâunduhobyry wâgâ” uguelly. Auguely lâpylâ inanry. “Aiese ugonotobyry aieniem wawyly, tutuze mawylygue myakâwâm, uduakely imaryem witoem” uguelly eyam.

<sup>13</sup> Jesus kâinwândyly iraynâ, inakanhe kulâ kâinane Jesus wâgâ auguely. Jesus eynynonro modo tyâwâse kâinane urâ. Toenzepa kâinane eagâmo yewiâky, tâwentâguezemo, tapioguzemo warâ winane; inakanhe iwâgâmo adâkeze warâ. Jesus kâinwâmpyra wawylygue akâwâm âdawidly awyly kâuntuba wawyly. Deus ize ato aralâ awidly uguewâdylygue, Jesus xurâ modo kâenagazedly. Arâlâ olâ Deus ytyendâ, iedâ warâ, saguhoem inakanhe kulâ aitybyem wawyly umelâ.

<sup>14</sup> Koendonro lelâlâ Kywymâry Jesus tytyenzein-emba, tâmakezein-emba warâ wawyly umelâ, kâinwântoem eynynonro modo kâinwynedoem warâ anieneho, Cristo Jesuslâ arâ tâinwânni modo aitoem aienehonrim. <sup>15</sup> Deus izepa ato aieni modo emakeze Cristo Jesus xirâ onro anaxi âewyly. Âkealâ xirâ, ton-honre lelâ idânârâ kyzeinwâne. Âkealâ awyly tutuze urâ, iemakewâm mawânkâ, urâ eagonro modo takaze kehoem inakanhe aityby.

<sup>16</sup> Aunloopyry wawylygue lakuru olâ Deus ienagazebyra awyly; tângazezeinhe wawyly umelâ iedyly. Inakanhe aguidyly watay, kytyendâ Deus; Cristo Jesus kieinwândyly tynwânwânse. Awârâ tienehon-hoem mawânkâ akâwâm Deus koendâ yagâ awyly. Deus ytyenmâ, iemakewâm warâ, idânârâ Jesus einwânni modo tytyenze tawyly tienehon-hoem. Tâwâlâ wâne ise toenzepa Deus izepa ato aienibyryem awylymo, agânhetobyry ara, kâinwântobyry ara nheinwântuomo olâ âzemakeozemo. <sup>17</sup> Tynrenseim, ton-honreim, tywâkureim warâ Deus. Kywymâry kaynonro mawânkâ. Aunlolâ awâkâ tâlâ awyly; adaguho peba, xypyry peba warâ; aunloenlâ pymâem awyly. Igueim mâkeba awâkâ, tâenseim keba warâ. Deus tokaleom lelâlâ awâkâ, ânguy emyenro lâpeba. Arâlâ ise.

<sup>18</sup> Ymery ara kâenkyly âmâ, Timóteo. Awylygue iozepa kulâ unâ egatuwâni modo mâempagunâdoem âyam auguely. Deus itaumbypyry egatuwâni modo âyam aguehobyry enanâguegâ: “Deus induakeyby âmâ tâmaryem” kehomobyry. Aguehomobyry mâenanâgueley-ro watay, ozohondâze âmâ, iozepa kulâ unâ egatuwâni modo aguely mâempagunâdoem. <sup>19</sup> Jesus einwândyly kâjimowâdaundâ. Tywykeba angahumo oday âunârymo nidâ. Tâlâ mawânkâ tuoday tutzelâ âdy adyesenry warâ awyly xurâem. Alâ olâ adyesenry anhedyly waunlo. Pepi xytyyby wâne paru myenraym tuzase, myara awâkâ aunlo Jesus nheinwândyly xuzadly. <sup>20</sup> Himeneu, Alexandre warâ mawânkâ Jesus einwândyly imowânbiry modo. Satanásram tâgamezemo olâ ani urâ, Deus wâgâ inakanhe kulâ adâkely awyly nhutuhomoem.

## 2

### *Deus agâ aguykehoem kurutobyry*

<sup>1</sup> Jesus einwânni modo Deus agâ aguely olâ mâtâ kuru. Idânârâ kurâ domodo eynynâ Deusram ekadaungâ. Ipa atomo Deus nhuduhoem ekadaungâ. Âzechohoem, âduahuohomoem warâ ekadaungâ. Âdara awylymo umelâ Deus eagâmo itoem ekadaungâ. “Koendonro âmâ” Deus kewâtaungâ, xurâmoem koendâ aitobyry wâgâ, koendonro modo nhuduhoem warâ. <sup>2</sup> Idânârâ pymâ domodo eynynâ Deusram ekadaungâ, itymo

anaym pymâ xurâem, idânârâ âtâ anary iwymârydo modo eynynâ lâpylâ warâ. Koendâ kywymâryem awylymo-ro watay, tâdâtuebadly peba, tywaunsezeim peba warâ ise kurâ. Deus ize ato aiese lelâ kurâ, kagonro agâ Deus ize ato ara koendâ lelâ ise kurâ warâ. <sup>3</sup> Kâmakerim Deus, eagâ aguykeduo, tuomazeze. <sup>4</sup> Mâkâ wâgâ âkealonro idânârâ kiuntudyze Deus; idânârâ Jesus nheinwândyse mâkâ âsemaguehomoe.

<sup>5</sup> Tokalelâ Deus; tokalelâ Deus agâ kyeni kydâsemaguehoem aienehonrim, uguondo Cristo Jesus lelâ. <sup>6</sup> Jesus iguely myakâwâm, iwâgâ idânârâ kydâsemaguehoem, kieinwândyly-ro watay. Deus aguehobyry odaylâ tyiguely awyly tienehon-hoem myakâwâm iguely, Deus idânârâ kydâsemaguedyze awyly xutuhoem warâ. <sup>7</sup> Deuslâ myakâwâm unâ iwâkuru, judeu keba modoram kâengatuhoem agueim, unâ âkealonrogue kâenomedâdomoem warâ. Âkealâ auguely, uguewâdyly kulâ mâkeba.

<sup>8</sup> Jesus einwânni modo âtâdyguyhodâ, uguondo modo Deus agâ aguely ize wato. XYDYK itybyem, tâmary saunânibyryem warâ, kâzwenry ara, Deus ize ato aieni modo lelâ. Tyewiâtuneim modo, tagonro agâ âjitoguyim warâ olâ tâdâtâdyguyhodâ Deus agâ aguepa nidâmo.

### *Jesus einwânni pekodo modo xuruto*

<sup>9</sup> Warâ Jesus einwânni pekodo modo wâgâ auguely. Âtâ tagaraneim modogue, TÂM waunlo modogue, sodomo enehorim modogue uguondo modo âsewaniho modogue warâgue nâzetydâbyra nidâmo. Tâzekagâinday, koendâ kehoem tâzehohoem kulâ tyan-gahudu nhakuidaynly nipyra nidâmo. Tâpâgudâdyly-ro watay, toenzepa tâensedoguepa nâpagudâdâmo, ouruguento, tuhu imeimbyry tâwâenseim perolagueto, âtâ tâwâenseinguepa warâ. <sup>10</sup> Pekodo Jesus einwânni modo koendonro anhekyly wâgâ mawânkâ ise koendâ âzeholymo, âpâgudâdobyry wâgâpa.

<sup>11</sup> Jesus einwânni pekodo modo tâdâtâdyguyhodâ MYK alelâ nidadâmo, tâsenomedâdomoem. Uguondo tâdâtâdyguyho oday aguenri agueday MYK alelâ nidadâmo.

<sup>12</sup> Warâ âurutomo. Pekodo modo, uguondo modo nenomedâbyra, nurupyra warâ nidâ tâdâtâdyguyhodâ. Ekadybyenlâ MYK alelâ nidadâmo. <sup>13</sup> Pekodo uguondo modo iwymâryem nipyra nidâ, Adão mawânkâ Deus waunroem nhgatyby, ilâpyryem Eva warâ awylygue. <sup>14</sup> Adão mâkeba enokudyby; Eva mawânkâ Diaburam âzenokuorim, Deus eyanmo aguehobyry sakanybyry warâ. Awylygue mawânkâ pekodo uguondo modo iwymâryem nipyra awyly. <sup>15</sup> Imezezemo, âpyneânzemo warâ, Deus olâ esemo. Jesus nheinwândylymo, tagonrodo agâ âpynedylymo. Deus ize ato ara lelâ aidylymo, toenzepa tâensedo keba anhekylymo warâ watay, Deusram âzemakeozemo.

## 3

### *Jesus einwânni modo iwymâry (pastor) âdaunlo awyly xutuho*

<sup>1</sup> Âkealâ ise xirâ augueho. Jesus einwânni modo iwymâryem tâidysedo, âwanu koendonro lelâlâ awârâ ize atomo. <sup>2</sup> Jesus einwânni modo iwymâry âdalâ kulâ aini keba nidâ, ânguy âdakepa itoem iwâgâ. Tywyein-ro watay, tokalelâ iwydy nidâ. Tâwâlâ idânârâ adienkyly modo imanâni, tâwâlâ âjimanâni, ânguy âwankuem ietânry, âxigodo tâtydâ tâjítâze lelâ waunlo; enomedâdyly xutuim warâ nidâ. <sup>3</sup> Toku ikaji ini keba, alâ kulâ iewiâpani keba, tâdâjito guyly keim keba, tâdâpeândyly keim keba, tydinerugu, âdydo imeompe tawyly kulâ izetonro keba warâ nidâ. <sup>4</sup> Tâty odano modo koendâ nhedyly, nhurudyly waunlo nidâ; koendâ tymeombyry xuruni, sagâikerim warâ, âwankuem nâiehoba itomoem. <sup>5</sup> Tâty odano modolâ koendâ nepyra, nurupyra warâ watay, Jesus einwânni modo eniem, xuruniem warâ nitaymba lâpylâ.

<sup>6</sup> Iwelo Jesus einwânniem ityby watay, mâkâ keba Jesus einwânni modo iwymâry nidâ. Mâkâ pymâem idyly-ro watay, toenzepa ise mâkâ âtyrendyly, tagonro takaze. Arâ tyangahu oday xunâgu watay, Deusram âzenagazeoze, Deus takazenoem Diabu âdutuduo

aietobyry ara. <sup>7</sup> Jesus einwânni modo iwymâry anhekyly wâgâ koendâ nâzeho, Jesus xurâ keba modoram, xurâ modoram alelâ. Inakai anhedyly watay, Jesus xurâ keba modo inakanhe iwâgâ aguezemo lâpylâ. Diabu iwyndyry odaji ihugueylâ ise mâtâ. Jesus einwânni modo iwymâry Deus izepa ato anhedyly mawânkâ Diabu ize ato, Deus xurâem ewano âdyem nipyra itoem.

### *Jesus eynynonro modo iwymâry emawyadâni (diácono) âdaunlo awyly xutuho*

<sup>8</sup> Iwerâ âurudyly ise Jesus eynynonro modo iwymâry emawyadâni âdaunlo awyly wâgâ. Ton-honre lelâ âkeá lelâlâagueim nidâ warâ. Toku ikaji ini keba, tydinerugu, toenzepa âdype tawyly kulâ izetonro keba warâ nidâ. <sup>9</sup> Jesus einwânni lelâlâ, Deus itaumbyry xutuim lelâlâ warâ nidâ. Deus izepa ato adientuo, inepa Deusram adâitobyry nhygakehoem ekani nidâ. <sup>10</sup> Uguondo Jesus eynynonro modo iwymâry emawyadâniem tâidysedonrobe watay, waunroem âdaunloem awyly edyly wao. Idânârâ âdapa lelâ aidyly watayma tâwâlâ âjidiukeoly, awârâ âwanu anhetoem. <sup>11</sup> Jesus eynynonro modo iwymâry emawyadâni iwydy\*, âwankuem tyesem keba nidâ. Âdalâ kulâ agueândaynly waunlo keba nidâ; adienkyly wâgâ, adâkeho wâgâ warâ âjimanâni, âkeá lelâlâagueim warâ nidâ. <sup>12</sup> Jesus eynynonro modo iwymâry emawyadâniem iduakeyby tywyein-ro watay, tokalelâ iwydy nidâ. Tâty odano modo koendâ nhedyly, nhurudyly waunlo nidâ, tywydy, tymeom, tâmary modo warâ koendâ eni. <sup>13</sup> Jesus eynynonro iwymâry emawyadâni koendâ lelâ tâwanu aieni âwankuem tyetuneba ise Jesus einwânni modoram. Tyanepa ise Jesus tâinwânse tawyly wâgâ aguely. Waunlo mawânkâ Jesus eynynonro modo iwymâry emawyadâniem itoem tuduakezeim.

### *Unâ Jesus wâgâ agueim âkealonro*

<sup>14</sup> Inepa nhese udâdyse wawyly umelâ, âdara udâhoem nhuduly awyly kâuntuba urâ. Awlygue xirâ kata kâinweniby âyam kâingonodyly. <sup>15</sup> Tahuleba widyly-ro watay, xirâ kata wâgâlâ ise mâtuly, âdara Jesus einwânni modo aidyly awyly, Deus adaindâny xurâ modo. Âtâ enu wâneam nihugueba itoem esebydâni, mâtâ emyenro kurâ. Jesus einwânni modo kieinwândyly, âkeá lelâlâ Jesus wâgâ aguykely warâ watay, unâ âkealonro kiainhonwâbyra kurâ. <sup>16</sup> Imâem kieinwânyly Deus nhutuen-hoymby Jesus wâgâ âkealonro awyly. Xirâ mawânkâ nhutuen-honly:  
Jesus kurâem idyly; onro anaxi tâetoem.

Deus imerylâ Jesus awyly nhenehonly Deus Ispiritury,  
igueypyem awyly ume kurâem nhetondobry wâgâ.  
Anju domodoram eon-honru, ehogu warâ âzeholy.  
Mâtâ anakâ lelâba eynynonro modo iwâgâ aguelymo.  
Mâtâ anakâ lelâba iwâgâ aguely idanipyrry modoram toenzepa âzeinwân-honly.  
Deus ezaxilâ akâwâm adaholy, pymâem kuru itoem.

## 4

### *Jesus wâgâ iozepa kulâ unâ egatuwâni modo wâgâ agueho*

<sup>1</sup> Tutuzeinhelâ Deus Ispiritury aguely: “Xypyryam saindyly tutuze Jesus wâgâ unâ iozeno einwândyly imoim modope ise. Kadopâ modo konokuni nhenomedâdo kulâ ise nheinwânylymo” kely. <sup>2</sup> “Jesus eynynonro xina” tâkezemo wâne. Nhenomedâdomo âewyly olâ Diabudâ kulâ. Toenzepa tâdâsenogudyly kely tyangahu oday. Nâdutubamo mawânkâ, ferro tâdâpigueingue iaduântybymoen-ro waunlo ara. Awlygue tienomedâdo iozepa kulâ awyly nutuba awylymo. <sup>3</sup> “Jesus einwânni modo nohogüimba nidâ” kelymo. “Tâlâ podo tâsenry, pyni tâinzenry warâ” kelymo. Kewâdylymo kulâ olâ. Podo modo, pyni modo warâ Deus nhugudyly myakâwândy kypniryem, koduem warâ. Aituo,

\* **3:11** Gregüem, tâwâlâ diácono iwydy atay, diaconisa atay warâ.

Jesus einwânni kydawylygue, kydâwinduapyra kidyly kitaymba kurâ. “Koendonro âmâ, xina ipyniry mâundulygue” kykebygueduo, tâwâlâ âdaunlolâ podo, pyni warâgue kydâwinduadyly.

<sup>4</sup> Idânârâ Deus nhugutyby modo koendonro lelâ. Awylygue pyni tainzenry, podo tâsenry warâ peba awyly. Podo, pyni warâgue kydâwinduadyly iray, warâ Deusram aguykenre: “Pabai, koendonro âmâ, xirâ xinaram mâundulygue” kykenre. <sup>5</sup> “Idânârâ kâungutyby modo koendonro lelâ” tâkeze Deus. Awylygue, “Koendonro âmâ” eyam kykeduo, tâwâlâ kieinly lelâ.

### *Timóteo xurutobyry*

<sup>6</sup> Xirâ modogue Jesus einwânni modo mâunrudyly-ro watay, Cristo Jesus emary koendonro ise âmâ. Deus tainwânni modo anhedyse ato aiedyly kâjimo, nhenomedâdo einwândyly kâjimo warâ. Tutuze urâ, tainwânnse mawyly. Awylygue ise on-honru âduduoly Deus ize ato amânhetoem, kohonwandoem wâne kydâwinduadyly myara.

<sup>7</sup> Agaityom modo unâ nhegatuly inwantagueze kulâ tâiseba ikâ, Deus wâgâpa aguely watay. Unâ iamimeom iomazeândoem tâgatuzeim, kydâsemaguehoem nipyra mawânrâ. Ton-honroem adaimpâni ohoiwadyly wâne myara Deus ize ato lelâ amânhetoem aisezegâ, ton-honre lelâ Jesus mânwântoem.

<sup>8</sup> Xirâ onro anaym kydawyly ara kodo koendâ itoem, eon-honwadoem warâ kulâ kydohoiwadyly. Ton-honre kehoem Jesus kieinwântoem aguidyly olâ tywyneim kuru. Awârâ tywyneim kuru tarâ onro anaym kydawyly ume, tarâpa kituo alelâ. <sup>9</sup> Âkealâ xirâ konomedâdo aguely; kuoday ton-honre tainwânnseim lelâlâ xirâ. <sup>10</sup> Awylygue mawânrâ ton-honre kehoem kydâsewanily Jesus wâgâ kiengatuhoem. Aunlolâ mawânkâ Deus Iguedâny kâmakely; aunlolâ lâpylâ eagâ kitoem kadyly kinwânwândyly. Deus lelâ mawânkâ kâmakeim, Jesus einwântaynrim modo olâ tâmakein-ro warâ.

<sup>11</sup> Timóteo, inomedâdobyry ara, Jesus einwânni modo enomedâgâmo, xurukâmo warâ.

<sup>12</sup> Salokuzenomoem mawylygue kulâ âwankuem tâiehozeba ikâ. Âwâgâlâ enehongâ âdaunloem Jesus einwânni modo awyly. Koendonro wâgâ lelâ aguekâ, aiekâ warâ. Jesus einwânni modo iwynegâ, xurâmoem koendonro lelâ aiekâ warâ. Jesus mânwâmpyra tâiseba ikâ, iwâgâ iozeno keba kulâ kâzeinwândâ warâ. Ohogüimby keba mawylygue kulâ âdaunlo pekodo mâynanâdyly tâiseba ikâ. Arâ ise einwânni modo koendâ tadalafil nhutulymo.

<sup>13</sup> Yaindyly ara, Jesus einwânni modo âtâdyguyhodâ Deus itaumbyry tytainze ikâ, idânârâ indatomoem, nhutuhomoem warâ. Mâintaimby wâgâ eon-hondâgâmo, Jesus wâgâ tainwânnseingue enomedâgâmo warâ. <sup>14</sup> Jesus einwânni modo iwymârydo tâmary angahu onwa niedâ. “Deus inomery nudu, xurâem mitoem” xina nygue warâ. Awylygue iwerâ âyam auguely: “Deus amânhetoem iwanu nhuduypy aiedyly kâjimo” uguelly.

<sup>15</sup> Arâ lakuru aisezegâ. Awârâ aiedylylâ iwanu nidâ. Arâ ise idânârâ nhutulymo, Deus xurâem iwanu koendâ lelâ amânhekyly awyly. <sup>16</sup> Timóteo, koendâ amânhekyly xutugâ, Deus ize ato ara lelâ amitoem. Ioze lelâ Jesus wâgâ enomedâgâ. Arâ ise xypyry etay mâzemakeoly, amyguely idani modo Jesus einwânni modo âsemaguelymo warâ.

## 5

### *Âdara Jesus einwânni modo edyly kiuntuho*

<sup>1</sup> Timóteo, agaityom Deus izepa ato anhedyly-ro watay, kâzeudâ; koendâ eyam aguekâ; tyewiâseba, pabai myguehoam amygueho aralâ aguekâ. Salokuzenomo Deus izepa ato anhedyly-ro watay, âukono mâunruto aralâ xurukâ <sup>2</sup> Âze aralâ aripido egâ, nhaundudo aralâ âwynsaundo modo egâ warâ; Deus xurâem tywykeim eagâmo akâiedâ.

<sup>3</sup> Jesus einwânni modo xurukâ, pypâ modo typemugüenry nhemawyadâdomoem, pynigue, âtâ iwogonromogue, âdy ipa atomogue warâ. <sup>4</sup> Tymegue, tywegue warâ

pypâ watay olâ akaemolâ eni nidâ, Jesus einwânni modo keba. Awârâ mawânrâ Deus aguiendye ato. Kunwyndo agaityoem ituo kiendyly Deus ize ato, iamudoem kydawyly ume kâentomobyry ara.

<sup>5</sup> Tâlâ pylâ olâ pypâ modo mâkâ kulelânro; ânguy eni pebaom. Jesuslâ nheinwânkylomo, Deus tâendylâ nheinwânkylomo warâ. Deus agâ aguepa nipyramo. Peto oday, kopae alelâ Deus tâentoem nhekadylymo. Pypâ aunlo modo mawânkâ Jesus eynynonro modo nhekyl. <sup>6</sup> Tâlâ pylâ olâ pypâ modo Deus ize ato araba kulâ aini. Tohomaendyly kulâ ize atomo, Deus xurâem adâidyl keba. Niguepa wâne, Deus xurâem olâ igueypyem, eagâpa ietybyem awylygue. Aunlo modoma Jesus einwânni modoram tâensebam. <sup>7</sup> Timóteo, amyguehomo âurutobyry arâ Jesus einwânni modo xurukâ, ânguy inakanhe iwâgâmo aguepa itoem. <sup>8</sup> Tâty odaylâ typemugu Jesus einwânni koendâ etânry watay, Jesus einwântâny takaze mâkâ inakai anhedyly. Deus ize ato aiedyly inmolylâ mâkâ arâ aituo.

<sup>9</sup> Pypâ sessenta anu takazeom; tokalelâ tusoneimbyry tâenseim, <sup>10</sup> koendonroem lelâ âdutuoyby; koendâ lelâ tymeombyry enamanânbry; Jesus einwânni modo âkelo âjî anaymba âetyby modo koendâ lelâ ejitânbry, ihugoguerimbyry; âsenagazeni modo koendâ enipyry, nhonipyry warâ; koendonro aiedyly imodânrybyry warâ ise pypâ modo Jesus einwânni modoram tâentuneim modo.

<sup>11</sup> Pypâ sessenta anu âgânâyam tydadigueim modo keba tâenseim nidâ, aripi kebamo mawânkâ; ohogüin-onze kezemo. Tohogüin-onduo, Cristo xurâem adâidyl imozemo.

<sup>12</sup> Pypâ iduakeyby modo, “Cristo xurâem lelâ ise xina aidyly” tâkezemo mawânkâ. Agueypyem, ohogüin-ondlylomo-ro olâ watay, awârâ âwanu lelâ aieniem adâkehobryy nhakadylylâ. Awylygue ise ewentâguedyly. <sup>13</sup> Pypâ aripi keba âzemawyadâoly watay, toenzepa ise xynu; mâkâ etyam, mâkâ etyam alâ kulâ ise adakobâdyly, âkelomo xunâgueze. Unâ iwyku keduonroem ise, xutudyzeba tadato kehoem ise nhegatuly. <sup>14</sup> Awylygue, tâwâlâ pypâ aripi keba watay nohogüin-ondâ, âtâdâlâ tâwanu anhetoem, koendâ tuso, tymeombyry warâ nhetoem. Arâ ise kuduery modo kunâguebyra awyly kurâ Jesus einwânni modo. <sup>15</sup> Tâlâ mawânkâ pypâ modo ewy Deus ize ato aiedyly imoimbyry. Satanás ize ato anhekylymo iwerâ. Koendonro mâkeba awârâ.

<sup>16</sup> Warâ aguekâ pekodo modo Jesus eynynonro modoram: “Pypâgue typemugüeim âmaemo-ro watay, âmaemolâ etaungâmo. Pypâ typemugüenry modo lelâ mawânkâ Jesus einwânni modo nhekyl” kekâ.

<sup>17</sup> Iwerâ Jesus einwânni modo iwymâryo wâgâ ise auguely. Koendâ tâwano aieni modo koendâ lâpylâ nâzepywaomo, ipa tato nhanâtomobe itomoem. Jesus wâgâ unâ egatuim, Jesus wâgâ kieinwânkyl enomedâni warâ lakuru, imâem nâzepywaomo. <sup>18</sup> Arâ âurudylomo, warâ mawânkâ Moisésram Deus inwenien-hoymby: “Tapirâ kâjitagâjiwâdaundâ, trigu âekyguehoem nhakabely ume” kely. Mateus lâpylâ Jesus aguehobryy tywenize: “Tâwaneim tâzepywaoze lelâ nidâ” kely.

<sup>19</sup> Timóteo, tokalâ kurâam kulâ Jesus einwânni modo iwymâry âzewentâoly watay, mâkâ agueho kulâ kâjiwantaguedâ. Azagâ, azagâ tokalâ warâ ewentâni watayma akaemo agueho koendâ idakâ. <sup>20</sup> Mâkâ Jesus einwânni modo iwymâry Deus izepa ato aienibyryen-ro watay, kurâ domodo enanaynlâ eukâmo, eagonro pymâdo adienkyly wâgâ tyanelâ itomoem, “Inakai aguiendyly-ro watay, idânârâ enanaym ise kydâzeuholy” kehomoem.

<sup>21</sup> Timóteo, warâ âyam auguely, kâenkazezedly warâ. Âzekiba lelâ Jesus eynynonro modo egâ. Âduery tâwentâzeim watay, eukâ, tyewiâseba olâ-ro warâ. Ataen-ho tâwentâzeim watay, eukâ lâpylâ. Xirâ kâzenanâneho, Kunwym Deus, Cristo Jesus, anju domodo Deus xurâem aini warâ, amânhekyly tâensem, amygueho tydasemo warâ. <sup>22</sup> Jesus einwânni modo iwymâryo mâinduakely watay, tadalafilizeba ikâ. Waunroem âdaunlo awyly egâ wao. Idânârâ âdapa lelâ aidyly, aguely watayma tâwâlâ imary

nhangahumo onwa iekâ, Kywymâry Jesus emaryem awyly xutuhoem. Koendâ iwâgâmo mâmuntuba âmâ watay, Deus induakeyby keba kulâ iduakezemo âmâ. Awylygue Deus izepa ato anhedylymo-ro watay, âzewentâoze lâpylâ âmâ, mâinduakehobyry wâgâ. Âdy inakai akâiedâ. Tywykeba ikâ.

<sup>23</sup> Timóteo, âuwe oday tâwâmase mawyly, tutuze urâ. Awylygue, paru lelâba enygâ, uguely. Vinhu âdiempa âenygâ lâpylâ, âuwe ewânu ekadoem.

<sup>24</sup> Xirâ enanâguegâ. Tâlâ Deus izepa ato aieni inakanhe aito tâenseim. Idânârâ tâdutuoze âsenagazeze awyly anhetyby wâgâ. Tâlâ olâ mâkâ inakanhe aito tâensenry, tutuzenry warâ, ânguy nutuba ise-ro warâ, xypyry odaxi idyly ara. <sup>25</sup> Tâlâ lâpylâ Deus ize ato aieni koendâ aito tâenseim. Tâlâ lâpylâ mâkâ koendâ aidyly tâensenry, tutuzenry warâ. Âdalâ olâ koendonro awyly âdutuoze.

## 6

<sup>1</sup> Iwerâ kâinwenily tâbyguepa âsewanirim modo wâgâ. Timóteo, tâwanuneim Jesus einwânni modo, tywymâry âwankuem niepyra itomoem aguekâ, tylahureba tywymâry aguehobyry anhetomoem warâ. Arâ aidylymo watay, kieinwânykyly Deus wâgâ, Jesus wâgâ warâ ânguy inakanhe aguewâpyra ise. <sup>2</sup> Tâwanuneim modo Jesus einwânnigue tywymâguneim modoram warâ aguekâ: “Cristo eynynâ âpemugumo mâinwyneguyl xurâem iwanumo; awylygue lâkuru koendâ kuru xurâem âsewaniwâdaungâ, einwântaungâ, âwankuem kâietaudâ warâ” kekâ.

### *Jesus wâgâ iozepa kulâ unâ egatuwâni modo Deus ewanu takaladâze*

Timóteo, xirâ kâinweniby modogue Jesus einwânni modo enomedâgâmo, xurukâmo warâ, nhutuhomoem. <sup>3</sup> Tâlâ mawânkâ iozepa kulâ unâ egatuwâni modo kienomedâdo arapa kulâ agueim. Akaemo agueho olâ Kywymâry Jesus Cristo aguehobyry agâ, Deus itaumbyry egatuwâni modo agueho agâ warâ nâseinwâmbyra. Jesus wâgâ iozeno tonomedâzeim nhakaladâdyly kulâ. <sup>4</sup> Tâwâlâ tutuze âdutulymo. Koendâ Deus itaumbyry tiuntuly warâ wâne, enanajimo, âdy iwâgâ adâkeho awyly nutubamo olâ. Deus itaumbyry wâgâ tâdâjitolugy, tâdâtuebadly warâ kulâ ize atomo. Tâzewânu tâwinzenry ara awârâ. Ajigue tâsewâñizemo, tâtuebazemo, tâpyguezemo, nâseinwâmbyra tâisemo warâ. <sup>5</sup> Âjigue tâjihoguly nimopamo, tyangahugoenguenry âpaunzedly ara kulâ âpaunzedlymo. Âdy iozeno, âdy iozepao warâ awyly nutubamo. Iozepa kulâ aguelymo: Toenzepa âdype tâjitoem, toenzepa tâjidinherugoem warâ kulâ Jesus einwândyly, enanajimo.

<sup>6</sup> Tâlâ kydato wâgâ tuomare lelâlâ kurâ, imâem, imâemba warâ tâlâ kydawly umelâ. Kuomaru koendonro kuru olâ Deus ize ato aguiendylygue, tutuzema kurâ idânârâ ize kydato Deus xuduze awyly. <sup>7</sup> Âdy lâpeba kurâ kyazepygueduo; kyigueduo âdy kagâ kiampyra lâpylâ ise kurâ warâ. <sup>8</sup> Awylygue, typynigue kurâ, tâtyem kurâ kywogonrogue watay, kydadahuliba kine, ipa kydatogue. <sup>9</sup> Toenzepa âdype tâidysedo modo, ânguydo imeom wâne inra odaxi ihuguely, iguely warâ myara akaemo toenzepa lelâlâ âdype tâidysedo modo. Inakai kulâ adiendyse atomo. Tâwâlâ kulâ olâ inakanhe idylymo. Tyigueho nhuinlymo paru tâsanigueim ikaji tywârenry ihugueyby wâne tyense myara. <sup>10</sup> Nady kyârim iwindy ara awârâ toenzepa âdype tâjidyly idânârâ inakai modo iwindyem awyly. Awylygue akaemo toenzepa âdype tâidysedo modo Jesus einwândyly inmolymo. Tâwâlâ kulâ olâ tâsenagazedo nhuinlymo.

### *Paulo Timóteo nhurutobyry*

<sup>11</sup> Âmâ olâ, uguondo Deus xurâem aini mawylygue, awârâ inakai modo akâiedâ. Âsegamigâ Deus ize ato lelâ amânhetoem; Deus aguehobyry makabyra mitoem; toenzepa Jesus mâinwântoem; Jesus eynynonro modo mâinwynedoem; mâsenagazedyly mâenmaenhoem, Jesus einwândyly mâinmopalâ; eagonro modo âyam aguelygue tyewiâseba mitoem

warâ. <sup>12</sup> Tâgaseim ton-honre kehoem tâgatuze, tâbyry tienmakehoem, myara lâpylâ ton-honre ikâ, Jesus mânwânsezedoem, Deus ize ato amânhetoem warâ. Aunloenlâ eagâ mitoem aenehonze mâkâ. Idânârâ kurâdo enanaym, Jesus einwânniem itybyem mawyly adâkeze ani âmâ. Igâsedbyby âmâ xurâem, aunloenlâ eagâ mitoem.

<sup>13</sup> Deus ize ato aralâ Cristo Jesus aitobyry enanâguegâ. Pôncio Pilatos enado tawyly ume, ânguy tawyly wâgâ aguewânmy tyanepa kehoem. “Messias urâ Deus ingonotyby” kewâm, tyiguely iraynâ. Awylygue, Kunwym Deus idânârâ xuguni, imery Jesus Cristo warâ âyam kainwenily tânuagaenze awyly tutuze mawylygue, Deus aguehobryy aunlolâ aiekâ, Kywymâry Jesus odopâdyly ara. <sup>14</sup> Awylygue amânhetoem mâjiduakeohobryy “Aiekâ” uguely âyam. Kywymâry odopâdyly ara awârâ aiedyly kâjimo, ânguy iwentâbyra itoem. <sup>15</sup> Odopâdo odaji ituo, Deus, Jesus odopâdoem aienehonze.

Koendonro lelâlâ Deus, ton-honreim, tohoguezeim warâ.

Mâkâ kulelâ Kâeni kuru,

mâkâ takaze ânguy kâeni lâpeba.

Pymâ domodo iwymâry, kuturim modo xutuim warâ mâkâ.

<sup>16</sup> Mâkâ kulelâ iguedâny.

Iatygu, tohoreingue mâkâ enâmidybyem awyly.

Awylygue ânguy eyam iwaguepa naimpyra awyly.

Ânguy âdaunloenlâ Deus netaymba; ânguy nepyra ise-ro warâ.

Eyam aguykenre:

“Aunloenlâ Deus nâdyren-ho, nâzehogueo;

aunloenlâ ise pymâ kaynonroem awyly warâ” kykenre.

Arâlâ nidâ.

<sup>17</sup> Warâ aguekâ Cristo einwânni modo âdypeom modoram: “Sawoem tâiseba itaungâ. ‘Adykâ âdawitaymba ise urâ, âdypeom wawylygue’ tâkezeba itaungâ. Enanâguewâdaungâ, âdinherurumo, âsejigumo warâ inepa adainrim kulâ awyly; xirâ anano kulâ mawânrâ, aunloenlâ ini keba. Deus einwântaungâ kuru, agâmolâ itoem. Kyam tâwânnreim mâkeba Deus; mâkâlâ tâlâ kydato xudunri, kuomazehoem. <sup>18</sup> Koendonro lelâ aietaungâ. Âdypeom âmaemo watay, âdypebaom ipa ato mâunduhomoem âdinherurumo ewy nidâ. Tâwânnrempa itaungâ; tâlâ matomo eagonro agâ epajigâdaungâ” kekâ âdypeom modoram, Timóteo. <sup>19</sup> “Arâ ise koendonro modo amânhedylymo imâem isezedly, iwâkuru modo âmaemoem aienibyryem mawylymo warâ. Deus koendonro nhuduly emakeze âmaemo, aunloenlâ eagâ mitomoem” kekâ âdypeom modoram.

<sup>20</sup> Timóteo, unâ iozeno Jesus wâgâ egaturin-em, aguehoymbyem âmâ, âdylâ tâwâenseim kehoem âdalâ mânhenhomba mitoem xuduypy ara. Awylygue amygueday âdaunloenlâ kieinwânyly kâduguke. Tâlâ mawânkâ iozepa kulâ unâ egatuwâni modo. Deus xurâem tawyly, adâkezemo wâne, mâkâ keba olâ aguehomo; xirâ anano kulâ aguehomo. Tienomedâdomo “Deus wâgâ tutuzeim âkealonro xina” kelygue nhezetâdylymo, kewâdylymo kulâ olâ. <sup>21</sup> Toenzepa olâ aguehomo einwânni modo. Awylygue Jesus wâgâ unâ iozeno einwândyly inmolymo, mâkâ ânwa iozeno imyim ara.

*Deus nhesemo*

Deusram koendâ mâzehohomoem kâenkadyly.

Paulo

## 2 TIMÓTEO

### Paulo Kata Azagâ Ieto Inweniby Timóteoram

Xirâ kata wâgâ inwenily Paulo nhangahu odaji iemâmy Deus. Awylygue Deus itaumbrylâ xirâ Paulo inweniby. Kata azagâ ieto Paulo Timóteoram inweniby. Xirâ kata agueho Timóteo Jesus einwânni modo iwymâryem awyly ume ewanopyry wâgâ. Azagâ tokalâ warâ myakâwândy Paulo âwanu agueho, Timóteo tienomedâdoem. Sodadu tysejiguy âxiâymby modo wâgâ nâtynanâdaymba sodaduem tâitoem, arâ lâpylâ Timóteo nâseguâdâbyra nidâ âxiâymby modo wâgâ Jesus tienmawyadâdoem. Tâgaseim tâgatudoem agueho tâinwânse, tâgatudyly xypyryam kehoem, arâ lâpylâ Timóteo Deus aguehobryy aniendo, xypyryam kehoem. Tyzegueim, typi ezay tientâdybylâ nheinly, arâ lâpylâ Deus itaumbryy egatuim ize ato âduduoly aguely idataynrim modoranlâ. Xypyry etay aitaynrim modo wâgâ tytainze kurâ xirâ kata wâgâ. Toenzepa ise tâmagaduneim modo, konokuni modo, kyârim modo, Deus itaumbryy izepaom modo warâ, kely.

#### *Aguely adaguho*

<sup>1</sup> Urâ Paulo tywâgâ aguenriem Cristo Jesus ingonotyby xirâ kata iweninri. Deus adâkeze: “Cristo Jesus einwânni modo emakeze urâ; aunloenlâ ise yagâ awylymo warâ” tâkeze. Xirâ mawânrâ Deus kâengatudyze ato. Deuslâ xirâ kâengatuhoe yam agueim. <sup>2</sup> Xirâ âyam kâinwenily, Timóteo, Jesus mânwântobyry wâgâ ymery kâinwyneuguy ara kâenkyly mawylygue.

Aynynâ Kunwym Deusram, Kywymâry Cristo Jesusram warâ kâenkadyly, koendâ mâzehohoem, âtyendâlâ itoem, akaladâni peba itoem warâ.

#### *Tâdâturudo*

<sup>3</sup> Agânhekly modo Deus xurâem lelâ, ydamudo aitobyry ara. Deus xurâem iewanu ume âdalâ kulâ awipyra watobyry wâgâ koendâ lelâ yangahu oday. Peto oday, kopae warâ Deus agâ augueday, tuomare lelâ urâ, âmâem anhetaymby modo kâenanâgueduo. <sup>4</sup> Toenzepa nhetondyze wawyly. Toenzepa ywyneni mawyly tutuze urâ; kydâsededaenguday ogunropyry, tânanâgueze winase. Kydâzetondyly-ro watay, toenzepa lelâlâ ise womaru. <sup>5</sup> “Jesus tâinwânse urâ” myguely; âkealâ amyguely. Tâinwânse lelâlâ âmâ, awârâ tutuze urâ. Jesus mânwândyly iraynâlâ, âundu Lôide, âze Eunice warâlâ akâwâm Jesus einwânni. Awylyguelâ akaemo ara lâpylâ mânwândyly. <sup>6</sup> Awylygue lâpylâ angahu onwa iemary MÂ’ kânhetobyry mânenanâguedye wawyly, Deus indu-akebyem mawyly xutuhoem, on-honru xuduimpypyry xurâem amitoem. Awylygue Deus amânhedyse ato aiedyly kâjimo, peto tyatygue lelâ itoem tyatyguyze wâne kurâ, myara lâpylâ xurâem aisezegâ. <sup>7</sup> Deus Tyispiritury ingonotybylâ mawânkâ tyanepa kyenehorim. Jesus einwândyly kinmopa kitoem, kon-hondâdâ mâkâ, idânârâ kienmaen-hoem. Kagonro agâ kydâpynedoem adyenehonze. Koendâ kydâpaunzedo tyenehonze mâkâ, Deus ize ato lelâ aguentoem, kydâjimanâdoem warâ.

<sup>8</sup> Tywypazeba, tyanepa warâ Kywymâry Jesus wâgâ unâ egatugâ. Tarâ kadeia oday wawylygue, tâpybazezeba ikâ yataen-hoem mawylygue. Iwâgâ auguehobryy wâgâlâ tarâ wawyly. Xara lâpylâ xurâ keba modoram âzenagazeoze keanze âmâ. Mâzenagazeoduo olâ emaengâ lelâ; mâkâ xurâenlâma adâjidyly mânmpalâ mawyly; Deus mawânkâ ohondâze inagazedo modo mânmaen-hoem.

<sup>9</sup> Deus kâmakewâm, kygâsemâ warâ xurâem kitoem. Aguientaymby modo wâgâ inkâba kygâsedyly. Kygâsedyly, kâmakedyze tawylyguelâ, kagâ koendâ tâidye tawylyguelâ warâ. Adaguly iraynâlâ myakâwândy kâmakely wâgâ aguely: “Koendâ ise urâ kâingâsedaymby modo agâ” kely. <sup>10</sup> Iwerâ olâ kâmakerim Cristo Jesus xirâ onro anaxi âetobyry wâgâ

Deus koendonro awyly kiendyly. Jesus wâgâ unâ koendonro kieinwândylygue, tutuze kurâ, tâjiguelo eon-honru sainrimpyryem mâkâ awyly; tyanepa kine igueze. Kyigueduo, idâzema kurâ Deusram aunloenlâ eagâ kitoem; âdaunloenlâ eagâpa kipyra kitoem.

<sup>11</sup> Deus induakeybylâ urâ, Jesus wâgâ unâ koendonro kâengatuhom. Iwâgâ kieinwânkyl wâgâ kâenomedâdoem, auguehoem warâ. <sup>12</sup> Xirâ âwanu agânhedylygue mawânrâ kâzenagazeoly xurâ keba modoram. Arâlâ olâ, ytywambyra wawyly, koendâ tutuzema urâ mâkâ kâinwânkyl. Tâinwânse lelâlâ urâ, Deus ton-honreim lelâlâ awyly. Tytaumbyry ioze lelâ egatuhoem aienehonze mâkâ, xypyry etaji kehoem, xirâ unâ mawânkâ kâengatuhom aguehobyry. <sup>13</sup> Jesus wâgâ unâ iozeno auguely tydaselâ âmâ. Auguely mâindatybylâ mäenomedâdoem aguezesegâ. Mäenomedâdyly kâjimo. Jesus mâinwândyly imâem iesezegâ lakuru, Cristo eynynâ âpemugudo iwynegâ warâ. Mâkâ kieinwândylygue, kydâpynydylygue warâ mawânrâ, Cristo Jesus agâlâ kydawly, kagâlâ mâkâ awyly warâ kienehonly. <sup>14</sup> Kywymâry Deus Ispiritury eon-honwanâdybyem, xirâ unâ ioze lelâ egatuzezagâ; iozepa kulâ unâ egatuwâni modo xurukâmo lâpylâ warâ. Ioze lelâ unâ mäengatuhom Deus aguehobyry âmâ âdylâ tâwâenseim mäenkanâdoem nhânlly-ro waunlo ara.

<sup>15</sup> Ásia eynynâ Jesus einwânni modo ynynâ adâkedyzebam, iemakedyzebam warâ keankâ tyanumogue, até Fígeo, Hermógenes warâ, tutuzelâ âmâ. <sup>16</sup> Onesíforolâ olâ toenzepa womazeâni, won-hondâni warâ. Awylygue Kywymâry Jesusram: “Koendâ Onesíforo ety odano modo egâ” uguely. Etadâdybyem wawyly ume, ywypazedaymba keankâ mâkâ uguondo, <sup>17</sup> Xarâ Romaram taintuo, ui mâkâ, woенke lelâlâ warâ. <sup>18</sup> Tutuzelâ âmâ, koendâ kehoem idânrâ mâkâ urâem anhetyby Efesodâ wawyly ume. Kywymâry Jesus mâkâ koendâ nhedyly ise ize wato xypyry etay enadoram kydâepanâgueday.

## 2

### *Ton-honre lelâ unâ iozeno Jesus wâgâ kyzegatunre*

<sup>1</sup> Timóteo, ymery ara kâenkyly âmâ. Koendonro mawânkâ Cristo Jesus kagâ, inomery nhuduly ani, xurâem amitoem. Awylygue âzeon-hondâgâ awârâ on-honru nhuduypygue. <sup>2</sup> Tâzenanaym inomedâdobyrygue eagonro modo enomedâgâ, xirâ ioze lelâ agueim modo. Akaemo ise eagonro kurâdoram egatuin-ro warâ. Amyguely tindatybygue ise akaemo eagonro modo nhenomedâdylymo lâpylâ-ro warâ.

<sup>3</sup> Sodadu koendonro tâsenagazedyly tâmaenze, nâwiempyrâlâ, arâ lâpylâ Cristo Jesus eynynonroem mawylygue mâzenagazeoly watay mâsenagazedyly emaengâ; xurâem amidyly kâjimo. <sup>4</sup> Sodadu exército duano tywymâry ize ato ara lelâ adâidye awyly. Awylygue tywymâry keba kulâ aguely niwantaguebyra awyly. Sodaduem tâitoem tysejiguy âxiâymby modo wâgâ nâtynanâdaymba. Arâ lâpylâ aikâ, Kywymâry Jesus ize ato ara lelâ amitoem, xurâem mitoem mânhâympy modo wâgâ tâtynanâzeba ikâ. <sup>5</sup> Tâgaseim tâgatudoem turutobyry nhakadyly-ro watay, tâmakezeim nemakewâbyra. Awylygue âmâ lâpylâ, koendâ turâem aini modoram Deus nhuduly mäenmakehoem, koendâ lelâ aguehobyry aiekâ. <sup>6</sup> Tâwaneim ton-honre kehoem âpa ezay âsewaniby mawânkâ ewily ekaunâday, waunroem kuru emakerim. Arâ lâpylâ ton-honre âsewanigâ, Deus itaumbyry mäengatuhom, âyam nhuduly mäenmakehoem. <sup>7</sup> Kâinweniby wâgâ tunâgue ikâ angahu oday; Kywymâry Jesus mawânkâ idânrâ xirâ âyam xutuen-honze.

<sup>8</sup> Jesus Cristo Davi ipemugüem awyly wâgâ, ânguy awyly wâgâ warâ âpaunzegâ. Iguewâm lelâlâ, kurâem itonmâ olâ. Igueypyem inkâba mâkâ iwerâ. Mâkâ wâgâlâ unâ koendonro kâengatuly. <sup>9</sup> Kâengatuhobyry wâgâlâ kâsenagazedyly; kyâimpypy ara korentygue ekâjibyem wawyly. Arâlâ olâ, Deus itaumbyry âzegatuozedely; korentygue ekâjibyemba mawânrâ. <sup>10</sup> Awylygue kâsenagazedyly kâenmaenly, Deus induakewâdyby

modo Cristo Jesus nheinwândylygue âsemaguehomoem, tynrense kehoem mâkâ agâ aun-loenlâ itomoem, Jesus agâlâ âdyren-hon-homoem warâ.

<sup>11</sup> Cristo agâ kyiguely watay, eagâlâ ise tâlâ kydawly.

<sup>12</sup> Cristo xurâ keba modo kânagazenehon-ho kienmaenzezedly lelâ watay,  
eagâlâ ise pymâem kydawly.

“Cristo xurâ mâkeba urâ” kykely-ro watay,  
xypyry etay, “Urâ xurâ mâkeba âmaemo” keze lâpylâ mâkâ kyam.

<sup>13</sup> “Cristo xurâem aiese urâ” kykehobyry aguiempyra kurâ-ro watay,  
Cristo olâ “Aiese urâ” tâkehobyry aunlolâ adyese lelâ.

Adâkehobyry aniempyra itoem nuduwâpyra.

Âkeá lelâlâ ise xirâ; idânârâ kyzeinwâne.

### *Cristo xurâem kâwano*

<sup>14</sup> Timóteo, Jesus einwânni modo mânemedâday, ton-honre aguekâ: “Warâ âurudylymo. Tyewiâseba, tâjihoguzeba warâ itaungâ, Deus itaumbypyry egatuwâni modo aguely wâgâ kulâ. Koendâ inkâba mâtihogulymo; Jesus wâgâ unâ idani modo mankaladâdylymo kulâ. Deus ydatâ âyanmo auguely” kekâ eyanmo. <sup>15</sup> Tâpyneânze âdalâ Deus xurâem iwano aiekâ, iwanopyry wâgâ koendâ lelâ agâ itoem. Ioze lelâ unâ Jesus wâgâ enomedâgâ. Arâ ise koendâ tâwaneim tywymâry adientyby nhenuagaenday tywypazebaom ara mawyly. “Koendonro awârâ urâem amânhekyly” keze Deus âyam. <sup>16</sup> Âdy wâgâpa kulâ, Deus izepa ato wâgâ kulâ warâ âjihogulymo-ro watay, eagâmo tâjihoguzeba ikâ. Awârâ alâ kulâ aguewâdyly modo kadawâdâ; iwâkuru mâkeba awârâ. Deusdâ kurâdo iwague nhenehonly kulâ awârâ. <sup>17</sup> Pinuri inakai wâne MON tâise, kunru odakâ kain-hoem myara awârâ iozepa enomedâdo toenzepa kurâdoram âzeinwân-honly, Jesus einwândyly nhainly. Himeneu, Fileto warâ iozepa kulâ unâ egatuwâni modo ewy akaemo.

<sup>18</sup> Jesus wâgâ unâ iozeno agueim einwândyly imoimbyryem akaemo. Ânwa iozeno imyimbyry idu oday xuzatybyem adakobâni aramo. Warâ nhenomedâdylymo: “Xypyry etay, kâguepybyry kurâem nitondaymba ise, kâgadopyry lelâ ise. Batiza kituolâ mawânrâ ani kurâem kitondyly” kelymo. Kewâdylymo kulâ olâ. Iozeno kieinwânyly imoen-honze kulâ arâ aguelymo.

<sup>19</sup> Kurâ Jesus einwânni modo kuru olâ kinmopa; unâ iozeno Deus kyam nhutuen-hoymby tâinwânsema kurâ. Âtâ tâhugane kehoem itâdyby wâne nihugueba, myara lâpylâ unâ iozeno Jesus wâgâ kieinwândyly watay, Jesus einwândyly kinmopa kydawly. Âtâ iwyantary wâgâ ânguy âtâ sodo awyly xutuhoem ezedy tâjiwenioze, arâ lâpylâ tâzedygue kâzetânibyryem Deus awyly, kurâ Jesus einwânni modo. Saguhoenlâ Deus itaumbypyry wâgâ iwenibyem: “Kywymâry Deus idânârâ turâ xurâ modo tutuze” kely. Iwenibyem lâpylâ: “Idânârâ Deus xurâ modo, Deus izepa ato aiedyly nimo” kely. <sup>20</sup> Egâ wâne âdypeom modo ety oday tâlâ isejiguy ourugueto, pratagueto warâ; sodo toenzepa ize awyly mâtâ; aunlolâ nhondyly, tynzekyly awylygue. Tâlâ lâpylâ isejiguy segueto, on-rogueto warâ. Nhyzekyly keba mâtâ; nhewanily nhameley waunlo, <sup>21</sup> myara kurâ Jesus einwânni modo Jesus wâgâ iozepa kulâ unâ egatuwâni modo einwândyly kyjimonre. Arâ ise tywykeba kydawly, Kywymâry Jesus xurâem. Ize tato anheto ise kurâ. On-hondybyem lelâ ise kurâ, koendonro ize ato aguentoem.

<sup>22</sup> Timóteo, salokuzenomo modo Deus izepa ato anhekyly amânhedyse tâiseba ikâ. Ton-honre ikâ, Deus ize ato ara lelâ amitoem, Jesus mânwânsezedoem lakuru, Cristo eynynâ âpemugudo mânwynedoem, eagâmo mâtuebabrya mitoem warâ. Âkealâ kuru Kywymâry Jesus einwânni modo arâ lâpylâ anidâmo. <sup>23</sup> Deus itaumbypyry koendâ xutudânry modo âjihogulymo-ro watay, eagâmo tâjihoguzeba ikâ. Tâdâjihogudu mawânrâ tâdâtuebadly. Koendonro mâkeba awârâ anhekylymo. Aunlolâ mawânkâ iewiâpadylymo, âtuebadlymo warâ. <sup>24</sup> Âmâ Kywymâry Jesus emary, ânguy agâ tâtuebazeba ikâ. Koendâ ikâ idânârâ agâ.

Enomedâdylymo xutugâ, mânomedâguyl agâ tyewiâpazeba ikâ. <sup>25</sup> Kywymâry Jesus wâgâ xutudânry watay, koendâ enomedâgâ. Mânomedâdo arapa kulâ aini watay, koendâ lelâ xurukâ, sagâikegâmo warâ. Unâ Iozepaom kulâ nheinwândyly imoen-honze kewânkâ Deus, iozeno lelâ nhutuhomoem. <sup>26</sup> Iozeno lelâ tyeinwântoem, iozepaom einwândyly inmolymo watay, âsemaguezemo Diabu emaymba. Iweâpa mawânkâ Diaburam âdutuozeze awylymo, ize ato anhetomoem. Ânguydo inra odaxi ihugueyby ara akaemo Diabu emaym awyly.

### 3

#### *Xypyry etay aini modo*

<sup>1</sup> Xirâ enanâguegâ. Xypyry etay, Jesus odopâdyly iray, toenzepa ise inakanhe tadowly. <sup>2</sup> Toenzepa ise ize tatolâ aieni modo; dinheru, âdydo imeom kulâ izetonro modo; kaloenrim modo warâ. Toenzepa ise tagonro takaze tynrendysedonro modo; kywykewâni modo; tâmawyadânbibyry modoram “Alâ ise” kedânry modo; tunwym, tyze warâ aguelyeinwântânry modo; Deus âwankuem ieni modo, isejiguy âwankuem ieni modo warâ; <sup>3</sup> tagonro iwynedânr modo; tunâguedobyry tânagazedobyry warâ enanânehondânr modo; tâwanugoengueim, tunâgoengueim warâ xunâgueni modo; âjimanâdânr modo; âdadiseba aini modo, ânguydo kulâ idu odano emyenro modo; koendonro izepanro modo; <sup>4</sup> tataen-holâ egamenri modo; ize tatobe tâitoem, ize tato adientoem warâ koendâ âpaunzedânr modo; idânârâ kehoem tutuze âdutuwâni modo; Deus takaze kehoem tâlâ tato kulâ nhomaenguly waunlo modo warâ.

<sup>5</sup> Jesus einwânniem tawyly adâkezemo wâne, kewâdylymo kulâ olâ. Anhekylymo wâgâlâ Jesus einwânni keba awylymo âzeholy. Tataen-hoemba ikâ awâkâ aunlogue. <sup>6</sup> Âtâam, âtâam warâ adakobâdylymo, unâ iozepaom enomedâze kulâ. Toenzepa tâdâsenogudyly kelymo; pekodo unâ âdaunlo kulâ einwânni mawânkâ nhenokuguylymo kuru. Inakai modo kulâ adienkyly amaymba tâsemaguedyze tawylygue pylâ pekodo aguehomo nheinwândyly lelâ-ro warâ. <sup>7</sup> Aunlolâ unâ iwelo tiuntuzezedyly wâne ize atomo, unâ iozeno kuru Jesus wâgâ agueim nutubamo olâ. <sup>8</sup> Saguhoem Janes, Jambres warâ\*, Moisés iduerymoem myakâwândy, arâ lâpylâ asaemo iozepa kulâ unâ egatuwâni modo Jesus wâgâ unâ iozeno idueryem awylymo. Âpaunzedomo inakanhe ietybyen-ro waunlo ara. Jesus einwânniem tawyly adâkezemo lelâlâ wâne, Jesus neinwâmpyramo olâ. <sup>9</sup> Alâ aisezedyly nitaymba ise akaemo. Iweâpa nitaymba ise âdy utuim keba awylymo âdutuoly, Janes, Jambres warâ âdutuohobyry ara.

#### *Paulo Timóteo nhurutobyry*

<sup>10</sup> Âmâ olâ, Timóteo, koendâ tutuzelâ âmâ Jesus wâgâ kâenomedâdyby; mâkâ aguehobyry ara lelâ awitobyry; unâ tâdâsemaguedyze watobyry; Jesus kâinwântobyry; uduery modo ienagazedyly ume; yewiâpabyra, watobyry tuomareba wipyra watobyry; Cristo eynynâ ypemugudo kâinwynedobyry; koendonro, koendâpaom alelâ yagâ aidyly umelâ kâenmaen-hombyry; <sup>11</sup> Jesus eynynâbaom modo toenzepa ienagazedyly warâ. Idânârâ xirâ awitobyry modo tutuze âmâ. Tutuzelâ âmâ âdy yagâ aityby modo xidadâ Antioquiadâ, Iconiodâ, Listradâ warâ. Toenzepa ienagazêmo lelâlâ uduery modo! Yâen-homba olâ keankâ Kywymâry Jesus; iemake idânârâ kâsenagazedo modo amaym. <sup>12</sup> Idânârâ Deus ize ato ara aini modo âzenagazeze eynynâbaom modoram, Cristo Jesus nheinwândylymogue. <sup>13</sup> Inakai aieni modo,

\* <sup>3:8</sup> Janes, Jambres warâ myakâwândy adyesenry modo kehoem Diabu eon-honrugue aieni, Moisés, Egito iwymâry Faraó warâ enado. Êxodo 7dâ, 8dâ warâ aguely. Testamento Saguhobyry wâgâ ezedymo nâepanâgueba, idânârâ judeu domodo olâ akaemo wâgâ adâkeze xunârymoem warâ.

konokuni modo warâ Deus izepa ato aiesezemolâ ise. Konokuzemo, âzenokuozemo lâpylâ warâ.

<sup>14</sup> Âmâ olâ, Timóteo, Jesus wâgâ unâ iozeno inomedâdobyry einwândyly kâjimo; oday ton-honre kehoem mânwânylylâ einwânkâ. Tutuzelâ âmâ, ânguy, ânguy warâ Cristo einwândyly wâgâ inomedânibyry awyly; tâwâlâ einwânkâ âyam aguehomobyry.

<sup>15</sup> Iamudoenlâ unâ Deus wâgâ iweniby mâuntuly, Deus Itaumbypy wâgâ. Mârâ wâgâ mawânrâ âdara tâdâsemaguely awyly mâuntuly, Cristo Jesus kieinwândylygue lelâ tâdâsemaguely warâ. <sup>16</sup> Deuslâ myakâwândy tytaumbypy iweninri modo nhangahu odaji inwenilymo ieni. Idânârâ Deus Itaumbypy awo wogonro Deus Ispiriturylâ iweniehorim. Mârâ mawânrâ Deus wâgâ kydâsenomedâdo; Deus wâgâ iozepa kulâ kieinwântuo, kuruni; Deus izepa ato aguentuo kydadagâikeho; Deus ize ato ara lelâ kitoem konomedâni warâ. <sup>17</sup> Deus itaumbypy koendâ kiuntuduo, ohondbyyem lelâ kurâ, idânârâ koendonro mâkâ aguiendyse ato aguentoem.

## 4

<sup>1</sup> Timóteo, Kunwym Deus, Cristo Jesus warâ tutuzemo arâ âyam auguely. Idânârâ iwymâryem odopâdonze Jesus. Idânârâ âdy iguewâtyby modoem, iguedâny mod-oem warâ aini wâgâ agueze mâkâ. Tainwânni modoem koendonro ise anhenehonly, tainwântâny modo enagazenehonze warâ. Awylygue âyam aguehobypy aiekâ, uguely.

<sup>2</sup> Jesus wâgâ unâ egatuzezegâ, amyguedyse mawyly ume, amyguedyseba mawyly ume, tindadyse awyly ume, tindadyseba awyly ume alelâ. Koendâ Deus itaumbypy xutudâny modo enomedâgâ, koendâ nhutuhomoem. Deus aguehobypy sakani modoram tâwâlâ ton-honre aguekâ. Einwânni modo xurukâ, toenzepa nheinwânsedomoem lakuru. Deus itaumbypygue koendâ enomedâgâ; mâenomedâdaymo, tyewiâseba ikâ.

<sup>3</sup> Iweâpa nipyralâ ise unâ iozeno tindadysebaom modope idyly. Iwelo tâsenomedâdo ise tiuntudyze atomo kuru. Awylygue ise iozepa kulâ unâ egatuwâni modo ingâsedilymo, tonomedâdoem, akaemo agueho ise tindadyse kehoem atomo. <sup>4</sup> Aituo ise Jesus Cristo wâgâ unâ iozeno nidapyra idylymo. Agaityom modo xunârybyry egatuyby kulâ ise indakylymo, nheinwânylymo warâ. <sup>5</sup> Âmâ olâ, Timóteo, koendâ âpaunzegâ, âjimanâgâ warâ amânhokyly wâgâ. Jesus einwânni mawylygue mâzenagazeoly watay, mâsenagazedly emaenzelegâ. Jesus wâgâ unâ koendonro egatuly kâjimo, eynynâbaom modo, âdara tâsemaguely awyly nhutuhomoem. Deus xurâem âsewanirim âmâ, emary mawylygue idânârâ Deus amânhedyse ato aiekâ.

<sup>6</sup> Odokehomo sainsezedly awârâ. Inepa ise yâlymo. Deusram egameyby iaduânto ara, on-hondbyyem wawyly Deusram kâtuhoem, Deus ewanuem yiguehoem warâ.

<sup>7</sup> Tâgaseim tâgatuday tozohoinze, xypyry etaji kehoem tâgatudoem myara lâpylâ kozohoinly xypyryam kehoem agânhetoem aguehobypy aienibypyem wawyly. Cristo Jesus einwândyly kâinmowâbyra urâ, unâ aguehobypy auguehoem egatuly kâinmowâbyra urâ warâ. <sup>8</sup> Awylygue koendonro urâem târâ eydâ tatodâ Deus nhekanâdyby kâenmakely kâenuendyly, tâgaseim waunroem saintyby tâpywado nhemakeho ara. Deus turâ xurâ modoem nhekanâdyby ise Kywymâry Jesus, juiz koendonro, iebyry nhuduly. Urâem lelâ inkâba ise awârâ ebyry âduduoly. Idânârâ mâkâ odopâdly tuomare kehoem enuenni modoem izetonro modoem warâ ise âduduoly.

### Tataen-ho modo wâgâ Paulo aguehobypy

<sup>9</sup> Iweâpa tâiseba ikâ, xarâ Yam maeitoem. <sup>10</sup> Demas wodoke. Xidadâ Tessalonicaram nâtâ, Deus ize ato agâ âseinwândâny modolâ mawânkâ keankâ ize ato kuru. Galácia yan-yam Crescente nâtâ. Tito, Dalmácia yan-yam nâtâ warâ. <sup>11</sup> Lucas lelâ taunlo yagonro. Marcos xuigâ. Mâetuo, agâ enekâ, Kywymâry ewanu aiedylyem imawyadâdoem.

<sup>12</sup> Efesoram Tíquico xigonodâ. <sup>13</sup> Mâetuo, igâwynu kâyntado iety nhangatay kânhokyly

kânhâympy enekâ Troadedâ Carpo ety oday. Pape iweniby modo enekâ lâpylâ, awârâ tâjitusby wâgâ iweniby enekâ kuru.

<sup>14</sup> Alexandre, âdyo imeom metalgue xygahudâni, toenzepa inakanhe yenehom. Kywymâry Jesus olâ enagazenehonze yagâ anhetaymby modo wâgâ. <sup>15</sup> Deus eynynonro modo izetonro mâkeba mâkâ uguondo. Cristo Jesus wâgâ unâ iozeno kiengatuly-ro watay, inepa mâkâ toenzepa iewiâpadly. Awylygue eagâ moxiodyly-ro watay, tâmaynelâ ikâ, uguely.

<sup>16</sup> Waunroem kuru, pymâ domodo enado kâsemaguehoem augueday, ynynâ aguenriem ânguy nâxiânwâbyra keankâ yagâ; idânârâ yataen-ho modo wodokewâdaundâmo. Awârâ wâgâ Deusram kâenkadyly, nâzenagazeoba itomoem. <sup>17</sup> Kywymâry Cristo Jesus olâ keankâ yagâlâ, judeu keba modoram koendâ kehoem iwâgâ unâ kâenomedâdoem won-hondâdâ. Uguondo modo ton-honreim emaymba yedâ mâkâ, udodo ara kehoem tyewiâtuneim modo emaymba. <sup>18</sup> Idânârâ inakai modo amaym iemakeze Kywymâry Jesus; iemakeimbyryem yase myarâ kayam, pymâ ton-honreinhe tatoram. Awylygue, “Ton-honreim, tywâkureim warâ âmâ” kykely kinmopa kine Kywymâry Cristo Jesusram. Arâlâ nidâ.

### *Aguely âdypygueândo*

<sup>19</sup> Priscila, isolâ Áquila warâ ywynu nawâdâmo, Onesíforo ety odano modo lâpylâ warâ. <sup>20</sup> Xidadâ Corintodâlâ Erasto nâxiâm; Miletodâlâ Trófimo xiâm warâ, tâwâne mawânkâ keankâ. <sup>21</sup> Tahuleba tâiseba ikâ, igâwyno sainto iraynâlâ inepa âekâ. Tarâ Romadâ Jesus einwânni modo, idaenkulymo lâpylâ, Éubulo, Prudente, Lino, Cláudia warâ.

<sup>22</sup> Kywymâry Jesus agâ auguely: “Timóteo agâlâ ikâ, eon-hondâzelâ” uguely.

### *Deus nhesemo*

Xirâ kata wâgâ kâinweniby itainrim modo, idani modo warâ Deusram koendâ mâzehohomoem kâenkadyly.

Paulo

## TITO Paulo Kata Inweniby Titoram

Xirâ kata wâgâ inwenily Paulo nhangahu odaji iemâmy Deus. Awylygue Deus itaumbrylâ xirâ Paulo inweniby. Judeu keba myakâwândy Tito, Jesus einwânnipyryem olâ myakâwândy. Paulo eatael-ho, emawyadâni warâ myakâwândy, âji iwaguenodâ Jesus xunâry egatuze awyly ume. Ilha Cretadâ myakâwândy Tito âxiânlâ, târâ Jesus einwânni modo iwymâry modo tinduakehoem, tonomedâdoem warâ.

Xirâ kata wâgâ Paulo tywenize Jesus einwânni modo iwymâry ewanu wâgâ. Âdy wâgâ Tito nhenomedâdo awyly adâkeze; âdara aidylymo awyly wâgâ adâkeze warâ.

Xirâ wâgâ kiuntuly, Jesus eynynonro modo, iozepa kulâ unâ egatuwâni modo neinwâmpyra itomoem, Jesus tyeinwândyly iraynâ inakanhe adâitobyry anientombyra itomoem warâ.

### *Aguely adaguho*

<sup>1</sup> Urâ Paulo xirâ kata âyam iweninri, Tito. Deus emary urâ. Jesus Cristo ingonotybylâ urâ, unâ iozeno turâem Deus induakeyby modoram kâengatuhoem, nheinwândylymo koeon-honwanâdoem warâ. Arâ ise nhutulymo ize ato ara adâjidyly.

<sup>2</sup> Tyeinwândylymogue aunloenlâ eagâ tâidylly inwânwândylymo. Onro, kau warâ tiungudyly iraynâ warâ myakâwândy Deus aguely: “Aunloenlâ ise ynynonro modo yagâ awyly” kewândymy. Kewândyly kulâ waunlo mâkeba Deus; adâkehobypy adyese lelâlâ. Awylygue eagâ ise kydawlyly kiuntuly. <sup>3</sup> Adâkeho odaji ituolâ myakâwâm Deus âdara kâmakely awyly nhutuen-honly, yam âzegatuoly warâ. Kâmakeim Deus aguehobypyrem urâ pylâ egatuin-ro warâ.

<sup>4</sup> Idaenkuho xirâ kata, Tito. Ymery ara kâenklylly âmâ, Jesus wâgâ augueduo mânwântobyry wâgâ.

Âynynâ Kunwym Deusram, Kâmakerim Cristo Jesusram warâ kâenkadyly, koendâ mâzehohoem, akaladâni peba itoem warâ.

### *Cretadâ Tito ewanopyry*

<sup>5</sup> Târâ ilha imâsedo Cretadâ watay, Jesus einwânni modo duay agânhekyly kâenwanikeba wakynre. Âmâlâ olâ ise ewanikeim, Tito. “Jesus einwânni modo ewy ise pymâem tuduakezeim iwerâ. Idânârâ xidadâ modo odakâ Jesus eynynonro modope ato ara enomedââno pymâ iduakegâ” uguelâ âyam. Awâtârâ watay, âdaunlo pymâem ini awyly wâgâ âyam auguelâ. Auguehobypy ara aikâ. <sup>6</sup> Koendâ lelâ aini ise, Jesus einwânni modo iwymâry, ânguy iwâgâ âdakepa itoem. Ohogüimby-ro watay, tokalelâ iwydy nidâ. Jesus einwânni modo iwymâry imeom Jesus neinwândâmo, âdalâ kulâ anipyra nidâmo lâpylâ warâ.

<sup>7</sup> Deus ewanulâ ise Jesus einwânni modo iwymâry anhekyly. Awylygue koendâ lelâ anidâ, “Inakanhe aidyly” kehoemba itoem; adâkehobypy lelâ aidyse ato waunlo keba; inepa kulâ iewiâpani keba; toku ikaji ini keba; tâdâjítoguuly keim keba; toenzepa dinherupe, âdydo imeompe warâ tâidysedonro keba; <sup>8</sup> âxigodo saintuo, tâty odaylâ ejitâni, kurâ domodo tienmawyadâdyedo; koendonro lelâ adiendyly wâgâ tunâgueim, adâidylly, adâkely warâ xuturim, âdalâ kulâ aini keba; Deus ize ato ara lelâ aini; âwâlâ âjimanâni; <sup>9</sup> Jesus unâry tyam egatuyby âkeá lelâlâ awyly einwânni warâ nidâ. Arâ mawânkâ ise xirâ unâ iwâkuru nhegatuday, kurâ domodo nheinwântoem ingüizeândyly. Iozepa kulâ unâ egatuwâni modo watay, koendâ nurudâ, arâ ise iozepa kulâ adâkely awyly nhutulymo.

<sup>10</sup> Toenzepa mawânkâ kurâ domodo tywymâry modo turudyly tindadysebanro modo, judeu domodo aunlo kuru tâzewenry timodyzebaom. Awylygue tienomedâday âdalâ

kulâ aguelymo, ânguy koendâ ieni keba aguehomo. Tunârygue kurâdo nhenokudylymo kulâ warâ. <sup>11</sup> Âdalâ kulâ nhenomedâdylymogue toenzepa tâjiunwym, tâjise, tâjimery warâ enagadubadylymo. Âdykonlo iozeno, iozepaom warâ awyly nutuba idylymo. Idinherurumo tienmakehomoem kulâ mawânkâ arâ aguelymo. Warâ kulâ aidylymo. Agueylomo kâzeinwântaundâ. Arâ nhenomedâdylymo sainwâtaungâ, kewâdylymo kulâ mawânkâ. <sup>12</sup> Cretadâ enomedâni modo ewy aguewânm my Creta donro modo wâgâ: “Konokuni kulâ asaemo Creta donro modo! Ânguyo imeom iewiâpadyby ara kulâ asaemo. Toenzepa idolagumo, tâsewanidyzebamo pylâ-ro waunlo asaemo” kewânm my. <sup>13</sup> Âkealâ myakâwâm agueylomo warâ. Jesus wâgâ iozepa kulâ unâ egatuwâni modoram ton-honre aguekâ, kewâdylykulâ waunlo modo, Jesus wâgâ ioze aguenri lelâ nheinwântomoem. <sup>14</sup> Eyanmo aguekâ, judeu domodo unâ nhugutyby einwândyly inmohomoem, iozepa kulâ unâ egatuwâni modo agueho aniempyra itomoem warâ.

<sup>15</sup> Deus lelâ kieinwântuo, âdy tâinzenry lâpeba, âdy adyesenrylâ peba warâ. Jesus kieinwâmpyra kurâ watay olâ, âdy koendonro peba, kânanaji. Jesus eynynâbaom modo inakanhe adâidyly-ro watay, koendâ adâidyly enanajimo. Koendâ adâidyly-ro watay, inakanhe adâidyly enanajimo. Idânârâ tâpaunzedomo inakanhe awylygue, adientyby wâgâ nâjityembyramo warâ. <sup>16</sup> “Deus eynynonro xina” tâkezemo wâne, iozepa kulâ olâ nhenomedâdylymo, koendâpa aidylymo, agueylomo warâ. Arâ awylymolâ; Deus eynynonro keba awylymo enehorim. Deus aguehobry neinwâmpyramo. Izepa ato kehoem anhekylomo. Âdy koendonro adiendysebamo, aiedyly nutubamo warâ.

## 2

### *Koendâ adâjito modo xutuho*

<sup>1</sup> Deus wâgâ unâ tâinwânsaim iozenogue lelâ enomedâgâmo, Tito. <sup>2</sup> Agaityom modo xurukâ: “Toku ikayba itaungâ. Koendâ lelâ aitaungâ, âwankuem tyeseba mitomoem. Âwâlâ âjimanâdaungâ. Ton-honre lelâ Jesus einwântaungâ, iwâgâ iozepa kulâ enomedâdo mâyinwâmpyra mitomoem. Idânârâ kurâdo iwynedaungâ. Jesus einwânniem mawylymogue mâyzenagazeoduomo kulâ Jesus mâyinwâmpyra tâiseba itaungâ” kekâ agaityom modoram.

<sup>3</sup> Aripido lâpylâ warâ xurukâ: “Deus ize ato ara lelâ aitaungâ, Jesus tâinwâns mawylymo mâyenehon-homoem. Ânguy kâdunâguedaundâ. Toku ikayba itaungâ. Koendâ pekodo iwelo ohogünze modo xurutaungâ, <sup>4</sup> tuso agâ, tymery agâ warâ koendâ itomoem, <sup>5</sup> âwâlâ âjimanâdomoem, eagonro uguondoram nâdynanâoba itomoem, tynepa itomoem pekodo ewanu aiese, tâty oday koendâ lelâ itomoem, tuso ‘Aiekâ’ kehobry anhetomoem. Warâ xurukâmo, ânguy Deus itaumbyry wâgâ inakanhe aguepa itoem” kekâ aripidoram, Tito.

<sup>6</sup> Uguondo xutuwâdyby modo, salokuzenomo modo warâ xurukâ lâpylâ: “Âwâlâ âjimanâdaungâ” kekâ eyanmo. <sup>7</sup> Tito, âmâlâ koendâ lelâ aikâ lâpylâ, amito ara lelâ Jesus einwânni modo aitoem. Jesus wâgâ unâ mâyengatuday, koendâ lelâ aguekâ, tâwankunremba warâ. <sup>8</sup> Ioze lelâ aguekâ, ânguy âunâguebyra itoem. Âduerydo âpybazeze, âdy âunâguedomo peba awylygue, Jesus einwântaynrim modo tiunâguedo peba awylygue warâ.

<sup>9</sup> Tâwanuneim modo xurukâ: “Eagâ iwanomo âwankuem kâietaunderâ, einwântaungâ warâ. ‘Aiekâ’ kehobry aietaungâ, tylahureba. <sup>10</sup> Eagâ iwanomo isejiguy kâzemagazaundâ. Koendâ isejiguy nhontaungâ; koendâ ewanuem aitaungâ warâ. Koendâ lelâ amituomo ise eagâ iwanomo âwâgâmo koendâ aguely, âDeusrymo mâyinwânkylomo wâgâ koendâ aguely warâ” kekâ tâwanuneim modoram.

<sup>11</sup> Idânârâ agâ koendonroem tawyly enehonwâm Deus, awylygue ise einwânni modo âsemaguely. <sup>12</sup> Kagâ koendonro tawylygue, Deus konomedâdyly izepa tato aiedyly kinmohoem, Deus ize ato agâ âseinwândânry modo aiedyly kinmohoem warâ.

Konomedânybyryem âwâlâ kydâjimanâdoem, koendonro aguientoem, ize ato lelâ aguien-toem warâ, <sup>13</sup> toenzepa kuomaro, Jesus Cristo odopâdo kienuendyly ara. Tynwânwânse kurâ kyDeusry imâsedo, kâmakeim warâ. <sup>14</sup> Tâwâlâ ize tawylyguelâ myakâwâm Jesus âtuly tyiguehoem, inakai amaymba kâmakehoem, inakanhe aguitobyry xygakeze, xurâem kitoem. Koendonro, ize ato lelâ warâ aguiendyse kitoem myakâwâm iguely.

<sup>15</sup> Tito, xirâ âyam auguewâtobyry modogue mâunrudysemo wawyly. Iomazeângâmo ton-honre lelâ Jesus nheinwântomoem. Deus wâgâ amyguely tindadysebaom modoram ton-honre aguekâ. Ânguyram amygueho âwankuem kâieneho, Tito.

### 3

#### *Jesus einwânni modo aito*

<sup>1</sup> Atonlo Jesus einwânni modo xurukâ. Tito, warâ eyanmo aguekâ. “Idânârâ pymâ domodo einwântaungâ, âtâ anary iwymâry, xidadâ odano modo iwymâry alelâ. ‘Ai-etaungâ’ kehobyry, aietaungâ. Koendonro aiese on-hondybyem lelâ itaungâ” kekâ.

<sup>2</sup> “Ânguy kâdunâguedaundâ. Tâdâjitoguylâ tâkezeba itaungâ. Koendâ lelâ itaungâ idânârâ agâ” kekâ eyanmo. <sup>3</sup> Saguhoem Jesus einwântâny modo ara kâinane aguidyly, Jesus eynynonroemba kydatay. Deus kiuntuba kydakâwâm ilâeday. Koendonro, inakai warâ aguienkly awyly kiuntuba. Deus, pymâ domodo warâ âdaunloenlâ kiynrempyra, kieinwâmpyra warâ kydawly. Deus eynynâbaom modoram kydâzenokuoly kulâ. Inakai modo aguiensezedye kydato aiedyly kinmohoem nudupa. Kopaelâgâembaba olâ koendâpa kidyly. Âkelomo tâlâ atogue toenzepa tâsewâñize kurâ. Izepamo kydakâwâm; akaemo lâpylâ kyizepa warâ.

<sup>4</sup> Kâmakerim Deus olâ kywynedâ tawyly enenehonwâm. Kagâ koendonroem tawyly enenehonwâm warâ. <sup>5</sup> Koendâ aguitobyry wâgâpalâ kâmakely, kytyendylyguelâ. Inakanhe kitobyry xygakewâm, tâwâlâ ize tawylyguelâ. Tyispirituryguelâ iweloem kyemâ, iweloem kyesezedyle aunloenlâ. <sup>6</sup> Paru iazehodâ wâne paru nawepa-ro myara Deus Tyispiritury kyam ingonodyly. Kâmakerim Jesus Cristo anhetyby wâgâ, Deus Isipitury kagâ awyly. <sup>7</sup> Deus kâmakely, imeryem kitoem, eagâ aunloenlâ kitoem, koendâpa kydawly umelâ. Aunloenlâ ise eagâ kydawly, koendâ kâendylygue. “Inakanhe amitomobyry wâgâ mâsenagazedaymba ise âmaemo” kewâm Jesus eynynonro modoram. <sup>8</sup> Iozeno lelâlâ xirâ âyam kâinwenily.

Deus einwânni modo xurukâ, koendâ adâidyl nimopa itomoem, koendonro aiedyly lelâ nhutuhomoem. Xirâ amyguedyse wato; koendonro xirâ idânârâem. <sup>9</sup> Tito, auguely âyam, atonlo modoram warâ. Âdy wâgâpa kulâ tâseuzeba itaungâ. “‘Uguondo tyn-renseimbyry imeryem, iwyrem warâ wawylygue, tynrenseim urâ’ tâkezeba itaungâ” kekâ arâ aguewâni modoram. Tâjitoguylâ kewâni modo agâpa itaungâ. Judeu domodo ezewenry wâgâ tâjihoguzeba itaungâ warâ. Earamopa itaungâ. Âdyem nitaymba awârâ modo; âdy mâkeba awârâ modo. <sup>10</sup> Jesus einwânni modo tygue, tygue ienehonri-ro watay, ton-honre kehoem aguekâ. Iozepa kulâ aguezesedylimo-ro watay, ton-honre kehoem agueonkâ eyanmo. Iozepa kulâ enomedâdyl nimopamo-ro watay, âduaximo kâieneho. <sup>11</sup> Arâ kurâ domodo tygue tygue ienehonrimbyry modo koendâpa tawylygue mawânkâ arâ kulâ aidylymo. Xurudylymo lelâlâ wâne, inakanhe adâidyl inmohomoem, alâ Deus izepa ato anhesezedylimo. Inakanhe aidylymo wâgâlâ koendâpa awylymo xutuly.

#### *Paulo Titoram adâkely nhypygueândo*

<sup>12</sup> Ártemas atay, Tíquico atay warâ Cretaram kâingonodyse urâ. Asaemo ewy ise kâingonokyly, itaybyanoem. Asaemo ewy awyarâ saintuone, xidadâ Nicopolisram idâ, yagâ oxioze. Udâly ise myarâ kopâ, igâwynu warâ sakaze. <sup>13</sup> Zenas, Apolo warâ

Cretadâba âxiguedaymo âdylâ ize atomo âundugâne, koendâ lelâ idâhomoe. Tâzezewenry koendâ xuturim awâkâ Zenas. Idânârâ ize atomogue emawyadâgâmo. <sup>14</sup> Warâ Jesus einwânni modoram aguekâ: “Koendâ lelâ aguine. Kuduano modo âdy peba-ro watay, ipa atomo kududunre. Tynepa kine. Arâ ise ânguy kydawyly kienehonzezedyly” kekâ.

<sup>15</sup> Idânârâ taunlo yagonro modo idaenkudyzemo. Atonlo modo xina eatael-ho Jesus einwânni modo xina nhenanâguely lâpylâ.

*Deus nhesemo*

Deusram koendâ idânârâ mâzehohomoem kâenkadyly.

Xirâ kulâ âyam augueho, Tito.

Paulo

## FILEMOM Paulo Kata Inweniby Filemomram

Xirâ kata wâgâ inwenily Paulo nhangahu odaji iemâmy Deus. Awylygue Deus itaumbrylâ xirâ Paulo inweniby. Uguondo tynrenseim, tydinerugueim warâ myakâwândy Filemom, Jesus einwânni. Xurâem tâwaneimpe myakâwândy Onésimo, tâbyguepa âsewanirin-em nhanâtyby. Tywymâry isejiguy ewy emagazemâ olâmy Onésimo. Aitybyem Filemom etydâba âwiendyly. Xidadâ Paulo etadâdobyry yan-yam myakâwândy âwiendyly. Târâ Paulo Jesus wâgâ aguely indadyly myakâwândy. Tindatuo Jesus einwânniem idyly. Tagâlâ myakâwândy Paulo, Onésimo ize awyly, tâmawyadâdoem. Tutuze olâ myakâwândy tywymâry etyram Onésimo odopâniem awyly.

Deus, Pauloram xirâ kata inwenien-honly myakâwândy, Onésimo tywymâryam nhatoem. Tâwaneinhe kulâ inkâba myakâwândy Paulo Onésimo odopâdyze awyly, Cristo eynynâ ipemugüem lâpylâ. Paulo mâkâ ekaunâdyze awyly, Paulolâ tâty odaji Filemom nhekaunâguuly waunlo ara lelâ.

### *Aguely Adaguho*

<sup>1</sup> Urâ Paulo xirâ kata âyam iweninri, Filemom. Kadeia oday tarâ wawyly, Cristo Jesus wâgâ auguelygue. Tarâ yagâlâ merâ Timóteo, kypemugu Cristo eynynâ, idaenkuly lâpylâ. Xina eataen-ho tutuzeim âmâ. Xina memawyadâdâ Jesus unâry xina nhegatuday.

<sup>2</sup> Iegary egatugâ awyarâ ityam Jesus wâgâ unâ idase idâwâni modoram. Áfia lâpylâ xina nhedaenkuly, kypemugu Cristo eynynâ. Arquipo xina nhedaenkuly lâpylâ warâ. Xina eataen-ho lâpylâ awâkâ, xina âsenagazedo ara Jesus Cristo nheinwândylygue âsenagazeni.

<sup>3</sup> Kunwym Deusram, Kywymâry Jesusram warâ kâenkadyly, koendâ mâzehohomoem, akaladânímo peba itoem warâ.

### *Filemom Jesus tâinwâns, Jesus einwânni modo tywyneze, tâmawyadâze warâ*

<sup>4-5</sup> “Filemom-ma idânârâ Jesus einwânni modo tâmawyadâze, tywyneze warâ. Kywymâry Jesus einwânni lelâlâ mâkâ” warâ aguelymo âwâgâ. Arâ igary kâindatobyry wâgâ, aunlolâ inanry Deus agâ auguely âwâgâ: “Pabai Deus, agâ womaru, koendâ Filemom egary kâindadylygue. <sup>6</sup> Koendâ mâkâ âinwânni modo agâ. Nemawyadâbyramo nipyra. Awylygue âyam kâenkadyly, toenzepa lelâlâ Cristo wâgâ nhutuhoem, neinwâmpyra nipyra itoem, nheinwântoem lakuru. Arâ aidyly tiuntuduomo, toenzepa ise kurâ domodo iomaru agâ, Deus, koendâ Filemom aidylygue” uguely inanry âwâgâ Deusram.

<sup>7</sup> Ypemugu Cristo eynynâ, Jesus einwânni modo tywyneze, tâmawyadâzemo, koendâpamo-ro watay, tuomazeâñzemo warâ myguehonly kâindatuo, toenzepa womaze. Toenzepa kehoem kozohondâdâ.

### *Paulo Onésimo eynynâ nhekadobyry*

<sup>8-9</sup> Xirâ kâinwenily, yataen-ho, âyam kâenkadoem. “Cristo eon-honrube wawylygue, agaityoem wawylygue, kadeia oday wawylygue warâ, ‘Ize, izepa alelâ auguehobypy amânhetoem’ auguely” tâkeze tâise urâ. Toenzepa kydâpynedyly olâ, xirâ auguehoem aienehoim: “Kâenkaguuly waone aiekâ, amânhedyse matay” uguely-ro warâ. <sup>10</sup> Warâ kâenkadyly Onésimo xurâem. (“Koendâ tâwaneim” keze Onésimo kely.) Kâinwyneguuly merâ, ymery ara kehoem. Tarâ kadeia oday watay, yam nâedâ; Jesus wâgâ augue eyam; neinwândâ-ro warâ. Nhunwym ara lelâ urâ, urâ Jesus wâgâ enomedâni awylygue. <sup>11</sup> Ady keba wâne keankâ itydâ âsewanily ume. Iwerâ olâ iemawyadâniem itybyem. Ityam odopâduo, imawyadâze lâpylâ warâ.

<sup>12</sup> Kâingonodyly ise merâ ymery ara kâinwyneguuly. Koendâ edaenkugâ. Iedaenkuho aralâ edaenkugâ. <sup>13</sup> Jesus unâry kâengatulygue tarâ kadeia oday ietagu. Yagâlâ wâne ize

wawyly, iemawyadâniem. Tarâlâ âmâ-ro watay, arâ lâpylâma tâise iemawyadâdyly. <sup>14</sup> Xirâ kâenkadyby wâgâ âmâ olâ xutuim. Âkeá myguepa âmâ watay, âdapa. Âkeá myguely watay, âdapa lâpylâ warâ.

<sup>15</sup> Nâwiendâ wâne itydâba, koendâ lelâ olâ Deus aniendâ xurâem, âmâem alelâ. Iweâpa nidâ wâne itydâba âwentybyem. Jesus einwânnipyryem tawylygue ise iwerâ âyanlâ odopâdyly. Aunloenlâ ise agâ ewanu. <sup>16</sup> Odopâduo, âsewanize âmâem, agâ tâwaneim tawylygue kulâba olâ, Cristo eynynâ âukono mânwyneguylâ awylygue. Kâinwyneguylâ merâ. Âmâ olâ ise iwyneni kuru-ro warâ. Ity oday mawânkâ ejiku, aralâ Jesus nheinwândyly lâpylâ warâ.

<sup>17</sup> “Paulo yataen-ho” myguely, Jesus xurâem kydâsewanilygue. Awylygue Onésimo odopâduo, koendâ edaenkugâ, urâlâ mânendaenkuly-ro waunlo ara lelâ. <sup>18</sup> Âmâem inakanhe aitybyem, âsejiguy emagazenibyryem merâ watay, urâlâ ise anhetyby modo epywani. <sup>19</sup> Xirâ kata wâgâ iezyedâ kâinwenily, urâlâ ipywani awyly mâtuntuhoem: “Urâ Paulo ise merâ inakai anhetybybe watay epywani.” “Dinherugue iepywagâ” myguely iraynâ, saguhoem wao koendâ âmâem agânhetyby enanâguegâ. Urâlâ keankâ Jesus mânwântoem agueim. Xirâ âmâem auguehobyry kâzenanânen-ho. <sup>20</sup> Koendâ lelâ ikâ Onésimo agâ, âyam kâenkado ara, ypemugu Cristo eynynâ. Amituo ise won-honru mâtunduly, azakâlâ Cristo eynynonro kydawlygue.

<sup>21</sup> Koendâ Onésimo mânendaenkuly, tutuzelâ xirâ kâinwenily. Awârâ takaze Onésimo xurâem amidyly, tutuze urâ. <sup>22</sup> Itydâ waone iejidy âungukâ, udâduo kâxidâdo. Tutuze urâ, Deusram ywâgâ amyguepa mipyra mawylymo: “Pabai Deus, Paulo xarâ nâetondâ” myguelymo inanry eyam. Inepa kewânkâ Deus amyguehomobyry aiese, agâmo witoem.

### *Aguely xypyry*

<sup>23</sup> Epafras idaenkuly. Tarâ yagâ kadeia odaylâ merâ. Cristo Jesus einwândyly, emaryem tadarwly warâ nimopalâ. <sup>24</sup> Marcos, Aristarco, Demas, Lucas warâ iwynu sawâtaungâ lâpylâ. Yataen-ho lâpylâ asaemo, Jesus wâgâ aguelymogue.

### *Kywymâry nhesemo*

<sup>25</sup> Kywymâry Jesus Cristoram koendâ mâzehohomoem kâenkadyly lâpylâ.

Alâ kulâ âyam augueho.

Paulo

## HEBREUS

### Hebreu Domodoram Kata Iweniby

Deus myakâwândy âdy xirâ kata wâgâ tywenizeim awyly iweninribyry nhangahu odaji ieni. Ânguy iweninribyry awyly tutuduneba. Deus itaumbyrylâ xirâ iweninribyry nhegatuly.

Xirâ kata judeu domodo Jesus einwânni modoram myakâwândy âjigonoholy; Jesus eynynâbaom modoram tânagazezeim myakâwândy akaemo. (“Hebreu” lâpylâ judeu domodo, israelita warâ ezedy.)

Xirâ kata wâgâ toenzepa Jesus Cristo wâgâ itainly. Kunwym Deus xutuen-hoim mâkâ Jesus. Jesus kiuntuduo, âdaunlo Kunwym awyly tutuze kurâ, Deus imery mawânkâ Jesus. Saguhoem Deus wâgâ aguewâtyby modo takaze tutuzeim lelâlâ mâkâ. Judeu domodoram tinweniday, iweninri tâgatuze Deus ety oday aini modo, târâ kurâ domodo eynynâ Deus agâ aguewâni modo ewanu wâgâ warâ.

Saguhoem Deus einwânni modo tâguy tyânwâsemo mykâinane. Mâkâ âguynro modo xyâypy iunu tientuo mykâinane Deus mâkâ egamewâni modo inakanhe aitobyry nhygakely. Xirâ kata wâgâ tutuze kurâ, âwâlâ Cristo âtuhibyry, inakanhe aguitobyry xygakehoem. Jesus kieinwântuo lelâ mâkâ kâmakely iwerâ, âguynro xyâypy iunu, nhunru warâ kiengamelygue inkâba.

Capítulo 11dâ adâkeze Deus einwândyly wâgâ. Saguho modo toenzepa Deus einwânni modo ezedy tâgatuze myakâwândy mâkâ.

#### *Jesus Cristo wâgâlâ Deus âdutuoly*

<sup>1</sup> Saguhoem toenzepa adâkeze myakâwândy Deus kydamudo tytaumbyry egatuwâni modoram, tytanrugue aguely atay, eâenkymoem aguely atay, âpaunzedomo oday atay, enu oday nhugunehonly atay warâ. Akaemo pylâ myakâwândy Deus aguehobry kurâ domodoram egatuin-ro warâ. <sup>2</sup> Xirâ ume, xypyry iwaguepa idyly iray olâ mâkâ imerylâ Deus kiuntudyze ato agueim. Tymery agâlâ myakâwândy Deus idânarâ nhugudyly. Idânarâ tiungutyby modo sodoem itoem tymeryam aguewâny. <sup>3</sup> Deus eon-honru, iwâkuru, pymâem awyly warâ etolâ imery, Deus agâ âzekiba awylygue. Mâkâ imery itanru ton-honreingue idânarâ âdydo imeom eon-honwanâdybyem awyly. Mâkâlâ mawânkâ igueim, inakanhe aguitobyry xygakehoem, Deus xurâem tywykenryem kitodem. Igueypyem, kurâem itondybyem, Deus ton-honreim kuru eydâ atoam odopâmâ. Eahoru eynynâ ekadybyem awyly pymâ ekadodâ.

#### *Deus imery tynrenseim kuru, ton-honreim warâ, anju domodo takaze kehoem*

<sup>4</sup> “Ymery” kewânmy Deus Jesusram. Awlylygue kiuntuly Jesus, anju domodo takazeno kuru awyly. Deus imery tynrenseim kuru anju domodo takaze. Deus Imery kelygue tâzekeim imâsedo kuru, “anju” kelygue tâzekeim takaze. <sup>5</sup> Deus myakâwândy anju domodo ewyram:

“Ymery âmâ, unwâm urâ warâ;

kurâdoram ymery mawyly kâenehonly warâ” kepa,  
tymeryam adâkehobry ara, warâ iwenibyem awyly.

Deus itaumbyry awo wâgâ iwenibyem âdaunlo anjuam wakewâpyra:  
“Nhunwym ise urâ; ymery ise mâkâ” kewâpyra;  
tymeryam lelâ myakâwândy arâ aguely. <sup>6</sup> Deus, tymery onro anaxi igonoseaji awyly ume,  
“Idânarâ anju domodo ymery nhyrerendyly ize wato” kewândymy.

<sup>7</sup> Anju domodo wâgâ aguewâny Deus:  
“Urâ Deuslâ anju domodo xuguni.

Sapezenru ara, peto ara warâ kehoem eon-honromoem adyese urâ.  
Iemaryem aitomoem urâlâ agueim”  
warâ iwenibyem awyly Deus itaumbyry awo wâgâ.

<sup>8</sup> Kunwym Deus tymeryam aguewânmy:

“ ‘Âdaunloenlâ nadainwâpyra ise pymâem mawyly.  
Koendâ lelâ ise âynynonro modo mâendyly.  
<sup>9</sup> Kurâ domodo koendâ anhekyly tohogueze âmâ;  
akaemo inakanhe kulâ anhekyly olâ mâen-hoguebyra âmâ.  
Awlygue aunloenlâ pymâem mitoem ajiedâ.

ÂDeusry urâ.

Mohomaendoem ajiedâ,  
ataen-hodo duay tynrenseim kehoem âwanu amânhedylygue  
ewanumo takaze iwanu imâsedoem awlygue âduakely' kewândymy”  
warâ iwenibyem awyly.

<sup>10</sup> Warâ lâpylâ myakâwândy iwenibyem awyly Jesus wâgâ aguehobyry:

“Âdy peba awyly ume, amygueduo akâwândy, onro, kau warâ mâungunehonly, Pymâ.  
Imaryguelâ mâyngadly waunlo ara.

<sup>11</sup> Kau, onro warâ adainze;

âtâ tâjiwogonro adainly ara ise kau, onro warâ adainly,  
Âmâ olâ ise âdaunloenlâ madaimpâ.

<sup>12</sup> Âtâ tâjiwogonro xugukely ara ise kau, onro warâ mâungukely.

Âmâ olâ ise âdaunloenlâ mâtugugueba”

warâ iwenibyem awyly Deus itaumbyry awo wâgâ.

<sup>13</sup> Jesus, anju domodo takaze kehoem awyly, tutuze kurâ, Deus mawânkâ, tymeryam  
adâkehobyry ara, eyanmo aguepa:

“Yahoru eynynâ ikagâ tynrenseim ekadodâ,

âduery modo eon-honru kainly ara,  
âdydo ara kulâ âhuru iaxi kânhedylymo ara”

kewândymy Deus tymeryam; anju domodo ewyampa aguely; warâ iwenibyem awyly  
Deus itaumbyry awo wâgâ.

<sup>14</sup> Anju domodo-ro? Anju domodoma tâenseim keba, Deus emaryem tâwaneim akaemo.  
Kurâ Jesusram âzemakeorim modo emawyadâze Deus ingonokyly.

## 2

### *Mâsemaguehomoem Deus âgâsedomobyry imedyly wâgâ aguehobyry*

<sup>1</sup> Anju domodo takaze tynrenseim lelâlâ Deus imery awlygue, unâ iozeno kin-datyby toenzepa kyjiwantaguene, kiuntuhoem, kieinwândyly kinmoba kitoem. <sup>2</sup> Deus, anju domodo Moisésram tâzezewenry nhuduhoem aguehobyry tâinwânseim myakâwândy mâtâ. Einwântânybyry modo tânagazenehonze myakâwândy Deus, aitomobyry aralâ.

<sup>3</sup> Tutuze kurâ, saguhobyry tâzezewenry tâinwânseinhe awyly. Tâinwânsezeim kuru olâ Jesus xunârybyry.

Mâtâ saguhobyry tâzezewenry einwântânybyry modo âzenagazeowânm. Iwerâ Jesus einwântâny modo xurâem lakuru ise ton-honre kuru awyly xypyry etay. Kywymâry Jesus waunroem adâkezelâ tâdâsemaguely wâgâ. Idanipyry modo kyam âkealâ kuru awyly nutuen-homo lâpylâ. <sup>4</sup> Jesus eon-honrugue lelâ adyeseim anhetomoem, kurâ domodo adawihoem aieni modo anhetomoem, Deus eon-honrugue lelâ kuomazeâni anhetomoem warâ aiemâmy. Tyispiriturylâ Deus eyanmo ingonokyly, anhekylymo wâgâ enomedâzemo ize tato aralâ. Arâ myakâwâm Deus aguehomobyry âkeá lelâlâ awyly nhutuen-honly lâpylâ.

*Jesus Cristo lelâ kâmakerim*

<sup>5</sup> Kau, onro warâ iweloem aiehoze kely mawânrâ âyanmo kâinwenily, mâuntuhomoem. Anju domodo keba Deus mâtâ ume pymâem itoem agueho, tymery Jesuslâ. <sup>6</sup> Deus itaumbyry awo wâgâ Davi, Deusram aguehobyry iwenibyem:

“Deus, âdy mâkeba xina,

(‘xina’ uguelly, idânârâ kurâ domodo xirâ onro anano modo.)

Âydâ xina itoem nuduwâpyra; inudâba aini kulâma xina.

Âyam tâenseim keba gâlâ tâise xina warâ.

Arâlâ olâ, xina agâlâ mâenanânehomba mawyly,  
xina-enlâ mawyly warâ.

<sup>7</sup> Âdiempa kulâ myakâwândy xina eon-honru mâunduypy, anju domodo eon-honru  
mâunduypy iatyay awyly.

Xirâ anaym mâungutyby modo xuturin-em xina itoem amygue olâ, tâdyren-honze, ton-  
honre warâ,  
xina tarâ pymâ-ro waunlo ara.

<sup>8</sup> Kurâ domodo ise idânârâ tâlânro modo xuturim”  
warâ iwenibyem awyly kurâ domodo wâgâ.

“Kurâ domodo ise idânârâ tâlânro modo xuturim” keduo, idânârâ lelâlâ ise kurâ domodo nhutulyem awyly. Kiempyra olâ kurâ idânârâ tâlânro modo xuturin-em kurâ domodo awyly. <sup>9</sup> Jesuslâ idânârâ tâlânro modo xuturim. Jesus tarâ onro anaym tawyly ume, anju domodo iatyay kulâ myakâwâm mâkâ. Arâ aidyly myakâwâm, tyiguehoem, idânârâ einwânni modo âsemaguehoem. Deuslâ arâ aienehoim, kurâ domodo agâ koendâ tawyly tienehon-hoem, arâ tâensein-emba awylymo umelâ. Iwerâ olâ Jesus pymâ ton-honreim, tynrenseim warâ, igueypyem, kurâem itondobyry wâgâ. <sup>10</sup> Deuslâ idânârâ tâlânro modo aieni, eni warâ. Mâkâ peba-ro watay, âdy lâpeba tâise. Iozeno lelâ Deus an-hekyly. Idânârâ tynynonro modo âsemaguely ize mâkâ, tymery agâ pymâ tynrenseinhe, tohoguezeinhe warâ itomoem. Arâ ize awyly, “ymeom” tâkeho modoem. Idânârâ Deus aguehobyry anhetuo, Jesus kâmakerin-em awyly, âsenagazedyly, iguely warâ, tunwynram katoem.

<sup>11</sup> Inakanhe aguitobyry xygakewâm Jesus, Deus xurâem tywykeba kitoem. Awylygue mâkâ inakanhe aguitobyry xygakerimbyry, kurâ inakanhe kydawyly xygakeyby warâ, âjiunwym wâgâ lelâ kydawyly, Deus lelâ Kunwym awyly. Awylygue kakadâ Jesus pymâ tynrenseim awyly, tywypazeba olâ mâkâ “Ukonodo, koudo modo” keze tynynonro modoram. <sup>12</sup> Deus itaumbyry awo wâgâ iwenibyem Jesus aguehobyry:

“Deus, âwâgâ agueze urâ ukonodoram, koudo modoram warâ.

Koendâ ise âynynonro modo duay âwâgâ auguely  
warâ iwenibyem awyly.

<sup>13</sup> Iwenibyem lâpylâ Jesus aguehobyry: “Deus, imaxilâ kâtuly; âmâlâ iegâ, uwahugâ” kely. Isaíasdâ iwenibyem lâpylâ mâkâ aguehobyry: “Tarâ urâ, Deus, ymeombyry ara kâenkyly modo agâ” kely.

<sup>14</sup> Kurâ, Jesus “ymeombyry ara kâenkyly modo” keho, tune, tunre warâ kurâ awylygue mawânkâ karalâ iazely. Arâ tyazeduo mawânkâ kâmakeze iguely, Diabu pymâem awyly, eon-honru warâ tyain-hoem. Diabu mawânkâ kyiguehoem aienehoim.

<sup>15</sup> Tâwaneim tâbyguepa âsewanihoem sanâtyby, tywymâry “Aiekâ” kehobyry ize, izepa alelâ anhedyly, myara kâinane kurâ, Diabugue kywymâgu ume, ize, izepa alelâ “Aiekâ” kehobyry aguiendly. Jesus kiuntuly iraynâ, kyiguelly tytaze ani kurâ. Jesus olâ kâmakedâ awylygue, kyiguelly kiyntabyra kydawyly iwerâ. <sup>16</sup> Anju domodo emakezeba myakâwâm Jesus âewyly, Abraão iweompyry kâmayno amaymba emakeze. <sup>17</sup> Kâmakezelâ âewyly awyly kiuntudu, âdaituo Jesus karalâ kurâem idyly awyly tutuze kurâ. Arâ aidyly, Deus aguehobyry ara adâitoem, koendâ kitoem warâ. Jesus ewanu, kurâ domodo

xurâem Deus agâ aguely, Deus aguehobyry kurâ domodoram egatuly warâ. Deus ety oday kurâ domodo eynynâ aguewâni modo iwymâry kuru aito ara aidyly. Âwâlâ Jesus âtuly kynynâ tyiguehoem; arâ awylygue mawânkâ Deus idânârâ ekanibyry modo inakanhe aito nhygakely.

<sup>18</sup> Iwerâ Deus kieinwâmpyra kyenehonze kely Diabu-ro watay, Jesuslâ kon-hondâni, Diabu aguely kinwantaguebyra kitoem. Âdynanâowâm lâpylâ mawânkâ Jesus, Diabu-ram, âsenagazemâ warâ, Deus neinwâmpyra itoem aiese Diabu keday; Diabu aguehobyry aniempyra olâ myakâwâm.

### 3

#### *Jesus tynrenseim kuru, Moisés takaze*

<sup>1</sup> Cristo eynynâ ypemugudo, Deus ingâsedbyylâ âmaemo, aunloenlâ eagâ mitomoem. Kynynâ aguenriem Deus Ingonotyby Jesus awyly xutuwâdaungâ, târâ Jerusalémdâ Deus ety oday kurâ domodo eynynâ aguewâni modo iwymâry kuru Deus agâ agueim ara. Awylygue, Jesus wâgâ mâpaunzebyra tâiseba itaungâ. <sup>2</sup> Deus aguehobyry idânârâ anhetuo, tynynonro modo eynynâ aguenriem itoem, aguehonwâny Jesus, Deusram. Saguhoem Moisésram tynynonro modo eniem aguehobyry ara. <sup>3</sup> Mâkâ âtâ itâni tuomaenzeim kuru, intâdyby takaze kehoem. Arâ lâpylâ Jesus xyrendyly, Moisés takaze kehoem. <sup>4</sup> Ânguylâ âtâ tytâze lelâ; Deus olâ idânârâ tâlânro modo xugunipyry. <sup>5</sup> Tâzemary, twymâry ety odano emyenro myakâwândy Moisés. Deus “Aiekâ” kehobyry adyese lelâ myakâwândy. Kurâ domodo Deus xurâ koendâ lelâ myakâwândy nhedyly, nhurudyly warâ. Wayam waunroem Deus agueho wâgâ aguewâm lâpylâmy. <sup>6</sup> Cristo Jesus olâ âtâ sodo imery kuru emyenro, Deus imery lelâlâ awylygue. Cristolâ âtâ oday xutuim kuru, Deus aguehobyry ara kehoem anhedyly. Kurâ Jesus einwânni modo, Kunwym Deus ety kurâ, ton-honre Jesus kieinwântuo, “Xuduze urâ” Deus kehobyry kinwânwânsezduo warâ.

#### *Tâeganepa itaungâ, Deus “Aiekâ” kehobyry aiese*

<sup>7</sup> Deus Ispiritury aguehobyry enanâguewâdaungâ, Deus itaumbypyry awo wâgâ iwenibyem mawânrâ.

“Iwerâ âyanmo Deus agueho mâindatuomo,

<sup>8</sup> âdamudomo ara tâeganepa itaungâ.

Aguelmo myakâwâm:

‘Deus wâgâ kydâtynanâdaymba kine’ kewânmomy.

Mârâ ume, myarâ myarâ warâ âdy peba ato einkâ tadakobâdaymo, aguelmo:

‘Kyzene olegue Deus inakanhe aguidyly nhemaenly, kânagazenehombalâ’ kelymo.

<sup>9</sup> Deus aguely:

‘Quarenta anu akâwâm akaemo eseze wawyly,

toenzepa kâinane xurâmoem koendonro modo agânhedyly.

Arâlâ olâ akâwâm udueryem idylymo.

“Kyzene olegue Deus inakanhe aguidyly nhemaenly, kânagazenehombalâ” kelymo.

<sup>10</sup> Aituo eagâmo yewiâpadly,

eyanmo auguehobyry adiendyseba awylymogue.

Tâeganemo akâwâm.

Auguehobyry tutuzelâ akâwâm,

izepa wato anhedylymo.

Mâkâ tani neinwâmpyra tawylymogue,

ânwa oze xuzani emyenro akaemo.

<sup>11</sup> Awylygue eagâmo yewiâpadly; ton-honre kehoem auguely:

“Ynynonro modoram kâunduly” ugueho onroam

âdaunloenlâ naintaymbamo, negawântaymbamo warâ ise;  
auguehobyry ara âdaunloenlâ târâ nekobyzeguebamo ise warâ”  
kewândymy Deus kydamudo wâgâ, warâ iwenibyem awyly Deus itaumbypy wâgâ.

<sup>12</sup> Cristo eynynâ ypemugudo, tonomeguelâ itaungâ. Tâeganepa itaungâ, Deus agueho mankabyra mitoem, Deasdâ iwague mipyra mitomoem warâ. <sup>13</sup> Deus itaumbypy awo wâgâ iwenibyem: “Iwerâ âyanmo Deus agueho mâindatuomo, tâeganepa itaungâ” kely. Saguhoem “iwerâ” kehobyry umelâ lâpylâ kurâ iwerâ. Awylygue agonromo eon-hondâdaungâ, Satanásram nâzenokuoba itomoem, Deus izepa ato aniempyra itomoem, tâeganepa itomoem, Deus einwândyly nimoba itomoem warâ. <sup>14</sup> Jesus kieinwândyly adaguhobyry aralâ, kyigueho odaji kehoem kieinwâñsezedyly watay, idânârâ iwymâryem awyly ume mâkâ agâlâ ise kurâ.

<sup>15</sup> Xirâ mawânrâ Deus itaumbypy awo wâgâ agueho:  
“Iwerâ âyanmo Deus agueho mâindatuomo,  
âadamudomo ara tâeganepa itaungâ.  
‘Deus wâgâ kydâtynanâdaymba kine’ kewânmomy.”

<sup>16</sup> Ânguya myakâwândy Deus neinwâmpyra ini, aguely tindadyly umelâ? Akaemo kydamudo Egitodâba Moisés nhatyby modo. <sup>17</sup> Ânguy agâka myakâwândy Deus quarenta anu lelâ iewiâky? Izepa ato aienibyry modo agâ myakâwândy iewiâky. Awylygue myakâwândy mâtâ âji âdy peba atodâ iguelymo. <sup>18</sup> Ânguy wâgâka myakâwândy Deus ton-honre kehoem aguely: “ ‘Ynynonro modoram kâunduly’ ugueho onroam âdaunloenlâ naintaymbamo, negawântaymbamo warâ ise; auguehobyry ara âdaunloenlâ târâ nekobyzeguebamo ise warâ” kely? “Deus wâgâ kydâtynanâdaymba kine” keypy modo wâgâ myakâwândy mâkâ aguely. <sup>19</sup> Aituo tutzelâ kurâ, “Ynynonro modoram xuduze urâ” Deus kehobyryam akaemo naimpyra atobyry, mâkâ tyeinwândyseba atomobyry wâgâ.

## 4

<sup>1</sup> Deus kyam adâkezelâ myakâwâm eyam kytâhoem, târâlâ kokobyzeguehoem warâ. Aituo auguely idânârâ âyanmo. Tâmaynelâ itaungâ, Deus “Ikobyzeguehomo xuduze urâ” kehobyry mâenmakehomba mitomoem, kydamudo ewy tonroru kehobyry odaji negawâmpyra atobyry ara. <sup>2</sup> Akaemo Deus aguehobyry indatobyry ara lâpylâ unâ koendorro tâdâsemagueho kindadyly. Akaemoem olâ Deus aguehobyry indatybymo âdyem nipyra, tindatyby modo neinwâmpyra awylymogue. Deus aguehobyry idadyly kulâ, agueho tâinwâñseba warâ watay, âdyem nitaymba kurâem. <sup>3</sup> Kurâ mâkâ einwânni modo olâ, Deus ezaxi idâze kurâ, einwânnipyryem kydawylygue, ekobyzegueze kurâ warâ, Deus aguehobyry ara. Mâkâlâ myakâwândy warâ agueim:  
“Awylygue eagâmo yewiâpadly; ton-honre kehoem auguely:  
‘Ynynonro modoram kâunduly’ ugueho onroam

âdaunloenlâ naintaymbamo, negawântaymbamo warâ ise;  
auguehobyry ara âdaunloenlâ târâ nekobyzeguebamo ise warâ” keim.

Mâtâ âji kokobyzegueho nhontybyem awyly myakâwândy, onro, iwogonro modo warâ nhugudyly iraynâlâ. Onro, kau, iwogonro modo warâ xugunipyryem, tâwanu nhewanikelylâ myakâwândy. <sup>4</sup> Warâ mawânrâ iwenibyem awyly Deus itaumbypy awo wâgâ tâzekobyzegueho wâgâ. “Sete emedyly itobyry wâgâ myakâwândy Deus ekobyzeguely, idânârâ tâlânro modo xugunipyryem” warâ iwenibyem awyly.

<sup>5</sup> Unâ tâzekobyzegueho wâgâ agueim Salmosdâ iwenibyem lâpylâ, Deus aguehobyry: “ ‘Ynynonro modoram kâunduly’ ugueho onroam âdaunloenlâ naintaymbamo, negawântaymbamo warâ ise; auguehobyry ara âdaunloenlâ târâ nekobyzeguebamo ise warâ” warâ myakâwândy Deus aguely kydamudo tâinwântâny modo wâgâ.

<sup>6</sup> Akaemo myakâwândy waunroem kuru tâzekobyzeguely wâgâ Deus aguehobyry idani. Âji tâzekobyzeguehoam naimpyramo, negawâmpyramo warâ olâ myakâwândy, Deus neinwâmpyra awylymogue. Tâlâ olâ Deusram saini modo, târâ tokobyzeguehomem. <sup>7</sup> Eagonro umenoem iduakerimbyryem Deus, “Iwerâ” kelygue nhezetâdyby, tâdâsemaguely wâgâ agueim, mâkânra tadaintoem. Iweâpa kydamudo Deus neinwâmpyra atobypy sakadybyem awyly ume, Davi aguehoem aguewânmmy Deus: “Iwerâ âyanmo Deus agueho mâindadylymo-ro watay, tâeganepa itaungâ” kely.

<sup>8</sup> Tutuzelâ kurâ, eagonro âji tâzekobyzegueho wâgâ Deus aguely awyly, Canaã anary tynynonro modoram nhegameyby wâgâ lelâba awyly. Âji tâzekobyzegueho kuru keba olâ myakâwândy Canaã, Josué, eagonro modo warâ egawântomobyry. Âji tâzekobyzegueho kuru watay, “Ynynonro modo ekobyzeguehobe ise” kewâpyra tâise Deus, kurâ domodo Canaâram egawâmpygueduo iweâpa itybyem. <sup>9</sup> Awylygue tâlâ Deus induakewâdyby modo ekobyzegueho, idânârâ tâlânro modo xugunipyryem sete emedyly itobypy wâgâ Deus ekobyzeguehobyry ara. <sup>10</sup> Aituo, kokobyzeguehoem Deus aguehobyry odaji kâgawântuo, xirâ onro anaym idânârâ kâwanu “Aietaungâ” kehobyry ewanikeimbyryem ise kurâ, idânârâ tâwanu aiedyly ewanikeimbyryem Deus ekobyzeguehobyry ara. <sup>11</sup> Awylygue toenzepa kydâzeon-hondâne Deus kieinwânsedoem, eydâ atodâ âji tâzekobyzeguehoram kâgawântoem. Ânguy mâkâ neinwâmpyra kulâ eydâ atoram negawântaymba, kydamudo âdy einwântâny modo, Canaâdâ tâzekobyzeguehoram naimpyra, negawâmpyra warâ atobypy ara.

<sup>12</sup> Ton-honreim lelâlâ Deus itaumbyry adainrim keba warâ, espada tâynâ, tâynâ alelâ iewipy emyenro. Katâduo kuodano modo kehoem tâense kurâ, myara mawânrâ Deus itaumbyry kintainduo, âdaunlo kydawyly nhutuen-honly. Ize kydato wâgâ kyangahu oday kunâgo ânguyram kiengatudâny tutuen-honze. Kunâry koendonro, inakai warâ awyly kyam tutuen-honze. <sup>13</sup> Deus xurâem olâ âdy soentyby peba. Idânârâ tâense mâkâ. Aguidyly eni, aguykely idani, kyangahu oday kunâgo, ize kydato warâ xuturim mâkâ. Mâkânra ise idânârâ aguientaymba modo wâgâ, aguykewâdobyry modo wâgâ warâ kydâkaduly.

### *Jesus kurâem agueim Deus enado*

<sup>14</sup> Jesus, Deus imery, kurâem agueim Deus enado, Deus ety oday kurâ domodo eynynâ aguewâni modo iwymâry kuru kurâ domodo eynynâ Deus agâ agueho ara. Cristo xurâem kydawyly aguykeduo, ton-honre lelâ Jesus kieinwândyly kinmoba kine.

<sup>15</sup> Jesus Deus enado tatay, kytyendâ mâkâ, ton-honremba kydawyly ume, kytyru ume, tugüiguepa kydawyly ume, kyanu ume, kydadahulily ume, kydâsenagazedyly ume warâ. Karalâ mawânkâ Jesus kurâem awyly. Kydâsenagazedo aralâ âsenagazemâ. Jesus, Deus neinwâmpyra itoem aienehonze kewânmmy Satanás, Jesus kieinwâmpyra kitoem aienehonze keho ara. Jesus olâ âdaunloenlâ Deus izepa ato aniempyra. <sup>16</sup> Awylygue Deus enadoram kainne, eagâ aguykehoem, Kytyendâ Deus, kagâ koendâ lelâ warâ; ohondybyem lelâ mâkâ, kydâzekainly idase, kienkadyze kurâ-ro watay.

## 5

<sup>1</sup> Kâzwenry Moisés inweniby ara, Deus ety oday kurâ domodo eynynâ aguewâni modo iwymâry kuru Deuslâ iduakeim, eataen-ho modo duay, tâmawyadâdoem type-mugudo eynynâ. Mâkâ mawânkâ kurâdo nhatyby Deusram egameim, inakanhe ait-omobyry xygakehoem âguynro modo xyârim warâ. <sup>2</sup> Kurâdo Deus itaumbyry koendâ nutuba awylymogue aguehobyry nhakaduomo, tytyenzemo mykâinane mâkâ, emyen-romolâ tawylygue, iozepaom adyese lâpylâ tawylygue. <sup>3</sup> Deus izepa ato adyese lâpylâ tawylygue, âguynro modo tyâze, Deusram tâgameze warâ, inakanhe adâitobyry nhygakehoem lâpylâ, kurâ domodo inakanhe aitobyry lelâba nhygakely itoem. <sup>4</sup> Ânguy

âwâlâ kulâ nâxiduagewâbyra, âwanu Deus ety oday kurâ domodo eynynâ aguewâni modo iwymâryem kuru tâitoem. Deus induakeybyem lelâ, âjigâseoly, saguhoem Arão, Moisés iwaigorou, igâsedobyry ara, waunroem kuru Deus ety oday kurâ domodo eynynâ aguewâni modo iwymâry kuruem itoem.

<sup>5</sup> Alâpylâ, Cristo tâwâlâ nâxiduagewâbyra, Deus eynynonro modo eynynâ aguenriem tâitoem. Deuslâ mâkâ iduakeim, tynynonro modo xurâem aguenriem. Deus aguewânmy eyam:

“Ymery âmâ, unwâm urâ warâ;

kurâdoram ymery mawyly kâenehonly warâ”

kewândymy. Warâ iwenibyem awyly Deus itaumbypy awo wâgâ.

<sup>6</sup> Tâlâ lâpylâ Deus wakehobyry tymeryam:

“Aunloenlâ ise ynynonro modo eynynâ yagâ aguenriem mawyly.

Saguhoem ynynonro modo eynynâ Melquisedeque\* aguehobyry ara ise yagâ amyguely”

kewândymy Deus tymeryam.

<sup>7</sup> Tarâ onro anaym Jesus awyly ume, kydâsenagazedo aralâ myakâwâm âsenagazedyly. Taenle, tânugure warâ myakâwâm Deusram nhekadyly, tâsenagazedyly nhain-hoem, tyiguely amaym tâmakehoem warâ. Mâkâ aguely idamâ Deus-ro warâ, eon-hondâmâ, mârâ nhemaen-hoem, kruz wâgâ iguehoem. Deus ize atolâ mawânkâ myakâwâm anhekyly, ize tato kulâ keba. <sup>8</sup> Toenzepa kruz wâgâ tâsenagazedu myakâwâm Jesus idânârâ Deus aguehobyry tâinwânseim lelâlâ awyly nhutuly kuru, Deus imery tawyly umelâ. <sup>9</sup> Idânârâ Deus ize ato aienibyryem myakâwâm, kâmakerin-em idyly. Jesus mawânkâ aunloenlâ Deus agâ kitoem aienehoim, idânârâ kurâ einwânni modo, Deus agâpa kyenehonwâbyra. <sup>10</sup> Deuslâ myakâwâm agueim: “Aunloenlâ ise ynynonro modo eynynâ yagâ aguenriem mawyly. Ynynonro modo eynynâ Melquisedeque aguehobyry ara ise yagâ amyguely” kewândymy Deus.

### *Jesus einwândyly kinmoba kine*

<sup>11</sup> Toenzepalâ auguedyse wato modo, Cristo, Melquisedeque ara tâwaneim awyly wâgâ, xirâ unâ wâgâ idânârâ kâengatuhoem nudupa olâ, ton-honre mawânrâ mâuntuhomoem. <sup>12</sup> Iweâpalâ Kywymâry Jesus einwânsese mawylymo. Iwâgâ koendâ xutuimbyryem mawylymo tâise, eagonro modo mâenomedâdomoem. Aypa olâ, âmaemo lakuru tonomedâzeim; iamudo tyze inwanry wâgâ lelâ adakuirim ara kulâ âmaemo, Deus itaumbypy koendâ mâuntuba lelâ mawylymogue. <sup>13</sup> Âdy Deus ize ato awyly koendâ mâuntuwâbyra âmaemo. Iamudo tyze inwanry enynri ara kulâ, âdy iozeno, âdy iozepaom warâ mâuntuba mawylymo. <sup>14</sup> Xutuwâdyby modo MON alelâ ipynigu, arâ lâpylâ koendâ Deus itaumbypy xutuwâni modo tâwâlâ ton-honreingue kehoem âzenomedâoly; tutuze mawânkâ Deus aguiendyse, aguiendyseba warâ ato.

## 6

<sup>1</sup> Cristo kieinwândyly adaguly ume kiuntuyby kulelâba kydutunre, Deus itaumbypy wâgâ kiuntuhoem ton-honreim modo wâgâ kydâsenomedâzezedoem, iamudo toku wogonro araba kitoem. Mâkâ âtâ itâni, enu nhepadâdyly, nhepaguely, nhepadâdondyly, nhepagueonly arâ adâidylygue itâdyly newanikeba mâtâ ara inkâba kine. Xirâ modo mawânrâ Jesus einwânni iwelo nhutudyze tadato:

Tâdâsemaguehoem Jesus einwândyly.

Deus izepa ato aiedyly imoly.

<sup>2</sup> Jesus tâinwânse tadawyly enehon-hoem batiza tâjidyly.

Âwanu koendonro aieniem iduakeyby nhangahu onwa tâzemary iedyly xutuly.

\* <sup>5:6</sup> Gênesis 14.17-24 warâdâ aguely etaungâ, Melquisedeque ânguy awyly mâuntuhomoem.

Xypyry etay iguewâtyby modo kurâem ietonze Deus awyly xutuly.

Deus xurâ modo aunloenlâ eagâ awyly einwândy,

mâkâ xurâ keba modo aunloenlâ âjî tâdâsenagazedodâ awyly warâ.

<sup>3</sup> Awârâ modo xuturimbyryenlâ kâpagudyly kipyra kine. Waunroem kytâzezene. Deus itaumbypy wogonro âdyo imeom xutuhoem ton-honreim kydutunre lâpylâ. Arâ ise kiuntuzedely, Deus kyam nhutuen-honly-ro watay; mâkâ lelâ mawânkâ konomery xuduim.

<sup>4</sup>Tâlâ Jesus tyeinwândyly imowânybyry modo. Nuduwâpyra akaemo nheinwântondoem. Saguhoem koendâ tutuzemolâ myakâwâm Deus itaumbypy; Deus tywâgâ eyanmo nhutuen-honly. Koendonro modo Deus tyam nhuduupy tâmakezemolâ. Deus Ispiritury eagâmolâ warâ myakâwâm. <sup>5</sup> Deus itaumbypy idamâmo. Deus itaumbypy koendonro awyly aguewânymo. Deus emary modo adyesenry anhedyly emâmo, âdy waunroem aitaynrim modo awyly emâmo, xutuwânymo warâ. <sup>6</sup> Arâlâ olâ, Cristo tyeinwândyly immolymo. Jesus einwânni modo, Jesus einwândyly immolymo watay, Deus imery kruz onwa nhakâjiondylymo waunlo ara, kurâdo enanaym âwankuem nhetondylymo waunlo ara warâ. Aunloopyryem, nuduwâpyra Deus eynnonro modo ewyem itondomoem.

<sup>7</sup> Etaungâ âpa ezary. Koendâ kopâ ihuguey-ro watay, onro koendonro tukuize, nady modo ago tâitaynze, sodo xurâem koendonro tuduze-ro warâ. Arâ lâpylâ ise Deus aguehobyry einwânni modo koendonro modo anhedylymo, akaemo agâ koendâ ise mâkâ-ro warâ. <sup>8</sup> Mârâ âpa ezay sahubâ, tygureim warâ iazely watay olâ sodo xurâem tywyneim keba awylygue tâjiaduân-honze lelâ. Arâ lâpylâ ise Deus, Jesus einwândyly immoimbyry modo peto nhâtânr onwanji nhameley, tydâpa itomoem aienehonze.

<sup>9</sup> Jesus einwândyly imowâni modo wâgâ arâ augueaki lelâlâ, tutuze olâ urâ, ton-honre lelâ mawylymo, yataen-hodo kâinwyneguuly. Jesus einwândyly mâinmoba mawylymogue, Deus nhemakeyby mawylymo tânehonze âmaemo. <sup>10</sup> Agonromo Jesus einwânni modo toenzepa mâenmawyadâdylymo, emawyadâzezelâ âmaemo-ro warâ. Arâ amituomo, Deus tywyneze lelâlâ mawylymo tânehonze âmaemo. Iozeno lelâ Deus anhekylly. Koen-donro amânhekylly nenanânehonwâbyra mâkâ, xurâ mawylymogue. Awylygue ise mâkâ agâmo koendâ lelâ awyly. <sup>11</sup> Ize wato kuru olâ âwâlâ, âwâlâ warâ âmaemo ewy xypyryam kehoem Deus einwânsze mawylymo, Deus emaymba koendonro mâenmakelymo mâinwândylymo ara. <sup>12</sup> Deus ewanuem amitaymo, tynepa mawylymo ize wato. Jesus einwândyly âdykâ imodânr modo ara âizemo wawyly. Aituo ise Deus "Xuduze urâ" kehobyry mâenmakelymo.

### *"Aiese urâ" tâkehobyry, adyese lelâlâ Deus*

<sup>13-14</sup> Enanâguewâdaungâ kydamudo Abraãooram Deus aguehobyry: "Iwâkuru modo lelâ ise âmâem agânhekylly. Toenzepa âweonzeânehonze urâ. Deuslâ urâ agueim, 'Aiese urâ' keim. Auguehobyry agânhepyra witaymba urâ" kewândymy Deus Abraãooram, agaityon-em, tymegueba warâ awyly ume. Tâzedy wâgâlâ myakâwândy aguely, ânguy takazeno peba awylygue. <sup>15</sup> Abraão tynwânwânsse myakâwândy Deus tyam aguehobyry tâlâ tâidylly. Deus aguehobyry ara adâidylly einwândyly warâ nimoba myakâwândy. Iweâpa itybyem lelâlâ myakâwândy, imezely, toenzepa iweonzely warâ. <sup>16</sup> Takadâ kehoem ton-honreim ezedy kurâdo agueho, adâkeho âkealâ awyly einwântoem. Arâ agueduomo, idânârâ nhutulymo, aguehobyry adahowanze lelâlâ awyly, âdy nugukebalâ. <sup>17</sup> "Koendonro emakeze âmaemo" tâkehobyry modo adâkehobyry adyese lelâlâ awyly, tunâry nugukeba awyly warâ nhutudyzemo myakâwândy Deus. Awylygue myakâwândy Deus Abraãooram aguely. "Urâ Deus agueim; auguehobyry aiese urâ. Iwâkuru modo ise âmâem agânhekylly" kely.

<sup>18</sup> Deus "Auguehobyry aiese urâ" keduo, "Deuslâ urâ agueim; auguehobyry agânhepyra witaymba ise urâ" keduo warâ, tutuze kurâ, âdaunloenlâ tunâry nugukeba awyly. Tâinwânsse lelâlâ kurâ. Awylygue kurâ mâkâ einwânni modo ton-honre kydawly

iwâgâ kydâsemagueli kiuntulygue, “Imakezemo urâ” kehobyry wâgâ. Awylygue ton-honre lelâ kinwânwândyly, “Xuduze urâ” kehobyry emakeze lelâlâ kydawlylygue. <sup>19</sup> Âkeá lelâlâ kieinwândyly Deus kyam nhuduly modo kienmakely, âsemaguenriem kydawlyly koendâ kiuntuly warâ, ton-honre kehoem pepi ekâjihobyry wâne âdyam nalehoba myara. Kydâsemagueli kieinwândylygue, iwerâ tâwâlâ ise Deus eydâ atoam kâgawândyly, saguhoem kurâ domodo eynynâ aguewâni modo iwymâry kuru Deus Âepanâgueho iwyantary xuahuho nhakadobyry ara, eyam taintoem. <sup>20</sup> Waunroenlâ Jesus idâwâm Deusram, idâze lâpylâ kurâ. Mâkâlâ Deus enado kynynâ agueim, kynynâ adâkely nimoba ise mâkâ-ro warâ. Deus ety oday kurâ domodo eynynâ aguewâni modo iwymâry kuru, kurâ domodo eynynâ Deus agâ aguehobyry ara. Melquisedeque Deus agâ aguely myakâwândy Deus eynynonro modo eynynâ, myara lâpylâ Jesus kynynâ aguely.

## 7

*Melquisedeque pymâ, kurâ domodo eynynâ Deus enado agueim warâ*

<sup>1</sup> Xidadâ Salém donro modo iwymâry myakâwândy Melquisedeque. (“Jerusalém” kely ezedi eagonrolâ mawânrâ “Salém” kely.) Deus toenzepa ton-honrein-am kurâ domodo eynynâ agueim lâpylâ myakâwândy mâkâ. Abraão tydykauru Ló tienmakehoem azagâ azagâ warâ pymâdo egakunibyryem odopâdly ume myakâwândy Melquisedeque, Abraão agâ oxioze idâly. Eagâ oxiodybyem myakâwândy, Melquisedeque, Abraão koendâ nhetoem nhekadyly Deusram. <sup>2</sup> Aituo myakâwândy Abraão tuduery isejiguy modo tienmakeyby mâtâ ewy, mâtâ ewy warâ, dez ieto nhetyly, Melquisedequeram tiunduhoem, tynrense tawyly tienehon-hoem.

“Pymâ koendonro lelâ aieni” keze awârâ “Melquisedeque” kely. Salém donro modo iwymâry awylygue myakâwândy “koendâ tadato iwymâry” kehonly lâpylâ. (“Koendâ tadato” keze awârâ “Salém” kely.) <sup>3</sup> Ânguy Melquisedeque nhunwym, ise, idamudo warâ awyly nutuwâbyra. Âdykâ iazely, âdara iguely warâ awyly ânguy nutuba. Âdara ewanu adaguly, âdypygueândyly warâ awyly nâdutuoba lâpylâ warâ. Arâ awylygue, Jesuslâ waunlo ara mâkâ, Jesus wâneam kynynâ agueim typygueba kehoem myara.

<sup>4</sup> Etaungâ Melquisedeque toenzepa tynrenseinhe awyly. Tynrenseinhe lâpylâ myakâwândy Abraão, iwerâ xayam tâdyren-honzelâ mâkâ-ro warâ; Abraão wâgâlâ mawânrâ “judeu imeombyry” kykehonly. Takadâ kehoem ton-honreim Melquisedeque awyly, xutuwâm olâmy Abraão. Awylygue myakâwândy tuduery modo tiengakudyby isejiguy tienmakeyby ewy dez ieto nhetyly tiunduhoem, Melquisedeque tynrense tawyly tienehon-hoem. Pymâ kuruam mawânrâ dízimo xuduly.

<sup>5</sup> Moisés kâzewenryem inweniby ara: “Ynynonro modo, âsejiguymo dez ieto ewy ietyram antaungâ urâem. Levi iweompyry, awârâ âwanu aieniem kâinduakeyby modo, emakerin-ro warâ. Dez lelâ tâlâ âmaemo-ro watay, tokalâ etywâdaungâ, xuduwaâtaungâ. Dez moedabe âmaemo-ro watay, tokalâ urâem mâundulymo. Cem moedabe âmaemo-ro watay, dez urâem mâundulymo. Arâ mawânkâ Abraão iweompyrylâ, Deus ety oday tâwanuneim modo âjipemuguenlâ âdydo imeom xuduypy emakewâni modo, eyanmo xuduwanâni modo alelâ awyly. <sup>6</sup> Kâzewenry ara, Deusram xuduypy modo emakerin-em iduakeyby keba myakâwândy Melquisedeque, Levi iwerypyry keba awylygue. Levi iweompyry modo takazeno kehoem mâkâ awyly, tutuze olâ kurâ, Abraão tyam nhudupy nhemakehobyry wâgâ. Deus kydamu Abraão koendâ nhetoem ekamâ lâpylâmy Melquisedeque, Abraão tienmakeyby ewy tyam nhudupygueduo. Abraãoram saguhoem Deus: “Koendâ ise nhedyly; toenzepa âweonzehoem aiese urâ” kehobyrylâ mâkâ.

<sup>7</sup> Melquisedeque Abraão xurâem Deusram nhekaduo olâ, tutuze kurâ, Abraão takazeno mâkâ awyly. Mâkâ Deusram ekanibyry mawânkâ tynrensein kuru, xurâem

ekadyby keba. <sup>8</sup> Akaemo Levi iweompyry modo, kurâdo Deus xurâem tysejiguy ewy nhuduypy emakewâni modo, igueim kulâ akaemo. Melquisedeque wâgâ olâ arâpa, Abraão tysejiguy ewy eyam nhududuo, iguedânyram nhuduly-ro waunlo ara, iguehobyry wâgâ iweniby peba mawânrâ Deus itaumbyry awo wâgâ. <sup>9</sup> Tâlâ tato dez ieto ewy tokalâ Melquisedequeram Abraão nhududuo, iwery Levi tuduze lâpylâ myakâwândy. (Levi iweompyry modo mawânkâ Deus etyram satyby modo emakeim.) <sup>10</sup> Melquisedeque agâ Abraão oxiday, ipa myakâwândy Levi, tydamu Abraão oday lakuru. Awylygue Levi lâpylâmy tysejiguy ewy Melquisedequeram xuduwâm, kykely.

<sup>11</sup> Levita domodo ewy kurâ domodo eynynâ agueim anhekyly wâgâlâ Deusram kurâdo âzemakeoly watay, âdaituo pylâka Melquisedeque emyenro âewyly emakerimoem, Arão ewy keba âeni awyly. <sup>12</sup> Iwerâ Arão iweryppyry keba awârâ âwanu aieniem Deus induakeyby. Awylygue awârâ Moisés tâzezewenry inweniby âdugukeoly lâpylâ, iwerâ Jesuslâ kynynâ Deus agâ agueim itoem. <sup>13</sup> Deus itaumbyry awo wâgâ tâjitainhoze, kâmakerin-em ingonokyly wâgâ, Kywymâry Jesus wâgâ. Judá iwery mâkâ, Levi iwery keba. Kâzewenry Moisés inweniby ara, Judá iweompyry ewy kydamudo eynynâ Deus enado aguewâpyramo myakâwândy. Judá domodo ewy âdaunloenlâ ânguydo imeom kurâ domodo nhatyby nemakewâbyramo, nyâmpamo, niaduâmpyramo warâ mâtâ mesa tuhugueto Deus ety odano wâgâ. <sup>14</sup> Tutuze kurâ, Kywymâry Jesus, Judá iwery awyly. Moisés olâ myakâwândy âdaunloenlâ Judá iweom wâgâ aguepa Deus ety oday kurâ domodo eynynâ aguewâni modo wâgâ, tinweniday.

### *Jesus kynynâ agueim Deus enado*

<sup>15</sup> Iwerâma tâzehoze saguho tâzezewenry xugukerimbyryem Deus awyly, tâlâ mawânkâ kynynâ Deusram agueim Melquisedeque emyenro, Levi, Arão warâ iweompyry emyenro keba. <sup>16</sup> Jesus Deus enado kynynâ aguenriem âieholy, kurâ domodo ezewenry wâgâ inkâba. Deus enado kynynâ aguenriem awyly, igueypyem, kurâem itondybyem awylygue, nigueompyra ise-ro warâ. <sup>17</sup> Iwenibyem Deus itaumbyry awo wâgâ: “Aunloenlâ ise ynynonro modo eynynâ yagâ aguenriem mawyly.

Ynynonro modo eynynâ Melquisedeque aguehobyry ara ise yagâ amyguely” kewândymy Deus tymeryam.

<sup>18</sup> Warâ myakâwândy Levi iweompyry modo lelâ Deus agâ agueim keim tâzezewenry adainly, âdyempa idyly. <sup>19</sup> Deus xurâem tywykeba nitaymba myakâwândy mâtâ tâzezewenry saguho einwânni modo. Iwerâ kinwânwânylyma koendonro lelâlâ, saguhobyry takaze kehoem, Deus eydâ atoam kaintoem tuduze mawânrâ.

<sup>20-21</sup> Tâty oday kurâ domodo eynynâ aguewâni modoram, Jesusram adâkehobyry ara, aguepa myakâwândy Deus. Jesusram lelâ myakâwândy Deus aguely, tânado kynynâ aguenriem ituo:

“Aunloenlâ ise ynynonro modo eynynâ yagâ aguenriem mawyly.

Pymâ Deus urâ agueim.

‘Aiese urâ’ uguehobyry aieni lelâlâ urâ.

Unâry kâungukewâbyra ise urâ”

kely myakâwândy, warâ iwenibyem awyly.

<sup>22</sup> Deus enado kynynâ aguenriem ituo, iwelo tâdâseinwândo tâkehobyry aieniem lelâlâ Deus awyly xutuho mâkâ Jesus. Xirâ iwelo Deus âseinwândobyry tynynonro modo agâ koendonro kuru, saguhobyry takaze.

<sup>23</sup> Saguhobyry tâdâseinwândo ume agui Deus ety oday kurâ domodo eynynâ aguewâni modo iwymârydo kuru. Igueim kulâ awylymogue, mawânrâ arâ awyly. Awylygue tokalâ igueduo, eagonro egânâpyaji âxiedyly, warâ itoem. <sup>24</sup> Jesus olâ tâtaybyanoneim keba. Igueypyem, kurâem itonmâ, nigueompyra ise-ro warâ. Awylygue aunloenlâ Deus enado kynynâ aguenrienlâ awyly. <sup>25</sup> Awylygue mâkâ kâmakeim iwerâ, aunloenlâ Deusram

kytâhoem, kâmakeze iguehobyry wâgâ. Tâlâ mawânkâ Jesus iwerâ, aunloenlâ ise tâlâ awyly; Deus ezay mâkâ, tâinwântaynrim modo eynynâ Deus agâ adâkehoem.

<sup>26</sup> Jesus mawânkâ kynynâ agueim Deus enado. Deus agâ koendâ lelâ kitoem adyese mâkâ. Eagonro ize inkâba kurâ. Mâkâ lelâ koendonro Deus xurâem, ewentâdo lâpeba mâkâ. Deus izepa ato kulâ anientaymba mâkâ warâ. Xirâ onro anaym atay, Deus izepa ato aieni modo duay lelâlâ wâne myakâwâm. Deus olâmy akaemo duaypa iemâ, kayam samâmy-ro warâ, tyanlâ. <sup>27</sup> Deus ety oday kurâ domodo eynynâ aguewâni modo kopaelâgâembaba mykâinane ânguydo imeom nhâlymo Deusram tiengamehoem, inakanhe tâitomobyry, kurâ domodo inakanhe aitobyry alelâ xygakehoem. Jesus olâ myakâwâm tokalelâ âtuly kruz wâgâ tyiguehoem, inakanhe aguitobyry tyngakehoem warâ.

<sup>28</sup> Tâzezewenry Moisésram iweniehoymby ara, uguondo modo tâjiduakeowâze mykâinane Deus ety oday kurâ domodo eynynâ aguewâni modo iwymâry kuruem, akaemo uguondo modo âdaunloenlâ koendâ aini keba awyly umelâ. Jesus olâ âdaunloenlâ Deus izepa ato kulâ aieni keba. Iweâpalâ myakâwândy Deus, Moisésram tâzezewenry tiengatubygueduo, tymeryam aguely: “Aunloenlâ ise ynynonro modo eynynâ yagâ aguenriem mawyly. Pymâ Deus urâ agueim. ‘Aiese urâ’ uguehobyry aieni lelâlâ urâ. Unâry kâungukewâbyra ise urâ-ro warâ” kely. Arâ adâkehobyry nugukewâbyra Deus. Deus imery idânârâ Deus aiedyse ato aiemâ, aiesezelâ-ro warâ.

## 8

### *Iwelo tâdâseinwândo ume Deus enado kynynâ agueim Jesus*

<sup>1</sup> Kywâgâ agueim Jesus awyly mâtuntudyzemo wato, Deus enado kynynâ adâkeze mâkâ. Târâ kaynâ mâkâ ekadybyem awyly, tynreim ejidydâ, Deus ton-honreim eahoru eynynâ. <sup>2</sup> Saguhoem kurâdo eynynâ Deus agâ aguewâni modo iwymâry kuru tâwanu anhedyly mykâinane âtâ tâjitubygue itâdyby sahomery oday Deus Âepanâguehodâ. Iwerâ olâ Jesus Deus enado kynynâ aguely, âji Deus anhetybydâ.

<sup>3</sup> Kurâ domodo eynynâ aguewâni modo iwymâry kuru iduakely, Deus iomaze-hoem xuduypy modo, ânguydo imeom inakanhe adâjítobyry xygakehoem xyâypy warâ Deusram egamenriem. Âdy eyam nhegamely peba kulâ Deus Âepanâgueho odaji negawântaymba mykâinane. Arâ lâpylâ kynynâ Deus agâ agueim Jesus âdype awyly, Deusram tiengamehoem. Awlygue myakâwâm tâwâlâ âtuly, inakanhe aguitobyry xygakehoem. <sup>4</sup> Tarâ onro anaynlâ Jesus watay, Deus ety oday kynynâ aguenriem nitaymba tâise; ânguydo imeom nhunru negameba tâise warâ, Judá iwerypyry awlygue. Levi iweompyry modo lelâ mawânkâ Deus ety oday âsewanirim, Deus xurâem satyby emakerim, kâzewenry ara.

<sup>5</sup> Iwerâ Deus enado Jesus anhekyly emyenro mawânkâ kurâ domodo eynynâ Deus agâ aguewâni modo iwymâry kuru anhekyly, âzekiba kehoemba olâ. Arâ lâpylâ âtâ Deus etyem itâdyby, târâ Deus eydâ ato donro ekudo lâpylâ awyly, eara kehoemba olâ. Warâ myakâwândy Deus, Moisésram aguely târâ iwy wâgâ, âtâ Deus xyrento saunâdyly saguly iraynâ: “Âdaunlo âtâ awyly kâenehon-hombyry ara kehoem iety itânehongâ” kely myakâwândy eyam. <sup>6</sup> Deus, Jesus âwanu anhekylyem aguehobyry koendonro kuru, Deus ety oday kurâ domodo eynynâ aguewâni modo iwymâry kuru anhetyby takaze kehoem. Iwelo tâdâseinwândobypy, kydamudo agâ saguhoem âseinwândobypy takaze koendonro kuru keim mâkâ. Takaze koendonro kuru, tâkeze urâ, mârâ saguhobyry einwânnipyry modoram “Koendonro xuduze urâ” kehobyry mawânrâ ise kienmakely.

<sup>7</sup> Saguho tâzezewenry koendâ lelâ einwândyly-ro watay, iwelo tâdâseinwândo Deus anientaymba tâise. <sup>8</sup> Saguho tâzezewenry tynynonro modo neinwâmpyra awyly tiuntuduo myakâwândy Deus aguely:

“Sainse Israel donro modo agâ, Judá donro modo agâ warâ iwelo tâdâseinwândo agânheto.

<sup>9</sup> Egitodâba idamudomo kâentyday eagâmo kâseinwândobyry ara inkâba ise,  
xirâ iwelo tâdâseinwândo eagâmo agânhekyly,

Mârâ ume tâmayne kehoem akâwâm akaemo târâpa kâentylymo,  
tâjiunwym tymery emary wâgâ sawâni ara.

Eagâmo kâseinwândobyry araba olâ akâwâm aidylymo.

‘Amyguehobyry einwâNSE xina’ keypyem,  
kâunrutomobyry araba kulâ akâwâm aidylymo.

Yeinwâmpyra atomobyry wâgâ akâwâm ‘Tâwâlâ pylâ itaungâ’ uguelly.

<sup>10</sup> Israel domodo agâ tâdâseinwândo iwelo agânheto saintuo warâ ise agânhedyly:  
Kâunruto mo koendâ nhutuhomoem aiese urâ,

yeinwântomoem aienehonze urâ-ro warâ;

mârâ tâzezewenry iodaymo,

nhangahumo oday warâ iwenibyem awyly-ro waunlo ara kehoem ise,  
âdaunloenlâ nenanânehomba itomoem.

IDeusrymo ise urâ, ynynonro modo ise akaemo-ro warâ.

<sup>11</sup> Ânguy ywâgâ nenomedâdondaymba ise;  
idânârâ utudâmo lelâ awylygue,

‘Kywyrmâr Deus xutuwâdaungâ’ ânguy kewâpyra ise.

Pymâdo, kurâdo âdy modo warâ utuzemo.

Kurâdo âdy keba modo utuzemo lâpylâ warâ.

Ânguy utudânrâ lâpeba ise.

<sup>12</sup> Idânârâ inakanhe aitomobyry xygakeze urâ.

Âdaunloenlâ kâenanâgueondaymba ise urâ izepa wato anhetomobyry”  
kewândymy Deus, warâ itaumbypyri iwenibyem awyly.

<sup>13</sup> Iwelo tâdâseinwândo wâgâ Deus agueduo, saguho tâdâseinwândobyry ton-honremba  
ienipyryem tawylylâ Deus agueho. Mârâ saguhobyry xuzadylylâ ise-ro warâ.

## 9

### Âdara Deus iomazeândyly tarâ onro anaym, târâ kaynâ warâ awyly xutuho

<sup>1</sup> Saguhoem kydamudo agâ Deus âseinwânday, âdara tohoguedyly awyly aguewânm. Âtâ tâjitubygue itâdyby tohoguedo, tarâ onro anano wâgâ aguewâm lâpylâmy. <sup>2</sup> Mârâ âtâ nhehugâdylymo myakâwândy Deus aguehobyry aralâ. Azagâ myakâwândy sahomegu; sahomery imâsedo waunroem; sahomery imeimbyry pylâ xypyrydâ-ro warâ. Tânâmize sahodâdybyem myakâwândy. Waunro sahomery myakâwândy “Tynrenseim” kelygue tâzekeim. Târâ myakâwândy tâdâzesagon-ho modo sawo, mesa pão Deusram egamewâdyby ekanâdo warâ. <sup>3</sup> Mârâ sahomery xypyry myakâwândy “Deus Âepanâgueho” kelygue tâzekeim. Tyxieingue mykâinane sahomegu. <sup>4</sup> Târâ mawânrâ myakâwândy mesa ourugue xygatyby, edunu tyânrângueim iaduânto, kaixa tynnonro modo agâ âseinwândobyry enanâgueho warâ. Ourugue etydâdyby myakâwândy mâtâ kaixa. Ilâ odaylâ myakâwândy manâ etary ourugue xygatyby. Egitodâba israelita domodo egasebygueduomo ipynirymoem Deus nhuduypy myakâwândy manâ. Kaixa oday tâlâ lâpylâ myakâwândy Arão eamatagorubyry iluseyby. Tâlâ lâpylâ myakâwândy azagâ lelâ tuhu tapologueim kydamudo ezewenry Deus inwenihobyry. <sup>5</sup> Mârâ kaixa wâgâ myakâwândy XYDYK warâ azagâ anju “querubins” kelygue tâzekeim ekudo modo; Deus târâlâ awyly xutuho myakâwândy akaemo. Tawâtarigue myakâwândy mâtâ kaixa enahuru wâgâ awylymo. Mârâ kaixa enahuru mykâinane tâjiunugue tukuizeim, Deus, inakanhe

adâjitobyry modo nhygakehoem. Xirâ unâ wâgâ imâem adâkeze tâise urâ. Xirâ ume awârâ wâgâ kâengatuombyra olâ ise urâ.

<sup>6</sup> Aituo warâ myakâwândy Deus ety oday aieholys. Kopaelâgâembaba mykâinane Deus agâ kurâ domodo eynynâ aguewâni modo Sahomery Tynrenseim odaji egawândylymo, Deus aguehobypy ara adâitomoem. <sup>7</sup> Mârâ sahomery xypyry oday Deus Âepanâgueho odaji egawânni olâ mykâinane kurâ domodo eynynâ aguewâni modo iwymâry kuru lelâ. Tokalâ anu wâgâ, tokalelâ mykâinane egawândyly. Kudupi oday ânguydo imeom xyâypy iunugue tâmase lelâ egawândyly. Tâjiunugue mykâinane kaixa inwinkely, Deusram tienkadoem. “Inakanhe awitobyry, kurâ domodo inakanhe aitobyry warâ xygakegâ, tiuntudânryenlâ xina inakanhe kulâ aitobyry” warâ tâkeze mykâinane.

<sup>8</sup> Mârâ tâdâseinwândo saguhobypy ume, Deus Âepanâgueho âji odaji kurâ domodo negawântaymbamo mykâinane. Kurâ domodo eynynâ Deus agâ aguewâni modo iwymâry kuru lelâ egawânni. Warâ myakâwândy Deus ehoguedo âtâbe onro anaym awyly ume adâjidyly. <sup>9</sup> Mâkâ ânguydo imeom, âdyo imeom warâ kydamudo Deusram saguhoem nhegameybymo ton-honremba mykâinane, mâtâgue Deus iomazeânze kewâni modo tâwentâgueba niepyra awylygue. Awârâ mawânrâ Deus Ispiritury kiuntudyze ato. <sup>10</sup> Saguhobypy modo nheinwânyly mykâinane tâentuneim modo lelâ, tâinzeim, tâinzenry, tânyzeim, tânyzenry, todokoguely wâgâ, Deusram âdyo imeom egamely wâgâ warâ mykâinane aguelymo. Mârâ tâzezewenry kyangahu oday kunâgo wâgâ, ize kydato wâgâ, kuodano Deus wâgâ aguykeho wâgâ warâ aguepa mykâinane. Saguho tâzezewenry einwândyly myakâwâm, iwelo einwândyly adaguly ara kulâ.

<sup>11</sup> Cristo olâ âemâ. Deus enado kynynâ agueim mâkâ, iwelo tâdâseinwândo agueho ara. Tarâ onro anaym Deus ety oday kurâ domodo eynynâ aguewâni modo anhetyby takaze kehoem, mâkâ kurâem anhetyby koendâ awyly. Deus aiedyse ato lelâ mâkâ anhekyly. Âji tynrenseindâ kehoem mâkâ âsewanily iwerâ, mâtâ âtâ xirâ anaym Deus ehoguedoem itâdyby takaze kehoem tynrenseindâ. Uguondo kulâ anhetyby mâkeba mâkâ ejidy iwerâ, tarâ onro anano keba-ro warâ. <sup>12</sup> Kayam idâypyem, âji Deus Âepanâgueho kuru odaji egawânmâmy Cristo. Inakanhe aguitobyry xygakeze myakâwâm egawândyly. Body iunu keba, bizeru iunu keba warâ myakâwâm nhakyly; tunu lelâlâ myakâwâm nhakyly Deusram, inakanhe aguitobyry xygakehoem. Arâ myakâwâm kydatâsemagueho typguebaombe nhenehonly. Tunugue myakâwâm nhepywadyly. Tokalelâ olâ myakâwâm mâkâ iguely; iguezesedyly nipyra.

<sup>13</sup> Saguhoem, Deus ety oday kurâ domodo eynynâ aguewâni modo body, tapirâ warâ xyâypy iunugue Deus aguehobypy sakaniubyry modo tywinkezemo mykâinane. Arâ lâpylâ mykâinane novilha nhâlymo. Eguepybyry nhaduândylymo. Iwelupâry etary odaji nhetadâguylomo. Awylygue, ânguylâ Deus xurâem inakanhe idly-ro watay, âdiempa mâtâ pelupâ ewy nhetylymo, paru agâ intugândylymo, mâkâ inakanhe aityby inwinke-lymo warâ, tywykeba itoem. <sup>14</sup> Body, tapirâ warâ iunu ton-honre tywykeba kyesetay, Cristo iunu kruz wâgâ apâdyby lakuru ton-honreim kuru, inakanhe aguitobyry xygakehoem! Deus Ispiritury Âdykâ Iguedânry eon-honrugue Cristo tâwâlâ myakâwâm âtuly Deusram, kynynâ tyiguehoem. Mâkâ âdaunloenlâ Deus ize ato sakadânry iunu olâ tywykeba kehoem kyetâ Deus xurâem. Arâ ise Deus iguedânry xurâem kydatâsemagueho typguebaombe nhenehonly, iaduândyly awârâ keba ise aguienkyl.

### *Iwelo tâdâseinwândobe idyly Jesus iguehobypy wâgâ*

<sup>15</sup> Deus tynynonro modo agâ iwelo tâdâseinwândo anhedyly myakâwâm Cristo anhetyby wâgâ. Cristo iguely myakâwâm saguho tâzezewenry einwânnipyry modo inakanhe itobyry xygakeze lâpylâ, Deus tynynonroem ingâseguyly modo “Koendonro adaindânry xuduze urâ” kehobypy nhemakehomoem.

<sup>16-17</sup> Ânguylâ pape testamento inwenily, tyigueduo, ânguy xurâem turâ xurâbyry modo awyly xutuho watay, niguepa kulâ mâkâ xurâem ise kehobyry âdy tâmaxi ni-etaymba. Sodo igueduo lelâ mâtâ pape âzeinwân-honly. <sup>18</sup> Arâ lâpylâ mykâinane saguho tâdâseinwândo einwântoem, âguyndro modo xyâly, mâkâ iunugue myakâwândy âdydo imeom Deus ety odano modo iwinkely-ro warâ.

<sup>19</sup> Deus tâzezewenry nhuduypy emakerimbyryem, kurâ domodo idâtyguywânmy Moisés. Ilâpyryem myakâwândy eyanmo nhegatuly idânârâ Deus aguehobyry. Agueimpypyem, bizeru, body warâ nhâen-honly, iunu etyhoem. Kaneru xuhudu sapabilbyb hissopo iwataly onwa tienkâjibygueduo pylâ munru paru agâ itugândyby ikaji inkuily; tâzezewenry sawo pape ituwymby inwinkely. Ilâpygueduo kurâ domodo âtâdyguyby inwinkewâdyly lâpylâ. <sup>20</sup> “Xirâ tâjiunu mawânrâ Deus agâ kydâseinwândobryy adaguly xutuho” kewândymy Moisés eyanmo. <sup>21</sup> Tâjiunugue mâtâ âtâ, Deus ety kehomo, tywinkeze lâpylâ myakâwândy. Deusram tuduzeim modo sawo, âdydo imeom idânârâ awâtârâ Deus ehoguedo modo onwa warâ aiemâ lâpylâmy. <sup>22</sup> Deus, Moisésram kâzewenry inwenien-hoymby warâ iwenibyem awyly: “Deus xurâem tywykeba kitoem, idânârâ kysejiguy modo, ânguydo imeom xyâypy iunugue tywinkeze lelâ” kely. Tâjiguely peba kulâ, munru tyapâzeba kulâ warâ, Deus inakanhe tadalafil nygakewâbyra.

### *Cristo igueduo, inakanhe aguitobyry âdygakeoly*

<sup>23</sup> Onro anano Deus ety, âdydo imeom iodano modo warâ tânehonze âdiempa âdara târâ kaynâ Deus eydâ atodâ awyly. Târâ mawânrâ Deus ety kuru. Saguhoem idânârâ Deus ety odano modo ânguydo imeom iunugue lelâ mykâinane tywykeba itoem aiehol. Iwerâ Deusram kaintoem, aunloenlâ eagâ kitoem, ânguydo imeom xyâypy iunu takazeno samâmy Jesus Deus enado tunulâ, tâwentâzeba kitoem.

<sup>24</sup> Igueypyem, Cristo, Deus ezaxi lelâlâ egawânmâmy, âtâ uguondo kulâ intâdyby odaxiba myakâwâm egawândyly. Deus ety kaynonro ekudo kulâ mykâinane mâtâ Deus ety kehomo taunlo. Jesus Deus ezaxi egawândyly myakâwâm, kynynâ aguenriem. Iwerâ kynynâ mâkâ aguely târâ. <sup>25</sup> Deus ety oday kurâ domodo eynynâ aguewâni modo iwymâry kuru mâtâ anu wâgâ lelâba mykâinane Deus Âepanâgueho odaji egawândyly. Myarâ tâgawântay, aunlolâ mykâinane ânguydo imeom iunugue tâmase egawândyly.

Cristo egawânmâ lâpylâ Deus eydâ atoam, âwâlâ âtuze, inakanhe kydawyly xygakehoem. Tokalelâ olâ myakâwâm mâkâ aidyly, aisezedly nipyra. <sup>26</sup> Aunlolâ âtuzezedly-ro watay, onro âtugudyly umelâ, tâise âsenagazezedly, iguezesedyly warâ. Aypa olâ, xypyryam idâze awyly ume, tokalelâ xarâ onro anaxi âemâ, kurâem tyiguehoem Deusram âtuze, inakanhe aguitayn-hobyry modo xygakehoem, âdaunloenlâ nigueompyra tâitoem warâ.

<sup>27</sup> Idânârâ igueze kurâ tokalelâ. Ilâpygueduo ise Deus aguely âdy kagâ aini wâgâ-ro warâ, eagâ kaynâ atoam kytâly atay, âji tâdâsenagazedoam kytâly atay warâ. <sup>28</sup> Onro anaxi odopâze mâkâ; inakanhe aguitobyry xygakeonzeba, igueonseba warâ olâ ise mâkâ odopâdyly. Tokalelâ mawânrâ awârâ aimâ. Odopâdyly enuenni modo idânârâ emakeze ise mâkâ odopâdyly.

## 10

<sup>1</sup> Moisés tâzezewenry inweniby kintainduo, âdiempa kulâ kiuntuly âdara Deus inakanhe aguitobyry modo nhygakely awyly wâgâ, âtâ ekudobyry âdaunlo mâtâ âtâ awyly âdiempa kulâ nhutuen-hon-ho ara, kurâ âsegudobyry âdaunlo mâkâ awyly âdiempa kulâ nhutuen-hon-ho ara warâ. Aunlolâ mykâinane kurâdo Israel donro modo Deus etyram ânguydo imeom nhadylymo, anu, anu warâ, tyân-homoem, Deusram tiengamehomoem. Arâ aidylymo umelâ, Deus xurâem tywykeba nipyramo olâ myakâwândy. <sup>2</sup> Inakanhe aitomobyry xygakeybyem lelâlâ-ro watay, tâwentâguezebamô tâise, ânguydo imeom xyâypy iunu

Deusram egamely imoimbyrymoem tâise warâ. <sup>3</sup> Arâpa olâ. Aunlolâ tâguy nhadylymo Deus etyram, târâ tâwanuneim modo nhâhoem, iunu pylâ Deusram nhegamelimo itoem. Inakanhe adâitobyry tânanâguezelâ mykâinane akaemo. Aituo pylâ tâwentâguelâ tawyly nhutulymo-ro warâ. <sup>4</sup> Tapirâ, body warâ iunu âdaunloenlâ ton-honruneba ânguylâ inakanhe aitobyry xygakeze.

<sup>5</sup> Deus itaumbyry awo wâgâ iweniby enanâguewâdaungâ, Cristo Deusram aguehobyry, xarâ onro anaxi tâewly iraynâ:

“Deus, ânguydo imeom xyâypy iunu, âdydo imeom warâ kurâ domodo nhuduypy ize inkâba âmâ.

Awylygue wodo mâungudyly.

<sup>6</sup> Mâkâ ânguydo imeom itydâ xyâypy, iaduântyby warâ mâen-hoguedaymba âmâ.

Inakanhe adâitobyry mâyngakehoem âyam egameyby, omazeândaymba.

<sup>7</sup> Awylygue auguely:

“Talâ urâ, agânhedyse mato aiese on-hondybyem.

Ywâgâ amyguehobyry iweniby ara aidyse wawyly”

kewândymy Deusram, warâ Salmosdâ iwenibyem awyly.

<sup>8</sup> Waunroem kuru: “Ânguydo imeom xyâypy iunu, âdydo imeom warâ kurâ domodo nhuduypy ize inkâba âmâ. Mâkâ ânguydo imeom itydâ xyâypy, iaduântyby warâ mâen-hoguedaymba âmâ. Inakanhe adâitobyry mâyngakehoem, âyam egameyby, omazeândaymba” kewânmy Cristo, Deusram. Moisés tâzezewenry inweniby agueho aralâ aidylymo umelâ myakâwândy arâ aguely. <sup>9</sup> Mâkâlâ tyâzeim tawyly aguewâm lâpylâmy. “Talâ urâ, agânhedyse mato aiese on-hondybyem” kewânmy Cristo Deusram. Kruz wâgâ tyiguehoem Cristo âstuduo, iwelo tâdâseinwândo nadagu. Saguhoem inakanhe tadarwly xygakehoem ânguydo imeom xyâly âdyempa niedâ Deus. <sup>10</sup> Deus ize ato mawânkâ myakâwâm Jesus Cristo anhekyly. Tokalelâ kruz wâgâ tyiguehoem âtuwâm âdaunloenlâ nigueompyra tâitoem. Aituo, Deus xurâem, tywykeba kurâ Jesus einwânni modo. Âdy inakai kâwentâdo lâpeba kurâ.

<sup>11</sup> Kopaelâgâembaba Deus ety oday kurâ domodo eynynâ aguewâni modo ânguydo imeom nhâlymo, iunu, nhunru warâ Deusram nhegamelimo, judeu domodo xurâem ekadoem. Tokalelâba aidylymo, kopaelâgâembaba awârâ âwanu aieseze awylymo. Arâ lelâlâ wâne aidylymo, ânguy inakanhe aito nygakeba olâ awârâ. <sup>12</sup> Jesus Cristo olâ âwâlâ âtuwâm, kruz wâgâ tyiguehoem. Tokalelâ myakâwâm iguely, Deus izepa ato aguenta by xygakeze. Aunlolâ mâtâ koendonro kurâem anhetyby. Idânârâ inakanhe adâitobyry xygakehoem tâtuze myakâwâm. Âdaunloenlâ nâtuondaymba ise mâtâ tyigueontoem. Igueypyem, kurâem itondybyem, kau odaxi âkuwâm. Deus eahoru eynynâ mâtâ ekadybyem awyly, pymâem kuru tâitoem. <sup>13</sup> Târâ Cristo, Deus tuduery modo tuhuru iaxi nhedly ara. <sup>14</sup> Tokalelâ myakâwâm mâtâ iguely, inakanhe aguitobyry xygakehoem, tywykeba kitoem warâ. Tyigueduo, Deus eynynonro modo aunloenlâ tâwentâguezein- emba ienehonwâm.

<sup>15</sup> Deus Ispiritury mawânkâ kyam adâkeze inakanhe aguitobyry xygakeze Jesus igue- hobyry wâgâ:

<sup>16</sup> “Israel domodo agâ tâdâseinwândo iwelo agânheto saintuo warâ ise agânhedyly.

Kâunrutomo koendâ nhutuhomoem aiese urâ,

yeinwântomoem aienehonze urâ-ro warâ;

mâtâ tâzezewenry iodaymo kehoem nhangahumo oday kehoem warâ iwenibyem awyly- ro waunlo ara ise,

âdaunloenlâ nenanânehomba itomoem”

kewândymy Deus Ispiritury.

<sup>17</sup> Ilâpyryem aguely:

“ ‘Idânârâ inakanhe aitomobyry xygakeze urâ.

Âdaunloenlâ kâenanâgueondaymba ise urâ izepa wato anhetomobry' "kewândymy Deus Ispiritury, warâ iwenibyem awyly Deus itaumbyry awo wâgâ.

**18** Inakanhe aguitobyry xygakeybyem mawânrâ, ânguydo imeom, âdyo imeom warâ tâgameduneba iwerâ. Jesus iguehobyry wâgâ tâwentâguezeba kydawyly Deus xurâem.

*Kâkuâdâni peba kurâ, Deus agâ aguykehoem*

**19** Awylygue, Cristo eynynâ ypmugudo, Deusram iwaguepa kaintoem, eagâ aguykehoem warâ, âdy kâkuâdâni lâpeba iwerâ kurâem kruz wâgâ tunu tyapâze Cristo iguehobyry wâgâ.

**20** Sahomery xuahuru txiem Deus Âepanâgueho xuahuim myakâwâm iotagâ adaugeim, Jesus kruz wâgâ igueduo. Kurâ domodo eynynâ aguewâni modo iwymâr kuru lelâ mykâinane myarâ egawânni. Iwerâma tâwlâ Deus ezaxi kâgawândy, eagâ aguykehoem. Âwâlâ myakâwâm Jesus âtuly tyiguehoem; awylygue âdy kâkuâdâbyra awyly, Deusram iwaguepa kaintoem. **21** Iwerâ Jesuslâ kynynâ Deus agâ agueim, mâkâlâ Deus xurâ modo eni, saguhoem Deus ety oday kurâ domodo eynynâ aguewâni modo iwymâr kuru, mâtâ âtâ nhetobyry ara, Deus xurâ modo eynynâ agueho ara warâ.

**22** Awylygue Deus iopaji kainne, eagâ aguykehoem. Kyzehoguene lelâlâ mâkâ. Tâwentâzeba kâendyly kyzeinwâne lelâlâ warâ, einwânni ara kidyly kulâ warâpa. "Aiese urâ" tâkehobyry aiese awyly kyzeinwâne; kieinwâmpyra kipyra kine. Inakanhe aguitobyry mâkâna kyzegatunre, nhygakehoem eyam kyzekane-ro warâ. Arâ ise xurâem tywykeba kydawyly, paru tywykenrygue igokeyby ara kydawyly. **23** Deus "Aiese urâ" tâkehobyry aieni lelâlâ awyly kiuntulygue, tynynonro modoram koendonro Deus nhuduly kienmakely kinwânwândyly kinmoba kine. Tutuzema kurâ, adâkehobyry aiese lelâlâ Deus awyly. **24** Âdara kataen-ho keon-hondâdyly wâgâ kydâpaunzene, tagonrodo inwynedomoem lelâlâ, eagonro modo xurâem koendonro lelâ anhetomoem warâ. **25** Jesus einwânni modo Deus ety oday tâdâtâdyguyl imoimbyry modo araba kine! Deus ehogueze tâdâtâdyguyl kinmoba kine. Kywymâr Jesus sainto iwaguepa awyly tutuze kydawylygue, âjigue kydâzeon-hondâne.

**26** Unâ iozeno Cristo wâgâ agueim xuturimbyryenlâ, Jesus kieinwâmpyra kidyly. Saguhoem aguenta by modo aguiendyly watay, ânguy igueonni lâpeba ise, inakanhe aguitobyry xygakehoem. **27** Deus izepa ato aiese sahozeyby eanu lelâ ise xypyry etay aini modo wâgâ. Deus enado tâepanâgueduo, Deus tyam aguely idase: "Âji tâdâsenagazedoam ise mydâly, peto nhâtânryam, uduery modo iaduhoram" kehonze. **28** Saguhoem mykâinane pymâ domodo tâzezewenry Moisés inweniby sakani byry tyâen-honze, azagâ, azagâ tokalâ warâ kurâdo mâkâ inakanhe aidly enipyrybe-ro watay. Nityembyra kehoem mykâinane xyâhoem pymâdo aguelymo.

**29** Awârâ takaze kehoem ise Deus imery imenibyry âsenagazedyly. Jesus iunu âwankuem ieni, âdyem nitaymba awârâ keim; inakanhe kehoem ise âsenagazedyly. Kruz wâgâ Jesus Cristo tunu nhapâdobyry wâgâ myakâwâm Deus tynynonro modo agâ tâseinwândo iwelope nhedyly. Ilâ wâgâ mawânkâ Deus kâwentâguedo peba nhedyly. Inakai kuru ise Deus Ispiritury kagâ koendonro iwykeim âsenagazedo. **30** Deuslâ myakâwândy warâ agueim: "Kankanehonwâbyra ise urâ. Aitomobyry ara ise nhepywadomoem auguely" keim. Watâkeze lâpylâ: "Urâ iwymârmo ise ynynonro modo âdara awyly agueim; eyanmo augueho nhakadylymo-ro watay enagazenehonzemo urâ" kewândymy Deus. Warâ iwenibyem awyly Deus itaumbyry awo wâgâ. **31** Kyanoem lelâlâ Deus Âdaunloenlâ Iguedâny emaym einwântânry modo awyly, itaumbyry sakani nhenagazedo tutuze kydawylygue.

**32** Enanâguewâdaungâ, Jesus mâinwândylymo adaguday aityby modo. Deus itaumbyry imâem mâuntuduomo, angahumo oday Deus nhajimanâdyly-ro waunlo ara mienehomo. Eynynonro keba modo inagazedylymo lelâlâ wâne, einwândyly mâinmoba olâ ani

âmaemo, adaimpâni adameodânry ara. <sup>33</sup> Âdatay tâzenagazeoze, tâjiwykeoze warâ ani âmaemo kurâ domodo enanaym. Âdatay âpemugumo Cristo eynynonro âzenagazeolymo tâense âmaemo, eagâmolâ mâsenagazedylymo waunlo ara. <sup>34</sup> Jesus einwânni modo etadâdyby modo tytyenze ani âmaemo; awylygue eon-hondâzemo eyanmo IU midylymo. Idânârâ tâlâ matomo emakeduo, mâtityembra ani âmaemo; mohomaendylymo lelâ, mâtâ koendonro adaindânry emakerimbyryem mawylymogue, mâtâ âdaunloenlâ imaymo âzemakeodânry.

<sup>35</sup> Aituo, Jesus mânwândylymogue mâzenagazeolymo watay, einwândyly kâjimowâdaundâ. Mânwânsededylymo watay, emakeze âmaemo koendonro “Xuduze urâ ynynonro modoram” Deus kehobyry. <sup>36</sup> Mâzenagazeolymo Cristo xurâem mawylymogue watay, emaenwâdaungâ, einwândyly mânmobamolâ, Deus ize ato amânhetomoem. Arâ ise tâlâ mawylymo koendonro “Xuduze urâ ynynonro modoram” kehobyry.

<sup>37</sup> Xirâ enanâguewâdaungâ Messias saindyly wâgâ, Deus itaumbypy awo wâgâ iweniby, mâtâ Deus ingonokyly wâgâ aguehobyry:

“ ‘Iweâpa nitaymba ise auguehobyry âewyly;

Iweâpa nitaymba lelâlâ ise.

<sup>38</sup> Urâem tywykenry modo aunloenlâ ise yagâ awylymo,  
yeinwândylymogue;

Yeinwânnipyryem yeinwândyly inmolymo watay olâ,  
eagâmo tuomareba ise urâ,  
enagazenehonzemo urâ-ro warâ’ nyguemy Deus.  
Awylygue Deus einwânsededaungâ”

warâ iwenibyem awyly Deus itaumbypy awo wâgâ.

<sup>39</sup> Tâsenagazedylygue kulâ Jesus einwândyly imorim modo emyenro mâkeba kurâ. Âji tâdâsenagazedoam ise akaemo idâly. Kurâ olâ emakeybyem, Jesus lelâ kieinwânkyl. Awylygue ise kytâly Deus eydâ atoam.

## 11

### *Saguhoem Deus einwânni modo wâgâ kiento*

<sup>1</sup> Koendâ kiuntuhoem âdara Jesus einwândyly wâgâ adâjidyl wâgâ ise auguely. Deus kieinwândy-ro watay, aguehobyry emakeze kydawyly tâinwânsel lelâlâ kurâ, mâtâ emaymba kienmakely kinwânkyl. Kientâny modo tâlâ lelâlâ awyly kiuntuholâ awârâ. <sup>2</sup> Tyeinwândylygue myakâwândy saguho Deus einwânni modo Deusram âzehogueolymo.

<sup>3</sup> Deus tâinwânsel kydawylygue, tutuze kurâ, idânârâ tâlânro modo tytanrungue kulâ Deus nhugutyby awyly, âdygue inkâba myakâwândy idânârâ kienkyly modo nhugudyly. Arâ myakâwândy mâtâ tâensemny modo, tâensemny modo warâ nhugudyly.

<sup>4</sup> Deus tâinwânsel myakâwândy Abel. Awylygue nhegameyby kordeiru xyâypy Deus nhehogueguyl kuru, iwaigoru Caim typi ezano ewy nhegameyby takaze. “Yeinwândylygue, uguondo koendonro âmâ” kewândymy Deus eyam. Adão, Eva warâ umelâ myakâwândy awârâ aidyly. Arâlâ olâ, Abel wâgâ aguely kindatuo, konomedâdyly Deus einwândyly kiuntuhoem, Abel nheinwântobyry ara.

<sup>5</sup> Deus tâinwânsel myakâwândy Enoque. Awylygue myakâwândy xuzadyly. Deuslâ myakâwândy xirâ onro anaymba sani. Ânguy nepyra myakâwândy, Deuslâ tâzaxi sani awylygue. Enoque toenzepa Deus tuomazeânehonze kely iwenibybe Deus itaumbypy awo wâgâ. <sup>6</sup> Deus kieinwâmpyra kulâ nuduwâpyra iomazeândoem. Deus agâ aguykedyze kurâ-ro watay, tâlâ mâtâ awyly kyezinwâne lelâlâ, tyam saini modoram koendonro xuduze awyly kyezinwâne lâpylâ warâ.

<sup>7</sup> Deus tāinwānse myakâwândy Noé. “Pepi imâsedo âtâ emyenro xygakâ. Toenzepa kopâ igonose urâ, idânârâ onro wogonro modo adain-hoem” Deus kely idamâmy. Âdykâ paru kaynâpa ihuguely nepyra myakâwândy Noé\*. Alâ olâ myakâwândy pepi imâsedo nhygadyly lelâ, Deus tyeinwândylygue, ihuguewânm my kopâ-ro warâ. Noé, ety odano modolâ warâ olâmy âsemaguewâm mâtâ pepi imâsedo oday tawylymogue. Eagonro modo olâ myakâwândy, Deus neinwâmpyra tawylymogue, pepi imâsedo odaji negawâmpyramo. Awylygue myakâwândy parugue tyense iguewâdylymo. Deus xurâem tâwentâguezenry lelâlâ myakâwândy Noé, nheinwântobyry wâgâ.

<sup>8</sup> Deus tāinwânse myakâwândy Abraão. Awylygue myakâwândy Deus tygâsedyly indadyly. “Igaségâ tarâ onro azehobypyrdâba. Onro ijidym uguehobypyram idâ” Deus keduo, idâly lelâ. Tonrorudâpa âxiguelly, âdyam tâtâly nutubalâ. <sup>9</sup> Deus tyeinwândylygue myakâwândy mâtâ âji aguehobypyram taintuo, âkelomo eonroru anano ara kulâ awyly. Abraão, eagâ idâwâtyby modo warâ âtâ ânguydo imeom itubygue itâdyby odaymo mykâinane, âdapa lelâ. Etywâdyly, idâkawynly waunlo mykâinane etymo, myarâ, myarâ warâ âxiguellymo-ro watay. Abraâoram adâkehobypyram ara lâpylâ myakâwândy Deus, Isaquenra, Jacoram warâ aguely, eyanmo tiunduly wâgâ. Deus einwândyly âdaunloenlâ nimobamo myakâwândy. <sup>10</sup> Warâ myakâwândy Abraão ejiku; târâpa tâjidy kuru awyly, tutuze olâ myakâwândy. Deus eydâ atodâ tâjidype awyly, tynwânwâns tawylygue. Mâtâ âji Deus nhontyby, nhygatyby warâ, âdaunloenlâ adakalagueodânyram idârin-em tawylygue warâ.

<sup>11</sup> Abraão einwânmâ lelâlâmy adâkehobypyram aieniem lelâlâ Deus awyly. Awylygue myakâwândy tâjiunwyn-em idyly, agaityoem imezein-emba tawyly umelâ. Iwydy Sara lâpylâ aripiem, adamym keba myakâwândy mâtâ. Deus olâ myakâwândy eyanmo “Imezeze âmaemo” tâkeze; awârâ einwânmâmomy-ro warâ. Awylygue myakâwândy Deus imezehomoem anhenehonly. <sup>12</sup> Arâ myakâwândy iguezeseajiombyry Abraão kulelâ toenzepa kurâdo idamumoem idyly. Nuduwâpyra mâtâ iweompyry sapâguehoem, agui awylymogue. (“Iguezeseajiombyry” uguely, agaityon-em kehoem awylygue.) Ximukâ kau wogonro sapâguehoem nuduwâpyra, sagunu parutabâ emelano sapâguehoem nuduwâpyra warâ, myara akaemo sapâguehoem nudupa awyly.

<sup>13</sup> Idânârâmy akaemo iguewâm, Deus einwândyly nimobalâ: Abraão, Isaqué, Jacó warâ. Canaâdâ lelâlâmo wâne mykâinane. Onro tâxidâdobypyram sodoem nipyralâ olâ myakâwândy iguewâdylymo. Deus eydâ ato tâjidy kuru awyly, tutuzemo myakâwândy. Tuomare kehoem myakâwândy myarâ taindyly inwânwândylymo, Deus “Xuduze urâ” kehobypyram tienmakehomoem. Aituo, Canaâdâ tawylymo ume, adakobâze idâppy aramo kulâ myakâwândy, iwague endaylâ tâjidy kuru eni ara. Awylygue myakâwândy aguellymo: “Sakani kulâ kurâ xirâ onro anakâ” kelymo. <sup>14</sup> Arâ aguewâni modo tâjidy lelâlâpe tâidylly tynwânwâns awyly tutuen-honze. <sup>15</sup> Kydamudo Abraão, Isaqué, Jacó warâ tydamudo eonronru anaxi todopâdyly wâgâ nâtynanâbyramo myakâwândy. Izemo-ro watay, tâwâlâ tâise odopâdylymo. <sup>16</sup> Akaemo âji ize ato olâ myakâwândy Deus eydâ ato âji koendonro kehoem, eydâ atomo takazeno. “Ynynonro akaemo” keze tywypazeba myakâwândy Deus. Târâ kaynâ eydâ tatodâ âji xurâmoem nhonipyryem myakâwândy mâtâ.

<sup>17-18</sup> Deus “Aiese urâ” tâkehobypyram aieniem lelâlâ awyly tyeinwândylygue myakâwândy Abraão, “Âmery xyâgâ, idânârâ auguehobypyram aiese lelâlâ mawyly kâinwântoem” Deus keduo, on-hondbyyem awyly tymery xyâze, tymery Isaqué wâgâ lelâ toenzepa tyweonzely awyly tiuntuly umelâ. <sup>19</sup> Tutuze myakâwândy Abraão, Isaqué iguely-ro watay, Deus kurâem ietoniem awyly, “Aiese urâ” tâkehobypyram adyese lelâ Deus tâkeduo. Tâinwântâ

\* <sup>11:7</sup> Mâtâ ume ondaypa kulelâ myakâwândy paru modo iazely.

lelâlâ awyly tientuo, tymery nyâmpa itoem aguewâm Deus. Imery niguepa lelâlâ wâne, Abraão xurâem olâ myakâwândy igueypyem imery kurâem itondyl waunlo ara.

<sup>20</sup> Deus tâinwânse myakâwândy Isaque. Awylygue myakâwândy Deusram nhekadyly, tymeombyry Jacó, Esaú warâ agâ Deus koendâ itoem. Tutuze myakâwândy mâtâ, tienkadyby wayam waunroem ainiem awyly.

<sup>21</sup> Deus tâinwânse myakâwândy Jacó. Awylygue myakâwândy tyiguely iraynâ, “Koendâ lelâ ise Deus nhedylymo” kely akaemo azagâ tyweonram, José imeombyry modoram. Arâ adâkebygueduo myakâwândy, tamatagoru wâgâ âzesebydâdyly, Deus nhehoguedyly warâ.

<sup>22</sup> Deus tâinwânse myakâwândy José. Canaâdâ eonronrumo tiunduly Deus aguehobyry awyly, tutuze myakâwândy José. Awylygue myakâwândy tyiguely iraynâ, Israelita domodo Egitodâba egasely wâgâ aguely. “Kypemugudo Canaâram odopâduo, iegueypybyry nhadysemo ise urâ, târâ onro kyam tiundulyem Deus aguehobyrydâ epyâdoem” kewândymy.

<sup>23</sup> Deus tâinwânse myakâwândy Moisés nhunwym, ise warâ. Awylygue myakâwândy tymery iazedu nohoendylymo ânguy nepyra atodâ, tyâzepa itoem. Azagâ tokalâ warâ nunâ ara myakâwândy nohoendylymo. Tywâkureim awylygue, tâwanu aieniem Deus induakeyby mâtâ iamudo awyly xutuwânmomy. Awylygue myakâwândy egípcios domodo iwymâry aguehobyry sakaze tyanepa awylymo, iamudo uguondo imeombyry modo idânârâ xyâwâdyly kehobyry.

<sup>24</sup> Deus tâinwânse myakâwândy Moisés. Awylygue myakâwândy tutuduo, pymâ Egito donro exiry imery kely izepa awyly, mâtâna enamanâdyby tawyly umelâ. <sup>25</sup> Warâ myakâwândy tyangahu oday xunâgu: “Egípcio domodo agâlâ urâ-ro watay, imâemba kulâ ise womaru, eagâmo Deus izepa ato agânhetuo. Ypemugudo Deus xurâ modo agâlâ koendâ wawyly, tâwâlâ lelâlâ wâne eagâmo kâsenagazedyly. <sup>26</sup> Âdapa lâgâlâ idânârâ âdype, iwâkuru modobe warâ wawyly, pymâ Egito donro iweryem wawylygue. Womaru kuru olâ ise, Deus ize ato agânhetuo, tâwâlâ lelâlâ wâne ise kâsenagazedyly, Messias, Deus ingonokyly ara” kely tyanlâ. Deus tynynonro modoram nhuduly wâgâ myakâwândy âpaunzedyly, mâtâ koendonro tienmakely târâ eagâ kaynâ tatay, tâgaseim taintodâ lelâ eseni ara myani.

<sup>27</sup> Adâkehobyry aieniem lelâlâ Deus awyly tyeinwântuo myakâwândy Moisés Egitodâba egasely Israelita domodo agâ, Faraó nytabyra kehoem. Deuslâ myakâwândy nheinwânsezeguyl, awylygue myakâwândy idâzesedyly lelâ; Deus tâensemry nhedylyro waunlo ara myakâwândy. <sup>28</sup> Deus tyeinwândylygue myakâwândy Egitodâba tâgasely iraynâ, waunroem kuru âty Páscoa etyguedo anhedyly. “Kordeiru atay, kabra atay warâ xyâwâtaungâ; itymo iwyantary onwa iunu ietaungâ warâ. Deus mawânkâ anju kyârim igonose, âtâ modo odakâ tâjimebyary xyâze. Kymeombyry olâ ise âda tyeseba, kâty iwyantary modo munrube ietybyem awylygue” kewândymy typemugudoam.

<sup>29</sup> Deus tâinwânsemo myakâwândy akaemo israelita domodo Moisés agâ Egitodâba egasewâdyby modo. Awylygue Egitodâba egaseybyem, Parutabâ Tapabilein-am saintuomo, Deus paru iotagâ kehoem nhaweânehonly, âzekuâdomoem. Igueyam, iatubyam warâ myakâwândy paru epagudybyem awyly, israelita domodo sakadoem. Egípcio domodo akaemo nhapygue ekuâze tâkewâzemo lâpylâ myakâwândy. Deus olâ myakâwândy paru ezaxi tyetonze, nakabyra itomoem. Aituo myakâwândy idânârâ kehoem âjenlâholymo, paruam âduonlymo-ro waunlo ara kehoem. Idânârâ israelita domodo olâmy âsemaguewânm.

<sup>30</sup> Deus tâinwânsemo myakâwândy israelita domodo Canaâ anaxi saintyby modo. Awylygue myakâwândy Jericóram saintybyem, mâtâ xidadâ sahodâdobyry Deus in-hugueânehonly. Seis emedyly ara lelâ myakâwândy xidadâ sahodâdobyry nhenâmidylymo.

Sete emedyly ieto wâgâ nhenâmidylymo ume myakâwândy Deus mârâ sahodâdobyry in-hugueândyly, nheinwândylymogue. <sup>31</sup> Deus tâinwânse myakâwândy mâkâ pekodo Raabe, MON warâ adyeseim. Awlygue myakâwândy tâty oday akaemo azagâ uguondo israelita xidadâ enuagaenze Josué ingonotyby modo nhoendyly, Jericó iwymâry modoram nâzehoba itomoem. Sahodâdobyry ihuguebygueduo, xidadâ odaji egawântybyem, idânârâ tonlo modo Deus einwântâny xyâwânmomy; mâkâ pekodo olâ myakâwândy nyâmpamo, Deus nheinwântobyry wâgâ.

<sup>32</sup> Toenzepa lelâlâ Deus einwânnipyry modo; idânârâ wâgâ auguehoem nudupa olâ. Unâ modo tydase olâ âmaemo, Gideão, Baraque, Sansão, Jafté, Davi, Samuel, eagonro Deus itaumbyry aguewâni modo wâgâ warâ. <sup>33</sup> Deus tâinwânse tawylymogue myakâwândy tâseguebydaymo, tuduery ton-honreim modo kehoem nhainlymo. Pymâem awlymo ume, koendâ lelâ myakâwândy aguehobypy aralâ. Tâinwânse awlymogue myakâwândy Deusram âzemakeolymo. Leão itahuwânmomy. <sup>34</sup> Peto kâmayno kehoem nhâlâmâmomy. Sodadu domodo ispadary amaym âsemaguelymo. Ton-honreba awlymo ume, eon-honrumo âduduoly. Tâseguebydaymo, ton-honremo lelâ mykâinane, toenzepa uguondo modo xyâwânmomy. Sodadu âkelo anano modo agâ tâjítoguyday akaemolâ mykâinane ton-honreim kuru. <sup>35</sup> Deus nheinwândylymogue myakâwândy pekodo modo ipemugumo ewy igueypy eagâmo itondoem Deusram kurâem âiehondly warâ.

Tâlâ lâpylâ olâ myakâwândy Deus einwânni modo ewy, typgueba kehoem Deus einwântâny modoram tânagazeim, Deus einwândyly nimoba awlymogue. Tâsemaguehoem kulâ âdakepamo olâ myakâwândy. Tyigueduo eydâ tatoam Deus tadyly tâinwânsemo myakâwândy, târâ kurâem tâitondomoem. Deus eydâ atodâ koendâ kuru tawyly xutuwânmomy. <sup>36</sup> Tâlâ myakâwândy akaemo ewy âwankuem tyeseim, tapioguozeim warâ. Tâlâ myakâwândy âjihugâjioly, âzemakâjioly, iweâma pylâ kadeia odaji samely-ro tyeseim. <sup>37</sup> Tâlâ lâpylâ tuhugue tamytâze, serrotygue iotagâ tadtayoze, espadague tadtâoze warâ tyâzeim.

Tâlâ myakâwândy ety odaybalâ tâgaseânzeim modo. Aituo âdy peba tawylygue, tâguymo itubygue kulâ myakâwândy âzetydâdylymo. Toenzepa myakâwândy âdy peba tawylymogue âsenagazedylymo. Deus einwântâny modoram tâzenagazeolygue, nekobyzeguebamo myakâwândy. Toenzepa lelâlâ âsenagazedylymo, inakanhe kulâ adâieholymogue. <sup>38</sup> Tâjikebamo myakâwândy myarâ, myarâ warâ kulâ adakobâdylymo, iwy modo wâgâ, âji paru peba ato einkâ, âdy peba ato einkâ warâ. Iwy tâtagueim oday, onday warâ kulâ myakâwândy ejikumo. Xirâ onro anaym Deus einwântâny modoram âdy keba ara kulâ myakâwândy âzeholymo, Deus xurâem olâ akaemo tywyneim.

<sup>39</sup> Idânârâ mâkâ Deus einwânnipyry modo koendoro emakerin-em aguehoymbyem Deusram, nemakebamo wao olâ. <sup>40</sup> “Inwândylymo wao ise, iwelo kâseinwândo agânhedyly ara” warâ myakâwândy Deus xunâry. Cristo iunugue myakâwâm idânârâ inakanhe tadowly tyngakedyze awly, akaemo saguhobypy modo inakanhe aitobyry, iwerâ inakanhe aguitobyry alelâ. Idânârâ tynynonro modo ize tato ara aidylymo tynwânwânsse myakâwândy Deus.

## 12

### *Kunwym Deus kuruto*

<sup>1</sup> Toenzepa mawânkâ aguidyly, aguykely warâ enuagaeni modo. Awlygue Jesus ize ato aguiempyra kyenehorim kyjimonre. Inakanhe aguitobyry kyjimonre. Mydy ânguydo imeom nhawâto ara awârâ inakai modo kawâdyly. Âdaunloenlâ ton-honremba kipyra olâ kine. Kynynâ inakanhe awly kyzemaenre, Deus kyize ato ara kitoem. Mâkâ tâgaseim ara kine. Toenzepa egaky enuagaeni modo, âgânâyam MYK nipyra olâ egaky, tadtintoam taintoem. <sup>2</sup> Jesus lelâ kânanano nidâ, mâkâ tâgaseim, tâzegaky xypyryam taindyly lelâ enanano myara. Jesus wâgâ mawânrâ Deus einwândyly adaguly;

Jesuslâ kieinwânsezedoem aienehoin-ro warâ. Kywypado kruz wâgâ tâjiguely awyly umelâ myakâwâm Jesus iguely kâjipyay. Tutuze mawânkâ Deus aguehobypy adiendyly-ro watay, tuomare lelâ tawyly. Awylygue arâ adâieholyn nhemaenly lelâ. Iwerâ Deus ekadodâ eahoru eynynâ ekadybyem awyly, Deus eyam aguehobypy ara.

<sup>3</sup> Koendâ mâkâ wâgâ âpaunzedaungâ. Toenzepa âsenagazemâ, Deus ize ato aietânry modo âdalâ kulâ adyedyly emaenwâm warâ. Awylygue Deus ize ato aiedyly nimoba atobyry enanâguewâdaungâ; tuomareba tâiseba lâpylâ itaungâ; einwândyly kâjimowâdaundâ warâ. <sup>4</sup> Toenzepa inakanhe aini modo âwankuem âedylymo, inagazedylymo warâ. Tyâzepa olâ âmaemo, Jesus mâinwândylymogue. <sup>5</sup> Deus on-honwanâdomoem aguehobypy mänenanâguebaka âmaemo, tâjiunwym tymery eon-hondâze agueho ara aguehobypy?

“Mery, âDeusry agueim,  
idakâ wao auguely.

Amânhedyseba wato amânhedyly watay,  
ton-honre kehoem ise âyam auguely.

Âurudyly watay, idakâ.

Agâikeduo, tâjityenzeba ikâ,  
inakanhe amidylyguema âurudyly.

<sup>6</sup> Urâ, Pymâ Deus, idânârâ kâinwyneguyl modo tagâikeze urâ,  
idânârâ ‘ymery’ ugueho modo turuse urâ warâ,  
izepa wato anhetuomo”

warâ iwenibyem awyly Deus itaumbypy awo wâgâ.

<sup>7</sup> Deus agâikelymo-ro watay, âdara myguepamolâ emaenwâdaungâ, tâjiunwym tymery tinwyneguyl tymery nhagâikeho ara. Agâikehomo wâgâlâ tymery ara lelâlâ nhedylymo awyly Deus nhenehonly. Âdykâ tâjimery, nhunwynram tagâikezenry, turusenry warâ lâpeba. <sup>8</sup> Âurupyramo, agâikebamo warâ mâkâ-ro watay, mâkâ imery keba lelâlâ mawylymolâ nhenehonly. Tâjiunwym tymery nhagâikeho ara, nhuruto ara warâ lâpylâ Deus tynynonro modo nhagâikely, nhurudyly warâ.

<sup>9</sup> Kunwym domodo kurudyly, kagâikely warâ tydase kurâ, tâinwânse-ro warâ, kiynrendylymogue. Kunwym kaynonro kagâikely, kurudyly warâ olâ koendâ kyjidane kuru. Kyigueduo aunloenlâ mawânrâ ise eagâ kydawyly. <sup>10</sup> Iamudoem kydawyly ume, kunwym domodo kagâikedâmo, âdara koendâ kydawyly tiuntuhoem, aunloenlâba olâ mâtâ. Koendâ kitoem Deus kagâikeho, kuruto warâ olâ aunloenlâ, mâkâ ara kitoem, âdy inakanhe aguiempyra kitoem warâ. <sup>11</sup> Inakanhe aguitobyry wâgâ kagâikeduo, tâjityenze kurâ, tuomareba warâ, aguykehonday. Ilâpygueduo olâ âdy Deus konomedâdyze ato awyly xuturimbyryem kurâ, Deus ize ato ara ise kurâ, kurâ domodo agâ koendâ ise kurâ warâ.

### *Deus wâgâ kuruto*

<sup>12</sup> Mâsenagazedylymo ume ton-honremba tâise lelâlâ wâne âmaemo, âzeon-hondâdaungâ olâ, Deus amidysemo ato ara amisezedomoem. Adaimpâni ara itaungâ, tokozelygue tâwâkonubaze lelâlâ wâne, ton-honwandonze olâ tadaimpâdyly nimoba tâitoem. Tâgaseim ara lâpylâ itaungâ, tyxigâmylygue tâzeumpaze lelâlâ wâne, tyxigamadonze olâ tâgaky tienwanikehoem. <sup>13</sup> Koendâ lelâ aitaungâ, âpemugumo ton-honremba kulâ Jesus einwânni nheinwândyly eon-honwandoem, ihudune tâwâneim nihugueba itoem, ânwa tywyguneim iwygueim ara, tâtaguneim etamuim ara warâ itaungâ.

<sup>14</sup> Âzeon-hondâdaungâ, ânguy agâ mâtuebabyra, âewiâpabyra warâ mitomoem, Deus ize ato ara lelâ mitomoem, Arâpa-ro watay, ânguy Kywymâry Jesus netaymba ise.

<sup>15</sup> Tâmaynelâ itaungâ, ânguy Deus koendâ kâenidâba nâxigueba itoem, Deus izepa ato aiedyly imâem mânhenehomba mitomoem. Inakanhe tadawyly imâembaombyry, imâem tâise mawânrâ, idânârâ tawâse warâ, nady kâgueâni iwindy imâem idyly, âzedypâguelly,

idânârâ nady âpa ezano inakanhe ieni ara. <sup>16</sup> Tâmaynelâ itaungâ, ânguy eagâ tohogüinhobyry keba kulâ nynanâbyra itoem.

Tonomeguelâ itaungâ. Deus âwankuem kâietaudâ; anhekyly, agueho warâ âwankuem kâietaudâ, Esaú, Isaque imebyary, Deus ezewenry âwankuem nhetobypy ara. “Koendondro ise idânârâ tâjimebyary modo agâ agânhekyly” kewândymy Deus. Esaú olâ myakâwândy tâwindygue kulâ, tâjimebyary nhemakely, tukonoram tuduze ipyniry ebyryem. <sup>17</sup> Tutuzelâ âmaemo Esaú agâ aityby. Ilâpygueduo, “Tunwynram urâem Deusram ekagâ, yagâ koendâ itoem” kewândymy. “Nudupa enra, âukono xurâenma sekadai. Âdaunloenlâ tugukezeba awârâ-ro warâ” kewândymy nhunwym. Esaú, tuogunre, tunwynram aguezesemâ lâwâneny; nudupa olâ myakâwândy nhunwym agueontoem, tokalelâ mawânrâ tâjimebyary xurâem ekadyly.

<sup>18</sup> Tyanuneba Deus eydâ atoam aindylymo. Kydamudo olâ myakâwândy iwague Deus âepanâguehodâ. Enanâguewâdaungâ târâ iwy Sinaidâ Deus, Moisés agâ agueze âepanâguehobyry. Toenzepa lelâlâ myakâwândy eanumo. Tâmyguyne myakâwândy eunu iwy wâgâ, toenzepa iamu warâ. PEVK PEVK idyly, peto eunu iwy wâgâba egasely emâmomy. Toenzepa myakâwândy adapezeinly. <sup>19-20</sup> Trombeta ton-honre kehoem âjidily. Deus, “Xirâ iwy onwa wopaji taintoem âkuze keim tuhugue tamytâze ise âdyoly, kurâ, ânguydo imeom alelâ” kely tindatuomo, “Tindatondyzeba xina” kewânmomy. Arâ aguelymo myakâwândy, mâkâ agueho nemaemba tawylymogue. <sup>21</sup> Kyanedâ lelâlâ myakâwândy mâtâ nhekylymo. Kyanoem lelâlâ awylygue myakâwândy Moisés aguely: “Tapâne kehoem urâ ianugue” kely.

<sup>22</sup> Âmaemo olâ tyanepa, Deus agâ amygueduomo. Eagonro iwyram aindylymo waunlo ara, mâtâ iwy Sião kaynonroam, Jerusalém kaynonro kelygue tâzekeim, Deus Âdaunloenlâ Iguedânry eydâ ato mâtâ. Toenzepa târâ anju domodo awyly, tapâguelly eki kehoem. <sup>23</sup> Jesus eynynonro modo Deus nhuduly koendonro emakeze âtâdyguyhobyryam aindylymo, saguhoem tâjimebyary tunwym emayumba koendonro nhemakehobyry ara. Jesus einwânni modo ezedy iwenibyem mawânrâ livru wâgâ târâ Deus eydâ atodâ. Deusram saintybyem âmaemo, mâkâ ise tâjigueduo âdy aini, aitânry warâ awyly kagâ agueim. Deus einwânni modo iguewâtyby ejidyram saintybyem âmaemo.

<sup>24</sup> Jesusram saintybyem âmaemo, mâkâ iwelo tâdâseinwândo aienibyryam. Kruz wâgâ tyigueday tunu iapâmâ, inakanhe kydawyly xygakeze, saguho tâzezewenry ume tâjiunugue inakanhe itomobyry xygakehoem iwinkehombypy ara. Awylygue tyanepa mawylymo, Deus agâ amygueduomo, Jesus târâlâ awylygue. Enanâguewâdaungâ Abel aitobyry. Caim tukono Abel xyâwânm. Onro onwa myakâwândy iunu apâdyly. “Abel iunu kâentuo, tadaenlu kâindadyly, xyâimpypy kâenagazedoem nhekadyly-ro waunlo ara” kewândymy Deus. Jesus olâ myakâwâm tâweântoem nekabyra, tunu tyapâze kruz wâgâ tyigueday. Aguely myakâwâm: “Pabai, xirâ inakanhe aitomobyry xygakegâ; âdy adiencyly nutuwâbyra asaemo” kely lelâ.

<sup>25</sup> Awylygue tâmaynelâ itaungâ. Deus âyanmo aguely-ro watay, mâindadyseba tâiseba itaungâ. Deus âyanmo agueduo, iwantaguedaungâ. Saguhoem Moisés “Aietaungâ” kehobyry aniempyra ituomo, Deus myakâwândy kydamudo tânagazenehonze. Arâ lâpylâ kurâ iwerâ mâkâ kaynonro “Aietaungâ” kehobyry aguiempyra kurâ-ro watay, âsenagazeze lelâlâ kurâ. Kieinwâmpyra kydatobyry wâgâ nuduwâpyra awârâ tâdâsenagazedyly amayumba kydâsemaguehoem. <sup>26</sup> Saguhoem, iwy Sinaidâ adâkeday, onro ekâniwânm Deus. Wakewândymy: “Aietonze urâ. Onro lelâba olâ ise kâenkânenhonly, kau ekânen-honze lâpylâ urâ” kewândymy. <sup>27</sup> “Aietonze urâ” keduo, tutuze kurâ, nhugutyby modo adainze, âdugugueze warâ awyly. Tugukezenry modoma ise tugukezeba, aunlolâ awylygue.

<sup>28</sup> Aituo, Deusram wakykenre: “Koendonro lelâlâ âmâ, âmâlâma ise xina iwymâry” kykenre. Deus aguehobyry âdaunloenlâ tugukezeim mâkeba. Awylygue tuomare lelâ kine Deus agâ, kyzehoguene warâ, mâkâ ize ato ara. Deus âwankuem kiempyra kine, kydynrene warâ. <sup>29</sup> Peto kyaduâni emyenro mâkâ.

## 13

### *Âdara Deus kionmazeândy*

<sup>1</sup> Âpynedaungâ, Cristo eynynâ âjipemugüem mawylymogue. <sup>2</sup> Jesus einwânni modo mâenjitâbyra tâiseba itaungâ, mâuntudânrymo awylygue kulâ. Kiuntudânryenlâ kyam tâepanâgueze mawânkâ anju. <sup>3</sup> Jesus einwânni modo etadâdyby edyly kâzenanânehonwâdaundâ; eagâmolâ itagumo waunlo ara lelâ nidâ. Âsenagazeni modo eon-hondâdaungâ, mâsenagazedy ume on-hondâdyze matomo ara.

<sup>4</sup> Koendâ ohogüimbyem tadalafil, inakai olâ ohogüimby modo âximohoem aiedyly. Uguondo modo tywydy lelâ nynanâdâ, pekodo modo isoram lelâ nâdynanâo warâ. Uguondo, pekodo warâ tohogün-hobyry keba kulâ xynanâni watay, Deus xurâem inakanhe kulâ. Arâ lâpylâ ohogüindâny modo kywypadoem kulâ aini modo Deus xurâem inakanhe awyly. Awârâ aieni modo enagazenehonze Deus.

<sup>5</sup> D inheru ize mawylymo kulâ âutubamo nidâ. Tuomare lelâ itaungâ tâlâ matomogue. Wakewâm mawânkâ Deus: “Ipa matomo xuduze urâ. Nhepyramo witaymba ise urâ. Odokebamo ise urâ warâ” kewândy. <sup>6</sup> Awylygue tâegane lelâlâ, tainwânslelelâlâ warâ aguykenre:

“Ywymâry Deus mawânkâ idani,  
iemawyadâdoem kâingâsedy watay.  
Awylygue tyanepa wawyly.

Âwâlâ wâne urâem ânguylâ inakai aiese kely, yagâlâ olâ mâkâ Deus, ietâ-ro warâ”  
kykenre, itaumbyry awo wâgâ iwenihobyry ara.

<sup>7</sup> Deus itaumbyry âyanmo egatuwânbiry modo enanâguewâdaungâ. Tyiguepa tawyly ara âdara atomobyry, âdara iguehomobyry warâ angahumo odaji ietaungâ, akaemo ara mâinwântomoem, akaemo anhetobyry ara amânhetomoem warâ. <sup>8</sup> Jesus Cristo nâtuguguewâbyra. Saguhoem tatobyry aralâ mâkâ; arâlâ mâkâ iwerâ; arâlâ ise-ro warâ.

<sup>9</sup> Deus itaumbyry awo wâgâ iwenihobyry araba kulâ, Jesus agueho araba kulâ warâ inomedâdomo kâzeinwântaundâ. Âdalâ kulâ unâ egatuwâni modo tyampygueni ânwa iozepaom oze sani emyenro kulâ mawânkâ. “Kieinly wâgâ, kienly wâgâ warâ Deus ara kydawyly” tâkezemo. Kieinly, kieindâny warâ wâgâpa mawânrâ kieinwândy imâem idyly. Kieinwândy imâem idyly, kagâ Deus koendâ awylygue lelâ.

<sup>10</sup> Kurâ domodo eynynâ Deus agâ aguewâni modo, inakanhe tâjito byry xygakehoem Deusram ânguyo doimeom nhunru egameyby ewy nâtaymbamo myakâwândy, mâkâ nhunru iaduândy awylygue. Arâ lâpylâ saguho tâzezewenry tyeinwândylygue âsemagueze kewâni modo Deusram kygâtudo ara tygâseba awylymo. Kurâem kruz wâgâ Jesus anhetyby wâgâ mawânrâ kionmaendyly, kien-hoguedyly warâ. <sup>11</sup> Deus etyoday kurâdo eynynâ aguewâni modo iwymâry kuru mawânkâ ânguyo doimeom xyâypy iunu sani mârâ âji tynrenseim Deus Âepanâgueho odaji, inakanhe adâitobyry, kurâ domodo inakanhe aitobyry warâ xygakehoem ekaze. Ânguyo doimeom iunu etyyby, eguepybyry âtâ itâdyby etyodayba tyesemo mykâinane iaduântoem. <sup>12</sup> Alâpylâ myakâwâm xidadâ Jerusalém etyodayba Jesus iguely, tunu tyapâze, inakanhe aguitobyry xygakehoem, tywykeba Deus ezaxi kâgawântoem. <sup>13</sup> Awylygue Jesusram inoro. Eagâ anhetybymo ara kagâ anhetuomo kyzemaenre; tâwâlâ wâne kywypado modo awyly kyzemaenre lelâ olâ xidadâ etyodayba kruz wâgâ kyigueli waunlo ara.

<sup>14</sup> Xirâ onro anaym âji aunloenlâ kito lâpeba mawânrâ. Târâ kaynâlâ mawânrâ ise kâjidy kuru, Deus eydâ atodâ. <sup>15</sup> Awylygue Deus koendâ awyly wâgâ, eon-honru wâgâ warâ aguykely kinmoba kine, kurâem anhetyby wâgâ, Jesus Cristo iguehobyry wâgâ. “Jesus Cristo kâmakerim, kywymâry warâ” tâkeze kurâ. Arâ aguykeduo, Jesus tâinwânsse kydawyly tânehonze kurâ. Mâkâem kygâtudo, mâkâ agâ aguykeday kytaumbypy warâ iwerâ eyam kiunduly, ânguydo imeom xyâypy iunu keba. <sup>16</sup> Koendonro aiedyly kinmoba kine, kagonro modo kyzemawyadâne warâ. Arâ aguidyly-ro watay, Deusram âdylâ toenzepa kehoem ize ato kiunduly-ro waunlo ara xurâem.

<sup>17</sup> Jesus einwânni modo iwymârydo aguehobyry aietaungâ, einwântaungâ warâ. Aguehomobyry amânhedylymo-ro watay, koendâ ise âmaemoem, tuomare kehoem ise tâwanu anhedylymo-ro warâ. Aguehomobyry mankadlymo watay olâ, âurutomobyry âdyem âepyramo ise, tytynre ise akaemo-ro warâ Deus xurâem tâsewanily ara. Tyigueduomo, Deus enado, onro anaym xurâem tâsewanihobyry wâgâ aguezemo. Jesus imâem mâinwântomoem adientyby wâgâ aguezemo. Awylygue akaemo tarâ atay imâem âsewanily, Jesus wâgâ imâem mâuntuhomoem.

<sup>18</sup> Xina xurâem ekazeedaungâ lelâ Deusram. Aunlolâ Deus “Aietaungâ” kehobyry adiendyse xina awyly. Awylygue mâkâ xurâem tywykeba tawyly tutuze xina. <sup>19</sup> Âyanmo kâenkaguyl kuru olâ Deus agâ amyguehomoem, inepa âyanmo ugonotondoem.

### *Kata xypyryem Deus agâ aguehobyry*

<sup>20</sup> Deusram augueday, warâ eyam auguely: “Deus, xina ekobyzegueho, xina koendâ ieni warâ âmâ. Pymâ Jesus igueduo kurâem ietonibyry âmâ. Xina eni mâkâ tâguyeim, tâguy nheto ara. Kruz wâgâ tunu nhapâduo, tâdâseinwândo iwelope xina awyly, âdaunloenlâ adaindâny. Pymâ tâseinwândo selupe tyesê myara lâpylâ xirâ iweleo tâdâseinwândo Jesus iunugue âynynonro modo agâ âseinwândybyem awyly. <sup>21</sup> Idânârâ koendonro xinaram xudugâ, amânhedyse mato xina anhetoem. Jesus Cristo wâgâ ise ize mato xina agâ amânhedyly. Koendonro Cristo awyly, ton-honreim, tohogueim warâ awyly wâgâ aguykely kinmoba kine. Arâlâ nidâ” uguely.

### *Âdypygueândo*

<sup>22</sup> Xirâ kâjitaumbyguehobyry kâinweniby mâintainduomo, koendâ iwantaguedaungâ, âmaemo Cristo eynynâ ypemugudo modo. Xirâ kâinwenily âurutomoem, Jesus einwândyly mâinmoba mitomoem. Imâsedo keba lâgâlâ xirâ kata kâinweniby. <sup>23</sup> Timóteo, Cristo eynynâ kypemugu, kadeia oday awyly keankâ, Jesus wâgâ agueduo. Mâuntudyzemo olâ urâ, etagueybyem awyly. Inepa xarâ saindyly-ro watay, yagâ sase urâ, âyanmo IU ise udâly watay.

<sup>24</sup> Awâtârâ Jesus einwânni modo iwymâry domodo, idânârâ Jesus einwânni modo lâpylâ warâ xina iwynu nawâdâ, Cristo eynynâ âpemugumo Itália donro modo iwynu manwâtomoem aguelymo lâpylâ.

### *Deus nhesemo*

<sup>25</sup> Âynynâmo Kunwym Deusram kâenkadyly, koendâ mâzehohomoem. Xirâ kulâ âyanmo auguedyse wato. Alâ kulâ.

## TIAGO Tiago Kata Inweniby

Xirâ kata wâgâ inwenily Tiago nhangahu odaji iemâmy Deus. Awylygue Deus itaum-byrylâ xirâ Tiago inweniby. Maria imery myakâwândy Tiago; awylygue myakâwândy Jesus iukonoem awyly ise eynynâ.

Deus, xirâ inwenien-honly myakâwândy, Jesus einwânni modo âdara adâidly awyly nhutuhomoem. Xirâ kata wâgâ tutuze kurâ, âzekiba lelâ idânârâ kiendyly awyly, âdypeom, âdypebaom alelâ. Jesus einwânni modo âtâdyguyhodâ tydinerugueim modo lelâ koendâ tâdaenkuzeim, tydineruguenry modo pylâ koendâ tâdaenkuzeba-ro waypa kelype.

Koendorro aguyjiene, Jesus tâinwânselâ kydawyly kienehon-hoem, kely tytainze kurâ xirâ kata wâgâ. Åkelomo kienmawyadâbyra kurâ, kienagazedyly warâ-ro watay, kykewâdyly kulâ, “Jesus tâinwânselâ urâ” kykely. Aguykeho tymanâzelâ kine, âdalâ kulâ aguykeba kitoem. Peto xigâlegueam poji nhawâdyly watay, imeâgâemba kehoem tugueze, myara lâpylâ kytanru iwyku inakanhe kyedly.

Âdypeom turâem tâwanuneim modo nenokubyra nidâ. Koendâ lelâ nepywadâmo. Jesus einwânni Deus izepa ato anhedyly watay, eagonro modo nurudâ, âdalâ kulâ adâidly imohomoem, Deus lelâ nheinwântomoem warâ.

### *Aguely adaguho*

<sup>1</sup>Urâ Tiago xirâ iweninri. Deus, Kywymâry Jesus Cristo warâ emary urâ. Idânârâ Deus eynynonro modo kâendaenkuly tâinkonro modo lelâba.

### *Tâsenagazedyly tâmaenze Jesus eynynonro modo*

<sup>2</sup> Cristo eynynâ ypemugudo, mâsenagazedylymo watay, tâjityenzeba itaungâ, tuomare lelâ itaungâ. <sup>3</sup> Tutuzelâ âmaemo, mâsenagazedylymo umelâ, Jesus einwândly mânmobâ mawylymo. Awârâ wâgâ enehorimbyryem âmaemo, mâkâ einwânselâ mawylymo. <sup>4</sup> Mâsenagazedylymo umelâ, Jesus mânwândlymo mânmobâ âmaemo watay, Deus ize ato aralâ âmaemo. Ize ato lelâ amânhekylymo. Koendâ kehoem ize ato aiedyly xutuimbyryem âmaemo. Ton-honreba mitaymba ise âmaemo, mânwândlymogue. Izepa ato kulâ amânhetaymba ise âmaemo. <sup>5</sup> Âda midylymo mâuntuba âmaemo watay, Deusram ekadaungâ. Kienkaduo, âdiempa kulâ xudunri mâkeba mâkâ; kienkadobyry wâgâ kagâ tyewiâtuneba ise mâkâ. <sup>6</sup> Deusram kienkaduo olâ, kienkadyby nhuduly kyzeinwâne lelâlâ. “Xuduze keanra” kykeba kine. Kieinwândly, kieinwâmpyra kidyly watay, parutabâ sahugânu ara kulâ kurâ, sapezenruam wayam, wayam âiehoim ara kurâ, Deus lelâ kieinwâmpyra kydawylygue. <sup>7-8</sup> Iwerâ tâinwânselâ, kopaelâgâem neinwâmpyra waunlo; âdy nhekadyby nâduduowâpyra ise.

### *Âdypeom, âdypebaom warâ*

<sup>9</sup> Âmaemo âdypebaom Jesus einwânni modo, tuomare lelâ itaungâ, Deus xurâem kurâdo tynrenseim âmaemo. <sup>10</sup> Alâ pylâ âmaemo âdypeom modo, Deus tâlâ matomo nhainly-ro watay, tuomare lelâ itaungâ, Jesus tâinwânselâ mawylymogue. Iguezâ âmaemo, nady sawanku adakâdybyem âdiempa kulâ ehogu, inepa iguely myara. <sup>11</sup> Xixi ton-honre kehoem watay, âdâpigu nady tyaduânse. Sawanku tâihuguewâze, tywâkureba tâise-ro warâ. Arâ lâpylâ âdypeom modo iguely, tâlâ tato modo imâem tientoem tâsewanily umelâ.

### *Deus mâkeba inakanhe aguitoem aienehoim*

<sup>12</sup> Kurâ Jesus einwândly kinmobalâ kydâsenagazedyly emaenrimbyry kuomazeânze Deus. Arâ kienmaenzezedyly-ro watay, aunloenlâ kyiguepa kitoem aiese Deus, tâgaseim

waunroem saintyby tâgatobyry ebyry nhemakeho ara. Awârâ mawânkâ adienkylyem aguehobyry tywynneni modoem. <sup>13</sup> Inakanhe aguidyse lelâ kurâ-ro watay, “Deuslâ ‘Inakai aiekâ’ keim” kykeba kine. Ânguy Deus inakai anhetoem aienehonrim lâpeba; inakai modo aguentoem aguewâpyra lâpylâ mâkâ warâ. <sup>14</sup> Deus xurâ mâkeba awârâ inakanhe adâjidyly. Kurâlâ mawânrâ Deus aguehobyry kiankadoem inakanhe aguidysedonro. Atâ wâgâ eturu tientuo mawânkâ kanra âsenogudyly, iwogonro sawâse idâly; nhawâtuo, adaweoly; arâ lâpylâ mawânrâ tâwâlâ kulâ kydâsenogudyly, Deus izepa ato aguiendyse kydawylyguelâ. <sup>15</sup> Inakanhe aguidyse kydatogue kydâpaunzeduo mawânrâ inakanhe aguidyly; Deus aguehobyry kiankadyly. Itaumbyry kiankaduo, kyiguelylâ, aunloenlâ eagâpa kidyly-ro warâ.

<sup>16</sup> Cristo eynynâ ypemugudo, tâsenoguzeba itaungâ. “Mârâ inakai agânhedyly, Deuslâ mawânkâ agânhetoem agueim” tâkezeba itaungâ. <sup>17</sup> Idânârâ koendonro modo, iwâkuru modo warâ kienmakely Deus kaynonrodâlâ âewyly; xixi, nunâ, ximukâ warâ tytanrugue kulâ xugunipyry nhuduly. Xixi, nunâ, ximukâ warâ tâjidydâpa tâtugugueze. Âtugugueduo tyamase. Deus olâ nâtugugueba; aunlolâ kagâ awyly, kurâem koendonro modo aiese, <sup>18</sup> Tâwâlâ ize tawylyguelâ kyazeântondyly, itaumbyry kieinwântoem. Etâdyby ewily waunroem ekaunâdyby wâne eyam xuduly, myara lâpylâ waunroem kydawyly, idânârâ nhugutyby modo enday.

### *Deus aguehobyry ara aguine, kindadyly kulâ warâ inkâba*

<sup>19</sup> Xirâ enanâguewâdaungâ, Cristo eynynâ ypemugudo kâinwyneguyl modo. Onhondybyem lelâ itaungâ idase. Inepa kehoem âdy kâjihoguwâdaundâ; koendâ wao amyguehomo xutuwâdaungâ; inepa tyewiâpazeba itaungâ warâ. <sup>20</sup> Kyewiâpaduo mawânrâ Deus izepa ato ara kulâ aguidyly, aguykely warâ. <sup>21</sup> Idânârâ inakanhe tadauly imowâdaungâ. Eagâ mohogün-homobypy keba kulâ kâdynanâdaundâ. Nady âpa ezay etâdyby wâne tyazeze, ago tâise, tâwiseze warâ myara awârâ Deus itaumbyry, kieinwântuo kydâsemaguehoem idyly. Deus aguehobyry kyangahu odaylâ watay, ize ato adyese kurâ. Koendâ lelâ itaungâ, aguehobyry ara lelâ amitomoem.

<sup>22</sup> Tâsenoguzeba itaungâ. Idadyly kulâ warâ inkâba Deus itaumbyry; aiedyly koendonro kuru. <sup>23</sup> Takaday espelhu oday tahule kulâ âzeni ara awâkâ kurâ Deus aguely indadyly kulelâ, agueho ara anipyra waunlo. <sup>24</sup> Âzedyly. Idâly. Inepa âdara tawyly nhenanânehonly. <sup>25</sup> Koendâ kehoem unâ iwâkuru tâdâsemaguehoem Deus aguehobyry aguidyly-ro watay, arâ ise âdaunloenlâ kydâzewentâoba kydawyly Deusram. Deus inwenien-hoymby kienanânehomba aguiensezedyly lelâ warâ watay, idânârâ aguienkyl modo koendâ ese Deus.

<sup>26</sup> Jesus einwânniem lelâlâ kydâdutuly, aguykeho kinmanâbyra olâ kurâ warâ watay, âwâlâ kulâ kydâsenogudyly. Deus xurâem aguienkyl âdyem nitaymba, Deus niomazeândaymba awârâ. <sup>27</sup> Jesus tâinwâns kydawyly kienehondyze Kunwym Deus, todonentry modo, pypâ modo warâ kienmawyadâdylygue, mâkâ izepa ato aguiempyra kydawylygue warâ. Arâ mawânrâ xurâem tywykeba kydawyly.

## 2

### *Âzekiba koendâ kydawyly nidâ âdypeom agâ, âdypebaom agâ alelâ*

<sup>1</sup> Cristo eynynâ ypemugudo, Kywymâry Jesus Cristo, Kunwym Deus iwâkuru enehoim, einwânni warâ âmaemo. Awylygue âzekiba kurâ domodo sawiwâtaungâ, âdypeom, âdypebaom alelâ, mâkâ lelâ manwilymo, mâkâ mawipamo waypa. <sup>2</sup> Deus ehogueze âtâdyguybyem matomoam azagâ uguondo egawândyly, tokalâ tydinerugueim, tâtygoengue kehoem, ane ouruguetobe warâ, eagonro olâ âdy odo keba, ety adaugueypyem, tywyke kehoem warâ. <sup>3</sup> Tâtygoengueim lelâ mawilymo, âji iwâkurudâ

mâenkanâguylymo. Âdy pebaonram, “XYDYK warâlâ ikâ” myguelymo. “Onwâgâlâ ikagâ ypebaylâ” myguelymo. <sup>4</sup> Arâ amituomo, ânguy âzekiba mâempyra mawylymolâ awârâ. Âdypeom manwilymo, toenzepa idinherugugue kulâ, âdypebaom pylâ mawipa âmaemo-ro. Koendonro mâkeba awârâ arâ adâjidyly!

<sup>5</sup> Idataungâ, Cristo eynynâ ypemugudo kâinwyneguyl modo. Xirâ onro anaym âdy pebaom modo Deus induakely, toenzepa tâinwântoem. Tâlâ ise akaemo târâ Deus pymâem atodâ, Deus “Ywyneni modoam xuduze urâ” kehobypy. <sup>6</sup> Âdypebaom modo Deus induakeyby izepa olâ âmaemo! Âdypebaom modo mâkeba inagazenimo! Âdypeom modolâ pymâ modoram igamenrimo, mâzewentâohomoem. <sup>7</sup> Jesus Cristo eynynonro âmaemo. Âdypeom modo olâ mâkâ ezedy wâgâ inakanhe kulâ aguenri.

<sup>8</sup> Iwenibyem Deus itaumbyry awo wâgâ: “Agonromo agâ âpynedaungâ; koendâ mâzetomo ara, arâ lâpylâ agonromo agâ koendâ âzetaungâ.” Xirâ tâzezewenry Pymâ Deus aguehobypy adyese âmaemo watay, mâkâ aguiendyse atolâ amânhekylymo. <sup>9</sup> Âdypeom modo lelâ ize matomo, âdypebaom modo pylâ izepa âmaemo-ro watay olâ, Deus aguiendyse ato araba amidylymo. Inakanhe kulâ amidylymogue, Deus iwentâzemo. <sup>10</sup> Ize tato lelâ Deus aguiendyse ato. Deus aguiendyse ato iweniwânm Moisés.

Tokalâ Deus aguehobypy sakaniubyry-ro watay, idânârâ nhakadylylâ mâtâ. Mâtâlâ ise tâwentâguezeim, idânârâ Deus aguehobypy aniempyra awylygue. <sup>11</sup> “Eagâ mohogüinhomobypy keba kulâ kâdynanâdaundâ. Ânguy kâdyâwâtaundâ” kewândymy Deus. Âdykâ âkelo agâ mipyra lelâlâ wâne âmaemo, âguedy xyâimpypy âmaemo-ro watay olâ, Deus iwentâzemo, idânârâ aguiendyse ato mâinwâmpyra matomobyry wâgâ. <sup>12</sup> Deusram emakeybyem mawylymogue, ize ato ara lelâ aitaungâ, aguewâtaungâ warâ. Xypyry etay koendonro âyanmo xuduze mâkâ, “Koendonro aiekâ” kehobypy aienibypyem âmaemo-ro watay. Amânhepyramo-ro watay olâ ise koendonro nudupa âyanmo. <sup>13</sup> Ânguy kintyembyra kurâ-ro watay, Deus kytyendaymba lâpylâ ise xypyry etay, âdara kydawyly wâgâ adâkeday. Âkelo ityeni kurâ watay olâ, Deus kytyenze lâpylâ.

### *Jesus eynynonro lelâlâ kurâ watay, kaikârro modo kyzemawyadâne*

<sup>14</sup> “Jesus einwânni urâ” myguelymo, âkelomo xurâem koendâ amipyra âmaemo warâ watay olâ myguelymo kulâ, Cristo eynynâ ypemugudo. Amygueduomo kulâ Deus imakewâbyramo ise. <sup>15-16</sup> Tâwâlâ wâne Jesus einwânni âdypebaom modoram, “Tâseguâdâzeba itaungâ. Deus âpynirymo, itymo owogonromo warâ xuduze” myguelymo; mâtampyramo, mâentydâbyramo warâ watay olâ ise amyguehomobypy âdyem nipyra. Tâlâ âmaemo tuduzeim, pyni, âtâ tyeseim warâ watay, âunduwâtaungâ. <sup>17</sup> “Jesus tâinwânsi urâ” kykely, ânguy kienmawyadâbyra kulâ-ro watay, kieinwânto âdyem nitaymba, igueypy ara kulâ.

<sup>18</sup> Tâlâ wakeim modo: “Koendonro agânhepyra wâne urâ. Cristo kâinwândylygue olâ ise kâsemaguely” keimpe âmaemo ewy. Tâlâ pylâ olâ, “Urâ olâ, kâsemaguely ise koendonro agânhedlylygue, Jesus kâinwâmpyra wawyly umelâ” keim modo. Eyanmo wauguely olâ: “Nuduwâpyra Jesus kieinwântoem, koendonro aguiempyra kulâ. Koendonro aguienkyl wâgâma Jesus tâinwânsi lelâlâ kydawyly kienehonly” uguely. <sup>19</sup> Tutuzelâ âmaemo Deuspe awyly. Âkealâ awârâ. Awârâ mâtuntulymogue kulâba olâ ise mâtumakeolymo. Kadopâ inakai modo mawânkâ Deuspe awyly tutuzemo lâpylâ, tytazemo-ro warâ. <sup>20</sup> Tuândy awâkâ, “Jesus tâinwânsi urâ, âdy koendonro agânhepyra olâ urâ âkelomo xurâem” keim. Koendonro aguienkyl wâgâma Jesus tâinwânsi kydawyly kienehonly.

<sup>21</sup> Enanâguewâdaungâ Deus aguehobypy kydamu Abraãooram, Abraão tâinwântâ lelâlâ awyly tientoem: “Âmery Isaque xyâgâ, ânguydo imeom yam mâengamehoem mâyân-ho ara” kewândymy. Aituo Abraão tuhu angatoam ietyby onwa Isaque nhadyly, nhague-tunâdyly. Nhâly ume kehoem myakâwândy: “Akâiedâ! ‘Aiekâ’ uguehobypy amânhetoem

on-hondybyem mawyly xutuagUILâ” kely Deus AbraÃoram. <sup>22</sup> Deus “Aiekâ” kehobyry ara kehoem myakâwândy AbraÃo aidyly, Deus tâinwânsel lelâlâ tawyly tienehon-hoem, adienkyly modo wâgâ. <sup>23</sup> Deus itaumbyry awo wâgâ iwenibyem: “Deus aguely AbraÃoram: ‘Pymâ Deus tâinwânsel lelâlâ âmâ. Awlygue âdy iwentâdo lâpeba âmâ’ kely.” Aituo myakâwândy AbraÃo “Deus eataen-ho” kehonly. <sup>24</sup> Arâma kieinwândyly kienehonly, “Aiekâ” kehobyry aguiendylygue. Arâpa watay, kieinwândyly âdyem nitaymba, Deus xurâem tâwentâguezenry keba kurâ-ro warâ.

<sup>25</sup> Enanâguewâdaungâ pekodo MON waunlo Raabe, azagâ uguondo israelita nhoento-byry. Sodadu israelita domodo iray igoñotyby myakâwândy akaemo azagâ, xidadâ enuagaenze. Deus wâgâ unâ tindatyby tâinwânsel tawylygue myakâwândy Raabe akaemo azagâ uguondo tâty oday soense tyanepa awyly. Ilâpyryem âsemaguehomoem eagonro ânwa oze indâwantâdylymo. Adienkyly wâgâlâ tâinwânsel tawyly nhenehonduo, ewentâdo lâpeba Deus xurâem.

<sup>26</sup> Kâgadopyry âzetyly-ro watay, igueypyem kurâ. Arâ lâpylâ, Deus aguiendyse ato aguiempyra kurâ-ro watay, “Jesus einwânni urâ” kykeho, âdyem nipyra awyly. Igueypy ara kulâ Deus kâendyly.

### 3

#### *Kulugue inakanhe aguykeho kaindâ lâpylâ*

<sup>1</sup> Âmaemo ewy aguipalâ tâise Jesus eynynonro modo âtâdyguyhodâ enomedâniem ini, Cristo eynynâ ypemugudo. Xina Deus wâgâ enomedâni modo ise, âdalâ kulâ xina aidyly-ro watay, âsenomedâni modo takaze kehoem tâwentâguezeim, tutuzelâ âmaemo. <sup>2</sup> Idânârâ kurâdo Deus izepa ato adyele lelâ. Âdykâ lâgâlâ ânguy Deus izepa ato aniempyra nipyra. Mâkâ âdalâ kulâ aguedânrâ, Deus ize ato ara isezedlylakuru. Adâkeho modo, adienkyly modo, tyangahu oday tunâry modo warâ tymanâze mawânkâ.

<sup>3</sup> Kawaru itano tyese kurâ, ize kydato ara aguientoem. Mârâgue kulâ mâkâ kiempagunâdyly, kiangâikely warâ. <sup>4</sup> Etaungâ pepi imâsedo; sapezenru ton-honreim mâtâ igononi, leme imeimbyry kulâ olâ sani sagâikeim warâ. <sup>5</sup> Alâpylâ kulu, imeimbyry kulâ wâne, sawoem kitoem, imâsedoem kehoem kydâdutuhoem warâ adyele olâ. Etaungâ! Peto imeimbyry wâne, poji imeâgâembâ tugueze olâ! <sup>6</sup> Kulugue inakanhe aguykeho kaindâ lâpylâ, peto ara kehoem. Idânârâ unâ inakai adâkeze kurâ. Inakanhe aguykeho idânârâ kodo inakanhe nhedyly, tâzewânu inakai kodo nhahuly wâneam myara. Peto poji anaym adapeguylly-ro watay, idânârâ tyaduânse, myara lâpylâ kunâry iwyku MON idyly, idânârâ kodo nhahuly, kyigueho odaji kehoem. Âdykâka awârâ âewyly? Infernudâ, Satanás ejidydâ.

<sup>7</sup> Idânârâ ânguydo imeom tahozeânze kurâ, tawâguneim modo, idu odano modo, ârahujini modo, paikano modo warâ. Kianwâdyly watay, tâwâlâ ize kydato ara aguiendyly. <sup>8</sup> Ânguy olâ tulu nimanâbyra, inakanhe adâkeba tâitoem. Âgâu kâtobyry ewânedly, ara lâpylâ inakanhe aguykeduo ewânedly, kyâdâ-ro warâ. Ânguy tulugue inakanhe adâkeho aguepa tâitoem aguepa nitaymba. <sup>9</sup> Kytanrugue Kywymâry, Kunwym Deus koendâ awyly wâgâ adâkeze kurâ. Mâkâam aguykehoguelâ lâpylâ olâ âkelomo kiunâguedly Deus tara nhugutyby modo. <sup>10</sup> Kytaybalâ unâ Deus koendonroem awyly wâgâ aguely egasely, mâtâ oze lâpylâ olâ kurâ domodo wâgâ inakanhe aguykely egasely. Arâ aguykeba kine, Cristo eynynâ ypemugudo. <sup>11</sup> Paru tânyzeim, paru tânyzenry warâ âzetay lelâ inkâba iazely! <sup>12</sup> Cristo eynynâ ypemugudo, figu lelâ figureira ewily, azeiton-ague pylâ ewitu nitaymba. Uva lelâ uva edy wogonro, uva, figu warâ inkâba. Paru tânyzenry egasehodâ, paru tânyzeim negasewâbyra. Awlygue kytarygue koendonro wâgâ lelâ aguykenre, inakai modo wâgâ lâpylâ waypa.

### *Azagâ tâzenomery wâgâ agueho, Deus nhuduypy, Diabu nhuduypy warâ*

<sup>13</sup> Âduaymo tâlâ âdy iozeno, âdy iozepaom warâ awyly xutuim watay, koendâ adâidlyguelâ awârâ nenehomo. Koendâ adâidlygue, sawoem nipyra tiuntuyby aniendâmo. <sup>14</sup> Angahumo oday agonromo wâgâ mâsewânilymo, âdalâ kulâ amyguelymo, amidlylmo warâ watay, “Tonomegueim urâ” tâkezeba itaungâ; myguewâdylymo kulâ awârâ. <sup>15-16</sup> Deus konomery nhuduypy mâkeba awârâ. Xirâ onro anano kulâ awârâ. Tâzenomery inakai Diabudâpa âewyly, adyeso kurâ-ro warâ, kyangahu odaylâ mawânrâ âtugudyly. Âdykâlâ âkelomo isejiguy wâgâ âsewânirimbe, âkelomo takaze âdutuimbe warâ watay, tâdâtuebadlybe, inakai modobe warâ.

<sup>17</sup> Konomery Deusdâba âenibe kurâ-ro watay olâ aguidyly, âdygue kâwentânehomba. Ânguy kieumpyra kurâ; kintoguyba kurâ. Koendâ lelâ ize kydawyly. Idânârâ agâ kataen-honu. Toenzepa kinwynedyly lelâ. Koendonro modo aguienkylgue âdaunlo modolâ kienmawyadâguyl. Aguykehogue, aguienkylgue warâ ânguy kienokubyra kurâ warâ. <sup>18</sup> Deus xurâem koendonro tâdâseguebyly, tâjidueku warâ epagunâni modo ewanopyry, ewy etâdyby wâne, ewilyem tâze kaunâoze myara.

## 4

### *Deus ize ato agâ âseinwândânry modo*

<sup>1</sup> Âdykâbaka tâdâjiewiâsedly, tâdâseguebydyze tadalafil warâ âewyly, inanajimo? Deus mâinwândyse lelâlâ wâne âmaemo, mâkâ aguehobyry takaze lâpylâ olâ âmaemo. Angahumo oday tâdâjitoguulybe-ro waunlo ara. <sup>2</sup> Toenzepa âdyo imeompe midyse mawylymo. Ize matomo manâto peba-ro watay, kurâ tyâze lelâlâ âmaemo, âdype mitomoem. Mâkâ tâlâ atogue toenzepa tâsewânize âmaemo. Awylygue mâintoguydyze mawylymo, ize matomobe mitomoem. Deusram mâenkabyra mawylymogue olâ, ize matomo peba mawylymo. <sup>3</sup> Deusram tâkaze lelâlâ wâne âmaemo, mâenmakeba olâ âmaemo. Koendâ âunâgumogueba mâenkadylymo awylygue, Deus nudupa awyly. Tâwâlâ omaromoem kulâ mawânrâ mâenkadylymo.

<sup>4</sup> Deus aguehobyry mâinwâmpyra mawylymogue, ize ato aiedyly mâinmolymo, ize matomo amânhetomoem kulâ. Tutzelâ âmaemo, Deus ize ato agâ âseinwândânry modo ize matomo watay, Deus idueryem midylymolâ awyly. Augueondyly, Deus izepa ato ara kulâ xirâ onro anaym amidlylmo watay, Deus idueryem midylymolâ lâpylâ. <sup>5</sup> Warâ iwenibyem awyly Deus itaumbypy awo wâgâ: “Deus kyispiritury kuodaxi ienipyryem. Awylygue koendonro, koendâpaom alelâ aguiendyse kydawyly.” <sup>6</sup> Deus koendonroem awyly olâ ton-honreim kuru, inakanhe aguipyra kitoem. Awylygue Deus itaumbypy awo wâgâ warâ iwenibyem awyly: “Tadaloenly kewâni modo ize inkâba Deus; ‘Âdy mâkeba urâ’ kewâni modo tâmawyadâze, eon-honrumo tuduze warâ olâ.”

<sup>7</sup> Deus aguehobyry ara aitaungâ. Diabu, Deus izepa ato âyanmo aienehonze ke-duo, âdaunloenlâ aguely kâjiwantaguedaundâ. Idatânry ara midylymo lelâ-ro watay, âydâpamo âxigueze lelâ. <sup>8</sup> Deusram iwaguepa aintaungâ, iwaguepa âyanmo saintoem lâpylâ. Imarymo tywykeba itoem mâzemaunguehomo ara, inakai modo amânhekylymo imowâdaungâ, Deus enanaym koendâ mitomoem, âmaemo Deus izepa ato aieni modo. Inakanhe mâpaunzedomo imowâdaungâ, âmaemo koendâ lelâ amidlylmo waunlo emyenro modo. <sup>9</sup> Toenzepa âjityendaungâ, toenzepa kehoem ohogüendaungâ warâ inakai modo amânhetomo byry wâgâ. Ailumo ogunrumoem ietaungâ, Deus mâinwâmpyra matomobyry mâuntuduomo. Omarumo âtynrumoem ietaungâ warâ. <sup>10</sup> “Âdy mâkeba urâ” kewâtaungâ Kywymâry Deusram. Arâ ise xurâem, tynrenseinhe mawylymo.

### *Ânguy kiunâguebyra kine*

<sup>11</sup> Cristo eynynâ ypemugudo, âkelomo kâdunâguedaundâ. Deus ânguy kiunâguebyra kitoem adâkeze. Âdaituoba kulâ âkelomo mânentâdylymo, mânâguedylymo warâ watay, Deus aguehobyry mânâgueguylymo. Deus aguehobyry mânâgueduomo, Deus takaze mâtutulymo. Âmaemo mawânrâ âdy ioze, âdy iozepaom warâ awyly agueim, Deus keba. Arâ-ro watay, Deus einwânniembâ tâise âmaemo, Deus xuturin-em ise myguewâdylymolâ. <sup>12</sup> Deus lelâ warâ “Aitaungâ” keim. Mâkâ lelâ ânguy tâwentâzeim, tâwentâzenry warâ awyly xutuim. Mâkâ lelâ ise xypyryem agueim: “Mâkâ modo ise kâenmakely. Mâkâ modo ise ydâpa kânhekyly” keim warâ. Awylygue ioze inkâba ânguy kienwentâdyly.

### *Kopaelâgâ aini ânguy nutuwâbyra*

<sup>13</sup> Idataungâ. Watâkeze âmaemo: “Iwerâ atay, kopaelâgâ atay warâ idâze urâ xidadâram. Tokalâ anu ise târâ wawyly. Âdydo imeom sanâse, vende iese warâ urâ, toenzepa ise ydinerugu” myguelymo. <sup>14</sup> Âdy kopaelâgâ agâmo aini mâtuntuba olâ âmaemo, âiguepamo atay, âiguepamo atay warâ. Ikamu emyenro kulâ âmaemo, âewyly, sakadyly waunlo. <sup>15</sup> Awylygue warâ aguewâtaungâ: “Deus ize-ro watay, auguehobyry aiese urâ” kewâtaungâ. <sup>16</sup> Kopaelâgâem aini tutuze mâtutulymo-ro watay, Deus takaze mâtutulymo awârâ. Ìnakai kulâ arâ tâdâpaunzedly. Mâkâ lelâ awârâ xuturim, âmaemo mâkeba. <sup>17</sup> Mâkâ Deus aguehobyry adyeseinhe tiuntuly umelâ aietânry, Deus aguehobyry nhakadylylâ mâtakâ.

## 5

### *Toenzepa tydinerugueim modo xuruto*

<sup>1</sup> Idataungâ, âmaemo toenzepa âdydo imeom sodo modo, Deus einwântâny modo! Ohogüendaungâ, adaenkewâdaungâ warâ wayam mânengazedomo wâgâ. <sup>2</sup> Toenzepa tâlâ matomo modo âdyempa itaynly, iwânzewâdyly, xuhurozewâdyly warâ. Itymo owogonromo tâwâenseim tuonroam âdâhowâdyly. <sup>3</sup> Âdinherurumo, âsejigumo ourugueto warâ mânkanâdybymo tohozeleba idyllylâ ise xutuen-hoim âdy pebaom modo mâtâgue mânemawyadâbyra matomobyry. Xypyry etaji kehoem mawânrâ âdinherurumo, âsejigumo warâ idâtyguyimbyryem mawlymo âmaemoem lelâ. Awylygue ise peto nhâtâny amaym mânengazedylymo. <sup>4</sup> Âpimo ezay tâwanuneim modo ewanopyry ara mâmempwyadaymba âmaemo. Kywymâry Deus Ton-honreim olâ tâwanuneim modo saenlumo tydase. <sup>5</sup> Âdy ipa matomo lâpeba âmaemo xirâ onro anaym. Koendâ lelâ kehoem ize mawlymo, âdyam ize matomoam tâtâze lelâ âmaemo warâ. Tapirâ xyâhoem sadyeândyly wâne myara, adyzededylymo pyni tâkubâgueingue, tâwâenseingue warâ, âiguehomo odaji idly ara. <sup>6</sup> Âdaitânry modo tunâgueze, tâwentâze warâ âmaemo, pymâ modo enanaym, xyâhomoeum kulâ. Âdara âsemaguehomo peba-ro warâ, âdypeom keba awylymogue.

### *Kydâsenagazedyly kienmaen-hoem kuruto*

<sup>7</sup> Cristo eynynâ ypemugudo, idânrâ mânengazedylymo emaenwâdaungâ, Kywymâry Jesus odopâdyly ara. Etaungâ. Âpa ezary sodo kopâ waunro ihuguely nhenuendyly tientâdoem. Ilâpyryem sahanâni ihuguely nhenuendyly, tienkaunâdoem. Mârâ pyni nhekaunâguylyma tywyneim kuru, mâtâgue mawânkâ ise ipynigu. <sup>8</sup> Myara lâpylâ Kywymâry Jesus enuenze tynazeba itaungâ. Inepa ise odopâdyly.

<sup>9</sup> Cristo eynynâ ypemugudo, âpemugumo Jesus eynynonro modo kâdunâguedaundâ, Cristo eynynâ ypemugudo, Deus inwentâbyramo itoem. Ohondbyyem mawânkâ Jesus. Inepa ise âewyly, tâwentâzeim, tâwentâzenry warâ wâgâ agueze. <sup>10</sup> Jesus mânwândylymogue mânengazeolymo emaenwâdaungâ, saguhoem Deus itaumbypyry aguewâni modo nhemaen-hobyry ara. <sup>11</sup> Akaemo wâgâ koendâ aguykely olâ, tâsenagazedyly umelâ Deus einwândyly nimoba atomobyry wâgâ. Jó aiehohobyry

enanâguewâdaungâ. Toenzepa âsenagazemâmy. Idânârâ tâlâ ato modo adainwânmy: imeombyry, eguydo, isejiguy, ipi ezary modo; toenzepa ewâmamâ lâpylâmmy warâ. Deus einwândyly nimoba olâ myakâwândy. Ilâpygueduo olâ, koendâ kehoem myakâwândy Deus eagâ awyly. Idânârâ tâlâ ato adaimpy ejipyano xuduwânmy Deus. Kytyendâ lelâlâ Deus, koendâ lelâ kagâ awyly warâ.

<sup>12</sup> Cristo eynynâ ypemugudo, aiese lelâlâ mâtutulymo watay lelâ, “Aiese urâ” kewâtaungâ. Amânhepyra mâtutuduomo olâ “Agânhepyra ise urâ” kewâtaungâ. “Tâwlâ ise kau, onro warâ tytanrugue kulâ xugunipyry ienagazenehonly, âkealâba auguely watay!” tâkezeba itaungâ. Arâ Deus ezedy âwankuem mânhedylymo-ro watay, inwentâzemo, inagazezemo warâ mâkâ. Xirâ mâuntudyzemo wato.

<sup>13</sup> Mâsenagazedylymo watay, Deus agâ aguewâtaungâ. Omarumo ume, Deus koendoroem awyly wâgâ âgâtudaungâ. <sup>14</sup> Iwâmadlymo watay, Jesus einwânni iwymâry modo igâsedâungâ, Deus agâ aguehomoem, tâwâneim nhangahu onwa azeiti âdiempa nhetomoem warâ. “Kywymâry Jesus aguehobypy ara xirâ âmâem agânhedyly” kezemo. <sup>15</sup> Deus tâwâneim kua iese awyly tâinwânske kehoem Deusram nhekadylymo watay, tâwâneim kua iese Deus. Inakanhe aityby mâkâ tâwânein-ro watay, inakanhe aitobyry xygakeze lâpylâ. <sup>16</sup> Deus izepa ato amânhedylymo-ro watay, agonromo agâ âkaduwâdaungâ. Deusram ekadaungâ, inakanhe amitomobyry nhygakehoem, kua âetomoem lâpylâ warâ. Deus ize ato lelâ aieni nhekadyby ton-honre lelâlâ, Deus ize ato aienehonze.

<sup>17</sup> Elias enanâguewâdaungâ, Deus eynynâ agueypy. Kâmyenro kulâ lâpylâ myakâwândy mâkâ. Kopâ nihugueba itoem myakâwândy Deusram nhekadyly. Três anu, tuotagueze myakâwândy kopâ nihugueba awyly! <sup>18</sup> Awârâ sakabygueduo myakâwândy, Deus agâ agueondyly; kopâ ihuguehoem nhekadondyly. Toenzepa myakâwândy kopâ ihuguely. Âdydo imeom etâdyby iazely, ago idyly, ekaunâdyly warâ.

<sup>19</sup> Âpemugumo ewy Jesus eynynâ iozeno lelâ aniempypyra-ro watay, inepa kehoem xurutaungâ, koendâ lelâ nheinwântondoem. <sup>20</sup> Xirâ enanâguewâdaungâ. Mâkâ iozeno einwântâny koendâ lelâ Jesus nheinwântondoem amânhenehonlymo watay, âsemagueze mâkâ. Inakanhe aitobyry modo Deus xygakeze. Igueduo, Deus agâpa nitaymba ise.

Tiago

## 1 PEDRO

### Pedro Saguhô Kata Inweniby

Xirâ kata wâgâ inwenily Pedro nhangahu odaji iemâmy Deus. Awylygue Deus itaumbrylâ xirâ Pedro inweniby. Jesus nhappygueni, aguely idani modo ewy myakâwândy Pedro.

Jesus einwânni modo tâsenagazedylygue âkelo âjiram âwientyby modoram myakâwândy inwenily kuru, iomazeândoem. Deus itaumbry egatuly izepaom modoram myakâwândy âzenagazeolymo. Aituo xirâ kata inwenily myakâwândy xurutomoem, einwândyly nimopa itomoem, tyeinwândylygue tânagazedyly umelâ, Deus ize atolâ anhesezedomoem warâ. Cristo tânagazedyly nhemaen-hobypy ara, Tunwym ize ato aniempyra nipyralâ, arâ lâpylâ tâise akaemo nhemaenly, tyeinwândyly nimopamolâ.

Xirâ kata wâgâ einwânni modo tâduruhozemo myakâwândy, âpynedomoem, nâpeâmbyra itomoem, tâsenagazedyly nhemaen-homoem warâ.

#### *Aguely adaguho*

<sup>1</sup> Urâ Pedro, tywâgâ aguenriem Jesus Cristo ingonotyby. Âmaemo Deus turâem iduakewâdyby modo wayam wayam ityby modoram xirâ kata kâinwenily, Ponto eynynonro modoram Galácia eynynonro modoram, Capadócia eynynonro modoram, Ásia eynynonro modoram, Bitínia eynynonro modoram warâ. <sup>2</sup> Iduakewâdyby modo âmaemo Deus aguehobypy ara, xurâem mitomoem. Deus Ispiriturylâ âduakewânímo, turâem âetomoem, Jesus Cristo einwânniem tywykenry ara mitomoem. Jesus Cristo tunu tyapâze kruz wâgâ, inakanhe amitomobypy modo xygakehoem.

Alâ inanry âynynâmo Deusram kâenkadyly, imâem kehoem koendâ mâzehohomoem, âdylâ akaladânímo peba itoem warâ.

#### *Deus agâ kito kinwânwânto*

<sup>3</sup> “Koendonro lelâlâ âmâ, tuomaenzeim warâ!” kykenre Deusram, Kywymâry Jesus Cristo nhunwynram. Toenzepa koendonro kurâem aniedâ, xurâem koendâpa kydawly umelâ. Iweloem kyetondâ, kyazeondyly-ro waunlo ara. Iweâma kurâ tutuze, “Aiese urâ” tâkehobypy aiese awyly kurâem. Jesus igueypyem awyly ume kurâem tyetonze myakâwâm. Awylygue, tainwâNSE lelâlâ kurâ, mâkâ aunloenlâ tagâ kyesey awyly kyigueduo. <sup>4</sup> Deus tynynonro modoram “Xuduze urâ” kehobypy kienmakely kinwânwândyly. Âdaunloenlâ adainrim keba, inakanhe ini keba warâ ise kienmakely târâ kâjidydâ. <sup>5</sup> Koendonro modo mäenmakelymo nhontybyem târâ. Jesus tainwâNSE mawylymogue, nhetâmolâ Deus, eydâ atoram mydâlymo. Xypyry etay Deus xutuenhonze, kienmakely tienkanâdyby âdaunloenlâ eagâpa kipyra kito.

<sup>6</sup> Awârâ wâgâ ohomaendaungâ, imakezemo mawânkâ Deus. Mârâgue lelâba wâne iwerâ mâsenagazedylymo, aekuru tâjityenzeba olâ itaungâ. Sakani kulâ awârâ mâsenagazedomo. Tâese wâne, takaze olâ; aunloenlâ nipyra. <sup>7</sup> Jesus tainwâNSE kuru mawylymo eto awârâ mâsenagazedomo. Egâ wâneam ouru. Peto onwanji âieholy mâtâ âjiguetolâ kuru awyly xutuhoem myara. Âjiguetolâ watay, nadaimpa peto onwaym. Arâ lâpylâ Jesus tainwâNSE mawylymo âzeholy mâsenagazedylymo wâgâ. Jesus mânwândyly olâ âdyem ini kuru, ouru takaze, adainrim keba mawânrâ ise. Jesus Cristo odopâduo, âyanmo Deus aguely ise: “Tâdâsenagazedylybe lelâlâ wâne, arâlâ olâ Jesus mânwâNSEzedylymo. Adyren-honze âmaemo warâ, âwâkurumo, on-honrumo warâ xuduze urâ” keze mawânkâ âyanmo.

<sup>8</sup> Jesus māinwynedlymo, âdykâ māempyramolâ. Tāinwānse âmaemo mâkâ, iwerâ māempyramolâ. Toenzepa omarumo, âmaemoem anhetyby wâgâ; âdara mygue-homo nudupa lâgâlâ. <sup>9</sup> Mohomaendlymo, Deus imakelymo awylygue, Jesus māinwântomobyry wâgâ warâ.

<sup>10</sup> Saguhoem Deus itaumbypyry egatuwâni modo koendâ kehoem myakâwândy awârâ tâdâsemaguelly wâgâ tiuntudyze awylymo. Cristo âewyly iraylâ, mâkâ kieinwântuo kydâsemaguelly awyly wâgâ adâkezemo myakâwâm, ânguy adâkeho awyly koendâ nutubamo olâ myakâwâm. <sup>11</sup> Waunroenlâ, xutunrimo Deus Ispiritury eyanmo aguewânmmy: “Messias, Deus ingonokyly, âsenagazeze. Âsenagazedybyem olâ âdyren-honze” kewânmmy. Messias ezedy olâ myakâwândy aguepa. Awylygue aunlolâ aguelymo: “Ânguyka ise Messias, Deus Ingonokyly? Aunlolâ âdaraka ise saindyly?” kezesedylymo. <sup>12</sup> “Messias wâgâ amyguelymo, âigueduomo olâ ise awârâ aidyly. Wayam ise awârâ aidyly, âweonmo ume” kely myakâwândy Deus eyanmo. Iwerâ unâ iwâkuru tâdâsemaguelly māindadylymo, Jesus einwândyly wâgâ aguewâni modo nhegatuyby. Xirâ unâ âyanmo egatuwânbypyry modo Deus Ispirituryam aguehoymbyem aguelymo. Awârâ tâdâsemaguelly wâgâ mawânkâ anju domodo toenzepa tiuntudyze awylymo wâne, nutubamo olâ ise.

### *Deus amânhedysemo ato aiedyly kâjimowâdaundâ*

<sup>13</sup> Ohondbyem lelâ itaungâ, Deus amânhedysemo ato inepa amânhetomoem. Inanaynmolâ itaungâ. Aunlolâ mâenmakelymo iwânwântaungâ, Jesus Cristo odopâduo, “Koendonro xuduze urâ” Deus kehobyry. <sup>14</sup> Deus amânhedysemo ato aiedyly kâjimowâdaundâ. Jesus māinwândlymo iray, ize ato araba kulâ ani izewenkumo, inakai modo aiedyly kulâ ize matomo, âdy mâkâ ize ato awyly mâuntuba mawylymogue. Iwerâ olâ, xurâem mawylymogue, ize matomobypyry, izewenrymobypyry warâ araba aitaungâ. <sup>15</sup> Deus mawânkâ âgâsenimo, xurâem mitomoem; awylygue mâkâ ara lâpylâ aitaungâ. Âdaunloenlâ inakai akâiedaundâ, inakai aniempyra ato ara. <sup>16</sup> Iwenibyem mawânrâ Deus itaumbypyry awo wâgâ: “Âdy inakai akâiedaundâ, inakai agânhepyra wato ara” kewândymy Deus.

<sup>17</sup> Deus agâ amygueduomo, “Kunwym Deus” myguelymo. Xypyry etay, mâkâ enado ise idânrâ kydâtâdyguyl, xirâ onro anaym aguentaymby modo xutuhoem. Agueduo, ioze lelâ ise aguely, anhedyly warâ, kieinwântobypyry ara, kieinwâmpyra kydatobypyry ara warâ. Tâinwânnipyry modo koendâ ise nhedyly; tâinwântânybyry modo olâ ise koendâpa nhedyly. Awylygue onro anaym mawylymo ara aunlolâ Deus xyrentaungâ. <sup>18</sup> Âdamudomo ezewenry amânhedylymogue kulâ ani saguhoem Deus xurâem mawylymo, inanajimo. Âdyem nipyra olâ mârâ tâzezewenry, awylygue mârâ aguiendlyguepa Deus xurâem kidyly.

Âdygue imakehomoem epywadobyry tutuzelâ âmaemo. Dinherugue, ourugue, prague warâ inkâba imakehomoem epywadyly; adainrim modo kulâ awârâ. <sup>19</sup> Cristo kruz wâgâ tunu tyapâze igueduo, tâwâense kehoem akâwâm imakehomo nhanâdyly. Kaneru tywykenry kehoem inakanhe adâjítobyry xygakehoem tyâzeim, myara akâwâm Cristo iguely, inakanhe aguitobyry xygakeze, âdaunloenlâ âdy inakai aniempyra awyly umelâ.

<sup>20</sup> Idânrâ âtugudyly iraylâ, Deusram aguehoymbyem awyly kâmakerin-em. Iwerâ xirâ “Xypyry etay” keho ume Deus Jesus ingonodyly xarâ onro anaxi, koendâ kyeze. <sup>21</sup> Cristo wâgâ tâwâlâ Deus māinwândly, xurâem midyly warâ. Igueypyem awyly ume, kurâem ietomâ, pymâ ton-honreinhe, tywâkureinhe warâ ienehonwâm. Deus awârâ anhedyly, kieinwântoem, “Aiese urâ” kehobyry anhedyly kinwântoem warâ.

<sup>22</sup> Unâ âkealonro tâinwânsse mawylymogue, inakanhe amitomobypyry xygakely, igokeyby ara âmaemo. Awylygue ton-honre lelâlâ Cristo eynynâ âpemugumo māinwynedlymo.

Toenzepa iwynedaungâmo lakuru; amyguelymo kulâ waypa nidâ. <sup>23</sup> Iweloem ietybyem âmaemo, iazeontybyem. Odomo iguedânrygue iazeyypyem mawylymo Deus iguedânry aguehobyry âdykâ adaindânry wâgâ. Deus inwenien-hoymby aunloenlâ ise âdyem awyly. <sup>24</sup> Saguhoem Deus, Isaías inwenihoeum aguehobyry ara kehoem kagâ aidyly: “Egâ wâneam nady poji anano modo.

Tywâkure lelâlâ wâne sawanku, aunloenlâ nipyra olâ.

Inepa kehoem nady iladyly;

sawanku onro onwa ihuguely warâ.

Arâ lâpylâ idânârâ kurâ domodo xirâ onro anaym iguein-em awylymo.

Idânârâ eon-honrumo adainze, imâsedoem awylymo warâ.

<sup>25</sup> Kywymâry Deus aguehobyry olâ ise âdaunloenlâ nadaimpa;

alâ ise aisezedly aguehobyry aralâ”

warâ Deus itaumbypyry awo wâgâ iwenibyem awyly.

Jesus wâgâ unâ koendonro âyanmo egatuybylâ xirâ Deus itaumbypyry.

## 2

### *Idânârâ tynynonro modo agâlâ Jesus*

<sup>1</sup> Inakai aiedyly imowâdaungâ. Ânguy kâzenokudaundâ. Inakanhe aini âmaemo watay, koendonro ara tâiseba itaungâ. Tâsewâñizeba itaungâ. Agonromo kâdunâguedaundâ.

<sup>2</sup> Egâ wâneam iamudo iwelo iazeypy. Tyze inwanry tienydyze lelâ. Tadakuilygue ago idyly. Arâ lâpylâ Deus itaumbypyry iozeno xutuzezedaungâ. Deus Ispiritury unâ nhuduypylâ mawânrâ kydâsemagueho wâgâ kiuntuho. Mâindadylymogue, mâinwândylymogue warâ mawânrâ iwâgâ imâem mâuntulymo, kâenmakeybynra “Xuduze urâ” kehobyry mâuntulymo warâ. <sup>3</sup> Iwenibyem mawânrâ Deus itaumbypyry awo wâgâ: “Kywymâry tainwâñse mawylymogue, tutuze âmaemo, koendâ kagâ awyly.”

<sup>4</sup> Tuhuge âtâ itâdyly watay, itâni tuduakeze; izepa tato pylâ nhamuinly-ro. Mârâ tuhu samuimby ara lâpylâ toenzepa Jesus imeni modope awyly. Deus olâ “Jesuslâ Messias kâingonotyby; tywyneim awâkâ urâem” tâkeze. Igueypyem inkâba Kywymâry Jesus; tâlâ mâkâ. Eyam iwaguepa aintaungâ, tuhu tywyneim kehoem emyenroam. <sup>5</sup> Âtâ saunâtoem tuhu angatoam iedyly myara lâpylâ Deus on-hoam âedylymo, Ispiritury etyem mitomoem. Kurâ domodo eynynâ Deus agâ agueim lâpylâ âmaemo. Deus Ispiritury aguehobyry aralâ, Deus tuomaenze, eagâ adâkeze warâ âmaemo, Deusram ânguylâ mâundulymo waunlo ara. Amyguehomo tydase Deus, Jesus Cristo iguehobyry wâgâ.

<sup>6</sup> Warâ myakâwândy Jesus Cristo wâgâ Isaías inwenily:

“Âtâ itâni tuhu imâsedo iaxi tyese, ipery nihugueba itoem myara,  
mâkâ kâinwyneguylâ kâingonodyly.

Siãodâ\* ise mâkâ, eydâ watodâ.

Idânârâ iwymâryem itoem augue.

Auguehobyry modo aiese lelâ urâ.

Mâkâ kâingonokyly einwânni nâpybazedaymba ise tinwânwântyby wâgâ’ kely Deus.”

Warâ iwenibyem awyly Deus itaumbypyry awo wâgâ.

<sup>7</sup> Âmaemoem tywyneim lelâlâ Jesus, tuhu tywyneingue tâzekeim; awylygue mâinwynedlymo. Einwântânry modo olâ, mâkâ izepa. Warâ iwenibyem awyly Deus itaumbypyry awo wâgâ: “Mârâ tuhu âtâ itâni modo izepa atobypyry ize tadatoem nidâ” kely iwenibyem Salmosdâ.

<sup>8</sup> Warâ Jesus Cristo wâgâ Isaías inwenily: “Ihodaigâñimo ise xirâ tuhu, ihuguehomoem” kely iwenibybe lâpylâ Deus itaumbypyry awo wâgâ. Toenzepa wâne Deus

\* <sup>2:6</sup> Sião egâ vocabuláriodâ.

itaumbyry idani modo neinwâmpyramo olâ. Aituo ise Deus ize ato aralâ âsenagazedlymo xypyry etay.

<sup>9</sup> Âmaemo Jesus einwânni modo olâ Deus âduakelymo, xurâem mitomoem. Kurâ domodo eynynâ Pymâ Deus agâ agueim âmaemo. Deus ize ato ara lelâ aini modo âmaemo. Deus tâlâ ato âmaemo. Deus ton-honrugue anhetyby egaturin-em iduakeyby âmaemo. Kopae iamu duay adakobâni ara ani âmaemo saguhoem. Deus ingâsedbyylâ âmaemo, idânârâ iwâgâ mâuntuhomoem. Awylygue iwerâ, ânwa koendâ kehoem tyajineim oze adakobâni ara âmaemo. <sup>10</sup> Saguhoem Deus xurâempa ani âmaemo; iwerâ olâ xurâem âmaemo. Saguhoem idânârâ kytyendâ Deus awyly mâuntuba ani âmaemo; iwerâ olâ kytyendâ awyly tutuze âmaemo.

### *Jesus einwântaynrim modo aito*

<sup>11</sup> Yataen-ho kâinwyneguyl modo, enanâguewâdaungâ xirâ onro anaym sakani kulâ mawylymo; tarâ tâjikeim keba âmaemo. Awylygue âyanmo kâenkadyly, inakai modo amânhedyse matomo imowâdaungâ. Kuoday tâdâjítoguylybe-ro waunlo ara mawânrâ; inakanhe aguidyse kydato, Deus ize ato aguienkyl agâ âjítoguyly-ro waunlo ara. <sup>12</sup> Koendâ lelâ Jesus einwântâny modo agâ itaungâ. Awylygue, tâwâlâ wâne âunâguedlymo, koendonro modo amânhedylymo tientuo olâ, inakai keba mawylymo, aguezemo. “Koendonro âmâ, Deus” kezemo xypyry etay.

<sup>13</sup> Kywymâry Jesus xurâ mawylymogue, idânârâ pymâ domodo agueho kadakadaundâ. Pymâ kuru César einwântaungâ. <sup>14</sup> Pymâ kuru, pymâdo tâmaryem ingonotyby modo einwântaungâ lâpylâ. Aguehoymbyem akaemo inakanhe aini modo nhenagazenehon-homoem, koendonro aieni modo wâgâ koendâ aguehomoem warâ. <sup>15</sup> Pymâdo tâinwânsse âmaemo, koendonro adyese âmaemo warâ watay, Jesus kâmakerim wâgâ xutudâny modo MYK isemo lelâ, âdy wâgâ inwentâguedomo peba mawânrâ ise. Awârâ mawânrâ Deus amânhedysemo ato. <sup>16</sup> Etadâdybyem etagueyby ara âmaemo. Awylygue koendonro aietaungâ. “Iweâma tâwâlâ âdylâ inakai agânhedyly, ânguy ienagazedaymba ise” tâkezeba itaungâ. Deus agâlâ âmaemo iwerâ. “Aietaungâ” kehobyry amânhepyra tâiseba itaungâ. <sup>17</sup> Kurâ domodo âwankuem kâietaundâ. Cristo eynynâ âpemugumo iwynedaungâ. Deus xyrentaungâ. Âwankuem kâietaundâ. Pymâ César âwankuem kâietaundâ warâ.

### *Kydâpeâmbyalâ, kydâsenagazedyly kyzemaenre*

<sup>18</sup> Tâzemary modo, âwymârmyo einwântaungâ. Koendonro âwymârmyo atay, koendonro keba atay alelâ, âwankuem kâietaundâmo warâ. <sup>19</sup> Alâ kulâ eagâ iwanomo inagazedylymo-ro watay, tyewiâpazeba itaungâ; alâ emaenwâdaungâ. Âdy agâmo aini tutuze Deus; mâtâlâ ise koendâ âenimo. <sup>20</sup> Aguehobyry mankaduomolâ âwymârmyoam mâzenagazeolymo watay, âkealâ inagazenehonlymo, aguely mankaduomolâ. Âdaituoba kulâ eagâ iwanomoram mâzenagazeolymo watay olâ Deuslâ ise koendâ nhenimo. <sup>21</sup> Âdakykebalâ Deus kydâsenagazedyly kienmaendye awyly. Aitoem lakuru mawânkâ Deus kygâsedly, “Aiekâ” kehobyry aguentoem.

Cristo kruz wâgâ âsenagazebry enanâguewâdaungâ, Deus agâpa kydâiehoba kitodem akâwâm mâtâ aiehol. Tâsenagazeze lelâlâ wâne, âpeânze kepa olâ akâwâm. Kydâsenagazedyly ume, kyewiâpabyra kitodem kienanâguelylâ awârâ. <sup>22</sup> Inakanhe aityby mâtâ keba mâtâ, âdykâ ânguy nenokubyra lâgâlâ warâ. <sup>23</sup> Tâjiwykeoduo, koendâ lelâ aguely, ânguy niwykeba. Kruz wâgâ tâsenagazedu, “Inagazezemo lâpylâ urâ ayetomobyry wâgâ” kepa akâwâm. Warâ akâwâm aguely: “Deus emaxilâ kâtuly” kely. Tutuze Jesus, Deus koendonro, iozeno lelâ warâ awyly, tânanagazi modo âdanhedyly tutuze warâ.

<sup>24</sup> Kruz wâgâ akâwâm Cristo iguely, tâwâlâ âtuly, inakanhe aguitobyry xygakehoem. Iguely akâwâm, inakai modo aguiempyra kitodem, Deus aguiendye ato lelâ aguentoem warâ. Jesus sapioguhobyry wâgâ kua ietybyem kydawyly; Jesus Cristo âzenagazeohobyry

wâgâ ani Deus agâ koendâ kydâieholo. <sup>25</sup> Kaneru ânwa oze xuzatyby ara ani âmaemo. Kaneru eni emyenro pylâ Jesus Cristo-ro. Xurâempa ani âmaemo saguhoem, iwerâ olâ xurâem midâmo; nhetâmo mâkâ aunlolâ.

### 3

#### *Ohogüimby modo xuruto*

<sup>1-2</sup> Tâjiwydy modo, osomo einwântaungâ. Deus aguehobyry neinwâmpyramo lelälâ wâne, amidylymo koendâ awyly tientuolâ ise tyeinwândyse idylymo, Jesus wâgâ unâ eyanmo amyguezesbyramolâ. <sup>3</sup> Âmaemo pekodo modo, mâtâpâgudâdomo ouru mâtækagâin-homo, itymo tâwâenseim warâ wâgâ inkâba âwâkurumo âzeholy. <sup>4</sup> Amânhekylymo wâgâlâ, amyguehomô wâgâlâ tyewiâseba mawylymo wâgâlâ, tâdâjitooguyl myguepa mawylymo wâgâlâ warâ mawânrâ âwâkurumo âzeholy. Xirâ mawânrâ ise adaindânry, tâwâlâ wâne aripiem midylymo. Awârâ mawânrâ Deus xurâem tâjiwâkuru adaindânry.

<sup>5</sup> Arâ myakâwândy pekodo saguho modo, Deus einwânni. Koendonro adienkylymoguelâ, adâkehomoguelâ warâ tywâkuru nhenehonlymo. Deus “Aiese urâ” kehobyry tynwânwânsimo myakâwândy; tusomo tâinwânsimo warâ. <sup>6</sup> Sara enanâguewâdaungâ. Tuso Abraão tâinwânsimo myakâwândy, “Ywymâry” tâkeze myakâwândy eyam. “Sara iweom” kehonze âmaemo, eara amânhekylymo, aiese tyanepa âmaemo-ro watay.

<sup>7</sup> Tâjisodo, tutuze âmaemo, âdara Deus âwydymo mâtâendysemo awyly. Koendâ kehoem etaungâmo; akaemo takaze awârâ on-honrumo. Tawize kehoem etaungâmo. Agâmolâ ise Jesus einwânni modoram Deus nhuduly koendonro modo nhemakelymo. Koendâ mâtâempyra âmaemo-ro watay, Deus âdapypyramo ise, eagâ amyguedyse matomo.

#### *Idânârâ Jesus einwânni modo xuruto*

<sup>8</sup> Xypyryem kuru warâ âurudysemo wawyly. Âzekiba lelâ mâtâpaunzedomo nidâ; tuo-gunreim agâ ohogüendaungâ; tuomareim agâ ohomaendaungâ. Âpynedauingâ. Ityendaungâmo. Agonromo agâ imâsedoem ise tâkezeba itaungâ. <sup>9</sup> Tâpeânzeba itaungâ. Inakanhe aini xurâem inakanhe adâiseba itaungâ. Tyewiâseba itaungâ, agâmo tyewiâtuneim modo agâ. Kâzenagazaundâmo; Deusram ekadaungâ, inagazenimo agâ koendâ itoem, inakanhe aitomobyry, koendonrogue mâtâempywadylymo waunlo ara. Deus ingâsedybylâ âmaemo, idânârâ agâ koendâ mitomoem. Arâ ise “Xuduze urâ” kehobyry mânemakelymo. <sup>10</sup> Warâ Salmos wâgâ, Deus itaumbyry iwenibyem awyly: “Tuomare lelâ ize kydatay, ânguy kiunâguebyra kine,

ânguy kienokubyra kine warâ.

<sup>11</sup> Inakai aiedyly kyjimonre lelälâ;  
koendonro aguyjiene.

Ânguy agâ kydâtuebabrya kine.

Aunlolâ kyewiâseni modo agâ koendâ lelâ kine, iewiâkymo adain-hoem.

<sup>12</sup> Deus ize ato aieni modo mawânkâ aunlolâ koendâ lelâ âzeholy.

Nhekadybymo âjidaholy lelâ warâ;

inakai aieni modo olâ nepyra, nhekadybymo nidapyra warâ”  
warâ iwenibyem awyly Deus itaumbyry awo wâgâ.

#### *Kydâsenagazedy koendonro aguiendylygue*

<sup>13</sup> Koendonro lelâ amânhekylymo-ro watay, ânguy âmaemoem inakai aiese ton-honruneba. <sup>14</sup> Aituo, koendonro amânhekylymo umelâ mâtâzenagazeolymo watay, Deus koendonrogue ipywazemo, omazeânzemo warâ. Awylygue inagazenimo kâdytadaundâ, tâseanezeba itaungâ warâ. <sup>15</sup> Toenzepa Cristo xyrentaungâ. Amânhetomoem aguehobyry aietaungâ, mâkâ mawânkâ âwymârymo kuru. “Âdaituoka Jesus mâtâmpyramo?

Âdaituoka, ‘Âigueduomo, Deusram ise mydâlymo’ kely mânwândylymo?” keim, mân-hoguhomoem âturudybyem lelâ itaungâ. <sup>16</sup> Koendâ lelâ ihoguwâdaungâ. Idataungâ lelâ aguely; tyewiâse kâjihoguwâdaundâ. Tâwâlâ mâsewendâdomoem akâiedaundâ. Tywykeim peba angahumo oday nidâ. Jesus eynynâbaom modo âunâguenimo koendonro modo lelâ amânhedylymo tientuo, âpybazezemo.

<sup>17</sup> Deuslâ mânseñagazedyze donromo watay, koendonro amânhedylymoguelâ mânseñagazedylymo nidâ, inakanhe amidylymo wâgâ inkâba. <sup>18</sup> Tyiguely ume, Cristo âsenagazemâ lâpylâ. Inakanhe aguitobyry xygakeze akâwâm mâkâ iguely. Tokalelâ olâ iguewâm; niguezesebyra. Mâkâ inakanhe aitânry iguely akâwâm inakanhe aini modo xurâem, tâinwânni tunwynram tiantoem. Kruz wâgâ sodo adakâjioly iguehoem; Deus Ispiritury olâ Jesus kurâem ietomâ.

<sup>19</sup> Kurâem tâitondly iraynâ Jesus idâwânm myguewâtyby modo egadopyry etadâdobryam, mâkâlâ Messias einwânnipyry modo emakeim tawyly wâgâ agueze.

<sup>20</sup> Noé pepi imâsedo nhygadyly ume, toenzepa myakâwândy kurâ domodo inakanhe kulâ aidylymo. Tâinwândylymo tynwânwânszelâ myakâwândy Deus. Inepa nenagazenehombamo. Deus neinwâmpyramo olâ myakâwândy. Idânârâ onro xytybyem awyly ume, aguipa kulâ myakâwândy âsemaguerim, pepi odaji âxiedyby modo lelâ. Oito lelâ myakâwândy âsemagueyby: Noé, iwydylâ, azagâ tokalâ warâ imeom, azagâ tokalâ warâ iweisedo, alâ kulâ.

<sup>21</sup> Pepi imâsedo oday tawylygue paru inwenly ume, Noé domodo âsemaguehomobyry ara iwerâ kydâsemagueho. Arâ lâpylâ Jesus Cristo mânwântuomo mânseñaguelymo. Batiza mâieholymo ani, Jesus einwânnipyryem mawylymo mânenehon-homoem, âwykumo etyhoem inkâba. “Tâwentâgueba urâ, Deus xurâem, inakanhe witobyry xygakehobyry wâgâ” tâkeze ani âmaemo, batiza mâieholymo ume. Deus eon-honrugue Jesus kurâem itobyry wâgâlâ âsemagueybyem mawylymo. Awylygue tâwâlâ paikayba mâtikaguemo, Jesus wâgâ iweloem ietondlybyem mawyly mânenehon-homoem. <sup>22</sup> Kayam Deus eydâ atoram todopâze akâwâm mâkâ. Iwerâ Deus eapay eahoru eynynâ ekadybyem awyly, pymâem, idânârâ anju domodo, ton-honruneim modo warâ iwymâryem.

## 4

### *Iweloem ietondlybyem*

<sup>1</sup> Kruz wâgâ tâsenagazeze akâwâm Cristo iguely. Âdara aguydâieholi kiuntuholâ mâkâ. Xurâem mawylymogue mânseñagazeolymo-ro watay, ohondbyem lelâ itaungâ âsenagazeze mânwânklymo mânimopa mitomoem. Cristo xurâ kydawlygue kydâzenagazeoly kien-maenly watay, inakai modo aiedyly imoimbyryem kydawly tânehonze, Deus izepa ato kulâ keba aguienkly awyly. Cristo aralâ tywykeba ize kydawly. <sup>2</sup> Awylygue saguhoem adâjitobyry modo Deus izepa ato âdaunloenlâ akâiedaundâ. Deus ize ato lelâ aietaungâ, âiguehomo saindly ara.

<sup>3</sup> Saguhoem Jesus mânwâmpyra mawylymo ume, inakai modo aiedyly mânimopa mataunaguynre, Jesus xurâ keba modo adiendye ato. Eagâ mohogün-homobyry keba kulâ mâynanâguylomo. Âdylâ inakanhe amidyse matomo adyese lelâ kâinane âmaemo. Okumo ikaji midylymo mânimopa kâinane âmaemo. Ataen-homo agâ adakuize tâtâdyguyze lâpylâ ani âmaemo âjigue oku ikaji mitomoem, kywypado modo amânhetomoem. Kywypadoem kehoem kâinane âty mododâ amidylymo, ekudyby modo deus kewâto mân-hoguedomoem.

<sup>4</sup> Iwerâ olâ arâ amipyra âmaemo. Awylygue ataen-homo Jesus eynynâbaom âsegûâdâdylymo, saguhoem eagâmo amitomobyry ara amidysebamo mawylymogue. Eagâmo amidyseba mawylymogue, âynanâdâmo, âwankuem âetâmo warâ. <sup>5</sup> Xypyry etay idânârâ adientyby modo egatuzemo Deus enado iguewâtyby modo, iguedânrô modo

alelâ. Xirâ anaym aguitobyry ara ise Deus kâpywadyly. <sup>6</sup> Saguhobypy modo ipa, iguewâtybyem. Tunârybyry nheinwântomobyry arâlâ Deusram âzepywaolymo, arâ lâpylâ ise Deus kâpywadyly. Únâ tâdâsemagueho koendonro egatuwâm olâ, tainwânni modo Deus eydâ atoram idâhomoem, tyigueduomo, nadaimpa itomoem, Deus nadaimpa ato ara.

### *Deus konomery nhuduypy ara lelâ aguine*

<sup>7</sup> Iwaguepa xirâ modo adain-ho. Inanaynmolâ itaungâ. Tâwâlâ âjimanâdaungâ, Deus ize ato ara amitomoem, Deus agâ amyguehomoem warâ. <sup>8</sup> Koendonro kuru mâpynedylymo. Agonromo agâ tâpyneze kehoem âmaemo watay, mâtâ inakanhe aito enanânehonze âmaemo. <sup>9</sup> Âxigodo âwantaungâ; xykyho xuduwâtaungâ warâ. Xurâmoem amânhekylmo wâgâ tylahureba itaungâ. <sup>10</sup> Âikâ, âikâ warâ Deus konomeryem nhuduypy. Awylygue mâtâ, mâtâ warâ emawyadâdaungâ inomerymo Deus nhuduypygue, tywymâry isejiguy xuturim koendâ kehoem isejiguy modo nhewaniho ara. <sup>11</sup> Deus itaumbypy mâengatuhomoem Deus inomerymo nhuduly-ro watay, Deus amyguedysemo ato lelâ egatuwâdaungâ. Kâmawyadâniem Deus inomerymo nhuduly-ro watay, aietaungâ on-honrumo Deus nhuduypygue. Koendâ lelâ amidylymo tientuomo, Deus ise nhehogueguylmo, Jesus Cristo eynynonro modo koendâ aidylygue. Aunlolâ tynrenseim, tuomaenzeim, idânârâ iwymâry warâ mawânkâ. Âkealâ xirâ-ro warâ.

### *Jesus einwânniem kydawylygue kydâsenagazedo*

<sup>12</sup> Yataen-hodo kâinwyneguylmo modo, tadalafilizeba itaungâ iwerâ mâsenagazedylymogue. Ouru wâne peto onwanji tâiehoze, iwyku etyhoen-ro, myara lâpylâ agâmo aidyly, Deus ize ato ara mitomoem. Âmaemo kulelâ inkâba âsenagazeni; idânârâ Jesus einwânni modo, Jesus eynynâbaom modoram tâzenagazeozemo. <sup>13</sup> Mâsenagazedylymo ume, tytyremba itaungâ, ohomaendaungâ lelâ. Cristo aiehohobypy ara amâieholymo awylygue. Odopâday, ehogu, eon-honru warâ ese kurâ. Toenzepa lelâlâ ise mohomaendylymo. <sup>14</sup> Jesus Cristo eynynonroem mawylymogue âwankuem mâtâehoduomo, mâtâzenagazeoduomo warâ, tuomare lelâ itaungâ, Deus Ispiritury ton-honreim mawânkâ agâmolâ. <sup>15</sup> Âmaemo ewy ânguy nhyân-hombyry wâgâpa, emagadudobyry wâgâpa, âkelomo nhynanâdobypy wâgâpa, âdylâ inakanhe aitobyry wâgâpa warâ âzenagazeoly nidâ. <sup>16</sup> Cristo xurâem mawylymogue mâsenagazedylymo watay olâ tâpybazezeba itaungâ. Deusram aguewâtaungâ: “Tuomare xina, ‘Cristo eynynonro’ kelygue tâzekeim tawylygue” kewâtaungâ.

<sup>17</sup> Tâdâsenagazedo saintybyem mawânrâ, kurâ Deus xurâ modolâ waunroem kuru âsenagazeni-ro warâ. Xirâ onro anaym; toenzepa kuru âsenagazeni olâ ise unâ koendonro tâdâsemaguely wâgâ agueim tindadysebaom modo, aunloenlâ âsenagazedoam sameduomo. <sup>18</sup> Arâ mawânrâ iwenibyem awyly Deus itaumbypy awo wâgâ: “Ton-honre kehoem lelâlâ koendonro aieni modo âsemaguely. Arâ-ro watay, nuduwâpyra lelâlâ Deus eynynâbaom, ize ato aietâny modo âsemaguehoem” warâ iwenibyem awyly.

<sup>19</sup> Deus ize ato aralâ mâsenagazedylymo watay, emaxi âtuwâdaungâ. Âgunimopyry mawânkâ; adâkehobypy aiese. Koendonro aiesezedaungâ lelâ, Deus ize ato amânhedylmogue, mâtâzenagazeolymo umelâ.

## 5

### *Jesus einwânni modo xuruto*

<sup>1</sup> Jesus Cristo einwânni modo iwymârydo kâunrudly iwerâ. Koendâ auguely idataungâ, Cristo einwânni modo iwymâry lâpylâma urâ. Tâense urâ Cristo âsenagazedyly. Mâtâ ehogu, eon-honru warâ âzehoday, târâ eagâlâ ise urâ. <sup>2</sup> Âurudyllymo, koendâ Deus xurâem ityby modo mâtâentomoem. Ovelha eni koendâ tâguy nheto ara, akaemo

eniem Deus induakeyby âmaemo. Amânhedyse mawylymogue lelâlâ awârâ ai-etaungâ, Deus ize ato ara, “Aiekâ” myguehondromo kulâ inkâba. Mâzepywaohomoem kulâ inkâba aietaungâ, Jesus einwânni modo mäenmawyadâdyze mawylymogue lelâlâ. <sup>3</sup> Amyguehomobyry lelâ tainwânseim ize matomo waypa lâpylâ nidâ. Amitomoguelâ, âdara aidylymo awyly xutuen-honwâdaungâ, enehonwâdaungâ warâ. <sup>4</sup> Kâeni kuru Kywymâry Cristo odopâduo, aunlolâ ise mâzehogueolymo. Tâmakezeim iwâkuru, ehozelu adaindânrý waunlo emakeze âmaemo.

<sup>5</sup> Alâpylâ salokuzenomo modo, âwynsaundo modo warâ kâunrudly. Agaityom modo einwântaungâ. Idânârâ âyanmo xirâ kâinwenily: Koendâ lelâ agonromo emawyadâdaungâ. Arâ mawânrâ iwenibyem awyly Deus itaumbyry awo wâgâ: “Sawo modo eynynâ inkâba Deus, sawo keba modo agâ olâ koendâ” warâ iwenibyem awyly. <sup>6</sup> Deus ton-honreim awyly enanâguewâdaungâ. Mâsenagazedylymo emaenwâdaungâ. Epagudo odaji ituo epagunâze mâkâ. Imakezemo, ihoguezemo-ro warâ. <sup>7</sup> Ikuâdânímo emaxilâ idânârâ xuduwâtaungâ. Aunlolâ mawânkâ mâkâ nhedylymo.

<sup>8</sup> Inanaynmolâ itaungâ, ohondbyyem lelâ warâ. Awârâenlâ mawânkâ kuduery Di-abu tumunreim. Leão wâne tygâse kehoem todou nhuinly tyântoem myara mawânkâ kânâmidyly. Jesus kieinwâmpyra kyedyse mawânkâ. <sup>9</sup> Ozohondâdybyem lelâ itaungâ, Di-abu, Jesus mäinwâmpyra âenehonzemo keduo. Jesus lelâ einwântaungâ. Âmaemo kulelâba âsenagazeni awyly tutzelâ âmaemo. Tâinkâ lelâba Jesus einwânni modo âsenagazedylymo lâpylâ.

<sup>10</sup> Aunloenlâ nipyra olâ ise mâsenagazedomo. Inepa ise mâsenagazedylymo adainly. Koendorro lelâlâ Deus, kytyeni warâ. On-honwanâzemo, aini modo mäenmaen-homoem. Se ondaxi kehoem epadâdyby wayam, wayam warâ nâzekâniwâbyra, arâ ise mâkâ mäinwâmpyra mipyra âenehonlymo, koendâ mäinwânszedomoem lakuru. Koendâ âesemo mâkâ; ize tato ara âenehonzemo. Aunloenlâ eagâ mitomoem âgâsedâmo, Cristo agâ ity-byem mawylymogue. Mâkâ agâlâ ise. Mâzehogueolymo, mâdyren-honlymo, mojomaeon-lymo warâ. <sup>11</sup> Âdaunloenlâ nadainwâpyra ise mâkâ eon-honru. Aunlolâ ise arâ awyly. Arâlâ nidâ.

### Kata xypygueândo

<sup>12</sup> Xirâ kata imeimbyry âyanmo kâinweniday, iemawyadâni olâ Silas. Toenzepa kâinwyneguyl merâ, Cristo eynynâ ypemugu. Aunlolâ Jesus einwânni merâ. Omazeâñzemo xirâ kata kâinwenily. Kagâ koendâ, kytyendâ warâ Deus awyly auguedyse wato. Awylygue mäuntudyzemo wawyly, Deus koendâ kehoem nhetâmo awyly. Mâinwâmpyra tâiseba itaungâ.

<sup>13</sup> Babilônia donro Jesus einwânni modo, âyanmo tywynu nhawânehonlymo, akaemo, aramo Deus-am iduakewâdyby modo. Marcos lâpylâ âyanmo tywynu nhawânehonly; yataen-ho merâ, ymery ara kâinwyneguyl. <sup>14</sup> Âwaparymodâ tohonuguze âsedaenguwâdaungâ, Cristo eynynâ âjipemugu mawylymo mânehon-homoem\*.

### Deus nhesemo

Alâ Deusram kâenkadyly, âmaemo Cristo eynynonro modo madahuliba mitomoem, kâmaynoem mawylymo umelâ, nhetâmolâ awyly mâtuntulymogue warâ.

Pedro

\* <sup>5:14</sup> Saguhoem tohonuguze âsedaengulymo. Iwerâma tâpymogoynze tâdâsedaenguly.

## 2 PEDRO

### Pedro Kata Azagâ Ieto Inweniby

Xirâ kata wâgâ inwenily Pedro nhangahu odaji iemâmy Deus. Awylygue Deus itaumbrylâ xirâ Pedro inweniby. Jesus aguely idani modo ewy myakâwândy Pedro.

Kata azagâ ieto xirâ Deus, Pedroam inwenien-hoymby Jesus Cristo einwânni modoram. Iozepa kulâ Deus wâgâ enomedâni modo tâinkâ lelâba awyly wâgâ myakâwândy inwenily. Deus wâgâ iozepa kulâ aguelymo lelâ waypamo myakâwândy, inakai modo anhedylymo, eagonro modo tagâ aitoem aguelymo warâ lâpylâ.

Pedro kurudyly iozepaom modo kulâ einwândyly wâgâ, Deus ize ato ara lelâ aguitoem. Iozepa kulâ unâ egatuwâni modo, Cristo odopâdyly âwankuem tyesemo mykâinane. "Nodopâdaymba ise; iweâpa itybyem mawânrâ. Nodopâbyra awylylâ ise mâkâ" tâkezemo mykâinane. Xirâ kata wâgâ olâ tutuze kurâ, koendonro lelâlâ Deus awyly. Agui Jesus einwânni modo idyse mâkâ. Xirâ kata kintainduo, tutuze kurâ, Jesus odopâdyly tynwânwânselâ kydawyly, aunloenlâ eagâ kitoem.

#### *Aguely adaguhô*

<sup>1</sup> Urâ Simão Pedro, Jesus Cristo emary, tywâgâ aguenriem induakeyby, xirâ Jesus Cristo einwânni modoram iweninri, xina nheinwântobyry ara einwânniram. KyDeusry mawânkâ mâkâ, kâmakerim warâ. Mâkâ kieinwântoem aieni. Awârâ anhedyly, koendonro, iozeno warâ tawylygue.

<sup>2</sup> Âynynâmo Deusram kâenkadyly, imâem kehoem mâzehohomoem, akaladânímo peba itoem warâ. Arâ ise aunlolâ koendâ kuru mawylymo, Deus, Kywymâry Jesus Cristo warâ mâuntuzededylymo.

#### *Deus kygâsemâ, kuduakewâm warâ*

<sup>3</sup> Deus tawylygue, ton-honruguelâ, idânârâ ize kydato xuduwâm aunloenlâ eagâ kitoem, ize ato lelâ aguentoem warâ. Tutuze kurâ mâkâ. Mâkâlâ mawânkâ kygâseni xurâem kitoem. Awylygue ize ato ara lelâ aguidyly, koendonro, ton-honreim, tohogueim warâ awylygue. <sup>4</sup> Deus koendonro lelâlâ tawylygue, "Koendonro aiese urâ âmaemoem" tâkehobry adyese lelâlâ. Mâkâ ara kisezedoem ize ato lelâ aguentoem warâ adyese. Deus eynynâbaom modo inakanhe aito aguiendyse kipyra kurâ warâ.

<sup>5</sup> Awylygue Jesus mâinwântuomo, idânârâ agâ koendâ lelâ aitaungâ. Eagâmo koendâ mawylymo ume, koendâ lâpylâ Deus wâgâ xutuzezedauungâ. <sup>6</sup> Deus wâgâ mâuntuzedaymo, tâwâlâ kulâ inakai amânhepyra mitomoem âjimanâdaungâ. Mâjimanâdylymo umelâ, mâsenagazedylymo emaenwâdaungâ. Mâsenagazedylymo mâenmaenlymo umelâ, Deusram âtuwâdaungâ, ize ato lelâ amânhetomoem. <sup>7</sup> Deus ize ato lelâ amânhetomoem mâtulymo ume, Cristo eynynâ âpemugumo ize isezaungâ. Cristo eynynâ âpemugumo agâ âjize mawylymo ume, idânârâ kurâ domodo iwynedaungâ, tâwâlâ wâne Jesus einwânni, einwânni keba warâ awylymo.

<sup>8</sup> Arâlâ amisezedylymo watay, alâ ise Kywymâry Jesus Cristo mâuntuzededylymo, mâkâ ize ato aieseze lelâ âmaemo, se ewiseim ewisezedyly wâne tâwiseho odaji ituo myara.

<sup>9</sup> Arâ aitânry olâ epy ara kulâ, Deus nepyra tâitoem âzepâinly-ro waunlo ara. Inakanhe tâitomobyry xygakerimbyryem Deus awyly enanânehorimbyryem.

<sup>10</sup> Aituo Cristo eynynâ ypmugudo, koendonro amânhetomoem âzeon-hondâdaungâ, turâem Deus induakeyby, ingâsedyby warâ mawylymo mâenehon-homoem, tâgaseim ni-hugueba kehoem tâzegato xypyryam saini ara. <sup>11</sup> Arâ ise Deus ikaunâdylymo: "Âetaungâ; âdy igawâmpyra âenehonrimo lâpeba tarâ" keze. Aituo ise myarâ Kâmakerim, Kywymâry warâ Jesus Cristo typgueba kehoem pymâem atoram mydâlymo.

<sup>12</sup> Unâ iozeno Deus nhegatuyby tydase âmaemo; tâinwânse ani âmaemo; mâtara ara lelâ amidylymo warâ. Tutuzelâ âmaemo, aunlolâ xirâ modo mânênanâguedyzemo wawyly.

<sup>13</sup> Iewanulâ xirâ, yiguepa wawyly ara mânênanâguehomoe mâyammo aguely. <sup>14</sup> Inepa iguein-em wawyly tutuze urâ, Kywymâry Jesus Cristo mawânkâ yam nutuen-ho. Wodopyry nhânze urâ, âtâbâbyry kânhâho ara. <sup>15</sup> Xirâ modo toenzepa mâtundudyzemo wato, yigueduo, auguehobyry mânênanânehomba mitomoem.

### *Kunwym Deus Jesus xyrentoem anhenehonday, Pedro domodo nhetobyry*

<sup>16</sup> Tiungutyby kulâ mâkeba xina nhegatuly, “Kywymâry Jesus Cristo pymâem tohogue kehoem ise odopâdy” xina keho. Tânugue lelâlâ ani xina nhedyly, Jesus eon-honru imâsedoem awyly. <sup>17</sup> Târâ iwy wâgâlâ ani xina, Kunwym Deus, Jesus ehogu, xynru warâ wâgâ agueday. Jesus ety iwogonro sapekadyly, ehozeladyly warâ xina emâ. Deus ton-honreim kuru: “Ymery toenzepa kâinwyneguyl merâ, toenzepa womazeâni” kely xina idamâ warâ. <sup>18</sup> Kywymâry Jesus Cristo agâ iwy tynrenseim wâgâ xina awyly ume, kaynâpa tâjitanru âemâ.

<sup>19</sup> Tutuzelâ kurâ, saguhoem Deus eynynâ aguewâni modo Cristo wâgâ inweniby iozeno tâinwânseim awyly. Mâkâ odopâdyly wâgâ inwenibymo, xina agueho agâ âzekiba lelâ. Akaemo inweniby modo koendâ lelâ idataungâ, einwântaungâ warâ. Inwenibymo âyanmo xutuen-honze, âdy mânwânylymo awyly, esagon-ho âji tyameim nhesagon-ho ara. Xirâ unâ agueho koendâ idasezedauungâ. Jesus Cristo odopâduo ise koendâ kuru Deus wâgâ mâtuhomoem anhenehonly, emedyly wâgâ xixi egaseduo onro wogonro modo eto ara. Ximukâ emeni emyenro ise mâkâ, koendâ Deus wâgâ mâtuhomoem.

<sup>20</sup> Xirâ kâinwenily koendâ xutuwâdaungâ. Saguhoem Deus wâgâ aguewâni modo tonomery mâkeba myakâwândy inwenilymo, Deuslâ inwenihomoem agueim. Konomerygue kulâ Deus itaumbypy kiuntuwâbyra lâpylâ kurâ. <sup>21</sup> Deus aguehobyry nhegatulymo watay, tyangahu oday tunâry kulâ, tonomery kulâ warâ mâkeba nhegatulymo. Deus Ispiriturylâ nhangahumo oday xunârymo xuduim; âdakeze Deus aguely awyly mâkâlâ egatuen-horim.

## 2

### *Deus wâgâ iozepa kulâ unâ egatuwâni modo (Jd 3-16)*

<sup>1</sup> Iweâpalâ myakâwândy Deus eynynonro modo enokunibe awyly, “Deus wâgâ aguenri urâ” kewâni modo. Arâ lâpylâ ise iwerâ âduaymo Deus wâgâ unâ iozepa kulâ unâ egatuwâni modo âepanâguely, inokuzemo kulâ. Xypyry etay olâ âsenagazezemo; inakanhe adâitobyry epywaze igueypy Jesus Cristo, tywymâryem, todoem warâ izepamo mawânkâ. Arâ tawylymoguelâ ise tâwâlâ inepa tain-ho nhuinlymo. <sup>2</sup> “Jesus eynynonro urâ” kewâni modo akaemoram toenzepa âzenokuze. Awylygue ise inakanhe aitomo ara aidylymo. “Jesus eynynonro urâ” kewâni modo inakanhe aidyly tientuo, Jesus eynynâbaom modo: “Âdyem nitaymba mynra unâ Jesus wâgâ einwândy” kezemo. <sup>3</sup> Deus wâgâ iozepa kulâ unâ egatuwâni modo toenzepa tydinerugu kulâ ize atomo. Awylygue tâdâsenogudly kelymo, tyangahu oday tiungutyby kulâ aguehomo; dinheru tienmakely kulâ mawânkâ ize atomo. Deus olâ nykyba. Tutuze mâkâ, âdy anhekylymo awyly. Iweâpalâ on-hondbyem awyly, akaemo tienwentâdoem, tienagazenehon-hoem warâ.

<sup>4</sup> Adâkehobyry aietânrâ modo idânrâ enagazenehonze Deus. Enanâguewâdaungâ anju domodo Deus aguehobyry sakanibyry agâ aityby. Akaemo nityendaymba myakâwândy Deus. Tâtagueim tuhuadaguenry odaji igonomâmomy, âji tâdâsenagazedo odaji. Iamu oday ekâjibyem akaemo târâ awyly. Deus âda tyedyly awyly akaemo inwânwânyly. “Târâ mâtunagazedylymo. Âdaunloenlâ nadainwâpyra ise” kely ise eyanmo.

<sup>5</sup> Enanâguewâdaungâ lâpylâ iweâpa Noé ume kurâ domodo inakai modo aiehohobyry. Deus ize ato adiendysebamo myakâwândy. Aituo Deus paru inweândyly. Idânârâ kehoem paru onro nhytyândyly. Idânârâ kehoem iguewânmomy. Mârâ ume Noé kulelâ myakâwândy Deus ize ato ara aini. Paru inwenly saindyly iraynâ, aunlolâ mykâinane Noé typemugudoam aguezesedyly: “Deus aguehobyr sakadyly, inakai modo aiedyly warâ imowâdaungâ. Einwântaungâ” kezesedyly. Tindadysebamo olâ myakâwândy. Aituo, Noé, iwydylâ, imeombyry, iweisedo alâ kulâ Deus nhemakely, paru inwenly amaym.

<sup>6</sup> Enanâguewâdaungâ lâpylâ iweâpalâ xidadâ Sodomadâ, Gomorradâ warâ tâtyuneim modo aietobyry. Deus izepa ato adyesemo myakâwândy. Awylygue myakâwândy Deus aguely: “Idânârâ kehoem ise kainlymo” kely. Aituo peto ingonodyly, inakai modo tyain-hoem, idânârâ kehoem pelupâem imâmomy. Arâ adientuo, kyam nhutuen-honlylâ xurâ keba modo xypyry etay âsenagazeniawyly. <sup>7</sup> Ló lelâ myakâwândy Deus nhemakely Sodoma donro enday. Uguondo koendonro myakâwândy Ló. Aituo toenzepa âjityendyly, tâty anano modo inakai modo anhesezedlymogue. <sup>8</sup> Târâ kurâ domodo duay tawylygue myakâwândy Ló. Kopaelâgâembaba inakai modo anhedylymo, aguelymo indadyly, Deus ize ato araba aidylymo awyly warâ nhedyly. Awylygue, toenzepa myakâwândy âpaunzedyly, âjityendyly warâ. <sup>9</sup> Deus olâ aunlolâ tynynonro modo nhemakely, nhedyly warâ âsenagazedyly ume. Âkealâ Deus tynynonro keba modo enagazenehonze awyly. “Ydâ iwague ise mâsenagazedylymo” keze eyanmo. <sup>10</sup> Idânârâ izepa tato aieni modo enagazenehonze Deus. Kywypado adiendyse tatolâ aieni modo toenzepa enagazenehonze, Deus xurâem inakanhe adâjito. Deusgue tywymâgu izepaom modo toenzepa enagazenehonze lâpylâ mâkâ.

Akaemo iozepa kulâ unâ egatuwâni modo ânguy xyreni keba akaemo; ânguydo kulâ. Ânguy neinwântaymbamo; tonomegue mawânkâ âdutulymo. Idânârâ anju domodo ton-honreim Deus agonro âwankuem tyesemo lelâ. Iwâgâmo koendâ aguepamo, inwykelymo warâ. <sup>11</sup> Deus wâgâ iozepa kulâ enomedâdaynrim modo takaze ton-honre olâ anju domodo, akaemo takaze kehoem koendâ awylymo warâ. Anju domodo olâ Kywymâry enanaym akaemo wâgâ inakanhe aguepa, newentâbyramo warâ.

<sup>12</sup> Ânguydo imeom poji anano, idu odano warâ tyâzeinhelâ iazely, adiendyse tatolâ mawânkâ anheklyly, nâpaunzebyra tawylygue. Arâ lâpylâ Deus wâgâ iozepa kulâ unâ egatuwâni modo adienkyly wâgâ nâpaunzebyra kulâ aguelymo. Unâ tâdâsemaguely wâgâ agueim âwankuem tyesemo, nutuba kulâ, tywykezemo warâ. Awylygue ise ânguydo imeom xyâly ara kulâ Deus akaemo nhainly. <sup>13</sup> Akaemo Deus wâgâ iozepa kulâ unâ egatuwâni modo kânagazedâmo. Awylygue ise Deus nhenagazeneonlymo lâpylâ. Kopae kulelâba kywypado anhedylymo, peto oday alelâ. Âjigue mâtâdyguylomo mâwinduatomoen-ro watay, âduaymolâ akaemo. Akaemo âduaymo atobypy wâgâ, Jesus eynynâbaom modo âunâguezemo. Âwypazenehonzemo akaemo, âtâ kywogonro tywykenry iwykanâni emyenro akaemo. <sup>14</sup> Pekodo nhesedylymo, eagâ tâguetudyze tawylymogue; Deus izepa ato adiendyly nepagunâbyramo. Deus xurâem ityby iwelo modo enokuze kehomo. Dinhedu tienmakely kulâ enananomo warâ. Awylygue Deus nhenagazeguyluem awylymo. <sup>15</sup> Ânwa iwâkuru oze tâtâly enanânehoimbyry ara akaemo, Jesus lelâ Deusram kainto kely neinwâmpyra itybyem tawylymogue.

Enanâguewâdaungâ iweâpalâ Balaão aitobyry, Beor imery. Balaão ara akaemo iozepa kulâ unâ egatuwâni modo. Toenzepa tydinerugu kulâ myakâwândy Balaão ize ato. <sup>16</sup> Awylygue myakâwândy Deus izepa ato anhedyly. Deus olâ myakâwândy Balaão eguy jumenta kurâ ara kehoem tytainhehonze, Balaão inakai adiendyse tato aniempyra itoem.

<sup>17</sup> Âdyem nitaymba akaemo Deus wâgâ iozepa kulâ nhenomedâdo, paru iazeho saweypy ara kulâ. Eunu tâmyguyne kehoem kopâ ihugueim ara, adapezeinduo olâ tâtygagueze; kopâ nihuguebalâ mâmâ emyenro akaemo. Deus âji tyameim aienibyryem xurâmoem. Târâ ise akaemo aunloenlâ âsenagazedlymo. <sup>18</sup> Tonomegueinhe kehoem âdutulymo, tuândy ara kulâ olâ nhenomedâdylymo. Aguelymo: “Tâwâlâ inakai modo, kywypado warâ aguiendyly; kuomaru mawânkâ Deus ize ato” kelymo. Kanra aweim wâne kanra tonokuze eturugue myara akaemo tienomedâdogue konokuze kelymo. Tonhonreba kulâ Jesus einwânni modo mawânkâ enokuze kehomo kuru, koendâ Deus aguehobyry nutubamo mawânkâ.

<sup>19</sup> Warâ akaemo Deus wâgâ iozepa kulâ unâ egatuwâni modo Cristo eynynonro modoram aguelymo: “Xina inomedâdomo amânhedylymo-ro watay, idânârâ amânhedyse matomo aiese lelâ âmaemo” kelymo. Adâkely umelâ olâ inakai aiedyly nimopa awylymo. Mâkâ inakai amaymba âsemaguedânrâ emyenro akaemo. <sup>20</sup> Kywymâry, Kâmakeim warâ Jesus Cristo kieinwândyly-ro watay, kywypado aiedyly, eynynâbaom modo anhekyl y aiedyly warâ tumoze kurâ. Ânguyo imoem tywyânto amaymba âsemagueyby emyenro kurâ. Tâlâ olâ kywypado, inakai warâ adiendyly imowânbiry modo timoymby aietoni. Ânguyo imoem âsemagueybyenlâ ihugueoni ara akaemo. “Jesus einwânni urâ” keypyenlâ inakanhe aitonduo, saguhobyry takaze kehoem ise inakanhe idyly. <sup>21</sup> Koendâ tâise Cristo wâgâ nutubamo lelâlâ awyly, koendâpa mawânrâ Deus aguehobyry xutuimbyryem, xutudânrâ ara idylymo. Âkeá lelâlâ xirâ: “Cristo tainwânsse xina” keypyem, inakanhe aitondyby modo toenzepa enagazenehonze Deus, Cristo einwântânrâ takaze kehoem. <sup>22</sup> Tâlâ wakeho: “Tâeankehobyry tâinhonse lelâ kaxoro. Pâsega igokeyby ikila onwanjilâ âjikobeguyonze todopâze”; myara akaemo, “Cristo tainwânsse xina” keypyem inakanhe aitoni modo.

### 3

#### *Kywymâry Jesus odopâdo*

<sup>1</sup> Cristo eynynâ ypmugudo kâinwyneguyl modo, kata azagâ ieto xirâ âyanmo kâinwenily. Waunro kata kâinweniby wâgâ, xirâ azagâ kata ieto wâgâlâ warâ kâinwenily mâuntuybymo mâenanâguehomoem, iozeno wâgâ lelâ angahumo oday âunâgomoe warâ. <sup>2</sup> Mâenanâguedyzemo urâ, akaemo saguhoem Deus itaumbyry egatuwâni modo aguehobyry, tynynâ aguenriem iduakewâdyby modo. Enanâguewâdaungâ lâpylâ Kywymâry, Kâmakerim Jesus aguehobyry, mâmâ unâ egatuwâni modo âyanmo nhegatuyby. <sup>3</sup> Cristo odopâdyly iraynâ âdy waunroem kuru aini âyanmo kâengatudyze wato. Tâlâ ise âdylâ inakai, kywypado warâ adiendyse tato aieni modo. Âilezemo, âwankuem âesemo warâ, Jesus mânwândylymogue. <sup>4</sup> Aguelymo ise: “Jesus tarâ onro anaym tatay, odopâze tawyly aguewânm. Nodopâbyra lelâ olâ! Âdykâ wânkâ? Toenzepa einwânni modo tâigueze, odopâdyly nepyralâ. Âdy nâtuguguewâbyra. Idânârâ aidyly onro adaguly ume aitobyry aralâ” kezemo.

<sup>5</sup> Iozepa kulâ olâ arâ aguelymo. Koendâ tiuntuyby enanânehonze kelymo. Idânârâ tâtuguguewâze lelâ. Saguhoem kau, onro warâ lâpeba myakâwândy. Deus agueduo myakâwândy kau, onro alelâ âepanâguely. Paikaylâ onro nhugudyly; aguely paru ontay, onrope itoem\*. <sup>6</sup> Paruguelâ myakâwândy mâmâ saguhoem tâlânro modo nhainly lâpylâ.

\* <sup>3:5</sup> Gênesis 1.6-10 warâdâ Deus aguely myakâwândy: “Paru iotay kehoem taynynâ, taynynâ ienipe nidâ, nhangatano, iano warâ itoem” kely. Aituo arâ âzepajigâdyly. Arâ myakâwândy Deus paru nhepajigâdyly, iano, nhangatano warâ myakâwândy. Mâmâ epajigâdobry kaynonroam Deus “kau” kely. Azagâ emedyly ieto wâgâ myakâwândy Deus awârâ nhugudyly; tytanrungue kulâ nhugudyly. Iguantybyem myakâwândy emedyly. Deus aguely: “Paru kau iano tokalâ âzejidydâ lelâ nâtâdyguy, onro âepanâguehoem” kely. Arâlâ myakâwândy aidyly aguehobyry ara. Mâmâ tapigüenryam Deus “onro” kely, mâmâ paruam “parutabâ” kely warâ. Mâmâ onro, parutabâ warâ tientuo, koendâ myakâwândy Deus xurâem.

Toenzepa myakâwândy kopâ in-hugueândyly, Inwenwâmy toenzepa lelâlâ. Idânârâ tâlânro modo adainwânm̄y. <sup>7</sup> Arâ lâpylâ kau, onro warâ tâlâ awyly ise Deus aguehobypy odajilâ. Mârâ ume peto ise ingonokyly, onro, kau alelâ sainze. Xypyry etay, koendonro ise turâ modoram nhuduly; tynynâbaom modo ise aunlolâ nhenagazeguyl.

<sup>8</sup> Xirâ mâenanâguedyzemo wato, kâinwyneguyl modo. Tokalâ emedyly âdiempa kulâ kurâem, mil anu olâ imâem. Kywymâry Jesus xurâem olâ mil anu âzekiba lelâ tokalâ emedyly agâ. <sup>9</sup> “Odopâze urâ” kehobypy iweâpa sakadybyem awylygue, aguelymo: “Adâkehobypy ara anipyra awylylâ ise Jesus” kelymo. Iozepa kulâ olâ aguelymo. Âji tâdâsenagazedoram ânguy tingonodyse inkâba mâkâ. Tynynâbaom modo inakanhe adâidyl inmoly mâkâ inwânwânyly, nheinwântomoem. Idânârâ tâinwândyly mâkâ ize ato, tienmakehomoem. Awylygue nodopâbyra awyly wao. <sup>10</sup> Pymâ Jesus odopâze lelâlâ olâ-ro warâ. MOK alelâ ise mâkâ âepanâguely; ânguy tynwânwândyly ume inkâba, tâmagazeim sainto ara ise âewyly. Kyanoem ise kaynâ âjipyruguely. Kau xuzase. Idânârâ iwogonro iaduwâse. Xixi, nunâ, ximukâ warâ ipa ise. Onro xuzase; idânârâ iwogonro ipa ise warâ.

### *Jesus odopâdyly kyzenue*

<sup>11</sup> Tutuze kurâ, idânârâ âdydo imeom sainrin-em Deus awyly. Arâ-ro watay, âdaraka ise amidylymo? Idânârâ inakanhe amânhetomoem imowâdaungâ, Deus ize ato lelâ amânhetomoem. <sup>12</sup> Jesus odopâdyly enuendaungâ. Xurâem âsewaniwâdaungâ, sainto iwaguepa isezeedoem. Xypyry etay, kau iaduâNSE, iwogonro modo sainze warâ Deus. Toenzepa ise mârâ peto âdâpigu, xixi, nunâ, ximukâ warâ âjixigogueze; âdy nâxiânwâbyra ise! <sup>13</sup> Deus olâ adâkeze: “Onro iwelo, kau iwelo warâ aiese urâ” tâkeze. Idânârâ mârâ onro iwelo anano modo koendonro lelâ ise anhekyly, Deus ize ato lelâ. Awârâ mawânrâ kinwânwânyly.

<sup>14</sup> Awylygue, yataen-hodo, kau iwelo, onro iwelo warâ mâenuendylymo ara, âzeon-hondâdaungâ, ioze lelâ amitomoem, tywykeba mitomoem warâ Deus enado, âdy wâgâ inwentâbyramo itoem. <sup>15</sup> Xirâ enanâguewâdaungâ. Agui kurâ domodo tienmakely Kywymâry ize ato. Akaemo tâinwântâny modo tâinwândyly wao inwânwânyly; awylygue olâ iweâpa idyly. Tonomery Deus nhuduypygue xirâ modo wâgâ âyanmo tywenize ani Cristo eynynâ kypemugu kinwyneguyl Paulo. <sup>16</sup> Tygatary modo wâgâ Kywymâry odopâdyly wâgâ tywenize, âdy Deus iomazehoem aguienyly wâgâ warâ. Tâlâ mâkâ inweniby wâgâ tutuzein-emba kehoem agueim. Awylygue Deus itaumbyry xutudâny modo, ton-honremba kulâ Jesus einwânni modo warâ, iozepa kulâ Paulo inweniby nhegatulymo. Kyam Deus âjitaumbyguehobypy idânârâ inwenien-hoymby koendâ nutuwâbyra lâpylâ akaemo. Awylygue âdakeze aguely awyly koendâ nenomedâbyra awylymo. Aituo tâwâlâ akaemo Deus tânagazedo nhuinlymo.

<sup>17</sup> Yataen-hodo, tutzelâ âmaemo, Deus itaumbyry koendâ egatudânybe awyly. Awylygue tonomeguelâ itaungâ, Deus izepa ato aieni modo kewâdyly kulâgue enomedâni modo mâinwâmpyra mitomoem. Akaemo agueho mâinwantaguedylymo-ro watay, unâ iozeno iwerâ mâinwânylymo mâinwâmpyra ise âmaemo. Iozeno einwândyly mâinmolymo-ro watay, tuhu iwy wogonro âtâgâni ara ise âmaemo. <sup>18</sup> Kywymâry, Kâmakerim Jesus Cristo koendonro lelâlâ kagâ, koendâ kâendyly warâ. Awylygue kurâem koendonro anhekyly koendâ xutuzededaungâ. Koendâ mâkâ xutuzededaungâ lâpylâ warâ. Eyam wakykely kimoba kine: “Âynrentâ xina. Koendonro lelâlâ âmâ, ton-honreim, iwâkuru warâ” kykenre. Arâlâ nidâ.

Xirâ mawânrâ mâuntudyzemo wato.

Pedro

## 1 JOÃO

### João Saguho Kata Inweniby

Deus myakâwândy âdy xirâ kata wâgâ tywenizeim awly iweninribyry nhangahu odaji ieni. Kata wâgâ tâzedy niweniba myakâwândy iweninribyry, idânârâ enanajimo olâ João iweninri, mâkâ toenzepa Jesus inwynebyry. Versículu 1dâ, “Jesus tarâ onro wâgâ awly ume tâense, tydase warâ xina” kehobyry. Awlygue kata “João Saguho Kata Inweniby” kehonly. Deus itaumbyrylâ xirâ.

Deus xirâ kata inwenien-honly myakâwândy kywynedylygue, âdara kagonro agâ kydâpynyedly kiuntuhoem warâ. Koendâ lelâ mâkâ kurâem aidyse awly. Iweniby itainrim modo turuse xirâ, Jesus wâgâ iozepa kulâ egatuwâni modo neinwâmpyra itomoem. Mârâ ume tâlâ myakâwândy: “Uguondo lelâlâ mâkeba Jesus, egadopyry kulâ” kerim modo. Awâkâ arâ tunâgueim modo olâ Deus iduery.

#### *Aguely Adaguho*

<sup>1</sup> Jesuslâ myakâwândy kaudyly iraynâlâ Deus Kyam Xutuen-hoim. Mâkâ xurâem kydawlygue mawânrâ ise aunloenlâ Deus eydâ atodâ kydawly. Mâkâ wâgâlâ mawânrâ âyanmo kâinwenily. Onro anaym awly ume, eagonropypyrlâ xina, aguely idanipyry, tânuque enipyry, tâmarygue MÂ’ ienipyry warâ. <sup>2</sup> Deus Xutuen-hoim âepanâguewâm. Xina emâ. Iwerâ mâkâ wâgâ xina nhegatuly. Mâkâlâ mawânkâ aunloenlâ Deus ezay kitoem aieni. Kunwym Deus agâlâ myakâwândy mâkâ, onro anaxi âemâ olâ ânguy Deus awly xutuen-honze. <sup>3</sup> Tientyby, tindatyby warâ xina âyanmo nhegatuly, xina nheinwânto ara mâinwântomoem, xina agâ tokaleon-em mitomoem. Arâ lâpylâ âmaemo, Deus agâpa mâiehowâbyramo; Kunwym Deus agâpa, imery Jesus Cristo agâpa warâ tyetuneba ise kurâ. <sup>4</sup> Xirâ kâinweniby mâintainlymo, koendâ kehoem mâuntulymo warâ watay, toenzepa ohomaenze âmaemo, xina iomaro ara, Deus ize ato ara warâ. Xirâ wâgâ mawânrâ âyanmo kâinwenily.

#### *Koendonro lelâlâ Deus*

<sup>5</sup> Jesus Cristo aguehobyry tindatyby ise xina âyanmo nhegatuly. Koendonro mâkâ Deus, âdaunloenlâ inakai keba, inakai aieni keba warâ, iajinu emyenro, iamu emyenro keba. <sup>6</sup> “Deus agâpa witaymba urâ” kykely umelâ, Deus izepa ato aguiendy-ro watay, kykewâdyly kulâ; ioze inkâba aguykely. Tâinwânsse kydawly wâgâ adâkeze wâne kurâ, iamu oday kulâ olâ kydadakobâdyly. <sup>7</sup> Deus ize ato ara lelâ aguidy-ro watay, iajinu oday kydadakobâdo ara lelâ kurâ. Iozeno lelâ mawânkâ Deus aunlolâ. Awlygue on-hoam itybyem kurâ. Deus xurâem tâwentâgueduneba ise kurâ, idânârâ izepa ato aguientyby xygakeybyem mawânrâ, imery Jesus kruz wâgâ tunu tyapâze iguehobyry wâgâ.

<sup>8</sup> “Deus aguehobyry âdaunloenlâ kankadaymba urâ” kykely-ro watay, tâwâlâ kulâ kydâsenogudyly; âdy iozeno, iozepao warâ awly kiuntuwâbyra kurâ. <sup>9</sup> Deusram, “Inakanhe aini kulâ urâ; tâjityenze olâ urâ awitobyry wâgâ” kykeduo olâ, inakanhe aguitobyry tygakeze. Aituo ise âdy mâkâ kâwentâguedo peba-ro warâ, mâkâem tywykeba ise kurâ. Adâkehobyry aiese lelâlâ mâkâ-ro warâ, koendonro lelâlâ mawânkâ Deus. <sup>10</sup> “Adykâ Deus izepa ato agânhepyra urâ” kykely-ro watay, “Deus konokuni” kykelylâ, “Idânârâ izepa wato adyesemo lelâ” tâkeze mawânkâ, aguehobyry peba kuoday-ro warâ.

<sup>1</sup> Âmaemo ymery ara kehoem kâinwyneguyl modoram xirâ kâinwenily, âurutomoem, Deus izepa ato amânhepyra mitomoem warâ. Deus aguehobyry kiakadyly watay, Jesus lelâ kynynâ agueze ton-honreim, “Pabai, merâ inakanhe aitobyry xygakegâ” keze, âdaunloenlâ inakanhe aityby keba awylygue. <sup>2</sup> Mâkâ lelâ mawânkâ inakanhe aguitobyry epywaze igueypy. Awylygue kieinwândy-ro watay, tygakeze Deus. Inakanhe aguito-byry kulelâ mâkeba nhygakely; idânârâ mâkâ inakanhe adâitobyry nhygakehoem ekani modo inakanhe aitobyry tygakeze lâpylan.

<sup>3</sup> Deus aguehobyry kiakabyra kurâ-ro watay, âkealâ “Tutuze urâ” kykely. <sup>4</sup> Aguehobyry neinwâmpyra kulâ, “Deus tutuze urâ. Mâkâ xurâ urâ” keim watay olâ âkealâba aguely. Deus itaumbyry iozeno nhutuen-hoymby ozepa kulâ aidyly. <sup>5</sup> Aguehobyry kieinwândy watay olâ, kinwynedyly tânehonze kurâ, ize ato ara kehoem. Aguehobyry kieinwântuo mawânrâ ise eagâpa kydâiehoba kydawyly. <sup>6</sup> “Deus agâpa witaymba urâ” kykely-ro watay, Jesus aralâ kine.

### *Jesus eynynonro modo ânguy izepa nipyra nidâmo*

<sup>7</sup> Yataen-ho kâinwyneguyl modo, xirâ âurutomo iwelo mâkebalâ xirâ, tâdâpnedly wâgâ aguely. Jesus Cristo einwândy mangulymo ume mâindatybymolâ; aguentoem aguehobyrly mawânrâ. <sup>8</sup> Iwerâ olâ aguehobyry iweloem âzeholy, Jesus mawânkâ enehonwâm, âdara tâdâpnedly awyly. Iwerâ tâpyneze lâpylan kurâ. Iajimatuo iamu peba idyly myara âdara Jesus einwândy awyly mâuntuzedlymo.

<sup>9</sup> Mâkâ “Jesus aguehobyry ara lelâ awidyly” kerim, adâkely umelâ Cristo eynynâ typemugu niwynebyra awyly izepa waunlo watay, iamu duano mâkâ. <sup>10</sup> Mâkâ âkeá lelâlâ Jesus einwânni modo iwyneni olâ iajinu duaylâ adakobâdyly waunlo ara lelâ. Deus “Ajetaungâ” kehobyrly mawânrâ kieinwânyly. Arâ lelâ kurâ watay, ânguy Deus neinwâmpyra itoem aguienehonwâbyra kurâ. <sup>11</sup> Cristo eynynâ typemugu iwynedâny, Deus aguehobyry inmedylylâ. Inakai adyese, Deus aguehobyry tiankadyly nutubalâ, Deus itaumbyry koendâ nutuba tawylygue, iamu duay xuzatbyara; epy âdykâingâ tâtâly xutudâny ara kulâ.

<sup>12</sup> Iamimeom, âyanmo xirâ kata kâingonodyly,

Cristo mâinwântuomo lelâ Deus inakanhe amitomobyry nhygakely.

<sup>13</sup> Tâjiunwyndo modo, âyanmo xirâ kata kâinwenily,

Deus tutuze mawylymogue.

Kaudyly iraynâlâ tâlâ myakâwândy mâkâ.

Salokuzenomo modo, âwynsaundo modo warâ âyanmo xirâ kata kâinwenily.

Ton-honre mataunaguynre Satanás amânhedysemo ato amânhepyra mitomoem.

<sup>14</sup> Iamimeom, augueondlyly âyanmo.

Deus tutuze âmaemo, unwânmkoendâ mâuntuhomo ara.

Tâjiunwyndo modo, âyanmo augueondlyly,

Deus tutuze mawylymogue.

Kaudyly iraynâlâ tâlâ myakâwândy mâkâ.

Salokuzenomo modo, âwynsaundo modo warâ, âyanmo augueondlyly,

Jesus tâinwâñse lelâlâ mawylymogue.

Deus itaumbyry mawânrâ angahumo oday âunâgom.

Awlygue ton-honre âmaemo, Satanás amânhedysemo ato amânhepyra mitomoem.

<sup>15</sup> Deus mâinwâmpyra mitomoem aienehonrim modo kulâ kâjiwynaundâ. Deus mâinwâmpyra mitomoem aienehonrim modo mâinwynedylymo watay, Kunwym Deus mâinwynedaymba âmaemo. <sup>16</sup> Deus einwântâny modo âwâlâ tâzehoguedoem kulâ idânârâ adiendye awylymo. Idânârâ tienkyly modo sodoem tâidyse awylymo. Imâem tâlâ tawylygue, sawoem idylymo. Deus keba olâ awârâ arâ aitomoem aienehoim. <sup>17</sup> Idânârâ Deus kieinwâmpyra kyenehorim modo âdypygueânze; idânârâ inakanhe tadowyly

âdypygueânze warâ. Kurâ Deus ize ato ara aini modo olâ ise kydadaimpa. Aunloenlâ ise tâlâ kydawly.

### *Cristo Iduery*

<sup>18</sup> Âmaemo ymeombyry ara kâenkyly modo âurudylymo. Inepa ise idânârâ adainly. Tutuzelâ âmaemo aguehobypy, xypyry etaji ituo, âepanâgueze “Cristo Iduery” kehobypy. Toenzepa iwerâ Cristo iduery modo. Awylygue xypyry etaji idyly kiuntuly. <sup>19</sup> Deus itaumbyry wâgâ âsenomedâze kagâ âtâdyguyby modo kagâpa tâisemo ani. Jesus einwânni modolâ-ro watay, kagâ tâtâdyguyzezemolâ tâise. Kagâ nâtâdyguyba awylymolâ, Jesus neinwâmpyra awylymo xutuen-hoim.

<sup>20</sup> Onwanmo olâ Deus Tyispiritury tugonose, Deus Induakeyby mawylymo xutuhuem, Deus emary modo nhangahu onwa azeiti iapâdyly, Deusram âjiduakeoybymo awyly xutuhuem myara. Awylygue konomedâdo iozeno mâuntulymo, Deus nhutuen-hoymby. <sup>21</sup> Iozeno mâuntuba mawylymogue inkâba xirâ kata âyanmo kâingonodyly, unâ iozeno einwândyly mâinmoba mitomoem lâkuru âurudylymo. Tutuzelâ âmaemo, iozeno, iozepaom agâ nâseinwâmbypyra awyly. Awylygue iozeno modo lelâ Deus xurâ awyly.

<sup>22</sup> Xirâ kata kâinwenily olâ, ânguy tâdâsenogudly kerim modo awyly mâuntuhomoem. “Messias mâkeba awâkâ Jesus, kâmakeze Deus ingonotyby mâkeba” kewâni modo, konokuni modo kulâ, Cristo izepaom modo arâ agueim. Imery Jesus neinwâmpyramo watay, nhunwym Deus neinwântaymbamo lâpylâ. <sup>23</sup> Tâzenanaym kehoem: “Jesus Deus imeryem awyly kâinwântaymba urâ” keim, Kunwym Deus xurâem nitaymba. Tâjidiay kehoem: “Tâinwânsse urâ Jesus Deus imeryem awyly” keim watay olâ Kunwym Deus xurâlâ mâkâ.

<sup>24</sup> Jesus wâgâ unâ iwâkuru einwândyly mangulymo umelâ mâindatybymo wâgâ âpaunzedaungâ, unâ agueho ara lelâ aitaungâ warâ. Arâ amidylymo watay, Jesus ize ato aralâ amidylymo, Nhunwym ize ato aralâ warâ. <sup>25</sup> Cristolâ “Âmaemo yeinwânni modo, âigueduomo, kurâem itonze âmaemo, aunloenlâ ise yagâ mawylymo târâ Deus eydâ atodâ” keim.

<sup>26</sup> Xirâ kata wâgâ âurudylymo, inokuzemo kewâni modoram mâzenokuoba mitomoem. <sup>27</sup> Cristo Tyispiritury âyanmo ingonotyby agâmolâ, iozeno mâuntuhomoem adyenehonze warâ. Idânârâ mâkâ konomedâdo iozeno lelâ, kewâdyly kulâ waunlo mâkeba; idânârâ Deus tienehondyze ato lelâ konomedâdo. Awylygue, mâkâ inomedâdomo mâindadylymo watay, âdy tâinwânsse awyly xutuze âmaemo. Deus Ispiritury amânhetomoem aguehobypy lelâ aietaungâ. Cristo agâ tokaleom ara lelâ itaungâ, Deus Ispiritury aguehobypy ara.

### *Deus eynynonro modo*

<sup>28</sup> Augueondyly. Cristo agâ tokaleom ara lelâ itaungâ, âmaemo ymeombyry ara kâenkyly modo. Ize ato lelâ aguiensezeguyl watay, kydâpybazedaymba ise kurâ, âetonduo. Kydotoendaymba ise kurâ, kientuo. Tyanuneba ise kurâ, sainto odaji ituo. <sup>29</sup> Tutuze âmaemo, koendonro lelâ Cristo anhetyby awyly. Awylygue xutuwâdaungâ lâpylâ, koendonro amânhetuomo, Deus imeryem mawylymo.

## 3

<sup>1</sup> Angahumo odaylâ Kunwym Deus toenzepa kywynedyly awyly nidâ. Toenzepa kywynedylygue “Ymeombyry” kely kyam. Mâkâ imeom lelâkurâ. Deus eynynâbaom modo olâ nutubamo Deus imeryem kydawly, eynynonro keba tawylymogue. <sup>2</sup> Iweâma tuomare kurâ, Deus imeryem kydawlygue. Kuomaru kuru olâ ise, eydâ atoram kytâduo. Kiuntuba olâ kurâ, mârâ ume âdara kidyly awyly. Cristo âetonduo olâ xutuze kurâ, eara kitoem aiese mâkâ-ro warâ. <sup>3</sup> Deus izepa ato kulâ anientaymba Cristo; tywykenry mâkâ Deus xurâem. Cristo ara kidyly tynwânwânsse kurâ; awylygue Deus ize ato lelâ aguiendyse kydawly, Deus xurâem tywykenryem kitoem.

<sup>4</sup> Deus izepa ato aiesezeni mawânkâ tâwentâguezeim, aguehobyry nhakazezedlygue. Deus aguehobyry sakadyly watay, aguehobyry izepa tadalafil. <sup>5</sup> Kâtaybyay igueze akâwâm Cristo onro anaxi âewyly, inakanhe aguitayn-hobyry modo âsebywadoem. Mâkâ olâ âdaunloenlâ Deus aguehobyry nakabyra. Xirâ tutuzelâ âmaemo. <sup>6</sup> Cristo agâ tokaleom inakanhe aisezedly nitaymba. Deus izepa ato aiesezeni olâ Cristo âdaunlo awyly nutuba, Deus imery awyly nutuba warâ.

<sup>7</sup> Âmaemo ymeombyry ara kâenkyly modo, Cristo eynynâbaom modo inokubyramo nidâ. Iozepa kulâ akaemo aguely. Koendonro lelâ alieni mawânkâ tâwentâguezeba. Deus ize ato lelâ anhekyl, Jesus Cristo tunwym ize ato anheto ara. <sup>8</sup> Deus izepa ato aiesezeni olâ Diabu xurâ; idânârâ nhugudyly iraynâlâ myakâwândy Diabu, Deus izepa ato aieseze awyly. Deus imery onro anaxi âemâ, Diabu anhetyby sainze.

<sup>9</sup> Deus xurâ kydawylygue, Deus izepa ato kulâ aguiensezedaymba kurâ, Ispiritury kagâlâ awylygue. Aguehobyry kiankazezedoem nuduwâpyra, Kunwym awylygue. <sup>10</sup> Tutuzelâ âmaemo, ânguy Deus xurâ, ânguy Diabu xurâ warâ awyly. Koendonro aietânrý modo, Cristo eynynâ typemugu iwynedânrý modo Deus imeom mâkeba.

### *Kypemugudo Jesus einwânni modo agâ kydâpynene*

<sup>11</sup> Jesus einwândyly magulymo ume unâ mâindatybymo xirâ: “Jesus einwânni modo agâ kydâpynene; koendâ kydâzeto ara, arâ lâpylâ kagonrodo agâ koendâ kydâzene” kely.

<sup>12</sup> Caim ara inkâba kine. Diabu xurâem tawylygue myakâwândy tukono Abel nhâly. Abel olâ myakâwândy koendâ lelâ aini. Awylygue myakâwândy Deusram koendâ lelâ âzeholy. Caim pylâ myakâwândy Deus aguehobyry sakani-ro warâ. Tâsewânilygue kulâ myakâwândy tukono nhâly.

<sup>13</sup> Cristo eynynâ ypemugudo, Deus xurâ mawylymogue Deus iduery modo âweiâsedlymogue, tâseguâdâzeba itaungâ. <sup>14</sup> Deus xurâem, iweloem ietybyem kydawyly tutuze kurâ, Cristo eynynâ kypemugudo kinwynedylygue. Tânehonze awârâ igueypyem, kurâem itondyby ara kydawyly. Âpynedânrý modo olâ igueypy aramo kulâ, iweloem tyesebamo awylygue.

<sup>15</sup> Mâkâ Cristo eynynâ typemugu agâ âpynedânrý, kyârinlâ mâkâ, Deus xurâem. Tutuzelâ âmaemo, kyârimpyry, adâitobyry Deus nhygakehoem nekabyra watay, tyigueduo, aunloenlâ Deus agâ nipyra awyly.

<sup>16</sup> Xirâ kiuntuly, âpyneni tyanuneba tagonro tienmakeday igueze. Cristo awârâ enehonwâm, kâmakeze tyiguehobyry wâgâ. Awylygue Cristo eynynâ kypemugu kâmaynoem watay, kienmakehoem kyiguely kiyntadaymba kine. <sup>17</sup> Wakykely: “Deus tywyneze urâ, tâinwânsse urâ warâ” kykely. Tâlâ kydato modo âdypebaom modo agâ kiempajigâbyra kurâ watay, tânehonze awârâ Deus kinwynebyra kydawyly, kyam aguehobyry aguiempyra kydawyly warâ. <sup>18</sup> Âmaemo ymery ara kâenkyly modoram xirâ auguely. “Kydâpynene” kykely kulâ mâkeba nidâ. Kagonro kienmawyadâdoem aguyjiene. “Kydâpynene” kykeduo, âkeá lelâlâ aguykenre.

### *Tyanepa ise Deus enado kydawyly*

<sup>19</sup> Kydâpyneduo, Deus aguehobyry kiankabyra kydawyly kiuntuly. Deus enado âdapa kehoem kydawyly; eagâ agueze tyanepa kydawyly warâ. <sup>20</sup> Inakanhe aguitobyry wâgâ âwâlâ kulâ kydâsewendâdyly watay, kydâseguâdâbyra kine. Tutuze Deus, aguiendyseba ato aienibyryem lelâlâ kydawyly. Kienkadyly watay, kytyenze olâ mâkâ. <sup>21</sup> Yataen-ho kâinwyneguyl modo, Deus kâwentâguebyra awyly kiuntuly watay, tyanunepa kurâ, eagâ aguykehoem. <sup>22</sup> Kienkadyby xuduze lelâ, aguehobyry kiankabyra kydawylygue, ize ato aguiendylygue warâ. <sup>23</sup> Xirâ azagâ mawânrâ Deus aguehobyry tutuzeim: “Ymery Jesus Cristo einwântaungâ” kely. “Âpynedauingâ” kely warâ. <sup>24</sup> Aguehobyry aguiendyly

watay, Deus agâpa kitaymba kurâ, kagâpa nitaymba lâpylâ ise. Kagâ awyly kiuntuly, Tyispiritury ingonotyby kagâ awylygue.

## 4

### *Deus Ispiritury eynynâ agueim, aguedânry warâ*

<sup>1</sup> Toenzepa mâtâem lelâba, “Deus Ispiritury auguehoem aguehobyrlâ kâenomedâdo” kewâni modo. Yataen-ho kâinwyneguyl modo, idânârâ arâ agueim modo olâ kâzeinwântaundâ, tâlâ mawânkâ konokuni modo. Koendâ wao aguehomo, nhénomedâdomo warâ âkealâ, âkealâba warâ awyly xutuwâdaungâ, Deus eynynonro, eynynâbaom warâ awyly mäunturomoem. <sup>2</sup> “Jesuslâ Messias, Deus Ingonytyby. Karalâ mâtâ kurâem awyly, tunre, tybygue warâ; egadopyry mâtkeba” keim tutuze kurâ, Deus Ispirituryam aguehoymby awyly aguehoem. <sup>3</sup> “Deus Ingonytyby Messias mâtkeba mâtâ Jesus. Kurâ egadopyry âepanâgueyby kulâ” keim olâ Deus Ispiritury pebaom. Cristo Iduerygue taseim awâkâ arâ agueim. Tydaselâ âmaemo, “Cristo Iduery âese onro anaxi” kely. Toenzepa Cristo iduery eon-honrugue aini modo xirâ onro anaym awyly iwerâ.

<sup>4</sup> Deus xurâ olâ âmaemo, ymeombyry ara kâenkyly modo. Awylygue iozepa kulâ unâ egatuwâni modoram mâtzenokuoba mawylymo. Deus Ispiritury agonromo, ton-honreim kuru, Satanás ispiritury onro anano modo agonro takaze eon-honru. <sup>5</sup> Iozepa kulâ unâ egatuwâni modo Deus iduery eon-honrugue aguelymo; awylygue Deus izepa ato kulâ aguehomo. Deus eynynâbaom modoram aguelymo tâjidahoze, Deus iduery lâpylâ awylymogue. <sup>6</sup> Xina olâ Deus xurâ; Deus eynynonro modo xina aguely tydasemo; xurâ keba modo olâ xina aguely nidapyramo. Ânguylâ Jesus wâgâ nhénomedâdyly watay, agueho koendâ idataungâ. Mâtâ âyanmo agueho xina aguehobyry arâlâ watay, iozelâ ise, Deus Ispiritury iozeno xutuen-hoim mâtâ agâlâ awylygue. Mâtâ agueho xina aguehobyry agâ âzekiba nipyra watayma konokuni kulâ ise agueim, Satanás mawânkâ arâ agueim.

### *Kagonro agâ kydâpynedyly kyzenehonre*

<sup>7</sup> Yataen-ho modo, aunlolâ kagonrodo agâ kydâpynene; Deuslâ mawânkâ kydâpynedoem kon-honru xuduim. Kurâ Cristo eynynâ kypemugudo agâ âpyneni modo, Deus imery kurâ; iamudo, tunwym nhutuho ara Kunwym Deus kiuntuly. <sup>8</sup> Âpynedânry modo olâ Deus nutubamo. Kurâem adienkyly modo wâgâlâ kywyndâ tawyly Deus nhenehonly. <sup>9</sup> Kywyndâ tawyly enehonwâm Deus, tymery tokaleom onro anaxi igonomâ; mâtâ kurâem iguehobyry wâgâ mawânrâ ise kyigueduo aunloenlâ eagâ kydawyly. <sup>10</sup> Awârâ mawânrâ Deus toenzepa kywyndâ tawyly nhenehon-hombyry. Kinwynedâlygue inkâba Deus arâ anhedyly, kywynedâlyguelâ. Awylygue tymery tokaleom ingonodyly, kieinwândylygue, inakanhe aguitobyry nhygakehoem.

<sup>11</sup> Yataen-ho modo, arâ kehoem Deus kywyndâly watayma kydâpynene lâpylâ-ro. <sup>12</sup> Ângu âdaunloenlâ Deus netaymba. Cristo eynynâ kypemugudo agâ kydâpynedyly watay olâ Deus kagâlâ. Kagonro modo agâ toenzepa lelâlâ kydâpynedyly watay, Deus kyize ato ara kisezedly lakuru. <sup>13</sup> Deus Tyispiritury kagâ itoem nhuduypy wâgâ mawânrâ kiuntuly, Deus agâpa kipyra kydawyly, kagâpa nipyra awyly warâ. <sup>14</sup> Xina Jesus agonropyry modo tutuze xina, einwânni modo emakeze Kunwym Deus tymery ingonodyly awyly. Xina emâ, iwâgâ egatuly xina nimoba-ro warâ. <sup>15</sup> “Deus imeryma Jesus Cristo” kykely MON warâ-ro watay, kagâlâ Deus, eagâlâ kurâ warâ. <sup>16</sup> Tutuze kurâ, Deus toenzepa kywyndâ awyly, kywynedâly nimoba awyly tâinwânsse kurâ-ro warâ.

Kurâem adienkyly modo wâgâlâ kywyndâ tawyly Deus nhenehonly. Cristo eynynâ typemugu agâ tâpynedyly imodânry Deus agâlâ, eagâlâ Deus warâ. <sup>17</sup> Iwerâ Deus kywynedo ara kehoem kinwynedoem anhenehonly. Awylygue ise, xypyry etay, enado

kydâepanâgueduo tâegane kydawly. Cristo eynynâ kypemugu agâ tâpyneze lelâ kurâ-ro watay, xirâ onro anaym tawyly ume Cristo anhetybylâ aguienkyly awyly, xutuze Deus. Aituo ise xypyry etay tâwentâzeba, tywykeba warâ kydawly. <sup>18</sup> Deus kywynedâ awyly tâinwânse lelâkurâ-ro watay, kiyntadaymba kurâ. Nuduwâpyra kywyneni modo kiyntadoem; kurâem inakai aieni modo lelâ kiyntaguyly. Deus tytaze kurâ-ro watay, koendâ kubalâ eagâ kydawly, kyanu mawânrâ kânanagazedoem aienehonrim.

<sup>19</sup> Iwerâma Deus tywyneze kurâ, kieinwândyly iraylâ mawânkâ kywynedyly. <sup>20</sup> Jesus einwânni modo kinwynebyra kulâ, “Deus tywyneze urâ” kykely-ro watay, konokuni kulâ kurâ, Deus iwyneni mâkeba. Tâenseim mâkeba Deus, Jesus einwânni modo olâ kagâmolâ. Kienkyly modolâ kinwynebyra kurâ-ro watay, nuduwâpyra Deus kientâny kinwynedoem. <sup>21</sup> “Deus tywyneze âmaemo-ro watay, ynynonro modo iwynedaungâ lâpylâ” nygue Jesus, xina agâ tawyly ume.

## 5

### *Ton-honre kurâ, Deus ize ato agâ âseinwândâny modo aguiempyra kitoem*

<sup>1</sup> Idânârâ Jesus Deus Ingonytyby awyly einwânni modo, Deus imeonlâ. Kunwym Deus kinwynedylygue, Jesus einwânni modo tywyneze lâpylâ kurâ, Deus xurâlâ mawânkâ akaemo. Nhunwym tywyneze kurâ watay, imery tywyneze lâpylâ kurâ. <sup>2</sup> Deus tywyneze kurâ-ro watay, aguehobyry kiankadaymba kurâ, eynynonro modo tywyneze lâpylâ warâ. <sup>3</sup> Deus tywyneze kurâ watay, âdy mâkeba gâlâ agueho ara kidyly. Tuonugueim kyenwanday kianâdyly ara kulâ. <sup>4</sup> Idânârâ kurâ Deus imeryem itaymby modo Deus kieinwâmpyra kitoem aienehoim modo aguiempyra kitoem ton-honre kurâ, Jesus tâinwânse kydawlygue. <sup>5</sup> Kurâ Deus imerylâ Jesus awyly einwânni modo lelâ ton-honreim, Deus kieinwâmpyra kitoem aienehoim modo aguiempyra kitoem.

### *Deus imerylâ Jesus Cristo awyly tutuze kurâ*

<sup>6</sup> Jesus onro anaxi âetybyem, Deus imeryem tawyly enehonwâm. Batiza âiehobygueduo akâwâm Deus, Jesus tymerylâ awyly aguely: “Ymery âmâ” kely eyam. Tunu tyapâze tâigueday, tânehonze lâpylâ Deus imeryem tawyly. Augueondyly, adâitobyry wâgâ akâwâm Deus imeryem tawyly nhenehonly, batiza tyepygueduo, kruz wâgâ tunu nhapâduo warâ. Deus Ispiritury kewâdyly kulâ nitaymba; mâkâlâ Jesus Deus imeryem awyly xutuen-hoim. <sup>7</sup> Azagâ tokalâ warâ Jesus Deus imeryem awyly wâgâ agueim. <sup>8</sup> Deus Ispiriturylâ mawânkâ Deus imery Jesus awyly xutuen-hoim. Jesus batiza iepygueduo, Kunwym Deus. “Ymery toenzepa kâinwyneguyl merâ” kewâm. Kruz wâgâ tunu tyapâze, tyigueday, Jesus “Pabai, imaxi iegadopyry kâengamely” kewâm lâpylâ warâ. Xirâ azagâ tokalâ warâ mawânrâ kyam tutuen-honze Jesus Deus imery lelâkurâ awyly. <sup>9</sup> Mâkâ aidyly enipyry kyam nhegatuly, tâinwânse lâpylâ kurâ. Deus aguehobyry olâ tâinwânseim kuru. Awlygue Jesus wâgâ aguehobyry kieinwândyly.

<sup>10</sup> Jesus einwânni modo tutuze, tutuzemo lelâkurâ, Deus agueho âkealâ awyly. Jesus einwântâny modo olâ tyangahu oday “Konokuni kulâ awâkâ Deus” tâkezemo. Arâ ague-lymo, Jesus wâgâ Deus aguehobyry neinwâmpyra tawylymogue. <sup>11</sup> Xirâ mawânrâ kyam Deus nhutuen-honly. Imery tâinwânse kydawlygue, typygueba ise eagâ kydawly. <sup>12</sup> Deus imery einwânni modo iweloem ietybyenlâ, Deus agâpa nâiehobamo warâ. Deus imery einwântâny modo olâ iweloem tyeseba. Aunloenlâ ise Deus agâpa awylymo.

### *Typygueba ise Deus agâ kydawly*

<sup>13</sup> Âmaemo Deus imery einwântaynrim modo âyanmo xirâ kâinwenily, iweloem ietybyem mawylymo mâenanâguehomoem. Âigueduomo Deus eydâ atoam ise mydâlymo, typygueba mâkâ agâ mitomoem. <sup>14</sup> Awlygue Deus agâ agueze tyanepa kydawly. Ize ato ara kienkadyly-ro watay, tutuze kurâ kydatâ awyly. <sup>15</sup> Kydatâ awyly kiuntulygue, kienkadyby xuduze awyly kiuntuly.

<sup>16</sup> Cristo einwânni modo ewy Deus izepa ato anhedyly watay, “Pabai, ityengâ mâkâ; inakanhe aitobyry xygakegâ” kykenre Deusram. Arâ kienkadly watay, inakanhe aitobyry xygakeze Deus. Igueduo, aunloenlâ ise Deus agâ awyly. Tâlâ olâ inakanhe tâjitobyry âdaunloenlâ Deus nhygakedânry. Awylygue ânguy Deusram nhygakehoem nhekadoem nudupa awyly. <sup>17</sup> Idânârâ inakai aguienkyl, aguykeho warâ Deus izepa ato lelâ. Tâlâ olâ inakanhe tâjitobyry âdaunloenlâ Deus nhygakedânry.

<sup>18</sup> Kurâ Deus eynynonro modo Deus aguehobyry kiankazeedyly kitaymba kurâ, Deus imery kâentâ mawânkâ. Awylygue Satanás inakai modo kurâem aniempyra awyly.

<sup>19</sup> Deus xurâem kydawyly tâdutuzelâ kurâ. Tutuze lâpylâ olâ kurâ, mâkâ eynynâbaom modo Satanás emaym awyly.

<sup>20</sup> Deus imery onro anaxi âemâ; awârâ tutuze kurâ. Mâkâ lelâ Deus wâgâ koendâ kiuntuhoem konomedâni. Aituo Deus agâpa tyetuneba kurâ, imery Jesus Cristo agâpa tyetuneba lâpylâ warâ. Kunwym Deus tokalelâ, ipa eagonro. Mâkâ mawânkâ iweloem kyetoni, kyigueduo typygueba eagâ kitoem.

<sup>21</sup> Âmaemo ymery ara kâenkyly modo, akaemo Deus ara kehoem nhyrekylymo kâdynanâdaundâ.

Alâ kulâ.

## 2 JOÃO

### João Kata Azagâ Ieto Inweniby

Deus myakâwândy âdy xirâ kata wâgâ tywenizeim awyly iweninribyry nhangahu odaji ieni. Kata wâgâ tâzedy niweniba xirâ iweninribyry, idânârâ enanaji olâ João iweninri, mâkâ toenzepa Jesus inwyneguyl. Awylygue “João kata azagâ ieto inweniby” kehonly. Deus itaumbyrylâ xirâ, iweninribyry olâ egatuim. Deus xirâ kata imeimbyry inwenien-honly myakâwândy Jesus einwânni modoem. Xirâ kata itainrim modoram nhekadyly, tagonro agâ âpynedomoem, Jesus wâgâ iozepa kulâ tonomedâni neinwâmpyra itomoem warâ.

#### *Aguely adaguhō*

<sup>1</sup> Âyam xirâ kata kâinwenily, âmâ pekodo Deus induakeyby, âmeombyryam warâ\*. Jesus einwânni modo iwymâry urâ. Toenzepa âwynedylymo. Urâ kulelâba olâ âwynenimo; idânârâ Kunwym Deus itaumbyry iozeno einwânni modo âwynedâmo lâpylâ. <sup>2</sup> Deus itaumbyry iozeno xina nheinwânto ara mânwândylymogue xina âwynedylymo. Deus nhutuen-hoymby aunlolâ kyangahu oday awyly, itaumbyry iweniby ara lelâ aguidyly warâ.

<sup>3</sup> Kunwym Deusram, imery Jesus Cristoram warâ kâenkadyly, kytyendomoem, koendâ kâentomoem, kydadahuliba kyetomoem warâ. “Xina agâlâ itaungâ, amyguehomobyry xina nheinwântay, tagonrodo agâ xina âpyneday warâ” uguelly inanry eyanmo.

#### *Agonromo agâ âpynedaungâ*

<sup>4</sup> Âmeom egary xidadâ. Toenzepa kohomaendâ, Deus itaumbyry iozeno lelâ anhekylymo kely kâindatuo, Kunwym Deus aguitoem aguehobyrara aidylymo awylygue.

<sup>5</sup> Aituo, kou Cristo eynynonro, wauguelly âyam, kurâ Jesus einwânni modo kagonro agâ kydâpynene, uguelly. Iwelo mâkeba xirâ kuruto. Jesus Cristo einwândyly kianguly umelâ, xirâ kiuntuly. <sup>6</sup> Deus aguehobyrara lelâ aguidyly-ro watay, Deus tywyneze kydawlyly tânehonze kurâ. Augueondyly, Jesus mânwândylymogu umelâ, agonromo agâ âpyneniem mawylymo mâtulymo.

<sup>7</sup> Tâinkâ lelâba iozepa kulâ enomedâze kewâni modope awyly. “Kurâ ara inkâba Jesus Cristo iazely. Tâzegadopyry uguondoem ityby kulâ” kelymo. Arâ aguehomoem aguehoymbyem akaemo Cristo Idueryam. Xypyry etay ise mâkâ uguondo Cristo Iduery âepanâguelly. Toenzepa ise mâkâ tâdâsenogudyly kely. <sup>8</sup> Tonomeguelâ itaungâ, akaemoram mâzenokuoba mitomoem. Mâzenokuoba âmaemo-ro watay, Deus ipywazemo, xurâem amitomobyry wâgâ, tynynonro modoram koendoro tiunduly ume.

<sup>9</sup> Tâlâ lâpylâ Cristo nhenomedâdogueba kulâ enomedâni modo, tyangahu odano tunârygue kulâ nhenomedâdylymo. Jesus Cristo takaze kehoem tonomegue wâne âdutulymo, Deus agâbamolâ olâ. Cristo wâgâ aguewâni modo olâ, Kunwym Deus, imery Jesus Cristo warâ agâba tyesebamo. <sup>10</sup> Itymo anaxi Cristo nhenomedâdobyry arabâ kulâ unâ egatuwâni modo saindyly-ro watay, ataen-homo ara kâzekaunâdaundâ, “Âetaungâ ietyram; ikobyzeguewâdaungârâ, yagâ âwinduataungârâ” tâkezeba itaungâ eyanmo. <sup>11</sup> Akaemo mânkaunâdylymo-ro watay, inakanhe aitomo amânhedylymolâ lâpylâ mawânrâ.

#### *Aguely âdypygueândo*

---

\* <sup>1:1</sup> Ise, imeombyry warâ lelâlâ tâdaenkuzeim, tâlâ pylâ olâ awâkâ “Jesus âjigue einwânni âtâdyguyngi modoram inwenily” kerim modo.

<sup>12</sup> Toenzepa âyanmo kâengatudyze watobe urâ, xirâ kata wâgâba olâ kâengatudyze wawyly. Udâdyse urâ âyanmo, urâ lelâlâ âyanmo auguehoem, on-hoam lelâ kuomaroem.

<sup>13</sup> Âwidy Deus induakeyby imeombyry idaenkulymo lâpylâ<sup>†</sup>.  
Xirâ kulâ âyanmo augueho.

---

<sup>†</sup> **1:13** “Xirâ kata iweninribyry ijidadâry donro Jesus einwânni modo agueho” kerim modope lâpylâ “âwidy Deus induakeyby imeombyry” keduo.

## 3 JOÃO

### João Kata Azagâ Tokalâ Ieto Inweniby

Deus myakâwândy âdy xirâ kata wâgâ tywenizeim awly iweninribyry nhangahu odaji ieni. Xirâ kata wâgâ tâzedy niweniba myakâwândy iweninribyry, idânârâ enanaji olâ João iweninri, mâtâ toenzepa Jesus inwyneguuly. Awlygue xirâ kata “João igatary azagâ tokalâ ieto” kehonly. Deus itaumbyrylâ xirâ. Xirâ kata iweninribyry Gaioram xirâ kata igonodyly. Koendâ Gaio wâgâ aguely, Jesus xurâem anhekyly wâgâ aguely warâ. Koendâ lâpylâ Demétrio wâgâ aguely. Diótrefes inakanhe anhekyly wâgâ adâkeze lâpylâ olâ.

#### *Agueley adaguho*

<sup>1</sup> Âyam xirâ kata kâinwenily, Gaio. Jesus Cristo einwânni modo iwymâry urâ. Yataen-ho toenzepa lelâlâ kâinwyneguuly âmâ.

#### *Gaio wâgâ koendâ aguehobyry*

<sup>2</sup> Koendâ lelâ idânârâ âmâem ize wawyly, tâwânepe warâ. Deus einwândyly mânmpopa mato ara. <sup>3</sup> Jesus einwânni modo eydâ mato dompyryem xarâ nâedâmo. Yam aguelymo keankâ: “Deus ize ato aiedyly nimowâbyra Gaio, Deus itaumbyry agueho ara adâidyl nimowâbyra warâ” nyguemo. Awârâ kâindatuo, toenzepa kohomaendâ. <sup>4</sup> Toenzepa inanry kohomaendyly, ymery ara kehoem kâinwyneguuly modo Deus itaumbyry agueho ara lelâ aidylymo kely, kâindadyly-ro watay.

<sup>5</sup> Yataen-ho kâinwyneguuly, koendâ kehoem amidâ, Cristo eynynâ kypemugudo âyam IU ise idâypy modo koendâ mâendaenkohobyry wâgâ. Mâuntuly modo keba wâne, arâlâ olâ koendâ medaenkumo. Arâ amituo, Deus ize atolâ amânhetyby negatumo. <sup>6</sup> Taunlo Jesus einwânni modo agâ tâtâdyguyduomo, amânhetyby negatumo. “Koendâ lelâ keankâ Gaioram xina âzedaenkuoly” nyguemo xinaram. Eydâ mato einkâ sakadondylymo-ro watay, idâhomoe idâlî âundugâ, Deus xurâenlâ mawânkâ aidylymo. <sup>7</sup> Jesus Cristo wâgâ agueze adakobâdaymo, Jesus einwânni modoam keankâ âzeholymo, Jesus einwântânr modoamba. <sup>8</sup> Kurâ Cristo eynynonro modo, myarâ myarâ warâ Jesus wâgâ agueze adakobâni modo kyzemawyadâñemo. Ipa atomo eyanmo kiunduly watay, Deus itaumbyry iozeno nhegatudaymo kienmawyadâdylymolâ ise.

#### *Diótrefes, Demétrio warâ wâgâ aguehobyry*

<sup>9</sup> Kata xiwenilâ awâtârâ eydâ matodâ Jesus einwânni modoram. Awâtârâ Jesus eynynonro modo iwymâryem tâidyse olâ Diótrefes. Awlygue adâkeho lelâ akaemo indadyse ato, kâinweniby adâkedyzeba. <sup>10</sup> Awyarâ yaindaly-ro watay, âyanmo egatuze urâ, Diótrefes inakanhe aitobyry. Ywâgâ koendâpa anygue. Adâkehogue, inakanhe yedyse. Ywâgâ kulelâba olâ, eagonro modo wâgâ inakanhe anygue lâpylâ. Jesus einwânni modo myarâ idâwâtyby modo tâtayam nigâsedaymba mâtâ. Tonlo Jesus einwânni modo tâtayam ingâsedyzebamo lâpylâ warâ. “Itymoram mâingâsedylymo-ro watay, xina Jesus einwânni modo agâ mâtâdyguyba ise âmaemo” kely eyanmo.

<sup>11</sup> Yataen-ho Gaio, koendonro modo aito ara lelâ aikâ; inakai modo aito araba aikâ. Koendâ adâidyl imodânr Deus xurâlâ, inakanhe adâidyl imodânr olâ Deus xurâ keba.

<sup>12</sup> Idânârâ koendâ aguelymo inanry Demétrio wâgâ. “Uguondo koendonro mâtâ” kelymo. “Deus itaumbyry oze lelâ adâidyl nimowâbyra.” Koendâ adâkeze lâpylâ urâ iwâgâ; âkealâ auguely awly tutuze lâpylâ âmâ.

#### *Agueley âdypygueândo*

<sup>13</sup> Toenzepa âyam kâengatulybelâ urâ, xirâ kata wâgâba olâ auguedyse wawyly. <sup>14</sup> Inepa nhedyse wawyly, âmâ, urâ warâ kydâtunâguedoem.

<sup>15</sup> “Pabai, agâ koendâ lelâ Gaio itoem aiekâ. Sakaladâni peba iekâ” uguely Deusram. Idânârâ taunlo ataen-ho modo idaenkuly. Idânârâ atonlo yataen-ho modo kâendaenkulymo lâpylan warâ.

Xirâ kulâ âyam kâinwenily.

## JUDAS

### Judas Kata Inweniby

Xirâ kata inwenily Judas nhangahu odaji iemâmy Deus. Awylygue Deus itaumbrylâ xirâ Judas inweniby Jesus einwânni modoram. Judas Queriote donro keba xirâ iweninri, eagonro uguondo Judas kelygue tâzekeim.

Judas xirâ itainrim modo nhurudyly, iozepa kulâ unâ egatuwâni modoram nâzenokuoba itomoem. Saguhobyry modo ume tumunreim modo tâzenagazeoze myakâwândy arâ lâpylâ ise Jesus Cristo wâgâ iozepa kulâ agueypy modo enagazedyly.

#### *Aguely adaghuo*

<sup>1</sup> Urâ Judas, xirâ kata iweninri, Jesus Cristo emary, Tiago iukono. Âmaemo Deus tynynonroem induakeyby modoram xirâ kata kâinwenily. Tywyneim âmaemo Kunwym Deus xurâem, Jesus Cristolâ nhenimo warâ.

<sup>2</sup> Âynynâmo Kunwym Deusram kâenkadyly, âtyendâmolâ itoem, akaladânímo peba itoem, toenzepa âwynedlymo nhenehon-hoem warâ.

#### *Jesus wâgâ iozepa kulâ unâ egatuwâni modo enagazedo* (2Pe 2.1-22)

<sup>3</sup> Yataen-ho kâinwyneguylâ âmaemo. Toenzepa keankâ âdara Deus kâmakely awyly wâgâ âyanmo kâinwenidye wawyly. Awârâ wâgâpa olâ xirâ kata kâinwenily. Tâlâ mawânrâ Deus tynynonro modo nheinwânyly nhenomedâdobyry. Awârâ konomedâdobyry modo âdalâ nâdugukeowâbyra. Ârutomoem xirâ kata kâinwenily, Jesus wâgâ ioze lelâ inomedâdomobyry mâinmopa mitomoem, inomedâdomobyry arapa iese kerin-am madagâikeoba mitomoem. <sup>4</sup> Âduaymolâ inokunimo; inokudlymo kulâ awyly mâuntuba olâ âmaemo. Angahumo oday âunârymo tiungukedyzemo, mâuntuba olâ âmaemo. Adâkely umelâ Deus xunârybyry nhugukelymo. “Deus koendoro awylygue, inakanhe aguitobyry xygakeim awylygue warâ, tâwâlâ inakai modo aguiendyly, tâwâlâ âdalâ kulâ aguykeândaynly warâ” kelymo. “Deus eynynonro xina” tâkewâzemo wâne, kewâdylymo kulâ olâ. Jesus Cristo kulelâ kywymâry; mâkâ aguientoem aguehobyry ara adâidysebamo olâ. “Ywâgâ iozepa kulâ unâ egatuwâni modo enagazeze olâ urâ” kewânmy Deus.

<sup>5</sup> Kydamudo israelita domodo aitobyry enanâguewâdaungâ. Egitodâ awylymo ume, enagazenimo amayumba tâmakezemo myakâwândy Deus. Deus tâmakebygueduolâ, toenzepa Israel domodo ewy Deus aguehobyry takazemo myakâwândy. Awylygue myakâwândy Deus tâinwântânry modo ingueânehonwâdyly. Tutuzelâ wâne âmaemo xirâ, mäenanâguehomoenlâ olâ auguely. <sup>6</sup> Idânârâ adaguly iraynâ akaemo anju domodo Deus aguehobyry sakaniubyry modo enanâguewâdaungâ lâpylâ. Deus eydâ atodâmolâ myakâwândy, tyeinwândy ume. Deus tywymâryem awyly izepamo olâ myakâwândy. Deus agâ âzekiba myakâwândy ize awylymo. Awylygue myakâwândy Deusram târâpa âieholymo. Tâtagueim tuhuadaguenery tyameim odaji myakâwândy âjigonoholymo, aunloenlâ korentygue ekâjiwâdybyem awylymo. Târâlâ akaemo typgueba kehoem Deus tânagazenehon-ho saindyly inwânwândylymo.

<sup>7</sup> Enanâguewâdaungâ lâpylâ Sodoma donro modo agâ, Gomorra donro modo agâ, xidadâ mårâdâ iwaguepaom modo agâ warâ aityby. Inakai modo, kywypado modo warâ aiedyly nimopamo myakâwândy. Anju domodo Deusgue tywymâgu izepa atobyry, ara lâpylâ myakâwândy akaemo Deusgue tywymâgu izepa awylymo. Eagâ tohogüin-hobyry lelâba myakâwândy nhynanâguylymo, pekodo modo, uguondo modo alelâ. Pekodo, pekodo agâ, uguondo, uguondo agâ warâmo kulâ myakâwândy. Arâ inakanhe aidylymogue myakâwândy Deusram âzenagazeolymo. Petomâgue myakâwândy iadulymo,

adainlymo warâ. Mârâ peto amaymba nâsemaguebamo myakâwândy, myara lâpylâ ise Deus eynynâbaom modo mâtâny amaymba nâsemagueba awyly.

<sup>8</sup> Mârâ xidadâ anano modo, “Adâiseba itaungâ” tâkehonly umelâ aitomobry ara lâpylâ asaemo iozepa kulâ unâ egatuwâni modo Deus enudâba kulâ aidyly. Warâ aguelymo: “Xina anhekyly koendâ lelâ awyly, Deus nenehom xina nhâenkyem” kelymo. Kewâdylymo kulâ olâ. Awylygue âdaunlo modolâ nhynanâguylymo; aituo pylâ tâwâlâ kulâ inakanhe idylymo-ro warâ. Awylygue tywymâry modo aguely neinwâmpyra awylymo. Deus pymâ imâsedo kuru aguely neinwâmpyra awylymo. Anju domodo nhunâguedylymo warâ. <sup>9</sup> Anju domodo iwymâry, anju Miguel, asaemo iozepa kulâ unâ egatuwâni modo ara âdalâ kulâ aguepa myakâwândy. Diabu niwykeba myakâwândy. Miguel, Diabu warâ myakâwândy ânguy Moisés equepybyry sodoem ini awyly wâgâ âjihogulymo. Tonhonre myakâwândy Miguel, âdylâ adientoem, Diabu niwykeba olâ myakâwândy. Warâ myakâwândy aguely: “Satanás, ioze inkâba awârâ amidyly. Deus ise agâ agueim, urâ mâkeba” kely.

<sup>10</sup> Asaemo iozepa kulâ unâ egatuwâni modoma tiuntudânry modo tywykeze. Ânguydo imeom wâne adienkylygue nâpaunzebyra, adiendye tatolâ anhekylymo, myara lâpylâ asaemo iozepa kulâ unâ egatuwâni modo ize tatolâ anhekylymo Deus ize ato keba. Awylygue ise Deusram âzewentâolymo; xypyry etay âzenagazeolymo warâ. <sup>11</sup> Kaikâlâ ise asaemo ize tato kulâ aieni modo, Caim ara. Dinherru wâgâ kulâ âtynanâni modo, Balaão ara. Corá aimâmy myara lâpylâ aidylymo. Deus israelita domodo iwymâryem indukeyby Moisés tywymâryem izepa myakâwândy Corá; awylygue myakâwândy Moisés idueryem idyly. Awylygue myakâwândy Deus, Corá iguehoem anhedyly.

Arâ lâpylâ ise “Deus eynynonro urâ” kewâni modo, kewâdyly kulâ-ro waunlo modo aiehowâdyly. <sup>12</sup> Âmaemo Jesus eynynonro modo âjigue mâywinduatomoem, tâpyneze mawylymo mânehon-homoem warâ mâtâdyguyhomobyryam tâtâze akaemo iozepa kulâ unâ egatuwâni modo, agâmo âwinduase. Tywykenry duay tywykeim emyenro akaemo. Tywypazeba kehoem tâzenanaym toku ikaji idylymo. Kaneru etaynrim modo wâne, turâem koendonro adientay, kaneru nepyramo myara, akaemo tâwâlâ on-hondlymo, âkelo olâ niompyramo. Eunu tâmyguyneim kopâem ihugueim emyenro akaemo; ihugueim ara wâne sapezenruam tadahoze olâ nihugueba itoem. Âkealâ konomedâdomo tynwânwânse kurâ; konokudylymo kulâ olâ. Nady ewisely kinwânwânyly, newiseba olâ, waunlo emyenro akaemo. Mârâ se iwindy agâlâ to-jionkeoze, iladoem myara ise akaemo iozepa enomedâni modo iguelymo, Deus agâpamo ise typgueba kehoem.

<sup>13</sup> Parutabâ sahugânu ton-honreim ara kehoem akaemo. Sagunu onwa tâese mâtâ sahugânu, todopâday olâ iwyku sagunu wâgâ tâxiânze. Arâ lâpylâ akaemo iozepa kulâ unâ egatuwâni modo, âdykâ takadomobyrydâ, kywypado modo, inakai modo warâ kehoem anhekylymo. Ximukâ kau wâgâ tâjidy xuguikerim emyenro akaemo. Mârâ ximukâ aunlo tânuagaenze adakobâni modo watay, tuzase. Arâ lâpylâ ise iozepa kulâ unâ egatuwâni modo, Deus eydâ atoam kainlânehomba awyly. Âji tyameim kehoem aienibyryenlâ Deus, akaemo iozepa kulâ unâ egatuwâni modo ejidyem. Târâ ise Deusram aunloenlâ âzenagazeolymo.

<sup>14-15</sup> Saguhoem Enoque adâkezelâ myakâwândy akaemo iozepa kulâ unâ egatuwâni modo wâgâ. Tâlâ tawyly umelâ myakâwândy Enoque, iwerâ aitaynrim modo wâgâ aguely. Warâ myakâwândy aguely: “Wayam waunroem Kywymâry âetuo, eanjury modo eagâ âese, tapâguely ekimo ise-ro warâ. Ilâem ise kurâdo modo âda tiendyly wâgâ aguely. ‘Yagonroenlâ ise âmaemo’ keze tynynonro modoram. Tâinwântânybyry modoram olâ, ‘Yizepa mataunaguynre. Ize wato ara aityby mâkeba âmaemo. Ywykewânmô,

unâguemâmo warâ. Iwague ise ydâpa mawylymo' keze" kewândymy Enoque. (Adâogue tydamudogueim myakâwândy Enoque\*.)

**16** Alâ akaemo konokudaynrim modo ilahuru Deus agâ, anhekyly modo izepa tawylymogue. Alâ inakanhe adâidysse tato anhedylymo. Tadaloenly keduonro akaemo; âdypeom modo wâgâ, pymâ domodo wâgâ warâ koendâ aguelymo, âdylâ tienmakehomoem kulâ.

### *Kydâturudo*

**17** Yataen-hodo, Pymâ Jesus Cristo tunâry egaturin-em induakeyby modo aguehobypy kâzenanânehonwâdaundâ. **18** Wakewânmomy: "Xypyry etaji idyly-ro watay, sainse lâpylâ Deus âwankuem ieni modo; einwânni modo âwankuem iesemo lâpylâ warâ. Deus eynynonro keba ise akaemo. Awylygue ise idânârâ inakai adiendysse tato anhedylymo" kewânmoo. **19** Jesus eynynonro modo âjizepa itomoem aienehonrim modo wâgâ myakâwâm aguelymo. Idânârâ inakai modo tâpaunzedo, adyese lelâ akaemo konokuni modo. Eagâmo inkâba Deus Ispiritury.

**20** Earamo tâiseba itaungâ, yataen-hodo. Ago lelâlâ Jesus einwânsededaungâ, koendâ kehoem Jesus wâgâ âsenomedâzeedaungâ warâ. Deus agâ amyguedaymo, Deus Ispiritury amyguehomoe nhuduhobypy aralâ Deus agâ aguewâtaungâ. **21** Deus âwynedâmo awyly kâzenanânehonwâdaundâ. Kywymâry Jesus Cristo odopâdyly tânuenzelâ itaungâ; aunloenlâ ise eagâ kydawly. Kytyendâ tawylygue ise Jesus tagâ kyedyl.

**22** Tâlâ âduaymo ton-honremba kulâ Jesus einwânni modo. Awylygue tâinwânsse, neinwâmpyra warâ awylymo. Akaemo modo tytyenzelâ itaungâ, eon-hondâdaungâmo warâ, koendâ nheinwântomoem. **23** Âdylâ peto onwanji ihuguezajiom tâmaegoze kehoem manwâdylymo wâne, myara inepa kehoem eagâmo aguewâtaungâ, eon-honrumo xuduwâtaungâ, Jesus koendâ nheinwântomoem. Iozepa enomedâni modo tytyenzelâ itaungâ. Tonomeguelâ olâ itaungâ, inakanhe aitomo ara amipyra mitomoem. Inakai kulâ akaemo nheinwânyly, anhekyly warâ, âtâ tâjiwogonro itânzeyby ara. Mârâ itângu izepa mawylymo, ara lâpylâ akaemo iozepa enomedâni modo aito izepa itaungâ.

### *Koendonro awâkâ Deus*

**24** Warâ inanry auguely, Deus agâ augueday: "Koendonro lelâlâ âmâ xina agâ. Tâenselâ âmâ, Satanás xinaram 'Aiekâ' keho xina aniempyra awyly. Toenzepa ise xina iomaru, xina mâenkaunâduo. Eydâ matoam xina idâhoem amiendâ, tâwentâzeba âyam xina saintoem. Âwâkuru, on-honru warâ ese xina. **25** Âmâ lelâ Deus, ânguy imyenro lâpeba. Xina etaybyay Pymâ Jesus Cristo iguehobypy wâgâ xina mâenmakely. Koendonro lelâlâ âmâ. Imyenro koendonro lâpeba. Âmâ ton-honreim kuru. Âmâlâ idânârâ xutuim. Arâlâ âmâ iwerâ. Aunlolâ ise âmâ. Åkeá lelâlâ xirâ xina agueho" uguely Deusram.

Alâ kulâ ise âyanmo kâinwenily.

Judas

---

\* **1:14-15** Gênesis 5.3-24 warâdâ aguely. Saguho uguondo Adâogue tydamudogueim merâ Enoque. Jaredimery myakâwândy mâkâ. Maalalel imery myakâwândy Jaredimery. Cainâ imery myakâwândy Maalalel. Enos imery myakâwândy Cainâ. Sete imery myakâwândy Enos. Adão imery myakâwândy Sete.

## APOCALIPSE

### Deus Waunroem Aitaynrim Modo Nhutuen-hon-ho

Deus myakâwândy João nhangahu odaji ieni âdy xirâ livru wâgâ inwenily awyly, onro adaimpygueduo âdy aini awyly kiuntuhoem, âdara târâ Deus eydâ atodâ awyly kiuntuhoem warâ. João lelâlâ wâne iweninri, Deus itaumbyry olâ nhegatuly. Jesus nhapygueni, aguely idani warâ myakâwândy João. “Jesus toenzepa inwyneguyl” kelygue myakâwândy ezekely. Ilha Patmosdâ myakâwândy mâkâ etagu, unâ tâdâsemagueho nhegatuhobyry wâgâ. Ásia eynynâ Jesus einwânni modoram mâkâ xirâ livru inwenily.

“Kordeiru” kelygue tâzekeim Jesus, inakanhe aguitobyry xygakeze mawânkâ myakâwândy iguely. Xypyry etay tâdâsenagazedo wâgâ adâkeze João, anju domodo trombeta indyduomo, tâdâsenagazedo modo saindyly awyly wâgâ. Azagâ ânguydo imeom adyry âepanâguely wâgâ adâkeze. Deus lelâlâ ara tynrendysedo ise akaemo. Deus iduery modo on-hoam isemo, Jesus agâ tâseguebyhomoem. Kawaru tapekeim wâgâ ise Jesus âewyly. Akaemo eon-honru idânârâ ise Jesus nhainly. Kau iwelo, onro iwelo warâpe ise. Jesus ise pymâ imâsedo kuru-ro warâ.

Xirâ livru wâgâ tutuze kurâ, târâ Deus ezay âdara awyly. Jesus xurâ modo lelâ ise târâ. Jesus eynynâbaom modo olâ ise âji tâdâsenagazedorâba nipyra; aunloenlâ ise târâ awylymo.

#### *Aguely adaguho*

<sup>1</sup> Xirâ pape kâinwenily Jesus einwânni modoam, waunroem aitaynrim modo Jesus nhutuen-hoymby nhutuhomoem. Deus myakâwândy waunroem aitaynrim modo tânehonze Jesus Cristoram. Jesus tyanjury tydâpa ingonotyby xirâ modo yam xutuenhoim. <sup>2</sup> Urâ lelâlâ kâentaymby modo awylygue âkeá lelâlâ xirâ kâinwenily, waunroem aitaynrim modo tutuze lelâ mitomoem. Deus kurudyse ato xirâ kâinwenily, Jesus Cristo yam nhutuen-hoymby. <sup>3</sup> Jesus einwânni modo âtâdyguyhodâ xirâ pape itainrim modo koendâ lelâ ise Deus agâ. Koendâ lelâ lâpylâ ise aguely idani modo, xirâ livru wâgâ tâdâturudo einwânni modo warâ. Iweâpa nipyra ise idânârâ xirâ modo aidly.

#### *Sete xidadâ anaym Jesus einwânni modoram João aguehobyry*

<sup>4-5</sup> Urâ João xirâ iweninri Jesus einwânni modoram, Ásia eynynonro sete xidadâ modoram. Deus agâ augueday: “Koendâ Ásia eynynonro modo egâ, koendâ lelâ agâ itomoem. Sakaladââimo peba iekâ” warâ keze urâ Deusram, Jesus Cristoram, sete espíritu koendonro modoram warâ. Iweâpalâ mykâinane Deus tâlâ awyly; iwerâ tâlâ; aunlolâ ise tâlâ awyly warâ. Deus eydonro akaemo sete espíritu modo. Jesus Cristo olâ Deus wâgâ ioze kehoem kuru kiuntuhoem agueim. Iguewâm; ipa lelâlâ imâ. Igueypyem mâkâlâ akâwâm waunroem kuru kurâem itoni. Xirâ onro anaym idânârâ pymâ domodo iwymârê mâkâ.

Kywyneni lelâlâ mâkâ. Kruz wâgâ tunu tyapâze iguehobyry wâgâ inakanhe aguito-byry xygakewâm Deus. <sup>6</sup> Eynynonro modoem aguitoem aguewâm Jesus Cristo, Deus agâ aguenriem kitoem, Deus, kurâ domodo agâ aguehoem kienmawyadâdoem warâ. Tâtaybyanoem kyemâ, tunwym Deus agâ tâwaneinhe. Âdaunloenlâ Jesus koendonroem awyly wâgâ aguykely kimopa kine, eon-honru wâgâ warâ. Âkeá lelâlâ xirâ.

<sup>7</sup> Xirâ kâinweniby aguely xutuwâdaungâ. Inepa ise Jesus Cristo odopâdyly eunu duay. Idânârâ kurâ domodo Jesus Cristo odopâdyly esemo. Kruz wâgâ awyly ume ferro tuose-bileingue sodo ihoguyimbyry modo esemo lâpylâ. Idânârâ kurâ domodo onro anano mâkâ eynynâbaom modo, Jesus odopâdyly tientuo, tânagazedyly ytaze ohogüenzemo. Âkeá lelâlâ xirâ.

<sup>8</sup> — Idânârâ adaguho, âdypygueândo warâ urâ. Letra A adaguho, letra Z pylâ xypyry\* ilâ emyenro urâ — kely Deus Ton-honreim.

Tâlâlâ myakâwândy Deus; tâlâ iwerâ; aunlolâ ise tâlâ awyly warâ.

### *João, Jesus Cristo nhetobyry*

<sup>9</sup> Âpemugumolâ urâ João, Jesus Cristo eynynonro kydawylygue. Aramo, Jesusgue twymâgueim lâpylâ urâ. Jesus einwânni wawylygue keankâ iduerydoram kâzenagazeoly. Inagazedomo ara lâpylâ kâzenagazeoly; toenzepa ienagazedylymo; kâenmaenly lelâ olâ, âdara uguepalâ, Jesus einwândyly kâinmopalâ warâ. Ilha Patmosdâ ietagu, Deus itaumbury kâengatuhobyry wâgâ, Jesus nhenomedâdobyry âkeá lelâlâ awyly auguehobyry wâgâ warâ. <sup>10</sup> Semana adaguho oday keankâ Deus Ispiritury âewyly, wayam waunroem aini modo kâentoem aienehonze. Ykaynâ keankâ tâjitanru kâindadyly. Ton-honre kehoem aguely, trombeta ara:

<sup>11</sup> — Idânârâ mâenkyly modo iwenigâ pape wâgâ. Igonokâ sete xidadâ anaxi Jesus einwânni modoram, Éfeso, Esmirna, Pérgamo Tiatira, Sardes, Filadélfia, Laodicéia warâam — kely keankâ Yam.

<sup>12</sup> Kâsemyobâdyly keankâ, yagâ agueim ese. Âsemyombâdybyem, sete candelabru ourugue xygatyby kâendyly. <sup>13</sup> Mârâ duay keankâ uguondo emyenro kâendyly. BOH waunlo keankâ ety iwogonro. Ouru xygatybygue ihogâdyly nhewandanopyryem epady onwa, pymâem awyly xutuhoem. <sup>14</sup> Tapeke lelâlâ keankâ nhangahudu, kâdâkerâ† ara kehoem. Peto iatygu ara kehoem keankâ enu ehozelu. <sup>15</sup> Bronze sareântyby ehozelu ara kehoem keankâ ihuru ehozelu. Iwâelu imâsedo ipyru ara kehoem keankâ itanru eon-honru. <sup>16</sup> Emary aho eynynâ sete ximukâ keankâ emano. Itayba espada tuosebileim, tâynâ, taynâ warâ iewipy keankâ egaserim. Xixi wâne toenzepa kehoem tohobaze myara keankâ emydy ehozelu.

<sup>17</sup> Kâentuo, iekomadâ; ipebaji kehoem yihuguely igueypy ara. Aituo tâmary aho eynynonrogue MÂ' yedly. Aguely:

— Tyanepa ikâ. Idânârâ adaguho urâ. Idânârâ adaimpygueduo, ipa witaymba ise urâ. <sup>18</sup> Mâkâ iguedânry urâ! Yiguewâm wâne. Kurâem witonmâ olâ, aunloenlâ witoem. Iguewâtyby modo kurâem kânhetondoem aguehoymbyem urâ. Ânguy igueypyem nâtâzezedaymba ise, kurâem itondoem agânhetuo. Etadâdyby wâne myara akaemo, urâ pylâ xave etaguehomo sodo-ro myara. <sup>19</sup> Awylygue wayam aini modo mâenkyly wâgâ iwenigâ, iwerâ aini modo wâgâ, ilâpygueduo aini modo wâgâ warâ. <sup>20</sup> Sete ximukâ lelâ metai iemaym, aho eynynâ, sete candelabru modo sawo duay wawyly warâ. Mâuntuba olâ âmâ âdy mâentyby awyly. Wakeze xirâ auguely. Sete xidadâ anaym yeinwânni modo mâenanâgueholâ ise awârâ sete candelabru ourugueto modo. Awârâ sete ximukâ ise ynynonro modoram unâry egatuwâni modo mâenanâgueho-ro warâ — kely keankâ Jesus.

## 2

### *Efesodâ Jesus einwânni modoram unâ egatuhobyry*

<sup>1</sup> Aituo keankâ Jesus Yam aguely:

— Xirâ iwenigâ Efesodâ ynynonro modoram unâry egaturin-am.

“Sete ximukâ tâmary aho eynynâ sawâni, sete candelabru modo duay adakobâni warâ urâ. Ytaumbyry xirâ âmaemo Éfeso donro modoram:

\* **1:8** Gregu domodo itanwe-em, “Alfa” kely “Adaguho” keze, “Ômega” kely “Xypyry” keze warâ. Awylygue Cristo Alfague, Ômegague warâ tâzekeim. † **1:14** Greguem adâkeze: “Neve ara kehoem nhangahudu sapeku.” Tapeke mawânrâ neve, toenzepa sapeku. Bakairi domodo olâ neve âdykâ nepyra awylygue, tarâ “kâdâkerâ ara” kehonly lelâ, tapekeim enday kâdâkerâlâma idânârâ nhutuly.

<sup>2</sup> “Tutuze urâ idânârâ urâem amânhetybymo. Ton-honre minasemo ize wato ara lelâ amitomoem. Toenzepa tâsenagazeze minasemo, yeinwândyly mâninpoma olâ âmaemo. Konokuze kulâ, ‘Cristo xina igononi iwâgâ agueze’ kewâni modo, agueduo, tâpaunzeze âmaemo, âkealâ, âkealâba warâ awyly mâtuntuhomoem. Tutuze olâ urâ, aguelymo mânwâmpyro mawylymo, kewâdylymo kulâ awylygue. <sup>3</sup> Ynynonro keba modo inagazedâmo, yeinwândylymogue. Mâzenagazeolymogue kulâ yeinwâmpyro mipyra olâ keankâ âmaemo. Toenzepa wâne mâzenagazeomo, tuomareba mipyra olâ matau-naguyne.

<sup>4</sup> “Tâlâ olâ inwentâdomo. Waunroem yeinwâmpygueduomo ywynedylimo ara inkâba ywynedylimo iwerâ. <sup>5</sup> Saguhoem ywynedomobyry enanâguewâdaungâ. Tâjityenzelâ itaungâ, iwerâ toenzepa ywynebyra mawylymogue. Toenzepa ywynedondaungâ, saguhoem ywynedomobyry ara. Odopâze urâ. Izepa wato aiedyly mâninpoma âmaemo-ro watay, inagazezemo urâ. Candelabru ejidydâpa ejikely wâne myara ise aedylymo, amidylimo mâungukeba âmaemo watay.

<sup>6</sup> “Koendâ lelâlâ, Nicolau eynynonro modo nhenomedâdomo izepa mawylymo. Ienudâba lâpylâ akaemo aidly.

<sup>7</sup> “Awlygue auguely mâtundudyze mataymo, idataungâ Deus Ispiritury aguely idânârâ yeinwânni modoram.

“Âmaemo xypyry etaji kehoem yeinwândyly imodânry modo, Deus enadoram ale-hozemo urâ, âji iwâkuruam, âigueompyra mitomoem. Nady ewily kyigueânehondânrubye târâ. ‘Tâwâlâ xirâ nady ewily einwâtaungâ’ keze urâ âyanmo” – kely keankâ Jesus Efesodâ tynynonro modoram.

### *Esmirnadâ Jesus einwânni modoram unâ egatuhobry*

<sup>8</sup> Aituo keankâ Jesus agueondly:

– Xirâ iwenigâ Esmirnadâ ynynonro modoram unâry egaturin-am.

“Idânârâ adaguho urâ. Idânârâ adaimpygueduomo, ipa witaymba ise urâ. Yiguewâm wâne, kurâem witonmâ olâ. Ytaumbyry xirâ âmaemo Esmirna donro modoram:

<sup>9</sup> “Tutuze urâ, mâzenagazeolymo, âdypeom keba mawylymo warâ. Yeinwânni modoram kâunduly tâlâ olâ âmaemo. ‘Judeu urâ’ kewâni modope awâtârâ, Deus xurâ keba olâ akaemo. Âunâguenimo kulâ akaemo awyly, tutuze urâ. Deus keba nheinwânklymo, Satanás kulâ. <sup>10</sup> Mâzenagazeolymo kâdytadaundâ. Pymâ modo nhegameybyem âzetadâoze âmaemo ewy. Satanás ise aenehonrimo. Yeinwândyly mâninpomapolâ mâsenagazedylymo mâenmaenlymo-ro watay, arâ ise âkealâ kuru yeinwântâ mawylymo âdutuoly. Dez iguandyly awârâem kulâ olâ ise mâzenagazeolymo. Yeinwândyly kâjimowâdaundâ, mâdylymo umelâ. Adaimpâni emaenrimbyry wâne koroa tâmakeze, myara ise Deus eydâ atodâ aunloenlâ mitomoem agânhedyly, âmaemo yeinwândyly imodânry modo.

<sup>11</sup> “Awlygue auguely, mâtundudyze mataymo, idataungâ Deus Ispiritury aguely idânârâ yeinwânni modoram.

“Âmaemo xypyry etaji kehoem yeinwândyly imodânry modo, Deus agâpa ini keba ise âmaemo. Âigueduomo, aunloenlâ ise eagâ mawylymo. Tânagazedonduneba ise âmaemo” – kely keankâ Jesus Esmirnadâ tynynonro modoram.

### *Pergamodâ Jesus einwânni modoram unâ egatuhobry*

<sup>12</sup> Aituo keankâ Jesus agueondly:

– Xirâ iwenigâ Pergamodâ ynynonro modoram unâry egaturin-am.

“Espada tuosebileim taynâ, tâynâ warâ iewipy sodo urâ. Ytaumbyry xirâ âmaemo Pérgamo donro modoram:

<sup>13</sup> “Satanás pymâem ato donro mawylymo, tutuze urâ. Awâtârâ mawylymogue kulâ, yeinwâmpyro mipyra olâ mitaunazemo. ‘Jesus xurâ xina’ warâ inanry amyguezesedylymo. Awâtârâlâ ani Antipas âdyoly Satanás eynynonro modoram, ywâgâ aguely nimopa

awylygue. Tâwâlâ lelâlâ wâne ataen-homo âzenagazeoly, âdyoly warâ, alâ olâ yeinwândyly mâinmopa mawylymo.

<sup>14</sup> “Ize wato lelâ waypa olâ amânhekylymo. Balaão nhenomedâdobyry ara ainipe âduaymo. Warâ myakâwândy Balaão Balaqueam aguely: ‘Israelita domodo xurukâ, Deus lelâ netyguebyra itomoem. Ekudyby modo deus keho netyguedâmo lâpylâ, eyam podo egameyby nâdâmo warâ. Pekodo ohogüimby, uguondo ohogüimby, ohogüindânrý âdaunlolâ nhynanâdomoem, warâ xurukâmo’ kewândymy. <sup>15</sup> Tâlâ lâpylâ âduaymo Nicolau eynynonro modo inakanhe nhenomedâdomobyry einwânni modo. <sup>16</sup> Âjityendaungâ, inakanhe kulâ amitomobyry wâgâ. Inakanhe amidylymo imowâdaungâ. Inepa ise kodopâdy. Inakanhe amidylymo mâinmopa âmaemo-ro watay, inagazezemo urâ. Xirâ espada tuosebileim ytayba egaseringue ise agâmo kâseguebyly.

<sup>17</sup> “Awyligye auguely mâuntudye mataymo, idataungâ Deus Ispiritury aguely idânârâ yeinwânni modoram.

“Âmaemo xypyry etaji kehoem yeinwândyly imodânrý modo, Deus nhekanâdyby maná kehogue âwasemo urâ. Tuhu tapekeim xuduze lâpylâ urâ yeinwânni modoram. Ezedymo iwelo iweniby ise tuhu wogonro. Ânguy âkelo ezedy nutuwâbyra ise; sodo lelâ ise xutuim” – kely keankâ Jesus Pergamodâ tynynonro modoram.

### *Tiatiradâ Jesus einwânni modoram unâ egatuhobyry*

<sup>18</sup> Aituo keankâ Jesus agueondly:

– Xirâ iwenigâ Tiatiradâ ynynonro modoram unâry egaturin-am.

“Deus imery urâ. Peto iatygu ara ienu ehozelu. Uhuru ehozelu bronze ehozeliby ara. Ytaumbypyry xirâ âmaemo Tiatira donro modoram:

<sup>19</sup> “Âdy amânhekylymo awyly, tutuze urâ. Tutuze urâ, agonromo tywyneze mawylymo, yeinwândyly mâinmopa mawylymo warâ. Mâsemawyadâdylymo. Idânârâ tâmaenze mitaunazemo, âdamyguepamolâ, yeinwândyly mâinmopamolâ warâ. Imâem iwerâ urâem amidylymo, saguhoem yeinwâmpygueduomo amitomobyry takaze kehoem.

<sup>20</sup> “Pekodo Jezabel izepa wato aniempyra itoem, aguepa itoem warâ amânhepyra mawylymo olâ ikuâdâni. ‘Deus aguehobyrlyâ augueho’ kely wâne; kewâdyly kulâ olâ. ‘Ohogüindânrý modo, ohogünwâdyby modo alelâ tâwâlâ kywypado anienâmo, âdalâ nidâmo ize tato aralâ’ kely. ‘Koendonro kuru lâpylâ xygatyby modo deus keho etyguedyly, eyam egameyby podo sâdyly warâ’ kely. Kewâdyly kulâ olâ mâkâ. Izepa wato amânhetomoem adienehondye mâkâ. <sup>21</sup> ‘Inakanhe kulâ amyguely. Inagazenehonze urâ, amyguely mâinmopa âmâ-ro watay’ uguezesedyly inanry mâkâ pekodoam. Timodyzeba olâ inakanhe adâidyly. Âdaunlo uguondolâ ize ato tynanâniem. <sup>22</sup> Tâzewanu inakaigue enagazeze urâ toenzepa kehoem. Alâpylâ ise uguondo modo eagâ ityby kâenagazedyly. Nâjityembrya, adâidyly nimopamo warâ watay, toenzepa kehoem ise kâenagazedylymo. <sup>23</sup> Mâkâ pekodo ara aini modo xyâze urâ. Awârâ tientuo ise, idânârâ ynynonro modo tyangahu oday tunâgo tutuze wawyly nhutulymo. Aitomobyry ara ise epywadylymo. Inakanhe aitaymby modo enagazeze urâ. Koendâ aitaymby modo agâ koendâ lâpylâ ise urâ.

<sup>24</sup> “Âjidadârymo oday tâlâ wâne inakanhe aini modo. Tuomare olâ urâ, agui mawânkâ âduaymo akaemo arapaom modo. Mâkâ pekodo inakai Satanás wâgâ nhenomedâdobyry, âdara aidyly wâgâ warâ tiuntudyzebamo. Xirâ olâ âyanmo augueho: <sup>25</sup> ‘Kodopâdyly ara, iozeno kâenomedâdo einwândyly kâjimowâdaundâ.’

<sup>26-27</sup> “Âmaemo xypyry etaji kehoem yeinwândyly imodânrý modo, auguehobyrlyara lelâ aitaynrim modo, pymâem yagâ âesemo urâ. Pabai Deus mawânkâ saguhoem kuru yam adâkeze: ‘Idânârâ onro anano modo iwymâryem ise âmâ. Yizepaom modo sainze âmâ, âmugâ xukagâdyly wâne-ro myara’ kewândy. Pabai pymâem witodem aguehobyrlyara, arâ

lâpylâ ise pymâem mitomoem auguely. <sup>28</sup> Ximukâ emedyly umeno xigâlegueam ehoru, iwâkuru warâ myara aenehonzemo urâ, yeinwândyly mâinmopa matomobyry wâgâ.

<sup>29</sup> “Awlygue auguely mâtududyze mataymo, idataungâ Deus Ispiritury aguely idânârâ yeinwânni modoram” – kely keankâ Jesus Tiatiradâ tynynonro modoram.

### 3

#### *Sardesdâ Jesus einwânni modoram unâ egatuhobypy*

<sup>1</sup> Aituo keankâ Jesus agueondly:

– Xirâ iwenigâ Sardesdâ ynynonro modoram unârâ egaturin-am.

“Sete ispiritubeom urâ; sete ximukâbe iemaym. Ytaumbyry xirâ âmaemo Sardes donro modoram: “Tutuze urâ idânârâ amânhekylymo. Atonlo modo enanaji, yeinwântâ âmaemo-ro waunlo ara. Arâpa olâ, iguewâtyby modo ara kulâ âmaemo, ienanaji. <sup>2</sup> Deus âurudâmólâ, ize ato ara lelâ amitomoem, koendâ lelâ amipyra olâ âmaemo. Mâuntudânrymoenlâ izepa wato adyese mawylymogue inanaynmolâ itaungâ, amânhepyra mitomoem. Xykywâni modo arapa itaungâ; auguely tywantaguezelâ itaungâ warâ. Âdiempa kulâ yeinwândylymo. Âzeon-hondâdaungâ, imâem yeinwântomoem, mâinmopa mitomoem warâ. Iguedânry ara itaungâ, igueypy ara inkâba! <sup>3</sup> Deus itaumbyry idanipyry âmaemo. Deus wâgâ inomedâdomobyry mutuwâdaundâmo. Awârâ enanâguewâdaungâ. Angahumo odaji ietaungâ warâ Âjityendaungâ Deus aguehobypy mankadomobyry wâgâ. Inakanhe mawylymo imowâdaungâ warâ. Deus aguehobypy kadakadaundâ. Inakanhe amidylymo mâinmopa âmaemo-ro watay, kodopâduo inagazezemo urâ. Tutuzeba, tânuenzeba warâ wâne tâmagazeim saindyly myara ise kodopâdyly, ywânwândylymo umeba.

<sup>4</sup> “Âmaemo Sardes donro modo ewy tâlâ ize wato ara aini modo. Izepa wato aieni keba mawylymogue, âtâ tapekeim, tywykenry ara lelâ mawylymo. Yeinwântomobyry wâgâ, koendâ lelâ amitomobyry wâgâ warâ, tâwâlâ yagâ itaungâ.

<sup>5</sup> “Âmaemo xypyry etaji kehoem yeinwândyly imodânry modo, inakanhe amitomobyry xygakeze urâ. Tapekeingue âzetydâdyby modo ara ise âmaemo. Mârâ pape Aunloenlâ Deus Agâ Ini Modo Ezedy sawo wâgâ iwenibyem izedymo. Mârâ wâgâpa izedymo kâyngakeba ise urâ-ro warâ. Pabai enado, anju domodo enado warâ agueze urâ: ‘Ynynonro modo asaemo’ keze urâ.

<sup>6</sup> “Awlygue auguely mâtududyze mataymo, idataungâ Deus Ispiritury aguely idânârâ yeinwânni modoram” – kely keankâ Jesus Sardesdâ tynynonro modoram.

#### *Filadelfiadâ Jesus einwânni modoram unâ egatuhobypy*

<sup>7</sup> Aituo keankâ Jesus agueondly:

– Xirâ iwenigâ Filadelfiadâ ynynonro modoram unârâ egaturin-am.

“Deus izepa ato âdykâ aieni keba urâ. ‘Aiese urâ’ uguehobypy aieni urâ. Tako Davi Deus eynynonro modo iwymâryem awly myakâwândy, myara pymâem witoem aguehoymbyem urâ. Agueze urâ, ânguy Deus eydâ atoam idâim awly, ânguy idâdânry awly warâ, xave kâenahungueho, kâenahun-ho warâgue iematu-ro waunlo ara. Kâenahungueyby, ânguy nenahunwâbyra. Kâenahuymby, ânguy nenahungueba warâ. Urâ kulelâ ise enahuim, enahungueim warâ. Ytaumbyry xirâ âmaemo Filadelfia donro modoram:

<sup>8</sup> “Âdy amânhekylymo awly, tutuze urâ. Aguipa kulâ Filadelfiadâ yeinwânni modo, âdaunlo modo kulâ, âdy pebanro modo kulâ warâ mawylymo, tutuze urâ. Aunlo kulâ wâne âmaemo, inomedâdomobyry ara lelâ olâ amidylymo. ‘Jesus eynynonro keba xina’ myguepa olâ mitaunazemo. Yeinwântuomo lelâ âwymârymoem Deus awly, eydâ atoam tâdâtâly warâ. Ânguy ynynonro modo myarâ nâtâba itoem aniehonzemo. Ânguy nhenahunly keba pyanta kâenahungueyby-ro waunlo ara.

**9** “Idataungâ augueho! Tâlâ awâtârâ Filadelfiadâ judeu domodo ewy ‘Deus eynynonro xina’ kewâni modo. Kewâdylymo kulâ olâ, Satanás eynynonro kulâ akaemo. Tâwâlâ wâne iwerâ âduerymoem awylymo. Xypyry etay olâ inadomo âzeguhoam isemo, âyrentomoem. ‘Jesus âwynedâmo awyly, tutuze xina’ kezemo. Warâ ise âyrentomoem agânhedylymo.

**10** “Inomedâdomobyry ara, yeinwâmpyra mipyra olâ mitaunazemo, mâzenagazeolymo umelâ. Awylygue ise âdaenehombamo wawyly, kurâ domodo idânârâ âzenagazeolymo umelâ. Tâdâsenagazedo ume ynynonro modo emakeze urâ. Tâdâsenagazedo saintuo mawânrâ ise ânguy ynynonro, ânguy ynynâbaom warâ awyly xutuly. **11** Inepa ise kodopâdyly. Yeinwândyly kâjimowâdaundâ. Adaimpâni emaeenrimbyry wâne koroa tâmakeze myara ise yeinwândyly imodânry modo xurâem koendonro Deus nhuduly. Ânguyam yeinwâmpyra mitomoem akâienehonwâdaundâ. Koendonro mâenmakeyby mâenmagazenehonly waunlo ara tâise awârâ.

**12** “Âmaemo xypyry etaji kehoem yeinwândyly imodânry modo, aunlolâ Deus eydâ atodâ mitomoem aiese urâ. Âtâ enu koendâ kehoem epadâdyby wâne alâ kulâ ni-hugueba, myara lâpylâ ise Deus eydâ atodâ âdaunloenlâ igaseba mawylymo. Azagâ âze âwâgâmo iwenize urâ, yDeusry ezedy, iezyed iwo warâ. ‘Jerusalém iwo donro merâ, Deus ety anary donro kaynonrodâpa âetyby’ kely iwenize lâpylâ urâ warâ.

**13** “Awylygue auguely mâuntudyze mataymo, idataungâ Deus Ispiritury aguely idânârâ yeinwânni modoram” – kely keankâ Jesus Filadelfiadâ tynynonro modoram.

### *Laodiceiadâ Jesus einwânni modoram unâ egatuhobyry*

**14** Aituo keankâ Jesus agueondyly:

— Xirâ iwenigâ Laodiceiadâ ynynonro modoram unâry egaturin-am.

“‘Aiese urâ’ uguehobyry aieni urâ. Âkeá lelâlâ Deus eynynâ aguenri urâ; uguewâdyly kulâ waunlo mâkeba urâ. Idânârâ tâlânro modo âtugudobyrlyâ urâ warâ. Ytaumbry xirâ âmaemo Laodicéia donro modoram:

**15** “Âdy amânhekylymo tutuze urâ. Ago lelâ ynynâ mawylymo warâ inkâba âmaemo. Ago lelâba lâpylâ udueryem mawylymo. Paru tanreim emyenro âmaemo, tâdâpigue kehoemba, tyânkâne kehoemba warâ. **16** Paru tanreim kywilupanâdyly myara kulâ yeinwândylymo, yeinwâmpyra warâ mawylymo. Agâmopa widyly tâise ize wato, paru tanreim ytayba kamely myara. **17** ‘Âdypeonlâ xina. Âdy ize inkâba xina warâ. Deus ize ato ara lelâ xina aidly’ myguelymo wâne. Tâwâlâ kulâ olâ mâsenogudylymo. Âdalâ Deus ize ato amânhetaymba âmaemo! Âdaunlo kulâ âmaemo! Âdypeom mâkeba âmaemo urâem, ize wato peba mawylymogue, tâwâlâ wâne toenzepa âdydo imeompe mawylymo. Epy ara kulâ olâ âmaemo, ywâgâ âdy mâuntuba mawylymogue. ‘Koendâ Jesus wâgâ tutuze xina’ tâkeze wâne âmaemo. Âzetygueyby ara kulâ olâ âmaemo, imâem yeinwâmpyra mawylymogue, inanajimo yeinwântâ wâne âmaemo!

**18** “Xirâ olâ âyanmo augueho, ipa matomo Yam ekadaungâ, Deus ize ato ara amito-moem. Deus tynynonro modoram koendonro nhuduly âyanmo xuduze urâ, Deus enado mâpybazebyra mitomoem. Ipa matomo xuduze urâ, Deus wâgâ koendâ mâuntuomoem. Ouru tywykenry, itymo mâtuanuhomo, tâzenu ewânu ewindy awârâ modo kâunduly âyanmo-ro waunlo ara ise. **19** Idânârâ kâinwyneguyly modo turuse, tagâikeze warâ urâ, inakanhe adâidlyly imohomoem. Tâjityenzelâ itaungâ inakanhe amidlylymogue. Imowâdaungâ lelâlâ inakanhe amidlylymo; imoze myguelymo kulâ mâkeba nidâ.

**20** “Egâ wâneam mâkâ adakobâni saindyly pyantaji. Âtâ odo ingâsedly. Pyantaylâ nhenahunguely inwânwândyly. Mâkâ adakobâni tygâsedly tindatuo, âtâ odo pyanta nhenahunguely, egawântoem. Aituo ise on-hoam lelâ âwinduadylymo, tagonro agâ ohomaendylymo warâ. Mâkâ adakobâni emyenro urâ. ‘Igawânkâ. Xina agâ ikâ’

myguelymo kāinwānwkyl. Ygāsedylymo-ro watay, agāmolâ ise urâ. On-hoam lelâ ohomaenze kurâ.

<sup>21</sup> “Âmaemo xypyry etaji kehoem yeinwândyly imodânry modo, idânârâ kurâdo iwymâryem wituo, yagâ pymâem ise âmaemo. Âdaunloenlâ Satanás kâinwâmpyra watobyry ara lâpylâ mâinwâmpyra mawylymo. Iwerâ Pabai Deus agâ pymâem wawyly. Aituo ise âmaemo yeinwânni modo yagâ pymâem midylymo lâpylâ.

<sup>22</sup> “Awlygue auguely mâuntudyze mataymo, idataungâ Deus Ispiritury aguely idânârâ yeinwânni modoram” – kely keankâ Jesus Laodiceiadâ tynynonro modoram.

## 4

### *João tâjigâky indatobyry*

<sup>1</sup> Jesus tynynonro modoram xirâ modo auguehoem aguepygueduo keankâ, pyanta ara kau wâgâ âzenahunguely kâendyly. Âzenahunguehobyry oze Deus eydâ ato sedâ, tâjitanru xidadâ warâ. Trombeta ara keankâ itanru ipyru. Saguhoem yam agueypylâ keankâ yam agueoni.

– Xarâ âkugâ, wayam waunroem âdydo imeom aitaynrim modo âyam kâenehohoem – kely.

<sup>2</sup> Aguepygueduolâ kehoem keankâ ienu âtygadyly; Deus Ispiritury âewyly, wayam waunroem aini modo kâentoem aienehonze. Deus sedâ mure imâsedo, iwâkuru warâ wâgâ ekadybyem awyly, pymâem atodâ. <sup>3</sup> Tohozele kehoem keankâ, tuhu iwâkuru kehoem jaspe ara, sârdio ara warâ. Mârâ mure Pymâ Deus xurery tânâmize nanagope keankâ. Tuhu esmeralda ehozelu ara keankâ ehozelu. <sup>4</sup> Mâkâ Pymâ xurery tânâmize vinte e quatro lelâ mure sedâ. Vinte e quatro agaityom tynrenseim modo mârâ modo wâgâ ekadybyem sedâ warâ. Tapekeim keankâ etymo iwogonromo. Koroa ourugue xygatyby keankâ nhangahumo wogonro, pymâem awylymo xutuho. <sup>5</sup> Ielu âzehoruguely sedâ Pymâ Deus xurery wâgâ. Ielu âjipyruguely ton-honre kehoem xidadâ lâpylâ mârâ muredâ. Tâzekado emyto tâlâ keankâ sete esagon-ho tyatgueim modo. Sete lelâ ispíritu Deus emary modo mârâ nhenehonly. <sup>6</sup> Pymâ Deus xurery xuaynâ tâlâ keankâ paru emyenro, tysenzeim kehoem vidru ara, tuanreim olâ keankâ, cristal emyenro.

Pymâ xurery tânâmize taynâ, tâynâ warâ quattro ânguydo imeompe keankâ. Toenzepa keankâ mâkâ modo enu, waunroem, âgânâ alelâ. <sup>7</sup> Leão emyenro keankâ waunro kuru. Azagâ ieto keankâ xibu emyenro. Azagâ tokalâ ieto keankâ kurâ emydgyueom. Quattro ieto keankâ ârigâ sawâguni emyenro. <sup>8</sup> Akaemo quattro ânguydo imeom seis, seis, seis, seis warâ sawâry. Sawârymo wâgâ kehoem keankâ akaemo enu, MON warâ kehoem. Deus wâgâ tygâky nimopamo keankâ:

– Âdalâ inakanhe aityby mâkeba âmâ, Pymâ Deus.

Inakai aieni mâkeba âmâ, koendonro lelâ aieni.  
Idânârâ takaze on-honru.

Igueim mâkeba âmâ; tâlâ mykâinane âmâ saguhoem.

Iwerâ tâlâ âmâ. Aunlolâ ise tâlâ mawyly warâ

– kely keankâ igâkymo.

<sup>9</sup> Warâ keankâ Deus pymâem awyly wâgâ igâkymo lâpylâ:

– Ton-honreim, iwâkuru warâ âmâ! Tynrenseim âmâ! Tuomare xina, koendonro xinaem aieni mawylygue! Igueim mâkeba âmâ – kelymo Deusram.

<sup>10</sup> Akaemo quattro ânguydo imeom Deus xurâem igâky ume keankâ akaemo vinte e quattro agaityom tynrenseim modo âzeguhoam itybyenmo Deus enado. Tykoroary nhetylymo. Nhekanâdylymo Pymâ Deus xurery enado. Pymâlâ wâne akaemo, Deus olâ pymâem kuru nhutulymo, takadâmo kehoem. <sup>11</sup> Warâ keankâ igâkymo:

– Xina iwymâry kuru âmâ.

Âmâ kulelâ Deus xina nheinwânyly.

Tohoguezeim, tynrenseim warâ âmâ.

Awylygue koendâ mawyly wâgâ, tynrenseim mawyly wâgâ, ton-honreim mawyly wâgâ warâ xina aguely.

Âmâlâ idânârâ tâlânro modo xuguni.

Awylygue idânârâ tâlâ awyly, ize mawylyguelâ – kelymo keankâ Deusram.

## 5

### *Pape ituwymby Jesus nhemakehobyry*

<sup>1</sup> Aituo keankâ Deus emaym aho eynnâ pape ituwymby kâendyly. Ioday, ikaynâ alelâ keankâ mâtâ pape iwenibyem awyly. Sete lelâ keankâ sakâjiho. <sup>2</sup> Târâ anju domodo ewy sedâ lâpylâ. Ago kehoem keankâ mâkâ aguely:

— Ânguyka ise awârâ sakâjihobyry etyim, nhawynkeim warâ? — kely.

<sup>3</sup> Deus nhygataymby modo ewy mâtâ sakâjihobyry etyim peba olâ keankâ, pape tintain-hoem, anju târâ kaynâ, kurâ tarâ onwâgâ, onro iano modo alelâ. <sup>4</sup> Awylygue keankâ toenzepa ytynru, wogunru warâ, ânguy aguehoymby peba awylygue, pape intuwynquehoem, intain-hoem warâ. <sup>5</sup> Aituo keankâ akaemo agaityom tynrenseim modo ewy Yam aguely:

— Tuogunrepa ikâ. Egâ mâkâ, Judá domodo ewy, pymâ Davi iweryppyry leão ara ton-honreim mâkâ. Deus iduery eon-honru idânârâ sainwâm mâkâ. Mâkâ lelâ ise pape sakâjihobyry etyim, ituwyngueim, itainrim warâ — kely keankâ.

<sup>6</sup> “Kordeiru” kelygue tâzekeim XYDYK warâ sedâ. Sodo wâgâ xyâhobyry xypyhobyrybe keankâ; igueypyemba olâ keankâ mâkâ iwerâ. Sete lelâ keankâ iwâenky, enu warâ. Mâtâ sete tâzenu, Deus sete ispíritu onro anakâ ingonotyby modo mâtâ nhenehonly. Deus xurery enado mâkâ âepanâguely. Vinte e quatro agaityom tynrenseim modo, quattro ânguydo imeom warâ mâkâ enâminibyem keankâ. <sup>7</sup> Aituo keankâ mâkâ Kordeiru, Pymâ Deus xurery opaji saindyly. Mure wâgâ ekadyby tâmary ahogue pape ituwymby mâkâna nhuduly, Kordeiru kelygue tâzekein-am.

<sup>8</sup> Akaemo quattro ânguydo imeom, akaemo vinte e quattro agaityom tynrenseim modo warâ keankâ Kordeiru enado âzeguhoam idylymo. Vinte e quattro agaityom modo harpague tâmatunemo lelâ keankâ. Kudupi ourugue xygatyby edunu tyânrângueingue tumykeimbemo keankâ warâ. Kurâdo Deus agâ agueylâ mâtâ edunu tyânrângueim nhenehonly. <sup>9</sup> Akaemo âzeguhoam ityby modo igâky keankâ mâkâ Kordeiruram. Tâjigâky iwelogue igâtudylymo:

— Âmâ lelâ pape sakâjihobyry sakâjigueim, ituwymby ituwyngueim warâ kehobyry.

Âmâlâma kruz wâgâ igueypy, âunu iapâni byry warâ.

Idânârâ kehoem kurâdo onro anano modo Deus eynynonroem mânhetoem myakâwâm âiguely.

<sup>10</sup> Âynynonroem akaemo. Âmâ iwymârymo warâ.

Âmâ ani imaryem ienimo, eynnâ kydato Deus aitobyry nhegatu homoem.

Agâ ise târâ onro anaym pymâem awylymo

— kely igâkymo.

<sup>11</sup> MYK witondly keankâ. Anju domodo kâendyly. Toenzepamo keankâ tapâguely ekimo kehoem. Tâpagunemo keankâ Deus xurery imâsedo, quattro ânguydo imeom, vinte e quattro agaityom tynrenseim modo warâ tânâmizemo kehoem. Igâkymo xidadâ. <sup>12</sup> Ago kehoem keankâ aguelymo:

— Kordeiru âmâ.

Saguhoem kordeiru tâdyoze kâinane, inakanhe tadalafil xygakehoem;

arâ lâpylâ akâwâm âiguely, inakanhe tâjito xygakeze.

Pymâ ton-honreim âmâ.

Idânârâ tâlânro modo sodo âmâ.

Idânârâ tutuze âmâ. Âdylâ aiese ton-honre âmâ

Tynrenseim âmâ. Koendonro lelâlâ âmâ

Aunlolâ koendâ mawyly wâgâ xina aguely.

Alâ idânârâ âwâgâ anyguemo

– kelymo keankâ.

<sup>13</sup> Ilâpygueduo kaynonro modo, onro anano modo, ondano modo, paikano modo warâ igâkymo kâindadyly. Warâ keankâ aguelymo tygâkymoem:

– Koendâ mawyly wâgâ xina aguely.

Pymâ Deus wâgâ, Kordeiru wâgâ warâ xina aguely.

Tynrenseim, koendonro warâ âmaemo!

Iwâkuru, ton-honreim warâ âmaemo.

Âdylâ aiese ton-honre âmaemo.

Aunloenlâ ise arâ mawylymo. Arâpa mitaymba ise âmaemo

– kely keankâ igâkymo.

<sup>14</sup> Alâ pylâ keankâ akaemo quatro ânguydo imeom aguely:

– Âwâgâmo aguehomobyry ara lelâlâ âmaemo! – kelymo keankâ.

Akaemo vinte e quatro agaityom tynrenseim modo âzeguhuam idylymo keankâ.

– Koendonro lelâlâ âmaemo! – kelymo keankâ Deusram, Kordeiruram warâ.

## 6

### *Pape ituwymbysakâjihobyrmodesakâjiguewâdobypy*

<sup>1</sup> Aituo keankâ Kordeiru mâtâ pape ituwymbysakâjihobyry nhakâjiguely kâendaly. Nhakâjiguely ume keankâ mâkâ quattro ânguydo imeom ewy aguely kâindadyly; ielu âjipyruguely ara keankâ itanru.

– Âekâ, onro anaxi idâ-ro warâ! – kely.

<sup>2</sup> Agueduo MYK widyly. Kawaru tapekeim kâendaly. Tâka, pyrâu warâ keankâ mâkâ kawaru wogonro emano. Koroa eyam nâdu duo, âseguebyrin-em kehoymby awyly xutuhoem. Tuduery modo eon-honru nhainly sedâ.

<sup>3</sup> Aituo keankâ Kordeiru mâtâ pape ituwymbysakâjihobyry azagâ ieto nhakâjiguely. Nhakâjiguely ume keankâ ânguydo imeom azagâ ieto aguely kâindadyly:

– Âekâ, onro anaxi idâ-ro warâ! – kely.

<sup>4</sup> Agueduo keankâ eagonro kawaru egasely, tapabileim. Mâtâ kawaru wogonro am espada keankâ tuduzeim, âseguebyhoem. Kurâdo âseguebyhoem, âjigue âdyâwâtoem warâ “Ajeta” kehoymbyem keankâ mâkâ egasely.

<sup>5</sup> Aituo keankâ Kordeiru mâtâ pape ituwymbysakâjihobyry azagâ tokalâ ieto nhakâjiguely. Nhakâjiguely ume keankâ ânguydo imeom azagâ tokalâ ieto aguely kâindadyly.

– Âekâ, onro anaxi idâ-ro warâ! – kely.

Agueduo MYK widyly; kawaru tâmyguyneim kâendaly. Balança keankâ mâkâ kawaru wogonro emano. <sup>6</sup> Aituo keankâ tâjitanru kâindadyly. Akaemo quattro ânguydo imeom duay keankâ aguely:

– Pyni peba ise. Tuguanse ise uguondo âsewanily, trigu ifarinharystâpajigâze kulâ atay, tokalâ kilo, tâpajigâze cevada atay warâ tianâtoem. Se oliva ipery olâ kadatâwâdaundâ; uva edy kâzemodywâdaundâ warâ – kely keankâ.

<sup>7</sup> Aituo keankâ Kordeiru mâtâ pape ituwymbysakâjihobyry quattro ieto nhakâjiguely. Nhakâjiguely ume keankâ ânguydo imeom quattro ieto aguely kâindadyly.

– Âekâ, onro anaxi idâ-ro warâ! – kely.

<sup>8</sup> Agueduo MYK widyly; kawaru tapadureim kâendyly. “Tâjigueho” kelygue tâzekeim keankâ mâkâ kawaru wogonro. “Âji tâdâsenagazedo” kelygue tâzekeimbe keankâ eagâ. “Onro anano modo ewy quarta parte ise mâyânymo. Tâseguebyday, tâwindygue, tâwânuque warâ iguehomoeam ise amânhedylymo. Eagonro modo âdâhozemo ânguydo imeom idu odano modoram” warâ kehoymbyem keankâ akaemo egasely.

<sup>9</sup> Aituo keankâ Kordeiru pape sakâjihobyry cinco ieto nhakâjiguely. Nhakâjiguely ume keankâ kurâ domodo egadopyry kâendyly, Deus itaumbryy nhegatulymogue, Jesus wâgâ aguely nimopa awylymogue warâ xyâwâtyby. Ânguydo imeom xyâypy Deusram egameho iopay keankâ akaemo. <sup>10</sup> Ago kehoem keankâ Deusram aguelymo:

— Amânhedyse mato aiese ton-honre âmâ, Pymâ. Âdy inakai aieni mâkeba âmâ. Aiese myguehobyry, adyese lelâlâ âmâ. Inepa xina xyâimpypy modo enagazegâ. Inepa xina eweânkâ — kelymo.

<sup>11</sup> Eyanmo âtâ tapekeim nâduduo, aituo keankâ Deus eyanmo aguely:

— Tadahulizeba itaungâ. Toenzepa ise iwerâ ywâgâ aguewâni modo âdyoly uduery modoram. Âpemugumo lâpylâ akaemo, Jesus Cristo eynynâ. Âdiempa iwânwântaungâ wao, idânârâ âdyowâdylymo ara — kelymo.

<sup>12</sup> Ilâpygueduo keankâ Kordeiru pape sakâjihobyry seis ieto nhakâjiguely kâendyly. Nhakâjiguely ume keankâ ton-honre kehoem onro âzekânily. Xixi tohoreba idyly, emyguymadyly warâ, âtâ tâjiwogonro tâmyguyneim tâjitynru enehon-ho ara kehoem. Nunâ tâjiunu ara sapabiladyly. <sup>13</sup> Kau âzekânily lâpylâ. Ximukâ onro onwa ihuguewâdyly, figu sahuadânrâ tâwy wâgâpa ihuguewâdyly wâne sapezenru tâkâniduo myara. <sup>14</sup> Kau adawynly, pape ituwymba ara idyly. Idânârâ ivy modo, ilha modo warâ eagonro âjiam âtuguguewâdyly.

<sup>15</sup> Idânârâ kurâdo âwientaynly; otoendylymo ivy odano tâtagueim odaxi, tuhu imâsedo modo duaxi warâ. Idânârâ kehoem keankâ pymâ domodo otoendaynlymo. Idânârâ kehoem keankâ sodadu domodo iwymâry, kurâ domodo iwymâry warâ otoendaynly. Idânârâ kehoem âdypeom modo, ton-honreim modo kehoem warâ otoendaynlymo keankâ. Idânârâ wâne otoenze kewâdylymo, kurâdo âdy modo, kurâdo âdy keba modo lâpylâ warâ. <sup>16</sup> Aguelymo keankâ ivy modoram, tuhu imâsedo modoram warâ:

— Xina onwa âihuguegâ, xina moentomoem, mâkâ Pymâ Deus xina nepyra itoem, mâkâ Kordeiru xina agâ tyewiâseba itoem warâ — kelymo.

<sup>17</sup> — Iweâma naintai tyewiâky nhenehon-homo. Ânguy iewiâkymo nemaenwâbyra ise, tuduery nhenagazeduomo — kelymo.

## 7

### *Deus eynynonro modo inwendydâ PE ietobyry*

<sup>1</sup> Ilâpygueduo keankâ quatro anju modo kâendyly. XYDYK warâmo keankâ xixi egaseho eynynâ, xixi egawânto eynynâ, sul eynynâ, norte eynynâ warâ. Sapezenru nhawâdylymo keankâ, onro anaym, parutabâ ikay, poji anaym, idu oday warâ nadapezeimba itoem. <sup>2-3</sup> Aituo keankâ Deus eyanmo aguely:

— Onro, parutabâ warâ inakanhe mânhetomoem auguely — kely.

Aituo eagonro anju kâendyly kaynâ, xixi egaseho eynynâ. Deus Iguedânrâ eynynonroem kurâdo awyly xutuhomoeam xina PE niedâmo wao. Xina anhepygueduomo ise onro, parutabâ, idu modo warâ inakanhe mânhenehonlymo sapezenruam — kely.

— Ine wao. Sapezenru kâjimowâdaundâ wao. Saguhom kuru Deus eynynonroem awylymo xutuhomoeam xina PE niedâmo wao. Xina anhepygueduomo ise onro, parutabâ, idu modo warâ inakanhe mânhenehonlymo sapezenruam — kely.

<sup>4</sup> Yam anyguemo âdara lelâ kurâdo Deus imarkarybeombe awyly. Toenzepa keankâ marka ietyby modo, cento e quarenta e quatro mil lelâ keankâ idânârâ; israelita domodo keankâ akaemo.

<sup>5-8</sup> Warâ keankâ PE ietaymby modo:

12.000 lelâ Judá iweompyry,  
12.000 lelâ Rúben iweompyry,  
12.000 lelâ Gade iweompyry,  
12.000 lelâ Aser iweompyry,  
12.000 lelâ Naftali iweompyry,  
12.000 lelâ Manassés iweompyry,  
12.000 lelâ Simeão iweompyry,  
12.000 lelâ Levi iweompyry,  
12.000 lelâ Issacar iweompyry,  
12.000 lelâ Zebulom iweompyry,  
12.000 lelâ José iweompyry,  
12.000 lelâ Benjamim iweompyry warâ.

### *João kurâdo tapekeingue etyunu nhetobyry*

<sup>9</sup> Ilâpyryem MYK widyly. Toenzepa kehoem kurâdo kâendyly. Toenzepamo keankâ tapâguely ekimo kehoem, tâinkonro modo lelâba keankâ. XYDYK warâmo Pymâ Deus enado, Kordeiru enado warâ. Tapekeingue keankâ etyunumo. Wakuri sarygue tâmasemo keankâ, tuomare tawyly tienehon-homoem. <sup>10</sup> Toenzepa kehoem adaenkelymo:

— Deus mure imâsedo wâgâ pymâem tawylygue ekadyby koendonroem awyly wâgâ aguykely. Kordeiru koendonroem awyly wâgâ aguykely. Kâmakerim asaemo! — kelymo keankâ.

<sup>11</sup> Idânârâ anju domodo XYDYK warâmo keankâ târâ Pymâ Deus xurery tânâmize. Vinte e quattro lelâ agaityom tynrenseim modo lelâlâ, quattro ânguydo imeom warâ tânâmizemo. Pymâ Deus enadoram idâlymo, enagozelymo idylymo keankâ akaemo anju domodo. Deus koendonroem awyly wâgâ agueze:

<sup>12</sup> — Âkeá lelâlâ xina âwâgâ aguely, xina iDeusry. Aunlolâ koendâ mawyly wâgâ xina aguezesedyly. Koendonro lelâlâ âmâ. Idânârâ tutuze âmâ. Tuomare xina, koendâ lelâ xina agâ mawylygue. Toenzepa tynrenseim âmâ. Âdy ize mato adyese lelâlâ âmâ, tonhonreim âmâ warâ. Aunlolâ myakâwândy âmâ, arâlâ ise âmâ-ro warâ — kelymo keankâ.

<sup>13</sup> Agaityom tynrenseim modo ewy yapâigue:

— Tutuze âmâ akaemo tapekeingue tâtyuneim modo ânguy awyly? Âdykâba âewylymo warâ? — kely.

<sup>14</sup> Aituo keankâ kâin-hoguly:

— Kâuntuwâbyra urâ. Âmâlâ xutuim — uguely.

Aituo keankâ Yam aguely:

— Inakanhe kehoem tâsenagazedyly emaenrimbyry akaemo, Jesus einwândyly nimopamo awylygue. Kordeirulâ keankâ akaemo nheinwânyly, Jesuslâ. Turâem tunu tyapâze igueypy tainwâNSE awylymogue, Deus inakanhe itomobyry nhygakely, âtâ tywykeim igokeho ara. Iweâma tywykeba tapekeingue etyumo, inakanhe itomobyry xygakeybyem awylygue. <sup>15</sup> Jesus einwânnipyryem awylymogue tywykebamo. Aituo Pymâ Deus enado epagunumo. Târâ eydâ atodâ aunlolâ ise emaryem awylymo, peto oday, kopae alelâ. Mâkâ mure imâsedo wâgâ ekadybyram nâjimowâbyramo ise. <sup>16</sup> Typynigueba nipyramo, tokuumba nipyramo warâ ise asaemo. Xixi âdâpigugue nâsenagazedaymbamo ise. <sup>17</sup> Eagâmolâ mawânkâ ise Pymâ Deus xurery eapano Kordeiru; kaneru eni wâne tâguy modo nhedyly myara ise âzecholymo. Kaneru eni wâne tatuandylygue tâguy niguepa

itoem parube atoam tase, myara ise niguepa itomo nhuduly. Tytyremba, tâwanepa warâ iesemo Deus. Mâkâlâ enugurumo idânârâ xyguyrim waunlo ara lelâ ise.

## 8

### *Jesus pape sakâjihobyry sete ieto nhakâjiguehobyry*

<sup>1</sup> Aituo keankâ Kordeiru pape sakâjihobyry sete ieto nhakâjiguely. Mârâ nhakâjiguebygueduo, Deus eydâ atodâ ânguy âdakepa, âdy tygâseba warâ niidâ wao âdiempa, meia hora awârâem. <sup>2</sup> Ilâpygueduo keankâ sete anju domodo kâendyly Deus enado. Akaemoam keankâ mâtâ tâjitarygue tydyzeim trombeta âduduoly.

<sup>3</sup> Ilâpygueduo keankâ eagonro anju kâendyly. XYDYK warâ mâtâ edunu tyânrângueim Deus indatoem iaduânto mesa opay. Mâtâ edunu etary ourugue xygatybybe keankâ emaym. Toenzepa keankâ edunu tyânrângueim eyam âduduoly, Pymâ Deus xurery enado iaduântoem, Deus eynynonro modo eagâ agueday. <sup>4</sup> Anju emaym awyly ume keankâ edunu tyânrângueim iaduântyby eunu âkuly Deus eydâ atoam, Deus eynynonro modo eagâ agueday. <sup>5</sup> Aituo keankâ anju mesa wâgâpa peto ehoru nhanâdly, mâtâ edunu tyânrângueim iaduânto tiunmykanâdoem. Ilâpyryem nhameley onro anaxi. Awârâ anhetuo keankâ kopâ âjipyruguely. PEKYK PEKYK idyly. Onro âzekânily warâ.

### *Anju domodo trombeta indyhobyry*

<sup>6</sup> Inepa lâpylâ akaemo sete anju domodo trombeta tindyho ara itaynlymo.

<sup>7</sup> Aituo anju saguho tytrombetary indyly. Indyday, pewendâ ihuguely, peto tâjiunu emyenro tapabileingue tuduase ihuguely onro anaxi. Toenzepa se modo, poji, idu warâ tyaduântse lelâlâ keankâ, terça parte keankâ tainzeim.

<sup>8</sup> Ine warâ lâpylâ anju nhatano tytrombetary indyly. Indyday, iwy imâsedo tyatygueim emyenro parutabâ ikaji adameoly. Ihugueduo, mâtâ paru ewy terça parte keankâ tâjiunuem ini. <sup>9</sup> Toenzepa ânguydo imeom parutabâ ikano modo niguewâdâ, terça parte keankâ iguerim. Toenzepa pepi imâsedo modo parutabâ ekuâdo adainholy agâ, mâtâ modo ewy terça parte keankâ adainhoim.

<sup>10-11</sup> Aituo tonlo kaynonro anju azagâ tokalâ ieto tytrombetary indyly. Indyday, ximukâ imeâgâkeba kau odaypa ihuguely. Ximukâ ihugueyby ezedy keankâ “Absinto”. Peto ehoru ara keankâ iatygu. Toenzepa paru ikaji, saimu ikaji, paru iazeho modo ikaji warâ keankâ ihuguely; mâtâ modo ewy terça parte keankâ ihuguely. Ihuguehobyrydâ, paru inakanhe nhedyly. Mâtâ paru ago lelâlâ idurandyly. Toenzepa kurâ domodo nigue, mâtâ paru tudureim tienyduomo.

<sup>12</sup> Aituo keankâ anju quatro ieto tytrombetary indyly. Indyday, xixi, nunâ, ximukâ modo warâ inakanhe itaynly. Tohoreba itaynly; koendâ tâwanepa idylymo. Oito hora kulâ keankâ xixi ehoru peto oday; nunâ, ximukâ warâ ehoru oito hora kulâ kopae; arâ lâpylâ keankâ peto oday, kopae warâ oito hora tyajinepa awyly.

<sup>13</sup> Anju quattro ieto tytrombetary indypygueduo ârigâ kâendyly kaynâ sawâgu. Tonhonre kehoem keankâ aguely kâindadyly:

— Kaikâ! Kaikâ! Kaikâ âmaemo-kâ! Inakanhe kehoem ise Deus eynynâbaom modo âsenagazedyly! Akaemo três anju domodo tytrombetary indyduo, inakanhe kehoem ise Deus eynynâbaom modo âsenagazedyly — kely.

## 9

<sup>1</sup> Ârigâ kâempygueduo, aguely kâindapygueduo warâ keankâ anju domodo cinco ieto tytrombetary indyly. Indyday ximukâ emyenro sedâ, Deus eydâ atodâba xarâ onro anaxi xytâguyby. Xave xuduypygue ematu sedâ, tâtagueim tâsanigueim kehoem odaxi tâdâwânto enahungueho, kadopâ modo ejidy iwyantary enahungueho. <sup>2</sup> Mâtâ tâtagueim tâsanigueim kehoem odaxi tâdâwânto nenahungue mâkâ. Nnenahungueduo, toenzepa

keankâ eunu egasely, se âduguely umeno ara kehoem. Toenzepa keankâ eunu, xixi etoem nudupa. <sup>3</sup> Mârâ eunu duaypa keankâ kahuli modo egasely. Tawâgune keankâ xytâguylomo onro anaxi. Ielawada aito ara aitomoem keankâ mâkâ modo aguehoym-byem awyly. <sup>4</sup> Aituo keankâ Deus eyanmo aguely:

— Poji anaym, idu oday warâ ago ini modo, âpa ezay etâdaymby modo warâne inakanhe kâietaudâ — kely.

— Yeinwântânry modo inwendy wâgâ PE tyetuneba. Akaemo lelâ ise mäenagazeguylomo. <sup>5</sup> Kâdyâwâtaundâmo olâ. Âpymo ewânugue cinco nunâ ara lelâ âsenagazedomoem olâ auguely — kely.

Ielawada kyâhobyrry ewânu ara kehoem ise tyâhobyrry nhewânedlymo. <sup>6</sup> Mârâ cinco nunâ wâgâ toenzepa ise kurâ domodo âsenagazedyly. Tyâhobyrry ewânu epagudyze isemo, tâwânepe nipyra olâ ise. Tyiguedyse isemo, niguepamo olâ ise.

<sup>7</sup> Kawaru sodadu domodo tuduery agâ âseguebyze sani modo ara keankâ mâkâ kahuli modo nhontaymbyem awyly. Koroa ourugue xygatyby emyenrobe keankâ nhangahumo wâgâ. Kurâ emydygue keankâ emydymo. <sup>8</sup> Tuseguemo keankâ pekodo ara. Imâsedo modoem keankâ ierymo, tuosebimune warâ, udodo iery ara. <sup>9</sup> Ferro tyxienry emyenrobe keankâ iohumo, xuahuruem. Toenzepa keankâ sawâgutay sawâry igâky. Kawaru karosa epâguewâni modo tâgase idâday wâne ihurumo tygâse, myara kehoem keankâ akaemo sawâry igâky. <sup>10</sup> Tonwyn-em keankâ, ielawada ipy emyenrobe warâ. Cinco nunâ ara lelâ kurâdo nhenagazedomo keankâ mârâ eonwynmo. <sup>11</sup> Xutuinmogue tywymâguemo keankâ. Mârâ tâtagueim tâsanigueim kehoem kadopâ modo ejidy xutuinlâ keankâ iwymârymo. “Sainrim” kelygue keankâ ezeku, “Abadom” judeu domodo itanwe, “Apolião” gregu domodo itanwe warâ. Satanâslâ olâ mâkâ agueho.

<sup>12</sup> Anju cinco ieto tytrombetary indypygueduo inakanhe kehoem keankâ tâdâsenagazedyly. Tâlalâ olâ azagâ inakanhe kehoem tâdâsenagazo.

<sup>13</sup> Aituo keankâ anju domodo seis ieto tytrombetary indyly. Indyday keankâ tâjitanru kâindadyly. Mârâ mesa ourugueto iotay keankâ itanru âewyly. Edunu tyânrângueim Deus enado iaduânto mârâ mesa. <sup>14</sup> Mâkâ aguenri wakely keankâ trombeta idyimpyryam:

— Awâkâ quatro anju domodo paru imâsedo Eufrates iwaguepa ekâjiby modo ekâjiguewâgâ — kely.

<sup>15</sup> Aituo keankâ akaemo anju domodo âzekâjigueoly, toenzepa kurâ domodo, onro anaym tâlâom modo terça parte xyâze idâhomoem. Deus aitomoem aguehobyrry oday lelâ keankâ nhâlymo adaguly, (hora oday, iguandyly wâgâ, nunâ wâgâ, anu wâgâ warâ).

<sup>16</sup> Kawaru wogonro âseguebywâni modo nâepanâgue. Toenzepa keankâ sodadu domodo, toenzepa lelâlâ.

— Duzentos milhôes sodadu kawaru wogonro — kely keankâ kâindakyly.

<sup>17</sup> Deus nhenehonly ume, kawarudo kâendyly, iwogonro modo warâ. Metal tapiegureim keankâ kawaru wogonro modo iohohu xuahuru. Tâlâ keankâ ferro peto ara tapabileingue iohohu tuahugueim. Eagonro modo keankâ tukueingue iohohu tuahugueim, tuhu tâwâenseim safira emyenro. Eagonro modo iohohu xuahuru keankâ tapadureim, enxofre emyenro. Kawarudo nhangahu keankâ leão nhangahu ara. Itaybamo peto egasely, peto eunu, enxofre warâ. <sup>18</sup> Kawarudo itayba egaseybygue keankâ toenzepa kurâ domodo iguely lelâlâ, peto tyaduântuo, tâepaiguedyly, peto eunugue, enxofre itângugue warâ. Kurâ domodo ewy terça parte keankâ arâ igueim. <sup>19</sup> Warâ keankâ kawarudo tytayba egaseybygue, tonwyngue warâ kurâ domodo nhâly. Eonwynmo xypyrydâ, âgâu nhangahu ara awylygue, toenzepa kurâdo tâdâhoze mârâ tozonwym modoram.

<sup>20</sup> Iguewântânrymodo, typemugudo, tataen-hodo warâ âsenagazedyly, iguely warâ nedâmo. Arâlâ inakai aiedyly nimopamo olâ keankâ. “Deus” tâkewâdo akaemolâ

tyngatyby enado âzeguhoam tâidly nimopamo keankâ. Kadopâ modo iomaendyly nimopamo keankâ. Tydeusry ourugueto, pratagueto, bronzegueto, tuhugueto, segueto warâ aiesezemolâ keankâ. Aienibyryem, enado âidylymo. Kâempyra, kydapyra, nadakobâbyra waunlo kulâ akaemo tydeusry nhygatyby. Âdara nidapyra. Âdara nadakobâbyra warâ. Arâlâ olâ tâdâidly, tâjigâtudyly warâ nimopa awylymo mâkâ modo enado. <sup>21</sup> Nâjityendaymba keankâ merâ kurâdo, Deus neinwâmpyra tatobyry wâgâ. Inakanhe adâidly timodyzebamo keankâ. Kurâdo tyânly nimopamo keankâ. Âmeodoem, kuenwenriem warâ tawyly nimopamo keankâ. Ohogüindânry modo, ohogünwâdyby modo warâ âdaunlo modolâ tiynanâdyly nimopamo. Tâmagaguy nimopamo. Warâ Deus izepa ato anhesezedylymo.

## 10

### *João anju pape ituwyngueybe tâmase nhetobyry*

<sup>1</sup> Aituo keankâ anju eagonro ton-honreim xytâguyly kâendyly Deus eydâ atodâba. Eunugue etydâdybyem keankâ mâkâ. Nhangahu tânâmize keankâ mâtâ nanago. Xixi ara keankâ emydy ehozelu. Peto XYDYK warâ tyatygueim ara keankâ ixinary. <sup>2</sup> Pape imeimbyry ituwyngueybybe keankâ emaym. Sapilugueybyenlâ keankâ pape emaym awyly. XYDYK warâ keankâ, ipery aho eynynonro parutabâ ikay, ipery pâem eynynonro keankâ onro wâgâ warâ. <sup>3</sup> Leão ara ton-honre kehoem keankâ adaenkely. Adaenkebygueduo keankâ kopâ ara ton-honre kehoem âjipyruguely kâindadyly. Sete lelâ keankâ âjipyruguely. <sup>4</sup> Kâindatuo keankâ pape kanâdyly, iweniho warâ. Mâtâ kopâ ipyru aguehobypy kainweniduze wakynre. Târâ Deus eydâ atodâba olâ wakely xidadâ:

— Mâindatyby kâjiweni. Angahu oday lelâ nidâ — kely keankâ.

<sup>5</sup> Ilâpygueduo keankâ anju parutabâ wâgâ, onro wâgâ warâ XYDYK warâ kâentyby, tâmary aho eynynonro nhaunâdyly kâendyly. <sup>6</sup> Warâ aguely:

— Deus iguedânrylâ keankâ xirâ agueze ugononi, kau, onro, parutabâ, idânârâ tâlâom modo tytanrugue kulâ xugunipyry. Adâkehobypy aiese iweâpa nitaymba ise Deus. <sup>7</sup> Anju sete ieto tytrombetary indyduo ise awârâ anhedyly. Tâmary tywâgâ aguewâni modoram adâkehobypy ara ise anhedyly. Âdutuoly ise iweâma — kely.

<sup>8</sup> Aituo keankâ mâkâ Deus eydâ atodâ kâindatyby Yam agueondyly:

— Egâ mâkâ anju, parutabâ ikay, onro wâgâ warâ tâpagueim. Eyam idâ. Mâtâ pape ituwyngueyby ekagâ. Xuduze lelâ âyam — kely.

<sup>9</sup> Agueduo keankâ mâkâ anjuam udâly. Saintybyem eyam auguely:

— Enekâ wao awârâ pape imeimbyry imano — uguely.

Aituo keankâ aguely:

— Anra. Sawâkâ. Sagugâ. Mâinlawiguedyly ume xirâ pape imeimbyry saekuzeze penrâ ara. Âuwe odaxi idâduo olâ iduranse — kely.

<sup>10</sup> Aituo keankâ mâtâ pape imeimbyry emaymba kâenmakely, kanguhoem. Âkealâ mykeankâ aguely. Kâinlawiguedyly ume tâkubâgue, taekure warâ keankâ penrâ ara. Konwompygueduo olâ uwe oday nidurandâ. <sup>11</sup> Aituo keankâ auguehonly:

— Âtâ anakonro modoram, âkeloem tytanruneim modoram warâ ise âdy Deus anhekyly awyly wâgâ amygueondyly, idânârâ pymâ domodo âdara Deusram aieholymo awyly wâgâ warâ — uguehonly.

## 11

### *Azagâ uguondo modo Deus wâgâ aguenri*

<sup>1</sup> Ilâpygueduo keankâ régua âduduoly Yam, âdydo imeom ekudo. Aituo keankâ Deus Yam aguely:

— Iety, mārâ mesa iety odano Yam xuduypy ekanâdo warâ ekuda. Ietydâ âdara kurâdo lelâ yagâ agueim modo awyly sapâguegâ lâpylâ warâ. <sup>2</sup> Judeu keba modo idasery keho olâ kâzekudâ. Ynynâbaom modo mārâ xidadâ odano modo tâmaxi iesemo. Enagazezemo. Arâ ise azagâ tokalâ, tuotagueze warâ anu ara aidylymo. <sup>3</sup> Azagâ uguondo igonose urâ. Ywâgâ aguewâni modo ise akaemo. Tyxiuneingue ise etyumo. Tâdâsenagazedo inepa saindyly awyly xutuho ise mārâ. Azagâ tokalâ, tuotagueze warâ anu ara lelâ ise ytaumbyry egatuze awylymo — kely.

<sup>4</sup> Akaemo azagâ uguondo modo Deus itaumbyry egatuim, Deus idânârâ kurâdo iwymâry enado XYDYK warâmo keankâ, ohondybymoem Deus xurâem tâsewanahoem. Azagâ se oliveira, azagâ candelabru warâ saguhoem iweâpalâ Zacarias inwenibylâ, akaemo azagâ uguondo modo Deus emary lâpylâ akaemo. <sup>5</sup> Deus itaumbyry egatuim modo enagazeze kelymo-ro watay, tytayba peto sameze akaemo Deus itaumbyry aguewâni modo, tduerymo tyain-homoem. Warâ ise tânagazeze keypy modo nhainlymo. <sup>6</sup> Eon-honrumo nâduduo adyesenry modo anhetomoem, Deus itaumbyry nhegatulymo ara kopâ nihugueba itoem adyenehonzemo azagâ tokalâ, tuotagueze warâ anu ara. Paru tâjiunuem tyesemo. Xirâ anano modo inakanhe kehoem nhenagazenehon-homoem aguehoymbyem ise akaemo. Idânârâ xirâ modo adyesemo lelâ ize tatobyry ara kehoem.

<sup>7</sup> Azagâ tokalâ, tuotagueze warâ anu pygueduo ise akaemo azagâ Deus itaumbyry egatuly nhewanikely. Ilâpygueduo ise mâtâ Ânguyo imoem adyry mâtâ tâtagueim tâsanigueim kehoem odaypa egasely, kadopâ modo ejidy odaypa. Akaemo azakâlâ unâ egatuim modo agâ âseguebyze. Mâtâ Ânguyo imoem adyry ise takazemo kehoem tonhonreim. Akaemo azagâ Deus emary modo xyâze mâtâ. <sup>8</sup> Eguepymobyrty tâpyâduneba ise. Akaemo azagâ eguepybyry xidadâ tynrenseim earuary oze ise sameybyem awyly, iwymârymo kruz wâgâ iguehobyrydâlâ. Xidadâ Jerusalém, “Sodoma” kelygue, “Egitô” kelygue warâ tâzekeim lâpylâ mâtâ. (Deus ingonotyby izepamô myakâwândy mâtâ azagâ xidadâ anano modo.)

<sup>9</sup> Idânârâ onro anano modo, âikâ tytanruneim modo warâ akaemo eguepybyry esezemo. Azagâ tokalâ, tuotagueze warâ iguandyly ara ise eguepymobyrty târâ awyly, idânârâ nhetomodâ, peto oday, kopae warâ. Nepyânehonwâbyramo ise.

<sup>10</sup> Toenzepa ise idânârâ Deus einwântâny modo iomarumo, mâtâ azagâ Deus itaumbyry egatuim modo iguehobyry wâgâ. Tataen-homoram âdylâ xuduzemo, iguehobyry wâgâ tuomarumo tienehon-homoem. Inakanhe aitaynrim modo tyewiâpazemo keankâ Deus itaumbyry egatuim modo agâ, tyam aguezesedobyry, tâusezedobyry wâgâ warâ. Awlyygue keankâ akaemo tumunruneim modo iomamunu, Deus itaumbyry egatuim modo igueypyem awyly tiuntuduomo.

<sup>11</sup> Azagâ tokalâ, tuotagueze warâ iguampygueduo, Deus ÂBU nhedyly enatarymodâ akaemo tâmary modo. Aituo kurâem itondylymo. Kurâem itondybyem saudylymo. Idânârâ mâtâ etaynrimbyry modo toenzepa lelâlâ keankâ âseanedlymo. <sup>12</sup> Mâtâ azagâ unâ egatuim modo Deus eydâ atodâ ago kehoem aguely nidadâmo:

— Âkuwâdaungâ xarâ! — kely.

Tduerymo tâensedlyl umelâ keankâ akaemo azagâ Deus itaumbyry egatuim modo âkulymo eunu duay Deus eydâ atoam. <sup>13</sup> Âkulymo ume, ton-honre kehoem keankâ onro âzekânily. Âtâ xidadâ odano modo nadakalague, décima parte keankâ adakalagueoim. Toenzepa kurâ domodo nigüe, sete mil lelâ. Toenzepa iguewâtâny modo nâseanedâmo. Aguelymo keankâ:

— Ton-honreim lelâlâ awâkâ Deus kaynâ tâtyeim — kelymo.

**14** Saguhogue, nhatanogue warâ kurâ domodo toenzepa lelâlâ nâsenagazedâ. Tâsenagazedyly nypygueâmbyramo lelâ olâ-ro warâ. Tâlâ mawânrâ ise ilâ takaze kehoem aini. Âsenagazedonzero inepa lâpylâ!

*Anju sete ieto tytrombetary indyhobyry*

**15** Ilâpygueduo keankâ anju sete ieto tytrombetary indyly. Deus eydâ ato donro modo ewy aguely kâindadyly. Ago kehoem keankâ aguelymo:

— Deus Kywymâry ton-honreim kuru! Idânârâ kurâdo iwymâry ise merâ! Ingonytyby Messias pymâem ise lâpylâ! Typygueba ise pymâem awyly! — kelymo.

**16** Vinte e quatro agaityom tynrenseim modo târâlâ keankâ, Deus enadolâ. Pymâem tato turery wâgâ ekadybymoem keankâ. Aituo saudylymo; âzeguhoam idylymo. Tâmydy onro onwa nhedylymo Deus enado, tynrense tawyly tienehon-homoem. Deus iwâkuruem awyly wâgâ, anhetyby wâgâ warâ keankâ aguelymo:

**17** — Ton-honre âmâ idânârâ ize mato aiese, Deus!

Xina iwymâry kuru âmâ.

Aunlolâ tâlâ mawyly.

Tâlâ myakâwândy âmâ, kaudyly iraynâ.

Tâlâ âmâ iwerâ warâ.

Idânârâ xuturim, iwymâry warâ âmâ.

Awylygue xina agâ iomaru.

**18** Toenzepa âduery modo agâ iewiâkymo.

Naintai mawânrâ inakanhe aitomobyry wâgâ âsenagazedomoem amânheto iweâma.

Naintai mawânrâ idânârâ iguewâtyby modo âdara iedyly awyly wâgâ amygueho.

Naintai mawânrâ imary modoram koendonro mâunduho, âtaumbypyry egatuwâni modoram.

Naintai mawânrâ âynynonro modoram koendonro mâunduho, idânârâ âinwânnipyry modoram, âdy modoram, âdy keba modoram alelâ.

Naintai lâpylâ idânârâ kânagazenibyry modo, kyârimpyry modo warâ mâenagazo — kelymo Deusram.

**19** Ilâpygueduo keankâ târâ kaynâ Deus ety iwyantary âzenahungueoly. Ioday kaixa, “arca” kelygue tâzekeim, nâzeho, Deus kurâem anhetyby kienanâgueho. Mârâ kaixa âzechoduo, ton-honre kehoem kopâ âjipyrugueoly. PEBYK PEBYK idyly. Onro âzekânily. Toenzepa pewendâ ihuguely warâ. Warâ keankâ aidyly.

## 12

*Pekodo, dragão warâ âepanâguehobyry*

**1** Kau wâgâ keankâ âdykâ tâensenry âepanâguely. Pekodo xixigue tâtyeim emyenro keankâ. Ihuru iay keankâ nunâ. Doze ximukâgue xygatyby keankâ koroa nhangahu wogonro. **2** Tase keankâ, imery egasezeaji. Tymery egasely awylygue, toenzepa saenlu.

**3** Târâ kaynâ keankâ eagonro âdykâ tâensenry âepanâguely, dragão tapabileim keankâ. Sete lelâ keankâ nhangahu, dez iwâenky. Koroape keankâ mâkâ nhangahu modo wâgâ warâ. **4** Tonwyngue keankâ ximukâ kau odano modo ewy toenzepa indâtyguyly; terça parte onro anaxi nhamuinly warâ. Aitybyem pekodo imery egaserim enado epagu. Iamudo tiândyse keankâ egasebygueduolâ kehoem. **5** Aituo keankâ imery uguondo egasely. Idânârâ iwymâry ise, tuduery modo tyain-hoem ferrogue ematu waunlo ara. Iamudo tiândyse wâne, iamudo nejikemo olâ târâpa. Deus turery wâgâ atoam nadâmo.

**6** Âji âdy peba atoram keankâ pekodo âwiendyly, Deus tâjidy kehobyryanlâ. Azagâ tokalâ, tuotagueze warâ anu ise Deusram âzechozedely.

**7** Ilâpygueduo keankâ tâdâseguebyly aidyly târâ kaynâ. Anju domodo Miguelgue tywymâgueim dragâogue tywymâgueim modo warâ âseguebylymo. Ton-honre kehoem

keankâ âseguebylymo. <sup>8</sup> Dragão ton-honremba niedâmo. Aituo keankâ eagonro modo agâlâ Deus eydâ atodâba âieholymo. <sup>9</sup> Dragão, eataen-ho modolâ warâ Deus eydâ atodâba âjiânykolymo. Âgâu kaudyly ume âepanâgueybylâ mâkâ dragão. Diabu, Satanás warâ lâpylâ mâkâ ezedy. Deus izepa ato aguentoem konokunilâ mâkâ. Dragão, idânârâ eataen-ho modo warâ xirâ onro anaxilâ keankâ adameoly.

<sup>10</sup> Ilâpygueduo keankâ Deus eydâ atodâ ânguy kukeanra ago kehoem aguely:

— Iweâma ise Deus tynynonro modo nhemakely, ton-honru pymâem tawyly warâ nhenehonly. Iweâma Messias ton-honru nhenehonly; idânârâ iwymâryem ise kehobyry. Diabu, “Konokuni” kelygue tâzekeim, Deusdâpa nâieho; kataen-hodo nenokudaymba ise mâkâ iwerâ. Deus eydâ atodâba sameybyem mawânkâ iwerâ. <sup>11</sup> Akaemo kagonro modo Diabu neinwântaymbamo, Kordeiru tunu tyapâze turâem iguehobyry tainwâns tawylymogue, mâkâ xunârybyry, iwâgâ nhegatuybymo warâ iozeno kuru awyly tyeinwândylymogue warâ. “Jesus einwândyly mâinmopa âmaemo-ro watay, âzemo xina” tâkehonduo kulâ, einwândyly nimopamo keankâ. Tyanepamo keankâ igueze. <sup>12</sup> Omazewâdaungâ, idânârâ âmaemo Deus eydâ atodâ tâjikeim modo. Kaikâlâ âmaemo Jesus eynynâbaom modo, âdykâ matomodâlâ, âtâ anaym, paru oze mataymo warâ. Âyanmo kehoem Diabu nâjigonoho. Tyewiâse lelâlâ mâkâ, iwaguepa ton-honru adain-ho, tutuze tawylygue – kely.

<sup>13</sup> Deusdâpa, kurâdo ety anaxi sameybyem tawyly tiuntuduo keankâ dragão, iamudo egaseyby ise nhapygue idâly. <sup>14</sup> Aituo pekodo adawâtâoly ârigâ imeâgâkeba sawâry ara. Tawâry xuduypygue keankâ sawâgudyly tâjidy kehobyryam idâly, dragão tuiopyra atoram. Azagâ tokalâ, tuotagueze warâ anu ise Deus awâkâ ese awyly. <sup>15</sup> Aituo keankâ toenzepa kehoem dragão itayba paru egasely. Mârâ paru egaseyby inweândyly; pekodo nhapygue idâly, paruanlâ târâpa adahohoem wâne. <sup>16</sup> Deuslâ olâ keankâ pekodo emakerim. Onro nhatuen-hoymby odaxilâ keankâ idânârâ paru dragão itayba egaseyby âwândyly. Onro paru nhuonly ara idyly. <sup>17</sup> Dragão iewiâpadyly, pekodo âsemagueduo. Âda tiempyra tâituo keankâ pekodo iweompyry, Deus aguehobyry, Jesus nhenomedâdobyry warâ einwândyly imodâny modo agâ âseguebyze idâly. <sup>18</sup> Aituo keankâ dragão XYDYK idyly sagunu wâgâ.

## 13

### Azagâ ânguydo adyry modo

<sup>1</sup> Ilâpyryem keankâ ânguydo adyry parutabâ ikayba âjikaguely kâendyly. Dez lelâ keankâ iwâenky, sete lelâ nhangahu warâ. Idânârâ iwâenky wâgâ keankâ koroa imeimbyry emyenro ourugueto modo. Deus wâgâ inakanhe lelâlâ aguely keankâ mâkâ nhangahu modo wâgâ iweniby. <sup>2</sup> Udodo adyry emyenro keankâ mâkâ ânguydo. Emary, ihuru warâ imeonkebaem, tuhudune warâ keankâ; eondary tuosebimune kehoem keankâ, urso ara. Itary imâsedoem keankâ; iery modo tuosebile kehoem keankâ, leão ara. Dragão keankâ mâkâna aguely:

— Toenzepa ise on-honru; won-honru agâ âzekiba. Âmâ, urâ warâ ise kurâdo iwymâryem kydawyly – kely.

<sup>3</sup> Tokalâ nhangahu wâgâ âdyâhobyrygue tywinurigue keankâ mâkâ ânguydo adyry parutabâ ikanobyry. Iguerim ara kehoem keankâ, mâtâ tywinurigugue. Nypy olâ mâtâ inepa. Awârâ tientuo, toenzepa kurâ domodo nâsewânímo. Awylygue mâkâ nheinwândylymo. <sup>4</sup> Aituo keankâ aguelymo:

— Tynrenseim, ton-honreim warâ awâkâ dragão. Awâkâlâ keankâ mâkâ ânguydo adyry parutabâ ikanobyryam “Âmâ, urâ warâ ise kurâdo iwymâryem kydawyly” keim – kelymo.

Aituo keankâ agueondylymo:

Tynrenseim, ton-honreim warâ lâpylâ mâkâ ânguydo adyry parutabâ ikanobyry. Ânguy ton-honruneba mâkâ ara kehoem! Ânguy eagâ tâdâseguebyly nemaenwâbyra ise! – kelymo.

<sup>5</sup> Dragâoram quarenta e dois nunâ\* ara ton-honru nhenehon-hoem aguehoymbyem keankâ mâkâ ânguydo adyry parutabâ ikanobyry. Deus wâgâ inakanhe kehoem aguehoem aguehoymbyem. <sup>6</sup> Aituo mâkâ inakanhe aguely adaguly Deus wâgâ, eydâ ato donro modo wâgâ warâ. Deus ezedy, ejidy tynrenseim warâ âwankuem nhedyly keankâ.

<sup>7</sup> Deus eynynonro modo agâ âseguebyhoem, eon-honru nhain-hoem warâ aguehoymbyem keankâ mâkâ ânguydo adyry. Idânârâ kurâdo xirâ onro anano modo iwymâryem keankâ. <sup>8</sup> Kaudyly umelâ Deus aunloenlâ tagâ ini modo ezedy inweniby modo mâkâ ânguydo adyry neinwâmpyramo keankâ, mâkâ kurâdo inakanhe ito epywaze igueypy xurâ tawylymogue. Idânârâ akaemo mâtâ pape wâgâ ezedy tywenizenrybyry modo lelâ mâkâ ânguydo adyry izetonro, ehogueni warâ. <sup>9</sup> Awylygue, mâuntudyze mataymo, kainweniby koendâ xutuwâdaungâ. <sup>10</sup> Kydadawâholo kydâzetadâohoen-ro watay, arâlâ ise aguydâieholo. Espadague âdyoim kydatay, arâlâ ise kydâdyoly. Tâwâlâ toenzepa kydâzenagazeonre Deus eynynonroem kydawlygue, kieinwâmpyra kipyra olâ kine. MÝK alelâ kydâzenagazeoly kyzemaenre.

<sup>11</sup> Aituo keankâ eagonro ânguydo adyry onro anaynlâ kâendyly. Imeombyryem keankâ iwâenky, kaneru iwâenky ara, azagâ lelâ. Dragão agueho ara, ton-honre, kyanedâ warâ olâ keankâ aguely. <sup>12</sup> Mâtâ ânguydo parutabâ ikanobyry aguehobyryem keankâ aguely, aidyly warâ. Mâtâ parutabâ ikanobyry enanaym keankâ mâkâ ânguydo adyry onro anano, idânârâ kurâdo warâ iwymâryem awyly. Aguely:

– Awâkâ ânguydo parutabâ ikanobyry einwântaungâ. Igueim ara kehoem keankâ iwinurigu. Nypy olâ mâtâ. Mâinwâmpyra âmaemo-ro watay, inagazezemo urâ – kely.

<sup>13</sup> Mâtâ ânguydo adyry onro anano, âdykâ kientâny modo kehoem anhekly. Kau odaypa peto nihugueândâ idânârâ kurâdo enanaym. <sup>14</sup> Toenzepa âdykâ kientâny modo mâkâ ânguydo parutabâ ikanobyry enanaym anhetoem aguehobyryem keankâ mâkâ. Mâtâ modo adiendylygue idânârâ kurâdo onro anano modo nhenokudly. Warâ keankâ eyanmo aguely:

– Merâ ânguydo adyry parutabâ ikanobyry ekudo âyngataungâ. Warâ ise mâkâ espadague nhangahu satâyby, niguepa olâ-ro waunlo mâen-hoguedylymo, mâentyguedylymo warâ. Enado âzeguhoam itaungâ, mâen-hoguedomoem – kely.

<sup>15</sup> Aguehobyry ara keankâ ânguydo adyry paikano ekudo anhedylymo. Aituo ânguydo onro wogonro mâkâ ekudo kurâem nhenehonly, intainhehonly warâ. Aituo keankâ ekudo xygatyby aguely:

– Idânârâ ienado âzeguhoam itânrybyry modo xyâwâtaungâ – kely.

<sup>16</sup> Aituo keankâ mâkâ ânguydo adyry onro anano aguely:

– PE tyetaynze ise idânârâ ynynonro modo, emary aho eynynonro wâgâ atay, inwendy wâgâ atay warâ. Idânârâ PE ietaymbyem lelâ nidâmo, tynrenseim modo, tynrensenry modo alelâ; âdypeom, âdypebaom modo; tâpyguebalâ âsewanirin-em sanâtyby modo, tâpywazeim modo alelâ. <sup>17</sup> Iezedy atay, ynumerury atay warâ ise marka urâem awylymo xutuho. Ânguy âdy nanâpyra, vende niepyra warâ ise, xirâ marka peba-ro watay – kely.

<sup>18</sup> Seiscentos e sessenta e seis keankâ mâtâ número, uguondo ezedy xutuho. Tonomeguneim modo xutuze mâtâ número âdakeze aguely awyly, uguondo ezedy xutuho mâtâ. Ton-honre wâne ise mâtâ número xutuhoem, âdutuoze olâ.

\* <sup>13:5</sup> Azagâ tokalâ, tuotagueze warâ anu awârâ agueho.

## 14

### *Cento e quarenta e quatro mil kurâ domodo igâtudobyry*

<sup>1</sup> Aituo keankâ mâkâ Kordeiru XYDYK warâ iwy Sião wâgâ kâendyly. Cento e quarenta e quatro mil lelâ keankâ kurâdo eagâ awyly. Mâkâ Kordeiru ezedy, nhunwym ezedý warâ iwenibyem keankâ inwendymo wâgâ. <sup>2</sup> Deus eydâ atodâ ânguylâ aguely xidadâ, ton-honre kehoem, iwâelu imâsedo ara, kopâ ipyru ara warâ. Koendâ kehoem lâpylâ olâ keankâ igâky, harpa igâky wâne myara. <sup>3</sup> Cento e quarenta e quatro mil kurâ domodo igâkymo keankâ mâkâ Pymâ Deus xurery enado, quattro ânguydo imeom enado, vinte e quattro agaityom tynrenseim modo enado warâ. Tâjigâky iwelo keankâ igâtudomo; akaemo emakewâdyby modo lelâ olâ xutuin-ro warâ. <sup>4</sup> Koendâ lelâ aidylymo, âdaunloenlâ pekodo nynanâbyramo warâ. Mâkâ Kordeiru agâpa nipyramo, âdykâingâ idâhobyrydâ mâkâ agâlâ idâlymo. Emakeyby keankâ akaemo, Deusram, Kordeiruam warâ xuduypy awylymogue; saguho nady etâdyby ewily wâne Deusram xuduly myara xuduypyem awylymogue. <sup>5</sup> Âdykâ ânguy âdaunloenlâ enokunibyry mâkeba akaemo; alâ kulâ aguepamo, ewentâguedomo peba warâ.

### *Azagâ tokalâ warâ anju domodo unâ nhegatuhobyry*

<sup>6</sup> Aituo keankâ anju eagonro sawâgu kâendyly târâ kaynâ, idânârâ kurâdo tâentodâ, tydatodâ warâ. Unâ koendorro âtuguguedânry egatuim mâkâ, Deus kurâem anhetyby. Idânârâ kurâdo xirâ onro anano modoram keankâ nhegatuly. <sup>7</sup> Ton-honre kehoem keankâ aguely:

— Deus xyrentaungâ. “Deus, ton-honreim âmâ, koendorro warâ” kewâtaungâ eyam. Inepa ise Deus koendorro nhuduly tainwânni modoam. Tainwântânry modo enagazeze warâ. Awârâ kau, onro, parutabâ, paru, idânârâ tâlâom modo tytanrugue kulâ xugunipyry ehoguedaungâ — kely keankâ.

<sup>8</sup> Mâkâ aguepygueduo keankâ eagonro anju aguely kâindadyly:

— Babilônia xidadâ tâgareim adainholo ise! Mârâ xidadâ anano modo ety adakalagueoze! Kurâ domodo tumuenze keankâ akaemo tonlo modo. Uguondo modo wâne tagonro toku ikaji tyese myara keankâ akaemo kurâ domodo anhedyly, inakanhe kulâ aitomoem, Deus izepa ato ara kulâ aitomoem. Awylygue ise idânârâ adainholo — kely.

<sup>9-10</sup> Aguepygueduo keankâ anju azagâ tokalâ ieto aguely kâindadyly târâ kaynâ. Ton-honre kehoem keankâ aguely:

— Toenzepa ise Deus iewiâky, idânârâ ânguydo adyry parutabâ ikano ehoguenibyry modo agâ, ekudo xygatyby ehoguenibyry modo agâ warâ. Toenzepa ise nhenagazenehonly. Deus toenzepa enagazeze idânârâ inwendy wâgâ atay, emary wâgâ atay warâ mâkâ imarkarybeom. Toenzepa ise Deus eagâmo iewiâky. Igopurumo odaji nhenyhomoevinhu tudureim XU nhedyly-ro waunlo ara ise. Peto onwaym idânârâ âsenagazeze akaemo; enxofre eunu lelâ ise tytângue egaseim. Mârâ eunu tâepaigueho nhuan-hulygue ise âsenagazedylymo. Âsenagazezemo anju domodo enanaym, Kordeiru enanaym warâ. <sup>11</sup> Niântaymba ise mâtâ peto iaduânímo. Nâkuba nitaymba ise mâtâ eunu. Tâzekobyzeguely peba ise târâ peto oday, kopae warâ akaemo ânguydo adyry, ekudo xygatyby warâ einwânni modoem. Aunlolâ ise akaemo inwendy wâgâ atay, emary wâgâ atay warâ mâkâ ezedypeom modo âsenagazedyly.

<sup>12</sup> Awylygue Deus eynynonro modo xirâ anaym tâsenagazedyly nemaenmo lelâlâ, Jesus tyeinwândyly nimopamolâ, Deus aguehobyrylâ tyeinwândyly nimopamolâ warâ, âji tâdâsenagazedoam nâtâba itomoem.

<sup>13</sup> Aituo keankâ Deus eydâ atodâ tâjitanru kâindadyly. Warâ keankâ aguely:

— Xirâ âyam augueho iwenigâ: “Kaikâ mâkeba akaemo Kywymâry Jesus nheinwândylymogue kulâ tyâzeim modo” — kely.

Aituo keankâ Deus Ispiritury aguely:

— Âkealâ amyguely. Iweâma tâwâlâ ekobyzeguelymo, âwanu aienibyryem; Deus tutuze mawânkâ koendonro aienibyryem awylymo — kely.

### *Xypyry etay aitaynrim modo*

<sup>14</sup> Aituo keankâ MYK widyly. Xypyry etay aitaynrim modo kâendyly. Uguondo kâendyly eunu tapekeim wâgâ ekadybyem. Koroa ouruguento keankâ nhangahu wogonro. Taho iewipy uva ekaunâdo emyenro keankâ emano. <sup>15</sup> Aituo anju Deus ety odarya egasely. Ton-honre kehoem adaenkely mâkâ eunu wâgâ ekadybyam:

— Awârâ taho imano emyra. Ekaunâdo odanylâ mawânrâ onro anaym sahuadyby modo — kely.

<sup>16</sup> Aituo keankâ mâkâ eunu wâgâ ekadyby, onwogonro modo indâtyguly kâendyly, uva ekaunâdoem idâtyguyho ara.

<sup>17</sup> Aituo keankâ eagonro anju kâendyly târâ kaynâ. Târâ Deus ety odarya egasely. Taho uva ekaunâdobe lâpylâ keankâ mâkâ emaym.

<sup>18</sup> Ilâpyryem keankâ eagonro anju târâ kaynâ Deus ety odarya egasely. Mârâ peto mesa wogonro edunu tyânrângueim iaduânto eni keankâ mâkâ. Ago kehoem keankâ adaenkely mâkâ tagonro taho uva ekaunâdogue tâmaseinra. Aguely:

— Awârâ taho imano emyra. Onro anakâ uva ewily ekaunâda, sahuadybyem mawânrâ — kely.

{“Uva ewily ewy wâgâpa satâwâdyly wâne myara ise Deus tynynâbaom modo âikâam nhedyly” keze awârâ aguely.}

<sup>19</sup> Ilâpygueduo keankâ anju tydahorugue âpa ezay uva ewily ewy wâgâpa nhatâwâdyly. Tanki imâsedo odaji uva ewily nhameley, ekuguehoem. Uva âzekuguehoem toenzepa sakabely wâne myara ise Deus tynynâbaom modo agâ iewiâky, awârâ nhenehonly. <sup>20</sup> Âji uva ewily ekugueho âikâlâ keankâ xidadâ odarya awyly. Munruem keankâ mâtâ uva ekuru. Trezentos kilômetros keankâ iwague awyly, tokalâ, tuotagueze warâ metru keankâ esanigu mâtâ tâjiunu.

{“Toenzepa ise Deus eynynâbaom modo âsenagazedyly. Toenzepa ise tâdâseguebyly. Tunu tyapâze ise iguelymo. Saimu imâsedo ara ise awârâ tâjiunu” keze awârâ aguely.}

## 15

### *Sete anju domodo*

<sup>1</sup> Ilâpygueduo keankâ âdykâ tâensenry kâendyly kau wâgâ. Kyanoem keankâ mâtâ, âwankuumba lâgâlâ. Sete anju domodo lelâ keankâ kâenkyly. Sete tâdâsenagazedo xypyrygue tâmatunemo keankâ. Tynynâbaom modo inakanhe aitobyry wâgâ tyewiâse mâkâ Deus. Tâdâsenagazedo odaji idyly watay, “Warâ ise merâ âsenagazedyly” Deus kehobyry aralâ ise âsenagazedylymo.

<sup>2</sup> Aituo keankâ paru, vidru emyenro peto agonro kâendyly. Mâtâ paru iwaguepa kurâdo sedâ lâpylâ tâpagune; âdykâ mâkâ ânguydo adyry parutabâ ikanobyry einwânnipyry keba, ekudo xygatyby tien-hoguedoem enado âzeguhaoam ityby keba, inumerury ezedy xutuhogue marka ietyby keba warâ keankâ akaemo. Deus nhuduupy harpa keankâ indylymo. <sup>3</sup> Tâsemagueduomo saguhoem Deus emarybyry Moisés igâtudobyry ara nigâtudâmo, Kordeiru igâkylâ:

— Deus, xîna iwymâry, ton-honre amâ.

Ize mato aiese ton-honre amâ.  
Idânârâ amânhekyly koendonro mawyly tânehonze, on-honru tutuen-honze warâ.  
Idânârâ kurâ domodo iwymâry amâ.

Koendâ lelâ aieni amâ; âdy koendâpa kulâ aieni mâkeba amâ.

Ânguy enokuni keba amâ.

<sup>4</sup> Idânârâam tâdyren-honze âmâ, Pymâ.

“Deus kywymâry, ton-honreim kuru” kezemo idânârâ.

Âmâ kulelâ inakai aietânry.

Idânârâ kurâ domodo amânhokyly esemo.

“Idânârâ amânhokyly koendonro lelâ” kezemo âyam.

“Deus, ton-honreim âmâ” kezemo âyam.

Tientuomo, xutuzemo idânârâ koendâ lelâ, ioze lelâ warâ amidyly awyly – kelymo keankâ Deusram.

<sup>5</sup> Ilâpyryem keankâ Deus ety kâendyly kaynâ. Ety iwyantary âzenahungueduo, koendâ ioday sedâ, Deus âepanâguehodâ. <sup>6</sup> Sete anju lelâ târâpa negase. Sete tâdâsenagazedo xypyrygue tâmasemo keankâ. Linhuguento tapekeim, ehozelu pylâ-ro waunlogue keankâ etyumo. Ouru xygatybygue keankâ ihogâdylymo nhewandanomopyryem, epady onwa.

<sup>7</sup> Quatro ânguydo imeom ieto ewy keankâ eyanmo kudupi ourugueto vinhugue tatune xuduim, mâtâem, mâtâem warâ. Tynynâbaom modo agâ tyewiâse tawyly Deus Iguedânry nhutuen-hon-holâ keankâ mâtâ vinhu. <sup>8</sup> Toenzepa keankâ Deus ety oday âseunuguely. Deus ton-honre awyly, koendonroem awyly warâ xutuho mâtâ eunu ety odaypa egaserim. Mâtâ sete lelâ tâdâsenagazedo modo akaemo anju nhenetaymby anipyra kulâ, ânguy negawântaymba keankâ myarâ Deus ety odaji.

## 16

### *Sete lelâ Deus einwântânry modo âsenagazedo*

<sup>1</sup> Ilâpyryem keankâ tâjitanru ton-honre aguely kâindadyly Deus ety oday. Akaemo sete anju domodoram aguely:

– Idâwâtaungâ. Onro anano modo onwa âgudupirymo odano iapâdaunda. Ynynâbaom modo onwa yewiâky mânhapâdylymo ara ise – kely akaemo sete lelâram.

<sup>2</sup> Saguho anju idâly; mâtâ tugudupiry odano onro onwa nhapâdyly. Aituo toenzepa nâsenagazedâ akaemo kurâdo mâtâ ânguydo adyry parutabâ ikanobyry ezedygue inwendy wâgâ atay, emary wâgâ atay warâ PE ietyby modo, ekudo xygatyby nhehoguedyly waunlopyry modo. Pinuri xypydânry keankâ iwâgâmo âepanâgueim. Awârâ keankâ saguho tâdâsenagazedo.

<sup>3</sup> Mâtâ anju azagâ ieto mâtâ tugudupiry odano parutabâ ikaji keankâ nhapâdyly. Nhâpâbygueduo mâtâ paru tâjiunu sakamadyby tywângueim ara idyly. Idânârâ ânguydo imeom parutabâ ikano modo niguewâdâ. Paru munruem idyly keankâ tâdâsenagazedo azagâ ieto.

<sup>4</sup> Ilâpyryem keankâ mâtâ anju azagâ tokalâ ieto mâtâ tugudupiry odano paru imâsedo ikaji, iwatarly modo ikaji warâ nhapâdyly. Aituo keankâ paru imâsedo, iwatarly modo warâ munruem itaynly. Awârâ keankâ tâdâsenagazedo azagâ tokalâ ieto. <sup>5</sup> Aituo keankâ anju paru xutuim Deusram aguely kâindadyly:

– Aunlolâ tâlâ mawyly; tâlâ minase, iwerâ tâlâ âmâ warâ. Âdykâ inakanhe amitaymba âmâ, Deus. Inakanhe amidyly mâtâeba, âynynâbaom modo mâtâenagazedyly. <sup>6</sup> Âtaumbyry egatuwâni modo nyâwâdâmo. Âynynonroem ityby modo nyâmo, iunumo niapâdâmo warâ. Awylygue keankâ munru mâtâunduly nhenyhomoe. Adâitobyry aralâ akaemo nhemakely – kely keankâ.

<sup>7</sup> Aituo keankâ tâjitanru kâindadyly. Deusram xuduupy egamehodâba keankâ aguely.

– Xina iwymâry âmâ, Deus. Ize mato tâwâlâ adyese âmâ. Åkealâ, kurâdo inakanhe aitaynrim modo mâtâenagazedyly. Aitomobyry wâgâlâ mâtâenagazedylymo – kely keankâ.

<sup>8</sup> Ilâpyryem keankâ anju quatro ieto mâtâ tugudupiry odano xixi onwa nhapâdyly. Mâtâ nhapâbygueduo xixi toenzepa kehoem âdâpigadyly, kurâ domodo nhaduândyly warâ. <sup>9</sup> Toenzepa wâne xixi tyaduântobyry âdâpigugue âsenagazedylymo, nâjityembryamo

lâgâlâ olâ Deus tieinwâmpyra tawylymogue. Neinwâmpyramo lâgâlâ olâ. “Deus, inakanhe amidyly mâkeba keankâ, xina mäenagazenehonduo, izepa mato kulâ keankâ xina anhekyly” kepamo. Deus inwykelymo lelâ tâsenagazedo ingonotobyry wâgâ.

— Âumunru kulâ, Deus. Âdaituoba kulâ xina mäenagazedyly – kelymo keankâ.

Awârâ keankâ tâdâsenagazedo quatro ieto.

**10-11** Ilâpyryem keankâ anju cinco ieto tugudupiry odano onro anaxi nhapâdyly, ânguydo adyry parutabâ ikanobyrygue tywymâguneim modo onwa. Idânârâ niamadâ lelâlâ. Âdy nepyramo lâgâlâ keankâ. Tulu tâsemo kehoem keankâ, toenzepa âsenagazedylymo ewânugue. Arâlâ olâ inakanhe adâidyly nimopa awylymo-ro warâ. Deus kaynonro inwykelymo lelâ.

— Tâzewânu modogue toenzepa xina menagazêdâ. Egâ xina iwinuriry, xina iaduhobypy warâ inakanhe kehoem awyly. Tumunreim lelâlâ âmâ, Deus – tâkely nimopamo keankâ.

Awârâ keankâ tâdâsenagazedo cinco ieto.

**12** Ilâpyryem keankâ anju seis ieto mâtâ tugudupiry odano paru Eufrates ikaji nhapâdyly. Aituo paru tâgaseba idyly, sawely warâ. Akaemo pymâ xixi egaseho eynynâba saintaynrim modo âzekuâdoem keankâ mâtâ sawely. **13** Aituo azagâ tokalâ warâ kadopâ inakai kulâ kâendyly, pârâru emyenro modo. Dragão itayba, ânguydo adyry parutabâ ikanobyry itayba, ânguydo konokuni itayba warâ keankâ egasely. **14** Ânguy anhetânrý adyese keankâ akaemo azagâ tokalâ warâ kadopâ modo. Onro anakâ pymâ modo idâtyguyze keankâ akaemo idâly, Deus ton-honreim agâ tâseguebyhomoe. Xypyry etay ise awârâ modo aidyly. Ilâem mawânkâ ise Deus, tynynâbaom modo nhenagazedyly.

**15** Aituo keankâ Jesus aguely kâindadyly.

— Xirâ xutuwâdaungâ! Odopâze urâ, idânârâ ânguy ienuendyly umeba kehoem, tâmagazeim saindyly wâne tynwânwândyly umeba myara. Ienuenibyrylâ ise yagâ tuo-mareim kuru. Etaungâ wâne mâtâ âtâ eni, sodo âxigueduo, tykyhoem âzetygueim, âtâ sodo saintuo, tâtyemba tawyly nhetuo, âpybazedyly waunlo. Mâtâ araba itaungâ – kely keankâ Jesus.

**16** Aituo keankâ akaemo azagâ tokalâ warâ kadopâ modo, pymâ domodo indâtyguylymo tâdâseguebyhoam, israelita domodo itanwe Armagedomram. Paru sawely, akaemo pymâ domodo âseguebyze saindyly awârâ modo keankâ tâdâsenagazedo seis ieto.

**17** Akaemo seis anju domodo nhapâbygueduo keankâ anju xypyry kau, onro warâ ontay tugudupiry odano nhapâdyly. Aituo keankâ Deus tâty oday turery wâgâ ekadybyem ton-honre kehoem aguely kâindadyly.

— Ipa, idânârâ ynyñâbaom modo sete lelâ âsenagazedo ajietai! – kely keankâ.

**18** Awârâ aguepygueduo keankâ ielu toenzepa kehoem âzehoruguel; kopâ âjipyruguel warâ. Ago kehoem onro âzekânily; toenzepa lelâlâ inakanhe nhedyly. Kurâdobe awyly ara xirâ onro anaym, âdykâ ton-honre kehoem onro nâzekâniwâbyra myara kehoem. **19** Onro âzekâniduo, xidadâ imâsedo, azagâ tokalâ warâem kehoem nâzepajigâdâ. Idânârâ onro anano kurâ domodo ety anary nadainho. Deus toenzepa niewiâpadâ Babilônia donro modo inakanhe aitomobyry wâgâ. Âdaunloenlâ inakanhe aitomobyry nenanânehomba mawânkâ. Awylygue ise toenzepa âsenagazedylymo, vinhu venenupeom nhenyhomoem nhuduly-ro waunlo ara. **20** Idânârâ ilha modo nytywâdâ. Idânârâ iwy modo nuzataym warâ. **21** Pewendâ ihuguel keankâ kau odaypa kurâ domodo onwa. Imâsedo, tâmânreim warâ keankâ mâtâ pewendâ. Quarenta kilo keankâ emânru. Toenzepa kurâ domodo âsenagazedyly mâtâ pewendâgue. Awylygue keankâ Deusram inakanhe kehoem aguelymo:

— Âumunru kulâ, Deus. Awylygue pewendâ xina onwa mân-hugueândyly. Âmâ xina enagazeni inakanhe kehoem! Xina nemaembâ ise enra – kezesedylymo.

## 17

*Pekodo MON warâ adyeseim, ânguydo adyry warâ*

<sup>1</sup> Aituo akaemo kudupigue tâmatuneim modo ewy yam agueze âewyly:

— Egârâ mâkâ pekodo; mâtâ xidadâ imâsedo paru modo emelay saunâtyby âdara awyly etolâ mâkâ pekodo. Alâ kulâ adyeseim mâkâ MON warâ tynanâzeim. Idânârâ tâdutuoze inakanhe aitobyry. Agueze urâ âyam, âdara Deus mâkâ pekodo MON waunlo nhenagazedyly awyly. <sup>2</sup> Tâinkânro modo lelâba pymâ domodoram tâdynanâoze. Vinhu nhuduypygue idânârâ toku ikaji nidâmo, nynanâdâmo warâ — kely.

<sup>3</sup> Aituo Deus Ispiritory wayam waunroem aini modo kâentoem anhenehonduo, âji âdy peba atoam anju yadâ. Târâ pekodo sedâ, ânguydo adyry parutabâ ikayba salokuyby tapabileim wâgâ. Sete lelâ keankâ mâkâ ânguydo nhangahu, dez lelâ iwâenky warâ. Idânârâ sodo wâgâ tâjitanru inakai Deus wâgâ agueim iwenibyem keankâ. <sup>4</sup> Iwâkuru keankâ pekodo ety iwogonro, púrpura ara, karmesim ara warâ tyweneim. Ourugue keankâ iwâkudâdybyem awyly, tuhu imeombyry perolague iwâkudâdybyem, eagonro tuhu imeombyry tâwâenseim modogue warâ. Kopu ourugueto keankâ emano. Vinhugue tumyke keankâ mâtâ. Idânârâ inakai modo, idânârâ tâjiwypado modo warâ anhetyby enanâgueho mâtâ vinhu. <sup>5</sup> Âze iwenibybe keankâ inwendy wâgâ; âdakely awyly ânguy nutuba olâ keankâ. “Babilônia ton-honreim urâ. MON waunlo urâ; idânârâ pekodo modo yara lâpylâ ize wawyly. Tâlâ wawylygue mawânrâ onro anaym kywypado modope awyly” kely. <sup>6</sup> Toenzepa Deus eynynonro modo Jesus einwândly imodânry modo tyâen-honze mykeankâ mâkâ pekodo. Iunumo tienylygue toku ikaji idyly-ro waunlo ara keankâ mâkâ pekodo.

Kâentuo, toenzepa kâseguâdâdâ, kâseanedâ warâ.

— Inakai kulâ myanze awâkâ! — uguely keankâ.

<sup>7</sup> Aituo keankâ anju aguely:

— Arâ kehoem tâseguâdâzeba ikâ, tâseanezeba ikâ warâ. Mâtâ pekodo wâgâ, ânguydo adyry iwâgâ adakobâdo, sete lelâ tyangahueim, dez lelâ pylâ iwâenkyun-ro waunlo wâgâ tutuzenrybyry âyam agueze urâ. <sup>8</sup> Mâtâ ânguydo adyry mâentyby onro anaym âepanâgueyby mâkâ. Iwerâ olâ tâentonzeba. Egasezeaji olâ tâtagueim imâsedo odaypa, kadopâ modo etadâdobyry odaypa. Typygueba ise Deusram eon-honru adainhol. Mâtâ ânguydo adyry tientuo ise Deus eynynâbaom modo toenzepa âseanedlylmo. Aun-loenlâ Deus Agâ Ini Modo Ezedy sawo wâgâ iweniby kebamo mawânkâ. Kaudyly iraynâlâ myakâwândy tâzezedy sawobe awyly. Tâlâ mâkâ ânguydo adyry onro anaym âepanâgueyby. Iwerâ olâ tâentonzeba. Âepanâgueonze olâ-ro warâ — kely keankâ anju.

<sup>9</sup> Aituo keankâ anju yam aguely:

— Tonomeguneim modo lelâ ise xirâ aguely xutuim. Pekodo metai, ânguydo adyry sete tyangahueim wâgâ. Sete iwy imeimbyry modo wâgâ âtâ anary saunâtyby wâgâ, sete pymâ domodo wâgâ warâ mâtâ sete nhangahu nhenehonly. <sup>10</sup> Cinco asaemo pymâdo ewy igueypyem. Tokalelâ iwerâ pymâem awyly, eagonro nâepanâgueba. Âepanâgueduo, âdiempa kulâ ise Deus merâ pymâem nhenehonly. <sup>11</sup> Mâtâ ânguydo adyry parutabâ ikanobyry pymâem ise lâpylâ. Onro anaynlâ âepanâgueyby mâkâ; iwerâ olâ tâentonzeba. Merâ sete pymâ domodo ewylâ ise, âepanâgueoni, pymâdo oito ieniem. Xypyry etay olâ, Deusram ton-honremba âiehoze lelâlâ — kely keankâ anju.

<sup>12</sup> Yam agueondly keankâ:

— Dez lelâ awâkâ ânguydo adyry iwâenky awyly metai. Mâtâ dez pymâ domodo tâwanu sagudânry modolâ awârâ nhenehonly. Ânguydo adyry parutabâ ikanobyry âepanâgueonduo olâ, âdiempa kulâ eagâ pymâem itomoem aguehonzemo, tokalâ hora awârâem kulâ. <sup>13</sup> Akaemo dez pymâ domodo âseinwânzemo, ânguydo adyry parutabâ ikayba âepanâgueyby agâ, mâkâlâ pymâ kuru itoem, akaemo pylâ eynynonro modo-ro

warâ tâitomoem. <sup>14</sup> Ânguydo adyry, mâkâ dez pymâ domodo warâ, Kordeiru itoguyzemo, emaenze olâ-ro warâ, pymâdo iwymâry tawylygue, xutuwâni modo xutuim tawylygue warâ. Kordeiru, xurâ modo warâ eagâlâ ise âseguebylymo, eon-honrumo sainsemo-ro warâ, mâkâ ingâsedybymo mawânkâ einwândyly nimopamo warâ — kely.

<sup>15</sup> Aituo keankâ anju Yam agueondly:

— Mâkâ pekodo MON warâ adyeseim paru emelay ekadybyem metai. Idânârâ kurâdo onro anano modo, mâtâ paru nhenehonly. <sup>16</sup> Ânguydo adyry paru ikanobyry, dez pymâ domodo warâ mâkâ pekodo MON waunlo iewiâsezemo. Idânârâ tâlâ ato modo emakezemo. Ety iwogonro etyzemo. Nhunru sâsemo. Petogue ise âsegubydâdyby nhainlymo-ro warâ. <sup>17</sup> Xirâ aiese lelâ akaemo, Deuslâ aiedysedonro awylygue. Awylygue ise idânârâ, merâ ânguydo adyryam adâkehomoem âturudylymo: “Ize tawylyguelâ ise amyguehobyry xina anhedyly. Akaemo iwymâryem tato modoram, amyguely einwânehonze xina warâ. ‘Aiekâ’ myguehobyry aiese lelâ xina” kezemo. Ânguydo adyry ise nheinwânklymo. Xirâ aiese akaemo, “Arâ ise aidyly” Deus kehobyrylâ mawânrâ.

<sup>18</sup> Pekodo MON warâ adyeseim mâtentyby wâgâ augueday, xirâ âtâ anary imâsedo paru emelano wâgâlâ enra auguely. Idânârâ onro anano modo iwymâry mâkâ tonlo pymâ — kely keankâ anju.

## 18

### *Deus xidadâ imâsedo Babilônia keho nhain-hobyry*

<sup>1</sup> Yam aguepygueduo keankâ eagonro anju Deus eydâ atodâba xytâguyly kâendyly. Ton-honre keankâ mâkâ, âdydo imeom aiese. Idânârâ kurâ domodo onro anano modo tyajimanâse keankâ mâkâ ehoru. <sup>2</sup> Ton-honre keankâ adaenkely:

— Babilônia xidadâ imâsedo tadainhoze! Idânârâ iodano modo tadainhoze! Kadopâ modo lelâ atonlo iwerâ; elaho modo, tywânguneim sâni eagonro modo alelâ. <sup>3</sup> Deus neinwântaymba keankâ akaemo Babilônia donro modo. Inakai, kywypado warâ olâ keankâ anhekylymo. Âkelo anano modo inakanhe adâito ara aitomoem adyesemo keankâ, pekodo inakanhe kulâ aini uguondoam vinhu nhuduly, toku ikaji itomoem, eagâ kywâpado kehoem adientoem. Onro anaym pymâ domodo tâesemo keankâ, Babilônia donro modo agâ Deus izepa ato aiese. Âwâlâ tohomaendomoem toenzepa keankâ âdydo imeom nhaunkulymo, kywypado, inakai warâ adientomoem; âkelo anaymba âetyby modo âdydo imeombe tâisemo keankâ, akaemo tianâdyse ato vende tientomobyrygue — kely.

<sup>4</sup> Aituo keankâ târâ Deus eydâ tatodâ aguely kâindadyly:

— Igasewâdaungâ âmaemo ynynonro modo awârâ xidadâ odaypa.

Igasewâdaungâ, atonlo modo ara inakanhe amipyra mitomoem,

atonlo modo inakanhe tâitobyry epywaze âsenagazedomo ara mâsenagazebyra mitomoem warâ.

<sup>5</sup> Izepa wato aiedyly nimopa atonlo modo.

Inepa, inepa warâ inakai anhedylymo.

Kau opaji kehoem inakai aitomobyry saintybyen-ro waunlo ara kâendyly.

Yangahu odaylâ inanry inakanhe aitayn-homobyry.

<sup>6</sup> Warâ xidadâ sainrim modoram auguely:

“Babilônia donro modo toenzepa kuru enagazaungâ, kurâ domodo nhenagaze-domobyry takaze kehoem.

Toenzepa lelâlâ enagazaungâmo.

Vinhugue sakuizezaungâmo, azagâ lelâ âkelomo nhakuihobyry takaze kehoem.

<sup>7</sup> Toenzepa âdydo imeompe akaemo Babilônia donro modo.

‘Iweâma ton-honre kurâ’ tâkezemo inanry.

‘Pymâ lelâlâ kurâ. Aunlolâ ise koendâ kydawyly.

Âdykâ tytynruneba, tumowâduneba warâ ise kurâ, pypâbyry modo ara’ tâkezemo inanry.

Iweâma âdy peba ietaungâmo.

Enagazaungâmo toenzepa kehoem.

Toenzepa itywandomoem aietaungâ.

<sup>8</sup> Tânajanji, ton-honreim keankâ akaemo, inepa olâ ise âsenagazedylymo.

Toenzepa ise ewânumo.

Toenzepa ise itynrumo typemugumo iguehobyry wâgâ.

Tâwindygue âsenagazezemo.

Petogue ise adainholymo.

Inepa ise arâ âsenagazedylymo, tokalâ iguandyly wâgâ kulelâ waunlo ara.

Pymâ Deus urâ. Urâlâ ise enagazenimo.

Ton-honreim lelâlâ urâ” uguely – kely Deus.

<sup>9</sup> Âtâ anary iwymâry modo, Babilônia donro modo agâ Deus izepa ato aienibyry, âdype tâitoem akaemo tonlo modoram âdydo imeom vende ienipyry modo warâ xidadâ petogue adainly esemo. Toenzepa ise âjityendylymo, awârâ tientuomo. Saenlumo, eogunrumo warâ ise petomâ eunu tientuo. <sup>10</sup> Toenzepa âseanezemo, atonlo modo âsenagazedyly tientuomo. Awlygue ise iwaguelâ awylymo.

— Kaikâlâ âmaemo! Toenzepa lelâlâ mâsenagazedylymo, âmaemo Babilônia domodo! Kurâdo onro anano modoram âsejigumo vende mânhetuomo olâ inanry âdydo imeombe midylymo. Inepa kulâ awârâ mâsenagazedylymo inakanhe amitomobyry epywaze – kelymo, akaemo tonlo modo agâ waunlo ara.

<sup>11</sup> Idânârâ âtâ anano âdydo imeom vende ieni modo esemo lâpylâ mâtâ xidadâ adainholymo. Toenzepa âjityenzemo, tysejiguy vende tiento peba ituo. Aituo ise eogunrumo, saenlumo warâ ton-honre kehoem. <sup>12</sup> Xirâ modo ani nhakylymo vende tientoem: Ouru, prata, tuhu tâwâenseim modo, pérola iwâkudâdyby; âtâ tâwâenseim linhugueto, sedagueto warâ, purpurague tyweneim pymâ domodo ety emyenro, carmesimgue tyweneim, kurâdo tynruneim ety ara tyweneim; se tâwâenseim modo warâ, aunlo kulâ keba; marfingue aietyby tâwâentuneim modo, se iwâkurugue, bronzegue, ferrogue, marmoregue warâ; <sup>13</sup> canela, cardamomo, óleo tyânrânguneim modo, uriza tyânrânguneim modo, edunu tyânrânguneim modo, mirra ânwin-em, âguedy epyâdoem nhârâneântoem tyeseim warâ; tyânrângueim pyni nhârâneântoem, urizaem warâ adyeseim, lamparina wâgâ tyaduânseim warâ; vinhu, oliva igady; trigu ifarinharay xunoyby, trigu ewily warâ; âguynro: tapirâ, kaneru, kawaru; karosa iwâkuru kawaru, tapirâ warâ nhêpâguely modo; uguondo modo, pekodo modo tâpyguebalâ âsewanihoem sanâtyby modo, guerradâ sawâtaymby modo warâ nhakylymo, Babilônia donro modoram vende tientoem. Ânguy nanâtondaymba olâ ise awârâ âdydo imeom nhatybymo.

<sup>14</sup> Babilônia donro modoram aguelymo iwaguelâ:

— Nadainhaki mâtâ koendonro modo ize matobyry. Âmaemo xurâ tâwâentuneim modo, iwâkuru modo waunlo memakehoanguimo. Âdype mitondaymba ise âmaemo – kezemo.

<sup>15</sup> Tyane ise akaemo âdydo imeom vende ieni modo.

— Iwaguelâ kine. Xidadâam kaintuo, atonlo modo agâ âsenagazeze kurâ – kezemo.

Aituo iwague endaylâ ise nhesedylymo. Itynrumo ise, tydineruguepa tawylymogue. Aituo ise adaenkelymo:

<sup>16</sup> — Kaikâ Babilônia donro modo-kâ! Inakanhe kehoem akaemo âsenagazedyly mâtâ xidadâ imâsedo odano modo. Saguhoem akaemo ety keankâ linhugueto tâwâenseim kehoem. Tâwâenseim kehoem keankâ etymo iwogonro, púrpura emyenro tapabileim.

Ourugue keankâ âpâgudâdylymo, tuhu imeimbyry tâwâenseim iwkuru waunlogue, pero-lague warâ! <sup>17</sup> Inepa olâ nadainhoakimo – kezemo.

Idânârâ paikanobyry modogue âzetaynrim modo: pepi imâsedo iwymâry modo, ioday tâwanuneim modo; pepi oday tuantaji, tuantaji warâ sanâtyby, vende ietyby warâ sani modo; paikanobyry ebyrygue âdylâpe ityby modo warâ iwague endaylâ xidadâ adainly nhesezedlymo. <sup>18</sup> Peto iatygu, eunu warâ tientuomo, adaenkelymo keankâ:

– Imâsedo, ton-honreim warâ keankâ mâtâ xidadâ! Mâtâ emyenro kuru lâpeba! – kelymo.

<sup>19</sup> Toenzepa keankâ itynrumo. Sagunu nhamelymo tyangahumo onwa, toenzepa tytyrungue, tâzewenrymo ara. Eogunrumo, saenlumo warâ keankâ,

– Kaikâlâ Babilônia donro modo! Toenzepa lelâlâ akaemo xidadâ imâsedo odano modo âsenagazedyly! Pepi imâsedo sodo modo parutabâ oze âdylâ sanâse, vende iese warâ idâim âdydo imeombe tâisemo ani, mâtâ xidadâ odano modo ize ato tiandylygue. Inepa olâ ize tato idânârâ kehoem nanhehoanguimo! – kelymo.

<sup>20</sup> Omazewâdaungâ olâ, mâtâ xidadâ odano modo adain-hobyry wâgâ, âmaemo Deus eynynonro modo. Tuomare itaungâ, âmaemo Deus eydâ ato donro modo. Tuomare itaungâ, âmaemo Jesus tywâgâ agueze induakeyby modo. Tuomare itaungâ, âmaemo Deus itaumbyry egatuze igonotaymby modo. Inagazenimobyry enagazeze Deus.

<sup>21</sup> Aituo keankâ anju ton-honreim tuhu imâsedo, tâmânreim nhanâdyly, trigu akoho emyenro. Ton-honre kehoem keankâ parutabâ ikaji nhamely. Akaemo Babilônia donro modoram aguely iwaguelâ:

– Xirâ tuhu parutabâ ikaji ton-honre kehoem sameyby xuzatyby ara ise âmaemo xidadâ imâsedo Babilônia donro modo madainholymo ton-honre kehoem, mâzehoba mitomoem. <sup>22</sup> Ânguy nâzetyguedaymba ise awâtârâ. Harpalâ ânguy nidywâpyra ise. Ânguy flauta, trombeta, awârâ modo nidywâpyra ise. Ânguy nigâtudaymba ise awâtârâ. Ânguy âdy ekudo anientaymba ise, âkelo âwanu aieni modo lâpeba ise warâ. Pekodo modo egogu tydatuneba ise. <sup>23</sup> Ânguy lâpeba ise tarâ xidadâ oday. Lamparina ehobanâni lâpeba ise awâtârâ. Âwynsaundo, salokuzenomo modo warâ ipa ise awâtârâ ohogüinrin-em. Târâ âdydo imeom vende ienipyry modo ton-honremo; kurâdo takaze kehoem âdutulymo. Kurâdo idânârâ âtâ anano modo inakanhe amidlymo tientuo, adiendysemo lâpylâ myara. Âwenwenrymogue keankâ idânârâ mânokudylymo – kely keankâ.

<sup>24</sup> Mâtâ xidadâ imâsedo Babilônia odano modo toenzepa âsenagazezemo, inakanhe aitomobyry wâgâ, iumunromobyry wâgâ warâ. Toenzepa Deus eynynonro modo, itaumbyry egatuwâni modo warâ nâdyomo akaemoam. Babilônia donro modolâ tâwentâguezeim, kurâdo onro anano modo xyâhobyry wâgâ.

## 19

<sup>1</sup> Mâtâ anju aguepygueduo keankâ akaemo Deus eydâ ato donro modo saenlu waunlo ara kâindadyly.

– Aleluia! Koendonro lelâlâ âmâ, Deus! Xina emakerim âmâ! Iwâkuru âmâ! Ton-honreim lelâlâ âmâ warâ! <sup>2</sup> Âkealâ, izepa mato aienibyry modo mânagazenehonly. Tâsenagazedylylâ mawânkâ ize atomo. Kurâ domodo inakanhe nieneho akaemo Babilônia donro modo. Pekodo wâne tokalâ uguondo agâ lelâ tâidyseba, myara akaemo ize mato lelâ adiendyseba awyly; eagonro kurâ domodo âinwâmpyra itoem nhenomedâdylymo lâpylâ warâ. Mânagazedylymo olâ inakanhe aitomobyry wâgâ, âynynonro modo nhâwâtomobyry wâgâ warâ – kelymo keankâ.

<sup>3</sup> Inepa lâpylâ keankâ agueondylymo:

– Aleluia! Koendonro lelâlâ âmâ, Deus! Mâtâ xidadâ nadainhaki. Niântaymba ise mâtâ peto xidadâ sainrimpyry – kelymo.

<sup>4</sup> Aituo keankâ akaemo vinte e quatro agaityom tynrenseim modo, quattro ânguydo imeom warâ âzeguhoam idylymo, pymâ Deus xurery enado. Deus koendonroem awyly wâgâ aguelymo keankâ.

— Âkeá lelâlâ xirâ xina agueho. Koendonro, iozeno warâ awâkâ Deus! — kelymo keankâ.

### *Kordeiru, tynynonro modo agâ itobyry*

<sup>5</sup> Aituo keankâ Deus xurerydâpa tâjitanru kâindadyly.

— Aguewâtaungâ kyDeusry koendonroem awyly wâgâ, idânârâ emary modo, âmaemo xyrentaynrim modo warâ. Idânârâ iwâgâ aguewâtaungâ, âmaemo âdy modo, âdy keba modo alelâ — kely keankâ.

<sup>6</sup> Aituo keankâ toenzepa kurâ domodo aguely kâindadyly. Iwâelu imâsedo ara ton-honre keankâ aguelymo, kopâ ipyru ara warâ.

— Aleluia! Koendonro lelâlâ awâkâ Deus! Kywymâry awâkâ! Ton-honreim lelâlâ Deus! Idânârâ ize tato adyese lelâ! Idânârâ kurâ domodo iwymâry lelâlâ awâkâ!

<sup>7</sup> Tuomare kine! Kuomarugue kydadaenkenre! “Koendonro lelâlâ Deus, ton-honreim lelâlâ warâ” kykenre. Kydâzetyguene. Sainseaji mâkâ Kordeiru ohogüin-ho. Ohondbyem lelâ mâkâ iwydyem ini. <sup>8</sup> Pekodo ohogüinrim wâne tywâkure, tapekeim, tywykenrygue âzetydâdyby myara, Jesus eynynonro modo ohondbyem awyly, aunloenlâ eagâ tâitomoem, inakanhe aitomobry xygakeimbyryem Deus awylygue — kelymo keankâ.

<sup>9</sup> Aituo keankâ anju yam aguely:

— Xirâ auguely iwenigâ. Tuomareim ise Kordeiru ohogüin-ho etyryam igâsedaymby modo. Akaemo agâ ise Deus koendâ lelâ awyly warâ — kely.

Aituo keankâ agueondyly:

— Deus itaumbyry iozeno xirâ — kely.

<sup>10</sup> Mâkâ anju enado âzeguhoam widâ, yakadâ awyly kâenehohoem. Warâ olâ keankâ aguely:

— Ienado âzeguhoam tâiseba ikâ. Deus emary kulâ urâ, ara, idânârâ Jesus einwânni modo ara warâ. Unâ iozeno Jesus aguehobry einwânni akaemo. Deus lelâ ehoguegâ — kely.

Jesus unâ iozeno aguehobry mawânrâ Deus Ispiritury nhutuen-honly Deus itaumbyry egatuwâni modoram.

### *Kawaru tapekeim wogonro*

<sup>11</sup> Ilâpyryem keankâ kau, Deus eydâ ato, âzenahunguely-ro waunlo ara, kâendyly. Kawaru tapekeim wogonro âepanâguely kâendyly. “TâinwâNSEIM” kelygue tâzekeim; “Ioze lelâ tunâgueim” warâ keankâ mâkâ kawaru wogonro ezedy. Mâkâ ise ânguy âsenagazeni, ânguy âsenagazedâny warâ awyly agueim. Ewentâguedobyry ara ise mâkâ anhenehonly. Iozelâ tuduery modo nhenagazenehonly, eagâmo âseguebylymo warâ. <sup>12</sup> Peto iatygu ara kehoem keankâ enu ehozelu. Agui keankâ koroa nhangahu wâgâ awyly, pymâ tynrenseim tyangahu onwa nhekylara. Tâzezedy keankâ iwâgâ iweniby. Mâkâ lelâ keankâ mâtâ tâzezedy âdakely awyly xutuim. Ânguy eagonro nutuwâbyra âdakeze aguely awyly. <sup>13</sup> Munrugue tapigunre keankâ mâkâ ety BOH waunlo tâwâgueim. “Deus Xutuen-hoim” mâkâ ezedy. <sup>14</sup> Eagâlâ keankâ izodadury modo idâly. Kawaru tapekuneim modo wâgâmo keankâ, etymo iwogonro tâwâNSEIM, tapekeim kehoem, tywykeim keba warâ. <sup>15</sup> Espada tâynâ, tâynâ warâ iewipy keankâ Deus Xutuen-hoim itayba egaserim. Mârâgue tuduery modo eon-honru nhainwâdyly. Idânârâ tâlânro modo xutuim ise mâkâ, tuduery modo ton-honremba iese warâ, tienagazedomoem ferrogue tâmase-ro waunlo ara ise. Uva ekuguehoem sakabeho ara ise inakanhe aitomobry wâgâ adakabeolymo, Deus toenzepa ton-honreim iewiâky ume. <sup>16</sup> Ety iwogonro BOH waunlo wâgâ iwedyduno

eynynâ iwenibyem keankâ: “Pymâdo idânârâ iwymâry. Xutuwâni modo xutuim warâ urâ” kely.

<sup>17</sup> Aituo keankâ anju XYDYK warâ kâendyly xixi wâgâ. Elahoam, tywângueim sâtaynrim modoram ton-honre kehoem adaenkely:

— Âetaungâ. Deus âyanmo nhuduypy sâse âtâdyguywâdaungâ. <sup>18</sup> Pymâ domodo, sodadu domodo, sodadu iwymâry domodo warâ iguewâtyby nhunru sâtaungârâ. Kawaru iguewâtyby nhunru, iwogonro modo igueypy nhunru warâ sâtaungârâ. Idânârâ iguewâtyby modo nhunru sâtaungârâ, kurâdo âdy modo, âdy keba modo alelâ, tâbyguepa âsewanirin-em sanâtyby modo, tâpywaze tâwaniduneim modo warâ lâpylâ. Âetaungâ merâ iguewâtyby modo nhunru sâse — kely keankâ.

<sup>19</sup> Aguepygueduo keankâ ânguydo adyry parutabâ ikanobyry kâendyly. Onro anano modo pymâdo agâ âtâdyguybyem awyly, izodadury modo agâ warâ. Idânârâ mâkâ modo âewyly keankâ, mâkâ kawaru tapekeim wogonro agâ, izodadury domodo agâ warâ âseguebyze. <sup>20</sup> Idânârâ keankâ âseguebylymo. Mâkâ kawaru tapekeim wogonro keankâ emaenrim. Ânguydo adyry parutabâ ikanobyry netadânehom kurâdo enokuni netadânehom, “Deus itaumbypy egatuim urâ” keimpyry. Mâkâ kewâdyly kulâ egatuim, saguhoem ânguydo adyry enanaym âdydo imeom adyesenry kehoem aienibyrylâ mâkâ. Mâkâ adyesenry anhetuo, akaemo ânguydo adyry imarkarygue tymarkagueim modo tonokuze ani. Mâkâ ânguydo adyry ekudo enado âzeguhoam itaynrim tâzenokuoze ani warâ. Tyâdunepa keankâ ânguydo adyry, kurâdo enokuni warâ. Peto imâsedo onwanji olâ keankâ adameolymo, mârâ saimu imâsedo peto emyenro onwanji. Mârâ petodâba keankâ eunu âkuly, tytângue kehoem kyârim enxofre ara. <sup>21</sup> Mârâ espada imâsedo kawaru tapekeim wogonro itayba egaseybygue keankâ akaemo izodadury domodo âdyoly. Elaho domodo, ânguydo imeom tywângueim sâni modo warâ kurâdo igueypy nhunru, kawaru igueypy nhunru warâ nâdâmo. Toenzepa nâdâmo, nioladâmo warâ.

## 20

### *Mil anu lelâ Satanás etagobyry*

<sup>1</sup> Aituo keankâ anju xytâguyly kâendyly Deus eydâ atodâba. Tâtagueim imâsedo iwyantary enahun-ho xavepe keankâ emaym, korenty imâsedo tâmâneimbe warâ. <sup>2-3</sup> Dragão tapabileim eon-honru naim lâpylâ, “Âgau adyry iwelo keba”, “Diabu”, “Satanás”gue tâzekeim lâpylâ mâkâ. Korentygue keankâ nhekâjily. Ekâjirimbyryem, tâtagueim tuhuadaguentry odaxi nhamely. Selupe niedâ mâkâ, etadâdobry iwyantary, tutuzeba kulâ tânahunguezeba itoem, Diabu iweâpadobe mil anu lelâ itoem, Messias agâ nâjiton guyba itomoem. Târâ tâtagu ume, onro anano modo nenokudaymba ise. Mil anu sakabygue-duo ise âzetaqueoly wao.

<sup>4</sup> Aituo keankâ mure modo kâendyly, pymâ domodo xurery. “Pymâem itaungâ” kehobyry modo keankâ mârâ onwa ekani. Alâpylâ Deus itaumbypy, Jesus nhenomedâdyby modo warâ egatuwâni modo tugosagâze iguewâtyby modo egadopyry kâendyly keankâ. Ânguydo adyry parutabâ ikanobyry einwântânybyry, ekudo xygatyby enado âzeguhoam itânybyry, ehoguedânybyry warâ akaemo. Inwendymo wâgâ atay, emarymo wâgâ atay warâ ânguydo adyry imarkary peba keankâ akaemo. Kurâem itondybymoem keankâ. Aituo ise pymâem awylymo Cristo agâ mil anu lelâ, Diabu tâtagueim tuhuadaguentry oday awyly ara, Deus pymâem ienimopyryem awylygue. <sup>5</sup> Saguhoem kurâem tâjiton dylylâ keankâ xirâ.

Eagonro iguewâtyby modoma keankâ kurâem nitombyra, mârâ mil anu âwanikely ara. <sup>6</sup> Xirâ ume kurâem tientondyby modo agâ koendâ lelâ Deus, Deus eynynonro awylymogue. Peto onwanji nadamuneowâbyramo ise. Igueondylymo nitaymbamo ise.

Deus, Cristo warâ emaryenmo ise, Deus aguehobyry kurâdoam aguenriem. Mil anu ise Cristo agâ pymâem awyly.

### *Diabu eon-honru sain-hobyry*

<sup>7</sup> Mil anu âwanikeduo ise Satanás etagueley mâtâ etadâdobyry odaypa. <sup>8</sup> Onro anano modo enokuze ise egasely. Satanás idâtyguyzemo, âseguebyhomoem Deus agâ, eynynonro modo agâ warâ. Gogue donro modo, Magogue donro modo warâ keankâ akaemo Deus agâ âseguebyim modo. Aguiom keankâ akaemo. Sagunu paru emelano sapâguehoem nuduwâpyra, arâ lâpylâ ise sapâguehomoem nudupa awyly, toenzepa awylymogue.

<sup>9</sup> Tysegoze kehoem ise idâlymo israelita domodo ety anaxi. Âtâ anary Deus ize ato, eynynonro mâtâ anano modo warâ enâmizemo. Deus olâ peto igonose, tynynâbaom modo nhaduântoem. <sup>10</sup> Ilâpygueduo ise Deus, Diabu Konokuni nhamely mâtâ âji infernuram, peto imâsedo onwanji. Mâtâ peto ejidydâ ise mâtâ, eunu tytângueindâ, enxofre ara kyârindâ, mâtâ ânguydo adyry parutabâ ikanobyry, mâtâ kurâdo enokuni warâ samehobyrydâ. Âsenagazedylymo nadainwâpyra ise târâ. Peto oday, kopae alelâ ise âsenagazedylymo typgueim mâkeba.

### *Xypyry etay Deus kurâdo âda tiendly nhutuho*

<sup>11</sup> Aituo keankâ mure imâsedo tapekeim kâendyly, mâtâ kurâdo âdaiedly awyly wâgâ agueim xurery. Deus târâ ekadybyem kâendyly warâ. Onro, kau warâ nuzadâ; tâentonzeba keankâ. <sup>12</sup> Idânârâ kurâdo iguewâtyby modo sedâ, âdy modo, âdy keba modo alelâ. Tâpagune keankâ Deus enado awylymo. Idânârâ aitomobyry iwenihobyry pape modo nadapilugueowâdâ. Ilâpygueduo eagonro pape adapilugueoly, Aunloenlâ Deus Agâ Ini Modo Ezedy awo. Mâtâ pape wâgâ iwenihobyry ara keankâ akaemo iguewâtyby modo aguehonly. Deus izepa ato aienibyry modo, inakanhe adâitobyry aralâ nhemakely. Jesus einwânnipyry modo koendoro emakerim. <sup>13</sup> Târâlâ keankâ idânârâ kurâdo iguewâtyby modo, parutabâ ikaji sameyby modo, onro anaym epyâdyby modo warâ. Aitomobyry ara keankâ idânârâ aieholymo.

<sup>14-15</sup> Idânârâ mâtâ Aunloenlâ Deus Agâ Ini Modo Ezedy awo wâgâ tâzekenry modo nadameomo tâdâsenagazedoram. Aunloenlâ ise akaemo, mâtâ âji donroem awylymo, peto onwaym. Tâjiguely xypyrylâ ise xirâ, peto onwanji tâdâsenagazedoem tadameoho. Deus eynynonro modo, eynynâbaom modo agâpa iepygueduo, tâjiguely peba, tâdâzepyâdyly peba warâ ise; typgueba mawânkâ ise Deus eynynonro modo eagâ awyly. Eynynâbaom modo aunloenlâ ise âji tâdâsenagazodâ awylymo.

## 21

### *Kau iwelo, onro iwelo warâ*

<sup>1</sup> Deus eynynâbaom modo peto onwanji samely kâempygueduo, kau iwelo, onro iwelo warâ sedâ. Kau saguhobyry, onro saguhobyry warâ nadaim, parutabâ peba nidâ warâ. <sup>2</sup> Deus ijidadârý “Jerusalém Iwelo” kelygue tâzekeim sedâ, Deus eydâ atodâba xytâguyby. Âwynsaundo salokuzenomo tohogüin-ho agâ oxioni ara âpâgudâdyly, tâty iwâkurugue âzetydâdybyem awyly myara keankâ mâtâ xidadâ iwâkudâdybyem, iwâkuruem warâ awyly; Deus ejidyem on-hondybyem awyly. Idânârâ koendâ lelâ keankâ mâtâ xidadâ oday awyly. <sup>3</sup> Ton-honre kehoem tâjitanru kâindadyly mâtâ pymâ Deus xurerydâ.

— Tynynonro modo duaylâ ise iwerâ Deus ejiku. Aunloenlâ ise akaemo agâ awyly, eynynonro modo ise akaemo-ro warâ. Mâtâ kulelâ ise nheinwânkylomo. <sup>4</sup> Ânguy tytynruneba ise târâ, Deus itynrumo etyze mawânkâ. Ânguy niguepa ise. Tozogunru lâpeba ise târâ. Ânguy newâmataymba ise, nâsenagazebyra warâ. Idânârâ awârâ modo nadaim — kely.

<sup>5</sup> Pymâ Deus yam aguely keankâ:

— Iweâma idânârâ âdydo imeom iweloem kânhetaynly; saguhoem mykeankâ myara inkâba ise. Iwenigâ awârâ idânârâ iweloem itaynrim modo wâgâ. TainwâNSEIM lelâlâ xirâ augueho — kely.

**6** Aituo keankâ aueondyly:

— Idânârâ aietybyem awyly! Idânârâ adaguho, âwanikeho warâ urâ, letra A adaguho, letra Z pylâ xypyry, ilâ emyenro urâ. Utudyzedo modoem, yeinwândysedo modoem warâ, aiese lelâ urâ, ize atomo ara, paru sawedâny ewygue tatuanduneim modo niguepa itoem kankuihobyry ara. Tâbygunepa ise agânhedyly. Âdygue iepywadyzemo inkâba urâ. **7** Idânârâ xirâ xuduze urâ, yeinwândyly imodâny modoam. Ymery ise akaemo. Urâ ise iDeusrymo warâ.

**8** Yeinwântâny modo olâ aunlolâ ise âsenagazedylymo petomâ onwaym. Typygueim keba ise mâtâ peto iatygu, eunu tytângueim, kyârim waunlo ise mâtâ. Ywâgâ tâsenagazedyly xytani modo ise petomâ onwaym âsenagazeni, alâpylâ yeinwândyly imowâni modo; Deus iewiâto aietaynrim modo; kyârim modo; uguondo tywydy lelâ xynanâdâny modo, pekodo modo tusoram lelâ âdynanâodâny modo; kuenweim modo, ome odo modo; kurâdo nhygatyby ekudo modo, Deus ara kehoem xyreni modo; idânârâ kurâdo enokuni modo warâ. Warâ ise akaemo kurâdo idânârâ âsenagazedyly mâtâ petomâ nhâtâny onwaym. Tâjiguely azagâ ieto awârâ — kely keankâ.

### *Jerusalém iwelo*

**9** Ilâpyryem keankâ anju kaynâpa âewyly. Tokalâ akaemo sete igudupiry tâdâsenagazedorogue tumykeimbyry ewy keankâ mâkâ. Yam aguely keankâ:

— Âekâ. Mâtâ Kordeiru iwydyem ini âyam enehonze urâ — kely keankâ.

**10** Deus Ispiritury âewyly, wayam waunroem aini modo kâentoem aienehonze. Anju iwy kaynonro onwa yadâ. Deus ijidadâry, Jerusalém iwelo nhenehonly keankâ. Deus eydâ atodâba keankâ xytâguyl. **11** Tywâkure kehoem keankâ xidadâ, tohozele warâ, ehoru Deasdâpa âenigue. Tuhu iwâkuru tâwâNSEIM jaspe ara keankâ mâtâ xidadâ ehozelu, vidru tapiegureim ara. **12-13** Kaynâ kehoem keankâ mâtâ xidadâ sahodâdo, tonhonre kehoem warâ. Doze lelâ keankâ pyanta myarâ tâdâwânto, azagâ tokalâ warâ xixi egaseho eynynâ, azagâ tokalâ warâ norte eynynâ, azagâ tokalâ warâ sul eynynâ, azagâ tokalâ warâ xixi egawânto eynynâ warâ. Pyanta eni keankâ anju domodo. Mâtâ doze pyanta modo wâgâ keankâ akaemo doze Israel iweompyry modo ezedy iwenibyem awyly. **14** Doze tuhu imâsedo modo wâgâ keankâ mâtâ sahodâdo saunâtybyem awyly. Doze lelâ tuhu mododâ keankâ doze “Kordeiru tunâry egatuze ingonotaymby modo” ezedy iwenibyem awyly lâpylan.

**15** Metru emyenrogue tâmase keankâ mâkâ anju yagâ tunâgueim. Ourugueto keankâ mâtâ emano; xidadâ, pyanta modo, sahodâdo modo warâ ekudo keankâ mâtâ. **16** Mâtâ xidadâ nekudâ. Azagâ mil e duzentos kilômetros keankâ iwague awyly, etaedygu agâ âzekiba. Alâpylâ azagâ mil e duzentos kilômetros kaynâ awyly warâ. Idânârâ ekudobyry modo âzekiba lelâ. **17** Mâtâ sahodâdobyr nekudâ lâpylan anju. Sessenta e seis metros keankâ kaynâ awyly. Kienkudo aralâ keankâ nhekudylymo. **18** TâwâNSEIM tuhu jaspegue aietyby keankâ mâtâ sahodâdo. Âtâ modo, arua modo warâ mâtâ xidadâ odano modo keankâ ouru âjigueto kehoem, tohozele kehoem vidru ara.

**19** Sahodâdo iano modo keankâ tuhu iwâkuru, tâwâNSEIM modo. Saguho tuhu imâsedo keankâ jaspegueto; nhatano safiragueto; azagâ tokalâ ieto ágatagueto; quatro ieto esmeraldagueto; **20** cinco ieto sardônicaagueto; seis ieto sárdiogueto; sete ieto crisólitogueto; oito ieto berilogueto; nove ieto topáziogueto; dez ieto crisóprasogueto; onze ieto jacintogueto; doze ieto ametistagueto. Warâ keankâ mâtâ sahodâdo iano tuhu imâsedo, iwâkuru, tâwâNSEIM warâ awyly nhemaen-hoem. **21** Pérolagueto keankâ mâtâ doze pyanta modo.

Tokalâ pérola imâsedogue aietyby kulâ keankâ mâtâ pyanta modo. Arua imâsedo mâtâ xidadâ odano keankâ ouru tâwâenseim âjiguelo lelâ, vidru ara tohozeleim.

<sup>22</sup> Deus ehoguedo âtâ lelâ keankâ ipaom mâtâ xidadâ oday. Târâlâ mawânkâ Kywymâry Deus ton-honreim. Târâlâ lâpylâ mâkâ Kordeiru warâ. Târâlâ awylymogue, âtâ eagâmo aguehoem tâdâtâdyguyho peba awyly. Adykâlâ ise eagâ aguykely. <sup>23</sup> Xixi peba, nunâ peba warâ keankâ mâtâ xidadâ, tyamepa târâ awylygue, Deuslâ, Jesus Kordeirulâ warâ tohorugue, idânârâ iajimanâni awylygue. <sup>24</sup> Mâtâ iajinu oday ise kydadakobâdyly. Warâ ise onro anaym âtâ anary iwymâry modo Deusram aguely:

— Saguhoem xina ani tohoguezeim, tynrenseim warâ pymâem tatay. Iwerâ olâ xina âmâ nhehogueguyl, nhyrekyly warâ — kelymo.

<sup>25</sup> Pyanta modo tânahuwâduneba ise. Niampyra awylygue ise tânahunzeba awyly.

<sup>26</sup> Warâ ise kurâdo onro ananobyry modo Deusram aguelymo:

— Tynrenseim ani xina saguhoem. Iwerâ olâ âmâ lelâ xina nhyrekyly. Saguhoem ehoguedyby ani xina. Iwerâ olâ xina koendonro mawyly wâgâ aguely — kelymo ise.

<sup>27</sup> Ady Deus izepa ato lâpeba ise târâ, âdy inakai lâpeba warâ. Ânguy kywypazenehoim lâpeba ise târâ, konokuni lâpeba warâ. Aunloenlâ Deus Agâ Ini Modo Ezedy Awo wâgâ tâzekuneim modo lelâ ise mâtâ xidadâ odano modo; xirâ mawânrâ Kordeiru iwapery wogonro.

## 22

<sup>1</sup> Aituo keankâ anju kaynonro paru iwâkuru kehoem nhenehonly. Mâtâ paru ewy enynri modo aunloenlâ ise Deus agâ awylymo; niguepamo ise warâ. Tysenze keankâ mâtâ paru, vidru ara tohozeleim kehoem keankâ. Mure imâsedo Pymâ Deus, Kordeiru Jesus warâ ekadomo iay mâtâ egasely. <sup>2</sup> Mâtâ xidadâ earuary imâsedo tuotagueze keankâ paru sakadyly. Paru taynâ, tâynâ warâ keankâ se modo. Toenzepa mâtâ modo ewitunu; doze nunâ ara âkeloem âkeloem warâ ewisely. Mâtâ ewily einrim modo niguewâpyramo ise. Aunloenlâ ise Deus agâ awylymo. Saryguelâ ise idânârâ âsewiândylymo, aunloenlâ tâwânepa tâitomoem. <sup>3</sup> Deus izepa ato lâpeba ise târâ xidadâ oday.

Târâ ise Deus, Jesus Kordeirugue tâzekeim lâpylâ warâ pymâem awyly, pymâ xurery wâgâ. Idânârâ eynynonro modolâ ise ehogueni, iomaeni warâ. <sup>4</sup> Eagâlâ ise kurâ; emydy ese kurâ warâ. Kywendy wâgâ iwenibyem ise mâkâ ezedy, eynynonroem kydawyly xutuhoem. <sup>5</sup> Niguantaymba ise târâ Deus eydâ atodâ. Mâtâ xidadâ xixi iajinu, lamparina warâ tywynuneba ise. Tyamuneba ise târâ. Pymâ Deus ehozelulâ mawânrâ ise tonlo modo iajimanâni. Jesus agâ aunloenlâ ise pymâem awylymo.

### *Jesus odopâdo*

<sup>6</sup> Aituo keankâ anju aguely Yam:

— Åkealâ, tâinwâNSEIM lelâlâ awârâ mâtentyby, mâtindatyby warâ. Deuslâ keankâ tyanjury igononi, âdy inepa aini awyly xutuen-honze. Tytaumbryy egatuwâni modo enomedâniem Tyispiritury igonibyry lâpylâ mâkâ — kely.

<sup>7</sup> Anju aguepygueduo keankâ Jesus Yam aguely:

— Xutuwâdaungâ xirâ. Inepa ise kodopâdyly — kely keankâ.

Tuomareim ise akaemo, xirâ pape wâgâ âdydo imeom aitaynrim modo wâgâ iweniby idânârâ einwânnipyry modo.

<sup>8</sup> João urâ. Urâlâ keankâ idânârâ xirâ Yam egatuyby modo idani, idânârâ Yam enehoymby modo eni warâ. Awârâ modo kâindapygueduo, kâempygueduo warâ, âzeguhoam widâ anju awârâ modo egatuimbyry, enehoimbyry warâ enado kâen-hoguedoem. <sup>9</sup> Warâ olâ keankâ Yam aguely:

— Adâiseba ikâ! Iehoguedâ! Deus lelâ ehoguegâ! Ara, Deus emary kulâ lâpylâ urâ, Deus eynynâ aguewâni modo, Cristo eynynâ âpemugumo ara warâ. Xirâ pape wâgâ Deus aguehobyry einwânni modo ara, Deus emary lâpylâ urâ — kely.

**10** Aituo keankâ agueondly:

— Kurâdoram kodoendâ xirâ aini wâgâ mâinwenily. Inepa ise idânârâ aguewâtobypy modo aidyly. **11** Xypyry etaji ituo, âdatâjito nuduwâpyra. Alâ awâkâ idânârâ inakanhe aitaynrim modo inakai aniensezedâmo. Uguondo tywydy lelâ xynanâdânrý modo anisezedâmo; pekodo tusoam lelâ âdynanâodânrý modo anisezedâmo. Idânârâ koendonro aietaynrim modo koendonrolâ aniensezedâmo. Idânârâ Deus eynynonro modo alâ Deus ize ato lelâ aniensezedâmo warâ — kely.

**12** Aituo keankâ Jesus aguely:

— Xirâ xutuwâdaungâ! Inepa ise kodopâdyly. Kodopâduo, koendonro modoram koendonrolâ ise kâunduly. Inakai modoram inakailâ ise kâunduly warâ. Amânhetybymo ara ise âyanmo kâunduly. **13** Idânârâ adaguho, âwanikeho warâ urâ. Letra A adaguho, letra Z pylâ xypyry ilâ emyenro urâ. Kaudyly iraynâlâ akâwândy tâlâ wawyly. Idânârâ âdydo imeom adaimpygueduo, kadainwâpyra ise urâ — kely Jesus.

**14** Inakanhe aitobyry xygakeyby modo Deus agâ tuomareim kuru. Âtâ iwyku etyhoem wâne igokely myara lâpylâ Deus inakanhe aitomobyry nhygakely. Deus ijidadâry iwantasy oze egawântomoem, târâ peim modo nhein-homoem warâ aguehoymbyem akaemo. Mârâ peim einrimpyry modo nigueontaymbamo ise. Aunloenlâ ise Deus lelâlâ eydâ atodâ awylymo. **15** Deus izepa ato aieni modo; kuenwenwâni modo, ome odo modo; uguondo tywydy lelâ xynanâdânrý modo, pekodo tusoram lelâ âdynanâodânrý modo; kurâdo xyâwâni modo; xygatyby modo Deus ara kehoem xyreni modo; kurâdo enokuni modo, tâdâsenogudyly keduonro modo warâ olâ ise mârâ xidadâ odaji tâkaunâzebam.

**16** Aituo keankâ Jesus agueondly:

— Jesus urâ. Anju xigonotai, idânârâ âmaemo ywâgâ âsenomedâze âtâdyguywâni modoram xirâ unâ egatuze. Davi iwerypyry urâ. “Ximukâ Emedyly Umeno” urâ\* — kely.

**17** Deus Ispiritury, Kordeiru Iwydyem Inigue tâzekeim modo warâ Jesusram agueim.

— Odopâgâ, Jesus! — kerim.

Idânârâ xirâ kâinweniby itainrim modo, idataynrim modo warâ,

— Odopâgâ, Jesus! — nyguemo lâpylâ.

Âmaemo Jesus eagonroem midysedonro modo, iweâ lelâlâ einwântaungâ. Eyam idâwâtaungâ, toenzepa tatuanzeim paru enyze idâly wâne myara. Tâbyguepa ise imake-lymo. Aunloenlâ ise eagâ mawylymo.

### *Agueley xypyry*

**18** Urâ João ton-honre xirâ âyanmo auguely, âmaemo xirâ pape wâgâ iweniby itainrim modoram, idataynrim modoram warâ.

— Xirâ pape wâgâ iweniby imâem ienipyry, Deus imâem enagazeze lâpylâ. Tâzewânu, âdy peba tadalafil awârâ modogue âsenagazeze lelâlâ, xirâ pape wâgâ agueho ara. Xirâ pape agueho xuguukeimbyry lakuru ise toenzepa kuru âsenagazeni. **19** Xirâ pape waunroem aitaynrim modo xutuho wâgâ iweniby ewy etyimbyry, eyam koendonro tiunduly Deus etyze lâpylâ. Deus ijidadâry odaji negawântaymba ise. Tonlo se ewily ewy neinwâpyra ise warâ — uguely âyanmo xirâ pape wâgâ iweniby xuguukeim modoram.

— Mârâ se ewily ewy einrimpyry modo olâ igueondly nitaymba ise. Aunloenlâ ise yagâ awyly — keze Deus.

\* **22:16** Arâ ezekely, mâkâ wâgâ mawânrâ iweloem kydâiehondly, ximukâ emedyly umeno iwelo emedyly awyly xutuho ara.

<sup>20</sup> Jesuslâ keankâ idânârâ xirâ pape wâgâ iweniby, kâindatoem, kâentoem warâ agueim. Mâkâlâ mawânkâ agueim:

— Inepa ise kodopâdyly — keim.

Aituo keankâ eyam auguely:

— Âkeá lelâlâ xirâ auguely. Inepa odopâgâ, pymâ Jesus! — uguely.

<sup>21</sup> Ize wato kuru olâ Kywymâry Jesus koendâ lelâ idânârâ tynynonro modo agâ awyly.

Alâ kulâ.

João